


Lologena Wo Kienane
Yesu Kristo Kome
Kewo



The New Testament in the Lewo Language of Epi Island,
Vanuatu

**Lologena Wo Kienane Yesu Kristo Kome
Kewo
The New Testament in the Lewo Language of Epi
Island, Vanuatu
Le Nouveau Testament en Lewo langue de l'île d'Épi
au Vanuatu — Niutestamen long Lewo lanwis, blong
Epi Aelan, Vanuatu**

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files dated 22 Nov 2019

ee028e1c-7e53-571d-8041-681daaf580e8

Contents

Matiu	1
Mak	108
Luk	172
Yoane	287
Yumaena Lala	370
Rom	486
1 Koren	542
2 Koren	591
Kalesia	626
Episas	645
Piliḗpae	661
Kolosi	674
1 Tesalonaika	686
2 Tesalonaika	696
1 Timote	702
2 Timote	716
Taetas	726
Pilimon	733
Le Yu Lala	737
James	778
1 Pita	791
2 Pita	806
1 Yoane	815
2 Yoane	827
3 Yoane	829
Sut	832
Nakilologianega	837

Lologena Wo Kiena Ne Yesu Kristo Naña MATIU Siriyuia Visayuena Na Tusi Nene

*Komþasnen suniena plas
na tusi nini*

Tusi nini, “Lologena
Wo Kiena Ne Yesu Kristo
Naña Matiu Siriyuia”, naga
pisawal lologena wo sape
Yesu, naga yaru naña Ntewa
pisaar pa kiena yeririna la
nanua sumo rui sape yoko
naga imi vena tamalia la.
A e Yesu, navisaarena la
naña Ntewa pisaar pa kiena
yeririna lala e Tusi Pesa ana
pimi m̄alivi narui. Yesu
paeme e yo kiena lus nae
Israel lala, a kiena lologena
wo nene, naga pe kiela re ga
poli, naga pe kiena yeririna
punuga na yomarava nini.

Matiu mligan ruru
komþasnen tusi la nene
sum̄aga sanene. Naga
pisayu þesania, naña Yesu
paeme, a naga pisayu
m̄enaga naña Yoane kea,
a naña Yermare kilalia. A
siraunia, naga pisayu naña
Yesu siari kiena yum̄aena e
yo naña Kalele sum̄a pisawal
ke lologena wo pa yaru lala,
pian la, a kila ruru kiela
inanena lala. Siraun nene,
naga pisayu m̄ena naña Yesu
pa ma Yerusalem, amio suri
la naña Yesu kila maron e

kiena legiena na olua maro.
A naga pisayu maron naña
Yesu mare, a yoko mal sina.

Matiu pisayu naña Yesu
naga pe navianiena tai naña
po taulu navianiena taþena
lala a nam̄areraena na vi-
sawalen kinasnen navisalua-
aena kiena Ntewa sike e
naga, a pisayu þelaga naña
Ntewa pimi pe Parin Suþe
kiena ne kiena yeririna lala.

Suri la moki naña Yesu
pian la ea, Matiu miliþere
kompas lima, sanene:

Yesu pian kiena yeririna
lala metava e kunusa.
E kiena vianiena nena,
naga pisawal þelaga
naña yaru la monar
akila, vena aimi naña
Ntewa ve kiela Parin
Suþe. A naga pisawal
kiela yum̄aena lala,
ana taman pan la vena
ayum̄aenia, a pisayu sur
la naña yoko atolia e
luwasnen kiela maliena
e yomarava viu naña
Ntewa imi ve Parin
Suþenia. Kiena vianena
la nene sike e marana
na keviu lima vito tol
marana na keviu olua.

Yesu pian kiena yeririna
lualima taaga pa lua. A
mila m̄areraena pan la
vena ava avisawal kiena
lologena wo va yaru
taþena lala. Navianena
la nene sike e marana na
keviu lualima.

Pakaiwa la naña Yesu pisa
vena visayuen yaru la
naña Ntewa pe kiela
Parin Suþe, e yomarava
viu naña yoko ava asike
ea. Pakaiwa la nene

sike e marana na keviu lualima taaga pa telu.

Yesu pian kiena yeririna lala e p̄elaga nāpa yaru monar kila vena tavevea. Navianena la nene sike e marana nakeviu lualima taaga pa orelu.

Yesu pian kiena yeririna lala, pisayu suri la nāpa yoko imi m̄alivi e legiena maro, a e yomarava viu nāpa Ntewa ve Parin Sūpenia. Navianena la nene sike e marana na keviu lualima lua pa vari a lualima lua pa lima.

Kom̄pasnen tus la nini

Repinane Yesu lala a Yesu paeme 1:1—2:23

Yum̄aena kiena Yoane Nakeena 3:1-12

Yoane kee Yesu, a Yermare tāpalia 3:13—4:11

Yesu kila kiena yum̄aena e lepas nāpa Kalele 4:12—18:35

Yesu moluwe Kalele pa ma Yerusalem 19:1—20:34

Legiena na maro kiena Yesu nāpa kila kiena yum̄aena garu Yerusalem a yo la nāpa lavisin ga Yerusalem 21:1—27:66

Yesu mal sina a kiena nalogena lala apisu naga 28:1-20

Repina ne Yesu lala

Luk 3:23-38

¹ Yesu Kristo naga molue kome lus na yermarua keviu lalua kiena ne repina ne le Yu lala, nane Epraam naga sumo, amio Tepet nāpa naga

sirau. Repina ne Yesu la punu ga, la kiela kia sanini:

² Epraam naga narina nāpa Aisak.

Aisak naga narina nāpa Sekop.

Sekop naga narina nāpa Suta, amio wenla tāpena lala.

³ Suta naga narina lua, Peres amio wenla Saera, nāpa lalua na ape kaora, nāpa lalua na anela nāpa Tāña.

Peres naga narina nāpa Ebron.

Ebron naga narina nāpa Ram.

⁴ Ram naga narina nāpa Aminatap.

Aminatap naga narina nāpa Nason.

Nason naga narina nāpa Salom.

⁵ Salom naga narina nāpa Poas, a Poas nene nāpa naga anena Reap.

Poas naga narina nāpa Opet, a Opet nene nāpa naga anena Rut.

Opet naga narina nāpa Sese.

⁶ Sese naga narina nāpa Tepet, a Tepet nene nāpa naga pe p̄arin sūpe kiena ne le Israel lala.

Tepet naga narina nāpa Solomon, a Solomon nene nāpa anena, naga wona ne Uraea na sumo.

⁷ Solomon naga narina nāpa Reopoam.

Reopoam naga narina nāpa Apia.

Apia naga narina nāpa Asa.

8 Asa naga narina naña Seosepat.

Seosepat naga narina naña Soram.

Soram naga narina naña Usaea.

9 Usaea naga narina naña Sotam.

Sotam naga narina naña Eas.

Eas naga narina naña Isakaea.

10 Isakaea naga narina naña Manasa.

Manasa naga narina naña Amon.

Amon naga narina naña Sosaea.

11 Sosaea naga narina naña Sekonaea, amio wenla lala. Ana e pogos kiena ne la nene narui, yaru lala na purvanua taþena naña Páþilon apanon aþure plan le Israel lala ava ayumãe korena garu Páþilon.

12 Sekonaea naga narina naña Seltiel, nane pogos naña le Israel lala amiyumãe korena ke garu Páþilon wa.

Seltiel naga narina naña Seruþapel.

13 Seruþapel naga narina naña Apiut.

Apiut naga narina naña Eliakim.

Eliakim naga narina naña Aso.

14 Aso naga narina naña Satok.

Satok naga narina naña Akim.

Akim naga narina naña Eliut.

15 Eliut naga narina naña Eliesa.

Eliesa naga narina naña Matan.

Matan naga narina naña Sekop.

16 Sekop naga narina naña Yosop, naña wona ne Maria. Maria nene, naga anenane Yesu, naña apisape naga pe Navisaarena.

17 Siar e Epraam, teras lelei lala pimi tol Tepet, teras la nene tol lualima taaga pa vari. A siar e Tepet pimi tol pogos naña le Páþilon lala aþure plan le Israel lala avanon ayumãe korena garu Páþilon, teras lelei lala tol mñena ga lualima taaga pa vari, a siar e pogos naña la asike garu Páþilon, pimi tol Kristo, teras lelei lala tol ke sina ga lualima taaga pa vari.

Yesu paeme

Luk 2:1-7

18 Suniena nini kiena ne Yesu Kristo, naña naga paeme sanape, naga sanini: naga anena, sira naña Maria, naña la apisaaria sumo asape yokorena talopa amio yaru tai, kiena kia Yosop. Ana pogos naña lalua pe atalopa re poli wa, Maria naga mlogekilale naña naga mñeþena, na pimi kome Ninuna Wa. ¹⁹ A Yosop naña la apisaaria apisape yokorena naga talopa amio Maria nene, naga pe yaru wo tai, a naga pe pisa re pisape Maria naga kila suri tai piowa poli. Ana

naga pisu sane p̃isi na lalua na monar akilaro kiela navisaarena nene, ana naga sitom ke pisape kila ga e p̃elaga tai naṣa malumu ga, vanon naṣa naga yepen mavin kilaen Maria memawa manenea vanon suri nene. ²⁰ A pogos naṣa naga sitom ke sape kila sanene, naga m̃enia, pisu navisi tai kiena ne Ntewa m̃alivin naga, ana navisi nene pisa pania, pisape “Yosop, ko lus kiena ne Tepet, ko na ve ologe re viowagan naṣa oure Maria ve woña, vanon sisi naṣa teke e naga, naga pimi ga kome Ninuna Wa. ²¹ Yokorena Maria war narina yerm̃ene, a monar osikia kiena kia Yesu Natamaliaena, vanon yokorena naga warplan mlamulena viowa lala vetan kiena yeririna lala.”

²² Ana suri la nene pimi kakate sanene, vena kila visena kiena ne Ntewa tai vim ve lelaga, sa naṣa Navisawalena Aisea naga pisawal sumo, ²³ naṣa naga pisape

“Yokorena sira m̃ee tai naṣa yerm̃ene pe pisu re poli wa, naga m̃eṣena, p̃isi na war narina tai ve yerm̃ene, ana p̃isi na asikia kiena kia ve ‘Emanuel.’” Ais 7:14

Kia naṣa “Emanuel” naga kana kinas sane “Ntewa sike amio ita.”

²⁴ Pogos naṣa Yosop tavolo sina, kila sa naṣa navisi kiena ne Ntewa pisa pania, ana naga talopa amio Maria, p̃ere pe wona. ²⁵ Ana pe pa pisu re Maria tol pogos naṣa Maria p̃arlua narina nene. A pogos naṣa Maria p̃arlua sisi nene, ana Yosop sikia kiena kia “Yesu.”

2

Yaru la naṣa akilia ruru p̃elaga kiena ne verue lala apimin asape avisu Yesu

¹ Yesu naga paeme e pulkumali tai, kiena kia Petleem, lepas nae Yutea. E pogos naṣa Yesu paeme, Erot naga pe p̃arin suṣe kiena ne le Yu ke lala. A siraunia, pe piavi re nena poli, ana yaru la p̃asia naṣa la akilia ruru p̃elaga kiena ne verue la po paṣisi, apimi atol garu Yerusalem. Susumo la nene amolue e kiela purvanua, e lepas naṣa mrae molue ke komea, ana apimi. ² Ana la apiun tan yaru lala, asape “? Sisi naṣa paeme mare ga na wa, naṣa asape p̃isi na naga vim ve p̃arin suṣe kiena ne le Yu lala, naga m̃eke pe? Imimi moṃal kiena verue rui, molue ke e yo naṣa mrae molue ea, ana imimi mepimin ke mesape meieluar naga.”

³ Ana pogos naṣa Parin Suṣe Erot tol visena la nene, amio yaru taṣena laṣasia nae Yerusalem, amloge, ana la pe akekarana re nena ga.

⁴ Ana Erot pio yerkawa kiena ne yaru wa lala amio navianena navisaluaena lala apimi apisuia, ana naga piuntan la, pisape “?Navisaarena naña apisape p̃isi na naga imi, la apisa ke asape p̃isi na naga vaeme pe?”

⁵ La nañani apisatam̃ea, asape “Yokorena Navisaarena naga vaeme garu lepas nae Yutea, e pulkumali naña Petleem. ⁶ Nanene vanon naña sumo na, navisawalena tai siriyuia, pisape

‘Ntewa naga pisa sanini, pisape

“Amiu nae kumali naña Petleem, amiu tañatete avisavenua,

yerkawa tañena nae Yutea lala, la atola metavan amiu, ana amiu na ato ga tano, peraga,

vanon yokorena nasumonena keviu tai molue nenaga kom pun amiu,

ana naga visuar ruru kiau yeririna lala nae Israel.” ’ ’ Maika 5:2

⁷ Pisi na Āarin Suñe Erot naga pio vinaun ga yaru na kilia ruruen p̃elaga kiena ne verue la nene, vena aimi avis ga amio naga taaga, vena naga loge ruru tan la, pisape la apisu verue nañani kate na pogwai. ⁸ Ana naga pisa pan la, pisape “Amiu na monar ava akale sisi nene vano-o alualia, ana awasuñe si aimi avisawal van inu, vena inu m̃ena ga nevano neieluar naga,” ana naga

mligan la apa garu Petleem. Ana kiena visena nene naña naga pisa ana pisokan ga, naga sinenan pisape visae lual sisi tomtom nene, ana weñaria.

⁹⁻¹⁰ Ana yaru la nene la amloge visena kiena ne p̃arin suñe nene p̃isi, ana apa sina ga e kiela mrapplepa, ana apisu sina verue nene naña tego p̃esia e lepas naña mrae molue ke komea. Pogos naña la apisu si verue nene, akekara pañisi, ana verue naña naga sumon la m̃a ga pano-o atol e naña sisi nene m̃eke ea. ¹¹ Ana la apa loyuma e yuma nene, apisu sisi nene, amio anena naña Maria. Ana la akinai, amieluar naga. A la apikeña kiela karo lala, añar plan kiena nalaena la pania, suri tai naña kol, amio suri lalua naña ponos taninu po pañisi sa naña m̃añes, naña kiela kia prakensis, amio mer, naña mer nene naga kana kilavaru keviu pañisi.

¹² Ana kolemalo, Ntewa pisi pan la e m̃eniena tai, pialuñar la pisape “Ve ava akom re si lepas naña puna ne Erot.” Ana la amligan yo nene, añasuñela ke sina ga, akome mrapa tañena apa kiela.

Añurelua Yesu, añure apa Isip

¹³ Pogos naña yaru la nene amial rui, ana Yosop m̃enia m̃a navisi kiena ne Ntewa tai pimi puna, pisa pania pisape “Yosop, osumalu, owar ninis

nene amio anena, amiu aure ava garu Isip, vanon lavisi ke Parin Suḡe Erot kale ninis tomtom nene vena weṃar narui. Ava asuṃa garu Isip vano-o tol pogos naḡa nevisa van ko, ana awasuḡe amiu si aimi.”¹⁴ Ana Yosop mlogear visena kiena navisi naḡani, ana suṃalu ḡarlua ninis tomtom nene amio anena, ana amligan plan ke e yemalo nene, ana amialin ke ava garu Isip.¹⁵ Ana la apa asuṃa garu Isip yam piavi li ṃa ga, pano-o tol pogos naḡa Parin Suḡe Erot mare.

Suri la nene pimi kakate sanene, vena kila visena kiena ne Ntewa tai naḡa Navisawalena Osea naga pi-sawal nanua sumo vena vim ve lelaga, naḡa naga sapenua

*“Naruu na yermene sike garu Isip,
ana nevio naga wasuḡe imi.”
Ose 11:1*

Yaru nakilaen mara lala aṃe moṃar ninis lala

¹⁶ Pogos naḡa Parin Suḡe Erot naga kilia sape yaru nakilia ruruen ḡelaga kiena ne verue lala pe akila re sa naḡa naga pisa poli, pe apimi akom re si puna poli, ana naga sinena mimi paḡisi, ana naga pisa pan kiena yaru na mara lala, pisape “Ava akale ninis la puno ga naḡa ape yermene asike Petleem, a la ṃena ga naḡa asike lavisinia, la naḡa pe kiela kas lua re poli wa, ana awe moṃar la make

ga amarmare.” Parin Suḡe nene naga polo pogos nene sanini, vanon mloge visena tan yaru la nene, naḡa apisawal mesmesun pania nanua e pogos naḡa verue nene kateḡesia.

¹⁷ Suri la nene kila visena naḡa Navisawalena Seremaea naga pisa sumo pimi pe lelaga, naḡa naga pisape

*“Le Rama lala amloge sira
nae pula tai tagi na
tagi,
naga mloge piowa
paḡisi,
sira nene naga Resel, naḡa
naga tagin ke mapina
lala.*

*Ana naga yepena mavin yaru
tai kila luḡeluḡeena
vena loge wo sina,
vanon mapina la
akokovio make ḡisi
rui.” Ser 31:15*

*Yosop ḡar Yesu nene
molue Isip, ḡasuḡe si pa
Naḡaret*

¹⁹ Ana pogos naḡa Yosop lala asike garu Isip wa, ana Parin Suḡe Erot naga mare. Ana Yosop ṃenia, pisu sina navisi kiena ne Ntewa tai pimi puna,²⁰ ana navisi nene pisa pania, pisape “Yosop, osumalu, oure ninis nene amio anena, awasuḡe amiu si, ava garu ki-amiu purvanua naḡa Israel, vanon Parin Suḡe Erot nene naḡa naga sape weṃar ninis nene, naga mare rui.”²¹ Ana Yosop naga mlogear visena nene, naga suṃalu, ḡar ninis nene amio anena, aḡasuḡela

ke sina ga apa e kiela purvanua naña Israel.

²² Pogos naña la ami-alin ke asape ava tol garu Yutea, ana Yosop mloge asape Akaleas kus ke lelenā ne arimana naña Erot, pe p̄arin supe ke garu Yutea. Ana Yosop maraun si vaen garu Yutea, ana naga mēni si tai, m̄al Ntewa naga pisi pania, pisalup̄ar pisape “Ve ova re si garu Yutea,” ana Yosop lala apalein e yo taņena tai, kiena kia Kalele. ²³ Ana la apa asike e kumali tai e lepas nene, kiena kia Nasaret.

Suri nene pimi kate sanene vena kila visena kiena ne navisawalena lala vim ve lelaga, naña la apisayu Navisaarena nanua sumo rui, naña la apisa apisapenua

“Yokorena, lala avisave naga ve yaru nae Nasaret tai.”

3

Yoane Nakeena sike ga e yokorena, mlologon ke navilopuena

Mak 1:1-8; Luk 3:1-8; Yoane 1:1-28

¹ Yesu naga kapuru pimi keviu, gar ga Nasaret, ana e pogos ke nene narui, Yoane Nakeena naga pimi p̄arpoyo e yokorena e lepas nae Yutea, ana naga sumā mlologon ke, pisapenua

² “Amiu na monar avilopu amiu, vanon Nasuņenena kiena ne Ntewa pimi ke

narui.” ³ Yoane Nakeena nene naga pe yaru naña Navisawalena Aisea pisawal nanua sumo rui, naña naga pisa, pisapenua

“Pulgon yaru tai sumā pio ke e yokorena, pisape

‘Amiu akila ruru make mrapa kiena ne Ntewa, vena naga kilia imi m̄alivi e kiamiu malena lala.’ ”
Ais 40:3

⁴ Yoane Nakeena nene naga sane Navisawalena Elaisa nene nanua sumo, sa naña naga pe miyen re kulsota naña po poli, m̄ana kulsota na ape ga e vilulus nen kamel, a kiena kilika na kararen m̄eņena na amiyum̄aen ga e kulus nen puluk. A kana kinanena e yokorena, kan ga narin suri la naña asape kurpo ne, amio suri kiki naña sukapak tetan la amiyum̄aenia.

⁵ Naga sumā e yokorena nene pano pano-o, ana yeririna nae Yerusalem lala amio m̄ena ga pulkumali taņena lala nae lepas naña Yutea, a pulkumali m̄ena ga la naña lavisin wii nae Yortan, la apanon apisu naga. ⁶ La amiyagogon kiena lologena lala, a la apisa plan kiela mlamulena viowa lala pania, ana Yoane kela e wii nae Yortan.

⁷ Ana e pogos tai, Yoane pisu naña yeririna la moki na p̄egas nalotena lua nene kiena ne le Yu lala, naña Varasi lala amio Satusi lala, la apimin ke naña naga ke

la, ana naga pisi m̃arera pan la, pisape “?Amiu na sane lom̃ara lala, nãpa la amaraun kapi tai ana la ãpure, ana amiu na asitom asape akilia aurmatan kapi nãpa Ntewa naga p̃isi na ligan imi, nãpa pe amiu apilon amiu re poli wa? ⁸ Ana visae ve lelaga kemua nãpa amiu amaraun nakoena nene, ana kiamiu malena naga monar war mras la nãpa powo, nãpa torokin kiamiu navilopuena nene. ⁹ Ana avisuar amiu, popon amiu na ve awarwar amiu re sina, sa nãpa asum̃a akila ke rui, nãpa apisa ke asape ‘A, ita na poga ga rui, okilakan ita na tepe lus ruru kemua kiena ne yermarua Epraam.’ Ana nanene na pe suri re tai nene poli, vanon visae Ntewa naga sinenania, naga kilia la ga kilavaru la nene, kila la aimi ave lus kiena ne Epraam la ve moki, vena akus lelemiu. ¹⁰ Nevisa van amiu, nesape m̃ekiavi mon ruru rui pisape teroro purlaki la nãpa pe p̃ar re mras wo poli, ana yokorena ateroro la ana akoven la ava e kapi. ¹¹ In na nepimi sumo, ana nekee amiu ke ga e wii, vena kila merarava sa nãpa amiu apilopu amiu rui, ana yaru tãpena tai naga pimi ke siraun inu wa. Yaru nene, naga to laa metavan inu, a in na nepiowa ga, netorokin re nowar plan kiena kulus nen lana poli, pona nekilia nek-

ila kiena yum̃aena tãpena lala. Ana naga ke narui, naga kilia kee amiu e Ninuna Wa, amio kana kapi nena, vena kekan plan kororaki lala e kiamiu malena lala. ¹² Naga na sane mlarar ke koruak nayuraren wit e limana, ana sisilin plan mrasa la akekapil vito lele tãpena, a vinus vito lele tãpena, ana war plan mrasa va um̃a m̃ana, a yokorena naga kilia kuan vinusa va e kapi nãpa tãpatete mare pogos tai.”

Yoane ke Yesu

Mak 1:9-11; Luk 3:21-22

¹³ Ana Yesu mligan lepas nãpa garo Kalele, pam e wii nae Yortan vena Yoane ke naga. ¹⁴ Ana Yoane pisape visalũp̃aria, pisapenua “?Sanape na ko opamin osape nekee ko? Suri nene na pe mesmesu re poli. Popon ga ko na okee inu.”

¹⁵ Ana Yesu pisatam̃ea, pisape “Peraga, p̃isi na ve ve sa re nene, popon ita na tetam̃an ga tetaveve suri wo la nãpa Ntewa naga sinenania sape tekila.”

Ana Yoane tam̃an Yesu pimi puna, ana kea.

¹⁶ Ana pogos nãpa naga ke p̃isi, Yesu naga molue e wii pa metava, ana veraga ma e peni pietava pania, ana naga m̃al Ninuna ne Ntewa pitomi ke tano sa nãpa lom̃e, pitomi tol Yesu. ¹⁷ Ana la amloge Ntewa nae ma e peni pisi pitomi tano, pisape “Nene na naruu ne, nãpa nesitom

naga pañisi. Kiau sitomena teke ga e naga, a nekekaran naga pañisi.”

4

Parin supe kiena ne yermare lala tañali Yesu

Mak 1:12-13; Luk 4:1-13

¹ Suraun naña Yoane Na-keena kee Yesu ñisi, ana Ni-nuna Wa naga sumon Yesu pa e yokorena tai, vena Yermare tañali naga. ² Ana e pogos nene, Yesu monsilun leniena tol legiena lualima vari a lemalo mēna ga lualima vari, a siraunia naga viso kari pañisi. ³ Ana Yermare, yaru na tañalien yeririna lala, pimi pisa pania, pisape “Visae ko na ope narina ne Ntewa kemua lelaga, ko ovisali van kilavaru la nene aimi ave kilaparavi, vena okan tai.”

⁴ Ana Yesu pisa pania, pisape “Peraga, vanon Visena Wa pisa sanini pisape

‘Kinanena ga tañatete kila yaru mali, ana visena punu ga naña Ntewa pisa, naga ga nene kilia kila yaru mali.’”
Naw 8:3

⁵ Ana Yermare pisape wereli sina ga sitomena kiena Yesu va garu e Yumña Wa naña garu Yerusalem, ana mligan naga sike e yo tai naña pa manene metava pañisi e wosoyumña Mana Ntewa. ⁶ Ana naga pisa pania, pisape “Visae ko ope narina ne Ntewa kemua lelaga, no oula, oto tano e

nene. Ana yoko ko okila woga ga ne, vanon Visena Wa pisayu Ntewa, pisape

‘Naga yoko ligan kiena navisi lala aimi avisuar ko mēga,

ana la ayukop yaun ko ga omēke metava e li-mala, vena ve owan re lanña e kilavaru tai.’”
Yauena 91:11,12

⁷ Ana Yesu pisatamē ke sina ga Yermare, pisa pisape “Peraga, vanon Visena Wa pisa mēna ga sanini, pisape

‘Ko na tañatete otañali kioñña Supe Ntewa, naña otañali omāreran osape naga kila kioñña suri tai.’”
Naw 6:16

⁸ Naga na, Yermare ñere ke sina ga sitomena kiena Yesu pa metava e pupia kunus tai, pisape “Visae ova ose kunus nene, okira vito tano ovisu purvanua kerkeviu la ne sike e yomarava nini, amio kala suri wo la naña asike ea.” ⁹ Ana tañali ke sina ga Yesu yam telu narui, pisa pania, pisape “Suri punu la nene na yokorena netañan van ko, visae okinai olotun inu.”

¹⁰ Ana Yesu pisatamēna, pisa pisape “Ko oure, Yermare. Visena Wa pisa sanini, pisape

‘Pisi na monar olotun ga Ntewa naga taaga, naña pe kioñña Supe,
a okila ga kiena yumñaena naga taaga.’”

11 Ana Yermare purmatan Yesu, ana navisi la apitomi, apisuar ke naga.

Yesu siar kiena yuññaena garu lepas nae Kalele

Mak 1:14-15; Luk 4:14-15

12 Ana e pogos nene, li na mara lala kiena Parin Suḽe Erot la atarar Yoane Nakeena, amligan naga pa e yuñña nakoena. Ana pogos naḽa Yesu mloge nalogeena nene, naga sitom sape wasuḽe si vito garo Kalele. 13 A pogos naḽa naga ḽasuḽe si pito garo Kalele, ana naga pe pa re si garo Nasaret poli, naga pito la garo Kapeneam rui, pulkumali naḽa mēke lavisin lapa nae Kalele. Yo la naḽa siar Kalele pito tol yo losi, yo la nene porotano kiena ne lus lalua kiena yermarua lalua na nanua sumo, Sepulan amio Nap-tali. 14 Suri nene pimi mñalivi vena kila visena kiena ne Ntewa nene vim ve lelaga, sa naḽa Navisawalena Aisea naga pisawal sumo rui, naḽa pisape

15 *“Amiu yaru lala nae yo kiena ne Sepulan amio yaru lala nae yo kiena ne Naptali,*

naḽa asike likan wii nae Yortan amio pupia sive, amiu yaru la nae garo Kalele, e lenen yaru la moki naḽa pe ape le Yu re poli asike ea, amiu aloge visena nini:

16 *Yeririna la naḽa asike e yemalolo, ḽisi na alual pupia yomerarava tai.*

La nene asuke ga e yemalolo silaga, naḽa la na ape namarena ga, ana pupia yomerarava tai tego paḽisi pimi tegoli la.” Ais 9:1,2

17 Ana siar e pogos nene, Yesu sumña ga mlologon ke, pisapenua “Amiu na monar avilopu kiamiu sitomena vetan kiamiu mlamuleña viowa lala, vanon naḽa nasuḽenena nae ma e peni pimi ke lavisi narui.”

Yesu pio yaru na wereen ika la vari

Mak 1:16-24; Luk 5:1-11

18 Ana Yesu sumña ga miyaloro ke e isinen pupia lapa nae Kalele, ana mñal yaru la lua, Saemon Pita amio wenla naḽa Antru. Lalua asuñña ga akuan ke lilivi, vanon lalua na ape yaru na wereen ika. 19 Ana naga pisa pan lalua, pisape “Amiu lua ataveve inu, ave kiau yaru lala, vena nevian amiu ana ave yaru na wereen yaru lala.” 20 Ana lalua nene amligan kiela lilivi naḽani veraga ga, lalua ataveve Yesu.

21 Ana Yesu mial li ga pa laa sane, mñal si yaru la lua Semes amio wenla naḽa Yoane, la lua na la narina ne Sepeti. Lalua asike e kiela los nen wa tai amio arimala, lala asuñña ga akila ruru ke kiela lilivi. Ana Yesu pio

lalua pisape lalua atavevea,
²² ana la lua asuñalu veraga,
 amligan arimala mñeke e wa,
 ana ataveve Yesu apano.

Yesu mlologo, pian ke yaru lala, a kila ruru ke namaiena lala

Luk 6:17-19

²³ Ana Yesu miyaloro ke pa e yo punu ga garu Kalele, pian ke le Yu lala e loyuma e kiela yuma na lotuena lala. Ana naga pisawal ke nalologena wo nene nasuñenena kiena ne Ntewa, a kila ruru ke yaru la naña maiena sike e yepela, a kila yaru la naña yepela lañas malmalumu, apimi amloge po sina. ²⁴ Ana la asunyu kia kiena Yesu pa kalo mñena yo punu ga e lepas naña Kalele na vito tano, naña apio asape Seria. Ana la aþure yaru la naña amai e yo punu ga nene apimi puna Yesu. La nene, lañasia naña amai, lañasia naña magka kar kare la amloge piowa pañisi, lañas naña yermare la asike e la, lañas naña amarmarelu ke lala, a lañasia naña yepela lañasia marmare, ana Yesu kila ruru punu ga namaiena la nene amloge po sina. ²⁵ A yaru la moki pañisi naña ataveve Yesu e pogos nene. La nene apimi garu Kalele, a e mñena e lepas naña pulkumali lualima sike ea, a garu Yerusalem, a garu lepas taþena lala nae Yutea, a ma mñena e lepas nen þalu nae Yortan lepas þasia na vano.

Ana la nae yo la nene apimi ataveve Yesu e pogos nene.

5

Yesu pian yeririna lala

Luk 6:20-23

¹ Ana e pogos tai, Yesu pisu yeririna la moki, ana naga pa metava e kunus tai. Sane kiela navianena tai, naga totano ana kiena yeririna lala apimi atovivia, ² ana naga pian la.

³ Navianena kerkeviu lañasia kiena ne Yesu sanini: naga pisape

“La naña apisu kilale naña pe amal re Ntewa e kiela malena poli wa, ana þisi na navisa ruruena vim van la, vanon Ntewa naga pe Þarin Suþe kiena ne yeririna la ne sanene.

⁴ La naña suri viowa lala akila kare la ke pañisi, a amloge piowa, atagi ke na, ana navisa ruruena vim van la, e nakila luþeluþeena lala.

⁵ La naña ape yaru malumu ga, navisa ruruena vim van la, vanon naña Ntewa pisaar pan la rui pisape la suri wo la naña sike e yomarava nini van la.

⁶ La naña sinelan manene þelaga mesmesu lala sa naña Ntewa naga sinenania, ana navisa ruruena vim van la, naña þisi na avisu kiela malena ulen

namesmesuena la nene.

⁷ La naña asumña sinela miye ke yaru tañena lala, navisa ruruena vim van la, naña yokorena Ntewa naga sinena ye manene la vañisi.

⁸ La naña sinela mekiki po, navisa ruruena vim van la, naña yokorena la avisu Ntewa.

⁹ La naña ape yaru na ki-laen sunñare, ana navisa ruruena vim van la, naña Ntewa naga vio yaru la nene ave narina lala.

¹⁰ La naña amlelaga e Ntewa, ana yaru tañena lala akila kare la vanon kiela nalelagaena nene, navisa ruruena vim van la, naña yokorena Ntewa ure la ava loyumña e kiena nasuñenena.

¹¹ “Amiu la naña yaru la akila kare ke kiamiu kia, a la añene amiu ke na, a la apisa kare amiu, a apisa kotalia amiu, vanon naña amiu na ape kiau yeririna lala, ana pñisi na navisa ruruena vim mñena ga van amiu. ¹² Ana ve sinemiu viowa re, akilia akekara ga, vanon kiamiu pupia suri wo tanea lala sike ma e peni. Pisi na yaru la akila kare amiu vañisi, ana visae ve sanene, la akila ve sa ke naña yaru na sumo lala akila kare navisawalena lala.”

Kururu sive amio kapi vi-aga

Mak 9:50; Luk 14:34-35

¹³ Ana Yesu pisa mñena ga, pisapenua “Amiu na sane sive na e yaru na yomarava lala. Ana visae sive ve melkalka re sina, ana pe suri re si tai naña kilia kila melkalka si poli. Ana sive nene na pe popon re si suri tai poli, popon ga akuan va narui.

¹⁴ “Amiu na sane kapi vi-aga na yomarava. Pogos naña yaru la akila kiela pulkumali metava e kunus tai, kolemallo yaru la naña asike perina akilia avisu kapi nena, ana tañatete akilawan kiela pulkumali nene.

¹⁵ Ana pe yaru re tai poli naña silan kiena kapi, ana kalo si kapi nene e piaki tai. Pogos na yaru silan kapi, ana monar ligan to metava e lelana, ana yaru punu ga naña asike loyumña ana kapi vivaga nene tegoli la. ¹⁶ Ana e ñelaga ne na nene, amiu na monar atamñan kapi na kiamiu malena tegoli yaru la punu ga vena akilia avisu kiamiu yumñaena wo la naña amiu akila ke na. Ana pogos naña la avisu kiamiu yumñaena wo la nene, ana la akilia ayeluar kia kiena Arimamiu naña sike ma e peni.”

Yesu pisayu navisaluaena kiena Mosis

17 Ana Yesu pisa m̃ena ga, pisapenua “Pe sineun re nenaga, naña amiu asitom ke asape inu nepimin nesape nekuan plan navisaluaena kiena Mosis, amio visena kiena ne yaru navisawalena la poli. Peraga, pe sa re nene poli. In na nepimin nesape nevian ruru amiu e kinas nen visena punu ga la nene van amiu.

18 Suri na ne nepisa ke pan amiu ne, ana lelaga paṽisi monar asitomañalia, ṽisi na taṽatete navisaluaena nene kovio, vanon sinapane amio yomarava nini lalua akovio. Ana taṽatete narin mras nen visena tai, pona ya sina naña teke e navisaluaena nene, kilia kovio, taṽatete ga, vano-o tol pogos naña suri na navisaluaena la nene vim kakate make ga. 19 Vanon suri ne na nene, visae yaru tai kila pal narin suri tai e navisaluaena nene, pona vian yaru taṽena tai kila sanene, yaru ḥene na ve to re e yo wo tai e nasuṽenena kiena ne Ntewa. Ana yaru naña taveve ruru visena na navisaluaena la nene, a pian ke yaru taṽena lala akila sanene, ana naga yoko kiena kia wo e nasuṽenena kiena ne Ntewa. 20 Inu nevisa van amiu, visae sinemiun asape ava e nasuṽenena kiena ne Ntewa, ana monar kiamiu ṽelaga la wo a mesmesu, taulu navianena navisaluaena lala, amio Varasi lala, visae peraga,

taṽatete ava ea.”

*Yesu pisayu nasinekarena
Luk 12:57-59*

21 Ana Yesu pisa m̃ene ga, pisapenua “Amiu amloge m̃a naña navianena la apian ke kieta yermarua la nanua sumo rui, apisape ‘Ve aweṽar re yaru, a visae yaru na weṽar yaru mare, mesmesun ga naña aure naga va kumali ana avis vania.’ 22 Ana nevisa van amiu sanini: Yaru naña sinena kari wenla, yaru nene mesmesun aure va kumali avis vania. A yaru naña visi viowa van wenla, visavenua ‘Ko na yaru viowa tai nene wa,’ yaru nene mesmesun aure va e kieta viorena keviu ana aliṽere naga. A yaru naña ṽisi na la sinemimiena van wenla, pisape ‘Ko na ṽaruña pe wowe,’ naga mesmesun va e kapi naña e lele na loge viowaena. 23 Vanon suri ne na nene, visae oimi e wonta kiena ne Ntewa vena ola nalaena vania, ana ositomañ si naña okila suri tai pa womla piowa teke na, 24 ana oligan nalaena nene toṽa e lepas nen wonta nene sumo wa, ana monar omolue sina, ova okila ke ne marawo wa, ana siraunia okilia oṽimi ola si kiona nalaena naṽani va Ntewa.

25 “Visae okila suri piowa pa yaru tai, ana naga sine-nan pisape were ko ova kumali avis van ko, ana popon okoskosin ovisi ruru omṽo yaru nene, e pogos naña

pe aþure ko re opa kumali poli wa. Visae peraga, pona ligan ko e limana yaru na lipereena la yo, ana la nene aligan ko e limana yaru na taren yaru lala, ana la akilia aligan ko e yuṁa nakoena. ²⁶ Suri na nepisa ke pan ko ne naga lelaga, ana visae sanene, taþatete si omolue e yuṁa na koena, vano-o tol pogos naþa oul make kioṁa nakoena.”

Yesu pisayu kolau

²⁷ Ana Yesu pisa ṁena ga, pisapenua “Amiu amloge ṁa naþa navianena lala apisalua sumo rui, asape ‘Ve okila re kolau.’ ²⁸ Ana inu, nevisa van amiu sanini: Yaru naþa yepen kawe ke sira taþena tai, naþa naga sinenania sape werea, ana naga sane kila kolau amio sira nene þisi rui e kiena sitomena.

²⁹⁻³⁰ “Visae kilamaraṁa na þamarua kila ko ke om-loru e mlamulena viowa sanene, popon osilua kilamaraṁa nene vano. A visae lumoṁa na þamarua kila ko ke oloru e mlamulena viowa, popon otelua, okuan vano. Ana popon narin lepasneṁa ga tai kovio, a visae peraga, akoven punu ga tasneṁa va e lele na loge viowaena.”

*Yesu pisayu nakuwanlu-
aen sira*

*Matiu 19:9; Mak 10:11-12;
Luk 16:18*

³¹ Ana Yesu pisa ṁena ga, pisapenua “Nanua sumo

na apisa sanini, apisape ‘Yaru naþa koanlua wona, ana naga monar kila ṁaki tai vania, naþa pisa meraravan pania pisape koanlua rui, pe pe wona re si poli.’ ³² A in ne nanini, nevisa van amiu, sanini: Pe mesmesun re nena ga naþa yaru tai ṁenelua wona poli, visae naþa wona nene naga pe kila re kolau sumo poli. Visae yaru tai ṁenelua wona, naga kila kare wona nowo nene sa ga naþa wona nene naga pe sira na taþaen ga kolau rui. A yaru taþena naþa naga were sira tai naþa wona nasumo naga ṁenelua naga rui, yaru taþena nene, naga suṁa kila ke kolau narui.”

*Yesu pisayu sanape naþa
akila navisaarena*

³³ Ana Yesu pisa ṁena ga, pisapenua “Amiu na amloge ṁa naþa navianena lala apisa pan kieta yer-marua la sumo rui, apisape ‘Visae ovisa kia kiena ne Ntewa vena kila kioṁa visena ṁarera, siraunia ko taþatete okilaro sina visena nene. Visae ovisa kia kiena ne Ntewa, monar okila mesmesu sa naþa ko opisa.’ ³⁴ Ana nanagane, inu nevisa van amiu, sanini ‘Taþatete ovisa kia kiena ne suri taþena vena kila kioṁa visena ṁarera.’ Taþatete ovisavenua ‘Lelaga metava,’ vanon naþa ma e peni na lelana ne Ntewa naþa totano

ke ea, na pe yo wa pañisi.
³⁵ A tañatete mēna ga ovisa kia kiena yomarava nini, vanon yomarava nini lelen lana ne Ntewa naña naga piawa ke ea. Tañatete ovisa Yerusalem, vanon Yerusalem na lelena ne kieta Parin Suñe Wa. ³⁶ A tañatete mēna ga ovisa ãarumña, vanon tañatete ovilon vilumña tai imi yuwowo pona imi malolo. ³⁷ Visae avisa suri na lelaga, monar avisa ga ‘Lelaga,’ a visae avisa suri naña peraga, monar avisa ga ‘Peraga.’ A visena tañena la naña akilia avisa, naga molue ga kome Yermare.”

Yesu pisayu yaru naña kila maran si piowa pan yaru naña kila piowa pania

Luk 6:29-30

³⁸ Ana Yesu pisa mēna ga, pisapenua “Amiu amloge mña naña navianena lala apisa nanua sumo, apisape ‘Visae yaru tai kito kilamaramña tai, ana ko okilia okito mēna ga kilamarana. A visae yaru tai sulua maluemña tai, ko mēna ga okilia osulua maluenā tai.’ ³⁹ Ana nanagane, inu nevisa van amiu sanini: Amiu ve akilamaran re si suri van yaru naña kila viowa van amiu. Visae yaru tai lipa pipimña e lepas na ãamarua, ana monar otamñan mēna ga lipa pipimña lepas na ãameli. ⁴⁰ Ana visae yaru tai visave were ko ova avis van ko kumali, ana naga mñareran visave owar momña kulsota vania, ana ko owar mēna ga momña

kulsaket vania. ⁴¹ A visae yerkawa tai mñareran visave owar kiena karo amio ayal va tol mrae ve taaga, ana monar okekaran owar va tol si maran mrae ve taaga. ⁴² Visae yaru tai viun suri tan ko, monar ola vania, a visae yaru sinenan visave la kiomña suri tai yumñania, monar otamñan vania vena lavia, ve ovisalupar re vania.”

Yesu pisayu nisape monar akekaran nasinekar lala
Luk 6:27-28,32-36

⁴³ Ana Yesu pisa mēna ga, pisapenua “Amiu amloge mña naña navianena pisa sumo rui pisape ‘Monar ositom nalavis punña, a monar okila viowa va kiomña nasinekar lala.’ ⁴⁴ A nanagane, inu nevisa van amiu sanini: Monar asitom kiamiu nasinekar lala, a monar alen wo mēna yaru la naña akila ke piowa pan amiu, ⁴⁵ vena amiu ataveve ruru ãelaga kiena ne Arimamiu naña sike ma e peni, vanon naña naga kekaran yaru punu ga maran taaga. Vanon suri ne nanene, naga kila kiena mrae tego, a kila kiena yua powo pitomi pun yaru punu ga, la naña apo a la naña apiowa. ⁴⁶ ?Visae akekaran ke ga yaru la naña asitom amiu ke na, amiu na asitom ke asape yokorena atol kiamiu nalaena tai? A yaru na takis lala, naña yaru tañena la asape la ape yaru viowa ga, la akilia akila sanene. ⁴⁷ Visae otalopan ga

kiomña yeririna lala, nanene na pe otauulu re ðelaga kiena ne yaru viowa la poli. A yaru la naða pe amlelaga re e Ntewa poli, la mña ga akekarã kiela namratava lala. ⁴⁸ A kiamiu malena monar mesmesu ruru wo, sa naða ðelaga kiena ne Arimamiu naða sike ma e peni naga mesmesu ruru paðisi, a naga po pan yaru la punu ga.”

6

Yesu pisayu nalaena lala

¹ Ana Yesu suña pisi pan la, pisa pisape “Suri la naða kieta nalotena pisa pisape popon teyuñaenia, amiu na ve akila re sa naða amiu akila na vena yaru ve moki akilia avisu kilale naða amiu akila ke suri wo. Visae amiu asuña akila mña sanene, ðisi na Arimamiu naða sike ma e peni, naga taðatete la nalaena van amiu vanon kiamiu yuñaena la nene.

² “Visae ve sanene, pogos naða ko ola nalaena va yeririna la naða pe kiela suri re poli, vena oiila la, ana pe pon re owarwar ko vanon poli, sane li navilavenen viskorenena. Yaru la nene apisawal ke kiela yuñaena wo lala e loyuña na leniena, a e yepesinas la vanua, vena yaru la ayeluar la. Ana nevisa suri na lelaga van amiu, yaru la ne sanene amla kiela nalaena ðisi rui e nayeluarena naða yaru taðena la amla pan la, a

taðatete si ala suri tai. ³ A pogos naða ko ola nalaena va yaru la naða pe kiela suri re poli, vena oiila la, monar okila ga e ðelaga na tapolouena, yaru ve visu re, a ve kiomña sitomena yeluar ko re e nalaena nene. ⁴ A visae okila tapoloun ga kiomña yuñaena wo la ne sanene, ana Arimomña naða pisu ke suri la naða yaru la pe apisu re poli, naga kilia la nalaena van ko vanon kiomña yuñaena wo la nene.”

Yesu pisayu leniena *Luk 11:2-4*

⁵ A Yesu pisa mña ga, pisapenua “Ana pogos naða amiu alen, pe pon re ataveve ðelaga kiena ne li navilavenen viskorenena la poli. La nene na sinelan manene asape asuñalu vena alen loyuña e yuña na leniena, a vanua e yometava lala, ana yaru la akilia avisu la. Ana inu nevisa suri na lelaga van amiu, yaru la ne sanene amla kiela nalaena ðisi rui e nayeluarena naða yaru taðena la amla pan la, a taðatete si ala suri tai. ⁶ Ana pogos naða visae okila leniena, ana ova loyuña e momña yuña ko ga taaga, okotava ana okila leniena va Arimomña naða sike na, ana pe yaru pisu re naga poli. Ana Arimomña naða kilia visu suri la naða pe yaru pisu re poli, naga kilia la kiomña nalaena van ko,

vanon kioṃa suri wo naṓa okila.

⁷ “A pogos naṓa alenia, ana pe pon re avisa visena ve moki poli, ve sa yaru la naṓa pe amlelaga re e Arimata lelaga poli. Yaru la nene aṃape yokorena na alual suri naṓa la amlen ke vanonia, komin la apisa ke visena la moki manenea, ana peraga. ⁸ Ana amiu na ve ataveve re kiela ṓelaga lala, vanon Arimamiu, naga kilia ke suri la naṓa limamiu plasan rui, pogos naṓa amiu pe apiun re suri la nene tan naga poli wa.

⁹ “Vanon suri ne nanene, mesmesun naṓa amiu alen sane leniena nini, naṓa pisa pisape

‘Arimamimi naṓa ko osike ma e peni,

mesmesun ga naṓa yaru la asu vatanon kioṃa kia wa.

¹⁰ Memlen mesape kioṃa nasuṓenena imi suṃalu ṃarera se yomarava nini, vena yeririna la akila sa naṓa ko sinoṃania, sa naṓa la ne ma e peni akila ṃaga.

¹¹ Awis, ola kinanena van imimi ṓane, a e legiena punu ga.

¹² A oviewo imimi e kiamimi mlamulena viowa lala,

sa naṓa imimi ṃena mepiewo ke yaru taṓena la naṓa akila ke piowa pan imimi.

¹³ Ko ve oligan manene re suri viowa lala aimi ataṓali imimi,

okila wo Yermare ve imi kila kare imimi re.’

¹⁴ “Vanon naṓa visae amiu aviewo ke yaru la naṓa akila ke piowa pan amiu, ana Arimamiu naṓa sike ma e peni viewo amiu ṃena ga. ¹⁵ A visae ve aviewo re yaru taṓena la naṓa akila ke suri piowa pan amiu, ana Arimamiu taṓatete viewo kiamiu mlamulena viowa lala.”

Yesu pisayu monsilena

¹⁶ A Yesu pisa ṃena ga, pisapenua “A visae pogos naṓa amiu amonsilu ke sina ga, ve akinan re vena amiu asitoṃali Ntewa a alen vana, amiu ve akila re sa naṓa pe ake re maramiu poli, pona amiu akila maramiu la viowa, a kulugomiu la miyopiop sa naṓa viso kar amiu paṓisi, vena yaru lala avisu kilia ya naṓa akila ke na. Nanene na yuṃaena kiena ne li navilavenen viskorena. Ana visae akila sanene, ana yeririna laṓasia sinela ye la, naga ga nene kiela naulena naṓa la akilia alavia vanon kiela monsilena, ṓisi na taṓatete si Ntewa naga la sina ga suri tai van la. ¹⁷ Ana ko, pogos naṓa amonsilu ga sanene, popon okee marama, okila ruru viluṃa, oyowau ruru wo sa naṓa ko okila ke silaga, ¹⁸ vena yaru la aninue

ya naña ko okila ke ne. Ari-moña ga naña naga sike na, pe yaru la aña re naga poli, ana naga ga p̄isi na kilia pisu ke suri la naña pe yaru la apisu re poli, p̄isi na naga la nalaena van ko vanonia.”

Yesu pisayu kilavaru

Luk 12:33-34

¹⁹ Ana Yesu pisa m̄ena ga, pisapenua “Pe pon re amiu akilapolo kiamiu suri wo na yomarava la nini poli, vena avim ave yaru keviu na suri mōki manenea. E yomarava nini na kirara lala akilia akar suri la nene, a suri la nene akilia avililua a amenunu m̄ena ga, a amio m̄ena ga yaru na vinauena naña kilia kilapo yuñā, vena vinaun suri la naña amiu āp̄ionia. ²⁰ Ana amiu na monar awarpolo kiamiu suri wo lala ma e peni, vanon naña e nene na yo tai naña pe kirara re e poli, a suri tai tāpatete vililua a menunu, a yaru na vinauena lala tāpatete akila kare kiamiu suri nowo la naña amiu amligan ruru sike ea. ²¹ Popon vena amiu na kiamiu suri wo la ve moki sike ma e peni, vanon e naña kioñā suri wo la sike ea, ana kioñā sitomena m̄ena ga sike e nene silaga.”

Yesu suñā pisayu naña yaru la ve ave puluvis re

Luk 11:34-36

²² A Yesu pisa m̄ena ga, pisapenua “Kilamarana yaru naga pe yo taaga ga naña

kapi vivaga pimi loyuñā e tasnena. Visae kilamarañā merarava ruruia, okilia ovisu kilale yaru tāp̄ena, vena oiila naga. Visae okila sanene, losineñā pulen ruru kapi pivaga pāp̄isi. ²³ A visae kilamarañā ve merarava ruru re, yoko tāpatete ovisu kilale ruru yaru tāp̄ena, yoko osuñā ovisu ga kioñā suri lala ove puluvisin ga. Visae okila sanene, losineñā pulen manene la yemalolo, a visae yemalolo naga sike e naña mesmesun kapi vivaga naga se ea, nanene sane ko na osike e yemalolo naña pe pupumalo pāp̄isi.”

Yaru tāpatete yuñāe kiena sūpe ve lua veraga

Luk 16:13

²⁴ A Yesu pisa m̄ena ga, pisapenua “Yaru tai tāpatete kilia yuñāe kiena sūpe ve lua veraga. Visae sanene ana naga kekaran tai, a yepena mavin tai, pona naga logear tai, aligan tai. Amiu na tāpatete akila sane ave yaru kiena ne Ntewa, ana ave yaru kiena kilavaru m̄ena ga.”

Sanapen yaru naña sitom manene kiena malena

Luk 12:22-31

²⁵ Ana Yesu pisa m̄ena ga, pisapenua “Vanon suri ne na nene, inu nevisa van amiu sanini: Pe pon re kiamiu sitomena ulen manene ga kiamiu yuñāena na visuar amiuen la poli, naña amiu asuñā apiuviun ke, asapenua “?Añā e nape naña

yoko ita telual kata kinanena a m̄ata namunena?’ pona ‘? Pisi na ita tetol m̄ata kulsota na yenwo e sanape ne?’ Sitomena la ne sanene na pe po re nenaga, komin kiamiu malena naga po taulu kinanena, a tasnemi naga po taulu kulsota. ²⁶ Asitomli manu la ne akaka ke ne. Manu la nene pe amapla re kala lokove poli, a pe apa aṗar re kinanena pitomin naṗa aligan ruru sike loyuṃa poli. Ana Arimamiu ga naṗa sike ma e peni, naga ga mla ke kinanena pan la, ana e kiena navisuenaga, naga pisu amiu na sane ato metavan manu lala, ṗisi na naga kilia visuar amiu taulu la. ²⁷ ?Amiu na asitom asape yaru kilia kila kiena malena naṗa plas ga ne vim ve piavi li laa sane wo ga, vanon sitom manene la kiena malena? Peraga, pe sa re nene poli, ana amiu na popon ve asitom manene re kiamiu malena.

²⁸ “?A komin ya ne asitom manene ke m̄amiu kulsota la vaṇonia? Amiu asitomli vinas nen purmeme la ne pitotovi ke e yo punu la ne. Vinas la nene na pe amiyuṃae re poli, a pe asulu re m̄ala kulsota la poli. ²⁹ Ana inu nevisa van amiu, Ṗarin Suṗe Solomon nene nanua sūmo, naga pe yaru na suri moki, ana naga m̄ana kulsota la naṗa naga miyenia na pe miyowau ruru re sane meme la nene poli. ³⁰ A meme la nene na la ape na legiena taaga ga, peni narui

asikapi la e kapi, ana Ntewa ga naga paia ruru la ke apo sanene. ?Ana amiu na asitom asape ṗisi na Ntewa naga taṗatete la kulsota van amiu? !Aulai, amiu na pe apiawa re nena m̄arera e Ntewa poli!

³¹ “Komin suri ne la nene, pe pon re sinemi la ulen sitomena la nene poli naṗa sape ‘?Yoko takan ya ne, a tomun ya ne, a telual m̄ata kulsota sanape ne?’ ³² Lelaga, yaru la naṗa pe amlelaga re e Ntewa poli la asitom manene suri la ne sanene silaga, ana amiu, Arimamiu naṗa sike ma e peni, naga kilia m̄a ga naṗa pisape yokorena monar kiamiu suri la nene na wa. ³³ Suri naṗa amiu monar asitom ṗesan ve keviu e kiamiu malena, nane nasuṗenena kiena ne Ntewa, amio kana namesmesuena nena lala. Visae ve sanene, ṗisi na naga la m̄ena ga suri taṗena la nene van amiu.”

³⁴ “Ve sanene, pe pon re sane ṗane na, asitom manene suri la na legiena na peni poli. Peni ga, akilia asitom suri la na peni, komin legiena na ṗane, ana suri viowa la moki pimi e rui.”

7

Yesu pisayu naliṗere ka-reen yaru taṗena

Luk 6:37-38,41-42

¹ Ana Yesu pisi ke pan la na wa, pisape “Amiu na monar ve aliṗere kare re yaru taṗena lala. Ve sanene, Ntewa m̄ena ga ve liṗere

amiu manene re, ² komin sitomena naŋa teke e amiu pogos naŋa amiu aliŋere yaru taŋena, ŋisi na sitomena na sanene teke mēna ga e Ntewa e pogos naŋa naga liŋere amiu. Pisi na Ntewa naga liŋere amiu, ve sa ke naŋa amiu amlifere yaru taŋena lala. ³ Pe pon re naŋa ko osuŋa ovisasawal ke narin kororaki naŋa teke e kilamarana ne womla poli, ana ko pe opisu kilale re pupia mora laki na mēke e kilamarama poli. ⁴ ?Sanape narui ko ositom ke osape okilia ovisi va womla nene, ovisave ‘Pisi na nelalua ke ne kororaki na teke e kilamarama ne sumo wa?’ ⁵ !Visae sanene, na ko na pe opisu kilale re kioŋa mlamulena viowa poli, ana ko osuŋa omliŋere ke ga mlamulena kiena ne yaru taŋena lala! !Ko na ope yaru navilavenen viskorenena paŋisi wa! Okilalua ke ne pupia miasin laki naŋa mēke kilamarama sumo wa, siraunia ana okilia ovisuveve narin kororaki naŋa teke e kilamaran yaru taŋena.

⁶ “Pe pon re amiu akilali naŋa avisawal Visena Wa kiena ne Ntewa va yeririna la naŋa la pe akekaran re ala poli. Nanene sa naŋa amiu asuŋa apagan ruru ke lokul tetan lala e kinanena naŋa po, ana pogos naŋa akinana ŋisi, ŋisi na avilon ŋarila ana akar amiu ke sina ga. Sa ke mēna ga naŋa visae awar

nalaena wo lala va nompui lala, ŋisi na la avie neno ga vitove sike e pulkene.”

Yesu pisayu naviunena suri tan Ntewa

Luk 11:9-13

⁷⁻⁸ A Yesu pisape “Yaru naŋa suŋa piun ke suria, silaga naga mlavia, a yaru naŋa suŋa kale suria, silaga naga mŋalia, a yaru naŋa suŋa sigariga ke mratava, silaga pulutava pietava pania. Visae sanene, ŋisi na amiu awar ya naŋa amiu asuŋa apiun ke tan Ntewa, a ŋisi na amiu alual ya naŋa amiu asuŋa akale ke tania, a mratava naŋa amiu asuŋa asigariga ke ne, ŋisi na Ntewa naga vietava van amiu. ⁹ Visae naruŋa tai viso karia, viun narin kilaparavi naŋa teke ne, ŋisi na taŋatete ola kilavaru tai vania, ¹⁰ pona visae naga viun ruru ika naŋa teke rui, ana taŋatete ola lomara van kania. ¹¹ A lelaga naŋa amiu na ape yaru viowa ga lala, ana taŋatete amiu yaru tai kilia kila sanene, amiu na akekaran ga silaga naŋa amla suri wo lala pan narimiu lala. Sanene, pogos naŋa amiu aviun suri tai va Arimamiu nae ma e peni, naga kekaran ga naŋa la suri wo la van amiu narina lala, va ve keviu la sane wa.

¹² “Amiu na monar akila wo va yaru taŋena la silaga e suri wo ga lala, sa naŋa amiu sinemiun asape yaru

taþena lala, la monar akila wo van amiu. Visena ke nene narui naga purþes nen visena kiena ne navisaluaena la nene naþa Mo-sis naga siriyuia, amio mēna ga ya naþa navisawalena na sumo lala la apisa.”

Mrapa lua la

Luk 13:24

13-14 Ana Yesu pisa mēna ga, pisapenua “Pupia pulutava tai naþa keviu mon mēga, ana mrapa naþa pa þarpoyo komea ana lepalepasa a pe yotop ruru po paþisi. Yeririna la mokliu naþa ataveve ke mrapa nene, ana mrapa nene naga va e yo natolen koaena. A amiu na monar ava loyuma e pulutava taþena tai, naþa naga ve tokak la ga. Naga kana mrapa nena mārera paþisi, a pe yeririna moki re naþa akom ke e poli, ana mrapa nene naga mrapa na malena.”

Purlaki amio kana mrasa

Luk 6:43-44

15 Ana Yesu pisa mēna ga, pisapenua “Amiu na monar avisuar ruru yaru la naþa la apisape la ape yaru navisawalena lala, ana apian ke suri navisokanena lala. Pogos naþa la sinelan asape avian amiu, la apimi sa naþa ape erau wo amio amiu, naþa la yepela momāu ruru nenaga, sa naþa sipsip lala, ana e losinela lala la sa ga lokul tetan lala, naþa la visokarlan suri punu ga. 16 Ana þisi na amiu avisu

kilale la e mras nen kiela malena lala. Vilumini la naþa pe nenosa, amio kilika la naþa pe nenosa, la pe aþar re kinanena wo poli pona mras naþa kiki ruru poli. 17 Purlaki naþa kapuru ruru po, naga monar war mras naþa po, a purlaki naþa kapuru piowa ga, naga monar war mras naþa piowa ga. 18 Ana purlaki naþa kapuru po, ana taþatete war mras naþa viowa, a purlaki naþa kapuru piowa ga, ana taþatete war mras naþa po. 19 Naga sa ga nene narui, visae purlaki viowa la nene naþa la taþatete awar mras napo, þisi na monar ate plan la ga vena akuan la ava e kapi. 20 Visae ve sanene narui, mras naþa naga molue e malena kiena ne yaru kila meraravan pisape yaru nene naga pe yaru na sanape, ana þisi na amiu akilia avisu kilale navisawalena viowa la nene e mras viowa la naþa molue e kiela malena lala.”

“Pe nekilia amiu re nenaga”

Luk 13:25-27

21 Ana Yesu pisa mēna ga, pisapenua “Yaru la mokliu asuma apio inu ke asape ‘Kiau Suþe, kiau Suþe o!’ ana taþatete la punu ga nene naþa þisi na akilia ava loyuma e nasuþenena kiena ne Ntewa ma e peni. Yeririna naþa kilia va loyuma, naga yeririna ga naþa naga suma kila ke suri la naþa

Ata naga sinenania. ²² E pogos naþa þisi na Ntewa naga liþere yeririna lala, yeririna la ve moki naþa þisi na avio inu ve sanene, avisave in na nepe kiela Suþe. Pisi na la avisa avisave 'Suþe, sanapen imimi? Imimi na memiyuþnaen suri wo la mokliu e kioþna kia, a imimi mepisawal mþena ga kioþna visena, a imimi meþnene plan mþena ga yermare lala, a mekila ke mþena ga kile la mokliu. ?Pona ko pe ositoþnal re kiamimi yuþnaena wo la nene poli, yo?"

²³ "Ana yokorena inu nevisawal mesmesun van la, nevisave: Inu na pe nekilia ami re nenaga pogos tai, naþa ami na ape kiau. Ami na ape yaru na mlamulena viowa ga la ne. !Ami aurmatan inu nagane!"

Yuþna lua
Luk 6:47-49

²⁴ A Yesu pisa mþena ga, pisapenua "Visae ve sanene, la naþa ataveve ruru sa naþa nepian ami rui, la sane yaru tai naþa pe manmaruan naþa kila mþana yuþna, naþa naga mapila kana kemraþe pito tano tol yo mþarera tano. ²⁵ Ana sirania, yua pimi, a womie la mlau keviu, a lagi miyui, mþe yuþna nene, ana yuþna nene pe mloru re poli, komin naþa yaru nene pisirlua

ruru mþana yuþna nene e yo mþarera naþa.

²⁶ "Ana la naþa pe ataveve ruru re sa naþa nepian amiun rui, la sane yaru tai naþa kiena sitomena piowa ga, ana pogos naþa kila mþana yuþna, kililinarina kana kemraþe lala su ga metava e none. ²⁷ A siraunia, pupia yua kove, a womie la mlau keviu, a lagi miyui, mþe yuþna nene, ana yuþna nene mloru. A pogos naþa mloru, yuþnaena kiena ne yar nene pimi piowa make nenaga."

Amilan manene Yesu kiena visena nene þan wa

²⁸ Siraun naþa Yesu þisin kiena visena la nene, yeririna la amilan paþisi, ²⁹ komin naþa la apisuvevea sane kiena visena na pe sa re visena kiena ne kiela navianena navisaluaen la poli, ana kiena visena la urmi paþisi, a naga suþna miur ke kiela sitomena lala, a naga pisawal visena sane yaru tai naþa namþareraena teke e naga.

8

Yesu kila ruru yaru tai naþa leperosi se yepena, miania

Mak 1:40-45; Luk 15:12-16

¹ Yesu mligan kunus keviu naþa naga pian ke yaru la ea, naga pitomi tano, ana yaru la mokliu naþa atavevea. ² Ana yaru tai naþa leperosi sike e yepena pimi puna, ana kinaí tano pania

piunia, pisape “!Suṣe! In na nemlelaga e ko nesape ko na okilia okila ruru inu wo ga, ana visae ko okekara, sineun nesape neviun tan ko vena okila van inu ve sanene.”

³ Ana Yesu pe maraun re yaru naṣa poli vanon kiena maiena nene, ana ṣuarar naga e limana, pisape “Ee, inu sineunia. Poga ga, nesape yepenā ikiki.” Ana veraga ga yepena miania, leperosi nene ṣisi ea. ⁴ Ana Yesu pisa pania, pisape “Omloge ke ne, ovano ve ovisawal re suri nene va yaru lala wa, ana nanagane ga ne ova okom puna yaru wa vena naga kilia visuveveli yepenā. Ṣisi na, monar ova okila lotuena va Ntewa, a okila mēna kuṣaṣaena nene naṣa Mosis pisa sape yaru monar kila vanon suri na sanene, ana siraun naga nene, yaru wa nene naga kilia visawal visave leperosi nene ṣisi rui.”

Yesu kila yaru naṣa yepena komṣasia mare pimi po

Luk 7:1-10

⁵ Ana pogos naṣa Yesu pa loyuma garu pulkumali naṣa Kapeneam, yaru keviu tai kiena ne li na mara lala nae Rom pimi puna, tagi pania, ⁶ pisape “Suṣe, yaru na kilaen kiau yumaena tai mloru meke e mana tog nanagane garu mau. Tasnena lepas komṣas mare, ana naga mloge ke piowa paṣisi.”

⁷ Ana Yesu pisa pania, pisape “Ita, tevano. Ṣisi na inu nekila ruru si naga loge wo.”

⁸ Ana yerkawa na kilaen mara naṣa pisatamea, pisape “Suṣe, in na pe nepe yaru wo re tai naṣa netorokin naṣa ko oimi maun loyuma poli, sane in na pe nepe yere Yu re poli, ana visae okilia ovisa ga visena tai, nekilia nesape ṣisi na kiau yaru nene kilia loge wo narui. ⁹ In na nekilia naṣa nesape ṣisi na monar ve sanene, vanon nekilia nesape kioṣa visena namareraena keviu sike ea. Naga sane yaru na mara la naṣa asike vatanon inu, naṣa monar alogear kiau visena. Visae nevisavenua ‘Ovano,’ monar tai vano, pona nevisave ‘Oimi,’ monar naga imi, pona nevisave ‘Okila ve sa nene,’ ana naga monar kila. A inu mēna ga monar nekila ya naṣa kiau yaru keviu pisa pan inu. Ana nemlelaga naṣa visae ko ovisa ga suri tai, ana monar ve sa nene.”

¹⁰ Ana pogos naṣa Yesu mloge kiena visena nene, kila naga milan paṣisi a kekara mēna ga paṣisi. Ana pisa pan ṣina la naṣa ataveve ke ne, pisape “Nevisa suri na lelaga van amiu, in na pe noṣal re nena ga yaru nae Israel tai naṣa naga piawa marera e inu sane yaru nene poli. ¹¹ Inu nevisawal van amiu sanini, ve le Yu re ga la naṣa akilia aimi loyuma e

þaþagena keviu na legiena maro nene. Peraga, ana yokorena yaru la ve moki ve sa yaru nene e yo taþena lala na yomarava nini, naþa aimi atotano lele taaga vena akinana amio Epraam, Aisak, a Sekop. Pisi na la nene na asu ruru silaga ve sanene e nasuþenena kiena ne Ntewa ma e peni. ¹² Ana le Yu la nene naþa Ntewa pio la sumo vena ava loyuña, nanagane la pe amlelaga re e inu poli, ana þisi na Ntewa koven plan la ava e yemalolo vanua, e yo naþa yaru la asuña atagi ke ea, akar ke malueta ea.”

¹³ Ana Yesu pisa pa yerkaawa na kilaen mara naþani, pisape “Ko, okilia ova uña. Þisi na vim van ko ve sa naþa kionña nalelagaena piawa ke ñarera ea.” A e ke e pog nene narui, ana yepen yaru na yuñaena nene pimi po sina.

Yesu kila riru anenane wona Pita

Mak 1:29-34; Luk 4:38-41

¹⁴ Ana pogos naþa Yesu sike garu Kapeneam wa, ana naga pa loyuña ñana Pita, naga pisu anenane wona Pita naga miava karia, ñeke e ñana tog. ¹⁵ Ana Yesu mligan limana te limana ne sira nene, ana miava naþa þisi, ana naga sumalu, mla kinanena pa Yesu.

¹⁶ A yepekilavi e legiena nene, yaru la aþure yaru la moki naþa apimi puna

Yesu, yaru la naþa yer-mare lala asike e la. Ana naga ñene plan yermare la nene e ga e kiena visena, a naga kila ruru ñena ga na-maiena lala apimi apo sina. ¹⁷ Suri la nene pimi kakate vena kila visena kiena ne Navisawalena Aisea imi ve lelaga, naþa naga pisape

*“Naga lalua kieta maiena lala,
a naga kuslua kieta yepe lalaea lala.” Ais 53:4*

Yaru la lua sinelan asape ataveve Yesu

Luk 9:57-62

¹⁸ E legiena taþena sina ga tai, Yesu sunña amio yaru la mokliu naþa la amier-vivi naga telivi piora, ana naga sinenan pisape yali ve-tan la, ana naga pisa pan kiena nalogena lala, pisape “!Aulai! Ita, teva e lepas nen lapa nene lepas þasa.”

¹⁹ Ana asun ke asape avano, ana navianena navisaluaena tai naga pimi, pisaar pa Yesu, pisape “Navianena, þisi na netaveve ko, e nape naþa ko okom ea ana inu netaveve ko teva ea.”

²⁰ Ana Yesu pisatamea, pisape “Lokul tetan lala, la ñala pulus na monena la asuña ga, a manu ñena ga lala ñala ponovi la asuña ga. Ana inu, Narina ne Yeri-rina na, pe ñau yo re tai naþa neva nomomalia e poli. Visae ko okekarana ñena ga malena na sanene, ko okilia oimi.”

21 E ke e pogos nene, ana nalogena tañena kiena ne Yesu tai pisa pania, pisape “Awis Mara, otamān inu neva nevisuar ke ne ata sumo wa, a visae pogos naña mare pae, ñisi na neimi ne-taveve ko ga na wa.”

22 Ana Yesu pisa pania, pisape “Ko oimi otaveve inu ga. Ko oligan yeririna la naña ninula mare rui, vena la asin kiela yaru la naña la amare.”

*Yesu pisi pa lagi amio sive
Mak 5:1-20; Luk 8:26-39*

23 Ana Yesu amio kiena nalogena lala apitomi atol lapa nene narui, ana añiyu apa e waa tai e yo nene.

24 Ana apa li ga metava pe piavi re poli, pupia lagi tai molue, miyui kila pupia lapa nañani kululu keviu pañisi, ana kila waa nañani siar sape talilu. Ana Yesu ñeke e waa, naga momalio ruru ga ñeke na, 25 ana la apito akilañegea, apisape “!Suñe, opisus ke ne! Lavisi tetalilu narui, monar otamalia ita.”

26 Ana Yesu pisa pan la, pisape “! Ei! ? Amaraun ke ya ne sanene? Aa, amiu na pe apiawa re nena ñarera e kiau namareraena poli.” Ana naga suñalu, pialuñar lagi, pisape ve yui re sina, a pialuñar sive, pisape malumu. Ana pog pimi po, amalumu.

27 Ana pogos naña nalogena la apisu yo pimi pa ruru make nenaga po sanene, ana amilan pañisi, apisape “!Suwala! Yaru nene

na pisa ga sanene, ana lagi amio sive lalua amlogear naga. !Yaru nene na pe yaru re nene poli yo!”

*Yesu pile plan yermare
lala petan yaru lua*

Mak 5:1-20; Luk 8:26-39

28 Ana pogos naña Yesu pimi tol lapa nene lepas ñasa, naga pa gare yo kiena ne le Katara lala. E yo nene, yaru la lua amolue e puluve ñana ne yaru mare lala, ana la lua añal Yesu. Ana la lua nene na yermare lala asike e la, ana la lua ape wowe asirag pañisi, ana kila yaru la amaraun vaen e mrapa nene pañisi. 29 Ana pogos naña apisu Yesu, lalua apio manene pañisi, apisape “? Ko Narina ne Ntewa, kiomā ya naña teke e imimi? ?Ko opimin osape ola nakoaena van imimi naña pe kana pog re poli wa, ne?”

30 Ana e yo nene, na ñegas nen nompui tai asuñia akolkol ña porotano lavis ga, 31 ana yermare la nene atagi, apisa pa Yesu, asape “Visae omene plan imimi, awis oligan imimi mava e los nen nompui la ne asike ne.”

32 Ana naga pisa pan la, pisape “Avano.” Ana la amolue petan lalua nene, apa e los nen nompui la nañani. Ana pogos ke nene, nompui la nañani akiriri apano, apitove e yeparpasa tai, amloloru apito tano e pupia lapa nene, atalilu apito akokovio ea.

33 Ana yaru na visuaren nompui lala apureure apa e kiela pulkumali, apisawal suri la naña kakate, a ya naña tol lalua naña yermare la ase lalua sumo. 34 Ana pogos ke nene, yeririna la punu ga naña e kiela pulkumali nene apimi apisu Yesu. A pogos naña apisu naga, apisi m̄arera pania apisape naga ure vetan kiela yo.

9

Yesu kilia viewo mlamulena viowa

Mak 2:1-12; Luk 5:17-26

1 Ana Yesu p̄asupe sina amio kiena nalogena lala, amiyai ke ga e waa nañani, ana akusro si lapa keviu nañani, ana āpasupe apimi e kiena pulkumali naña Kapeneam. 2 Ana yaru lāpasia akus namaiena tai pimi puna naña naga tasnena kom̄pas mare, naga mloru ga n̄eke e m̄ana tog. Ana pogos naña Yesu pisu kiela nalelagaena m̄arera asape Ntewa naga p̄isi na iila namaiena nene, naga pisa pania pisape “Naruu, ve sinem̄a kona re. Kiom̄a mlamulena piowa lala, nepiewo p̄isi rui.”

3 Ana e pogos nene navianena navisaluaen lāpasia asuñã ga, ana amloge ke visena kiena ne Yesu nene. Ana verakorena la apismununia, apisape “Yaru nene naga p̄arnena kare kia wa kiena ne Ntewa rui. Naga pisa ke sanene sa ga naga Ntewa rui.”

4 Ana Yesu kilia m̄a kiela sitomena lala, ana pisape “? Vanon ya ne kiamiu sitomena la pulen sitomena viowa sanene? 5 Visae nevisa sanini va yaru nene, nevisavenua ‘Inu nepiewo kiom̄a mlamulena viowa,’ pona nevisa nevisavenua ‘Osum̄alu oyali,’ e visena lua nene, tai m̄areran na visaena, a tai meme ga navisaena. Visena naña pisapenua ‘Osum̄alu oyali,’ naga m̄arera, vanon naña yaru la apisu kilale asape yaru nene sum̄alu pona ve sum̄alu re. 6 Ana p̄isi na nekila suri tai naña amiu asitom sane Ntewa naga ga taaga kilia kila, komin naña sineun nesape nekila merarava van amiu naña sane Narina ne Yeririna naga torokin naña viewo mlamulena viowa lala e yomarava nini.” Ana Yesu pisa pan namaiena nene, pisa pisape “Osum̄alu osilowar mom̄a tog, oyali, ova mom̄a.” 7 Ana yaru nañani sum̄alu, mial pa m̄ana.

8 Ana p̄ina na yeririna la naña apisu suri nene amarau, a amieluar m̄ena ga Ntewa vanon naña naga tañan nam̄areraena nene pisape yaru tai kilia kila ve sanene.

Yesu pio Matiu pimi taveve naga

Mak 2:13-17; Luk 5:27-32

9 Ana Yesu mligan yo nene, naga mial ga pa m̄a sane. Naga pa m̄aga, ana m̄al inu neteke tano e lenen kiau yuñãena. Kiau yuñãena

e pogos nene, nawarpoloen kilavaru na takis. Ana Yesu pio inu, pisape “Matiu, oimi otaveve inu.” Ana nesuñalu veraga, netaveve Yesu.

10 Siraunia, Yesu pimi kinana e ñau yuñã, ana e pogos nene nepure li nawarpoloen takis la moki, amio yaru viowa tañena lala, apimi atotano, vena akilia akinana veraga amio Yesu a kiena nalogena lala. 11 Ana le Varasi lañasa asike e pogos nene, ana apisu naña Yesu teke veraga amio yaru la ne sanene, ana apiun tan kiena nalogena lala, asape “? Komin ya ne kiamiu navianena kinana ke veraga amio yaru viowa la ne sanene?”

12 Ana Yesu mloge kiela visena nene, ana naga pisatamñe la, pisape “Yaru la naña yepela poga ga, pe sinelan re yaru na kilaruruen maiena poli, ana la ga naña añar maiena, ana la sinelania. 13 Popon amiu asitomyuli kinas nen visena tai naña teke e Visena Wa, naña Ntewa pisa, pisape

‘In na pe sineun re kiamiu kuñapaena la poli,

ana sineun ga nasineyeena se kiamiu malena lala.’

In na pe nepimin re naña nevio yaru la naña asitom asape la amesmesu ñisi rui, peraga, inu na nepimin ga nesape nevio yaru viowa lala vena ataveve inu.”

Naviunena tai e lepas na monsilena

Mak 2:18-22; Luk 5:33-39

14 Siraun suri nene, ana nalogena lañasia kiena ne Yoane Nakeena apimi pu Yesu, apiun tania, asape “Sinemimin mesape ovisawal suri nene van imimi. ? Imimi na memonsilu ga silaga vena mekila leniena, a Varasi mñena ga lala akila ke sanene, ana vanon ya ne kioñã nalogena lala pe akila re poli?”

15 Ana Yesu pisatamñe la, pisayu naga amio kiena nalogena lala, sane la akekara pañisi pogos naña naga sike amio la, ana ñisi na sinela monar viowa siraun pogos naña naga ure matan la, ana pisape “? Pogos naña yaru naña talopa naga sike e pañagena amio kiena erau lala wa, amiu asitom asape akilia ataginia? Peraga. Ana e pogos tai, visae nasinekar kiena ne yaru nene lañasia aimi aurelua naga vetan kiena erau lala, e pogos nene narui ñisi na kiena erau lala la akilia amonsilu ga vanon nasineyeena.”

Sur viu amio sur marua

16 Pelaga na monsilena nene, naga ñelaga marua na lotuena kiena ne le Yu lala, ana Yesu sinenan pisape kila meraravan van la sape ñelaga marua la ne sanene, la tañatete akilia asikolia amio suri viu la naña naga pian la ke ea,

ana naga pisa ãakaiwa tai e lepas nene pan la, pisape “Taãatete ola kinakina kulmrae tai naãa pe urviu ana osuluwo ruru pulus naãa teke e kulsota marua. Vanon naãa kinakina kulmrae viu nene kilia kilaroro kulsota marua nene komãasa, ana kana pulus kilia vim ve ke-viu la sane.

¹⁷ “Ana taãatete okonkonkia kuruta na munena naãa sirpup pava ke ea wa, vito e kulus nen nani naãa pe urmarua, naãa akonkonkia kuruta na munena pito ea yam moki rui. Ana visae akila sanene, kuruta na munena nene lapa e kulus nen nani nene, ana yukuswinia na mãapoa, ana kuruta namunena naãani lau, ana pias nene naga mãena viowa. Ana kuruta viu monar okonkonkia va e pias viu, naãa mãrera ruru po, ana okilia oligan ruru moãia kuruta na munena nene moãia ga.”

Yesu kila ruru sira kawa tai amio nin sira m̃ee tai

Mak 5:21-43; Luk 8:40-56

¹⁸ Ana pogos naãa Yesu pisayu ke pa nalogena kiena ne Yoane la sanene, ana yaru keviu nalotena kiena ne le Yu lala pimi lavisi, kinai pito tanon Yesu, tagi pania, pisape “!Awee! Kiau lom̃earu mare ga na wa, ana sineun nesape oimi, oligan lumoãia towar naga, vena naga kiena malena imi sina.” ¹⁹ Ana Yesu sumãalu, taveve yaru nene, naga amio kiena nalogena lala apano.

²⁰⁻²¹ Ana pogos naãa Yesu pa ke sanene, ana sira tai sumãa ga naãa maiena na kupario teke e naga legiena punu ga pano-o pimi tol kas lualima taaga pa lua rui. Ana naga pisu naãa Yesu mial pimi, naga sitom sape “Visae netol ga mãana kulsaket, vena kiau maiena ãisi.” Ana naga kom rana Yesu, pimi tol ga mãana isin-nen kulsaket.

²² Ana Yesu pilon veraga, pisu sira naãani, pisa pania, pisape “Auia, ve sinemãa kona re. Kioãa naviawaena e inu kila ko owo sina.” Ana e ke e pogos nene, maiena naãani ãisi e sira nene.

²³ Ana pogos naãa Yesu pa tol yumãa mãana yerkawa nene, naga pisu yaru la sinela m̃ie manene la sira m̃ee naãa mare m̃eke ne, ana asumãa atagi a amiyaun ke yauena na marena lala.

²⁴ Ana naga pisi pan la, pisape “Amiu amolue, ayal tetai sina. Sira m̃ee nene na pe mare re nene poli, naga momalio ga ne.” Ana la naãani apitalia kare ga naga.

²⁵ Ana amligan plan yaru la nene apa vanua, ana Yesu pa loyumãa. Naga pa tarar limana sira m̃ee nene, ana naga sumãalu, mali sina.

²⁶ Ana amlologon suri nene pa e yo make ga, kalo make yo punu ga e lepas nene.

Yesu kila ruru kilama-raãala lua

²⁷ Ana Yesu molue petan yumãa mãana yerkawa nene, a pogos naãa naga mial ke

pano, ana kilamara ðala la lua atavevea, la asumã apio ke, asapenua “Ko lus kiena ne Tepet, ko Navisaarena, awis ko sinemã ye imimi lua nini ka.”

²⁸ Ana Yesu mial pano, pa pa loyurã e yurã tai, ana kilamara ðala la lua naþani apimi puna. Ana Yesu piuntan la luoka, pisape “?Amiu luoka ga amlelaga e inu, asape nekilia nekila ruru amiu sanene?”

Lalua apisatamãea, apisape “Ee Suþe, imimi memlelaga.”

²⁹ Ana Yesu mligan li mana te kilamarala, pisape “Pisi na ve sa naþa nalelagaena kiamiu amlua.” ³⁰ Ana lalua kilamarala pimi po ke e pogos nene. Ana Yesu pialuþar m̃arera pan la luoka, pisape “Pisi na amiu lua ve avisawal re suri nene va yaru lala.” ³¹ Ana lalua amolue petania, ana lalua amlologon suri naþa Yesu kila pan la ne, pano-o kalo make yo la punu ga e lepas nene.

Yesu pilelua yermare petan puru tai

³² Ana pogos naþa lalua nene amligan Yesu apano, yaru taþena lala aþure yaru tai pimi puna. Yaru nene pe puru, vanon yermare sike e naga. ³³ Ana Yesu pilelua yermare nene, ana puru naþa pisi ruru narui, ana yeririna lala sinela kurkur paþisi, apisape “Suwala, pe

tepisuli re suri tai e Israel sanene poli wa, ðane ga.”

³⁴ Ana Varasi lala apisayu Yesu, apismumunia, apisape “Yeririna nene pile plan ke ga yermare lala e nam̃areraena naþa suþe kiena ne yermare lala naga mla pania.”

Yesu sinen mie yeririna lala

³⁵ Ana Yesu surã mialili ke pulkumali lala, a pian ke yeririna lala e kiela yurã na lotuena lala. Naga pisaawal ke nalologena wo nasuþenena kiena ne Ntewa, a naga surã kila ruru ke namaiena lala a la naþa tasnela la piowa. ³⁶ Ana pogos naþa surã mialili ke yaru la sanene, naga surã pisu þina lala, naga pisu la sa naþa kiela sitomena la pule paþisi, a suri la piowa pan la e kiela malena lala, ana naga sinena mie la paþisi, komin naþa asumã ga sa ga nene sane sipsip la naþa pe yaru navisuar laen re poli, la amninue asape þisi na la ave sanape narui. ³⁷ Ana naga pisa pan kiena nalogena lala, pisape “Lelaga, kinanena moki paþisi naþa marua sike lokove, ana yaru la lua la ga naþa asumã aþar ke pitomi umã. ³⁸ Ana amiu na, monar aviun manene tan suþe na lokove nene, vena naga ligand plan re si yaru laþasia la avano vena

awar kana kinanena la nene vim.”

10

Li nalogena kiena ne Yesu lala

Mak 3:13-19; Luk 6:12-16

¹ Ana Yesu pio kiena nalogena la lualima taaga pa lua pisape aimi puna. Ana la apimi, ana naga pisi ruru pan la p̄isi, a naga mligan plan la apano vena akilia āmene plan ninuna viowa e yeririna lala, a vena akilia akila ruru namaiena lala a nainanena viowa tāpena lala.² Ana kia kiena ne li nalogena ne la nanini narui:

nasumo, Saemon, nāpa apio asape Pita, nāpa naga pe kiela yerkawa, amio wenla, nāpa Antru,

Semes, nāpa narina ne Sepeti, amio wenla nāpa Yoane,

³ Pilip,

Patalomiu,

Tom̄as,

inu Matiu, in na nepe yaru na waren takis,

Semes, nāpa naga narina ne Alpeas,

Tateas,

⁴ Saemon, nāpa naga kila manene politik sape kuan plan le Rom lala,

a Sutas nae Kariot, nāpa siraunia, naga pielua Yesu.

Yesu mligan plan kiena li nalologena lala

Mak 6:7-13; Luk 9:1-6

⁵ Ana Yesu pisi ruru pa la lualima taaga pa lua nene, a siraunia naga mligan plan la apano. Visena wo la nene nāpa naga pisa pan la nanini, nāpa naga pisape “Amiu na ve ava re puna ne la nāpa pe ape le Yu re la poli, a amiu ve ava re e pulkumali nae Samaria lala wa. ⁶ Amiu na avanon ga sipsip nae Israel la nāpa akilalu mrapa. ⁷ Ana pogos nāpa avanon la nene, ana monar alologon, avisave ‘! Nasūpenena kiena ne Ntewa pimi ke pun ita narui!’ ⁸ Ana amiu monar akila ruru namaiena lala, a monar akila namarena lala aimi amal sina. A la nāpa leperosi sike e yepela, monar akila yepela la imi ikiki sina, a amiu monar āmene plan yermare e yaru lala. Ana yūmaena la nene, p̄isi na ayūmaen e nam̄areraena tai nāpa amla korenan ga, ana amiu monar ala korenan lein ga va yaru lala. ⁹ A amiu na ve awar re kiamiu kilavaru lāpasia e kiamiu pultaga lala, ¹⁰ a ve awar re m̄ena kiamiu karo tai, nāpa akon m̄amiu kulsota tāpena lala, a kiamiu kulus nen lamiu tāpena lala se ea, a ve awar re m̄ena kiamiu plasgai vano. Yaru la nāpa akila yūmaena wo la ne sane amiu, p̄isi yaru tāpena la nāpa la amiyūmae pan la, monar avisuar ruru

la vanonia.”

¹¹ Ana Yesu pisa m̃ena ga, pisape “Pogos naṣa amiu avano-o atol pulkumali tai, ana monar akale yaru tai naṣa kekaran naṣa were amiu ava m̃ana, ana asum̃a ga m̃ana, vano vano-o tol pogos naṣa amiu avatani si pulkumali naṣani. ¹² Ana pogos naṣa avano asike mratava m̃ana yaru nene, ana monar atalopan ruru la, avisavenua ‘Sum̃are sike amio amiu.’ ¹³ A visae mratava nene kila wo van amiu, ana sum̃are naṣa apisa ana ṣisi na sike amio la, a visae la akila viowa ga van amiu, ṣisi na sum̃are nene wasuṣe ke sina ga, vim van amiu. ¹⁴ Ana visae yaru laṣasia yepela mavin were amiuena ava m̃ala um̃a, pona yepela mavin loge amiuena, ana popon aligan ruru mratava nene pona pulkumali nene m̃eke na. Ana pogos naṣa amolue e yo nene, amiu atanvan puluyavi nae e yo nene naṣa sike e lamiu, sane kiamiu visena m̃arera tai ne pan la ne, pisape ṣisi na la akus nakoena naṣa mesmesun ga kiela ṣelaga viowa la nene. ¹⁵ Lelaga naṣa nevisa meraravan van amiu, e legiena na liṣereena, ana la nene na m̃arera la van la, taulu naṣa Ntewa mliṣere le Sotom amio le Komora lala nanua sumo.”

Pisi na yaru la am̃ene

10:14 Yum̃aena 13:51 **10:15** Mat 11:24 **10:15** Luk 10:4-12 **10:16** Luk 10:3 **10:17** Mak 13:9-11; Luk 12:11,12, 21:12-15 **10:21** Mak 13:12; Luk 21:16

nalogena kiena ne Yesu lala
Mak 13:9-13; Luk 21:12-17

¹⁶ Ana Yesu pisa pan la, pisape “Amiu asitom ruru wo. Inu neligan plan amiu avano, a amiu ala limamiu ga ava sanene, amiu na sa ga sipsip la naṣa asike likan ṣegas nen lokul tetan lala. Visae sanene, ana monar ave manmarua ruru wo, a amiu monar amom̃au ruruia. ¹⁷ Ana monar avisuar ruru amiu, vanon naṣa saṣisi yaru lala aure amiu ava kiela kumali, a e kiela yum̃a na leniena lala, vena avis van amiu, ana ṣisi na ala nakoena van amiu, a avisuaria saṣisi awe amiu. ¹⁸ Ana ṣisi na aligan amiu ava asum̃alu ase marana ne yerkawa na purvanua vanon ga naṣa amiu ape kiau nalogena lala, a e pogos nene amiu akilia avisawal kiamiu nalelagaena e inu e maran la nene a e marana ne la naṣa pe amlelaga re e Ntewa poli. ¹⁹ Ana pogos naṣa la nene aimi aure amiu, ana amiu na ve asitom manene re avisave ‘Ṣisi na nevisa sanape ne, a nevisa ya ne van la ne?’ vanon naṣa ṣisi na Ninuna Wa naga la visena na visawalena van amiu naṣa avisa, mesmesun e pogos na visena. ²⁰ A pogos naṣa amiu avis, ana pe kiamiu visena re nene poli, ana visena kiena ne Ninuna ne Arimamiu naṣa naga visi e amiu.

²¹ “E pogos m̃arera nene,

ṽisi na yaru kilia taṽan yaru viowa taṽena la nene la aimi aurelua wenla ruru naapo pona narina ruru naapo, vena awe moṽar la amarmare, nanene komin naṽa la nene amlelaga e inu. A nisisi lala la ṽena ga akilia asuṽalu avisawal anela lala a arimala lala naṽa la amlelaga e inu, vena la ṽena ga amare sanene. ²² Ana ṽisi na yaru lala ve sinelan amiu re sina, akawe kiamiu visena silaga, vanon kiau kia teke e amiu, a yaru naṽa suṽalar ṽarera suṽa ga vano-o pog ṽarera nene ṽisi, ṽisi na Ntewa tamalia naga. ²³ Ana pogos naṽa la asuṽa aṽene manene amiu la e pulkumali tai, amiu monar aure ava e pulkumali taṽena, a visae aṽene amiu ke sina ga e yo nene, amiu monar aure sina. Ana nevisa ruru van amiu, nesape kiamiu yuṽaena nene e pulkumali nae Israel lala, ṽisi na ve ṽisi ruru re wa ana Narina ne Yeririna vim warpoyo ke sina ga.”

²⁴ Ana Yesu pisa, pisape “Naloge-na, naga pe to re metavan kiena navianena poli, a yaru na yuṽaena, naga pe to re ṽena metavan kiena suṽe poli. Ve sanene, amiu na ve asitom re avisave ṽisi na taṽatete ṽarera van amiu pogos tai, ²⁵ komin ṽelaga ṽarera naṽa la akila va navianena, ṽisi na la akila ke ṽena ga va nalo-

gena, a suri ṽarera la naṽa suṽe naga kusia, ṽisi na kiena yeririna naga ṽena ga monar tolia. Sa naṽa yaru la apio kare inu, naṽa in na nepe yerkawa e ṽau mratava, apisape in na Piel-sipel, naṽa naga pe suṽe kiena ne yermare lala, ṽisi na la akilia avio kare amiu la sane na wa, amiu la naṽa ape kiau e mratava taaga.”

Naloga kiena ne Yesu taṽatete maraun yaru lala

Luk 12:2-7

²⁶ Ana Yesu pisape “Vanon naṽa ṽisi na avis viowa van amiu ve sa ke ga naṽa apisi piowa pan inu, ana amiu ve amaraun la re. Suri viowa la punu ga naṽa yaru lala akila vinaunia, pona apisawaniga, ṽisi na vim kakate e yometava na wa, vena yaru la punu ga akilia. ²⁷ A amiu ṽena ga, suri wo la naṽa nesuṽa nepisa ke pan amiu e yemalolo, amiu monar avisawal ke sina ga e yomerarava, a suri la naṽa nesuṽa nepragagon ke ga e kiligamiu, amiu na monar avion manene va metava e maran yeririna lala, vena yar punu ga akilia aloge.

²⁸ “Ana amiu na ve amaraun re yaru la naṽa akilia aweṽar tasnemi mare, komin naṽa la taṽatete aweṽar ninumi mare. Ana amiu na monar amaraun ga Ntewa, naṽa naga kilia kilalele kare tasnemi amio ninumi luwoka e lele

naloge viowaena. ²⁹ Amiu asitomālia. Ninlaea la ne akaka ke la ne, la moki paḡisi, sa ga kororaki ga, a la asumā aḡiliwilin ke lua e narin kilavaru ga tai, ana visae tai loru vitove tano e porotano, ana Arimamiu naga kilia mā ga. ³⁰ A vilḡarimiu mēna ga moki paḡisi, ana Ntewa naga poloar make ga peve taaga, naga kilia la māga. ³¹ Sanene, ana amiu ve amarau re, vanon naḡa Ntewa pisu amiu na po manenea taulu ninlaea la nene, ana ḡisi na naga kilia visuar ruru amiu e suri punu ga e kiamiu malena.”

*Yaru naḡa naga pisawal
pisape naga pe kiena ne Yesu
Luk 12:8-9*

³² Ana Yesu pisa pisape “Yaru naḡa naga visawal e marana ne yaru lala visave naga pe kiau yeririna tai, ḡisi na inu mēna ga, nevisawal naga e marana ne Ata naḡa ma e peni, nevisave yaru nene pe kiau. ³³ Ana yaru naḡa visawal e marana ne yaru lala visave naga pe pe kiau yeririna re poli, ana inu mēna ga nevisawal e marana ne Ata naḡa ma e peni, nevisave yaru nene naga pe pe kiau yeririna re poli.”

*Yesu naga pe purḡes nen
kaween visena
Luk 12:51-53*

³⁴ Ana Yesu pisape “Amiu na ve asitom re avisave inu nepimin naḡa nekila sane pupia sumāre pimi sike e yomarava nini. Peraga, inu pe nepimin re ga neli-gan sumāre e poli, ana inu nepimi nemio playu na ki-laen mara tai, naḡa ḡisi na yaru la aveveyu la, a akila mara van la vanon inu. ³⁵ In na nepimin nesape nekila sane ḡisi na yaru mēe lala akawe visena kiena ne arimāla lala, a sira mēe lala akawe visena kienā ne anela lala, a sira la naḡa atalopa ga na wa, ḡisi na akawe visena kiena ne anela simem lala. ³⁶ ḡisi na la naḡa sinela kari manene kiau nalogena lala, naga pe yaru taḡena re la poli, yaru na mratava ga māla lala.”

*Yesu naga sumo e malena
kiena ne kiena nalogena lala
Luk 14:26-27*

³⁷ Ana Yesu pisa, pisape “Yaru naḡa sitom manene la arimana, pona anena, pona narina, taulu naḡa naga sitom inu, yaru nene naga mesmesun re imi sane ve kiau nalogena poli. ³⁸ Ana visae yaru tai naḡa ve kus re kiena laktorovia ḡaveve inu, sane naga pe tamān re naga loge viowa vanon inu poli, yaru nene taḡatete imi ve kiau nalogena. ³⁹ Visae yaru tai naḡa naga sitom manene la kiena malena, yaru nene naga ḡisi na kilalu kiena malena nene. A visae kiau nalogena tai naga kilalu

kiena malena vanon inu, ĵisi na naga tol malena naĵa taĵatete ĵisi.”

La naĵa avisuar ruru nalogena lala, ĵisi na la atol kiela nalaena

Mak 9:41

⁴⁰ A Yesu pisa, pisape “Visae yaru tai naĵa were amiu ava mĵana loyuĵna, nanene sa ga naĵa ĵere inu ke ga nepa mĵana loyuĵna ne. A visae yaru tai were inu neva mĵana loyuĵna, ana nanene sa ga naĵa pere ke ga naga naĵa naga mligan inu nepimi, pa ke mĵana loyuĵna. ⁴¹ Visae yaru tai were navisawalena tai pona yaru mesmesu tai ne sanene va mĵana loyuĵna, komin naga kilia ke sape yerkawa nene naga pe yaru wa nayuĵnaena kiena ne Ntewa, yoko naga kus ke ga nalaena torokin naĵa yoko Ntewa la va kiena yerkawa la nene. ⁴² A inu nevisa ruru van amiu sanini, visae yaru tai naga la piala na wii manini ve taaga va kiau nalogena tai, naĵa naga pe sitom re pisape nalogena nene naga pe yerkawa tai poli, pona yaru tai naĵa naga to ga tano, ĵisi na yaru nene la kiena nalaena tai komin suri wo nene naĵa naga kila pa kiau yeririna tai.”

11

¹ Ana pogos naĵa Yesu pisa ruru pa kiena nalogena la lualima taaga pa lua nene

ĵisi, naga mligan yo nene, ana naga pa e pulkumali nae Kalele lala, vena vian la a lologon van la.

Nalogena kiena ne Yoane Nakeena lala apimi

Luk 7:18-23

² E pogos nene, Yoane Nakeena sike e yuĵna nakoena, a naga mloge ke yuĵnaena la naĵa Kristo kila ke ne, ana naga mligan kiena nalogena laĵasia, ³ apanon apiun tan Yesu, apisape “? Sanape? ?Ko na yaru nanua apisa ke sumo asape ĵisi na yaru keviu tai imin vena ve kieta nasumonena, pona pe naga re nane ko poli, ana imimi na monar mesuĵate laa na wa, ĵisi na yaru nene imi?”

⁴ Ana Yesu pisataĵe la, pisape “Awasuĵe amiu sina, ava ke ga puna ne Yoane, a avisawal vania e suri la naĵa amiu apisuia naĵa nemiyuĵnaen ke e yo nini, a suri la naĵa apisayu inu ke pan amiu, sane suri la naĵa Navisawalena Aisea naga pisayu sumo rui, naĵa naga pisape:

⁵ *‘Kilamaraĵala lala, nana-gane akirava si rui,*

a yaru la naĵa ape lapele a ape laulu, nana-gane akilia amial po si narui,

a yaru la naĵa leperosi sike e yepela, nanagane yepela pimi mian ruru si narui,

*a yaru la naña ape kili-
gapoře, nanagane am-
loge si suri narui,*

*a yaru la naña amare, nana-
gane amal si rui,*

*a yaru la naña limala korena
ga, nanagane nemlolo-
gon ke Nalologena Wo
pan la rui.’ Ais 35:5,6*

⁶ “A amiu avano avisa
mëna va Yoane, avisave
‘Yaru naña pe kiena sitom-
ena pe pepe lua li re e inu
pogos tai poli, ãisi na navisa
ruruena sike e naga.’”

*Yesu pisayu Yoane Na-
keena*

Luk 7:24-30

⁷ Ana pogos naña nalo-
gena kiena ne Yoane Na-
keena lala amolue vena awa-
suře sina, Yesu pisayu Yoane
nene pa yaru la naña asike
ne, pisape “? Nanua sumo
na, pogos naña amiu apa
e yokorena nene, amiu na
apanon apisu ya? ! In
na pe nesitom re naña ne-
sape amiu apanon apisu kiai
na yokorena la naña lagi
miyuia ana kulkulul luen
ga poli! ⁸ A pe nesitom
re mëna ga nesape amiu
avanon vena avisu yerkawa
tai naña naga miyowau ruru
po poli, komin yaru la ne
sanene ana tařatete ase lele
viowa tai sane yokorena
nene, ana silaga asike ga e
pupia yuňa wo mëna ne
suře kerkeviu lala. ⁹ ?Per-
aga, ana in na nesitom ke ne-
sape amiu apanon ke vena
avisu navisawalena tai, ne?”

Ee, ana naga nene na poga
ga ne, ana inu nevisa van
amiu, yaru nene naña amiu
amoluen apa apisu naga,
naga to laa metava, taulu
navisawalena nasumo lala,
¹⁰ komin Ntewa naga pisayu
Yoane nene sumo rui e kiena
Visena Wa, naña naga pisape

*‘In na nemligan kiau nav-
isi pimi sumon ko,
vena kila ruru kioňa
mrapa.’ Mal 3:1*

¹¹ “Lelaga nevisa van amiu
sanini, e yomarava nini,
Yoane Nakeena naga to la
metavan yaru tařena la
punu ga. Ana yeririna la
punu ga naña ãisi na la ava
loyuňa e nasuřenena kiena
ne Ntewa, vano-o tol kiela
yaru naña su maro la garo
tano, la punu ga nene la apa
la metavan Yoane, naña la
awar kiela navisa ruruena
kiena ne Ntewa pa laa taulu
naga. ¹² A siar e pogos
naña Yoane Nakeena siar
mlologo, pimi tol nanagane,
yaru lala asuňa akawe
ke nasuřenena kiena ne
Ntewa, a nasinekar mārera
na kilaen mara lala la mëna
ga akilali naña atauluia.
¹³ Nanua sumo manene la,
pimi tol pogos kiena ne
Yoane, navisawalena lala,
a navisaluena naña Mosis
siria, ana la apisayu suri la
moki naña kilia kakate sirau.
¹⁴ A visae amiu akekarān
alelaga e suri la nene naña
ãisi na aňalivi sirau, ana
ãisi na amiu akilia avisu
kilale naña Yoane Nakeena

naga pe Elaisa nene, naña la apisaaria sumo rui apisape ñisi na naga monar wasuñe sina ga imi. ¹⁵ A visae kiligamiu toña ga, popon ayagogon ruru kiau visena la nene.”

Yesu pisi m̄arera pan kiena teras lala

Luk 7:31-35

¹⁶⁻¹⁹ A Yesu pisi pa laa sane, pisa pisape “?Ana ñisi na nevisawal visena ya naña kilia tol ñelaga kiena ne yeririna na nanagane lala? E lepas punu ga naña Ntewa naga kila vena kilali wo van amiu, ana amiu yepemiu mavin ga, amiu apisa kare ga naga vanonia. Komin pogos naña Yoane naga pimi sike ga wa, ana monsilu ga pe kinana re poli vena len, a naga palia m̄ena ga kuruta na munena, pe mun re poli, ana yaru la apisu naga sanene, la apismumun naga, apisape ‘Yaru nene yermare pa e naga.’ A pogos naña Narina ne Yeririna naga pimi sike na, naga kinana ruru ga a mun ruru ga, sa ke ga yaru tañena lala, ana yaru la apismumun naga, apisa apisape ‘Opisu ke ne, yaru nene naga pe yaru na kinan merorolen pañisi, a pe yaru na munena m̄ena kuruta na munena pañisi, a naña naga kiena erau lala na, la ape yaru nawarpoloen ga takis, a ape yaru viowa ga lala.’

“Komin suri ne nanene narui, inu nepisu amiu yeririna na nanagane lala naña amiu na sa ga sisi lala

naña visae asuñña akirakirai e yometava na kumali, ñisi na la asuñña aviovion va kiela erau lala, avisave ‘!E, amiu na apiowa nene! Visae imimi mesuñña mowe plañe, ana amiu ve awol re amio imimi, a visae imimi meyaun yauena na marena, ana amiu ve atagi re amio imimi.’

“Ana suri punu ga naña la amolmolue e namanmaruaena kiena ne Ntewa, sumonia yaru la mokliu naña apisu sane piowa ga, ana siraunia ñisi na Ntewa naga kila imi merarava sane kiena manmaruaena nene naga mesmesu a naga pe lelaga ruru nenaga.”

Yesu pisaar ruru pa la naña pe amlelaga re e naga poli

Luk 10:13-15

²⁰ Ana Yesu pisaar ruru pa yeririna lala na pulkumali la punu ga naña naga kila kile la moki pan la, komin naña apisu kiena suri la nene rui, ana pe apilon la re poli. ²¹ Naga pisa pisape “Yaru nae Korasin lala, amio yaru nae Petsaeta lala, amiu na akila kare amiu keviu pañisi wa! Visae le Taea amio le Saeton la nanua sumo, ana la avisuli ga kile la naña amiu apisu ñisi rui, pona avilopu la nanua sumo yo rui. La pe ape le Yu re poli, ana ñisi na vera na ayen ñililis nen karo, a pona la akuwani posnoyavi e ñarila yo rui, vena yaru la avisu

kilale sane amloge kemua piowa lelaga vanon kiela mla-mulena piowa lala. ²² Inu nevisa mesmesun van amiu, e legiena na liṽereena, ṽisi na kiamiu nakoena naṽa van amiu taulu naṽa van la nene. ²³ !Ana amiu le Kapeneam lala, naṽa amiu asumã aṽarwar amiu, a naṽa sinemiun asape amiu ato manene metava, ana amiu avisuar amiu! ṽisi na Ntewa koven plan amiu ato tano, ato tano vaṽisi e pulukapi. Visae le Sotom lala la avisuli ga kile la nene naṽa amiu apisuia, vera na la apilopu la rui, a vera na pupia kapi nae ma e peni nene taṽatete kekan kiela yo nene kovio. Ana amiu apisu pa kile la nene rui, amiu pe apilopu amiu re nena poli, ²⁴ nane nevisa van amiu, e legiena na liṽereena, ṽisi na Ntewa naga sinena ye la manenea taulu amiu.”

*Yesu pisa potena pa Ari-
mana*

Luk 10:21-22

²⁵ Ana e pogos nene, Yesu mlen, pisa pisape “!Ata-o, ko ope Suṽe nae ma e peni a Suṽe nae yomarava nini! Nevisa potena van ko, Ata, vanon naṽa ko opian suri la naṽa e inu pan la naṽa kiela sitomena sa ga nisisi lala, ana yaru la naṽa asitom asape ape manmarua a la naṽa asitom asape akilia ruru suria, ko okilawan suri la nene van la. ²⁶ Lelaga,

Ata, nanene ve sa ga naṽa ko sinomãnia.”

²⁷ Ana Yesu pisa m̃ena ga, pisape “Arimau naga mli-gan make suri la punu ga e lumãu ṽisi rui. A Arimau naga taaga naga kilia ruru inu, a inu naṽa nepe narina, in ga taaga ga nek-ilia ruru naga. Inu nemio la naṽa nemligan la vena nekilogia Arimau van la vena awasinea, ana imimi ga nene mekilia ruru naga naṽa naga pe Arimamimi.”

*“Amiu aimi pun inu vena
ava ruru amiu”*

²⁸ Ana Yesu pisa m̃ena ga, pisape “Amiu punu ga naṽa amiu sinemiu mare paṽisi vanon naṽa amiu asumã aṽar ke suri urmi lala e kiamiu malena lala, amiu aimi, amiu aimi pun inu, vena nekilia nekila amiu ava ruru amiu. ²⁹ Amiu alarar kiau visena lala ve sa naṽa ṽeligas tai e kiamiu malena, a amiu alarar kiau ṽelaga lala, vanon naṽa inu na nepe yaru moṽau tai, a kiau sitomena to ga tano. Sanene, ṽisi na amiu alual naṽa kiamiu sitomena lala varuruia, ³⁰ vanon naṽa kiau vianena lala ameme ga a amelala ga, a suri la naṽa ṽisi na inu nowar van amiu vena amiu awaria, ṽisi na naga taṽatete urmi manene van amiu.”

12

*Yesu naga pe suḡen
Legiena Wa*

Mak 2:23-28; Luk 6:1-5

¹ Ana e legiena taḡena si tai, naḡa naga pe Legiena Wa, Yesu amio kiena nalogena lala amial apano, ana kiela mrapa pa ga likan lokove na wit lala. Amial ke sanene, ana kiena nalogena lala viso kar la, ana apeve plan mras nen wit laḡasia vena akania. ² Asiar akila ke sanene, ana Varasi la ḡasia asike e yo nene, ana apisula mḡaga, ana la apisi pa Yesu, asape “!Ei, opisu ke ne! Kioḡa nalogena lala la asumḡa aḡar ke kinanena e lokove sanene, la asumḡa amiyumḡae ke e Legiena Wa ne, a visae ve sanene, la asu mḡa akilaro ke kieta navisaluaena ne.”

³ Ana Yesu pisataḡe la, pisape “?Ana, sanene yo, pona amiu pe apuloli re Tusi Wa pogos tai poli yo, e suri la naḡa Parin Suḡe Tepet naga kila sumo? Naga amio kiena yeririna lala viso kar la paḡisi, ⁴ ana naga pa loyumḡa e silparpara wa mḡana Ntewa, ana naga mla kilaparavi wa nene naḡa Navisaluaena pisape yaru wa ga lala, la akilia akania, ana Tepet mḡena ga la akania. ⁵ ?Pona amiu na pe apulo re mḡena Navisaluaena kiena ne Mosis poli yo, naḡa e Legiena Wa punu ga, yaru wa lala, la monar ava loyumḡa e Yumḡa Wa

mḡana Ntewa vena akila kiela yumḡaena la ea? Sanene na, la akilaro ke Navisaluaena naḡa pisaluḡar ke sape yaru ve yumḡae re e Legiena Wa ne, ana Ntewa naga pisu suri nene ana pe sitom re pisape suri viowa tai nene poli. ⁶ Inu nevisa van amiu, nesape nasuḡenena viu tai sike nanagane, naḡa naga to laa metava taulu navisaluaena na Yumḡa Wa mḡana ne Ntewa, ⁷ ana naga sa naḡa e Tusi Wa, Ntewa pisa pisape ‘*Inu na pe sineun re kiamiu kuḡaḡaena la poli, ana in na sineun ga ḡelaga na sineyena.*’ Ose 6:6

?Pona amiu na amninue ke kinas nen visena nene wa? Visae amiu akilia, a ḡisi na amiu taḡatete asumḡa aliḡere kare kiau nalogena la nene naḡa pe akila re ḡelaga viowa tai poli. ⁸ Narina ne Yeririna, naga ke naḡa pe suḡen Legiena Wa narui.”

*Yesu miyumḡaen ruru li-
mana yaru tai*

Mak 3:1-6; Luk 6:6-11

⁹ Ana Yesu molue e yo nene, mial pano, ana pa loyumḡa e kiela yumḡa na lotuena tai. ¹⁰ E yo nene, yaru tai sike ea ana naga limana ve tokak, a pe lima mare, ana yaru mḡena ga laḡasia naḡa asumḡa ga sinelan asape alual li suri laḡasia naḡa Yesu naga kila na pe mesmesu re poli yo. Ana yaru la nene apiun tan Yesu, asape “?Sanape, kieta navisaluaena pisaluḡar

yumãena na kilaruruen tas nen yaru e Legiena Wa, pona pe pisaluþar re poli? !Ovisali suri nene!”

¹¹ Ana Yesu pisatañea, pisape “Visae yaru tai kiena sipsip ve taaga ga, ana e Legiena Wa tai, kiena sipsip nene va loru vitove e þilipiþili tai, amiu asitom asape þisi na yaru nene taþatete va werelua sina? !Ee, þisi na ita punu ga monar tekila sanene va kieta suri mali lala! ¹² Ana visae mesmesu ga ve sanene e kieta navisaluena vena teilla kieta sipsip tai sanene e Legiena Wa, ana sanene ita tekilia tekila mña ga yumãena naiilaen yaru taþena e Legiena Wa, komin yaru naga po taulu sipsip.”

¹³ Ana Yesu pisa pa yaru naþa limana mare, pisape “Okian mesmesun lumõña.” Ana yaru naþa kila sane Yesu pisa, kian mesmesun limana, ana limana pimi po sina, sa ke ga limana komþas. ¹⁴ Ana Varasi la naþa asike e pogos nene apielue, ana amolue apa vanua, vena avisayu sanape naþa akilia awemãar Yesu mare.

Yesu naga pe yaru nayumãena kiena ne Ntewa

¹⁵ Ana Yesu kilia mña naþa Varasi lala asape awe naga, ana naga molue e yo nene, amio yeririna la moki naþa atavevea. Ana naga sumña kila ruru ke namaiena lala, ¹⁶ ana naga pisi mñarera pan

la, naga pisaluþar la pisape la ve avisayu re naga va yaru taþena lala. ¹⁷ Naga kila sanene vena visena kiena ne Ntewa tai vim ve lelaga, naþa Navisawalena Aisea pisawal sumo rui, a visena nene pisa sanini, pisape

¹⁸ *“Nanene yaru naþa naga miyumãae kiau, naþa in na nemligan lua naga.*

In na nesitom naga paþisi, a kiau sitomena kekaran naga paþisi.

Pisi na inu neligan Ninuu van naga, vena naga visawal þelaga mesmesu lala va yolai lala na yomarava nini.

¹⁹ *Pisi na naga taþatete visin sinekar van yaru, pona visi molmolue va þisi, a naga taþatete koven visena ve moki e yo metava.*

²⁰ *Ana naga taþatete telua kiai naþa poroli þisi rui, a naga taþatete vilonmãar kapi vivaga naþa lavis mare rui.*

Naga þisi na yumãae mña sanene vano vano-o, tol naþa þelaga mesmesu sumãalu mñarera taulu nena þelaga viowa.

²¹ *Ana þisi na yolai lala na yomarava nini, la alelaga mñarera e naga, avisave þisi na naga tamalia la.” Ais 42:1-4*

Apisa apisape Yesu myuñae e nañareraena kiena ne Yermare

Mak 3:20-30; Luk 11:14-23, 12:10

²² Ana yaru lala asumon yaru tai naña yermare pa e naga pimi puna Yesu. Yermare nene kila naga pe kilamara p̄ala, a pe puru m̄ena ga, ana Yesu kila ruru si kilamarana amio pulgona apimi apo sina. ²³ Ana yeririna la naña apisu suri nene amilania, a sinela kurkuru pañisi, ana apiun ke sina ga tan la, apisape “!E! ?Yaru nene naga narina ne Tepet naña tesuñate ke yo, pona peraga?”

²⁴ Ana pogos naña Varasi lala amloge visena kiena ne yeririna la nene, ana apielue pañisi, naña apisape “Yaru nene m̄ene plan yermare lala e ga e nañareraena kiena ne suñe kiena yermare lala, naña Pielsipel, naga tañan pania.”

²⁵ Ana Yesu mlogekilale m̄a kiela sitomena nene, ana naga pisa pan la, pisape “Visae suñe tai, kiena yeririna lala aliñerela, naña lañasia akawe si visena kiena ne lala komñasia, p̄isi na suñe nene kiena yuñae lala monar loloru ga vito sike na; a visae pulkumali tai pona mratava tai, kiela yeririna lala aliñerela, naña sane lañasia sinelan asape am̄ene plan si lañasia, p̄isi na yeririna la

nene tañatete asu ruru pogos tai. ²⁶ ?A sa m̄ena ga nini, visae yermare lala kiena ne Yermare Lego, lañasia am̄ene plan ke sina ga lala p̄asia, nanene na kana kinasia sane amliñere la p̄isi narui, ana nasuñenena kiena ne Yermare Lego naga yoko suñalu ve sanape ne? ²⁷ !Ana amiu na apisa ke asape sanene narui, asape in na nesuñā nem̄ene plan ke yermare tañena lala e nañareraena kiena ne pupia yermare naña Pelsepel, ana pe sa re nena nene poli! Ana visae ve sa naña amiu apisa, sanape na amiu m̄ena lañasia naña am̄ene plan ke yermare lala? ?Ane mla nañareraena nene pan la, pona Yermare Lego m̄ena yo? A popon visae kiamiu nalogena la naña am̄ene plan ke yermare lala, la alogeveveruruli kiamiu visena la nene. ²⁸ Ana peraga, amiu apisa suri nene na pe mesmesu re poli. Inu na nem̄ene plan ke ga yermare lala e nañareraena kiena ne Ninuna Ntewa, ana suri nene na sane nasuñenena kiena ne Ntewa sike likan amiu p̄isi rui.

²⁹ “!Amiu na apisu ke ne! Visae yaru tai sinenan ke pisape va loyūñā m̄ana ne yaru m̄arera tai, vena vin-aun kiena suria, naga monar war kilika viar ke ne yaru nene sumo wa, p̄isi na naga kilia va loyūñā ana war plan make kiena suria. Ana in

na nekila ke sanene pa yaru m̄arera nene naṣa Yermare Lego.

³⁰ “Yaru naṣa pe taveve inu re poli, naga suwo inu ke ne, a yaru naṣa pe miyuṁae re amio inu poli vena moure kiau yeririna lala aimi lele taaga, naga sane suṁa m̄enetetain la ke ne. ³¹⁻³² Ana sanene narui, in na nevisa van amiu, mlamulena viowa lala, a visena viowa lala, a visena naṣa kila kare Narina ne Yeririna, Ntewa naga kilia viewo yaru vanonia, ana yaru naṣa pisayu kare Ninuna Wa, naṣa pisa pisape kiena yuṁaena naga Yermare Lego ga miyuṁaenia, yaru na sanene, Ntewa taṣatete viewo naga pogos tai, e pogos na tesike e ne, a e pogos naṣa pimi ke sirau.”

Purlaki amio kana mrasnena

Luk 6:43-45

³³ A Yesu pisa ṁena ga, pisape “Ita tekilia tevisu kilale purlaki lala e mrasnela naṣa aṣaria. Purlaki naṣa kapuru po, naga mrasa ṁena ga po, ana purlaki naṣa piowa ga, ṣar ṁena ga mrasa naṣa piowa ga. ³⁴ A malena kiena ne yeririna naga sa ke ṁena ga nene, naṣa e losinena naga sane pe purṣes tai, a visena la naṣa amolmolue e kiena malena, la sane mras la naṣa amolmolue ke e purṣes nene. ?A

inu nepisu kiamiu purṣesia menunū ṣisi rui, ana sanape naṣa yoko mras wo laṣasia kilia molue kome kiamiu visena lala? !Amiu na ape lus kiena ne lom̄ara kemua lelaga narui! ³⁵ Yaru naṣa po, ṣarpolo suri wo lala sike e losinena, ana silaga naga kiena sitomena wo tom̄a ga naṣa kilia lalua va yaru. Ana yaru viowa, naga suṁa ṣarpolo suri viowa lala sike e losinena, ana naga taṣatete kilia lalua kiena sitomena wo tai pogos tai.

³⁶ “Inu sineun nesape amiu akilia naṣa e legiena na liṣereena, ana yaru la punu ga monar akila navisawalena tai vanon kiela visena viowa la veve taaga naṣa apisa e kiela malena lala, ³⁷ vanon naṣa ṣisi na Ntewa naga liṣere kioṁa malena e ga e kioṁa visena lala. Nanene, vanon naṣa kioṁa visena lala akilia akila ko vena omal, pona akila ko vena owar nakoena.”

Yerkawa laṣasia la sinelan asape avisu kile

Mak 8:11-12; Luk 11:29-32

³⁸ Ana navianena na navisaluaena laṣasia, amio Varasi laṣasia, apisa pa Yesu, apisape “!Ei, ko naṣa apio ko ke asape Navianena, imimi sinemimin mesape okila kile tai van imimi vena imimi mevisu kioṁa nam̄areraena.”

39 Ana Yesu pisatamē la, pisape “Yaru la naḡa sinelan ga asape avisu kile la sanene, la ape yaru viowa la paḡisi, akila ke wowe pa Ntewa sane la naḡa akila ke kolau. Peraga, ḡisi na taḡatete amiu avisu kile tai, ana kile naḡa kiena ne Navisawalena Sona sumo, naga ga nene na akilia ayisua. 40 Sona nene meke e lomēḡen pupia ika lesumsum nene pano-o tol legiena telu a lemalo telu, ana ḡisi na ve sa ke mēna ga nene e Narina ne Yeririna, naḡa ḡisi na naga meke e los nen porotano vano-o tol legiena ve telu a lemalo ve telu. 41 Ana la nae Ninive nanua sumo amloge visena kiena ne Sona narui, ana apilopu la, a e legiena na liḡereena, ḡisi na la nene asuḡalu avisa lologia kiamiu naviowaena lala, komin naḡa yaru tai naḡa naga to laa metavan Sona naga sike amio amiu nanagane, ana amiu na pe apilopu amiu re nenaga.

42 “Nanua mēna ga sumo, ana sira kawa tai naga pe ḡarin suḡe tai, naḡa naga mligan kiena purvanua naḡa sike koperina paḡisi, ana pitomi tano vena loge visena namanmaruaena kiena ne Parin Suḡe Solomon. Ana sira kawa mēna ga nene ḡisi na sumalu e legiena naliḡereena, naga visa lologia kiamiu naviowaena lala, komin naḡa yaru tai naga pe

manmarua to laa metavan Solomon sane, naga sike amio amiu nanagane, ana amiu na pe sinemiun re nenaga.”

Ninuna viowa naga kilia wasuḡe sina

Luk 11:24-26

43 Ana Yesu pisa mēna ga, pisapenua “Pogos tai, pogos naḡa visae aḡenelua yermare e yaru tai, yermare nene kilia va yomaru vena kaleli yo tai naḡa va se ea vena ve mēna uḡa. Ana visae ve lual re, 44 ḡisi na naga visavenua, ‘A, ḡisi na nevito li si e mēau uḡa marua na sumo wa.’ Ana pogos naḡa naga wasuḡe vitomi, ḡisi na naga vitomi wal yuḡa naḡa mon korena ga, ana merarava po paḡisi, a akila ruru make suri la e yuḡa naḡa ḡisi rui. 45 Ana naga kilia wasuḡe sina va were si yermare taḡena lala ve olua, naḡa la apiowa manene la taulu naga sane, atomi amio naga, ana akilia ava si asike e los nen yaru nene. Ana yaru nene, nanua sumo kiena malena piowa, ana siraunia kiena malena viowa la sane. A ḡisi na ve sa ke mēna ga nene e malena kiena ne yaru viowa nanagane lala.”

Yesu, anena amio wenla lala

Mak 3:31-35; Luk 8:19-21

46 Pogos naḡa Yesu pisi ke amio yaru la nene wa, ana anena amio wenla lala apimi aporu e yo nene, asuḡalu asuḡa ga vanua, la sinelan

asape avis amio Yesu. ⁴⁷ Ana yaru la tai nene pisa pa Yesu, pisape “Ei, anomā amio womla lala asuñalu asike vanua, la sinelan asape avis re amio ko wa.”

⁴⁸ Ana Yesu pisatamea, pisape “?Ana ane pe aneu, a ane pe wolai lala?” ⁴⁹ Ana naga kiar kiena nalogena lala, pisapenua “?Apisu ke yaru la ne asike ne? Aneu a wolai lala, yaru ne la nane asike ne. ⁵⁰ Komin visae yaru naña kila ke ya naña Ata nae ma e peni naga sinenania, yaru na sanene naga pe wolai, a pe vineu, a pe aneu.”

13

Pakaiwa na kurus nen wit la naña akekapil apa e porotano la naña ape tañena la vari

Mak 4:1-9; Luk 8:4-8

¹ E ke e legiena nene, Yesu molue umā, pito totano e yepas nen pupia lapa nene vena vian yeririna lala.

² Ana yeririna la moki pañisi apitomi puna e pogos nene narui, ana kila naga ñiyu pa to meta e waa tai, ana yeririna la punu ga yo pule ga asike ura, ³ ana naga pian suri moki pan la e ga e ñakaiwa lala.

Ana naga pisa pan la, pisape “Yaru tai pa peven kurusa e kana lokove. ⁴ Pogos naña naga sumā sisilin ke kurus la nene, ana kurus lañasia kekapil pa e mrapa, ana siraunia manu lala apimi ate plan make ga.

⁵ Ana kurus lañasia akekapili pa e naña kilavaru mēke tano, ana pe porotano po re teke meta poli. Ana akakapur vilaga, vanon porotano meninivi ga. ⁶ Ana pogos naña mrae pa mārera, kekan kurus nen suri la naña pitotovi memeu veraga, vanon ñeligas lala pe pito ruru re tano poli wa. ⁷ Ana kurus lañasia akekapili apa e naña sumo pe ate plan ruru re kilika viowa la e poli, ana ñisi na kilika viowa naña pitovi pimi keviu sina, ana piwo kare kurus nen suri la naña pitotovi ne ana amarmare.

⁸ A kurus tañena si lañasia akekapil apa e porotano tai naña po, ana akapuru po, ana añar mrasnela, naña lañas añar mras tol ponotia taaga, lañasia añar mras tol lualima orai, a lañasia lualima telu.”

⁹ Ana Yesu pisa, pisape “Yaru naña kiligana teke ea naga monar yagogon ruru visena nene.”

?Vanon ya ne Yesu pis e ñakaiwa lala?

Mak 4:10-12; Luk 8:9-10

¹⁰ Ana siraunia, nalogena lala apimi puna ne Yesu apiunia, asape “?Vanon ya ne ko osumā opian ke yeririna lala e ñakaiwa la sanene?”

¹¹ Ana Yesu pisatamea, pisape “Ntewa naga kila ke sape ñisi na amiu akilia alual nakilia wanena kiena ne kiena nasupenena, ana naga tañatete la kiliaena ne va yeririna tañena la nene.

¹² Nevisa sanini van amiu, visae yaru naña kiena suri moki rui, ñisi na war va la sane vena ve moki va ñisi, a yaru naña pe kiena suri re poli, ñisi na naga kilalu narin suri ya naña naga kiena. ¹³ Sanene, nepian la e ñakaiwa lala, vanon naña la asumã apisuia, ana apisu kilale ñele ga, ana asumã amloge, ana amloge kilale ñele ga. ¹⁴ Yaru suri la ne sanene, akila narui ana Ntewa pisayu la nanua sumo rui e visena lelaga naña Navisawalena Aisea pisawal sumo, naña pisa pisape

'Ana ñisi na amiu aloge vano-o, ana tañatete alogek-ilale pogos tai.

A ñisi na amiu avisu vano-o, ana tañatete avisu kilale pogos tai,

¹⁵ *vanon naña amiu na sane yaru la naña kiela sitomena la amarmare ñisi rui, sa naña añiwo pulkiligala, a sane añelawa rui.*

Visae ve akila re sanene, pona vera na akilia avisu kilale suria, a vera na akilia alogek-ilale suria, a vera na kiela sitomena akilia asitomkilale suria, ana sanene, akilia avilopu la aimi pun inu vena nekila ruru la.' Ais 6:9,10

¹⁶ "Ana nevisa van amiu, kiau nalogena lala, navisa rurueña sike e amiu komin naña kilamaramiu la asumã

apisu ke suri la naña amiu apisuia, a kiligamiu la amloge mña suri la naña nesumã nepian amiu ke ea. ¹⁷ Inu nevisa van amiu, navisawalena la moki amio yeririna kiena ne Ntewa lala la moki liu nanua sumo, naña sinelan manene pañisi naña asape avisu suri la naña amiu apisu ke nanagane, ana pe apisu re poli, a la akilayon manene naña aloge suri la naña amiu amloge ke nanagane, ana pe amloge re nenaga."

Yesu pisawal kinas nen ñakaiwa na kurus nen wit

Mak 4:13-20; Luk 8:11-15

¹⁸ Ana Yesu pisa pan la, pisape "Amiu, ayagogo ruruia, ñisi na nevisayu kinas nen ñakaiwa nene, naña naga pisayu yaru nene naña pa peven kurusa e kana lokove.

¹⁹ "Suri nasumo, naga kurus la naña kekapili e mrapa, naga sa naña yaru la ne amloge nalologena wo nasuñenena nene ana pe amloge kilale re poli. Kurus wo lala kekapil e kiela sitomena lala, ana yaru viowa nene naña Yermare, naga pimi ñar plan ke sina ga nalologena wo nene e losinela.

²⁰ "Tañena, naga nene na kurus la naña kekapili e yo naña kilavaru mñeke tano, a naga sa naña yaru la ne amloge lologena wo nene, ana akekaran veraga, ²¹ ana sa naña ñeligasa pe po re poli.

Akilia asu ve plas ga, a visae pogos m̃arera tai, pona yaru la a m̃ene la vanon na p̃a la amlelaga e visena kiena ne Ntewa, p̃isi na la aloru ke veraga.

²² “Ta p̃ena m̃ena ga, naga na kurus la na p̃a kekapil e yo na p̃a kilika viowa sike ea, ana naga na sa na p̃a yaru la ne amloge lologena wo nene, ana la asitom manene la kiela malena lala, a sinelan manene la suri na yomarava nini. Pelaga la nene apimi sane kilika viowa, ana la apiwo kare nalologena wo nene vena ve war re si mrasa e kiela malena.

²³ “Ana na maro, naga na kurus la na p̃a kekapili e porotano na p̃a po, naga na sa na p̃a yaru la amiyagogo ruru e lologena wo nene, ana amloge kilale ruru po, ana a p̃ar mras nen nalologena nene e kiela malena lala, na p̃a sane la p̃asia a p̃ar lualima telu, la p̃asia a p̃ar sane lualima orai, a la p̃asia a p̃ar moki sane mrasa tol ponotia taaga.”

Pakaiwa na vilum̃ini viowa amio kurus nen wit lalua akapuru lele taaga

²⁴ Ana Yesu pisa sina ga p̃akaiwa ta p̃ena tai pan la, pisape “Pelaga na p̃a Ntewa p̃ere yaru lala apimi loyuma e nasu p̃enena kiena naga sanini. Yerkawa tai na p̃a naga pa peven kurus nen wit la na p̃a po e kana lokove, ²⁵ ana pogos na p̃a yaru lala amomalio ke kole-malo, kiena nasinekar tai

naga pimi, mapila kurus nen vilum̃ini viowa tai e lokove nene p̃isi, ana pure pano. ²⁶ Ana suri la lua nene apitotovi, ana lalua maran taaga ga, ana pogos na p̃a wit lala asiar na p̃a awar mrasa, ana yerkawa nene, kiena yaru na yumaena lala apisu kilalea sane vilum̃ini viowa m̃ena ga kapuru ke amio wit nene. ²⁷ Ana la apimi puna, apiun tania, asape “? Yerkawa, sanape? Kurus la na p̃a tepeven e kom̃a lokove, ana kurus wo ga lala. ?Ana vilum̃ini viowa nene pimi sanape?”

²⁸ “Ana naga pisa pan la, pisape ‘Peraga, nene na kiau nasinekar tai ne kila suri sanene.’

“Ana kiena yaru na yumaena lala apiun ke sina ga tania, asape ‘? Poga ga, ana sanape, sinom̃an osape imimi meva moure plan vilum̃ini viowa la nene?’ ²⁹ Ana naga pisalup̃aria, pisape ‘Toko, aligan suwa wa. Visae amiu ava aure plan vilum̃ini viowa la nene, pona visae akila palia sa aure plan lae m̃ena ga amio wit la nene veraga. ³⁰ Lalua akilia akakapuru ma veraga vano-o tol pogos na warden kinas nen wit imi. E ke e pogos nene, p̃isi na nekilia nevisa va yaru la na p̃a ava awar wit, vena ava ate ke ne vilum̃ini viowa nene sumo wa, aviaria e p̃egasia akoven va e kapi. Siraunia, la akilia ava ate wit lala vena awar vitomi uma.’”

Pakaiwa na kurus nen mras nen purpa

Mak 4:30-32; Luk 13:18-19

³¹ Ana Yesu pisawal *ḗ*pakaiwa taḗena tai pan la, pisape “Nasuḗenena nae ma e peni naga sane kurus nen mras nen purpa tai naḗa pito pelan te laki tai. ³² Kurus nene na ve tokak na ve tokak paḗisi, ana pogos naḗa kapuru pano-o, ana pimi pe purlaki tai naḗa keviu taulu make purlaki taḗena lala, ana manu lala akila n̄ala ponovi lala e kana korowas lala.”

Pakaiwa na is
Luk 13:20-21

³³ A Yesu pisawal sina *ḗ*pakaiwa taḗena tai pan la, pisape “Nasuḗenena kiena ne Ntewa, naga sa naḗa sira tai ḗalelar narin is amio puluyavi na kilaparavi e pupia pialora tai, ana narin is nene kilia kila kilaparavi la nene punu ga mlapa.”

Yesu pisi pan la e ga e ḗpakaiwa lala

Mak 4:33-34

³⁴ E visena kiena ne Yesu la nene, naga pisawal suri la ne sanene pa yaru lala, a silaga naga pisi pan la e ga e *ḗ*pakaiwa lala. ³⁵ Sanene, naga kila visena kiena ne navisawalena nanua sumo imi ve lelaga, naḗa Ntewa pisa, pisape

“Pisi na inu nevisawal kiau visena lala e ga e ḗpakaiwa,

ḗpisi na nevisawal suri la naḗa tapolou su nakonua rui, asike ga perina

wa, siar e pogos na siien yomerava nini, pimi tol nanagane.”
Yauena 78:2

Yesu pisawal kinas nen ḗpakaiwa na vilum̄ini viowa

³⁶ Ana Yesu mligan ḗina lala, pa loyuma, ana kiena nalogena lala apimi puna, apiunia apisape “?Yesu, imimi sinemimi mesape ovisawal van imimi ya ne kinas nen *ḗ*pakaiwa na vilum̄ini viowa naḗa kapuru ke e lokove na wit nene?”

³⁷ Ana Yesu pisataḗe la, pisape “Yerkawa naḗa peven ke kurus wo lala, nane Narina ne Yeririna nene. ³⁸ A kana lokove nene, nane yomarava nini. A kurus wo la nene, nane yeririna la naḗa asike loyuma e nasuḗenena kiena ne Ntewa nene. A vilum̄ini viowa la nene, nane yeririna kiena ne Yermare la nene. ³⁹ A nasinekar nene naḗa pa peven kurus nen vilum̄ini viowa nene, nane Yermare na ga. A pogos nawarpoloen kinas nen wit la nene imi, nane luas nen pog nini. A yaru na yumaena la nene naḗa avanon ate wit awarpuloia, nane navisi lala. ⁴⁰ A yumaena nene na warpiloena vilum̄ini viowa la nene vena asikapila, nane ḗelaga ke sina ga nene naḗa ḗisi na imi e pogos maro, ⁴¹ naḗa Narina ne Yeririna, naga ligam̄ kiena navisi lala vena avano awar plan suri la naḗa kila yaru lala amloru e mlamulena viowa, amio

yaru la natañaen mlamu-
lena viowa, vena ve asu re
si veraga amio yaru la na-
suñenena kiena. ⁴² Pisi na
navisi lala akoven la ava
e pupia kapi, e yo naña
yaru lala asumã ga atagi, a
asumã ga akar ke maluela
ea. ⁴³ Ana siraunia, yaru
mesmesu lala pisi na atego
ve sa mrae, loyuma e na-
suñenena kiena ne Arimala.
A yaru naña kiligana teke e
naga monar yagogo ruru e
visena nene.”

*Pakaiwa na pupia
kilavaru wo tai natauluen
kilavaru*

⁴⁴ A Yesu pisape “Pelaga
kiena ne yaru naña sine-
nan sape va loyuma e na-
suñenena kiena ne Ntewa,
sane pakaiwa nini: yaru
tai pa pisu kinakinas nen
porotano tai, ana naga milan
pupia kilavaru wo tai naña
monyoyou ga meke ea.
Ana naga sinwan rurulein
kilavaru nañani, ana naga
pitove piliwilin plan make
kiena suri lala punu ga, vena
kilia vam ul lua kinakinas
nen porotano nene, vanon
naña mloge po manene la
pañisi e suri wo naña m̃alia.”

*Pakaiwa na kilavaru
yuwowo naña teke e
mratamelilivi*

⁴⁵ A Yesu pisa m̃ena ga,
pisape “A sa ke sina ga nini,
pelaga kiena ne yaru naña
sinenan pisape va loyuma e
nasuñenena kiena ne Ntewa,
sa ke m̃ena ga nini: yaru tai
naña naga pul ke kilavaru
yuwowo la naña po tan yaru

lala, naña sike loyuma e
mratamelilivi. ⁴⁶ Ana pogos
tai naga m̃al tai naña po na
po, pisa pisape “!Lelaga pa,
in na sineun suri nene pañisi
wa! Visae in na nokus ga ve
kiau ga rui vera wo wa. Yoko
in na neto nowilwilin plan
make kiau suri tañena lala,
vena nevam nowul lua suri
wo nini.”

Pakaiwa na lilivi

⁴⁷ Ana Yesu pisa ke sina ga,
pisape “A naga ke sina ga,
pelaga kiena ne Ntewa naw-
ereen yaru lala ava loyuma
e kiena nasuñenena, naga sa
m̃ena ga nini, naña pogos na
yaru la apane lilivi e lapa,
la akilia asuwoia ana aure
ika la naña veve tañena ve
moki vañisi ea. ⁴⁸ Ana pogos
naña lilivi pule ruru po, ana
yaru lala apane lua pa ura
e yomema, ana atapurpurga
atotano, amlipere ika lala.
Ana ika la naña po, akon
apito e kiela karo lala, a ika
la ne piowa, ana akuwani
pano. ⁴⁹ Pisi na ve sa
nene e luas nen pogos nini,
naña pisi na navisi lala ava
alipere yaru lala, awere plan
yeririna viowa lala, ⁵⁰ vena
akoven la ava e pupia kapi
nene, naña yaru lala asumã
ga atagi, a asumã ga akar ke
maluela ea.”

*Pakaiwa na suri marua
amio suri viu*

⁵¹ Ana Yesu piun tan kiena
nalogena lala, pisape “?Amiu
amloge kilale ke visena la
nene?”

Ana lala apisatam̃ea, asape “Ee, pona mekilia m̃a yo.”

⁵² Ana naga pisa pan la, pisape “Suri la nene naga sane yaru tai naṣa sumo, naga pe navianena tai e navisaluaena lala na Visena Wa kiena ne Ntewa, ana sirau-
nia, naga pimi sane kiau nalogena tai e nasuṣenena kiena ne Ntewa. Yaru na sanene naga sane yerkawa tai naṣa kiena suri wo na yuṃaena lala moki e m̃ana yuṃa. Ana silaga naga kilia lalua kiena suri marua naṣa po ke ga wa, akilia m̃ena ga lalua kiena suri viu, vena kila kiena yuṃaena amio la.”

Le Nasaret lala pe sinelan re Yesu poli

Mak 6:1-6; Luk 4:16-30

⁵³ Ana pogos naṣa Yesu pisawal ṣakaiwa la nene ṣisi, naga molue e yo nene, ⁵⁴ ṣasuṣe sina ga pimi kiena. Ana naga sum̃a pian ke yaru lala nae yo nene, loyuṃa e kiela yuṃa na leniena, a la sinela kurkurun kiena visena la pano paṣisi. Ana la asum̃a apisavisa ke pan la, apisape “!Aulai! ?Yaru nene tol nakiliaena na sanene sanape, a naga kila ke kile la nene sanape? ⁵⁵ Ita tekilia ke yaru nene rui. Naga arimana, yaru na yuṃaenen ga yuṃa, naṣa Yosop, a anena naga naṣa Maria. A wenla lala yaru la nene, Semes, a Yosop, a Saemon, a Sutas, naga pe wenla la nene. ⁵⁶ A

vinena lala, la ga nene naṣa asike ga amio ita ne. ? Ana yaru nene naga molue pun ita pa ṣar suri la nene pe?” ⁵⁷ Ana sinela karia, pe sinelan re nena naga.

Ana Yesu pisa pan la, pisape “Yaru naṣa pe navisawalena, yaru taṣena lala akilia avatanon naga, ana yaru na m̃ana mratava lala, amio yaru na kiena yo lala, la ga nene na taṣatete avatanon naga.” ⁵⁸ Ana e yo nene, naga pe kila re kile la moki e poli, vanon naṣa pe amlelaga re e naga poli.

14

Parin Suṣe Erot Antiṣas pisayu Yesu

Mak 6:14-16; Luk 9:7-9

¹ E pogos nene, apisayu Yesu pa tol Suṣe Erot, naṣa naga pe ṣarin suṣe e lepas nae garu Kalele. ² Ana Suṣe Erot mloge visena la nene, ana naga pisa pan kiena yerkawa lala, pisape “?Yaru nene naṣa apisayu ke ne, pona naga Yoane Nakeena nene, naṣa nanagane naga mali sina e marena yo? Vanon suri ne nanene, naga kila naga tol nam̃areraena nakilaena kile la nene.”

? Yoane Nakeena mare sanape?

Mak 6:17-29

³⁻⁴ Ana Suṣe Erot pisa sanene, vanon naṣa naga m̃em̃ar Yoane Nakeena mare rui, ana naga marau paṣisi. Ana marena kiena ne Yoane

Nakeena kana suniena nena sanini: wenla Suṽe Erot nene, naga kiena kia Pilip, naṽa lalua arimala taaga, ana anela lua. Ana sumo, Pilip nene talopa amio sira tai, kiena kia Lerotias. Ana siraunia, Suṽe Erot pa ṽerelua sira nene. Ana e pogos nene, Yoane pisi pa Suṽe Erot, pisape “Suri nene pe mesmesu re nene poli, naṽa ko oure sira nene, komin naga pe wona ne womla.” Ana Erotias naga pe kekaran re nena visena kiena ne Yoane poli, ana naga pisi pa Suṽe Erot, ana Suṽe Erot mligan kiena yeririna la ṽasia apa atarar Yoane, ana apiari naga, amligan naga pa e yumā nakoena. ⁵ Ana Suṽe Erot sape weṽar Yoane, ana naga maraun li mā le Israel lala, vanon naṽa amlelaga e Yoane asape naga pe kiela navisawalena tai.

⁶ Ana Lerotias nene, naga narina na lomēaru mā tai, ana pogos naṽa la akila ṽaṽagena nasitomālena legiena naṽa Suṽe Erot paeme ea, lomēaru nene naga polu e marana ne la naṽa asike lele taaga e ṽaṽagena nene. Ana Suṽe Erot kekaran kiena wolena paṽisi, ⁷ ana naga pisaar mārerera pan lomēaru nene, pisape suri ya naṽa naga visa, ṽisi na naga la vania.

⁸ Ana Lerotias pisi amio narina naṽa sira mēe nene, ana sira mēe pa pisalein pa Suṽe Erot, pisape “In na

sineun nesape okus ṽarina ne Yoane Nakeena, mēne pialo tai, imi van inu nagane ga ne e nini.”

⁹ Ana visena nene kila Suṽe Erot mloge piowa vanon kiena navisalaweena nene, ana naga pisape akilaga ve sa naṽa sira mēe nene pisa, vanon naṽa naga pisaar mārerera sanene e marana ne kiena erau la ṽisi rui. ¹⁰ Ana apa e loyurmā nakoena nene, atelua kolmekina ne Yoane, ¹¹ ana la amligan ṽarina mēne pialo tai, akus pimi pa sira mēe naṽani, ana sira mēe nene kus pa anena. ¹² Ana siraunia nalogena kiena ne Yoane lala apimi akus tasnena, apa asinia, ana apano apa apisawal pa Yesu.

Suniena kiena ne Yoane Nakeena nane maro e nene.

Yesu pagan yermene lala tol manu lima

Mak 6:30-44; Luk 9:10-17; Yoane 6:1-14

¹³ Ana pogos naṽa Yesu mloge sanene, naṽa Suṽe Erot naga pisayu ke mēna naga, sape naga Yoane Nakeena naṽa mali sina petan marena, ana Yesu molue e yo nene, ana ṽiyu e waa tai, vena va e yo māno tai naṽa pe yaru re e poli. Ana pogos naṽa yeririna lala akilia asape naga pa ke e sanene, la mēna ga amolmolue e kiela pulkumali lala, la amial akom ura. ¹⁴ Ana pogos naṽa Yesu pa ura, naga pisu naṽa ṽina na yeririna mēke pa ura rui, ana naga sinena mie

la pañisi, ana naga kila ruru si kiela yaru namaiena lala apimi apo sina.

¹⁵ Ana pogos naña mrae pito tano, nalogena lala apimi puna Yesu, apisa apisape “Ei, Suñe, yo nini pe po re nenaga, a lavisi mēna ga yemalo narui. Popon ko oligan pīna na yeririna la nene awasuñe ava e pulkumali lala vena auli kala kinanena la pñasia.”

¹⁶ Ana Yesu pisatañe la, pisape “Toko, akilia asuñā ga ve sanene woga ga ne. Popon amiu awar kinanena la pñasia van la.”

¹⁷ Ana la apisa, apisape “! Ke peraga yo, imimi memlarar narin kilaparavi lima ga teke na, amio narin ika naña satin lua ga!”

¹⁸ Ana Yesu pisape “Ala imi van inu,” ¹⁹ ana naga pisi pan yeririna la nene, pisape “Amiu atotano e vilumīni sumo wa.” Ana naga mla narin kilaparavi lima amio narin satin lua nañani, kirava pa metava ma e sinapane, pisa potena pa Ntewa vanon kinanena nene, ana kauroro narin kilaparavi lima nañani, kian pa kiena nalogena lala vena avion plan va yeririna la nene. ²⁰ Ana la akan panoo, mēpela kawa pañisi, ana kinakinas nen kinanena la naña pe akan re poli, torokin akon va e karo mavava la naña kerkeviu ve lualima taaga pa lua. ²¹ Ana yaru la naña akan kinanena nene, la pa sane manu lima, ana

pe apulo re sira la poli amio ninis lala.

Yesu mial yau metava e wos nen sive

Mak 6:45-52; Yoane 6:15-21

²² Ana Yesu pisa pan kiena nalogena lala, pisape “Inu sineun nesape amiu akus kieta waa, ana asumo akusro pupia lapa nene ava lepas pñasia navano, ana in na nesuwa nesuñā neligan plan kone yeririna la awasuñela avano wa.” ²³ Ana pogos naña naga mligan plan yeririna lala apavano pñisi, ana naga pa metava e kunus tai, naga taaga, vena len. Pogos naña yemalolo, Yesu naga ga taaga sike na, ²⁴ ana e pogos nene, waa nene mēke perina pañisi, mēke likan lapa nañani, mēke va yotena narui. Ana sive keviu, a la asuñā akawe lagi pañisi, a kila sane akus mēna ga sive naña akus sive. ²⁵ Pogos naña lavisi yelagi merarava, Yesu pimi pula, naga mial yau ga metava e wos nen sive.

²⁶ Pogos naña kiena nalogena lala apisu naga mial yau ke e wos nen sive pimi pula sanene, amarau pañisi, apisa apisape “! Aulai! ? Suri ya na pimi ke sanene? ? Yermare yo, pona ya ne sanene?”

A la asuñā ga amlolokai keviu, vanon naña la amarau pañisi, ²⁷ ana Yesu pis pan la vilaga, pisa pisape “! Ei, ve amarau re, in ga nini!”

28 Ana Pita pisatañea, pisape “Suñe, visae ko kemua nene, otamñan naña inu mñena ga neyal yau metava e wos nen sive, neimñasu pumña.”

29 Ana Yesu pisa, pisape “Ko, poga, otomi.”

Ana Pita mligan waa, pito tano, siar mial yau e sive, pa lavisin Yesu, 30 ana pogos naña naga sitomñal si lagi mñarera nene, naga marau. Naga marau sanene, siar mian pito tano narui, ana naga pio Yesu, pisape “Suñe, ko otamalia inu.”

31 Ana Yesu kian limana pa veraga, tarar Pita, ana pisa pania, pisape “?Vanon ya ne sinemña miyuwawa sanene? !Ko pe opiawa re nena kawa e inu poli wa!”

32 Ana pogos naña lalua aþiyu si apa meta e waa, lagi nene mare, 33 a la naña e waa amieluar Yesu, apisa, apisape “Lelaga kemua, ko ope narina ne Ntewa lelaga.”

Namaiena lala atol ga isinen kulkota mñana Yesu
Mak 6:53-56

34 Ana Yesu lala akusro pupia lapa nene e kiela waa, apa e lañas þasia, ana apa ura e yo tai, kiena kia Kenasaret. 35 Ana pogos naña yaru lala nae e yo nene apisu kilale Yesu, amligan visena telivi piora pa e yo punu ga. Ana yaru lala aþure namaiena lala apimi puna, 36 apiun tan naga vena naga tamñan namaiena lala atol ga mñana isinen kulkota. Ana

la naña atol ga sanene, kiela maiena la kokovio nenaga, apimi apowo sina.

15

Nalogenala lala kiena ne Yesu pe ataveve re þelaga marua kiena ne le Yu la poli

Mak 7:1-13

1 Ana e pogos nene, Varasi la þasia amio navianena navisaluaena laþasia amolue garu Yerusalem, apimi apisu Yesu. 2 Apiun tan naga, apisa apisape “? Vanon ya ne kionmñanalogena lala pe ataveve ruru re kieta þelaga marua na lotuen nanua sumo poli, naña kieta nasumonena lala apian ita, sa naña la asumña apisa, apisape visae yaru tai sinenan sape kinana, naga monar taveve ruru þelaga mesmesu lala na keyanen limana sumo wa, ana þisi na naga kilia kinana?”

3 Ana Yesu pisatañe la, pisape “?Ana amiu mñena ga, vanon ya ne amiu amñareran naña ataveve kiamiu þelaga marua lala, ana e kiamiu þelaga marua la nene, amiu asumña akilaro ke navisaluaena kiena ne Ntewa? 4 Ana Ntewa pisa rui, pisape ‘Ovatano e arimomña amio anomña,’ a naga pisa mñena ga, pisape ‘Yaru naña pisi piowa pan arimana pona anena, aweñar naga mare.’

5 Ana nanagane, pogos naña yaru tai visaar visave kiena suri lala ve suri wa, þisi na la va Ntewa pogos tai, ana naga pisa sanene ana siraunia

naga pe pisuar ruru re kiena yermarua la luwoka poli, pona ve iila re si la luoka e suri la nene, ⁶ ana amiu asuñã ga apisa ke asape sanene na poga ga ne, pe pe sur re tai nene poli. A e ðelaga nene, amiu asuñã ga akila ke navisaluaena kiena ne Ntewa pimi pe suri korena ga tai ne, vanon naña amiu sinemiun asape auarar ga kiamiu ðelaga marua lala. ⁷ !Ana amiu na apisokani ke nene, amiu apisi korena ga ne! Navisawalena Aisea naga pisayu amiu sumo rui, naña naga pisawal visena nene naña Ntewa pisa, naña pisa pisape

⁸ *‘Yaru la nene apatanon inu e ga e kiela visena lala, ana kiela sitomena lala asike perinan inu wa.*

⁹ *Akila ke lotuena pan inu, ana pe suri korena ga, vanon pogos naña akilapian yeririna lala, apisa ke asape visena nene naga pe visena kiena ne Ntewa nene, ana visena la nene pe kiela ga la ga yeririna lala.’* Ais 29:13

Suri la naña kila yaru namname e marana Ntewa
Mak 7:14-23

¹⁰ Ana Yesu pio viraviran yeririna lala vena aimi puna, ana naga pisa pan la, pisa pisape “Amiu ayagogo ruruia, amiu monar alogekilale kiau visena nene. ¹¹ Pe kinanena re naña pa e logon yaru poli naña kilia kila

naga namname e marana ne Ntewa, ana visena lala naña molue e logona yaru, suri ne nanene naga kilia kila naga namname.”

¹² Ana siraunia, kiena nalogena lala apimi, apisa pania, apisape “?Ei, ko okilia ñã naña Varasi lala sinela mimi pañisi vanon kioma visena la naña osuñã opisa ke ne?”

¹³⁻¹⁴ Ana Yesu pisatañe la, pisape “Amiu na ve asitom re yaru la nene. Ya naña la asuñã akila ke ne, naga pe yuñãena kiena ne re Ntewa nene poli, a yoko kau Ata nae ma e peni, ðisi na naga wereplan make suri la naña naga pe mapila re poli. ? Yeririna la nene na ape kilamara ðala ga, ana sinelan asape asumoni yeririna lala, ana sanape narui, yaru tai naña pe kilamara ðala kilia sumon yaru tañena naña pe kilamara ðala lalua ayal? ! Pisi na lalua akilia aloru veraga atotano e ðilipili tai ne!”

¹⁵ Ana Pita piun tan Yesu, pisape “Suñe, sineun nesape ovisawal ke ne kinas nen ðakaiwa nene sumo wa, naña opisa ðesan ga na wa.”

¹⁶ Ana Yesu pisa pisape, “?Sanape ne, pona ðarimiu ñena ga merorol ke yo wa? ¹⁷ Pona amiu akilia ñã ve tokak ga yo, naña suri ya naña vito kome logona yaru, pito tano vitove kome mēñena narui, ana kilia pa vanua si kome tasnena, ¹⁸ ana suri ya naña

molue e logona yaru, naga molue e losinena sumo, a suri ne nanene, naga kilia kila yaru namname. ¹⁹ Naga nene na vanon naña naitomiena viowa lala amolue e los nen yaru, sa naña nawemomñaren yaru, natañaen kolau, nakilaena lau, navinauena, navisokanena, a nasisiena visena. ²⁰ Nanene ðelaga la naña akilia akila yaru namname e marana ne Ntewa. A ðelaga nene naña yaru kinana ana pe ke re limana sumo poli, suri nene naga taþatete kila yaru namname sanene.”

Yesu pilelua yermare e sira mñee tai

Mak 7:24-30

²¹ Ana Yesu molue e yo nene, naga pito e lepas naña pulkumali lua asike ea, naña Taea amio Saeton. ²² Ana sira tai nae lepas naña Kenan, naga pe wolawa ga, sike e lepas nene, ana naga pimi puna ne Yesu, pio naga, pisape “Suþe, ko ope Navisaarena naña ko omolue e lus kiena ne Tepet, neviun tan ko vena sinemña ye inu. Kiau lomñearu, yermare tai sike e naga, naña sumña kila kare naga silaga.” ²³ Ana Yesu mloge visena nene, ana pe pisa re nena suri tai pa sira nene poli.

Siraunia, nalogena lala apimi, apisa pa Yesu, apisape “Sira nene sumña taveve ita ke sanene na, naga sumña pio manene liu wa. Popon oligan lua naga vano.”

²⁴ Ana pe Yesu pisatamñe la re poli, ana naga pisi pa sira nene narui, pisa pania, pisape “Ntewa mligan inu nepimi vena neva ga puna ne le Israel lala, la naña sane sipsip la naña akila pal mrapa.”

²⁵ Ana sira nañani pimi, kinai tano e lana ne Yesu, pisape “Awis, Suþe, nepiun tan ko, nesape oiila inu.”

²⁶ Ana Yesu pisatamñea, pisa pisape “Ana pe mesmesu re naña nelalua kinanena kana ne nisisi lala, vena nela va lokul poli.” Naga pisi sanene vanon naña naga kilia mña sape e pogos nene, le Yu taþena lala, naña la asitom asape la ga ape narina ne Ntewa, asumña apisayu kare yaru la naña pe ape le Yu re poli, apisape la ape lokul ga la ne.

²⁷ Ana sira nene pisi, pisa pisape “Ko opisa pe lelaga, Suþe, ana lokul lala akilia akan mñena kororos nen kinanena naña amloloru vatano e lelen kinanena kana ne taena ne lokul lala.”

²⁸ Ana Yesu pisatamñe ruru naga narui, pisa pisape “Sira, ko opiawa ruru ke mñarera e inu paþisi. Pisi na ko ovisu ga nanagane imi van ko ve sa naña ko omlelaga ea.” Ana e ke e pogos nene narui, sira mñee kiena ne sira nene pimi po sina.

Yesu kila ruru namaien la moki

Mak 7:31-37

29 Siraunia, Yesu molue ke sina ga e yo nene, p̄asuṽe si pa lepas naṽa Kalele. Naga suṽa mial pano, ana pa kom ga lavisin pupia lapa na lepas nene, ana pa totano metava e kunus tai. 30 Tom̄a sane, ana p̄egas nen yeririna lala apimi puna, amio laulu lala, amio latakin lala, amio kilamara p̄ala lala, amio kiligapoṽe lala, amio m̄ena namaiena taṽena m̄ena ga laṽasia. Ana aṽar la nene apimi, amligan la asike ga lavisin Yesu, ana Yesu kila ruru la apo ke sina ga. 31 Ana yeririna lala sinela kurkuru paṽisi, pogos naṽa apisu puru lala apisi, latakin lala apimi apo, laulu lala amial po, a kilamara kata lala akirava, ana la amieluar Ntewa kiena ne le Israel lala paṽisi vanonia.

Yesu pagan yerm̄ene lala tol manu vari [4000], amio m̄ena ga sira lala a nin sisi lala

Mak 8:1-10

32 Ana Yesu pio kiena nalogena lala apimi puna, ana naga pisa pisape “Inu sineu mie p̄ina na yeririna la nene paṽisi wa, komin naṽa asike amio ita legiena telu narui, ana pe kala kinanena re si poli. A inu taṽatete neli-gan la ava si uṽa naṽa pe kala kinanena re sanene poli, vanon naṽa visae nek-ila sanene, pona e mrapa komsusa ana yaru laṽasia viso kar la vano-o marala malko yo.”

33 Ana nalogena kiena ne Yesu lala apisa pania, apisape “?Ana p̄isi na ita towar kala kinanena pe ne? Ana komin yo nini na yo korena ga nini, a la moki manene la wa.”

34 Ana Yesu piun tan la, pisape “?Ana amiu kamiu kilaparavi via na sike na?”

Ana la apisa, pisape “Olua ga, amio narin ika naṽa satin laṽasia.”

35 Ana Yesu pisa pa p̄ina na yeririna la naṽani, pisape “Atotano e nene sumo wa.”

36 Ana naga p̄ar kilaparavi la olua naṽani, amio narin ika naṽa satin la nene, ana naga pisa potena pan Ntewa vanonia, ana siraunia ana kawewowala, ana kian pa kiena nalogena lala, ana la lein aṽar apiovion pa yeririna lala. 37 Ana la punu ga akan pano-o m̄eṽela kawa ruru po paṽisi. Ana sir-aunia, akon kinakinas nen kinanena la nene naṽa sike na, pa e karo popos olua, ana puleule paṽisi. 38 Ana yerm̄ene la naṽa akania, tol manu vari, ana pe apulo re sira lala amio ninis la poli.

39 Ana Yesu mligan p̄ina na yeririna la nene aṽasuṽe apa si uṽa, ana naga pa si e kiela waa, ana mligan yo nene, pimi suli ga plas ga e lepas naṽa kumali keviu naṽa Makatan m̄eke ea.

16

Yer kawa la p̄asia asape avisu kile tai

Mak 8:11-13; Luk 12:54-56

¹ Ana pogos tai Varasi la p̄sasia amio Satusi la p̄sasia apimi puna Yesu, naḡa sinelan asape akilali naga, ana apisa, apisape “Imimi sinemiminia mesape ko okilali pupia kile tai van imimi, naḡa ko okila e puriukawa nae ma e peni.”

² Ana Yesu pisataḡe la, pisape “Pogos naḡa mrae pito ke tano, ana visae amiu avisu naḡa yo vivaga e lepas naḡa mrae pito ke tano ea, amiu akilia avisa avisave ‘Pisi na yepisun peni,’ ³ a pogos naḡa mrae pa p̄arpo yo, a visae amiu avisu sinapane tano vivaga a lul la malolo ḡena ga metavanaia, amiu akilia avisave ‘Pisi na yua kove p̄ane.’ ?Nane amiu asum̄a apisu kilale ke kile la nene e sinapane p̄isi narui, naḡa p̄isi na pog ve sanape poḡa ve sanape, ana sanape naḡa amiu pe apisu kilale re kiau kile lala na pog keviu nini naḡa nesike nemio amiu poli?”

⁴ Ana Yesu pisa ḡena pan la, pisape “Yaru la naḡa sinelan ga avisu kile lala, la ape li viowa la paḡisi, la akila wowe pa Ntewa, la apilon ḡasila pania, sane la naḡa akila lau, aḡure matan wola lala. Peraga, p̄isi na taḡatete amiu avisu kile tai narui, ana yoko amiu avisu ga naḡa ḡalivi e inu ve sa ke ga kile naḡa pa Navisawalena Sona nanua sumo, naḡa Ntewa kila naga mali

sina.” Ana Yesu purmatan la, naga mligan la asikena.

“Amiu avisuar e is kiena ne Varasi lala amio Satusi lala”

Mak 8:14-21

⁵ Ana pogos naḡa Yesu amio kiena nalogena lala amligan e nene, ana aḡaro e pupia lapa naḡa apa e lepas p̄asa, ana nalogena lala sinela p̄sania naḡa pe aḡar re si kala kilaparavi laḡas poli. Ana pogos naḡa atol lepas p̄asa, ⁶ ana Yesu mla visena tai pan la, pisape “Amiu na monar avisuar ruru amiu, e is kiena ne Varasi lala amio Satusi lala.”

⁷ Ana la amloge visena nene, ana la apisayulein pan la, apisape “?Pona naga pisi sanene vanon naḡa pe toḡar re kilaparavi laḡas pimi poli yo?”

⁸⁻⁹ Ana Yesu kilia ḡa kiela sitomena nene narui, pisape “?Pe na ya naḡa amiu asitom manene ke ḡeḡemiu la sanene, naḡa apisape yoko takan ya ne? ?Sanape naḡa amiu pe amloge kilale re suri la nene poli wa? ! Kiamiu lelagaena ve tokaki paḡisi wa! ?Pona amiu sine-miu p̄esan ḡena ga kilaparavi la lima nene yo, naḡa inu nemla pa yeririna lala tol manu lima nene, amio ḡena karo la naḡa amiu akon puleule? ¹⁰ ?Pona amiu sinemiu p̄esan ḡena ga kilaparavi la olua nene, naḡa inu nemla pa yeririna lala

tol manu vari nene yo, a karo via naña amiu akon sirau? ¹¹ ?Sanape naña amiu pe amloge kilale re naña pe nepisi re pan amiu vanon kilaparavi poli? Inu nevisa ke sina ga van amiu, nesape amiu na monar avisuar ruru amiu e is kiena ne Varasi lala amio Satusi lala.”

¹² Ana e pogos nene, la akilia mā naña naga pe pisayu re is nakilaen kilaparavi pan la poli, ana naga pisa ke visena navisokanena la naña Varasi lala amio Satusi lala akilia avian la ea, naña kilia kila p̄arin yaru lapa imi ve keviu, ana kilia kila kare make kiena malena, sa naña is na miyumāen ke e kilaparavi.

Pita pisawal sape Yesu naga pe Navisaarena kemua lelaga

Mak 8:27-30; Luk 9:18-21

¹³ Ana Yesu lala apito garo e lepas naña pulkumali keviu nene Sisaria Piliṗae m̄eke ea, ana e pogos nene naga piun tan kiena nalogena lala, pisape “? Amiu asuñā amloge mā naña yeririna lala asuñā ga apisavisa ke Narina ne Yeririna, apisape naga ai?”

¹⁴ Ana lala apisa, apisape “La p̄asia apisa apisape ko Yoane Nakeena ke sina ga, a la p̄asia apisape ko Elaisa, a la p̄asia apisape ko Seremāea, pona navisawalena taṗena tai na nanua sumo.”

¹⁵ Ana naga piun tan la, pisape “?Ana amiu, amiu na asape inu na ai?”

¹⁶ Ana Saemon Pita pisatam̄ea, pisape “Ko, kō na Navisaarena, ko ope Narina ne Ntewa Mali.”

¹⁷ Ana Yesu pisatam̄e pania, pisape “Saemon, narina ne Yoane, navisa ruruena imi van ko. Suri naña ko opisa ne, pe yaru re na pian ko e poli, ana Ata ga nae ma e peni naga pian ko ea. ¹⁸ A ko nene ko kionā kia taṗena naña Pita, naga kana kinasia sanini, sane ‘kilavaru,’ ana lelaga paṗisi, sa naña nanagane, in na nepisu ko na sane ko ope varsu tai, ana p̄isi na in na nevisirlua p̄egas nen kiau li nalotena lala e kilatapili na sanene narui, a puriukawa na marena taṗatete kilia taulu p̄egas nene. ¹⁹ Pisi na in na nela kii lala navitavanena amio nakotaween nasuṗenena kiena ne Ntewa van ko, a suri ya naña ko ovisaluṗar e yomarava nini, ana Ntewa nae ma e peni naga m̄ena ga visaluṗaria amio ko, a suri ya naña ko otañania e yomarava nini, ana Ntewa nae ma e peni naga m̄ena ga tam̄ania amio ko.”

²⁰ Ana Yesu pisa m̄arera pa kiena nalogena lala, pisape “Amiu na ve ava avisawal re van yeririna la avisave in na nepe Navisaarena.”

Yesu pisawal kiena marena

Mak 8:31-33; Luk 9:22

²¹ Ana siar e pogos nene, Yesu kilali naþa kila merarava va nalogena lala, sape naga monar va ma Yerusalem, ana e yo nene, þisi na suþe kiena ne le Israel lala, akila kare manene naga vaþisi, amio þarin yaru wa lala, amio mþena ga navianena navisaluaena lala, la make narui þisi na akila kare naga vaþisi. Yesu pisa mþena ga pisape þisi na la nene awemþar naga mare, ana kana legiena na telu þisi, Ata Ntewa kila naga sumþalu mali sina.

²² Ana pogos naþa Pita mloge visena nene, piolua Yesu pano, pisi mþarera pania, pisape visaluþaria, pisape “Yesu, Ntewa monar visaluþar suri nene. Suri la nene taþatete kilia imi ve lelaga e ko ve sa nene.”

²³ Ana Yesu pilopuia, pisi mþarera pa Pita, pisape “!Yermare Lego, oure vetan inu! Ko osuþa okilali inu ke sina ga e kioþa sitomena nene naþa pe sitomena kiena yaru ga, pe sitomena kiena ne Ntewa re nena ga.”

Nalogena kiena ne Yesu monar sitom korenan ga kiena nasinenanena lala

Mak 8:34-9:1; Luk 9:22-27

²⁴ Ana Yesu pisa pa kiena nalogena lala, pisape “Yaru naþa sinenan sape siraun

inu, monar sitom korenan ga kiena nasinenanena lala, ana monar kus kiena laki torovia, ana taveve inu.

²⁵ Yaru naþa sinenan sape visuar ruru kiena malena, naga þisi na kilaluia, ana yaru naþa naga kilalu kiena malena vanon inu, naga þisi na kilia tol malena lelaga.

²⁶ Ana visae yaru tai naga tol make suri na yomarava la punu ga, ana kilalu mrapa na malena, naga pe taulu re nena suri wo napo lelaga tai poli, ana siraunia, taþatete kiena suri wo la nene aulimaran si kiena malena.

²⁷ Ana lavisi ke Narina ne Yeririna wasuþe ke sina ga imi narui amio navisi lala, naga imi amio naurarena kiena ne Arimana, ana naga ul yaru lala mesmesun kiela nayuþaen lala. ²⁸ Inu nevisa suri na lelaga nene van amiu, nesape yaru la þasia asuþalu asike e nini, naþa þisi na taþatete amare asuþa ga vano-o avisu Narina ne Yeririna warpoyo amio kiena nasuþenena, vena vim ve suþen yeririna la punu ga.”

17

Yepena ne Yesu pilonia pimi pe taþena

Mak 9:2-10; Luk 9:28-36

¹ Siraun e pogos nene, legiena orai þarovia, ana Yesu þere Pita, a Semes, a wenla naþa Yoane, ana la ga vari nene apa metava e ravie

tai. ² Asumña sanene, ana nalogena la telu nene apisu naña yepena ne Yesu pimi ke pe tañena, a marana pilavila manene sa naña mrae, a mñana kulkota lala apimi amiyuwowo pano-o amiyuwowo po pañisi. ³ Ana la telu nene apisu mña ga Mosis amio Elaisa, lalua aňaliv, ana lalua asumña ga asun ke amio Yesu. ⁴ Ana Pita pisa pa Yesu, pisape “Suñe, popon tanea ita tesumña ga e yo nini. Visae ko sinomñania, ana neyumñaen silparpara ve telu e nini, moña tai, mñana ne Mosis tai, a mñana ne Elaisa tai.”

⁵ Ana pogos naña Pita sumña pisi ke ga wa, ana lul tai naña pilavila pañisi pitomi kalo la, ana amloge visena tai molue e lul nene, pisa pisape “Nene na naruu nene, naña in na nesitom naga pañisi. Kiau sitomena sike ga e naga, a nekekan naga pañisi. Amiu na monar alogear ruru naga.”

⁶ Nalogenena lala amloge visena nene, ana amarau na amarau, ana amloru e porotano, aňariwani marala lala.

⁷ Ana Yesu pimi pulu, mli-palipa la telu nene, ana pisa pan la, pisape “Amiu asumñalu, ve amarau re.” ⁸ Ana pogos naña la aňar plan si pñarila pa metava, apisu re si lalua nene poli, ana la apisu ga Yesu naga taaga sike na.

⁹ Ana lala amolue e ravie nene, aňasuñe la ke sina apitomi tano, ana Yesu pisaar mñarera pan la, pialuňar la, pisape “Suri naña Ntewa kila amiu apisu ne, pñisi na amiu ve avisawal re va yaru la nanagane, vano-o tol naña Narina ne Yeririna mali sina ga e marena, e pogos nene narui amiu akilia avisawal va yeririna lala.”

La apisayu Elaisa

Mak 9:11-13

¹⁰ Ana nalogenena la telu nene apiun tan Yesu, apisape “?Sanapen naña navianena na navisaluaena lala asumña ga apisa ke, apisape ‘Monar Elaisa naga wasuñe ke sina ga imi sumo wa, siraunia na Navisaarena nene kilia imi mñalivi?’”

¹¹ Ana Yesu pisatamñe la, pisape “Naña la apisa sanene, naga lelaga kemua, komin Navisawalena Malakaea naga pisa sanene rui e kiena tusi. Elaisa naga monar imi sumo vena kila ruru make suri punu ga, pñisi na Navisaarena naga kilia imi sirau, ¹² ana in na nevisa van amiu sanini, Elaisa nene pimi pñisi rui, ana pe yaru lala apisu kilale re asape naga poli, ana pe asitom re naga poli. Ana e ke e pñelaga nene, pñisi na akila ke mña ga viowa va Narina ne Yeririna.”

¹³ Ana e pogos ke nanene, nalogenena la telu nene akilia ga na wa, naña Elaisa naña

Yesu pisayu ke ne, nane Yoane Nakeena nene.

Yesu pilelua yermare e yaru m̄ee tai

Mak 9:14-29; Luk 9:37-42

¹⁴ Ana Yesu amio la telu nene aṗasuṗela, ana apito asikolila amio ṗina la naṗa asike e pogos nene, ana yaru tai pimi kinai tano e lana ne Yesu, ana pisa pisape ¹⁵ “Suṗe, inu sineun nesape ko sinema ye kiau yaru m̄ee nini, oiila naga, komin naṗa maiena tai teke e naga. Maiena nene kila naga marmarluia yam moki paṗisi, ana kila kare manene la naga wa, sum̄a kila ke naga mlorvavae m̄a pano, mloru pa e kapi pona e m̄ena ga e wii lala. ¹⁶ Inu nepureli naga pimi puna ne kioṗa nalogena lala, ana amiyum̄aen pano-o, peraga, ana akila ruru ṗele naga.”

¹⁷ Ana Yesu pisi pa kiena nalogena lala, pisape “?Amiu la nene, sanape na sanene? Amiu na pe apiawa re nenaga e Ntewa poli, silaga amiu asum̄a ga apa ape wowe yo. ?Monar nesum̄a si nemio amiu vano tol pogwai? Inu sineu maren amiu paṗisi rui. Ana poga ga, aure yaru m̄ee nene imi pun inu.” ¹⁸ Ana la aṗure yaru m̄ee nene pimi, ana Yesu pisaar pan yermare naṗa sike e naga, pisape “!Omolue e naga nanagane ga ne!,” ana verakorena yaru m̄ee nene pimi po sina.

¹⁹ Ana siraun e pogos nene, pog naṗa Yesu sum̄a naga taaga, nalogena lala apimi puna, apiun tania apisape “?Sanape na imimi mepilelua ṗele yermare naṗa sike e yaru m̄ee nene?”

²⁰ Ana Yesu pisa pan la, pisape “Nanene na vanon naṗa amiu pe apiawa ruru re m̄arera e inu poli wa. Lelaga nevisa van amiu, visae aviawa e inu ve tokak ga ve sa ga narin kurus nen mras nen purpa, ana visae kiamiu naviawaena ne ve lelaga kemua napo, ana ṗisi na amiu akilia avisa va tavie na m̄eke ne, avisave ‘Ko oure,’ ana ṗisi na naga monar ure. Pisi na pe suri re tai naṗa amiu akilia akila ṗele poli. ²¹ Ana naṗa nam̄eneplanen yermare la ne sanene, ana kana mrapa ne sanini: yaru na monar len, ana monar monsilu ga ve kinan re. E ga e ṗelaga nene, ṗisi na naga kilia m̄ene plan yermare kar la ne sanene.”

Yesu pisawal ke sina ga kiena marena

Mak 9:30-32; Luk 9:43-45

²² Ana pogos tai naṗa Yesu amio kiena nalogena lala apimi lele taaga garu Kalele, Yesu pisa pan la, pisape “Lavisi ke naṗa aligan Narina ne Yeririna va e limana yaru la narui, ²³ naṗa ṗisi na awem̄ar naga mare, ana siraunia, e kana legiena na telu, ṗisi na Ntewa kila naga mali ke sina ga.” Ana pogos

naña Yesu pisa visena nene, kiena nalogena lala amloge piowa vanon pañisi.

Kilavaru na takis na Yumã Wa Mana Ntewa garu Yerusalem

²⁴ Pogos naña Yesu amio kiena nalogena lala apimi atol Kapeneam, yaru lala na warpoloen takis na Yumã Wa Mana Ntewa, apimi puna ne Pita, apiunia apisape “? Sanape, kioñã navianena mñena ga pul mña takis ne, pona peraga?”

²⁵ Ana Pita pisatañea, pisape “Naga pul mñaga.”

Ana Pita ãasuñe si pa e yumã naña Yesu sike ea, a naga pe pis re poli wa, ana Yesu naga pisñesia, piunia pisape “Saemon, ko ositomveveli ãarin suñe na yomarava la nene. ?Li pe la ne apul ke takis nene pan la? ?Yaru na mñala mratava ga lala, pona yaru tañena lala?”

²⁶ Ana Pita pisa, pisape “Yaru tañena ga lala, la monar aulia.”

Ana Yesu pisa, pisape “Ee, sanene narui, ana kana kinasia sanini, mratava kiena ne ãarin suñe lala, la tañatete aulia. Ana in ke nena naña nepe mratava kiena ne Suñe Keviu na Yumã Wa naña narui, ana vanon suri ne nanene, in na pe pon re neul takis naña la apiun ke tan ko poli. ²⁷ Ana popon italua na ve tekila kare re yaru lala na warpoloen takis,

italua mñena ga monar toul ga. Ko, oto garo e lapa, oto omñate ika, a ika naña omñate ãesania, ãisi na ko olual kilavaru tai e logona, naña torokin italua toul kieta takis ea, ana olavia ola ova oulia.”

18

“?Yaru ai naña naga to laa metavan yaru tañena lala?”

Mak 9:33-37; Luk 9:46-48

¹ Ana e pogos ke nene, nalogena tañena lala apimi añalivi, apimi nena puna Yesu, apiun tania, asape “Imimi sinemimin meviun mesape: ? Yaru ai naña naga to laa metavan yaru tañena lala e loyumã na nasuñenena kiena ne Ntewa?”

² Ana Yesu pio sisi tai naña sumã ga pimi puna, ana mligan sisi nañani sumãlu su likan la, ³ ana naga pisa pan la, pisape “In na nevisa van amiu, visae amiu ve avilopu amiu re naña ki-amiu ãelaga la aimi ve sa ãelaga kiena ne nisisi nene, ãisi na amiu tañatete kemua aimi loyumã e nasuñenena kiena ne Ntewa pogos tai.

⁴ Ana yaru naña kila kiena sitomena su ga tano ve sa nisisi nini, yaru nene naga yoko kilia imi to laa metava, taulu yaru tañena lala e nasuñenena kiena ne Ntewa.

⁵ Yaru naña kiena sitomena pito tano e inu, ana naga kekaran naña naga kila wo va nisisi kokan tai ne sanene, yaru nene naga sa

ga naŕa naga kekaran inu ke ga narui.”

Nataŕaliena lala

Mak 9:42-48; Luk 17:1-2

⁶ Ana Yesu pisa mēna ga, pisape “Ana visae yaru tai kila nisisi tai ne sanene ligan inu, ve viawa re si mārera e inu, ana ŕisi na yaru nene kus nakoena tai naŕa mārera manene la. Visae aŕatear pupia kilavaru tai mēne kolmekina, ana akuwani naga talilu vitove e lowe memaena, nanene naga nakoena tai ne meme ga ne, ana yaru nene naga yoko war va re la na wa taulu nanene. ⁷ ! Aulai! Yomarava nini piowa manene la narui, naŕa pulen manene la suri la naŕa silaga asuŕa akilali ke yaru lala vena kila la akilalu kiela naviawaena e inu. Nataŕaliena la nene ŕisi na asuŕa likan amiu silaga, ana ŕisi na viowa manene la va yaru la naŕa aŕar nataŕaliena viowa la nene pimi e yaru taŕena lala.

⁸⁻⁹ “Visae lumoŕa tai, pona laŕa tai, pona kilamaraŕa tai, pona suri ya sina naŕa e kioŕa malena, visae suri la nene tai kila ko ve oviawa re si mārera e inu, popon otelua suri nene vetan ko, okuwan vano. Visae otelua ŕelaga na mlamulena viowa vetan kioŕa malena ve sanene, ŕisi na ko okilia ova loyuŕa e malena, a visae ko ova loyuŕa e malena naŕa

lumoŕa, pona laŕa, pona kilamaraŕa, pona suri ya sina e kioŕa malena, visae suri la nene tai kovio ŕisi rui, ana nanene na poga ga nene. Ana piowa manene la naŕa visae tasneŕa la punu ga amio kioŕa ŕelaga viowa lala asuŕa woga ga e ko, ana siraunia akoven ko e kapi naŕa taŕatete mēwo pogos tai e yo naloge viowaena.”

Pakaiwa na sipsip naŕa kilalu mrapa

Luk 15:3-7

¹⁰ Ana Yesu pisa mēna ga, pisape “Amiu na monar avisuar ruruia vena amiu ve asitom korenan re naruu la tai nene pogos tai. Visae peraga, amaraŕe amiu, vanon naŕa naruu la nene, la kiela navisi lala nae ma e peni naŕa la asuŕa apisuar la mŕaga, a navisi la nene silaga asike e marana ne Ata nae ma e peni. ¹¹ Ana yumaena kiena ne Narina ne Yeririna naga sanini: naŕa naga pimin pisape tamalia la naŕa akilalu mrapa.

¹² “Amiu ayagagon ruru li suniena nini: Yaru tai naŕa naga kiena sipsip lala tol ponotia taaga, ana lala tai kila ŕarina, pa la perina, ana kila pal mrapa, pa kovio. ?Pisi na yaru nene kila sanape narui? Naga monar ligan kiena sipsip la lualima ovari pa ovari nene, asuŕa ga akinana ke e yo na vilumŕini, ana naga monar vano vena kaleli sipsip nene

naña kilalu mrapa. ¹³ Lelaga nevisa van amiu, pogos naña naga mñal si sipsip nene, ana naga kilia kekaran va ðisi, taulu naña naga kekaran kiena sipsip taþena la moki naña asu ruru asuñña ga, pe amial re naña apa akovio poli.

¹⁴ “Ana Arimamiu nae ma e peni, naga mñena ga sa ke ga, naña naga yepen mavin narina tai nene yepe vetan mrapa vena vano va kovio.”

Visae womla tai naña kila viowa van ko

Luk 17:3

¹⁵ Ana Yesu pisa mñena ga, pisape “Visae womla tai naga kila viowa van ko pogos tai, monar ko ova ovisu naga naña amiu ga lua nene asikena, ana ko monar ovisawal kiena naviowaena vania. Visae naga kekaran logeen kionña visena, nanene naga sa naña kionña visena kila amiu luwoka ape mara wo si ðisi narui. ¹⁶ Ana visae naga yepen mavin yagogonen kionña visena, ana monar ko ovano oure si yaru taþena la ve lua pona ve telu aimi amio ko, vena aiila ko e kionña visena, sa naña Tusi Wa pisa pisape ‘Visena la punu ga, monar yaru naiilaena visena, yaru ve lua pona ve telu, vena kila visena nene kilia sumalu.’ ¹⁷ Ana visae womla nene yepen mavin ke yagogon rurukoena wa, ana ko monar ovisawal kiena

þarkawa nene va þegas nen li nalelagaena lala, vena la þasia akilia aimi avisuli re mñena ga naga. A visae naga mñarera ke ga wa, ve yagogon re mñena ga nalelagaena lala, amiu monar avisu naga sa naña naga pe wolawa ga tai, pona naga sa ga yaru na warpoloen takis, naña yaru lala pe ape erau ruru re nenaga amio la poli.”

Leniena naña yaru la mras ve lua la ga aviranar la ea

¹⁸ Ana Yesu pisa mñena ga, pisape “Lelaga, inu nevisa van amiu, ana suri ya naña amiu avisaluþaria e yomarava nini, ana Ntewa nae ma e peni naga mñena ga visaluþaria amio amiu, a suri ya naña amiu atañania e yomarava nini, ana Ntewa nae ma e peni naga mñena ga tañania amio amiu.

¹⁹ “A naga sina, nevisa mñena ga van amiu, visae amiu yaru la ve lua naña la lua aviranarlan suri tai e yomarava nini, ana visae lalua alenwoia, ana kau Ata nae ma e peni ðisi na naga kila suri nene van lalua. ²⁰ Vanon naña visae yaru ve lua pona ve telu aimi lele taaga e kiau kia, ana inu mñena nesike likan la.”

Pakaiwa na þelaga na viewoena

Luk 17:3-4

²¹ Ana Pita pimi puna Yesu, piun tania, pisape “? Suþe, visae kiau wolai

kila ke pe mesmesu re pan inu silaga poli, inu monar neviewo naga yam ve via? ?Monar va tol yam ve olua pona sanape?”

²² Ana Yesu pisatañea, pisape “Peraga, ãisi na ko ve oviewo re ga naga yam ve olua ga, ko monar oviewo naga yam ve lualima yam ve olua, ko oviewo ña naga sanene vano tol sina ga kana yam ve olua [70 x 7]. ²³ ðelaga naviewoena loyũña e nasuñenen kiena ne Ntewa, monar ve sanene narui. Amiu ayagogo e suniena tai naña pisayu ðelaga naviewoena, naña pisa sanini, pisape: Parin suñe tai, naña naga sinenan sape visuveveli lapui la naña kiena yaru na yuñæna lala akila pania. ²⁴ Ana naga kila ña sanene pano-o, ana aþure kiena yaru nayuñæna tai pimi puna, naña yaru nene naga kila lapui na kilavaru na tenario via puna ne kiena yerkawa nene. ²⁵ Pogos naña apiun kilavaru tan yaru nene, naga pisape naga taþatete si ulmaran lapui nene. Ana yerkawa nene pisa pa kiena yeririna lala, pisape ‘Poga, akilalua naga a auliulinlua naga ve kiena ne yerkawa taþena, vena yuñæe korena ga vania. Ana auliulin ñena ga wona, amio narina lala, a amio make kiela suri lala, a awar kana kilavaru imi vena auli kiena lapui nene komþasia ea.’

²⁶ “Ana yaru nene mloru

e lana ne þarin suñe nene, tagi ñarera pania, pisape ‘Ko ope yerkawa, awis, inu sineun nesape neviun tan ko vena ko ola re narin pogos tai van inu sumo wa, vena inu nekilali neul maranli lapui nene van ko.’ ²⁷ Ana yerkawa nene sinena miye yaru nene, naga piwo make lapui nene pania, vena ve ul marana re sina, ana tañan yaru nañani molue ga sa ga ne.

²⁸ “Ana pogos naña yaru nene pano, naga pisu kiena erau tai, naña kiena erau nene kiena lapui tai teke e yaru nene. Ana kiena lapui ne ve tokaki ga, ana yaru nene pano þuarar kolmekina, pisa pania, pisape ‘Ko monar oul lua kioñia lapui nene vetan inu nanagane ga ne.’

²⁹ “Ana kiena erau nene pimi mloru e lana, tagi manene pania, pisape ‘Mara, ko ope kiau erau, awis, sineun nesape neviun tan ko vena ko ola re narin pogos tai van inu sumo wa, vena inu nekilali neul maranli lapui nene van ko.’ ³⁰ Ana yaru nene yepena mavin viewoen kiena erau nene, ãisi na naga pa kila la amligan naga pa e yuñæ nakoena, vena sumã vano-o ul plan kiena lapui nene, ãisi na naga kilia molue sina.

³¹ “Ana pogos naña yaru taþena la naña kiena ne þarin suñe nene apisu ðelaga nene, amloge piowa paþisi, ana apa puna ne kiela þarin suñe, apisawal

suri la nene pania. ³² Ana p̄arin suḡe nene pio kiena yaru nene vena vim si puna, ana sinena karia, pis m̄arera pania, pisape ‘!Aa, ko na ope yaru p̄ilp̄il ya na sanene! Inu nepiewo ko e kioḡa pupia lapui nene rui, vanon naḡa otagin manene pan inu, ana okila sineu miye ko. ³³ ? Vanon ya ne ko taḡatete ḡena ga sinema ye kioḡa erau sa naḡa inu sineu miye ko sumo rui?’ ³⁴ Ana p̄arin suḡe nene sinena mimi pa la narui, ana naga pisape monar aligan yaru nene va e yuḡa nakoarena, ana la monar ala ḡa nakoarena vania vano-o naga ul plan make kiena lapui nene.”

³⁵ Ana Yesu pisa, pisape “Visae amiu ve aviewo re womlamiu lala silaga, ve lelaga e sinemiu la wetelu, p̄isi na kau Ata nae ma e peni, naga sinena kar amiu ve sanene, p̄isi na naga la nakoarena ve sa ke ga nene van amiu.”

19

Yesu pisayu sanape naḡa yaru mligan lua wona

Mak 10:1-12

¹ Ana Yesu pisa visena la nene p̄isi, ana naga mligan Kalele naga kome wii nae Yortan lepas na vano, ana pa metava e lepas nae Yutea.

² Ana p̄ina lala ataveve ke naga e pogos nene, ana e yo nene naga kila ruru namaiena la moki.

³ Ana Varasi ḡena ga laḡasia asike e pogos nene, ana apimi puna ne Yesu, apisape akilali ke sina ga naga, la apiun naviunena tai pania, la apiunia, apisape “? Kieta navisaluaena pisa ya ne e lepas nen p̄elaga kiena ne yaru naḡa ligan lua wona? ?Mesmesu ga naḡa yaru kilia kila sanene vanon suri kar punu ga naḡa pe miasia, pona kilia kila vanon ga suri kerkeviu ga laḡasia?”

⁴ Ana Yesu pisataḡe la, pisape “?Pona amiu na pe akilia re Visena Wa kiena ne Ntewa naḡa naga pisa, pisape

‘E purḡesia, Ntewa naga sii suri punu ga, ana sii ḡena ga yeririna lua, yermene tai, a sira tai?’

⁵ Suri nene amiu akilia p̄isi rui, amio ḡena ga visena taḡena nene naḡa pisa, pisape

‘Sanene, p̄isi na yaru ligan arimana amio anena, ana naga vano vilolar wona na sira, ana lalua aimi ave taaga ga narui.’ *Nas 2:24*

⁶ Nanene kila sane lalua ve ave lua re sina, ana lalua apimi ape taaga ga narui. Ana ya naḡa Ntewa naga vilolaria aimi ave taaga, pe pon re si yaru kilapure la poli.”

⁷ Ana Varasi la nene amloge visena la nene, ana apiun ke sina ga tan Yesu, asape “?Poga ga, ana vanon ya

ne Mosis naga pisawal nav-
isaluaena nene naña tañan
sape yaru naga kilia la ñaki
naliganluaena tai vena la va
wona, vena ligan lua naga
vano?”

⁸ Ana Yesu pisatañe la,
pisape “Ee, ana sumon naña
nasiien yomarava nini, naga
pe sa re nene poli, ana
vanon naña amiu ñarimiu
lala apimi ñarera pañisi,
nane kila Mosis tañania
sanene sape siar e repimiu
la pimi, amiu akilia aligan
plan womiu lala. ⁹ Ana

nanagane, inu nevisa van
amiu, visae yaru tai, wona
kila kolau, yaru nene kilia
ligan lua wona nene. Ana
visae sira nene ve kila re
kolau ve sanene sumo, ana
yaru nene ligan lua naga,
ana ñisi na va were sira
tañena, visae ve sanene, ana
Ntewa pisu sane yaru nene
naga kila kolau narui amio
sira tañena nene, naga kila
kare sira nene naña wona na
sumo.”

¹⁰ Ana nalogena kiena
Yesu lala apisa pania,
apisape “Visae ve sanene,
ñelaga na talopaena pe suri
ñarera tai ne pañisi ne. Pe
pon re si tekila ita tetalopa
poli.”

¹¹⁻¹² Ana Yesu pisa pan la,
pisape “Ee, lelaga naña yaru
lañasia naña ñisi na la ve
atalopa re pogos tai, sa naña
sane lañasia apaeme ana tas-
nela la piowa pa rui, pona
lañasia akila kare tasnela, sa
naña asila, ana la tañatete

atalopa. A lañasia, pe at-
alopa re poli vanon naña
la amligan talopaena vena
la ayuñae e nasuñenena
kiena ne Ntewa. Ana Visena
Wa, naga pisa pisape popon
yermene amio sira, lalua at-
alopa, a popon lalua asu
ruru ñaga sanene tol luas
nen kiela malena la luoka.
A ko naña ko okekaran
visena nene, ana opisu naña
Ntewa naga kila sanene pan
ko rui, popon olarar ruru
visena nene ñarera e kioma
malena.”

Yesu pisa ruru sisi lala

Mak 10:13-16; Luk 18:15-17

¹³ Ana lañasia akus narila
lala apimi puna Yesu, vena
naga ligan limana te la, len
wo la. Ana nalogena lala
apisuia, ana apisi ñarera
pan yaru la nene, apisaluñar
la, ¹⁴ ana Yesu pisa, pisape
“Amiu ve avisaluñar re sisi
la nene, amiu atañan la
aimi pun inu, vanon naña
sisi la nene na asa ga la naña
asike loyuma e nasuñenena
kiena ne Ntewa.”

¹⁵ Ana naga mligan limana
te sisi la nene, ana suraunia,
naga mial pano.

*Yaru ñee tai naña kiena
suri moki*

Mak 10:17-22; Luk 18:18-23

¹⁶ Ana e pogos tañena tai,
yaru ñee tai pimi pisu Yesu,
piun tania, pisape “?Navia-
nena, ana in na monar nek-
ila yumaena wo ya, naña

vena kila inu ĩisi na netol malena naĵa ve uro re?”

17 Ana Yesu pisa pania, pisape “?Vanon ya ne ko opiun tan inu sanene, osape nevisa yuĵaena wo tai van ko? Ntewa ga naga po, a visae ko ologear kiena navisaluaena lala, ĩisi na ko okilia otol malena wo nene.”

18 Ana yaru naĵani piun ke sina ga tan Yesu, pisape “?Ana ko opisa ke navisaluaena ya la nene?”

Ana Yesu pisa pania, pisape “Navisaluaena ne la nanini narui, naĵa pisa pisape: ve owemĵar re yaru mare, ve okila re kolau, ve ovinau re, 19 ve ovisokan re, ko ova tanon arimomĵa amio anomĵa, a ko ositom nalavis puĵa lala, ovisuar ruru la, ve sa ke naĵa ko opisuar ruru ko ke ga.”

20 Ana yaru ĵee nene pisa pania, pisape “Navisaluaena la naĵa ko opisa ke nene, inu nesuĵa nemlarar make punu ga rui. ?Suri ya si naĵa teke ga wa, naĵa inu pe nekila re poli wa?”

21 Ana Yesu pisa pania, pisape “Visae ko sinomĵan osape oimi omesmesu ruru wo va ĩisi, torokin naĵa ko otol malena naĵa ve uro re, ĩisi na ko na monar okila ve sanini: ko ovano, oululin plan make kiomĵa suri la punu ga, ana owar kana kilavaru nena, ova oviovionia van yaru la naĵa pe kiela suri re poli. Visae ko okila sanene, ĩisi na ko kiomĵa suri wo lala ve moki vaĵisi ma e

peni. Ko, ova okila, siraunia oimi otaveve inu.”

22 Ana pogos naĵa yaru ĵee nene mloge visena nene, kiena sitomena urmi a sinena piowa paĵisi, vanon naĵa naga kiena suri la moki manene la. Ana naga pure matan Yesu.

Yaru naĵa kiena suri moki, naga ĵarera la naĵa va loyomĵa e nasuĵenena kiena ne Ntewa.

Mak 10:23-31; Luk 18:24-30

23 Ana Yesu pisa pa kiena nalogena lala, pisape “Lelaga nevisa van amiu, visae yaru tai naĵa kiena suri moki, naga sinenan pisape va loyomĵa e nasuĵenena kiena ne Ntewa, suri nene na ĵarera towe mĵa naĵa.

24 Ee, inu nevisa van amiu, visae kamel tai naga va warpoyo e pulus nen nitil nene, nane naga ĵarera vaĵisi ne, ana visae yaru tai naĵa naga kiena suri la moki ana sinenan sape va loyomĵa e nasuĵenena kiena ne Ntewa, naga ĵarera la na wa.”

25 Pogos naĵa nalogena lala amloge visena nene, amilania paĵisi, ana la apisape “?Suwala, ana visae ve sanene, ĩisi na ane kilia tol namalena nene?”

26 Ana Yesu kirava pisu la, naga pisa pisape “Ee, lelaga naĵa yaru taĵatete kilia kila yaru tol malena nene, ana Ntewa ga kilia kila make suri punu ga.”

27 Ana Pita pisatamēa, pisa pisape “?Ana sanapen imimi? Imimi meligan make kimimi suri la rui, ana imimi metaveve ko. ?Pisi na imimi metol mā suri wo laḡas ne, pona peraga?”

28 Ana Yesu pisa pan la, pisape “Lelaga nevisa van amiu sanini, pogos naḡa Narina ne Yeririna totano e kiena lelana wa natotanoena e yomarava viu nene naḡa ḡisi na imi, amiu naḡa ataveve inu ke nanagane, ana amiu mēna ga atotano e pupia lelemiu wa natotanoena ve lualima taaga va lua, vena avisuar lus nae Israel lala lualima taaga pa lua nene, sa naḡa amiu ape kiela ḡarin suḡe lala.

29 Ana yaru naḡa visae ligan mēna yuḡa, pona wenla pona vinena, pona arimana pona anena, pona narina, pona kiena porotano, ana visae naga ligan suri la nene vanon ga inu, ḡisi na naga warmarana sina ga e yomarava nini kiena suri la naḡa naga mligania, kilia tol sina ve ponotia tai, ana metavana, ḡisi na naga kilia tol mēna ga malena naḡa ve uro re.

30 “Ana yaru la moki liu naḡa asu metava, ḡisi na atotano, a yaru la naḡa atotano, ḡisi na la asu metava.”

20

Pakaiwa kiena ne yaru na yuḡaena lala

1 Ana Yesu suḡa pisa mēga pano-o, pisape “Suri naḡa nepisa ga na wa, sa ke ḡelaga naḡa Ntewa kila ke pa yaru lala loyuḡa e nasuḡenena kiena. A ḡisi na nevisayu suri nene van amiu e ḡakaiwa tai, naḡa pisa sanene, pisape: Yerikawa tai, naḡa kana pupia lokilmāsmās tai. E kolulagi tai, naḡa pe yemlagi ruru re poli wa, naga pa e pulkumali tai vena were yaru laḡasia ava ayuḡae e kiena lokilmāsmās nene e legiena nene. 2 Naga māl la ḡasia, ana pisaar pan la e kilavaru tai naḡa torokin yuḡaena na legiena wetelu tai, ana mligan plan la apano vena ava ayuḡae e kiena lokilmāsmās nene. 3 Ana e mrae ovari, naga pa sina ga e pulkumali nene, pisu yaru taḡena lala asu korena ga, asuḡa sane pe kiela yuḡaena re poli, 4 ana naga pisa pan la, pisape ‘Popon amiu mēna ga aimi ayuḡae re e kiau lokilmāsmās, ana ḡisi na nowul amiu ke ga.’

5 “Ana la nene apa amiyuḡae, a siraunia, kolpae mēna ga, a mrae telu mēna ga naḡa yepekilavi, ana yerikawa nene ḡasuḡe si pano, ḡere ke sina ga yaru laḡas apimi amiyuḡae kiena sanene. 6 A yam si tai, e yepekilavi mrae lima, naga ḡasuḡe sina ga pa e pulkumali nene, pisu yaru laḡasia naḡa asuḡalu asike e yo nene na wa, ana naga

pisa pan la, pisape ‘?Komin ya ne asu koren ke sanene na wa e yo nini, naña pe akila re nena yuñae na tai poli?’

⁷ “Ana la apisatamēa, apisape ‘Peraga, pe yaru tai pimin re sape meva meyuñae kiena poli.’

“Ana yerkawa nene pisa pan la, pisape ‘Poga, visae sanene, in na neure amiu narui. Amiu, aimi ayuñae kiau.’

⁸ “Ana e ko yepakilavi la rui, amiyuñae p̄isi, ana yerkawa nene pisa pa kiena navisuaren yuñae nene, pisape ‘Poga, ovio yaru na yuñae na nene aimi, oul la. Pisi na ko okila sanini: oul p̄esan la naña apimi mare ga na wa, vano-o ōpisi e la naña apimp̄esani kolulagi.’ ⁹ Ana pogos naña yaru la naña asiar ga yuñae e mrae lima apimi, yaru nene mla kilavaru pan la torokin ke legiena wetelu na yuñae taaga. ¹⁰ A pogos naña la naña apami amiyuñae sumo apimin vena awar kiela kilavaru, la amape pona la ala va la metava, taulu la naña amiyuñae plas ga, ana yaru nene mla kilavaru pan la, la punu ga torok ga.

¹¹ “Ana pogos naña la apisu kiela kilavaru sa ke ga nene, la amloge piowa, asuñña apisimumun yerkawa nene. ¹² Ana amligan lala tai pa piuntania, pisa pisape ‘La naña

apimi mare ga na wa, la amiyuñae aora taaga ga, ana imimi memiyuñae legiena wetelu e pupia yepisusun nene. Imimi mepisu naña ko omla kilavaru maran taaga pan la, sa ke naña omla pan imimi. ?Suri nene na sanape na sanene?’

¹³ “Ana yerkawa nene pisatamē naga, pisape ‘Mara, in na pe nekila kare ko re nene poli. Italua tepranar p̄isi rui, tesape ko oyuñae e legiena wetelu ve taaga nene, ana tesape p̄isi na nowul ko torokin ga kioñña yuñae nene. ¹⁴ Ve sanene, popon ko ola kioñña kilavaru ova ga uñña. Naga kiau sitomena ga tai nene, naña kilavaru naña nemla pan ko, sineun nesape nela mēna ga marana ve taaga va la naña apimi mare ga. ¹⁵ ?Ko ositom osape in na tařatete nekila sa naña inu sineunia, e kiau kilavaru? ?Sanape na ko opielue e yaru la naña nekila ke po pan la? Ana p̄akaiwa nini p̄isi e nene.’ ”

¹⁶ Ana Yesu pisa make kiena visena e pogos nene, pisa pisape “Ana yaru la naña asirau, p̄isi na la asumo, a la naña asumo, p̄isi na la asirau.”

Yesu pisawal kiena marena yam telu narui

Mak 10:32-34; Luk 18:31-34

¹⁷ Ana Yesu pa ke metava ma Yerusalem narui, ana

pogos naŕa amial ke e mrapplepa apavini, naga pio kiena nalogena la lualima taaga pa lua apimi puna, ana pisi pan la, pisape ¹⁸ “Amiu ayagogo ruruia. Nanagane ita tepa ke ma Yerusalem narui, naŕa pisi na ve ve piavi re, pisi na aligan Narina ne Yeririna e limana ne yerkawa lala kiena ne yaru wa lala, a amio navianena kiena ne navisaluaena mēna lala, ana pisi na la nene la aliŕere naga avisave pisi na naga monar mare. ¹⁹ Ana siraunia aligan naga e limana ne le Rom lala, naŕa pisi na la nene akirakirai viowa vania, a pisi na la akoa naga, ana pisi na asuaria naga e laki torovia vena mare. Ana pogos naŕa naga mare pae, ana e kana legiena na telu, pisi na Ntewa kilamalia sina naga.”

Anenane Semes amio Yoane, naga piun suri tai tan Yesu

Mak 10:35-40

²⁰ Ana wona ne Sepeti, naga ŕere narila luwoka nene naŕa Semes amio Yoane, apimi puna ne Yesu. Sira nene kinai e lana Yesu, piunia pisape “Inu sineunia nesape otaŕan suri tai van inu.”

²¹ Ana Yesu pisataŕe naga, pisape “? Ana ko sinoŕan osape oviun ya?”

Sira nene pisataŕea, pisape “Inu sineunia nesape otaŕan sanini: pogos naŕa

ko ovisirlua kioŕa nasuŕenena, pisi na naruu la luwoka nene akilia atotano amio ko e kioŕa yo wa naŕa metava lavisin ko, tai e lepas nen lumoŕa na ŕamarua, a tai e lepas nen lumoŕa na ŕamēli.”

²² Ana Yesu pisataŕe la, pisape “Amiu pe akilia re suri naŕa apiun ke ne poli. ? Sanape, amiu lua nene asitom asape amiu lua atorokin naŕa ita tomunpae e piala naloge viowaena nene naŕa inu monar nomun ea?”

Lalua apisa pania, apisape “Ee, imimi lua metoroki.”

²³ Ana Yesu pisa pan la luoka, pisape “Ee, lelaga naŕa pisi na amiu luwoka amun mēna ga e mēau piala naloge viowaena nene, ana suri nene naŕa amiu lua apiunia, apisape amiu lua atotano amio inu e lepasneu luwoka, suri nene naga pe kiau re naŕa nela van amiu poli. Yo la ne sanene, kiena ne la ga naŕa kau Ata naga kila ruru pe kiela, a naŕa naga pisaar pisi rui pisape pisi na la atotano ea.”

Narina ne yeririna pimin vena yuŕae kiena yaru lala

Mak 10:41-45

²⁴ Pogos naŕa nalogena taŕena la lualima nene la amloge suri nene, naŕa wolai lalua nene Semes amio Yoane apiunia, ana la sinela kari lalua. ²⁵ Ana Yesu pio la, vena aimi puna, vena naga visi van la, ana naga

pisa pisape “Ita tekilia rui p̃elaga kiena ne yaru la naña pe amlelaga re e Ntewa poli. Ita tepisu mā naña suñe lala amio yerkawa lala na yomarava nini, la sinelan asape añareran yaru tañena lala vena asu vatanon la silaga. ²⁶⁻²⁷ Ana amiu kiau nalogena lala, kiamiu p̃elaga monar ve ve sa re nene. Visae amiu yaru tai sinenan sape imi ve kiamiu yerkawa tai pona kiamiu nasumonena tai, kana mrapa nena sanini: yaru nene monar imi ve sa ga yaru na yuñae kiamiuena tai. ²⁸ Narina ne Yeririna naga kila sanene p̃isi rui, naña naga pe pimin re naña vena yaru la akila yuñae na iilaen naga poli, ana naga pimin vena naga yuñae vena iilaen lala, a vena tañan kiena malena vena ul plan yaru la ve moki.”

Yesu kila ruru kilamarakata lua

Mak 10:46-52; Luk 18:35-43

²⁹ E pogos nene, Yesu amio kiena nalogena lala asike garu Seriko, ana pogos naña amligan e pulkumali nene apano, ana yeririna la moki pañisi naña ataveve la. ³⁰ Ana kilamara kata la lua, naña lalua atoña tano e isinen mrapplepa. Ana pogos naña lalua amloge naña apisape Yesu mial ke e mrapplepa pimi, lalua apio ke asape “!Suñe-o, ko lus kiena

ne Tepet, imimi lua mesape ko sinema ye imimi!”

³¹ Ana yaru tañena lala apisin sinemimien pan lalua nene, apisa apisape “Ee, amiu lua nene añaaga.”

Ana lalua apio manene la, asape “!Suñe-o, ko lus kiena ne Tepet, imimi lua mesape ko sinema ye imimi.”

³² Ana Yesu suñalu su mrapa e yo nene, pio lalua, pisa pisape “?Amiu lua sinemiuun asape nekila ya ne van amiu?”

³³ Ana lalua apisatañea, asape “Suñe, awis, imimi lua sinemimin mesape kilamaramimi la imi wo, vena mekilila mekirava.”

³⁴ Ana Yesu sinen mie la, ana tol kilamarala, ana lalua apisu ruru ke ga suri e pogos nene, a lalua asuñalu ataveve Yesu apano.

21

Yesu pimi tol yo Yerusalem

Mak 11:1-11; Luk 19:28-40; Yoane 12:12-19

¹ Nanagane, Yesu lala apami lavisin Yerusalem narui, ana la añalivi e narin pulkumali tai sumo, kiena kia Petpas, naña teke e kunus nene naña la apio asape Kunus Na Purolip. Ana Yesu miila kiena nalogena la lua, pisape ² “Amiu lua ava e pulkumali na gare, a mesmesu e pogos naña ava loyurña ea, p̃isi na amiu lua avisu togki tai, naña amatear sike na, naga

amio narina. Ana amiu lua alupar plan la, a amiu aure ga la luoka aimi pun inu e nini. ³ Ana visae amiu lua aloge yaru tai visi van amiu, p̄isi na amiu lua avisa ga vania, avisave ‘Supe na sinenan suri mali lalua nini vena ava akila kiena yuṁaena tai wa,’ ana pogos naṁa amiu lua avisa sanene, naga kilia taṁan lalua aimi veraga.”

⁴ Suri nene pimi p̄arpoyo vena kila visena nene kiena ne navisawalena nanua sumo vim ve lelaga, naṁa naga pisa pisape

⁵ “Amiu avion va le Saeon lala, avisave

‘Amiu apisu ke ne, nanagane kiamiu p̄arin supe pam ke pun amiu narui.

Naga pe yaru tai naṁa kiena sitomena to ga tano, kila naga kus ga togki, togki tai naṁa ve tokaki ga, naṁa pe ninus ke ga wa.’ Sek 9:9

⁶ Ana nalogena lalua nene apano, ana lalua akila sa naṁa Yesu pisa. ⁷ Ana pogos naṁa lalua aṁere togki nene amio narina apimi, ana lala aṁatetae ṁala kulkota lala e wos nen togki lalua nene, ana Yesu naga pa totano meta e navetokak.

⁸ Ana yaru la mokliu naṁa aṁatetae ṁala kulkota lala suvileviles nen mrapplepa, ana yaru laṁasia apa ate ṁaṁela lala pitomi aṁatetae ṁena ga, vena togki kiena ne Yesu yali ea. Ve sanene, akila sa naṁa la apatanon

Yesu sa naṁa naga pe pupia p̄arin supe tai. ⁹ Ana la amial ke apano vena ava loyuma Yerusalem, ana p̄ina na yeririna la naṁa asumon Yesu, amio la naṁa asiraunia, asuṁa apiovionia sanini, apisa apisape

“!A ke suwala, po na po! !
Teyeluar naga naṁa pe
lus kiena ne Tepet tai
nene!

!Ntewa na mava, ko ovisa
ruru naga nene naṁa
pimi e kioṁa kia!

!Amiu nae ma e peni metava
amiu ṁena ga ayeluar
naga!” Yauena 118:26

¹⁰ Ana pogos naṁa Yesu pa loyuma e Yerusalem, yaru lala sinela pulaula, ana la asuṁa akila ke visena la moki, asuṁa apiuviunia, asape “?Yaru nene naga ai?”

¹¹ Ana yeririna la naṁa apimi amio Yesu, la apisa-taṁela sanini, apisa apisape “Nanene na navisawalena nene naṁa naga molue e pulkumali nae Nasaret garu Kalele, naṁa kiena kia Yesu.”

Yesu ṁene plan la naṁa asuṁa apuliwilin ke suri e Yuṁa Wa Mana ne Ntewa
Mak 11:15-19; Luk 19:45-48; Yoane 2:13-22

¹² Ana Yesu pa e Yuṁa Wa ṁana ne Ntewa, a e pogos nene naga pisa sane yaru la moki liu naṁa la asuṁa e kopkop na yuṁa nene. La nene la asuṁa akila ke ga yuṁaena lala natauluen kilavaru, naga nene e lepas nalaena lala a e kuṁaṁaena na Yuṁa Wa nene, ana la

asumã akila kewia ke ga yaru lala. Ana pogos naþa Yesu pisu suri nene, naga pe kekaran re poli. Ana naga pa mēne plan la, naga kawepu narin varvara kiena ne yaru na keueen kururu varu lala, a naga koantetain lele na totanoena kiena la naþa apuliwilin ke kupa lala. ¹³ Ana naga pisa pan la, pisape “Ntewa pisa e kiena Visena Wa, pisape ‘Pisi na la avisa m̃au Yumã Wa avisave naga yumã na leniena,’ ana amiu apilon þisi pimi sa ga puluve m̃ana yaru na vin-auena la narui.”

¹⁴ Ana pogos naþa Yesu sike e Yumã Wa nene na wa, kilamara kata lala amio laulu lala apimi puna, ana naga kila ruru la sina. ¹⁵ Ana yerkawa lala kiena ne yaru wa lala, amio navianena na navisaluaena lala, apisu yumãena wo kiena ne Yesu la nene, a amloge m̃ena ga naþa sisi lala asumã ga apiovion ke ga wa, asape “! A ke suwala, pona po! Teieluar naga naþa naga pe lus kiena ne Tepet nene!” ana yerkawa la nene sinela mimi manene la. ¹⁶ La sinela mimi sanene, ana la apisa pa Yesu, apisape “?E sanape, ko omloge m̃a visena naþa la asumã apisa ke ne?”

Ana Yesu pisatam̃e la, pisape “Ee, nemloge m̃a ne. ? Ana sanape, amiu asitom ke asape visena nene piowa ga? Pona pe apuloli re Visena Wa kiena ne Suþe naþa pisa,

pisape

‘Ntewa o, ko okilia okila nin sisi kokan lala, amio m̃ena sisi tomtom lala, amieluar ruru ko paþisi.’” Yauena 8:2

¹⁷ Ana Yesu mligan la nene, molue ke sina ga petan Yerusalem, pa e narin pulku-mali naþa Petani, pa mono ea.

Purlaki tai naþa pe þar re mras poli

Mak 11:12-14,20-24

¹⁸ Ana Yesu mon m̃a e nene, ana yemlagi kolulagi naga pisape wasuþe sina va Yerusalem, a naga sumã mial m̃a pavini, ana naga mloge sane viso karia. ¹⁹ Naga kira pa e isinen mrapplepa, naga m̃al purpiliva tai, naþa naga m̃as ga moki, ana pe mras su re e poli. Ana Yesu pisa pa purlaki nene, pisape “Ko ove owar re si mrasnomã pogos tai.” Naga pisi sanene, ana veraga ga purpiliva nene mano taþa nenaga.

²⁰ Nalogenã lala apisu naþa purlaki nene pimi mano sanene, ana sinela kurkur paþisi. La apiun tai Yesu, apisape “?Ya ne kila purpiliva nene mano ke veraga sanene?”

²¹ Ana Yesu pisatam̃e la, pisape “Lelaga nevisa van amiu, visae amiu aviawa m̃arera e inu, naþa amiu kiamiu sitomena ve yeve lua re, þisi na amiu m̃ena ga akilia akila sanene, a þisi na amiu akilia akila m̃ena

ga va re laa na wa taulu nene. Sane visae amiu avisa va pupia kunus nene, avisave 'Osum̃alu otove oula ova e sive,' p̃isi na ve sanene narui. ²² A visae amiu avi-awa kawa e Ntewa, na pa amiu alelaga kemua lelaga, p̃isi na amiu akilia atol suri ya na pa amiu amlen vanonia, amiu aviun tan naga."

Nasumonēn le israel lala sinelan asape avisalu p̃ar Yesu

Mak 11:27-33; Luk 20:1-8

²³ Ana Yesu p̃asu p̃e si pa loyuma e Yuma Wa Mana ne Ntewa, ana naga pa suna pian ke sina ga yaru lala. Ana yerkawa kiena ne yaru wa lala, amio nasumonena lala kiena ne le Yu lala, apimi puna, apiun tania, apisape "?Ko osuma okila ke suri la ne sanene e yo nini e kia kiena ai, a a mena ga na pa tam̃an ko sape okila ve sanene?"

²⁴ Ana Yesu pisatame la, pisape "Poga ga, ana inu mena ga nesape neviun navunena tai van amiu wa. Visae amiu avisatame ruru kiau naviunena nene, p̃isi na nekilia nevisawal van amiu sanape na pa nekilia nekila ve sanene. ²⁵ Poga ga, kiau naviunena sanini narui, sape: ?Nakeena na pa Yoane naga kila mare ga nanua e yaru lala, naga suri tai na pa Ntewa naga pisa pania pisape naga monar kila, pona yaru ga la apisa pania?"

Ana naviunena nene kiena ne Yesu kila na la apisi ga pan la narui, na pa la asuma apisa apisape "? Pisi na ita tevisa sanape na vania? !Tevisuaruruia! Visae ita tevisa tevisave nakeena nene Ntewa naga pisa pa Yoane, p̃isi na yaru nene viun si tan ita, visave vanon ya ne ita pe temlelaga re e Yoane poli. ²⁶ Ana siraunia ita tapatete si tevisa tevisave nakeena nene, yaru ga la apisa pa Yoane, vanon na pa yeririna la nene la amlelaga ke marera p̃isi rui, asape Yoane nene naga pe navisawalena na lelaga tai kiena ne Ntewa, ana pe pon re yeririna la nene sinela kar ita poli." ²⁷ Ana kiela sitomena la ne sanene narui kila la apisatame Yesu sanini, apisa ga apisape "Imimi memninue ga."

Ana Yesu pisa pan la, pisape "Visae sanene, p̃isi na inu mena ga, tapatete nevisa van amiu nevisave ane pisa pan inu pisape nekila yumaena la ne sanene."

Pakaiwa kiena ne yaru tai amio narina lalua

²⁸ Ana Yesu pisa pan la, pisape "Amiu asitomli suniena nini. Yaru tai, narina na yermene lua, ana yaru nene pa pisa narina na pa mearu, pisa pania, pisape 'Naruu, sineun nesape pane na ko ova oyuma e kata lokilmasma.'"

²⁹ "Ana narina nene pisatame, pisape 'Peraga, yepemavi.' Ana pe piavi re poli,

yaru viu nene sitom si arimana, ana naga pilon kiena sitomena, ana pa miyuñae sa naña arimana pisa pania. ³⁰ Ana arimana ne lalua nene naga sitom ke sape p̃isi na narina nene tařatete va yo, ana pisa si visena nene pan narina nasirau, ana narina nene pisatañe ruruia, pisape ‘Poga ga ata, p̃isi na neva ke nanagane ga ne,’ ana siraunia, ana naga pe pa re si poli.”

³¹ Ana Yesu piun tan la, pisape “? Lalua nene, ane kila sa naña arimala sinenania?”

Ana lala apisatañea, apisape “Mearu.”

Ana Yesu pisa pan la, pisape “Ee, ana lelaga nevisa van amiu, nanagane na sanene narui. Inu nesuñã nepisu naña yaru viowa la moki sane yaru na warpoloen takis lala, amio sira na mrapplepa lala, la ke naña ape yeririna viowa la nene, ana nanagane la asuñã akekaran ke naña vena aimi loyuñã e nasuřenena kiena ne Ntewa, la asuñã apilon la ke rui. Ana nepisu sane amiu asike la varaun la, asike la perina pařisi wa.

³² Ana pogos naña Yoane Nakeena naga pimi, naga pian amiu e řelaga na mrapa naña mesmesu, ana yeririna viowa la nene amlelaga e naga. A amiu ñena ga, amiu apisu suri la nene, ana amiu na pe apilon amiu re

lelaga poli, a pe amlelaga re nenaga.”

Pakaiwa na yeririna viowa la naña apisuar lokilmãsmãs tai

Mak 12:1-12; Luk 20:9-19

³³ Ana Yesu pisi ke pan la na wa, pisa pisape “Amiu ayagokon ruru si řakaiwa tařena nini, naña pisayu yerkawa tai, amio kiena lokilmãsmãs tai. Yaru nene kila ruru kiena yo nene naña kila kove m̃arera tai telivi piora ea, a kila kana lena navieplanen was nen m̃asmãs, a kila ñena kana lele tai naña pa metava naña yaru kilia wiyu va se ea, vena visuar lokilmãsmãs nene.

“Ana e pogos tai, yerkawa nene sinenan sape yalor re va e purvanua tařena tai, ana naga mligan kana lokilmãsmãs nene e limana ne yaru la řasia ayuñãenia, ana aul vania. ³⁴ Ana yerkawa nene pa suñã perina pano-o, ana naga pisu kilale pisape nanagane pogos na mramãsmãs marua narui. Ana naga mligan kiena yaru la ava si puna ne la naña asike e kana lokilmãsmãs nene vena awar kiena kilavaru na mras nen m̃asmãs komřasia, naña la nene monar aul vania. ³⁵ Ana poglis naña kiena yaru la nene apimi, ana yaru tařena la nene añe la, naña tai la añe ga naga, a tai asuñar naga mare, a tařena sina akoveñar naga mare.

36 “Ana yerkawa nene mligan si kiena yaru taþena laþasia, ana la moki la sane, ana la naþani akila si þelaga maran taaga sa ke ga pan la. 37 Ana yerkawa nene sitomyu þelaga kiena la nene, ana naga pisape ‘Inu monar neligan ga naruu vano, þisi na monar avatanon naga,’ ana naga mligan narina wawa napo nene pano. 38 Ana pogos naþa apisu naga, asumã apisavisa pan la, apisape ‘Naga nene na narina ne yerkawa ke narui. Yaru ke nanene narui, naþa visae yerkawa nene kovio, þisi na naga ke narui naga kus porotano nene sane lalimana ne arimana. Popon ita towemãr m̃ena ga naga mare, ana þisi na ita ga tekilia tokus porotano nene ve kieta.’ 39 Ana sanene narui atarar naga, aþure lua naga petan lokilmãsmãs pa vanua, ana amemãr naga mare.”

40 Ana Yesu piunia, pisape “? Pogos naþa yerkawa nene imi sina, þisi na naga kila sanapen la naþa asumã apisuar ke kiena lokilmãsmãs nene?”

41 Lala apisatam̃ea, apisape “Yaru viowa la nene, þisi na yerkawa nene wemãr la, monar amare e þelaga tai naþa m̃arera viowa vaþisi. Siraunia, naga ligan kiena lokilmãsmãs e limana ne yaru wo taþena lala, naþa þisi na akilia auli mesmesun vania e kana pog nena.”

42 Ana Yesu pisa pan la, pisape “Visena tai teke e Visena Wa kiena ne Ntewa, pisape

‘Kilavaru nene, yaru na yuñāenen yuñā lala, apisa apisape piowa ga, akoven rui.

Ana nanagane, kilavaru nene pimi pe kilavaru wo na mrapun yuñā, naþa uarar yuñā m̃arera.

Suri nene, naga Ntewa ga kila, a imimi mepisuiā na po paþisi.’ Yauena 118:22

“? Visena nene na amiu apuloli m̃a pogos tai rui, pona peraga yo? 43 Inu nevisa van amiu, þisi na Ntewa lalua kiena nasuþenena vetan amiu, ana þisi na la va yaru taþena lala naþa kiela malena lala kilia war mras wo lala, torokin naþa asike loyumuã ea.

44 “Ana visae yaru tai loru e kilavaru nene, þisi na si kare naga vaþisi, tasnena wororowa make ga, pona visae kilavaru nene loru e yaru tai, þisi na kilamumu yaru nene kila kare naga vaþisi.”

45 Ana pogos naþa yerkawa kiena ne yaru wa lala amio Varasi lala amloge þakaiwa kiena ne Yesu la nene, akilia naþa naga sumã pisayu la ke sanene. 46 Kila narui lala sinela kar naga, sinelan asape auarar naga, ana akila þele ga komin amaraun manene laa þina na yeririna la, naþa amlelaga asape Yesu

naga navisawalena kiena ne Ntewa tai.

22

Pakaiwa na ãpaãgena na talopaena

Luk 14:15-24

¹ Ana Yesu pis sina ga pan la e ãakaiwa, pisa pisape ² “Pelaga kiena ne Ntewa naãa pio yaru lala apimi loyuma e kiena nasuãenena sanini: Parin suãe tai kila ruru pupia kinanena tai e ãpaãgena na talopaena kiena ne narina. ³ Naga piun tan yaru la moki rui naãa yoko aimi e ãpaãgena na talopaena nene, ana pogos naãa mligan kiena yaru na yumaena lala vena ava aure la nene aimi, ana la nene yepel mavin si imiena. ⁴ Ana ãarin suãe nene pisa pan kiena yaru na yumaena taãena lala, pisape ‘Amiu towe awasuãe amiu ke sina ga avano, vena avisa kiau visena nene van la, avisavenua ita toãe puluk la rui, amio mãena ga suri mali taãena lala naãa amlapa ruru po, ana suri punu ga lala e kinanena nene tekila ruru la pa rui. Avisava van la avisave monar aimi lele taaga amio ita e ãpaãgena nini.’

⁵ “Ana la apa apisa pan la sanene, ana la nene asitom korenan ga visena kiena ne ãarin suãe nene, lala sinelan asape asuma akila ga suri naãa la sinelania. Tai pa kana lokove, a tai suma ga pisuar ma kiena yuma na

wilwilinen suria, ⁶ a laãasia apuarar yaru na yumaena kiena ne ãarin suãe la nene, akila piowa pan la, ana amemomãar la. ⁷ Ana ãarin suãe nene sinena mimi, ana mligan kiena li na mara lala apano, ana amãe yeririna viowa la nene amarmare, a asikapi kiela pulkumali.

⁸ “Ana ãarin suãe nene pisa pan kiena yeririna lala, pisape ‘Kinanena nene tekila ruru ãisi rui, ana la naãa nepio la ãisi vena aimi ea, la pe pon re si aimi poli narui, teligan la. ⁹ Ana inu sineun nesape amiu ataveve narin mrapa taãena lala, ana yaru ai la naãa amiu alualia, avio la vena aimi e ãpaãgena nini.’ ¹⁰ Ana kiena yeririna lala apano akila sanene, aãure yaru la apimi, pe suri korena ga naãa visae yaru wo lala pona yaru viowa lala, aimi ga sanene vena akokonia ruru yo na ãpaãgena nene.

¹¹ “Pogos naãa la asike loyuma e yo nene, ana ãarin suãe nene pimi vena talopan la naãa apimi, ana e pogos nene naga pisa lala yaru tai, naãa pe miyen re moãa kulsota wo naãa torokin ãpaãgena poli, mien ga kulsota tai naãa pe taãena ga. ¹² Ana ãarin suãe nene piun tan yaru nene, pisape ‘?Mara, ko opimi loyuma e yo nini sanape, naãa ko pe omiyen re moãa kulsota wo na ãpaãgena poli?’ Ana yaru nene pe pisa re si suri tai

pan poli. ¹³ Ana þarin suþe nene pisa pan kiena yaru na yuþaena lala, pisape ‘Amiu aviar ruru limana luwoka amio lana luwoka, ana amiu akoven naga va vanua, e yo malolo, e yo naþa þisi na naga suþa taglue, a suþa kar luen ga maluena ea.’”
¹⁴ Ana Yesu pisa, pisape “Ntewa naga pio yeririna la punu ga, ana ve ve moki re naþa naga wereplan la ave kiena.”

Suri kiena ne Ntewa a suri kiena ne Sisa

Mak 12:13-17; Luk 20:20-26

¹⁵ Ana Varasi lala apanon ataþali naþa alual naviunena mārera laþasia vena ataþali Yesu ea, naþa naga visataþe þele ga. ¹⁶ Lala apisayu m̄aga pano-o þisi narui, ana lala mligan kiela nalogena laþasia amio m̄ena ga laþas e þegas kiena ne Erot, apimi puna ne Yesu. Ana la nene akila kotalia naga e visena wo lala, la apisa apisape “Navianiena, imimi mekilia naþa ko ope yaru mesmesu tai. Kioþa visena lala punu ga pe lelaga, a ko opian ke yeririna lala e þelaga naþa Ntewa naga sinenania. Ana ko pe opisu re ga yaru laþas po poli, ana ko opisu yeririna punu ga marana taaga ga. ¹⁷ ?Suri ne nanene narui, imimi mesitom mesape ko ovisali van imimi, naþa kieta navisaluaena pisa sanape? ? Pisa pisape, mesmesun ga

naþa ita le Yu lala toul takis va Sisa, naþa pe þarin suþe kiena ne le Rom lala, pona pe mesmesu re na sanene poli?”

¹⁸ Ana Yesu kilia m̄aga naþa la sinelan asape akila kare naga, ana naga pisa pisape “Kiamiu visena lala po naþa po, ana losinemiu lala piowa a kona rui. ?Amiu asuþa ataþali inu ke sanene vanon ya? ¹⁹ Poga ga, amiu ala kilavaru na ulen takis tai imi.”

Ana amla tai pimi, akian pania, ²⁰ ana Yesu piun tan la, pisape “?Ane marana na teke e narin kilavaru nene? ?A ane kiena kia nene?”

La apisa apisape “Marana ne Sisa nene, a kiena kia m̄ena ga.”

²¹ Ana naga pisa pan la, pisape “Poga ga, suri naþa kiena ne Sisa, amiu ala va Sisa, a suri naþa kiena ne Ntewa, amiu ala va Ntewa.”

²² Ana pogos naþa la amloge visena nene, amilan paþisi, ana amligan Yesu aþure apano.

La naþa amare, þisi na amal sina

Mak 12:18-27; Luk 20:27-40

²³ Ana e ke e legiena nene narui, le Satusi laþas apimi puna ne Yesu, la sinelan asape aviun suri tai tan naga e lepas naþa lala amlelaga mārera ea, naþa la amlelaga asape yaru la naþa amare, taþatete amal sina e legiena maro. Vanon suri ne nanene

apiun tan Yesu sanini, apisa apisape ²⁴ “Yesu, ko naþa ope navianena, imimi sine-mimi mesape meviun tan ko, mesape sanape e visena tai naþa yermarua Mosis pisa nanua sumo. Naga pisa pisape visae yaru tai mare tan wona, naþa pe narila re poli wa, naga wenla monar talopa sina amio letano nene vena ve wona. E þelaga nene, þisi na sira nene kilia war narila tai, vena uarar kia kiena ne wona na yermene naþa mare ne, vena kia nene mali mþaga. ²⁵ Poga ga, ana e umþa tai pun imimi, welelai la olua. Kiela mþearu talopa, ana naga pe narina re tai poli wa ana naga mare tan wona, ana wenla nasiraunia þere leinia pe wona. ²⁶ Ana wenla nene naga mare tan mþena ga, a welelai na telu kila mþena ga sanene, pano-o tol welelai na olua, la punu ga amare tan sira nene. ²⁷ A siraun e wona la punu ga, sira mþena ga nene mare. ²⁸ ?Ana ko ovisali suri nene: e legiena maro, pogos naþa apisa ke apisape þisi na yaru la amal sina, þisi na sira nene na ve wona ai, vanon naþa naga talopa amio punu welelai la olua nene þisi rui?”

²⁹ Ana Yesu pisa pisape “Peraga, kiamiu sitomena pa pe wowe la, vanon naþa amiu pe akilia re ya naþa Visena Wa kiena ne Ntewa pisa poli, a amiu pe akilia re mþena ga ya naþa naga kiena nanareraena keviu kilia kila

poli. ³⁰ Pogos naþa yaru lala amal sina, þisi na lala ave saga navisi kiena ne Ntewa lala ma e peni narui, ana þisi na ve akila re si suri nene natalopaena. ³¹⁻³² ?A e lepas na malena si nene, ana Visena Wa tai kiena ne Ntewa sumþa ga naga kilia iila ita e nene, pona amiu na pe apuloli re poli yo wa? Visena nene pisa sanini, pisape ‘In na nepe Ntewa kiena ne Epraam, Aisak, a Sekop.’ ? Ana visena nene pisa ya? La telu nene la amare e yomarava nini nakonua rui, ana kas moki na moki þaro rui, ana Ntewa pisa ga visena nene na wa, naþa pisape naga pe kiela Ntewa. Sanene na kiena visena naga kana kinsasia sape la telu nene la amare e yomarava, ana la amal kemua puna na wa. Ntewa pe sinenan re sape kiena yeririna lala la ave yaru naþa mare la poli, ana naga sinenan sape naga ve Ntewa kiena ne yeririna la naþa la amali.”

³³ Ana pogos naþa þina na yeririna lala amloge visena kiena ne Yesu nene, la amilan suri lala naþa naga sumþa pian la ke ea.

Navisaluaena na keviu lua
Mak 12:28-34; Luk 10:25-28

³⁴ Ana pogos naþa Varasi lala amloge naþa Yesu kila Satusi lala pe akilia re si suri tai naþa avisa poli, ana la akila narin viorena tai þisi, ana apimi puna Yesu, la mþena ga asape akilialia.

35 Ana la yaru tai, naþa la apisu sane naga pe manmarua ruru e Navisaluaena, naga piun naviunena tai pan Yesu, pisape ³⁶ “?Navianena, inu sineun nesape ko ovisawal li, ovisave e visena la punu ga naþa sike e kieta Navisaluaena, nape naþa keviu, a to metavan la taþena la sane?”

37 Ana Yesu pisa pania, pisape “Visena Wa pisa sanini, pisape ‘Ntewa na mava naþa naga pe kioma Ntewa, ko monar ositom naga e losinema wetelu, a e kioma malena wetelu, a e kioma sitomena wetelu.’ ³⁸ Nanene naga pe navisaluaena þesia, a naþa naga keviu paþisi. ³⁹ A navisaluaena na lua nene naþa naga keviu mēna ga sa ke ga nasumo nene, naga pisa sanini, pisape ‘Ko monar ositom nalavis puma lala, okila wo van la, ve sa ke naþa ko ositom ko mēaga.’ ⁴⁰ Navisaluaena la lua nene, ape purþesen navisaluaena taþena lala kiena ne Mosis, amio mēna ga visena kiena ne navisawalena lala, naþa asike e kieta Tusi Wa.”

Navisaarena naga pe Ntewa kiena ne yermarua Tepet

Mak 12:35-37; Luk 20:41-44

41 Ana e pogos naþa Varasi lala asike veraga amio Yesu sanene, naga mēna ga piun naviunena tai pan la, pisape ⁴² “?E kiamiu sitomena lala,

asape þisi na Navisaarena mālivi e lus kiena ai?”

Ana la apisatamea, apisape “Þisi na naga ve lus kiena ne yermarua Tepet nene naþa naga pe þarin suþe sumo.”

⁴³⁻⁴⁴ Ana Yesu piun sina ga tan la, pisape “?Ee, naþa amiu apisa na pe lelaga, ana sanape naþa Ninuna Wa sike e Tepet, ana Tepet pisi, pisa pisape

‘Ntewa na mava pisa pa kiau Suþe, pisape

‘Ko ototano pun inu e lepas na þamarua, otomate ma vano-o, þisi na inu neligan kioma nasinekar lala aimi ve sa narin takue na vilanvanen lama ea.’ [’] *Yauena 110:1*

“E yo nene tepisu naþa Tepet naga sumā pio Navisaarena nene pisape Navisaarena naga pe kiena Suþe. ⁴⁵ ?Ana vanon naþa Tepet pisa sanene, a sanapen naþa amiu apisa apisape Navisaarena nene naga moluega e Tepet, ana naga pe kiena lus ga tai?”

⁴⁶ Ana pe yaru re si tai naþa kilia visa si navisatameena tai va Yesu, a siar mēna ga e legiena nene, pe yaru re si tai naþa kilali si Yesu e naviunena la poli.

23

Yesu pisi marera paþisi pa nasumonena lala nalotena
Mak 12:38-39; Luk 11:43,46, 20:45-46

¹ Ana e pogos nene, Yesu pisi pa ĩina lala, amio mēna kiena nalogena lala, pisape ² “Lelaga kemua naĳa nana-gane, navianena na nav-isaluaena amio Varasi lala, naĳa la ke narui la akus lelena ne Mosis vena avisa-wal kinas nen navisaluaena lala kiena ne Ntewa. ³ Ana visae ve sanene, ana amiu na monar alogear la, akila ve sa naĳa la apisa. Ana amiu na ve ataveve re kiela ĩelaga lala, komin naĳa pe akila re suri la naĳa la asuĳa apisa ke pa yaru taĳena la poli. ⁴ Ana la asuĳa asikol ke si narin nav-isaluaena la moki naĳa la ga akila, naĳa mārera paĳisi, naĳa amāreran ke pa yeririna lala vena alogear la. Asumā akila ke yuĳaena la nene sa naĳa akon ke suri la naĳa urmi paĳisi e yeririna lala, ana lala na pe akekaran re nenaga naĳa vena aiila la na akuspae ga suri la nene.

⁵ “Lala na aĳarwar la manene la e kiela yuĳaena lala wa, naĳa lala akila ga vena aware kilamarana yaru taĳena lala. Amiu apisu ke kiela narin pultaga la nene, naĳa akon Visena Wa kiena ne Ntewa sike e la, naĳa apiari e piamenala a e pilepile na limala. La asuĳa sinelan ke asape kiela lala na monar ve kerkeviu vaĳisi, taulu yaru taĳena lala. Amiu apisu mēna ga naĳa lala apil mēla in kulsota na leniena lala piayavi paĳisi. Ana la

apilave manene la e suri la nene, a la sinelan ga asape yaru la ayeluar la ea. ⁶ A e pogos na ĩaĳagena lala a e loyuĳa na lotena mēna ga lala, la sinelan naĳa silaga asape atoga tano e lelen yerkawa lala, ⁷ a pogos naĳa visae la ayaloro e lelen na wilwilena, sinelan asape monar yaru lala avatanon la, a avio ruru la avisa avisave ‘!Oo navianena wo, pokolu-lagi!’

⁸ “Ana amiu na, amiu ki-amiu navianena taaga ga rui, a amiu na sa naĳa na mratava taaga ga, aĳa visae ve sanene na amiu ve ataĳan re si yaru lala avio amiu laĳas avisa avisave ‘Navianena.’ ⁹ Ana ĩisi na amiu ve avio re yaru e yomarava nini avisave arimamiu, vanon naĳa amiu na Arimamiu na taaga ga, naĳa naga sike ma e peni. ¹⁰ A ĩisi na amiu ve ataĳan re yaru la avio amiu laĳasia avisave amiu ave kiela nasumonena, komin naĳa amiu na, ki-amiu nasumonena na taaga ga, naĳa Navisaarena nene. ¹¹ Kiamiu yerkawa ai naĳa naga to laa metava, naga monar imi ve sa ga yaru na yuĳae kiamiuena. ¹² Ana yaru ai naĳa naga ga pisirlua naga vena vim ve yerkawa, ĩisi na Ntewa kila naga suĳa tano. Ana yaru naĳa naga ga kila naga suĳa tano, ĩisi na Ntewa visirlua naga va metava.”

Yesu pisawal napiowaena kiena ne nasumonena nalotena lala

Mak 12:40; Luk 11:39-42,44,52, 20:47

¹³ Ana Yesu pisa pan la, pisape “! Amiu navianena na navisaluaena lala amio Varasi lala, ake! Amiu akila kare amiu paḡisi wa, ḡisi na viowa van amiu vaḡisi, komin naḡa kiamiu visena lala pona po, ana losine-miu lala piowa a kona rui. Yaru la sinelan asape aimi loyuḡa e nasuḡenena kiena ne Ntewa, ana amiu asuḡa akotawela ke ga e marala, vena ve aimi re si loyuḡa narui, a metavana, amiu ḡena ga pe apimi re loyuḡa poli.

¹⁴ “! Amiu navianena na navisaluaena lala amio Varasi lala, ake! Amiu na apiowa ga. Amiu na asuḡa aḡure piavin ke kiamiu leniena la paḡisi, ana apisokani ke ga ne, vanon naḡa e ke e pogos nene, amiu asuḡa akila kotalia ke letano la nene, vena avinaun kiela suri lala. Vanon suri ne nanene, ḡisi na kiamiu nakoarena ḡarera re la sane.

¹⁵ “! Amiu navianena na navisaluaena lala amio Varasi lala, amiu na amiyuḡae piowa ga! Amiu akekarana naḡa ayaloro e waa lala, vena ava e purvanua taḡena lala, vena akilali naḡa aure yaru lala ataveve amiu. Ana pogos naḡa amiu ataulu tai imi narui, ana ve ve piavi re naga la make kiamiu ḡelaga

naḡa piowa, va viowa la sane, taulu amiu sina.

¹⁶ “! Ake, amiu na sumonena lala, na ape kilamara ḡala ga lala! Akila kare amiu paḡisi wa, ḡisi na viowa vaḡisi van amiu. E pogos naḡa yaru lala apisa kia kien suri tai vena kila kiela navisaarena suḡalu ḡarera, visae avisa avisave ‘Nepisa lelaga nene, Yuḡa Wa ḡana ne Ntewa na ḡeke ne,’ ana sirauḡ, visae akilaro sina navisaarena nene, amiu apisape ‘Nanene na naga poga ga nene, ve ve suri re tai.’ Ana visae avisa avisave ‘Nepisa lelaga, suri la naḡa pe kol, la ne asike e Yuḡa Wa ḡana ne Ntewa ne,’ amiu apisa apisape visena nene na ḡarera paḡisi, taḡatete si akilarovia. ¹⁷ Aa, amiu na kilamaramiu ḡala ga, a ḡarimiu pe wowe. ?Ya ne pe suri wa manene la sane: suri la naḡa pe kol nene, pona Yuḡa Wa ḡana Ntewa naḡa kila kol nene pe suri wa tai?

¹⁸ “A visae yaru tai visa visave ‘Nepisa lelaga nene, wonta na ḡeke ne,’ amiu apisa apisape visena nene pe suri korena ga. A visae naga visa visae ‘Nepisa lelaga nene, kuḡaḡaena nane ḡeke e wonta,’ nanagane amiu apisa apisape visena nene naga ḡarera paḡisi, yaru taḡatete kilarovia. ¹⁹ !Sa naḡa nepisa rui, amiu ape kilamara ḡala ga! ?Ya naḡa pe suri wo manenea: kuḡaḡaena naḡa ḡeke e wonta, pona wonta naḡa

kila kuḗaḗaena nene pe suri wa tai? ²⁰ Amiu na monar avisu kilale suri la nene, vanon naḗa naga naḗa ki wonta veḗa kila kiena visena va māraera, naga suḗa ki ke mēna ga amio kuḗaḗaena naḗa suḗa e wonta. ²¹ A yaru naḗa ki ke Yumā Wa Mana Ntewa, naga ki ke mēna ga yerka wa naḗa māna yumā, ²² a yaru naḗa ki ke pa ma e peni, naga suḗa kipran ke mēna ga lele natotanoena wa kiena ne pupia Parin Suḗe keviu nene, ana visae ve sanene, naga suḗa ki mesmesun ke nena Ntewa narui.

²³ “! Amiu navianena na navisaluaena lala, amio Varasi lala, ake! Amiu akila kare amiu paḗisi wa, ḗisi na viowa manene van amiu vaḗisi. In na nekilia māga naḗa amiu asuḗa apisu ruru ke silaga, naḗa visae amiu awar kamiu kinanena ve lualima, ḗisi na monar ala tai va e Yumā Wa māna ne Ntewa, sa naḗa navisaluaena naga suḗa pisa, a amiu asuḗa akila ke sanene e kiamiu suri punu ga, pano tol mēna ga narin māka lala a suri mēna ga la ne sane mrasil. Ana pupia suri la naḗa navisaluaena naga pisa, ana amiu na pe asitom re nena ga, sa naḗa naga pisa pisape amiu na monar amesmesu ruru wo, a amiu monar asitom yaru taḗena lala, a amiu monar auarar kiamiu navisaarena lala. Visae amiu sinemiun

awarar narin suri la ne sanene māraera, nanene na poga ga, ana pupia suri la nene naga popon visae amiu akila rui, ana peraga.

²⁴ “! Amiu nasumonena lala, ake, amiu na ape kilamara ḗala ga! Amiu asuḗa akila ke sa naḗa pogos naḗa amiu amun suria, ana amiu asitom manene la naḗa ve akilalu re naḗa akilalu narin neneno tai naḗa naḗa talilu pito teke e māmiu piala, ana amiu pe apisu kilale re naḗa amiu asuḗa asinomlaunlae ke puluk la naḗa asike e poli.

²⁵ “! Amiu navianena na navisaluaena lala amio Varasi lala, ake! Amiu akila kare amiu paḗisi wa, ḗisi na viowa van amiu vaḗisi. Amiu asuḗa ataveve ruru ke narin navisaluaena lala e lepa na kevanen māmiu piala amio kamiu pialo lala, ana amiu asitom ke asape kiamiu suri punu ga mekiki ruru narui. Ana kiamiu pialo la nene punu ga pulen ga kinanena na vinauena naḗa amiu aḗar e ḗelaga na sinesunena ga lala. ²⁶ Amiu Varasi lala, amiu ape kilamara ḗala kemua lelaga. Visae amiu sinemiun asape kamiu pialo amio māmiu piala lala imi ikiki ruru wo silaga, ḗisi na amiu ve akonia la re si e kinanena la naḗa kiamiu mlamulena viowa sike ea.

²⁷ “! Amiu navianena na navisaluaena lala amio Varasi lala, ake! Amiu na akila kare amiu paḗisi

wa, p̃isi na viowa van amiu vaṗisi. Amiu na sa ga tampona na yaru naṗa mare, naṗa amioa wosia miyuwowo na miyuwowo ruru po paṗisi, ana e losa na pulen ga puriu na yaru mare nene, amio tasnena naṗa menun ke na wa. ²⁸ A sanene, na visae pogos naṗa yaru la apisu ke yepas nemiu vanua, p̃isi na lala asitom ke asape amiu na amesmesu ruru ke ne, ana peraga, e losinemi lala na apuleni ga visokanena a mlamulena viowa lala.

²⁹ “! Amiu navianena na navisaluaena lala amio Varasi lala, ake! Sila ga na amiu asuṃa apisi ke ga e kulugomiu. Amiu na asuṃa ga apisuar ruru ke tampona kiena ne navisawalena na sumo lala, ana amiu asuṃa ga apaia ke ṃena ga kilavaru na nasitoṃalena kiena ne yaru mesmesu lala, ana sanape: ? Amiu na asitom ke asape amiu amesmesu ruru ṃena ga amio la nene? ³⁰ A amiu asuṃa apisa ke apisape visae amiu amal ke rui e pogos kiena ne repimiu la na nanua sumo nene, vera na amiu ve amio re la nene e pogos naṗa la aṃe moṃar navisawalena lala kiena ne Ntewa. ³¹ Ana e kiamiu visena na visokanena nene, amiu asuṃa apisa kare amiu ke sina ga, vanon naṗa visena nene, kana kinasia sane pisape amiu ape lus ruru nenaga kiena

ne repimiu lala li nawe-moṃaren navisawalena lala. ³² Poga ga, amiu ayuṃaen va ṃaga, amiu akilali naṗa akila make yuṃaena nene naṗa repimiu lala la asiar p̃esan nanua sumo rui.”

Nakoena kiena ne li na-sumonena nalotena lala

Luk 11:47-51

³³ Ana Yesu pisi ṃarera ke pan la na wa, pisa pisape “Amiu na sa nena ga loṃara lala. ? Amiu asitom asape amiu akilia aure matan kiamiu nakoena e lele naloge viowaena? ! Peraga! ³⁴ Pisi na visae neiila navisawalena lala aiṃasu, amio yaru lala naṗa ape manmarua ruru e visena kiena ne Ntewa, amio navianena na navisaluaena lala, visae aiṃasu pun amiu, ana p̃isi na amiu awe moṃar laṗasia amare e laki torovia, a laṗasia amiu awela e kiamiu yuṃa na leniena lala, a p̃isi na aṃene plan la ṃena ga e kiamiu pulkumali lala. ³⁵ Ana p̃isi na amiu akilalue ga ve sanene van la vano-o, ana p̃isi na amiu ke ga narui naṗa akus nakoena vanon marena kiena ne yaru mesmesu la punu ga nene naṗa repimiu nasumo lala aṃe moṃar la amarmare rui. Nanene siar e Epela, naṗa naga pe kila re suri tai piowa poli, pimi pimi tol Sakaraea naṗa narina ne Parakaea, naṗa repimiu la nene aṃeṃar naga mare lavisin wonta,

loyuũa e Yumuũa Wa mũana ne Ntewa. ³⁶ Lelaga nevisa van amiu, nakoarena nene vanon nawemuarena kiena ne la nene, pĩsi na imi tol amiu la nene, naũa amiu amal ke nanagane.”

*Yesu Sinena Mie
Yerusalem*

Luk 13:34-35

³⁷ Ana Yesu tagin Yerusalem, naga pisa pisape “!Yerusalem oo, Yerusalem oo! ? Vanon ya ne ko osuũa omũe momũar ke navisawalena lala amare sanene, a okove momũar ke yaru lala naũa Ntewa mligan la apimũasu puũa? Yam moki liu naũa inu sineun nesape neligan lumũau yer-vivi kiuũa yeririna lala, sa naũa lakaporo pũere narina lala apimi atapolou vatano e kupena, ana kiuũa yeririna lala pe akekaran in re poli.

³⁸ Ana ko opisu ke ne, Ntewa mligan ko ke narui, ana pĩsi na ko oimi ove yo yau korena ga narui. ³⁹ Ana nevisa van ko, pĩsi na kiuũa yeririna lala taũatete avisu inu sina, vano vano tol pogos naũa kiuũa yeririna lala avisa sina ga sanene, avisave ‘Ntewa Namava, ovisa ruru naga nene naũa pimi ke e kiuũa kia.’ ”

24

*Yesu pisawal naũa pĩsi na
awe plan Yumuũa Wa Mana
Ntewa*

Mak 13:1-2; Luk 21:5-6

¹ Ana Yesu molue e Yumuũa Wa mũana ne Ntewa, ana pogos naũa naga suũa mial

pano, kiena nalogena lala apimi akilologia pupia yumuũa la naũa asike loyumuũa e kove na Yumuũa Wa nene, naũa la apowo papĩsi, ana la apisape Yesu kiraũatau si visu la. ² Ana Yesu pisa pan la, pisape “?Amiu apisu ke yumuũa la nene? Lelaga inu nevisa van amiu, yumuũa la nene, pĩsi na taũatete si kana kilavaru ne tai naũa toũa ga towawa ruru teke e lelen, komin pĩsi na yar laũasia aimi, awe plan make nena yumuũa la nene vano.”

*Pog naloge viowaena
monar imi*

Mak 13:3-13; Luk 21:7-19

³ La amial sanene, apimi e Kunus Na Purolip, ana Yesu totano e yo nene. A pogos naũa pe yaru taũena lala asu re poli, kiena nalogena lala apimi puna, ana apiuntania, apisape “?Pĩsi na awe plan Yumuũa Wa nene pogwai, a kile ya na kiuũa nawa-suũeena, naũa pĩsi na ko owasuũe ko sina e luas nen pogos nini?”

⁴ Ana Yesu pisatamũe la, pisape “Popon amiu avisuar ruru e amiu, vena ve yaru imi ve visa kotalia amiu re, ⁵ vanon naũa pĩsi na yaru la ve moki naũa ala kiau kia, ana pĩsi na aimi avisa avisave ‘In na nepe Navisaarena nene,’ ana visae ve sanene, pĩsi na aure yaru la ve moki naũa aya avewowe. ⁶ Ana e mũena ga e pogos nene, pĩsi na amiu aloge mũaagena na

mara naþa suþa lavisi, a lologena na mara la naþa sike perina, ana amiu ve sinemiu yuyuwawa manene re. Suri la nene monar imi kakate sumo, ana nanene na pe legien maro re poli la wa. ⁷ A þarin suþe lala, þisi na akila mara amio þarin suþe taþena lala, a purvanua lala þisi na asumalu akawela amio purvanua taþena lala. A yo kari ga e yomarava nini, þisi na pupia viso, a yokorena yemninu vaþisi e yo punu ga. ⁸ Ana suri la nene, pe legiena maro re nene po la wa, ana sa ga sira naþa meþena, naþa sane mloge þesan masina mlaea vena war sisi, ana pupia naloge viowaena naga pere na wa.

⁹ “A e pogos nene narui, amiu nene naþa kiau kia sike e amiu, yokorena auarar amiu marera, a akoa kare amiu mena ga, vano vano-o awe momar amiu amarmare. Ana yaru na purvanua taþena lala ve sinelan amiu re nenaga, la akawe kiamiu visena lala. ¹⁰ Suri la nene, þisi na kila yaru la ve moki naþa ve aviawa re si marera e inu, a þisi na la nene naþa amlelaga þesan e inu, þisi na ve sinelan re si la naþa amlelaga ke marera e inu na wa e pogos nini, a þisi na la avie plan la ava e limana ne kiela nasinekar la nene. ¹¹ Ana yokorena navisawalena navisokanena

la ve moki asumalu, a þisi na la aure yaru la ve moki ava ayal wowe. ¹² Yokorena naviowaena imi ve keviu manene va laa sane, kila yaru la ve moki vaþisi naþa sinela la imi marmare, la pe asitom re si Ntewa poli. ¹³ Ana yaru naþa naga sumalar marera suþa ga e inu vano vano-o pogos marera nene þisi, þisi na Ntewa tamalia naga. ¹⁴ A lologena wo na nasuþenena nene, yokorena alologon va yolai la punu ga e yomarava nini, þisi na kile tai naþa pisawal ke pisape legiena maro pimi ke narui.”

Pupia pog marera tai garu Yerusalem
Mak 13:14-23; Luk 21:20-24

¹⁵ Ana Yesu pisa mena ga visena taþena tai, naþa popon visae yaru naþa wolovia, kilali naþa kilia ruru kana kinasia. Visena nene pisa sanini, pisape “Yokorena amiu akilia avisu avisirlua nono tai naþa viowa na viowa manene laa, naþa yoko sumalu ana warnena kare manene laa yo wa na Yuþa Wa Mana ne Ntewa. Suri nene Navisawalena Taniel naga pisawal nanua sumo rui, ¹⁶ a pogos naþa amiu avisu suri nene, amiu naþa asike Yutea, amiu popon aure, ava atapolou e kunus lala. ¹⁷ E pogos nene, visae yaru tai va ruru teke vanua lavisin mana yuþa, naga

monar ve va re si loyũa vena war kiena suri laņasia,¹⁸ pona visae yaru sike e kana lokove, naga monar ve vito re si uũa vena tar mņana kulsota, naga monar kiriri vitaņili ga sanene vano.¹⁹ Ana e mņena ga e pogos nene, yokorena viowa la va sira la naņa la asena, amio mņena ga la naņa asuũa amla ke yu pa kiela sisi tomtom lala.²⁰ Visae ve sanene, popon amiu alen wo amiu vena kiamiu pog na ureena nene, ųisi na ve imi tol amiu re e pogos naņa miava keviu, pona e legiena wa tai,²¹ vanon naņa pogos mņarera nene, ųisi na mņarera la sane taulu mņena ga pogos mņarera taņena lala, naņa siar e pogos naņa Ntewa sii yomarava nini pimi tol nanagane, a yokorena ve pupia pog mņarera re si tai ve sanene pogos tai.²² Ana Ntewa naga sitoņal rui pisape yokorena tero pogos mņarera nene imi ve plas ga, vanon kiena yeririna la naņa naga mligan plan la vena ave kiena, naņa asike e pogos nene. Ana visae naga ve tero re ve plas sanene, yokorena taņatete yaru tai kilia mali sike na.

²³ “Ana e pogos mņena ga nene, visae yaru tai visa van amiu, visa visavenua ‘Amiu apisu ke yaru nene, nanene na Navisaarena nene,’ pona visae visa visavenua ‘Nane Navisaarena ne nane gare,’

ana amiu na ve alelaga re e kiena visena la nene,²⁴ komin naņa navisaarena la mokliu naņa pe ape lelaga re poli, la akilia asuũalu, amio mņena ga navisawalena navisokanena la ve moki, a ųisi na la nene akila pupia kile lala, amio suri nailanena mņena ga lala. Yokorena akilia sanene, ana ųisi na la aure yaru lala avano avewowe, vano-o tol naņa ųisi na akilali naņa aure mņena yeririna kiena ne Ntewa naņa naga mligan plan la vena ave kiena, ana la taņatete akilia akila.²⁵ Ana nanagane, akilia avisuar amiu, komin nepisawal suri la nene pan amiu sumo rui, e pogos naņa pe aņaripo re yo poli wa.

²⁶ “Ana vanon suri ne nanene, visae yaru la avisa van amiu, avisave ‘Navisaarena nene, nanagane naga sike gare yokorena nene rui,’ ana ųisi na amiu na ve avanon re naņa avisulia, pona visae la avisa, avisave ‘Naga ke narui, naga nane sike ga loyũa e yũa nene,’ ųisi na amiu ve alelaga re e visena la ne sanene.²⁷ Ana pogos naņa Narina ne Yeririna wasuņe sina ga vitomi, ana ųisi na vitomi merarava ruru nenaga va yeririna la punu ga, sa naņa yekarpla naņa pilavila, a vivaga ruru make ga e yo punu ga ma e sinapane.²⁸ E pogos nene,

ĥisi na ve sa mēna ga naĥa visae suri mare tai mēke e yo tai, ana pupia pepaumā la naĥa akan ke suri mare lala, ĥisi na aiminia, la monar ave ĥegas ga asike e yo nene.”

Pisi na narina ne yeririna imi sina

Mak 13:24-27; Luk 21:25-28

²⁹ A Yesu pisa pisape

“Ana siraunia, mesmesun nena e pogos naĥa naloge viowaena nene visae ĥisi narui, ĥisi na mrae imi ve pupumalo, a kupario ve tego re sina.

A verue la ne ma e sinapane ĥisi na aloloru, a suri mārera lala nae ma e sinapane, yokorena Ntewa naga kululun la akululu.” Ais 13:10, 34:4

³⁰ “E pogos nene, kile nawa-suĥeena kiena ne Narina ne Yeririna yokorena warpoyo ma e sinapane, a yokorena yolai lala nae yomarava nini atagtagi alolokai, a ĥisi na la avisu Narina ne Yeririna molue e lul lala amio pupia nanāreraena a pupia nau-rarenakam kiena. ³¹ Ana sir-aunia, pupia kumasua yelu, a naga ligan kiena navisi lala ava e yo punu ga e yomarava nini a ma e peni, vena aure kiena yeririna la naĥa naga mligan plan la ĥisi rui, aimi lele ve taaga puna.”

Pe yaru re tai naĥa kilia pog na legiena maro nene poli

Mak 13:28-32; Luk 21:29-33

³² Ana Yesu pisa, pisape “Amiu asitomli purlaki nene, naĥa asape purpiliva ne. Naga kiena suri navian amiuenta tai teke ea, naĥa amiu na monar avisururuia. Pogos naĥa amiu avisu naĥa naga korowas nena imi memaena, a imi malumu, sitos la siar miyulua sina, ana amiu akilia asape pogos na yepisinu mārera pimi ke lavisi narui.

³³ Ve sanene, pogos naĥa amiu avisu kile la nene e yomarava, sa naĥa nepisa pan amiu rui, ana amiu akilia naĥa Narina ne Yeririna naga suĥa ga e pulutava rui, lavisi ke molue narui.

³⁴ Nevisa suri na lelaga van amiu, yokorena suri la nene ĥisi na imi kakate sumo, ana siraunia, teras kiena ne yaru la naĥa la amal ke e pogos nene, ĥisi na naga kilia kovio vetan yomarava nini.

³⁵ A yokorena sinapane amio yomarava nini lalua mēna ga akovio veraga, ana kiau visena lala taĥatete akovio pogos tai. ³⁶ Ana pe yaru re tai naĥa kilia kana legiena pona aora nena naĥa ĥisi na Narina ne Yeririna naga imi ea. Navisi lala nae ma e peni, amio Narina ne Ntewa, la mēna ga amninue ga, ana Ata ga, naga taaga naga kilia mĥaga.”

Amiu monar akila ruru amiu asuṃa ga

Mak 13:33-37; Luk 17:26-30,34-36

³⁷ Ana Yesu pisa pisape “Vano vano tol pogos naṃa Narina ne Yeririna imi sina, ana ṃisi na taṃatete yaru la akila ruru la wo, ve sa ke pogos kiena ne Yermarua Noa nanua sumo. ³⁸ Ana e pogos nene narui, sumon naṃa pupia womie mlau, ana yaru lala asuṃa akinana ṃaga, a asuṃa amun ṃa namunena lala, a akila ke talopaena la sanene, pimi tol pogos naṃa Noa pa loyuṃa e kiena pupia waa naṃa naga miyuṃaenia. ³⁹ Ana yeririna la nene asuṃa ga sanene, la pe asitom re suri tai poli, ana apisu ga pupia womie nene mlau pimi ṃere plan la. Ana inu nevisa van amiu, yokorena e pogos naṃa Narina ne Yeririna naga wasuṃe sina imi, ana ṃisi na la nene maran ve taaga ke ga ve sa nanua sumo e pogos kiena ne Noa. ⁴⁰ Visae yaru la ve lua, lalua asuṃa ayuṃae ke e lokove, ṃisi na navisi lala aimi atarlua tai, ana aligan tai ṃeke na, ⁴¹ a visae sira ve lua, naṃa lalua asuṃa ayuṃaen ke kinanena, ana la atarlua tai, ana aligan tai ṃeke na.

⁴² “Sanene, ana amiu monar asuṃa aviṃuar ruru amiu, komin naṃa amiu amninue ga e legiena ya naṃa kiamiu Suṃe imi sina warpo yo. ⁴³ Amiu na monar

avisu kilale suri nene, sa naṃa visae yerkawa tai suṃa ga, ana visae naga kilia ṃaga pogos naṃa yokorena yaru navinauena tai imi e ṃana yuṃa vena vinaun kiena suri lala, ṃisi na yerkawa nene suṃa visuṃar ruru silaga, vena suṃate ruru yaru navinauena nene imi. ⁴⁴ Ana ve sanene, na amiu monar asuṃa aviṃuar ruru amiu, vanon naṃa Narina ne Yeririna ṃisi na naga imi kate, e pogos tai naṃa amiu pe asitom re asape ṃisi na naga imi e poli.”

Pakaiwa na yaru na yuṃaena naṃa kiena yerkawa ṃasuṃe sina pimi

Luk 12:41-48

⁴⁵ Ana Yesu pisa pisape “? Visae yaru na yuṃaena tai, naṃa naga pe manmarua ea, naga ṃuarar ruru yuṃaena, naga yuṃae sanape? Naga yuṃae sanene, naṃa visae kiena yerkawa naga ligan yo vena va perina, ana yerkawa nene ligan naga vena naga visuṃar ruru e yaru na yuṃaena taṃena lala, ana yoko yaru nene naga uarar ruru yuṃaena la nene. ⁴⁶ Ana pogos naṃa yerkawa nene wasuṃe sina, ana kilia lual naṃa yaru na kiena yuṃaena nene suṃa ga uarar ruru ke yuṃaena lala na wa. Ana yokorena yaru na yuṃaena nene loge wo vaṃisi, ⁴⁷ komin naṃa yokorena yerkawa nene ligan kiena suri punu ga e

limana ne kiena yaru nene. Ee, lelaga, yoko Ntewa naga kila m̄ena ga ve sa ke nene.

48 “Ana visae yaru na yuṁaena nene viowa ga, a pogos naṁa yerkaṁa nene ligana yo va suṁa perina ve piavi, ana yaru na yuṁaena nene kilia visa, visave ‘?E suwala, yerkaṁa nene pa su piavi la wa, pona ve wasuṁe re si yo narui, pona ṁa sanape?’ 49 Ana ṁisi na naga suṁalu kila viowa va yaru na yuṁaena taṁena lala, a yokorena naga va suṁa mun ṁa wii, ve wowe amio yaru na munen wii lala, ana asuṁa akan kare ke ga kilavaru kiena ne yerkaṁa nene na. 50 Ana yokorena yerkaṁa nene naga wasuṁe imi e legiena tai naṁa yaru na yuṁaena nene ilan ga, a e pogos tai naṁa yaru nene naga pe sitoṁal re sape ṁisi na naga imi ea. 51 Ana yerkaṁa nene ṁisi na naga la nakoena ve keviu va yaru nene, naṁa yokorena kila naga va sike amio yaru na visokanena taṁena lala e yo naṁa yaru la asuṁa atagi, a akar ga malueta ea.”

25

Pakaiwa na sira ṁee lualima

1 Ana Yesu pisa, pisape “E pogos naṁa Narina ne Yeririna wasuṁe sina ga, yokorena nasuṁenena kiena ne Ntewa naga ve sa naṁa ṁakaiwa nini pisa. Pakaiwa

nini, naga pisayu ṁaṁagena na talopaena tai, naṁa taveve kieta ṁelaga, la ne e lepas naṁa puna ne yermene la aṁure naga pa e yuṁa ṁana ne sira ṁee vena aure sira nene amio naga imi amio la. Ana vinena ne yermene nene la lualima la asike ga uṁa, vena la akila ruru suri la punu ga. Ana lavisi yemalo, ana vinena lala la aṁar kieta kapi vivaga lala, la amiyalilu mrapan la, vena la punu ga awasuṁela si aimi. 2-4 Ana vinena la nene, lala lima la ape manmarua, asitom ruru suri po, naṁa aṁar ṁa piawi na sirveve laṁasia vena akokonia sina ga kieta nakapi vivaga lala, ana la lima na ape tampos ga, la pe asitom ruru re si sanene poli, ana la aṁar ṁaga kieta nakapi vivaga lala, ana la pe aṁar re si sirveve laṁas poli naṁa vena visae taṁa, ana akilia akokonia sina ga. 5 Ana lala asuṁate ṁa yaru natalopaena nene pano-o, ana naga susun paṁisi, kila sanene sira ṁee la lualima nene, atekavito pano-o paṁisi, ana amomalio.

6 “Ana kolemallo ko yepelilika, ana yaru tai pio, pisape ‘!Yaru na talopaena, pimi ke lavisi warpoyo narui. Amiu aimi aṁitawe naga!’ 7 Ana sira ṁee la lualima nene atavilo, akila ruru kieta nakapi vivaga lala vena vivaga ruru sina. La akila plan ṁau na kilika

na kapi lala, a apisuveve kiela sirveve lala. ⁸ Ana la naþa la pe asitom ruru re suri poli, apisu kilale kiela nakapi vivaga lala lavisi marmare, sirveve þisi, ana apiun tan lala þasia, apisape ‘Awis suwala, amiu akilia ala re narin sirveve van imimi wa, a visae peraga yokorena kiamimi nakapi la amarmare yo.’

⁹ “Ana la naþa asitom ruru suri po, apisa apisape ‘!Peraga yo! Sirveve nini pe torokin punu ita re poli. Popon amiu ava li si e yuþa nawilwilena vena aul si kiamiu laþasia.’

¹⁰ “Ana la apanon si asape aul kiela sirveve, a pogos naþa apa ke ga wa, yaru natalopaena naþani pimi poru. Naga pa loyuþa e mþana yuþa, a sira mþee la lima nene naþa la asuþate, lala amio naga apa veraga e kinanena na talopaena. Ana pogos naþa yeririna la apa asike loyuþa rui, ana la akotava ruru e mratava.

¹¹ “Ana siraunia, sira mþee taþena la naþani aþasuþe la ke sina ga, ana asuþalu asuþa mratava, apio apisape ‘!Meneu, mþeneu, awis ovieta va meimþasu loyuþa!’

¹² “Ana yaru naþa pisa ga pan la, pisape ‘!Lelaga nevisa van amiu, nemninue amiu ga!’ ”

¹³ Ana Yesu pisa pae þakaiwa nene þisi, ana pisa pisape “Poga ga, ana amiu na monar avisuar ruru wo,

vanon naþa amiu pe akilia re legiena na suri nene poli amio mrae nena.”

Pakaiwa na yaru telu naþa la apisuar kilavaru tai
Luk 18:11-27

¹⁴ Ana Yesu pisa, pisape “Ana pogos naþa Narina ne Yeririna wasuþe sina ga, þisi na ve sa mþena ga naþa þakaiwa nini pisa, pisape: Yerkawa tai, kila ruru ke pisape þisi na va e yo tai naþa koperina na koperina, e purvanua taþena tai. Ana yerkawa nene pio kiena yaru na yuþaena lala vena aimi puna, ana naga pisi pan la, mligan kiena suri lala e limala, vena avisuar ruruia ayuþae amio. ¹⁵ Ana naga pisuveve kiela na kiliaena lala þisi, ana mligan taga na kilavaru lima te liman tai, a mligan taga na kilavaru lua te limana yaru taþena, a mligan taga na kilavaru taaga e limana ne taþena, ana siraunia naga mligan la, ana pa sike koperina na piavi towe la ga. ¹⁶ Ana yaru naþa mla taga na kilavaru lima, mial ke veraga pano, kila yuþaena la moki e kilavaru nene, pano-o tol ke sina ga taga na kilavaru taþena lima. ¹⁷ Ana e ke e þelaga nene, yaru mþena ga naþa mla taga na kilavaru lua, naga mþena ga taulu ke sina ga taga na kilavaru taþena lua. ¹⁸ Ana yaru naþa mla taga na kilavaru taga ga, naga

pa kili p̄ilip̄ili e porotano, vena sinwan kilavaru kiena ne kiena yerkawa nene.

19 “Ana pogos moki p̄aro pa rui, ana yerkawa kiena ne yaru la nene naga p̄asupe ke sina ga pimi, ana naga sinenan pisape visuveveli kilavaru la naṗa naga p̄ar pa kiena yaru la telu nene.

20 Ana yaru naṗa naga tol taga na kilavaru lima sumo, ana naga pimi sumalu se marana ne kiena yerkawa nene, naga p̄ar ke sina ga taga na kilavaru nene lima. Ana naga pisa pisape ‘Mara, nanua sumo ko oṗar taga na kilavaru lima pan inu, ana na nini. Ana netaulu sina ga taga na kilavaru lima nini su metavanja nanua sumo, naṗa netauluia na pe kioṃa.’

21 “Ana yerkawa nene pisa pania, pisape ‘Po paṗisi, potena. Ko na okila yuṃaena po paṗisi wa. Ko opuarar ruru narin yuṃaena nene naṗa nemligan e lumoṃa, ana p̄isi na neligan ko vena ko ovisuar kiau yuṃaena kerkeviu la p̄asia. Poga ga, oimi omio inu e kiau p̄apaṗaḡena na kekarena nini.’

22 “Ana yaru naṗa naga p̄ar taga na kilavaru lua, ana naga ṃena ga pimi sumalu se marana ne yerkawa nene. Ana naga pisa pania, pisape ‘Mara, nanua sumo ko otar taga na kilavaru lua nini pan inu. Ana taga na kilavaru lua ne na nini, amio sina ga taga na kilavaru lua naṗa netauluia na pe kioṃa.’

23 “Ana yerkawa nene pisa pania, pisape ‘! Po paṗisi! Potena, ko na okila yuṃaena po paṗisi wa. Ko opuarar ruru narin yuṃaena nene naṗa nemligan e lumoṃa, ana p̄isi na neligan ko vena ko ovisuar ruru kiau yuṃaena kerkeviu la p̄asia. Poga ga, oimi omio inu e kiau p̄apaṗaḡena na kekarena nini.’

24 “Ana yaru naṗa tol taga na kilavaru taaga ga, naga pimi sumalu se marana ne yerkawa nene, pisawo ga, pisa pisape ‘Mara, nesitom nesape ko ope yaru ṃarera tai. Ko okilia ola kinana e lokove naṗa ko pe omiyuṃaen re poli, a ko okilia ola ṃena ga mralaki e purmraki naṗa pe ko re omapila poli. 25 Vanon suri ne na nene, nemaraun ko ea, ana nepa nesinwan ga kioṃa kilavaru e porotano. Ana nanini, ovisu kioṃa kilavaru nane su ruru ga sumṃa ne.’

26 “Ana yerkawa nene pisatam̄ea, pisape ‘! Aa, ko na yaru viowa tai nene naṗa ne, ko ope yowena paṗisi wa! Ko opisae kare inu p̄isi rui, osape in na nepe tewena tai, ana visae ko opisae naṗa in na nepe yaru ṃarera tai sanene, vanon ya ne ko omligan ga kilavaru su korena ga sumṃa sanene? 27 Visae ko ova oligan ga e yuṃa na kilavaru vera na woga ga, vena pogos naṗa neimi si sanini, nekilia nelalua sina amio ninusa

naþa kapuru ke e yepasia.’
²⁸ Ana yerkawa nene pisi pa kiena yaru lala, pisape ‘Aulai, avano alalua kilavaru nene vetan limana, ana ala va van yaru naþa þarar ke taga na kilavaru lualima rui.
²⁹ Nevisa sanini van amiu, visae yaru naþa kiena suri moki rui, þisi na naga war va la sane vena kiena ve moki vaþisi, ana yaru naþa pe kiena suri re poli, þisi na naga kilia kilalu narin suri naþa naga mla ke na.
³⁰ Ana amiu akoven melioi nene va vanua e yo malolo, e yo naþa yaru lala asumã ga atagi ke ea, a akar ke maluela ea!’ ”

Legiena na liþereena

³¹ Siraunia, ana Yesu pisa pisape “Pogos naþa Narina ne Yeririna vitomi amio navisi lala e kiena naurarena, þisi na naga imi ve Parin Suþe narui, a þisi na naga vitomi va e kiena lele wa na totanoen ea.
³² Ana navisi lala, þisi na awere yolai punu ga na yomara va nini aimi asumãlu ase marana. Ana e pogos nene narui, þisi na naga liþere yaru lala ava e þegas ve lua, ve sa naþa yaru tai navisuaren suri mali lala, naga liþere kiena sipsip lala e nane lala.
³³ Ana þisi na þarin suþe nene ligana kiena sipsip lala ava ase kiena lepas na þamarua, a nane lala ava ase laþas na þameli.
³⁴ Ana þisi na naga visa van la ne asike e lepas na

þamarua, visave ‘Amiu yeririna ne la na nene naþa Ata naga visa ruru amiu. Amiu aimi narui, a akus lelemiu loyũã e kiena nasuþenena, naþa naga miyuũãen ruru sumate amiu ke rui nanua sumo, e pogos naþa naga sii yomarava nini ea.
³⁵ Amiu aimi, vanon pogos naþa visae viso kar inu, amiu amla kinanena pan inu, a pogos naþa moto kar inu, amiu amla wii pan inu. A pogos naþa nepe wolawa ga, amiu aþure inu nepa e mãmiamiu uũã,
³⁶ a pogos naþa yepeu korena ga, amiu amla kulsota pan inu. A pogos naþa nemai, amiu apimi akaten inu, a pogos naþa nesike e yũã na loge viowaena, amiu apimi asun amio inu.’

³⁷⁻³⁹ “Ana yaru mesmesu lala naþa asike e lepas na þamarua þisi na aviun tania avisave “?Ana Suþe, sanape? Ko osumã apisa ke osape imimi memiila ko e kioũã pogos m̃arera la ne sanene, ana imimi pe mesitom re nena mesape mekila sanene pan ko poli-i þisa. ?Imimi mekila suri la nene pan ko na pogwai?”

⁴⁰ “Ana yoko Parin Suþe nene visataũe la, visave ‘Lelaga nevisa van amiu, pogos naþa amiu akila ke sanene pan yaru na m̃au mratava tai, ana sa ga naþa akila ke ga pan inu narui, pe suri korena ga naþa naga pe

yaru na sanape.

41 “Ana siraunia, p̃isi na naga pisi m̃ena ga pa la naṣa e lepas na p̃am̃eli, yokorena visa van la, visave ‘Amiu aure vetan inu, Ntewa pi-ain nakoena viowa tai pan amiu p̃isi rui. Amiu ava e kapi nene naṣa pivaga m̃a silaga, taṣatete mare pog tai, naṣa sum̃ate ke Yermare Lego amio kiena navisi lala vena la ava ea. 42 Vanon pogos naṣa viso kar inu, ana pe amla re kinanena pan inu poli, a pogos naṣa moto kar inu, ana pe amla re wii pan inu poli. 43 A pogos naṣa nepe wolawa, ana pe aṣure inu re nepa m̃amiu um̃a poli, a pogos naṣa yepeu korena, ana pe amla re kulsota pan inu poli, a pogos naṣa nem- inana, pona nesike e yuṃa naloge viowaena, ana pe apimi akaten inu re poli.’

44 “Ana p̃isi na la avisa- tam̃e p̃arin suṣe nene, avisave ‘?Ana Suṣe, sanape? ?Imimi moṃal ko na pogwai naṣa ko viso kar ko, pona moto kar ko, pona ko ope wolawa, pona ko yepem̃a korena ga, pona omai, pona osike e yuṃa naloge viowaena? ?Ana pogwai naṣa ko sanene, ana imimi pe mepimi memiila ko re poli?’

45 “Ana naga p̃isi na visatam̃e la, visave ‘Lelaga, nevisa van amiu, nevisave pogos naṣa amiu na pe asitoṃali re naṣa akila ve sanene va kiau yaru tai naṣa naga pe yaru na sanape,

nanene na sa ga naṣa amiu pe asitoṃali re naṣa akila pan inu poli.’”

46 Ana Yesu kila make kiena visena nene, naga pisa pisape “La nene yokorena la avanon vena atol nakoena nene naṣa ve uro re. Ana yaru mesmesu la nene yoko- rena la avanon atol malena nene naṣa sum̃a vano vano ve uro re.”

26

Apisape aweṃar Yesu mare

Mak 14:1-2; Luk 22:1-2; Yoane 11:45-53

1 Ana pogos naṣa Yesu pian kiena yeririna lala e visena la nene p̃isi, ana naga pisa pan la, pisape 2 “Amiu akilia m̃a legiena na vewo rui, ana Paṣagena Naṣitoṃalena Natamaliaena siar narui. E pogos na p̃aṣagena nene narui, p̃isi na aligan Narina ne Yeririna va e limana ne la naṣa yoko asuari naga e laki torovia vena mare.”

3 Ana e pogos nene, yerkawa lala kiena ne yaru wa lala, amio nasumonena kiena ne le Israel lala, asuṃa e viorena e yuṃa m̃ana ne p̃arin yaru wa, naṣa naga kiena kia Kaeṣas. 4 La apisayu ke naṣa p̃isi na auaravinaun ga Yesu, a ala nakoena namarena ga vania. 5 Ana la apisa apisape “Suri nene, ita taṣatete tekila e pogos na p̃aṣagena, vanon naṣa p̃isi na yaru la sinela kar ita vaṣisi, ana yokorena la am̃aaga vaṣisi ne wa,

komin naþa la mokliu naþa la akekaran yaru ne nanene þisa.”

Maria taron ponotaninu e þarina ne Yesu

Mak 14:3-9; Yoane 12:1-8

⁶ Ana siraunia, Yesu sike garu e pulkumali nene Petani, ana naga pa sike e yuþa mþana ne yaru naþa apio kiena kia asape Saemon Leperosi, komin naþa naga þar leperosi sumo. ⁷ Ana pogos tai naþa Yesu kinana ke e yuþa nene, ana sira tai pimi puna, ana sira nena kus piawi naþa amiyuþaenia e kilavaru tai naþa po paþisi, a ponotaninu pule ga mþeke ea, naþa kana kilavaru keviu manene la paþisi. Ana sira nene taron make ponotaninu nene e þarina ne Yesu.

⁸ Ana pogos naþa nalogena kiena ne Yesu lala apisu suri nene, ana sinela mimi paþisi, ana la apisape “? Vanon ya ne naga kila kare ponotaninu nene sanene? ⁹ Visae naga wilwilin lua ga, vera na naga tol kilavaru keviu tai, naga kilia lavia vena iilaen yaru la naþa limala korena ga.”

¹⁰ Ana Yesu kilia mþa naþa la apisi ke sanene, ana naga pisi pan la, pisape “Ei, ve akila kare re sira nene sanene. Naga kila yuþaena wo tanea e inu ne. ¹¹ Yaru la ne pe kiela suri re poli, þisi na la na asumþa ga likan amiu silaga, vena akilia aila la, ana inu na, taþatete

nesike nemio amiu silaga. ¹² Suri naþa sira nene kila, naþa taron ponotaninu e tasneu, naga kila sane kila ruru ke tasneu vena asin inu. ¹³ Lelaga nevisa van amiu, e yo punu ga e yomarava nini naþa þisi na avisawal kiau nalologena wo ea, ana þisi na lala asunyu mþena ga suri naþa sira nene kila, vena asitoþali luen ga kiena nasitomienna keviu nene, naþa sinena mie inu kemua lelaga.”

Sutas pisaar pisape yoko vielua Yesu

Mak 14:10-11; Luk 22:3-6

¹⁴ Ana nalogena la lualima taaga pa lua nene, lala tai, naþa kiena kia Sutas nae Kariot, naga pa puna ne yerkawa kiena ne yaru wa lala, ¹⁵ ana naga pisa, pisape “?Visae nevielua Yesu viþasu e limamiu, þisi na amiu ala ya ne van inu?” Ana la nene apul pania e kilavaru naþa selpa tol lualima yam telu, ¹⁶ ana siar e pogos nene, Sutas sumþa kalewele mrapa naþa vielua Yesu van la ea.

Nalogena lala akila ruru kinanena na þaþagena

Mak 14:12-16; Luk 22:7-13

¹⁷ Ana pimi tol legiena þesia na þaþagena nene, naþa la apisa mþena ga apisape naga pe Paþagena Na Kanen Kiligaþe, ana nalologena lala apimi puna Yesu, apiunia apisape “? Ko sinoþan osape imimi

meva mekila ruru suri lala e yo nape, vena ita tekila Kinanena Na Sitomālena Natamaliaena ea?”

¹⁸ Ana Yesu pisatañea, pisape “Ava garu Yerusalem, ava avisu yaru nañani, avisa van sanini, avisave ‘Kiamimi navianena pisape naga kiena pogos pimi ke lavis narui. Naga sinenan pisape naga, amio imimi kiena nalogena lala, ñisi na meimi mekila kanena nañani e momā umā.’”

¹⁹ Ana nalogena lala apa akila sa naña naga pisa, ana la akila ruru suri lala na pañagena nene.

Yesu pisawal naña yoko Sutas vielua naga

Mak 14:17-21; Luk 22:14,21-23; Yoane 13:21-30

²⁰ Ana siraunia, Yesu lala apimi e umā nene, ana kolemalo, la atotano, la asumā akan ke kinanena nene narui, ²¹ a Yesu pisa pisape “Lelaga nevisa van amiu, ñisi na amiu yaru tai, naga vielua inu.”

²² Ana kiena nalogena lala amloge naña naga pisa sanene, ana la sinela piowa pañisi, ana lala peve taaga apiun tania, apisape “!Suñe! ?Pe inu re poli, ne?”

²³ Ana Yesu pisatañe la, pisape “Tai naña imimi lua melapae kamimi kinanena e pialo taaga, naga ke narui.

²⁴ Yokorena Narina ne Yeririna monar mare ve sa naña Nasiriena Wa la pisayuia, ana yaru naña pielua naga, ñisi na viowa la van naga,

visae naga ve vaeme re vera wo va ñisi.”

²⁵ Ana Sutas, naña sirau-
nia naga pielua Yesu, naga piunia pisape “?Navianena, ana ai? ?Inu?”

Ana Yesu pisatañea, pisape “Ana, sane opisa ne yo.”

Kinanena maro

Mak 14:22-26; Luk 22:15-20; 1 Koren 11:23-25

²⁶ Ana pogos naña la asumā akinana ke ga wa, Yesu mla kilaparavi tai, pisa potena pa Ntewa vanonia, ana naga kawewowaia, kian pa kiena nalogena lala, pisa pisape “Amiu alavia, akania. Nanene na pe tasneu.” ²⁷ A siraunia, mla piala na kuruta namunena, ana pisa potena pa Ntewa vanonia, ana kian pa pan la, naga pisa pisape “Amiu punu ga amunpae ga e piala nini, ²⁸ vanon naña nanene na tau nene, naña vena kila naviranarena kiena ne Ntewa sumālu marera, a vena lau vanon naviewoena na mlamulena viowa kiena ne yaru lala ve moki. ²⁹ Nevisaar van amiu, yokorena ve nomun re si kuruta namunena nene narui, vano vano-o yoko nemun kuruta na munena viu nene nemio amiu, e pogos naña tesike e nasuñenena kiena ne Ata.”

³⁰ Ana siraunia la amiyau maro e yauena tai na Yauena lala ñisi, a siraunia la amolue, apa maro e Kunus Na Purolip.

Yesu pisawal naña p̄isi na Pita viro naga

Mak 14:27-31; Luk 22:31-34; Yoane 13:36-38

³¹ Ana Yesu pisa pan la, pisape “E yemalo ke nini narui, kiamiu nalelagaena e inu p̄isi na loloru, vanon suri la naña imi m̄alm̄alivin inu. Pisi na ve sa ke ga naña Ntewa pisa e Nasiriena Wa lala, naña pisa, pisape

‘Pisi na nowem̄ar yaru na visuarena sipsip mare, ana p̄isi na kiena sipsip lala ayaltetai ava e yo punu ga.’ Sek 13:7

³² “Ana pogos naña nemali sina ga vetan marena, yokorena nesumo neva garu Kalele, ana yokorena amiu m̄ena ga monar asirau aimi.”

³³ Ana Pita pisawal pania, pisape “Yesu, pona nalelagaena kiena ne la nene punu ga loloru, ana la aure vetan ko yo, ana in na taṭatete kemua neligan ko pog tai.”

³⁴ Ana Yesu pisa pania, pisape “Lelaga nevisa van ko, p̄isi na yemalo ke ga nene, pogos naña term̄ene ve kokoreko re yam tai wa, ana ko oviro inu yam ve telu narui, ko ovisave omninue nu ga.”

³⁵ Ana Pita pisawal meraravan pa Yesu e marala, pisape “Visae la sinelan avisave awem̄ar nu nemio ko, nanene na poga ga ne, ana inu, yokorena taṭatete kemua neviro ko, nevisave in na pe nepe kioṃa re poli.” A e pogos nene, nallogena

taṭena m̄ena ga lala apisa m̄ena ga sa ke ga.

Yesu pa mlen e Ketsemani

Mak 14:32-42; Luk 22:39-46

³⁶ Ana siraunia, Yesu amio kiena nallogena lala apa e yo tai, kiena kia Ketsemani. Ana naga pisa pan la, pisape “Amiu atoṃa e nene sumo wa, ana in na neva laa perina sane, vena nelen re yam ve plas ga.” ³⁷ Ana naga p̄ere Pita amio narina ne Sepeti la luwoka, Semes amio Yoane, la teloka nene amio naga apa la perina ve tokak ga, a e pogos nene Yesu naga sinena pimi urmi manene la, mloge piowa paṭisi. ³⁸ Ana naga pisa pa la telu nene, pisa pisape “Nanagane nemloge sane ninuu pilaroro la narui, ana kila inu lavisi nemare vanonia. Awis, amiu akilali asum̄a atavilo amio inu e yo nini sumo wa.”

³⁹ Ana Yesu mial ga pa la sane, ana mloru kinai mono, monar marana, vena len. Ana naga pio, pisape “!Ata o! Visae okilia okila suri nene, awis ko olalua piala nallogena viowaena nene vetan inu, vena p̄isi na ve nomun re ea. Ana ko ve okila re nasinenanena kiau, ana okila ga kioṃa.”

⁴⁰ Ana naga p̄asupe sina, pitomi puna ne kiena nallogena la telu nene, ana naga pisu naña la asum̄a amom̄alio rui. Ana la atavilo sina, ana Yesu pisa pa Pita, pisape “? Sanape na amiu taṭatete atavilo amio inu

e aora ve taaga ga nene?
⁴¹ Amiu monar avisuar ruru wo, a amiu monar alen silaga, vena nakilaliena lala ve akila amiu re aloru e mlamulena viowa. Ee, ki-amiu sitomena m̄arera ruru po, ana tasnemiū malumu manene la.”

⁴² Ana yam lua, naga pa sina e nañani, mlen pisape “! Ata o! Visae otañatete olalua m̄au piala naloge viowaena nene, ana monar nomun ea, komin naña monar ve sa ga naña ko sinoñania.” ⁴³ Ana naga ãasupe sina pimi, pisu naña la telu nene asum̄a amomalio ke sina ga, komin naña marala kawa, atekavito pañisi, atavilo ãele ga.

⁴⁴ Ana naga mligan la telu nene asum̄a ga, ana ãasupe ke sina ga pa e nañani, mlen e visena taaga m̄a nena ga, naña naga kila yam telu ne. ⁴⁵ Ana naga ãasupe si pimi pun la telu nene, pisape “?Ei, amiu asum̄a apa ruru amiu, a amomalio ke ga wa? ! Amiu aviñuarial! Lavisi ke pogos naña Narina ne Yeririna va e limana ne li viowa la narui. ⁴⁶ Ita, asum̄alu, tevano. Amiu apisu ke ne, yaru na vielua inuena nane sum̄a pimi m̄a ga lavisi nam̄a.”

*La apuarar Yesu m̄arera
 Mak 14:43-50; Luk 22:47-53; Yoane 18:3-12*

⁴⁷ Ana pogos naña Yesu pisa ke visena nene wa, Sutas nene, naña nalogena la lualima taaga pa lua nene lala tai, naga pimi, naga amio yaru na mara la moki

naña añar kiela playu na mara lala amio kiela plaki lala. La ke nene narui, naña yerkawa lala kiena ne yaru wa lala, amio nasumonena kiena ne le Yu lala, la amligan la apimi.

⁴⁸ Ana sumon naña la apa am̄alivi sanene, yaru na vieluaena naña Sutas nene, naga pisaar kile tai pan la, naña naga pisa pisape “Yaru naña visae neva nevitawe ãesania, nane yaru ne nanene naña ãisi na amiu auarar ruru naga,” ⁴⁹ ana pogos naña la am̄alivi, Sutas mial mesmesun ga Yesu, ana naga pitawea, pisa pania, pisape “!Pokolemalo, Navianena! Sum̄are sike amio ko.”

⁵⁰ Ana Yesu pisa pania, pisape “Mara, yum̄aena naña ko opiminia, ko okila ga.” Ana la apimi narui, apuarar Yesu m̄arera. ⁵¹ La apuarar naga sanene narui, ana Pita ãerelua kiena playu, terania, tetereria yaru kiena ne Parin yaru wa tai, ana telua kiligana lepas tai. ⁵² Ana Yesu pisa pania, pisape “Ko oligan ruru si kioñia playu e kana taga. Yaru naña ãar ke playu na kilaen mara, naga ãisi na mare e playu na kilaen mara. ⁵³ ?Amiu asitom asape in na tañatete nevio Ata, vena naga iila inu? Visae nevio naga, yam ve taaga naga ãisi na ligan ãegas nen kiena navisi lala ve moki naña vena aimi avisuar inu. ⁵⁴ Ana visae nekila sanene, ãisi na visena nasumo lala naña asike e

Nasiriena Wa lala, yokorena la tařatete aimi ave lelaga, sa nařa apisaar řisi rui.”

⁵⁵ Ana Yesu pisi pan yaru la nene, pisape “?Vanon ya ne amiu ařara kiamiu playu amio kiamiu plaki lala? ? A vanon ya ne amiu asape aimi atararvinaun inu e pupumalo sanene? ? Pona amiu asitom ke asape in na nepe yaru mřara na vinaena tai pona na weřaren yaru? ?Ana silaga e legiena punu ga, nařa in na nesuřa nepian ke yaru lala loyuřa e Yuřa Wa Mana ne Ntewa, ana vanon ya ne pe apimi atarar inu re e pogos la nene poli? ⁵⁶ Ana suri la nene la poga ga ne, vanon suri la ne amiu akila ke ne, sa ke ga nařa navisawalena nasumo lala apisawal nanua rui e kiela Nasiriena Wa lala, ana kiela visena la nene pimi ke sane pe lelaga make narui.”

Ana e pogos nene, nalogena lala amligan Yesu, la ařure matania.

Ařere yesu pa e kumali keviu kiena ne yerkawa kiena ne le yu lala

Mak 14:53-65; Luk 22:54-55,63-71; Yoane 18:13-14,19-24

⁵⁷ Ana la nařa atarar Yesu, ařure pimi vena akila naga suřalu se marana ne Kaeřas, nařa naga pe řarin yaru wa. Ana navianena navisaluaena lala amio nasumonena kiena ne le Yu lala, apimi mřena ga lele taaga e kiena kumali nene

rui. ⁵⁸ Ana Pita mřena ga suřa taveve ke Yesu e pogos nene, ana pe pa re lavisin naga poli, ana pogos nařa la apimi loyuřa e kove na kumali nene, Pita pano totano amio li nayuřaena kiena ne Kaeřas lala, vena naga logeli sanape nařa řisi na la akila va Yesu.

⁵⁹ Ana yerkawa lala kiena ne yaru wa lala, amio yerkawa tařena lala nařa la asike loyuřa e viorena nene, akilali nařa akale yaru lařasia vena la avisokan ga e Yesu, nařa la avisa suri lařasia nařa la avisu sane akilia aweřar Yesu mare vanonia. ⁶⁰ Ana la apisi narui, ana yaru la moki nařa asuřalu, la apisokani pano pano-o pařisi, ana viorena nene pe mřa re suri tai e kiela visena la poli vena torokin la akila ve sanene va Yesu. Kiela visena la peve tařena ga sanene pano-o řisi, ana yaru la lua asuřalu, ⁶¹ ana la lua apiranari visena taaga, apisape “Yaru nene, pisa pisape naga kilia we plan Yuřa Wa Mana ne Ntewa, ana visirlua sina e legiena ve telu ga.”

⁶² Ana řarin yaru wa nene suřalu, pisi pa Yesu, pisa pisape “?Sanape, yokorena ko ovisataře la, pona peraga? ?Sanapen visena la nene nařa la asuřa apisawal ke ne?”

⁶³ Ana Yesu topuru ga tořa ga. Ana řarin yaru wa nene pisa sina ga pania,

pisape “Nevisa van ko, ko na monar ovisa kia kiena ne Ntewa Mali, ovisave lelaga naña ko Navisaarena, naña ko ope narina ne Ntewa, pona pe ko re naga poli. !Ko na monar ovisawal ruru van imimi nanagane narui!”

64 Ana Yesu pisatamea, pisape “Suri ne nanene narui, nane ko osuñia opisa ke narui. Ana nevisa van amiu, nesape siraunia ve ve piavi re, p̄isi na amiu avisu Narina ne Yeririna naña totano e lepas marua kiena ne Ntewa namareraena, a p̄isi na amiu avisu naña warpoyo e lul lala, vitomi tano e yomarava nini.”

65 Ana Parin yaru wa nene sinena mimi pañisi, pitolwowa m̄ana kulsaket, pisa pisape “!Nane-e, toroki! Yaru naña suñia p̄arnena kare ke kia wa kiena ne Ntewa, nanene rui. ? Amiu amloge m̄a ne? ? Vanon ya ne ita tesuñia takale ke si yaru vena visawal si suri lañas e naga? 66 ?Ana viorena nini siñom sanape? ?Pisi na teliñere naga sanape?”

Ana la apisatamea, apisape “Popon awem̄ar nena naga mare.”

67 Ana la nene la apilasiria marana, a asu naga, a lañasia la amlipa kare naga pañisi, 68 ana apisa kare naga, apisape “?Ei, Navisaarena, ko ovisawalia, ane mlipa ko ga na wa?”

Pita piro Yesu

Mak 14:66-72; Luk 22:56-62; Yoane 18:15-18,25-27

69 Ana e pogos nene, naña Pita toña tano loyuña e kove nene, sira m̄ee tai na visuaren yuñia pimi puna, pisa pisape “!Ei, ko m̄ena ga otaveve Yesu nae Kalele nene!”

70 Ana e marala la punu ga, Pita piro suri nene, pisa pisape “Peraga, nemninue suri na ko opisa ke ne.” 71 Ana naga mial petania, pito tano e pupia pulutava na kove na kumali nene.

Ana e yo nene, sira m̄ee tañena m̄al naga, ana pisa pa yaru la naña asike ga lavisinia, pisape “Yaru nene, naga m̄ena ga amio yaru nae Nasaret naña Yesu.”

72 Ana Pita piro ke sina ga suri nene, pisa visena tai naña pe visena m̄arera, pisape “!Peraga p̄a, in na nemninue nena yaru nene!”

73 Ana yam plas ga, yaru la naña asike ga lavisin pulutava nene apimi puna ne Pita narui, ana apisa pania, apisape “Lelaga, ko na ko lala yaru tai, vanon naña memloge kilale naña ko osuñia opan ke visena lala sa ga le Kalele ga lala.”

74 Ana Pita pisi m̄arera la sane, naga pisaar ga visena m̄arera lala, pisape “!Lelaga p̄a, sinapane! Nepisa pa rui, inu na pe nekilia re nena yaru nene poli.”

Ana e ke e pogos nene naña Pita pisa visena nene, term̄ene tai kokoreko, 75 ana

kila Pita sitomāl si visena kiena ne Yesu, naŋa naga pisa pania, pisape “Lelaga nevisa van ko, ƀisi na yemalo ke ga nene, pogos naŋa termēne ve kokoreko re yam tai wa, ana ko oviro inu yam ve telu narui, ko ovisave omninue inu ga.” Ana Pita mloge piowa naŋa piowa, ana naga pa vanua, naga tagi naŋa tagi.

27

Lala aŋure Yesu pa puna ne Parin Suŋe kiena ne le Rom lala naŋa pisuar ke Israel

Mak 15:1; Luk 23:1-2; Yoane 18:28-32

¹ Ana e kolulagi nene, pogos naŋa mrae siar pa metava, yerkawa kiena ne yaru wa lala amio nasumonena kiena ne le Israel lala, la atotano ke sina ga vena aviranar ruru li mrapa tai, vena kilaen Yesu mare. ² Pogos naŋa la apisayu ƀisi, ana la apiar limana ne Yesu, la aŋure naga pa puna ne Paelat, naŋa naga pe ƀarin suŋe nae Rom naŋa naga pisuar ke Israel e pogos nene, ana la amligan Yesu e limana ne Paelat nene, vena naga liŋere naga.

Sutas mēmar ke sina ga naga

Yumāena 1:18-19

³ Ana Sutas, naŋa naga pielua Yesu ƀisi, naga pisu kilale naŋa la amlipere Yesu ƀisi rui asape naga monar mare, ana e pogos nene naga

mloge si piowagan suri naŋa naga kila. Ana naga pilon si kiena sitomena narui, ana naga ƀar si selpa lualima yam telu nene, pa yerkawa la naŋa apul naga sumo. ⁴ Ana naga pisa pan la, pisape “In na nekila mlamulena viowa nene, naŋa inu nepielua yaru tai naŋa pe kila re nena suri tai, ana kiau visena na kila na yoko awemār naga mare.”

Ana yerkawa la nene apisa ga pania, apisape “Ei, ve oimi otag re si van imimi. Imimi meƀisin ko pa rui.”

⁵ Ana Sutas silin tetain kilavaru nene su tano e loyuma wa mmana Ntewa, ana naga pa vanua, pa telan kolmekina e kilika, naga mare.

⁶ Ana yerkawa kiena ne yaru wa lala, la apano aŋar kilavaru nene, ana la apisape “Kilavaru nene, kuruta kana yaru mlau vanon rui, a e kieta navisaluaena, ita taƀatete teligan kilavaru na ŋanene va teke karo na Yuma Wa Mana Ntewa.”

⁷ Ana lala apisayuia, ana amla kilavaru nene, apa apul kinakinas nen porotano tai naŋa nanua sumo, la apisape kiena kia “Porotano na piaki,” ana la amligan narin porotano nene pe lotap kiena ne wolawa lala. ⁸ Vanon suri ne nanene, pimi tol nanagane, yaru lala apisa ke narin porotano nene, asape “Porotano na Kuruta.”

⁹ A suri ne nanene kila visena tai kiena ne Nav-

isawalena Seremãaea pimi pe lelaga, naña sumo naga kiena visena pisape

“La ala kilavaru naña selpa ve lualima yam telu nene,

na torokin maran kilavaru naña le Israel lala apisa apisape mesmesun aul lua yaru,

¹⁰ *ana la amla apano apul porotano kiena ne yaru na kilaen piaki nene, sa ga naña Ntewa pisa pan inu sape nekila.” Sek 11:12-13*

Yesu sumãalu e marana ne Paelat

Mak 15:2-5; Luk 23:3-5; Yoane 18:33-38

¹¹ Ana la aþure Yesu pimi sumãalu se marana ne Parin Suþe Paelat, ana naga piun tan Yesu, pisape “?Ko ope Parin Suþe kiena ne le Israel lala, pona peraga?”

Ana Yesu pisatãnea, pisape “Naga ke narui, sane ko opisane ke ne.”

¹² Ana pogos naña yerkawa kiena ne þarin yaru wa lala amio nasumonena lala apisavisawal suri moki e Yesu, ana Yesu pisatãne re si suri tai poli. ¹³ Naga topuru ga tomã sanene, ana kila Paelat piun sina ga tania, pisape “?Sanape, ko pe ositom re naña la apisa suri viowa la moki e ko poli?”

¹⁴ Ana e lepas na suri la nene naña la asumã apisa ke ne, ana Yesu pe pisatãne re si suri tai pan la poli,

ana Parin Suþe nene milan paþisi.

Paelat naga tañan pisape Yesu Monar mare

Mak 15:6-15; Luk 23:13-25; Yoane 18:39-19:16

¹⁵ Ana e pogos nene, la asike e pog na Paþagena na Sitomãalena Natamaliaena na wa, ana e kayui punu ga e þaþagena nene, Parin Suþe nae Rom nene naga silaga kila suri tai pa le Israel lala. Naga kila naña visae la þasia asike e yuñã naloge viowaena, la akilia avisa kia kiena ne yaru ve taaga naña la sinelania, ana yokorena Paelat naga ligan lua naga molue. ¹⁶ Ana e pogos nene, yaru na kilaen politik tai naga momã e yuñã naloge viowaena, naña yaru la akilia ruru naga, kiena kia Yesu Paraþas. ¹⁷ Pisi na, pogos naña þina lala apimi ape moki lele taaga e marana ne Paelat, ana naga piun tan la, pisape “?Amiu sinemiun asape neligan lua ane molue sina imãasu pun amiu? ?Sine-miun Yesu Paraþas, pona Yesu naña apio ke asape Navisaarena?” ¹⁸ Paelat piun sanene, vanon naña naga kilia þisi rui naña yerkawa ga lala kiena ne le Yu lala, la aþure Yesu pimi puna, sane yuñãena na vielueen ga, vanon naña apisu naña kiela yeririna taþena lala akekarana Yesu paþisi.

¹⁹ Ana e mēna ga e pogos naña naga totano ke e lelen nalipereena vena

akila navisena nene, ana wona mligan visena pimi pania, pisape “Ko ve okila re suri tai va yaru nene. Naga pe kila re suri tai poli, ana na kolemallo nomo-malio, nepisu naga, ana nanagane nemloge ke piowa vanon pañisi.”

20 Sanene narui, Paelat sinenan pisape ligand lua Yesu naga vano, ana yerkawa lala kiena ne yaru wa lala amio nasumonena kiena ne le Yu lala, la akila kare sitomena kiena ne yeririna lala, la amareran la pañisi vena la monar avisa va Paelat vena naga ligand lua Parañas nene vano, a naga monar kila Yesu va mare.

21 Ana Parin suñe nene piun sina ga tan la, pisape “?Amiu sinemiun asape netañan yaru la lua nene, ana ane molue ga sane?”

Ana la apisatamea, apisape “Imimi sinemimin Parañas.”

22 Ana Paelat piun tan la, pisape “Poga ga, ana visae ve sanene, ñisi na nekila ve sanapen Yesu nene naña apio ke naga asape Navisaarena?”

Ana la punu ga apionia, la apisape “!Asuar naga e laki torovia!”

23 Ana Paelat piun tan la, pisa pisape “?Vanon ya? ? Naga kila suri ya naña piowa?”

Ana la apion manene la pa metava sane, la apisa apisape “!Asuaria, asuar naga e laki torovia!”

24 Ana Paelat pisu naña naga tañatete si taulu la, vanon naña pupia maagena pañisi naña pa ke metava rui, ana naga kus pialo na wii tai, ana e maran yeririna la nene, naga kevan limana ea, ana naga pisape “Kuruta na yaru nene naga pe su re e inu poli. Kiena marena, naga kiamiu yumnaena ga nene.”

25 Ana pogos naña yaru la amloge visena nene, la akiikii ke sina ga, apisape “Poga ga ne, suri ke naña imimi sinemimin ke nanene narui e, naña kiena marena pe kiamimi yumnaena, a naña kana kuruta sumna e imimi memio narimimi lala.”

26 Ana Paelat mligand lua Parañas molue si ñasuñe pa pula, sa naña la sinelania, ana naga mligand Yesu e limana ne kiena li na mara lala vena akoa naga, a vena aure naga va asuaria e laki torovia.

Li na mara lala akirakirai viowa pa Yesu

Mak 15:16-20; Yoane 19:2-3

27 Ana yaru na kilaena mara lala kiena ne Paelat, la atar Yesu añurelua pa vanua e yometava na kiena kumali nene, ana la apio pa kiela ñegas nen li na mara tañena lala vena la aimi avisu Yesu. 28 Ana la amiyenlua maana kulsota, ana amiyen kulkota tai e naga naña marana pe melia vivaga sa naña ñarin suñe la amiyen, 29 ana la añar nenos nen kilsirili, ana añar

ruruia, amligan e ÷arina, sa na÷a karo na ÷arin su÷e tai, a amligan mēna lakiavio tai e limana na ÷amarua vena lararia. Ana la asuñā akinai tano pania, la asuñā akirakirai viowa pania, la apisa apisape “!Imimi meva tanon ko, ko na÷a ope ÷arin Su÷e kiena ne le Yu lala, imimi memieluar ko!”³⁰ Ana la asuñā apilasiria naga, a amla lakiavio na÷ani, asuñā añe ÷arina Yesu ea.³¹ Ana pogos na÷a la akirakirai piowa pania ÷isi, a÷arlua kulkota nene e naga, ana amien si mēna kulsota la e naga, ana atar naga, apano vena asuar naga e laki torovia.

Asuar yesu e laki torovia

Mak 15:21-32; Luk 23:26-43; Yoane 19:17-27

³² Ana pogos na÷a li na mara lala la asumon Yesu apa ke narui, amal yaru tai nae Saerin, kiena kia Saemon, ana la añareran pania asape naga towe kus laki torovia kiena ne Yesu vano.³³ Ana la apa atol kunus tai, kiena kia Kolkota, na÷a kana kinasia na asape yo na÷a sane puriu na pia÷arin yaru.³⁴ Pogos na÷a apimi aporu e wos nen kunus nene, ana la sinelan asape ala kuruta namunena va Yesu vena munia, ana kuruta namunena nene was nen suri tai na÷a melkalka sike ea, vena kila tasnena ne Yesu kapulu ga, ve lae manene re, ana pogos na÷a Yesu munli suri

nene, naga yepen mavin si munena.

³⁵ Ana la atar Yesu, asuari naga e laki torovia. Pisi na, la akila sa na÷a amlil mēpila, vena alual li na÷a ane war mēna kulsota tai, a ane war tai,³⁶ ana la atotano atomāga e yo nene vena akirakira mēga va avisu naga.³⁷ Ana la asiri navisawalena tai, asuari teke metavan ÷arina, na÷a pisawal suri na÷a la añemān naga mare vanonia, na÷a pisa pisape “Yesu nene, ÷arin su÷e kiena ne le Yu lala.”³⁸ Ana e pogos nene, yaru navinauena lalua, asuari mēna ga la luoja e laki torovia sa ke Yesu, la amligan tai e lepasnena na ÷amarua, tañena e lepasnena na ÷amēli.

³⁹ Ana yaru la na÷a asuñā amialoro ke apa e yo nene, asuñā asisilin ÷arila, apisalele kare Yesu ÷isa, la apisa apisape⁴⁰ “! Ke, suwala! Ko nene, nanua sumo ko opisa opisape ko okilia owe plan Yumā Wa Mana ne Ntewa, ana ovisirlua ke sina ga e legiena ve telu ga, ana sanape narui? !Poga, ko ga otamalia ko lia! !Visae ko ope narin Ntewa kemua lelaga, ko otapulu e laki torovia nañā, otomi tano!”

⁴¹ E ÷elaga mēna nena ga nene, yerkawa lala kiena ne ÷arin yaru wa lala, amio navianena na navisaluaena, a li na sumonena kiena ne le Yu lala, la asuñā apitalia kare naga pa÷isi,⁴² la

asumã apisa ke, apisape “! Pona naga tamalia ña yaru tañena la moki yo rui, ana naga mninue kare si narui, tapatete si tamalia naga! ? Ana naga pe kieta ãarin suñe ita le Yu lala, pona peraga? Popon naga vitomi tano e laki torovia nanagane, vena ita telelaga e naga. ⁴³ A yaru nene pisape naga piawa e Ntewa, ana pisape naga Narina ne Ntewa. ! Poga ga, tevisulia, visave Ntewa kekaran naga, yoko naga tamalia naga nanagane narui!”

⁴⁴ Ana yaru navinauena la lua nene, naña asuar la e laki torovia amio Yesu, la ñena ga luoka asikol sina visena viowa kiena ne la nene pania.

Yesu mare

Mak 15:33-41; Luk 23:44-49; Yoane 19:28-30

⁴⁵ Ana kolipae ga, yemalolo pimi kalõ make yo punu ga e yo nene, pano tol mrae telu yepekilavi, ⁴⁶ a lavis ga e pog nene, Yesu mlokai keviu e kiena visena ruru napo, pisa pisape “?Eli, Eli, lamã sañatani?” naña kana kinasia sape “?Kiau Ntewa, kiau Ntewa, sanape naña ko omligan inu nemẽke sanene?”

⁴⁷ Ana yeririna lañasia naña asumãalu asumã e yo nene, naña la asumã apisuvisu ke suri la nene, ana amlogepalia naña Yesu mlokai sane, ana la apisa apisape “Ke, yaru nene sumã pio ke yermarua Elaisa, vena imi

iila naga-o.” ⁴⁸ Ana veraga ga, lala yaru tai kiriri pimi, mla lumlum tai, taron kuruta namunena naña melkalka pa ea, miyurar te laki tai, ana kian va Yesu munia. ⁴⁹ Ana yaru tañena lala apisa apisape “! Osuwa! Tevisulia wa, pona yokorena yermarua Elaisa vitomi tamalia naga, pona ve vitomi re.”

⁵⁰ Ana Yesu mlokai manene sina, ana ãere maron kiena yalua, tañan ninuna pano, mare ãan.

⁵¹ Ana pogos ke ga nene, pupia kulmrae naña e Yumã Wa Mana ne Ntewa, naña mono ke yo wa naña pe yo wa pañisi, naga purãa pito ga lika, siar metava pito tol tano. A yemninu, a pupia kilavaru lala pororowa la, ⁵² a e lotap, tampona na yaru mesmesu la moki na nanua sumo apikevike, ana kana yaru ne lala amamal sina. ⁵³ Ana la amolmolue e kiela tampona lala, ana siraun pogos naña Yesu ñena ga mali sina ga e marena, la nene amial apa garu pulkumali wa Yerusalem, ana yaru la moki naña apisula.

⁵⁴ Ana li na mara lala, amio kiela yerkawa, naña la asumã apisusuari ke Yesu, pogos naña la amloge yemninu, a apisu suri la naña kakate, la amilan pañisi, la sinela kurkur pano-o amiyuyuwawa, ana la apisa apisape “! Aulai, yaru nene naga pe Narina ne Ntewa kemua lelaga naña ne!”

⁵⁵ Ana sira la moki pañisi e yo nene, la asuñña asuñmalu asike la perina sane, la asuñña apisuvisu ke Yesu. La nene, naga la naña amolue garu Kalele nanua sumo, la asuñña ataveve ñña Yesu pano-o, a asuñña amiila naga. ⁵⁶ Ana likan sira la nene, ana Maria tai naña sira nae Maktala, a Maria ñña naña anenane Semes amio Yosop, a sira ñña naña wona ne Sepeti.

Yosop sin Yesu

Mak 15:42-47; Luk 23:50-56; Yoane 19:38-42

⁵⁷ Ana yaru tai nae Aramatia suña ga, naña naga pe yaru na suri moki, kiena kia Yosop, a naga pe nalogena kiena ne Yesu tai. Ana pogos naña lavisi mrae vito tano, ⁵⁸ naga pa suñmalu se marana ne Paelat, piun tania pisape kus tasnena ne Yesu. Ana Paelat pisa pa kiena li na mara lala, vena la akus tas nen Yesu imi vania. ⁵⁹ Ana Yosop kus tasnena ne Yesu, mliluwoia e kulmrae tai naña miyuwowo ruru po, ⁶⁰ ana naga pa mligan ññe e puluve viu naña naga ñña, naña la ate mare ga ññi ga na wa. Ana la amelilivin pupia kilavaru na monoen puluve nene, pimi mono pulusa, ana Yosop la añasuñe si apano. ⁶¹ Ana Maria lalua nene, naña lala tai nae Maktala, amio tañena nene, lalua apimi asike e yo nene, la atoñña tano ato

mesmesun ga pulmaran puluve nene naña tasnena ne Yesu ññe ea.

Li namara lala akirakiravan ñña puluve

⁶² Ana suri la nene la apimi kakate e legiena na kilaen suri la punu ga su ruruia suñate Legiena Wa. Ana e legiena tañena, naña sane Legiena Wa nene narui, yerkawa kiena ne yaru wa lala amio Varasi lala la apa asuñmalu ase marana ne Paelat, ⁶³ ana la apisa apisape “Mesape mevisa ga van ko, Paelat, naña imimi mesitoñal ke visena kiena ne yaru na visokanena nene na wa, naña pogos naña naga mali ke ga wa, naga suña pisaar pisape ‘Siraun legiena ve telu, ññi na nemali ke sina ga.’ ⁶⁴ Ana visae ve sanene, imimi sinemimin mesape meviun tan ko sanini, mesape ko oligan kioñña li na mara lañasia ava avisuar e puluve nene, vano vano tol kana legiena telu nene warovia. Visae peraga sa ññi kiena nalogena la ava akusvinaun tasnena, ana ññi na la avisokan, avisawal va yaru lala, avisave ‘Naga mali sina e marena rui.’ A visae la akila ve sanene, ññi na kiena navisokanena maro nene yoko imi viowa la sane, taulu naña nasumo.”

⁶⁵ Ana Paelat pisa pan la, pisape “Poga ga, aure kiau li na mara lañasia avano.

Amiu akilia ava akila ruru make suri punu ga sa naña amiu ava akirakiravan ruru yo nene.”

⁶⁶ Ana la apano, amligan pilu tai e kilavaru naña mono ke puluve nene, naña visae yaru tai melilivin kilavaru nene, p̄isi na pilu nene worovia, ana p̄isi na akilia avisu kilalea. Ana la amligan m̄ena li na mara lala asum̄a akirakirava e puluve nene.

28

Puluve korena ga m̄eke na Mak 16:1-10; Luk 24:1-12; Yoane 20:1-10

¹ Ana pogos naña Legiena Wa p̄arovia, ana e legiena na siraunia, naña legiena p̄esia na wik, pogos naña mrae p̄arpoyo, ana Maria nae Maktala amio Maria taḗena nene, lalua apanon asape avisuli puluve nene. ² Lalua apano atol yo nene, ana pupia yemninu veraga, vanon naña navisi kiena ne Ntewa tai mligan ma e peni, pitomi tano melilivin lua kilavaru nene, ana pa teke metava e wosia. ³ Ana marana pilavila paḗisi, a m̄ana kulsota merarava ruru po, naña miyuwowo na miyuwowo ruru po, ⁴ ana pogos naña li na mara lala la apisuaia, la amarau pano pano-o amarmar-lau asike ea.

⁵ Ana navisi nene pisi pan sira la lua nene, pisa pisape “Marauen toko. Nekilia m̄a naña amiu lua apimin ke Yesu, naña asuar naga e laki torovia, ⁶ ana naga pe mon

re si e nini poli, naga mali sina, suñalu rui, sa naña naga pisaar sumo. Amiu lua aimi avisuaia e naña tas-nena momalio m̄enea. ⁷ Ana amiu lua ava vila ga, avisawal va kiena nalogena lala naña naga mali si e marena rui. Ana nanagane, yokorena naga sumo vito garo Kalele, ana amiu m̄ena ga yoko atove, avisu naga e yo nene. Nane kiau visena pan amlua nene.”

⁸ Ana lalua akoskosin naña lalua amolue e puluve, lalua apano. Lalua apano na, sa naña lalua amarau ke ga wa ana lalua amloge sane akekara m̄ena ga paḗisi. Ana lalua akiriri apano vena avisawal lologena nene va kiena nalogena lala, ⁹ ana lalua apa m̄a sane, ana lalua apitawe Yesu. Lalua amilan kare naga paḗisi, ana naga pisi pan lalua, pisa pisape “Pokolulagi.” Ana lalua apa akinai tano e naga, lalua atarar lana, lalua amlotun naga. ¹⁰ Ana Yesu pisa ga pan la luoka, pisape “Marauen toko. Amiu ga luoka ava avisa va wolai lala vena ato garo tano Kalele, ana e yo nene, la akilia avisu inu.”

Li na mara lala la apa apisawal suri la nene

¹¹ Pogos naña sira lalua nene aḗasuḗela apa ke puna ne nalogena lala, e ke e pogos ga nene, ana li na mara lala p̄asia aḗasuḗela apa Yerusalem, la apa apisawal suri la nene naña

kakate, van yerkawa kiena ne yaru wa lala. ¹² Ana la nene, la apio nasumonena taþena lala apimi, ana la apa lele taaga amio la, ana la apisayu suri la nene pano-o þisi, ana la apiranaria asape la monar awar kilavaru keviu tai va li na mara la nene, ¹³ ana la apisi m̃arera pan la, apisape “Avano avisavisawal va yeririna lala, avisave ‘! Peraga, kiena nalogena ga la nene! Apimi kolemallo, e pogos naþa imimi mesuñña momomallio ke ga wa, ana la apinaun tasnena akus apano.’” ¹⁴ Ana la apisa m̃ena ga pan la, apisape “A visae visena na suri nene va tol Paelat, þisi na imimi ga mevano mekila ruru memio naga, þisi na amiu ve aloge re visena tai vanonia.”

¹⁵ Ana li na mara la nene akekaran kilavaru nene, amlavia, ana la apano apisovisokani e yo punu ga sa naþa yerkawa la nene apisa pan la, a suri nene kila le Israel lala la apisavisa ke visena nene pimi tol nanagane.

Yesu pimi puna ne kiena nalogena lala

Mak 16:14-18; Luk 24:36-49; Yoane 20:19-23

¹⁶ Ana nalogena la lualima taaga pa taaga nene apitogarotano Kalele, e tavie naþa Yesu pisaar pan la, ¹⁷ ana pogos naþa la apisu naga, amlotun naga, ana la þasia la asitom þele ga asape Yesu re nene poli.

¹⁸ Ana Yesu pimi lavisin la, pisa pan la, pisape “Ntewa mligan suri punu ga nae ma e peni a nae m̃ena ga e yomarava nini, e lum̃au, vena nevesuþen la. ¹⁹ Sanene, nemligan plan amiu ke narui, vena amiu monar ava e yolai punu ga na yomarava nini, amiu monar aurela aimi aye kiau nalogena lala, naþa amiu akela e kia kiena ne Ata, Narina, a Ninuna Wa, ²⁰ a naþa avian la m̃ena ga vena alogear visena la naþa nepisa pan amiu þisi rui. Ana amiu monar asitom̃ali luen ga, naþa nesuñña nemio amiu silaga, vano vano-o tol luas nen pog nini.”

Lologena Wo Kiena Ne Yesu Kristo Naña MAK Siriyuia Visayuena Na Tusi Nene

*Komþasnen suniena plas
na tusi nini*

Tusi nini, “*Lologena Wo Kiena Ne Yesu Kristo Naña Mak Siriyuia*”, naga siari e visena tai naña sape lologena wo nene, naga lologena wo kiena Yesu Kristo, narina Ntewa. Mak kilologia naña Yesu pe yaru na yuñæena kiena ne Ntewa, a kiena visena mæraena sike ea. Tekilia tevisu kiena mæraena pogos naña piyan ke yeririna lala, a mæneplan mæna yermare lala, a naña warplan milamulena viowa kiena yaru lala. Yesu pisawal kiena kia tai, sape naga Narina Yeririna, naña naga pimin tamæn kiena maliena vena warplanen milamulena viowa kiena yaru lala, vena akilia aure matan nalogeviowaena, yepela melala.

Mak pisayu manene yuñæena kiena Yesu pa laa sane, amio kile lala naña naga myuñæenia, taulu naña pisayu kiena visena lala.

E tusi nini, Mak pisayu þesan Yoane Nakeena amio

kiena yuñæena, a naña Yoane kee Yesu. Siraunia, pisayu naña Yermare taþali Yesu. A siraun mæna suniena plas na visena nene, naga pisayu yuñæena kiena Yesu la narui naña kila ruru yaru la naña amai apimi apowo sina a naña naga piyan ke yeririna lala. Pogos naña Yesu kila kiena yuñæena lala, silaga kiena nalogena la asumæa akilia ruru naga amio kiena þelaga lala pa laa sanene.

Ana e pogos nene, yaru laþas pe akekaran re Yesu poli, sinela kar Yesu paþisi. Marana na maro la na tusi nini apisayu malena kiena ne Yesu e kiena legiana olua na maro e yomarava nini, a pupia suri naña pisayuia, nane kiena marena, a naña mali sina.

E marana na keviu 16, yaru moki asitom asape Mak naga siri tusi nene tol ga marana na ve tokaki orelu, ana marana na ve tokaki la ne siraun nene, pona yaru taþena naga siria yo.

*Komþasnen suniena la
naña sike e tusi nini*

Yuñæena kiena Yoane Nakeena 1:1-13

Yuñæena kiena Yesu garu Kalele 1:14—9:50

Yesu molue Kalele pa Yerusalem 10:1-52

Legiana olua na maro kiena Yesu naña kila kiena yuñæena Yerusalem, a yo make la naña lavisin Yerusalem 11:1—15:47

Yesu mal sina 16:1-8

Yesu pimi m̃alivin kiena nalogena lala a naga pa mae peni 16:9-20

Yoane Nakeena sike e yokorena pisawal ke visena kiena ne Ntewa

¹ Na nene Lologena Wo kiena Yesu Kristo naḗa narina Ntewa. ² Šuniena na Lologena Wo nini siar e Yoane Nakeena, sa naḗa Visena Wa kiena ne Ntewa pisayu naga konua rui e visena tai naḗa Navisawalena Aisea pisawalia, naḗa Ntewa pisa pisape

“Naga pe yaru tai nalologonen kiau visena, naḗa nemligan naga sumon ko, pe na kilaruruen mrapa lala kioḗa mekiki ruru wo. Mal 3:1

³ *Ana naga suḗa piovion ke e yokorena, piovion ke pisa ke pisape*

‘Amiu na monar akila ruru mrapa lala kiena Suḗe Ntewa, amesmes ruru wo,

vena naga kilia yali ea imi kate, e kiamiu malena lala.’” Ais 40:3

⁴ Sanene narui, Yoane Nakeena pimi kate e yokorena lepas naḗa Yutea, ana mlologon ke visena kiena ne Ntewa pan yeririna lala. Naga pisawal ke pan la pisape “Amiu monar avilopu amiu e kiamiu mlamulena viowa lala, aimi, vena nekee amiu e wii nakeena, ḗisi na Ntewa viewo amiunia.”

⁵ Ana ḗisi na yeririna la moki nae Yerusalem amio nae pulkumali taḗena e lepas

naḗa Yutea, la apa amiya-gogan Yoane, ana la apisa plan ke kiela naviowaena lala pania, ana naga kee la e wii naḗa Yortan.

⁶ Ana pogos naḗa Yoane Nakeena sike e yokorena sanene, naga kila sa ga yer-marua navisawalena tai na konua rui naḗa Elaisa, sa naḗa pe miyen re kulsota la naḗa po poli, ana m̃ana kulkota ape ga e vilulus nen sur mali tai naḗa kiena kia kamel, ana kulka na m̃eḗena amiyuḗaen e narin kulus nen puluk tai. A kana kina-nena e yokorena nene, naga kurpo ga ne amio kopulus nen lago na yom̃arua, naḗa kiki sane purutevi.

⁷ Ana pisaar pan yeririna lala, pisa pisape “Pisi na yar tai, naḗa puryuna m̃arera taulunu, naga yoko siraun inu imi. Yar nene, naga to laa metavan inu, in na pe netorokin re poli naḗa neulounia neyen plan kiena kulus nen lana, pona nekila si yuḗaen tai ne sanene vania.

⁸ In na nesuḗa nekee amiu e ga e wii, ana yoko naga kee amiu e Ninuna Wa.”

*Yoane kee Yesu
Matiu 3:13-17; Luk 3:21-22*

⁹ Ana Yesu mligan pulkumali naḗa Nasaret, e lepas naḗa Kalele, pimi e lepas naḗa wii nae Yortan, ana Yoane kee e wii nene. ¹⁰ Ana pogos naḗa kee pae Yesu, Yesu suḗalu, molue e wii pa metava, ana veraga ga m̃a e peni pietava pania, naga m̃al

Ninuna ne Ntewa pitomi ke tano sa ga manu naña lom̄e, pitomi mesmes ga koan te naga. ¹¹ Ana lala amloge Ntewa nae ma e peni pis pitomi, pisape “Ko, ko ga taaga ope naruu wawa, ana nepinaia ko pañisi. Sineu si ko, nekekanan ko pañisi.”

Yermare tañali Yesu

¹² Ana e pogos m̄a ke nene, Ninuna Wa ãere Yesu naga taaga pa laa perina sane e yokorena, ¹³ ana Yesu sum̄a e nene tol legiena lualima yam vari, naña Yermare tañali naga pañisi. Yesu sike amio sur mal tetan lala e lele nene, ana navisi kiena ne Ntewa lala apimi apisuar ke naga.

Yesu siar kiena yum̄aena garo Kalele

Matiu 4:12-17; Luk 4:14-15

¹⁴ Ana siraunia, apim atarar Yoane Nakeena, aãere pa akotawea e yum̄a naloge viowaena. Ana pogos naña Yesu mloge lologena nene, petan yo ãasupe pato si lepas naña Kalele, ana siar e pogos nene, naga mlologon Lologena Wo kiena ne Ntewa.

¹⁵ Ana pogos naña naga mlologon ke, pisa ke sape “Nanagane na, Ntewa kilia sane pe pog mesmes naña monar avilopu amiu narui. Navesuãenena kiena ne Ntewa naga pimi ke pun amiu narui, monar avilopu

amiu, alelaga e Lologena Wo nini.”

Yesu pio yar na wereen ika la vari

¹⁶ Ana siraunia, Yesu naga sum̄a mialoro ke e is nen pupia lapa nae Kalele, m̄al yaru la lua nawereen ika, nane Saemon amio wenla Antru, lalua asum̄a aãere ke kiela lilivi. ¹⁷ Ana Yesu pisa pan la, pisape “Amiu lua aim atavevenu. Yoko nekila amiu ave li nawereen yeririna lala aim ave kiau.” ¹⁸ Ana veraga ga lalua nene amligan kiela lilivi lala, ataveve Yesu.

¹⁹ Ana Yesu mial pali laa sane, kirawal narina ne Sepeti la luoka, nane Semes amio wenla naña Yoane. Lalua atotano ke e pulus nen kiela waa, akila ruru ke kiela lilivi lala. ²⁰ Ana pogos naña Yesu kirawal lalua nene, pio la, vena la m̄ena ataveve naga, ana asum̄alu, amligan arimala Sepeti naga m̄eke e waa amio kiena yaru nayum̄aena lala, lalua ataveve Yesu.

Yesu pilelua ninuna viowatai

Luk 4:31-37

²¹ Ana Yesu amio kiena yaru lala amial apa atol pulkumali naña Kapeneam, ana e Legiena Wa, apa e yum̄a nalotena, ana Yesu naga pian yeririna lala e Visena Wa kiena ne Ntewa. ²² Ana la naña amiyagogania amilan pañisi, komin naña amloge navianena kiena

ne Yesu naga pe tañena, pe sa re navianena kiena ne kiela navianena la poli, komin Yesu naga kiena urmi po, puriukawaena kiena ne Ntewa teke ea.

²³ Ana e pogos nene, yaru tai naña ninuna viowa teke e naga sike amio la, ²⁴ kila yar nene, naga mãmãaga kare ga pañisi, naga pis pa Yesu, pisape “?Yesu nae Nasaret, kioñã ya ne teke e imimi? ! Po ko na opimin osape okila kare imimi! In na nekilia ko pa rui, ko na ope Yar Nowo Wa kiena ne Ntewa.”

²⁵ Ana Yesu pis mñarera pan ninuna viowa nañane, pialuñar pania, pisape “!E, ko na ve ovis re! !Oure vetan yar nene nanagane ga ne!”

²⁶ Ana ninuna viowa nañane kila yepen yar nene miokamarmare, maaaga keviu yam si tai, pisi na molue petania pure pano.

²⁷ Ana yar la nae yo nene amilan sur nene pañisi, asuñã apisasayu ke Yesu, asape “?E, sanape na sanene? ?Navianena viu si tai nene, pona yar ne? Yar nene, naga puriuna kawa pañisi ne, pis ga pan ninuna viowa lala, ana amlogearia.”

²⁸ Ana komin sur ne la nanene narui, akekarania, apisa ruru kia wo kiena Yesu pa e yo lala pa ãar punu yo punu ga e lepas nae Kalele.

Yesu kila ruru anenane wona Saemon Pita, amio yeririna tañena si lañasia

Matiu 8:14-15; Luk 4:38-39

²⁹ Ana Yesu amio yaru ne la nini, Semes amio Yoane, a Saemon amio Antru, lala amolue petan yuñã na lotena, apa e yuñã mãana ne lalua nene Saemon amio Antru, nanene e pulkumali mña ke ga naña Kapeneam. ³⁰ Ana e uñã mãana lalua nene, anenane wona Saemon naga mai mñeke ea, yepena pisusun, momalio ke e mãana tog, ana lalua apisawal pa Yesu.

³¹ Ana Yesu pa tarar limana sira marua nene, tarlua toñalu e mãana tog, ana yepena pimi manin sina, naga suñalu, pa piran kala kap.

³² Ana e mña nena e legiena nene ko yepekilavi, pogos naña Legiena Wa ãarovia, sane mrae pito kovio pa rui, yeririna lala aþure yar la naña amai, a la naña yermare la asike e la, apim pu Yesu, ³³ ana la moki manene la, sa naña lavisi la punu ga nae kumali nene apim asuñalu e mratava na yuñã nene. ³⁴ Ana Yesu kila ruru yeririna la moki naña amain inanena tañena lala, a mñene plan yermare la moki petan yar lala, pisawo yermare lala sape ve avisa re si sur tai, komin akilia pa rui sane naga pe Navisaarena kemua lelaga kiena ne Ntewa.

Yesu mlologon ke e yo lala lepas nae Kalele

Luk 4:42-44

³⁵ Ana kolulagi, pogos naña lakaporo pe kokoreko re poli waa, Yesu suñalu,

naga taaga mial petan uña, ana pa e yo mñano tai, mlen pa Arimana. ³⁶ Ana siraunia, yeririna la apimi akale si naga uña, ana Saemon la aña re si naga poli, la apa akalea. ³⁷ Lala akale ña pano-o, añañ naga e yo nañane, apisa pania, asape “Yeririna tañena la moki apimin akale ko ke.”

³⁸ Ana Yesu pisape “Ee, nekilia ña ga. Ana peraga, monar teva mña ga e pulkumali tañena lañas naña sike ga waa, vena nekilia nelologon mña Lologena Wo nene van la. Sur ne na nene, in na nepetan ma ne nepitom nesike e yo nene.”

³⁹ Ana pñisi na Yesu pato mialoro ke e yo punu ga garo Kalele, mlologon ke e yuña na lotena kiena le Yu lala, pile plan ke mña yermare lala moki petan yeririna lala.

Yesu kila ruru yaru tai naña leperosi se yepena miania

Matiu 8:1-4; Luk 5:12-16

⁴⁰ Ana yaru tai naña leperosi sike e yepena pimi puna Yesu, kinai tano puna, piun mñareran tania, pisape “Awis, visae ko na otañan ga, nelelaga sane ko ga okilia okilarurunu, neikiki sina.”

⁴¹ Ana Yesu sinena miye manene yaru nañane, naga pe maraun re sape visae tol lae naga vanon kiena inanena, ana naga mligan limana te naga, pisape

“Inu netamñania, nanagane monar yepemña ikiki sina.” ⁴² Ana veraga ga yepena miania, leperosi nene pñisi petan yepena, naga mekiki sina. ⁴³⁻⁴⁴ Ana Yesu mñareran pania, pisa pisape “Omloge ke ne, ovano ve ovisawal re suri nene wa, ana nanagane ga ne ova okom puna yaru wa vena naga kilia visuveve yepemña. Pisi na monar ova okila lotena va Ntewa a okila mña kuñapaena na ikikiena nene naña Mosis pisa, sape yaru monar kila vanon sur na sa nene, ana pñisin sur nene, yar wa kilia visawalia sape nanagane na leperosi naga pñisi.” Ana Yesu pítetalia naga pano.

⁴⁵ Ana pogos naña yaru nene pano, pa pisayu sur la nene pan yeririna lala punu ga, kila sane visena nene pa ãar punu yo, pano-o kila sane Yesu pe mial re si pa loyuma e pulkumali tañena la poli, komin visae vano, yoko yeririna la ve moki aiminia. Naga sumña ga perinan pulkumali lala, ana yeririna lala asumña apetan ke kiela pulkumali lala, apimi puna.

2

Yesu kilia viewo mña mlamulena viowa kiena yeririna lala

¹ Ana legiena lañas ãarovia, Yesu ãasuñe si pa ma pulkumali naña Kapeneam, ana pe piavi re poli, yeririna la amloge

asape naga pam si rui. ² Ana p̃isi na la moki naṣa apim puna, yo loyuṃa naga pulen la paṣisi, a vanua ṃena e mratava naga yepa vitokaki ga. Ana pogos naṣa la asike lele taaga sanene, Yesu mlologon Visena Wa kiena ne Ntewa pan la. ³ Ana e ke e pogos nene na, yar laṣasia atar yaru tai naṣa minana pimi, naṣa yepena wetelu ga mare. Ana la vari atar ga naga e ṃana tog naṣa mono ke ea pimi.

⁴ Ana pogos naṣa apim atol yo naṣane, apisu sane yo pule pa rui, taṣatete si atar kiela erau nene va lavisin Yesu. Pisi na lala ataryaun naga apa metava e wos nen yuṃa naṣane, lala aṃepo wos nen yuṃa metava mesmesun ga e naṣa Yesu sike ea, amligan malumun yaru naṣa mono ke e ṃana tog, pitomi tano e pulmas naṣane, pito loyuṃa.

⁵ Ana pogos naṣa Yesu kira pisu sur nene, kilia sape la nene, amlelaga ṃarera e naga paṣisi sane yoko naga iila kiela inanena nene, naga pisa pania, pisape “Naruu, in na nepiewo kon kiomṃa mlamulena piowa lala.”

⁶ Ana e pogos nene yaru navianena ṃa visaluaena la ṣasia asuṃa ga, amloge ke visena kiena ne Yesu. Ana p̃isi na la kiela sitomena la miyuṃae piowa ke e sur nene, ⁷ apisa kare ke naga, apisape “? Yaru nene pisalele kare ke kia wa kiena ne Ntewa sanape

na sanene? Ntewa naga taaga kilia viewo mlamulena viowa lala, pe yar re si tai poli, ana yaru nene pis ke sanene, naga sitom ke sape naga pe Ntewa narui.”

⁸ Ana veraga ga, Yesu mnunulu-ṣaria sape asitom ke piowa sanene e naga, ana pis pan la, pisape “? Komin ya ne sinemiu la pulen ke sitomena viowa la ne sanene? ⁹ Visae nevisa ve sanini van inanena nene, nevisave ‘Nepiewo pa kiomṃa mlamulena viowa rui,’ pona nevisa vania nesapenua ‘Osuṃalu, osulowar moṃa tog, oyali,’ ana e visena lua nene, tai naga ṃareran navisaena, a tai naga meme ga naṣa avisa. Naṣa sape ‘Osuṃalu, oyali,’ naga ṃarera manene laa, komin yoko akilia avisuluṣar sane kiau visena nene pe lelaga pona pe pe lelaga re poli, naṣa yaru nene suṃalu, pona pe suṃalu re poli. ¹⁰ Ana nagane, neyuṃaen sur tai naṣa amiu asitom ke asape Ntewa ga naga taaga kilia yuṃaenia, vena akilia avisuluṣar sane Narina Yeririna naga kiena puriukawaena torokin naṣa viewo mlamulena viowa lala na yomarava nini. Amiu ayagogan ruruia.”

¹¹ Ana Yesu pisa pa yaru na inanena naṣane, pisape “Nepisa pan ko, osuṃalu, osulowar moṃa tog, oyali ova uṃa.”

¹² Ana veraga ga, e maran la naṣa apisu ke, suṃal

sanene, kus m̃ana tog, mial pa vanua pa uña.

Ana pogos naña p̃ina la nene apisu sur nene, amilan paṽisi, amieluar Ntewa, asape “Awee, pe tepisuli re sur tai sanene poli wa e kieta malena, p̃ane ga ne.”

Yesu pio Matiu naña kiena kia tai Livae pimi tavevea

Matiu 9:9-13; Luk 5:27-32

¹³ Ana Yesu p̃asuṽe si pito garo e is nen pupia lapa, ana p̃ina la moki apim lele taaga e yo nene akovivia, naga pian la ke. ¹⁴ Pisi na naga mial laa pa sane, kirawal yaru tai teke e kiena yum̃aena e yum̃a na war-poloen kururu varu na takis. Yaru nene naga Livae, narina ne Alpeas. Ana Yesu pion pania, pisape “Oimi otavevenu.” Ana veraga ga Livae suñalu, taveve Yesu.

¹⁵ Siraunia, Yesu pa kinana e yum̃a m̃ana Livae, ana e pogos nene, li nawar-poloen m̃ena takis la moki, amio p̃arm̃arera taṽena la, naña apimi atotano veraga amio Yesu amio kiena nalogena lala, komin e legiena nene, yeririna kar la ne naña atavevelili m̃a Yesu. ¹⁶ Ana navianena navisaluaena la p̃asia, naña la ape le Varasi lala, apisu naña Yesu teke veraga amio yaru la ne sanene, apiun tan nalogena lala, apisape “?Komin ya ne kiamiu navianena kinan ke veraga amio p̃arm̃arera la sa nene?”

¹⁷ Ana Yesu mloge visena nene, pisatam̃e la, pisape

“Yaru la naña yepela poga ga la pe sinelan re asape ava puna ne yaru nakilaruruen maiena la poli, ana la ga naña amai, la na sinelan paṽisi. In na pe nepimin re naña nevio yaru la naña apisa ke asape amesmes p̃isi rui e marana ne Ntewa vena ataveve inu, peraga, in na nepimin li viowa la sane la nini.”

Naviunena tai e lepas na monsilena

Matiu 9:14-17

¹⁸ Ana e pogos nene, nalogena kiena ne Yoane Nakeena amio le Varasi lala aṽuar ke p̃elaga namonsilena nakilaen lotuena van Ntewa, ana yeririna la apim pu Yesu, apiun tania, apisape “? E, sanape ne naña nalogena kiena ne Yoane la amonsilu pe nakilaen leniena, a nalogena sa le Varasi m̃ena lala, akila ke maran taaga, ana komin ya ne kioña nalogena lala pe akila re poli?”

¹⁹ Ana Yesu pisatam̃e la, pisayu naga amio kiena nalogena lala, sane la akekara paṽisi pogos naña naga sike amio la, ana p̃isi na sinela viowa pogos naña sa naga ure matan la, ana pisape “? Pogos naña yaru natalopa-ena sike e p̃ap̃agena amio kiena erau lala wa, asitom ke asape lala monar aligan kinanena na p̃ap̃agena? Peraga. ²⁰ Ana siraunia, visae pogos tai nasinekar kiena ne yaru nene laṽasia aimi aurelua

naga vetan kiena erau lala, e pogos nene narui kiena erau la nene akilia aligan kinanena, komin naþa la sinela piowagan manene naga.”

Sur vii amio sur marua

²¹ Pelaga na monsilena nene, naga þelaga marua tai na lotena kiena ne le Yu lala, ana Yesu sinenan pisape kila meraravan van la sape þelaga marua la ne sanene, la taþatete yakol si amio suri vii la naþa naga pian lan ke ne. Ana pisa þakaiwa tai e lepas nene pan la, pisape “Taþatete tela kinakina kulmrae tai naþa pe urviu ana tesuluwo ruru pulus naþa teke e kulsota marua nene, komin kulmrae vii nene kilia urewowa kulsota nene kompas, þisi na pulus naga kilia vim ve keviu laa sane. ²² Ana kuruta na munena naþa sirpup pava ke ga wa, taþatete tetaron vito e kulus nen nane naþa pe urmarua, naþa ataron kuruta na munena pito ea yam moki rui. Ana visae tekila ve sanene, yoko kuruta naþani lapa, kila kulus mapoa, kuruta namunena naga taroi, a kana pias nena piowa nena ga. Ana kuruta vii, monar tetaron va e kulus nen nane naþa pe urviu, mārera ruru po, ana tekilia teligan ruru moña yam ve piavi.”

Yesu pe suþen Legiena Wa Matiu 12:1-8; Luk 6:1-5

²³ Ana e legiena taþena si tai, naþa pe Legiena Wa, Yesu amio kiena nalogena

lala amial apano, ana kiela mrapa naga pa kom lokove na kona lala. La amial mña sanene, pano-o kiena nalogena la viso kari la, ana apae plan kona laþasia akania. ²⁴ Lala akila ke sanene, le Varasi la þasia asuña e naþane, naþa akirawal ke Yesu lala, apisa pa Yesu, apisape “!Ei, okira! Kiomña nalogena la akila ke sanene, la pe pon re akila sanene e Legiena Wa poli, sa ve sanene la akilaro ke kieta navisaluaena ne.”

²⁵ Ana Yesu pisatamne la, pisape “?Pona pe amiu apuloli re e Visena Wa pogos tai poli yo, naþa pisayu sur la naþa Parin Suþe Keviu Tepet kila nanua sumo? !Amiu akilia ruru pa rui! Naga amio kiena yaru lala viso kar la paþisi, ²⁶ naga pa loyumi e lele wa kiena ne Ntewa, mla kilaparavi wa naþa navisaluaena pisape yar wa ga lala akilia akania, þisi na Tepet la akania. Ana Apieta, naþa pe þarin yaru wa e pog nene, naga tamān ga pan la.

²⁷ “Nevisa van amiu, sane kieta navisaluaena lala pe pe na māreran kare itaen re si poli. Ve sanene na, Legiena Wa naga pe pe na kila kareen re si malena kiena yeririna la poli, ana pe naiila itaena. ²⁸ Ana Narina ne Yeririna naþa pe suþen sur punu ga, naga ke narui pe suþen mēna Legiena Wa, naga ga kilia visa ya naþa tekilia teyumiāen e Legiena Wa, a naþa ve teyumiāen re.”

3

Yesu kila ruru lima ulu tai e Legiena Wa

Matiu 12:9-14; Luk 6:6-11

¹ Ana e Legiena Wa si tai na, Yesu naga pa si e yumã na lotuena, ana e pogos nene, yar tai naga m̃eke loyũã naãa limana tai pulu. ² Ana le Varasi laãasa naãa sinela kar ke pa Yesu rui, asike lavisin naga e pogos nene, la asape apisuar ruruli ke naga, vena alual li ãelaga viowa ãasia e naga, ana sinelan asape avisuli m̃ena yoko Yesu kila ruru lima ulu nene e Legiena Wa nene pona ve kila re.

³ Ana Yesu pisa pan yar naãane, pisape “Osumãlu, ovam metava e nini wa,” ⁴ ana naga piun tan la naãa asike ne, pisape “?E, kieta navisaluaena pisa ke sape tekilia teyũãen yara la ne e Legiena Wa lala? ?Pisa ke sape tekilia teyũãen sur la naãa po, pona sur la naãa piowa? ?Po pisa ke sape tekilia tetamalia yaru, po towemoñaria?”

Ana la nene pe apisa re si sur tai poli.

⁵ Ana Yesu kira pisuveve la, pisu marala la m̃arera ga sike na, ana naga mloge piowa manene paãisi vanonia, ana sinena kari la. Ana naga pis si pan yar naãa limana pulu, pisape “Kian mesmesun li lumoña wa.” Ana pogos ga naãa yar nene kila sanene, limana pimi po sina

ga. ⁶ Ana le Varasi la amolue, apa mesmes ga apisu yeririna kiena Suãe Erot, naãa lala akilia alual li mrapa tai na weñaren Yesu ve sanape.

Yeririna la moki apimin Yesu

⁷ Ana Yesu amio kiena nalogena la apetan la, apato si garo pupia lapa, ana yeririna la moki atavevela apatove. Yeririna la nene, laãasia amolue e yo taãena lala nae Kalele, ⁸ a la ãasia apitom tano e lepas naãa Yutea, amio pupia kiela kumali naãa Yerusalem, a ãas apitom e lepas naãa Itumea, a ãas apitom e wii naãa Yortan lepas na vano, a ãas akom ma pupia sive keviu e yo lala nae kumali keviu lua nene, Taea amio Saeton. La punu nene amloge pa visena na sur la naãa Yesu miyuñaen ke rui, ana asape aviminia.

⁹ Ana pogos naãa la punu ga nene asike e is nen lapa, Yesu pisa pan kiena nalogena la pisape ava avisawo narin waa tai toña ga, komin yaru la nene moki liu, ana naga yepen mavin sape sa ãisi yar la aim yo kuskus manene la puna. ¹⁰ Na nene komin naga kila inanena la moki amloge po si rui, ana yar taãena la naãa aminana ke wa, la m̃ena moki naãa asusunlan ke asape aimi lavisin Yesu, vena atol ga naga.

¹¹ Ana e pogos nene, visae ninuna viowa la asike e yeririna la ñasia, visae avisu Yesu, lala monar avatanonia, akinai e mia lana, avion ñareran, avisave “Ko na ope narina Ntewa.” ¹² Ana Yesu pis ñarera pan ninuna viowa la nene, pialuñar la pisape yoko ve avisawal re sanene van yaru lala avisave naga ai.

Yesu mliganar kiena nalogena la lualima taaga pa lua
Matiu 10:1-4; Luk 6:12-16

¹³ Ana siraunia, Yesu naga pa metava e yo naña pe kunusia, naga pio yeririna lañasia pisape aimi puna. ¹⁴ Ana pogos naña apimi, naga mliganar la lualima taaga pa lua, pisa pisape lala ave nalologena, naña kiela yumãena na ve sanini: yoko monar la ayal luen ga amio naga, a yoko naga ligana la vena akus Lologena Wo va e yo lala, ¹⁵ a yoko puriukawaena na ñeneplanen yermare sike e la.

¹⁶ Ana kia kiena ne nalologena ne lala sanini:

Saemon, naña Yesu sikiapu si ki viu tai Pita,

¹⁷ a Semes, naña narina ne Sepeti,

a Yoane naña wenla ne Semes nene, naña Yesu sikiapu lalua nene rui, asape Ponases, naña kana kinasia pisape la lua nene ape polilu nena

ga, komin la lua nene, pulgola apismolue luega,

¹⁸ a Antru,

a Pilip,

a Patalomiu,

a Matiu,

a Tomãs,

a Semes naña narina Alpeas,

a Tateas,

a Saemon, naña kila politik pan le Rom lala,

¹⁹ amio Sutas nae Kariot, naña siraunia pielua Yesu.

Namratava puna ne Yesu asitom ke asape naga pe wowe

Matiu 12:24-32; Luk 11:14-23, 12:10

²⁰ Ana siraunia, Yesu ñasuñe si umã, pupia ñina la apim si puna, ana Yesu amio kiena nalogena la amiyumãen la ñã pano-o pe aparurula re nena ga, akinana re poli.

²¹ Ana la naña e mratava puna ne Yesu amloge naña naga miyumãe manene la pa sanene, amloge ñena yar tañena la apisayu ke naga, apisape “!Yar nene kilalu pa ñarina rui!” ana anena amio wenla lala, apano asape aurrelua naga vetan la.

Yerkawa ñena lala apisa ke asape Yesu miyumãe ke ga e puriukawaena kiena ne Yermare

²² Ana e pogos nene, naviana na visaluaena lañasia

amligan ma Yerusalem apitomi e yo nene, la mēna apisayu ke Yesu pan yeririna lala, asape “Yaru nene, suḡe kiena yermare la naḡa Pelsepel, naga pa mēke e rui,” ana apisa mēna, asape “Yar nene, naga mēna pile plan ke ga yermare lala e puriukawaena naḡa Pelsepel taḡan pania.”

²³ Ana Yesu pio la apimi lavis puna, pisi pan la e ḡakaiwa, pisa sape “? Sanape, amiu asitom ke asape Yermare naga kilia mēnelua sina Yermare? ! Naga taḡatete nena ve sa nene! ²⁴ Visae suḡe tai, kiena yeririna la aureure, sane komḡas la na akawela ke amio laḡas, yuḡaena kiena suḡe nene taḡatete ga suḡalu. ²⁵ A visae uḡa tai, la aureure naḡa la ḡasia asape aḡene plan lala ḡasia, yoko yeririna la nene taḡatete asu ruru pogos tai. ²⁶ Ana sa mēna nene, sa yermare kiena Yermare Lego, la ḡasia asuḡalu asape akilali naḡa aḡene plan lala ḡasia, nanene kana kinasia sane nasuḡenena kiena Yermare taḡatete suḡal mārera, kiena puriukawaena naga ḡisi. !Ana peraga, yermare mārera ke ga wa!

²⁷ “Kam na apisu ke ne, visae yaru tai sinenan ke pisape va loyuḡa mēna ne yaru mārera tai vena vin-aun kiena sur lala, naga

monar war kilika viar ke ne yaru mārera nene sumo wa, ḡisi na kilia war plan kiena suria. Ana nekila ke sanene pan yaru mārera nene Yermare.

²⁸ “Lelaga nepisa ke pan amiu, mlamulena viowa kiena yeririna lala, amio visena viowa la naḡa apisa ke nene, Ntewa kilia viewo la vanonia, ²⁹ ana yar naḡa visae visanena kare Ninuna Wa, visa kiena yuḡaena ḡasia Yermare Lego ga naga miyuḡaenia, yar na sa nene taḡatete tol naviewoena pogos tai, kiena mlamulena viowa nene tolue ga vano-o taḡatete ḡisi pogos tai.”

³⁰ Yesu pisa ruru si visena mārera nene pan la komin la nene la ke narui naḡa apisa ke asape ninuna naḡa teke e naga pe ninuna viowa ga tai.

Anenane Yesu amio wenla lala apim asape aurelua naga Matiu 12:46-50; Luk 8:19-21

³¹ Ana anenane Yesu amio wenla la apimi akate e pog nene, asuḡal ga asuḡa vanua, amligan visena pavinia vena naga vitom katen la. ³² Ana e pogos nene, pupia ḡina atotano ke lavisin Yesu, ana visena nene pa tol naga, la apisa apisape “! E, anoḡa amio womla lala asike vanua, asape avis kone amio ko wa!”

³³ A Yesu pisatame la, pisape “? A aneu naga ai? ? A wolai lala ai?” ³⁴ Ana kira pisuveve la naḡa ateke

lavisinia pisa pan la pisape “!E, apisu ke ne! Aneu, amio wolai lala, la ke nene narui. ³⁵ Komin yaru naña miyuñaen sur naña Ntewa naga sinenania, yar ne sanene naga pe wolai, a pe vineu, a pe aneu ãa rui.”

4

Pakaiwa na yaru naña peven kona

Matiu 13:1-9; Luk 8:4-8

¹ Ana e pogos tañena si tai, Yesu pian ke yaru lala e yepas nen lapa nae Kalele. Ana yeririna la moki naña apimi puna e pog nene, kila naga pa metava e narin waa tai naña toña e lapa nene, pa tofano metava ea, ana yar la naña asuña ga ura.

² Ana naga pian la ke e sur la moki e ãakaiwa, ³ naga pisa pan la, pisape “Ayagoga ruru lia. Yar tai, naga pa peven kona e kana lokove. ⁴ Ana pogos naña naga peven kona la pa sanene, kurus la ãasia kekapil lavisin laa is nen mrapplepa. Ana siraunia, manu la apimi atete plan sina.

⁵ “Ana kurus lañasia kekapil e yo naña kilavaru sike vatano. Ana e yo nene pe porotano wo keviu re poli teke metava, ana kila narui akapuru iroro ga, ⁶ ana pogos naña mrae ãarlar pa metava, yepisusun sus lala, veraga ga amiyayai komin ãeligas la pe pito manene re tano poli.

⁷ “Ana kurus ãasia amlolor e yo tai naña sumo pe ate plan ruru re kilika la naña pe nonos e poli, ana ãisi na kilika nene kapur sina keviu, ana piwo make ga sus nen kona la nañane pano-o amarmare, pe añar re si mras la poli.

⁸ “Ana kurus tañena la amloloru e porotano naña po, akapuru po, pano-o añar mrasnela lala. La ãasia añar mrasnela tol lualima yam telu [30], a lañas añar tol lualima yam orai [60], ana lañasia pa laa tol ponotia taaga [100].”

⁹ Ana Yesu pisa pan la, pisape “! Amiu punu ga kiligamiu sike na. !Popon sa aloge kilia kiau visena nini!”

?Komin ya ne Yesu pis ke ga e ãakaiwa lala?

¹⁰ Ana siraunia, ãina lala apiaña tetai, ana Yesu naga taaga ga sike, ana yar la naña asike amio naga amio kiena nalogena lala, apim apiun tania apisape “? Kinas nen ãakaiwa nini naga sanape? ?Ana komin ya ne ko na okuan ke visena la ne sa nene, ana opian ke mēna yaru lala e ãakaiwa?”

¹¹⁻¹² Ana Yesu pisatamē la, pisape “In na nepian la ke e ãakaiwa la nene, komin la ape ãarmarera la pañisi, sa naña akila ke visena kiena Navisawalena Aisea na konua rui pimi pe lelaga, naña pisa ke sape

*'La akirava, akirava ĉa
vano-o, amloge, am-
loge ĉa vano-o,
ana taĉatete avisu kilia
suri tai, taĉatete ĉena
aloge kilia suria.*

*!Visae peraga, pona avilon
kiela sitomena la yo
rui, pona Ntewa viewo
pa kiela mlamulena
viowa la yo rui!' Ais
6:9,10*

“Vanon sur sanene, inu nepisape lala ape ĉarmarera lala, asumĉa perina paĉisi. Ana amiu ke narui, yoko wo laa van amiu vaĉisi. Navisawanena navesuĉenena kiena ne Ntewa, yoko in na nevisawal ruru merarava wo van amiu.

13 “?Ana sanape, amiu pe amloge kilia re kinas nen kona nene poli? ?Ana visae amiu pe asitom kilale re kinas poli, ana sanape yoko aloge kilia ĉakaiwa taĉena la naĉa sa nevisayu van yeririna lala?”

*Yesu pisawal kinas nen
ĉakaiwa na yar naĉa peven
kona*

14 Ana Yesu pisa, pisape “Pogaga, yoko in na nevisayu meraravan kinas nen ĉakaiwa nene van amiu. Kana kinasia naga sa nini: Porotano taĉena la nene, la sa naĉa malena kar la ne kiena yeririna lala. A naĉa yar nene peven ke kurusia e porotano la nene, naga sa naĉa apisawal ke visena kiena ne Ntewa pan yeririna lala.

15 “Porotano ĉarera naĉa e is nen mrapplepa, naga sa naĉa yar naĉa pogos naĉa mloge visena kiena ne Ntewa, ana visena nene pe pa ruru re nena loyumuĉa e losinena poli. Ana manu la nene, la sa naĉa Yermare, naĉa veraga ga pimi mlalua sina visena kiena ne Ntewa petan los nen yeririna nene.

16 “Ana porotano naĉa kilavaru naga sike tano, naga sa naĉa yar naĉa mloge visena kiena ne Ntewa, ana verakorena ga kekarania, ana mlavia, 17 ana visena nene naga pe towawa ruru re e losinena poli. Ana naga kapuru sa ga narin sus tai naĉa pe pe ĉeligas ruru re poli naĉa kila yoko kapuru ve plas ga. Ana pogos naĉa sa pog ĉarera la imi pona yar la asape avevela komin amlelaga ke e visena kiena ne Ntewa, ana verakorena ga aligan sina ga.

18 “Ana porotano naĉa kili-kiela viowa sike ea, naga sa naĉa yar la amloge visena kiena ne Ntewa, 19 ana ĉisi na, lala asitom manene la kiela malena, a sitomena na waren sur ve moki vim kila kotalia la, ana lala sinelan manene la sur wo lala na yomarava nini. Pelaga la nene pimi sane kilika viowa, piwo Lologena Wo nene kila sane ve war re si mrasa e malena kiena yeririna la nene.

20 “Ana porotano wo nene, naga sa naĉa yeririna la naĉa amloge visena kiena ne Ntewa, amloge kilia,

akekarania, amlararia e losinela, ana siraunia aþar mras nen Lologena Wo nene e kiela malena, la þasia aþaria tol lualima yam telu [30], þas tol lualima yam orai [60], þas tol ponotia taaga [100].

“Kinas na þakaiwa na kona maro ga e nene.”

Pakaiwa na kapi na tegaena

Luk 8:16-18

²¹ Ana Yesu pisa sina pan la, pisape “Ita yeririna lala, visae tesilan kap vivaga, yoko ve telawan re to vatanon paket. Peraga, monar tetelan to metava e kana lele nena vena tegoli punu yo. ²² Sanene, nanagane nasuþenena kiena ne Ntewa sane kapi te ga nene, naþa nanagane na molmolue ke e ita narui, vena tegoli sur punu ga, ana sur lala punu ga naþa apisawo sike na, a visena wan lala, monar akakate e yomerarava. ²³ !Ana amiu punu ga kiligamiu sike na, popon sa aloge kilia kiau visena nini!”

La monar ayagogan ruru visena kiena Yesu

²⁴ Ana Yesu naga pis si pan la, pisape “Amiu monar ayagogan ruru kiau visena, asiþom ruru la lia. Yaru naþa mloge, ana pe taveve re poli, naga yoko taþatete loge kilia ruru si narui. Ana yar naþa mlogear kiau visena la, naga kilia loge

kilia ruru mþena kiau navia-nena la moki naþa sa imi si sirau. ²⁵ Ana yar naþa kiena suri moki pa rui, yoko war ve moki laa va laa sane, ana yar naþa pe kiena sur re poli, þisi na naga kilalu narin sur naþa mla ke.”

Pakaiwa na kurusia naþa kapuru ke

²⁶ Ana Yesu pisa ke sina ga pisape “Nasuþenena kiena ne Ntewa naga sa naþa kona naþa yar tai naga peven ke e kiena porotano. ²⁷ Pogos naþa peven pae na, pe kila re si sur tai e kurus nene poli. Naga momia momalio ga, tavolo, momalio, tavolo, suþalu, salue ga nene yemalo a legiena, ana kurus nen sur nene, naga ga sus plamolue, kapuru ke sanene. Kapuru ma pano-o, ana yar nene naga kiliar re kurus nen sur nene kapur ke sanape poli. ²⁸ Yar nene kilia re sur tai poli, pano-o korowas la kian pa perina piavi re na þar vinasia, þisi na tau. ²⁹ Ana pogos naþa kinas la menmene ruru po, yar nene siar si miyumaie narui, þar kiena playu pa te plan mrasnena lala.

“Ana navesuþenena kiena ne Ntewa naga kapur tekak ga sanene, telivi ke e yomarava wetelu nagane, ana e legiena tai yoko tekirawal pupia mrasnena vam metava.”

Pakaiwa na kurus nen purpa

Matiu 13:31-32; Luk 13:18-19

³⁰ Ana Yesu pisa sina, pisape “Pelaga navesuņenena kiena ne Ntewa naga pe taņena ga sike na, naga mārera paņisi naņa nekilia nekirawal si pākaiwa tai naņa vena visaen sape naga sanape. ³¹ Sa naņa kurus nen purpa tai yo, naņa naga tekaki ga miyuve kurus nen sur taņena la naņa temapila la ke e kata lokove lala, naga tekaki na tekaki. ³² Ana pogos naņa kapuru keviu, purņesia naga pimi keviu miyuve make ga kinanena taņena la naņa sike e kata lokove lala. Ana pupia korowas la paņisi, naņa manu la akilia ava ase ea, vanon kana wamal po, yomanin ea.”

Yesu naga pian yeririna la e pākaiwa

³³ Ana Yesu pian ke yeririna la e Lologena Wo e pākaiwa la moki sanene, naņa sane torokin yoko akilia aloge kilia. ³⁴ Visena la punu ga naņa pian lania, pākaiwa teke loyuma, ana pogos naņa naga ga sike amio kiena nalogena la, e pogos nene narui na naga sun pisa meraravan kinas nen pākaiwa la nene pan la.

Pupia lagi naņa Yesu naga pisawoia

Matiu 8:23-27; Luk 8:22-25

³⁵ Ana Yesu sumņa ke e waa naņa naga totano e

pian yeririna lala, ana ko yepekilavi, naga pisa pan kiena nalogena la, pisape “Ei, ita tokusro teva komņas nen lapa vano.” ³⁶ Ana kiena nalogena la amligan yeririna la asike na, apa e waa naņa Yesu naga teke pa e rui apano. Ana narin waa si laņasia asiraun la. ³⁷ Narin waa la nene apato ma pano, pupia lagi tai naga molue, miyu lapa naņane kila pupia sive naga kekela ke e waa, kila na pulen ke e sive narui, lavisi talilu. ³⁸ Ana Yesu naga miyulugan ke e yulugana tai e pēren waa, monon momalio mąga. Pisi na lala apa apioņegeia, ana apisa pania, asape “!Navianena! ? E, sanape pe ositomāl ita re na lavis tetalilu ne po?”

³⁹ Ana Yesu sumalu, pis mārera pan lagi, a pis mēna pan pupia sive la nene, pisape “!Amiu ava ruru amiu!” Pisi na lagi molue re si poli, yo mare ga mēke na. ⁴⁰ Ana Yesu pisa pan la, pisape “? Komin ya ne amiu amarau sanene? ?Amiu pe amlelaga re e in poli yo?”

⁴¹ Pisi na la amarau paņisi, apiuyun ke sina ga petan la, sape “?Yar a nene? Aulai, naga pis ga sanene na, lagi amio sive amlogear veraga ga.”

5

Yesu mēne plan ninuna viowa moki petan yaru nae Kerasa

Matiu 8:28-34; Luk 8:26-39

¹ Ana Yesu amio kiena nalogena lala apimi aþarpo yo e komþas nen pupia lapa nene, aþarpo lologia yo naþa Kerasa, naþa laþas apio ke asape Katara pona Kerkasa.

² Ana la apa ura e yo nene, ana e yo nene puluve na yar mare la asike ea, ana yar tai naþa ninuna viowa teke e naga, naga sike e lotap nene, sa naþa pe mñana uña.

Ana pogos naþa Yesu pula tano petan waa, veraga ga yar nene molue e lotap, kiriri pitomi puna.

³ Yaru nene marana ka paþisi, yar la akilayon asape aviaria pano-o akilapule ga yonia.

⁴ Yam moki rui apiar lana amio limana e sen pona kilika, apiviaria panon laki ana naga pureroro ga sen la nene amio laki lala, pano-o pe yar re si tai poli naþa puryuna kawa torokin kila yar nene imi momñau.

⁵ Ana kolemalo punu ga amio legiena, naga sumña mialialor ke e lotap a metava mñena e kunus lala, naga monon mñañaul ke, a pilavilan wowa ke yepena lala e kilavaru.

⁶ Ana yar naþane, pogos naþa naga sumña ke perinan yo naþa Yesu la apim ura ea wa, naga mñal pa Yesu rui, kiriri pitomi tano puna, patanonia, kinai puna.

⁷⁻⁸ Ana Yesu pisa, pisape “! Ninuna viowa, ovetan yar naña, oure matan naga nanagane!”

Ana ninuna viowa mlakai mñarera pania, pisape “A ko,

Yesu, narina ne Ntewa Mali, kiomña ya ne teke e inu? !In na nepiun tan ko, e kia kiena ne Ntewa, sane yoko ko na ve ola re nakoarena van inu.”

⁹ Ana Yesu piun tania, pisape “?Ko na kiomña kia ai?”

Ana ninuna viowa pisa-tañea, pisape “In sa kia Yaru Moki na Mara, komin imimi moki liu.” ¹⁰ Ana ninuna viowa naþane piuyun mñareran ke petan Yesu sape ve mñene plan la re vetan mñala nene.

¹¹ Ana e yepas nen kunus nae yo nene, pupia þegas nen nompui, la asun akolkol mña e porotano, naþa tol sane manu lua [2000], ¹² þisi na yermare la naþane atagi, apiuyun mñarera petan Yesu, asape “Awis, oligan imimi meva e nompui la nene, otamñan imimi meva mese e losinela.”

¹³ Ana Yesu tamñan pan la, pisape “Pogaga, amiu avano.” Ana lala amolue petan yar naþane, apa e los nen nompui la naþane. Ana veraga ga, nompui la nene akiriri, apito tano e yeparpas nen kunus nene, amloloru apito tano e pupia lapa naþani, ana la amunñar lan wii na amarmare.

¹⁴ Ana yaru navisuaren nompui la apureure, apito uña, apisawal sur nene, a lala apisawal mñena e yo taþena la naþa sike ne, kila narui na yeririna la moki naþa apavin asape avisulia. ¹⁵ Ana pogos naþa la apavini, apisu Yesu naga sike

amio yaru naþa sumo nin-
una viowa la ase naga, mian
pa kulmrae rui, pa ruru
pa rui pe maran ka re si
poli. La apisu naga pimi
po si sanene rui, amaraunia.

¹⁶ Ana la naþa asuþesania
apisu ke sur la punu ga
nene, la asunyu pan yeri-
rina taþena la naþa apam
marea, la apisayu sur la
naþa Yesu miyumaen pan
yar nene, a sanapen nompui
la naþa amloloru apito e wii.

¹⁷ Ana la apisu sane piowa
ga, añareran ke pan Yesu
asape naga monar ure vetan
kiela yo.

¹⁸ Ana þisi na Yesu la apito
si tano e kiela waa, pogos
naþa Yesu pa ke metava e
waa, yar naþa sumo ne,
naga pitomi piun māraran
ke pan Yesu, pisape “Awis
Suþe, in na sineun nesape ko
otamañia ita la nini!”

¹⁹ Ana Yesu pe tamān re
poli, pisa pania, pisape “Per-
aga, popon sa ova si uña,
ovisayu van la naþa na
mratava pun ko amio kioma
erau lala, ovisayu van la
sanape naþa Ntewa sinena
miye ko paþisi, ana kila po
na po sanene pan ko.”

²⁰ Ana yaru naþane
þasuþe sina, pa e yo punu
ga e laþas naþa puna, naþa
apio ke asape Pulkumali
Lualima, naþa yaru la naþa
Le Yu lala pe asu re e poli,
ana pisawal ke yumāena wo
naþa Yesu miyumaen pania.
Ana lala naþa amiyaggon
kiena sunena nene, lala
amilan paþisi.

*Narina ne Saeras naþa
sira, amio sira naþa tol
kulkota mñana ne Yesu*

*Matiu 9:18-26; Luk 8:40-
56*

²¹ Ana Yesu la akome waa,
akusro sina komþas nen
lapa naþa narui, ana po-
gos naþa Yesu pula pa ura
sane na, pupia þina na yeri-
rina la apim akovivi sina
asike. ²² Ana yaru keviu

tai na yuñā na lotena nae
yo nene, kiena kia Saeras,
naga pimin sape visu Yesu,
pimi lavisinia, kinai tano
puna. ²³ Naga tagi pania,
piun tania, pisape “Naruu
naþa sira, naga mai na mai,
ana nanagane na pona naga
mare pa yo rui. Ana nepiun
ke tan ko vena ko oim, oligan
lumoma te naga, vena loge
wo sina, mal ve piavi re laa
sane wa.” ²⁴ Ana Yesu þarlar
sumālu, amio yar naþane
apavin, ana yaru la moki
e þina la nene, la mēna
ataveve la, naþa amigagar
la ga e yepas nena ne Yesu
apano.

²⁵ Ana lala yaru tai naþa
apa ataveve ke Yesu sanene,
naga sira, naþa inanena na
kupario teke e naga legiena
punu ga, tol kas lualima
taaga pa lua rui. ²⁶ Ana
sira nene, naga pul yaru na
kilaruruen inanena la pano-
o kiena kilavaru la þisi, ak-
ilayon naga pano-o paþisi,
ana naga mloge maran taaga
sike, inanena nene naga
pimi keviu lue ga legiena
punu ga. ²⁷⁻²⁸ Naga mloge
yam moki rui naþa yaru la

apisayu ke Yesu, ana kiena sitomena tai na, sitom ke sape “Visae netol ga m̃ana kulkota, yoko kiau inanena naga p̃isi.” Sanene narui na pa tapolou likan yeririna la naṣane, naga pimlilue lavis varaun m̃asina ne Yesu, kian limana sane na, tol ga mra-pogos nen kulkota m̃ana ne Yesu.

29 Pogos naṣa naga tol kulkota m̃ana Yesu sane na, veraga ga e aora nene kiena kuruta naṣane p̃isi, ana naga mnunun luṣaria e naga sane kiena inanena naga kovio petan rui. 30 A Yesu m̃ena mnunun luṣar sur tai, sane puriuna tai kovio petania, ana naga pilon veraga ga likan yeririna la naṣane, piunia pisape “?E, ane tol ga m̃a kulkota nanagane?”

31 Ana kiena nalogena la apisa-tamea, asape “?Ko na opiun osape ane tol ko ga nagane, sanape ne, ko pe opisu re yeririna la moki manene na amigar la akovivi ko ke ne po?”

32 Ana naga sum̃a kirawelee m̃aga sape kirawal li ane tol naga. 33 Ana sira naṣane kilia pa rui, sape naga, naga marau paṣisi, sinena kurkur na kurkur, p̃isi na pimi puna Yesu, kinai tano e mialana, pisawal sur punu ga. 34 Ana Yesu pisa pania, pisape “Aua, nalelagaena ga kioṃa e inu kila ko om̃loge si po narui. Kioṃa inanena naga kovio nenaga. Sum̃arena kiena ne Ntewa

sike amio ko, owasuṣe ko sina ga oto um̃a.”

35 Ana pogos naṣa Yesu pis ke pan sira naṣane wa, visena tai kom ma um̃a m̃ana ne Saeras pitomi, pisawal pania sape “Narum̃a sira naṣane naga mare rui. Yoko ve oure re si pupia navianena nene vavini, ve okila kare re naga.”

36 Ana Yesu mloge m̃a visena nene, pisa pan Saeras, pisape “Ve sinem̃a viowa re, olelaga ga m̃arera e Ntewa.” 37 Ana Yesu pialuṣar yeririna la punu ga sape la asum̃ara ga ve ataveve la re avavini, naga pure ga la telu Pita, a Semes amio wenla naṣa Yoane apavini. 38 Pogos naṣa apa lavisin um̃a m̃ana ne yar keviu naṣane, apisu yar la sinela piowagan ke nin sira nene rui, la asike atagin ke, amlolokaj̃n ke. 39 Ana Yesu pa loyum̃a, pisa pan yaru la nene, pisape “? Sanape ne amiu amlolokai keviu ke, atagi ke sanene? Sira nene naga mare re poli, naga momalio ga ne.” 40 Ana la apitale viowa ga pania.

Ana Yesu pisa pan la apa vanua, purear ga anenaṣe sira nene amio arimana, a kiena nalogena la telu naṣane apa e lele naṣa tas nen narin sira nene m̃eke ea. 41 Ana Yesu pa mlilu tarar limana, pis pania kome kiela visena, pisape “Talita kum,” kinas nen visena nene pisa ke sape “Kiau narin sira, ko osuṃalu lia.”

⁴² Ana veraga ga e aora nene, narin sira nene naña kiena kas tol lualima taaga pa lua [12], naga suñalu, mial. Ana pogos naña la apisu sur nene, amilan na pano-o kiela sitomena plas ga. ⁴³ Ana Yesu pisa pan la pisape ala re kinanena tai vania, a pisa mēna pan la pisape yeririna tañena la ve aloge re sur nene.

6

Le Nasaret lala pe sinelan re Yesu poli

Matiu 13:53-58; Luk 4:16-30

¹ Ana Yesu molue e yo nene, p̄asuḗ sina ga pimi kiena, amio kiena nalogena la. ² Ana e Legiena Wa, naga pa amio yaru lala nae kiena yo nene e loyurña e kiela yurña na lotena, ana suña pian la ke. Ana pogos naña la amloge amilan kiena visena la pano-o pañisi. Ana la apisa apisape “!Aulai! ? Yaru nene naga p̄ar sur la nene pe? ?Naga tol namanmaruaena nene sanape? A naga kila ke kile la nene sanape ne? ³ Ita tekilia ke yaru nene rui. Naga yaru na yurñaenen ga yurña, naga pe narina ne sira naña Maria, a la nene, Semes, a Yoses, a Suta, a Saemon, naga pe wenla ne la nene. A vinena lala, la ga naña asike amio ita ne.” Ana sinela karia, pe sinelan re nena naga.

⁴ Ana Yesu pisa pan la, pisape “Yaru naña pe navi-sawalena, yaru tañena lala akilia avatanon naga, ana yaru nae kiena yo, amio mēna namratava puna, la ga nene taḗtete avatanon naga.” ⁵ Ana e kiena yo wawa nene, Yesu taḗtete kila kile la ea, ana naga mligan ga limana e yaru la lua la ga naña aminana, amloge si po. ⁶ Ana Yesu sinen pula mila pañisi komin yaru la nae kiena yo wawa naña pe amlelaga re e naga poli. Pisi na naga petan kiena yo, mial pa e pulkumali tañena lala ana pian ke yeririna lala.

Yesu mligan plan kiena nalogena lala peve lua

Matiu 10:5-15; Luk 9:1-6

⁷ Ana Yesu pio kiena lualima taaga pa lua nene, pis ruru pan la, mla nam̄areraena pan la vena akilia ataulu ninuna viowa lala, a siraunia mligan plan la peve lua apano. ⁸ Visena wo la nene naña naga pisa pan la sumon naña lala apano, naga sanini, pisape “E lepas na kiamiu mrapa, yoko amiu ve awar re sur laḗas amio amiu, ana kiamiu plasgai ga alararia avano. Yoko amiu ve awar re kiamiu kinanena p̄asia, pona karo lala, pona varu. ⁹ Amiu akilia ayen kiamiu kulus nen lamiu lala, a ve awar re m̄amiu kulmrae tañena laḗasia, m̄amiu kulmrae

taaga nane amiyenar ke ne sa ayal avano.”

¹⁰ Ana Yesu pisa mēna ga, pisape “Pog naḡa sa la awere amiu ava loyuma mēla, ana amiu monar akekarana ga nasuen amio na mratava nene, vano tol pogos naḡa sa amiu avatan si pulkumali naḡane.

¹¹ Ana visae pulkumali tai, yeririna laḡas yepela mavin were amiuena ava mēla uma lala pona yepela mavin loge amiuena, amiu aligan ruru kiela yo nene mēke na, ana pogos naḡa sa amolue e yo nene, monar atanvan puluyavi nae yo nene naḡa sike e lamiu, sane kile tai, pona kiamiu visena mārera tai pan la, sane yoko lala akus nakoena tai naḡa mesmesun ga kiela ḡelaga viowa nene.”

¹² Pisi na kiena nalogena lala apa amlologon pan yeririna lala asape monar avilopu la, ¹³ ana la aḡene plan ninuna viowa la moki e yeririna lala, ataron mēna narin wel na mras nen olip e ḡarin nainanena la moki, sane kile na navisa ruruena kiena ne Ntewa, ana la amloge po sina.

Parin Suḡe Erot Antiḡas pisayu Yesu

Matiu 14:1-2; Luk 3:19-20, 9:7-9

¹⁴ Ana e pogos nene, Parin Suḡe Erot naga mēna mlogeli ma sur la naḡa Yesu miyumaenia, komin kia kiena Yesu, apisawal

ke pa rui e yo punu ga, a yeririna la punu ga akilia pa rui. Yar la ḡasia apisa ke Yesu, asape “Naga na, pe Yoane Nakeena si ne, naḡa naga mal sina e marena; sur ne na nene kila naga puriuna kawan nakilaen kile la sanene.” ¹⁵ La ḡasia apisa ke asape “Naga na yer marua Elaisa na konua rui,” a la ḡasia apisa ke asape “Naga navisawalena tai ne sa naḡa yermarua navisawalena lala nakonua manene la rui.” ¹⁶ Ana pogos naḡa Suḡe Erot mloge sur la naḡa Yesu naga kila ke ne, ana naga pisa sape “?Yaru nene, pona Yoane Nakeena ke sina ga ne. Inu netero pa ḡarina pa rui, ana nanagane naga mali sina e marena yo?”

? Yoane Nakeena mare sanape?

¹⁷⁻¹⁸ Ana Suḡe Erot pisa sanene vanon naḡa naga mēmar Yoane Nakeena mare nanua rui, ana naga marau paḡisi. Ana marena kiena ne Yoane Nakeena kana sunḡena nena sanini: Wenla Suḡe Erot nene, naga kiena kia Pilip, naḡa lalua arimala taaga a anela lua. Ana sumo, Pilip nene talopa amio sira tai, kiena kia Erotias. Ana siraunia, Suḡe Erot pa ḡerelua lein sira nene pe wona. Ana e pogos nene Yoane pis pa Suḡe Erot, pisape “Sur mesmesu re nene poli, naḡa ko opurelua sira

nene, komin naga pe wona ne womla.”

Ana Erotias pe kekaran re nena visena kiena ne Yoane nene, naga sinena karia, ana Suṣe Erot mligan kiena yeririna la p̄asia apa atararia, apiari naga amligan pa e yuṁa nakoena. ¹⁹ Ana Erotias sinenan ke sape monar weṁar Yoane, ana naga kila p̄ele ga, ²⁰ komin Erot maraun wemoṁarena. Naga maraunia komin naga kilia ruruia sane Yoane naga pe yar mesmes tai a pe yar wa, naga puar ruru ga suṁa ga. Yam la moki naga mligan visenan Yoane pa puna lalua asun, naga kekaran visena kiena ne Yoane la paṁisi, ana yam punu ga, visena la nene miyur ke naga, kila narui na naga kiena sitomena pepe lua ke narui. ²¹ Pe piavi re poli na, Erotias ṁal kiena mrapa tai. Nane e pogos naṁa la akila p̄aṁagena nasitomalen legiena naṁa Suṣe Erot paeme ea, ana Erot naga kila kinanena kana kiena yarkeviu lala, amio nasumonena na yuṁaena kiena, a yerkawa taṁena lala nae yo naṁa Kalele. ²²⁻²³ E pogos na p̄aṁagena nene, lom̄earu kiena ne Erotias naga polu e marala, ana Suṣe Erot la akekaran kiena wolena paṁisi, naga pisaaria ṁarera pania, pisape “Suri ya naṁa visae oviun tan inu, nekilia netam̄an ga van ko, va tol komṁas nen kiau sur make ga lala.”

²⁴ Pisi na sira naṁa pa

vanua, piun petan anena naṁa Erotias, pisape “?Auia, yoko neviun yar ne tania?”

Ana anena pisa pania pisape “Ovisa ga vania ovisave, naga monar kus ga p̄arina ne Yoane Nakeena van ita.”

²⁵ Ana sira naṁani miroro si pa loyumuṁa, pisa iroron ga pa Erot, pisape “In na sineun nesape okus ga p̄arina ne Yoane Nakeena ṁene pialo tai imi ga nanagane e nini.” ²⁶ Ana visena nene kila Suṣe Erot mloge piowa, pe sinenan re sape kilaro kiena navisaarena naṁa pisaar ṁarera rui e maran kiena erau lala, ²⁷ p̄isi na veraga ga e ṁa nena ga e pogos nene, naga miila kiena yar na mara tai pa pisa, pisape akus p̄arina Yoane vano. Pisi na lala apa e loyumuṁa e yuṁa nakoena nene, atelua kolmekina, ²⁸ ana la amligan p̄arina ṁene pialo tai, akus pimi pan sira ṁee naṁane, ana kus pa pan anena.

²⁹ Ana siraunia, pogos naṁa nalogena kiena ne Yoane la amloge suri nene, la apimi akus tasnena, apa amligan e lotap. Ana suniena kiena ne Yoane Nakeena maro ga e nene, ana pogos naṁa Erot mloge suniena kiena ne Yesu, kila naga marau paṁisi, ṁape Yoane Nakeena nene naṁa naga ṁemaria, mal sina.

Li nalologena la apa amlologon visena kiena ne

Ntewa ñisi na añasuñela sina
Matiu 14:13-21; Luk 9:10-
17; Yoane 6:1-13

³⁰ Ana e pogos nene, nalologena la naña Yesu mligan plan la apa amlologo, añasuñe la si apimi. Ana lala apisayu pa Yesu sur la punu ga naña amiyuñæn pan yeririna lala, a sanape naña apian la. ³¹ Ana yar la moki naña asumña apimi ke pu Yesu, ñisi na apano, ana ñisi na tañena si la apimi, ñisi na apano, salue ga nene, Yesu la pe apa ruru la re nenaga, pe aora re tai naña la akilia ala narin kinanena tai. Ana Yesu pisa pan la, pisape “Aulai, ita, tevetanli la e yo nini wa. Teva takale yo tai naña naga yo ñano, akilia avaruru amiu ea.”

³² Pisi na la apa akus waa tai, asape ava akale yo tai lepas nen lapa naña pe yar la asu re e poli.

Yesu pagan yeririna la moki taulu manu lima [5000]

³³ Ana yeririna la moki apisu sane Yesu la apa ke sanene, la ñena ga amolue e kiela pulkumali lala, akiriri ataveve la akom ura, apato atolñesa yo nene naña la apisu sane waa naga pato ke ea, la asumon Yesu lala.

³⁴ Ana Yesu pa ura, pogos naña pisu ñina na yeririna naña asike pa ura rui, naga sinena mie la pañisi, komin naga pisu la sa naña sipsip la naña akuspal mrapa, pe yar re tai naña kilia visuar

la, ñisi na naga pa sun pian la e visena wo la moki.

³⁵ Ana pogos naña mrae pito tano, nalogena lala apimi puna, apisa asape “E, Suñe, yo nini naga pe po re poli, a lavisi ñena yemalolo narui. ³⁶ Ana popon ko oligan ñina la nene awasuñe ava ñala uña pona pulkumali lala vena awul kala kinanena la ñasia.”

³⁷ Ana Yesu pisatamñe la, pisape “Toko, popon amiu ga awar kinanena ñasia van la.”

A lala amape Yesu naga pe pisa ruru re poli, ana la apisa asape “!Ke, peraga yo! Pona ko na sinoñan ke osape imimi mowar pupia kieta varu ana mevato meul kilaparavi torokin lala manu moki nene akania!”

³⁸ Ana Yesu pitetalia la, pisape “Amiu avato avisulia aña ke kilaparavi via na sike amio amiu nanagane.”

La apato apisu pae na, apam sina ga apisape “Mem-larar narin kilaparavi lima ga teke na, amio narin ika naña satin lua ga.”

³⁹ Ana Yesu pis pan yeririna lala, pisape “Amiu atotano e vilumñini wa,” ⁴⁰ ana la atotano e ñegas lala, ñegas lañasia sane lualima lima [50], ana ñegas tañena lañasia sane ponotia taaga [100]. ⁴¹ Ana naga mla narin kilaparavi lima nañane amio narin satin lua nene, kira pa ma e peni, pisa potena

pa Ntewa vanonia, p̄isi na kaweroro narin kilaparavi lima nañane kian pa kiena nalogena lala vena avion plan van yeririna lala, pion m̄ena narin ika lua nañane sa ke ga.

⁴² Ana la akan m̄a pano-o, mep̄ela la kawa pañisi, ⁴³ ana kinakinas nen kinanena la nañã akanligania, torokin akon si va e karo la tol lualima taaga pa lua [12]. ⁴⁴ Ana yaru la nañã akan kinanena nene, yerm̄ene ga lala, la atol sur sane manu lima.

Yesu mial yau metava e wos nen lapa

Matiu 14:22-23; Yoane 6:16-21

⁴⁵ Ana Yesu pisa pan kiena nalogena lala, pisape “Inu sineun nesape amiu akus kieta waa, asumo akusro pupia lapa nene ava lepas p̄asia e kumali nañã Petsaeta, ana in na nesuwa nesunã neligan plan ke ne yeririna la nene wa.” ⁴⁶ Ana pogos nañã naga mligan plan yeririna la nene apa pae na naga pa metava e kunusia vena len. ⁴⁷ Pogos nañã yemalolo ke narui, waa nañane m̄eke perina pañisi, lika e lapa, ana Yesu naga taaga sike ura. ⁴⁸ Ana naga kira pisu la na m̄arera pan la na valuanen waa pañisi, komin la apane ke pupia lagi, kila kiela waa naga pure malum ga. Pogos nañã lavisi yelagi merarava, Yesu pimi pula, mial yau ga metava e wos nen lapa. Suri ne na nene vena ñaga va

p̄esan ura sumon la, ⁴⁹ a pogos nañã lala apisu naga mial yau ke e lapa pimi pula sanene, la apionia asape “! Aulai, suri ya ne pimi ke sanene! ?Yermare yo, pona yar ne sanene?” ⁵⁰ Lala punu apisu naga sa nene, amarau pañisi.

Ana veraga Yesu pisi pan la, pisape “! E, ve amarau re, in ga ne.” ⁵¹ Ana Yesu p̄iyu pa metava e waa amio la, ana veraga ga e aora nene, lagi nene mare, ana la nañã asike e waa amilan pañisi. ⁵² Amilan sanene komin kiela sitomena la m̄arera ke wa, la pe apisu kilia re sur la nañã Yesu naga kilia yunãenia e kiena puriu kawaena poli, sane ya nañã miyumãen amio narin kilaparavi la lima nañane.

Namaiena lala atol ga luas nen kulkota m̄ana Yesu
Matiu 14:34-36

⁵³ Ana Yesu lala akusro pupia lapa nene e kiela wa, apa atol yo tai, kiena kia Kenasaret. Ana pogos nañã akoan kana kilavaru pa ura, ⁵⁴ apula petan kiela wa, ana verakorena ga yaru nae e yo nene lala apisu kilale Yesu. ⁵⁵ Ana lala akiriri atelivi pi-ora e m̄ala yunã lala, akus kiela inanena la e m̄ala tog, apa ke e yo la nañã amloge asape naga pa ke ea.

⁵⁶ Ana e yo punu ga nañã Yesu pa ke ea, e yunã lala, pona pulkumali lala, pona mrapa lala, akus ke kiela

inanena lala, amligan ruru la ke pa rui e yo metava lala, la apiun ke tania asape visae naga tañania ana inanena lala akilia atoliga mñana luas nen kulkota. Ana lala naña atolga sanene, kiela inanena la p̄isi, amloge po sina.

7

Nalogenena kiena Yesu la pe ataveve re p̄elaga marua kiena le Yu la poli

Matiu 15:1-9

¹ Ana e pogos nene, le Varasi la p̄asia apimi lele taaga puna Yesu, amio mñena navianena navisaluaena, naña lala akom garo Yerusalem apami. ² Ana lala apisu ke sane pogos naña nalogenena kiena Yesu la akinana ke, lala akila sane e nakiravaena kiena le Varasi la, la nene limala la na piowa ga. Na nene vanon pe ataveve ruru re narin mrapa la moki naña na kevanen limala sa naña le Varasi la apisa ke asape yar naga monar yum̄aen, sumon naña kinana.

³ Nanene komin e pogos nene, le Varasi lala amio le Yu tañena la añareran ke pañisi nayum̄aen ve sanene, vena taveve ruruen kiela p̄elaga marua na kiela nalotena na sumo lala. ⁴ La akila ke sanene pogos naña amiyal apa kumali, pona akom pe, ana pogos naña la awasupe la si um̄a, la monar ataveve kiela navisaluaena na kevanlaen amerarava wo pona ave wa ruru sina. Pisin nakilaen sanene, la

akilia akinana narui, komin visae la ve akila re, tañatete atol kala kinanena. Ana kiela narin navisaluaena mñena lañas moki naña monar atavevea, naña p̄asia, na kevanen m̄ala piala la monar akevan ve sanene ve sanene, a p̄asia, sane monar avilvan kala piaki ve sanene ve sanene, a p̄asia, naña nakevanen kala pialo la naña amiyum̄aen e pras ve sanene ve sanene, naga pa sa la nene.

⁵ Sur ne nanene kila le Varasi la apiun petan Yesu, asape “Komin ya ne kionña nalogenena la pe ataveve re p̄elaga marua la na kieta nalotena na sumo la poli, naña kieta nasumonena la apian itania. Ana kionña yar la nene, la akinana ga e limala namname lala, komin pe akevan ruru re limala la poli.”

⁶ Ana Yesu pisatam̄e la, pisape “Pe lelaga ga, navisawalena Aisea na sumo naga pisayu ruru amiu ga yeririna na visokanen lala, naña naga mlologon visena naña Ntewa naga pisa, naña naga pisa sape

Yeririna la nene la apatanonu ga e kiela visena lala,

ana kiela sitomena naga sike perinan inu pañisi wa.

⁷ *La amiyeluarnu ke, ana pe sur korena ga, komin pog naña la apian ke yeririna lala, apisa ke asape visena nene kiena ne Ntewa,*

ana peraga, visena nene naga pe kiela ga yeririna lala!” Ais 29:13

⁸ A Yesu pisa pan la, pisape “Amiu na amligan lua ke navisaluaena kiena ne Ntewa, apuarar ke ga ðelaga marua kiena ne yeririna lala m̄arera.

⁹ Nanene naga pe mesmes re naða ayuñāen sanene poli, komin amiu am̄areran ga nataveveen ðelaga marua kiena ne yeririna lala, a nanagane amiu akila pano-o ðelaga marua ga la nene naga sike narui, miaslua make navisaluaena kiena ne Ntewa.

¹⁰ Amiu na ve asitom re asape amiu akila ke sanene, ana yoko nevisa kiamiu tai, naða amiu asuñā akila ke. Amiu asitom̄al li navisaluaen kiena Mosis, naða pisape ‘Ologear arimoñā amio anoñā,’ pisa m̄ena sape yar naða sa vis viowa van arimana amio anena, awe-moñāria.

¹¹ Navisaluaena nene pisa ke sape ita monar tevisuar ruru ita kieta yermarua lua nene, ana amiu na akila pe tañena.

Visae yar tai kilawoia sape kiena sur lañasia pe kiena ne Ntewa, ana pogos naða kiena yermarua lua kiela sur re poli, aim aviunia, yoko amiu avisa ya ne vania?

¹² Yoko amiu am̄areran vania, avisave ‘Toko, ve otañan re van lalua nene, vanon kieta ðelaga naga pisa sape sur naða tepisaarwoia pan Ntewa, ko na monar

owar ga van kiena yar wa lala, ve otañan re van yar tañena lala.’ ¹³ ? Amiu na apisa ke sanene, ana sanape na sanene? Amiu na asuñāal ke m̄arera e kiamiu ðelaga marua, amiu amligan lelein ke pitove, ana kila ke naða ðelaga marua la nene naga kila ke navisaluaena kiena ne Ntewa pimi pe sur korena ga. Ana pe naga re ga nene poli, amiu akila ke m̄ena sur la moki sanene.”

Suri la naða kilia kila yaru naga pe namname e marana Ntewa

Matiu 15:10-20

¹⁴ Pisi na Yesu naga pio si yeririna lala pisape aimi veraga puna, ana pisa pan la, pisape “Amiu punu ga ayagogan ruru inu, monar aloge kilia kiau visena la nini. ¹⁵⁻¹⁶ Pe sur re tai naða teke vanuan yeririna, naða sa naga va loyuñā e losinena kilia kila naga namname e marana Ntewa. Ana suri ga la naða sike loyuñā e losinena yeririna, pogos naða molmolue e naga, kila naga ve namname e marana Ntewa.”

¹⁷ Ana Yesu petan yeririna la nene, pato si uñā, siraunia kiena nalogena la apim, apiun tania e kinas nen ðakaiwa naða naga pisayu pan la. ¹⁸ Ana Yesu pisape “? Ei, sanape, pona amiu m̄ena pe ðarimiu pike re sane la nene poli yo? Komin ya ne amiu m̄ena pe apisuluñar re sur nene poli, sane suri la naða teke vanua, sane kinanena lala, visae

va loyumañan yeririna, sur la nene naga tařatete kila yeririna viowa e marana ne Ntewa. ¹⁹ Nanene komin sur la nene pe tol re kiena sitomena poli, la apato ga e mēřena, ana la amolue akom sina ga e yepena.” Yesu pisa pa sanene narui, siraunia, yeririna la apisuluřar kiena visena, naga pisa kilale pisape pe kinanen re tai poli nařa yeririna monar lonia vena mekiki e marana ne Ntewa, ana kinanena la punu ga naga pon na kanena.

²⁰ Ana Yesu pisa mēna sape “A suri la nařa sike pa e yeririna rui, řisi na amolmolue e kiena malena, sur ne la nanene naga kilia kila yeririna ve namname. ²¹ Nanene komin e los nen yeririna, řelaga viowa la na amolmolue ke ea, suri ne la sane sitomen viowa, kolau, vinauena, nawemořaren yaru, navinaunen wona yar tařena, ²² sinenanen sur kiena yar tařena, řelaga viowa lala, visokanena, kilaroen navisaluaena, veveyuena, navisa kareen yaru, nawarwarena, navilaveena, a ve woweena. ²³ Pelaga viowa ne la nene amolmolue e los nen yeririna, sur la nene kilia kila yeririna ve namname e marana ne Ntewa.”

*Yesu mēnelua ninuna
viowa e sira mēe tai
Matiu 15:21-28*

²⁴ Pisi na Yesu petan yo nene, pato tano garo pulkumali nae Taea. Ana pa e uņa tai, sape kila sane yaru la ve akilia re asape naga sike e yo nene, ana naga tapolou řele ga sanene. ²⁵⁻²⁶ Ana sira tai sike e nene nařa kiena lus la kom ma Kris apitom, nařa la pe ape Yu re poli, apitom asike yo nařa Ponosia lavisin Seria. Sira nene, narina tai na sira, ninuna viowa teke ea, pogos nařa naga mloge asape Yesu naga sike e yo nene, naga pa kinai e mialana, tagi pania sinenan pisape naga mēnelua ninuna viowa ure vetan narin sira nene. ²⁷ Ana Yesu pisatamē pania, pisape “Ana sisi mesmes la na monar akinana řo ne wa. Pe mesmes re nařa nowar plan kinanena kan sisi la vetan la, nevagan lokul la ea.” Naga pisa sanene komin e pogos nene, le Yu la na asitom ke asape la ga ape narina Ntewa, la apio kare ke la nařa pe ape le Yu re la poli, asape “Amiu na ape lokul lala.”

²⁸ Ana sira nařa pisatamē pania, pisape “Ko na opisa pe lelaga, Suře, ana lokul mēna la apa ke lavisin lele na kinanen kan sisi kokan lala, akilia akan korkoro kinanena la nařa kekapili sike e porotano.”

²⁹ Ana Yesu pisa pania, pisape “Ko na opisatamē kinas nen kiau visena nene po pařisi. Ana komin kioma visena nowo nene, nepisuluřar sane opiawa

m̃arera e inu. Poga, okilia ovato si uṃa, ninuna viowa molue petan naruṃa naṃa rui.”³⁰ Pisi na sira naṃa pato si uṃa, pisu narina pa ruru ga toṃa ga, toṃa momalio ṃa pogaga e ṃana tog.

Yesu kila ruru yar tai naṃa kiligana la poṃe

³¹ Ana Yesu naga mligan yo nae Taea, pato kome pulkumali taṃena tai, Saeton, ana naga pam sina ga e lapa nae Kalele, e lepas nae yo naṃa apio sape Pulku-mali Lualima.³² Ana la nae yo nene aṃure yar tai pimi puna, vena naga ligan limana te ea, komin yar nene kiligana la poṃe, mon ṃa mnenene ga.³³ Ana Yesu ṃurelua yar nene petan yeririna moki la naṃa asike lele nene, lalua apa li laa perina sane. Ana naga kian mrasilmana pa e pulkiligana lala, ṃisi na mla wasirina, plan e purmenen yar naṃane.³⁴ Ana Yesu kira pa ma e peni, pure kiena yalua keviu, pisa pan yar naṃa e kiela visena, pisape “Epata.” Visena nene kana kinasia sape “Ovike.”³⁵ Ana veraga ga, yar naṃane kiligana la pike, a purmenena naga kululu sina, kila sane naga mloge ruru si sur lala, a pis ruru sina.

³⁶ Pisi narui na Yesu pisa m̃areran pan la, pisape ve ava asunun re sur nene van yar taṃena lala, ana silaga pogos naṃa pisa sanene pan la la apa apisalelein ke pa

e yo punu ga.³⁷ Ana la apisawal-lelein sa nene, komin sinela la pula na pulan sur la punu ga naṃa apisu Yesu kilia taṃa. La apisasa ke asape “Yesu nene kila la naṃa kiligala la poṃe amloge si suria, a kila la naṃa apis pule ga, akilia apis ruru sina. Aulai, yar nene kila sur la punu ga po na po pa ṃisi.”

8

Yesu pagan yeririna la miyuve manu vari [4000]

Matiu 15:32-39

¹ Ana e pogos tai, pupia ṃina na yeririna la moki apimi sina pu Yesu, la asuṃa amio pano-o, viso kar la, ana la pe kala kinanen re poli. Ana Yesu pio kiena nalogena la apimi lavisi puna, pisa pan la pisape² “E, in na sineu miye ṃina la nini paṃisi, komin naṃa la asike amio ita legiena telu ṃaro rui, kala kinanena la ṃisi.”³ Ana visae netam̃an la ava uṃa ṃala naṃa pe akinana re sanene poli, pona laṃas viso kar la e mrapa komsusa, kilamarala malko, komin laṃasia ṃala uṃa la sike koperina paṃisi.”

⁴ Ana kiena nalogena la apisa pania, asape “? Ana tevagan yeririna la nene e yo korena nini sanape ne?”

⁵ Pisi na naga piun tan la, pisape “? Amiu amlarar ke kilaparavi via?”

Ana la apisataṃea “Olua ga ṃa.”

⁶ Pisi na Yesu pisa pan p̃ina moki la nene, pisape “Amiu atotano e yo nene wa.” Naga mla kilaparavi la olua nene, pisa potena pan Ntewa panonia, p̃isi na kawewowaia, kian pan kiena nalogena lala vena akianlelein van yeririna lala, p̃isi na la apion tetain pan la. ⁷ Ana la amla m̃ena narin satin lua la ga e pogos nene, a Yesu mlotuwo m̃ena ga, pisa pan la sape ava avionlelein m̃ena ga van yeririna lala. ⁸ Ana la naṽa akinana pano-o, meṽela la kawa, ana korkoro kinanena naṽa akanligania, aṽar akon pa e karo olua. ⁹ Ana la naṽa akinana e pogos nene tol sane manu vari.

Pisi na Yesu miila si p̃ina la nene aṽasuṽe si m̃ala uṽa lala, ¹⁰ ana naga pa e kiela wa, amio kiena nalogena lala, apetan yo nene, akusro apa atol yo tai naṽa kiena ki Talmanuta.

Yar keviu la p̃asia asape avisu kile tai

¹¹ Ana e pogos tai, le Varasi laṽasia apim asape agorua Yesu, asape ataṽali m̃ena ga naga, ana la apisa asape “Imimi sinemimin mesape okilali pupia kile tai van imimi, naṽa sane okila e puriu kawaena nae ma e peni.”

¹² Ana Yesu naga miyu-veve pa kona, sa naṽa sinena maren la pa rui, naga pisa-taṽe la, pisape “? Sanape

na amiu na nanagane, sine-miun asape avisu kile tai ne sanene? Nepisa ke pe lelaga pan amiu, sane peraga, yoko kiamiu lus la na nanagane taṽatete avisu kile tai.”

¹³ Ana Yesu pure petan la mligan la asike na, pa si e wa, pa kusro lapa komṽasia pa lepas na vano.

Nasumonena nalotena la asuṽa akila ke p̃elaga viowa la kapurulue ke

¹⁴ Ana pogos naṽa la apetan yo nene apa atol komṽas nen lapa nene, amilan sane sinela pon nawararen kala kilaparavi p̃asia amio la, ana la amlarar ga kilaparavi taaga teke amio la e wa. ¹⁵ Ana Yesu pisa visena tai pan la, pisape “Amiu monar avisuar ruru amiu, vanon is kiena ne le Varasi la amio Erot.”

Yesu pisa is nene, kana kinasia p̃elaga viowa kiena ne nasumonena lala, ana nalogena la pe asitom kilia re poli. ¹⁶ La amloge visena nene, apisayu ke pan la, apisape “Pona naga pis sanene vanon ita pe toṽar re kilaparavi laṽas pimi poli yo.”

¹⁷ Ana Yesu kilia m̃a kiela sitomena lala, p̃isi na pisape “?Amiu apisayu ke asape ita pe toṽarar re kilaparavi komin ya? ?Sanape, amiu pe amloge kilia re poli, pona pe apisu kilia re sur la poli wa? !Sinemiu la m̃arera paṽisi wa! ¹⁸ Amiu

kilamaramiu la sike na, ana apisu kilale re sur poli, ana kiligamiu la sike na, ana amloge kilia re sur poli. ?Pona amiu pe asitomāal re si sur la naña nemiyuñāen pan yeririna la poli? ¹⁹ ?Pogos naña nekiantetain kilaparavi lima nanua ne pan yeririna la manu lima nañane, akan pano-o mepela kawa, ana akon korkoro kinanena la nene pa e karo via?”

La apisatamēa, asape “Imimi mokonkonkia lualima taaga pa lua [12].”

²⁰ Pisi na naga piun sina ga, pisape “?A pogos naña lala manu vari nanua ne akan kilaparavi olua ga nañane, pñisi na amiu akon si karo via?”

Ana la apisatamēa, asape “Imimi mokonkonkia olua.”

²¹ Ana naga pis pan la, pisape “?Pogaga, ana sanapen nanagane? ?Amiu akiliali mā sur la nene, pona pere ke ga wa?”

Yesu kila ruru kilamara kata tai nae Petsaeta

²² Ana Yesu la apam atol pulkumali nene, Petsaeta. Ana la nae yo nene, a sumon kilamara kata tai pimi puna, atagi pania vena tol ruru yaru nene. ²³ Ana Yesu tarar limana ne kilamara kata, sumon naga pano, la lua amiyuve kumali apa lepas na vano. Pisi na Yesu mla wasirina, mligan e kilamaran yar luwoka nañane, mligan liman tea, ana piun petania, pisape “?Sanape, ko na

opisu ke suria, pona pere ke ga wa?”

²⁴ Ana yar nañane kirava, kira pisu suri lala, naga pisape “Ee, nepisu ke yar lala, ana nepisu la sa ga purpēs nen laki la amiyal ke na.”

²⁵ Ana Yesu mligan si limana e naga, yam luania, pñisi na yar nene kilamarana pimi po ruruia, naga kilia kira pisu si suri lala, kira pisu la merarava po na po pañisi. ²⁶ Ana Yesu pisa pania, pisape “Yoko ko ove ova re si ovisu la nene gar uña, oto mesmes ga momā.”

Pita pisawal sape Yesu pe Navisaarena lelaga

Matiu 16:13-20; Luk 9:18-21

²⁷ Pisi na Yesu amio kiena nalogena la asape avato e narin pulkumali lala naña lavisin kumali keviu naña Sisaria Piliḡae, a e pogos naña la amiyal ke apato e yo nene, naga piun tan la pisape “?Amiu amloge ke yar la apisa ke asape in na ai?”

²⁸ La apisatamēa apisape “Lañasia apisa ke asape ko na Yoane Nakeena sina ga, lañasia asape ko na Elaisa, pñasia asape ko na navi-sawalena tai naña na konua rui.”

²⁹ Ana naga piun si tan la, pisape “?A sanapen amiu, amiu na apisa ke asape in na ai?”

Ana Pita pisatamēa, pi-sawalia pisape “Ko na ope ki-amimi Navisaarena kemua lelaga.”

³⁰ Ana Yesu pisa mesmesun ga pan la, pisape “Pogaga, ana amiu ve ava avisawal lelein re sur nene van yeririna lala.”

Yesu pisawal kiena marena

Matiu 16:21-28; Luk 9:22-27

³¹ Ana e pogos nene, Yesu siar naña mlologon ke pan kiena nalogena lala, pisape Narin Yeririna, monar akila sur la ve moki naña naga loge viowagania, ana nasumonena kiena le Israel lala, amio yar keviu kiena yar wa lala, amio navianena navisaluaena, p̄isi na la akovenlua naga. Ana Yesu pisa m̄ena ga sape la awen̄ar naga mare, ana e kiena legiena na telu, sum̄alu sina, taulu marena.

³² Visena la nene, Yesu pisa meraravan po pan la, ana pogos naña Pita mloge, naga piolua Yesu, pis m̄arera pania, sape visawoia, yoko monar ve ve sa re nene.

³³ Ana veraga ga Yesu pilon m̄asina pimi pu Pita, kira pa pun kiena nalogena taņena la naña asike ne, p̄isalup̄ar m̄arera pa Pita, pisape “!Yermare, oure vetan inu! Kiom̄a sitomena nene naga pe sitomena kien yeririna ga, pe pe sitomen kiena re Ntewa poli.”

Nalogena kiena ne Yesu naga monar sitom korenan nasinenanena kiena

³⁴ Ana Yesu pio p̄ina lala amio kiena nalogena

lala, sape aim puna, pisa pan la, pisape “Yar naña sinenan sape taveve inu, monar sitom korenan nasinenanena kiena, monar kus kiena laki torovia, siraun inu. ³⁵ Yar naña sape taulu kiena malena, yoko kilaluia. A yar naña kilalu kiena malena vanon inu pona vanon kiau lologena wo, naga yoko tauluia. ³⁶ Visae yar tai war make sur na yomarava la punu ga ne, p̄isi na kupal mrapa na malena, naga pe taulu re sur wo tai poli. ³⁷ Ana kiena sur nowo la naña naga p̄aria, taņatete ulmaran si kiena malena. ³⁸ Yeririna moki naña lus na nanagane, la ataņa mlamulena viowa, la pe ape lelaga re pan Ntewa poli, la apiowa manene la, a la amawan ke yar taņena la vanon inu a vanon m̄ena kiau visena. Ana siraunia, Narin Yeririna naga yoko wasuņe sina ga, amio kiena navisi wa lala, amio naurarena kiena arimana, ana pogos naña avim, visae yar naña yepena mavin ke naga nanagane, naga m̄ena yoko yepena mavin yar nene.”

9

¹ Ana Yesu pisa m̄ena pan la, pisape “Lelaga nepisa ke pan amiu, yeririna laņas na asuņal ke e nini, naña p̄isi na taņatete amare, vano-o tol pogos naña avisu nasuņenena kiena ne Ntewa

imi kate amio kiena pupia m̃areraena.”

Yepena ne Yesu pimi pe taḗena

Matiu 17:1-13; Luk 9:28-36

² Siraun Legiena Orai ḗarovia, Yesu ḗere Pita amio Semes, a Yoane, la ga vari apa metava e pupia ravie tai. Asuḗa sane na, nalogena la telu naḗane apisu ga yepena ne Yesu pimi pe taḗena ke narui, ³ apisu ga m̃ana kulkota la pilavila ke, miyuwowo na miyuwowo, miyuve make ga sur na yomarava la naḗa miyuwowo. ⁴ Ana akirawal m̃ena navisawalena Elaisa amio yermarua Mosis akate, lalua asike asun ke amio Yesu. ⁵ Ana Pita pisa pa Yesu, pisape “Suḗe, po paḗisi naḗa ita tesuḗa ga e nini. Popon sa meyuḗaen silparpara ve telu se e nini, moḗa tai, m̃ana yermarua Mosis tai, a m̃ana ne navisawalena Elaisa tai.” ⁶ Pita pis wowe ga sanene komin lala sinela kurkur paḗisi, amarau m̃ena ga, ana la aminue ga avisa yara.

⁷ Veraga ga lul tai pimi kalo la, amloge visena tai molue ea, pisape “Nanene naga pe Naruu, naḗa nekekan naga paḗisi. Amiu monar alogear ruru naga.” ⁸ Nalogena la amloge visena nene, ana akiraweke ke e yo nene, ḗisi na pe apisu re si lalua naḗa poli,

akirawal ga Yesu naga taaga suḗal sike amio la.

⁹ Pisi na lala apetan ravie naḗane, apitom ke sina ga tano, a Yesu pis m̃arera pan la, pisawo la pisape “Sur la naḗa Ntewa kila pan amiu apisuia, amiu na ve ava avisasawal re van yeririna la nanagane, vano-o tol pogos naḗa Narin Yeririna mal sina ga e marena, e pogos nene narui amiu akilia avisawal van yeririna lala.” ¹⁰ Pisi na la amlogear visena kiena ne Yesu nene, amlarar ga pe kiela ga, ana la apiuyun ke sina ga petan la asape ya ne kinas nen kiena visena nene, naḗa pisape mal sina ga e marena.

Asitom ke asape Elaisa na lua sirau vim sina, ana Yesu sape naga Yoane Nakeena pa rui

¹¹ Ana nalogena la telu nene apiun tan Yesu, asape “Sanape ne navianena navisaluaena la apisa ke asape ‘Elaisa naga monar wasuḗe ḗesia wa, ḗisi na Navisaarena nene naga m̃alivi?’ ”

¹² Pisi na Yesu pisatam̃e la, pisape “Naḗa apisa ke ne pe lelaga, Elaisa naga monar imi ḗesia vena kilaruruen sur la punu ga susumo, ḗisi na Navisaarena kilia vim. Ana nasiriena wa pisa ke m̃ena sur taḗena tai naḗa pe asitom̃al re poli, naḗa pisayu ke Narin Yeririna, sane naga monar vane nataḗaliena la

ve moki, ana yoko yeririna la asitom korenan naga viowa vaḡisi ne. ¹³ Ana nevisa van amiu, Elaisa nene naga pimi ga na wa, ana yeririna la yepela mavinia. Sa naḡa Visena Wa pisa, ana la akila pa piowa ga pan rui.”

Yesu m̄enelua yermare petan teras tai

Matiu 17:14-22; Luk 9:37-43

¹⁴ Pisi na Yesu amio la telu naḡane apa ke sina ga puna ne nalogena taḡena lala, ana apisu na pupia ḡina na yeririna la akovivi la asike na, apisu navianena navisaluaena la agorua la ke amio la. ¹⁵ Ana pogos naḡa ḡina la akirawal Yesu pam ke sina, amilania, akekaran m̄ena naḡa asape avisu naga, akiriri apim puna, atalopan naga. ¹⁶ Ana Yesu piun tan nalogena la, pisape “?E, amiu apisayu ke ya ne amio la nene?”

¹⁷ Pisi na lala yar tai pisa pania, pisape “Navianena, in na nepure kiau sisi yerm̄ene nini pimin ko vena ovisulia, komin purkol m̄arera tai kila naga. ¹⁸ Ana pogos naḡa kila naga, kovenlua naga pato tano e porotano, wasirina mlau piowa ga sa naḡa siripu, karar ke mraluena, a yepena punu ga miokamarmare. Ana nepure naga pamin ko, ko na osu re poli, ḡisi na nepiun ga tan kion̄a nalogena lala vena la alen nam̄eneluaen suri nene vetania, ana la amiyum̄aen m̄a pano-o, akilapule ga yonia.”

¹⁹ Ana Yesu pisataḡe la, pis pan la, pisape “?Amiu la nene, sanape na sanene? Amiu na pe asum̄al m̄arera re nena e Ntewa. ? In na monar nesum̄a nemio amiu vano tol pog ya? Nemiwon amiu pa rui. Ana pogaga, akus teras nene vim punu.” ²⁰ Ana la aḡure pimi, ana pogos naḡa purkol nene m̄al Yesu, kila yepen teras naḡane miokamarmare, mloru pato tano e porotano m̄eke pilolon ke, kila wasirina naga mlau piowa ga sa naḡa siripu. ²¹ Ana Yesu piun tan ariman teras naḡane, pisape “?Ana purkol nene siar kila sanene pogwai?”

Ana arimana pisataḡea, pisape “E, sur nene siar na konua konua rui, pogos naḡa pe sisi ke ga wa. ²² Ana pimi tol nanagane, yam moki rui naḡa sur nene kila ke naga mlolor pa e kapi po pito e puluwii. Sur nene kila kare ke ga naga paḡisi, sape kilam̄aria, ana sa ko na okilia okila sur yan tai, imimi mepiun tan ko, awis, ko na sinea ye imimi, oiila imimi komin narimimi nini!”

²³ Ana Yesu pisa pania, pisape “Nemloge ko na opisa sanene, osape sa in na nekilia nekila. Ana nepisa pan ko, visae ko na olelaga ga, okilia okila sur punu ga.”

²⁴ Ana ariman teras naḡane pio verakorena ga pa Yesu, tagi pania, pisape “Nemlelaga tekak ga, ana pe nemlelaga toroki re poli

wa. Awis, ko na oiila inu vena kiau nalelagaena vim ve keviu laa sane wa.”

²⁵ Ana pogos naþa Yesu pisu þina na yeririna la apim moki manene la akovivi la, ana naga pis pa purkol naþa teke e sisi yermene nene, pisape, “Ko yermare na kiliga poþe, a na plapur, nepisa mesmes ga pan ko, omolue vetan naga nana-gane, ana ve oimi re si loyuma e naga pogos tai.”

²⁶ Ana yermare nene ki viowa keviu, kila yepen sisi yermene naþane miokamarmare pano-o piowa ga rui, þisi na molue petania, pure pano. Ana yepen yar naþane malumu ga meke, sa ga naþa naga mare pa rui, yar la naþa asike apisu ke la apisa ke sa nini, asape “Ke, teras nene mare pa þisi rui.”

²⁷ Ana Yesu tarar limana, tarlua sumalu, ana teras nene sumal ruru ga sike.

²⁸ Ana siraunia, Yesu pato si uma, a e pogos nene, naþa naga taaga sike, kiena nalogena la apim, apiun tania, asape “? Sanape ne imimi na memenelua þele yermare petan teras nene?”

²⁹ Ana Yesu pisa pan la, pisape “Yermare la ne sanene, la amarerera paþisi, ana leniena ga kilia mene plan la.”

Yesu pisawal sina ga kiena marena

Matiu 17:22-23; Luk 9:43-45

³⁰ Ana Yesu la apetan yo nene, apa akom ga likan yo na e Kalele, ana e pogos nene, Yesu pe sinenan re sape yeririna la akilia suri la naþa naga kila ke poli, a e mena yo la naþa apa ke ea. ³¹ Na nene komin naþa pian ke kiena nalogena lala e pogos la nene, a naga pisa mena ga ke pan la, sape “Lavisi mena narui naþa aligan Narin Yeririna va e liman yar la naþa aweñar naga mare, siraunia e legiena na telu, þisi na Ntewa tamalia sina.” ³² Ana kiena nalogena la pe amloge kilia re sur la naþa Yesu pisayu ke ne, ana la amaraun mena naviun ruruen si tania.

“? Yar ane to metavan make yar taþena lala?”

Matiu 18:1-5; Luk 9:46-48

³³ Ana siraunia, pogos tai la apam atol si Kapeneam, apa loyuma e yuma tai, ana Yesu piun tan kiena nalogena lala, pisape “? Amiu na akawe amiun ke visena ya naþa e mrapa?” ³⁴ Ana la pe apisatame re poli, komin naþa lala amiyal ke mrapa apami, apis ke pan la, asape lala ane naga to metavan make la, po miyuve make la ga. ³⁵ Pisi na Yesu totano, ana pio kiena lualima taaga pa lua apim lavis puna, pisa pan la, pisape “Visae amiu yar tai naga sinenan sape vim sumo, pona sinenan sape kiena kia to þesia,

pogaga, naga monar kila naga imi maro, to vatanon la make ga, naga monar vim ve yar nayum̄aenen yum̄aena kiena ne yar taḡena la wa.”

³⁶ Ana Yesu pio narin sisi tai naḡa sum̄a ga pimi puna, mligan su likan la, ana tararia, pisa pan la, pisape ³⁷ “Yar naḡa kiena sitom-ena pato ga tanon inu, ana kekaran na kilaen wo van nisisi tai ne sanini, nanene sane naga kekaran inu ke pa narui. A yar naḡa kekaran inu sanene, pe kekaran inu re ga ne po, kekaran m̄ena ke pa naga naḡa mliganu nepimi.”

“Yar naḡa pe pisalup̄ar ita re poli, naga miila ita ke”

Matiu 18:6-9; Luk 9:49-50, 17:1-2

³⁸ Ana nalogena naḡa Yoane pisa pa Yesu, pisape “Navianena, imimi mepisu yar tai, naḡa naga m̄ene plan ke yermare lala, m̄ene plan la ke e kion̄a kia. Ana yar nene na, pe mekilia re naga poli, naga pe ita yar re tai poli, ana imimi mepisalup̄aria.”

³⁹ Ana Yesu pisa pan la, pisape “Peraga, amiu ve avisalup̄ar re naga. Visae yar tai sane pe lelaga, kila ke yum̄aena keviu la e kiau kia, ana yoko naga taḡatete si visanena kare kiau kia pogos tai. ⁴⁰ Yar naḡa pe pisalup̄ar ita re poli, miila ita ke ne. ⁴¹ Inu nepisa ke pe

lelaga pan amiu, visae yar tai kilia sape amiu akus ke kia kiena ne Kristo e amiu, naga la piala na wii tai van amiu amunia, yar nene naga yoko taḡatete kilalu kiena nalaena nowo naḡa yoko tol sirau.”

Nataḡaliena lala

⁴² Ana Yesu pisa m̄ena ga, pisape “A visae yar tai naga kila narin sisi tai ne sanini ve sum̄al m̄arera re e inu, yar nene yoko tol nakoena tai ne m̄arera laa sane taulu naḡa sa aviar pupia kilavaru tai e kolmekina, akuan naga talilu e lowe memaena. ⁴³⁻⁴⁶ Visae lum̄oḡa tai pona lam̄a tai naḡa kila ko na pe osuḡalu m̄arera re si e in poli, popon manene ga otelua vano. Visae ko na ote plan ḡelaga naviowaena vetan kion̄a malena sanene, ḡisi na okilia ova loyum̄a e malena, a sa ova loyum̄a e malena naḡa komḡas nen lum̄oḡa tai po lam̄a tai kovio pa rui, nanene naga pogaga ne. Ana piowa vaḡisi visae yepem̄a la asum̄a ga woga ga, ḡisi na akuan ko ova e kapi naḡa taḡatete mare pogos tai. ⁴⁷ Ana visae kilamaram̄a pona suri ya si tai e malena kion̄a naḡa kila ko pe osuḡalu m̄arera re si e inu poli, popon manene ga osiplania. Pisi na okilia ova loyum̄a e nasuḡenena kiena ne Ntewa

naña sane narin sur tai nene kovio petan ko, na nene naga pogaga ne. Ana piowa ga vañisi visae kilamaramña luoka pona kioña ðelaga viowa tai suña ga, ðisi na narin sur ga la nene aure kioña malena wetelu va e kapi e lele naloge viowaena, 48 naña kapi nene tañatete ðisi pogos tai, sisu la na akakarluwe ga yepema.

49 “Sa naña kururu sive naga kila kinanena ponos tañatete kona, yoko Ntewa naga ligan kapi e yar lala vena kekan plan kororaki la naña e kiela malena lala. 50 Ana tepisu mena sane kururu sive kila kata kinanena naga kiki, ana visae kana mareraena kovio, tañatete si kila kiena yumaena narui. Ana amiu monar ataman kururu sive kiena ne Ntewa yumaena lue ga e amiu, vena kiamiu malena naga ve kona re, a vena kiamiu ðelaga la kiki, naña sane sunarena sike amio amiu silaga.”

10

Yesu pisayu sanape naña yaru mligan lua wona

Matiu 19:1-12; Luk 16:18

1 Ana siraunia, Yesu mligan Kalele ana pa metava e lepas nae Yutea, kome wii nae Yortan lepas na vano. Ana ðina lala apim ke sina ga puna e pogos nene, ana sa naña naga kila ke silaga, pian la ke e sur la moki.

2 Ana Varasi mena ga ðasia asike e pogos nene, apimi

puna ne Yesu, apisape akilali sina ga naga, la apiun naviunena tai pania. La apisape “?Kieta Navisaluaena pisa ya ne e lepas nen ðelaga naña visae yaru mligan lua wona? ?Ositom sanape, memes ga naña yaru kilia kila sanene, pona pe memes re poli?”

3 Ana Yesu piuntame la, pisape “?Ana Yermarua Mosis pisalua ya ne e kiena navisaluaena rui?”

4 Ana Varasi la apisape “Mosis pisawal navisaluaena tai naña naga tamania sape yaru kilia la lumaki naliganluaena tai van wona, vena ligan lua.”

5 Ana Yesu pisatame la, pisape “Lelaga, ana Mosis siri visena nene vanon ga naña amiu parimiu la marera pañisi, suri nene kila naga tamania sape akilia aligan plan womiu lala. 6 A siaria e nasiiena naga pe sa re nene poli, komin Visena Wa kiena ne Ntewa pisa sape ‘E purpesia, Ntewa sii yeririna, yermene a sira.’

7 Ana visena tañena si tai, naña pisape

‘Vanon suri nene, ðisi na yaru ligan arimana amio anena, naga va iakol amio wona, 8 ana lalua aimi ave taaga ga narui.’

“Nanene kila sane lalua ve ave lua re sina ga, aimi ave taaga ga narui. 9 Ana sur ya naña Ntewa vilolaria pimi taaga, pe memes re naña yaru kilapure si poli.”

¹⁰ Ana pogos naña lala apa si loyuma, kiena nalogena lala apiun sina ga tania e lepas nen visena la nañane.

¹¹ Ana Yesu pisa mesmes ga pan la, pisape “Visae yaru tai ligan lua wona, pisi na va ure si sira tañena, Ntewa pisu sane yaru nene naga taña ke pa kolau rui, naga kila kare sira naña pe wona nasumo. ¹² Ana visae sira tai ure matan wona na yermene, va pu yermene tañena, naga mēna nene Ntewa pisu sane kolau.”

Yesu pisa ruru sisi lala

Matiu 19:13-15; Luk 18:15-17

¹³ Ana lañasia akus narila la apimi pu Yesu, vena naga ligan limana te la, ana nalogena la apisuia, apisi mārera pan yeririna la nene, apisalupar la. ¹⁴ Ana pogos naña Yesu pisuia, pe kekaran re nena naña kiena nalogena la amiyumaen sanene poli, naga pis pan la pisape “Amiu ve avisalupar re sisi la nene, atañan la ga aim pun inu, vanon naña sisi lala, la na sa ga yeririna la naña asike loyuma e nasuñenena kiena ne Ntewa. ¹⁵ In na neviša ve lelaga van amiu, yar naña sinenan ke sape va loyuma e nasuñenena kiena ne Ntewa, naga monar kilia sane naga sa ga sisi kokan tai, naga tañatete kila sur tai vena kus nasuñenena kiena ne Ntewa e malena kiena.” ¹⁶ Ana Yesu kutarar sisi la nene e limana,

mligan limana te ãarila pisa ruru la.

Yaru mēe tai naña kiena sur moki

Matiu 19:16; Luk 18:18-23

¹⁷ Ana e pogos naña Yesu siar mial pa ke narui, yaru mēe tai kiriri pimi kinai tano puna, piun tania, pisape “?Navianena Nowo, in na monar nekila yumaena wo ya, naña kila pisi na netol malena naña ve uro re?”

¹⁸ Ana Yesu pisa pania, pisape “?Vanon ya ne opiun tan inu sanene, osape in na nepe Navianena Nowo? Pe yar re tai po poli, Ntewa ga naga taaga po. ¹⁹ Ana ko na okilia mēna kiena navisaluaena la naña monar ologear la, naña apisa ke asape, ve owemār re yaru mare, ve otaña re kolau, ve ovinau re, ve oviosokan re, ve okilakewean re yaru, ko ova tanon arimoma amio anomā.”

²⁰ Ana yaru mēe nene pisa pania, pisape “Navianena, navisaluaena la naña opisa ke ne, siar pogos naña nepe sisi ke ga wa, nesuma nemlarar make punu ga rui pimi tol nagane.”

²¹ Ana Yesu kira pisu mā sane pano-o, kekaran naga vanon kiena visena nene pañisi, pisa pania, pisape “Sur taaga teke ga wa naña ko na okila re poli wa. Ko ovano, owilwilin plan make kiona sur la punu ga, owar kana kilavaru nena, ova oviovionia van yaru la naña pe kiela sur re poli. Visae ko

okila sanene, p̃isi na kioma suri wo lala ve moki vaṗisi ma e peni. Ko, ova okila, siraunia oimi otavevenu.”

²² Ana pogos naṗa yaru m̃ee nene mloge visena nene, kila naga milan karea, sinena piowa paṗisi, vanon naṗa naga kiena sur la moki manene laa. Ana naga pure matan Yesu.

Yaru naṗa kiena sur moki, naga m̃arera laa naṗa va loyuṃa e nasuṗenena kiena ne Ntewa

Matiu 19:23-30; Luk 18:24-30

²³ Ana Yesu kira pisuveve kiena nalogena lala, pisa pan la, pisape “!Nevisa ruru van amiu, visae yaru tai naṗa kiena suri moki, sinenan pisape va loyuṃa e nasuṗenena kiena ne Ntewa, suri nene na m̃arera towe ma naṗa!” ²⁴ Ana kiena nalogena lala amilan visena kiena ne Yesu nene paṗisi, naga pisa si pan la, pisape “Pe lelaga naruu la, navaen loyuṃa e nasuṗenena kiena ne Ntewa naga m̃arera na m̃arera. ²⁵ Ee, nevisa van amiu, naṗa kamel tai naga va warpoyo e pulus nen nitil, nanene naga m̃arera vaṗisi ne, ana visae yaru tai naṗa kiena suri la moki sinenan sape va loyuṃa e nasuṗenena kiena ne Ntewa, naga m̃arera laa na wa.”

²⁶ Ana pogos naṗa nalogena la amloge visena nene, amilan paṗisi, apisape “? Suwala, ana visae ve sanene,

p̃isi na ane kilia tol namalena nene?”

²⁷ Ana Yesu kirava pisu la, pisape “Ee, lelaga naṗa yaru taṗatete tamalia yaru, ana Ntewa ga kilia kila make suri punu ga.”

²⁸ Ana Pita sinenan sape vis, pisape “? Ana sanapen imimi? Imimi memligan make kiamimi sur la rui, ana metaveve ko.”

²⁹ Ana Yesu pisa pan la, pisape “In na nepisa ke pe lelaga pan amiu, yaru a naṗa visae ligan m̃ana uṃa, pona wenla pona vinena, anena pona arimana, narina pona kiena porotano, ana visae naga ligan sur la nene vanon ga inu, a vanon kiau lologena wo, ³⁰ p̃isi na naga warmarana sina ga kiena suri la naṗa mligania, kilia tol sina ga ve ponotia tai. E yomerava nini, yoko tol sina m̃ana uṃa la, wenla la, amio vinena la, anena la amio narina la, a porotano la, a amio sur la nene, yoko tol pog m̃arera ve moki, naṗa yaru la sinela kar m̃ena ga. Ana metavan sur taṗena la nene, e pogos naṗa imi, yoko tol m̃ena malena naṗa taṗatete p̃isi. ³¹ Ana yaru la moki liu naṗa asike metava, p̃isi na avito tano, ana yaru la naṗa asike tano, p̃isi na la ava metava.”

Yesu pisawal kiena marena yam telu narui

Matiu 20:17-19; Luk 18:31-34

³² Ana Yesu lala amlulu ke mrapa, apa ke metava ma Yerusalem narui. Ana Yesu naga sumon ke kiena nalogena la, la sinela kurkur pañisi naña apisu naga sumon la apa Yerusalem, komin la akilia ke asape yeririna nae yo nene la sinela kari ke pañisi. Ana li tañena la naña asurau ke ga wa, la mēna asuñā amarau lili māga. A naga piolua ga kiena lualima taaga pa lua apimi puna, pisawal si pan la sanape naña pñisi na akila viowa vania gar Yerusalem. ³³ Naga pisayu pan la, pisape “Amiu ayagoga ruruia. Nanagane ita tepa ke Yerusalem narui, naña ve ve piavi re, pñisi na aligan Narina Yeririna e limana ne yerikawa lala kiena ne yaru wa lala, amio navianena navisaluaena mēna lala, ana pñisi na la nene aliñpere naga avisave pñisi na monar mare. Ana siraunia, aligan naga e limana ne la naña pe ape le Yu re poli, ³⁴ naña pñisi na la nene akirakirai viowa vania, avilasirkon marana, pñisi na akoa naga vano-o awemāria. Ana e kana legiena natelu, pñisi na mali sina.”

Semes amio Yoane, apiun sur tai tan Yesu

Matiu 20:20-23

³⁵ Ana amiyal laa apa sane, pñisi na narina ne Sepeti lalua nene Semes amio Yoane, apimi puna ne Yesu, apiun petania,

apisape “Navianena, imimi lua mesape sur ya naña meviun tan ko nagane, mesape otañan van imimi.”

³⁶ Ana Yesu pisatañe la, pisape “?Ana amiu lua sine-miun asape in na nekila ya ne van amiu?”

³⁷ Apisatañea, asape “Imimi lua sinemimin mesape otañan sanini: pogos naña ko na ovim ove pñarin suñe na yomerava nini, pñisi na mekilia metotano memio ko e kioñā yo wa metava lavisin ko, tai te lepas na pñamarua, a tai e lepas na pñameli.”

³⁸ Ana Yesu pisatañe la, pisape “Amiu pe akilia re sur ne apiun ke ne poli. ?Sanape, amiu lua nene asitom asape atorokin naña tomunpae e piala naloge viowaena nene naña in na monar nemun ea? ?Aña amiu asitom ke asape amiu akilia atol nakeena e wii naña akee in ea?”

³⁹ Lalua apisa pania, apisape “Ee, imimi lua metoroki.”

Ana Yesu pisa pan la, pisape “Ee, lelaga naña pñisi na amiu amun mēna ga e mānu piala naloge viowaena nene, ana pe lelaga naña atol nakeena e wii nakeena naña akeenu ea, ⁴⁰ ana sur nene naña amiu lua apiunia, asape atotano amio inu e lepasneu luwoka, sur nene naga pe kiau re naña nela van amiu poli. Yo la ne sanene, kiena ga la naña Ata

kila ruru pe kiela, pisaar ĩisi rui pisape ĩisi na atotano ea.”

Narin Yeririna pimin vena yuñae kiena ne yeririna lala
Matiu 20:24-28

⁴¹ Ana pogos naña nalogena taņena la lualima nene amloge sur nene, naña wenla lalua nene Semes amio Yoane apiunia, la sinela kar lalua. ⁴² Ana Yesu pio la apimi puna vena naga visi van la, ana pisape “Amiu akilia ruru ĩelaga kiena ne yaru la naña pe amlelaga re e Ntewa poli. Tepisu sa naña suņe lala amio yerkawa lala na yomerava, la sinelan asape amāreran yaru taņena lala asu vatanon la silaga.

⁴³⁻⁴⁴ “Ana amiu kiau nalogena lala, kiamiu ĩelaga monar ve ve sa re nene. Visae amiu yar tai sine nan sape imi ve yerkawa tai pona ve kiamiu nasumonena tai, kana mrapa nena sanini: yaru nene monar imi ve sa ga yaru na yuñae kiamiuena tai. ⁴⁵ Narina Yeririna naga kila sanene ĩisi rui, naña pe pimin re vena yar la aiila naga poli, naga pimin naiilalaena, a vena tañan kiena malena nawulplanen yeririna la ve moki.”

Yesu taña ruru kilamara kata tai

Luk 18:35-43

⁴⁶ E pogos nene, Yesu amio kiena nalogena lala apim asike garu Seriko, ana pogos naña amligan yo

e pulkumali nene apano, ana yeririna la moki paņisi ataveve la. Pog naña amiyal ke apano, ana kilamara kata tai toña tano e isinen mrapplepa. Yar nene, arimana kiena kia Timeas, ana apio kia kiena ne narina asape Patimeas. Patimeas nene, totano e mrapplepa legiena punu ga, pion ke pan yar lala sape akuan narin kururu varu vania vena iilaena kiena malena.

⁴⁷ Ana pogos naña mloge apisape Yesu nae Nasaret mial ke e mrapplepa pimi, ĩisi na naga pion ke, sape “!Yesu-o, ko lus kiena ne Tepet, nesape ko sinemña ye inu wa!”

⁴⁸ Ana yaru taņena la apisin sinemimien pania, asape “Ee, ve omñaaga re.”

Ana naga pion manene la pavini, sape “!Suņe-o, ko lus kiena ne Tepet, awis, nesape sinemña ye inu.”

⁴⁹ Ana Yesu panar suñalu su mrapa e yo nene, pis pan yeririna lala, pisape avio yar nene vim lavis puna, ana lala apa apisa pan kilamara kata naņane, asape “Welu.” Ana naga sape “Pasa.” Ana lala apisape “Ve ologe re viowa. Yesu naņane sape oim puna wa. Ko osuñalu, ita.” ⁵⁰ Ana yaru nene kuanlua mña kulkota, suñal veraga, pimi puna.

⁵¹ Ana Yesu piun tania, pisape “?Ko na sinomñan osape nekila ya ne van ko?”

Ana naga pisatam̃ea, sape “Suḗe, awis, in na sineun nesape kilamarau la imi wo, vena nekilia nekirava.”

⁵² Ana Yesu pisa pania, pisape “Pogaga, ko na okilia ova si um̃a moḃa. Kioḃa nalelagaena ga kila ko opim omloge po narui.” Ana naga pisu ruru ke ga suria e pogos nene, ana mial taveve Yesu e mrapa apano.

11

Yesu pimi tol yo naḗa Yerusalem

Matiu 21:1-11; Luk 19:28-40; Yoane 12:12-19

¹ Nanagane, Yesu lala apam lavisin Yerusalem narui, ana la am̃alivi e narin pulkumali lalua sumo, kiela kia Petpas amio Petani, naḗa sike e yepas nen kunus nene naḗa la apio asape Kunus Na Purolip Lala. Ana Yesu miila kiena nalogena la lua, pisape ² “Amiu lua ava e pulkumali na gare, a memes ga e pogos naḗa ava loyum̃a ea, ḗisi na avisu narin togki tai, naḗa am̃atear teke na, pe yar tai totanoli re e wosia poli wa. Ana aluḗarlua aure imi pun inu e nini. ³ Ana visae yar tai vis van amiu vanonia, viunia visave “?Amiu akila sanene vanon ya?,” ḗisi na avisa ga vania, avisave ‘Suḗe na sinenan sur mal nini vena va kila kiena yum̃aena tai wa, ḗisi na naga ligam̃ wasuḗe sina ve ve piavi re.’”

⁴ Ana ḗisi na nalogena lua nene apano, am̃al narin togki naḗane, apiaria teke na sike ga vanua e mratava

na yum̃a tai lavisin ga mrapplepa. Pogos naḗa asape aluḗarlua kana kilika, ⁵ ana lala naḗa asike e yo nene apiunia, asape “?Amiu akila ke ya ne, amluḗarlua ke kana kilika na ya ne?”

⁶ Ana la apisa pan la visena la naḗa Yesu pisa ruru pan la, naḗa sane avisa van yar la nene, ana la atam̃an asape akilia aure togki vano pogaga. ⁷ Pisi na lalua aḗere togki nene pimi, aḗetetae m̃ala kulkota lala e wos nena, ana Yesu pa totano metava ea. ⁸ Ana yar la moki liu naḗa aḗetetae m̃ala kulkota lala suvileviles nen mrapplepa, ana yaru laḗasia apa ate m̃am̃ela lala pitomi aḗetetae m̃ena ga, vena togki yal ea. Sanene narui, akila sa naḗa la apatanon Yesu sa naḗa pe pupia ḗarin suḗe tai. ⁹ Ana la amial ke apano vena ava loyum̃a Yerusalem, ana ḗina na yeririna la naḗa asumon Yesu, amio la naḗa asirau-nia, asum̃a apiovion manene sanini, apisape

“!A ke suwala, pona po! ! Teyeluar naga!

!Ntewa na mava, ko ovisa ruru naga nene naḗa pimi e kioḃa kia!

¹⁰ !Ita tekekan pap̃isi nasuḗenena kiena ne ki-eta yermarua Tepet naḗa pimi ke! !Amiu nae mava peni, amiu m̃ena ga ayeluaria!”

¹¹ Ana Yesu pa loyum̃a Yerusalem, a pa tol Yum̃a

Wa m̃ana ne Ntewa. Ana pa loyuma, pisuveve yo lala, a sur la punu ga naṣa amiyumaen ke ea, pano-o mrae naga pato ke tano narui, naga pure kiena lualima taaga pa lua, apetan si pupia kumali naṣani, apa amono gar Petani.

Purlaki tai naṣa pe tau re poli wa

Matiu 21:18-19

¹² Ana yemlagi kolulagi la amligan si ma Petani aṣasuṣe sina vena ava Yerusalem, ana Yesu mloge sane viso karia. ¹³ Naga kira pa e is nen mrapplepa, m̃al purpik tai sike, ana naga mial pa lavisinia vena war mras laṣasia. Ana pogos naṣa pimi pisuia, purpik nene m̃as ga moki, ana pe mras su re e poli, komin pe kana pog re poli wa.

¹⁴ Ana Yesu pisa pan purpik nene, pisape “Ko ove owar re si mrasnoṃa pogos tai vena yar la akilia akania.” Ana kiena nalogena m̃ena la amloge ke naṣa naga pisalele kare laki na sanene.

Yesu m̃ene plan la naṣa asuma aṣiliwilin ke suri e Yuma Wa Mana ne Ntewa

Matiu 21:12-17; Luk 19:45-48; Yoane 2:13-22

¹⁵ Ana Yesu la apa atol si Yerusalem narui, lala apa sina ga loyuma e Yuma Wa m̃ana ne Ntewa. Ana e pogos nene naga pisu sane yar la moki liu naṣa asuma e yepas nen yuma nene, la asuma akila ke ga yumaena

natauluen kilavaru lala ea, ana yar la mok liu naṣa apul ke sur la naṣa aṣiliwilin ke ne. Ana naga pe kekaran re nenaga, pa m̃ene plan la, kawepu narin varvara kiena ne yar nakeueen varu sa le Rom la pimi ve sa le Yu la, nakilaena nalaena. A naga koantetain lele na totanoena kiena ne la naṣa apuliwilin ke kupa nakuṣaṣaena lala.

¹⁶ A naga pisawo m̃ena ga yar la naṣa sinelan ke asape awar kiela sur na yumaena la ayal akom likan yepa na Yuma Wa nene.

¹⁷ Ana naga pisa pian la, pisape “? Sanape, amiu pe akilia re asape Ntewa pisa e kiena Visena Wa, sape

‘Pisi na la avisa m̃au Yuma Wa avisave naga yuma nalotena kiena ne yolai punu ga e yomarava wetelu?’ Ais 56:7

‘Ana nanagane na amiu akepu pimi sa ga ponovi m̃ana yaru na vinauena la narui.’” Ser 7:11

¹⁸ Ana pe piavi re nena, yerkawa lala kiena ne yaru wa lala, amio navianena na navisaluaena lala, amloge sur la naṣa Yesu kila e Yuma Wa m̃ana ne Ntewa, ana la sinela kar paṣisi, asape akila suriania. Ana amaraun Yesu, pe akila re si poli, vanon apisu kilale naṣa yeririna la akekaran naga paṣisi, asuma amilan ke kiena navianena wo lala.

¹⁹ Ana pogos naṣa mrae pato pa tano narui, Yesu la

apetan ke sina ga yo naŕa Yerusalem.

Purpik naŕa pe tau re poli, mare make ga

Matiu 21:20-22

²⁰ Ana kolulagi, la aŕasuŕe apa ke si Yerusalem, ana apisu purpik naŕane, nãas la miaiai make nena rui. ²¹ Ana Pita sitomañal si visena kiena ne Yesu, pisa pania, sape “Suŕe, opisu ke ne! Purpik naŕa opisana kare nakoneva, nagane mare rui.”

²² Ana Yesu pisatañea, pisa pan la, pisape “Amiu punu ga monar aviawa ñarera e Ntewa. ²³ In na nepisa ke pe lelaga pan amiu, visae yar tai naŕa pe kiena sitomena pepe lua re poli, a mlelaga ñarera, ana visae suri ya naŕa naga visa, monar ve sanene narui. Visae naga vis va pupia kunus nene, visave ‘Osumãlu otove, oula ova e sive,’ ŕisi na monar ve sa ga nene. ²⁴ Nane nepisa pan amiu, ana sur ya ne ko na oviunia e kioñã leniena, visae olelaga ñarera sane sur nene pe kioñã pa rui, ŕisi na monar ve sa ga nene narui. ²⁵⁻²⁶ Ana e pogos punu ga naŕa visae alen, amiu monar asitom ruru ñena ga, visae kilapurpu tai teke e ko amio yar taŕena tai, monar oviewo sumo wa, ŕisi na okilia osumãlu okila kioñã leniena van Ntewa. Visae okila ve sa nene, yoko arimata nae ma e peni, naga

ñena sitomañal ko, viewo kon kioñã mlamulena viowa lala.”

Nasumonon le Israel lala sinelan asape avisaluŕar Yesu

Matiu 11:23-27; Luk 20:1-8

²⁷ Ana Yesu la aŕasuŕe si apam atol Yerusalem, ana apa si loyuma e kove na Yuma Wa ñana ne Ntewa. Ana pogos naŕa amialoro ke loyuma, yerkawa kiena ne yaru wa lala, amio navianena navisaluaena, a nasumonena lala kiena ne le Yu la, apimi puna, ²⁸ apiuntania, asape “Ko osumã okila ke sur la ne sanene e yo nini e kia kiena ne ai? Ana a si na pisa pan ko sape okila ve sanene?”

²⁹ Ana Yesu pisatañe la, pisape “Pogaga, ana inu ñena nesape neviun naviunena tai van amiu wa. Visae amiu avisatañe ruru kiau naviunena nene wo, ŕisi na nekilia nevisawal van amiu sanape naŕa nekilia nekila ve sanene. ³⁰ Ana kiau naviunena naga sanini narui, sape: ?Nakeena naŕa Yoane naga kilamare ga nanua ne e yaru lala, naga pe sur tai naŕa Ntewa pisa pania sape naga monar kila, pona yaru ga la apisa pania? Amiu avisatañeli kiau naviunena nene.”

³¹ Ana naviunena nene kiena ne Yesu kila la agorua la narui, naŕa asumã apisa asape “? ŕisi na ita tevisa sanape na vania? !

Tevisuaruruia! Visae ita tevisa tevisave nakeena nene Ntewa naga pisa pa Yoane, ĩisi na yaru nene viun si vetan ita, visave vanon ya ne ita pe temlelaga re e Yoane poli. ³² Ana ita taĥatete si tevisa tevisave nakeena kiena Yoane nene pe sitomena kiena yeririna ga lala, visae peraga, la sinela kar ita.” Yar keviu la amaraun visaena visen nene, komin akilia asape yeririna la nene amlelaga ke po m̃arera e Yoane ĩisi rui, asape naga pe navisawalena na lelaga tai kiena ne Ntewa.

³³ Ana kiela sitomena la ne sanene narui, kila apisatañe Yesu sa ga nini, apisape “Imimi memninue ga.”

Pisi na Yesu pisa pan la, pisape “Visae sanene, inu m̃ena ga, taĥatete nevisa van amiu nevisave ane pisa pan inu sape nekila yum̃aena la ne sanene.”

12

Pakaiwa na li viowa la naĥa apisuar lokilkerep tai

Matiu 21:33-46; Luk 20:9-19

¹ Ana pogos naĥa Yesu sum̃a pian la ke, naga pisayu ke ĥakaiwa pan la. Pakaiwa tai na pisa sa nini, pisayu yerkawa tai, amio kiena lokilkerep. Yaru nene kila ruru kiena yo nene, kila kove m̃arera tai telivi piora ea, a kila kana lele navieplanen was nen kerep, kila m̃ena kana lele tai naĥa pa metava naĥa yaru kilia wiyu va se

ea, vena kiravawoen lokilkerep nene.

“Ana e pogos tai, yerkawa nene sinenan sape yaloro re va e purvanua taĥena tai, ĩisi na mligan kana lokilkerep nene e limana ne yaru laĥasia, vena ayum̃aenia, aul vania.

² “Ana yerkawa nene pa sum̃a gare pano-o, ĩisi na pisu kilale sane nanagane na pogos na mrakerep la marua narui. Ana mligan kiena yaru tai pa si puna ne la naĥa asike e kana lokilkerep nene vena war kiena kilavaru na mrakerep komĥasia, naĥa la nene monar aul vania. ³ Ana pogos naĥa kiena yaru nene pano, ana yaru taĥena la nene am̃e kare naga, am̃enelua sina naga pano, pe mla re sur tai poli.

⁴ “Ana yerkawa nene miila si kiena yaru taĥena pano, ana la naĥa am̃ea, ĥar kuruta e ĥarina, akila piowa pan naga paĥisi, am̃enelua pa sina. ⁵ Pisi na naga miila ke sina ga taĥena tai, ana am̃emoĥar naga mare, siraunia, naga miila kiena yeririna moki apano, asula am̃emoĥar la m̃ena ga.

⁶ “Ana yerkawa nene pisu sane yar taaga sike narui, pe narina wawa naĥa naga kekaran paĥisi, ana naga sitomveve pano-o, pisape ‘In na monar neligan ga naruu vano, vena monar avatanon naga.’

⁷ “Ana pogos naĥa yar viowa la nene apisu nar-

ina ne yerkawa nene pimi, la asumã apismumun pan la, asape 'Narina ne ke yerkawa namã narui. Yaru ke na nene narui, naña visae yerkawa kovio, þisi na kus porotano nene sane ve kiena lalimaña. Po-pon ita towemãr mēna naga mare, ana ita ga tekilia tokus porotano nene ve kieta.'
 8 Ana sanene narui atarar naga, amēmãria, akovenlua naga petan lokilkerep pa vanua."

9 Ana Yesu piun tan la, pisape "Pogos naña yerkawa nene yoko imi sina, þisi na kila sanapen la naña amiyumãe ke e kiena yo nene? Yaru viowa la nene, þisi na yerkawa nene imi weñar la, monar amare e þelaga m̃arera tai, siraunia naga ligan kiena lokilkerep e limana ne yaru wo taþena la þasia."

10 Ana Yesu pisa pan la, pisape "Visena tai teke e Visena Wa kiena ne Ntewa, pisa sanini pisape

'Kilavaru nene, yaru na yuñaaenen yuñã lala apisa asape piowa ga, akoven rui, ana nanagane na, kilavaru nene pimi pe kilavaru wo na mrapun yuñã, ve nauararen yuñã m̃arera.

11 *Ana sur nene, Ntewa ga kila, a mepisuia na po na po.'* " Yauena 118:22,23

akilia pa rui, apuloli m̃ã pogos tai, pona peraga yo?"

12 Ana pogos naña Yesu pisa pae þakaiwa nene, yerkawa lala akilia naña naga sumã pisa ke ga visena la nene vanon kiela þelaga lala, ana sinela kar naga, kila narui sinelan asape auarar naga, þisi narui na apisu sane yar la mokliu, amaraun la, amligan naga m̃eke na aþure apano.

Sur kiena ne Ntewa, a sur kiena ne Sisa

Matiu 22:15-22; Luk 20:20-26

13 Ana yar keviu lala apa apisuveve sur nene, lala amligan Varasi laþas apimi, amio m̃ena ga þasia e þegas kiena ne Erot, naña apiunli naviunena m̃arera laþasia ve nataþalien Yesu ea, naña sane naga visatañe þele ga. 14 Ana apimi puna ne Yesu, akila kotalia e visena wo lala, apisa asape "Navianena, imimi mekilia ko na ope lelaga kemua. Ko ope omaraun re yar tai poli, sane yar keviu, pona yar naña to metava, po yar na sanape, ana ko osuñã apisalua ke mrapa mesmes kiena ne Ntewa pan la punu ga. Ana mesape meviunli tan ko, mesape kieta navisaluaena pisa sanape? ? Pisape mesmes ga naña ita le Yu toul takis va Sisa, naña pe þarin suþe kiena ne le Rom lala, pona pe mesmes re sanene poli? 15 ?Pogaga naña toul takis la nene po peraga?"

"?Ana sanape, visena nene

Ana Yesu kilia m̃aga nãa la apiun kotalia ga, sinelan ke asape akila kare naga, ana naga pis pan la, pisape “?Amiu asum̃a atãalinu ke sanene vanon ya? Pogaga, amiu ala kilavaru tai imi vena nevisuvevelia.”

¹⁶ Ana amla tai pimi, akian pania, Yesu piun tan la, pisape “Ninun marana a ne teke e narin kilavaru nene? ?Ana kia na asiri teke ea, ane kiena kia nene?”

La apisape “Marana ne Parin Sũpe Sisa nene, a kiena kia m̃ena ga.”

¹⁷ Ana pisa pan la, pisape “Pogaga, sur nãa kiena ne Sisa, monar ala va Sisa, a suri nãa kiena ne Ntewa, monar ala va Ntewa.” Ana pogos nãa amloge navisatam̃eena nene, amilan kare pãisi.

La nãa amare, p̃isi na amal sina

Matiu 22:23-33; Luk 20:27-40

¹⁸ Ana siraunia, le Satusi lãpasia apimi puna ne Yesu, sinelan asape aviunli suri tai tania e lepas na sur tai nãa la amlelaga m̃arera ea, asape sa yaru la nãa amare, tãpatete amal sina e legiena maro. Vanon suri ne nanene apiun tan Yesu sanini, asape ¹⁹ “Navianena, sinemimin mesape meviunli tan ko sanape e visena tai nãa yermarua Mosis siri pan ita nanua sumo. Naga pisa pisape visae yaru tai, mare tan wona nãa sane pe narila re tai poli wa,

p̃isi na wenla yaru nene monar talopa sina amio letano nene. Ana visae sira nene war sisi, akilia asikia e kia kiena ne arimana nãa mare pa rui, vena kia nene mali m̃aga. ²⁰ Ana e pogos tai, wenla la olua. Kiela m̃earu talopa, ana naga mare petan wona, pe narila re tai poli wa. ²¹ Ana wenla nasiraunia p̃ereleinia pe wona, p̃isi na naga m̃ena ga mare petania, pe narila re tai poli, a wenla na telu kila m̃ena ga sanene, ²² pano-o tol wenla na olua, la punu ga amarmare tan sira nãa sanene. A siraun wona la punu ga nãa amarmare, sira m̃ena ga nene mare. ²³ Ana ko ovisali sur nene: ?E legiena maro, pogos nãa apisa ke asape p̃isi na yaru la amal sina, p̃isi na sira nene na ve wona ai, vanon nãa naga talopa amio wenla la olua nene p̃isi rui?”

²⁴ Ana Yesu pisape “Peraga, kiamiu sitomena pa pe wowe laa. ?Pona kam na pe akilia re ya ne kila amiu ape wowe ke sanene poli yo? Vanon pe akilia re ya nãa Visena Wa kiena ne Ntewa pisa ke poli, a pe akilia re m̃ena ya nãa kiena nam̃areraena keviu kilia kila poli. ²⁵ Pogos nãa yaru la amal sina, p̃isi na lala ave sa ga navisi kiena ne Ntewa lala ma e peni narui, ana p̃isi na ve akila re si suri nene nãa natalopaena. ²⁶ A e lepas na malena si nene,

kaña visena tai teke e tusi naña Mosis naga siria, naña pisayu ke narin laki tai naña kapi kekania, naña Ntewa pisa pa Mosis sanini, pisape 'Epraam, Aisak, a Sekop, in na nepe kiela Ntewa.'

"?Pona amiu na pe apuloli re visena nene pogos tai poli yo, ²⁷ ana in na nevisakilale van amiu vena kila ruru ki-amiu sitomena lala. La telu nene la amare e yomarava nini nakonua rui, ana kas moki na moki p̄aro pa rui, ana Ntewa pisa ga visena nini na wa, naña sape naga pe kiela Ntewa. Sanene na kiena visena naga kana kinasia sape la telu nene la amare e yomarava, ana la amal ke ma puna na wa. Ntewa pe sinenan re sape kiena yeririna lala la ave yaru la naña amare poli, ana naga sinenan sape naga ve Ntewa kiena ne yeririna la naña amali."

Navisaluaena na keviu lua Matiu 22:34-40; Luk 10:25-28

²⁸ Ana navianena na visaluaena tai pimi sum̄alu sike e pogos nene, ana miyagogan ke le Satusi lala ataṗali ke Yesu, ana Yesu taulu la ga e kiena navisatar̄neena wo lala. Ana navianena nene, naga sitom sape naga towe lai viun va Yesu, pisape "? E kieta navisaluaena lala, nape naña keviu, miyuve taṗena lala?"

²⁹ Ana Yesu pisa pania, sape "Visena Wa pisa sanini, pisape

'Yeririna nae Israel, amiu ay-agoga.

Ntewa na mava, kieta Ntewa, naga taaga pe Ntewa na mava.

³⁰ Ntewa na Mava naña pe kioṃa Ntewa, ko na monar sinem̄a sia e losinem̄a wetelu, e kioṃa malena wetelu, e kioṃa sitomena wetelu, a e kioṃa puriukawaena wetelu.'

³¹ "Nanene naga pe navisaluaena p̄esia, a nalua nena naga pisa sanini, pisape

'Ko monar sinem̄a si nalavis pun̄a lala, okila wo van la, sa ga naña ko sinem̄a si ko ke ga.'

"Ana pe navisaluaena re si tai poli naña naga keviu taulu lalua nene."

³² Pisi na navianena navisaluaena pisatar̄ne pania, pisape "Lelaga ga navianena, ko opisa mesmesu ga. Ko opisa pe lelaga ga, osape yar keviu naga taaga ga, pe tai re si poli. ³³ Ana ko opis pe lelaga m̄ena ga osape monar sineu si naga e sineu wetelu, e kiau nakiliaena wetelu, amio kiau puriukawaena wetelu, ana monar sineu si la naña asike lavis pun inu, sa ga naña sineu si in ke ga. Pe lelaga ga ne, e nakiravaena kiena ne Ntewa, visae nekila ve sa nene, nanene naga to laa metava, po manene laa taulu make nakuṗaṗaena lala naña ne-taṗa ke e m̄ana Yun̄a Wa."

34 Ana Yesu mloge kiena navisatamēena naga po, pe manmarua po, ana pisa pania, pisape “In na nevisa van ko, sane ko ko na osike pa lavisi rui, ko na yoko p̄isi na ova loyuma e nasuḡenena kiena ne Ntewa na wa.”

Ana siraun e pogos nene, p̄isi na pe yar tai taḡali re si Yesu e naviunena la poli.

Navisaarena naga pe Ntewa kiena ne yermarua Tepet

Matiu 22:41-46; Luk 20:41-44

35 Ana siraunia, Yesu naga pian ke yeririna lala e Yuma Wa maana ne Ntewa, ana naga towelai piun naviunena tai pan la. Naga pisape “?Nekilia maaga naḡa kiamiu navianena navisaluaena lala apian amiu maaga, ana nesape neviunlia, komin ya naḡa apisa ke asape Navisaarena naga monar malivi e lus kiena ne yermarua Tepet nene naḡa naga pe p̄arin suḡe sumo? 36 Nepiun ke sa nene, komin nanua sumo, Ninuna Wa pimi e Tepet, kila naga pisi, pisape

‘Ntewa na Mava pisa pa kiau Suḡe, pisape

“Ko ototano e kiau lepas na p̄amarua, otomate ma vano-o, p̄isi na neli-gan kioḡa nasinekar lala aimi ve sa narin takue na vilanvanen lamā ea.”’ Yauena 110:1

37 “E lele nene tepisu naḡa Tepet suma pio ke Navisaarena nene sape pe kiena Suḡe rui. ? Ana vanon naḡa Tepet pisa sanene, a sanapen naḡa amiu apisa ke asape Navisaarena nene naga molue ga e Tepet, ana naga pe kiena lus ga tai?”

Ana pupia p̄ina naḡa asike e pogos nene, lala sinelan manene navianena kiena Yesu la ne sanene, la akekaran manene paḡisi.

Yesu pisi marera paḡisi pan nasumonena lala nalotena

Matiu 23:1-36; Luk 20:45-47

38 Ana e pogos nene naḡa Yesu naga pian la ke, pian lan la ke maana ga e p̄elaga na yeluarlaena kiena ne kiela nasumonena lala. Naga pisape “Amiu avisuar amiu e navianena navisaluaena lala. Lala aplave ke paḡisi e mala kulkota piayavi lala, a pogos naḡa visae la ayaloro e lele na wilwilinena, sinelan asape yaru lala monar avatanon la, a avio ruru la avisave ‘! Navianena, pokolulagi!’ 39 A e pogos na paḡagena lala, a loyuma e nalotena maana ga lala, la sinelan naḡa silaga asape atotano ga e lelen yerkawa lala. Amiu apisu kilale la ke narui, ne? 40 Ana lala asuma aḡure piavin ke kiela leniena la paḡisi, ana apisokani ke ga ne, vanon naḡa e ke e pogos nene, lala asuma akila kotalia ke letano la, vena

avinaun kiela suri lala. Ana vanon suri ne nanene, p̄isi na kiela nakoena m̄arera re laa sane.”

Letano tai mla kiena kururu varu pan Ntewa

Luk 21:1-4

⁴¹ Ana siraunia, Yesu naga pa laa lavisin yo naḡa akuan ke varu ea e Yum̄a Wa nene, ana kira pisulili ke yar lala naḡa akuwakuan ke kiela nalaena lala. Naga p̄isu yar la moki naḡa kiela sur la mokliu, aḡar kiela nalaena kerkeviu la pimi, akuwania.

⁴² Ana p̄isi na p̄isu m̄ena sira marua tai pimi, naga letano tai, pe kiena sur re poli. Ana naga mla narin kururu varu lua pimi, mla pan Ntewa. ⁴³ P̄isi na Yesu pio kiena nalogena lala vena aim puna, naga pis pan la, pisape “?Amiu ap̄isu ke sira marua nene, naḡa kuan narin varu lua ga nene? In na nevisa ve lelaga van amiu, naga mla keviu taulu make nalaena punu ga naḡa yar la naḡa kiela sur la moki amlavia. ⁴⁴ Lala nene, kiela varu keviu paḡisi, ana amla ga komḡas tekak ga pano, ana letano nene, narin varu naḡa naga mlararia vena iilaena kiena malena, mla punu ga pan Ntewa.”

13

Yesu pisawal naḡa p̄isi na awe plan Yum̄a Wa M̄ana ne Ntewa

Matiu 24:1-2; Luk 21:5-6

¹ Ana Yesu molue e Yum̄a Wa m̄ana ne Ntewa, ana pogos naḡa naga sum̄a mial pa ke, kiena nalogena lala tai kilologia pupia yum̄a lala na Yum̄a Wa nene, pisa sape “! Navianena, ovisuia! !Yum̄a la nene amio kana kilavaru lala apo paḡisi wa!”

² Ana Yesu pisa pania, pisape “?Opisu ke pupia yum̄a la nene? Yum̄a la nene, p̄isi na taḡatete si kana kilavaru ne tai naḡa toḡa ga towawa ruru teke e lelana, komin p̄isi na yar laḡas aimi, awe plan make nena yum̄a la nene vano.”

Naloge viowaena monar imi

Matiu 24:3-14; Luk 21:7-19

³ La amial sanene, apim e Kunus Na Purolip lala, naḡa kira p̄isu ke Yum̄a Wa, ana Yesu totano e yo nene. A pogos naḡa pe yaru taḡena la asu re poli, kiena nalogena la vari apimi puna, Pita, Semes, Yoane amio Antru. Ana apiun tania, asape ⁴ “? P̄isi na awe plan Yum̄a Wa nene pogwai, a kile ya ne yoko kila sur la nene vim kakate?”

⁵ Ana Yesu pisatam̄e la narui, pisape “Popon amiu avisuar ruru amiu, vena ve yaru imi visa kotalia amiu re, ⁶ vanon naḡa p̄isi na yaru la ve moki naḡa ala kiau kia, ana aimi avisave ‘In na nepe Navisaarena p̄a,’ ana p̄isi na aure yaru la ve moki ava ave wowe. ⁷ Ana visae e pogos nene, aloge m̄aagena na mara pimi ke lavisi, pona

alologon pupia mara la naĉa sike perina, ana ve sinemiu kurkur manene re. Suri la nene monar imi kakate sumo, ana nanene na pe pe legien maro re poli na wa.

⁸ A ĉarin suĉe lala, yoko akila mara amio ĉarin suĉe taĉena lala, a purvanua lala yoko asuĉalu akawela amio purvanua taĉena lala. A yo kar ga e yomarava nini, yoko yemninu vaĉisi, a pupia viso mĉena, ana suri la nene, pe pe legiena maro re nene poli na wa. Ana suri la nene ŝa ga sira naĉa mĉepena, naĉa sane mloge ĉesan mĉasina mlaea vena warden sisi, ana pupia naloge viowaena naga pere na wa.

⁹ “Ana monar avisuar ruru amiu, sa ĉisi yaru la aure amiu ava e kielu kumali, pona e kielu yuĉa na lotuena lala, vena avis van amiu, ala nakoena van amiu, pona awe amiu. Yoko monar aligan amiu ava asuĉalu ase marana ne yerkawa na purvanua vanon ga naĉa amiu ape kiau nalogena lala, ana e pogos nene amiu akilia avisawal kiamiu nalelagaena e inu e marala. ¹⁰ A lologena wo, yoko alologon va yolai la punu ga e yomarava nini sumo wa, ĉisi na sur la nene kilia imi mĉalivi. ¹¹ Ana visae la nene aim atarar amiu, aure amiu avano vena ala nakoena van amiu, amiu na ve asitom manene re avisave ‘?ĉisi na nevisa ya ne van la ne?’ Ana avisa ga

visena naĉa ĉisi na Ninuna Wa la van amiu, mesmes ga e pogos na visena, vanon pe amiu re apis poli, komin Ninuna Wa ga naga vis e amiu.

¹² “E pog mĉarera nene, yoko yar kilia taĉan yaru viowa taĉena la aimi aurelua wenla ruru naapo pona narila ruru naapo, vena awe momĉar la, nanene komin naĉa la nene amlelaga e inu. A nin sisi mĉena ga lala akilia asuĉalu avisawal anela lala amio arimala lala naĉa la amlelaga e inu, vena lala mĉena ga amare sanene.

¹³ Ana yoko yaru la sinela kar manene amiu, naĉa kiau kia teke e amiu, a amiu yaru a naĉa suĉalar mĉarera suĉa ga vano-o pog mĉarera nene ĉisi, Ntewa tamalia naga.”

Pupia pog mĉarera tai garu Jerusalem

Matiu 24:15-28; Luk 21:20-24

¹⁴ Ana Yesu pisa mĉena ga visena taĉena tai, naĉa popon yaru kilia wuloyuia, vena kilia ruru kana kinasia. Visena nene sanini, pisape “Yoko amiu akilia avisu naĉa avisirlua nono tai naĉa piowa manene laa, yoko suĉalu se e yo wa tai pe pon re nena naĉa aligan se ea. A pogos naĉa avisu suri nene, amiu naĉa asike Yutea, popon amiu aure, ava atapolou e kunus lala. ¹⁵ E pogos nene, visae yaru tai va ruru teke vanua

lavisin m̃ana yuṃa, naga monar ve va re si loyuma war kiena suri laṃasia, ¹⁶ pona visae yaru sike e kana lokove, naga monar ve vito re si uṃa tar m̃ana kulgota, naga monar kiriri vitaṃpili ga sanene vano. ¹⁷ Ana e pogos nene, yoko viowa laa m̃ena van sira la naṃa meṃela, amio la naṃa amla ke yu pan kiela sisi tomtom lala. ¹⁸ Visae ve sanene, popon amiu alenwo amiu vena kiamiu pog naureena nene ve imi tol amiu re e pog na miava keviu. ¹⁹ Nanene yanon pogos nene, ṃisi na m̃arera na m̃arera, m̃arera laa sane taulu pogos m̃arera taṃena lala, naṃa siar e pogos naṃa Ntewa sii yomarava nini pimi tol nanagane, a yoko ve pog m̃arera re si tai ve sanene pogos tai. ²⁰ Ana Ntewa sitoṃal rui pisape yoko tero pog m̃arera nene imi ve plas ga, vanon kiena yeririna la naṃa pisir plan la vena ave kiena, asike e pogos nene. Ana visae ve tero re ve plas sanene, yoko taṃatete yaru tai kilia mal sike na.

²¹ “Ana visae yaru lala avivisa van amiu, avisave ‘Amiu avisu yaru nene, naga na Navisaarena nene,’ pona avisa taṃena, asape ‘Nane Navisaarena ne nane gare,’ ana amiu na ve alelaga re e kiela visena lala toko, ²² komin naṃa navisaarena la mokliu naṃa pe ape lelaga

re la poli, la akilia asuṃalu, amio m̃ena ga navisawalena navisokanena la ve moki, a ṃisi na la nene akilia akila kile lala, amio sur nailanena lala. Ana yoko akila sanene, aure yaru la ava ave wowe, vano-o tol naṃa akilali naṃa aure m̃ena yeririna kiena ne Ntewa la naṃa pisir plan la vena ave kiena, ana la taṃatete akilia akila. ²³ Ana akilia avisuar amiu ruruia, komin nepisawal make suri la rui pan amiu nanagane, naṃa pe aṃarpo yo re poli wa.”

Pisi na Narin Yeririna wasupe sina

Mak 13:24-27; Luk 21:25-28

²⁴ A Yesu pisape “Ana e pogos nene, siraun naṃa naloge viowaena nene ṃisi, mrae imi ve pupumalko, a kupario ve tego re sina. ²⁵ A verue la ma e sinapane asuṃa aloloru, a suri m̃arera lala nae ma e sinapane, yoko Ntewa kululun la. ²⁶ E pogos nene, ṃisi na la avisu Narin Yeririna molue e lul amio pupia kiena nam̃areraena amio naurarena. ²⁷ Ana siraunia, naga ligam kiena navisi lala ava e yo punu ga e yomarava a ma e peni, ana yoko aure kiena yeririna la naṃa naga pisir plan la ṃisi rui, aimi lele taaga puna.”

Pe yaru re tai naṃa kilia pog na legiena maro nene

poli

Matiu 24:32-36; Luk 21:29-33

²⁸ Ana Yesu pisape “Amiu asitomli purlaki nene, naþa asape purpiliva. Naga kiena sur navian amiuena tai teke ea, naþa monar avisuru-ruia. Pogos naþa avisu sitos la siar miyunlua sina, imi memaena, ana amiu akilia asape pog na yepisusunu mñarera pimi ke lavisi narui.

²⁹ Ve sanene, pogos naþa avisu kile la nene e yomar-ava, la apimi akakate ke sa naþa nepisa pan amiu rui, ana amiu akilia naþa Narin Yeririna suna ga e pulutava rui, lavisi ke kate narui.

³⁰ Nevisa suri na lelaga van amiu, yoko sur la nene imi kakate sumo, ana siraunia, lus kiena ne yaru la naþa amal ke e pogos nene, þisi na akilia akovio e yomarava nini. ³¹ A yoko sinapane amio yomar-ava nini lalua mnea akovio veraga, ana kiau visena lala taþatete nena akokovio pogos tai. ³² Ana pe yar re tai naþa kilia kana legiena

pona aora nena naþa þisi na Narin Yeririna mñalivi ea. Navisi lala nae ma e peni, amio Narina ne Ntewa, la mnea amninue ga, ana Ata ga, naga taaga kilia.”

Monar akila ruru amiu asuñga

Matiu 24:42-44

³³ Ana Yesu pisape “Sanene, ana monar asuñga avisuar ruru amiu, komin

amninue ga asape kiamiu suþe naga imi sina e legiena ya. ³⁴ Sur nene sa naþa yar keviu tai mligan mnea uña vena vanon kiena pupia yalena tai. Sumon naþa naga ligam kiena yo, naga monar ligam kiena sur la punu ga va sike limana ne kiena yar na yuñae lala, a monar vis ruru van la naþa apisuar ke mralaea, sape avisuar ruruia. ³⁵ Ana nanagane sa mnea nene van amiu, amiu mnea asuñga avisuar ruruia, komin pe tekilia re poli, yar keviu na uña vim pogwai. Pona imi kotaþa, po kolemallo, pona sa lakaporo la akokoreko, po kolulagi, ³⁶ ana piowa ga naþa sa naga vim mñalivin amiu, lual naþa kam na amomallo mña. ³⁷ Ana visena naþa nepisa ke pan amiu, mesmesun naþa yeririna la punu ga monar aloge, sane amiu akirarava ruruia, avisuaria.”

14

Li nasumonena la nae Israel sinelan asape yoko aweñar Yesu na wa

Matiu 26:1-5; Luk 22:1-2; Yoane 11:45-53

¹ Ana þisi na, pog pimi lavisi naþa e kas punu ga asuñga akila kiela pupia þaþagena lua. Legiena lua ga suwo ke wa, þisi na akila þaþagena na sitomñalen natamaliaena naga sumo, þisi na akila þaþagena na kanen kiligaþe naga sirau.

A e legiena nene, þarin yar wa lala, amio navianena na visaluaena la sinelan ke asape yoko awem̄ar Yesu na wa, ana akale ke mrapa tai na tarwanen naga. ² Ana lala apisayu ke pan la, asape “Sur nene taþatete tekila e maran yeririna la naþa apimi e þaþagena nene, komin visae pere na la sinela kar ita vaþisi ne, yoko akila pupia m̄aagena, vanon la mokliu naþa akekaran ke pa yar nene rui.”

Maria taron ponotaninu e Yesu

Matiu 26:6-13; Yoane 12:1-8

³ Ana e pogos nene, Yesu sike e kumali naþa Petani, naga sike e yuþa m̄ana yaru tai naþa apio ke Sae-mon Leperosi, komin nanua susumo naga þar leperosi se e yepena. Ana Yesu kinana ke e yuþa nene, sira tai pimi puna, mla pi-awi tai naþa amiyuþaen e kilavaru tai naþa po, a pi-awi nene na pulen ponotaninu naþa amiyuþaen e was nen þeligalaki tai, naþa kana kilavaru keviu paþisi. Ana sira nene pilonpo gon piawi nene, taron make ga ponotaninu nene taroi e þarina ne Yesu.

⁴ Ana laþas naþa asike e lele nene e pogos nene, apisu ke sur nene, ana la sinela kar sira nene paþisi, asum̄a apisamumun ke pan la, asape “? Komin yar ne sira nene taron kare korenan ke

ponotaninu sa nene? ⁵ Visae wilwilinlua ga na, vera war varu keviu ea, vena iilaena yeririna la naþa pe kiela sur re la poli. Naga kila kare na!” Ana la asun apisa kare ke sira naþa sanene.

⁶ Ana Yesu pisa pan la, sape “? E, kam na akila ke sanene pan sira nene komin ya? Amiu na ve avisa kare re si naga, naga kila yuþaena naþa po tanea pan inu, pisa ruru inu paþisi. ⁷ Li na lima korena la naþa apisa la ke ne, yoko lala asulue ga likan amiu, ana amiu akilia aiila la silaga e pog punu ga naþa sinemiunia. Ana inu, in na yoko ve nesu re silaga nemio amiu. ⁸ Suri naþa sira nene miyuþaenia, naþa taron ponotaninu e inu, naga kila sur wo punu ga naþa naga kilia kila, naþa pe nakilaruruen yepeu yoko neva e marena. ⁹ Nepisa ke sur na lelaga pan amiu, e yo punu ga e yomerava wetelu naþa avisawal kiau lologena wo ea, ana asunyu m̄ena sur nowo nene naþa sira nene miyuþaenia, vena asitom̄al sina ga silaga pupia sitomena kiena e inu, naþa sinena miye inu lelaga.”

Sutas þiliwilin wan Yesu

Matiu 26:14-30; Luk 22:3-20; Yoane 13:21-30

¹⁰ Ana Sutas nae Kariot, naþa naga m̄ena pe nalogena na lualima taaga pa lua tai, naga sitom ke pa rui naþa yoko wilwilinwan

Yesu, ĩisi na pa pisu ĩarin yar wa lala. ¹¹ Ana pogos naĵa amloge yoko naga kila kiela mrapa na tarwan vinaunen Yesu, akekaran paĵisi, apisaar pania, asape “!E po paĵisi ne! Visae oiila imimi ve sanene, yoko mela narin nalaena tai van ko vanonia.”

Ana e pogos nene, Sutas siar kale ke pulmas tai yoko kilia ligan Yesu va e liman yaru wa la nene.

Yesu pitetalia Pita amio Yoane ava akila ruru kana kinanena maro

¹² Ana legiena ĩesia na ĩaĵagena na kanen kiliĵaĵe pe Toste, naga legiena naĵa la asuĵa akila ke nakuĵaĵaena e narin sip-sip lala vena sitomĵalena natamaliaena. Ana nalogena la apiun tan Yesu, asape “?Ko na sinomĵan osape mekila ruru kata kinanena na ĩaĵagena naĵa e lepas nape?”

¹³ Ana naga pisa pan lalua, sape “Ava gar Yerusalem, yoko alual yar tai kus ke pupia piawi na wii tai, imi mĵalivin amiu. Ana ataveve naga avano, ¹⁴ ana yoko naga were amiu ava e yuĵa tai. Ana pogos naĵa ava loyuĵa e yuĵa nene, amiu avis van ĩar na yuĵa nene, avisa sanini asave ‘Kieta navianena piun ke sape awa yo kiena ne wolawa lala, vena naga memio imimi kiena nalogena lala mekilia makan kinanena na sitomĵalen natamaliaena ea?” ¹⁵ Amiu avisa sanene vania, ana naga vian

amiu e pupia lele tai metava van amiu, naĵa suri la punu ga sike pa e rui, ana yoko akila ruru sur la punu ga nakanena e lele nene.”

¹⁶ Ana Yesu pisa sanene pan nalogena lua nene, ana apano, amial mĵa apa atol Yerusalem. Ana e pogos nene, sur la punu ga pimi mĵalivi sa ga naĵa Yesu pisayu susumo pan lalua.

Āisi narui na, lalua akila ruru maron kinanena na ĩaĵagena nene kana Yesu, ĩisi na aĵasuĵela sina ga.

Yesu pisawal naĵa yoko Sutas vielua naga van kiena nasinekar lala

¹⁷ Ana kolemallo, Yesu amio kiena nalogena lala apitom garo Yerusalem, apito e yuĵa naĵani. ¹⁸ Ana pogos naĵa asuĵa akinana ke narui, Yesu pisa pan la, sape “In na nepisa ke pe lelaga pan amiu ne, yoko amiu yaru ga tai yoko vielua inu, amiu yaru ga tai naĵa ita tesike tekinana ke veraga nagane.”

¹⁹ Ana nalogena la amloge naĵa naga pisa sanene, ana amloge piowa paĵisi, apiun veve ke tan la peve taaga, asape “?E, in re poli?”

²⁰ Ana Yesu pisatame la, sape “Naga naĵa yoko kila sanene van inu, naga pe kiau nalualima ga taaga pa lua tai, naĵa naga yaru tai naĵa imimi lua meputon kamimi kilaparavi e ga e pulpiala taaga. ²¹ Ana yoko Narin Yeririna naga monar

mare sa naña Nasiriena Wa pisayu pa sumo rui. A yaru naña vielua naga, yoko viowa manene laa van naga, naga popon manene sa ve vaeme re ga rui.”

Kinanena maro

22 Ana pogos naña la akinana ke sanene na, Yesu mla kilaparavi tai, pisa potena pan Ntewa, ana kawewowaia, kian pan la, ana naga pisa pan la, sape “Alavia, akania; nanene naga pe tasneu.” 23 Ana pisin nene, mla piala na kuruta, pisa potena pan Ntewa, ana kian pan kiena nalogena lala, ana la punu ga peve taaga amunpae ea.

24 Ana naga pisa pan la, sape “Nanene, naga pe tau naña pe nakilaen naviranarena kiena ne Ntewa sumalu m̄arera silaga, naña yoko tau nene naga lauwo malena kiena ne yeririna la ve moki.

25 Nepisaar ke pe lelaga na pan amiu ne, nesape yoko sane in na ve nemun re si kuruta pogos tai, vano vano-o nemun ga kuruta viu e navesuñenena kiena ne Ntewa.”

26 Ana pogos naña Yesu kila pa sanene, ana la amiyau e yauena tai naña teke e tusi kiena ne Yauena lala, p̄isi na amolue petan yo nene, amiyal apa e Kunus Na Purolip la.

Yesu pisawal sape yoko Pita naga visawan naga

Matiu 26:31-35; Luk 22:31-34; Yoane 13:36-38

27 Ana pogos naña asike e kunus nene wa, Yesu pisawal pan la pisape “Pane ga kolemallo, kiamiu lela-gaena e inu naga loru, komin Visena Wa pisawal pa sur nene rui, naña sape

‘Yoko in na nowe moñar yar navisuaren sipsip, ana kiena sipsip lala yoko aureure tetai.’ Sek 13:7

28 “A pog naña netaulu si marena, yoko in na nesumo neto garo Kalele, ana amiu m̄ena monar asirau atom garo lele nene.”

29 Ana pogos naña Pita mloge visena naña Yesu pisa pania, pisawolia pisape “Pona nalelagaena kiela punu ga nene e ko loru, aure vetan ko, a yoko inu, in na tañatete neligan ko pogos tai.”

30 Ana Yesu pisa pan la, sape “Lelaga nepisa ke pan ko, yoko p̄ane ga kolemallo, pogos naña towa la ve akokoreko re yam ve lua wa, a ko, ko na yoko ovisawan inu yam ve telu rui.”

31 Ana Pita pisaluñar visena nene, pisaar m̄arera, sape “Visae la sinelan asape awem̄arnu m̄ena nemio ko, naga pogaga ne, ana inu, yoko tañatete nevisawan ko, nesape in na pe nepe kioñã re poli.” Ana e pogos nene, nalogena punu ga la apisa m̄ena sa nene.

Yesu pa mlen ma Ketsemani

Matiu 26:36-46; Luk 22:39-46

³² Ana sirau, Yesu lala apa e lepas nen kunusia, amiyal apito tano e narin pulḡalu tai, naḡa kiena ki Ketsemani. Ana naga pis pan la pisape “Amiu asuḡa e nini wa. Ana in na neva nelen ve plas ga wa.”

³³ Ana naga ḡere Pita amio Semes a Yoane, ataveve naga, apa li la vitokak ga sane, ana e pog nene, sinena Yesu naga pimi urmi keviu, mloge piowa paḡisi. ³⁴ Ana naga pisa pa la telu nene, pisa pisape “Nanagane, nemloge sa naḡa ninuu naga pororowa make ga, naḡa lavisi nemare narui. Awis, amiu asuḡali atavilo amio inu e yo nini wa.”

³⁵ Ana Yesu miyal pa laa sane, mlorun kinai, mlen pa arimana, sape “Ata-o, Ata-o, sa otaḡania, yoko aora na pog ḡarera la nene naga ve imin in re sina. ³⁶ Ko na okilia okila sur punu ga, ana nepiun tan ko vena okuslua piala naloge viowaena nene vetan inu, vena in na ve nemun re ea. Ana ko na ve okila re sa naḡa na sinena-nena kiau, ana okila ga sa naḡa kioma nasinenanena.”

³⁷ Pisi na, naga pimi sina ga puna kiena nalogena la telu naḡane, naga pisu lala amomalio pa rui. Pisi na lala atavilo sina ga, ana Yesu pis pa Pita sape “?Sanape Saemon? Ko na omomalio? ?Komin ya ne kam

na taḡatete atavilo amio inu e aora nini? ³⁸ Kam na monar avisuar ruru amiu, monar alen lue ga, vena nataḡaliena la ve akila amiu aloru re e mlamulena viowa. Pe lelaga, kiamiu sitomena ḡarera po, ana tasnemi naga miyowo ga.”

³⁹ Ana siraunia, naga pa si e yo na leniena naḡane, mlen, mlenin sina ga visena naḡane. ⁴⁰ Ana pogos naḡa naga ḡasuḡe sina, pisu la telu nene amomalio ke ḡina ga, komin atekavito paḡisi, ana pogos naḡa pis pan la, lala pe apisataḡe re si suri tai pan poli.

⁴¹ Ana naga pavin sina, kiena leniena na telu, ana pogos naḡa ḡasuḡea, naga pis pan la, sape “!E! ?Amiu apa ruru amiu ke ga wa, amomalio ke ga wa? !Poga, ḡisi ga ne! Naga ne lavis ga pog naḡa narin yeririna va e liman li viowa la narui. ⁴² Ko pogaga, amiu asuḡalu ita tetove, yar nawilwilin wan inuena, nagane pam ke lavis gar ne narui.”

Apuarar Yesu ḡarera

Matiu 26:47-56; Luk 22:47-53; Yoane 18:3-12

⁴³ Ana e pogos nene naḡa Yesu pisa ke visen nene wa, Sutas, naḡa naga tai lala lualima yam taaga pa lua ne, naga pimi, amio yeririna la moki naḡa aḡar ke playu na mara amio kiela plaki lala. La nene, yar keviu la kiena yar wa la, amio navianena na visaluaena, amio na sumonena kiena le Yu

la, lala amligan la apimi.
 44 Susumon naña apimi, yar na wilwilinena naña Sutas, naga pisapēs kile tai pan la sumo rui, pisape “Yar naña sa neva netalopan pēsia, yar ne nanene naña ita sinetan ke, ana kiamiu yar na mara la monar atararia mārera aure naga vano.”

45 Ana pog naña apimi narui, Sutas miyal mesmesun ga Yesu, pis pania, sape “Navianena, pokolemalo.” Talopania, 46 ana kiela yar na mara la apimi atararia asape aure naga vano. 47 Ana pogos naña atarar sanene, ana nalogena tai pūrelua kiena playu, sape te yar tai naña nae pun yar wa la, ana naga teteteria ga p̄arina, telua kiligana kompās pano.

48 A Yesu pis pan yar la nene, sape “?Sanape na amiu aṗar kiamiu playu amio plaki lala? ?Sanape na asape aim ataranu sanene? ?Pona asitom ke asape in na nepe yar mārera na vinuena amio na weṁaren yaru la yo?” 49 Sila ga e legiena punu ga, in na nepian amiu e yuṁa m̄ana Ntewa, ana sanape na amiu pe apim ataranu re e pogos nene poli? Ana pogaga, kome sur la naña nasiriena wa pisayu sumo rui, monar imi ve sa ga nene.” 50 Ana e pogos nene, nalogena la amligan Yesu, aṗure petania.

51 Ana e pogos nene, yar

m̄ee tai taveve ke yar la naña aṗure ke Yesu pano, ana naga pitavi ga. Ana yar la nene p̄asia apisuluṗar naga, asape atarar m̄ena naga, 52 ana atarpal ga naga, atarar ga kiena kulmrae aṗurelua petania, pe plamom̄e ga kiriri pano.

Aṗere Yesu pa e pupia kumali kiena yar kerkeviu kiena le Yu la

Matiu 26:57-68; Luk 22:54-71; Yoane 18:13-24

53 Ana lala aṗere Yesu pimi suṁal e marana ne p̄arin yar wa, naña kiena ki Kaeṗas, amio yar keviu kiena yar wa lala amio navianena na visaluaena, amio na sumonena kiena ne le Yu lala, apim pa lele taaga e yo nene rui. 54 Ana Pita m̄ena taveve m̄a Yesu e pogos nene, ana pe pa re lavisin poli, ana pogos naña apim loyūṁa e kove na kumali nene, Pita pa totano amio yeririna na yuṁaena kiena Kaeṗas, lala atega ke kapi, komin miava. 55 Ana yar keviu la naña asike loyūṁa e viorena nene, lala akale ke yar laṗas naña akilia avisa plan sur laṗasia naña Yesu miyūṁaenia pona pisa, vena kila la akilia awem̄ar naga vanonia, ana pe aṁa re sur tai poli. 56 La aṁal laṗasia aṗerela apimi apisawal visena moki, ana visena punu ga nene apisokan ga, asuṁa apisa ke ga sur la naña pe taṗena lala,

ana kiela visokanena la nene mlolor ga.

⁵⁷ Ana ĥisi na, laĥas na visokanena aĥal visena tai, asuĥalu, asape ⁵⁸ “Memloge yar nene naga ĥarwar e visena sanini rui, sape pupia yuĥa wa naĥa kieta yer-marua ga la amiyuĥaenia e limala, pisa sape yoko naga taaga ga kilia weplania, yoko yuĥaen ruru si yuĥa wa viu taĥena tai e legiena ve telu ga, naĥa liman yeririna taĥatete yuĥaenia.” ⁵⁹ La apisa ĥa visena la nene pano-o, kaka ga, kiela visena la nene pe suĥal ĥarera re poli.

⁶⁰ Ana ĥarin yar wa suĥalar se marala, pisi pa Yesu, piun tania, sape “?Ko na yoko ovisataĥe van la pona ve ovisataĥe la re? ?Sanape e visena la nene naĥa apisa plan ke ne?”

⁶¹ A Yesu pe pis re si po, pisataĥe re si poli. Ana ĥarin yar wa pis si pania, sape “?Sanape? Ko na ope Navisaarena naĥa pe narina ne Ntewa, pona pe ko re poli?”

⁶² Ana Yesu pisataĥe pania, sape “Ee, Navisaarena nene, naga inu. Ana nesape nevisa ĥena van ko, ĥisi na yam ve plas ga, avisu si Narin Yeririna naga totano ke e lepas na ĥamarua puna Ntewa na ĥareraena, yoko avisu naga vaeme e lul metava vitom tano e yomarava nini.”

⁶³ Ana ĥarin yaru wa sinen karia na pitolwowa ĥana kulkota, pisape “Ĥisi ga ne! ?Komin ya ne ita takale ke si yar taĥena naĥa kilia visa plan si sur laĥasia e naga? ⁶⁴ Amiu amloge ke ne! ! Yar nene naga ĥarnaena kare pa kia wa kiena ne Ntewa rui! Viorena sitom sanape, yoko tela naliĥereena van ve sanape?”

Ana la amla naliĥereena pa Yesu, asape mesmes ga naĥa monar aweĥaria.

⁶⁵ Ana laĥas apasirkon naga, apiwo kilamarana, ana asuia, apisa karea, apiuyun tania, asape “?E, ovisalia, ane mlipa ko ke nanagane?”

Ana yar na mara laĥas kiena ĥarin yaru wa la apim aĥurelua naga petan yo nene, ana la ĥena nene asuia, amlilipa ke pogos naĥa aĥure ke naga apano.

*Pita naga pisawan Yesu
Matiu 26:69-75; Luk
22:56-62; Yoane 18:15-18,25-27*

⁶⁶ Ana e pogos nene, Pita sike loyuĥa e kove wa, ana sira na visuaren yuĥa ĥana ĥarin yar wa pimi e lele nene, ⁶⁷ ana ĥal Pita tegan ke kapi, pisuluĥaria, pisa pania, sape “!E, ko nene ko ĥena otataveve yar nae Nasaret naĥane!”

⁶⁸ Ana Pita pisawan sur nene, sape “!E! In na pe nemloge ruru re sur na ko opisa ke ne poli!” Ana naga

petan lele nene, pato laa lavisin pupia pulutava na yumã nene.

⁶⁹ Ana e yo nene, sira nene naga m̃al sina, ana pisawal pan yar la naña asike ne, sape “Yar nene pe yar kiena ke yar namã tai narui.”

⁷⁰ Ana Pita pisawan sina ga visena nene. Ana pe piavi re nenaga, la nene apisa pa Pita, asape “Peraga, ko ke tai narui, komin ko na yar nae ke Kalele tai narui.”

⁷¹ Ana Pita pis m̃arera, pialuþar m̃arerania e visena sa nini, sape “! E lelaga kemua rui, Ntewa na Mava, in na nepisa pa rui, pe nekiliaar re nena yar na kam na apisayu ke ne poli.”

⁷² Ana veraga ga pogos naña Pita pisa ke sanene, towa kokoreko yam lua narui, kila Pita sitoñal si visena kiena Yesu, naña pisa pania, sape “! Lelaga nepisa pan ko, þane ga ne kolemalu, pogos naña towa ve kokoreko re na yam lua poli wa, ko na ovisawan inu yam ve telu rui.”

Ana Pita mloge sinena piowa na piowa, molue pa vanua, tag na tag.

15

Lala aþure Yesu pa puna ne þarin suþe kiena ne le Rom la naña sike Israel

¹ Ana kolulagi e Praere nene, li kerkeviu la kiena le Yu la apiora sina ga e kiela pupia kumali. La nene nane yerka kiena ne yaru wa lala, amio kiela nasumonena

lala, amio kiela navianena navisaluaena la. Apis m̃a pano-o, atol sitomena tai, þisi na apiar limana ne Yesu, aþure naga pa puna ne þarin suþe keviu Paelat, ana la amligan Yesu e limana, vena naga liþerea.

Yesu suñalu e marana ne Paelat

Matiu 27:11-14; Luk 23:3-5; Yoane 18:33-38

² Ana Paelat piun tan Yesu, sape “?Ko ope Þarin Suþe kiena ne le Israel lala, pona peraga?”

Ana Yesu pisatam̃ea, pisape “Naga ke narui, sane opisa ke ne.”

³ Ana yerka lala kiena ne þarin yaru wa lala apisa-sawal suri la e Yesu, asape naga kila sur la moki naña piowa. ⁴ Ana Paelat piun sina ga tania, sape “?Sanape, la apisa suri viowa moki e ko rui, ana ko na omla m̃a kana navisatam̃eena pona peraga?”

⁵ Ana e lepas nen sur la ne apisa ke ne, Yesu pe pisatam̃e re si sur tai pan la poli, ana Paelat sinen pulan sur nene paþisi.

Paelat tam̃an pisape Yesu monar mare

Matiu 27:15-26; Luk 23:13-25; Yoane 18:39-19:16

⁶ Ana e pogos nene, la asike e pog na Paþagena na Sitoñalena Natamaliaena wa, ana e kas punu ga e þaþagena nene, þarin suþe nae Rom silaga kila suri tai pan le Israel lala. Naga kila naña visae laþas naña asike

e yuñña naloge viowaena, la akilia aviun yaru ve taaga naña sinelania, yoko Paelat naga ligana lua naga molue. ⁷ Ana e pogos nene, yaru na kilaen politik tai naga mñeke e yuñña naloge viowaena, naña yaru la akilia ruru naga, kiena ki Parañas. Naga pe yar tai pogos naña asumalun kawelaen amio le Rom lala, mñemoñar lañas amare, ana amligan pa e yuñña na loge viowaena. ⁸ Pisi na, pñina lala apimi moki lele taaga e marana ne Paelat, apiun tania vena naga kila van la sa naña naga suñña kila ke ne, monar ligana lua lala yar tai naña sike e yuñña naloge viowaena molue sina.

⁹ Ana Paelat pisatamñe la, sape “Pogaga. ?Amiu sine-miun asape neligan lua yaru nene molue sina, naga pe kiamiu pñarin suñe amiu le Yu la?” ¹⁰ Paelat piun sanene, vanon naga kilia pa rui naña yerikawa ga kiena ne le Yu lala, aþure Yesu pimi puna, sane yuññaena na vielueen ga, vanon naña apisu kiela yeririna taþena lala akekarana Yesu paþisi.

¹¹ Sanene narui, Paelat sinenan sape ligana lua Yesu vano, ana yerikawa kiena ne yaru wa lala akila kare sitomena kiena ne yeririna lala pimi pisusun paþisi, asape amñarera van Paelat vena ve ligana lua re Yesu, ligana lua ga Parañas vano. ¹² Ana Paelat mloge ke sur la naña apisa ke pania, piun tan

la, sape “Pogaga, ana visae sanene, pñisi na nekila ve sanapen yar nene naña amiu apio ke naga asape pñarin suñe kiena ne le Yu lala?”

¹³ Ana la punu ga apioyonia, asape “!Asuar naga e lak torovia!”

¹⁴ Ana Paelat piun tan la, sape “?Vanon ya? ?Naga kila suri ya ne piowa?”

Ana la apioyoni manene laa pa metava sane, asape “!Asuar pña, asuar ma e laki torovia!”

¹⁵ Ana Paelat pisu pñele narui, sinenan sape visa sur tai naña kila yeririna la nene aloge wonia, ana naga sape Yesu naga suñña ga, a mligana lua ga Parañas pa si pula. Ana mligana Yesu e limana ne kiena li na mara lala vena akoo, aure va asuar e lak torovia.

Li na mara lala akila lele kare Yesu

Matiu 27:27-31; Yoane 19:2-3

¹⁶ Ana li na mara lala atarar Yesu aþerelua pa vanua e yometava na kumali kiena ne Paelat nene, ana la apio pa kiela pegas nen li na mara taþena lala vena aimi avisuia. ¹⁷ Ana la amiyenlua mñana kulsota, ana amiyen kulkota tai e naga naña marana mene sa naña pñarin suñe la amiyen, ana aþar nonos nen kilsirili, ana aþaniroron ga, amligan e pñarina, sa naña karo na pñarin suñe tai. ¹⁸ Ana pogos naña amligan sur la nene e pñisi, la asumña akila lele kare ke, asape “!Parin suñe

kiena ne le Yu lala-oo! Imimi mepatanon ko, memieluar ko!”¹⁹ La amla lakiavio tai, aŋe ƀarina ea, la asumã apiasiria kare naga, akinai tano puna sa naƀa apatanon ke naga.²⁰ Ana pogosia naƀa la akila lele kare naga, ƀisi na aƀarlua kulkota mene nene ƀetan naga, ana amiyen si m̄ana kulsota tai ea, aƀure apano vena asuar naga e lak torovia.

Asuar Yesu ma e lak torovia

Matiu 27:32-44; Luk 23:26-43; Yoane 19:17-27

²¹ Ana pogos naƀa li na mara la asumon Yesu apa ke narui, aŋal yaru tai naƀa naga pa yom̄arua ana naga mial pimi. Yar nene, naga Saemon naƀa sumo naga nae Saerin, naƀa naga arimanane lalua nene Alik-santa amio Ruƀas. Ana aŋareran pania asape naga towe kus lak torovia kiena ne Yesu vano.²² Ana lala asumon Yesu apa atol kunus tai, kiena kia Kolkota, naƀa kana kinasa asape yo naƀa sane puryu na piaƀarin yaru.²³ Pogos naƀa apimi aporu e wos nen kunus nene, ana la sinelan asape ala kuruta namunena va Yesu vena munia. Ana kuruta namunena neƀe ataron was nen suri tai naƀa melkalka sike ea, vena kila tasnena ne Yesu kapulu ga, ve lae manene re, ana pogos naƀa amla pania, yepen mavin munena.

²⁴ Ana la atarar Yesu, asuar naga ma e laki torovia. Pisi na, la akuan taes, vena alual li ane war m̄ana kulm-rae tai, a ane war tai.²⁵ Ana pogos naƀa amligan pa Yesu ma e laki torovia, naga kolulagi, maran mrae ovari.²⁶ Ana li na mara nae Rom la asiri navisawalena tai, naƀa pisawal suri naƀa nasumonena kiena ne le Yu la sinelan asape awem̄ar naga vanonia, naƀa sape “Yaru nene naga pe ƀarin suƀe kiena ne le Yu lala.”

²⁷ Ana e pogos m̄ena nene, yar navinauena lalua, asuari la m̄ena ga e laki torovia sa ke Yesu, apisirilua tai e lepas na ƀamarua, taƀena e lepas na ƀaŋeli.²⁸ E mrapa ne nanene, lala akila visena marua tai na Tusi Wa pimi kate sina ga, naƀa sape “Amligan naga m̄eke amio yar na kilaroen navisaluena.”

²⁹ Ana yaru la naƀa asumã amiyaloro ke apa e yo nene, asisilin ƀarila, apisalele kare ke Yesu ƀisa, la asape “! Koe, suwala! Ko nene nanua sumo ko opisa osape ko okilia owe plan Yunã Wa m̄ana ne Ntewa, ana ovisirilua sina ga e legiena ve telu ga, ana sanape narui?”³⁰ ! Pon ko ga otamalia ko lia, ovetan laki torovia naŋa, otom tano!”

³¹ E ƀelaga m̄a nenaga nene, yerkawa kiena ne ƀarin yaru wa lala, amio navianena na visaluena, asumã apitalia kare ke naga

pañisi, asumña apisa ke, asape “!Pona naga tamalia mña yaru tañena la moki rui, ana naga mninue kare si narui, tapatete si tamalia naga yo!
 32 ?Ana naga pe kieta Navisaarena, a pe ãarin suñen ita le Yu lala, pona peraga? Popon naga vitom tano e lak torovia nanagane, vena ita tevisu sane naga pe lelaga, vena telelaga e naga.” Ana la lua mñena naña asuar la e laki torovia amio Yesu, la mñena ga amiyakol sina visena viowa kiena ne la nene pania.

Yesu mare

33 Ana kolipae ga, yemalolo pimi kalo yo punu ga e yo nene, pano tol mrae telu koyepakilavi.
 34 A e pogos nene, Yesu mlokai keviu e kiena visena ruru naapo, sape “?Eli, Eli, lamña sañatani?” naña kana kinasia sape “?Kiau Ntewa, kiau Ntewa, sanape na omliganu nemñeke sanene?”

35 Ana yeririna lañas naña asumñalu asike e yo nene, apisusu suri la nene, ana amlogepal mñaagena kiena ne Yesu nene, ana la asape “Amloge ke ne, yaru nene pio ke yermarua Elaisa, vena imi iila naga yo?”
 36 Ana veraga ga, lala yaru tai kiriri pimi, ãar lumlum ãasia, taron kuruta namunena naña melkalka pa ea, miyurar te laki tai, kian pa Yesu vena munia, ãisi na

naga sape “!Tesu wa! Tevisulia, pona yoko yermarua Elaisa vitom tamalia naga pona pere.”

37 Ana Yesu mlokai manene sina, ãere maron kiena yalua, marñanu.

38 Ana pogos ke ga nene, pupia kulmrae naña mero-rol tamalele ke e Yumña Wa mña ne Ntewa, naña mono ke yo wa naña pe yo wa pañisi, purña pito ga lika, siar metava pito tol tano.

39 Ana yerkawa kiena ne li na mara lala, naña pisusuar mña Yesu, pogos naña pisu ãere maron kiena yaluaena, milan pañisi, pisa sape “!Aulai, yaru nene naga pe Narina kemua Ntewa lelaga nañane!”

40 Ana sira lañasia naña atataveve ke Yesu asike e yo nene, asumñalu asike laa perina sane, asumña atamaren ke kiela navianena. E lala nene, la telu naña kiela kia la sanini, Maria tai naña sira nae Maktala, Maria mñena naña anenane Semes kokan amio Yoses, a sira mñena tai, Salome.
 41 Naga lala naña pogos naña Yesu sike garu Kalele nanua sumo, la asumña ataveve naga, amiila mñena naga. Ana sira mñena la moki asumñalu asike e pogos nene, naña lala mñena akom garo Kalele ataveve Yesu apa ma Yerusalem.

Yosop sin Yesu

Matiu 27:57-61; Luk 23:50-56; Yoane 19:38-42

16

Puluve korena ga mēke

Matiu 28:1-8; Luk 24:1-12; Yoane 20:1-10

⁴² Ana legiena na Praere, naga pe legiena na kilaru-ruen sur la punu ga suñate Legiena Wa peni, ana pogos naña lavis mrae vito tano, ⁴³ yaru tai nae Aramatia, kiena ki Yosop, naga pe marau re poli, kila kiena sitomena mārera po, pa suñalu se marana ne Paelat, piun tania sape kus tasnena ne Yesu. Naga mārera pan pañisi nakilaen ve sanene, komin naga pe pupia yar tai na kansel kiena ne le Yu lala, naña yar la akilia ruru naga po, pe yar mēna tai naña sinenan ke navesuñenena kiena ne Ntewa naga vim.

⁴⁴ Ana Paelat mminue ga sape e pogos nene na Yesu mare rui po pere wa, pio kiena yar kawa na mara pimi piun tania. ⁴⁵ Pogos naña mloge sape Yesu mare rui, ana tamān tasnena Yesu imi va Yosop.

⁴⁶ Ana Yosop temare ga mēna puluve viu tai pñisi ga na wa, pa pul kulmrae nowo tai, pa akuslua tasnena ne Yesu petan laki torovia, am-luluwoia ana la apa amligan mēke e mēna puluve nañane. Ana amelilivin pupia kilavaru pimi mono pulusia, ana la añasuñe la si apano.

⁴⁷ Ana Maria lalua nene, tai naña nae Maktala, amio tañena nene anenane Yoses, lalua mēna apimi apisu yo naña tasnena ne Yesu mēke ea.

¹ Ana pogos naña Legiena Wa p̄arovia, ko yepekilavi e Pog Orai, Maria nae Maktala, amio Maria naña anenane Semes, amio mēna Salome, la telu nene apito apul suri la naña ponos taninu vena awar va avilan e yepena ne Yesu. ² Ana e Sante kolulagi wa ke ga wa, sa naña mrae siar molue, la teloka amiyal apa e puluve nañane. ³ Ana pogos naña amiyal ke apano, apiuyun ke sina ga pan la, asape “?Ana visae tetol ma ne, ane kilia melilivin lua pupia kilavaru naña mono ke pulus nena van ita, vena tekilia teva loyuma?”

⁴ Ana pogos naña la apimi lavisin yo nene, apisu ga pupia kilavaru nañane, yaru tai melilivin lua pa rui. ⁵ Ana la apa loyuma e puluve nañane, amilan yaru mēe tai totano teke e lepas na p̄amarua, miyen ke kulmrae naña miyuwowo pañisi, ana pogos naña apisuia, sinela kurkur, miyuyuwawa panoo pañisi. ⁶ Ana naga pis pan la, pisape “!E, ve amarau re! In na nekilia pa rui naña amiu apimi e yo nini vanon Yesu nae Nasaret, naña amēar naga e laki torovia. Ana naga suñalu mali si rui, pe mon re si e yo nini poli. Aimi avisulia! Na nene yo naña amligan

tasnena m̃enea. ⁷ Ana ato vilaga, avisawal va Pita amio nalogena tañena lala, avisave yoko Yesu naga sumo vito ñes garo Kalele, ana ñisi na la m̃ena monar asiraun atove, avisu naga e yo nañani, sa naña naga pisaar pan la sumo rui.”

⁸ Pisi na la apitañili, apetan puluve añure apitove, komin la amilan suri la nene pano-o pañisi, amiyuwawan ga rui. Ana la amarau m̃ena pañisi, kila sanene la apitove na pe apisawal re si pan yaru tañena la poli, apa mesmes puna ne nalogena lala.

Yesu m̃alivin Maria nae Maktala

Matiu 28:9-10; Yoane 20:11-18

⁹ Ana Yesu mal sina e Pog Olua kolulag wa ke ga wa, naña pe legien ñesia na wik. Pisi na naga m̃alivin ke la naña atavevea, ana naga naña m̃alivin ñesia, Maria nae Maktala, naña nanua sumo pile plan ninuna viowa la olua petania. ¹⁰ Pisin naña Maria pisu Yesu, pa m̃alivin la naña asum̃a ataveve ke naga sumo, la asum̃a amloge ke piowa atag ke ga wa, naga pisawal pan la pisape Yesu naga mal si rui. ¹¹ Naga pisa ruru pan la pisape naga pisu Yesu e kilamarana rui, ana la pe amlelaga re e naga poli.

Yesu m̃alivin kiena nalogena la lua

¹² Ana siraun sina, e pogos tai nalogena la lua apetan Yerusalem amial apa ke apa sane, ana Yesu m̃alivin la. Lalua apisu sane yepena pe tañena, pe sa re si nanua sumo poli, ¹³ ana pogos naña apisu pae ñisi, lalua apilon la sina añasuñela, apitove apisawal sur nene pan lala tañena lala, ana yam si tai lala tañena la nene pe amlelaga re e sur nene poli.

Yesu m̃alivin kiena nalogena lala

¹⁴ A siraun sina, Yesu m̃alivin kiena nalogena la lualima taaga pa taaga, e pogos tai naña atotanon ke kinanena. Ana naga pislĩ m̃a pan la, komin naña pe añasine ruru re naga poli, komin sinela la m̃arera pañisi, kila na la pe amlelaga re e visena kiena ne la naña akirawal naga mali si rui. ¹⁵ Ana Yesu pisa pan la, pisape “Nanagane na monar avano, aliureure amiu e yo punu ga e yomarava nini, monar alogon kiau lologena wo van yeririna la punu ga. ¹⁶ Visae yar tai naga loge, ana lelaga ea, siraunia tol wii nakeena, yaru nene yoko tol malena, a visae naga naña ve lelaga re, ñisi na Ntewa visaar marena vania. ¹⁷ Ana la naña yoko alelaga, ñisi na kile la asike e la, sa naña la avile plan yermare la e puriukawaena na kiau kia, ana avisin m̃ena visena

taṣena lala, ¹⁸ a sa pogos tai auarar loṃara tai, ana yoko woga ga, a visae amun sur tai naṣa monar amarenia, ana sur nene taṣatete kila sur tai van la, ana yoko ali-gan limala la e inanena lala, ṣisi na aloge wo sina ga.”

Yesu ṣasuṣe si pa ma e peni

Luk 24:50-53; Yuṃaena 1:9-11

¹⁹ Ana pogos naṣa kieta Suṣe Yesu pisa pa visena la nene pan la, Ntewa ṣurelua si naga pa ma e peni, mli-gan naga totano e lepas na ṣamarua puna. ²⁰ Ana kiena nalogena la amial tetai, apa amlologo e yo punu ga, ana aṣisu sane Suṣe naga miyuṃae ke amio la, kila ke kile la moki pan la, vena kilaen yeririna la avisu kilia sane kiela visena la pe lelaga ga.

A sunena nene maro ga e nene.

Lologena Wo Kiena Ne Yesu Kristo Naña LUK Siriyuia Visayuena Na Tusi Nene

Kompasinen suniena plas na tusi nini

Tusi nini, “Lologena Wo Kiena Ne Yesu Kristo Naña Luk Naga Siriyuia”, naga pisayu Yesu sape naga yaru naña Ntewa pisayu pa lus nae Israel lala nanua rui, sape yoko naga imin tamalia la, a vena tamaliena yeririna makega na yomarava. Luk sirilua pa e kiena tusi nini, sape Yesu nene, Ninuna Ntewa namava ke narui pio naga vena “visawal kiena lologena wo va la naña limala korena ga.” Ana komin sur ne nanene, lologena wo naña Luk siriyuia, pulen suniena la naña kilologia sape Ntewa sinena miyee yaru la naña asike e nalo-geviowaena.

Suri tañena la moki naña toñal e tusi nini, nane suniena kiena yaru la naña amloge po pona akekara. Suniena la moki na sanene sike e marana na keviu taaga [1] naña pisawal sape yoko Yesu imi, a e marana na keviu lua [2] naña pisawal sanape naña Yesu paeme.

A e mēna e marana na maro, yaru la akekara pañisi

kome naña Yesu mal sina, a ãasuñe si pa mae peni.

Yaru naña siri tusi nini naga siri si tusi tañena tai naña kiena kia “Yumñaena Kiena Li Nalologena Lala”. E tusi na lua nene, naga pisawal suniena lala naña moluwe marea e pogos naña Yesu pa mae peni. Suniena la nene pisa lologia sape yaru la naña amlelaga e Yesu Kristo apimi moki liluwe, ana asuñña apa apisawal kiela lelagaena nene e yo tañena lala.

Tusi nini “Lologena Wo Kiena Ne Yesu Kristo Naña Luk Siriyuia”, komsus orelu sike ea. E kompāsna na lua, amio na orai nena, pisawal suniena lañas la naña sike e ga e tusi nini, ana pe su re e tusi tañena lala naña Mati, Mak a Yoane la telu asiriyuia.

Naga suniena la naña pisayu navisi lala naña amiyau, a suniena naña pisayu yaru na visuaren sipsip lala naña apimin apisu Yesu e pogos naña naga paeme, amio mēna suniena naña pisayu pogos naña Yesu pa e yuñña mēna Ntewa pogos naña naga pe yaru viu ke ga wa, ãakaiwa na yaru wo nae Samaria, a ãakaiwa na ninis naña kovio.

Pupia suri mēna lañasia naña Luk pisayu kañarania e tusi nini, naga sanini. Naga pisayu lotena, a Ninuna Wa, a yo kiena sira lala loyuniña

e yuññaena kiena Yesu, a pisayu naña Ntewa kilia viyewo ita, kilia warplan ki-eta milamulena viowa lala.

Komþasnen tusi la nini

Visena na sumo 1:1—4

Yoane Nakeena amio Yesu lalua apaeme, a lalua akapuru 1:5—2:52

Yuññaena kiena Yoane Nakeena 3:1-20

Yoane kee Yesu, a Yermare taþalia 3:21—4:13

Yesu kila kiena yuññaena e lepas nae Kalele 4:14—9:50

Yesu moluwe Kalele pa ma Yerusalem 9:51—9:27

Legiena maro naña Yesu kila kiena yuññaena garu Yerusalem a e yo la naña lavisin Yerusalem 19:28—23:56

Yesu mali sina a kiena nalogena la apisu naga 24:1-53

Visen þesia

¹ Inu Luk nesiriyu suniena nini pan ko, Yerkawa Tiopilas. Sa naña ko okilia þisi rui, yaru la moki liu naña asiri suniena na suri la nene komþas rui naña añañmalivin ita e kas laþas þaro rui. ² Suri la nene, ita pe tepisu mesmesun re e kilamarata poli, ana la naña apisuia, siar e purþesa, a la na sa naña la ape li Nalologena Wo þesia, la ke narui la apisawal ruru lelein pimi pan ita. ³ Ana siar nakonua rui, nesuñña nepisusu ruru ke maki taþena la naña la asiria, a nesuñña nemla ke visena na suri la nene,

ana nepisu sane popon visae nekilali nela sunien taþena la nene komþasa, nesirikolia vena aim sane tus wo tai naña taveve ruru narin mrapa lala na suniena nene.

⁴ A nane nesiri sike na rui, a nekekaran naña neligan imi ve kionña, vena ouloyuia, okilia ovisu kilalea sane suri la naña osuñña omloge ke rui, la amesmes ga a ape lelaga, la sa naña kiau tus nini pisawalia.

Navisi pimi pisawal pa Sakaraea pisape yoko naga war Yoane Nakeena

⁵ Suniena nena naga siar sanini, sape: E pogos naña Þarin Suþe Erot naga pe suþen ke lepas nae Yutea, yaru wa tai, naga pe namratava kiena ne Apisa, a naga þere sira tai naña naga mñena molue kome lus kiena ne yaru wa lala, nane e namratava kiena yermarua Eron, wenla Mosis nanua sumo ne. Yaru nene kiena kia Sakaraea, a wona kiena kia Lesipet. ⁶ Ana lalua nene kiela malena mesmesu po paþisi e navisuena kiena ne Ntewa, naña la asuñña amlogear kiena navisaluena lala, a asuñña akila ke þelaga la naña mesmes silaga, pe akilalu re tai poli. ⁷ Ana suri ga tai, lalua pe narila re tai poli, komin sira naña Lesipet naga pe luññalumña ga, a nanagane lalua apimi ape yermarua laa rui.

⁸ Ana e pogos tai, pe pog na þegas kiena ne Sakaraea naña monar ava

akila kuṗaṗaena e Yum̃a Wa m̃ana ne Ntewa, sa naṗa ṗegas tai kila e wik tai, ṗegas tai kila e wik tai. ⁹ A silaga, pogos naṗa akila sanene, la monar akila sa naṗa amlil m̃apila, vena alual yaru ai naṗa yoko naga kila pupia yum̃aena navaen loyum̃a e Yo Wa na Yum̃a Wa nene, vena sikapen ponotaninu na wonta naṗa sike ne. Ana e poglis nene akila sanene, a kia kiena ne Sakaraea naga pa metava, asape naga narui naṗa va kila yum̃aena nene. ¹⁰ Ana e nena e pogos na sikapen ponotaninu nene, naga pa loyum̃a vena va kila, a pupia ṗina na yeririna lala asike vanua, asum̃a amlen m̃aga.

¹¹ Ana pog naṗa Sakaraea pa loyum̃a, ana milan kare navisi tai kiena ne Ntewa naṗa m̃alivinia, sum̃al ga sike e lepas nen wonta naṗani lepas na ṗamarua. ¹² Ana pogos naṗa Sakaraea pisu navisi naṗani, naga mñinue kare narui sape aña kila ve sanape na wa, naga marau paṗisi. ¹³ Ana navisi nene pisa pania, pisape “Sakaraea, ve omarau manene re. In na nepimin ga nesape nevisawal van ko, Ntewa mloge kiamiu leniena amlua rui, a yoko wom̃a Lesipet, ṗisi na war narum̃a na mom̃e tai, a pogos naṗa vaeme, yoko oligan kiena kia Yoane.

¹⁴ “Pogos naṗa vaeme, yoko akekara vaṗisi, aloge wo, ana ve amiu re ga,

ana yaru taṗena m̃ena lala akekara vaṗisi.

¹⁵ “Sisi nene, yoko imi ve yerkawa tai kiena ne Ntewa, a naga sane ve yaru wa tai, ṗisi na naga valia kuruta a wii m̃arera m̃ena lala. Siar e pog naṗa naga teke e lom̃eṗena anena wa, ana yoko Ninuna Wa ulen naga vaṗisi. ¹⁶ Yoko naga ve yaru tai naṗa ṗisi na vilon le Israel la ve moki awasuṗe la si puna Ntewa na Mava, kiela Suṗe. ¹⁷ Yoko avisu naṗa ninuna a nam̃areraena naṗa se e Navisawalena Elaisa sumo sike sina ga e naga maran ve taaga, komin naṗa naga imi sumo, vena visawal visave ve ve piavire Navisaarena naga imi raunia. Yoko naga vilon sinen ata lala vena asitomyu ruru sina ga narila lala, a yoko vilon sitomena kiena ne li nakilaroen navisalu-aena lala vena ataveve si ṗelaga naṗa pe manmarua a memes ruruia. E mrapa ne la nanene narui, ṗisi na naga kila ruru ṗegas nen yeririna la tai va Ntewa, vena asum̃ate naga imi m̃alivin la.”

¹⁸ Ana Sakaraea mloge visena la nene, ana pisa pa navisi nene, pisape “Ei, ve ovisa re sanene. Taṗatete ve sanene, komin imimi lua na mrae pito tano rui.”

¹⁹ Ana navisi naṗani pisa ke sina pania, pisape “Peraga, yoko ve sa ga nene. In na Navisi Kaṗriel nini, naṗa silaga nesum̃al luen

ga nesike e marana Ntewa vena nowar kiena visena, ana naga mligan inu nepim puña vena nevisawal lologena wo nini van ko. ²⁰ Ana pogos naña nepisawal pan ko, ko na pe omlelaga re e poli, ana nevisa van ko sanini, yoko ove puru, ana p̄isi na osuña ga sanene imi tol pogos naña ovisu suri la nene imi m̄alivin ko nena ga e kana pogosia.”

²¹ Ana pogos naña navisi pis ke sanene pa Sakaraea, yeririna la asuñal asike vanua na wa, asuñate m̄a pano-o, ana kiela sitomena lua narui, asape “Vanon ya ne naga pa loyumuña, kila malion manene suri sanene.” ²² Ana siraunia na, molue sina, ana la apisu naña naga pe pis re si pan la poli, ana la apisu kilale asape naga sike loyumuña, naga pisu suri tai, nane kila naga sanene. Ana naga pis ga e limana pan la, naga pe puru ga mom̄a ga. ²³ Ana suña kila kiena yuñuena e Yuña Wa m̄ana ne Ntewa, pano-o kilamake kiena pogosia, ana p̄asuñe si pa m̄ana.

²⁴ Ana asuña sanene pano-o, pe piavi re poli, wona sena, ana pogos naña naga mloge sane m̄eñena sanene, naga pa mom̄a ga m̄ala uña sanene pano-o tol kupario lima. ²⁵ A e pogos nene, naga suña pisa sanini, pisape “!Ntewa kila po pan

inu pañisi nene wa! Sumonia, yaru la asuña apisu memawan inu komin naña pe noñar re sisi poli, ana nanagane Ntewa pisuveve inu, sinena miye inu, ana mlalua memawaena na kiau lumalum̄aena nene rui.”

Navisi pimi pisawal pa Maria pisape yoko naga war Yesu

²⁶⁻²⁷ Ana Lesipet sena tol kupario orai rui, ana Ntewa pitetalia kiena navisi nañani, Kañriel, vena vito visawal kiēna visena tai va sira m̄ee tai, kiena kia Maria, naña naga sira m̄ee tai na pulkumali nae Nasaret e lepas naña Kalele. E pogos nene, la apisaar Maria rui vena va talopa amio yaru tai, kiena kia Yosop, naña naga molue kome lus kiena ne Parin Suñe Tepet nanua sumo, ana Maria pe pa su re amio naga poli wa.

²⁸ Ana navisi naña Kañriel pimi m̄alivin Maria, pisape “O, Maria, Ntewa sitom ruru ko nena pañisi, naga suña pisa ruru ko, sike kemua amio ko lelaga.”

²⁹ Pogos naña Maria mloge visena nene, naga sitom pañisi, sape visuvevelia, pisape navisi nene pisa po pañisi, ana kana kinas sanape. ³⁰ Ana navisi pis sina pania, pisape “Maria, ve omarau re. Ntewa kekaran ko ga, ana yoko kila pupia navisa ruruena tai imi e kiom̄a malena. ³¹ Nanagane, yoko osena, vano-o owarwal

narumã na yermene tai,
a visae naga vaeme pae,
monar osikia kiena kia Yesu.

³² Visena Wa nanua sumo
naga pisayu pa narumã nene
rui, naña pisape

‘Naga yoko ve yerkaawa, a
kiena kia,
“Narina ne Ntewa na mava,”
a Supe Ntewa yoko kila naga
imi ve ãarin supe tai
naña kus lelen repina
marua nene Parin
Supe Tepet nanua,

³³ ana ãisi na naga ve
supen la naña amolue
e mratava mãana yer-
marua Sekop, nane
le Yu ne la ne asike
nanagane, a la naña
yoko aim sirau,

a kiena nasuþenena nene
yoko taþatete ãisi po-
gos tai.’ ”

³⁴ Ana Maria milan visena
nene paþisi naña sape yoko
naga war sisi, ana naga piun
tan navisi nene, pisape “?
Ana suri nene yoko m̃alivi ve
sanape ne, komin naña in na
pe nesu re nemio wou nene
poli wa?”

³⁵ Ana navisi pisatamea,
pisape “Ninuna Wa yoko
naga vitom e ko, a
nañareraena kiena ne
Ntewa na mava ãisi na kalo
ko, ana yoko osena. A komin
naña yoko ove sanene, ãisi
na avisave sisi wa nene naña
yoko owaria, naga ve narina
ne Ntewa.

³⁶ “E kionã navisuena,
opisu suri nene sane m̃arera
paþisi naña yoko ve sanene,
ana popon ositomli anomã
sira marua Lesipet nene.

Asumã apisu ke naga asape
naga taþatete nena ga war
sisi narui, ana nevisa van ko,
naga pe sira marua rui, ana
nanagane, kiena kupario
orai narui. ³⁷ Ositomlia, sa
naña Ntewa pisa pa sira
marua Sera nanua sumo laa
rui, e lepas na puna, pe suri
re nena tai naña naga kila
þele poli.”

³⁸ Ana Maria pisatamea,
pisape “Lelaga kemua naña.
In na nepe sira m̃ee na
yumãena kiena ne Ntewa ga,
ana netañan inu ga vena
naga kila suri la nene imi ve
lelaga e inu ve sa ga naña
naga sinenania, sa naña opi-
sawal pan inu.” Ana navisi
nene purmatania.

Maria pa m̃alivin Lesipet

³⁹ Ana Maria sumã sitomãl
ke visena lala kiena ne
navisi nene, ana sinenan
manene paþisi sape va visu
anena nene, naña Lesipet,
ana pe piavi re poli na, mli-
gan kiena yo, mial kawa
pa e pulkumali naña Lesipet
amio wona Sakaraea lalua
asike ea, nane e lepas na
kunas lala nae Yutea.

⁴⁰ Ana Maria pa tol m̃ala
yumã, pa pio Lesipet. ⁴¹ A
poglis naña Lesipet mloge
kilale pulgo Maria naña pis-
pania, mloge narina naña
teke e naga kulul keviu. Ana
Ninuna Wa pitomi e Lesipet,
pitomi pule ea, ⁴² ana Lesipet
pio manenea, pisape “! O,
Maria, Ntewa pisa ruru ko
keviu paþisi, taulu make sira
la punu ga, a yoko pu-
pia kiena navisa ruruena

sike mēna e mrasnomā naŕa yoko owaria. ⁴³ In na pe nepe sira wo re nena tai poli vena anenane kiau Suŕe imi yal li inu sanene, ana nepisu sane po pan inu paŕisi. ⁴⁴ A kiau sisi tomtom pisu kilale ko, kekara paŕisi, komin pogos nena naŕa memloge ŕesan pulgomā, naga kulul paŕisi e lomēŕeu. ⁴⁵ Ita lua tekekara na tekekara, komin temlelaga e visena kiena ne Ntewa, a yoko imi ve lelaga van ita ve sa nena naŕa naga pisaar pan ita.”

Maria mieluar Ntewa e yauena tai

⁴⁶ Ana e poglis nene, yauena kiena Maria tai sanini, sape

“Sineu mieluar Ntewa keviu,

⁴⁷ ninuu kekara paŕisi
pa kiau Suŕe Natamali-
aena,

⁴⁸⁻⁴⁹ naga pisu inu nesike
taño
nepe sira na kiena
yumāena tai,

naga pe Ntewa naŕareraena,
naga sitomāl inu, kila po pan
inu.

Teras lelei la naŕa aim
sirau avisayu inu, as-
ape ‘Sira nene, Ntewa
pisa ruru naga keviu,’
nepisirlua kiena kia wa.

⁵⁰ Sinena miye la naŕa ap-
atanonia,

teras na sumo, na sirau.

⁵¹ Naŕareraena na limana
kila suri moki, naga
mlipureure la naŕa
ape ŕarnāraera, kila la
apa tetai.

⁵² Kila plan ŕarin suŕe e
lelela la, pisirilua la
naŕa sitomena su ga
taño.

⁵³ La naŕa viso kar la, pagan
ruru la,

li na suri moki, mēne plan la,
limala korena ga.

⁵⁴⁻⁵⁵ Kila sa naŕa pisaar pa
repita lala,

pimi miila ita kiena le Israel
lala.

Pe sinen ŕesan re Epraam
poli, sinen ye luen ga
kiena piaparavi, vano-
o ve uro re.”

⁵⁶ Yauena kiena ne Maria
nane ŕisi e nene, a naga sike
amio Lesipet pano-o tol ku-
pario telu, siraunia ŕasuŕe si
pa mēna uŕa.

Yoane Nakeena paeme

⁵⁷ Ana pimi tol ruru pogos
na narina ne Lesipet vaeme,
ana paeme pe momē. ⁵⁸ Ana
pogos naŕa namratava puna
ne Lesipet amio la naŕa
asike lavisinia amloge suri
nene, akekara paŕisi amio
naga e pupia sinewo kiena
ne Ntewa naŕa pimi pa-
nia, naŕa nanua sumo naga
pe lumālurŕa ga, ana nana-
gane narina nasumo nane
paeme ne. ⁵⁹ Ana pogos
naŕa sisi nene kiena legiena
olua, apimin akila naga pe
ŕaviu. E pogos nene, la
sinelan asape asikia mēna
kien kia, Sakaraea, sane kia
kiena ne arimana, ⁶⁰ ana
anena pisa luŕaria, pisape
“Peraga, kiena kia, Yoane.”
⁶¹ Ana la apis pania, apisape
“Ya ne sanene? Namratava

pumã na pe amligan re kia tai sanene e poli!”

⁶² Ana apisi ga e limala pa ariman sisi nañani, vena aviun tania avisave naga sinenan sape aligan kia nape e narina nene. ⁶³ Ana Sakaraea pis ga e limana pan la, pisape ala maki tai vania, ana siri ea, pisape “Kiena kia, Yoane.”

Suri nene kila la nae yo nene amilan pañisi, ⁶⁴ a e mēna e pogos nene, purmenena ne Sakaraea kulul sina, kilia pis narui, ana mieluar Ntewa.

⁶⁵ Ana yaru punu lala na lepas nene amloge suri nene, amilan kare pañisi, a suniena nene pa laa narui tol pulkumali tañena lala na lepas na kunus lala nae Yutea. ⁶⁶ A la naña amloge, asitom pañisi, komin naña la apisu kilale asape limana ne Ntewa sike amio naga, ana la asumã apiuviun pan la asape “?Nin sisi wa nene yoko naga ve sanape ne?”

Sakaraea pisawal visena naña Ntewa pisa pania

⁶⁷ Ana Ninuna Wa pitomi pule e Sakaraea arimanane sisi nene, ana naga pisawal sanini, pisape

⁶⁸ “Teieluar kia kiena ne kieta Ntewa,

Suñe nae Israel, pitomi pun ita, pul plan ita,

⁶⁹ maplarar kana keyowo, molue e piaparavi na kiena yaru na yunãena Tepet,

naña yoko tamalia ita.

⁷⁰ Nanene kiena navisaarena nanua, navisawalena apisawalia, asape

⁷¹ Naga urelua ita vetan limana ne nasinekar lala,

⁷² Tañatete mēna sinen ãesan naviranarena amio repita lala,

sinena mie la ke na wa,

⁷³ nane navisaarena mārera amio repita Epraam,

⁷⁴⁻⁷⁵ Ntewa pisaar pisape tamalia ita vetan limana ne kieta nasinekar lala,

vena ve temarau re sina, teve yaru wa,

temesmesu e marana,

teyũãae vania e legiena punu ga e kieta malena.

⁷⁶ Nin naruu, avio kon Navisawalena kiena ne Ntewa na meta manenea, osumon Suñe okila ruru kiena mrapa.

⁷⁷⁻⁷⁸ Yoko ovisawal sane Ntewa sinena ye kiena yeririna lala,

ve sinewo van la,

viewo kiela mlamulena viowa lala, tamalia la.

Yoko Ntewa kila kienã narin yomerarava ãesa na kolulagi va metava van ita,

⁷⁹ vitom tegoli ita naña tesike e yemalolo,

naña ninuna na marena kalo ita rui,

a vitom vivagali mrapa na suñare vena teyaloro ea.”

Yoane Nakeena kapur pa metava

⁸⁰ Ana pogos naña kas la pimi ãaro pano, Yoane nene

kapuru pimi keviu, a kiena sitomena marua ruru po, a suñalu m̄arera suwa wa se yuñæna kiena ne Ntewa. A naga pa sike e yokorena, vena va tol pogos naña naga monar vaeme e marana ne le Israel lala.

2

Yesu paeme

Matiu 1:18-25

¹ Ana e pogos nene, þarin suþe kiena ne le Rom lala, naga kiena kia Sisa Okastat. Ana naga pisawal pisape monar aulo yeririna punu ga e purvanua make ga naña asike vatanon kiena navisuarena. ² Yuñæna nawuloen yaru la nene, la akila þesania, a e pogos naña la akila, yeririna kiena ne Sisa tai naga pisuar ke pupia lepas nene Seria, a kia kiena ne yerkawa nena, naga Kuarinias. ³ Ana naki-laen yuñæna nene, apisape yeririna punu ga monar ava si e kiela yo lala, vena akilia asiri ruru kiela kia, a aulo ruru la.

⁴ Suri ne nanene kila Yosop molue e pulkumali nene Nasaret, naña naga sike ea, naga nene e lepas nae Kalele, ana naga pa ma metava e pulkumali nene Petleem, naña yermarua Þarin Suþe Tepet naga paeme e nanua sumo, naga nene e lepas naña Yutea, komin naña Yosop naga molue e lus kiena ne yermarua Tepet nene.

⁵ A Yosop þere wona naña Maria lalua apano, naña e

pogos nene, naga lavisin ke naña kana sisi vaeme narui. ⁶ Ana lalua apano, a pogos naña asike Petleem wa, Maria m̄inu sane kiena pogos na waren sisi pimi narui. ⁷ Ana Maria þarlua þesan kiena momie nene, a naga mliluwo ruru e kinakinan nen kulmrae lala, ana pe m̄ana yo namonena po re poli, komin lalua akilali asape ava e yuñæ m̄ana wolawa lala, ana pule rui, ana Maria m̄ligan ga sisi tomtom nene m̄ene lelen navaganen surmali lala.

Navisi lala añalivin yaru navisuaren sipsip lala

⁸ Ana lemalo nene, yaru navisuaren sipsip laþas asike amio kiela surmali lala, e yo na vilumini vanuan ga Petleem nene. ⁹ Ana navisi tai kiena ne Ntewa pitomi tano pula, a naurarena kiena ne Ntewa tegoli make yo nene sane pupia kapi tai, kila yaru la nene amilan paþisi. ¹⁰ Ana navisi naþani pis pan la, pisapenua “Ve amarau re. In na noþar ke visena tanea tai ne navisaen van amiu, naña kilia kila yeririna make ga aloge won vaþisi. ¹¹ Yemalo ga nini, e pulkumali kiena ne Þarin Suþe Tepet nanua, nane Petleem, nin sisi tai paememare ga na wa, naña yoko naga ve kiamiu Natamaliaena. Naga ke narui pe kiamiu Suþe, naga pe Navisaarena naña Ntewa pisaaria nanua rui pisape yoko ligan imi.

12 “A nanene narui nane kile la sur ne tai nini. Yoko alual nin sisi tomtom nene, naña la akila ve tañena vania. Yoko avisu naña aliluwo ga e kinakinas nen kulmrae lala, a amligan mēke e lelen kinanen kan surmali lala.”

13 Ana veraga ga amilan ga pupia pegas nen navisi tai nae ma e peni apitom asikol navisi nañani. Ana navisi la nene amieluar Ntewa, amiyau apisape

14 “Ma metava ma e peni, asike amieluar ke Ntewa keviu pañisi, a e yomarava nini, suñare sike e yeririna la naña Ntewa naga kekaran la.”

Yaru navisuaren sipsip la apa garu Petleem

15 Navisi lala apisawal visena nene ñisi, apur matan si yaru navisuaren sipsip la nañani, añasuñe la si apa ma e peni. Ana yaru la nene asumã apisasayu ke sina suri la nene pan la, apisapenua “Suwala, ita, tevano. Popon teva garu Petleem vena tevisuli suri naña malivi ga na wa, naña Ntewa pisawal pan ita.”

16 Ana amiyal kawa apano, apa añal Maria amio Yosop, apa akaten sisi tomtom nañani, mēke ga mñana yo e lele navaganen suri mali lala. 17 Ana pogos naña apisu suri la nene ana apisawal visena make ga naña navisi pisa pan la e lepas na sisi tomtom nene.

18 Ana pogos naña yaru tañena la amloge suniena nene, apule mamaga e pupia nailanena tai. 19 A Maria, naga mligan ruru suri la nene e losinena, pe sinen ñesan re poli, sisitoñal luen ga silaga.

20 Ana yaru la nene añasuñela si apa pun kiela sipsip lala, asumã apisirlua ke kia kiena ne Ntewa, a asumã amieluar naga pañisi vanon suri wo la naña amloge a naña apisuia, naña atorokin nena ga visena kiena ne navisi naña pisawal pan la.

Asikia Yesu

21 Ana pogos naña momē nene kiena legiena olua, ana kana pogos na kilaen ñaviu ea. Akila sanene ñisi, asikia asape Yesu, kia nena naña navisi pisawal ñesania, sumon naña Maria mēñenania.

Akus toroun Yesu pa e Yumã Wa mñana ne Ntewa

22-24 A pogos naña Yesu paeme wik orai ñaro pae pano, pogos nakilaen kuñapaena naikikena e Yumã Wa mñana ne Ntewa narui, naga nene komin kuruta kana sira naña ñar sisi. Ana akila kuñapaena nene, taveve Navisaluaena kiena ne Mosis naña pisape “La naña limala korena ga, akilia awe ga lomē ve lua, pona narin kupa ve lua.”

Ana e ke e pogos nene, la akus toroun Yesu pa

e Yumña Wa mñana Ntewa, amiyawawo pania. Suri nene taveve mēna Navisaluaena kiena ne Mosis, naña pisape “Yermēne punu ga la naña apaeme pēsia ape wa, la ape kiena ne Ntewa.”

Yermarua Simion pisu Yesu e Yumña Wa mñana ne Ntewa

²⁵ Ana yaru tai sike e Yumña Wa mñana ne Ntewa e pogos nene, kiena kia Simion. Naga pe yaru nae ga Yerusalem, pe yaru mesmesu tai, a pe yaru mñarera tai e p̄elaga na leniena. Naga suñña suñate ke sape sinenan visu Nasineyeena kiena ne Ntewa nene, nane Navisaarena, imi iila le Israel lala e pog mñarera nene naña asike ea.

Ana Simion nene naga yaru tai naña Ninuna Wa sike e naga silaga, ²⁶ a Ninuna Wa pisawal pa naga rui naña yoko naga tařatete kovio, vano vano-o kilamaraena visu Navisaarena kiena ne Ntewa sumo wa. ²⁷ A Ninuna Wa p̄ere pimi e Yumña Wa mñana ne Ntewa, e nena e pogos naña akus sisi tomtom Yesu pimi, vena akila p̄elaga navisaluaena nene.

²⁸ Ana Simion miařear sisi nene, mieluar Ntewa, pisa potena pania, pisape ²⁹ “Suře Keviu o, nanagane nepisu suri naña opisaar pan inu, pimi pe lelaga rui. Ana suri nene kila suñare pimi e sineu, ana nanagane okilia otañan inu, yaru na kionña yumñaena, nevetan yomarava nini

neimñasu. ³⁰ E ga e kila-marau, nepisu kionña Natamaliaena, ³¹ naña omligan pimi e maran yolai lala na yomerava, ³² sane kapi tai na kipian koena van yeririna tařena lala, a yoko aieluar imimi kionña le Yu lala, komin kiamimi naurarena nene Yesu.”

³³ Ana Yosop amio Maria lalua amilan visena kiena ne Simion nene pařisi naña pisayu Yesu, ³⁴ ana Simion pis ke sina ga, pisa ruru la, ana pisa pa anena Yesu, pisape “Ntewa mligan sisi nene pimi pan ita nae Israel vena kila ita ve moki teloru, a vena kila mēna ga ita ve moki tesuñalu sina. Ntewa mligan naga pimi sane kile tai, ana yokorena yaru ve moki naña avisa kare ga naga. ³⁵ Ana ve sanene, yoko naga kila kiela nasitomwanena la nene añalivi e yometava.

“Ana e lepas na puña, řisi na naloge viowaena yur losineña sane playu na mara tai, yokorena sineña worovia komin suri la naña yoko imi mñalivin naruñña nini.”

Sira marua Ana pisu Yesu e Yumña Wa mñana ne Ntewa

³⁶⁻³⁷ A sira marua tai naga mēna teke e poglis nene, kiena kia Ana, naña naga pe navisawalena tai. Ana nene, arimana Panuel, naña molue kome lus kiena ne Aisere nanua sumo. Naga talopa pogos naña pe sira mēe ke ga wa, ana naga sike

amio wona na yermene tol kas olua ga, ana wona nene mare tania. Naga pe letano ga sanene, pano-o tol kiena kas lualima orelu pa vari.

Naga pe sira tai naña silaga sulueen ga e Yuña Wa m̄ana ne Ntewa, naña sum̄a pa ke e pogos na lotuena na kolulagi lala pa tol na yepekilavi, a silaga naga monsilu ga vena len.

³⁸ E poglis nene narui, pimi lavisin la, mlen, pisa potena keviu pa Ntewa vanon sisi nene, a siraunia, molue pano sum̄a pisayu Yesu pa yeririna la naña asun akiravan m̄ate ke asape Ntewa imi tamalia Yerusalem, ana Ana pisawal ruru pan la, naña kiela Navisaarena pimi rui.

Yosop la añasuñela si apa Nasaret

³⁹ Pogos naña Yosop amio Maria akila suri la nene sa naña Navisaluaena kiena ne Ntewa pisa p̄isi narui, ana añar Yesu añasuñela si apito garo kiela pulkumali nene Nasaret, lepas naña Kalele. ⁴⁰ A nin sisi nene kapur pimi keviu, kiena sitomena pimi pe manmarua ruru po pañisi, a apisu naña Ntewa miila naga vena naga kila sur punu ga wo e kiena malena.

Yesu pe yaru viiu ga, pian yaru la e Yuña Wa

⁴¹ Ana e kas punu ga, le Yu la asum̄a akila ke kiela pañagena tai, naña

Pañagena na Sitomalen Natamaliaena. A silaga, la naña asike e yo tañena lala, la sinelan manene pañisi vena ava ma Yerusalem akila pañagena nene, a arimana Yesu amio anena, la m̄ana akila ke sanene. ⁴² Ana e kas tai, pog naña Yesu kiena kas tol lualima taaga pa lua [12] ke na wa, apa sina, ana añure Yesu amio la. ⁴³ Ana la akila suri na pañagena la nene pano-o p̄isi, ana yeririna la añasuñela si apa e kiela yo lala. Ana Yesu na pe pa re poli, naga sum̄a ga Yerusalem, ana arimana amio anena pe akilia re poli. ⁴⁴ Lalua asitom ke asape pona naga sike amio la p̄asia veraga e pupia p̄egas na kiela namratava lala a kiela erau lala, ana amial m̄a pano-o tol legiena wetelu tai. Ana e yemalo nene akale Yesu pano-o, ⁴⁵ pe am̄al re naga sike amio la poli, ana apisu sane la monar atayu lala awasuñe si ava garu Yerusalem vena alualia. ⁴⁶ La amial legiena wetelu taaga, apim atol si Yerusalem, akale pano-o, ana e legiena tañena, naña kana legiena na telu na kiela yalena, am̄al ga na wa, apisu teke tano e Yuña Wa m̄ana ne Ntewa. Naga totano teke amio navianena lala nae e yo nene, toña miyagogon ke kiela visena lala, a toña piuviun ke naviuunena la tañ la. ⁴⁷ A la naña asike lavisinia e pogos

nene, la amilan manene pupia manmaruaena a nakiliaena kiena ne Yesu pañisi, amio navisatameen la naña naga sumã mla ke pan la naña apiun ke suri tania. ⁴⁸ Ana pogos naña arimana amio anena apisu naña naga kila ke sanene, amilan pañisi, ana anena pis pania, pisape “Ei, naru! Komin ya ne sinoñan osape okila kare manene imimi sanene? Opisu ke ne, imimi lua makale ko pano-o, pe moñal ko re nena ga, ana okila imimi memloge piowa pañisi wa.”

⁴⁹ Ana e pogos nene Yesu mla navisatameen tai pan lalua, pisa sanini, pisape “? Komin ya ne amiu lua apa akale inu e yo taña la ne sanene? Sanape, amlua pe asitoñal re si sane in na monar nesumã nekila ga yumãena kiena ne kau Ata loyumã e mña yumã poli?” ⁵⁰ Ana navisatameena naña pisa pan la, aminue logekilaleen kana kinasia. ⁵¹ Ana Yesu mligan yo nene, naga pito amio la, ana la añasupe si apito e kiela yo naña Nasaret.

A Yesu su pogaga amio la e yo nene, sumã mlogear ruru la mña silaga. A anena naña Maria sumã sitoñal luen ga suri la nene loyumã e losinena silaga.

⁵² Ana kas la pimi ãaro pano, a Yesu kapur pimi keviu, a kiena manmaruaena amio kiena maruaena sumã pimi keviu laa narui,

a Ntewa sumã pisa ruru naga keviu pañisi, kila yaru la apisu naga po na po, akekaran manene naga pañisi.

3

Yoane Nakeena sike e yokorena, naga mlologon ke navilopuena

¹⁻² Ana kas lañas ãaro pa rui, ana Yoane Nakeena, narina ne Sakaraea, naga pimi mñaliv e yokorena. Naga nene e pogos naña pupia Parin Suñe Taepirias Sisa nae Rom naga pe suñe keviu ke tol kana kas lualima taaga pa lima rui, a e poglis nene na mliganar kiena yerkawa lañas rui, sane Ponses Paelat, naga pisuar Yutea, a Erot, naga pisuar Kalele, a wenla naña Pilip, naga pisuar lepas nae Ituraea amio Trakonatis, a Lasanias, naga pisuar lepas nae Apilin. A e mña ga e pogos nene, lalua naña ape ãar na yaru wa lala asike garu Yerusalem, naga Anas amio Kaeñas.

Ana Yoane sike garu yokorena, ana Ntewa mla visena la pania, ³ ana naga pa make e lepas punu ga na wii nae Yortan, naga sumã mlologon ke pisape yaru la punu ga monar avilopu la, a monar ava e nakeena, ana yoko Ntewa naga viewo kiela mlamulena viowa lala. ⁴ Naga kila sa ga naña Navisawalena Aisea pisa nanua rui e kiena tusi, naña sape

"Pulgo tai sumã pio ke e yokorena, sape

Akila ruru make mrapa kiena ne Ntewa,

vena naga kilia imi m̃alivi e kiamiu malena lala.

⁵ *Yoko kam na monar asinwo make pulpalu lala,*

a monar akilro kunus la su gatanano,

a yo la naña kapinia la monar aim amesmesu ruruia

a yo la naña p̃ilp̃il la monar aim ameri ruruia;

⁶ *ana sanene, yoko yolai la punu ga avisu kiela Natamaliaena naña Ntewa ligania yalin la e mrapa nene imi m̃alivin la." Ais 40:3-5*

Yaru la apim puna Yoane

⁷ *Yumãena kiena ne Yoane, naga mlologon sanene narui, ana pogos naña p̃ina la moki amolue apa e yokorena vena naga kee la, naga pis m̃arera pan la, pisa sanini, pisape "Kam na sa ga lom̃ara la naña amaraun kapi tai ana aþure, ana kam na asitom asape akilia aurmatan pupia anen kapi naña Ntewa yoko ligan imi? Peraga, komin pe apilopu amiu ruru re poli wa. ⁸ Ana visae lelaga kemua naña amaraun nakoena nene, kiamiu malena lala monar war mras wo la naña torokin kiamiu navilopuena nene. Ana avisuaria, ve awarwar amiu re sina, sa naña akila*

ke rui, naña asumã apisa ke asape 'E, ita na tesumã poga ga rui, okilakan ita ke narui tepe lus kiena ne Epraam nena naña.' Ana nanene na pe sur re tai nene poli, komin naña visae Ntewa sinenania, naga kilia war kilavaru la nene, yumãen lus kiena ne Epraam la ve moki ea, vena la akus lelemiu. ⁹ In na nevisa van amiu, nevisave m̃ekiavi mon ruru m̃eke rui, vena te plan laki la naña pe aþar re mras wo la poli, akoven la ava e kapi."

¹⁰ Ana pogos naña p̃ina la amloge nene, amarau na amarau, ana apiunia, asape "Ana visae ve sa nene, yoko imimi mekila ve sanape narui?"

¹¹ Ana Yoane pisatam̃e la, pisape "Yar naña m̃ana kul-saket lua, yoko naga monar tam̃an tai va yar naña pe m̃ana re tai poli. Yaru naña kana kinanena keviu, yoko naga monar vion re komþas va yar naña pe kana re poli."

¹² A yar na takis la moki, naña ape li nakila keuiaen nena yar lala, apimin vena Yoane kila nakeena van la, ana la m̃ena ga apisu kilale kiela napiowaena lala, ana la apiun m̃ena ga asape "? Navianena, sanapen imimi, yoko imimi monar mekila ve sanape?"

¹³ Ana naga pisa pan la, sape "Yoko awarpolo vetan yaru lala torokin ga ya naña la monar aulia, ana ve yuve

re, sa naþa akila ke þisi rui.”¹⁴ Ana yaru na mara mēna laþasia apiun sanini pa Yoane, asape “?A imimi, yoko mekila ya?”

Ana naga pis pan la, pisape “Amiu apuarar ke kiamiu suri na mara lala, ana yaru la asumā amaraun amiu paþisi, lala sane visae pog tai sinemiun kiela suri tai, amiu avisa ga ana monar atañania. Ana þelaga nene, yoko monar ve akila re sina. A asumā sinemiun mimi lue silaga asape yerkawa la nene apul amiu ve tokak ga, pona torok ga yo, ana monar akekaran ga narui.”

Yoane sape yoko Navisaarena imi

¹⁵ E pogos nene, le Yu lala asumā asitom ke asape kiela Navisaarena lavisi māliwi, ana amloge visena wo la nene kiena ne Yoane, akekarania, ana naviunena sike e kiela sitomena lala, asumā apiuviun ke, asape “O, pona yaru ne nanene yo, naga pe kieta Navisaarena, pona peraga?”

¹⁶ Ana Yoane sumā pi-sawal ruru merarava pan la, pisape “Peraga. In na nepitom sumo, vena nesumā nekee amiu ke ga e wii, ana yaru taþena tai vim siraun inu. Yaru nene, naga to laa metavan inu, a in na pe netorokin re naþa neluþarlua kulus nen lana poli pona nekila kiena yuñāena taþena. Ana naga

ke narui, yoko kee amiu e Ninuna Wa, amio kana kapi nena, vena kekan plan kororaki lala vetan kiamiu malena.¹⁷ Naga sa naþa naga tarar ke koruak nayuraren wit, vena silsilin plan kana kinas lala. Ve sanene, yoko naga war ruru kinas nen wit la nene va uñā, ana yoko naga koven vinus va e kapi tai naþa taþatete mare pogos tai.”

¹⁸ Nanene narui, Yoane Nakeena mlologon Lologena Wo pa yeririna la sa ke nene narui, a naga sumā pisa ke mēna visena wo naiilaaren taþena la pan la, a visena nakila þegelaena.¹⁹ Ana yar tai pe kekaran re nena Yoane, nane Parin Suþe Erot, komin Yoane sumā pis ke pania vanon naþa naga þerelua sira nene Lerotias, naþa wona wenla, a pis pania vanon sur taþena mēna laþasia naþa naga kila.²⁰ Ana metavan kiena napiowaena taþena lala, Erot sinen kar Yoane pano-o, sumā narui koven pa e yuñā naloge viowaena.

*Yoane kee Yesu
Matiu 3:13-17; Mak 1:9-11*

²¹ Ana pogos naþa Yoane pe pa re e yuñā naloge viowaena poli wa, naga kee mā yeririna la pano-o, ana pog tai Yesu mēna pimi e yo nene, ana Yoane kee mēna naga. Ana pogos naþa Yesu molue e wii, sumā mlen

mãaga, ana veraga ga sina-pane pike, ²² a Ninuna ne Ntewa pimi pe tasa, momã pitomi tano sane lomẽ tai, pitomi pran ea. Ana Ntewa pis ma e peni pitomi pania, pisape “Ko Naruu nene, naãa nepinaia ko paãisi. Kiau sitomena sike ga e ko, nekekaran ko paãisi.”

Repina ne Yesu lala

Matiu 1:1-17

²³ Ana siraun naãa Yoane kee Yesu, ana naga siar kiena yuãaena narui, a e poglis nene, naga kiena kas la tol lualima telu. A lus naãa Yesu molue komea, e lepas na yermene, siar e Yosop, naãa apisu sane arimanane Yesu, pa sanini:

Yosop, naga narina ne Eli;

²⁴ Eli, naga narina ne Matat;

Matat, naga narina ne Livae;

Livae, naga narina ne Melki;

Melki, naga narina ne Sanae;

Sanae, naga narina ne Yosop;

²⁵ Yosop, naga narina ne Matateas;

Matateas, naga narina ne Amos;

Amos, naga narina ne Neam;

Neam, naga narina ne Esli;

Esli, naga narina ne Nagae;

²⁶ Nagae, naga narina ne Mat;

Mat, naga narina ne Matateas;

Matateas, naga narina ne Semein;

Semein, naga narina ne Sosek;

Sosek naga narina ne Sot;

²⁷ Sota, naga narina ne Soanan;

Soanan, naga narina ne Resa;

Resa, naga narina ne Seruãapel;

Seruãapel, naga narina ne Saltiel;

Saltiel, naga narina ne Neri;

²⁸ Neri, naga narina ne Melki;

Melki, naga narina ne Ati;

Ati, naga narina ne Kosam;

Kosam, naga narina ne Elmãtam;

Elmãtam, naga narina ne Ere;

²⁹ Ere, naga narina ne Yosua;

Yosua, naga narina ne Eliesa;

Eliesa, naga narina ne Sorim;

Sorim, naga narina ne Matat;

Matat, naga narina ne Livae;

³⁰ Livae, naga narina ne Simion;

Simion, naga narina ne Suta;

Suta, naga narina ne Yosop;

Yosop, naga narina ne Sonam;

Sonam, naga narina ne Eliakim;

³¹ Eliakim, naga narina ne Melea;

Melea, naga narina ne
 Mena;
 Mena naga narina ne
 Matata;
 Matata, naga narina ne
 Natan;
 Natan, naga narina ne Te-
 pet;
³² Tepet, naga narina ne
 Sese;
 Sese, naga narina ne Opet;
 Opet, naga narina ne Poas;
 Poas, naga narina ne Sala;
 Sala, naga narina ne Na-
 son;
³³ Nason, naga narina ne
 Aminatap;
 Aminatap, naga narina ne
 Atmin;
 Atmin, naga narina ne
 Ani;
 Ani, naga narina ne Ebron;
 Ebron, naga narina ne
 Peres;
 Peres, naga narina ne
 Suta;
³⁴ Suta, naga narina ne
 Sekop;
 Sekop, naga narina ne
 Aisak;
 Aisak, naga narina ne
 Epraam;
 Epraam, naga narina ne
 Tera;
 Tera, naga narina ne Nao;
³⁵ Nao, naga narina ne
 Seruk;
 Seruk, naga narina ne
 Reu;
 Reu, naga narina ne Pelek;
 Pelek, naga narina ne Eña;
 Eña, naga narina ne Sela;
³⁶ Sela, naga narina ne
 Kaenan;
 Kaenan, naga narina ne
 Añaksati;

Añaksati, naga narina ne
 Sem;
 Sem, naga narina ne Noa;
 Noa, naga narina ne
 Lamek;
³⁷ Lamek, naga narina ne
 Metusela;
 Metusela, naga narina ne
 Inok;
 Inok, naga narina ne
 Saret;
 Saret, naga narina ne
 Malalil;
 Malalil, naga narina ne
 Kaenan;
³⁸ Kaenan, naga narina ne
 Enos;
 Enos, naga narina ne Set;
 Set, naga narina ne Atam;
 ana
 Atam, naga narina ne
 Ntewa.

4

*Parin suñe kiena ne yer-
 mare la naña Yermare Lego,
 kilali Yesu*

Matiu 4:1-11; Mak 1:12-13

¹ Ana pogos naña Yesu
 pimi si e lepas na wii nae
 Yortan naña Yoane kee naga
 ea, naga pulen Ninuna Wa
 pañisi. Ana Ninuna ñere
 Yesu pa ke sina ga e yoko-
 rena, ² a naga sike e yo nene
 pa tol legiena lualima yam
 vari, naña ñarin suñe kiena
 ne yermare lala suña kilali
 naga. Ana e legiena la nene,
 pe kinan re poli, suña pano
 pano-o tol naña visokar na
 visokaria.

³ Ana Yermare Lego nene
 pimi pisa pania, pisape
 “Visae ko ope Narina ne
 Ntewa kemua lelaga, ovisali

va kilavaru nene imi ve kilaparavi, vena okania.”

⁴ Ana Yesu pisatamēa, pisape “Peraga, komin Visena Wa pisape ‘Pe yar malin re ga kinnanen poli.’”

⁵ Ana Yermare Lego sine-nan sape kilali sina Yesu, ana ãere kiena sitomena pa metava e pupia kunus tai. Kipian naga e purvanua make ga na yomara-ava nini, ⁶ ana pisa pania, pisape “Navisuaren yo la nene, amio kala naurarena make ga, asike pa e luñau rui. Inu noñar kian la, ana nekilia netamān va yar ai naña in na sineun nesape netamān vania. ⁷ Pogaga, visae ovatanon inu, olotun inu, vera na neligan make sur la nene se lumomā.”

⁸ Ana Yesu pisatamēa, pisape “Visena Wa pisape ‘Olotun ga Ntewa okila ga kiena yuñāena naga taaga, komin naga ga pe kiomā Suþe.’”

⁹ Ana Yermare Lego sinenan sape kilali sina Yesu, ãere kiena sitomena pito garo Yerusalem, mligan naga e yo tai naña pa manene metava, e wos nen yuñā mñana Ntewa, ana pisa pania, pisape “Visae ko ope Narina ne Ntewa, oula oto tano. Okilia okila woga ga ne, ¹⁰ komin naña Visena Wa pisayu Ntewa, pisape

‘Naga yoko ligan kiena navisi lala, vena aim asuñā amio ko, avisuar ko mñaga.

¹¹ *Yoko ayukop yaun ko ga vena ve otan re lamā e kilavaru.’” Yauena 91:11,12*

¹² Ana Yesu pisatamē ke sina ga, pisape “Peraga rui, komin Visena Wa pisa mñena ga pisape

‘Ve omāreran re okilali kiomā Suþe Ntewa vena kila kiomā sur tai.’”

¹³ Ana pogos naña Yermare Lego kilali kiena natañāliena la nene pa Yesu ãisi, ana purmatania pano, naga pa sumāte ke vena lual pogos taþena naña sitom ke sape kilia taulu Yesu ea.

Yesu siar kiena yuñāena gar Kalele

Matiu 4:1-11; Mak 1:12-13

¹⁴ Ana siraunia, Yesu mialoro e namāraeraena kiena Ninuna Wa, pimi tol yo Kalele, ana yar la apisayu naga pano-o kalo make yo lepas nene. ¹⁵ Ana naga sumā pa ke e kiela yuñā na leniena lala, sumā pian la, ana asuñā akekaran naga paþisi, asuñā apisirlua ke kiena kia.

Le Nasaret la amñenlua Yesu

¹⁶⁻¹⁷ Ana Yesu pimi tol kiena yo naña Nasaret, naña kapuru pimi keviu ea, ana e Legiena Wa, sa naña kila mñā silaga, naga pa amio la e kiela yuñā nalenena. Ana asape naga ulolua Visena Wa Kiena ne Ntewa van la, ana akian tus naña Aisea siriyu pania. Ana naga sumālu na pikeþa tus naþani, mñal

e naña sinenan sape ulolua van la, ana puloia, naña pisa sanini, pisape

18 *“Ninuna ne Ntewa sike e in rui, komin naña Ntewa mligan inu vena in ke narui naña nelologon Nalologena Wo va la naña limala korena ga.*

Naga mligan inu nepimin vena nevisawal va la naña asike e yuma naloge viowaena, nevisave nanagane, akilia amolue ga sa ga ne,

a vena nevisawal va kilamara p̄ala lala, nevisave nanagane, kilamarala la kilia imi wo sina.

A naga mligan inun sape yeririna la naña asike tano, naña yar taḡena la asum̄a akila kare la ke silaga, yoko in na neure plan la, aim asu si e yo wo tai.

19 *Ana sanene, in na nekilia nekila merarava nevisave nanagane, Ntewa kila kiena pog viu nowo tai pimi m̄alivin yar la nene rui.” Ais 61:1,2*

20 Ana pogos naña Yesu pulo nawuloena nene ḡisi, naga pulonar si tus, kian si pa yaru na visuaren yumaena, ana pa to meta e lelen nalologena, vena vis va yar lala. Ana la make ga naña asike loyuma asum̄a atamaria Yesu asape am̄a yoko aloge ya ne visa van

la ne wa. 21 Ana pogos naña naga siar kiena visena, ana pisa sanini, sape “Nevisa van amiu, nevisave Visena Wa kiena ne Ntewa naña amloge ga na wa, kana visena la nene pimi pe lelaga nagane ga na wa, e maramiu.”

22 Ana pogos naña yar la amloge visena la naña kiena ne Yesu, amloge sane naga pis ruru po na po, pis malumu ga a pis tanea ḡisa, ana la amilan paḡisi, asum̄a apisavisa pan la sanini, asape “!Ana yar nene, naga narina ne Yosop ga nene! ? Naga ḡar visena tanea la ne sanene pe ne?”

23 Ana Yesu pisatame la, pisape “Pona sinemiun asape avisa kieta visena marua nene van inu yo, naña pisape ‘Tokta, okila ruru ko sumo wa, ana siraunia okilia oiila yar taḡena.’ Nanene komin naña amloge ḡisi rui naña nesike gar Kapeneam, nekila ruru ke namaiena la moki, ana asitom asape komin ya ne pe nepim nekila re m̄ena sanene pan amiu e kieta yo nini poli. 24 Ana lelaga nevisa van amiu, sane visae navisawalena tai, ana kiena yeririna lala nae kemua kiena yo naña, la taḡatete akekarania, taḡatete alogearia. 25-26 Nanene na lelaga.

Sineun nesape asitomyuli pogos kiena ne yermarua Elaisa nanua sumo. E pogos nene, yua pe powo re poli pa

tol kas telu komsusa, a pupia viso tai kalo make yo Israel. ?Ana Ntewa mligan Elaisa pa miila ane e poglis nene? Apisu ke ne, pe mligan re naga panon iila letano nae Israel lala tai naña amloge ke piowa poli, ana mligan naga pa miila letano nae pulkumali keviu nene Sarepat, nane lepas taņena naña Saeton. ²⁷ Ana asitomyuli mēna ga pogos kiena ne yermarua Elisa. ? E pogos nene, yar la moki naña aņar leperosi, ana Ntewa kila ruru ai? Naga pe kila ruru re le Israel lala tai naña aņar maiena nene poli, ana kila ruru ga yere Seria nene naña Neman. Lelaga-o, ita yeririna la naña tepisa ke tesape ita nena naña tepe yeririna lala kiena ne Ntewa, ana yar la naña Ntewa mligan la apimin asape akila kieta yumāena, ana yepeta mavin la ke sina ga.”

²⁸ Ana pogos naña la nene asike loyuma nalenena amloge visena nene, kiela sitomena la pilon pa pe taņena narui, nagane la sinela kar Yesu narui. ²⁹ Ana la aplamoluen Yesu, aņurelua naga petan kiela pulkumali pa vanua, aņure pa e pupia yeparpas tai naña kiela pulkumali mēke ea, la sinelan asape akuan Yesu vito tano e yo ne nanene narui. ³⁰ Ana Yesu kila naña la taņatete si auarar naga, ana mial ga pa p̄aro likan la

sanene pano, mligan la asike na.

Yesu pa garu Kapeneam, pilelua yermare tai

Mak 1:21-28

³¹ Ana Yesu mial pito tol pulkumali taņena nae Kalele, nane Kapeneam, ana e Legiena Wa naga pian la e kiela loyuma na leniena. ³² Ana la naña amiyagogonia amilan paņisi, komin amloge kiena visena urmi paņisi, a naņareraena kiena ne Ntewa sike ea. ³³ Ana pogos nene yar tai sike loyuma amio la, naña ninuna ne yermare viowa tai suna kila kare naga, ana yar naņani pio manene kare Yesu paņisi, pisa pania, pisape ³⁴ “?Ei, Yesu nae Nasaret, kioma ya na teke e imimi? ! Pona ko opimin osape okila kare imimi yo, a! Komin naña in na nekilia ko rui, sane ko ope Yar Wa nena napo tai kiena ne Ntewa.”

³⁵ Ana Yesu pis mārera pa yermare viowa naņani, pialuņaria, pisape “!Ei, ve ovis re sina! Omolue ke vetan yar nene nagane.” Ana ninuna viowa naņani koven yar nene mloru pito tano likan la, ana molue petania pure pano, ana yar ne po sina ga sike na.

³⁶ Ana yar na yo la nene amilan paņisi, ana apisas-ayu Yesu, asape “?Ei, visen ya na sanene? Nanene yar mārera tai nene yo, kiena naņareraena keviu paņisi wa. Naga pis ga pa ninuna

viowa lala, ana apureure ga sa nene.”³⁷ Ana komin sur ne la nanene narui la akekara, a asumã apisa ruru kia kiena ne Yesu mlewo pa e yo punu ga e lepas nene.

Yesu kila ruru auia simem kana Saemon Pita, amio m̃ena yar taḡena la moki

Matiu 8:14-17; Mak 1:29-34

³⁸ Ana Yesu sumãlu pa vanua e yuã nalenena nene, ana pa uã m̃ana Saemon, nanene gar ke Kapeneam na wa. Ana e uã nene auia simem kana Saemon mloru m̃eke e togin namaiena, yepena pisusun, ana apisawal pa Yesu, apiun pania asape sanape e sira marua nene.³⁹ Ana Yesu pimi sumãlu se yepas nen sira naḡani, ana pisaluḡar maiena nena, ana yepen pimi manin sina, mloge nena po, ana sumãlu pa miyumuãen kala kinanena.

⁴⁰ Ana pogos naḡa mrae pito tano, sane Legiena Wa nene ḡisi narui, la naḡa kiela namaiena la asikena, aḡerela apim puna Yesu, ana Yesu ḡuarar la, kila ruru la.⁴¹ A la moki naḡa, yermare la amolue petan la, naḡa asumã akiikii, asape “! Ei, ko kemua naḡa ope Narina ne Ntewa narui!” Ana Yesu pisaluḡar yermare la naḡani, pisape ve avisa re si suri tai, komin naḡa akilia rui asape naga Navisaarena kemua lelaga.

Yesu mlologo make ga e lepas lala nae Yutea

Mak 1:35-39

⁴² Ana kolulag kona, Yesu sumãlu naga taaga molue pa vanua, pa e yo m̃ano tai naḡa pa ruru po na po paḡisi. Ana siraunia, yar la apiminia, akale m̃a pano-o añal e yo ne nanene, a la sinelan asape naga sumã amio la, akilali asape avisaluḡaria vena ve ligana re,⁴³ ana pisa pan la, pisape “Toko, in na monar neva nelologon Nalologena Wo na suḡenena kiena ne Ntewa va e pulkumali taḡena la naḡa asike ga wa, komin naga mligan inu nepimin suri ne nanene.”⁴⁴ Ana naga petan la, pano mlologo teliv make e yuã nalenena lala e pulkumali punu ga nae lepas naḡa Yutea.

5

La naḡa Yesu pio la ḡesania, apa ataveve naga

Matiu 4:18-22; Mak 1:16-20

¹ Pogos tai, Yesu sike e yepas nen pupia lapa naḡa laḡas asape Lapa nae Kenasaret, a laḡas asape Lapa nae Kalele. A e pogos nene, yaru la naḡa asumãlu amiyervivi Yesu la moki paḡisi, sane yepa ve tokaki ga, komin naḡa sinelan asape aloge naga lologon visena kiena ne Ntewa van la.² Ana Yesu pisu waa lua naḡa sike ga lavisinia, naḡa aḡure pimi sike ga e kukunone, a

pisu kana yar ne la asuñalu asike e sive, asuña akevan ke kiela lilivi lala. ³ Ana Yesu mial pano pa miai e waa tai nene, naña kiena ne Saemon, ana pisa pania pisape suponlua va li laa sane. Ana Yesu teke e waa nañani, toña pian ke la naña asike ura.

⁴ Ana pogos naña naga pispan la p̄isi, naga pisa pa Saemon, pisape “Ita, in na sineun nesape teva re laa e lowe memaena, vena toure re lilivi wa.”

⁵ Ana Saemon pisatañea, pisape “E yerkawa, imimi mekila sur nene rui pano-o yemlagi, ana pe metol re nena ika tai poli. Ana komin naña opisa sanene pan inu, poga, nekekarana naña tevali ga.” ⁶ Ana la apa akila sa naña Yesu pisa, ana la amilan pupia p̄egas nen ika tai pulen ga kiela lilivi nañani, kila kiela lilivi nene siar pororovia, ⁷ ana la apio lañas naña asike e waa tañena, la akuñin limalan la vena aim aiila la. Ana la naña apim, ana asuña āpere lilivi nañani amio kana ika ne lala apa metava e waa luwoka nene, pano-o waa luwoka ga nañani pulemamaga ruru nena ga, lavis luoka ga talilu.

⁸ Ana Saemon pisu sur la nene, pisu kilale sane Yesu ga miyumaen e kiena pupia namareraena wa, ana kinai tano e mialana ne Yesu, pisape “Suñe, in na nepe yar viowa ga tai. Popon oure

matan inu, ve osu re si lavisin inu.” ⁹ A pe naga re ga taaga po, ana la m̄ena naña asike amio e pogos nene, la punu ga amilan p̄an wa e pupia p̄egas nen ika naña la añar ne, ¹⁰ amio narina ne Sepeti lua nene, Semes lalua Yoane, naña asikol la amio Saemon amiyumaen lele taaga, la m̄ena luoka amilan pañisi.

Ana Yesu pis pa Saemon, pisape “Ei, ve omaraun re si sur nene. Siar nagane, yoko ve oure re si ika, ana yoko osuña oure yar la aimi ataveve inu.” ¹¹ Ana āpasuñe la, āpere si kiela waa la nañani apa ura, ana pe akila re si sur tañena poli, amligan kiela sur punu ga suña sanene, ana ataveve Yesu apavini.

Yesu kila ruru yaru tai naña p̄ar leperosi

Matiu 8:1-4; Mak 1:44-45

¹² Ana siraunia, e pogos tai, Yesu sike pulkumali tai e yo nene, ana yar tai m̄alia pimi puna, naña yaru nena, maiena naña leperosi kilapel naga kila kare nena tasnena. Ana yaru nañani pimi mloru e lana ne Yesu, tag pania, piun tania, pisape “Suñe! In na nemlelaga nesape ko okilia okila ruru in si wo ga, ana visae okekarania, in na sineun nesape neviun tan ko vena okila inu neikiki sina ga.”

¹³ Ana Yesu pe maraun re tolen maiena kiena ne

yar nene poli, ana puararia, pisa pania pisape “Ee, in na sineun nesape yepemña yania.” Ana veraga ga yepena miania, leperosi nañani p̄isi e naga. ¹⁴ Ana Yesu pisa pania, pisape “Omloge ke ne, ovano ve ovisayu re sur nene va yar lala wa, ana nanagane ova nena okom puna ne yar wa vena naga visu ko lia, a kilia visawal višave tasnemña mian rui. Siraunia, ana monar ova okila kuṗaṗaena na kiomña yepe ikikena nene, sa naṗa Mosis pisape monar akila.” ¹⁵ Yesu pisape yar nene vano ve visayu re sur nene, ana peraga, pe piavi re poli asumña apisayu mña Yesu pano-o pa tol yo punu ga, kila sane pupia p̄ina la apimin asape aloge kiena visena, ana la sinelan asape naga kila ruru kiela namaiena lala. ¹⁶ Ana e pogos la punu nene Yesu sumña petan m̄ena yeririna lala, pa ke e yokorena, mlen ke pa Ntewa.

Yesu kilia viewo mlamulena viowa

Matiu 9:1-8; Mak 2:1-12

¹⁷ Ana pogos sina tai, Yesu pian la m̄aga, a Varasi laṗasa amio navianena navisaluaena lala atom̄aga tano e nene, naṗa la na pulkumali taṗena lala e lepas lala nae Kalele amio Yutea, a laṗasia amolue Yerusalem apimi. Ana e pogos nene, nam̄areraena kiena ne Ntewa pimi keviu manene laa e Yesu

narui, kila naga kila ruru namaiena lala. ¹⁸ Ana yar laṗasia akus namaiena tai pimi, naṗa yepena la punu ga marmare, naṗa akus pimi ana mlor ga m̄eke e m̄ana tog. La sinelan asape akus imi loyumña aligan mon lavisin Yesu, ¹⁹ ana apisu sane pupia p̄ina m̄eke pa loyumña rui, ana yo ve tokak paṗisi, taṗatete akus kiela erau nene vano. Ana akus pa metava e wos nen yumña narui, akawepo lologia Yesu, ana amligan malumun yaru naṗa amio m̄ana tog pito tano e pulus naṗani, pito m̄eke likan yeririna lala, m̄eke nena ga vamon Yesu. ²⁰ A pogos naṗa Yesu pisu suri nene, naga kilia naṗa la amlelaga m̄arera e naga paṗisi, asape yoko naga iila namaiena nene, ana naga pisa pania, pisape “Mara, in na nepiewo kiomña mlamulena viowa rui.”

²¹ Ana pogos naṗa Varasi amio navianen navisaluaena lala amloge visena nene, asitom piowa e naga paṗisi, ana asumña apiuviunia, asape “? Ane p̄arnena kare ke kia wa kiena ne Ntewa sanene? Ntewa naga taaga kilia viewo mlamulena viowa, pe yar taṗena re si poli, ana yaru nene pis ke sa naṗa naga sitom ke sape naga Ntewa nene narui.”

²² Ana Yesu mninu kilale rui sape asitom ke piowa sanene e naga, ana pisa pan la, pisape “? Komin ya ne sinemiu la pulen ke

sitomena viowa la sanene?
²³ Visae nevisa ve sanini va namaiena nene, nevisave 'In na nepiewo kioma mlamulena piowa,' pona nevisa vania nevisave 'Osumalu, oyali,' ana visena lua nene, tai mareran navisaena, a tai meme ga. Na naŋa sape 'Osumalu, oyali,' naga marera laa sane, komin naŋa yoko okilia ovisu kilale sane kiau visena pe lelaga pona peraga, naŋa yar nene sumalu pona taŋatete sumalu. ²⁴ Ana nanagane ŋisi na nekila suri tai naŋa asitom asape Ntewa ga naga taaga kilia kila, ana avisu kilale sane in na Narina ne Yeririna, namareraena sike e inu. A nevisa van amiu, nesape namareraena nene torokin nekilia neviewo mēna mlamulena viowa e yomarava nini. Ayagogo ruruia."

Ana Yesu pis pa namaiena naŋani, pisape "Nevisa van ko, nesape osuŋalu, ovilonar moma tog, oyali ova uŋa."

²⁵ Ana sa nena nene, e marana ne la naŋa apisu ke ne, yar nene sumalu, ŋar mēna tog, mial pa vanua, naga pa uŋa naŋa sumā miyeluarliluen Ntewa sanene pano.

²⁶ A pogos na la naŋani apisu suri nene, amilan kare nena lelaga, yepela ŋil paŋisi, asuŋa amiyeluar Ntewa, asape "E suwala, lelaga kemua-o, ŋane na ita

tepisu sur tai naŋa pe taŋena paŋisi!"

Yesu pio Matiu, naŋa apio mēna Livae, pimi tavevea

Matiu 9:9-13; Mak 2:13-17

²⁷ Ana siraunia, Yesu milili ga pa laa sane, ana māl yar tai totano teke e kiena yuŋaena e yuŋa na warpoloen takis. Yaru nena, kiena kia Livae. Ana Yesu pio, sape "Oim otaveve inu."

²⁸ Ana Livae suŋalu nena ga, mligan kiena yuŋaena, mligan kiena suri punu ga sike na, ana taveve Yesu.

²⁹ Siraunia, Livae nena kila pupia kinanena tai kana ne Yesu e mēna uŋa, a e pogos nene, yar na takis taŋena la moki, amio mēna yar taŋena la moki na sanene, la mēna apim ato lele taaga amio Yesu amio kiena nalogena lala e kinanena naŋani.

³⁰ Ana Varasi laŋasia, amio kiela navianen navisaluaena laŋasia, apragogo pa nalogena lala, asape "? Komin ya ne akinan ke lele taaga sanene amio yaru viowa lala a ŋarmarera la nene?"

³¹ Ana Yesu ke pisatame la narui, pisape "La naŋa tasnela marera ruru poga ga, la pe asitom re asape ava akom pun yar na kilaru-ruen maiena poli, ana la ga naŋa aŋar maiena, la sinelan paŋisi. ³² In na pe nepimin re nevio yar la naŋa apisa ke asape la apo rui e marana ne Ntewa vena ataveve inu, ana in na nepimin ke yeririna viowa la ne sanene narui,

vena avilopu la vetan kiela mlamulena viowa lala.”

Naviunena tai e lepas na monsilena

Matiu 9:14-17; Mak 2:18-22

³³ Ana la apiun naviunena tai pa Yesu, asape “Nalogenena kiena ne Yoane Nakeena la asumã apuarar ruru ke þelaga nene naþa yam mokliu, asumã amonsilu ga vena alen va Ntewa, a Varasi mïena la akila sa ke ga. ?Ana komin ya ne kionã nalogenena la pe akila re poli, ana la asumã akinana a asumã amun ga sanene?”

³⁴ Ana Yesu pisatamë la, pisayu naga amio kiena nalogenena lala, sane la akekara paþisi pogos naþa naga sike amio la, ana yoko sinela viowa sirau e pogos naþa naga ure matan la. Ana pisape “? Pogos naþa yar natalopaena sike amio kiena erau lala wa, asitom asape yoko akilia aligan kinanena na þaþagena nene sike na, ve akan re? Peraga.

³⁵ Ana yoko pogos tai imi, naþa yoko aurelua yar natalopaena nene vetan kiena erau lala, a e pogos nene narui akilia amonsilu, komin naþa sinela miye naga paþisi.”

Sur marua amio sur vii

³⁶ Pelaga na monsilena nene, naga þelaga marua tai nalotena kiena ne le Yu lala, ana Yesu sinenan sape kila meraravan sane þelaga marua na sanene, taþatete asikol amio suri vii la naþa

naga pian la ke ea, ana pisa þakaiwa tai e lepas nene pan la. Pisape “Taþatete ola kinakinã nen kulmrae viu tai, naþa ovitolþa kinakinã tai, ana osuluar e kulmrae marua vena kilawo pulus naþa teke ea. Visae sanene, yoko opitol þa kare kulmrae viu nene narui, ana kana kinakinã, yoko taþatete nena marana ve sa ke kulmrae marua nene, ana apisu piowa ga. ³⁷ A taþatete okokonia kuruta viu naþa mïeke þeþela ke ga wa va e kulus nen nane tai naþa pe urmarua, naþa akon kuruta pa e yam moki li rui. Visae okila sanene, yoko kuruta viu nene lapa, kila kulus nen nane naþani mïapo, ana kuruta nene lau kare ga ne, ana kana piã mïena imi viowa nena ga. ³⁸ Ana kuruta viu, monar okokonia va e kulus nen nane naþa naga mïena pe urviu, naga mïarera ruru po, a okilia oligan ruru moþa kuruta mon mïa ea. ³⁹ A pogos mïena naþa yar la amun kuruta naþa amiyumãen towe laa nanua rui, yoko ve sinelan re si munen kuruta viu, naþa amiyumãen mare ga na wa, ana yoko monar avisave kuruta marua naga kiki laa sane.”

6

Yesu pe suþen Legiena Wa
Matiu 12:1-8; Mak 2:23-28

¹ Ana e sina ga e legiena tai, naþa pe Legiena Wa, Yesu amio kiena nalogenena

lala amiyaloro apano, a kiela mrapa pa ĵaro e lokove na kona lala. La amiyal ĵana sanene, ana nalogena lala viso kar la ana akawe plan kona laĵas naĵani, apae vana, akania. ² La akila ke sanene, ana Varasi laĵas asuĵa e naĵani, apisu ke Yesu lala, ana apisa pania, apisape “Ei, komin ya ne asuĵa akila ke yuĵaena nene e Legiena Wa sanene? Visae sanene, asuĵa akilaro ke kieta navisaluaena ne.”

³ Ana Yesu pisataĵe la, pisape “?Pona pe apuloli re Visena Wa pog tai poli yo wa, e sur la naĵa Parin Suĵe Tepet nanua naga kila? ! Kam na akilia pa rui! Naga amio kiena yeririna lala la viso kar la manenea, ⁴ ana naga pa loyuĵa e yuĵa wa ĵana Ntewa, a naga mla kilaparavi wa naĵa Navisaluaena sape yar wa ga la akilia akania, ana Tepet amio kiena yeririna la akania.”

⁵ Ana Yesu pisa pan la, pisape “Inu Narina ne Yeririna, inu ke narui nepe suĵen Legiena Wa, ana inu ga nekilia nevisa ya naĵa popon akila e Legiena Wa, pona ya naĵa pe pon re akila poli.”

Yesu kila ruru limaulu tai e Legiena Wa

Matiu 12:9-14; Mak 3:1-6

⁶ A e si e Legiena Wa tai, Yesu pa si loyuĵa e yuĵa na leniena, pian la. Ana poglis nene yar ĵana tai sike loyuĵa naĵani, limana

marua pulu. ⁷ Ana navianen navisaluaena lala, amio Varasi lala, naĵa la sinela kar Yesu rui, asike ga lavisia e poglis nene, asuĵa apisuar ruruia ĵisa, vena asape alual li ĵelaga viowa laĵasa e naga, ana la sinelan asape avisu sane yoko Yesu kila ruru limaulu naĵani e kiela Legiena Wa nene pona yoko ve kila re.

⁸ Ana Yesu kilia ruru make ya naĵa sike e kiela sitomena, ana pis pa yar naĵani, sape “Osuĵalu, ovam osu metava e nini sumo wa,” ana naga suĵalu pavini. ⁹ Ana Yesu piun tan la naĵa asike e ne, pisape “?Kieta Navisaluaena sape tekilia tekila ya ne e Legiena Wa? ?Pisape popon tekila sur wo pona popon tekila sur viowa? ? Pona pisape popon tetamalia yaru, pona popon towem̄ar yaru?” ¹⁰ Ana Yesu pisuveve la make ga, ana pis sina pa yaru naĵani, pisape “Lumoĵa visilia!” A e ga e pogos naĵa yar nene kila sanene, limana naĵani pimi po nenaga.

¹¹ Ana le Varasi lala sinela mimi, naĵa sane amloge mlae paĵisi, ana apa vanua apisayu weleli sane yoko akila ve sanape na va Yesu.

Yesu mliganar kiena nalogena la lualima taaga pa lua
Matiu 10:1-4; Mak 3:13-19

¹² Ana siraunia, e sina e pogos tai, Yesu pa metava e pupia tavie tai vena naga se ea, len va Ntewa, ana suĵa kila ke sanene e yo naĵani

pa tol yemlagi. ¹³ Ana kolu-
lag na pitomi pio kiena naloga-
gena lala apimi lele taaga
puna, ana e la nene, naga pi-
sawal la lualima taaga pa lua
naña naga mliganar la pis-
ape la narui, la ape nalolo-
gena.

¹⁴ Ana kia kiena ne la lual-
ima taaga pa lua nanini:

Saemon, naña Yesu mligan
kiena kia tañena, sape
Pita,

a wenla naña Antru,

a Semes, a wenla naña
Yoane,

a Pilip,

a Patalomiu,

¹⁵ a Matiu,

a Tomñas,

a Semes, naña narina ne
Alpeas,

a Saemon, naña sape
mñene plan le Rom lala,

a Sutas, naña narina ne
Semes,

¹⁶ a Sutas nae Kariot, naña
siraunia naga kom va-
raun Yesu.

*Yesu sumña mlologo a kila
ruru namaiena lala*

Matiu 5:1-12

¹⁷ Ana Yesu ðere nalolo-
gena la nene apitom si tano,
ana añal yotop tai, apa asike
ea. A poglis nene, naloga-
gena kiena ne Yesu tañena
lala apule ga asike ea, amio
mñena pupia ðina lala na
pulkumali tañena lala nae
Yutea, a le Yerusalem mñena
lala, amio le Taea a le Saeton
lala, naña amolue e kiela
yo lala garo losi lavisin sive
apami. ¹⁸ La nene apamin

asape aloge visena lala kiena
ne Yesu, a la sinelan asape
kila ruru kiela majiena lala.
Ana Yesu kila mña sanene
pan la pano-o, naga kila
ruru mñena la naña yermare
lala asumña akila kare la ke
silaga.

¹⁹ Yaru la moki manene
pañisi, ana la punu ga
sinelan asape atol ga Yesu,
vena la aninuli ga pupia
nañareraena naña apisu
sane sumña mñalivi ke ea,
naña sumña kila ruru ke yar
la moki rui.

*Navianena lala kiena ne
Yesu*

²⁰ Ana Yesu kira pisu kiena
na-logena la nene, ana pian
la, pisape:

“Kam naña apisu kilale sane
limamiu koren ga,
navisa ruruena sike
e amiu, komin amiu
ke narui naña Ntewa
naga pe ðarin suñen
amiu, ana visuar
amiu.

²¹ Kam naña viso kar amiu
ke nagane, navisa ru-
ruena sike e amiu,
yoko aloge sane aim
aulemaamaga nena ga
e suri wo ne lala.

Kam naña atagi ke nagane,
navisa ruruena sike
e amiu, yoko akilia
akekara.

²² Kam naña yar la pe
akekaran amiu re poli,
a naña asumña yepel
mavin amiu, a naña
asumña apisa kare
amiu, a asumña akoven
plan ke kiamiu kia lala

sane kam na ape yar viowa ga lala, nanene komin naña kam na ape yar kiena ne inu Narina ne Yeririna, navisa ruruena sike e amiu.

23 E pogos la ne sanene, ve asitom manene re, aulaula ga warar pupia kekarena, komin naña asuña akila kare amiu ke ga e ðelaga ma nena naña repila lala akila pa navisawalena la nanua sumo. Ana pogaga, yoko awar kiamiu pupia nalaena ma e peni.

24 Ana kam la naña ape nasur moki manenea, yoko viowa manene laa van amiu, komin naña añar kiamiu nalogewoena a kiamiu nakekarena lala e kiamiu malena wo la na yomarava nini rui.

25 A kam la naña mēpēmīu pulemamaga ruru pa sike rui, yoko viowa van amiu vañisi, komin naña yoko viso kar amiu manene va laa sane.

A kam naña apitale ke nanagane rui, yoko viowa van amiu vañisi, komin ðisi na aloge viowa, atagi.

26 “A monar avisuar ruru amiu pogos naña yar la asuña amieluar ke kiamiu kia. Visae ve sanene, pe

pon re amiu mēna asitom ke asape amiu na apo, komin naña navisawalena navisokanena la nanua sumo, kieta yermarua la amiyeluar kiela kia la sanene, ana Ntewa pisu la sane la apiowa ga ana mla nakoena pan la.”

Yesu pisayu sinesien manene nasinekar lala Matiu 5:38-48, 7:1-5

27 Ana Yesu pisape “Kam la naña amloge kilale ke kiau visena nene, in na nevisa van amiu, nevisave: Monar sineta si kieta nasinekar lala, a monar tekila wo van la naña pe asitom ita re poli, 28 a monar tevisa ruru la naña apiuelin ita, a monar telenwo la naña akila kare ita. 29 Visae yar tai lipa pipimā lepas tai, ko monar ovilopu mēna pipimā lepas ðasia vania vena lipa, a visae yar tai māreran van ko vena war moña kulsaket, yoko monar okekaranga war mēna moña kulsota. 30 Visae yar tai viun kionā sur tai, monar ola vania, a visae yar tai lalua kionā suri tai, yoko ve ova oviun re si tania vena lamaran si van ko. 31 Pelaga ya naña sinomān vena yar la akila van ko, ðelaga ne nanene yoko monar okila van la.

32 “Visae tesuñā sineta si ga yaru la naña asitom ita, nanene na pe sur re tai nene po laa wa, komin yar naki-laen mlamulena viowa lala asitom ke la naña asitom

la rui. ³³ Pona visae tekila ga wo van la naŋa akila ke po pan ita rui, naga mēna pe sur re tai nene poli, komin yar nakilaen mlamulena lala, la mēna akila ke sanene rui. ³⁴ Pona visae tetamān ga kilavaru va la naŋa akilia alamaran sina, naga mēna ga pe pe sur re tai nene po laa wa, komin yaru nakilaen mlamulena la akila ke yumāena nene silaga.

³⁵ “Ana in na nevisa van amiu, nevisave: Sinemā si kioṃa nasinekar, a okila wo vania, a otaṃan ga kioṃa kilavaru sa ga ne, naŋa ve ositom manene re van naŋa omla pania, ovisave pona kilia lamaran si pogos tai, pona taŋatete si lamarana. Visae osuṃa okila ke sanene, osuṃa okus ke ŋelaga kiena ne Arimata Yaru na Meta ne, a naga yoko la nalaena tai van ko ve keviu laa sane, komin naŋa naga yar sur naŋa sinen po pan la naŋa pe apisa re potena pan poli, pona la naŋa asitom la ke sina. ³⁶ Sanene, ko na monar sinemā ye yar lala sa naŋa Arimata naga sinena miye la.”

Yesu pisayu naliŋereen yar taŋena

Matiu 7:1-5

³⁷ Ana Yesu pis ke pan la na wa, pisape “Yoko ve aliŋere manene re yar taŋena pona ala nakoena vania. Visae sanene, yoko Ntewa taŋatete liŋere

manene amiu, taŋatete la nakoena van amiu. Visae aviewo yar taŋena, yoko Ntewa viewo amiu, ³⁸ a visae ala sur va yaru taŋena, yoko Ntewa la sur imi van amiu. A yoko Ntewa laa van amiu ve keviu la sane taulu naŋa amlavia, yoko naga war ve moki vaŋisi, sa naŋa akokonia karo, atanaria, yoko amiyalar mēna ga, pano-o pulemamaga ruru nenaga, suri laŋas kekapil pito ke tano. Lelaga paŋisi, yokorena awar imi pun amiu maran ve taaga sa ke ga naŋa aŋarwar ke pan yar taŋena.”

Monar avisuar ruru kiamiu malena

³⁹ Ana Yesu pis ke pan la na wa, pisa ŋakaiwa tai pan la, pisape “? Sanape, visae kilamara ŋala tai suṃa ga, ana naga kilia sumon kilamara ŋala taŋena tai lalua ayalŋel woga ga? !Peraga, yoko la ga luwoka aloru ato e ŋiliŋili tai ne! ⁴⁰ Nalogenā naga pe pa manene re metavan yar naŋa pian ke naga poli, ana visae naga kilia ruru make sur la naŋa navianena piania, yoko naga imi maran ve taaga sa ke ga kiena navianena. ⁴¹ Pe pon re osuṃa ovisavisa ke narin kororaki tai naŋa teke e kilamarana ne womla poli, ana pe opisu kilale re osape pupia purŋes nen laki tai ṃeke e kilamaranā poli.

42 “?Sanape na osape ovisa va womla nene, ovisave ‘Wolai, yoko nowarlua kone kororaki na kilamarama wa’? Sanene ko na pe opisu kilale re kioma mlamulena viowa poli, a osuma omlipere ke ga mlamulena viowa kien yar tapena lala. Okilia ma napa ko opiowa ga, ana osape okila sane yar la asape ko opo rui. Okus lua pupia miasin laki na neke e kilamarama sumo wa, pisi na okilia ovisuveve narin kinakinas nen kororaki napa teke e kilamaran yar tapena nene.”

Purlaki amio mrasa
Matiu 7:16-20, 12:33-35

43 Ana Yesu pisa mena ga, pisape “Purlaki napa po tapatete war mras napa piowa, a purlaki napa piowa tapatete war mras napa po. 44 Ee, sanene narui, napa tevisu kilale purlaki, tesape sanape e ga e mrasnela. Mralaki la napa mam ruru po, pe topar re e vilumini la napa pe nenos poli, peraga. 45 Yaru napa po naga miyuwon ruru suri wo la sike e losinena, ana silaga kiena sitomena wo sumu ga napa kilia visaplania, ana yaru viowa naga sumu parpolo ke suri viowa e losinena, ana naga visa plan ga sitomena viowa lala. Suri ya napa pule sike e los nen yaru pona e kiena sitomena, sur ne na nene narui yoko sumu molmolue luen ga e gona.”

Yuma lua
Matiu 7:24-27

46 Ana Yesu pisape “? Komin ya ne apio in ke asape ‘Supe o, Supe o,’ ana siraunia pe asuma amlogear re ya napa nepisa pan amiu nesape akila poli? 47 Yar napa pimi pun inu, mloge kiau visena, naga monar logearia a monar kila. Yar napa kila sanene naga sa napa suniena tai pisayuia, napa pisa sanini: 48 Yar tai sumu kila ke mana yuma, a yaru nene pe manmarua ruru po, kil pilipili la pito manene tano vena tol yo marera tano, ana maplar kemrape lala e pulus la napani. Ana pogos na pog marera, pupia womie lau, ana tapatete nena kila yuma nene kulul, komin napa yar na kila, kila ruru marera po. 49 Ana yar napa mloge kiau visen lala, ana pe mlogear re poli, naga sane yar tapena tai. Yar nena, naga mena miyumaen mana yuma tai, ana naga pe wowe ga, miyumaen mana yuma sumal yau ga e porotano, kana kemrape ne la pe pito manene re nena tano poli. Ana pogos napa pog marera, pupia womie mlau pitomi, kil lua yuma napa, kilalua mloru, ana yuma napa pororovia, piowa make nenaga.”

7

Yer kawa na mara nae Rom tai mlelaga marera e

Yesu

Matiu 8:5-13

¹ Ana pogos naŕa Yesu pisa plan kiena navianena la naŕani p̄isi, naga pa loyuma e pulkumali nae Kapeneam.

² Ana e yo nene, nasumonen li na mara nae Rom tai sike ea, ana naga kiena yar wo na yumaena tai naga mai paŕisi, lavis ga kovio. ³ Ana pogos naŕa mloge yar la apisayu ke Yesu, asape pimi ke lavisin kiela yo rui, ana pio nasumonena kiena ne le Yu lala, pitetalia la apanon Yesu, vena aviun tania imi kila ruru namaiena nene.

⁴ Ana la naŕani apim puna Yesu, apisayu namaiena naŕa pania, ana apiun manene tan sanini, asape “Nasumonen li na mara la nene, popon sa oimi oiila naga. ⁵ Lelaga naŕa sane naga pe ita re tai nene poli, naga pe yere Rom ga, ana naga pe yar tai naŕa sitom manene kieta p̄egas nen yeririna la paŕisi, ana naga m̄ena miila imimi e yo nini keviu paŕisi rui, naŕa miyumaen kiamimi yuma na leniena. Ana visae ko okekarania, oim ovisu kiena yaru nene naŕa mai paŕisi.”

⁶ Ana Yesu taŕania, ana pa amio la. La amial apano, ana pogos naŕa asike towe laa perinan yuma m̄ana nasumonen li na mara nena wa, apisu yaru laŕasa amiyal ke apimi. La nene, erau kiena ne nasumonena si laŕasa, naŕa naga pitetalia la si apim puna Yesu, vena avisa kiena visena tai vania.

Ana la apim apisawal pa Yesu, apisape “Yere Rom naŕani mligan imimi mepim si puŕna, pisa sanini, pisape naga sum̄a kila kare ko paŕisi. Naga pisape naga pisu sa naŕa naga pe yaru tai naŕa pe torokin re oim m̄ana loyuma poli. ⁷ A sitomena nene kila naga pisu sane pe pon re m̄ena naga imi kate puŕna poli, komin naga pe pe yere Yu re sane ko poli, ana naga pisa ga pisape, visae ovisa ga visena tai, yoko kiena yaru nene loge wo woga ne. ⁸ Naga kilia sape monar ve sanene komin naga kilia sape kioŕna visena naga naŕareraena sike ea. Naga sape suri nene naga sane li na mara la naŕa asike vatanonia, naŕa la monar alogear kiena visena. Visae visa van tai, visave ‘Ovano,’ naga monar vano, pona visae visave ‘Oimi,’ naga monar imi, pona visae visave ‘Okila sanene,’ yoko naga monar kila. A naga m̄ena sape monar kila ya naŕa pupia yerkawa nasumonen li na mara la pisa pania. Naga sape naga sitom sanene narui, visae ovisa ga sur tai, ana monar ve sanene.”

⁹ Pogos naŕa Yesu mloge visena nene, naga milan sitomen kiena ne nasumonen li na mara la nene paŕisi, a kekaran paŕisi, ana pis pa p̄ina la naŕa asike amio e poglis nene, sape “Nevisa van amiu, nevisave pe nomal re nena yere Yu tai

naþa suñal m̃arera se e in sane yar nene poli.”

¹⁰ Ana siraunia, la nene aþasuþela si apa m̃ana nasumonon li na mara la naþani, ana la amilan naþa apisu namaiena nene pimi po si rui.

Yesu kila si m̃ee kiena letano tai mal si petan marena

¹¹ Ana siraunia, pe yam piavi re poli, Yesu mial pa tol pulkumali taþena tai, kiena kia Naeni, a sa naþa silaga, kiena nalogena lala amio yaru taþena la moki asuñã ataveve ke naga.

¹² Ana pogos naþa Yesu lala apim ke lavisin pupia mralaea na pulkumali nene, apisu sane yar la amiyalvai apim, asuñã akus ke yar mare tai pano vena ava asinia. Naga naþa mare ne, naga m̃ee tai naþa anena pe letano. Letano nene, naga pe þar re si narina tai poli, naga þar nena taaga ñe nane mare narui. ¹³ Ana Yesu la asuñã apisu ke la naþa amial apim, ana pogos naþa kieta Suþe pisu letano nene, naga sinen mie pano-o þisa. Ana pa lavisinia, pisa pania, sape “E, tagen toko.” ¹⁴ Ana Yesu pimi lavisin marena nene, mligan limana tea, a la naþa akus pa ke ne asuñalar la asu, pe amiyal re si poli. Ana naga pis pa yar mare naþani, pisape “E, nevisa van ko, osuñalu si na wa.”

¹⁵ Ana m̃ee nene suñalu, suñã pivis pan la, apikevike van sina, ana Yesu

sumon naga pano, mligan si pa anena. ¹⁶ Ana pogos naþa yar la apisu sur nene, sinela kurkur paþisi, a asuñã amieluar Ntewa, asape “!Ake, suwala! Pupia navisawalena kiena ne Ntewa suñalu ñena sike likan ita rui.” A laþas apisa m̃ena, asape “!Lelaga þa! Ntewa pimi katen kiena yeririna la rui.” ¹⁷ A suniena ña suri nene, asuñã apisalelein pano, pano-o tol lepas naþa Yutea, amio yo taþena la naþa asike lavisinia.

Yoane Nakeena pitetalia kiena nalogena lala apim pu Yesu

Matiu 11:2-19

¹⁸ Ana e pogos nene, Yoane Nakeena sike e yuñã nakoena rui, ana kiena nalogena la apim apisayu pania e sur la punu ga naþa Yesu suñã kila. ¹⁹ Ana Yoane pis ga pan lala lua, pitetalia la apa puna kieta Suþe, vena ava aviun ruru tania, avisave naga Navisaarena naþa asuñate ke ne, pona pe naga re poli. ²⁰ Ana la amial apim apisu Yesu, apiun sanini pania, asape “? Kiamimi yerkawa naþa Yoane sinenan sape kilia sanape? ?Ko na yar sur naþa apisa nanua sumo asape yoko yerkawa tai imi ve kieta nasumon itaena, pona pe ko re na nene poli wa, a monar mesuñate ke yar nene yoko imi na wa?”

²¹ Ana e nena e pogos naþa apim apiun naviunena nene, Yesu suñã kila ruru ke

maiēna lala a suṃa pile plan ke yermare petan yeririna lala, a suṃa kila ke kilamara ṃala lala, kilamarala la pimi po sina, ana nalogena kiena ne Yoane la apisu sur la nene. ²² Ana Yesu pisa-taṃe la, pisape “Awasuṃe amiu si ava puna Yoane, ana avisawal sur ya naṃa apisuia pona amloge e nini. Suri la nene asa ga naṃa navisawalena Aisea pisa pan amiu rui, naṃa sape:

‘Kilamaraṃala lala, nanagane apisu si suri rui, a laulu lala nanagane amial ruru si rui, a yaru la naṃa aṃar leperosi, nanagane tasnela la meki ruru si rui, a kiligapoṃe lala, nanagane amloge si suri narui, a yar mare lala, nanagane amal si rui, a la naṃa limala korena, nepisawal Lologena Wo pan la rui.’

²³ Ana ava avisawal ṃeṃa va Yoane, avisave ‘Yaru naṃa pe sinen peve lua re e inu pog tai poli, navisa ruruena sike e naga.’ ”

Yesu pisayu Yoane Nakeena

²⁴ Ana pogos naṃa nalogena kiena Yoane la amolue sina vena awasuṃe avano, Yesu pisayu Yoane nene pa yeririna la naṃa asike ne, sape “?Pogos naṃa apa ṃesan e yokorena nene, apanon asape avisu ya ne? !In na pe nesitom re nesape

apanon ga avisu kana kiai ne la poli, naṃa sisilin kare ke ga sanene. ²⁵ A in na pe nesitom re ṃeṃa nesape apa apisu yerkawa tai naṃa miyen ṃana kulsota nowo la poli, po sike e malena naapo, komin yaru sur la ne sanene, la pe asusu re e yo viowa la ne sane yomema nene poli, ana la asike ga e yuṃa naapo ṃana ṃarin suṃe keviu lala.

²⁶ Peraga, ana in na nesitom nesape apanon apisu navisawalena tai, ne? Nanene naapo ne, ana nevisa van amiu, Yoane naṃa apanon apisuia, naga pa laa sane, naga taulu navisawalena nasumo lala, ²⁷ komin naṃa Ntewa pisayu naga e kiena visena wa rui, sape

‘In na nemligan ṃesan kiau yaru na waren visena nene pitomi pun ko, vena kila ruru kioṃa mrapa.’ Mal 3:1

²⁸ “Lelaga nevisa van amiu, sane e yomarava nini Yoane Nakeena nene naga mon metavan make yar la punu ga. Ana la punu naṃa yoko aim e nasuṃenena kiena ne Ntewa, vito tol kiela yar maro naṃa sike laa tano, la punu nene la asike metavan Yoane, naṃa yoko la awar navisa ruruena kiena ne Ntewa va laa sane taulu naga.”

²⁹ Ana pogos naṃa apa amiyagokon Yoane Nakeena mlologo, naga pisawal mrapa kiena ne Ntewa vena la akilia avilopu la. Ana yar

viowa la moki, pa tol mēna yaru na takis lala, apisu sane mrapa nene pe lelaga, ana apilon la, ana Yoane kee la e wii. ³⁰ Ana yar taḡena lala, sa naḡa Varasi lala amio navianen navisaluaena lala, la apilopu māsila e mrapa naḡa Ntewa kila vena akilia avilon la ea, ana Yoane pe kee la re poli.

Yesu pis mārera pa yeririna la e kiena pogosia

³¹ Ana Yesu pis mārera pa yar na vilaveena lala e poglis nene, pisape “? Yoko nevisa visena ya naḡa kilia tol ḡelaga ken la na nagane, sane la ape yar ya? ³²⁻³⁴ E lepas punu ga naḡa Ntewa kila vena kilali wo van amiu, ana yepemiu mavin ga, apisa kare ga naga vanonia. Komin poglis naḡa Yoane pimi, naga sumā monsilun kinanena vena len, a naga mlon kuruta namunena, ana yaru la apisu sanene, asumā apisayuia, asape ‘Yaru nene, yermare sike e naga.’

“Ana pogos naḡa inu Narina ne Yeririna nepim nesike na, nekinan ruru ga a nomun ruru ga, ana apisayu si inu ḡisa, apisape ‘Apisu ke ne, yaru nene naga kinan merorol paḡisi wa, naga pe yar na mun maneneen mēna kuruta, a naga kiena erau lala, yar na warpoloen ga takis, a yar viowa ga lala.’

“Komin sur ne nanene nepisu yeririna na nagane

lala asa ga ninis la naḡa visae asumā akila kokan ke e yepesinas na kumali, yoko la aviovio kiela narin erau lala, avisave ‘!Ei, kam na apilon manene visena na! Visae mowe ke plaḡe, ana pe sine-miun re wolen amio imimi poli, pona visae meyaun ke yauena na marena, ana pe sinemiun re atagipae amio imimi poli.’

³⁵ “Sur ne na nene, yeririna la yepela mavin mrapa lala kiena ne Ntewa, ana mras wo naḡa molue e malena kiena yaru naḡa taveve ke mrapa kiena ne Ntewa, kilologia sane mrapa ne nanene narui, naga pe mrapa na manmaruaena naḡa lelaga.”

Sira tai mloge kemua piowa lelaga e kiena mlamulena viowa lala

³⁶ Ana Varasi tai, kiena kia Saemon, naga sape sine-nan kila kinanena tai ve kana Yesu, ana Yesu pa māna, pa totano vena akinana. ³⁷ Ana e pulkumali nena, sira tai sike ea, naḡa naga kila ḡelaga viowa la moki paḡisi, ana naga mloge naḡa Yesu pa kinan ke māna Varasi naḡa Saemon ne. Ana sira naḡa pisu kiena mlamulena viowa, mloge piowa manene laa, ana mloge sane monar imi visu Yesu, ana kus kiena piawi tanea tai na ponotaninu, kus pimi e yumā naḡani. ³⁸ Ana Yesu pelein ke sape kinana, ana

sira nene pimi suñal su va-raun lana, naña wamarana mlau, kekapil pito ke e lana ne Yesu. Wamarana kee ke lana sanene, ana tar viluna la naña piayavi ne, suña miyumuvan ke lana Yesu, a naga pelan pipina komþasa te lana ne Yesu, a yokorena taron ponotaninu nañani ea.

³⁹ Ana Varasi naña þere Yesu pimi mñana, naga pisu ke sur nene, ana sitom pi-owa towe ga ea. Naga sitom ke sanini, sape “Visae Yesu nene naga pe navisawalena tai naña lelaga, pona vera na kilia ruru yo rui sane sira nene naga pe sira na mlamulena viowa na sanene, ana yoko ve tañan re tol lana wa nene. Ana naga tañan kila sanene, in na nemninue kare narui.”

⁴⁰ Ana Yesu na kilia mña kiena sitomena nene, ana pisatamnea, sape “Saemon, in na nesape nevisa visena tai van ko sumo wa.”

Ana tañania sape “Pogaga, Navianena. Okilia ovisa.”

⁴¹ Ana Yesu pisatamne sanini pania, sape “Yerkawa tai, ana yar lua akila lapui pania. Lalua nene, tai na kiena lapui keviu, komþasa naga kiena lapui keviu manene laa pañisi. ⁴² Ana pogos na ulmaranen lapui la nene, la ga luwoka apulmaran þele ga, ana yerkawa nañani sinen mie la, ana piowo make kiela lapui la nene pan la. ?Ana komin sur ne nanene, lalua

nene ane sitom manene yerkawa nene?”

⁴³ Ana Saemon pisatamne Yesu, pisape “Nemninue ga, pona naña kiena lapui keviu manenea naga monar sitom va laa sane yo.”

⁴⁴ Ana Yesu pisape “Ee, sa ke nene narui.” Ana Yesu þarpuia kilologia sira nañani pa Saemon, sape “Saemon, pogos naña nepim momña, pe noñal re yar tai þar wii pimi pan inu poli vena nekevan kororak na mrapplepa e lau, sane e kieta þelaga na, monar okila. Ana opisu ke sira nini, naga ke naña kevan lau e wamarana narui, a miyumuvan si mema e viluna. ⁴⁵ In na nepim momña loyuma, ko na pe otalopan ruru in re poli, sane nepe kionña erau wo tai, ana siar e pogos naña nepim loyuma, naga mligan pipina lepas þasia te lau silaga. ⁴⁶ Ko na pe oþar re ponotaninu pimi otaron pito e þaruu po, ana naga kila e lau rui. ⁴⁷ Ana nevisa ruru van ko, nevisave sira nene, kiena mlamulena viowa moki pañisi, ana nepiewo make ga rui, kila narui naga sinena sii inu keviu pañisi. Ana nepisu yaru naña kiena mlamulena viowa pe keviu re poli, nepiewoia, ana naga pe sinen sii manene inu re poli.”

⁴⁸ Ana Yesu pisa ruru mña pa sira nañani, pisa pania, sape “Kionña mlamulena viowa la naña ositom

ṗele ke ne, nepiewo make rui.”

⁴⁹ Ana pogos naṗa Yesu suṃa pisa ke visena nene, yaru taṗena la naṗa akinan ke amio la e pogos nene pe akekara re nena poli, asuṃa apragogo pan la, apisa ke asape “?Ana yaru nene sine-nan sape naga ve ai, naṗa naga pisa ke sape naga ṗar plan ke mlamulena viowa kien yar la sanene?”

⁵⁰ Ana Yesu pisa si pa sira nene yam tai, pisape “Kiomṃa naviawaena kila otol nata-maliaena rui. Ve ologe re si viowa, okilia ova narui, a suṃare kiena ne Ntewa sike amio ko.”

8

Sira la moki naṗa ataveve Yesu

¹ Ana pe yam piavi re poli, Yesu mial sina pano, pa kome pulkumali lala, la naṗa ve torokak amio la naṗa kerkeviu, a e yo punu ga naga suṃa mlologo, a suṃa mla lologena wo nasuṗenena kiena ne Ntewa pimi pa yeririna lala. Ana sane silaga, kiena nalualima taaga pa lua la ṃena asike amio e pogos nene, ² a sira la moki li ṃa naṗa la asuṃa atavevela. E sira la nene, laṗasia naṗa Yesu taṗa ruru la petan ninuna viowa lala a e inanena viowa la naṗa se e la, sa naṗa Maria nae Mak-tala, naṗa sumo yermare la olua ase e naga, ³ amio Soana, naṗa naga wona ne

yar naṗa Kusa, naṗa naga pe yerkawa na kilaen yuṃaena kiena ne Parin Suṗe Erot, a amio ṃena Susana nene. A la moki manene ke sina ga, naṗa la asuṃa amiila Yesu lala keviu paṗisi, a la asuṃa apisuar la e nalaena la naṗa asuṃa aṗar ke pan la.

Pakaiwa na kurus nen vilumṃini naṗa kekapiḷ e porotano na pe taṗena vari

Matiu 13:1-9; Mak 4:1-9

⁴ Ana e pogos tai, pupia ṗina na yeririna lala la moki amolue e kiela pulkumali la pepe taaga, ana la apimi amiervivi Yesu piora, ana naga pis pan la, kuan ṗakaiwa tai pan la.

⁵ Naga pisa sanini, sape “Yar tai sape va veven kurusia e kana lokove. Pogos naṗa peven kurusia, suṃa sisilinia, ana kurus laṗasia amloloru e mrapplepa, a sir-aunia, yar la apim amiyaloro ea, apie kare ga, a manu ṃena lala apimi ate plan make ga. ⁶ A kurus laṗasia amloloru e yo naṗa kilavaru sike ea, pitotovi pavini, ana yoko miaiai ga, komin naṗa pe wii re e yo nene poli. ⁷ A kurus laṗasia mloloru e yo naṗa sumo na pe ate plan ruru re kilika viowa e poli, ana yoko siraunia kilika viowa nene kapur ke sina ga pimi keviu, kewo make kurus la naṗa pitotovi ne e amarmare. ⁸ A kurus taṗena ne laṗasia amloloru e porotano naapo tai, ana la

apitotovi akapur mña pano-o, la añar mrasnela la moki, tol ponotia taaga.”

Ana pogos naña Yesu pisa visena la nene pñisi, naga pion manene pan la, sape “Yar naña kiligana teke ea, monar yagogon ruru visena nene.”

?Komin ya ne Yesu pis e ðakaiwa lala?

Matiu 13:10-23; Mak 4:10-20

⁹ Ana siraunia, nalogena lala apim puna Yesu apiun kinas nen ðakaiwa nene tania. ¹⁰ Ana naga pisatamñe la, pisape “Ntewa kila sanene sape vena akilia aľual nakilia wanena na kiena nasuñenena.

‘Ana e yar tañena lala, nakilia wanena la nene la atapolou asike e ðakaiwa na wa, ana la asuñña apisu pano-o, pe apisu kilale re poli, a la asuñña amiyagogo pano-o, pe amloge kilale re nena poli.’” Ais 6:9

Yesu pisavan kinas nen ðakaiwa na kurus nen vilumñini

¹¹ Ana Yesu pisavan ruru ga ðakaiwa nene pan la na wa. Naga pisapenua “Pogaga, kinas nen ðakaiwa nene naga sanini. Sur nasumo, naga kurusa, a naga na sane visena kiena ne Ntewa. ¹² A kurus la naña akekapil mrapplepa, naga na sa naña yar la ne amloge visena nene, ana kurus nowo lala mloloru pitomi e kiela sitomena lala. Ana

Parin Yermare nene pimi ðar plan ke sina ga visena la nene petan sinela lala, vena kila sane ve alelaga re sina, ve atol re si natamaliaena.

¹³ “Tañena, naga kurus la naña asike e yo naña pe kilavaru, a na nene sane yar la naña amloge lologena wo nene, amlavia, akekarania, ana sa naña ðeligas nela pe po re poli. La asuñña amlelaga yam plas ga, a visae atol pog mñarera, pona nakilaliena imi, yokorena la aloloru ke sina ga.

¹⁴ “Tañena mñena ga, naga na kurus la naña asike e lelen kilika viowa lala, a na nene sa naña yar la amloge, ana pogos naña la amial ke apa sane, ana asitom manene laa kiela malena lala, a sinelan manene mñena kilavaru, a akekaran manene mñena kekarena na yomarava la nini pañisi. Pelaga la nene apimi sane kilika viowa tai naña piwo la, ana tañatete nena kiela malena war mras naña marua ruruia.

¹⁵ “Ana na maro, naga kurus la naña sike e porotano naapo, nanene naga sa naña yar la amiyagogo ruru e Lologena Wo nene, ana amligan ruru sike e losinela lala, atarar ruru mñarera, naña ape lelaga kemua. Yeririna wo la ne sanene, la akila kiela sitomena la viayavi, ayumñae ruru mña vano-o awar mras nen Lologena Wo nene e kiela malena lala.”

*Pakaiwa na kapi vivaga**Mak 4:21-25*

¹⁶ A Yesu pisa mēna ga, pisapenua “Ita yeririna lala, visae towar kap vivaga imi, yokorena ve yar tai warwan re mēke vatanon karo tai pona sur tai sanene. Peraga, tetelan ga mēke metava vena kila yar la naña aim loyuma la avisu naña yo merarava ruru nena ga. ¹⁷ Pogaga, ana nasuņenena kiena ne Ntewa naga sane kap vivaga nene, naña nanagane suma malmalivin ita vena tegoli make suri punu ga. Suri punu ga naña tapolou sike ga wa, a nakilia wanena punu ga, yokorena la monar amolue e yepesinasa vena yar la akilia avisu kilalea. ¹⁸ Kam na monar ayagogon ruru kiau visena lala, a akilali naña asitom ruru la. Yar naña kiena suri moki rui, yokorena naga war va ve mok manene vaņisi. Ana yar naña limana plasan suri lala, yokorena naga kilalu kiena narin sur nene naña naga sitom ke sape pe kiena pa rui.”

Anenane Yesu amio wenla lala, apim asape aurelua naga

Matiu 12:46-50; Mak 3:31-35

¹⁹ Ana anenane Yesu amio wenla lala apim aporun naga e pogos nene, ana la akila pēle yon naña ava atol naga loyuma, komin naña pina la moki, kila yo

ve tokak ga. ²⁰ Ana yar la amla lelein ga visena pimi tol Yesu, asape “!Ei, anomā amio womla lala asuñalu asike vanua, sinelan asape avisu ko sumo wa!”

²¹ Ana Yesu pisatamea, sape “Naga naña pe aneu, pona pe wolai, nanene na la ga naña amloge visena wa kiena ne Ntewa, a la asuma akila ke sa naña visena nene pisa.”

Pupia lagi naña Yesu pialuņaria

Matiu 8:23-27; Mak 4:35-41

²² Ana e legiena tai, Yesu pēre nalogena lala, la apa amiyai e waa tai, ana Yesu pisa pan la, sape “Ita, yoko teva e lepas nen lapa nene lepas pāsia.” Ana la amligan yo, asuma apano, ²³ ana pogos naña waa kiriri ke pa narui, Yesu maran kawa pano-o momalio. Ana sir-aunia, pupia lagi tai miyui, miyu lapa naņani, ana pupia sive lala akilapela pano-o sive pule e pulu waa, apisu sane piowa ga narui. ²⁴ Ana apito apioņege Yesu, apisa pania, asape “!Suņe, Suņe, lavis ke tetalilu narui!”

Ana Yesu sumaļu, pialuņar lagi amio sive mārera la nene, ana sur la nene apito tano, yo mmano ruru nenaga. ²⁵ Ana Yesu pisa pan la, sape “?Awa kiamiu naviawaena?”

Ana amarau pano-o, amilan manene paņisi, ana

asumã apiuviun ke sina tan la, asape “?Aulai, yaru ya nene? Naga pis ga sanene ana lagi amio sive, lalua amlogearia. !Suwala!”

Yesu pile plan yermare moki petan yere Karasa tai

Matu 8:28-34; Mak 5:1-20

²⁶ Ana Yesu la apa atol lepas p̄asa, e naña Kalele kira ke pa ea, nanene mesmesun e yo naña Karasa.

²⁷ Ana pogos naña Yesu pa ura e yo nene, yar nae e yo nene tai pitomi pitawea, naña yar nene yermare la asike ea. Nakonua rui, yar nene pesinas ga, pe miyen re sur tai poli, a naga pe mon re e yumã poli, naga kekaran ga naña monmon ga e lotap lala, e puluve la naña amligan ke kiela tas nen yar mare la aňmẽke ea. ²⁸⁻²⁹ Ana yermare la

nene akila kare yar nene yam moki rui, kila sane yar la akirakiravanli naga silaga, a apiar e kilipan, a apiar lana amio limana e kilika panon laki, ana naga sunã kilaroro ga, a yermare la nene aňenelua naga pa m̄eke e yokorena nene.

Ana Yesu pisuia, pis pa ninuna viowa, pilelua sape ligan yaru nene. Ana yar nene pisu Yesu, pio naga, a mloru e lana, ana ninuna naña sike ea pis m̄arera, sape “?Ana Yesu, ko narina ne Ntewa na Mava, kionã ya na teke e inu? !Nepiun m̄areran pan ko, nesape ve ola re nakoena van inu!”

³⁰ Ana Yesu piun tania, sape “?Ana kionã kia ai?”

Ana ninuna viowa nene pisatamea, sape “Kiau kia ‘Yermare lala na kilaen mara.’” Naga pisa sanene komin naña yermare la naña apa e losinena la mok liu.

³¹ A ninuna viowa la nene asumã apiuviun m̄areran ke sina ga pa Yesu vena naga ve vile plan la re, naga ve kila la re ava aloru ato tano e pupia pulukapi.

³² Ana yepas nen kunus na yo nene, pupia p̄egas nen nompui lala asumã akolkol ke porotano, ana yermare la nene atagi pa Yesu, apiun m̄areran tania asape naga ligan la ga ava e nompui la nene. Ana Yesu tamãan pan la, ³³ ana la amolue petan yar nene, apa e los nen nompui lala. Ana nompui la nene aplamolue yam veraga akiriri apito e yeparpas tai, ana apiovion la apito e pupia lapa nene, atalil make e sive.

³⁴ Ana yar na visuaren nompui lala apisu sur nene, la aPURE apa umã, apisawal sur nene, ana apisa make m̄ena ga e yo la punu ga, ³⁵ kila sane yar la moki sinelan asape aimi avisuia. A pogos naña la apimi, apisu Yesu sunã ga, a yar naña ninuna viowa la aPURE petan rui naga totano teke e lana ne Yesu. Nanagane, naga miyen ruru m̄ana kulmrae wo la rui, a pimi moňau ruru nenaga, pe sirag re si poli. Pogos naña la apisu yaru nene pimi po si sanene

narui, ana amarau. ³⁶ A la naña asuņesania apisu suri punu ga, asunyu pa la naña apim mare ga na wa, apisa meraravan pan la sanape naña yaru nene naña yermare la asuņesan ea, ana Yesu kila naga pimi po si rui. ³⁷ Ana yeririna lala na lepas nae Karasa, la apisu sane piowa ga, ana la asuņa aņareran pa Yesu asape la sinelan naga molue si vetan la, komin naña sur nene kila amarau paņisi. Ana Yesu la apitovin si vena aiai e kiela waa, vena awasuņela sina.

³⁸ Ana pogos naña la asuņa apito ke narui, yar naņani pitomi piun mņareran tan Yesu sape naga sinenan sape va su lue amio naga, ana Yesu pialuņaria, pisa pania, sape ³⁹ “Peraga, komin naña popon manene ko owasuņe ko ga ova si uņa, a ova osunyu van yar lala, ovisa van la sanape naña Ntewa kila po naña po manene pan ko sanene.”

Ana yar nene paasuņe sina, a naga suņa pa miyervivi yo punu ga nae lepas na kiena pupia pulkumali, a pisawal yuņaena wo naña Yesu kila pania.

Nin sira kiena Saeras, amio sira naña tol kulsota mņana Yesu

Matiu 9:18-26; Mak 5:21-43

⁴⁰ Ana Yesu lala akusro lapa nene apa ke sina lepas paņasia, a pupia paņina na yeririna lala asuņate ke naga, ana la akekaran naña apisu

pa mņalivin la sina. ⁴¹ Ana yerkawa na kiela yuņa na lotena nae e yo nene, kiena kia Saeras, naga pimi lavisin Yesu. Ana kinai tanonia, tag pania, piun tania sape imi mņana, ⁴² vena visu nin narina naña sira, naga minana paņisi. Nin sira nene, naña yerkawa nene naga narina taaga nena nene, a kiena kas pe sur sane lualima taaga pa lua ga [12], ana kiena inanena pimi keviu manene laa narui, kila narui apisu sane laviņ ke mare ne. Ana Yesu suņalu, amio yar nene apano.

Ana pogos naña naga pa ke sanene narui, pulen yeririna na pupia paņina la nene asuņa atavevea, asuņa amiigin la piora e Yesu. ⁴³ Ana lala tai, naga sira tai, naña maiena kien sira lala teke e naga e legiena punu ga, tol kas lualima taaga pa lua [12] rui, ana pe yar re nena tai naña kilia kila ruru kiena maiena nene poli. ⁴⁴ Ana sira nene, naga mialvan ga yaru la lika, pimi pimi lavisin mņasina ne Yesu, kian limana sane, tol ga mņana isinen kulkota. Tol ga kulkota mņana Yesu sane, ana e ke e pogos ga nene, kiena maiena naņani paņisi nena ga.

⁴⁵ Ana Yesu piun ke ga, pisape “?Ane tolmare in ga na wa?”

Ana la apisapenua “Pe yar tai tol ko re poli,” ana Pita mņena ga pisa pania, sape “?Ana Suņe, sanape? Yaru la apule manene laa asuņa

amiigin la kar ga miyervivi ko pivi, asumã apavan e ko.”

⁴⁶ Ana Yesu pisa pania, sape “Peraga, yaru tai tol inu nena naþa, komin naþa in na nemninukilale sane kiau namareraena kompas pa vanua e inu pa e yaru nene þisi rui.”

⁴⁷ Ana sira nene pisu sane naga taþatete si tapolou narui, ana pimi puna ne Yesu, marau paþisi, sinen kurkur mēna ga. Naga pimi mloru e lana Yesu, ana e marana ne yeririna la naþa asike ne, naga pisawal make sur la e naga pania, sa naþa komin ya ne naga pimi tolia, a sanape naþa pimi po si rui e pogos nenē.

⁴⁸ Ana Yesu pisa pania, sape “Auya, kionã navi-awaena e inu kila ko opo si rui. Sumãre kiena ne Ntewa sike amio ko, owasuþe ko sina ova uña.”

⁴⁹ Ana pogos naþa Yesu sumã pivis ke amio sira nene wa, visena pimi pa yerkawa nene, sape “Nin narumã nene kovio rui. Popon ve oure re si pupia navianena nene imi, vena ve okila kare korenan re naga.”

⁵⁰ Ana Yesu mēna mloge mña visena nene, ana pisa pa Saeras, pisape “Ve ositom re suria, owasine ga Ntewa mārera, a yokorena nin narumã sira nene imi wo si ne.” ⁵¹ Ana Yesu pa amio yar nene apa mña, a pogos naþa apim atol yo nene, naga pisaluþar laþasa sape yoko ve ava re

loyumã amio naga, ana naga þere ga Pita, amio Yoane, a Semes, a arimanane nin sira nene amio anena, ana apa loyumã. ⁵² Pogos naþa apa loyumã apisu naþa yar la asumã sinela miye ke nin sira naþa rui, asumã ataginia, ana Yesu pisa pan la, sape “Ve atagin re nin sira nene sanene. Naga pe mare re nene poli, naga momalio ke ga ne.” ⁵³ Ana la apitalia kare ga naga, komin naþa la akilia asape nin sira nene marþantop nena rui.

⁵⁴ Ana Yesu pa tarar li-mana ne nin sira naþani, pisa pania, sape “Nin naruu, osumã li sumo wa.” ⁵⁵ Ana e ke ga e pogos nene, apisu naþa nin sira nene, kiena malena þasuþe sina pimi e naga, ana sumãlu, sumã miyaloro, ana Yesu pisape popon ala narin kinnanen tai vania. ⁵⁶ Ana arimana amio anena, amilan paþisi naþa kiela sitomena la kovio nena ga, ana Yesu pisa pan la sape yoko ve avisawal re sur nene va yar taþena lala.

9

Yesu pitetalia kiena nalogena la pepe lua

Matiu 10:5-15; Mak 6:7-13

¹ Ana Yesu pio viraviran kiena lualima taaga pa lua [12], ana pis ruru pan la, naga mla māreraena pan la, tamãan la vena akilia ataulu yermare lala, a vena akilia akila ruru maiena lala. ² Naga kila sanene vena

vitetalia la avanon alologon navesuþenena kiena ne Ntewa, a vena akila ruru namaiena lala. ³ A visen wo laþas naþa pisa pan la sumon naþa apano, sanini, naþa sape “E lepas na kiamiu mrapa, yokorena ve awarar re sur tai. Ve awar re kiamiu plasgai, pona kiamiu karo, pona kinanena, pona kilavaru, a ve awar re mamiu kulsota ve lua, yokorena ayen ga mamiu kulsota ve taaga ga naþa amiyenar ke ne.

⁴ “A ua ya naþa visae aure amiu ava ase ea, þisi na monar akekanan naþa asu amio mratava na ua nene, yokorena aligan ga ua nene pogos naþa amolue si vetan pulkumali nene. ⁵ A e pulkumali ya naþa visae la yepel mavin were amiuenta ava e mala yua lala, þisi na aligan ga kiela yo nene, a pogos naþa amolue vetania, monar atan plan puluyavi na mrapa na yo nene vetan lamiu, sane kile tai pona kiamiu visena marera tai van la, sape yoko awar nakoaena tai naþa torokin ga kiela þelaga viowa nene.”

⁶ Ana nalogena lala amolue apa narui, a asua aþaro ke e pulkumali lala, asua amlologon ke lologena wo, a asua akila ruru ke maiena lala.

Parin Suþe Erot Antipas pisayu Yesu

Matiu 14:1-2; Mak 6:14-16

⁷ Ana e pogos nene, Parin Suþe Erot mena ga mloge towe ma ya naþa Yesu la asua akila ke ne, ana naga sitom manene paþisi, komin naþa yar laþas asua apisayu Yesu, asape naga Yoane Nakeena, naga mali si petan marena, ⁸ ana taþena laþas asape naga yermarua Elaisa nanua, nane malivi si ne, a taþena laþas asape naga pe navisawalena la tai nanua sumo sumo manene laa, naþa sualu si petan marena. ⁹ Ana Parin Suþe Erot pisape “Pe Yoane Nakeena re nene poli, komin nesilua þarina rui, ana yar na apisayu ke ne, naga a si nene?” Ana sitomena nene kila naga sinenan visuen Yesu paþisi.

Nalologena la apa amlologo, ana aþasuþe la sina

Matiu 14:13-21; Mak 6:30-44; Yoane 6:1-15

¹⁰ Ana nalologena la naþa Yesu pitetalia la sape ava alologo, aþasuþe sina, ana apisawal sur punu ga naþa amiyuaenia pa Yesu. Ana Yesu þere la amolue petan yar lala, amiyepe la ve tokak ga apa e pulkumali tai, kiena kia Petsaeta. ¹¹ Ana sir-aunia, yar la amloge asape apa ke e yo nene, ana la mena ga asirau apano, apa mena e yo nene. Ana Yesu kekara ga, naga sun towe amio la, a sir-aunia pian la e lepas navesuþenena kiena ne Ntewa, a kila ruru yar la

naña sinelan ke asape popon yar tai iila la.

Yesu pagan yeririna la manu lima [5000]

¹² Ana Yesu sumña amio la pano pano-o, apisu naña mrae pito ke tano narui, ana kiena lualima taaga pa lua nene apim puna, apisape “Ei, Suñe, popon oligan pına la nene awasuñela ava mñala umña lala pona avakar ga e pulkumali la ne sike ne, vena akilia aul kala kinnanena lañasia, a vena akilia alual mñala lele na monoena, komin e yo na tesike e ne pe pon re yemalo wo ita e poli.”

¹³ Ana Yesu pisa pan la, pisape “E, peraga. Popon kam ga awar kinnanen lañas van la.”

Ana la apisatamea, apisape “! Kei! Imimi memla ke ga narin kilaparavi lima, amio narin ika lua. ? Ana visae peraga, pona ko sinomnan ke osape yoko imimi ke narui meva mouł kinnanena torokin pupia pına la nene?” ¹⁴ La apisa sanene komin yeririna la naña asike ne la moki manene laa, ana yermene ga lala pa tol sur sane manu lima [5000].

Ana Yesu pisa pan la, sape “Ava avisa va yeririna lala avisave atotano ke ne wa, atotano e ñegas lala, naña yar la lualima ve lima [50] e ñegas tai.” ¹⁵ Ana apa akila sa naña naga pisa, a yeririna lala atotano e ñegas lala.

¹⁶ Ana Yesu mla kilaparavi lima nene amio narin ika

lua nañani, kirava pa ma e peni, pisa potenania ana kawewowa, kian pa nalologena lala vena alalein akian va ñegas la nene. ¹⁷ Ana akan panpano-o mñepela kawa ruru nena ga, a kororos nen kinnanena naña akanligania, akon pa e karo popos lala tol lualima taaga pa lua [12].

Pita pisawal pisape Yesu naga Navisaarena kemua lelaga

Matiu 16:13-28; Mak 8:27-31

¹⁸ Ana pogos tai, Yesu sumña mlen ke naga taaga, a kiena nalogena lala asuñaga lavisinia, ana naga piuntan la, sape “?Asumña amloge yar la apisavisa inu asape in na ai?”

¹⁹ Ana apisa pania, asape “Lañas asape ko Yoane Na-keena, a lañas asape ko Navisawalena Elaisa, a lañas asape ko navisawalena tañena lala tai nanua sumo sumo nane naga mali si petan marena ne.”

²⁰ Ana naga piuntan la, pisape “?A sanapen amiu, kam asape in na ai?”

Ana Pita pisatamea, pisape “Ko Navisaarena kiena ne Ntewa nene.”

Yesu pisawal kiena marena

²¹ Ana Yesu pis mñarera, pisaar nena pan la, pisape yokorena ve avisawal re sur nene va yar lala, ²² ana pisa ruru pan la pisape yoko ve

sanapen naga. Naga pisape “Inu na nepe Narina ne Yeririna, a yoko nasumonena kiena ne le Israel lala, amio yerkawa kiena ne yar wa lala, amio navianen navisaluaen lala, yoko akoven lua inu, p̄isi na monar akila sur ve moki na kila kare inuena. Yoko monar awem̄ar inu nemare, ana e kana legiena na telu, yoko Ntewa visirlua inu nemal sina.”

Nalogenā kiena Yesu naga monar sitom korenan ga kiena nasinenanena lala

²³ Ana e pogos nene, Yesu pis pan la, pisape “Yar naṗa sinenan sape taveve inu, naga monar sitom korenan ga kiena nasinenanena lala, naga monar kus kiena laki torovia e legien punu ga, sa naṗa yoko inu nekus kiau, ana taveve inu luen ga. ²⁴ Nepisa sanene komin yar naṗa sinenan sape ve puluvisin kiena malena, yoko kilalu kiena malena. Ana yar naṗa taṗan kiena malena vanon inu, yoko naga taulu si kiena malena. ²⁵ Visae yar tai tol make sur wo na yomarava nini lala, ana kila pal mrapa a kilalu kiena malena, naga pe taulu re nena sur wo tai poli. ²⁶ Yar naṗa mawa e marana yar taṗena lala vanon inu pona vanon kiau visena, yoko inu Narin Yeririna ṁena nemawan yar nene e marana Ntewa e pogos naṗa nowasuṗe sina, naṗa

yoko nevitom nemio pupia naurarena naṗa pe kiau, a pe kiena ne Ata, a naṗa pe kiena ne ṁena navisi wa lala. ²⁷ Lelaga nevisa van amiu, yar laṗas asuṁal asike e nini, naṗa taṗatete amare na wa, vano-o tol pogos naṗa avisu Navesuṗenena kiena ne Ntewa imi ṁalivi.”

Tasnena ne Yesu pimi pe taṗena

Matiu 17:1-8; Mak 9:2-8

²⁸ Siraun pogos naṗa Yesu pisa visena la nene, pe sur sane legiena olua ṗaro ga na wa, ana naga ṗere Pita, amio Yoane, a Semes, la vari apa metava e ravie tai, komin sape len. ²⁹ Ana apam atol yo nene, a pogos naṗa suṁa mlen, nalogenā la telu nene apisu naṗa marana pimi pe taṗena, a apisu naṗa ṁana kulsota pilavila paṗisi, a miyuwowo naṗa miyuwowo manene laa. ³⁰⁻³¹ Ana siraunia, yermarua lalua nene Elaisa amio Mosis, lalua aṁalivi amio pupia naurarena nae ma e peni, ana lalua asun ke amio naga, naṗa asuṁa apisayu ke sanape naṗa yoko naga monar va garu Yerusalem, a monar mare vetan yomarava nini, sa naṗa Ntewa pisaaria ṗa rui.

³² Ana sumo, la telu Pita, Yoane a Semes nene asuṁa amloge marala kawa paṗisi pano-o amomalio, ana pogos naṗa atavilo sina, la amilan

sur la nañani, naña apisu pupia naurarena kiena ne Yesu, a apisu lalua naña asuñal asike amio naga. ³³ Ana apisu naña lalua nene asape aligan si yo vena awasuñela, ana Pita sinenan sape visi, ana naga mninue ña visa ya ne, ana naga pisolawe ga visen kar tai pa Yesu, pisape “Suñe, popon naña ita tesuña e nini. Popon teyuñaen silparpara ve telu e yo nini, moña tai, ñana Mosis tai, a ñana Elaisa tai.”

³⁴ Ana pogos naña naga suña pisa ke visena nene, lul tai pitomi kalo la, ana pogos naña la apisu sane apa ke loyuña e lul nene narui, amarau pañisi. ³⁵ Ana amloge visena tai molue e lul nañani, pisape “Nanene na naruu ne, naña nepisirlua naga rui. Naga ke narui monar alogear ruru naga.”

³⁶ Ana pogos naña visena nene ñisi, lul nene kovio sina, apisu naña Yesu naga taaga sike si amio la. Ana sir-aun nene, nalogena la nene apa ruru la, asuña ga sa ga ne, pe apa apisayu re sur nene pa yar tañena la poli.

Yesu pilelua yermare petan ñee tai

Matiu 17:14-21; Mak 9:14-29

³⁷ Ana e kana legiena na siraunia, Yesu amio la telu nañani añasuñela si apitom tano, ana pupia ñina na yeririna la asuñate ke naga, sinelan asape avisuia.

³⁸ Ana pogos naña apim añalivin la, lala yaru tai pion manene pa Yesu, pisape “Navianena, nepisa awis pan ko, ovisuli naruu na yermene nini, komin naña naruu wawa taaga neña nini. ³⁹ Ninuna viowa tai ne suña pimi ke e naga sanene, kila naga mlakai manene pañisi, ana miokamarmare tasnena ñarera pano-o wasirina la mlalau. Sur nene suña kila ke naga pa piowa laa, kila kare naga pañisi, a suña kila luen ga, pe mliganli re naga pa ruru pogos tai poli. ⁴⁰ In na nopure naga pa puna ne kioña nalogena lala, nepisa awis pan la vena añenelua ninuna viowa nene, ana la akilalia, amiyuñen pano-o, akila ñele yonia.”

⁴¹ Ana Yesu pisatañea, pisa pan la, pisape “?Kam la nene, sanape na sanene? Pe asuñal re nena ase Ntewa poli. ?Monar nesuña nemio kam wowe lala tol pogwai? In na sineu maren amiu rui. Ko, pogaga, oure naruña nene imi.” ⁴² Ana apa añure pimi, a pogos naña apim ga sane, ninuna viowa nañani kilapel ke sina ninis nañani, kila tasnena miyuyuwawa a ñarera. Ana Yesu pis kapuru pisoluñar ninuna viowa nañani, a kila ruru ñee nene, ana mligan si pa arimana. ⁴³ A la naña apisu sur nene, amilan manene nañareraena nowo kiena ne Ntewa nene pañisi,

naña kila po sanene pañisi pan mēe nañani.

Yesu pisawal sina ga kiena marena

Ana siar e pogos naña yar tañena la asumña apisasayu ke sur wo naña Yesu kila, ana Yesu pisa kiena visena tai pa kiena nalogena lala.

⁴⁴ Naga pisa pan la, pisape “Ayagogon ruru kiau visena nini, aligan ruru te kiamiu sitomena lala, vena ve sine-miu p̄esan re sina. Ee, nepisa ruru van amiu, nesape Ntewa mligan inu sane Narin Yeririna, ana lavis ke naña aligan inu neva e li-mana ne yaru la naña yoko aweñar inu nemare narui.”

⁴⁵ Ana nalogena lala pe amloge kilale re ya naña Yesu suña pisayu ke pan la poli wa, sa naña kana kinas tapolou ke ga wa, kila pe apisu kilale re poli, a amaraun mēna naña aviun ruru va Yesu e lepas na visena nene.

“? Añe to laa metavan yaru tañena lala?”

Matiu 18:1-5; Mak 9:33-40

⁴⁶ Ana siraunia, veveyuena tai m̄alivi likan nalogena lala, naña apisape ane to laa metavan lala tañena lañasa.

⁴⁷ Ana Yesu kilia m̄a kiela sitomena la nene, ana pio ninis tai naña pimi ke puna, ana mligan ninis nañani suñalu se yepasa, ⁴⁸ ana pisa pan la, sape “Yar naña kiena sitomena patanon inu, ana naga kekaran wereruruen

ninis nini, nanene sa ga naña kekaran were ruru inuen ga narui. A yar naña kekaran inu, naga sane kekaran ke ga naga naña mligan inu nepim. Nanene komin naña amiu ai naña kiena sitomena su tano vañisi, naga ke narui naña naga to metavan amiu make ga.”

“Yaru naña pe pialuñar ita re poli, naga suña miila ita ke ne”

⁴⁹ Ana Yoane pisa pa Yesu, sape “Suñe, mepisu yar tai, naña suña pile plan ke yermare lala, naga mēne plan la e kioñia kia. Ana yaru nene, memninue ga, naga pe ita re tai poli, ana mepialuñaria.”

⁵⁰ Ana Yesu pisa pania, pisape “Toko, visaluñaren toko, komin yar naña pe pialuñar ita re poli, naga miila ita ke ne.”

Yesu sitom̄al sape lavis ke monar va ma meta Yerusalem narui

⁵¹ Ana Yesu pisu kilale sape nanagane, lavis ke Ntewa were si naga va meta ma e peni narui, ana kila ruru kiena sitomena, sape kiena mrapa monar va ma meta Yerusalem narui.

⁵² Ana la amial apano, ana Yesu mligan kiena yar na waren visena lala la asumo apa e pulkumali tai kiena ne le Samaria lala, vena akila ruru make suria, naga sirau imi. ⁵³ Ana la ne e yo nene, la pe sinelan

re Yesu la aim e kiela yo poli, komin la pe sinelan re iilaen le Yu la naþa akom ke kiela yo poli vena ava meta Yerusalem. ⁵⁴ Ana pogos naþa nalogena lalua nene Semes lalua Yoane apisu naþa apisalupar la sa nene, lalua apiun tan Yesu, asape “Suþe, ko sinomãan osape melen mevio kapi tai ligan ma e peni vitom tano kekan la nenaga?”

⁵⁵ Ana Yesu þarpuia pis m̃arera pan lalua, pisalupar la. ⁵⁶ Ana pe apa re si e nene poli, la apa e pulkumali taþena.

Yaru naþa taveve Yesu ve kiraþatau re sina
Matu 8:19-22

⁵⁷ Ana pogos naþa amial ke e mrapa narui, yaru tai pimi pu Yesu, pisaar pania, pisape “Yoko netaveve ko e nape naþa visae ova ea.”

⁵⁸ Ana Yesu pisatamea, pisape “Lokul tetan lala la m̃ala pulus la suña ga, a manu lala m̃ala ponovi la suña ga. Ana inu Narina ne Yeririna, naþa nokom ma e peni nepitom, in na pe m̃au yo re poli, naþa neva nomonea. Visae ko okekan m̃ena malena na sanene, ko okilia oimi.”

⁵⁹ E ke e pogos nene, yaru taþena tai, Yesu pisa m̃ena pania pisape imi tavevea, ana naga pisatamea, pisape “Suþe, otamãan neva nevisuar ke ne kiau yermarua sumo wa, a visae marþan

pae, ana yoko neim netaveve ko ga na wa.”

⁶⁰ Ana Yesu pisa pania, pisape “Oligan yaru la naþa pe atol re malena poli wa ava asin kiela yar mare lala. Ana ko, oim ga teva telologon navesuþenena kiena ne Ntewa.”

⁶¹ A yar taþena si tai kila sa ke ga, kila sa naþa pisasa ga, pisa pa Yesu, sape “Suþe, yoko in na netaveve ko lue narui, ana sur taaga ga, ne-sape otamãan neva nevisa ke ne pokolemalo va la ne umã m̃au wa.”

⁶² Ana Yesu pisa visen tai sanini pania, pisape “Yar naþa suña sitom manene la m̃ana umã þarar kiena suri make ga, naga sane yaru naþa tarar ke þeligas nen waa, a silaga, suña kira þatau lue ga. Yar na sanene pe torokin re imi ve yar na navesuþenena kiena ne Ntewa poli.”

10

Yesu pitetalia yar la moki naþa la peve lua ava alologo
Matu 9:37-38, 10:7-16, 11:20-24

¹ Ana e pogos nene, kieta Suþe pisir plan si kiena nalologena laþasa. La punu ga tol lualima yam olua pa lua [72], a naga sitom ke sape ligan la nene ava sumo, la veve lua ava e pulkumali lala a e yo la naþa yoko naga sirau va m̃alivi ea. ² Ana naga pian la sanini, pisape “Lelaga, kinanena moki liu

naþa marua sike lokove, ana yar la lua la ga naþa asuñã aþar ke pitomi uñã. Monar aviun manene tan yerka na lokove nene, vena naga ligana plan re si yar laþasia la avanon awar kana kinanena la nene imi. ³ Sanene, monar ala kiamiu mrapa avano. Ana popon avisu kilale sane in na nemligan plan amiu apano, sa ga naþa narin sip-sip, naþa apanon ke vena avitawe pupia lokul tetan lala. ⁴ A pogos naþa avano, ana ve awar re kiamiu taga na varu, a ve awar re kiamiu karo, a ve awar re si kiamiu kulus nen lamiu taþena. Ava ga sa ga ne, ve asunlilue re mrapplepa va yar lala. ⁵ A pogos naþa ava añaliv e yuñã ya, sur naþa yoko avisa þesania, yoko avisa sanini, avisave ‘Suñare sike e uñã nini.’ ⁶ Ana visae yaru naþa sike e uñã nene naga sinenan suñare, yoko suñare naþa avisa kilia sike amio naga, ana visae pe yar re tai ne sanene poli, yokorena suñare wasuþe si imi van amiu. ⁷ A ve ava aulaula kare e yuñã taþena lala, ana asuñã ga e yuñã nene, a akekarana ala kinanena ya pona namunena ya naþa ala imi van amiu. Ve amawan re ala sur wo ya naþa akila van amiu, komin naþa yar na yuñãena naga mesmesun la kiena narin nalaena tai.

⁸ “Sanene na, visae kumali ya naþa ava aworu ea,

visae akekarana naþa avisuar amiu, yoko monar akekarana ga kinanena ya naþa sinelana asape ala van amiu, ⁹ a monar akila ruru namaiena la e yo nene, a monar avisa van la, avisave ‘Nanagane, nasuþenena kiena ne Ntewa pimi ke lavisin amiu, nanagane Ntewa pimi pe kiamiu Suþe narui.’

¹⁰ “A pogos laþasia, yoko aworworu e pulkumali tai, ana yoko ve akekarana re naþa aure amiu ava asike amio la. Visae sanene, amiu ataveve pupia mrapanene ava e yepesinas na pulkumali nena, a avisawal va kana yar lala, avisave ¹¹ ‘Puluyavi na mrapplepa na kiamiu yo nini, imimi metan plan petan lamimi lala, sane kiamiu kile nasitoñalen tai. Monar ve sinemiu þesan re, sane lavis ga navesuþenena kiena ne Ntewa imi pun amiu narui, ana pe sinemiun re poli, ana akilalu narui.’

¹² “Nevisa lelaga van amiu, e legiena na liþereena, yokorena la ne sanene la ava e nakoena tai naþa mārera manene laa taulu nena naþa la nae pulkumali naþa Sotom nanua yoko awaria.”

Yesu pisayu la naþa pe amlelaga re e naga poli

Matiu 11:20-24

¹³ Ana Yesu pis mārera pa yeririna na kumali taþena laþasa, pisape “!Le Korasin, amio le Petsaeta, akila kare

manene amiu paṽisi wa! Visae le Taea amio le Sae-ton lala avisuli ga kile la naṽa kam na apisu ṽisi rui, vera na avilopu la nanua rui. La pe ape le Yu re poli, ana vera na la ayen ṽilili karo a akuan yavi e ṽarila rui, pona atotano mā sanene ana yaru la avisu sane sinela piowagan kemua kiela mlamulena viowa la lelaga. ¹⁴ Nevisa van amiu, e pogos naliṽereena, yokorena kiamiu nakoena naga taulu nena naṽa kiena ne la nene.

¹⁵ “!A amiu le Kapeneam la naṽa aṽarwar amiu paṽisi, naṽa sinemiun asape avisir plan amiu asu manene metava, avisuar amiu! Yoko Ntewa koven amiu ato laa tano rui e pulus nen kapi.”

¹⁶ A Yesu pisa mēna pan la, pisape “Yar naṽa visae yoko logear amiu, naga suṽa mlogear in ke ne, a visae yar naṽa yepen mavin amiu, naga suṽa yepen mavin in ke ne, a yaru naṽa visae yepen mavin in ke sanene, naga suṽa yepen mavin ke yerkaṽa naṽa naga mligan inu nepim.”

Ana e visena la nene, Yesu mligan yar nalologena lala apanon akila yuṽaena.

Yar nalologena la aṽasuṽe la si narui

¹⁷ Ana yar nalologena la nene apa akila yuṽaena wo la moki, ana siraunia aṽasuṽe la si apim puna Yesu, naṽa apulen manene

kekarena e sur punu ga naṽa akila rui. Aṽasuṽe la, apisa pa Yesu, asape “! Suṽe, memiyuṽaen sur la e kioṽa kia pa tol naṽa yermare mēna la asu vatanon imimi!”

¹⁸ Ana Yesu pisataṽe la, pisape “Ee, kieta yuṽaena sanene narui. A in mēna ga, noṽal Yermare molue ma e peni, akoven lua naga pitomi tano sane yekarpla tai.

¹⁹ Nanagane, in na netamān pan amiu rui, nesape akilia avieyar loṽara amio logovi, a māraena kiena ne kieta nasinekar sike mēna vatanon lamiu, ana taṽatete sur tai kila kare amiu. ²⁰ Ana ve awarwar amiun re ya naṽa in na netamān pan amiu, naṽa ninuna viowa la asike vatanon amiu, ana sur taaga ga naṽa akilia aulen manene kekarena vanonia, na naṽa kiamiu kia lala asiri plan sike loyuṽa e tus namalena rui.”

Yesu pisa potena pa Ari-mana

Matiu 11:25-27, 13:16-17

²¹ Ana e pogos nene Ninuna Wa kila sinena ne Yesu kekara paṽisi, ana Yesu mlen, pisape “!Ata o, ko ope Suṽe nae ma e peni a Suṽe nae yomarava nini! Nevisa potena van ko, Ata, vanon sur la naṽa e lepas na pun inu, okila meraravan pan la naṽa kiela sitomena sa ga nin sisi lala, ana yaru la naṽa asitom asape ape manmarua a la naṽa asape akilia

ruru suria, ko okilawan sur la nene van la. Lelaga þa Ata, nanene na sa ga naþa ko sinoñania.”

²² A Yesu pisa mñena pan la, pisape “Ata mligan suri punu sike e lumñau rui. A Ata naga taaga naþa kilia inu sape in na ai, a inu naþa nepe narina, in ga taaga naþa nekilia ruru naga, ne-sape naga ai. Inu nemio la naþa ne nemliganar la vena nekipian la e Ata vena awasine naga, imimi la nene narui naþa mekilia ruru naga naþa pe Arimamimi.”

²³ Ana Yesu pilon pa puna ne kiena nalogena lala, pragogo ga pan la, la ga amloge, pisape “Ntewa kila po pan amiu paþisi, naþa akilia avisu suri la nene. ²⁴ Navisawalena la mok liu amio þarin suþe la mok liu nanua sumo naþa la sinelan manene paþisi asape avisu sur la nene, ana pe apisuli re pogos tai poli, a aþaryon asape aloge mñena sur la nene, ana la pe amloge re nena poli.”

Pakaiwa naþa yere Samaria sinen miye yere Yu tai

Matiu 22:34-40; Mak 12:28-31

²⁵ Ana pogos taþena si tai, yar tai naga pe manmarua ruru e navisaluaena, naga pisape kilali Yesu e naviunen mñarera tai ana naga suñalu,

piun tan Yesu, pisape “?Navianena, visae sineun ne-sape nekilali netol malena naþa pe luas re poli, yoko monar nekila ve sanape?”

²⁶ Ana Yesu pisatañea, pisape “Ana kieta Tus Wa pisa ya ne e lepas nene? ?Ko opuloia opisu pisa sanape?”

²⁷ Ana yar naþani pisatañea, pisape “Tus Wa pisa sanini, pisape: Ntewa na mava naþa naga pe kioñña Ntewa, ko monar sinemña si naga, oligan naga to sumo e losinemña wetelu, a e kioñña malena wetelu, a e kioñña mñareraena wetelu, a e kioñña sitomena wetelu, a ko na monar ositom nalavis pumña lala, okila wo van la, sa naþa ko ositom ko ke ga.”

²⁸ Ana Yesu pisa pania, pisape “Ee, opisa mesmesun nena narui. A visae okila ve sa nene, yoko otol malena nane opiun ke ne.”

²⁹ Ana yar nene kilia sape naga pe kila re mesmes sanene poli, ana naga kilali naþa kila pisape mminue ga, piun tan Yesu, pisape “?Ana a la ne asike lavis pun inu naþa monar nekila wo van la?”

³⁰ Ana Yesu pisatañea kiena naviunena nene e þakaiwa tai, naþa pisape “E legiena tai, yar tai molue ma Yerusalem, suñña mialoro pito garo Seriko. Ana naga mialoro mña sanene pano tol yomñarera tai, ana milan þegas nen yar na vinauen tai, naþa apulania, añe kare

naga pañisi, añar plan make kiena suria aņure, amligan naga marluia mēke kiena mrapa komsusa. ³¹ Ana kieta yar wa tai, naga mēna mialoro e mrapa nene naga siraun pimi, ana pogos naņa pimi lavisin yar nene, naga miyepe ga pa e isinen mrapplepa, mial țaro pano. ³² Ana siraunia, yar taņena mial pimi. Naga pe Livae la tai, naņa asuņa akila ke yuņaena make ga e Yuņa Wa mēna ne Ntewa, ana pogos naņa pimi tol yar naņani, naga mēna ga yepen mavin iilaena, miyepe ga pa e isinen mrapplepa mial ga țaro pano. ³³ Ana siraun sina, yar taņena, naņa naga suņa mlilu kiena mrapa viavi tai pimi. Naga pe yere Samaria tai, ana sa naņa tekilia, yar la nene pe ape erau wo re amio ita le Yu la poli. Ana pogos naņa pimi tol e yo naņani, pisu yar nene marlu mēke e yo naņa aņe ea, ana sinen miye paņisi. ³⁴ Ana naga pimi lavisinia, kevan lele la naņa la nene aņea, plan sirveve e magka la naņani, piar ruruia. Ana tarlua yar nena, mligan mon meta e kiena togki, ana mial mēna amio pano-o tol yo tai naņa yuņa na varuruen tai mēke ea. Ana țere naga pa loyuņa ea, miila naga po paņisi. ³⁵ Ana kolulagi, țar kiena varu tai, kian pa țar na yuņa na varuruena naņani,

pisape 'In na monar neva si e kiau mrapa narui, ana yar nene yoko sike e lumoņa sumo wa. Ovisuar ruruia e sur punu ga, a visae varu nene ve torok re, yoko in na nevisuveve si e pogos naņa nowasuņe si e kiau yalena nini.' "

³⁶ Ana Yesu piun tan yar naņa piun naviunena nene pania, pisape "Opisu suniena nene sanape? ?E yar la telu naņa amiyal e mrapa naņa yar nene mēke ea, yar ai naņa kila pania sa ga yar tai naņa mēke ga lavisinia?"

³⁷ Ana yar naņa pisape "Nesitom nesape yar naņa sinen miyea, a miila."

A Yesu pisa si pania, pisape "Ore, naga ke narui, a ko mēna ga, ova otaveve kiena țelaga wo nene."

Mareta amio Maria

³⁸ Ana e pogos naņani, Yesu amio kiena nalogenala lala amiyaloro ke apa ma Yerusalem, ana apa aņal mēnaliv e narin pulkumali naņa Petani, ana sira naņa Mareta țere Yesu pa mēala uņa. ³⁹ Ana pogos naņa Yesu pa sike amio la nene, luena ne Mareta nene tai, kiena kia Maria, naga totano ga teke lavisin lana ne Yesu, toņa miyagokon ruru ke kiena navianena lala. ⁴⁰ Ana e pogos nene, Mareta naga pe toņa miyagogo re poli, ana naga suņa mēareran ke sape kila ruru make sur punu ga suņate

Yesu, a naga sitom manene laa e yuñāena la nene. A siraunia, pimi pisu Maria to ga tano toñā ga, miyagogon ñā Yesu, ana pisa pa Yesu, pisape “Suḗ, luou nañā to koren ga toñā sanene, ana in ga taaga nekila make suria. Pona ko opisu kilale re poli yo, ana popon ovisa vana vena imi iila inu.”

⁴¹ Ana kieta Suḗ pisa-tañea, pisape “Mareta, ko sireyar tai naḗa ositom manene sur paḗisi, a omloge piowagan manene sur moki laa na sanene wa. ⁴² Ana sur taaga ga toñā ga naḗa yoko ko ositom manene urmi ea, nane suri ne nane Maria ñal rui e kiena malena, ana yoko in na taḗatete si nelalua vetania.”

11

Leniena naḗa Suḗ pian ita ea

Matiu 6:9-13

¹ Pogos tai, Yesu pa mlen e yo tai, ḗisi ḗasuḗe pit-omi, ana kiena nalogena tai piun tania, pisape “Suḗ, visae okilia ovian imimi lia vena imimi ñēna mekilia melen, sa ga naḗa sumo na Yoane pian kiena nalogena lala vena alen, vera na wo vaḗisi.”

² Ana Yesu tañān, pisape “Pogaga, visae sinemiun leniena, akilia avisa sanini, avisave:

‘Arimamimi, torokin ke-mua naḗa imimi mevatanon kioñā kia wa.

Memlen mesape kioñā navesuḗenena imi.

³ Mepiun tan ko, mesape ola kinanena van imimi ḗane a e legiena punu ga.

⁴ A oviewo kiamimi mlamulena viowa lala, komin imimi mepiewo ke la naḗa akila ke piowa pan imimi.

A ve oligan re suri la imi akilali manene imimi.’ ”

Pakaiwa na viunen suria

⁵⁻⁶ Ana Yesu pisape monar ve amaraun re viunen sur tan Ntewa, ana pisa ḗakaiwa tai pan la, pisape “Visae kolemalo koe yepe lilika tai, oilan ga kioñā erau tai yal imi tol yo puñā. Ana pe koñā kinanen re si poli, ana monar okirir ova pun yuñā tai naḗa ñēke lavisin ko, monar oviun manene tania, ovisave ‘Wolai, kiau erau tai pimi porun in ga nagane na wa, ana in na luñāu plas nena ga. In na pe kau kinanena re si naḗa nekilia nela van kan poli. ?Ko na koñā kinanen tai toñā ga okilia otañān van inu sumo wa?’ ”

⁷ “Ana sanape, tesitom tesape yoko yaru nene kilia visatañē visave ‘Aa, ve okila re yuñāena ñarera sanene van inu. Opisu ke ne, moko-tava rui, ana memio nin sisi la, momēke e ñamimi tog rui, ana taḗatete si nesuñāl narui.’ Ana peraga, yaru nene taḗatete visa sanene.”

⁸ Ana Yesu yakol si visena van la, sape “Pona pogos tai yaru tai kilia sitom korenan

ko, yepen mavin iila koena vanon ga ko na osike lavisinia. Ana visae ve omawan re naþa oviun kaþaran ma sanene vano vano-o, yoko yar nene monar la ya naþa opiun ke ne van ko.”

Yesu pisayu naviunen suri tan Ntewa

Matiu 7:7-11

9-10 Ana maran taaga e þakaiwa kiena ne Yesu nene, naga pisa ke sina pan la, pisape “Yaru naþa piun ke suria, naga tol silaga, a yaru naþa kale ke suria, naga mǎlia, a yaru naþa sigariga ke mratava, pulutava pietava pan silaga. Visae sanene, yoko akilia awar ya naþa apiun tan Ntewa, a alual ya naþa akale ke puna, a mratava naþa asuǎa asigariga ke ne, vi-etava van amiu. 11 Visae naruǎa tai viso karia, viun narin ika naþa teke ne, taþatete ola lomara vania, 12 pona visae naga viun kopululus nen lakaporo naþa teke ne, taþatete ola logovi tai van kania. 13 Lelaga naþa kam na ape yar viowa ga lala, ana amiu yar tai taþatete kila sanene, asuǎa akekaran ga naþa ala suri wo la va narimiu la silaga. Sanene, pogos naþa aviun tan Arimamiu nae ma e peni, naga kekara manene la a naþa la Ninuna Wa van amiu naþa ape narina lala.”

Apisape Yesu miyuǎae ke ga e namareraena kiena ne Yermare

Matiu 12:22-30; Mak 3:20-27

14 Ana siraunia, aþure yaru tai naþa yermare pa e naga pimi puna Yesu. Yermare nene kila yar nena pe pis re poli, ana Yesu pilelua yermare naþani petania, ana naga pis ruru sina, kila yar la naþa apisu sur nene amilan paþisi. 15 Ana la þas apielue, ana apisalele kare Yesu þisa, apisape “Yar nene pile plan ke yermare lala e ga e namareraena naþa suþe kiena ne yermare lala, naþa kiena kia Pielsipel, tamǎn pania.” 16 Ana la si þasa, la mǎna asitom piowa e Yesu, ana asuǎa akilalia, sinelan asape amarerania vena kila kile tai nae ma e peni avisuia.

17 Ana Yesu mloge kilale kiela sitomena lala, ana pisape “Visae suþe tai, kiena yeririna la aliþere la, naþa laþasia akawe laþasia, yoko yuǎaena kiena ne suþe naþani monar loru. A visae uǎa tai, asuǎa aliþere la, naþa laþasa asape aǎene plan laþasa, yoko la nene taþatete asu ruru pog tai. 18? Sa mǎna nini, visae yermare kiena ne Yermare Lego la asuǎa amliþere la ke rui, ana yoko nasuþenena kiena ne Yermare Lego suǎalu ve sanape ne? !Kam na apisa ke sur pa sanene

narui, asape in na nesuũa nomene plan ke yermare lala e namareraena kiena ne pupia yermare naũa Pielsipel, ana tařatete nena ve sa nene řisa! ¹⁹ ?A visae ve sa kemua naũa apisa, ana komin ya naũa kam la řasa asuũa aņene plan ke yermare? ?Ane taņan mareraena nene pan la, pona yermare ma nene yo? Popon sa kiamiu nalogena la naũa aņene plan ke yermare lala aloge kiamiu visena la nene. ²⁰ Ana peraga, apis pe po re nene poli. In na nesuũa nepile plan ke yermare lala e ga e namareraena na limana Ntewa, a sur nene na kana kinasa sane navesuņenena kiena ne Ntewa sike likan amiu rui.

²¹ “!Apisu ke ne! Sa naũa visae pupia yar marera tai, naga war kiena pupia suri na mara lala, naga suũa kirawo ruru ke maņa yuũa. Ana sur kiena ne yar nene su ruru ga suũa e kiena kove. ²² Ana Yermare Lego kiena yuũaena naga sa ga nene. Visae yar marera taņena imi naũa marera laa taulu naga sane, yoko lalua akila ma mara vano naga taulu Yermare Lego, ana yoko kilia war plan kiena sur na mara lala, naũa naga řasine řesania, a yoko naga kilia war make sur la naũa sike loyuũa e kove nene ve kiena, ana liņere va kiena yeririna lala.

²³ “Yaru naũa pe taveve in re poli, naga sane suwo in ke ne, a yar naũa pe miyuũae re amio in poli, vena moure kiau yeririna la aim lele taaga, naga suũa mēene tetain la ke ne.”

Ninuna viowa kilia wasuņe sina imi

Matiu 12:43-45

²⁴ Ana Yesu pisa maņa ga, pisapenua “Pogos tai, pog naũa aņenelua yermare e yar tai, yermare nena kilia va yomarua vena kaleli yo tai naũa va se ea ve maņa uũa. Ana visae ve lual re, yoko naga visavenua ‘Aa, yoko neto li si e maņa uũa marua na sumo.’ ²⁵ Ana pogos naũa pitomi, yoko naga lual sane akilavan ruru ga maņeke na, akila ruru make sur la e yuũa naũa řisi rui. ²⁶ Ana yoko naga va were si yermare taņena la ve olua naũa apiowa manene laa taulu naga sane atom amio, ana yoko ava si asike los nen yar nene. Ana yar nene nanua sumo kiena malena piowa, ana siraunia kiena malena piowa manene laa sane.”

Mrapa na tolen kekarena naũa lelaga

²⁷ Ana e pogos nene, sira tai sike amio la naũa apisu ke sur la nene, a naũa amloge ke visena kiena ne Yesu lala, ana sira naņani kekaran pařisi. Ana pion manenea, pisape “!A kee, anomũa naũa řar ko, a mla

yu pan ko, navisa ruruena kiena ne Ntewa keviu paṽisi pania, naṽa naga ṽar sisi tai sane ko.”²⁸ Ana Yesu pisa-taṽea, pisape “Ee, nanene na lelaga, ana nevisa van ko, nesape navisa ruruena kiena ne Ntewa va ve keviu manene laa sanene sike e yar ai naṽa logear visena lala kiena ne Ntewa, a naṽa kila ya naṽa naga sinena-nia.”

Yar la naṽa sinelan visuen kile

Matiu 12:38-42; Mak 8:11-12

²⁹ Ana e pogos nene, ṽina la naṽa amiagogon ke Yesu asumā apim la mok manene laa narui, ana Yesu kilia ṽna naṽa sane la moki naṽa apimin ga avisu kiena kile lala, ana pis pan la, pisape “In na nepisu sane lus na yeririna nanagane lala la apiowa laa. La sinelan asape avisu ga kile lala, ana peraga, Ntewa taṽatete nena la kile tai van la vena avisuia. Ana kile kiena ne navisawalena Sona nanua sumo, naga ga nene akilia avisuia.

³⁰ Ntewa mligan Sona, naga sane kile tai kiena ne la nae Ninive nanua sumo, ana naga mligan ṽna inu Narina ne Yeririna nepimi sane kiamiu kile na nagane tai.

³¹⁻³² “Ana le Ninive la nanua sumo amloge visena kiena ne Sona, la apilopu la e pogos nene, a yoko la nene asumālu ase e legiena na liṽereena, la avisa lologia

kiamiu naviowaena, komin yar tai naṽa naga to laa metavan Sona naga sike amio amiu, ana pe apilopu amiu re nena ga.

“A nanua ṽna sumo naṽa sira kawa tai pe ṽarin suṽe tai naṽa molue e kiena purvanua naṽa sike koperin paṽisi, pitomi tano vena loge visena na manmaruaena lala kiena ne yermarua ṽarin Suṽe Solomon. Ana sira kawa ṽna naṽani yoko naga sumālu se e legiena na liṽereena nene ana visawal ruru nena kiamiu naviowaena lala, komin naṽa yar tai naga to laa metavan Solomon naga sike amio amiu, ana pe sinemiun re nena naga poli.”

Pakaiwa lua e lepas na kapi vivaga

Matiu 5:15, 6:22-23; Mak 4:21; Luk 8:16

³³ Ana Yesu pisa ṽna, pisape “Pogos naṽa tesilan kapi vivaga, ve tesilan re ga ṽisi na teva towarwan meke e ṽiliṽili tai e porotano, pona takalo si e piaki tai, ana tesilania vena tetelan to metava, vena visae yar imi loyūṽa ana lual naṽa kapi vivaga nene tegoli make nena yo.”

³⁴ Ana Yesu pisa ṽna, pisape “Kilamaran yar naga sane yo taaga ga naṽa yomerava pimi ke loyūṽa e tasnena. Sanene, visae kilamarāṽa merarava ruru wo, visu ruru nena sur lala, yoko ve sa naṽa tasnēṽa pulemamaga nena

e yomerarava. Ana visae kilamamaña viowa, pinaia sur la punu ga naña sumña pisuia, yoko ve sa naña losinema pulen nena yemalolo. ³⁵ Visae sanene monar avisuar ruru amiu, vena kapi vivaga naña teke e losinemi ve imi re si ve sa yemalolo. ³⁶ A visae losinemi la ulen ruru luę ga kapi vivaga silaga, naña ve narin malo re nena tai teke ea, yoko kiami malena tego ruru nenaga, tegoli make yo punu ga.”

Yesu pis marera pa li nasumonen nalotena lala

Matiu 23:1-36; Mak 12:38-40; Luk 20:45-47

³⁷ Yesu pis ma pa pina la pa sanene, ana Varasi tai naña toma miyagogonia pisa pania pisape yoko were va mana, kila kinanen tai vania. Ana amio Yesu apano, ana pog naña kinana su ruru pa sike na, ana Yesu pa totano e lelen kinana. ³⁸ Ana e pogos nene, Varasi lala la sane monar atarar marera navisaluaena tai naña sane yar monar taveve mrapa laasa nakevanen limana, pisi na kilia kinana. A Varasi nañani sitom pisape Yesu naga pe yaru wa tai, naga monar kila ve sa naña kiela pelaga marera nene pisa, ana pogos naña pisu sane Yesu pe sitom manene re kilaen poli, naga milan manene pañisi. ³⁹ Ana Supe pis pa yar nañani, pisape “In na nekilia make kiami pelaga le Varasi la rui.

Amiu na sinemiun manene asape akevan ruru mamiu piala amio kami pialora la silaga, ana apilaven pañisi, asitom ke asape kam na amekik pañisi ne, a ape yar wa. Ana pupia kororaki sike e amiu na wa, komin losinemi lala pulen kilakotaliaen yaru, a nakila kareen yaru, a pelaga viowa la ne sanene. ⁴⁰ !E, ve ave wowe re sanene! ?Pe apisu kilale re naña asape Ntewa nene naña si make sur na vanua e sur punu ga, naga si mena loyuma na sur make ga, ana po pañisi naña visae akila yepas nemiu la punu ga ikik ruru nena wo lelaga, vanua amio loyuma. ⁴¹ Sur nowo la naña asuma akokonia manene ke e kami pialora amio mamiu piala lala, visae aliwere re ga laasa va yar la naña limala plasia, vera na wo na wo. Visae ve sanene, pona yoko avisu kiami sur la imi ikik ruru yo rui, ana ve amareran re si kilaen kiami pelaga tapena laasia.”

⁴² Ana Yesu pisayu pelaga navisokanena kiena ne li na sumonen na lotena lala pa laa sane, pisape “!Amiu le Varasi lala, o! Akila kare amiu pañisi wa, yoko viowa manene laa van amiu. In na nekilia ma naña apisuar ruru ke silaga, asape visae awar kami kinana ve lualima, yoko monar tai va e yuma mana Ntewa, sa naña navisaluaena sumña pisa, a asuma akila ke sanene e kami sur punu ga, pano-

o tol mēna narin mās nen kapis lala a sur mēna la naḡa sane mrasil. Ana sur kerkeviu la naḡa navisaluaena pisa, kam na pe asitom re nena poli, sa naḡa pisape monar amesmes ruru wo, a monar sinemiū si Ntewa a yar taḡena lala. Visae sine-miun uararen narin sur la nene mārera, naga pogaga, ana pupia sur kerkeviu la nene popon visae asuḡa akila ga rui, ana pe akilali re nenaga.

43 “!Amiu le Varasi lala, o! Akila kare amiu paḡisi wa, yoko viowa van amiu vaḡisi. Loyuḡa e yuḡa na leniena lala, sinemiun asape ato luen ga tano e lelen yerkawa lala, a visae ayaloro e marana yeririna lala, sinemiun asape monar avatanon amiu, avio ruru amiu, avisave ‘A ke, navianena wo, pokolulagi!’ 44 Yoko viowa manene van amiu vaḡisi, komin naḡa kam na sane suri korena ga, kam na sane lotap marua la naḡa yaru la sinela ḡesan rui, ana amialor ke ga meta ea, pe apisu kilia re asape suri kona tai menunū mēke tano e poli.”

45 Ana e poglis nene, yar tai naḡa pe manmarua ruru e navisaluaena, naga mēna suḡa miyagogonia, ana mloge sane visena kiena ne Yesu tol ruru naga amio mēna la naḡa amiyuḡae ke sane naga, ana pisape “!Navianena, nemloge sane sinoḡan osape ovisa kare imimi towe mēna ga!”

46 Ana Yesu pisataḡea, pisape “!Ee, yoko viowa mēna van amiu li navisaluaena lala! Asuḡa apisir plan ke sina narin navisaluaena lala e lepas nen nalotena silaga, sane sur urmi la naḡa asuḡa akuanpolo sike e māsina yar lala asape monar awaria, ana amiu, asuḡa ga sanene, pe akululun re nena mrasilmamiū tai vena akilali naḡa aiila la. 47 Yoko viowa nena van amiu, komin naḡa kam na asuḡa amiyowauia ruru ke tampona kiena navisawalena la kiena ne Ntewa, ana amiu na maran taaga ga sa ke repimiū marua la nanua sumo, naḡa la ke narui naḡa aḡe moḡar navisawalena la nene. 48 Kam na amio la nene maran taaga, komin nanua sumo, yermarua la nene la aḡe moḡar navisawalena lala, ana nanagane kam na akekarān ke yuḡaena ken la nene, kam na asikol ke si ne naḡa asuḡa amioa ke kiela tampona lala.

49 “Kam na sane na visena na manmaruaena kiena ne Ntewa naḡa pisa nanua sumo, naḡa pisape ‘Yoko neligan kiau navisawalena lala a kiau li nalologena lala imi van la, ana yoko akila kare la, pona yoko awe moḡar la.’ 50 Visena nini, kana kinasa sane yoko kam ke narui naḡa akus nakoena kiena ne nawemāren navisawalen la punu ga naḡa repimiū na sumo lala aḡe moḡar la, siar e nasiaren purḡes nen yomarava nini. 51 Naga

nene siar e Epela nene, pimi tol Sakaraea naña repimiu la nene añemñaria likan wonta amio yo wa loyuma e yuma wa mana ne Ntewa. Lelaga nane nevisa van amiu ne, sane nakoena na kuruta kana navisawalena lala kiena ne Ntewa sike e kam nanagane.

⁵² “Ee, piowa pan amiu yaru na kilia ruruen navisaluaena lala, komin kam ke naña amlawan ki na pulutava na kiliaena, ana kam na pe apa re si loyuma e poli, a asuma asuwo ke mrapa pan yar tañena la naña sinelan asape ava loyuma.”

⁵³ Ana Yesu pisa pa visena la nene, molue petan yuma nene pano, ana navianen navisaluaena lala amio Varasi lala sinela mlaean naga pañisi, naña sinela mimi kar pañisi. Ana la apanon Yesu silaga, asuma akuan ke visen marera a naviunen marera la pania vena ayurli naga, ana akilali mena naña asape naga visa visena lañasa naña ve mesmes re. ⁵⁴ La apanon Yesu sa naña naga pe sur tetan tai, komin naña sinelan asape alual kiena visena lañas naña torokin aliñere naga vanonia.

12

Navisawanena lala naña tapolou yoko aim akate e yometava

Matiu 10:26-27

¹ Ana ñina la apim ke puna Yesu na wa, la ataulu manu mok liu, a poglis naña apim ke lele taaga sanene, yo ve tokaki ga, a asuma apieyepal kare ke ga lala lala. Ana pogos naña Yesu pe pis re pan la poli wa, pis ñesan pa kiena nalogena lala, pisape “Kam na avisuar ruru amiu e ñelaga viowa kiena ne Varasi lala, komin naña la asuma apivis ke ga e gola, la asuma apis vilave ke sanene, ana apisokan ga ne. Pelaga viowa kien la nene kilia va tolkare yar tañena lala, sa naña is na kilaparavi naga ve tokak ga ana ñarmake puluyavi na kilaparavi nene veraga. ² Sur viowa make ga naña yar la ne sanene asuma amiyumaen vinaun ke na, pona naña apisawan ke ga, yoko amolmolue e yo metava na wa, vena yar punu ga akilia. ³ Visena ya naña yar pisa ke ga e yemalolo, yoko monar aloge sina ko legiena, a sur la naña yar pisa mumun ke ga mana loyuma, yoko monar avion manene si va metava e maran yar make ga, vena yar make ga akilia aloge.”

Nalogena kiena Yesu naga monar ve maraun re yaru

Matiu 10:28-31

⁴ Ana Yesu pisa mena pa kiena nalogena lala, pisape “Erau lala, nevisa van amiu sanini, nesape ve amaraun re la naña akilia awenar

ga tasnemiū mare, ana sir-
aunia taṓatete si akila sur
tai ya ninumiū. ⁵ Ana in
na sineun nesape nevis ruru
van amiu nesape yoko ama-
raun yar ai? Yoko monar
amaraun nena Ntewa, naṓa
naga kilia kilaṓar ṓesan tas-
nemiū sumo, a siraunia kilia
kuan ninumiū vito e lele na
logeen viowa. Lelaga ṓa,
yar ne nanene na moṓar
amaraunia. ⁶ Ana visae ama-
raunia, yoko taṓatete si ama-
raun sur tai, komin Ntewa
na sumā pisuar ruru amiu
ṓaga, sitomāl amiu ṓaga.
Asitomli narin ninlaea la
naṓa la moki kar ga asike
ne, sa ga kororaki, a yar la
asumā aṓiliwilin ke la lima
e ga e narin varu tai, ana
Ntewa naga sitomāl make
la ga peve taaga silaga, pe
sinen ṓesan la re nena poli.
⁷ A vilṓarimiū ṓena lala,
moki paṓisi, ana naga polo
make vilṓarimiū la peve
taaga na sike ne. A Ntewa
na pisu amiu na po paṓisi,
taulu ninlaea la nene, ana
yoko visuar amiu e sur punu
ga na kiamiū malena lala.”

*Yar naṓa pisawal pisape
naga pe kiena ne Yesu*

*Matiu 10:32-33, 12:32,
10:19-20*

⁸ Ana Yesu pisape “Yar a
naṓa pisawal e maran yar
lala pisape naga pe kiau tai,
yoko inu Narina ne Yeri-
rina inu ṓena nevisawal e
marana ne navisi lala nae
ma e peni nevisave yar nene
naga pe kiau. ⁹ Ana yar a

naṓa pisawal e maran yar
lala pisape pe pe kiau re
poli, yoko inu Narina ne
Yeririna inu ṓena nevisawal
e marana yar lala nevisave
yaru nene na pe pe kiau re
poli.

¹⁰ “Mlamulen viowa amio
visen viowa lala, a visena
naṓa kila kare inu Narina ne
Yeririna, Ntewa kilia viewo
ke yar vanon na wa. A
yar naṓa kila kare sur wa
kiena ne Ninuna Wa, pisayu
yumāena kiena ne Ninuna
Wa pisape Yermare Lego ga
miyumāenia, yar na sanene
Ntewa taṓatete viewo pogos
tai.”

¹¹ “A visae pogos laṓasia,
yar la sinela kar amiu, yoko
avis van amiu. Yoko aṓ-
ilia aure amiu ava asumāl
ase maran yerkawa lala na
yumā na leniena, pona ku-
mali, ana ve asitom manene
re avisave yoko akilia avisa-
taṓe la ve sanape ne, pona
yoko avisa visena ya na van
la ne. ¹² E nena e aora ga
nene, yoko Ninuna Wa ga
iila amiu, vian amiu e visena
ya naṓa akilia avisa.”

*Pakaiwa na yaru na sur
moki naṓa pe sitom ruru re
kiena malena poli*

¹³ Ana yaru na ṓina nene
tai pion ke pa Yesu, pisape
“Navianena, wolai sumā kila
kare in ke ne, pe mliṓere
ruru re lalimana arimamimi
pan in poli. Popon ovisa
vania monar kila mesmes ga
van inu.”

¹⁴ Ana Yesu pisatamea, pisape “Peraga yaru, sur nene ve in re na nekila. In na pe nepe yar na lipereen re yar poli.” ¹⁵ Sanene, Yesu pe kila re sa naña yar nene pisa poli, ana mla visena tai pan la e lepas na sine-sunen manenea. Naga pisape “Monar avisu ruruia, pe pon re avieluen manene yar tañena la poli, sinemiun manene laa asape awar kiela sur lala. Kieta malena pe su re e sur moki la naña towar poli, ana kieta malena na sumal ga sike e sur tañena.”

¹⁶ Ana e nene Yesu sikol kiena visena pa laa sane, naga pisa ãakaiwa tai pan la, pisape “Yar na sur moki tai, kiena porotano keviu pañisi, a po mēna pañisi, ana kana lokove la ãar kinanen moki pañisi. ¹⁷ Ana yar naña pisu kinanena la nene, sitom ãele narui, pisape yoko naga kila ve sanape ne, yoko ligan ruru kana kinanena la nene su pe ne, komin kiena yumā na kinanena lala a kiena yo tañena la puleule make rui. ¹⁸ Ana yar nañani pisape ‘Yoko nowe plan ga kiau yumā na kinanena na urmarua la nene, ana nekila si urviu lañasa, naña akerkeviu laa sane, atorokin kinanen make la nene amio kiau sur moki tañena la naña sike ne. ¹⁹ Pogos naña nekila pae, yoko nevisave in na sane in ke narui, in na nopo laa narui. !Lelaga ãa, yoko neloge wo vañisi! Kiau sur moki la nene, yoko nakan

la mña sanene vano-o, la avisuar ruru inu e kas ve moki. E pogos nene, in na tapatete si neyumāe narui, yoko in na nakan ga ya naña in na sine-unia, yoko nomun korena ga suria, sane nesu luen ga e malena wo narui.’

²⁰ “Yar nene sitomiyu ke sanene pano, ana mninue ga, naga ke naña Ntewa kila ruru ke sape vis van narui, visave ‘Peraga yaru, ko na ope wowe ga. Yemalo ga nini, nesape nelalua si kioñā malena vetan ko. A kioñā sur moki la naña omñareran omiyuwon polo pe kioñā sike ne, yoko a ne ve kiena si narui?’ ”

²¹ Ana Yesu pisa pan la, pisape “Yoko ve sa ke nene narui va la naña amiyuwon polo ke kiela sur lala, la ape yar na sur moki e yomarava nini, ana la pe ape yar na sur moki re nenaga e lepas kiena ne Ntewa.”

Yesu pian la sanapen yar naña sitom manene kiena malena

Matiu 6:25-34

²² Ana Yesu pisa mēna pan kiena yeririna lala, pisape “Visae sanene, in na nevisa van amiu, nevisave, pe pon re kiamiu sitomena la ulen manene kiamiu yumāena na visuar amiuen ga la poli, naña apiuviun ke asape ‘?Yoko telual kata kinanena pe ne?’ pona ‘?Yoko tetol mñata kulmrae na yenen sanape ne?’ ²³ Sitomen la nene pe mesmes re poli, komin kiamiu malena naga to laa metavan kinanena, a

yepemiu na to laa metavan kulmrae. ²⁴ Asitomli sako la ne akaka kar ke la ne. La nene pe amapla re lokove po, la pe apanon re aþar kinanena pimi po, a pe lelen kala kinanena re tai naþa awarpolo se poli. Ana Ntewa pagan la ke ne, a e kiena navisuena, naga pisu amiu ato manene laa metavan manu la naþani, ana naga monar visuar amiu manene laa na wa taulu la. ²⁵ ?Asitom asape yar naþa naga sitom manene laa kiena malena naga kilia kila kiena malena naþa plas imi ve piavi li laa sane? ²⁶ Peraga, pe sa re nene po, komin naþa kam na taþatete akila narin sur tai ne sanene, po pon kam na ve asitom manene re sur taþena lala e kiamiu malena.

²⁷ “Asitomli meme tanea la ne pitotovi kar ke ga la ne. La na pe amiyuñae re poli, a pe asuluwo re ñala kulmrae la poli. Ana nevisa van amiu, þarin suþe Solomon nanua sumo, naga pe yar na sur moki a naga kiena sur make ga, ana ñana kulsota pe miyowau ruru re poli sane meme la nene. ²⁸ Meme la nene na legiena taaga ga, yoko peni ga na asikapi la, ana Ntewa suñña miyowauia ruru la paþisi. ? Ana asitom asape yoko taþatete Ntewa war kulsota van amiu? Peraga, kam na pe apiawa re nena ñarera e naga poli. ²⁹ Komin sur ne la na nene, pe pon re sinemiu ulen manene sitomena, naþa asape ?Sanape

na yoko tekinana, pona to-mun suria, pona telual ñata kulsota? Pe pon re asitom manene sur la sanene poli. ³⁰ Ee lelaga þa, yar make ga lala na purvanua kerkeviu na yomarava nini la asumña asitom manene sur la ne sanene silaga, ana amiu na, Arimamiu kilia pa rui sape yoko monar awar sur la nene. ³¹ Sur naþa asitom þesan ve keviu e kiamiu malena, naga navesuþenena kiena ne Ntewa. A visae akila sanene, yoko naga la ñena sur taþena la nene van amiu. ³² Lelaga þa, kiau narin sipsip lala, Arimamiu sinenan manene paþisi sape tañan amiu aimi avesuþen kiena yeririna lala, ana kam na taþatete sinemiu konan sur tai, yoko suri punu ga woga ga van amiu.”

Yar naþa naga pe yar na suri moki

Matiu 6:19-21

³³ Ana Yesu pisapenua “Po pon auliwilin plan kiamiu sur la nene, awar kana varu la va van la naþa limala korena vena aiila la. Visae akila sanene, sa naþa aþar ke kiamiu pupia karo tai naþa ñeke ma e peni, naþa taþatete viowa pogos tai, a akokoña ke kiamiu sur moki paþisi pito ke ea, naþa akilia awasinea, naþa yar navinauena taþatete si warlua vetan amiu, naþa kirara la taþatete si akila karea. ³⁴ Popon sane kam na kiamiu sur nowo la ve moki sanene su ma e peni, komin

naña yoko kiamiu sitomena lala sulue ga e yo nene naña kiamiu sur nowo la sike ea.”

Nalogenā la monar asu ruruian naña Suṽe wasuṽe sina

Matiu 24:42-51; Mak 13:33-36

³⁵⁻³⁶ Ana Yesu pisa mēna pan la, pisape “Monar asu ruru silaga vena kiamiu Suṽe imi mālivin amiu. Kam na monar ave sa yar na yuṽaena kiena ne yerkawa tai, naña mligan la vena va e talopaena tai. A amiyowau ruruia, a asilan kiela kapi lala, asumālu ga asumā ga, ana pog ya naña kiela yerkawa imi mālivin la, sigariga mratava, ana la asu ruru asike rui, akilia avietavan veraga. ³⁷ Pupia navisa ruruena sike e yar la naña amiyuṽae sanene, pogos naña kiela yerkawa pimi mālivin la, ana asumāte mā naga, atavilo ga asumā ga. Yokorena kiela yerkawa kekaran la vaṽisi, ana yoko naga va yowau, siraunia imi ana la aiilan ga naña vio la vena atotano e kana lelen kinanena, naga piovion kala kinanena tanea nene. ³⁸ Pe sur koren ga visae yemalo rui, pona pa ko yepelilika la ne, pona lavis lakaporo kokoreko, ana visae yerkawa naṽani imi lual kiena yeririna la atavilon ke sanene wa, ṽisi na naga kila wo manene laa van la sane wa.

³⁹ “Ana maran taaga sina ga, visae yar tai kilia ruru pogos naña yoko yar na vinauena tai imi māna, yoko yar nene taṽatete ligan māna yuṽa ana va koyo tai, ana naga monar su ruru ga sumāte māga. ⁴⁰ Ana visae sanene, kam mēna monar asururuia, asumāte naña inu Narina ne Yeririna neim nomālivi, komin naña yoko neim nomāliviṽ amiu sina e pogos tai naña pe yar tai kilia re poli, pona sitom ke sape yoko nowasuṽe inu ea.”

Pakaiwa na yar na yuṽaena naña kiena yerkawa ṽasuṽe si pimi

Matiu 24:45-51

⁴¹ Ana Pita piun tan Yesu, pisape “? Suṽe, ṽakaiwa naña opisa ga na wa, opisa ga pan imimi imimi kioṽa li nalologena lala, pona pe kien yaru make ga?”

⁴² Ana Yesu pe pisataṽe ruru re poli, ana pisataṽea e ṽakaiwa tai.

Pakaiwa nena sanini “? Visae yar na yuṽaena tai, naña naga pe manmarua ruru ea, a naga ṽuarar ruru yuṽaena nene, naga yuṽae sanape? Visae kiena yerkawa ligan yo vena va perina, ana yerkawa naṽani ligan kiena yuṽaena lala se e limana. Ana yar nene naga visuar ruru yar na yuṽaena taṽena lala, yoko uarar ruru yuṽaena la nene. ⁴³ A pogos naña yerkawa wasuṽe sina, yoko lual sane yar na kiena yuṽaena naṽani, sumā

ṗuarar ruru ke yuṁaena la naṗa na wa. Ana e pogos nene, yar na yuṁaena naṗani kilia loge wo vaṗisi, ⁴⁴ komin yoko yerkawa naṗani ligan make kiena sur la e limana ne. Ee, a yoko Ntewa ṁena ga kila ve sa ke ga.

⁴⁵ “Ana visae yar na yuṁaena naṗani yuṁae viowa ga, ana pogos naṗa kiena yerkawa mligan yo pa sike perina, yoko naga sitom visave ‘E, yerkawa nene pa sike gare piavi laa narui, pona ve imi re si yo.’ Ana yoko naga suṁalu kila viowa va kiena yar na yuṁaena lala, pona sira na yuṁaena lala, a yoko naga suṁa kinanan kilavaru kiena ne yerkawa naṗani, a va mun luen ga wii e legiena punu ga. ⁴⁶ Ana yoko yerkawa naṗani wasuṗe sina e legiena tai naṗa yar na yuṁaena nene ilan ga, e pogos tai naṗa yar nene pe sitom re pisape yoko imi e poli. Ana yoko yerkawa naṗani la pupia nakoena tai van yar nene, naṗa yoko kila naga va sike e yo kiena ne ṗarmarera lala.

⁴⁷ “Yar na yuṁaena naṗa kilia ruru ya naṗa kiena yerkawa sinenan pisape monar kila, ana siraunia naga pe kila re poli, yoko awe kare naga vaṗisi. ⁴⁸ A yar na yuṁaena naṗa kila piowa sane popon awe kare naga, ana komin naga

mninue ga, yoko taṗatete awe manene naga.

“Yar naṗa Ntewa mla keviu pania, Ntewa sinenan pisape visu yaru nene yuṁae ve keviu ṁena amio. A yar naṗa visae yar la amligan sur la moki se limana, yoko aviun ke sina sur ve moki vania va laa sane na wa.”

Yesu pe purṗes nen yar na kaween yaru

Matiu 10:34-36

⁴⁹ Ana Yesu pisape “In na nepimin nena nesape neligan kapi e yomarava nini, a popon manene visae kapi nene vivaga rui, ana pere wa. ⁵⁰ Ana pupia yuṁaena tai sike vamon inu wa, vena in na monar neva nowarpoyo ea, a nanagane in na nakawean in manene ke vanon rui. Popon sur nene imi vilaga, vena nekilia nekila makea. ⁵¹ ?Kam na asitom ke asape in na nepimin nekila sa naṗa pupia suṁare imi sike e yomarava? Peraga, in na pe nepimin re neligan suṁare e poli, ana in na nepimin nekila ṗelaga na viaṗaena imi ve keviu. ⁵² Siar nanagane, pona e uṁa tai, yar la lima asike ea, ana yoko la ve telu aviaṗa vetan la ve lua, pona la lua aviaṗa vetan la ve telu. ⁵³ Yoko yar la asuṁa aviaṗa, naṗa yoko ṁee lala akawe arimala lala, arimala lala akawe narila ṁee lala, a anela lala akawe narila sira ṁee lala, a sira ṁee lala akawe anela lala, a

yoko anen simem lala yoko akawe sira la naña atalopa amio narila na yermene lala, a yoko sira la nañani akawe anela simem la nene.”

Monar avisu kilale kile na pogos kiena ne Yesu

Matiu 16:2-3

⁵⁴ Ana Yesu pis sina ga pa ñina lala, pisape “Pogos naña ita tevisu pupia malo ñeke e yo naña lagi molue ke kom ea, tekilia tesape ñisi na yua wowo, a ve ve piavi re yoko yua nene imi. ⁵⁵ A pogos naña visae teloge kieta lagi ura yui, nanene na tekilia tesape yepisusun vañisi ne, a yokorena monar ve sa ga nene narui. ⁵⁶ ?Nanene narui, nane asuñña apisu kilale ke kile lala na sinapanane a na yomarava nini narui, avisave yoko pogos ve sanape pona ve sanape, ana sanapen naña pe apisu kilale re kiau kile la poli, na pupia pogos nanagane naña nesike nemio amiu ea? ?Pona kam na yepemiu mavin ga visu kilaleen yo? Aulai, kam na apilaven manene laa kiamiu visen koren la nene pañisi wa.

⁵⁷ “Popon kam akilali naña akilia towe laa narui sane mrapa ya naña mesmesun alilua. ⁵⁸ Visae pogos tai oveveyun sur tai omio yar tai, ana naga sinenan pisape were ko ova osuñalu ose marana ne yar naliñereena, popon okilayonli naña vena ovis ruru omio naga sumo wa, pogos naña pe atol re kumali poli wa. Visae peraga, pona naga ligan ko e limana

ne yerkawa na liñereen yar yo, ana yerkawa nañani pona naga ligan ko ñena ova e limana ne yar na taren yaru lala, a yaru na taren yar lala pona aligan ko e yuñña nakoena yo. ⁵⁹ Lelaga, nevisa van ko sanini, nesape visae sanene, yoko tañatete si omolue e yuñña nakoena, vano-o oul plan make kiuñña nakoena sumo wa, ñisi na okilia omolue sina.”

“Ana visena nini pe lelaga e kiamiu malena na yomarava nini, a pe lelaga ñena e lepas na pun amiu amio Ntewa.”

13

Visae ve ovilopu ko re yoko omare

¹ Ana yeririna lañas naña asike e pogos nene, la asunyu pa Yesu e lepas kiena ne le Kalele lañasia, naña yerkawa nae Rom naña Paelat kila ñelaga piowa tai pan la. Apisape “La nene, asike e Yuñña Wa ñana ne Ntewa, ana pogos nena naña amlotun ke Ntewa akila kuñañaena pania, Paelat la apim amial moñar la. A la añalear kuruta kan la nene amio kuruta na kuñañaena nene naña la asuñña akila ke ne.”

Ana pogos naña apisa sur nene pa Yesu, la asitom pa rui asape sur viowa nene naña pimi ñalivin la nene, pona nakoena kiena ne Ntewa tai nene yo komin kiela sur viowa

laņas naņa akila. ² Ana Yesu pisatamē la, pisape “? Kam na apisu le Kalele la naņa kiela marena piowa sanene, asitom sanape? ?Pona kam na asitom ke asape la nene na ape yar viowa la lala, taulu le Kalele taņena lala, pona kiela nakoena ga? ³ In na sineun nesape nevisa van amiu nevisave peraga, pe sa re nene poli. Ana kam na monar avisuar ruruia, komin visae ve avilopu amiu re, yoko kam mēna amare e ŗelaga tai ve sa ke nene. ⁴ A kam na asitomyuli mēna yumņa na kirakiravaena naņa mēke e pulkumali naņa Siloam. Naga mon manene metava paņisi, ana poglis nanua mloru ne, ana kowar yar lala, la lualima taaga pa orelu [18] amare. ? Sanapen la nene? ?Pona kam na asitom ke asape la mēna apiowa laa taulu le Yerusalem taņena lala, pona nanene na sane kiela nakoena ga ne? ⁵ Ana peraga, naga mēna pe sa re nene poli. Ana in na nevisa si van amiu, kam na monar avisuar ruru amiu, komin visae ve avilopu amiu re, yoko kam mēna amare ke ga e ŗelaga tai ve sa nene.”

Pakaiwa na purpiliva naņa pe ŗar re mras poli

⁶ Ana Yesu pisa sina ŗakaiwa tai, naņa pisa sanini, pisape “Yar tai, kana purpiliva tai kapuru sike e kana lokove. Ana pogos tai yar naņani pimin purlaki

nena, sinenan pisape visulia ŗar mņa mrasa pona peraga. Ana pimi pisulia, māl purlaki naņa pe ŗar re nena mras poli. ⁷ Ana pis pa yar naņa pisuar ke kana lokove, pisape ‘Nanagane tol kas telu narui naņa nepimin nakale mras nen purpiliva nini, ana peraga. Sineu maren rui, naga mono korenan ke ga yo wo nene, yoko otelua ga vano.’

⁸ “Ana yar nene sinen miye purpiliva naņani, pisa pa kiena yerkawa, pisape ‘Visae sanene, yoko teliganli mon mņa tol si kas ve taaga. Yoko nekilayonli naņa nekila ruru sumo, yoko nekilvivi purņesa, a yoko nokoven sin puluk laņas va ea vena kila kapur wo. ⁹ Ana visae kapur wo, war towe mņa mras laņas e kas na sirau, yoko kilia sumņa ga sanene, ana visae peraga, naga narui yoko otelua ga na wa.’ ”

Ana ŗakaiwa nene pisayu ke sape narin pulmas teke ga wa naņa yaru la akilia avilon la, visae peraga, yoko Ntewa la nakoena van la.

Yesu kila ruru sira marua tai e Legiena Wa

¹⁰ Ana e Legiena Wa tai, Yesu sumņa pian ke yeririna lala loyumņa e kiela yumņa na leniena. ¹¹ Ana e yo nene, sira marua tai sumņa ea, naņa ninuna na maiena viowa sike ea. Ana ninuna nene kila naga pa tol kas lualima taaga pa orelu [18] rui, kila mņasina ne

sira nene pulu nena paḗisi, naga suḗalu mesmes ḗele sina. ¹² Ana pogos naḗa Yesu pisuia, pio pimi, pisa pania, pisape “Sira marua, nevisa sanini, nevisave ko, inanena naḗa piar ko ke ne, ligan ko ga nanagane.” ¹³ A Yesu mligan limana tea amio visena nene, ana ḗasina pimi po ruru veraga e nena e pog naḗani, ana sira naḗani mloge po paḗisi, mieluar Ntewa.

¹⁴ Ana nasumonon na yuḗa na leniena naḗani sinen kar Yesu vanon naḗa kila ruru sira naḗa e Legiena Wa. Ana pis pa yeririna lala, pisape “Sa naḗa tekilia rui, tekilia teyuḗae e legiena ve orai, a legiena ve taaga ve teyuḗae re. Visae sinemiun naḗa akila plan maiena vetan amiu, popon aimi e legiena orai la nene, ana Legiena Wa na sa nini pe pe kana pogos re nene poli.” ¹⁵ Ana Suḗe pisataḗea, pisape “? Sanape? ? Pona akepu ke kiamiu puluk la e Legiena Wa yo, pona pe akila re poli? ?Pona apagan ke kiamiu sur mal lala, pona amla wii pan la e Legiena Wa yo, pona pe akila re poli? ?Ana vanon ya ne kam na pe akekaran re naḗa nekila suri wo e sira marua nene? ! Kam na ape yar navilavenen ga vis korenena nene! ¹⁶ Sira marua nini, naga vineta tai naḗa ita punu ga tomolue e lus kiena ne Epraam, ana Yermare Lego piar manene panon inanena nene ḗene

kas lualima taaga pa orelu rui. Ana in na nepisu sane Legiena Wa naga torokin ga naḗa tourelua naga e yo viowa naḗa naga sike ea.”

¹⁷ A pogos naḗa Yesu pisa visena nene, kila kiena nasinekar la naḗani amloge amawa paḗisi e marana ne yeririna lala. Ana yar taḗena lala, la amloge akekara paḗisi e yuḗaena naḗareraena wo la naḗa Yesu kila pan la.

Pakaiwa na kurus nen mrapa

Matiu 13:31-32; Mak 4:30-32

¹⁸ Ana Yesu pisa ke sina ga, pisape “? Yoko nevisa visena ya ne van amiu veḗa kila na akilia sane nasuḗenena kiena ne Ntewa naga sanape? Yoko nevisave nasuḗenena nene naga sane sur ya? ¹⁹ Yoko nekilali naḗa nekila merarava van amiu e ḗakaiwa nini, naḗa pisape: Nasuḗenena nene, naga sane kurus nen mrapa naḗa mloru pito pelan te laki tai. Kurus nene na ve tokak paḗisi, ana pogos naḗa kapuru, pimi pe purlaki tai naḗa keviu manene laa, ana manu la akila ḗala ponovi lala e kana korowas lala.”

Pakaiwa na is

Matiu 13:33

²⁰ Ana Yesu pisa sina ḗakaiwa taḗena pan la, pisape “?Pona nevisave nasuḗenena kiena ne Ntewa sa si ya narui? ²¹ Nasuḗenena nene, naga sane sira tai ḗalelar is amio yavi na

kilaparavi pa e pupia pialora tai, ana narin is nařani kila kilaparavi la punu nene mlapa.”

Mrapa lua ga

Matiu 7:13-14,21-23

²² Ana Yesu mla si kiena mrapa, sinenan pisape va ma Yerusalem. Ana pogos nařa pa sane, pa kome pulkumali lala, suņa pian ke yeririna lala. ²³ Ana yar tai piun tania, pisape “? Suņe, la nařa yoko atol malena la moki, pona pe la moki manene re poli?”

²⁴ Ana Yesu pisataņe la, pisape “Monar akilayonli nařa ava loyuņa e pulutava taņena nene, nařa ve tokak la ga. Nepisa ke lelaga na pan amiu ne, nesape yoko yar la ve moki nařa sinelan asape ava loyuņa, ana yoko taņatete akila. ²⁵ Nanene komin nařa siraunia, yoko yerkawa na yuņa, naga visu sane toroki rui, ana yoko naga suņalu, kotava ruru sina. E pogos nene, yoko kam ve moki nařa aim awon amiu ase mratava nene, asigar ga avio, avisave ‘Suņe-o, awis ovieta van imimi!’ Ana yoko yerkawa nařani visataņe ga sanini visave ‘Peraga o, nemninue amiu nena ga! Kam na yer pe la nene?’ ²⁶ Ana yoko akilali nařa avisa van e pogos nene, avisave “?Ana sanape, ko na pe ositomāl re si nařa osape ita ke narui nanua tesuņa

tekinan ke lele taaga ne? Imimi ke narui nařa opam opian imimi ke e yometava la nene e kiamimi pulkumali lala?” ²⁷ Ana yoko naga visa van la, visave ‘In na nepisa pan amiu yam tai rui, nesape nemninue amiu nena ga, nesape kam na yer pe la nene. Nekilia nesape kam la nene kam na yar na kilaen ga řelaga viowa lala. !Pogaga, kam na aure matan inu nagane!’ ²⁸ E pogos nene, yoko kam na aloge viowa vařisi, yoko atag vano-o řisa, asuņa akar maluemi. Nanene komin nařa yoko kam na avisu yeririna wo lala kiena ne Ntewa, nařa sane Epraam, Aisak, Sekop, a navisawalen taņena mēna ga lala, la asu ruru ga asike loyuņa e kiena nasuņenena ana kam na akoven amiu asuņalu asuņa ga vanua sanene.

²⁹ “E pogos nene, yoko yeririna taņena la ve moki nařa amolue e mrapun yomarava varoka, aimi atotano vena akinana e pupia řařagena loyuņa e navesuņenena kiena ne Ntewa, ana kam na taņatete ava loyuņa.”

³⁰ Ana Yesu pisa make kiena visena e pogos nene, pisape “Ana yar la nařa asirau, řisi na la asumo, a la nařa asumo, řisi na la asirau.”

Parin Suņe Erot sape

wem̃ar Yesu

Matiu 23:37-39

³¹ Ana e pogos nene naṓa Yesu pa ke ma Yerusalem wa, Varasi laṓas apim puna, apisawal pania, apisape “Pona ko pe okilia re poli yo, naṓa Parin Suṓe Erot, naga pisaar rui pisape yoko wem̃ar ko. Popon oure ova gar Yutea sumo wa, komin naga pisuar ke lepas nini.”

³² Ana Yesu pisataṓe la, pisape “In na pe nesitom re kawe nene nesape naga pe yar tai naṓa kilia kila sur tai van inu poli. Yoko ava avisawal e marana, avisave in na nekila ke ne kiau yum̃aena sumo wa. Avisavania avisave in na nom̃ene plan ke yermare lala, a nekila ruru ke namaiena lala, a yoko neyum̃ae ve sanene ṓane, amio peni, amio m̃ena vewo, vano-o nevisu sane nekila make nenaga. ³³ Ana nekilia nevisa van amiu, sane ve asitom manene in re, komin naṓa e ke e legiena la nene narui, in na nomolue nepa ke sanene narui. Monar neva netol ke ne yo ma Yerusalem wa, komin naṓa nepisu sane siar nanua sumo yar la aṓe mom̃ar kiena navisawalena lala e ke e yo nena nene narui.”

*Yesu sinen miye
Yerusalem*

³⁴ Ana e pogos nene, Yesu sitom manene Yerusalem pano-o taginia, pisape “Yerusalem o! Komin ya ne om̃e mom̃ar ke navisawalena lala, a okove

mom̃ar ke yar la naṓa Ntewa mligan la pimi pan ko? Yam mok liu naṓa sineun nesape neligan lum̃au yervivi kioṓa yeririna lala, sa naṓa lakaporo mligan narina lala apim atapolou vatanon kupena, ana kioṓa yeririna lala pe akekaran re poli.

³⁵ Ana opisu ke ne, Ntewa pilon ke m̃asina pan ko narui, ana naga pitetalia inu nepim ṓes e nini, ana nevisa van ko, nesape yoko kioṓa yeririna lala taṓatete si alual inu, vano-o tol pogos naṓa avisu kilale inu, avisayu inu, avisave

‘! Ntewa na mava, ovisa ruru naga naṓa pimi e kioṓa kia!’ ”

14

Yesu kila ruru namaiena tai

¹ Ana e Legiena Wa tai, nasumonena tai kiena ne Varasi lala ṓere Yesu pa kinnan m̃ana. Ana yar taṓena m̃ena la ṓasia asike e pogos nene, naṓa pe sinelan re Yesu poli, la asum̃a apisusu naga visae kila sur tai naṓa ve memes re, la akilia akila sur tai vania. ² Ana yar namaiena tai sike loyum̃a amio la e pogos nene, naṓa yar nena yepena la sirorop paṓisi. Ana Yesu pisu yar nene, ³ ana pis pa navianena navisaluaena lala, piun tan la pisape “?Sanape e lepas na kieta navisaluaena? ?Pisape tekilia tekila ruru maiena e Legiena Wa, pona pialuṓar pisape ve tekila ruru re?”

4 Ana pogos naña Yesu piun naviunena nene, apisu sane tařatete avisatamaea, atopur nenaga. Ana Yesu řere yar nařani pimi lavis puna, kila ruru sina, ana pisape kilia wasuře si va ga umã. 5 Ana naga pis pa la naña asike ne, pisape “Kam na asitomyulia. Visae kam yar tai nene, e Legiena Wa tai, narina tai pona kiena sur mali tai va ľoru vito e řiliřili na wii tai, ana yoko okila ve sanape? ? Yoko ovitařilin ne, naña ova ga ourelua si ne, pona ovisave: Ke, piowa narui e, nagane na Legiena Wa nini narui, navisaluaena pisape ve neyumaee re e Legiena Wa, ana pona naruu pona kiau sur mali nene mon ma e řiliřili wa, neva ga nourelua peni? Peraga, pona yoko ovitařilin ga ourelua yo.”

6 Ana la aminue kare narui ama yoko avisatamae si naga e lepas nene ve sanape, la asupur ga asike na.

Pe pon re yar ga visirlua sina naga poli

7 Ana pogos naña apim asun ke naña atotano e kinanena nene, Yesu pisu kilale naña la tařena lařas naña řar na řařagena pio la apimi, sinelan manene alual yo tai naña po, la apa atowo lelen yerkawa la metava. Ana Yesu pisu kiela řelaga navilaveena la nene, ana pisa pan la pisape 8 “Visae pogos tai avio kon ova e

kinanena natalopaena tai, pona sur tai sane řařagena, ana pe pon re ovitařilin naña ova oto nena tano e lelen yerkawa la poli. Pona yo nene akila ruru monmate ke pupia yerkawa tai yo, ana pe okilia re poli, 9 ana yoko řar na řařagena imi visa van ko, visave ‘Ake wolai, pe sineyeena pařisi, ana yoko otom ke ne tano wa, komin naña oteke e lelen kiau yerkawa nama.’ Ana yoko omawa ologe viowa vařisi, ana yoko monar oto si tano, okilali naña olual narin pulmas tai tano vena okilia olawan marama ea.

10 “Ana řelaga wo na sanini, visae avio ko ova e kinanena tai, pogos naña omalivi ea, yoko ova oto ga tano omio yar kar ga lala. Ana visae řar na řařagena vim visu ko, visave ‘E, yerkawa, nepisuar ruru lelema teke meta ma e ne rui. Yoko ita lua tevavini, neligan ruru ko otea.’ Ana e pogos nene, okilia ologe wo vařisi, naña řar na řařagena pisirlua ko sanene e maran yeririna tařena la naña akinan ke lele taaga. 11 Naga sanene narui, sane yar naña naga ga pisirlua naga, yoko aligan naga mon tano, ana yaru naña mligan naga mon tano, yoko avisirlua naga.”

Popon ovio mena yar naña limana korena ga imi e kionma řařagena

¹² Ana e pogos nene, Yesu pisa m̄ena visena tai pa yar naṣa pio naga pimi kinan m̄ana, pisa pania, pisape “Nagane, tepisu pogos naṣa visae yar la akila kinanena tai, la sinelan ga avio kiela erau wo lala, pona kiela wolai lala, pona kiela namratava taṣena lala, amio m̄ena pupia yerkawa la naṣa asike lavisin la. Akila ke sanene, komin akilia ke asape visae siraunia, visae la m̄ena akila kinanena pogos tai, yoko monar akila maran sina van la. ¹³ Ana ṗelaga wo na kilaen e ṗaṗagena naga pe sa re nene poli. Popon manene ovio yar taṣena lala, sane la naṣa limala korena ga, a la naṣa tasnela la piyowa ga, pona laulu lala, pona kilamara ṗala lala, yar la ne sanene, la aim akinana amio ko. ¹⁴ Yar sur la ne sanene la taṗatete akilamaran si van ko pogos tai, ana pogos naṣa Ntewa pisu naṣa okekaran opure la nene apim akinana moṃa, yoko naga kekara vaṗisi. Yoko naga visa ruru ko, a yoko owar kionṃa nalaena wo vanonia, nanene e pogos naṣa naga kila kiena yeririna mesmes lala amal si vetan marena.”

*Pakaiwa na visawoena
Matiu 22:10*

¹⁵ Ana yar tai toṃa e kinanena nene, naga mloge m̄a naṣa Yesu pisayu ke pisape yoko Ntewa visir plan kiena yar mesmes lala e

legiena maro, ana naga pisape “!Lelaga naṣane, yoko wo manene laṣa van ita e pogos nene, naṣa ita tesikol ita e pupia ṗaṗagena nene loyuma e nasuṗenena kiena ne Ntewa!”

¹⁶ Yar nene pona naga sitom ke sape naga po narui, ana yar la na sanene la sinelan re vaen loyuma poli, ana Yesu pisa ṗakaiwa tai e lepas nene, naṣa sanini “Yerkawa tai, naga sinenan pisape kila pupia kinanena tai, ana pio yar la moki naṣa aimi. ¹⁷ Ana pogos naṣa kila ruru make sur punu ga ṗisi, naga pitetalia kiena yar tai vena vanon were la naṣa apio la ṗisi rui aimi. ¹⁸ Ana pogos naṣa kana yar nena pimi m̄alivin la, la make ga nene maran taaga asuṃa akila ke sina ga visena na visawoen suria. Tai pisa sanini, pisape ‘Pogaga, ana in na nopul ga kiau narin porotano tai na wa, ana nepavin ke nesape nevisulia ama porotano nena sanape wa. Yoko ovisa va yerkawa ovisave pe nasineyeena paṗisi ana taṗatete neim̄as nanagane.’ ¹⁹ A taṣena, pisa sanini pisape ‘Pogaga, ana in na nopul ga kiau puluk laṗas na wa, vena ureen kiau kat lala, ana nesape neva nevisu la lia ama am̄arera ruru m̄aga. Yoko ovisa va yerkawa ovisave pe nasineyeena paṗisi, ana in na taṗatete neim̄as nanagane.’ ²⁰ A taṣena m̄ena ga, naga pisape ‘Pogaga, ana in

na nekila ga p̄ap̄agena na kiau talopaena nanua ga naganane, ana in na nepisu sane taṭatete neiṃas yo, komin sur moki paṭisi.'

21 "Ana yar naṭani pimi pisawal visena la naṭani pan kiena yerkawa, mloge, sinen kar la. Ana naga pitetalia sina kiena yar naṭani, pisape 'Pogaga, oyal kawa, ova e narin mrapa la ne lavis ga naṃa, ova olual la naṭa pe kiela sur re poli, amio la naṭa tasnela la pioyowa ga, amio laulu lala, amio kilamara kata lala, ana owere la nene aimi e kieta p̄ap̄agena.'

22 Ana naga pa kila, ana siraunia p̄asuṭe si pimi pun kiena yerkawa, pisape 'Suṭe, sur naṭa opisa p̄a, nekila rui, a yaru moki apimi, ana yepa keviu ṃeke ga wa.'

23 Ana pitetalia ke sina ga, pisape 'Visae sanene, ova sina, ova kare ga yo uṃa la e pulkumali, a om̄areran kare ga va yar naṭa visae olualia, ovisave monar aimi, vena akokonia kiau kove, vena akila p̄ap̄agena nini imi wo. 24 Taṭena la naṭa akila ke navisawoen viowa lala, in na nepio ruru la nesape aim e p̄ap̄agena nini p̄a rui, ana nanagane, yoko taṭatete nena lala yaru tai kan re narin kinakiṃas nen kiṃa-nena tai e p̄ap̄agena nini p̄isa, peraga. !Nepisa ruru ga ne!'"

Yesu naga monar to sumo

e malena kiena ne kiena nalogena lala

Matiu 10:37-38

25 Ana Yesu mla sina kiena mrapa, pa ke meta ma Yerusalem na wa, a pupia p̄ina moki la ataveveia. Amiyal ṃa pano-o, pilopu naga kira pimi pula, pisa pan la pisape 26 "Yar naṭa sitom sape taveve inu, naga monar ligam inu neto nena sumo e kiena malena, in na neto manene laa metavan arimana, pona anena, pona wona, pona narina, pona wenla, pona vinena. Yar naṭa pe pisu kilale re kiena malena sane naga pe pe sur re tai poli, naga pe torokin re nena naṭa imi sane kiau nalogena poli. 27 Ana yar naṭa sinenan sape imi ve kiau nalogena, naga monar kila sanini. Monar kus kiena lak torovia, taveve inu lue ga, sa naṭa kilia taṃan naga loge viowa vanon inu. 28 Po pon asitom ruru ke ne sur nene sumo wa, p̄isi na avitaṭilin visena, avisave sineṃiun ataveve inu.

"Nanene naga sa ga naṭa yaru tai, visae sitom ke sape kilia kila pupia yuṃa tai, naga monar totano, visu ruru ke ne sumo wa, wolo ruru kienā kilavaru naki-laen yuṃaena nene, naga monar visu kilale sane yoko naga torokin kilia kila make pupia yuṃaena nene, pona pe torokin re poli. 29 Visae peraga, yoko naga siaria, yuṃaen ruru p̄eren yuṃa

nena, va laa sane, yoko ilan ga naŋa limana ve plas ruru nena ga ana yoko yuŋaena nene loru mēke na. Ana pogos naŋa yar taŋena la aimi avisu yuŋa naŋa komŋas mēke na amio kana lepas ne lala, a pe m̄aero pa re e poli wa, yoko avitalia kare yar nene narui, yoko avisave

³⁰ ‘Ke, yar nene, kiena sitomena po paŋisi. Sinenan sape yuŋaen m̄ana yuŋa, ana pe maplar ruru re kiena yuŋaena po, ana taŋatete nena kila makea.’

³¹ “A yar naŋa sinenan sape visaar naŋa yoko imi kila yuŋaena amio inu, naga monar kila sane ŋarin suŋe tai, naŋa yerkawa taŋena suŋalunia, ŋere kiena pupia ŋegas nen nakilaen mara tai aim akila mara vania. Li namara kiena ne ŋarin suŋe nene pe la moki re poli sane yerkawa nene, ana ŋarin suŋe nene monar visu ruru sumo, monar sitom ruruia, sane naga kilia taulu pupia ŋegas naŋa pimi ke ne, pona taŋatete tauluia.

³² Visae visu sane taŋatete kilia kila, naga monar ligan visena vano va yerkawa, pogos naŋa sike perina wa. Naga monar viun tania, visave yoko ul ya naŋa yerkawa nene pisa, vena lalua asu sina e suŋare. Visae ve sanene, naga monar vatanon yerkawa, taŋan make nena naga vania.

³³ Ana kam naŋa sinemiun asape aim ataveve inu,

monar avisu kilale sane kam m̄ena monar akila ve sanene van inu. Yar naŋa pe taŋan re kiena malena poli, amio make kiena sur van inu, naga taŋatete kilia imi sane kiau nalogena.”

Pakaiwa na sive naŋa apeven e kinanena

Matiu 5:13; Mak 9:50

³⁴ Ana Yesu pisa sina ŋakaiwa taŋena pan la, pisape “Sive naga pe sur tai naŋa po paŋisi, ana visae pogos tai sive nene ve melkalka ruru re sina, taŋatete kila kiena yuŋaena naapo, a taŋatete si sur tai kilia kila imi melkalka ruru sina. ³⁵ A sive na sanene, taŋatete si kilia kila yuŋaena wo taŋena tai van ko moŋa uŋa, pona van m̄ena koŋa lokove. Sur nene naga pe na kovenen ga va e kororak narui.

“Naga ke nene narui naga pe kiau totou na kiau nalogena naŋa kilalu kiena nam̄areraena nakilaen kiau yuŋaena. Ana yar naŋa kiligana teke ea, popon naga loge kilale kiau visena nene.”

15

Yesu kila erau amio yar viowa lala

¹ Ana e pogos la ne sanene, apisu sane yar laŋas naŋa yar la pe asitom la re poli, sane yar na takis lala, amio yar taŋena la naŋa Varasi la asape la apiowa ga, la m̄ena apim ke lavisin Yesu vena

ayagogonia. ² Ana pogos naña Varasi lala amio navia-
nen navisaluaena lala apisu
naña Yesu sinenan pisape
sun amio la nene, apisu sane
piowa ga, ana asumã apisa
ke apisape “Lelaga kemua
nañane, yar nene naga sitom
ga li namlamulen viowa la
ne sanene, a silaga sinenan
mëna sape va kinan lele
taaga amio la. ?Pona naga
pisu sane la ga kiela ðelaga
po yo, a ita na kieta piowa
ga?”

³ Ana la kiela sitomena
sane kila Yesu sun pan la
e ðakaiwa la naña pisayu
sanape naña naga pimi e
yomarava nini vanon yar
naña kilalu mrapa.

*Pakaiwa na sipsip naña
kovio*

Matiu 18:12-14

⁴ Pakaiwa ðesa kiena ne
Yesu e lepas nene naga
sanini, naña pisa pan la,
pisape “Yar tai, naga pe
yar na vaganen sipsip, ana
kiena sipsip lala tol pono-
tia taaga [100]. Kiena sip-
sip la moki sanene narui,
ana visae pogos tai tai va
kovio, yoko naga sitom ko-
renan ga, pona naga sitom
vañisi? Yoko naga monar
ligan kiena sipsip tañena lala
asumã ga sanene wa, ana
naga vanon naña kovio, kale
mã vano-o lualia. ⁵ A pogos
naña lualia, kekaran vañisi,
yoko kuslua sipsip nañani va
e purkaunena, kus wasuþe
imi. ⁶ Ana siraunia, pogos
naña þasuþe si pitomi tano

umã, yoko vio namratava
la puna pona kiena erau
tañena lala vena aimi. Ana
naga sunyu van la, visave
‘Aulai, sur tai nini naña
ita tekilia teloge won vañisi.
Kiau sipsip tai naña pa
kovio na kovio lue, ana yoko
nepanonia, nepa nakale mã
pano-o, nomãlia. ! Pogos
naña nomãlia, nekekara na
nekekara!’ ”

⁷ Ana Yesu pisa meraravan
pa Varasi lala, pisape “Ana
yoko ve sa ke mëna nene
ma e peni. Yar mok liu
naña asike e yomarava nini
naña sane amiu, la asitom ke
asape la na apogaga narui,
ana asape ma e peni amloge
ke pon amiu la ne sanene
yo? Ana pogos naña visae
yar namlamulen viowa ve
taaga ga, naga vilopu kiena
malena, yoko pupia kekaren
vañisi vania ma e peni, naña
va ve keviu re laa sane
na wa. Suri ne nanene
kila narui inu na nekekarã
sunen nemio yar la naña
kam na pe akekanan la re
poli.”

*Pakaiwa na kururu varu
naña kovio*

⁸ Ana Yesu pisa si ðakaiwa
tai e lepas nene, pisape
“Sira tai, naga kiena kururu
varu lualima, naña mlawan
ruru teke e mãana loyumã.
Ana visae pogos tai, naga
wasuþe imi mäl tai naña
mloru rui, teke ko yo, yoko
naga kila ve sanape narui?
Yoko war kapi vivaga, war
plan make kiena suri lala,
yevan ruru mãana loyumã

vano vano lualia. ⁹ Ana pogos na lualia, yoko vio namratava la puna, pona kiena erau taņena lala, vena aimi. Ana yoko naga sunyu van la, visave 'Aulai, sur tai nini naņa tekilia teloge won vaņisi. Kiau pupia kilavaru tai nekilaluia pa kovio nenaga, ana siraunia, nakale mņa pano-o, noņalia. Pogos naņa noņalia, nekekarano pano-o pisa!' ”

¹⁰ Ana Yesu pisa meraravan pa Varasi lala, pisape “Ana yoko ve sa mņena nene ma e peni. Visae yar na mlamulen viowa ga tai, naga vilon kiena malena, yoko navisi kiena ne Ntewa lala avisu naņa pupia kekarena paņisi ma e peni.”

Pakaiwa na yaru mņee naņa pa kovio

¹¹ Ana pķakaiwa maro kiena ne Yesu e lepas nene sanini, naņa pisape “Yaru tai, narina na yermņene lua, naņa lalua amiyuņae ke amio naga e kiela porotano. ¹² Ana pogos tai, prasmaro na lalua nene suņalu, pisawal pa arimala, pisape ‘Ata, in na sineun nesape nowar kiau kilavaru komņasa naņa na lalumoņa nagane ga ne.’

“Ana sur nene pe mesmesun re nena naņa naga viun sanene poli, komin arimana mali sike ga wa, ana arimana pe pis re poli, mliņpere make kiena suria, taņan komņas pa prasmaro nene, a komņas pa mņearu. ¹³ A

yokorena yar mņee naņani suņa piliwilin plan make sur la naņa arimana pķar pania, ana siraunia pe piavi re poli, aņa ga naga kon make kiena sur lala, pķar kiena kilavaru pion pano. Ana naga pa sike e purvanua taņena tai koperin paņisi, ana e yo naņani, naga pa make nenaga e pķelaga viowa lala, kan kilavaru naņane pano-o, kila kare make punu nenaga.

¹⁴ “Ana naga kilia ruru sane limana plas ruru ga na wa, a e legiena nene, pupia viso pimi tol purvanua naņa naga sike ea, mligan yar mņee naņani sike e yo tai naņa mņarera paņisi.

¹⁵ Ana pa kale yuņaena tai naņa pona naga kilia yuņaen vena tamalia kiena malena, ana pa miyuņae kiena ne yerkawa tai e yo nene, pagan kiena nompui lala. Yar mņee naņani, naga pe mesmesun re kila yuņaena nene poli, komin naga palia nompui sane ita le Yu la, ana yuņaena taaga ga nene naņa naga kilia mņalia.

¹⁶ “Ana miyuņae mņa sanene pano-o, ana pe amla re kinanena pan poli, a pe mņal re mrapa na lualen kinanen poli, kila naga visokar luen ga. Naga visokar mņa sanene pano-o sinenan sape suan limana vito e karo na kinakinas nen kinanena ka nompui la naņa komņas pililua rui sike ea, amio purkavila na

kona la naþa kiena yerkawa ponpolo suña ga vena kiena nompui la akania. ¹⁷ Ana pogos naþa naga sinenan ke sape kila sanene, naga ga pisu kilale si naga narui, pisu kilale naþa kiena þarmarera ga kila kare manene si naga. Ana sitoñal si arimana amio mña unña, pisape 'Lelaga kemua naþane, in na nepe wowe paþisi. Kiau þarmarera ga nane kila nesike viso karmarin ke e yo nini. Ositomyu la naþa sane ape yar na yuñae kiena ne ata. Naga þar ke kinanena moki pan la e legiena punu ga, naþa yoko akan make þele ga. ¹⁸ Sanene, popon nowasuþeli in ga narui, neyuñae re ve sa la nene. Yoko neva nevisu ata, nevisa sanini vania nevisave: O Ata, in na nekila pupia mlamulen piowa pa Ntewa, a pan ko mña ga. ¹⁹ Nanagane, pe popon re si naþa ovisu inu sane nepe narumña tai poli, ana nesape neviun tan ko vena sineña ye inu, otamñan inu neyuñae re ga sane lala yar tai naþa miyuñae kioñna ke ne.'

²⁰ "Ana naga kila ruru kiena sitomena sanene, ana sumñalu, pimi lelei mña pimi þasuþe si pu arimana.

"Naga pe kilia re poli, ana arimana sitoñal luen ga naga silaga, suña kirakira ke mrapa sape pona naga imi. Ana pogos naþa sike perinan unña wa, ana arimana pisu kilalea, sinen

miye paþisi, ana kiriri pa pitawea. Ana pogos naþa pimi puna narina naþani, kutararia e limana luwoka yepen mavin liganen sina. ²¹ Ana yar mñee nene pisa pa arimana narui, pisape 'O Ata, in na nekila pupia mlamulena piowa paþisi pa Ntewa, a pan ko mña ga. Nanagane, pe mesmesun re si ovisu inu sane narumña tai poli.'

²² "Ana arimana pialuþaria, pio kiena yaru na yuñae lala, pisape 'E, ava vilaga, ava awar kulsota tai naþa po, amio kana kulus nen lana, a kana rig nena, sur la ne sanene, awar imi ayen ea. ²³ A narin puluk naþa apagan mlapa po ne, ava aweñaria, tekila kinanena tai takania vena tekekara temio prasmaro nini. ²⁴ Komin naruu nini naga mare rui, ana nagane mali sina, naga kovio, nanagane toñal sina.' Ana pe yam piavi re poli, la asuñna akila ke þaþagena na yar mñee nene narui.

²⁵ "Ana e pogos nene, narina na mñarua naga mialoro pa miyuñae ke kana lokove rui, ana siraunia pitomi si unña. Ana pogos naþa pitomi ke lavisin unña, mloge yauena a mloge mña mñaagena na wolena kapur pa mñeke na. ²⁶ Ana naga pisu yar na yuñae la tai, piun tania, pisape '?Ei, ya ne akila ke garo unña sanene?' ²⁷ Ana yaru naþa pisa pania pisape '!E, womla

nañani, naga ãasupe si rui, mal ga! Ana arimoña sine-nan sape kila kana kinanena tai. Añeñar narin puluk na ãa rui!’²⁸ Ana pogos naña ñearu mloge, sinena mimi pañisi, pe pa re loyuma amio la poli.

“Ana arimana pimi pis amio, vena were va loyuma, ana naga yepen mavin ga vaena.²⁹ Pisa ga pa arimana pisape ‘?Ata, kas via rui naña nesuma nemiyuma ke nemio ko e nini? In na nemlogear ruru ko e suri punu ga, ana pe okila re sur tai sanene pan inu poli. In na pe nomal re naña omñar narin nane tai pan inu pogos tai poli, vena nekila kinanena tai nemio kiau erau lala.³⁰ Ana pogos naña omal naruma tañena nene ãasupe sina, ana osumalu omñar kieta narin puluk naña tesuma tepagan ruruia. ?Ana yar nene kila ya ne po pan ko? Naga ãar plan pupia kioma kilavaru kompsia, pa kan kilavaru nene na nameneen ga sira, pano-o kila makea. ?Pona ãelaga ne nanene na ko sinomania ana okila kana kinanena nena?’

³¹ “Ana arimana sinena miye mēna kiena ñearu nañani, ana pisa pania pisape ‘Ei, naruu, in na pe nesitom re sanene poli. Ko okila inu nekekara manene laa rui, naña osuma omio inu silaga, a kiau sur la punu naña sike ne, in na netaman punu pan ko rui.³² Lelaga naña kiau prasmaro nene ki-

lalu kiena mrapa na malena, ana pogos naña pilopuia ãasupe si pimi pun inu, sineu miyea, a in na nepisu sane popon kemua tekekarnia, a tekila kinanena tai temio. Womla nene naga mare rui, ana naga mali sina, naga kovio, ana tomal sina!’ ”

Ana Yesu pisa pan le Varasi lala, pisape “Pogaga, ãakaiwa nini ãisi e nene narui. A sa naña pisa ne, popon yar naña kilalu mrapa, naga monar vilopu sina, sa naña prasmaro nene. Ana monar avisuar ruru amiu mēna ga ve akila re ve sa ñearu nene, naña kiena sitomena ñarera pañisi, naga pieluen wenla naña pilopu kiena malena.”

16

Pakaiwa na ãelaga na yumaen amio kilavaru

¹ Siraunia, Yesu pis pa kiena nalogena lala, pisa ãakaiwa tai pan la, ana pisayu yar na yumaena tai. Yaru nene, naga pisu sane yoko kiena yerkawa kovenlua, ana sumalu miyumaen sur tai naña yoko siraunia kiena malena suma woga ga. Pakaiwa nena sanini, sane: “Yerkawa tai, naga mligan lua kiena yar tai ve na visuaren kiena kilavaru. Ana pogos tai, visena pimi tolia sape kiena yar nene suma kan ke ga kiena kilavaru, a kila kare ke kiena sur lala.² Ana naga pio yar nene pimi puna, pis pania, pisape ‘Ei,

yar la apisawal ko pan inu rui. In na nepisu sane pon nekoventlua ko si vetan yum̃aena nene, yoko õpis nena. Ana sumon nãpa yoko ovano, sineun nesape oligan ruru sur lala wa vena nekilia nevisu lapui la nãpa yar la akila pan inu.'

3 "Ana yar na yum̃aena nãpani mloge piowa, pisape 'Lelaga o, piowa narui, yerka wa nene lalua yum̃aena wo nene vetan inu, nemninue sane yoko ãña nekinana ve sanape narui. In na netotano e yum̃aena nini nakonua rui, ana in na pe puriuu pe m̃areran re si yum̃aenen lokove poli, a pe sineun re m̃ena neva nesum̃a neviuviun kinanena vetan yar la poli. 4 Pogaga, kiau mrapa ve sa nini. Yoko nete plan si lapui kiena ne yaru lala vito laa tano, ana yoko la akekan inu vano vano-o yoko la monar avisuar inu e pogos nãpa yerka wa kovenlua inu vetan yum̃aena nene.'

5 "Ana naga pa pio la nãpa kiela lapui sike e yerka wa, la pepe taaga apim puna. Ana tai pimi puna narui, piun tania, pisape "Ana ko okila lapui e sur ya, a tol kilavaru via?" 6 Pisatamea, pisape 'Pias nen wel na kanena tol ponotia taaga [100].' Ana yar nãpa pisa pania pisape 'Pogaga, yoko italua tetelua si vito laa tano. Nane kiõña lapui ne nanini, ototano, oyumu plan ke ne vilaga wa, osiri lualima yam lima ga

[50].'

7 "Ana naga pano, yar tãpena pimi, piun tania, pisape "A ko, kiõña lapui na ya?" Ana naga pisatamea, pisape 'Karo na wit manu taaga [1000].' Ana naga pisa pania, pisape 'Pogaga, yoko italua tetelua si vito laa tano. Nane kiõña lapui ne nanini, ototano, oyumu plan ke ne vilaga wa, osiri ga ponotia ve orelu [800].' Ana naga kila m̃a sanene pano-o kila makea.

8 "Ana siraunia, yerka wa nãpani pisu kilale sur nene, ana naga pisa ke pa kiena yar nãpane nãpa naga kan kiena kilavaru sumo, pisape 'Lelaga ne, opinaun ruru inu nenaga, ana nepisu sane kiõña manmaruaena po, ko p̃arum̃a po pãpisi nãpane.' "

Ana Yesu pisape "Kam na apisu ke ne, yaru na yomarava nini lala, pogos nãpa amiyum̃ae amio kilavaru, ana akila masisuania p̃isa, akilia p̃elaga na kilaen erau wo amio yaru lala, vena yaru la nene akila wo van la sirau. Ana nepisu nãpa naruu na yomerarava lala, yam mokliu nãpa pe amanmarua ruru re poli nãpa ayum̃ae amio kilavaru nãpa Ntewa mla pan la."

9 Nepisa ruru pan amiu, nesape "Kilavaru naga pe na yomarava ga nini, ana visae kilia iila ko vena ove erau ruru omio Ntewa, popon oyum̃ae ea. Visae oyum̃ae ruru wo amio kilavaru kome mrapa naapo, siraunia yoko

Ntewa kekaran vena were ko ova e naḡa pe kilavaru re e poli, nane ma e moḡa uḡa ma metava.

¹⁰ “Yar naḡa ḡar yepemāen narin yuḡaena tai, tekilia towasinea sane yoko naga war ḡena yepemāen pupia yuḡaena woga. Ana yar naḡa miyuḡaen narin suri tai pe mesmes re poli, yoko naga yuḡae viowa laa na wa e pupia suria.

¹¹ Visae kam na ve awar re yepemāen yuḡaena na kilavaru e yomarava nini, yoko ane ligan sina sur nowo lala kiena ne Ntewa e limamiu vena ave kiamiu?

¹² A visae kam na taḡatete ayuḡae ruru amio sur la naḡa Ntewa taḡan pan amiu naḡa ve plas ga e yomarava nini, a ne yoko taḡan si nalaena nowo naḡa asike ma metava e peni ave kiamiu lue?”

Yar taḡatete yuḡaen yuḡaena kiena ne suḡe ve lua veraga

¹³ A Yesu pisa ḡena ga, pisape “Naga sina nini, visae yar na yuḡaena tai, naga taḡatete yuḡaen pran yuḡaena kiena ne suḡe ve lua veraga. Visae sanene, yoko naga kekaran tai, ana yepen mavin tai, pona logear tai, ana ligan tai. Taḡatete akila naḡa ave yar na yuḡaena kiena ne Ntewa, a ave yar na kilavaru ḡena veraga.”

Varasi lala la pe akekaran re visen kiena ne Yesu nene poli

¹⁴ Ana e poglis nene, Varasi ḡena lala asike ga wa, asuḡa amiyagogon ke visena la nene. Ana lala, la ape yar la naḡa asitom manene kilavaru silaga, ana apitalia kare ga mrapa wo na yuḡaen amio kilavaru naḡa Yesu pisayu ke pa kiena nalogena lala. ¹⁵ Ana Yesu pis pan la, pisape “Kam na sinemiun asape akila sa naḡa yar la avisu amiu sane yar mesmes lala, ana Ntewa naga pisu ke ya naḡa sike e losinemiun. Sur mok liu naḡa yar la amieluaria, asape po, ana e visuena kiena ne Ntewa, pisu sane sur viowa ga lala.”

Nasuḡenena kiena ne Ntewa pimi narui

Matiu 11:12-13, 5:18; Mak 10:11-12

¹⁶ Visena taḡena naḡa Yesu pisa sanini, pisape “Nanua sumo, Tus Marua moḡa ga, naḡa tus lala kiena ne Mo-sis amio tus la naḡa kiena ne navisaluaena lala asike ea, pimi ḡa pano-o tol pogos kiena ne Yoane Nakeena. Yoane miyuḡae pano-o ḡisi, a nanagane Lologena Wo na suḡenena kiena ne Ntewa pimi, ana asuḡa amlologon kare ga, a yar la naḡa sinelan asape ava loyuḡa ea asuḡa aḡar ke yon paḡisi vena atolia. ¹⁷ Ana nanene pe kila re sane Navisaluaena

kiena ne Ntewa naña sike e Tus Marua naga piowa poli. Pona ma e peni amio yomarava nini ava akovio yo, ana tañatete narin mras nen visena na Navisaluaena nañani kilia kovio pogos tai.”

Pe pon re teligan lua wota la poli

Matiu 5:31-32, 19:9; Mak 10:11-12

¹⁸ Visena tañena si tai naña Yesu pisa, sanini, pisape “Visae yar tai ligan lua wona, ana va were si sira tañena, Ntewa pisu yar nene kila ke kolau amio sira tañena ne. Maran taaga mēna ga visae yar tai talopa amio sira tai naña wona na sumo ligan lua rui, yar mēna nene kila ke kolau.”

Pakaiwa na yar na sur moki amio Lasaros

¹⁹ Yesu pisa mēna pakaiwa nene, naña pisa sanini, pisape “Yar tai, naga limana pulen sur wo la moki pañisi, naga sumā miyowau ruru lue ga silaga, a legiena punu ga amiyumāen kana pupia kinanena wo lala. ²⁰ Yar tañena mēna tai tomā ga, naña silaga añere naga pimi amligan teke vanua e kove na pupia yumā mēna yar na suri moki nañani. Yar nene, naga pe yar tai naña pe kiena suri re poli, naga pe yaru na loginen ga kinanena, tas nen wetelu pulen ga magka, kiena kia Lasaros.

²¹ Amligan naga teke e yo nene pona visae yoko kilia tol re kororos nen kinanen

lañas naña yerkawa nene kanligan yo, ana peraga. Naga mlogin korenan ke ga sanene, ana lokul la apim asumā amunvan ke kiena magka lala.

²² “Pano-o yar nañani mare, ana navisi lala apim akuslua pa amligan mēke e yepas nen Epraam, ma e peni. A pe piavi re poli, yerkawa mēna mare, asinia.

²³ Ana akoven naga pa e kapi, naña mloge piowa na mloge piowa pañisi, ana siraunia, kira pa metava, kira pa perina pañisi, pisu Epraam sike na, a pisu naña Lasaros sike amio, lalua asumā akināna ke na. ²⁴ Ana pio laa, pisape ‘Oe, Ata Epraam, awis sinemā ye inu, oligan Lasaros vitom suan luas nen mrasilmana vito e narin wii tai, vena ligan te purmeneu. Nanagane kapi kekan inu nemloge piowa pano-o pañisa.’

²⁵ “Ana Epraam pisatamēna, pisape ‘Naruu, nagane ositomāl si malena wo naña ose sumo. E pogos nene, ko otol make kionā suri la naña ko sinomānia po pan ko pañisi, ana Lasaros na ositom korenan ga vanon piowa ga. E kiena malena nanua, suri punu ga piowa ga, ana nanagane, naga mloge si po e nini narui, a ko omloge ke piowa manene laa pañisi e namā. ²⁶ Ana suri ga tai, tañatete imāsu iila ko, komin Ntewa mligan pupia pulus tai mēke likan ita lua,

vena kila sane yar taḗatete molue e yo nini vena im̄asu puña, a taḗatete molue e na osike e ne vena imi e yo nini.'

27 "Ana yar nene piun ke si na ga, pisape 'Ata, visae sanene, neviun m̄areran tan ko vena ovitetalia Lasaros wasuḗe si vito tano garo uña m̄ana kau ata, 28 komin naḗa wolai lima asike ga wa. Popon Lasaros vito vi-sawal van la, visae peraga, sa ḗisi la m̄ena aimlae e yo naloge viowaena nini.'

29 Ana Epraam pisataḗea, pisape 'Ana komin ya ne monar Lasaros vitove? La aḗar ke Tus Wa rui, naḗa nasiriena wa kiena Mosis amio navisawalena la sike e rui. Popon la auloia, yoko alual suri punu sike ea.' 30 Ana naga m̄areran m̄aga, pisape 'Ana Epraam, pona taḗatete akila yo? Ana visae yar tai wasuḗe si imi e marena, visawal make sur la nene van la, yoko monar avilon la ga narui.' 31 Ana Epraam pisataḗea, pisape 'Visae la nene yepel mavin logeen ya naḗa Tus Wa pisa, pe sur re si tai naḗa kilia kila na alelaga poli. Pona yar tai wasuḗe si imi e marena, visa sur punu van la, pona ya sina, ana yoko la yepel mavin ga lelagaena.'"

17

*Pelaga na kilaen nakilali-
liena van yar taḗena*

*Matiu 18:6-7,21-22; Mak
9:42*

1 Ana Yesu pisa pan kiena nalogena lala, pisape "Yoko nakilaliena lala akilia aim lue silaga ne, ana yar naḗa kila sur laḗasa naḗa were nakilaliena imi lavisi, yoko viowa van vaḗisi. 2 Visae am̄atear kilavaru tai m̄ene kolmekina a akoan talilu vito e lowe memaena, nanene na nakoena tai naḗa melala ga ne. Ana yar naḗa kila naruu tai ligan inu, ve viawa re si m̄arera e inu, loru e mlamulena viowa, yoko yar nene naga war nakoena tai naḗa m̄arera manene laa sane taulu naga nene. 3 Sanene, kam na monar avisu ruru kiamiu malena la silaga, vena ve okila re nakilaliena viowa lala aim am̄alivin kion̄a erau."

*Pelaga naḗa oviewo
womla*

A Yesu pisape "Visae ovisu naḗa womla mloru ke pito tano e mlamulen piowa tai, monar ovis omio vena okila ruruia, a visae naga vilonia, monar oviewoia. 4 Visae naga kila viowa van ko yam ve olua e legiena ve taaga, a pogos punu ga, naga kila viowa, a siraunia naga pisa ga pan ko na wa pisape 'Ake wolai, nekila kare ko paḗisi. Awis, oviewo inu,' yoko okilakania? Pisi na monar oviewo naga e pogos make la olua nene."

*Nam̄areraena na vi-
awaena*

5 Ana nalogena la apiun tan Yesu, apisape "Suḗe,

sinemimin mesape okila kiamimi naviawaena imi mārera la sane wa.”

⁶ Ana naga pisatamea pisape “Visae aviawa ve tokak ga e inu, sane kurus nen purpa, ana visae kiamiu naviawaena nene ve lelaga ruru naapo, ana p̄isi na akilia avisa va purlu na m̄eke gare avisave ‘Omolue e yo nene, omio p̄eligas nem̄a lala, ova okapur ke gare likan lowe memaena ne, ana yoko naga logear amiu woga.’”

Yar na kilaen yuṁaen kien yerkawa naga monar kekaran ga kila

⁷ A Yesu pisape “Visae kam yar tai ve yerkawa, a kiena yar tai sum̄a kila yuṁaena la pania. Pona pa miyuṁae lokove yo, pona pisuar kiena sur mali lala, pona ya sina, ana visae yepekilavi, pogos naṁa p̄asupe e yuṁaena pitomi, yoko yerkawa visa ya ne vania? Taṁatete visa vania visave ‘Ko, oimi oto omio inu, italua tekinana,’ komin naga pe kiena yar na yuṁaena ga. ⁸ Yoko yerkawa monar visa ga vania, visave ‘Pogaga, yoko ova oviran kapi sumo wa. Visae kinanena manoa, ova oyowau ruru ke ne wa, p̄isi na owar kau imi nakania, nomunia, p̄isi, okilia ola kom̄a.’ ⁹ A pogos naṁa yar nayuṁaena kila sur punu ga naṁa yerkawa pisa pania, yoko yerkawa taṁatete visa pupia potena vania, vanon naga kiena yuṁaena ga.

¹⁰ Ana kam m̄ena ga monar ave sanene. Visae akila ruru make yuṁaena naṁa Ntewa pisa pan amiu, vano-o p̄isi, yoko avisa ga sanene, avisave ‘Ee, nanene na pe sur re tai nene poli. Tekila ga ya naṁa torokin tekila sa ke ga yar na yuṁaena kiena ne Ntewa lala.’”

Yesu kila ruru yar na leperosi la lualima, ana taaga ga pisa potena

¹¹ Ana e pogos nene, Yesu la asuṁa amial ke apa ma Yerusalem na wa, ana kiela mrapa pa likan lepas lua nene, Samaria amio Kalele. ¹² Ana amial m̄a pano-o, lavis ga am̄alivi e pulkumali tai, apitawe p̄egas nen yar tai na leperosi lala, la lualima, naṁa la asuṁa e yepas nen mrapa. ¹³ Ana pogos naṁa apisu Yesu, apion manene pania, asape “Yesu, Suṁe, awis sinem̄a ye imi.”

¹⁴ Ana pogos naṁa Yesu mloge, pisa pan la, sape “Ava akom p̄esan pun yaru wa lala vena la avisu ruru nena tasnemiū lala vena avisave kam na yepemiū mian rui.”

Ana la apano, a pogos naṁa la asuṁa amial apano, amilan ga naṁa yepela la pimi mian ke narui. ¹⁵ A lala tai, pogos naṁa pisu naga po sanene narui, naga pilonia p̄asupe si pimi, miyeluar Ntewa paṁisi, ¹⁶ pimi mloru e lana Yesu, pisa potena pania. Yar nene, naga pe pe yere Yu re naapo poli, ana naga pe Yu la kom̄as tai nae

Samaria. Ana tañena lala, la ape yere Yu nena naapo, ana la pe añasuñe re si apim poli.

¹⁷ Ana Yesu pisa sanini, sape “La naña yepela mian rui, la lualima, ana awa la ovari? ¹⁸ Naña ãasuñe pimi, naga yar nae ga lele tañena, ana komin ya ne naga taaga ãasuñe pimi mieluar Ntewa, lañas pe apim re poli?”

¹⁹ Ana Yesu pisa pania, pisape “Erau, osuñalu oyali ova uña. Kioña naviawaena tamalia ko rui.”

Nasuñenena kiena ne Ntewa imi ve sanape?

Matiu 24:23-28,37-41

²⁰ Ana siraunia, Varasi la apim apiun tan Yesu, asape “?Nasuñenena kiena ne Ntewa naña opisayu ke silaga, yoko mevisu pogwai?”

Ana Yesu pisatañea pisape “Nasuñenena kiena ne Ntewa pe pimi re sane sur tai naña yar kilia visu e kilamarana poli. ²¹ Naga pe sur re tai naña yoko avisave ‘Ke, na naña narui, nane pimi ke naña,’ pona avisave ‘Nane, sike gare rui.’ Kam na pe apisu kilale re poli, ana nasuñenena kiena ne Ntewa sike pa likan amiu rui.”

²² Ana Yesu pisa pan kiena nalogena lala, sunyu pan la sape yoko ve sanape e legiena maro la ne pimi ke ne. Naga pisape “Siraunia, yoko kam na sine-miun manene vañisi navisuen pog naña yoko inu Narina ne Yeririna neim nonñalivin yomarava, ana

nanene na pe pon re kam na avisu poli. ²³ Yoko yar la avisasa sanini avisave ‘! Naga nane gare!,’ pona ‘! Naga nane garo nel,’ ana kam na ve ava re amio la, komin pe inu re nene po laa wa. ²⁴ Ana pogos naña inu Narina ne Yeririna nowasuñea ve lelaga e kana legiena nena, yoko yar make ga avisu kilalea, yoko neimi sane yekarpla tai naña kila sinapane vivaga e lepas tai va tol lepas komñasa. ²⁵ Ana sur nene na pe kana pogos re poli wa, komin sumon nene, yoko inu Narina ne Yeririna, yar nanagane lala akila viowa van inu e sur viowa la ve moki, yoko monar akovenlua inu.

²⁶ “Vano-o tol pogos naña inu Narina ne Yeririna nowasuñea, yoko yar la ve akila ruru la re na wa, maran ve taaga ga sa ke pogos kiena ne yermarua Noa nanua sumo. ²⁷ E pogos nene, yar la asuña akinana, amun suri lala, asuña akila ke talopaena sanene, pimi tol pogos naña Noa pa loyuma e kiena pupia waa naña naga miyumaenia. Ana pupia womie pitomi kus plan make kiela malena la punu ga. ²⁸ A e pogos kiena ne Lot sa ña nenaga nene. Yar la asuña akinana, amun suri lala, asuña apa ke e lele na wilwilena po amiyumaen ke kilavaru, asuña amiyumaen ke lokove, amiyumaen ke yuma, la akila ke ga sanene pa ke na, pe asitoñal re

sur tai poli. ²⁹ Ana e nena e legiena naþa Lot molue petan kiela yo, kapi amio pan na kapiapo mloloru pitomi ma e sinapane, kekan la akokovio make nenaga. ³⁰ Ana nevisa van amiu, e pogos naþa yoko inu Narina Yeririna neimi, yar la taþatete asitoñal sur tai, asitoñal la ga, ana yoko ailan pupia sur kerkeviu la ne sanene imi ñalivin la.

³¹ “E pogos nene, visae yar tai sumã yumãe ke meta e ñana wos nen yumã, ana visu sur nene imi, ana vito tano pe pon re kilali sape va war suri laþas e ñana loyumã poli, naga monar va ga narui. Yaru naþa miyumãe ke lokove, naga ñena taþatete si vito umã, yoko monar va ga narui.

³² Kam na ve sinemiu þesan re wona Lot, naþa kirapatau, ana pimi pe kilavaru. ³³ Yar naþa kilali sape visuar ruru ga kiena malena, yoko kovio, ana yar naþa tañan kiena malena kovio, yoko naga ga tamalia sina naga. ³⁴ Nevisa van amiu nevisave e pogos nene, pona kolemalo naþa yar ñeke amio wona yo e ñala tog, ana yoko aim awerelua ve taaga ga, aligan tai ñeke na. ³⁵ Ana pona yoko sira la ve lua asike avili ke kala kinanena lele taaga yo, ana ve taaga vano tai sike na. ³⁶ Ana pona yar lalua ayumãevain ke lokove tai yo, yoko tai ure matania,

ve taaga sumãl wowe ga sike na.”

³⁷ Ana nalogena la apiuntania, asape “?Ana Suþe, suri la nene yoko ñalivi e nape?”

Ana naga pisatame la, sape “E pogos nene, yoko ve sa naþa visae sur mare tai ñeke koyo tai. E yo nene narui yoko manu la naþa akakan ke sur mare, yoko aiminia, monar la ve moki ase yo nene. E nape naþa mlamulena viowa sike ea, yo ke ga nanene narui yoko naliþereena se ea.”

18

Pakaiwa na sira naþa tagi ña pa kiena suþe na pulkumali pano-o, suþe miyagognia

¹ Ana Yesu pisa sina þakaiwa taþena tai pan la, vena ilaar la ve asitom þele re si kiela leniena lala, vena asumãl ñarera asulue ga ea, alen ña vano-o atol kana ñavisatameena. ² Kiena þakaiwa nena pa sanini,

sape: “Pulkumali tai, naþa kana suþe nena naga pe yar ñarera tai, naga pe yar tai naþa pe patanon re Ntewa poli, pe maraun re nenaga, a naga sitom þele ñena yar la.

³ Ana letano ñena tai sike e yo nene, naþa yar tai sumã kila kare ke kiena sur la silaga. Ana letano naþani pa sumã tagi ke pan kiena suþe, naga sumã pisawal ke yar naþani, sape ‘Awis, monar okila sur tai va yar nene,

naga kila kare in pañisi wa.’
 4 Ana suñe nañani pe sinen miye re sira nene poli, a pe yowenan visen va yar nañani, ana kila luen ga sanene pa ke na, sira mēna nañani pa tagi luen ga pan silaga.

“Ana siraunia naga pisape ‘In na nepe yar tai naña pe nesitom re nesape nekila ya naña Ntewa pona yar tañena pisa pan inu sape popon nekila. 5 Ana sira pimi tagin ke pan inu, ana in na pe sineun re nesape nekila ya naña pisa ke poli. Ana naga pimi piun luen ga sanene, naga kila kare inu pañisi wa, ana pona nekila ga ya naña naga piun ke yo. Visae peraga, yoko neloge kiena tagena vano-o sineu marena.’”

6 Ana Suñe Yesu pis pa la naña amiyagogon ke ãakaiwa nene, pisape “?Kam na ayagogon ruru visena naña suñe yowena nene pisa ne? Komin sira nene tagi yam moki pania, ana yoko monar sitomli sur na sira nene piun ke ne. 7 ? Ana sanapen Ntewa nae ma e peni? ?Pogos naña mloge kiena yeririna la naña mligan plan la, atagi ke pania lemalo a legiena, naga kilia su kañar sanene ve kila re sur tai van la? 8 Peraga, ana nevisa van amiu sanini, visae loge naña alen mārera vania silaga, yoko naga suñalu vilaga e pogos make ga kilia iila amiu. ?Ana nesape neviun

mēna van amiu, sane visae pogos naña inu Narina ne Yeririna nowasuñe si neim e yomarava nini, yoko nelual naña yar la asumālu mārera asike e inu sanene, pona peraga?”

Pakaiwa kiena yar naña ãarwar e kiena ãelaga naña mesmesu

9 Ana pogos naña Yesu sike amio yeririna lala, naga pisu kilale naña lañasa añarwar la pañisi, asitom ke asape la kiela malena mesmes ruru po narui, a la apisu yar tañena la apiowa ga, apisu sane la apiowa manene laa pe sa re la poli. Ana pisayu yar la sanini, pisa ãakaiwa tai, sape 10 “Yar lalua apa ma e Yumā Wa mēna Ntewa e pogos na leniena. Lala yar tai, naga pe yere Varasi, a tañena, naga kila yumāena tai naña yaru la pe sinelan re naga vanon poli, naga pe yar na takis. 11 Ana pogos naña yere Varasi naga suñalu mlen, pisa sanini, sape ‘Ake Ntewa nepisa pupia potena pan ko pañisi, naña kiau malena naga po laa sane taulu kiena ne yar tañena lala. Nemieluar ko, naña in na pe sa re yar navinauen la poli, pona yar na kilakeuiaen yar lala, a yar na kilaen kolau lala, pona yar na takis lala sane yar na suñalu sike ne. 12 Peraga, in na nesuñā nekila ke po silaga, komin naña in na nomonsilun kilaen leniena van ko e legiena lua e wik taaga, a e sur make ga naña

nemla e lum̃au, visae netol ve lualima, monar nela ve taaga van ko silaga. Sur ne la na nene narui naṗa in na nesuṃa nekila, ana kila inu nopo paṗisi e maram̃a.’

13 “Ana yar na takis, naga suṃa mloge ke piowa vanon kiena mlamulena viowa naṗa kila, ana mminu sane Ntewa pisu kiena malena pe po re nena poli. Ana naga yepen mavin va maneneen lavisi, suṃalu ga suṃa perina, a naga yepen mavin kiraen va metava ma e peni, a naga ṗarin tau ga toṃa ga, mlipalipa ke yerena, tagi, pisape ‘!Ake Ntewa, ove lemam van inu, sinem̃a ye inu, yar na kilaen mlamulena piowa!’ 14 Ana kam na asitomyulia leniena kiena lalua nene, ana yoko Ntewa kekarān kiena ai? Lelaga, yar naṗa pisu kilale kiena mlamulena viowa, a mloge piowagania, Ntewa ṗar plan kiena mlamulena viowa. Ana yar taṗena naṗani, naga ṗasuṗe si pa uṃa naṗa kiena malena maran taaga ga sa ke naṗa pimi. Yar naṗa suṃa pisirlua naga, yoko Ntewa ligan naga ṃeke tano, ana yar naṗa mligan naga sike tano, yoko Ntewa visirlua naga.”

Yesu pisa ruru sisi kokan lala

Matiu 19:13-15; Mak 10:13-16

15 Ana e poglis nene, auia laṗas aṗar narila sisi

tomtom lala apim puna Yesu, sinelan asape kus la, visa ruru la. Ana pogos naṗa nalogena la apisuia, apisalupar la, asape avava sina. 16 Ana Yesu pio sira la naṗani, sape aim m̃aga, ana pisa pan nalogena lala sanini, sape “Kam na ve avisalupar re sisi la nam̃a, atam̃an la aim pun inu, komin naṗa sisi la nam̃a, yeririna la naṗa asa ke ga la nene, la ke ga nene narui naṗa asuṃa apa loyuṃa e nasuṗenena kiena ne Ntewa. 17 In na nepisa ke lelaga na pan amiu ne, visae yar naṗa sinenan nasuṗenena kiena ne Ntewa, naga monar kila naga imi ve sa sisi la nini, visae peraga, naga taṗatete va loyuṃa.”

Yerkawa kiena ne le Yu lala tai sinenan sape tol malena

Matiu 19:16-30; Mak 10:17-31

18 Ana siraunia, suṗe tai pimi piun tan Yesu, sape “Navianena wo, awis, popon ovisawal van inu sane in na monar nekila ya naṗa visae nekila yoko nekilia netol malena naṗa ve uro re.” 19 Ana Yesu pisatam̃ea, sape “!Ei! Ko na okilia ya ne, osape in na nopo? Pe yaru tai po ruru re naapo poli, ana Ntewa ga naga taaga. 20 Ana ko opiun osape sanape naṗa yar tai sane ko naga kilia imi wo e marana Ntewa woga.

Pona okilia ruru kiena Navisaluaena yo rui, naŋa pisape ko ve okila re lau, ve oweŋar re yaru, a ve ovinau re, ve ovisokan re, ovatanon arimoma amio anomā.

²¹ Ana yar naŋani pisatamea, pisape “Lelaga, in na nekilia kemua Navisaluaena la ne opisa ke ne, a nekilia nevisa van ko sanini, in na nopuar ruru la siar e pogos naŋa nepe yar viu ke ga wa. Pimi tol nanagane, pe nekilalu re tai poli.”

²² Ana pogos naŋa Yesu mloge pisa sanene, pisape “Pogaga, ana e lepas naŋa puma, sur tai sike ga wa. Monar ova owilwilin plan make kionia sur moki la nene, ana owar kana kilavaru, ova okiakian kare ga va yar la naŋa limala plasa. Visae okila sanene, yoko kionia sur wo la ve moki ma e peni. Ko, ova okila, piŋi na oim otaveve inu.” ²³ Ana pogos naŋa yar nene mloge visena nene, sinen piowa paŋisi, kiena sitomena pimi urmi na urmi, komin naga pe yar na sur moki, limana pule paŋisi.

Yaru naŋa kiena sur moki, naga marera li maga vena vaen loyuma e nasuŋenena kiena ne Ntewa

²⁴ Ana Yesu pisu manene yerka nene pano-o piŋa, siraunia pisape “Visae yar tai naŋa kiena sur moki, naga sinenan sape va loyuma e Nasuŋenena kiena ne Ntewa, sur nene naga marera towe ma naŋa. ²⁵ Ee,

nevisa van amiu, visae kamel tai va warpo yo kome pulus nen nitil, nanene na marera paŋisi, ana visae yar tai naŋa kiena sur moki sinenan sape va loyuma e Nasuŋenena kiena ne Ntewa naga marera laa na wa.”

²⁶ Ana la naŋa amloge visena nene amilan pano-o paŋisi, asape “! Aulai! Visae sanene, ane yoko tol malena?”

²⁷ Ana Yesu pisatamea, pisape “Lelaga, yar taŋatete kila naga tol malena, ana ya naŋa yar taŋatete kila, Ntewa naga kilia kila woga.”

²⁸ Ana Pita piunia, pisape “?A yoko ve sanapen imimi? Memligan mamimi uma la rui, ana metaveve ko ke narui.”

²⁹ Ana Yesu pisa pa kiena nalogena lala, sape “Kam na ve asitom manene re e lepas nene. Yar a naŋa visae ligan mana uma, pona wona, pona wenla, pona arimana amio anena, pona narina lala, a visae ligan sur la nene vanon yumaena na Nasuŋenena kiena ne Ntewa, ³⁰ yoko naga tol maran si kiena sur la nene va ve moki manene laa va laa sane na wa. Naga nene e pogos nanagane, a sirau mena ga e pogos na pimi ke ne, yoko naga tol malena naŋa ve uro re.”

Yesu pisawal kiena marena yam telun nene

Matiu 20:17-19; Mak 10:32-34

31 Ana poglis naña amiyaloro ke apano, Yesu pio kiena lualima taaga pa lua apim puna, pisa pan la pisape “Ayagogo ruruia. Nanagane tepa ke ma Yerusalem narui, a pogos naña tetolia, sur make la naña navisawalena lala asiriyu nanua sumo rui e lepas nen Narina ne Yeririna, yoko avisuia aimi amalmalivi ve sa nena naña apisa. 32 Yoko avisu naña aligan naga va e limana ne le Rom lala, naña yoko akirakirai viowa vania, akila karea e p̄elaga viowa lala, avilasiria, 33 alilia, akila m̄a sanene vano-o awem̄aria. Ana yoko kana legiena ve telu, naga sum̄alu mal sina.”

34 Ana pe sur korena ga naña Yesu pisawal meraravan make sur punu pan la sanene, ana la pe amloge kilia ruru re nenaga. Naga sa naña visena la nene na atapolou ga e la, ana kila sane taṭatete atol kana kinasa.

Yesu kila ruru kilamara p̄ala tai

Matiu 20:29-34; Mak 10:46-52

35 Ana Yesu la amiyaloro apa m̄aga, apim lavisin pulkumali naña Seriko, ana kilamara p̄ala tai teke tano e is nen mrapa, tom̄a mlogin ke kana kinanena tan yeririna la naña apa akomkom ke e nene.

36 Ana kilamara p̄ala nañani mloge naña Yesu la apim ke na amio p̄ina la naña asum̄a amialoro

ke amio, ana naga piunia pisape “La nene na li pe la nene, akope ke ne?”

37 Ana apisatam̄e sanini, asape “!Ke, nanene na Yesu nae Nasaret nañane, nane pimi ke ne imi kom pun ita ne!”

38 Ana yar naña pio mane-nea, a tagi pa Yesu pisape “!Yesu, ko lus kiena ne Tepet, sineun naña sinem̄a ye inu!”

39 Ana la naña asumon ke Yesu, amloge pio sanene, ana apisalup̄aria, apisape “Ova ruru ko ga.”

Ana yar naña yepen ma ga, pio ke sina ga, pa laa meta sane wa, pisape “!Yesu, ko na lus kiena Tepet, nemie awis pan ko, sinem̄a ye inu!”

40 Ana Yesu mial pano, pimi sum̄al su puna e yo nene, pisape atar yar nene imi lavisinia. Ana atar pimi, Yesu piun tania, pisape 41 “?Ana ko sinom̄an osape nekila ya ne van ko?”

Ana naga piunia pisape “Suṭe, awis, sineun nesape kilamarau imi wo, nekilia nevisu suria.”

42 Ana Yesu pisape “Pogaga, nanagane nela kioṃa nakiravaena van ko sa naña opiunia. Kioṃa naviawaena kila ko opim opo sina.” 43 Ana e nena e poglis nene, yar nañani, kilamarana pimi po, ana mial ke amio Yesu, sum̄a miyeluar ke Ntewa. A yeririna m̄ena la naña apisu sur nene, apisu po paṭisi, asum̄a amieluar ke kia kiena ne Ntewa vanonia.

19

Yesu pitawe Sakias

¹ Ana Yesu la apim loyuma Seriko, amialin ke naña ava awar ro ga ea. ² Ana e nañani yar tai sike ea kiena kia Sakias. Naga pe yerkawa kiena ne yar na warpoloen takis e pupia lepas nene, ana vanon naña naga miyuma piowa, kila kare ke yaru lala e kiela kilavaru na takis nena, kila naga liman pule pañisi, naga pe yar na sur moki. ³ Ana Sakias mēna pimi e poglis nene, sinenan sape visu Yesu naga pe yar na sanape, ana yeririna la mokliu naña asike lavisin Yesu, asuwo ga yo, sa naña yo kuskus ga rui, ana naga pe pisu ruru re poli, komin naga pe yar plas ga tai. ⁴ Ana Sakias pisu sane piowa narui, kiriri sumon Yesu lala, pa tol puryove tai ñiyu pa e korowas tai, sumate ke naña visae Yesu la ayal aimi, ana naga kilia visu ruruia.

⁵ Ana pogos naña Yesu pimi tol puryove nañani, Sakias milan ga naña Yesu kira pa pisuia, pis pania, pisape “Sakias, otapulu vilaga. In na nemninuluñar e inu sane ñane neva nesu re nemio ko sumo wa gar moña.”

⁶ Sakias mloge narui, sunalu pula nena pitomi tano, ana ñere Yesu pa mēna, amio pupia kekarena pañisi.

⁷ Ana pogos naña yeririna la apisu sur nene, la moki naña pe akekan re poli,

apismumu, apisape “Yar naña Sakias naga pe yar sur naña miyuma piowa ga, naga kila kareli yar lala wa, ana vanon ya ne Yesu sinenan sape amio ava asu mēna?”

⁸ Ana pogos naña asike loyuma rui, Sakias mloge sane naga monar vilopuia, a monar keñu kiena malena, ana sunalu pisawal e marana ne Suñe, pisape “Suñe, nanagane in na netamān kiau sur la kompas va yar la naña limala korena, pe kiela sur re poli. A suri ya naña nepisa kotalia yar la ea, nepinaun la, yoko nowar maran si van la tol yam ve vari.”

⁹ Ana Yesu mloge pon manene visena naña Sakias pisa, ana pisa pania pisape “Nepisu sane ñane na, nata-maliaena kiena ne Ntewa pimi nena tol mratava nini. Yar nene naga kilalu mrapa na kiena malena, ana naga mēna pe lus kiena ne Epraam kemua lelaga, naga pe yere Yu kemua tai, ¹⁰ ana inu Narina ne Yeririna nepim e yomarava nini vena nakale la naña amiyepe petan mrapa sane yaru nene, vena netamalia la.”

Pakaiwa na yar telu naña apisuar kilavaru kiena ne kiela yerkawa

Matiu 25:14-30

¹¹ Ana yeririna la asuma amiyaggon ke visena kiena Yesu la nene, ana pis mā pan

la pano-o, pisa ãakaiwa tai pan la. Naga pisu sane pon vian la e ãakaiwa nena, komin naga kilia ke sape sane yeririna lala asitom ke asape pogos naãa ava atol yo Yerusalem, yoko naga kila nasuãenena kiena ne Ntewa imi warpo ke yo van la veraga. A nanagane apim ke lavisin Yerusalem rui, a Yesu sape vianin la sane naga monar ligan la sumo wa, yoko imi si pula. ¹² Naga pisa pan la sanini, sape “Yerkawa tai, naga pa perina e naãa pupia ãarin suãe sike ea, vena avisirlua naga imi ve ãarin suãe na kiena lepasa, yoko naga kilia wasuãe sina visuar kiena yo. ¹³ Ana sumon naãa pe pa re poli wa, naga pio kiena yar lala, la lualima, a la punu ga mla kilavaru peve taaga pan la, sape monar ayuãae amio kilavaru naãani vano-o tol pogos naãa naga wasuãe sina. ¹⁴ Ana yeririna la nae lepas nene ape nasinekar kiena ne yerkawa nene, ana pogos naãa naga pur matan la pa narui, la apisayuia asape la pe sinelan re si naga imi ve kiela ãarin suãe poli. Ana amligan visena pa pa ãarin suãe keviu na purvanua naãani, asape ‘Pe sinemimin re yar nene imi ve kiamimi ãarin suãe poli. A pe sinemimin re nena naãa oligan kia keviu nene e naga poli.’ ¹⁵ Ana ãarin suãe keviu naãani kila ga, ana yerkawa nene pimi ve

suãen ke sina ga kiena lepasa. Ana pimi pio viraviran kiena yar la naãa naga ãar ãesan kilavaru nene pan la, sinenan sape visu sane amiyuãae ea, ana ataulu si kiena kilavaru via.

¹⁶ “Ana yar naãa pimi suãal ãesan se marana, pisape ‘Suãe kiuãa kilavaru taaga naãa omla pan inu, nemiyuãae ãa amio pano-o netaulu si lualima to metavana.’

¹⁷ “Ana yerkawa nene pisu kiena yar na yuãaena nene miyuãae po, ana pisa pania sape ‘Po na po paãisi, ko omiyuãae po manene laa wa. Ana komin naãa osuãalu ãarera ose narin yuãaena naãa nemligan e lumoãa, ana nagane nela yuãaena keviu tai van ko, neligan ko ovisuar kiau pupia pulkumali ve lualima.’

¹⁸ “Ana siraunia, yar nalua pimi, pisape ‘Suãe, kilavaru taaga naãa omla pan inu, nemiyuãae ãa ea pano-o taulu si lima to metavana.’

¹⁹ “Ana yerkawa naãani pisa pania, sape ‘Po wa, ko ãena omiyuãae po paãisi, yoko neligan ko ovisuar kiau pupia pulkumali ve lima.’

²⁰ “Yoko kiena yar taãena pimi, pisape ‘Suãe, kiuãa kilavaru naãa omla pan inu, nepiwo ruru e kinakina kulmrae tai, nemligan ruru toãa ga, nane nesape nela si wasuãe imi van ko narui. ²¹ In na nesuãa nepisu ko ke sane ko yar tai naãa okilia owar plan kiuãa sur naãa

yar taþena þarar sike na, a okilia okinana e lokove naþa pe ko re omapila poli. Kioþa þelaga marera towe laa sanene, kila nemaraun ko, ana pe nekila re surian kioþa kilavaru nene po, nepuarar ruru ga toþa ga.'

22 "Ana yerkawa naþani sinen karia, pisape 'Yaru, opisa kare in laa ne wa, naþa osape in na yar marera tai ne sanene. Ana pogaga, kioþa visena nene naga ga kar ko ke sina ga. 23 'Visae in na yar sur na sanene, komin ya ne opuar kiau kilavaru sanene? Po paþisi naþa visae oligan ga e pag, vena pogos naþa nowasuþea, nekilia nowar plan sina amio narina naþa naga tauluia.'

24 "Ana yerkawa naþani pisa pa yar taþena la naþa asumal asike lavisinia, sape 'Awar plan kilavaru nene e limana, awar va yar naþa taulu lualima.'

25 "Ana apis pa yerkawa naþani, asape '! Ana suþe, naga þar mokliu wa, kiena lualima rui!'

26 "Ana yerkawa pisa pan la pisape 'Lelaga, ana sanene narui. Naga naþa kiena sur mok rui, yoko naga war si va laa sane na wa, ana naga naþa pe kiena sur re poli, yoko naga kilalu kiena narin sur ve tokak ga naþa naga mla ke rui. 27 Ana e lepas na kiau nasinekar la nene, naþa la yepela mavin naþa in na

neve suþen la, sineun nesape ava aurela aim e nini, awe moþar la amarmare e marau.'"

Ana þakaiwa kiena ne Yesu nane þisi e nene.

Yesu pimi tol yo naþa Yerusalem

Matiu 21:1-11; Mak 11:1-11; Yoane 12:12-19

28 Ana Yesu pisa pa visena la nene, sumalu, sumon la, þere la apa ma Yerusalem.

29 Ana la apim lavisin narin pulkumali lua nene sumo, naþa Petpas amio Petani, e lepas nen Kunus Na Purolip lala. Ana Yesu pisa pa kiena nalogena lua, pisape 30 "Kam lua ayalor ava ke ne e narin pulkumali na gare sumo wa. Pogos naþa ava loyuma, yoko alual togki tai, amatear teke ea. Togki naþani pe teras ga, pe yar tai to li re e masina poli wa, ana kamlua aluþarlua, aure imi e nini. 31 Visae aviun tan amiu amlua, avisave 'E, amluþarlua ke pe na ya?', yoko avisa-tamea avisave 'Suþe sine-naþ sur mal nini kila kiena yumaena tai.'"

32 Yesu pisa sanene pan lalua, ana mligan la apano, ana apano apisu sanena naþa pisa pan la. 33 Ana apano asuma amluþarlua ke kilka petan sur mal naþani, ana pogos naþa akila ke sanene, kana þar ne la apiunia asape "? E, asuma amluþarlua ke kilika petan pe na ya?"

34 Ana apisatam̃ea asape “Peraga, Suḗ sinenan sape sur mal nini kila ke ne kiena yum̃aena tai sumo wa.”

35 Ana atam̃an narui, aḗure togki naḗani pimi pa Yesu, ana aḗatetae m̃ala kulkota lala meta e m̃asina, amligan Yesu totano ea. 36 Ana Yesu kus togki nene, mial pano, ana pogos naḗa mial ke pa sanene, yeririna lala amien plan m̃ala kulkota lala aḗatetae sululu mrapa, vena togki kiena ne Yesu yalor ga metava ea.

37 Ana amial m̃a e Kunus Na Purolip la pano-o, apim atol yo e naḗa mrapa na vitoen garo Yerusalem. Ana pogos naḗa pupia ḗina moki lala na nalogena lala apisu naḗa Yesu pimi ke lavisin Yerusalem, asitom̃al pupia yum̃aena lala a kile lala naḗa apisu naga kila, a apisu sane kiela pupia ḗarin suḗe viu tai ne pimi ke ne, ana akekara paḗisi, asum̃a amieluar Ntewa keviu vanonia. 38 Asum̃a apiovisiona, asape “! Ntewa na mava, ovisa ruru ḗarin suḗe nene naḗa pimi ke e kiom̃a kia! !Pupia kekarena ma e peni, kam nae ma metava avisirlua kia kiena ne Ntewa, kiena naurarena po na pol!”

39 Ana e poglis nene, Varasi laḗas asike m̃ena likan ḗina la nene, ana pe akekaran re naḗa apisirlua ke kia kiena Yesu sanene poli, ana apisa pania asape “! Navianena, ovisaluḗar

kioḃna nalogena lala ve akiikiin ko re si sanene!”

40 Ana Yesu pisatam̃e la, sape “E, peraga narui! Visae ve akiikii re sa nene, pona yoko kilavaru ga la ne sike ne monar akiikii yo.”

Yesu tagin pulkumali wa naḗa Yerusalem

41 Ana Yesu pimi lavisin pupia pulkumali nene Yerusalem, kira pito pisuia, sinen miyeya, siar naḗa wamarana m̃launia. 42 Kila sanene narui, pisaar nena pania, pisape “Visae ovisu kilale ga ya naḗa molue puña nagane! Ntewa sum̃a kila ke kioḃna mrapa wo tai vena olual sum̃are ea ana opisu kilale ḗele ga. 43 Ana monar nevisa van ko sanini, yoko pogos tai imi van ko naḗa kioḃna nasinekar lala, la ve moki vaḗisi naḗa aimin ko. Yoko asuvivi ko, asuwo ruru ko nenaga, a yoko awar porotano imi ayuwonpolo e yepas nen kioḃna pupia kove ana akila mrapa na vitoḃmasen loyum̃a, vena awe ko. 44 Yoko awe moḃar narum̃a lala, a akilawowa make moḃa yum̃a lala, awar plan make nena kala kilatapili lala. Nakoarena na sanene yoko imi van ko komin naḗa ko yepmavin visu kilaleen naḗa nagane naga pe kioḃna pogos naḗa Ntewa pimi m̃alivi vena tamalia ko.”

45 Ana Yesu mial pa loyum̃a e pulkumali, pa e Yum̃a Wa m̃ana Ntewa, ana pisu la naḗa akila ke

yum̃aena na tauluen kururu kilavaru ea. Ana naga m̃ene plan la, sape ⁴⁶ “Ntewa pisa e kiena Visena Wa, pisape ‘Mau yum̃a wa naga pe yum̃a na leniena, ana kam na apilon yum̃a nene narui pimi sane puluve tai m̃ana yar na vinauena lala.’ ”

⁴⁷ Ana e poglis nene e legiena punu ga Yesu pa ke loyum̃a e Yum̃a Wa, ana pian ke yeririna lala, a yerkawa kiena ne yar wa lala amio navianena navisaluaena lala amio m̃ena yerkawa kiena ne yeririna lala, pe akekaran re nenaga. Asum̃a akalewele ke mrapa vena akilia akila sur tai vena kila narui monar awem̃ar Yesu. ⁴⁸ Ana peraga, apisu sane taṗatete alual mrapa, komin yeririna la naṗa amiyagogon ke kiena navianena lala, akekaran manene laa kiena visena lala, la sinelan ga naga silaga.

20

Nasumonena nae Israel lala sinelan asape avisaluṗar Yesu

Matiu 21:23-27; Mak 11:27-33

¹ Ana e si e legiena taṗena, Yesu ṗasuṗe si pa e Yum̃a Wa m̃ana Ntewa gar Yerusalem, sum̃a pian ke yeririna lala a mlologon ke m̃ena nalologena wo pan la. Ana nasumonena kiena yar wa lala amio navianena navisaluaena lala amio m̃ena nasumonon taṗena lala apim puna, apiun tania, asape ² “?

Ovisali van imimi, sane okila ke sanene e nini e kia kiena ai? ?Ane pisa pan ko pisape okila sa nene?”

³ Ana Yesu pisatam̃e la, sape “Pogaga, ana yoko in m̃ena neviun naviunena tai van amiu sumo wa. Kiau naviunena sanini, sane ⁴ “? Nakeena naṗa Yoane kila nanua ga ne pa yar lala, naga pe sur tai naṗa Ntewa pisa pan pisape kila, pona Yoane ga sitom sape kila? Amiu avisalia.”

⁵ Ana naviunena kiena ne Yesu nene kila narui apis manene ke sina ga pan la, apisa ke asape “?Yoko tevisa ve sanape na vania? !Tevisuar rurua! Visae tevisave nakeena nene, Ntewa naga pisa pa Yoane, yoko yar nene viun sina tan ita ne visave ana komin ya ne yepeta mavin lelagaena e Yoane?

⁶ Ana visae tevisave Yoane ga sitom sape kila, sa ṗisi yaru la sinela kar ita ana akove ita, komin naṗa amlelaga m̃arera rui sane Yoane naga pe navisawalena kiena ne Ntewa kemua lelaga.”

⁷ Ana sitomena nene kila narui apisatam̃e Yesu asape amninue kare ga narui.

⁸ Ana Yesu pisa pan la, sape “Sanene, in m̃ena ga taṗatete nevisa van amiu ane pisa pan inu sape nekila yum̃aena nene.”

Pakaiwa na yeririna viowa lala navisuaren lok-ilkerep

Matiu 21:33-46; Mak 12:1-12

⁹ Ana Yesu pisa p̄akaiwa tai pan yeririna la naṣa asike e poglis nene, pisape “Yerkawa tai, amio kiena lokilkerep tai. Naga sinenan sape yaloro re va e purvanua taṣena tai, naṣa m̄eke laa perina, ana naga mligan kiena lokilkerep nene pa yeririna taṣena laṣasa naṣa yoko aim ayum̄ae ea, ana aul vania. ¹⁰ Ana yerkawa naṣani pa sum̄a gare pano, pisu kilale sane nanagane pogos naṣa mrakerep marua narui. Ana mligan kiena yar tai p̄asuṣe si pa pun la naṣa asike e kiena lokilkerep naṣani, vena war kilavaru na mrakerep kom̄asa naṣa monar aul vania. Yar nene pano, ana pogos naṣa m̄alivin la, la pe sinelan re aul poli, ana aṣe kare naga, amligan si naga p̄asuṣea liman korena ga. ¹¹ Ana yerkawa naṣani mligan si kiena yar taṣena pano, ana aṣe m̄ena naga, akila piowa pania paṣisi, ana am̄enelua p̄asuṣe koren ga pa sina. ¹² Ana yam telu narui, yerkawa naṣani mligan kiena yar taṣena, ana naga m̄ena ga, aṣea kulu ga kuruta rui, akoven lua e lokilkerep nene pano.

¹³ “Ana yerkawa na lokilkerep pisu p̄elaga viowa la ne sanene, mninue kare narui, pisape ‘! Awe! ? Popon nekila ya narui? Pona nanagane monar neligan ga naruu wawa nini narui. Naruu taaga ga nini, nesitom naga paṣisi, ana visae naga

vano monar avisu kilalea, avatanonia.’ ¹⁴ Ana mligan naga pano, a pogos naṣa yar la nene apisuia, asitom piowa pania. Apisayu sina pan la, asape ‘Nanene na narin yerkawa nene yo. Yar ne na nene narui, naṣa visae yerkawa nene kovio, naga ke narui naṣa yoko kus porotano nene sane kiena lalimana. Popon towem̄aria, vena ita ga touarar tano nene ve kieta.’ ¹⁵ Ana asum̄al narui atararia, akovenlua naga pa vanua e lokilkerep naṣane, ana am̄em̄aria.”

Ana Yesu sape “Suniena nene pimi maro e nini na p̄a rui, ana popon asitomlia. Pogos naṣa yerkawa mloge sur nene, yoko naga imi kila ve sanapen la nene? ¹⁶ Nevisa van amiu sanini, yeririna viowa la nene, yoko naga imi we mom̄ar la, yoko amarmare e nakoaen m̄arera tai, ana yoko ligan lokilkerep naṣani e limana yar laṣas naṣa apowo.”

Ana poglis naṣa amloge Yesu pisa sanene, amloge kilale naṣa visena nene sane pisawan ga sur tai, pisayu sape le Yu lala pe sinelan re naga naṣa pe narina ne Ntewa poli, ana yoko Ntewa were yar la naṣa pe ape le Yu re poli akus lelela. Ana sur nene pe sinelan re aloge po, apis m̄arera, asape “Sur naṣa opisa ke ne, Ntewa monar ve ligan re sur nene imi m̄alivi sanene.”

¹⁷ Ana Yesu kira pisu manene la, piun pisape “Pe

sinemiun re poli, ana vanon ya ne asiri visen wa naña pisa sanini, pisape

'Kilavaru nini, yar na yuñäenen yuñä lala asape piowa ga, ana akoven lua pa rui,

ana nanagane kilavaru nene pimi pe kilavaru wo tai naña pe na mrapun yuñä, vena uarar yuñä m̄arera.'
Yauena 118:22

¹⁸ “Yeririna make ga naña visae avane kilavaru nene, yoko aloru akove kilavaru nena, siwowa kare yepela lala. A visae vano vano-o tol pogos naña kilavaru nene loru, ana yar a naña kilavaru monoaria, yoko kilamumu kare naga vano-o kovio nena.”

¹⁹ Ana navianen navisaluaena lala amio yerkawa kiena ne yar wa lala, apisu kilale ñakaiwa kiena Yesu nene panon la nena ga, ana sinela kar manene laa narui, asuñalu asape auarar nena naga e pogos nene. Sinelan manene laa asape akila sur tai vania, ana akila ñele ga, komin apisu yeririna la akekaran laa naga. ²⁰ Kila sanene narui ana silaga asuñä apisuaria, a lañasa apa vinau ga apa lavisinia, akila kokanin ga sa naña alelaga e naga, ana sur naña la akila ke ne, asuñä añar make nena kiena visena lala. Kiela sitomena sane sinelan asape alual visena lañas naña naga pisa, ana akilia avisawal va yerkawa

nae Rom nene Paelat, vena naga kilia la nakoena tai vania sa naña la sinelania.

Sur kiena ne Ntewa, sur kiena ne Sisa

Matiu 22:15-22; Mak 12:13-17

²¹ Pis na pog tai la naña apinaun vena aim lavisin Yesu, apiun naviunena tai tania, sa naña akila kotalia ga naga. Asape “Navianena, mepisu kilale sane kionña visena lala a kionña vianena lala ape lelaga a po pañisi. A mepisu kilale sa naña kionña nalipereen yar lala pe peve tañena re poli, naña opisu la maran taaga ga, ko opisawal mesmesun ke mrapa kiena ne Ntewa pan yeririna make ga. ²² Ana sinemimin mesape meviun tan ko sanini, sane ‘?Kieta navisaluaena pisa sanape? ? Sape mesmesun ita le Yu lala toul takis va ñarin suñe nae Rom, naña Sisa, pona pisape pe mesmes re poli?’ ”

²³ Ana Yesu pisu kilale sane asape akila kotalia ga naga, ana pisa pan la pisape ²⁴ “Ala narin kilavaru tai imi van inu. ?Avisuli sane marana ne ane teke ea? ? A kia naña asiri teke ea, kia kiena ai?”

Apisape “Marana Sisa, a kiena kia m̄ena ga.”

²⁵ Ana naga pisa pan la sape “Pogaga, sur naña pe kiena ne Sisa, ala va Sisa. A sur naña pe kiena ne Ntewa, ala va Ntewa.”

²⁶ La nene sinelan manene asape atol ruru Yesu e maran yeririna lala e kiena

visena tai, ana pogos naña amloge kana navisatamēena nena, amilan pañisi, apisu sane naga kilañar ruru kiela kap narui, ana apa ruru la ga asikena, pe apisa re si sur tai po.

Yar la naña amarmare rui, yoko amamal sina

Matiu 22:23-33; Mak 12:18-27

²⁷ Ana siraun naga nene, le Satusi lañasa, apim puna Yesu, naña sinelan asape aviun tania e lepas na sur tai naña la amlelaga ñarera ea, naña asape yar la naña amarmare rui, tañatete amamal sina e legiena maro. ²⁸ Ana apiun tania, asape “Navianena, sinemimin mesape meviun tan ko sanini. Sanapen visena tai naña yermarua Mosis siriyu pan ita na nanua sumo. Naga pisape visae yar tai, wenla mare tan wona, naña lalua pe narila re tai poli wa, yokorena wenla nene monar were letano nene ve wona, vena kila sane sira nene kilia war sisi, vena uarar kia kiena ne wenla naña mare mal tomã ga. ²⁹ Pogaga, ana e pogos tai, welelai la olua. Kiela ñearu ñere wona tai, ana naga mare tan wona nañani lalua pe narila re tai poli wa. ³⁰ Ana wenla na surana naga towe ñere sira nañani, ana yoko naga ñena mare tania, ³¹ ana wenla ñena na telu, kila sa ke ga, akila ña sanene pano-o tol wenla

maro na olua, la make ga maran taaga ga, naña pe añar re nena narila tai poli.

³² A siraun wona la punu ga nene, sira ñena nañani marñanu. ³³ Ana ovisali sur nene: “E legiena maro, pogos naña apisa ke asape yoko yeririna la amamal sina, yoko sira nene ve wona ai, komin naña talopa make amio welelai la olua nene?”

³⁴ Ana Yesu pisatamē la sape “E ga e yomarava nini, yeririna lala asumã atatalopa, ³⁵ ana la naña Ntewa pisape visae akilia amal si vetan marena vena ava loyumiã e kiena yo, ve akila re sina. E pogos nene, tañatete si atalopa narui, ³⁶ a yoko ve amarmare re sina komin naña aim sa ga navisi la narui. Yoko Ntewa kila amal sina e marena ana avim ave narina ruru nena lala. ³⁷ A e lepas namalen si nene, Mosis ñena pisayu nanua sumo rui e suniena na purlaki naña kap pivaga ke ea. E nene tepisu naña Mosis pion pa Ntewa na mava sape naga pe Ntewa kiena ne Epraam a Ntewa kiena ne Aisak a Ntewa kiena ne Sekop. ³⁸ Ana pogos naña Mosis siri visena nene, la telu nene amarmare e yomarava nini nakonua rui, sane amare e yomarava nini, ana amal asike ma puna Ntewa na wa. Ntewa naga pe pe Ntewa kiena ne yeririna re ga la ne amarmare po, ana naga sinenan sape yeririna la naña asike amio,

yeririna la naŭa amali. E navisuena kiena ne Ntewa, yeririna la naŭa amarmare e yomarava nini rui, la amal ga asike ga wa.”

³⁹ Ana navianen navisaluaena lala asuŭa amiyagogon navisatameena kiena ne Yesu naŭa pa le Satusi lala, ana apisu sane manmarua ruru po paŭisi, asape “Navianena, kioŭa navisatameena po na po paŭisi.” ⁴⁰ Apis sa nene vanon visena kiena Yesu nene kila sane le Satusi lala amaraun naŭa aviunli si sur la tania.

Yesu Navisaarena naga pe Ntewa kiena ne yermarua Parin Suŭe Tepet

Matiu 22:41-46; Mak 12:35-37

⁴¹ Ana Yesu pis pan la pa laa sane, piun sur tai tan la, sape “Komin ya ne la apian amiun ke asape Navisaarena naga monar mŭaliv e lus kiena ne yermarua Parin Suŭe Tepet, naŭa naga pe ŭarin suŭe ŭesania?” ⁴² Nepiun nene, komin nanua sumo, Tepet siri e kiena tus na Yauena lala, sape

‘Ntewa na mava pisa pa kiau Suŭe, sape

‘Ototano e luŭau lepa na ŭamarua,

⁴³ *otoŭate mŭa vano-o, yoko neligan kioŭa nasinekar lala aim ve takue tai na kilavanen lamŭa.’* Yauena 110:1

⁴⁴ “Nanene na tepisu sane Tepet pio ke pa Navisaarena

sape naga pe kiena Suŭe rui. ?Ana komin naŭa Tepet pisa sanene, sanape naŭa asuŭa apisa ke Navisaarena nene asape yoko molue kome Tepet, naga pe lus nena ga tai?”

Ana yam si tai amilan visena kiena ne Yesu.

Yesu pis mŭarera pa nasumonon na lotena lala

Matiu 23:1-36; Mak 12:38-40; Luk 11:37-54

⁴⁵ Ana ŭina la asike amiyagogon ke ga wa, naga pisawal visena tai, naŭa pe kiena ne kiena nalogena ga lala. ⁴⁶ Naga sape “Kam

na avisuar ruru yar navianen navisaluaena la nene. Asuŭa aplave manene la e mŭala kulsota viavi la nene, a visave ayaloro e yepesinasa e maran yar lala sinelan asape yar la avatanonla, a avio ruru la asave, ‘!Kee, pokolulagi, ko na ope Navianen tai naŭa po paŭisi!’ A e pogos na ŭaŭagena a loyumuŭa e yumuŭa na leniena mŭena lala, sinelan asape atoga e lelen yerkawa lala. ?Kam

na apisu kilale narui ne? ⁴⁷ A la akila kiela leniena la piayavi paŭisi wa, ana apisokan ke ga ne, komin e ke e pog nene, asuŭa akila kotalia ke ga letano lala, akila kare la. Ana vanon kiela ŭelaga la ne sanene, yoko kiela nakoena naga mŭarera manene laa sane.”

21

Letano tai mla narin kilavaru lua pan Ntewa

Mak 12:41-44

¹ Ana pogos naña Yesu la asike e yuñã mñana Ntewa, apisu naña yar lañasa apimin naña akuan kiela nalaena lala e karo na Yumã Wa. Ana Yesu teke pisu ke ne, pisu naña yar na sur moki la apim akuan kiela nalaena wo lala, ² a siraunia, naga pisu mñena letano tai, naña pe kiena sur re poli, pimi kuan kiena narin kururu varu lua ga.

³ Ana naga pisayu sira nañani pan la, sape “Apisu ke letano nene, naña kuan narin kururu varu lua ga ne? Nevisa sur na lelaga van amiu, sane naga kuan taulu make yar la naña kiela sur moki. ⁴ Yar la nene, kiela kilavaru keviu pañisi, ana akuan ga narin kinakinas komþasa, ana letano nene, narin kilavaru naña mlararia vena ve kiena malena, tamñan make nena pan Ntewa.”

Yesu pisawal naña yoko awe plan yumã wa mñana Ntewa

⁵ Ana siraun naga nene, yar lañas apisayu ke Yumã Wa, asape apisu po pañisi, amio kana kilatapili nowo lala, a kana sur tanea la naña aþaria pe na vayaia punuen kana kove nena. Ana Yesu mloge mña naña asunyu ke sanene narui, naga sape ⁶ “?Kam na apisu sur la nene asape powo liu? Nevisa van amiu sanini, sir-aunia, e pogos la tai ne pimi ke ne, yoko taþatete si kana kilatapili ne tai to ruru si

teke e lelana, komin naña yoko yar lañasia aim awe plan tetain kare make yumã nene.”

Yoko pog mñarera monar imi

⁷ Ana pogos naña amloge Yesu pisa sanene, apiuntania, asape “?Ana Navianena, yoko awe plan Yumã Wa nene pogwai, a yoko mevisu kile ya naña visawal visave lavisi sur la nene imi malmaliv narui?”

⁸ Ana pisa pan la, pisape “Kam na popon avisuar ruru amiu, vena ve yar tai imi visa kotalia amiu re, komin yoko yar ve moki naña ala kiau kia, ana aim avisave ‘!In ne nanini nepe Navisaarena nene!’ pona avisave ‘!Nane, kana pogos ne nanini narui!’ Ana ve ataveve la re. ⁹ A visae e pogos nene, aloge mñaagena na mara lala, a sur viowa la asike ga lavisi, ana ve sinemiu kurkur manene re. Sur la nene monar amalmaliv sumo, ana naga nene na pe legiena maro re nene po la wa.”

¹⁰ Ana pisa mñena pan la, sape “A þarin suþe lala, yoko akila sina mara amio þarin suþe taþena lala, a purvanua lala asumalun sina purvanua taþena lala. ¹¹ Yoko yemninu vaþisi, a yoko yo kar ga la e yomarava nini pogos na pupia viso vaþisi a maiena mñarera lala, a nanene yoko amio mñena sur na sine kurkurena a pupia kile lala meta e sinapane. ¹² Ana pogos naña

sur la nene pere wa, yoko yeririna la akila ke ne viowa van amiu. Yoko auarar amiu m̄arera, ala magka van amiu, ana siraunia aligan amiu e limana ne li na sumonen yuṁa nalenena, pona akoven amiu ava asike e yuṁa naloge viowaena, pona akila amiu asuṁalu ase marana ne kiela p̄arin suṁe lala pona kiela nasumonena lala. Sur viowa la nene yoko akusia vanon naṁa kam na apuarar ke kiau kia m̄arera. ¹³ Pogos nene yoko akila m̄arera van amiu vaṁisi, ana yoko imi sa naṁa kiamiu pulmas na lologonen Lologena Wo van la.

¹⁴ “Ana nagane, pogos naṁa sur la nene pere ke na wa, ve asitom manene re sane yoko aṁa avisa ya ne e pogos nene, ¹⁵ komin naṁa yoko e nena e kana pogos nena, nela visena na manmaruaena van amiu. Ana pog naṁa avisa visena la nene van kiamiu nasinekar lala, yoko ataulu la, yoko taṁatete si avilon kiamiu visena nena.

¹⁶ “Yoko e kana pogos nena, la ga naṁa kam na apio la ke asape arimamiu pona womla pona p̄apo pona erau, la ne sanene la ke naṁa yoko aure plan amiu aligan amiu e limana ne yerkawa lala, ana yoko akilapel amiu sanene vaṁisi vano-o kam laṁasa awe moṁar la. ¹⁷ Yoko yar la

sinela kar amiu vaṁisi, yoko laṁasa alamaran si visena van amiu, kam la naṁa kiau kia sike e amiu.

¹⁸ “Ana nevisa van amiu sanini yoko taṁatete vilṁarimiu tai yoko kovio lue. ¹⁹ Yoko asuṁal m̄arera asuṁa vano-o ataulu pog m̄arera nene, a e mrapa nena nanene narui, yoko atol kiamiu malena na lelaga ea.”

*Pupia mara gar
Yerusalem*

²⁰ A e lepas na pupia pog m̄arera naṁa yoko imi, Yesu pisa sina pan la sape “Pogos naṁa visae avisu p̄egas nen yeririna na kilaen mara lala asuṁal asuwo ke yo yervivi pupia pulkumali naṁa Yerusalem, nane yoko akilia narui sane pupia kana pog na kilaroroen pimi ke lavis narui. ²¹ A pogos naṁa avisu sur nene, kam naṁa asike Sutea, popon aureure ana atapolou e kunus lala, a amiu naṁa asike loyuṁa Yerusalem, popon amomolue ana aureure, pona amiu naṁa asike yoṁarua, ve akilali re si naṁa ato garo uṁa. ²² Nanene vanon poglis nene, naga pe pupia legiena na kila maranen sinemimiena kiena ne Ntewa, sa naṁa nasiriena lala nanua sumo apisaaria. ²³ E ṁena e pogos nene, yoko viowa manene laa va sira la naṁa ṁeṁela, amio ṁena la naṁa amla ke yu pa narila lala. E pog nene, yoko naloge

viowaena ve keviu vaṽisi e kieta purvanua, a pupia sinemimiena imi va kieta yeririna la nene. ²⁴ A yoko playu na mara kila la ave moki aloloru, a la ve moki naṽa sen viar limala, aurela ava ayuṽae korena kiena ne ṽegas nen yeririna taṽena lala. Ita le Yu lala yoko yar taṽena lala avienena kare kieta pulkumali wa naṽa Yerusalem, la ave suṽenia vano-o tol pogos naṽa Ntewa ga kila sane lala kiela ṽisi narui.”

Yoko Narina ne Yeririna wasuṽe si imi

²⁵ A Yesu pisayu legiena maro, sape “E pogos nene yoko avisu kile lala ma e mrae a e kupario a e verue lala. E yomarava nini, yoko ṽegas nen yeririna lala aloge viowa, asitom kare sur la vaṽisi, a pogos naṽa avisu sive kululu ve keviu a lapa ke vam metava va ke ura, yoko la aninue kare narui asape ṽa yoko ve sanapen la na wa. ²⁶ A pogos naṽa la avisu kilale ya naṽa pivim ke e yomarava nini, a pupia sur la naṽa ma e sinapane kulkulul kar ga narui, yoko sinela kurkur vaṽisi, asuṽa marala malon maraena, a amarmarluia. ²⁷ Yoko akila ṽa sanene vano-o, avisu inu Narina ne Yeririna noṽalivi e lul amio kiau pupia naṽareraena amio kiau pupia naurarena.

²⁸ “Ana e kiamiu lepasa, pogos naṽa visae avisu sur la

ne sanene asiar aṽalmṽaliv, ve amarau re. Ve asitom re suria, ana asuṽalu awar plan ṽarimiu vena akira va metava, komin naṽa sur la nene kana kinasa sane ki-amiu yaru nawere plan ami- uena pimi ke, lavis warpoyo narui.”

Lepas na purpiliva

²⁹ Ana Yesu pisayu ṽakaiwa tai pan la e lepas na pogos ṽarera naṽa pimi ke ga wa, sape “Kam na asitomyuli purpiliva nene pona purlaki taṽena naṽa sanene. ³⁰ Pogos naṽa avisu sane korowas la imi memaena, a imi malmalumu, a kana stos la siar miyulua, ana kam na akilia sane pogos na yepisusun pimi ke lavis narui. ³¹ Sanene pogos naṽa avisu kile la nene aim aṽalmṽaliv ke sa naṽa nepisa pan amiu ṽa rui, yoko akilia sane nasuṽenena kiena ne Ntewa pimi ke lavisin amiu narui. ³² Lelaga nevisa van amiu, yoko sur punu ga monar imi ṽalmṽaliv ṽa sanene vano-o ṽisi, ana siraunia, teras na yaru la naṽa amal ke e pog nene akovio e yomarava nini. ³³ A yoko sinapane amio yomarava nini la ṽena luwoka akovio, ana kiau visena lala taṽatete akovio pogos tai.”

Kam na monar akila ruru kiamiu malena lala

³⁴ Ana Yesu mla visena nene pan la e pogos nene,

pe visena na weŕege laena, sape “Ana e kiamiu lep-asa, kam na avisuar ruru amiu. Pe pon re kiamiu malena ve taŕena si poli, pona amun manene la kuru-uta na munena, pona sur kar la ne sanene, a ve kiamiu sitomena su manene re mēna ga e sur na yomarava nini la silaga. Visae per-aga, yoko asumā akila mā sanene vano-o ailan ga pupia legiena nene imi mālivin amiu veraga sa ga ekarpila.³⁵ Lelaga, yeririna make ga e yo punu ga e yomarava nini, pe asitoṁal re poli, asu wowe ga pe akilia re poli, ana yoko legiena nene imi tol la sa naŕa manu milan ga ŕeregawa suṁal maneno sike e naga, marŕan nenaga.³⁶ Ana kam na monar avisuar ruru amiu silaga, monar alen lue ga vena akilia asṁal māraera vena atamalia amiu e sur la naŕa yoko imi mālmāliv, vena kila naŕa akilia asumā ase marau Narina Yeririna.”

³⁷ Ana Yesu suṁa pian la ke sanene e Yuṁa Wa ko legiena lala, a kolemalu naga petan pulkumali pava ke e Kunus Na Purolip lala.³⁸ A kolulagi kona lala yeririna lala atavilo koskos, aŕasuŕe la apa si e Yuṁa Wa vena aloge kiena visena lala.

22

Nasumonena nae Israel lala asitom ke asape aweṁar

Yesu na wa

Matiu 26:1-5,14-16; Mak 14:1-2,10-11; Yoane 11:45-53

¹ Ana siraunia, pimi ke lavisin pog naŕa kas punu ga, la akila kiela pupia ŕaŕagena lua, sane ŕaŕagena na kanen kiligaŕe naŕa pe is re e poli, amio ŕaŕagena na sitomālen natamaliaena.² A e pogos nene, yerkawa kiena ne yar wa lala amio navianen navisaluaena lala, asitom ke asape aweṁar Yesu na wa, ana pe aṁal re mrapa na kilaen poli, komin amaraun naŕa asape visae akila, pona yeririna la akila sur tai van la yo.

Sutas sun amio yerkawa lala, pisaar sape ŕisi na kom varaun Yesu

³ Ana e nena e pogos nene, Yermare pimi pa e sinena Sutas nae Kariot, naga nene la lualima taaga pa lua lala ga tai.⁴ Ana pe yam piavi re nenaga, Sutas suṁalu, pa mālivin yerkawa kiena ne yar wa lala amio yerkawa kiena ne kiela lokul lala, pi-sawal kiena sitomena nena, ana apisayu mrapa ya naŕa po, vena yoko kilia vielua Yesu van la.

⁵ Ana sitomena kiena ne Sutas nene kila amloge po paŕisi, ana la apisu sane popon ala kilavaru tai vania vanonia.⁶ Ana Sutas kekaran-ia, a siar e pogos nene, silaga naga suṁa kale ke kiena pulmas tai naŕa visae ve yeririna re lala, ana naga kilia vielua Yesu van la.

Yesu pitetalia Pita lalua Yoane vena ava akila ruru kana kinanena maro

Matiu 26:17-25; Mak 14:12-21; Yoane 13:21-30

⁷ Ana apim tol legiena na siaren p̄ap̄agena na kanen kiligaṽe naṽa pe is re e poli, naṽa e m̄a nena e legiena nene monar akila kuṽaṽaena na narin sipsip lala vena sitom̄alen natamaliaena. ⁸ Ana Yesu pisa pa Pita amio Yoane, sape “Nevitetalia amlua ava gare, vena akila ruru make sur lala na kinanena na p̄ap̄agena nene.”

⁹ Ana lalua apiun tania asape “?Ana ko na sinom̄an ke osape meva mekila ruru e nape ne?”

¹⁰ Ana Yesu sape “Kamlua ava atol pupia pulutava nae Yerusalem, ana pogos naṽa avaliga loyum̄a ea, alual yar tai naṽa kus ke pupia piawi tai imi vitawe amiu. Ana ataveve avano, yoko naga were amiu ava e yum̄a tai. ¹¹ Ana pogos naṽa ava loyum̄a, avis va p̄ar na yum̄a naṽani, avisave ‘Kieta Navianena piun sape, ?Awa m̄amimi yum̄a imimi wolawa lala, vena mekilia mese eṽa makan kinanena nasitom̄alen natamaliaena nene ea?’ ¹² Kamlua avisa ve sanene vania, ana yoko naga kipian amiun pupia lele tai metava, naṽa sur make sike pa e rui, ana yoko akila ruru make sur na kanen la e yo nene.”

¹³ Ana Yesu pisa pa sanene pa nalogena lua nene narui,

lalua apano, ana apisu sur la punu ga pimi m̄alivi sa ga naṽa naga pisa ruru p̄esan kemua pan la rui.

Sanene narui, lalua akila ruru kinanena maro kana Yesu.

Kinanena maro

Matiu 26:47-56; Mak 14:2-26; Yoane 18:3-11

¹⁴ Ana siraunia Yesu la apa meta e yo naṽani, ana pog na kinanena, Yesu totano e lelen kinanena, ana li na lologena lala apim atotano amio. ¹⁵ Ana Yesu pisa pan la sape “Na nanua rui, in na nesitom̄ m̄a kata kinanena nasitom̄alen natamaliaena nene. Na nene kau kinanena maro nini, naṽa ita ga tekinana lele taaga, ana siraunia, nekilia neva ga e kiau pog m̄arera na wa. ¹⁶ Nevisa van amiu sanini, kilaparavi nini kana kinas pisayu natamaliaena. Ana yoko in na ve nakan re si narui, vano vano-o tol pogos naṽa kiau natamaliaena imi m̄aliv e yomarava nini, e pogos naṽa nasuṽenena kiena ne Ntewa imi.”

¹⁷ Ana naga mlarar pi-ala tai, pisa potenan pa Ntewa, ana pisa pan la, sape “Ala nanini, ataron werewere van amiu, amunia. ¹⁸ Nanene komin naṽa siar nanagane, in na yoko ve nomun re si kuruta na munena, vano-o tol pogos naṽa nasuṽenena kiena ne Ntewa imi.”

¹⁹ Ana naga mla kala kilaparavi tai, mlenin pisa

potena pa Ntewa, kawewowaia pisape “Naga nini tasneu ne, naña netañan pan amiu. Ana yoko kam mñena ga monar akila ve sanene, sa naña kiamiu nasitoñalinena.”

²⁰ Ana siraunia, pogos naña akinana pae, naga kila ke sina sa naña kila e kilaparavi sumo, mla piala na munen tai, pisape “Piala nini naga sane kile na kau kuruta naña yoko lau vanon amiu, vena visirluaen naviranarena viu kiena ne Ntewa amio amiu. ²¹ Ana sur viowa tai, yar naña yoko vielua inu, naga ita ga tai naña tekinana ke lele taaga nagane. ²² Yoko inu Narina ne Yeririna monar nemare ve sa naña apisaar kemua nanua sumo rui, ana yar naña yoko vielua inu, sineu miye ke nagane, yoko viowa manene vania!”

²³ Ana pogos naña amloge, asumña apiuviun tan la asape akilali naña alual lala ai naña sitom ke sape kila sanene, ana pe añal re poli.

?Ane yoko ve kiela nasumonena?

Matiu 20:25-28; Mak 10:42-45

²⁴ Ana e pogos nene, veveyuen tai molue likan nalologena lala, sape lala ai naña yoko la monar avisu naga sane naga to laa metavan la sane, ve kiela nasumonena.

²⁵ Ana Yesu mloge, pisa pan la, sape “Ita tekilia ðelaga kiena ne yerkawa na yomarava la nini rui. Parin suþe lala la ape navisuaren kiela yeririna lala, a nasumonen lala, yar la monar avatanon la, ala kia naña tometava van la, avio la avisave ‘yar navisuar itaena.’ ²⁶ Ana kam na kiau nalogena lala, monar ve akilali re sa naña aim ave yerkawa na yomarava nini. Kam yar tai naña pona apisa ke asape naga pe yerkawa, yoko monar imi ve tokakin amiu, sa naña pe pras maro. Kam yar tai naña sape naga ve kiamiu nasumonena, monar imi ve sa yar na iila amiuena.

²⁷ “E pogos na kinanena, yar tai naga toña ga sane kikiran ga, a yar taþena naña þar ke kana kinanena pimi pania. Ana lalua nene apisu sane ane pe yerkawa, naga mon manene laa metava? Lelaga kam akilia mñaga, ana in na pe sa re naga po, in na nepitom e yomarava nini sane naga naña kila yumñaena, miila yar taþena lala a kila po pan la.”

Yesu pisaar nalaena pan la

²⁸ Ana Yesu pisa pan la, sape “Kam nene, nepisu amiu sane kam na sane amilar inu po e pog mñarera la

naŕa netolia, pimi tol nana-gane. ²⁹ Ana sa naŕa arimau mligan inu nepe suŕen kiena yo, in mēna nevisa van amiu sanini nevisir plan amiu aim ave narin suŕe lala e kiau yo la nene. ³⁰ Sanene, yoko kam ke narui kam naŕa yoko ato si tano amio inu, tekinana lele taaga loyuma e kiau nasuŕenena, a yoko kam mēna atoŕano e lele na totanoena naŕa mon metava vena visuaren lus lualima taaga pa lua nene nae Israel.”

Yesu pisawal naŕa yoko Pita viro naga

Matiu 26:31-35; Mak 14:27-31; Yoane 13:36-38

³¹ Ana Yesu pis amio Sae-mon Pita, sape “Ake Sae-mon, ovisuar ruru ko. Yermare sinen kar amiu, sine-nan sape kila kare amiu vaŕisi, ana Ntewa taŕan rui sape yoko naga kilali amiu ve tokak ga, kilia liŕere naŕa po vetan naŕa piowa. ³² Ana in na nemlenwo amiu ke rui, in na nomareran ko ke e kiau leniena nesape visae ko na ve sanape, ana yoko kioŕa naviawaena taŕatete loru makea. A sir-aunia visae ko na oim owo ruru sina, owasuŕe ko oimi, yoko ko na oim ove yar tai naŕa silaga okila womla lala aviawa marera manene laa sane.”

³³ Ana Pita pisataŕe Yesu, sape “Suŕe, visae akoven ko ova e yuma nakoena, yoko in na nemio ko woga ga.

Pona akila ma van ko vano-o ova otol marena, ana in mēna nekekaran ga naŕa italu.”

³⁴ Ana Yesu pisa pania, sape “Pita, nevisa sur na lelaga van ko, sane yemalo ga nini, ve lakaporo koko-reko re wa, yoko ovisa kotalia inu yam ve telu, ovisave ko na omninue in nena ga.”

Pog marera pimi ŕarpo yo rui

³⁵ Ana Yesu piun tan la, sape “Kam na asitoŕal ke nanua ne, pogos naŕa nemligan amiu apa amlologo kar ga e yo la nene. In na nepisa pan amiu nesape ve awar re sur laŕas amio amiu, sane taga na varu, pona karo, pona kulus nen lamiu taŕena, pona sur la ne sanene. ?Ana sanape, kam na apisu limamiu plasan sur laŕas, pona peraga?”

Ana apisataŕe, asape “Suŕe, pe limamimi plasan re sur tai poli.” ³⁶ Ana Yesu pisa pan la, sape “Lelaga, naga ke narui. Ana nanagane, tesike e pog taŕena nini narui. Nanagane, yar naŕa kiena taga na varu, pona kiena karo toŕa ga, yoko warar vano. Yar naŕa pe kiena playu na mara re poli, popon wilwilin lua mana kulkota ana la kana kilavaru, va ul kiena playu na mara tai.

³⁷ In na nepisa nene pan amiu, komin nasiriena wa nasumo lala naŕa la apisayu

inu, apim amālmāliv ape lelaga narui, pano-o tol visena naña Aisea pisa, naña sape

'Akila pania sa ga naga mēna pe yar viowa ga tai naña kilakilaro ke navisaluaena.'” Ais 53:12

38 Ana nalogena lala asumā asitom veve ke ga visena kiena Yesu e lepas na playu na mara nene, ana asape “Suḡe, opisu ke ne, nanini kieta playu na mara lua nini.”

Ana Yesu pisu sane la pe akilia ruru re kiena visena poli, ana sape “E, tepisayu sur nene torok narui.”

Yesu pa mlen ma Ketsemani ma meta e Kunus na Purolip lala

Matiu 26:36-46; Mak 14:32-42

39 Ana Yesu la amligan yo na ma metava nene, ana sa naña kilakila ke ne, naga mialoro pa tol Kunus Na Purolip lala, naga amio kiena nalogena lala. 40 Ana pogos naña atol yo naña Yesu pava ke ea, amap ea, ana pisa pan la, sape “Kam na monar alen silaga, vena nakilaliena lala ve akila amiu re aloru.”

41 Naga pisa pa sanene pan la, ana mligan la, pa laa perinan laa sane, ana kinai mlen pa Ntewa. 42 Naga mlen sanini, sape “Awis Ata, visae okilia okila woga ga, olalua piala na loge viowaena nene vetan inu ve nomun re. Ana ve okila re kiau naḡinenanena, okila ga sa naña kioḡa.”

43 Ana e poglis nene Yesu mloge urmi pan paḡisi, ana apisu navisi tai mligan ma e peni pitomi tano, pitomi miila naga vena naga mārera sina. 44 Ana Yesu sumā mloge piowa paḡisi, sitom ḡele narui ana mlen mārera laa sane, mlen mā pano-o kana ninena sigariga sane kuruta kekapili e porotano.

45 Ana pogos naña mlen pae, sumāl sina, ḡasuḡe si pa puna nalogena lala, ana pisu naña nasineyeena mē la rui, amiyumāen ke ga momalena narui. 46 Ana naga pis malum kilapēge la, sape “?E, amomalion ke ya ne? Popon asumālu, akila ve sa naña nepisa pan amiu rui. Kam na monar alen vena nakilaliena lala ve aim re akila amiu aloru.”

Sutas la apim atarar Yesu Mati u 26:47-56; Mak 14:43-50; Yoane 18:3-11

47 Ana pogos naña Yesu pis ke pan la wa, apisu ga pupia ḡegas nen yeririna tai apim akaten la, apisu naña yar tai sumon la apim ke lavis narui, nanene na lala yar ga na sumo tai, naña Sutas. Ana Sutas mial pimi lavisin Yesu, kutararia ana mun pipina. 48 Ana Yesu pis ḡesan pania sape “Sutas, omun pipiu sanene na pogaga, ana komin ya ne osape owilwilin inu Narina ne Yeririna e mrapa na sanene?”

49 Ana la naña ape kiena ne Yesu naña asumālu asiḡe lavisinia apisu kilale ya naña Sutas la asape akila, la apiun

tan Yesu, asape “? Suþe, sanape, tete la e kieta playu na mara lala?”

⁵⁰ Ana Yesu pe pisatame re poli wa, ana nalogena tai suñalu, þerelua kiena playu na mara, mligan pan tai tea, naþa naga yar kiena ne þarin yar wa, ana tetere-ria ga, telua kiligana na þamarua pano.

⁵¹ Ana Yesu pis pania, sape “!E toko! Ita ve tekila re si sanene van la.” Ana naga tol si lelen kiligana yar nene, kila ruru sina.

⁵² Ana kira pisu yerkawa kiena ne yar wa lala amio yerkawa kiena ne lokul lala na yuñã mñana Ntewa, amio nasumonena taþena kiena ne le Yu lala, naþa la mñena apiminia, pis pan la, sape “? Sanape na aþar kiamiu playu lala a kiamiu plaki la sanene? ?Pona kam na asitom ke asape in na yar tai naþa nepinau mñarera pona nomeme yaru? ⁵³ Nanua sumo, e legiena punu ga, in na nesisike nemio amiu e Yumã Wa silaga pano-o, ana komin ya ne kam na pe apim re lavisin in poli vena atarar inu e pogos la nene? Ana nepisu sane kam na ape yar na yemalolo, naþa apim amio nanareraena na yemalolo taþena lala, a nanagane kiamiu aora nena napo.”

Ana apim atarar Yesu aþere pano.

Pita piro Yesu

Matiu 26:57-58,69-75;

Mak 14:53-54,66-72; Yoane 18:12-18,25-27

⁵⁴ Ana atarar Yesu, aþere þasuþe amio la apano, apa loyumã e kove kiena ne þarin yar wa. Ana Pita mñena mial tapolou ga taveve la e pogos nene, pe pa re lavisin la poli. ⁵⁵ Ana pogos naþa apim loyumã e kove nene, laþasa apa akila kapi pivaga vena ategania, ana Pita mñena pa totano amio la.

⁵⁶ Ana la asuñã narui kapi pivaga tegoli marana Pita, ana sira mñee na yuñãena tai naþa naga sike amio la, naga pisu kilalea, sape “!E, avisulia! Yaru nene, naga mñena lala yar tai naþa silaga taveve yar naþani!”

⁵⁷ Ana Pita pirovia, sape “! Peraga, vineu! Nepisa ruru ke na pan ko ne, in na pe nekilia re yar nene poli.”

⁵⁸ Ana pe piavi re poli, yar taþena kira pisu Pita, pisu kilalea, sape “E, ko mñena tai nene naþa.”

Ana Pita pisatamea, sape “Peraga, mara.”

⁵⁹ Ana asuñã ga aora si taaga þarovia, taþena pimi pilagan manene ke sina ga pan la, sape “Nevisa ruru van amiu, yar nene naga miaialor kemua amio yere Kalele nene nanua rui. ! Apisu ke ne, naga mñena pe yere Kalele ruru nena napo!”

⁶⁰ Ana Pita pisatamea, pisa kotalia la ke sina ga sape “Peraga, nemninue nena sur na opisa ke ne.”

Ana pogos naña Pita pisa ke visena nene wa, lakaporo kokoreko.

⁶¹ Ana pogos naña lakaporo kokoreko, Supe pilon ñarina kira pimi pisu manene Pita. Ana Pita sitomãl si visena kiena ne Supe naña pisawal ñesan pania, naña sape “Nevisaar nena van ko, e yemalo na legiena ga nene, pogos naña lakaporo pe kokoreko re poli wa, ana yoko oviro inu yam ve telu narui, ovisave ko na omninue in ga.” ⁶² Ana Pita mloge piowa pañisi, pa vanua, tagi na tagi.

Yeririna lala kiena ne ñarin yar wa akila kare Yesu pañisi

Matiu 26:67-68; Mak 14:53-65; Yoane 18:19-24

⁶³ Ana la naña atarar ke Yesu e pogos nene akila piowa pania, apisa karea, asuia, ⁶⁴ akila mña panoo apiwo marana vena ve kirava re sina, ana pogos naña asumã amlipa ke naga, apiai pania apiun tania asape “Ei, apisa ke asape ko navisawalena tai, a ko ovisawal lia, ane mlipa ko ga na wa.” ⁶⁵ Ana akila mña sanene panpano-o, apisa kare naga pañisi.

Atar Yesu pa e pupia kumali kiena ne yerikawa kiena ne le Yu lala

⁶⁶ Asumã ga sanene panoo mrae pa metava, ana nasumonena kiena ne le Yu lala, sa naña pupia yerikawa wa lala amio navianen navisaluena lala, apim lele

taaga e kiela pupia kumali. Pogos naña apim pa e lele taaga narui, añere Yesu pa sumãl se marala. ⁶⁷ Ana apis pania, apiun asape “Visae ko ope Navisaarena kemua lelaga, naña le Yu lala akiravan ke asape yoko naga monar imi, sinemimin mesape ovisawal ruru van imimi nanagane.”

Ana Yesu pisatamẽ la, sape “Nekilia nevisawal van amiu, ana visae nevisa, pona tañatete akekaran naña alelaga e yo. ⁶⁸ A sineun nesape in mña neviun sur lañas tan amiu, ana visae neviunia, yoko kam na tañatete mña avisatamẽ yo. ⁶⁹ Ana sur tai naña in na nekekaran nesape nevisawal van amiu, nevisa sanini, nesape ‘Siar nanagane, yoko ve sa naña Tusi Wa pisa rui, naña sape yoko Narina ne Yeririna va totano ma metava e lepas na ñamarua puna ne Ntewa na pupia namareraena.’ ”

⁷⁰ Ana pogos naña amloge visena nene, apiun tania, asape “!Ke, ya ne sa nene! ? Opisa ke osape ko ke naña ope Narina Ntewa narui?”

Ana Yesu pisatamẽa sape “Naga ke narui, sane apisa ke ne.”

⁷¹ Ana pogos naña la asumã apisu naña Yesu pisa ke sape naga pe Narina ne Ntewa, sinela mimi, apisa sanini, asape “Yar nene pisa sanene, tepisu kilale ruru sane pupia veveyuena mneke ga e naga rui. Yoko ve takale

re si yar tañena la kiena visena imi visawalia, naga kiena visena ga mliþpere sina naga rui.”

23

Aþere Yesu pa puna ne Paelat, þarin suþe nae Rom naþa pisuar ke Israel

Matiu 27:1-2,11-14; Mak 15:1-5; Yoane 18:28-38

¹ Ana li na kumali kiena ne le Yu lala, amloge pa visena kiena Yesu rui, ana asumãlu akuspran la e pupia þegas tai, aþure Yesu pa sumãl se marana ne Paelat e kiena lele naliþereena. ² Ana apis pa Paelat, apisawal sur la mok paþisi pania naþa apisayu Yesu. Asape “Yar nene, naga sumã kila kare ke sitomena kiena ne yeririna lala e kiamimi purvanua, sumã pialuþar la ke sape ve aul re si takis va kionã yerkawa nene, Parin Suþe Sisa nae Rom, a naga ga sumã pisirlua ke naga sape kus kia naþa Navisaarena, kila sane naga ve kiamimi þarin suþe keviu. Sur la nene, imimi na mepisu nena e kilamaramimi.”

³ Paelat miyagogon pae kiela visena, ana piun tan Yesu, sape “Ko towe ovisali kionã. ?Lelaga kemua naþa ko ope þarin suþe kiena ne le Yu lala, pona peraga?”

Ana Yesu pisatamãea, sape “Naga ke narui, nane opisa ne.”

⁴ Ana Paelat miyagogon visena kiena Yesu, ana pe mãl re naþa naga kila sur

tai piowa po, ana pisa pa pupia yar wa lala amio kiela yeririna lala, sape “Yar nene, e kiau navisuena, naga mesmesu ga, naga pe kilaro re navisaluaena tai poli.”

⁵ Ana la pe sinelan re logen visena kiena ne Paelat nene poli, ana la akila ga sane sur na vitaþilena, amãraran manene pania, asape “Peraga, yar nene na piowa ga. Naga sumã miyuyur kare sitomena kiena kiamimi yeririna lala, a sumã mlologo ke pan la e yo kar ga la ne e yo punu ga, siar gar Kalele, pimi þar make yo Yutea, pimi tol pupia pulkumali nene rui.”

⁶ Ana pogos naþa Paelat mloge asape Yesu siar kiena yumãena gar Kalele, piun sape naga pe yere Kalele naapo pona peraga. ⁷ Paelat piun sanene komin naga pe pisuar re lepas nae Kalele po, ana þarin suþe tañena naþa Erot naga pisuar ke yo nene, a pogos naþa apisawal pa Paelat asape Yesu naga nae Kalele, naga pisa pan la sape yoko monar aure naga va mãlavin nena Parin Suþe Erot e kiena lepasa. Ana e pogos ke nene, ana Erot mñena pimi mialiali ke Yerusalem rui, ana aþere ga Yesu apa apisuia.

⁸ Ana pogos naþa Parin Suþe Erot pisu kilale sape Yesu nene, kekarania komin naþa mloge pa kiena suniena rui, kila sane nakonua rui naga sinenan sape visuia ana peraga,

ana naga sitom ke sape nanagane narui, pona visu Yesu kila kile tai van yo.
 9 Ana naga sunli amio Yesu, piun veve sur la mok pania, ana Yesu pe pisatamē re poli, toña ga sane, pe pis re poli.

10 Ana e pogos nene, pupia yerkawa wa lala amio navianen navisaluaena lala, la mēna asumāl asike ga lavis, apis keviu apisasawal ke sur lala e lepas kiena ne Yesu.

11 Ana sur la nene akila Erot amio kiena yar na mara lala pe sinelan re si Yesu po, akila piowa pania, apisalele karea p̄isa. Siraunia amiyen kulmrae nowo m̄ana ne p̄arin supe ea, vena avitalia, ana akila m̄a sanene pano-o, yoko Erot mligan si p̄asupe pa pa Paelat vena visuvevea.

12 Ana sumon sur la nene, lalua nene Paelat amio Erot lalua ape erau viowa ga, ana siar e poglis naḡa lalua amiyum̄ae si lele taagan liḡereen Yesu, ana p̄ere si lalua apim ape erau wo sina.

Yesu sumāl si se marana ne Paelat

Matiu 27:15-26; Mak 15:6-15; Yoane 18:39-19:16

13 Ana ap̄asupe la si apim e yo kiena Paelat, ana naga pio viraviran pupia yerkawa wa lala amio supe lala a yeririna lala sape aim avisuia. 14 Ana pogos naḡa apim loyuma, pis pan la, sape “Naḡa ap̄ere p̄esan yar nene pimi sumāl se marau, kam na apisawal asape naga pilon kare lue ga sitomen kiena ne kiamiu yeririna lala. Ana nepiun

sur laḡas tania, sa naḡa kam na amloge, ana in na pe nomāl re sane naga kila sur la naḡa apisa poli, nomāl sane naga mesmesu ga. 15 Ana nemligan pa pa Erot pisuvevea, ana Erot pe m̄a re sur tai e poli, ana mligan sina pimi pan inu. Pogaga, kiau nalip̄ereena naga sanini, sane naga pe kila re nena sur tai naḡa monar maren poli. 16 Visae sanene, yoko in na nekila ga sanini vania, nekila ga naḡa awea, yoko aligan si vano, kilia wasupe si va e kiena yo.”

17 Ana komin naḡa e pogos nene naga pe pogos na kilaen pupia p̄ap̄agena kiena ne le Yu lala, asitom ke asape sa naḡa Paelat naga kila ke silaga, yoko naga monar ligan lua si yere Yu tai naḡa apuarar m̄eke e kiena yum̄a na loge viowaena. 18-19 Ana poglis nene lala yar tai naḡa Paelat p̄uarar ke ga wa, naga yar naḡa Paraḡas, naḡa nanua sumo, naga p̄ere yar taḡena laḡas akila sur piowa tai gar Yerusalem pa yar na kilaen mara lala nae Rom, amē mom̄ar la, ana Paelat koven pa e kiena yum̄a na loge viowaena.

Ana pogos naḡa apisu sane Paelat sinenan sape ligan lua si Yesu molue, apion manene pania, asape “Toko, toko! Imimi na sinemimin ga Paraḡas wasupe si imi van imimi. Yar nene, mesape olalua ga kiena malena.”

20 Ana Paelat yepen mavi, naga sinenan sape Yesu na molue koren ga sa ga ne va si vanua, ana kilali naña pis sina ga pan la. 21 Ana la ato ga metavanua, apionia asape "!Osuaria, osuar e laki torovia!"

22 Ana Paelat pis pan la yam telu narui, sape "?Ana komin ya ne, naga kila ya ne piowa? In na nepisu-veve make sur la rui, ana pe nomal re sur tai piowa teke e naga po, naña naga kilia marenia. Yoko nekila awe ga naga, yoko aligan si wasupe va umã."

23 Ana la apisatamẽ si Paelat, apion manene laa pan sane, amãreran asape Yesu na monar va e lak torovia, ana akila mã sanene pano-o atauluia.

24 Ana yokorena Paelat mla kiena naliþereena, pi-sawal pisape naga tamãan ya naña la apiunia. 25 Yar naña sike e yuã naloge viowaena komin þelaga na kilaen mara amio þelaga na wemãren yaru, Paelat tamãan naga molue si pa pan la, sa naña la apiunia. Ana e lepas kiena ne Yesu, naga pisawal sape yoko kiena yar na mara lala akila vania ve sa naña le Yu la sinelania.

Aþere Yesu pa e yo naña Kalþari

Matiu 27:32-44; Mak 15:21-32; Yoane 19:17-27

26 Ana la aþere Yesu pavini, amiyal apa e lele na suaren naga e laktorovia.

Poglis naña apa ke narui, amãl yar tai pa yomãrua þasupea, yar nena naga Saemon naña nanua sumo naga nae Saerin, ana amãreran asape naga kus laktorovia kiena ne Yesu, ana amligan e purkaunena, ana taveve Yesu vavini.

27 Amiyal apa ke sanene, ana poglis nene yeririna taþena mēna la mokliu naña ataveve ke Yesu, naña sira la moki, naña asumã atag-ililue amio pupia sineyeena. 28 Ana Yesu mloge mã kiela visena na loge viowaena lala, ana kira þatau pisu la, pis pan la, sape "Sira re Yerusalem lala o, ve atagin in re si sanene. Visae sine-miun tagena popon atagin amiu ga, pona narimiu lala. 29 Nepisa sanene pan amiu, komin naña pog mãrera tai pimi ke ne naña yoko yar la ne asuwal pog nena yoko avisa sanini, avisave '!Visae sira la ve kala sisi re ga rui! A wo manene laa sane visae ve awar re sisi la ne amun ke yu ne, komin e pogos nene yoko mãrera manene laa van ita temio narita lala.'

30 "A yoko pog nene imi viowa manene laa van la vano-o asumãlu atag va tavie lala a kunus la avisave 'Awis, aloru akoar imimi, akove monar imimi, asinwo imimi.' 31 Monar avisuar ruruia, komin nanagane na lak memaena ke ga wa ana akila ke mãrera manene pan inu rui, ana siraunia va mã sanene vano-o visae lak imi

mano pae, yoko akilia akila viowa manene laa sane van amiu.”

Asuar Yesu e laktoria

³² Ana e poglis nene, apuarar ke mēna yar lua nakilaroen navisaluaena, ana aḡere lalua nene amio Yesu, vena awemār la amio naga. ³³ Ana amial mā apano-o, apa atol kana yo nene, yo tai naḡa apio asape “Yo na puriu na ḡarin yaru.” Ana la atarar Yesu, asuar naga e laktoria, apisirlua su lika, ana asuar yar na mlamulena viowa lua nene, apisirlua la tai se ḡamarua a tai se ḡamēli.

³⁴ Sa nene narui, Yesu telan mēke e lak torovia, ana pis pa Ntewa, pisape “Ata, awis oviewo la nene. La pe apisu kilale re sur na akila ke ne poli.”

Ana sirauia li na mara la asumā ga, akila sur sa naḡa amlil māpila, vena lualen lala ane yoko war kulmrae māna Yesu tai, a ane war tai.

Apitalia kare Yesu ḡisa

³⁵ A yeririna taḡena la asumālu asike laa perina, asumā apisuar ke ga, ana kiela nasumonena lala apis piowa pa Yesu, apisa karea, asape “Akira avisu yar naḡa! Asape naga tamalia yar taḡena la mok rui, ana nanagane na sanape? Asape naga pe Navisaarena kiena ne Ntewa, pona naga pe yar tanea tai naḡa Ntewa mligan pimi. Visae sanene, popon tamalia towe laa naga narui!”

³⁶ Ana yar na mara mēna lala apisa karea, apim akian kuruta namunena naḡa melkalka pania vena munia, ³⁷ asape “!Visae ko ope ḡarin suḡe kiena ne le Yu kemua la lelaga, sa naḡa apisa ke ne, popon otamalia ko nana-gane!”

³⁸ A e pogos nene asiri navisakilaleena tai, asuar to meta e laktoria to metavan ḡarina ne Yesu, naḡa sape “ḡarin Suḡe kiena ne le Yu lala.”

Lalua na kilaroen navisaluaena apis pa Yesu

³⁹ Ana e pogos nene, lalua naḡa atelan la asike meta e lak torovia amio Yesu apis pania. Tai pis piowa pania, sa ke taḡena lala, sape “?Ko ope Navisaarena naḡa, po peraga? !Popon ovitaḡilin otamalia ita!”

⁴⁰ Ana taḡena pis pania pialuḡaria, pisape “Mara, nanagane kieta pogos na marena narui, ana ko na pe opatanon re Ntewa poli wa. Ita telu nini, nalipereena naḡa akila pan ita naga taaga ga, ⁴¹ a e lepas na ita lua, mesmesun ga napiowaena naḡa ita lua tekila, ana e lepas na puna, naga pe kila re nena sur tai poli.”

⁴² Ana pis pa Yesu, piuntania, sape “Yesu, pogos naḡa oim ove ḡarin suḡe owasuḡe ko sina, awis, ve sinemā ḡesan in re.”

⁴³ Ana Yesu pisataḡea, sape “Nevisaar van ko, legiena ga na ḡane, yoko italua tesike e kieta yo wo.”

Yesu mare

Matiu 27:45-56; Mak 15:33-41; Yoane 19:28-30

⁴⁴ Nanagane pimi tol kol-pae narui, a siar e pogos nene mrae tego re si po, kila narui yemalolo kalo make ga yo nene, mon mña sanene pano-o tol mrae telu yepekilavi. ⁴⁵ Ana siraunia, kulmrae naña telan mñeke loyuma e Yuma Wa mña Ntewa, naña kilawo yo wa naña pe yo wa pañisi, naga purpa lepas lua. ⁴⁶ Ana e pogos nene, Yesu pio maro sape “Ata, neligan ninuu e lumoma.” Pio sanene narui, ana pñere maron kiena yalua marpan top.

⁴⁷ Ana pogos naña yerkawa kiena ne yar na mara lala pisu sur la nene, naga pisirlua kia kiena ne Ntewa, sape “!Lelaga nañane, yar nene naga pe yar mesmes ga naña!” ⁴⁸ A pñina la naña apim lele taaga e yo nene, la mña apisu make sur la nene naña akila pa Yesu, pe nasineyeena pan la pañisi. Ana siraunia añasupela sina, amial apano amio pupia naloge viowaena, apa si mña lala.

⁴⁹ A pñega nen yeririna tañena mña lala asike e pogos nene, la asumalu asike laa perina sane, asumña apisu make sur lala. Naga nene erau kiena ne Yesu lala amio sira la naña amolue gar Kalele nakonua rui, ataveve mña Yesu pano-o pimi tol yo

nene, ana la mña apisu marena kiena ne Yesu.

Yosop sin Yesu

Matiu 27:57-61; Mak 15:42-47; Yoane 19:38-42

⁵⁰ Ana yar tai, naga nae pulkumali kiena ne le Yu la naña Arimatea, kiena kia Yosop. Naga pe yerkawa tai na pupia kumali kiena ne le Yu lala gar Yerusalem, pe yar mesmes tai naña kiena pñelaga po pañisi. ⁵¹ Naga tai naña sinenan manene sape popon sa nasupenena kiena ne Ntewa imi, ana nanua pogos naña apisayu ke asape akila ya ne va Yesu, naga taaga kiena sitomena pe sa re nene poli, naga kilali naña pialupar la sape ve akila re viowa vania. ⁵² Ana pogos naña mloge asape Yesu mare rui, naga pa sumal se marana ne Paelat, piun tania sape kilia kus tasnena ne Yesu. ⁵³ Ana Paelat tamñan pania, ana pa kuslua tasnena ne Yesu e laktorovia, mliluar e kulmrae, kus pa mligan ruru mñeke loyuma e puluve viu tai naña ate mare ga na wa, pe amliganli re yar tai mñene poli wa.

⁵⁴ Ana legiena na marena kiena ne Yesu nene naga e Praere, sa naña pe legiena na kila ruruen sur lala na Legiena Wa. Ana mrae pito ke narui, lavis ke Legiena Wa siar ne, naga nene e ruru nena e pogos naña mrae pito kovio. ⁵⁵ Ana sira la naña nanua ataveve Yesu siar gar Kalele pimi

tol kiena laktorovia, nana-gane pogos naña akus tas-nena pimi, ataveve sina. Ataveve pimi tol kana yo na nasiniena, ana apisu naña amligan ñeke e puluve.

⁵⁶ Ana apisu pae, añasuþela apa si uña vena akila ruru ponotaninu lala sa naña ñaþes amio pomat. Atol yo uña, ana Legiena Wa siaria, kila narui pe pogos re si tai pan la naña ava avaia tasnena ne Yesu poli. Ana asuña ga uña sanene, sa naña navisaluaena pisape monar akila e legiena wa.

24

Puluve koren ga ñeke na Matiu 28:1-10; Mak 16:1-8; Yoane 20:1-10

¹ Legiena Wa þaro pano, ana kana legiena taþena na peni, naga legiena þesa na legiena olua. Ana kolulag kona, sira laþas nene aþar ponotaninu sa naña pomat amio ñaþes naña akila ruru pa rui, amiyal apa e puluve naþani vena avaia ruru tasnena ne Yesu. ² Ana pogos naña apitom atol yo, amal naña pupia kilavaru na kilawoen puluve nene, amelilivin lua rui, ³ ana apa loyuña, amilan naña tasnena ne Yesu kovio rui.

⁴ Ana asuñal ga asike narui asitom wele ma pano-o amilan naña yar lua asuñalu asike amio la. Lalua nene mñala kulmrae la miyuwowo naña miyuwowo

ruru nena naapo. ⁵ Ana sira la naþani amaraun naña akira avisu lalua nene, ana akinai tanon lalua, þarila tau pito e porotano. Ana lalua nene apis pan la, asape “E, sira lala, taþatete alual yar na malena e yo na marena. ⁶ Naga pe mon re si e nini poli, Ntewa pisirlua rui. Amiu asitomyuli sina ya naña naga pisawal pan amiu, pogos naña naga sike amio amiu nanua gar Kalele, pe apim re e nini poli wa. ⁷ Naga pisa sanini sape sa naña naga pe Narin Yeririna, yoko monar atamñan naga va e limana ne li viowa lala, ana yoko asuar naga va e laktorovia, ana siraunia, e kana legiena natelu, yoko suñalu mal sina. Nane visena ke nanene narui naña naga pisawal þesan pan amiu.”

⁸ Sira la amloge narui, kila la asitoñal si visaarena naña pisa ruru pan la pisape yoko naga kilia mal sina. ⁹ Ana asitoñal sina, amligan yo nene añasuþela, apa apisu nalologena la lualima taaga pa taaga amio lala taþena lala. Sur la naña apisu e puluve apisayu meraravan pan la, ¹⁰⁻¹¹ ana la pe amlelaga re e poli, apisu sane sira la nene asun wowe ga.

Ana sira la naña apisu suri la nene, kiela kia la sanini: Maria nae Maktala, Soana, Maria naña anenane Semes, amio si sira taþena laþasa.

Pita kiriri pa pisuveve puluve

¹² Ana Pita ga naga taaga sinenan sape visuli sur nene pe lelaga pona peraga, ana naga suṃalu, kiriri pano, sinenan sape visuveve yo loyuṃa e puluve. Pimi tol yo nene, pulu pa loyuṃa, ana pisu ga kulmrae la sike na, tasnena Yesu kovio. Ana pa si vanua, mial si ṃasuṃe pa uṃa, suṃa sitom liluenia sape sur nene na sanape ne, pona kana kinas na ya.

Nalogenā lalua amial apa gar Emeas, apitawe Yesu

¹³ Ana siraunia, e ke ga e legiena nene, la ke ga lalua amligan Yerusalem, sinelan asape ava e narin pulkumali tai, kiena kia Emeas. Mraplepa na vaen e yo nene pe piavi manene re poli, sur sane tasme lualima. ¹⁴ Ana pogos naṃa lalua amial apa ke narui, lalua asuṃa asunyu manene laa sur la naṃa ṃaro pa rui.

¹⁵ Asunlilue ṃa sanene apano, ana Yesu mial pimi piar la, amialpil amio apano. ¹⁶ Apisu naṃa mial ke amio la, apisu sane wolawa ga tai, komin naṃa apisu kilale ṃele naga.

¹⁷ Ana Yesu piun tan la, pisape “? Kam lua amial ke sanene asunyu liluen ke ya ne?” Ana pogos naṃa naga piun sanene, aparurula, asuṃalu asu, marala piowa ga sike narui.

¹⁸ Ana lala tai nene, kiena kia Kleoṃas, naga pisatanē Yesu, pisape “Yar la mok liu

na yo kar ga la ne, asuṃa amialiali ke Yerusalem e pogos nene, ana pona ko ga taaga manene ga pe omlogeyu li re pupia sur la ne kakate mare ga yo na wa?”

¹⁹ Ana Yesu piun pisape “? Ana ya la ne sane opisa ke ne?”

Apisatanēa, asape “Naga nene e lepas kiena ne yar nae Nasaret naṃa, Yesu. Naga pimi, pe navisawalen tai, kila kile la mok liu na kiena pupia naṃareraena, mlologo, a pian ruru yeririna la po paṃisi, kila sanene sinelan naga keviu, pano tol ṃena Ntewa na Mava pisawal sape kekarān naga paṃisi. ²⁰ Ana siraunia, nanua ga yemlagi nakoneva, pupia yar wa lala amio kieta nasumoneṃa lala sinela karia, aṃere ṃa naga pa e pupia kumali la pano-o amliṃerea, asape naga monar mare, ana apa asuar naga pa e laktorovia, mare rui.

²¹ Nanua sumo, kiamimi sitomena sike ga e naga, mesape naga ke narui naṃa yoko tamalia ita le Israel lala, yoko were plan ita vetan naṃareraena kiena ne le Rom lala, ana nanagane, sur la punu ga pa piowa si narui. Naga kovio petan imimi, nagane kana legiena telu narui.

²² “Ana sur si tai naṃa kila imimi memilan manene paṃisi, ana mesitomyu kaṃaran ke na wa. Nagane kolulag pogos naṃa lakaporo kokoreko yam taaga, kiamimi sira laṃas asuṃal apa

si e puluve naña amligan tasnena ne Yesu menea, apavinin asape avaiia ruru wo. ²³ Ana pogos naña apa aporu e yo nene, apisu naña tasnena pe mon re si e lelen poli, ana akirir si añasuñe la apitom pun imimi, apisawalia, a pe naga re ga nene poli, ana pisawal mēna asape apisu navisi lalua, naña apisawal asape Yesu mal si petan marena rui. ²⁴ Ana imimi lañasa sinelan asape ava avisulia, ana la apito e puluve, apisu sanena naña sira la apisa, pe añña re nena ga.”

²⁵ Nanene narui visena la naña lalua apisa pa Yesu, e pogos naña asuñal ga asike mrapa. Ana naga mēna pis, pisa pan la, pisape “Aulai, kam punu ga kiligamiu la poñe ga. Navisawalena la apisawal sur la nene nakonua rui, ana sanape naña kam na pe amlelaga re poli wa? ²⁶ Pona akilia rui naña yoko Ntewa visirlua kiena Navisaarena ve pupia yerkaawa e yomaraava nini. Ana kam na pe apisu kilale re nena ga naña Nasiriena Wa lala apisawal rui, asape yoko monar akila Navisaarena loge viowa e sur la ve moki, yoko akila kare naga sumo, ñisi na Ntewa kilia visirlua naga, vena tol kiena pupia nauarena.”

²⁷ Ana Yesu sunyu ke pan la sanene, pian la pa re laa sane wa. Naga siar e tus lala kiena ne Mosis, pimi tol tus

lala kiena ne navisawalena lala, suña pisa meraravan ruru ke pan lalua nene sanape naña visena marua la nene suña kiar ke ga naga, apisayu ke ga naga silaga.

²⁸ Ana asuñña amialor si apano, pe piavi re poli apim lavisin pulkumali naña lalua apanon ke ne. Ana lalua apisu sane Yesu suña mlilu mrapa pa yalen silaga. ²⁹ Ana amāreran pania vena sike ne amio la wa. Apis pania, asape “Nagane na mrae pito ke narui, lavis pintamña ne. Oimi osu re omio imimi sumo wa, omēke ga e nini.” Ana Yesu pa mēke amio la.

³⁰ Asuñña ga tol pogos na kinanena, ana apim lele taaga e yo na kinanena. Ana pogos na lenwoen kinanena, Yesu ga suñalu mlarar kala kilaparavi, mlen pa Ntewa pisa potena pania, kawē wowaia pion pan la. ³¹ Ana pogos naña kila sanene, e nena ga e pogos nene sa naña kilamarala pike, apisu kilalea sane naga naña sike amio la ne Yesu ke narui. Ana apisu manene mña sanene, a yam plas ga kovio nena ga.

³² Ana lalua asuñña apisayuia, asape “Suwala, tepisu kilale re poli e, ana kieta Suñe ga naña. Ana lelaga, naga nena ga, komin naña tesun lilue ke temio mrapa naña naga pisayu meraravan ke visena wa pan ita, kiena visena lala sa ga kapi kekan ke sineta.”

33 Ana pogos naña akilia sane apisu marana ne Yesu rui, pe amomal re si poli, ana asuñal ke ga, amial e pupia lepamiema añasuñe apa Yerusalem vena avisawal va lañasa.

Ana añalivin la lualima taaga pa taaga naña asike e viorena wa, amio lañasa, 34 ana lalua pe apis re pan la poli wa, ana la apis p̄san pan lalua, asape “E, pogos naña kamlua apa ga sane, sur tai pimi m̄alivin imimi e nini. Visena nanua sira la apisa, lelaga kemua naña, kieta Suñe suñalu molue petan marena rui, Pita ne nanene naga pisu e kilamaraña.” 35 Ana la m̄ena lua nañani asikol kiela visena, apisayu sanape naña Yesu m̄alivin la mrapa, a naña la pe apisu kilale re poli, pano o tol pogos naña kawewowa ga kilaparavi pan la.

Yesu m̄alivin kiena nalogena lala

Matiu 28:16-20; Mak 16:14-18; Yoane 20:19-23; Yuañaena 1:6-8

36 Ana pogos naña lalua asuñã asunyu ke sur la nene pan la wa, amilan ga naña Yesu suñal ga sike likan la rui, pisa pan la sape “Suñare sike amio amiu.” 37 Yesu pimi pula sanene, kila la amape yermare, ana amarau pañisi.

38 Ana Yesu pisu kilale naña amaraunia, piun tan la sape “!E, vanon ya ne asitom manene laa sanene? Ve sine-miu veve lua re!” 39 Avisuli lumau amio lau, lelen ya

na sike e la? !Apisuia, in ga nini! Aim atolili tasneu la komp̄asa, komin sur sane yermare naga pe puryun re poli a pe kilam̄iu re poli sane tasneu nini.” 40 Ana suñã pisa ke sanene pan la, kipian limana amio lana pan la vena akilia avisuia.

41 Ana e pogos nene, nalogena lala kiela sitomena miyuñae manene sanene, naña akekara pañisi naña apisu si Yesu, ana asitom p̄ele towe ke ga wa. Ana Yesu pis ke sina ga, piun tan la sape “?E, apran kapi rui?”

42 Ana la amlega ika tai, manoa ga na wa, ana amla kinakinas tai pa Yesu, 43 ana mlavia, kan ga e marala.

Yesu pis maro pa kiena nalogena lala

44 Ana siraunia, Yesu pis pan la, pisape “Pogos naña nesike nemio amiu nanua sumo ne, in na nepisayu visen la moki na lepas make ga na Siriena Wa pan amiu. In na neñar visena la e tus lala kiena ne Mosis, e tus lala kiena ne Navisawalena lala, a e tus na Yauena Wa lala, ana nesuñã nepisa ke nesape visena ne la nanene narui, asuñã apisayu in ke ga, a nesape yoko aim ave lelaga e inu ve ve piavi re. In na nepisa sanene pan amiu, ana nagane kam na apisu sur la punu ga nene apim ape lelaga e maramiu p̄isi narui.”

45 Ana Yesu pian la pa laa sane, kila kiela sitomen la pa keviu li laa sane

loyuñã e kinas nen Siriena Wa la nene, ana sur la punu ga pimi merarava ruru pan la. ⁴⁶ Naga pisa pan la, sape “Nane visen la nene kala kinas ne nanini narui, sane Navisaarena, yoko akila naga loge sinelae vano-o marenia, ana e kana legiena natelu, yoko suñalu mal si vetan marena. ⁴⁷ A sirau-nia e ga e kiena kia, yoko kiena yeririna lala asiar gar Yerusalem, a yoko amolue ava e yomarava wetelu, ava alologon va ðegas nen yeririna make ga, avisawal van la avisave monar avilopu la narui, ana akilia atol naviewoena e kiela mlamulen viowa lala.

⁴⁸ “Ana kam la naña apisu sur la punu ga nene e kilamaramiu, kam ke narui ava avisawal va yar taþena lala avisave suri la nene na lelaga. ⁴⁹ Yuñãena nene naga pe yuñãena ðarera tai naña ðarera paþisi, ana yoko neligan namareraena tai e amiu vena jila amiu atauluia. Namareraena nene, navisaarena kiena ne Ata sike naña yoko naga ligan molue ma e peni vitom kokonia amiu, ana sineun nesape nevisa van amiu, ve aur matan re pulkumali nini wa, ana monar asuñate ðã e nini, vano-o atolia.”

Ntewa þerelua si Yesu pa ma e peni

Mak 16:19-20; Yuñãena 1:9-11

⁵⁰ Ana pogos naña Yesu sinenan sape ligan la, sumon

la apito garo e narin pulkumali naña Petani. Apitom atol yo nene, asuñã sanene, pano-o Yesu þar plan limana metavan la, pisa ruru la. ⁵¹ Suñã pisa ruru la ðã sanene pano-o, suñã siar mligan la palilue narui, pa si metava pa nena ma e peni.

⁵² Ana nalogena lala apisu kiela Suþe kovio sina petan la, ana akinai tano amlotunia, ana aþasuþe la si apa gar Yerusalem, naña akekara naña akekara. ⁵³ Ana asuñã e nene pano-o, ana silaga e pogos na leniena make ga asuñã apa amieluar ke Ntewa e ðãana Yuñã Wa.

Nane Lologena Wo kiena ne Yesu Kristo naña in Luk nesiria, þisi e nene narui.

Lologena Wo Kiena Ne Yesu Kristo Naña YOANE Siriyuia Visayuena Na Tusi Nene

*Komþasnen suniena plas
na tusi nini*

Tusi nini, “Lologena Wo Kiena Ne Yesu Kristo Naña Yoane Siriyuia”, pisayu Yesu, sape naga Visena kiena Ntewa naña pimi sike amio ita, pe yaru. Yoane sape naga siri tusi nini vena yaru la naña auloia, akilia alelaga naña Yesu, naga yaru naña Ntewa pisaaria sape yoko ligán imi vena tamalia ita, a naga narina Ntewa lelaga. Naga siri sanene vena tekilia tetol malena e kia kiena Yesu, komin naña temlelaga ea (20:31).

Suri naña Yoane pisayu þesania, sape Yesu pe Visena naña sike kemua nanua sumo, naga sike amio Ntewa. Tusi nini pisayu kile la naña Yesu kila, naña akilia aiila ita tevisu kilalea sane Yesu naga narina Ntewa naña Ntewa pisaaria sape vitetalia naga imin tamalia ita. A sirauñ kile la pepe taaga nene naña Yesu kila, Yoane pisayu kala kinasa. Naga pisayu sanape naña yaru laþasa amlelaga e Yesu ana atavevea, a yaru laþasa yepela mavin naña alelaga ea.

E marana na keviu 13 pa tol marana na keviu 17, Yoane pisayu suri la naña pimi e Yesu kolemalo naña nasinekar la apimin vena atararia. E yemalo nene, Yesu pis ke pan kiena nalogena lala, vena akila ruru la asuñate suri la naña yoko imi tol la pogos naña akila ke kiena yuñæena. Naga pisin mēna visena na visirplanen kiela sitomena la sumo, sumon naña kiena nasinekar la apimi atararia.

E luasinen tusi nini, Yoane pisayu naña nasinekar la apimi atarar Yesu, aþure pa kumali apis pania, a sirauñia apa asuar naga e laki torovia. Naga mare, a sirauñia naga mali sina, a kiena nalogena lala apisu naga.

E tusi nini Yoane pisayu malena naña ve uro re, naña yaru kilia tolia e ga e Yesu Kristo. Malena nene siari nagane, a pimi ga e yaru la naña amlelaga, asape Yesu ga naga pe mrapa, a pe purþesnen visena lelaga, a pe purþesnen maliena. A pupia suri naña tusi nini pisayuia, naga þelaga kiena Yesu pogos naña piyan ke yaru lala, pisayu suri la naña yaru la akila pona amiyuñæenia e kiela maliena e legiena makega. Naga pis e þelaga na visena sanene, amio pakaiwa lala, vena kilaen totou naiilaen sitomiena kiena la naña amloge, a kila mēna amloge sane naga mēna pa yaru saga lala. Naga pisayu suri la

ne sane wii, kilaparavi, kapi vivaga, a yaru na visuaren sipsip amio kiena sipsip lala, a kilika naña krep amio mrasa, vena vian kiena yeririna lala e leñas na kieta maliena amio naga.

Komþasnen tusi nini la na nini

Visena na sumo 1:1—18

Yoane Nakeena a nalogena þesa lala kiena Yesu 1:19-51

Yesu kila kiena yuñæna 2:1—12:50

Legiena maro lala kiena Yesu garu Yerusalem 13:1—19:42

Yesu mali sina a kiena nalogena lala apisu naga 20:1-31

Yesu málivi sina pan kiena nalogena lala garu Kalele 21:1-25

Navisaarena naga to sumon nasiiena na yomarava nini

¹ Na konua konua rui, e purþesia, naga naña apio Purþes nen Pelaga kiena ne Ntewa naga sike amio Ntewa, a naga pe Ntewa.

² E pogos na siien sur punu ga, naga amio pa Ntewa rui,

³ naga miyuñæen yuñæna na kilaen sur punu ga. Pe sur re tai naña naga pe miyuñæen re poli.

⁴ Malena na lelaga molue e naga, ana malena nene pimi pe sane yomerarava kiena þegas punu ga na yeririna lala. ⁵ Naga pimi sa naña yomerarava na tegolien la

naña asike e pupumalko, na yemalolo nene taþatete tauluia.

Yoane Nakeena pimi mlol-ogon ke pisape yomerarava pimi ke rui

⁶ Siraunia, Ntewa mligan kiena yar tai pimi e yomarava nini, nane Yoane Nakeena. ⁷ Naga pimi sane yar na iilaena, vena visawalen yaru na yomerarava nene naga pimi ke ne, vena iilaen yeririna la punu ga akilia alelaga asape yaru nene naga pe yomerarava kiena ne Ntewa. ⁸ Sa naña, Yoane naga pe pe yomerarava re poli na wa, ana pe yar na visawalen ga.

⁹ Ana siraunia, yaru na yomerarava nene pimi kate e yomarava nini. Naga pe yomerarava nalelaga napo, ana pimi pe na ligan kiena yomerarava nene e malena kiena yeririna punu ga.

Yomerarava na yomarava

¹⁰ Yaru na yomerarava, naga naña sii yomarava nini, ana pogos naña pimi ea, ana yeririna na yomarava lala pe apisuluþar re si naga poli.

¹¹ Naga pimi þes puna ne uña mñana ne kiena yeririna la, ana la na mratava puna pe sinelan re naga poli.

¹² Ana la ga þasia akekaran naga, amlelaga ea, ana e la ga nene punuia, naga tañan la vena akilia aim ave narina ne Ntewa lala. ¹³ Naga kila la apaeme sina yam luania, pe sa re naña sisi la na

apaeme taveve lus na kuru-
ruta, pona nasinenanen sa
yernene amio sira, pona sit-
omena kiena yeririna, ana
apaeme sina taveve nasine-
nanena kiena ne Ntewa.

*Purp̄es nen Pelaga kiena
ne Ntewa pimi pe yeririna*

¹⁴ Sanene na, Purp̄es nen
Pelaga kiena ne Ntewa pimi
pe yeririna lelaga, pimi sike
likan ita, ana tepisu kiena
malena napo, pulen manene
laa p̄elaga na lemamena
amio p̄elaga nalelagaena.
Naga pe nowo tanea wa
m̄earu kiena ne Arimata,
ana mepisu kiena pupia
naurarena, kiena naga
taaga.

¹⁵ Pogos naŋa Yoane Na-
keena pisayu naga nanua
ne, pisape “Naga naŋa nepi-
sawal pae pan amiu, ne-
sape naga yoko siraun inu,
naga su metava, in na neto
ga tano, komin naga mal
nakonua laa sane, in na na
nanagane ga ne.”

¹⁶ Naga pulen p̄elaga wo
lala, ana silaga kila ke po
pan ita paŋisi, kiena pupia
lemamena kila temlogelue
ga po paŋisi.

¹⁷ Nanua
Ntewa pisirlua yermarua
Mosis, p̄ar ga kiena nav-
isaluena lala pimi pan
kiena yeririna lala, ana Yesu
Kristo, Ntewa pisirlua naga
p̄ar p̄elaga na lemamena
amio visena na lelagaena
pitomi e yomarava nini.

¹⁸ Ita yeririna lala pe yar re
nena tai naŋa kilia Ntewa
poli, pona pisu e kilamarana,

ana yaru naŋa tolue ga e
sitomena kiena ne Ntewa,
lalua aparpran la ga veraga,
naga ga pimi kila ita tekilia
Ntewa amio kiena p̄elaga
lala.

*Yoane Nakeena mlolo-
gonyu Navisaarena*

*Matiu 3:1-12; Mak 1:7-8;
Luk 3:15-17*

¹⁹ Ana pogos naŋa Yoane
Nakeena mlologo m̄a pano-
o, nasumonena kiena le Yu
lala nae Yerusalem la asitom
veve ke paŋisi sane naga
miyuñae ke sanape, pona
naga pe Navisaarena, po
naga ai. Ana la apitetalia
yaru wa p̄asia amio yar ke-
viu si p̄asia na lus wa kiena
ne Livae, apim apiun peta-
nia asape “Ko na ai?”

²⁰ Ana pogos naŋa lala api-
unia, naga pisawal ruru ga
sur punu ga pan la, pisatam̄e
la, pisape “Peraga, in na pe
nepe Navisaarena re poli.”

²¹ Ana la apisape “?Sanene
na, ko na Yermarua Elaisa
nanua sumo ne, ana ko omal
sina, po pere? Nanene
komin naŋa Visena Wa pis-
ape naga monar wasuŋe
sina sumon Navisaarena.”

Ana naga pisatam̄e la sina,
pisape “Peraga, pe in re nene
poli.”

Ana apisape “?Pogaga, ana
po ko na navisaluena naŋa
Mosis pisaar nanua yo rui?”

Ana pisatam̄e sina, pisape
“Peraga rui.”

²² Ana la apiun ke sina
ga tania, sape “?Ana ko
na a si narui? Monar
ovisa sur tai van imimi vena
mekilia mevano mevisawal

van la naŭa amligan imimi mepimi. Ovisawal ruru ga van imimi, sane ko na ai?"

²³ Ana kiena navisa-taŭeena e pogos nene sanini, pisape "Inu in na pulgo korena ga ne e yokorena nini, naŭa Navisawalena Aisea pisawal na konua rui. Ana pulgo nene pimi pe na visawalen sape: 'Amiu akila ruru mrapa lala kiena Suŭe e kiamiu malena!'"

²⁴ Ana lala ŭas naŭa asike e pogos nene, le Varasi lala, ²⁵ ana la apiun ke sina ga pan Yoane, apisape "Imimi memloge pa rui, ko na opisa osape pe ope Navisaarena re poli, pe ope Elaisa re poli, a pe ope navisaluaena re naŭa Mosis pisa poli. ?A visae sanene na, vanon ya ne ko na ositom osape ko na otorokin osun okekee lue yeririna lala sanene?"

²⁶ Ana Yoane pisataŭe la, pisape "Inu, nakeena naŭa nekila ke ne e la nene, naga e ga e wii. A yaru taŭena tai yoko imi kus leleu, naŭa naga sike pa likan ita rui, ana pe akilia re naga poli wa. ²⁷ Naga to laa metavan manene inu, sane in na pe netorokin re neva lavisin po, pona neyal nemio."

²⁸ Ana lele naŭa apa ke ea na visuen Yoane, nane e norava lavisin kumali naŭa Petania, e wii naŭa Yortan lepas na vano, nane e yo naŭa Yoane sumŭa kee ke yeririna lala ea.

Yesu, narin sipsip nakuŭaŭaena kiena ne Ntewa

²⁹ Ana e legien taŭena si tai, Yesu mial pa katen Yoane Nakeena amio imimi kiena nalogena la e yo naŭa mesike ea. Ana pogos naŭa Yoane pisu Yesu, pisa pan imimi, pisape "¡ E, amiu avisu yar na mial ke pimi naŭa! Naga, sa ga narin sipsip kiena ne Ntewa nawarplanen nakoena na mlamulena viowa kiena ne yeririna lala na yomarava nini. ³⁰ Nanene naga naŭa nepisayu ke pan amiu nanua rui, nepisa nesape: Siraun inu, pupia yar tai naga imi naŭa sumon inu, to manene laa metavan inu sane, komin naga teke sumon inu. ³¹ Nepisa visena nene nanua, nemninue ga nesape naga ai, nemninue ga nesape erau ne nanene, ana nekilia ga nesape monar nekee ita le Israel lala e wii, vena kilaen naŭa tekilia tevisu kilale kieta yerkawa nene."

³²⁻³³ Ana Yoane pisa meraravan pan imimi sanape naŭa naga kilia sape Yesu pe Navisaarena. Naga sape "Sa naŭa nepisa pa rui, in na pe nekilia re poli nesape naga ai, ana pe piavi re nena ga, Ntewa pis pan inu, pisa sanini, pisape: Visae ovisu kiau Ninuna Wa vitom ke tano, totano e yar tai, naga ke ga nene naŭa yoko kee yeririna lala e Ninuna naŭa kiau.

"Naga pisa sanene pan inu, ana pogos naŭa nepisu

Yesu nene, nepisu Ninuna mligan ma e peni pitomi tano e naga, sa naña loñe, pitomi koan e naga. ³⁴ Vanon sur ne na nene naña nepisua, nekilia nevisawal ruru van amiu, sane pe lelaga ga, yar nene pe narina ne Ntewa kemua lelaga.”

Nalogeno lua na sumo kiena Yesu apim puna

³⁵ Ana e legiena tañena si tai na, Yoane Nakeena sumña ke ga wa e yo nene, sun ke amio imimi lua Antru, naña e pogos nene mepe kiena nalogeno. ³⁶ Ana mepisu Yesu mial pimi ãaro lavis pu imimi. Ana Yoane pisa pan imimi lua, pisape “!Amiu lua avisu ke yar nene, naga sane narin sipsip na kuñañaena kiena ne Ntewa!”

³⁷ Memloge Yoane pisa sanene, ana veraga ga mesuñalu, memial mepa mesiraun Yesu. ³⁸ Ana Yesu kira patau pisu imimi lua, pisape “Nepisu sane amiu lua sinemiun ke sur tai.”

Ana mepisatamea, mepio naga sane kiamimi naviana tai, mesape “?Rapai, opimi e nini na, ko na omomon ke pe?”

³⁹ Ana naga sape “Pogaga, aimi teva avisua.” Ana memial mepa metol e naña Yesu sike ea e pogos nene, ana siar sane ko yepekilavi ko e maran mrae vari, mesun ña memio naga pano-o yemalolo.

⁴⁰ Ana Antru nene naña imimi lua memloge Yoane sunyu Yesu, mesuñalu

metaveve sanene, naga Antru naña wenla Saemon Pita navetokak. ⁴¹ Ana pog naña pisa sape taveve ga Yesu narui, ana miroro panon ãesa wenla nene, a pogos naña ñalia pis pania pisayu Navisaarena, naña e visena na Epru kiena ne le Yu la apio asape Mesaea, a e visena na Kris kiena ne le Krik la asape Kristo. Ana pisawal sanene, sape “Mara, Navisaarena nene, imimi meñal rui.” ⁴² Naga pisa pan wenla nañane, ana pure pimi pu Yesu.

Ana pogos naña Yesu pisu naga, pisape “?A, ko ñena nene naña narina ne yermarua Yoane tai? Nenagane na nesikia ko sina ga, kiomña ki Keñas.” Ki ñena nene kome visena nae Epru, naña kana kinasia kilavaru, naña kome visena nae Kris asape Pita.

Yesu pure nalogeno lua sina apim atavevea

⁴³ Ana e legiena tañena si tai, Yesu sinenan pisape taveve si kiena mrapa, pisape kusro yo vato si kiena yo naña Kalele. Mepa sanene, ãisi na ñal si yar tai, pisa pania pisape “Ko oim otaveve inu.” Yar nene, kiena ki Pilip, ⁴⁴ naña naga ñena nae yo kiena Antru amio Pita, nanene pulkumali na Pet-saeta.

⁴⁵ Ana pe piavi re poli na Pilip pa kale kiena erau tai, kiena ki Nataniel, pa pisa pania, pisape “Yar keviu naña yermarua Mosis amio

navisaluaena lala asiriyuia, apisawal na konua rui, naga pimi m̄alivi likan ita rui. Imimi meṁal rui, naga nae Nasaret, narina ne yermarua tai kiena kia Yosop. Ana yar nene, kiena ki Yesu.”

46 Ana pogos naṁa Nataniel mloge asape Yesu naga nae ga narin pulkumali naṁani, naga piunia pisape “Ana sanape? Pupia yar keviu napo tanea sanene taṁatete m̄alivi e narin yo nene Nasaret!”

Ana Pilip pisataṁea, pisape “Ei, ve ovis re sanene, ko na oim ovisuli kone wa.”

47 Ana ṁisi na lalua apa sina puna ne Yesu, a pogos naṁa lalua amial apim lavis puna, Yesu pisu Nataniel, pisayu naga, pisape “Lelaga ga, nepisu yar nene sa ne yar wo lelaga tai nae Israel, yar tai naṁa navisokanena pe to re nena e naga poli.”

48 Ana Nataniel mloge Yesu pisayu naga sanene, piun tania sape “? Ana sanape na ko na okilia osape in na yar na sanene?”

Yesu pisataṁea pisape “Pogos naṁa Pilip naga pe piṁasun ko re poli wa, pogos naṁa ko ga taaga opa ruru ko ke vatanon purpiliva, in na nekirawal ko pa rui.”

49 Ana Nataniel milan nakiliaena kiena Yesu nene, pisape “!Navianena, ko na narina ne Ntewa kemua ṁa lelaga! Ko na ope ṁarin suṁe lelaga kemua nae Israel.”

50 Ana Yesu pisa pania, pisape “! In na nepisa ga narin visena tai van ko, naṁa nepisu ko e purpiliva nene, ana veraga ga kila ko na omlelaga m̄arera e inu! Nanene na po paṁisi, ana nevisaar van ko sane yoko ovisu sur na ilanena la ve moki vaṁisi ne, naṁa ve keviu laa sane taulu naṁa opisu pa rui.

51 Lelaga nepisa ruru ga, sane yoko amiu punu ga avisu ma e peni naga vike ga ṁeke na, amio navisi nae ma metava lala avitom ke tano e inu, ava sina metava, avitom tano, ava si metava ve sanene. Sur ne la nanene akilia avisuia komin naṁa inu nepe Narina ne Yeririna, sane in na nae ma e peni nepimi nepe yeririna ruru nena naapo.”

2

Kile na sumo kiena ne Yesu, e talopaena gar Kana

1 Ana Yesu lala apimi atol pa norava nae Kalele, ana e legiena na telu, ṁaṁagena na talopaena tai e kumali nene Kana. Ana anenane Yesu naga pa kate pa e ṁaṁagena nene rui, ² a siraunia amligan visena pimin Yesu amio kiena nalogena lala, apio la ṁena ga vena ava ea.

³ Ana Yesu lala apa akate e ṁaṁagena, asum̄a amio yeririna la pano-o, sur tai naga piowa, kuruta na munena na ṁaṁagena nene naga ṁisi iroro ga. Ana anenane Yesu pimi pisa pa Yesu, pisape

“Namunena la naña yar keviu na ãpağena kila ruruia, amun make rui, ana nanağane na aplasan narui.”

⁴ Ana Yesu pisatamea, pis pania, pisape “?Sira marua, yuñena ya ne e ãpağena nene teke e inu? Ve oligan re te luñau, vanon kiau pog na yuñenen sur la ne sanene, naga pere ke ga wa.”

⁵ Anena mlogear sur la naña Yesu pisa, ana pis pa yar la naña na yuñenen ãpağena, pisape “Sur ya la naña sa naga visa, amiu akila ga, ve avis re, ayuñen ga.”

⁶ Ana ãisi na Yesu pisa pupia pias nen wii lañasia suña ga lavis, naña le Yu la asuña apio ke wii pa ea, akevan ke kiela sur la ea sa naña kiela lotuena pisa ke. Pupia pias nen wii la nene ate e kilavaru torokin waren lita ponotia ve taaga [100], punu ga tol orai. ⁷ Ana naga pisa pan la, pisape “Amiu ava avio wii, awar imi ataron vito e pias nen wii la nene vano-o uleule.” La apio ña wii pano-o apuleule ruru nega.

⁸ Ana Yesu pisape “Pogaga, nagane na avioli ve tekaki ga, ala van yar keviu na ãpağena munlia.” Pisi na apio, amla pano-o akian pania.

⁹ Ana yerkawa munlia, mloge sane pimi pe kuruta na munena narui, ana milan pañisi, mninue ga sape añal namunena nene pe.

Lala naña apio, la ga akilia ke, ana pe apisawal re poli, ãisi na naga pio yar naña talopa ga na wa pimi puna.

¹⁰ Yar nene naga pimi ana yerkawa pis pania, pisape “E ãpağena tañena lala, apio ke kuruta namunena naña po pimi ãesa, ana pogos naña yar la amun lili ña pano-o, atol mare ga kuruta na munena naña pe po manene re poli naga pimi maro. Ana e ãpağena nini, la amun ña pano-o, ãisi na ko otol ga ñau kuruta napo tai naña pimi maro. Komin ya ne okila sanene?”

¹¹ Ana sur naña Yesu kila e pulkumali nae Kana e yo naña Kalele, naga sane pe pupia kile tai, naga pe kiena kile ãesia naña miyuñenia. Naga kila, sa naña naga sape siar na kila meraravanen kiena puriukawaena nae yo metava, ana pogos naña kiena nalogena la apisuia, kiela nalelagaena e naga pa laa metava, sane naga pe Navisaarena kemua lelaga. ¹² Pisi narui na la punu ga nene apato si garo Kapeneam, nane Yesu amio anena, wenla lala amio kiena nalogena lala, apam atol si yo nene asu li ña sane pano-o tol legiena la ãasia.

Yesu ñene plan lala naña añilwilin ke sur lala loyuña e Yuña Wa ñana ne Ntewa Matiu 21:12-13; Mak 11:15-18; Luk 19:45-46

13 Ana pogos tai, lavis ke pog naña le Yu la akila kiela pupia pañagena tai, naña Pañagena na Sitomalen Natamaliaena. Ana kiela pelaga marua tai, sane e kas punu ga lala punu ga monar akilali naña ava ma metava Yerusalem e kana pog ne naapo vena kilaen pañagena nene, vena sitomalen kala apua la naña amolue gar Isip, ana e pogos nene Yesu mēna ga pavin. 14 Naga pa tol yo, ana pa kate e Yumña Wa Mana ne Ntewa, pisu lala moki naña asike aphilwilin ke puluk la, sipsip lala amio manu la, pisu mēna la naña nakepuen kilavaru tañena lala va e kilavaru nena naapo na Yumña Wa mēna Ntewa. Yumñaena la nene ape yumñaena wo tai, komin ape yumñaena na wilwili-nen sur lala naña yeririna la monar aulia vena kilaen kupapaena ea, a pe sur viowa tai, la akila kare laa yar lala, ana metavania, akila ke loyumña e kove na yo wa.

15 Ana Yesu pisu naña akila kare yo wa na yumña sanene, pisi na sinena mimi, par kilika lala, puarar luas lua sane, panon la. Naga pa sanene, pa mēne plan la amio kiela sipsip lala amio puluk lala apa vanua petan Yumña Wa mēna ne Ntewa, ana e lepas kiena ne la naña akepu ke kilavaru, pa taron plan kiela karo na kilavaru, kawe plan mēna kiela var-

vara lala. 16 Ana yar la naña aphilwilin ke manu lala, naga pis pan la pisape “!E, awar plan kiamiu sur la vetan yo nene! !Amiu ve akila re yumña mēna ne kiau ata nene imi ve yumña na tauluen kiamiu kilavaru sanene!”

17 Ana pogos naña nalogena la apisu naña Yesu mēne plan la sanene, kila lala asitomāl si nasiriena wa tai, sa naña pisayu pa Navisaarena sumo rui, naña pisa sape

“Kiau sitomena urmi pañisi e yumña wa kioña, naga sa naña kapi naga kekan ke loyumña e sineu.” Yauena 69:9

18 Ana vanon suri nene, yerkawa kiena le Yu lala, la mēna apisu ke sur la naña Yesu miyumñaenia, ana apiuntania, asape “Suria ne ko na omiyumñaen ga ne, sur keviu tanea. ?Ana ko nene okilia okila kile ya ne e maramimi, vena kila imimi mevišu kilia sane mesmesu ga naña okila sanene?”

19 Ana Yesu pisatamē pan la, pisape “Pogaga, kiau kile naga sanini: Amiu awe plan Yumña Wa nene, ana sirau-nia, e legiena ve telu ga, yoko nevisirlua sina ga.”

20 Ana asape “Lala naña amiyumñaen yumña nene, amiyumñaen pano-o tol kas lualima yam vari pa orai, ana sanape ne ko na opisa sanene, osape okilia ovisirlua si naga e legiena ve telu ga? !Tařatete ga ve sanene pa!” 21 Lala apis

sanene, vanon la pe akilia ruru re sur naña Yesu pisa ke e pogos nene poli. La pe apisu kilia re asape pog naña Yesu pisa ke Yumã mñana ne Ntewa nene, pisa ke ga tasnena ne. ²² Ana siraun laa sane, pogos naña naga mal sina ga taulu marena, kiena nalogena lala asitomãl naña naga pisa visena la nene pan la, p̄isi na kila amlelaga manene laa e nasiriena wa lala amio visena kiena ne Yesu lala pan la.

²³ Ana Yesu la asumã e p̄ap̄agena nene garo Yerusalem pano-o, naga kila ke kile la moki, ana pogos naña yeririna la apisuia, lala moki amlelaga e naga asape naga pe Navisaarena. ²⁴ Ana Yesu pe tamãan manene re naga pan la poli, pe p̄asine manene la re poli, vanon naga kilia ruru la pa rui. ²⁵ Yar tañena tařatete visa sur tai va Yesu e lepas na řelaga kiena ne yeririna lala, vanon naga kilia ruru make ga, kilia ruru sur punu ga naña sike e sitomena kiena yeririna lala.

3

Nikotimas pimi pisu Yesu

¹⁻² Ana pogos tañena tai na, kolemalu, nasumonena tai kiena ne le Yu lala pimi sape visu Yesu. Yar nene naga Varasi tai, kiena kia Nikotimas. Pisi na naga pimi, pisa pa Yesu pisape “Navianena, imimi mepisusu ko ke, naña mepisuluřar sane ko, ko

navianena tai naña okom puna Ntewa opim, vanon pe yar re tai naña kilia kila kile la ne sa naña ko na okila ke ne poli, sa Ntewa ve to re amio naga.”

³ Ana Yesu pisatam̄e pania, pisape “Ee, kile la nene apogaga, ana in na monar nevisatam̄e ve lelaga van ko, sane yar naña ve vaeme re sina ga imi ve urviu, yoko tařatete Ntewa ve suře e kiena malena.”

⁴ Ana Nikotimas sinena pulan visena nene, pisa pisape “!Aulai! ?Ana yar naña pe yermarua pa rui na kilia vaeme si ve sanape? In na pe nesitom re nesape naga kilia va sina ga loyumã e m̄eřena ne anena poli, vena vaeme sina.”

⁵ Ana Yesu pisatam̄ea sape “Nepisa pe lelaga pan ko, sane yar monar vaeme e wii, a monar vaeme e niņuna. Visae peraga, naga tařatete va loyumã e navesuřenena kiena ne Ntewa. ⁶ Yar kilia war sina ga yaru, ana Ninuna kiena ne Ntewa kilia war sina ga ninuna viu e malena kiena yeririna. ⁷ Nanene na vaemeena nalua naña nepisa ke pan ko. Ve sanene, ko na ve sinemã ulan re si naña nepisa pan ko nesape ko na monar ovaeme sina.

⁸ “Ositom veve li lagi. Lagi na miyui ke ne, naga pa ke ga e yo naña sape va ea, pona temloge ga miyui ana temninue ga tesape miyui pimi ke sanape, pona pa ke pe. Ana mrapa naña Ninuna

miyũaae e malena kiena ne yeririna lala naga sa nene, naga sa naña lagi.”

⁹ Ana Nikotimas sitom manene e visen la nene, piunia sape “Aulai, ana sur nene naga sanape ãa!”

¹⁰ Ana Yesu pisatamẽ pania, pisape “Ko na ope pupia navianena tai kiena ne le Israel la rui, ana nepisu sane sur la ne nepisa meraravan ke pan ko ne, ko na pe okilia re nenaga na!

¹¹ Oyagogo ruruia! Sa naña navisawalena la amiyũaen pa nanua rui, in na nepisa ke ga sur ya naña nekilia amio suri ya naña nepisuia, ana sa naña silaga, amiu yeririna nae Israel lala yepemiu mavin kiamimi visena lala.

¹² In na nepisayu pa sur na yomarava nini pan amiu rui, ana yepemiu mavin lelagaen ea, ana visae nevisayu si sur nae ma metava lala, yoko akilia alelaga e ve sanape? In na nepisu sane peraga yo.

¹³ Ana inu Narina ne Yeririna nekilia neviaan amiun sur la nae metava, vanon pe yar re si tai poli naña pisu yo nene, ana in ga Narin Yeririna nepetan ma e nene nepitom tano rui, sir- aunia yoko nowasuẽ neva si metava ea.

¹⁴ “Nanua sumo sumo, yermarua Mosis la asike e yo korena, lomãara la akar momãar ke yeririna lala, ana pisirlua laki tai, miyũaen totouena na lomãara a mligan mono metava ea, ana yar la naña lomãara kar la, visae akira ga

va avisu lomãara naña mẽke metava, Ntewa tamalia la. Ana e ga e mrapa mña nena nene, yoko monar aligan inu mña Narin Yeririna nomon metava e laki tai. ¹⁵ Ana yar naña visae lelaga e inu, yoko tol malena viu naña ve uro re pogos tai.”

¹⁶ Yesu pisa sanene komin Ntewa sinen si yeririna na yomarava la nini keviu pañisi, ana tamãan narina nowo nene, naña naga taaga ga pe kiena, pitomi mare wo ita, ana yar ai naña lelaga e naga taãatete kovio, yoko tol malena wo naña ve uro re pogos tai. ¹⁷ ? Ana vanon ya ne Ntewa mligan narina nene pitomi tanon yomarava nini? Pe mligan re pitomi vena naliãereen yeririna na yomarava nini poli, ana mligan pitomi vena tamãan kiena malena vena tamalia itaena.

¹⁸ “Yar naña mlelaga kemua e narina nene, yoko Ntewa taãatete liãere naga, ana yar naña pe mlelaga re poli, nakoena teke pa e naga rui, vanon pe mlelaga re e narina ne Ntewa poli.

¹⁹ ? Ana naliãereena nene naña Ntewa monar kila, purãesia naga ya? Nanene vanon mligan kiena yomerarava pitom e yomarava nini, ana yeririna la akila piowa ga pano-o, pe akekaran re naga poli, sinelan ga ãelaga viowa la na yemalolo. ²⁰ A lala punu ga naña akila ke piowa sanene, sa naña pe sinelan re nena

yomerarava nene poli, pe sinelan re aim lavisin poli, amaraun asape sa kilalae kiela naviowaena la nene vim kakate e yometava, p̄isi na yar la akilia avisu kilalea. ²¹ Ana yar la naṣa amiyuṁae e p̄elaga naṣa na po a mesmeṣ, pe amāraun re yaru na yomerarava nene poli, apim lavisinia. Lala akekarania, komin yomerarava nini naga kila meraravania sane sur la naṣa akila, pe yuṁaena nalogearena ga na sinenanena kiena ne Ntewa.”

Yoane Nakeena kekara vanon Yesu siar kiena yuṁaena

²² Ana siraun sur la nene, Yesu pure kiena nalogena lala amligan Yerusalem apa e norava nae Yutea. Apa sanene, asun akee ke yaru lala. ²³ Ana e ṁa nena e pogos nene, Yoane Nakeena ṁena suṁa e lele taṣena tai kiena ki Aenon, lavisin yo naṣa Salim. Naga pimi e nene vanon wii tai ṁeke ea, p̄isi na yeririna la naṣa apim puna, naga kee la e wii nene. ²⁴ Nanene e pogos naṣa pe atarar re naga amligan pa e yuṁa na koaena poli wa.

²⁵ Ana e pogos nene nalogena kiena ne Yoane lala akila visena tai amio le Yu taṣena tai e lepas nakevanen sur lala sa naṣa kiela lotuena pisa ke, ana e lepas ṁena nakeena lala naṣa Yoane amio Yesu lalua akila. ²⁶ Apisayu ṁa pano-o

p̄isi na apim apisu Yoane, apiun petania, asape “Naviana, mesape meviun tan ko sanape e lepas naṣa nanua sumo, pogos naṣa tesike e wii naṣa Yortan lepas navano, ana yaru naṣa Yesu pimi pisu ko, ana ko na opisa plan sur moki kom puna. A nanagane na naga ṁena kee ke yeririna lala, ana la punu ga asuṁa amliligan ita apa ke ga puna, la moki na moki.”

²⁷ Ana pogos naṣa apisa sanene pan Yoane, naga pe pielue re poli, pe mloge piowagan re poli, kekaran ga, pisape “Ita yeririna la punu ga monar teyuṁaen ga suri ya naṣa sa Ntewa ligana te limata. ²⁸ Sa naṣa amiu akilia ruru pa rui, in na nepisawal lue ga, sane kiau yuṁaena, in na pe Navisaarena re poli, in na nesumon ga naga nepimi, ve na visawalen sape naga pimi pa rui. ²⁹ A nenagane na, sane amiu na apisawal ga pan inu na wa, naga pimi kila ke pa kiena yuṁaena rui, ana suri nene nekekarnia, nepisu po paṣisi.

“Naga sane pog na talopaena, naṣa sanini. Visae yar naṣa talopa, kiena erau tai, naga iila keviu nakilaruruen sur punu ga na p̄aṣagena, ana siraunia, e kana legiena nena, pogos naṣa aure sira imi, sira nene taṣatete va totano amio yaru nene, va su ga

amio wona. Ana yaru nene pe mloge re piowa poli, kiena kekarena maran taaga ga sane naga naña talopa. Ana nanagane, in mēna nekekara sanene, naña kiau nalogena la asuñā ataveve Yesu. ³⁰ Nanene komin Suḡe Navisaarena naga monar imi ve keviu lue ga sanene, in na monar neim neve tokak lue ga.”

?Navisaarena imi yuñae ve sanape e yomarava?

³¹ Ana Yoane Nakeena pisayu Navisaarena, sape “Naga nae yo na mava, naga su metavan sur punu ga. Ita tomolue ga tano e yo nini, ana tekilia tevisu ga sur na tano lala. Ana sa naña nepisa, naga petan ma e peni pitomi tano, to metavan yeririna punu ga, ³² a naga pitomi pisawal ke sur la naña nanua susumo pisu ma metava, a sur la naña mloge. Naga pisawal sur wo la nene, ana yeririna la pe sinelan re kiena visena la nene poli, pe amlelaga re e poli. ³³ La moki pe amlelaga re poli, ana ita naña temlelaga, kieta nalelagaena kila sane Ntewa, naga kiena visena lala pe lelaga a mesmes ruru po. ³⁴ Kiena visena la nene, mligan Navisaarena pitomi pisawal pan ita rui, ana tekilia tesape visena la nene pe visena lelaga. Nanene komin pogos naña Navisaarena pitomi, tepisu sane naga pis e puriu kawaena

na Ninuna Wa kiena ne Ntewa, vanon Ntewa mla kiena Ninuna pan naga pe komsus re poli, punu nenaga. ³⁵ Ntewa Arimana kekaran narina nene keviu pañisi, ana mligan sur punu ga e limana.

³⁶ “Ve sanene na, ita naña temlelaga e naga, tetol malena rui naña pe nalue ga. Ana yar naña pe mlogear re poli, yoko taḡatete visu malena na sanene pogos tai, ana siñekar kiena ne Ntewa ve keviu vania.”

4

Yesu pisape wasuḡe si Kalele kom lepas na Samaria

¹⁻² Ana e pogos nene, visena tai telivi mā ga, apisa ke asape Yesu suñā pure ke si nalogena taḡena la moki apim puna, suñā kee la. Ana sa naña pe Yesu re kila ke nakeena e la poli, ana imimi nalogena ga la mekila, ana la apisu sane yeririna kiena ne Yesu la apim ape moki taulu kiena Yoane Nakeena.

Pisi na la apisasa lelein ke visena nene pa e yo la sanene, pano tol Varasi la, ana pogos naña Yesu mloge sape la mēna akilia, ana kila amloge piowa kominia, ³ naga pisu sane popon vetan Yutea, vato si tano garo Kalele. Pisi na naga mligan yo, pato sanene, ⁴ ana e kiena mrapa Ntewa pisaar sape monar vato war ro e norava nae Samaria.

5-6 Ana memial mña mepano, mepimi mořarpoyo e kumali tai, kiena ki Saeka. Ana lavisin kumali nene, pupia pulus nen wii tai mořa ga, nařa siar nakonua konua rui, pimi tol nagane, apio asape wii kiena ne Sekop. Porotano nene, nanua susumo pe kiena ne yermarua Sekop, ana siraunia naga tařan pa narina nařa Yosop.

Ana memio Yesu memial mepim metol wii nene, mrae su va ruru nena, Yesu mloge yepena mimi vanon kiamimi pupia yalena e mrae mřarera, řisi na pa totano e yepas nen wii nene.

Yesu pitawe sira nae Samaria tai

7-8 Meřuřa e wii nene pano-o, řisi na imimi nalogena la mesuřalu mepa e kumali pe na ulen kamimi kinanena, ana Yesu naga taaga pa ruru tořa ga. řisi na sira tai nae Samaria mial pimi sape vio wii. Naga pimi ana Yesu piun tania pisape “?Awis, okilia ovio re mña wii tai?”

9 Ana sira nene, pe kilia re Yesu poli, ana pisu kilia ga sane le Yu tai, ana milan pařisi nařa naga pis ruru po pan sařene, vanon e pogos nene, le Yu la amio le Samaria la pe apivis vitawa re poli. Ana piun tan Yesu, pisape “?Vanon ya ne ko na ope le Yu, opis panu, sira nae Samaria, opiun wii tan inu?”

10 Ana Yesu pisatařea, pisape “!Sira, visae ko na okilia ga nalaena nowo nařa

Ntewa sinena pisape la van ko! !Visae ko na okilia ga sape in na ai, nařa nepiun wii tan ko! Visae ve sa ga nene, pona ve in re nařa neviun wii tan ko, ana ko na nařa oviun wii tan inu. Ana pogos nařa visae oviun wii tan inu, nekilia nela wii nařa pe wii na laena malena van ko.”

11 Ana pogos nařa sira mloge sur nene, piun petan Yesu, pisape “Yar keviu, pe kiořa sur re tai nařa na vioen wii e poli, ana pulus nen wii nene naga pato tano pařisi. Ve sanene, wii na malena nařa opisa, yoko otol ve sanape, po yoko ovio lepas nape?” 12 Ana opisa ke wii tařena nene na, nane mřeke nini naga pe wii tanea tai. Kieta yermarua na susumo nařa Sekop, naga mřana wii nanini. Naga mun ke ea, amio narina lala, kiena sur mal lala, amligan lelein pimi tol řane. Ko na ořape ko opo taulu yermarua Sekop nene ana okilia ola wii tai nařa wo taulu nanini?”

13 Ana Yesu pisatařea pisape “Lelaga, wii nene naga po, ana pogos nařa tomun pae na, ve piavi re na moto kar ita sina. 14 Ana yar nařa visae mun wii nařa nela vania, řisi na naga tařatete si moto karia. Yoko wii nařa naga munia, imi ve sa purřes nen wii si tai loyurřa e kiena malena, ve wii na malena nařa ve uro re pogos tai, suřa lalau lue ga ve-

tania, tařatete mema pogos tai.”

¹⁵ Ana sira nene pe kilia ruru re visena kiena ne Yesu nene poli wa, pisape “Yar keviu, visae sanene, popon ola re narin wii tai nene van inu, vena nemunia, ana ve moto kar inu re sina, ve netom re si e nini nevio wii.”

¹⁶ Ana Yesu sinenan sape sira nene kilia sape naga ai, ana pisa pania, pisape “Nevisa sur tai van ko sumo wa: ovato sina, oto ovio omā oure naga amiu lua avam si e nini.”

¹⁷ Pisi na sira nařa pisape “Ee, pe wou re tai poli.”

Ana Yesu pisa pania, pisape “Lelaga, ko na opisa ke mesmes ne, ko na pe omā re tai poli. ¹⁸ Nanene vanon yar la nařa ko na ořere la nanua sumo rui, la punu ga tol lima, ana nagane na osike sina amio tai, ana pe otalopa re amio poli. Sane kiońa visena pe lelaga ga, ko na pe omā re tai poli.”

¹⁹ Ana sira nene sinena pula pařisi nařa sane Yesu kilia ruru kiena malena sanene, pisape “Lelaga ga, yar keviu. Nenagane na nekilia narui, ko ko na navisawalena tai. ²⁰ Naga po pařisi ne, ana pona ko na navisawalena ga kiena ne le Yu la yo. Imimi le Samaria lala, kiamimi yo wa nane pupia tavie nane ma ne Kerasim, nařa repimimi la nasusumo amlotun Ntewa e konua rui, pimi tol nagane. Ana amiu le Yu lala, amāreran ke asape pupia

kumali wa kiamiu nařa Yerusalem, naga taaga ga pe lele mesmes na kilaen lotena van Ntewa. Sanene, a si na mesmesu narui, amiu pona imimi? Ovisali nene!”

²¹⁻²² Ana Yesu kekaran nakilaruruen sitomena kiena ne sira nene e řelaga mesmes na lotunen Ntewa, naga pisa pania, pisape “Lelaga vineu, opisa pe lelaga ne, lotena kieta italua pe maran taaga re poli. A nanene pe vanon re lele na kilaen lotena la lua, naga vanon sur na sanini. Amiu na yo nini, akila ke lotena, a pe akilia ruru re naga nařa amlotun ke poli, a imimi le Yu la, Ntewa kilaar pisape yaru na tamaliaen yeririna lala naga molue e kiamimi lusia, řisi na mekilia ruru Ntewa kamimi nařa memlotun ke naga.

“Ana nekilia nevisa van ko sane yoko tařatete ve sanene. Monar olelaga e inu, nařa nepisa ke pan ko nagane, sane pogos tai ne pimi ke ne yoko nalotena viu tai siaria, nařa ve kieta ita punu ga. Le Yu amio le Samaria, ve tesitońal re si sape yo mesmes na lotunena Ntewa ea nane ma tavie ne, po kumali nařa Yerusalem, po yo tařena si tai. ²³ A pupia sur ga nařa tesitońalia, visae telotun Ntewa, na monar tetamān Ninuna Wa yumāe e ninuta, a monar telotun lelaga, torokin nařa kiena visena lelaga pisa.

“Ana nanagane na Ntewa arimata kale ke yeririna la

naña akilia alotun naga e ðelaga mesmesu na sanene. Pisi na e pogos ne pimi ke na wa, po naña pimi pa rui, yoko kiena ðegas na lelaga na kiena lotena, alotun naga ve sanene. ²⁴ Ntewa naga pe ninuna, ana yar naña sape lotunia, monar lotun e ninuna, a suri nene monar ve lelaga e kiena malena.”

²⁵ Pisi na sira nene, naga mlelaga ke sape yoko Navisaarena imi, naga naña visena nae Kris pisape Kristo, naga pisa pa Yesu pisape “Sur la naña ko na opisa ke ne, pona pe lelaga yo, ana nemlelaga nesape Navisaarena naña yoko imi, naga ke narui yoko visawal sur punu ga ve lelaga van imimi.”

²⁶ Ana Yesu pisa ga narin visena nene pania, pisape “Nane ko na opisa ke ne, in ga nini, nane nesun ke nemio ko nagane.”

²⁷ Naga pisawal pa naga pan sira nene sanene, ana nalogena la añasuþe la sina apa atol yo nañane. Apam na, apisu Yesu sun ke amio sira naña ne, sane lalua ga, ana la sinela pulania. Sinela pula na aparurula ga, pe lala yar tai piun re petan sira nañane pisape sinenan ya, po piun tan Yesu pisape lalua asunyu ke ya. ²⁸ Ana sira naña suñalu, mligan mñana piawi na wii meke na, mial si pa uña e kiela kumali. Pogos naña pa tol uña pisawal pan yeririna

lala, pisape ²⁹ “Wolawa le Yu tai sike tano garo puluwii, sun amio inu, kilia make sur punu ga e kiau malena. Nepisu sane Navisaarena kemua, po peraga? Amiu aimi, teto tevisulia.” ³⁰ Ana lala asuñalu apito tano asape avisu Yesu.

Pakaiwa na kinanena naña marua sike lokove

³¹ Ana pogos naña lala amiyal ke apimi, akate re poli wa, nalogena la aþar plan kala kinanena naña apato apulia, apisa pan Yesu, asape “Navianena, oim okinana.”

³² Ana Yesu pimi re poli, ana apio sina ga pano-o þisi na Yesu pisape “Amiu akinana, in na kau kinanena taþena tai teke na naña amiu pe akilia re poli.”

³³ Nalogena la amloge sanene na, la apisasa ke pan la, asape “?Ane kus kana kinanena nene pimi pania? !Pe tepisu re nena yar tai poli!”

³⁴ Ana Yesu pisa pan la, pisape “Peraga, kinanena naña nepisa ke ne naga pe taþena. Kau kinanena, naga yuñæena na logearen nasinenanena kiena ne naga naña mligan inu nepitom tano, monar neyuñæen punu ga vano-o þisi. ³⁵ Pogos naña temapila lokove, ita tepisayu lue ga tesape ‘Kupario vari sike ga wa, kinanena marua,’ ana nagane e lokove kana Ntewa yaru la asu ruru ke asape aloge kiena visena rui, la na

asa ga kinanen la mamarua rui. Ana sineun nesape amiu avike li kilamaramiu lala, akirava ruru lia e yo lala, ana yoko akilia akirawal kinanena la mamarua ruru po rui, nagane pe pog na va wāren imi. ³⁶⁻³⁷ Ana la naṗa ava awaria, yoko akekara vaṗisi vanon kiela narin nalaen tai naga teke pa rui, ana pogos naṗa awar kinanena la nene imi uña na malena naṗa ve uro re, yar keviu naṗa mapila, yoko naga mēna kekara vaṗisi. Naga sa ga visena naṗa asape ‘Yar taṗena mapila, taṗena pa ṗaria, ana pupia kekarena pan yeririna punu ga!’ ³⁸ Sanene, in na nemligan amiu vena ava aure yeririna lala naṗa li taṗena ga la akila pupia yuñaena pan la rui, ana nanagane na amiu punu ga ayakol amiu veraga e na logewoena e yuñaena nene.”

Le Samaria la moki amlelaga

³⁹ Ana pogos naṗa le Samaria la e kumali nene amloge naṗa sira nene pisape Yesu kilia make sur la punu ga e kiena malena, sinela pula paṗisi, kila lala moki amlelaga e Yesu. ⁴⁰ Ana pogos naṗa apim asape avisuia, la asun mā amio naga pano-o, ṗisi na apiun tania asape visae mekilia meva uña amjo la. Pisi na mepa mesuña amio la pano-o tol legiena

lua, ⁴¹ ana la moki sina amlelaga e naga vanon kiena visena wo lala. ⁴² Apisa mēna pa sira nene, asape “Nanua sumo, memloge sur la naṗa opisa, memninue ga, a nanagane, memloge ruru nena kiena visena lala, mekilia sane pe lelaga ga narui, kieta yar keviu nene, naga pe Natamaliaena na yomarava.”

Kile nalua kiena ne Yesu ma Kalele, tamalia narina ne suṗe keviu tai

⁴³ Ana legiena lua nene ṗaro pano, memio Yesu memligan yo nene, metaveve si kiamimi mrapa mepato si tano e lepas naṗa garo Kalele. ⁴⁴ Yesu sinenan sape wasuṗe si va gar kiena yo Kalele, komin naṗa naga pisu li taṗena lala amaagan li visayuen naga, asuña akalewele silaga. Nanene taveve kiena visena tai, naṗa pisape “Yeririna taṗena lala akekaran navatanon ruruen navisawalena, ana yeririna ga la na pulkumali puna na peraga, la asitom korenan ga naga.” ⁴⁵ Ana pogos naṗa mepa makate e yo naṗa Kalele, yaru na kiena yo lala akekaran paṗisi, aporworunia. Nanene vanon naṗa sumo, lala moki la mēna asike e ṗaṗagena ma Yerusalem, ana apisu pa nataṗaen mārerera tai naṗa Yesu miyuñaen e Yuña Wa mēna ne Ntewa e pogos nene, ana apisu po paṗisi.

⁴⁶ Ana sun mialili ke yo lala nae Kalele pimi tol sina ga kumali naña Kana, naña nanua sumo kilapu wii pimi pe kuruta na munena. Ana e pogos nene pupia suņe tai nae pulkumali taņena nae Kapeneam sike e yo nene, mloge ke piowa vanon narina yermene mai keviu paņisi, lavis ga mare. ⁴⁷ Ana pogos naña mloge asape Yesu řasuņe ma Yutea pitomi si Kalele rui, naga pa kirawalia. Ana pisu Yesu, tag pania sinenan pisape va uña vena tamalia narina nene. ⁴⁸ Ana Yesu pisa pania, pisape “Pona ko mēna sane yeririna taņena la nene. Sinelan lue ga kile taņena lala, ana visae neyumaenia, alelaga e in narui, a visae pe apisu re poli, pe akekaran re nalelagaena e inu poli.”

⁴⁹ Ana pupia suņe māraran pania, pisape “Yar keviu, awis oimi vilaga, visae pere na naruu naga kovio.”

⁵⁰ Ana Yesu taņali nalelagaena kiena ne suņe nene, pisape “Peraga, ko ga taaga ovano. Nevisa van ko, naruma taņatete mare, mal ma woga ga.” Pisi na naga mlelaga e visena naña Yesu pisa pania, mligan yo pa si uña.

⁵¹ Ana e legien taņena sina, pogos naña řasuņe ke si pavin, pitawe kiena yeririna lala, amial lulu ke

mrapania. Ana apisa pania asape “Naruma mloge si pogaga teke na.”

⁵² Ana piun tan la pisape “Ami asitom veve ruru lia: Pog ya ne naga siar mloge pimi po sina ga?”

Ana apisatamea, asape “Mepisu sane yepena pimi manin ruru nakoneva kolpae, sur tai sane koe aora taaga.” ⁵³ Ana ariman yermene nene mloge na nene, kilia ga sape naga ke narui mesmesu ga aora naña Yesu pisa pania pisape narina taņatete mare, mal ga woga ga. Ana sur nene kila naga, amio la punu ga na mratava puna, amlelaga e Yesu.

⁵⁴ Ana natamaliaena kiena ne yermene nene, Yesu kila suraun naña mligan ma Yutea pitomi, ana pe kiena kile nalua gar lepas naña Kalele.

5

Yesu kila ruru si yar tai naña yepena mare yam piavi

¹ Ana Yesu suna Kalele yam piavi ma pano-o, tol pog na řaņagena taņena si tai kiena ne le Yu lala ma Yerusalem. Ana Yesu lala apa si metava e řaņagena nene. ² Asuma Yerusalem sanena e legien tai Yesu mial pito tano lavisin pulutava keviu na kumali nene naña apio asape Pulutava Na Sip-sip, ana apa lele tai naña wii na kulena tai meke ea, naña e kiela visena apio kiena ki Petsaeta. Ana e yepas

nen wii nene, silparpara la lima sike ea, amiyuñāen e kilavaru. ³ Ana nalue ga inanena lala, kilamara kata lala, a laulu lala, amio la naña yepela la marmare, la ne sanene amoki manene apim añeke e lepa yuñā taaga la nene. Apim asike sanene, vanon wii nene yam peve taaga kulkulul, ⁴ sa naña navisi kiena ne Ntewa tai pitomi kila wii nene kulkulul, ana pogos naña apisu sanena, inanena la nene yar ai naña va ñes tol wii nene, yoko maiena ya naña teke e yepena ñisi veraga ga e pog nene. ⁵ Sanene inanena la asuñā apim e yo nene, ana lala yar tai naña sike e pog nene, naga yepena marmare tol kas lualima yam telu pa orely [38] rui. ⁶ Ana pogos naña Yesu pimi, pisu yar nene, kilia sape yar nene monon inanena nene yam piavi sanene, piun tania pisape “? Kiau erau, ko na sinomñan osape yepenā imi wo sina, ne?”

⁷ Ana inanena nene pisatañea, sape “Yar keviu, sineun pañisi ne, ana pogos naña wii kulul, pe yar nakusnuen re vito ligān nu e wii poli. Ana pogos naña in ga taaga nekila wowen ke yo nayalvitoen tano, yar tañena tai pitomi pito ñes tano e wii sumon inu.”

⁸ Ana Yesu pis memes ga pan yar nene, sape “Pogaga, osuñalu, okus momñā tog, oyali ovatove.” ⁹ Ana taveve visena kiena ne Yesu nene,

yepes marmare la nene punu ga pimi po, naga suñāl kus mñana tog mial pitove.

Ana e legiena na sur nene pimi kate, naga pe legiena wa tai kiena ne le Yu la, ¹⁰ kila sane pogos naña yar keviu ñasia sa le Yu la apisu yar nene mial kus ke mñana tog, apis pan vanonia, akilawoia, asape “E, ña nini na pe Legiena Wa ña! Okus ke momñā tog sanene na okilaro ke kieta navisaluaena ita le Yu la ne.”

¹¹ Ana pisatañe la, sape “In na yepeu pororowaia, ana yar nene pimi kila ruru inu, pisa panu sape nekus mñau tog nevano.”

¹² Pisi na lala sinelan asape akilia laa sane wa, apiuntania, asape “?Ana a nene? ? Naga pe ane pisa pan ko sape okila sanene?”

¹³ Ana yar nene mninue ga visaena, vanon naga pe kilia re sape Yesu naña kila ruru naga poli, a tañatete visu kilalea vanon ñina na yeririna la asike ea, ana Yesu mial ñaroro likan yeririna lala, petan yo nene rui. ¹⁴ Ana siraunia pe piavi re poli, Yesu kirawal si yar nene e Yuñā Wa, ana pisa pania sape “Nanagane omloge po si narui, popon ovisuar ruru ko. Oligan punu ga kiomñā naviowaena lala, visae peraga yoko sur tai viowa sina ga imi van ko va re laa sane taulu na sumo.” ¹⁵ Ana e pogos nene yar nene kilia narui sape Yesu ga naña kila ruru naga, ana pa pisawal

pan yar keviu kiena le Yu lala.

¹⁶ Ana pogos naþa la amloge sape Yesu ke narui naþa tamalia, sinela karia, pe akekaran re naþa miyuþaen sur nene e Legiena Wa, þisi na la asiar naþa apeveyunia.

¹⁷ Ana Yesu pisataþne la, sape “Kiau ata, naga miyuþaen ke kiena yuþaena wo lala e legiena make ga, pa tol mþena Legiena Wa, a in mþena monar neyuþae sa mþa nena naþa naga miyuþaenia.”

¹⁸ Sanene na e pogos nene, nasumonena kiena le Yu lala apisu ke pa Yesu narui sane pe yar na warnena kareen nawaena na Legiena Wa. A nanagane metavana, amloge naþa naga pio ke Ntewa sape Arimana wawa, apisu sane naga kila ke naga maran taaga ga sane Ntewa. Ana sur ne la nene kila sane la apim pibusun manene laa sane, sinelan manene laa na wemonþaren naga mare.

Narina ne Ntewa amio Arimana amiyuþae maran taaga ga

¹⁹ Ana Yesu pisa pan la, sape “Nepisa pe lelaga pan amiu, in na narina ne Ntewa, taþatete nekila sur tai inu ga taaga, ana sur ga la naþa nepisu Arimau kila, naga ga nene nekilia nekila. ²⁰ In na narina ne Ata Ntewa, naga sinen sii inu paþisi, kila pian inu e sur punu ga naþa naga sitom ke sape nekila. Ana yuþaena taþena si þasia sike ga wa, naþa kerkeviu laa sane,

naþa war van inu vena neyuþaen sirau, ana pogos naþa neyuþaenia, yoko amiu sinemiu ulan vaþisi ne. ²¹ Naga mþena nanini, sa naþa Ata mla si malena pan la naþa amarmare, tamþan si kiela malena pan la, ve sa mþa nena nene inu narina nekilia nela malena van yar ai naþa sineun nesape nela vania. ²² Ana pe Ata re ga kila naliþereena poli, ana yuþaena mþena nene mligan e luþau, ²³ vena kilaen yeririna punu ga monar avatanon inu sa ga naþa apatanon ke Ata. Ve sanene, visae yar naþa pe patanon ruru re inu narina poli, ana sa naþa naga pe patanon ruru re yerkawa naþa naga mligan inu nepitom tano poli.”

Marena amio malena

²⁴ Ana Yesu pisa laa sanene, sape “Ayagogon ruru visena nene. Yar a naþa logear kiau visena, a lelaga e naga naþa mliganu nepitom tano, e ke e pogos nene tol malena. Naga pe su re nena vatanon naliþereena mþarera tai, sane petan þelaga na marena rui, pa tol kiena malena viu rui.

²⁵ “A nepisa visena nalelaga nini pan amiu, sane pogos pimi ke sirau nanagane naþa sane yar la naþa amarmare e þelaga naviowaena rui, aloge pulgou inu narina ne Ntewa, ana la naþa aloge kilia, yoko atol malena. ²⁶ Kau Ata, malena nalelaga teke ga e naga, ana

naga tañan malena nene sike e inu, ²⁷ a tañan mēna sane inu Narina ne Yeririna, yoko nekila yumāena lala na liṭpereena.

²⁸ “Sur la nene pe pon re si sinemiu ulan poli, monar yoko ve sa ga nene e pog naṭa nepisa ke nesape pimi ke ne. Yoko la naṭa amomaliio e porotano, aloge pulgou vio, ²⁹ ana amolmolue sina ga, ana la naṭa amiyumāe po, kiela nasumālena si nene pe namalena, ana lala naṭa amiyumāe piowa, kiela nasumālena pe naliṭpereena.”

Sur la na iilaen visena kiena ne Yesu

³⁰ Ana Yesu pisa pa laa sane, pisa ṭarlologia ga pan yerkawa kiena ne le Yu la naṭa amon nalelagaena e naga, pisayu sur la naṭa kila meraravan sape naga pe lelaga. Pisa sape “E lepas naliṭpereena naṭa neyumāenia, yoko taṭatete neyumāen e nasitomiēna kiau in ga taaga, ana nekila ga e sur naṭa nemloge Ata pisa. Ve sanene, kiau naliṭpereena naga mesmes ga, vanon pe nekila re e kiau nasinenanena poli, nekila ga e nasinenanena kiena ne naga naṭa mliganu nepimi. ³¹ Ana nepis sanene pan amiu, nekilia sane nepisayunu ke sina ga, pona amiu ṭas apisu sane pe pon re nevis ve sanene poli yo, taṭatete alelaga e visena na sanene. ³² Ana pogaga, pe

sur re tai nene po, vanon sur taṭena la ṭasia naṭa kilia iila kiau visena sumāl ruru wo.

“Nasumo, naga yar tai naṭa pisayu sur la naṭa punu pe lelaga paṭisi. ³³ Nane Yoane Nakeena ne, naṭa nanua sumo, amiu amligan visena pato pania, apiunu sanape petania, ana pisawal sur punu ga pe lelaga pan amiu. ³⁴ Ana piowa ga naṭa asitom asape kiau visena sumāl sanene vanon ga visena kiena yaru tai sa ga Yoane. Ana sineun nesape amiu asitom ruru li e visena la naṭa Yoane pisa pan amiu e lepas na punu, vanon neṭaryon amiu ke vena akilia atol natamaliaena. ³⁵ In na nepisa Yoane nene pan amiu, vanon naga sane pe kap tego tai na tegolien kiamiu sitomena lala, amiu naṭa akekarān li mā naga.

³⁶ “Ana sur si tai naiilaen kiau visena, keviu laa taulu sur la naṭa Yoane naga pisa. Naga kile la naṭa Ata tañan panu nemiyumāenia e maramiu. Yumāena keviu la naṭa nemiyumāen, lala amiila ke visena nene keviu sane pe lelaga Ata ne nanene mliganu nepimi.

³⁷ “Ana metavan sur lua nene, taṭena tomā ga, nane kiau Ata naṭa mliganu nepitom. Amiu pe amlogeli re pulgona poli, pe apisuli re marana po, ana naga mēna, kiena

visena la miila kiau visena la keviu, naña pisawal inu. ³⁸ Ana amiu na akila sane visena nene pe lelana re e kiamiu malena poli, vanon amon lelagaen e naga naña mliganu nepimi. ³⁹ Yam moki asumã apisuveve ke Visena Wa lala, vanon amiu asitom ke asape yoko alual kiamiu malena naña ve uro re ea, ana visena wa la nene naña pisawal inu ga. ⁴⁰ Asape in na nepe purpes nen malena nene, ana amiu amon aimi atol malena nene e inu.”

⁴¹ Pisi na Yesu pisu sane þarila m̃arera paþisi, pis sanini, sape “Sur la naña nekila ke ne, pe nekila re nesape amiu ayeluar kiau ki, peraga. Pe nesitom̃al re nene poli, ⁴² ana sur viowa tai, nekilia ruru amiu pa rui, ana nekilia sane pe asitom manene re nena Ntewa poli. ⁴³ Pogos naña nepim nakaten amiu, nepim e ki kiena ne kiau Ata, ana amiu pe akekaranu re poli. Ana visae pogos tai yar taþena imi, naña imi ga e kiena ki naga taaga, pona amiu akekarana ga naga yo. ⁴⁴ Sineu mie amiu paþisi, ana nepisu sane m̃arera pan amiu paþisi naña atol nalelagaena nalelaga pogos tai. Nanene vanon amiu sine-miun lue ga nayeluaren kiamiu ki va metava. Amiu pe asitom re asape akilia avilopu si kiamiu þelaga poli, vena akila sur la naña siraunia Ntewa kilia yeluar amiu vanonia.

⁴⁵ “Nepisa visena la nene pan amiu, pona amiu asitom ke asape ‘E, yar nene sinen kar ita, pona e legiena nalipereena naga visawal kietana naviowaena la van arimata Ntewa ma e peni!’ A peraga, ve in re naña nekila sanene, ana yar taþena naga kila. Taþena nene nane yermarua Mosis, naña amiu aþasine ke naga asape yoko visa visena na iila ami- uena, ana nevisa ruru van amiu, naga ke narui naña yoko visa plan ga kiamiu naviowaena lala. ⁴⁶ Amiu na apisa ke asape amlelaga ke m̃arera e visena kiena ne yermarua Mosis nene, ana visae ve sanene, vanon ya ne amiu pe amlelaga m̃ena re e in poli, vanon yermarua nene, naga siriyunu lue ke ga. ⁴⁷ Ana nanagane, nepisu sane amiu pe amlelaga re e kiena nasiriena la poli, ana komin suri ne nanene yoko taþatete m̃ena alelaga e kiau visena lala.”

6

Yesu pagan þina na yeririna miyuve manu lima [5000]

Matu 14:13-21; Mak 6:32-44; Luk 9:10-17

¹ Siraun naga nene, memio Yesu memiai e wa tai memligan si kiena yo nene, mepa mokusro pupia lapa naña nae Kalele, naña la þasia apio asape Lapa Taepirias. ² Ana pogos naña yeririna la apisu imimi mepa ke sanene e lepas

navano, la mēna ga asuñalu asiraun imimi. Asape ataveve Yesu vanon apisu kile natamaliaena la naña miyuñāen pan inanena lala. ³ Ana pogos naña mepa metol lepas nene, mepa metava e kunus tai naña mēke e yo nene, memial mā mepano-o, memapi. ⁴⁻⁵ Ana pogos naña Yesu totano teke na kira pa gar tena, pisu pupia pñina la apim ke puna. Pisuluṗar sane la moki, ape yeririna na yo tañena ga la ne amlapran la ke apato Yerusalem. Apatovin ke pupia pñāgena kiena le Yu lala, Pañāgena na Sitomālen Natamaliaena, naña yoko ve yam ve piavi re na akila.

Ana pogos naña Yesu pisu la apimi, piun sur tai pa Pilip, pisape “Pilip, la nañā na viso kar la ke pañisi ne. ?Yoko toul kala kilaparavi ve sanape ne?” ⁶ Naviunena kiena ne Yesu, pe natañāliena ga Pilip, vanon Yesu kilia pa rui sur naña yoko kila van yeririna lala nene.

⁷ Pisi na Pilip pisatañea, pisa ga pisapenua “Visae neyuñāe kas ve taaga, taṗatete netaulu kilavaru torokin naulen kala kinanena lala la punu ga akan ve torokaki!”

⁸ Ana nalogena tañena tai, Antru, naña wenla Saemon Pita na ve tokak, pisa pa Yesu, pisape ⁹ “Suñe, neki-rawal teras tai teke e nini, pñar ke narin kilaparavi lima amio narin ika lua. Nanene

tekaki ga, vanon yeririna la mok pañisi.”

¹⁰ Ana Yesu pisape “Per-aga, poga ga ne, ovisa van pñina la nene ovisave atotano wa.” Mepisa pan la, pñisi na atotano e vilumñini lala, ana mepisu sane yermēne ga lala tol sur sane manu lima [5000]. ¹¹ Pisi na Yesu pñarar kilaparavi la lima nene, mlen, pisa potena vanonia. Siraunia siar kaweroroia, piovion pan la naña atotano ke ne, kila mēna sa ke ga e ika, mla make ga pan la torokin naña sinelan asape akania.

¹² Ana akan mā pano meṗela la kawa, pñisi na Yesu pisa pa imimi, pisape “Korkoro kinanena la ne sike ne, ve tekila kare re, ana pon awarpolo va lele taaga.” ¹³ Ana mepa moñar kinakina kilaparavi la lima naña ne, naña akanligania, mokon pa e karo pano-o tol karo lualima taaga pa lua [12].

¹⁴ Ana pog naña yeririna la apisuluṗar pupia kile naña Yesu miyuñāenia, apisa ke pan la sanini, apisape “Kieta pupia navisawalena naña kieta li marua la apisaar asape imi kate e yomarava nini, yar ne na nene navisawalena ke narui.” ¹⁵ Ana la asitom ke asape ava atarar Yesu, asape añareran vania vena avisirlua suñal imi ve kiela pñarin suñe, ana pogos naña mnunuluṗar sur naña la asitom ke asape ayuñāenia, naga petan la,

naga taaga mial pa laa sane metava e kunus la nene.

Yesu mial yau metava e sive

Matiu 14:22-27; Mak 6:45-52

¹⁶ Ana imimi nalogena la mepisu mrae pato ke tano narui, mepisu sane popon sa mowasuŕe imimi sina, ana mepato si tano e yepas nen lapa. ¹⁷ Mepato tano ana pe moña re Yesu katen imimi si poli, ana vanon yemalo pa rui, a mokus kiamimi waa, memligan si yo nene mepalua mepanon vena mokusro lapa meva ma Kapeneam. ¹⁸ Ana mepa ke sane, na narin lagi tai miyui li mña, kila sive siar piowa mña paŕisi. ¹⁹ Ana pogos naña mepaluan pa laa tol sane kilometa lima, memilan Yesu mial ke metava e sive pimi ke lavisi. Ana memaraun naga paŕisi, ²⁰ ana naga pis pan imimi, pisape “!Ee, amiu ve amarau re! In ga ne.”

²¹ Ana memloge po sina, metar pa meta e waa, ana veraga ga mepisu kiamimi wa monlogia ke lele naña mesape meva ea.

Yeririna la apim akale Yesu

²² Ana kolulag, la naña e lepas nen lapa, naña Yesu pagan la ga na wa, asitomwele ke asape sanapen Yesu narui. Asitom ke sanene vanon pogos naña memio Yesu mepim pula, mokus waa taaga ga, ana apisu imimi nalogena la

mokus waa nene mepa pa rui, a Yesu pe amio imimi re poli, naga taaga sike na. A nanagane taŕatete si alual naga amio la, ²³⁻²⁴ ana la apa akus waa taŕena lala, akusro apa Kapeneam akale imimi. Waa taŕena la nene, la pe kiela re poli, kiena ne la nae Taepirias naña apim akaten la, apim ga ura e naña Yesu mlenwo kilaparavi, kila pimi torokin naña akania.

Yesu pisape naga pe kilaparavi na malena

²⁵ Ana yeririna la naña ne apam atol Kapeneam, apa ura, apa akale Yesu. Ana pogos naña añaalia, apiuntania, apisape “?Navianena, ko opam otol e nini pogwai?”

²⁶ Ana Yesu kilia pa sur naña la asape avisu vanonia, naga pisatame la, pisape “Visae apamin akale inu sina vanon apisu kiau kile lala a apisuluŕar inu sane in na ai, visae ve sanene na po na. Ana in na nepisu sane asitomañal asape nakoneva nepagan ruru amiu, akinana pano-o mñeŕemiu la kakawa po, ana amiu sinemiun si asape ve sa nene ãane, yo?”

²⁷ “Poga ga, kiau visena na lelaga van amiu naga sanini: ve asitomañal manene re si kinanena naña yoko ve ve piavi re na naga kona make sina. Popon ayuñae mñarera vanon kinanena naña sulue ga, kilia suña ga sanene vano-o tol pog na malena naña pe luas re poli. Lelaga, in na Narin Yeririna nekilia

nela malena nene van amiu, vanon Ntewa arimau kilaar pan inu rui in ga taaga vena nekila ve sanene.”

²⁸ Ana apiun tania, apisape “Ana sa imimi sine-mimin mesape mekila sur la naña Ntewa sinenania, yoko monar meyumãae ve sanape?”

²⁹ Ana Yesu pisatamẽ pan la pisape “Pupia sur naña Ntewa sinenan sape ayumãaenia, sanini, sape alelaga lelaga e in naña Ntewa miila inu nepim e yomarava nini.”

³⁰ Ana apiun ke sina ga, apisape “?A ko, kioña kile ya naña sa mevisuia, yoko mekilia melelaga e ko? Ko na yoko okila yumãaena wo ya ne van imimi? ³¹ Mepiun ke sanene vanon mesitomãl kieta li marua la na susumo ne, naña asu e yokorena. Asumã sanena Mosis kila kile wo tai pan la, naña silaga la aþar kilaparavi naña apio mana, ana akania, pe visokar la re nena ga. Sur nene teke e Tus Wa, a pisa sape

‘Silau ga naga pagan la e kilaparavi nae ma e peni!’ ” Esik 16:4

³² Ana Yesu pisatamẽ la ke sina ga, pisapenua “Lelaga, sur nene teke e Tus Wa, ana kilaparavi naña Mosis mlavia, pe pe kilaparavi nae re ma e peni poli. Kilaparavi naña nae ma e peni nalelaga, arimau ga kilia lavia.

³³ Kilaparavi kiena ne Ntewa

naga inu ga ne naña nemligan ma e peni nepitom tano, vena nela malena viu van yeririna na yomerava lala.”

³⁴ Ana apisatamẽa, asape “Suþe, kilaparavi ke nene narui naña imimi sineminia silaga.”

³⁵ Ana Yesu pisa pan la, pisape “Inu, in na kilaparavi na malena. Yar a naña vim pun inu, taþatete si viso karia, yar ai naña lelaga e inu, taþatete si moto karia.

³⁶ Ana sur taaga ga na piowa, sa naña nepisa pa pan amiu rui, naña apisu inu amio kiau kile lala e kilamaramiu rui, ana amon lelagaen e inu. ³⁷ Ana monar yar þasia alelaga e inu, vanon la punu ga naña Ata mligan sike e lumãau, yoko monar aim pun inu, a la punu ga naña aim pun inu, ve lala yar re si tai naña nekilia nekuan lua sina, yoko nowarar ruru punu ga ave kiau.

³⁸ “In na nemligan ma e peni nepitom tano e yomerava nini, pe nakilaen re nasinenanena kiau poli, ana pe nakilaen nasinenanena kiena ne naga naña mligan inu nepitom tano. ³⁹ A pupia kiena nasinenanena sanini, sape la naña naga mligan la asike e lumãau, yoko ve nekilalu re lala yar tai, naga sinenan pisape e legiena maro nevisir plan la punu sina ga. ⁴⁰ Ata sinenan manene laa pisape ve sanene narui, naña la punu ga naña avisu inu, ana alelaga e inu, yoko atol malena naña pe luas

re poli, a sinenan manene mēna pisape e legiena maro, yoko in na nevisir plan la sina ga.”

Nasumonena kie le Yu lala pe akekaran re visena kiena ne Yesu la poli

41 Ana pogos naḡa yerkawa kiena ne le Yu lala amiyagogan ke visena kiena ne Yesu, pe akekaran re nenaga, ana la apis lili mā vaḡonia. Kiena visen tai naḡa amon logeena, nane visena naḡa pisawalia sape naga pe kilaparavi naḡa petan ma e peni pitomi tano e yomarava nini. 42 Apisayu pan la, apisape “? Sanape ne yar nene pisa ke pan ita pisape petan ma e peni metava pitomi tano pun ita? Naga pe yar re tai nene po, tekilia ruru pa naga rui, anena amio arimana. Naga Yesu ga ḡa, narina yermarua Yosop.”

43 Ana Yesu pisataḡe la, pisape “!Ei, visen mumu la e inu ḡisi, amiu ayagoga ruru kone wa! 44 Yar ai naḡa imi lelaga e inu naganane, e legiena maro nevisir-lua naga mal sina ga. A ata naḡa taḡan inu nepimi, visae naga ve ure re yaru nene vim, ana taḡatete nena kilia imi punu. 45 Tus kiena ne navisawalena Aisea pi-sawal visena tai, pisape ‘Lala punu ga, yoko Ntewa ga vian la,’ Ais 54:13 ana komin nanene, nepisape la naḡa aloge ruru visena kiena Ata Ntewa naḡa naga

vian ruru la ea, lala nene aim pun inu. 46 Ana la ne sanene, pe lala yar re tai naḡa pisu ke Ata Ntewa poli, vanon yar taaga pisu ke naga, nane inu naḡa nepetan ma puna nepitom.

47 “Nepisa ke lelaga pan amiu, sane yeririna punu ga naḡa alelaga e inu, asike pa loyuma e malena naḡa ve uro re rui, 48 vanon inu, in na kilaparavi na malena. 49 Kilaparavi nene pe maran taaga re poli sa naḡa kilaparavi naḡa mana naḡa yermarua la akan e yokorena. Akan mā pano-o, ana siraunia pe lala yar tai mal lue re si teke poli, lala punu ga amarmare ga sa nene. 50 Ana visae kilaparavi tai toḡa ga, visae yar naḡa kania taḡatete mare pogos tai, na nene tepio tesape kilaparavi nae peni lelaga. 51 Pogaga, in ke narui nepe kilaparavi na malena nene, naḡa petan ma e peni pitomi tano e yomarava nini, vena yar naḡa kania, yoko mal lue. Kilaparavi ne nanene naga pe tasneu, netamaḡan ke panon yomarava wetelu, nemla ke panon malena kiena ne kiena yeririna lala.”

52 Ana visena kiena ne Yesu la nene, maḡera pan yerkawa kiena ne le Yu la nene akilia ruruia, ana apiun ke asape “?Ya nene? Yar nene pisape yoko war kana kilamaḡiu van ita vena tekania, po pisa ke ya ne?”

53 Ana Yesu pisa merara-

van pan la e lepas na kinas nen kiena marena, pisape “Nepisa lelaga pan amiu, sane amiu monar akan kiau kilam̃iu inu Narina Yeririna, amiu monar amun kau kuruta. Visae peraga, kiau malena tařatete te amiu.

⁵⁴ A naga nařa kan kau kilam̃iu, a mun kau kuruta, naga tol pa malena nařa pe luas re poli, ana nevisirlua si naga suřalu e legiena maro, nekila naga mal sina ga. ⁵⁵ Nanene komin kau kilam̃iu, naga pe kinanena tařena tai, a kau kuruta, naga pe na munena tařena tai. ⁵⁶ Naga nařa kan kau kilam̃iu, mun kau kuruta, kiena malena wetelu sike e inu, a kiau malena wetelu sike e naga. ⁵⁷ Ata naga pe purřes nen malena, ana mligan inu nepimi, a nemalin ke kiena malena nařa teke e inu, ana naga nařa kan kau kilam̃iu yoko naga mali e kiau malena nařa teke e naga. ⁵⁸ Sur ne nanene nařa nepisa ke e kiau visena e lepas na kilaparavi nařa petan ma e peni pitomi tano. Kilaparavi nene naga pe sa re kilaparavi nařa repita nasumo la akan poli, ana amare ga sanene. Naga pe kilaparavi nařa yar a nařa visae kania, naga kilia mal lue narui.”

⁵⁹ Visena ne la nene Yesu pian lan ke e yuřa na lotena nae Kapeneam.

*Nalogenala moki amligan
Yesu ařasuře la sina*

⁶⁰ Ana komin nařa Yesu pisa visena la nene, ana imi kiena nalogenala moki asitom pano-o, apisa asape “Kiena nayianena la nene marera pařisi. ?A si na kilia loge kilale ruruia?”

⁶¹ Ana Yesu mloge kilale e naga sane kiena nalogenala lařas apis lili řa vanon naga sa nene, naga piuntan la, pisape “? Sanape, pe akekarana re kiau narin visena nene poli? ⁶² Narin visena ga nene, kila amiu asape aliganu sina? Visae ve sanene, nemninue amiu narui. Sane visae pogos tai, inu Narin Yeririna neligan amiu neva si metava ma e leleu, ana yoko sanape ne? Pona sinemiu řesan ruru inu yo? ⁶³ Kiau visena la nene ape mrapa na Ninuna a mrapa na malena. Yaru kilia war si yaru, ana yaru tařatete la malena lelaga nene va yaru tařena. Sur nene Ninuna ne Ntewa ga kilia lavia. ⁶⁴ Ana nevisu kilale amiu lařasia amlalaga pa rui, a amiu řas peraga.”

Yesu pisa naga nene, vanon siar nanua rui, naga kilia pa la nařa pe amlalaga re e naga po, pano-o tol nařa naga kilia lala ai nařa awilwilin wan naga. ⁶⁵ Ana Yesu pisa řena ga pan la, pisape “Lala řasia alelaga, řas ve alelaga re, naga nene nepisa ruru visena nene rui, nesape tařatete yar tai vim punu, nařa sa arimau naga ve tařan re naga imi.”

66 Ana e pogos nene imimi kiena nalogena lañas apisu sane navianena kiena Yesu la nene amārera laa narui, apisu sane peraga, ana añasuḗ la sina, pe ataveve re si naga poli.

Pita pialua māreran kiela na lelagaena pa Yesu

67 Ana pogos naña Yesu pisu lala pās amligan si naga, pis pan imimi kiena nalogena lualima taaga pa lua [12], piun pisape “?A sanapen amiu? ?Pona sine-miun asape amiu mēna ava sina ga amio la nene?”

68 Ana Saemon Pita pisa-taḗna, pisaar mārera pa Yesu, pisape “Suḗe, visae meligan ko, yoko mesiraun si a ne? Ko ga taaga naña lologena wo na malena teke e ko, 69 nanagane na memlelaga ke ga e ko ga taaga, a mekilia pa rui mesape ko, ko na Navisaarena Wa naña Ntewa mligan ko opimi vena otamalia imimi.”

70 Ana Yesu pisataḗne pisape “Lelaga, in na nekiar amiu kiau lualima taaga pa lua, vena alelelaga e inu sanene, a tai teke mēna likan amiu naga pe Yermare Lego ruru nenaga.”

71 Ana Yesu pe pisawal re kiamimi kia lala tai e pogos nene poli, ana sirau-nia mepisu kilale sane kiena visena nene, naga pisa ke Sutas, narina ne yermarua Saemon nae Kariot, naña naga imimi na lua lima taaga

pa lua tai, naña pe sitom re poli, pīlilinwan si kiena Suḗe naapo.

7

Yesu, wenla lala pe amlapran la ruru re amio naga poli

1 Siraun naga nene, Yesu mial telilivi ke ga e yo lala na tavie na kiena yo nene Kalele. Naga pe pa re si metava e yo na tavie nae Yutea poli, vanon nasumonena sa le Yu la nae yo nene akale ke naga rui, asape awe momār naga mare. 2 Ana pogos tai, lavisin pog na kiela pupia pāpagena kiena le Yu la tai, naña Pāpagena na Silparpara. Ana sa naña silaga, la moki sinelan asape avavini ma Yerusalem vanonia. 3 Ana e pogos nene, wenla Yesu lala apisania, apisape “E, ko na ose nini yam piavi rui, popon ova li ma Yutea, vena kioma nalogena la ma ne la towe avisu kile la naña okila ke ne. 4 Ko na sinoḗan osape yeririna la akilia ruru ko, ana omiyuḗae tapolou ke ga. Visae lelaga naña omiyuḗaen ke pupia kile lala, popon ovanon okate yo punu ga e yomerava.” 5 Ana visena la ne sanene, sa naña apisa kare ke ga Yesu, vanon lala na ape wenla ruru naapo, ana pe amlelaga re e naga poli.

6 Ana Yesu pisataḗne la, pisape “Amiu akilia akila ga

kiamiu sur ya e ga e pog naña amiu sinemiun asape ayuññaena, ana kiau pupia pogos naga pe pimi re poli wa. ⁷ Amiu akilia akila ga kiamiu yuññaena la woga ga, yeririna la tařatete avisa kare amiu vanonia, ana pogos naña in na nekila kiau yuññaena, nepisawal sane řelaga viowa kiena la na yomarava pe mesmes re poli, ana la sinela kar inu pařisi. ⁸ Ve sanene na amiu ga ava ma Yerusalem, in na nesuñña e nini wa. In na tařatete neva nakaten maran yar lala e řařagena nene, vanon kiau pog pimi ke rui, ana pe pimi punu re poli wa.” ⁹ Naga pisa visena nene pan la, siraunia apavin, naga suñña ga.

Siraunia Yesu pa ma e řařagena

¹⁰ Yesu suñña sane na, pe piavi re poli, naga mřena pa ma Yerusalem, ana pe pa re sa naña yeririna la akilia poli, naga tapoloun la ga. ¹¹ Ana yerkawa kiena le Yu lala, asitom ke pa rui sape pona naga mřena ga vam e řařagena, ana la akalewele, apiun asape naga mřeke pe. ¹² Ana yeririna mřena lala, asun apisayu lue ga naga, lařasia asape naga pe yar wo tai, lařasia asape naga pe yaru viowa ga, naña kila kare ke ga sitomen kien yeririna lala. ¹³ Asun apisayu ke Yesu sanene na, pe apisawal manene re pa e yo metava

poli, vanon asitom ke asape visae kiela yar keviu la aloge, yoko akila viowa van la.

Yesu pa kate e Yuñña Wa Mana ne Ntewa

¹⁴ Ana akila mřa řařagena pano-o, legiena řas řaro rui, ana Yesu pisu sane monar va ma Yuñña Wa Mana ne Ntewa vena vian si yeririna lala. ¹⁵ Ana pogos naña yerkawa kiena le Yu la amloge kiena navianena nowo lala, amilan pařisi, apisape “!Sanape na yar nene kilia ruru visena kiena ne Ntewa sanene? !Naga pe apian re nena ga, ana kiena navianena po na po!”

¹⁶ Ana sanene na Yesu pisawal pan la, pisape “Sur naña nepian lan ke ne, pe kiau re poli, pe kiena ne Ata ga naña mligan inu nepitom tano e yomarava nini. ¹⁷ Visae yar tai kekaran ga kila nasinenanena kiena ne Ata, yoko naga kila yar nene loge kilia sitom ruru kiau navianena. Yoko yaru nene kilia visu kilale sane in na pe nepian re yeririna la e ga e kiau kia poli, ana kilia visu kilale sane navianena la nene, pe lelaga naña amolue kemua e Ntewa. ¹⁸ Visae tevisu yar tai vis ke ga e kiena kia, tekilia ga sane naga miyeluar ga kiena kia. Ana visae yar naña pis, miyeluar ke ga kia kiena ne kiena yerkawa naña mligan naga pimi, tekilia ga sane pe lelaga ga, naga pe pisokan re poli.

19 “Yar tai ne kila sanene nane Mosis. Ntewa mla kiena navisaluaena pania, a naga pisaliluen pimi pan amiu, ana asuñña akilaro ke pa narui. Ana sanape na asape awem̃ar inu vanon asape nekilaro navisaluaena. ? Pogaga na sanene?”

20 Ana yeririna la apisatãnea, apisape “!Kue-e, naganane na opis wowe ke ga, sa ga yermare tai teke e ko! ?Ane sape wem̃ar ko? Ovisawal lia.”

21 Ana Yesu pisatãnea, pisape “Nanua e pogos naña nepim e yo nini, in na nekila pupia kile tai e maramiu, netamalia laulu nene. Ana pogos naña apisuia, pe akekan re poli, apisape in na nemiyuñae piowa ga naña nekila sanene e Legiena Wa. 22 Ana popon asitoñali kieta ãelaga na kilaen ãaviu, sa naña yermarua Mosis amio yermarua na sumo tañena lala, sane Epraam lala, la amla pan ita. Naga m̃ena pe yuññaena tanea, ana visae kana legiena nena sulologia Legiena Wa, pe asitoñal re poli, amiyuñae ga. 23 Amiu asuñña apisa ke asape amon kilaroen navisaluaena kiena ne Mosis, ana atañan luen ga asape nakilaen yuññaena na ãaviu e Legiena Wa pogaga. Ana visae atañan nene, vanon ya ne sinemi karnu keviu vanon ga kiau narin yuññaena wo taaga ga nene naña nekila ruru si

yepen yaru nene e Legiena Wa? 24 Nepisu sane asitom veve ke sur la ne e ga e kulusia, ana popon ave manmarua li laa sane, asitom veve ruru li sur la va tol kana kilam̃iu.”

Asitom ke asape Yesu pe Navisaarena po pe naga re poli

25 Ana e pogos nene yeririna moki nae Yerusalem apisu Yesu pian la ke e Yuñña Wa, amilania, apisape “!Lelaga naña ne! Yar ga nene nañane, naña yerkawa la apisa ke asape awem̃aria. 26 Ana naganane pisawal ke ga kiena visena la sanene, ana pe akila re si surian poli. Pe tekilia re poli, pona amon visaen vania vanon apisuluñaria sane lelaga, yaru nene, kieta Navisaarena lelaga. 27 Ana peraga, tañatete naga, vanon kieta nalelagaena tai ãa rui, sape Navisaarena, pogos naña naga kate, yoko tañatete yar kilia sape naga su pe na pimi ne. Ana yaru naña Yesu, ita punu ga tekilia ruru pa m̃ana uñña rui.” Apisa sanene komin am̃ape Yesu na paeme Nasaret, ana peraga, naga paeme Petleem.

28 Ana vanon naña apisa ke sanene, Yesu ãaryon ga navian laena loyuñña e Yuñña Wa, pisawal visena nene pan la, pisape “Asitom asape akilia inu, akilia ke lele naña nepim ea, ana in na nepisu

sane pe akilia ruru re poli. Nepimi e nini, pe e re ga e kiau sitomena poli, ana yar tañena ga mligan inu nepimi, naña naga pe purþes nen lelagaena. A sa naña amninue inu ga, ana amninue mñena naga. ²⁹ A naga, in ke narui naña nekilia ruru nena naga, vanon naga ke narui naña mligan lua inu nepitom tano e yomarava nini.”

³⁰ Ana visena kiena ne Yesu la ne sanene kila amñareran asape monar atarar naga, aña pe yaru re nena tai naña kilia tol naga, vanon kana pog ne pe pimi re poli wa. ³¹ Asape awe momar naga, ana yaru la moki amlelaga e naga rui, vanon kile la naña miyuñaenia. Apisa sanini, asape “! Yoko Navisaarena nape naña kilia imi kila si kile ya la naña yuve naga? Peraga, yar nene kieta Navisaarena ke lelaga narui.”

Amligan yar na mara la apavinin Yesu

³² Ana Varasi la þasia asuñña amiyagogon ke yeririna la amiilaar ke Yesu e kiela visena lala, ana apa iroro ga, apis pa pupia yar wa lala, na apiranan asape monar akila ga sur tai va Yesu nagane ga ne. Ana amligan kiela lokul navisuaren Yumña Wa lala, asape ava akale pulmas tai na tararen Yesu, vena aure si naga vim pula.

³³ Ana Yesu pisawalia, pisape “Yoko in na nekilia nesu si nemio amiu yam ve plas ga, þisi na nowasuþe sina puna ne naga naña mligan inu nepimi. ³⁴ Pogos naña sa nowasuþe pae na, amiu akilali naña akale inu vano-o yoko taþatete alual inu. Lele naña neva nese ea, taþatete aim ea.”

³⁵ Ana pogos naña yerkawa kiena ne le Yu la amloge visena nene, asitom þele narui, apisa ke pan la, apisape “?Yar nene pisa ke yo nape ne, naña yoko va ea a þisi na taþatete ita telual si naga ea? Pona sitom ke pisape va e yo tañena lala e yomarava naña wenla ita le Yu lala aþure apa ea e pog na pupia yaltetaena, ana pisape va vian la mñena ga? ³⁶ Ana naga pisa ke ya nene, sape takale naga vano-o taþatete telual naga. Ana sanapen kiena visena naña pisape naga pa ke lepas tai naña taþatete tesiraun naga, taþatete teva ea.”

Ana e pogos nene, lokul na visuaren Yumña Wa la pe atarar re Yesu poli wa.

Yesu mlologon Ninuna Wa, sape pe wii namalena

³⁷ Ana akila mña þaþagena nene pano-o, apa atol kana legiena maro, naña sane pe kana pupia legiena nena. Ana pogos naña asike veraga, Yesu suñal pion manene sanini, pisawal pisape “Amiu a naña moto karia, popon imi pun inu,

mun wii na malena. ³⁸ Yar naña mlelaga e inu, yoko wo van vañisi, sa naña Nasiriena Wa pisa, pisape !Yar na sanene, yoko losinena ule mamagan wii na malena, vano vano-o tataroi vetania sa naña wii mlau!”

³⁹ Ana visena kiena Yesu nene, kana kinasia na Ninuna Wa, vanon naga kilia sape siraunia, lala naña alelaga e naga, yoko atol Ninuna Wa. A e pogos nene, Ninuna Wa pe pimi re poli wa, vanon Yesu sike yomara wa, pe pa totano re e kiena lele wa poli wa.

Parin sitomena la e Yesu

⁴⁰ Ana pogos naña yeririna la amloge Yesu pion sane na, kiela sitomena la pa pe tañena lala. La ñasia, apisa asape “Yar nene, naga navisaawalena sane Mosis, naña temlelaga tesape yoko imi.”

⁴¹ La ñasia apisa asape “Ana, pona visae peraga, naga pe kieta Navisaarena kemua.” Ana la ñas apisatamea, apisape “Peraga, pe visena re tai naña pisa sanene sape Navisaarena yoko ve yeririna nae Kalele sane yar nene poli. ⁴² Nanene komin naña kieta Nasiriena Wa la apisa ke ga asape Navisaarena naga molue ga e lus kiena ne Parin Supe Tepet, yoko ve yeririna nae Petleem.”

⁴³ Ana ñarin sitomena moki la ne sanene kila narui yeririna la asu tetai vanon Yesu. ⁴⁴ La ñas pe akekanan re poli,

apisu sane popon akuan va e yuña nakoena, ana sirau-nia peraga, pe yar tai pa re lavis puna poli, vena tararia.

Nasumonena la sinela karmanene Yesu

⁴⁵ Ana siraun sur la nene, lala na visuaren Yuña Wa apa sina ga puna ne ñarin yar wa amio Varasi lala, vena kilaen navisaawalena lala van la. Ana pogos naña amñalivi e marala, yar keviu la nene pe apisu re Yesu poli, ana apis pan la, apisape “?Awa yar naña memligan amiu apanonia? ?Vanon ya ne amiu pe añure re naga pimi poli?”

⁴⁶ Ana navisuarena la apisatameia, apisape “Imimi memiagogon kiena visena lala po na po, pe yar re si tai poli naña kilia vian ruru ita wo sane naga.”

⁴⁷ Ana navisatameena nene kila Varasi la amilania, apisape “!Aulai, nagane na amiu mñena, yar nene ñere kiamiu sitomena la pa pe wowe! ⁴⁸ Amiu atamñan naga pisa kotalia amiu, ana sanape, apisu sane e imimi yar kerkeviu lala pona imimi Varasi lala, la ñas amlelaga ea? Peraga yo. ⁴⁹ Lala ga naña amlelaga ea, nane ñina viowa ga la naña asike ko laa ne, a la pe akilia re sur poli. Pe akilia re kieta navisaluaena poli, Ntewa piain pa nakoena pan la rui.”

⁵⁰ Asumña apis mñarera ke sane na, lala yar tai kilayon

ke sape kila kiela visena vito si tano. Nane Nikotimas, naña nanua sumo e yemalo tai pa sun amio Yesu. ⁵¹ Naga pisa pan la, pisape, “Ita tepisayu ke yar na sanene na, sa ga naña ita temla ke pa naliþereena pania. Ana kieta navisaluaena pisa lepas nene, pisa sape visae tesape tevis van yar tai, monar tetotano ruru temio e kumali, tela pog vania vena naga kilia visawal kiena sitomena van ita, ana monar teviun naviunena vania vena tekilia tekirawal tesape lelaga kemua naga kila sanene sanene po sanape. Naga nene pe mrapa mesmes nakilaen yumãena nene.”

⁵² Ana la pe sinelan re yagogonen kiena visena nene po, vanon apisu sane naga miilaar ke Yesu. Apis pania, apisape “!Aulai, ko na opis ke sa naña ko mēna ope yar nae si Kalele tai! Asitom-rurulia sur naña Visena Wa pisa. Pe visena re nena tai naña pisa sape yoko navisawalena viu tai sumãalu garo Kalele vam e nini.”

⁵³ Ana kiela visena pa m̃arera e lele nene, þis na la amial tetai sina ga aþasuþe si m̃ala umã lala.

8

Sira naña apisape akirawal taþa kolau

¹ Ana Yesu mligan Yumã Wa, mial pa si ma Kunus Na Purolip Lala. ² Monomi e nene, ana yemlagi kolulag

mial pato si Yumã Wa Mana ne Ntewa. Pogos naña yeririna la apisuia, la moki apim puna, naga totano pian la.

³ Ana pe piavi re nena ga, navianena navisaluaena lala amio Varasi lala aþure sira tai pimi puna, akila sumãl e marana ne yeririna lala. Sira nene, atarar ke sanene vanon asape kila kolau, ana laþas apisuia, apisawalia. ⁴ Ana akila naga sumãl sanene, apis pa Yesu, asape “Navianena, sira nene, akirawal kila ke kolau. ⁵ Ana sa naña navisaluaena kiena ne Mosis pisa e lepas na mlamulena viowa nene, nanagane na monar mokove momar ga naga mare. Ana navisaluaena kiena ne le Rom lala naga sape yoko taþatete mokovenar yaru. A ko na sanape, kioṃa sitomena sanape?”

⁶ Ana naviunena nene, pe apiun ruru re pa Yesu poli, ana akila ke ga nataþaliena pania, vena visapal sur tai naña siraunia akilia ala naliþereena vanonia.

Ana Yesu pe pisatamē re poli, þarina tau pito tano, kian mrasilmana siri visena tai e protano.

⁷ Ana apiuyun ke pania asape sanapen sira nene, ana Yesu tomãl ruru sina, pis pan la narui. Pisa pan la, pisape “Pogaga, ana amiu yar naña kove þes sira nene, naga monar ve yaru tai naña pe naviowaena tai to re nena e naga.” ⁸ Ana yam si tai, pulu

si pato tano, siri si visena taþena e porotano.

⁹ Ana pogos naþa amloge sur naþa Yesu pisa pan la, asiar naþa amiyal tetai si lala. Naga naþa sumon la, kiela yermarua tai, a siraun naga, lala taþena mēna lala apiayapa apavano, pano-o sira naþani naga taaga suñal sike e marana Yesu. ¹⁰ Ana Yesu kira pa pisuia piun tania, sape “?Sira, la naþa asike pe nagane? ?Pe lala yar re si tai sape liþere ko poli?”

¹¹ Ana sira pisatañea, pisape “Suþe, pe tai re si poli.”

Yesu pisa pania, sape “Pogaga, in mēna taþatete neliþere ko. Ko, okilia owasuþe ko sina ova moña, ana ovavini ve okila re si naviowaena.”

Yesu pisape naga pe yomerarava na yomarava

¹² Ana siraunia Yesu pisi pan la, pisape “In na nepe yomerarava na yomarava, yar a naþa taveve inu taþatete si yal e yemalolo, yoko yomerarava namalena teke e naga.”

¹³ Ana þisi na le Varasi la þasia naþa asike wa apilon si kiena visena, apisape “Ko na opisa sanene, ko ga omiila ke si kioña visena, ko na oþarwar ko wa! Sanene na, imimi taþatete melelaga ne, kioña visena pe pe lelaga re poli.”

¹⁴ Ana Yesu pisatañea, pisape “Pona nekila sanene yo,

ana kiau visena la punu ga amio kiau vianena la ape lelaga. In na nekilia sur punu ga e inu, sane nesu pe na nepim e nini, po nesike e nini þisi na nowasuþe si neva pe, ana amiu pe akilia in re nena poli. ¹⁵ Amiu amliþere in ke ga e sitomena kiena ga yeririna lala, ana in na pe nemliþere re ga amiu yar ta poli. ¹⁶ Ana visae pogos tai neliþere yeririna lala, yoko kiau naliþereena mesmes ga, vanon ve in ga taaga re nekila, nemio naga naþa mligan inu nepimi.

¹⁷ “Ana e kiamiu navisaluaena, asiri sanini asape visae yar la ve lua aviranarla e visena tai, þisi na monar alelaga ea, ¹⁸ ana yoko monar ve sa mēna nene e imimi lua kau ata. In na nepisa ke nesape in na nepe lelaga, a naga miilaar inu, ana kila sane monar alelaga e inu narui.”

¹⁹ Lala amloge visena nene, apiun tania, asape, “?Ko na opisa ke arimoña nene, ana sike pe nagane?”

Yesu pisatañe la, pisape, “Amiu amninue ga naga, sa naþa amiu amninue inu ga. Visae amiu akilia ruru inu, yoko kila amiu akilia ruru mēna naga, ana taþatete si aviun naviunena na sanene, ana peraga.”

²⁰ Visena la nene, Yesu pian la ke e Yumña Wa, e lepas naþa akuan ruru nalaena lala kiena ne Ntewa sike ea.

21 Ana Yesu pisa m̃ena pan la, pisape “In na nepur matan amiu ke narui. Pogos naṣa neva pae na, akalenu vano-o taṣatete awal inu, yoko amare amio kiamiu naviowaena lala. In na nepa ke e lele tai naṣa amiu taṣatete avam ea.”

22 Ana pogos naṣa yerkaewa kiena ne le Yu la amloge visena nene, apiunia asape “?Yar nene sinenan pisape kila ya? Pisape va e lele tai naṣa ita taṣatete teva ea, pisa ke sape yoko we moṃar naga mare yo?”

23 Ana Yesu pisape “Kiamiu sitomen lala amio kiau naga peve taṣena manene laa. Amiu na ape nae ga yo tano nini, inu na nepe nae yo na ma metava. Amiu na yomarava nini, in na pe nae re e poli. 24 Ana sa ga naṣa nepisa ga na wa, yoko amare ga amio kiamiu naviowaena lala. Visae pe amlelaga re e in poli, naṣa nepe naga naṣa sike na sike lue narui, yoko monar ve sa ga nene.”

25 Ana apiun, asape “Ko ovisa li sina osape ko na ai.”

Ana Yesu pisatame la, pisape “In na nepe naga ga naṣa siar na konua rui pimi tol nagane, nepisa ke nesape in na nepe naga.

26 Naga ga nene nepisa ke e lepas na punu. Ana e lepas na pun amiu, sur la moki naṣa nekilia nevisa, ana visae nevisa, pe visen naliṣereena ga punu ga. Ana sur la ne nepisa ke ne

e yomarava nini, naga pe visena ga la naṣa nemloge tan naga naṣa mligan inu, vanon silaga, kiena visena la mesmes paṣisi.”

27 Yesu pis merarava ga sanene, pisayu ke arimana naṣa ma e peni pan la, ana pe akilia ruru re nena poli.

28 Ana pis si pan la, pisape “Pogos naṣa yoko amiu atelan pae inu Narina Yeririna metava e laki, yoko akilia ga na wa sa naṣa in na nepe kiamiu Navisaarena. Yoko amiu aviṣu kilale naṣa sur punu ga naṣa nemiyuṃaenia, pe nekila re ga in ga taaga poli, silaga nepisa ga sur la naṣa Ata pisa pian inunia. 29 Naga ke narui naṣa mligan inu nepimi, a naga sike amio inu nagane. Naga pe mliganu li re poli, vanon silaga nekila ke sur punu ga sa ga naṣa naga kekarania.” 30 Yesu pis ke sanene, kiena visena la ṣere le Yu la moki amlelaga e naga.

Visena lelaga kila sen lala na mlamulena alolor sina ga

31 Ana Yesu pis pan le Yu la naṣa amlelaga mare ga e naga na wa, pisape “Visae awarar kiau visena ṃarera, amiu alogearia, amiu ave kiau nalogena la lelaga.

32 Yoko akilia ruru visena lelaga, ana visena lelaga kilia kila sen loru si vetan amiu.”

33 Apisatamea, apisape “Ee, imimi na lus kiena yermarua Epraam, imimi pe

memiyum̃ae koren kiena ne re yar keviu taḑena tai poli. ?Ana sanape ne osape sen lala alolor vetan imimi?”

³⁴ Yesu pisataḑe la, sape “Nepisa lelaga pan amiu, yeririna punu ga naḑa asuḑa akila ke naviowaena, la ape nayum̃ae korenaena na naviowaena, sen la na viowaena apiar ḡareran la. ³⁵ Ana asuḑa amiyum̃ae korena ga kiena ne yar keviu na naviowaena, ana pe ape namratava re puna poli. A inu, in na nesulue ga nemio Ata, komin in na namratava nena puna. ³⁶ Ana in na sisi nae ma e peni, visae noul plan amiu, yoko amiu ḡena akilia asulue amio inu ma um̃a.”

Yesu pisape la pe ape narina ne re yermarua Epraam poli, ape narina ne Yermare

³⁷ Ana Yesu pisa ke sina ga pan yeririna lala, pisape “Nekilia ruru amiu na, ape lus nena kiena ne yermarua Epraam, ana lus kiena ne Epraam la narui naḑa popon sa akekaranu. Ana peraga, amiu laḑasia na lus ga nene naḑa kiau visena pe towawa ruru re e kiamiu malena la poli, sinemiun manene asape awe moḡar inu. ³⁸ Ana popon amiu alelaga e kiau visena lala, vanon in na nepisawal ke ga sur la naḑa nepisua pogos naḑa nesike puna ne Ata, ana amiu na akila ke ga naḑa amloge arimamiu pisa.”

³⁹ Ana apisataḑeia, asape “Lelaga, vanon arimamimi,

yermarua apua Epraam na sumo sumo laa.”

Ana Yesu pisa pan la, sape “Peraga yo! Visae amiu ape narina ne yermarua Epraam lelaga, popon amiu towe lai akilali sur wo la ve sa naḑa naga miyum̃aenia. ⁴⁰ Ana pere, amiu akila piowa manene laa paḑisi. Sane inu, in na nepe yar tai naḑa nepisa plan ke ga visena na lelaga la naḑa Ntewa pisa pan inu, ana amiu asape awem̃ar inu. ?Pona amiu asitom ke asape ḑelaga wo ke narui naḑa kiamiu yermarua Epraam sape akila? ⁴¹ Peraga, nepisu sane pe naga re nene po, ana arimamiu taḑena ga tai sike ga wa, naḑa amiyum̃ae kiena ke.”

Ana la apisape “!Ke ya ne! !Osape okila imimi meve sisi na mrapa lala, memninue ga arimamimi! Armamimi taaga ga nalelaga naḑa sike, nane Ntewa.”

⁴² Ana Yesu pisape “Visae visena nene lelaga, sape Ntewa pe arimamiu, yoko amiu monar akekaran manene inu, vanon in na nepetan ma puna nepitom tano e nini. In na nepim re ga sanene poli, naga ke narui mliganu nepimi. ⁴³ In na nepisasa ke sur la nene pan amiu pano-o, ana silaga amiu pe amloge kilale re nena ga. Memninue amiu ga, vanon ya ne yepemiu mavin logekilaleen kiau visen sanene? ⁴⁴ Amiu na arimamiu na Yermare, ana amiu sinemiun ga

asape akila sa naña naga sinenania. Siar nanua sumo e nasiarena pimi, naga pe yaru na wemoñaren yaru, pe sinenan re visena nalelaga poli, pe sumal re nena e lepas nene poli. Kiena ðelaga mesmas, pis lue ga e pupia visokanena lala, vanon naga pe purþes nen navisokanena punu ga, pe ariman navisokanena. ⁴⁵ Naga sanene, ana pogos naña in na nepimi, nepi-sawal visena na lelaga wo pan amiu, ana siraunia amiu amon lelagaen si e inu. ⁴⁶ ? Ana amiu ane kilia visalua kiau naviowaena tai? ?Ana visae amiu apisu nepis pe lelaga, vanon ya ne amon lelagaen e inu?

⁴⁷ “Yar naña kiena ne Ntewa, naga sumã miyagogon ruru visena kiena ne Ntewa. Ana amiu la naña pe sinemiun re aloge kiena visena la poli, nekilia sane nanene vanon pe ape kiena re nena ga.”

Yesu amio Epraam

⁴⁸ Ana visena m̃arera la nene kiena ne Yesu kila yerkaawa kiena ne le Yu la nene amloge piowa, ana apiun pania, apisape “Imimi na memloge asape ko na pe ope yere Yu re lelaga poli, ko na ope apkas nae ga Samaria tai. Ana mepisu naña yermare tai teke e ko, kila ko ope wowe li m̃aga. ? Visena la nene ape lelaga, po peraga?”

⁴⁹ Ana Yesu pisatam̃e pan la, pisape “Peraga, pe yermare tai to re e inu poli. Sur la naña in na nekila ke ne, nekila ke ga vena kia kiena ne ata va metava. Sur la naña amiu akila panu, akila naña kiau kia pato tano. ⁵⁰ Ana pe pe sur re tai pan inu poli, vanon in na pe nemiyuñæn re naña na kilaen kiau kia va metava poli. Ana yar keviu tai m̃eke naña sinenan pisape yeririna la popon avatanon inu, ana naga taaga ga kilia la naliþereena e lepas la nene. ⁵¹ Ana visena tai naña lelaga nekilia nevisa van amiu sa nini, visae amiu yar tai larar kiau visena m̃arera, lo-gearia, yoko taþatete va tol marena pogos tai.”

⁵² Ana le Yu la amloge visena nene, apisa pania, asape “Nanagane na mekilua ruru naña yermare sike pa e ko rui. Ko opisape yar naña lelaga e ko taþatete mare, ana pe yar tai naña yoko taþatete ve mare re pogos tai. Yermarua Epraam mal m̃a pano-o mare, a navisawalena lala, lala m̃ena amiyuñæe m̃a pano-o amare. ⁵³ ?Pona ko na opisu sane oto laa metavan kieta yermarua wa la nene yo? ? Ko na ositom ke osape ko na a si ne?”

⁵⁴ Ana Yesu pisatam̃e la, pisape “Visae nevisawal van amiu, pona avisu sane nemiyeluar ke sina ga kiau kia, ana avisu viowa ga. Yar taþena ga tai kila ke kiau

kia pa metava, naga naña asape pe kiamiu Ntewa, naga kau ata ne. ⁵⁵ Naga, amiu pe akilia re poli, ana in na nekilia ruru naga. Pe nepisokan re sane amiu poli, nepisa ruru ga ne, nesape in na nekilia ruru naga, a kiena visena punu ga, nemligan ruru sike e kiau malena. ⁵⁶ Nekilia nevisa mēna ga sane repimiu yermarua Epraam, naga tai naña nanua sumo sinenan pisape visu kiau pog nane p̄ane. Naga sinenan pisape visu naña nomolue e kiena lusia, nevim nekila kiau yuñae nini, ana pogos naña naga siar pisu ke pa rui, naga kekara na kekara.”

⁵⁷ Ana le Yu la apiunia, asape “Ana ko na pe ope yermarua re tai ne sane naga po, kiom̄a kas pe tol re lualima yam lima poli wa. ?Ana sanape na opisa ke osape okilia yermarua Epraam na sumo ne? Ko opisus naga koyo tai?”

⁵⁸ Ana Yesu pisatam̄ea, pisape “Nepisa pe lelaga pan amiu, sane yermarua Epraam na nanua sumo ne, in na nesumon laa naga. Pogos naña naga pere wa, ana inu in na naga naña su sumo rui.”

⁵⁹ Ana pogos naña le Yu la amloge Yesu pisa narin visena ga nene, naña sane kia wa kiena ne Ntewa, ana akilia asape naga pisa ke sape naga Ntewa, ana sinela mimi pañisi. Akale kilavaru

na kovemareen Yesu, ana naga tapoloun la, mligan Yuñae Wa, pure sina ga pano.

9

Yar naña paeme pe kilamara p̄ala

¹ Ana imimi nalogena lala memio Yesu memial mepano, ana pogos naña mepa ke sane na, mekirawal yaru tai naña pogos naña paeme, naga pe kilamara p̄ala. ² Ana mepiun tan Yesu, mesape “?Navianena, sur ya ne kila yar nene? ?Pona nakoena na kiena mlamulena viowa ga yo, po nakoena na mlamulena viowa kiena ne anena po arimana, kila naga pe kilamara p̄ala sanene?”

³ Ana Yesu pisatam̄ea, pisape “Peraga, pe kiena naviowaena re poli, a pe naviowaena kiena re kiena yermarua lua poli, a naga paeme sanene vena kilaen ga sane yoko yaru la akilia avisu puriukawaena kiena ne Ntewa yuñae e kiena malena. ⁴ Sanene, yoko netamalia naga nanagane, komin pogos naña yemlagi ke ga wa, monar teyuñae m̄arera, monar teyuñae kiena yuñae lala naña naga mligan inu nepimi. Yemalolo naga pimi ke narui, naña taḡatete teyuñae ea. ⁵ A nanagane na, in na nesike tano e nini, in na nepe yomerarava na yomarava nini.”

6 Yesu pisa sanene, p̃si na plasiria yavi na porotano p̃asia, pulou p̃alelar pimi sane kene, plan e kilamaran yar nañane luwoka. 7 Ana pis pania, pisape “Pogaga, ovano oto tano e pulus nen wii naña Siloam, okevan ruru si maramña.”

Wii naña Yesu pisa pania, kiena kia Wii Na Liganen Vano. Ana yar nene pito tano kila sanene, ana kilamarana pimi po. Pisi na p̃asupe si pun imimi memio Yesu, sane naga kilia kira pisu sur narui.

Visena moki e lepas kiena kilamara p̃ala nene

8 Ana siraunia, la naña nalavis puna ne yar nene, amio la naña na sumo asuñia apisu naga mlogi ke, apisu si naga, apisa asape “? Kilamara p̃ala ke nene narui, naña nanua suñia monon mlogog kare ke ne, po pe naga re poli?”

9 Ana lala p̃asia apisape “Ee, naga ga nene ne,” a p̃asia asape “Peraga, yar tañena ga tai ne kus marana ne,” ana yar nene pisa meraravan pan la, pisape “In ga nini.”

10 Ana pogos naña pisawal pan la sane na, apiun tania asape “?Ana sanape na kilamaramña po sanene?”

11 Ana pisatam̃e la, pisape “Yar naña Yesu, naga miyuñiaenia. Palelar narin kene amio kiena vilasirena, plan e kilamarau, ana pisape netotano e wii naña

Siloam ne, neke plan si vetan kilamarau. Ana nekila ga sanene, nepitove, nekevan marau, nepisu sane kilamarau po narui.”

12 Ana apiun Yesu tania, asape “?Yar nene m̃eke pe nagane?”

Pisatam̃e la, pisape “Nemninue ga, pe nepisu re si po.”

Le Varasi la amliḡere la e sitomena lua e lepas na taña ruruena nene

13 Ana siraunia, aḡure yar naña sumo pe kilamara p̃ala, aḡure naga pa puna Varasi lala vena avisulia.

14 Aḡure naga pa sanene vanon legiena naña Yesu kila ruru kilamaran yaru nene, naga pe Legiena Wa, ana la asitom asape Yesu kila yuñiaena tai naña navisaluaena na legiena wa pisa luḡaria.

15 Ana pogos naña apa apisawal pan Varasi lala, apiun tania, asape “Pogaga, ko towe ovisayu meraravan sanape naña kilamaramña pimi po.”

Ana naga pisa ga sanini, pisape “Peraga, yar nene mligan ga narin kene e kilamarau, ana nepa neke plan sina ga, nekilia nepisu ruru si sur punu ga.”

16 Ana pogos naña Varasi la amloge, laḡas apisape “Yar naña kila nanene, naga kila sa ga sitom korena ga navisaluaena na Legiena Wa. Sanene na, naga pe molue re nena e Ntewa pitomi poli.”

Ana la p̃asia asape, “Per-aga, visae pe lelaga naña pe yar viowa ga tai na kilaroen navisaluaena, sanape na naga kilia kila kile wo la ne sanene.” Ana apisayu m̃a sanene pano-o asum̃alu ase sitomena lua narui.

¹⁷ Ana apiun ke sina ga tan yar naña nanua pe kilamara p̃ala, apisape “?Ana ko, ko naña naga miyuñ̃aen kilamaram̃a, ko na ovisa ya ne e lepas na yaru nene?”

Naga pisatam̃e ga la nena, pisape “Naga pe navisawalena lelaga tai.”

¹⁸ Naga pisa sanene, ana yerkawa kiena le Yu la pe amlelaga re e kiena navisawalena la nene poli, pe amlelaga re asape nanua sumo yar nene pe kilamara p̃ala, a nagane kilia kirava. Ana apio arimana amio anena vena avim̃ avisu la. ¹⁹ Ana pogos naña lalua apim, apiun tan la, asape “Avisu ruru li yar nene. ?Naga pe narimiu kemua lelaga, naña asape paeme ana pe kilamara p̃ala, pona pe naga re poli? ?Ana visae naga, sanape na kilamarana pimi po si sanene?”

²⁰ Ana lalua apisatam̃ela, asape “Imimi lua mekilia mesape naga pe narimimi, mekilia mesape pogos naña moñ̃aria, pimi tol nanagane, naga pe kilamara p̃ala nena. ²¹ A pe mekilia re mesape naga kilia pisu ruru si sur la nanagane, pe mekilia re a ne kila ruru si kilamarana sanene. Ana popon

aviun ruru ga tania, naga pe pe sisi re poli, kilia vis.”

²² Lalua apis sanene, akilawan li m̃a kiela sitomena, vanon yerkawa kiena ne le Yu la apisayu pa rui, apisawal asape yar naña mlelaga sape Yesu pe Navisaarena, yoko akuan lua ve su re si amio la e Yum̃a Wa Mana ne Ntewa. ²³ Apisawal sanena lalua amaraun pap̃isi, kila apisa ga asape amminue ga, asape “Popon amiu aviun ga tania, naga pe pe sisi re poli.”

Varasi la apis si pan yar naña nanua sumo pe kilamara p̃ala

²⁴ Ana pogos tañ̃ena si tai na, apio kilamara p̃ala na nanua ne pimi loyuñ̃a pula. Apis m̃arera pania, asape “Ovisa kia kiena ne Ntewa na mava, ovisa ke sur la punu ga nene van imimi ve lelaga, vanon nagane na mekirawal pa rui sane yar nene pe yar viowa kemua na kilaroen navisaluaena.”

²⁵ Ana naga pisatam̃e la, sape “Naga pe yar viowa pona pe yar wo, in na pe nekilia re poli. Sur taaga nekilia, sanini. Nanua sumo, kilamarau p̃ala nena ga, ana nanagane na nekilia nepisu sur punu ga.”

²⁶ Ana apiunia, asape “? Ana visae sanene, miyuñ̃aen ko sanape? ?Kila ruru kilamaram̃a sanape?”

²⁷ Ana naga pisatam̃e la, sape “Nepisa meraravan ruru sur punu ga nene pan amiu yam tai p̃a rui,

ana amiu amon logeena, ana nanagane na sinemiun asape aloge sina ga. ?Vanon ya? ? Pona amiu mēna sinemiun asape aim ave kiena nalogena la yo?”

28 Naga pisa sanene, sa naḡa pisa kare li la mā ga, ana la sinela kar manenea, apeveyunia asape “!Oo! Ko ga ope kiena nalogena tai, imimi na mepe nalogena la kiena ne yermarua wa Mosis. 29 Mosis nene, mekilia ruru mesape pe lelaga naḡa Ntewa pisawal kiena visena pania, ana e lepas na yar taḡena nene, imimi pe mekilia re poli, sane naga yar nae pe pimi sanape.”

30 Ana yar naḡa pisatamea, sape “!Kue-e, nemilan amiu paḡisi naḡa pe akilia re naga poli! Naga kila ke pupia yumaena la sanene, pano-o kila ruru kilamarau, ana amiu akilia re asape naga ai po naga yar nae pe.

31 Tekilia tesape visae yar viowa vio van Ntewa, yoko Ntewa taḡatete yagogonia, a visae yar naḡa pe yar na lotena a mlogear ke naga, visae vio vania, yoko yagogonia. 32 Ana yaru nene, Ntewa miyagogon ke naga, vanon siar e nasiarena na yomarava nini pimi tol nagane, pe apisuli re yar tai naḡa kila ruru si kilamaran yaru tai pogos naḡa paeme pe kilamara ḡala. 33 Yar na monar petan ga Ntewa pitom e nini, visae pere, naga taḡatete nena kila sur tai ne sanene.”

34 Ana lala pe akekara re nena naḡa yar nene pis sanene pan la, asape “E, ko ope yar viowa kemua tai. Ko na ḡelaga na mlamulena viowa pulemamaga e ko siar e pogos naḡa opaeme pimi tol nanagane. ?Ana ko ko na ai ositom ke osape okilia ovian imimi sina ga?”

Apis kare naga sanene pano-o, ḡisi na aḡenelua si naga pa vanua.

Kilamaraḡala nene mlelaga e Yesu narui

35 Ana pe piavi re nena ga Yesu mloge asape aḡenelua yaru nene sanene, ana pa mālia, piun tania, pisape “? Sanape? ?Nanagane na ko na omlelaga pa e Narin Yeririna rui, po pere?”

36 Ana yar naḡane piuntan Yesu, pisape “?Ana naga naḡa ko opisa ke ne, naga ai? Visae ko na okilia ovisali van inu, pona nekilia nelelaga e naga.”

37 Ana Yesu pisatamea, sape “Ko na opisu pa naga rui, ko opisu ke naga nagane. In ga ḡa, nane nepis ke nemio ko ne.”

38 Ana pisatamea, sape “O Suḡe, visae sanene, in na nemlelaga nena ga e ko.” Ana yar nene ḡaryon lue ga na yeluaren Yesu.

Yesu pis pan Varasi lala

39 Ana Yesu pis pisape “In na nepim e yomarava nini vena nevisusuveve yeririna lala, vena kilaen sane yeririna la naḡa kilamarala ḡala akilia avisusu suria, a vena

kilaen sane yeririna la naña asitom ke asape akilia apisu sur punu ga, avisu kilale sane la ape kilamara ãala ga.”

⁴⁰ Ana Varasi la ãas asumã lavis ga, amloge visena nene, apiun tania asape “? Ana opisape sane imimi mēna kilamaramimi ãala ga, a?”

⁴¹ Ana Yesu pisatamē la pisape “Visae pe lelaga naña amiu apisu kilale asape kilamaramiu ãala, po li m̃a ga, yoko amiu taãatete akilia awar nakoæna vanonia. Ana pogos naña visae apisa ke asape akilia avisu ruru sur punu ga, sanene na pupia naviowaena sike pa e amiu rui.”

10

Pakaiwa na kove kan sipsip

¹ Ana Yesu pis pa re laa sane, pisa ãakaiwa tai pan la, e lepas na kove kan sipsip, naña amiyum̃aen pae ana sipsip kiena ne yeririna punu ga akilia ava amomalio loyum̃a veraga. Naga pisa sanene, pisape “Nepisa pe lelaga pan amiu, yar naña visae ve kom re e mralaea na vaen loyum̃a vanon sipsip lala, ana ãiyukalawan ga kove, yar ne sanene pe yar viowa na vinauen ga.

² A naga naña silaga pa kom lologia mralaea, naga pe yar mesmes nena navisuaren sipsip. ³ Visae ali-gan yar tai na kirakirawoen mralaea, ana pogos naña yeririna navisuarena sipsip

vim, yoko naga kilia vike ga vania. Ana pogos naña va loyum̃a, sipsip la punu ga aloge pulgona, ana naga vio ga kia kiena ne lala naña ape kiena ga, ãisi na lala ga nene asum̃alu a naga sumon la ava vanua. ⁴ Ana pogos naña visae sumon la apa ava vanua, naga yal sumon la, la asiraunia avano, vanon akilia ruru pulgona. ⁵ Taãatete akila ve sanene van wolawa tai, yoko amaraun ga, vanon pe amloge kilia re pulgon yar taãena la poli.”

⁶ Ninun visena nene Yesu pisawal pan la, ana pe amloge kilia re kinas poli.

Yesu sape naga pe mralaea na kove na sipsip

⁷ Sanene na, Yesu sunyu m̃a pan la sane e lepas na kove na sipsip nene, pisape “Nepisa pe lelaga pan amiu, sane mralaea na kove na sipsip nene, naga inu.

⁸ Lala taãena la naña apim sumon inu, naña apisokan asape yoko avisuar ruru sipsip lala, ape yar viowa na vinauena ga lala, ana pogos naña apa akaten sipsip lala, sipsip la pe amloge la re poli. ⁹ In ga nepe mralaea na kove, yar naña imi kom ga pun inu, yoko nevisuar ruru kiena malena. Yoko naga kilia va vanua lual kana kinanena, ãisi na kilia vim sina momalio kolemallo, kilia vim vano ve sanene naga pogaga. ¹⁰ Yar na vinauena pimi vena war plan vinaunen sipsip lala, pona nawe monar laena, pona

kila kare manene laena, ana in na nepimin vena akilia atol malena, vena akilia akekaran malena naña wo vañisi van la.”

Yesu pisape naga pe yar wo na visuar ruruen sipsip lala

¹¹ Ana Yesu pisa mēna ga, sape “In na nepe yar na po na visuar ruruen sipsip lala. Yar na visuar ruruen sipsip naga monar kekara naña tañan kiena malena vena tamaliaen kiena sipsip lala. ¹² Visae ve yar na yuñnaena ga tai, ñisi na tañatete visuar ruru sipsip la ve sanene, naga pe kekaran re la ne sanene vanon pe pe kiena sipsip re poli. Visae pogos tai visu pupia lokul tetan lala atomin sipsip la nene, yoko naga marau ga, sumalu kiriri ure, ligan sipsip la asike na, ñisi na lokul tetan la nene avim akarkare la añenetetain la. ¹³ Yar nene ure vetan sipsip la ne sanene, vanon naga pe yar tai nayuñnaenen ga kiena kilavaru, naga pe sitom manene re sipsip la nene poli.

¹⁴ “A in na nepe yar na visuar ruruen kiau sipsip lala. Nekilia ruru la naña ape kiau, a la nene akilia ruru mēna inu. ¹⁵ Imimi na mekilua ruru imimi sa ga naña imimi lua Ata mekilua ruru imimi lua. A in na sineu si kiau sipsip la nene torokin naña netañan kiau malena vanon la.

¹⁶ “Ana kiau sipsip mēna la moki asuñna ke ga wa, naña pe apim asu re loyuñna e kiau kove poli wa, ana monar neva nevio la mēna ga, ana pogos naña aloge pulgou, yoko aimi. Nekila mēna sanene vano-o kiau sipsip la punu ga aim ave ñegas taaga ga narui amio inu, yar keviu na visuar laena.

¹⁷ “Vano-o yoko netañan kiau malena vanon la, ana kau Ata naga kekaran pañisi, kekaran inu vanonia. Ana nekilia nevisa mēna sane kiau malena naña visae netañan vano-o, yoko nela maran sina. ¹⁸ Pe yar tañena re si naña yoko lalua kiau malena vetan inu, ana in ga taaga netañania. Naga pe kiau ga natañanen vano, a pe kiau ga nalamaranen sina. Na naña neyuñnae sanene, Ata ga mligan e inu.”

¹⁹ Ana yam si tai, visena kiena ne Yesu na sanene kila le Yu lala añure tetai e sitomena lua sina. ²⁰ Lala moki asape “Yermare ga na sike e naga, yar namā ñarina pe wowe viowa ne. !Ve ayagoga re!”

²¹ Ana lepas ñasia asape “Peraga, kiena visena wo la nene pe pe visena kiena ne re yar naña yermare sike e poli. ?Ana sanape, yoko yermare viowa kilua kila ruru si kilamaran yaru naña pe ñala, sa naña yaru nene kila rui?”

Yesu pisawal meraravan naga pan le Yu lala

22 Ana e pogos nene la apim atol si pog na kala pupia pãpãgena tai, ma Yerusalem. Paãpãgena nene apio asape Paãpãgena Navisa Ruruen Yumã Wa Mana ne Ntewa, ana amiyumãen ke e pog na miava. 23 Ana Yesu m̃ena pa sike e pãpãgena nene, ana pogos tai naga pa ma e Yumã Wa Mana ne Ntewa, mial ke pa e pupia mraliu naãa apio sape Mraliu Kiena Solomon.

24 Ana yerkawa kiena le Yu lala naãa asike ne apim puna, ape p̃egas amiyervivia, apiun m̃areran pania, asape “!Konua rui mesape mekilia ruru ko ko na ai, ana ko okilawan ko m̃a sanene pano-o! Visae ko na ope Navisaarena kiamimi na lelaga, imimi sinemimin mesape ovisa meraravan ruru van imimi nanagane!”

25 Ana Yesu pisatam̃e la, sape “? Ana in na nepisa ruru pan amiu p̃a rui, po pere? Nepisa ruru pan amiu ana amon naãa alelaga ea. A pupia yumãena kerkeviu la naãa nemiyumãen e kia kiena ne kiau Ata, sa naãa amiu apisu pa rui, lala m̃ena akila meraravan inu pan amiu rui, 26 ana naga m̃ena nene amiu pe amlelaga re e poli. Amiu pe amlelaga re nena e inu, pona nanene vanon amiu pe ape p̃egas na kiau sipsip re poli yo. 27 Kiau sipsip lala amloge kilia pulgou, a in m̃ena nekilia la punu ga, a lala asuãa

ataveve inu. 28 In na nemla ke malena naãa ve uro re pan la, ana taãatete akovio, pe yar re tai naãa kilia war plan la vetan lumãau. 29 Nanene vanon kiau Ata ke narui naãa p̃ar la pan inu, a naga m̃arera manene laa taulu punu ga, ana taãatete yar tai war plan sipsip la nene vetan navisuarena na limana. 30 Lelaga, inu nemio ata, imimi lua mepe taaga ga.”

Le Yu la sinela kar Yesu

31 Ana pogos naãa Yesu pisa pa visena nene, yerkawa kiena ne le Yu la sinela kar ke sina ga, aãar kilavaru lala asape akovenãaria. 32 Yesu pisuia, ana pis pan la, piunia pisape “?In na nekila p̃arin yumãena wo lala e maramiu rui, naãa Ata sinenan sape neyumãenia, ana amiu asape akove inu vanon nape?”

33 Ana la apisatam̃ea, asape “Peraga, mesape mokove ko, pe vanon re yumãena wo poli, ana vanon ga naãa ko na oãarnena kare ke kia kiena ne Ntewa, naãa ko, ko na ope yeririna ga, ana silaga okila ke sa naãa ope Ntewa pa rui!”

34 Pisi na Yesu pisatam̃e la, sape “E kieta Tus Wa, visena kiena ne Ntewa tai teke e Tus Na Yauena, naãa pis pa yeririna nae Israel lala, pisayu sanape naãa lala ape narina lala, naga pis sanene pan la, pisape ‘Amiu na sa ga ntewa lala.’

35 “Sanene na, tevisu e yo nene sane la naŕa visena kiena ne Ntewa nene pan la, la ape yeririna ga lala, ana visena nene pisape lala ape ntewa lala, ana visena nene naga pe kieta Nasiriena Wa tai, monar ve lelaga ga.

36 “Ntewa pisayu kiena yeririna la sanene rui, ana yoko ve sanape van inu, naŕa in ga taaga naga miawawo inu, mligan inu nepitom e yomarava nini? Mesmesun ga naŕa nepisawal nesape naga pe kau Ata Ntewa, ana inu nepe narina, ana amiu asape piowa ga naŕa nevisa sanene. Apisa ke asape in na neŕarnena kare kia wa kiena ne Ntewa, ana pe sa re nene poli. 37 Visae pe lelaga naŕa nemiyuŕae ke pe pe kiena re arimau poli, pona amiu ve alelaga re e inu, naga pogaga. 38 Ana visae nekila ke kiena yuŕaena lala, pona amiu amlelaga ke e inu po pe amlelaga re poli, a amiu monar alelaga e kiau kile lala, sane ape yuŕaena kiena ne Ntewa lelaga. Visae ve sanene yoko amiu akilia avisu kilia sane Ata teke e inu lelaga, a inu ŕena neteke e naga.”

39 Yesu pisa sanene pan la, ana kiela sitomena ŕarera maran taaga ŕa ga. Lala akilali naŕa atararli si naga sanene na, amilan ga naga pure tan likan la pure pano.

40 Ana Yesu petan si

Yerusalem kusro pito sina e wii naŕa Yortan lepas na vano, e yo naŕa Yoane Nakeena kee yeririna lala ea nanua sumo. Ana ŕa e yo nene yam piavi li ŕa, 41 ana yeririna la apim ke puna silaga. Apim apisayu naga asape “Yoane nanua, naga pe kila re kile la sane yar nene kila ke ne poli, ana naga pisa plan sur moki e lepas na puna, ana tepisu e kilamarata sane sur la punu ga naŕa pisa ne apim ape lelaga ga narui.” 42 Ana kiela sitomena na sanene kila sane la moki nae yo nene amlelaga e Yesu.

11

Suniena kiena Lasaros

1 Ana pogos naŕa Yesu sike perina wa, maiena ŕarera tai pimi tol kiena erau tai, Lasaros. Lasaros nene vinena la lua naŕa Maria amio Mareta, la telu nene nae narin pulkumali naŕa Petani lavisin Yerusalem. 2 Ana Maria ne naga ŕa nene naŕa siraunia taron ponotaninu e Yesu, miyumu vania lana e vilŕarina. 3 Ana pogos naŕa vinena la lua nene apisu ŕenela nene mai keviu sanene, amligan vise-nan pa pan Yesu, asape “Suŕe, kioŕa erau naŕa ko na sineŕa si naga, mai tai na piowa ga.”

4 Ana pogos naŕa visena nene pa tol Yesu, naga pe pito re poli, pisa ga sape “Inanena nene pe na

marena re poli. Inanena nene sa ga mrapa kiena ne Ntewa tai, vena kila meraravanen kiena urarena, a vena kila meraravanen kiena pupia puriukawaena naña mla pan inu Narina Ntewa.” Yesu pisa visena nene, sa naña kilia pa rui suri naña yoko yuñäenia.

⁵ Yesu sinena si Mareta nene pañisi amio luena na ve tokak a mñela nene, a sinena mie la pañisi, ana pe kan pog mesmes re na kilaen suri nene poli wa. ⁶ Sa nene, naga pe pa re ga poli, suña si legiena lua e yo nene naña wii nae Yortan lepas na vano. ⁷ Sumña si sanene, ðisi na pisa pan imimi nalogena lala, sape “Pogaga, tokusro sina ga teva si yo nae Yutea.”

⁸ Ana imimi mesitoñal ke yerkawa kiena le Yu lala e yo nene naña sinela kar Yesu pañisi, ana memaraun vitoen sina. Mepiuntania, mesape “?Navianena, sanape? Nanua ga naña tesike ma ne na le Yu la akilayon asape akoveñar ko, ana nanagane na osape teva si pula.”

⁹ Ana Yesu pisa pan imimi pisape “Kiau navisatañeena van amiu naga sanini. E legiena, kana aora nena lualima yam taaga pa lua, pupia mrae tegoli yo, kila sane yar kilia yal ruruia, tañatete lolor. ¹⁰ Ana yar naña yal li e yemalolo na kolemallo, naga yoko lolor ga, vanon yomerarava nene pe tegoli re si kiena mrapa poli.”

¹¹ Yesu pisa visena nene pan imimi, kana kinasia sape naga kilia yaloro ga woga ga ne, tañatete suri viowa tai vania vano tol pogos naña Ntewa ligan ruruia sape akilia aweñar naga. Ana miakolkol sina ga, sape “Kieta erau nene momalio rui. Ana nanagane na tevano na neviopege sina naga.”

¹² Ana imimi nalogena la pe memlogekilale re kinasen visena nene po, ana mepisaluñar si Yesu, mesape “Suñe, visae naga momalio, pogaga ne, yoko kilia loge wo sina ga ne.” ¹³ Mepisa sanene vanon mesitom ke mesape Yesu pisa ke sape Lasaros pa ruru ke ga, ana pere, Yesu pisa ke kana marena ne.

¹⁴ Ana nagane na Yesu pisa meraravan pan imimi narui, sape “Lasaros mare pa rui, ¹⁵ komin pogos naña naga mai, pe nesu re nemio la poli. Ana sanene na nepisu pogaga, a po mñena ga pan amiu, vanon sane kiena marena nene yoko imi ve sa pulmas tai van amiu, vena amiu akilia alelaga lelaga e inu. Pogaga, tevanon, tevisuia.”

¹⁶ Ana imimi nalogena la memaraun ke navaena wa, ana Tomñas naña apio sape Tomñas Kaora, pisa pan imimi sape “Amiu asuñalu, ita punu ga tevano. Kieta Suñe sinenan sape va mare sanene, popon ita punu ga

tevano, temare temio naga veraga.”

17 Ana imimi punu ga memial veraga mepano, mepa makate lavisin narin pulkumali naþa Petani. Ana apisawal pa Yesu asape Lasaros, amligan tasnena mono e pulu kilavaru legiena vari þaro rui. 18 Ana kumali naþa Petani sike lavisin ga pupia kumali naþa Yerusalem, torokin sane kilometa ve telu ga, 19 kila sane le Yu moki nae Yerusalem, pogos naþa amloge marena nene, sinela miye Mareta amio Maria, ana apim vena atag amio la atagin naga naþa kovio. 20 Ana Mareta sike amio la nene, ana amligan visenania, asape Yesu pam sike pa garo ne e mrapa rui, ana naga suñal pato talopania. Ana luena naþa ve tokak, Maria, naga suñaga loyuma, ana pe pa re vanua poli. 21 Ana Mareta pitomi pisu Yesu, pisa pania, sape “! Suþe, visae ko na ovim ga e nini, mñemimi nene taþatete kovio! 22 Ana in na nemlelaga pe sur korena ga naþa mare, ana sur naþa ko oviun vetan Ntewa, yoko naga tañan ga van ko.”

23 Ana Yesu pisa pania, sape “Mareta, yoko mñemña nene suñal mal sina.”

24 Ana Mareta pisatamea, sape “Lelaga, nekilia ke ne, nekilia nesape naga yoko mal sina ga e pupia nasuñalena e legiena maro.”

25 A Yesu pisa visena nene pania, sape “In na nepe mrapa na suñalen sina, in na nepe purþes nen malena. Yar naþa lelaga e inu, pe suri korena ga naþa monar mare e yomarava nini, ana yoko mal sina ga. 26 Yar naþa tol malena nene, ana nalelagaena e inu teke e naga, naga taþatete visu si marena pogos tai. ?Mareta, ko na omlelaga sanene?”

27 Naga pisatamea, sape “O, Suþe nemlelaga. Nemlelaga e ko, sane ko na Navisaarena, narina ne Ntewa, ko ko na naþa siar nanua sumo sumo apisa ke sape yoko imi tamalia yeririna lala na yomerava nini.”

Yesu wamarana la mlalau

28 Ana pogos naþa Mareta pisa pa sanene pan Yesu, pa sina ga loyuma, pavinin vinena naþa Maria, pis malum ga pania, sape “Navianena naþa! Pam pa rui, sike garo e mrapa wa, pisape visu ko kone wa.” 29 Maria mloge, suñalu veraga, sape vito visu Yesu, 30 nane e ga e mrapa naþa Mareta pisu ga naga e nanagane, vanon naga pe pimi re loyuma e kumali poli wa. 31 Ana le Yu la naþa asike loyuma amio la, apisu naþa suñal pa vanua pito yuroro sanene na, asitom asape naga sinenan sape va tag sina e pulkilavaru, ana la mña asumalu, ataveve naga apano.

³² Ana Maria mial mña pito sanena, pimi tol e naña Yesu sike ea. Naga kira pisuia, pimi lavis puna, kuan mlor pito tano e mialana, tag pania, pisape “!Suþe, visae ko na oimi ga e nini, mñemimi nene taþatete kovio ne!”

³³ Ana naga tag mña sanene, le Yu taþena la naña atavevea, lala mña atagi. Ana pogos naña Yesu pisu pupia naloge viowaena kiena Maria la sanene, naga mña mloge piowa, mnunu sur nene sane urmi manene e losinena, ³⁴ naga piun petan la, sape “? Amiu amligan mono ke pe?”

La asape “Suþe, oimi teva tevisuia.”

³⁵ Yesu mloge sanene, ana tagena pimi e naga, wamarana la mlalau.

³⁶ Pogos naña apisu naga tag sanene, la þas asape “! Lelaga naña ne, naga sinen si kiena erau nene paþisi naña ne, kila sinena piowa na sinena piowa!” ³⁷ Ana lala þasia, naviunena teke e kiela sitomena, asape “Yar naña nanua kila kilamara þala tai, kilamarana pimi po sina ga. ?Visae sinenania na, naga kilia kila naña kiena erau nene ve kovio re ga, a?”

Yesu pioþege si Lasaros petan marena

³⁸ Ana Yesu mial amio pupia sineyeena, amio Maria lala apa akate e pulkilavaru naña amligan tasnena ne Lasaros mono ke ea. Pulkilavaru nene naga pe puluve, naña amligan pupia

kilavaru tai mono ke pulusia. ³⁹ Ana Yesu pisape akuslua pupia kilavaru nene.

Ana vinena taþena nene Mareta mloge naña Yesu sape akuslua kilavaru, þisi na sape visaluþaria, pisa pania, sape “Suþe, piowa naña tekila sanene, vanon naga mare legiena vari þaro pa rui, yoko ponos kona va þisi ne.”

⁴⁰ Ana Yesu pisatamñe pania, sape “? E, ko na pe ositoñal re si kiau visena naña nepisa pan ko rui? In na nesape sa ko na olelaga ga, ovisu namareraena na urarena kiena ne Ntewa naga yumae.” ⁴¹ Pisi na la akila ga, akuslua pupia kilavaru, ana Yesu kira pa metava, mlen, sape “Ata, nepisa siþa pan ko keviu naña ko na okekaran nalogeena kiau naviunena nini. ⁴² Nekilia sane sur ya naña visae in ga taaga nesape neviun tan ko, yoko ko ologe ga. Ana suri naña neviun tan ko nagane na, nepiunia e maran la ne asuñal asike nini, vena la mña akilia aloge. Ana visae avisu sane ko ovisatamñe van inu sa naña nepiunia, kilia ilala alelaga sane pe lelaga ko na omligan inu nepitom e yomarava nini.”

⁴³ Ana pogos naña Yesu mlen pae sane na, naga kii mñarera sanene pano, pisape “Lasaros, omolue ovim.”

⁴⁴ Ana amilan naña yar mare suñalu pimi vanua,

þarar kulmrae la naþa am-lular naga ea, tamalele ke e limana la amio lana a þarina asike wa. Ana Yesu pisa pan la sape “Pogaga, awar plan kulmrae la nene veta-
nia, vena naga kilia yal ruru sina ga.” Pisi na akila, ana Lasaros mal ruru ga sike si amio la.

Pupia kumali tamān sape monar aweñar Yesu mare
Matiu 26:1-5; Mak 14:1-2;
Luk 22:1-2

⁴⁵ Ana le Yu la moki naþa ataveve Maria apim e pulk-ilavaru nene, pogos naþa apisu Yesu kila Lasaros mal si e marena sanene na, amlelaga nena e naga. ⁴⁶ Ana lala þasia amon lelagaena, aþasuþe la sina ga, apa si pu Varasi lala, apisawal pan la sur naþa Yesu miyuþaenia. ⁴⁷ A pogos naþa amloge pe akekarān re nena ga, ana lala amio yerkawa na yar wa lala, apio mēna lala taþena na pupia kumali kiena le Yu lala apim lele taaga asunyuia. Ana pogos naþa apim pae lele taaga, apisawal pan la asape “?Yoko tekila kan yar nene narui? Naga kila ke pupia kile la paþisi e maran kieta yeririna lala. ⁴⁸ Visae ve tevisawo re naga, yoko kila mēna sanene vano-o ve tai re naþa ve lelaga re e naga, yoko ure la punu ga ataveve ne. Ana visae la na mara nae Rom avisu yar nene kila ke sape imi ve pupia nasumonena tai sanene, yoko sinela kar ita le Yu la punu ga. Yoko akilia aimi akila mara amio

ita vano-o akila kare kieta þegas punu ga amio awe plan kieta Yumā Wa Mana Ntewa.”

⁴⁹ Apisa ke sanene na, kiela pupia nasumonena Kaeþas, naþa e kas nene na naga þuarar kia naþa Þarin Yaru Wa, pisa pan la, sape “?E, vanon ya ne kiamiu sitomena la plas ga sanene, naþa amiu amninue ga sane yoko tekila ya ne van yar nene? ⁵⁰ Sur ya na po pan amiu? Pogaga naþa yar taaga ga nene kila ita make ga tokovio, pona popon naga taaga mare vena tamalia kieta þegasia ita punu ga?”

⁵¹ Pogos naþa pisa visena nene, naga mēape pisawal ke sitomena tai naþa kiena ga. Ntewa kila naga þuarar yuþaena na þarin yaru wa e pogos nene, ana Ntewa ke narui mligan mēna visena nene e kiena sitomena, vena visawalen visena lelaga tai, sape Yesu monar mare vena tamaliaen yeririna punu ga. ⁵² Naga pe kilia re poli, a pisa ke sape siraunia, pogos naþa Yesu mare, naga pe maren re ga þegas kiena ne le Yu ga la nene poli, ana kiena marena panon mēna narina ne Ntewa taþena lala naþa asike mēna e purvanua taþena lala, ve naurepran laena punu ga aim ave na mratava taaga ga.

⁵³ Ana e pogos nene, Kaeþas pisawal visena nene, pure sitomen kiena ne yerkawa la punu ga kiena ne le Yu la asape Yesu monar

mare ga. Ana siar e pogos nene, apisayu ke silaga, asape akilia akila ve sanape.
⁵⁴ Ana kiela sitomena nene kila Yesu mialorotete sina likan yeririna lala e yo nae Yutea, naga p̄ere plan imimi, mepa mesike e narin kumali tai, kiena kia Ipraim, naṣa sike perina, lavisin yokorena.

Lavisin pog na p̄ap̄agena maro na Sitom̄alen Natamaliaen kiena ne Yesu

⁵⁵ Ana lavisin pog na p̄ap̄agena kiena le Yu la nene, Paṣagena Nasitom̄alen Natamaliaena. Ana le Yu la naṣa asike e yo la ne, amligan ke kiela yo lala, apa ke ma Yerusalem, asape ava e Yum̄a Wa Mana ne Ntewa, akila kuṣap̄aena naikikena e marana ne Ntewa, sumon naṣa p̄ap̄agena siaria.
⁵⁶ Ana pogos naṣa yeririna la apa ke metava e Yum̄a Wa, asike akale ke Yesu. Akale pano am̄a re naga poli, ana la apiuyun ke petan la, asape “?E, amiu asitom sanape? ?Yoko naga vim kate e p̄ap̄agena nini, po ve vim re?”

⁵⁷ Ana p̄arin yar wa la amio Varasi lala, lala m̄ena asitom ke asape pona Yesu kate li e aora nene yo. Ana la apisaar m̄arera asape visae avisu Yesu sike lele tai, monar aligan visena va van la vena aim na atararia.

12

¹ Ana pogos naṣa Paṣagena Nasitom̄alen Natamaliaena nene pere ke ga wa, legiena orai sike ga wa, ana imimi memio Yesu mepa tol si narin pulkumali naṣani Petani. Ana mepa makate si e um̄a m̄ana ne naga naṣa Yesu kilamalia sina ga pe piavi re poli, naṣa Lasaros.
² Mesum̄a memio la pano-o, la nene asape akila kinanen tai akan amio Yesu. Ana pogos naṣa akila ruru punu pa sur lala, imimi memio Yesu mepim metotano, a Lasaros m̄ena totano amio imimi, ana vinena naṣa Mareta naga p̄ar ke kamimi kinanena pimi.
³ Ana vinena ne Lasaros taṣena naṣa Maria, naga m̄ena sum̄a ga, naga kus pupia pias na ponotaninu pimi, ponotaninu nene apio asape nat, naga ponotaninu tai naṣa kana maran kilavaru pa metava paṣisi. Ana kus pimi lavis pu Yesu, taronia miyumuvan la Yesu ea. Pisi na Maria tar pupia viluna piavi nene, miyumuvan sina ga la Yesu, ana pe piavi re poli, ponotaninu naṣa ne ponos miyere make loyum̄a e naṣa asike e ne.

⁴ Ana e pogos nene, nalogena kiena ne Yesu naṣa yoko siraunia wilwilin wania, Sutas nae Kariot, naga m̄ena pisu ke sur nene.
⁵ Naga pisape “?Vanon ya ne ve awilwilin re ga pupia

ponotaninu nene? Visae sanene, akilia ataulu pupia varu tai, sane kilavaru naþa yaru tai tauluia e kiena yumãena na kas wetelu tai, ana akilia ataþan vena iilaen la naþa pe kiela sur la poli. !Akila kare ga ne!”

⁶ Naga pisa sanene, ana naga pe sitomãl re yar la naþa pe kiela sur re la poli. Naga pisa vanon naga pisuar ke kiamimi karo na varu, a pinaun la ke, kan ke kiamimi varu lala, a naga sitom manene laa varu na ponotaninu nene.

⁷ Ana Yesu pisataþne e sur naþa Sutas pisa, sape “Ei, piowa naþa ko ovisa kare vineta sanene. Naga kila sanene pan inu vanon naga sitom ke sape legiena naþa yoko asinwo inu pimi make lavis narui. ⁸ Yoko yar la naþa ve kiela sur re la asulue ga amio amiu, vena amiu aiila la sanene, ana in na pe pe nasulueen re nemio amiu poli. Sanene, sur nene naþa naga kila pan inu naga po paþisi.”

⁹ Ana pe piavi re nena ga, visena pato tol lala naþa aþarpiran la ke e þaþagena garo Yerusalem, sape naganane na Yesu pam sike Petani rui. Þisi na lala apava ke asape avisuia, a pe naga re ga poli, asape avisu mēna Lasaros, naþa Yesu kila naga mal si rui. ¹⁰⁻¹¹ Yeririna la apa apisu ke Lasaros sanene, a sur naþa Yesu miyumaen pania kila naþa lala moki, pano tol li na

sumonena laþas kiena le Yu lala, aþure petan kiela nasumonena taþena lala, apim amlelaga e Yesu narui. Ana yer keviu kiena yar wa lala naþa asike ne apisayu sur nene, apiranaria asape akale mrapa naþa awe monar Lasaros mare.

Yesu pimi tol yo naþa Yerusalem

Matiu 21:1-11; Mak 11:1-11; Luk 19:28-40

¹² Lasaros lala akila pae kinanena kana ne Yesu þisi, ana e legiena taþena sina, visena pato tol pupia þina la naþa apam asike Yerusalem e þaþagena, asape Yesu naga pimi ke rui, vena vim loyuna e pupia kumali nene. ¹³ Ana yeririna la amloge, asumaal amial apa ate lumãnela lala, amiyal apano vena avitawe naga mrapa.

Asape akila sanene vania vena naga vim ve sane kiela þarin suþe, ana la amial apa sanene, apioyon ke sanini apisape,

“!Pona we-e po! Teieluar naga, kieta þarin suþe viu nae Israel!”

!Ntewa na mava ovisa ruru naga naþa pimi e kioþa kia!” Yauena 118:26

¹⁴ Ana Yesu mial pimi ke, naga kila naþa aþure narin togki tai pimi puna, pa totano ea mial pimi. Sur nene naþa naga kila taveve ruru ga visena tai na Visena Wa naþa pisape.

15 “Amiu le Yerusalem lala, amiu ve amarau re sina,

Amiu avisuia, nanagane na kiamiu p̄arin suṗe naga pimi ke pun amiu narui.

Naga kus ke ga narin ninus nen togki tai, pa totano ea pimi ke.” Sek 9:9

16 Ana e pogos nene, imimi nalogena kiena ne Yesu lala pe mesitoñal re visena nene poli, a siraunia, pogos naṗa pa pae ma e peni, imimi mepisu kilale ga na wa sane visena marua na nanua ne naga pisayu naga mesmes, ana mepisu sane naga kila sur punu ga mesmesu ga sa naṗa Visena Wa lala apisa nanua sumo asape yoko Navisaarena yum̄aenia.

17 Ana p̄isi na pupia p̄ina nene kila ke naworworena pa Yesu sanene na. Lala moki la naṗa nakoneva asike amio naga pogos naṗa pio Lasaros m̄al si petan marena, ana la apa apisawal pupia kile nene pan yeririna taṗena lala, 18 ana pogos naṗa lala amloge sur la naṗa Yesu miyum̄aenia, sinelan asape avisuia, ana la apim vena ava avisuia. 19 Ana lala punu ga nene, pupia p̄ina pa tai narui, ana pogos naṗa le Varasi la apisuia, amloge piowa, asilin p̄arila, apisape “Toṗaryon yar nene pano-o piowa ga. Naga taulu ita punu ga, pure yomarava wetelu nene apa ataveve naga rui.”

Le Krik laṗasia asape avisu Yesu

20 Ana e yeririna moki la naṗa ke metava ma Yerusalem vena alotun Ntewa e p̄aṗagena nene, lala p̄asia pe ape le Yu re poli, lala le Krik la naṗa apim amlelaga e Ntewa sane le Yu lala. 21 Ana pogos naṗa amloge manene laa kia kiena ne Yesu, asape avisu naga. Apa akale, akirawal kiena nalogena naṗa Pilip nae Petsaeta ma Kalele, ana apiun Yesu tania. 22 Ana Pilip pa pisawal pa Antru, p̄isi na lalua apa apisawal pa Yesu.

23 Ana pogos naṗa Yesu mloge sape la naṗa pe ape le Yu re la poli asape avisuia, naga pisawal sape “Nanagane na pe pogos mesmesu vena Ntewa kila kiau kia, inu Narina ne Yeririna, va metava. 24 Nepisa pe lelaga pan amiu, sane visae kurus tai, visae ve amapla re, yoko naga taaga to korena ga toñā sanene. Ana visae amapla, yoko menun nena ga, ana siraunia kilia war si mras ve moki.

25 “Sanene, naga naṗa kekaran manene laa malena kiena e yomarava nini, taulu naṗa kekaran inu, yoko kilaluia, a naga naṗa pe sitom manene re naga poli, yoko naga sum̄a ga woga ga vano-o tol malena viu naṗa pe luas re poli.

26 “Yere Yu pona yere Krik naṗa sape sinenan

kiau yuññaena, sinenan sape ilanu, naga monar taveve in lue ga. Ana pogos naña naga taveve inu ke sanene, yoko e lele ya naña sa neva nesike ea, a naga mña kilia amio inu. Yar naña pe yar na kiau yuññaena, yoko Ntewa la kia wo vania.”

Yesu sunyu kana marena

²⁷ Ana Yesu siar sitomveve ke naña yoko ve ve piavi re na, monar mare, ana mloge urmi pañisi e naga. Pisi na sape “Nanagane na, nemloge sane sitomena la moki e losineu. ?Yoko nevisa ya ne va kau Ata? ?Popon nelen, neviun vetania, nesape: Ata, awis otarlua inu e aora mñarera na loge viowaena nene? Pona piowa ga naña nevisa sanene, vanon in na nepim e yomarava nini vanon nenaga yuññaena ne nanene. ²⁸ Peraga, popon nevisa ve sa ga nene, nevisave: Ata, awis okila kionña kia vim ve keviu kome sur la naña sa akila van inu.”

Ana pogos naña Yesu pisa pa visena nene, pulgo tai metava ma e peni pis pitomi tano, pisape “Inu na nekila ke kiau kia pa metava kom ga e ko rui, a yoko nekila ke sina ga na wa.”

²⁹ Ana pñina la naña asu ke lavis ga amloge mñaagena na pulgo nene, ana pñasia asape polilu ga tai, la pñas asape “Peraga, navisi ga ta ne pisi ke pania.”

³⁰ Ana Yesu pisa pan la sape “Pulgona naña temloge

ne, naga pe pitomi re sape in na neloge poli, a pitomin amiu, vena amiu akilia sane inu nepimi pe. ³¹ Monar ve sanene vañon nagane na, pe pog na liñereen yeririna na yomarava narui, pe pog na kovenluaen pñarin supe na yomarava narui naña Yermare. ³² Vena nekila yuññaena nene, monar netamalele metava e laki torovia, ana pogos naña nemke metava sanene, nekilia noure yeririna punu ga aim pun inu.”

³³ Ana visena kiena ne Yesu, naga pisa pe nakilaen imi merarava van la sane kiena marena pe marena tai naña ve sanape. ³⁴ Ana pogos naña pñina la amloge, asape “Memloge ke naña apulyu ke Visena Wa, pisa ke sape Navisaarena naga mal lue ga, tañatete mare pogos tai. ?Ana sanape naña ko na opisa ke osape yoko atelan Narin Yeririna metava vena mare? ?Pona ko na opisa ke ga tañena tai yo? Narin Yeririna ya naña opisa ke ne, naña yoko ve sanene vania?”

³⁵ Ana Yesu pisatamne pan la, pisape “Inu na nepe yomerarava kiena ne Ntewa, a nekilia nesuñña si nemio amiu yam ve plas ga. Ana pogos naña nesike nemio amiu, popon ayal e kiau yomerarava nena, visae peraga, yoko pupumalko kalo make amiu, a yar naña sape yali, tañatete visuluñar si kiena mrapa. ³⁶ Pogos naña inu naña nepe yomerarava

nene nesike ke nemio amiu wa, popon alelaga e inu, vena amiu mēna akilia aim ave yeririna na yomerarava lala.”

Ana pogos naŕa Yesu pisa pa visena la nene, naga mligan la asike, petan la pa tapolou e lele tai naŕa taŕatete aimin sina naga.

Le Israel la pe sinelan re alelaga e Yesu poli

³⁷ Yesu miyuñāen pupia kile la moki e marala rui, ana pe suri korena, lala pe sinelan re asape alelaga e naga poli.

³⁸ Ana kiela ŕelaga na sanene, akila ke sina ga sa ga naŕa le Yu marua la nasumo akila e pogos kiena ne yermarua Aisea, naŕa pisayu e visena la lua naŕa pisawalia. Nasumo pisa sanene, pisape

“Ntewa na mava, imimi mepisasawal ke pan la, ana lala pe akekaran re asape alelaga poli, a ko ko na okila meraravan kionā puriukawaena na lumōñā van la, ana lala a ne pisuluŕaria? Pe ta re poli.” Ais 51:1

³⁹ Ana na luania, naga mēna pisa sanapen lala amon lela-gaena e Yesu, pisa sanini, pisape

⁴⁰ “Ntewa ŕaryon la pano-o peraga, ŕisi na kila ga kilamarala la pimi pe kilamara ŕala, kila losinela la pimi nāarera laa paŕisi.

Pisi na kilamarala la taŕatete si avisu ruru suria, po losinela la aninuluŕar suria.

Visae pere, yoko la avilon la aŕasuŕe la aim pa panu rui, vena nekila ruru kiela malena la.” Ais 6:10

⁴¹ Ana visena kiena Aisea nene pimi e naga, siraun naŕa naga pisu naurarena kiena Navisaarena loyuñā e Yuñā Wa Mana ne Ntewa, a nanagane na tepisu sane pisayu ga Yesu lelaga, amio lala naŕa e kiena pogosia.

⁴² Ana sa naŕa visena la nene pisa, lala moki pe amlelaga re e Yesu poli, ana ŕasia amlelaga, pa tol mēna kiela nasumonena laŕasia. Na nene naga po, ana sur taaga naga piowa, akilawan ke ga kiela nalelagaena, vanon amaraun Varasi lala, amaraun asape sa akoven plan la laea vetan kiela yuñā na lotena. ⁴³ Kiela mara-ruena nene, naga sane lala pe asitom re si nakilaena vena yoko Ntewa kekaran la vanonia, ana lala asitom ke ga keviu sane yar taŕena ga la avisu la ve sanape.

⁴⁴ Ana Yesu pisawal pupia visena maro tai e maran kiena yeririna lala, pisape “Naga naŕa mlelaga e inu, pe mlelaga re ga e inu poli, ana mlelaga e imimi lua naga naŕa mligan inu nepimi, ⁴⁵ a naga naŕa pisu nu ke, sa ga naŕa pisu ke mēna naga. ⁴⁶ In na nepim e yomarava nini, sane kana yomerarava, na kilaen yar ai naŕa lelaga

e inu, yoko ve su re si e yemalolo. ⁴⁷⁻⁴⁸ Ana visae la p̄asia aloge kiau visena, ana pe amlogear re poli, pona visae la p̄asia akovenwanu amon logeen kiau navianena lala, la nene yoko akus kiela nali p̄ereena e legiena maro. E pogos nene, ve in re na p̄a nesu m̄alu neli p̄ere la, vanon in na pe nepimin re nali p̄ereen re yeririna na yomarava nini poli, nepimin natamaliaena. Ana sur na p̄a li p̄erela, nane kiau visena la na p̄a nepisa ke pan la pogos na p̄a nesike nemio la nagane narui. ⁴⁹ Kiau visena kilia kila sanini, vanon pogos na p̄a nepisa plan ke visena la nene, in na pe nepis re ga e kiau kia in ga taaga poli, ana nepis ke e kia kiena ne Ata na p̄a mligan inu nepitom tano. Naga ga pisa plan ruru pan inu sur la punu ga na p̄a pe kiau na visaplanena, ⁵⁰ ana sanene, silaga in na nepisa ke sur punu ga na p̄a Ata sinenan pisape nevisa. A kiena navisaluaena punu ga nene, nekilia sane malena wo na p̄a pe luas re e poli, sike ga e lala.”

13

Peni na luas nen malena kiena Yesu, ana naga kevan lana ne kiena nalogenena lala

¹ Nanagane na, sur la punu ga akila ruru pa rui, na p̄a peni ga na pupia legiena na p̄a Pa p̄agena na Sitom̄alen na Tamaliaena

siaria. Ana Yesu pisu kilale ke pa rui sane kiena pog pimi ke narui, legiena ga na peni pe pog na p̄a monar ligan si yomarava nini wasu p̄e sina va puna ne arimana. Pimi tol pogos nene, e mrapa la moki, naga kila po pa p̄isi pan la na p̄a puna na p̄a asike pa e yomarava nini, sitom la pa p̄isi, a nanagane pe pog na sitom laen va ve keviu laa sane, vano-o tol na p̄a kiena malena kovio vanon la.

² Ana naga sike amio imimi kiena nalogenena lala e yo ma metava, kila ke kana kinanena maro amio imimi. A Sutas na p̄a nae Kariot ne, narina ne yermarua Saemon, naga m̄ena sike ke amio imimi e pogos nene, naga sike amio kiena sitomena viowa na wilwilinwanen Yesu, komin na p̄a Yermare mligan teke e kiena sitomena rui. ³ Ana mekinana m̄a pano-o p̄isi na Yesu naga sitomveve ke sanape na p̄a nanua sumo, petan ma puña Ntewa pitomi tano, a sanape na Ntewa mligan sur punu ga sike e limana, a sanape na p̄a monar tauluia, sir-aunia naga kilia vetan si yomarava nini va sina puna.

⁴ Naga mloge pupia sineyeena e losinena vanon imimi kiena nalogenena lala, sinenan sape kila kile tai e sineyeena nene van imimi, vena imimi m̄ena ga mekilia mekila van imimi. Ana su m̄alu, pa miyenlua m̄ana kulkota, pitavin tawol tai, ⁵ pio wii m̄ene pialo tai, kus pimi,

siar kevan lamimi lala, kila naga sane pe yar na yuñae kiamimiena tai. Kevan ña lamimi la sanene pano-o, miyumuvan la e tawol naña pitavin ke ne, ⁶ pano-o pimi tol lana ne Saemon Pita. Ana Pita pisu ña naña naga pimi tolia, pisa pania, sape “?Suñe, yar nene? Ko na ope yerkawa pañisi wa, pe mesmes re naña ko na okevan lau sanene poli.”

⁷ Ana Yesu pisatañea, sape “Pita, sur na nekila ke ne, nanagane na pe opisus kilale re poli wa. Ana siraunia, ko na okilia ovisu kilale ruru ga na wa.”

⁸ Ana Pita sinenan sape kilawo Yesu wa, sape “Peraga Suñe, tañatete ga netañan okevan lau.”

Ana Yesu pisape “Visae ve nekevan ruru ko re, pe kiau sur re tai teke e ko poli.”

⁹ Ana pogos naña Pita mloge nene, kiena sitomena pe tañena narui, pisa pa Yesu sape “!Suñe, visae ve sanene, netañan ga, sineun nesape okee inu, ane ve lau re ga, okee inu punu ga va tol ñena lumñau lala amio ñaruu!”

¹⁰ Ana Yesu pisatañe pa Pita e narin ñakaiwa tai naña pisayu ñelaga naña yaru mekiki e kiena mlamulena viowa lala. Naga sape “Yar naña kulu mare ga na wa, yepena punu ga merarava rui. Ana visae lana ve namname sina, ana tañatete naga va kulu punu

sina ga, yoko naga kevan ga lana. Ana nepisu sane amiu sanene narui. Amiu punu ga amerarava ruru pa rui, a amiu yar ga tai naga pe sa re nene poli, naga pe namname ga moña ga.” ¹¹ Ana Yesu pisa sanene, sape pe imimi punu re memerarava poli, vanon naga kilia pa rui imimi yar tai naña yoko ve yam ve piavi re na naga wilwilinwan naga.

¹² Ana Yesu kevan lana Pita amio imimi tañena lala pano-o ñisi, pa miyen sina ga ñana kulkota, totano piuntan imimi, pisape “? Amiu apisuluñar ke yuñae naña nekila pan amiu ne, po peraga? ¹³ Sur nene naga sanini. Pogos naña amiu apio inu ke asape nepe Navianena pona nepe Suñe, amiu na apisa pe lelaga ga. ¹⁴ Ana visae apisu naña inu kiamiu Navianena po kiamiu Suñe nekevan lamiu, popon amiu ñena akekevan ke lamiu lala, amiu akilakila ñelaga wo la sanene van amiu silaga. ¹⁵ In na nekila sanene pan amiu, vena amiu na yoko ataveve maran taaga e legiena la naña pimi ke ne, naña amiu ga akila si van amiu sane in na nekila pa pan amiu rui. ¹⁶ Nepisa pe lelaga pan amiu, sane yar na yuñae naga tañatete to metavan kiena yerkawa, po yar na warden visena naga ve to re metavan naga naña mligan naga pano. ¹⁷ Ana

visae amiū avisu sane kiau visena la nene pe lelaga, a visae amiū akila ke sur la naḡa nepisa, yoko pupia navisa ruruena vim van amiū sirau.”

Yesu pisawal sape yoko Yutas wilwilin wan naga

Matiu 26:22-25; Mak 14:17-21; Luk 22:21-23

¹⁸ Ana Yesu pisape “Nepisa sanene, a pe nepisa amiū punu re poli, komin ita yar ga tai naga sike ne, naḡa naga kiena sitomena pa pe taḡena pa rui. Lelaga, in na nekilia ruru amiū punu ga naḡa nekilogia amiū, ana nekilia nesape amiū yar tai yoko kila mesmes ga sa naḡa Visena Wa pisawal nanua rui, naḡa pisa sanini, sape *‘Naga naḡa imimi lua makan pae kau kilaparavi, nanagena na naga tarlua pa lana rui vena vielua inu!’* *Yauena 41:9*

¹⁹ “Sur nene naga piowa ga, ana nesape nevisawal van amiū sumo wa, ana pogos naḡa avisu sina ga ve yam piavi re na, akilia alelaga asape inu na lelaga, in na naga naḡa mon lue. ²⁰ Nepisa pe lelaga pan amiū, yar naḡa porworun yar na waren kiau visena naḡa nemligan naga piḡnasu, naga sa naḡa porworun inu ke ne, a naga naḡa porworun in sanene, naga sa naḡa porworun ke naga naḡa mligan inu nepimi.”

²¹ Yesu naga pisa pae visena nene pan imimi,

ana siar mloge naḡa sinena pulen naurmiena lala, pano-o pisawal meraravan ga e maramimi, pisape “Lelaga nepisa pan amiū, yoko amiū yar tai wilwilinwan inu.”

²² Ana pogos naḡa naga pisa sanene, imimi memilania, mesuḡa metamaren imimi ke sina ga, memninue ga mesape naga pisa ke imimi a ne. ²³ Ana e pog nene, inu Yoane, sane nalogena naḡa Yesu sinena sii inu paḡisi, inu netotano ke ga lavisin naga, ²⁴ ḡisi na Saemon Pita kila limana pan inu, sape “Wolai, ko na oviunli ga tania, ovisave naga pisa ke ai.”

²⁵ Siraunia nepa la lavisi tekaki ga, nekian ḡaruu pa laa lavis puna ne Yesu, nepi-unlili tania, nesape “?Suḡe, ko opisa ke imimi ai?”

²⁶ Ana Yesu pisataḡea, sape “Nepisa ke ga naga naḡa narin kinakina kilaparavi nene, nowuton vito e ḡata pursi, ana nekian vania.” Ana naga kila sa ga naḡa naga pisa, mla kilaparavi tai, kian pito e ḡamimi pursi, ana mlalua mla pan Sutas, narina ne yermarua Saemon nae Kariot. ²⁷ ḡisi na Sutas mla kania, ana veraga ga, Yermare pimi pa loyūḡa e naga. ḡisi na Yesu pisa pania, sape “Pogaga, sur naḡa pe kioḡa nakilaena, oto vilaga okilalia wa.”

²⁸ Ana e imimi taḡena la naḡa metotano ke e kina-

nena nene memio Yesu e pog nene, pe imimi yar ta kilia re poli, sane vanon ya ne Yesu pisa visena nene pan Sutas. ²⁹ Imimi p̄asia asitom amape vanon Sutas naga pisuar ke kiamimi karo, ana Yesu mi-ila vena va ul kamimi kina-nena yo, pona va la kilavaru tai van la naña pe kiela sur re poli, pona sur tai ne sanene. ³⁰ Ana Sutas naga kilia ruru ga sur ya naña Yesu pisa ke pania, ana ve-raga ga suñalu pa si vanua, naña sane yemalolo pa rui.

Navisaluaena viu na sine-siena

Matiu 26:31-35; Mak 14:27-31; Luk 22:31-34

³¹ Ana pogos naña Sutas pa pae vanua, Yesu siar pian imimi ke sina ga e sur la moki. Naga pisa pan imimi, sape “Nanagane na pe pog na naurarena kiena ne Narin Yeririna vim kate, nanagane na pe pog naña yoko naga kila naurarena kiena ne Ntewa vim ve keviu laa sane. ³² Ana sur ya naña yoko naga yuñañenia, kila kia kiena ne Ntewa va metava, siraun naga nene, ve ve viavi manene re, yoko Ntewa visirlua sina inu narina, kila mēna kiau kia va metava.

³³ “Naruu lala, narin aora ga teke na, naña nekilia nesike nemio amiu wa, lavis ga naña monar neligan amiu. Pogos naña amiu avisu in na nevetan amiu pae na, yoko asape akalenukia ko laa ne, ana sur

naña nepisa pan yerkawa kiena ita le Yu tañena lala, nevisa mēna si van amiu, sane lele naña in na yoko neva ea, amiu tañatete asiraunu aim e nanagane. ³⁴ Ana nanagane nesape nela si navisaluaena viu tai van amiu, sane amiu monar sinemiu sisii manene amiu, va laa sanene ve sa ga naña sineu sii amiu. ³⁵ Ana visae sinemiu sisii amiu ke sanene, naga nene pe mrapa nakilaen yeririna nae yomarava la avisu kilia sane amiu ape kiau nalogena kemua la pe lelaga.”

³⁶ Yesu pisa pae pupia visena nene pan imimi narui, ana Saemon Pita sitom̄al ke sina ga naña Yesu sape ligan imimi, naga piunia sape “Ana Suñe, ko na yoko okom pe?”

Ana Yesu pisatamēna, sape “In na nepa ke e lele tai naña amiu tañatete asiraun inu aim e na wa, ana akilia ga aim e sirau.”

³⁷ Ana Pita mloge, piun sina ga, pisape “Suñe, sanape in na tañatete neim nemio ko ke nanagane? In na nekekan ga netam̄an kiau malena vanon ko nanagane.”

³⁸ Ana Yesu pisa pania, sape “Ko opisa osape otam̄an ga kiom̄a malena vanon inu? Pogaga, ana nevisa ve lelaga van ko, p̄ane ga ne kole-malko, pogos naña lakaporo ve kokoreko re wa, ana ko na oviro inu yam ve telu pa

narui osape pe ope kiau re poli.”

14

Yesu mla visena na kila luṭeluṭeena pan kiena nalogena lala vena ve aloge manene re viowa

¹ Ana Yesu pisu naṭa imimi nalogena la memloge piowa naṭa naga monar vetan imimi, ṭisi na pisa pan imimi, sape “Amiu ve akila re naṭa sinemiu viowa manene sanene. Aṭasine Ntewa rui, ana monar awasine in mēna ga. ² Sa naṭa nepisa pa ṭa rui, neva nekila ruru lelemiu metava ma puna ne kau Ata, ana metava ma māna yuṃa, lele moki sike ea torokin amiu punu ga. Visae ve ve lelaga re, ve nevisa re van amiu. ³ Neva nekila ruru lelemiu nene, ana sir-aunia, nowasuṭe sina, netom tanon amiu, noure amiu avam punu, asulue ga amio inu e lele naṭa yoko nesike ea. ⁴ Ana mrapa naṭa na vaen tol lele naṭa nepa ke ea, amiu akilia pa rui.”

⁵ Ana Tomās piun petania, pisape “Suṭe, imimi memninue ga lele naṭa ko opisa ke osape ova ea, ana sanape ne yoko mekilia mrapa na vaen ea?”

⁶ Ana Yesu pisape “In na nepe purṭes nen mrapa, in na nepe purṭes nen lela-gaena, in na nepe purṭes nen malena. Pe yar re tai kilia va ma puna ne Ata sa ve kom re pun inu. ⁷ Visae amiu apisu kilale inu, asape

in na nepe ai, naga sa ga naṭa apisu kilale mēna Ata. Ana nanagane, amiu apisu ke pa naga narui, sane siar na ne ṭane, amiu akilia naga ve lelaga.”

⁸ Ana Pilip piun petania, sape “Suṭe, sur ne naga ke nene narui naṭa sineminia, mesape mevisu Arimata. Awis, sa ko na ovisa lologia li naga van imimi, yoko mekekarana vaṭisi.”

⁹ Ana Yesu pisataṃea, pisape “? Pilip, nesike nemio amiu tol kas via rui, ana ko pe opisu kilale ruru re in poli wa? Sa naṭa nepisa ke pa rui, yar naṭa pisu inu, naga sa naṭa pisu ke pa Ata narui. ?Ana sanape na ko opiun ke sina ga osape nevisa lologia li Ata nae ma e peni van amiu? ¹⁰ ?Ko na omlelaga sane inu, in na e Ata, a Ata e inu, po ko na pe omlelaga re e poli? Visena la naṭa nepisa ke pan amiu la, pe sa re naṭa inu ga taaga ne nepis ke e kiau kia poli, ana Ata naṭa teke e inu naga kila ke kiena yuṃaena la nene pimi ṭarpoyo e inu. ¹¹ Popon amiu alelaga e sur la naṭa nepisa, sane in na e Ata, a Ata na e inu. Visae ve alelaga re e inu vanon ga kiau visena la nene, monar alelaga ga vanon yuṃaena la naṭa amiu apisu in na nekila ke pa rui.

¹² “Nepisa pe lelaga pan amiu, sane yar naṭa sa lelaga e inu, yoko naga mēna kilia kila yuṃaena la sane in na nemiyuṃaen ke ne.

Yoko neligan si yo neva si puna ne Ata, ana siraunia neligan Ninuna vitomi, ana naga kilia kila kile kerkeviu la sanene, taulu naþa amiu apisu pa rui. ¹³ Nepisaar pan amiu, sane sur ya ne aviunia e kiau kia, yoko in na nekila ga van amiu. Yoko nekila ga ve sanene vam amiu, vena kilaen kia kiena ne Ata naga kilia va laa metava ve keviu likan amiu, e yuñæna la naþa inu, sane narina, nemiyuñænia. ¹⁴ Sanene na, sur ya naþa aviun tan inu, yoko nekila van amiu.”

Yesu pisaar Ninuna Wa pan la

¹⁵ Ana Yesu pisa mēna pan imimi, pisape “Visae amiu sinemiu sii inu pe lelaga, monar auarar ruru kiau navisaluaena lala. ¹⁶ Yoko in na ve nesu re si nemio amiu, ana yoko neviun tan Ata vena ligan yar taþena tai vim kus leleu vena iila amiu. Naga naþa yoko imi, yoko sulue ga amio amiu, ¹⁷ naga pe Ninuna na visawalen visena lelaga. Yeririna na yemalolo na yomarava nini taþatete atol naga, vanon taþatete akilia avisu kilale naga, pe akilia re nena, ana yoko amiu akilia ruru naga vanon naga ke narui naþa amio amiu nana-gane, a yoko sike lue ga e amiu.

¹⁸ “Kiau nalogena lala, taþatete neligan kare amiu naþa asuñæ sane ninuyu ga la poli. Peraga, yoko nowasuþe si neimin amiu.

¹⁹ Narin aora teke ga wa, pe piavi re nena, yoko yeririna na yomarava nini taþatete avisu in sina. Ana amiu ga yoko avisu naþa in na nemal sina ga, ana vanon naþa nemal, amiu mēna yoko amal. ²⁰ E legiena nene naþa avisunu nemal sina, amiu akilia sane in na e Ata, a amiu e inu, a in na e amiu. ²¹ Naga naþa sinena sii inu pe lelaga, naga pe naga naþa þuarar ruru kiau navisaluaena lala a mlogear la. Naga naþa sinena sii inu sanene, yoko Ata sinena siia, amio in mēna sineu siia, nakekaten ke naga vena nekila naga kilia inu laa sane.”

²² Ana imimi nalogena tai, naþa Yutas taþena, pe naga re naþa nae Kariot poli, piun tan Yesu, sape “Ana Suþe, osape oim okekaten imimi, ana yoko okila e mrapa na sanape naþa yoko yeririna taþena la nae yomarava taþatete avisu kilia?”

²³ Ana Yesu pisatamēna, pisape “Visae yar sinena sii inu, yoko uarar ruru kiau visena lala, ana yoko Ata sinena sii naga. A yoko imimi lua meim puna, mekila māmimi uñæ memio naga e kiena malena, ana yoko taþatete ve sanene va la naþa pe amlelaga re poli. ²⁴ Ana yar naþa pe sinena sii in re poli, naga taþatete logear ruru kiau visena lala. Naga nene navisatamēna na kiamiu naviunena nene, ana e visena naþa amiu amlogear

ga nagane, pe pe kiau visena re nene poli, naga pe visena kiena ne Ata naña mliganu nepitom e nini.”

²⁵ Ana Yesu pisape “Pogos naña nesike nemio amiu wa, in na nepisa ke sur la moki sanini pan amiu rui. ²⁶ Ana pogos naña sa nevano, yoko Ata ligan Ninuna na iilaena vitomi, ana naga yoko kus leleu, vian amiu e sur punu ga, ana ligan nasitomālena e kiau visena la punu ga e kiamiu sitomena lala. ²⁷ In na nevano, ana neligan suñarena sike amio amiu. Suñarena kiau nene pe suñare nowo tai naña yomarava nini tařatete la van amiu. Ve sanene na, ve akila re naña sinemiu viowa manenea, a ve amaraun re sur lala. Amiu ve asitom manene re, ²⁸ kome monar ve sa ga naña nepisa pa pan amiu rui, nesape in na neure kone wa, ana yoko neim si pun amiu. Pona amiu aloge viowa naña nevano, ana visae sinemiu sii inu, popon amiu akekara manenea naña nekilia neva sina puna ne Ata, naña naga to laa metavan inu keviu pařisi.

²⁹ “Sur la punu ga nene pere wa, ana nanagane na nepisawal ruru pan amiu rui. Ana pogos naña avisu imi mālivī torokin nena ga sa naña nepisa, ana řisi na akilia alelaga ga sane nepe lelaga.

³⁰ “A nanagane, tařatete nevisa si sur ve moki van amiu, vanon řarin suņe

naña pe řarin suņen ke yomarava nini nagane na, pimin inu ke pa rui. Ana yaru nene, puriukawaena kiena pe torokin re taulu kiau puriukawaena poli, ³¹ ana netamān inu ga e limana, monar nekila ga sur ya naña Ata sinenan sape nekila. Nekila sanene, vena yeririna na yomarava nini avisuluřaria sane sineu sii la.

“Poga, kana pog narui, tesuñalu teva vanua.”

15

Yesu pe purřes nen kilka naña lelaga

¹ Ana e pog naña memial mepano, Yesu pisa ke sina ga visena řas pan imimi. Naga pisape “In na nepe purřes nen kilkerep naña lelaga, a Ata naga pe yar na visuaren lokove na kilika lala. ² Naga pisuar ruru ke korowasneu lala, visae visu korowas tai naña řar re mras poli, naga telua, a visae visu tai naña řar mrasa, yoko kilavan ruruia vena war si mras ve moki. ³ Sur nene nekila pan amiu rui, naña sane sur naña kilavan ruru amiu, naga kiau visena la naña nepisa ke pan amiu. ⁴ Amiu na korowasneu lala, monar ayakolkol ruru amiu e inu, a in na neyakolkol ruru nemio amiu. Visae korowas nen kilka ve yakol ruru re amio purřesia, tařatete war mrasa, a maran taaga ga amio amiu, visae ve ayakolkol ruru re amio

inu, yoko kiamiu malena taĉatete nena war mras napo lala.

5 “In na nepe purĉes nen kilika, amiu na ape narin korowasneu lala. Naga naĉa sikol e inu a nesikol e naga, naga ke naĉa yoko kiena malena kilia war mras ve moki, vanon sa ve in re e amiu, taĉatete nena akilia akila sur tai naĉa po e marana ne Ntewa. 6 Visae yar tai ve sikol re e inu, naga sane korowas tai naĉa pimi mano pa rui, atelua awar akoven va e kapi, kapi kekania. 7 Visae asu ruru ĉa e inu, a kiau visena to ruru ĉa e amiu, sur ya naĉa sinemiun asape aviunia, akilia atolia. 8 Popon amiu awar mras la ve moki e kiamiu malena lala, naga nene mesmesun kiau nalogena la asumĉa akila, a pe mrapa ĉena nakilaen kia kiena ne Ata va manene laa metava. 9 Ata sinena sii inu paĉisi, ana vanon naĉa sinena sii inu, inu ĉena sineu sii amiu, ana popon amiu asikol ruru amiu e kiau nasinesiena nene.

10 “Visae auarar ruru kiau navisaluaena lala, akilia asumĉa loyuma e kiau nasinesiena nene, sa naĉa in na nepuarar ruru ke pa rui navisaluaena kiena ne Ata, nesike pa loyuma e kiena nasinesiena rui.

11 “Ana sur la naĉa nepisa ke pan amiu, nemla pan amiu vena kiau nakekarena

sike amio amiu, kila pupia kekarena tai naĉa po na po kilia sulue ga amio amiu silaga. 12 A kiau navisaluaena maro tai nalaen van amiu sanini, sane amiu monar sinemiu sisii amiu lue ga, sa naĉa in na sineu si amiu ke ne. 13 Pe sinesiena re si tai poli naĉa po taulu na sinesiena naĉa yar tai taĉan kiena malena, mare vena tamalia kiena erau tai. 14 Ana yoko in na nekilia nekila ve sa ga nene van amiu, vanon visae alelaga e kiau visena lala, yoko ave kiau erau la rui.

15 “Pe nepio amiu re sina nesape kam yar na yuma e kiauena ga lala poli, vanon yar na yumaena naga miyuma e ga, pe kilia ruru re navisaarena na yumaena kiena ne kiena suĉe poli. Ana in na nepisu amiu ape kiau erau lala, vanon sur punu ga naĉa nemloge Ata pisa pan inu, nepisawalia pimi merarava pan amiu. 16 Amiu pe apisa lologia in re poli asape nepe kiamiu, ana in na nepisa lologia amiu ape kiau, nepisirlar amiu vena ava awar mrasa e kiamiu malena lala, mras naĉa sulue ga sike na rui. Ana pogos naĉa ava ke sanene, sur ya naĉa aviun e kiau kia van Ata nae ma peni, yoko naga la ga van amiu. 17 Na nene kiau navisaluaena van amiu naga sanini, sane amiu monar sinemiu sisii amiu.”

Lala naña na yomarava nini yoko sinela kar nalogena kiena Yesu lala

18 A Yesu pisape “Visae yoko avisu sane yaru na yomarava la naña pe amlelaga re poli, sinela kar amiu, ve ailan manene re. Monar asitomāl mā naña lala na yomarava nini sinela kar inu sumo rui, p̄isi na sinela kar mare amiu m̄ena ga ne. 19 Visae amiu ave sa ga yeririna na yomarava nini, yoko akekaran amiu ga, ana in na nekilologia amiu pa rui nesape aure vetan malena na yomarava nini. Kam na pe maran taaga re si sane kiena yar la poli, kila sane sinela kar amiu narui. 20 Ana popon amiu asitomāl lue ga visena naña nepisa pan amiu rui, naña nesape yar na yuṁaena taṣatete sukalawan kiena suṁe. Visena nene kana kinasia sape sa ga naña akila piowa ga akila karenu, yoko akila viowa akila kare amiu m̄ena. Sa ga naña la pe amlogear re kiau visena la poli, yoko ve alogear re m̄ena kiamiu visena lala. 21 Pelaga viowa na sanene yoko akila van amiu vanon ga naña amiu ape kiau, akila vanon pe akilia re naga naña mligan inu nepitom tano.

22 “Visae ve neim nevisa meraravan re sur la nene e marala, yoko Ntewa visu sane lala pe akilaro re kiau visena poli. Ana nanagane na, amloge kiau visena la

punu ga rui, ana taṣatete avisawan si visena tai e kiela naviowaena naña akila p̄arm̄arera van Ntewa. 23 Lelaga, akila p̄arm̄arera pa Ntewa rui, vanon naña apieluen inu, ana naga sa naña apieluen m̄ena Ata. 24 Visae ve kiau kile re la naña apisu nekila, naña pe yar re si tai naña kilia kila, pona Ntewa yoko ve visa re sape naviowaena sike e la. Ana pere, apisu pa rui, ana pe amlelaga re ga poli, aṣaryon nakilaen navielueena pan imimi lua Ata. 25 Sur nene mesmesun ga visena tai naña Ntewa mligan teke e Nasiriena Wa, naña sape

*‘Sinela kar nu paṣisi, ana per-
aga, pe panon re kiau
naviowaena tai poli.’
Yauena 35:19, 69:4*

26 “Ana nevisa van amiu, sane yoko neligan Ninuna na iilaena vetan Ata maya vitom m̄alivin amiu, naña pe Ninuna naña molue e malena kiena ne Ntewa, naña pe Ninuna na vi-sawalen nalelagaena. Naga vitom visawal inu re laa van amiu sane, 27 ana siraunia, amiu m̄ena monar avisawal manene inu va laa sane van yar taṣena lala. Na nene komin naña amiu la nene asu lue ga amio inu silaga siar e nasiarena kiau yuṁaena pimi tol nanagane.”

16

1 Ana Yesu pis mā ke

pan imimi kiena nalogena lala wa, sape “Visena la nene, nepisa ke pan amiu ve nauarar ruru amiuena, vena kiamiu viawaena ve lor re pogos tai.

² “Pe lelaga, monar akilia asape kieta yerkawa lala yoko akoven plan amiu vetan kieta yumã nalotena lala, ana yoko viowa laa sane van amiu vano-o tol pogos naþa sane sa awe monar amiu, ana yoko la avisa asape nanene yumãena wo tai nene, ana akila vena Ntewa kekarania. ³ Yoko la akilia akila ve sanene van amiu, komin pimi tol nagane pe akilia ruru re Ata nae ma e peni poli wa, a pe akilia ruru in re m̃ena poli.

⁴ Ana siraunia, pogos naþa avisu sur la ne imi kakate ke ve sanene van amiu, akilia asitomãl sina ga, ana yoko avisa asape ‘Lelaga ga o, nanagane na tepisu sur la nene sa ga naþa Suþe pisa pan ita nanua sumo ne.’”

Yesu pisa sape Ninuna Wa yoko iila la

Ana Yesu pisape “Sur la nene pe nepisa re pan amiu sumo poli, komin e pogos nene nesike nemio amiu wa. ⁵ Ana nepisa ga na wa van amiu komin yoko ve viavi re na, monar neligan amiu, neva sina puna ne naga naþa sumo na mliganu nepitom. Nepisa lili m̃a sanene pan amiu rui, ana nepisu sane pe apiun manene re si lepas nene tan inu poli, asape nekom pe po

neva e yo na sanape, ⁶ vanon pogos naþa nepisawal ne-sape monar neligan amiu sa nene, amloge piowagan paþisi ne. ⁷ Ana peraga, monar ve sa ga nene. Nepisa pe lelaga pan amiu, po manene laa pan amiu naþa nevetan amiu, komin naþa visae ve neva re, yoko Ninuna na iilaena taþatete imi, ana sa nevano, yoko neila naga vitomin amiu. ⁸ Ana Ninuna nene, pogos naþa vitomi, kila pupia yumãena tai e yeririna na yomarava nini, kila la asitom kilia pupia sitomena þasia, tai e lepas na kiela mlamulena viowa, tai e lepas na kiau mesmesuena, a tai e lepas naliþereena kiena ne Ntewa pan la.

⁹ “Na sumo, Ninuna nene yoko kila la avisu kilia sane purþes nen kiela mlamulena viowa, naga kiela þelaga na yepela mavin vatanon inuena.

¹⁰ “Nalua, Ninuna nene yoko kila la avisu kilia sane in na pe nekila re suri viowa tai poli, nemesmes nenaga. Inu netorokin naþa nekilia neva si metava puna ne Ata, ana yoko ve alual inu re sina.

¹¹ “Natelu, Ninuna nene yoko kila avisu kilia sane Ntewa kilia liþere la, sa ga naþa mligan ruru pa naliþereena kiena suþe viowa naþa pe þarun ke yomarava nini nanagane.

¹² “Sur la moki sike na wa naþa nekilia nevisa van amiu, ana nepisu amiu amloge piowa sanene, taþatete

nevisawal van amiu nanagane. ¹³ Ana pogaga, vanon sirau, pogos naña Ninuna na visawalen lelagaena vim pun amiu, yoko naga kilia sumon amiu, atol visena nalelagaena taņena la nene. Visena na lelagaena la naña naga vian amiunia, taņatete visa ga e kiena sitomena naga taaga, ana sur la naña loge ma e peni, naga ga nene visawal van amiu. Ana yoko kila sanene vano-o tol naña naga kilia vian amiu ruruia e lepas na sur la naña amolmolue e inu ve yam piavi re. ¹⁴⁻¹⁵ Naurarena la punu ga naña kiena ne Ata, pe kiau mēna, ana Ninuna war kiau visena lelaga imi ligan ruru e kiamiu malena lala. E mrapa ne nanene yoko Ninuna naga kila mesmesun kiena yumāena, naña pe nayeluaren kiau kia.”

Pupia kekarena nawa-supeena kiena Yesu

¹⁶ Ana Yesu pisa mēna pan imimi, pisape “Ve yam viavi re na, yam ve plas ga, ana yoko ve avisunu re sina, ana yoko ve yam viavi re sina, akilia avisunu sina ga.”

¹⁷ Ana imimi nalogena la memloge visena nene, mepisa lelein pan imimi mesape “Ita pe tekilia re nena ga sur la naña naga pisa ke ne. Nanua sumo ne, pisa ke sape wasuņe sina va su si amio arimana ma e peni, ana nanagane na sape yam ve viavi re na, tevisu re si naga, pīsi na yam ve viavi re na, tevisu sina ga. ¹⁸ ?

A narin aora naña pisa ke ne, kana kinasia yara? !Pe tetol re nena kiena sitomena poli!”

¹⁹ Ana Yesu kilia sane sine-mimin mesape meviun meraravan sur la nene tania, naga pisawal pēsania, pisape “?Pona amiu apiuyun ke sina ga pan amiu e lepas nen kiau visena lala yo?”

²⁰ Pogaga, nevisa ve lelaga van amiu sanini, sane yoko amiu atagi, aloge viowagan ya naña yoko lala akila van inu, ana yoko yeririna taņena lala na yomarava akekarania, aloge won vaņisi. Yoko sinemiu la ulen naloge viowaena vano-

o, ana pīsi na, nemali sina ga vetan marena, ana avisu inu sina, a yoko kila kiamiu naloge viowaena nene vilonia imi ve nalogewoena.

²¹ Naga sa ga pogos naña sira mēņena, naña sa tol kana aora nena, mēņena laea naga monar loge viowagania vano warlua. Ana pogos naña p̄ar pa na, pe sitomāl re si kiena naloge viowaena poli, ana naga pulen kekarena vanon kiena sisi tomtom naña paeme mare ga pimi yomarava.

²² “Ana pīsi na amiu ve sa ga nene narui. Nanagane na sinemiu la ulen nasineyeena keviu, ana siraunia in na neņalivin amiu si na, akilia akekara sina ga e pupia kekarena tai naña taņatete yar tai lalua sina ga vetan amiu pogos tai. ²³ Ana e pogos naña neimi neņalivin

amiu, pona amiu asitom asape popon sa aviun sur ve moki vetan inu, ana tařatete ga, sur la nene pe naviunen re tan inu poli, akilia aviun mesmesun ga tan Ata ma e peni. Akilia aviun tania e ga e kiau kia, ana řisi na naga kilia tamān van amiu. ²⁴ Pimi tol nanagane na, amiu pe apiun re sur e kiau kia poli, ana siar ga nanagane na, sa aviunia e kiau kia, řisi na atolia, ana kila sinemiu ulen kekarena.

²⁵ “Pimi tol nanagane na, nepisa ke sur la pan amiu e ga e řakaiwa, ana aora pimi ke narui nařa ve nevisawan re si van amiu, nevisayu Ata ma e peni van amiu, nevisa plan meraravan sur punu ga van amiu. ²⁶ Ana e pogos nene, ve in re ga nařa neviun ke sur lala van Ata vanon amiu, ana amiu ga akilia aviun mesmesun vania e kiau kia. ²⁷ Amiu akilia aviun mesmesun ga vania, vanon naga pisu amiu ke nařa sinemiu sii inu, naga kilia ke nařa amlelaga e inu sane nepetan ma puna nepitom tano e yomarava nini. řuri nene kila sinena sii amiu pařisi, kekaran ga na yagoganen kiamiu naviunena lala.

²⁸ “Ana e lepas na lele nařa nepa ke ea, nekilia nevisa ga sa nařa nepisa ga řisi ne, sa nařa nepetan ma puna ne Ata nepitom e yomarava nini, ana řisi na nevetan si yomarava nini, nowasuře si ma umā puna.”

²⁹ Ana mepisatamea, mesape “! Suře, nanagane na ve ovisawan re si kiořa visena e řakaiwa lala! Pogos nařa opisa meraravan sur la sanene mepisu po pařisi. ³⁰ Memloge kiořa visena lala, mepisu kilia sane ko na okilia sur punu ga, pe kiamimi naviunena re si naviunena tan ko poli. Lelaga, nanagane na memlelaga mārera sane pe lelaga, ko na opetan Ntewa opitom e yo nini.”

³¹ Ana Yesu pisatame la, sape “Ana yo. Pona amlelaga e inu pe lelaga? ³² Popon alelaga mārera, vanon aora nařa nepisa ke ne, pimi ke narui, ana visae pere, pimi pa yo rui. E pogos nene, ameřene amiu ali-ureure amiu, po amiu awasuře amiu veve taaga sina e māmiu umā lala, tařatete tai sike si amio inu, yoko inu ga taaga nesike. Ana nanene naga pogaga pan inu, vanon nekilia sane inu, pe in ga taaga re nesike poli, ana Ata na amio inu lue ga. ³³ Nepisa sanene pan amiu vena ve sinemiu kurkur re, a vena ve aloge re viowa. Pe lelaga nařa kiamiu malena e yomarava nini, ulen ga naloge viowaena amio pog mārera, ana in na netaulu pa naviowaena na yomarava nini rui. E kiamiu malena la e inu, yoko alual luen ga sumārena wo.”

17

Pupia leniena kiena ne

Yesu

¹ Ana pogos naña Yesu pisa pa visena la nene, sape len va arimana. Kira pa metava ma e peni, pisape “Ata, nekilia sane nanagane na kiau pog na loge viowaena pimi narui. Awis, ovisuar inu naruña, vena kiau kia ve vito re tano, ana va metava, yoko inu mēna ga nekilia nevisirlua kionña kia va metava.

² Nemlelaga sane ko na okila sanene, vanon omla pupia puriukawaena pan inu rui, vena neve suñen yeririna punu ga. Ana otamān pan inu osape la naña omligan la e limau, yoko nekilia netamān malena naña ve uro re pogos tai van la.

³ Ana mrapa na malena naña ve uro re pogos tai naga sanini, naña akilia ko, naña ope Ntewa taaga ga naña pe lelaga, amio mēna inu Yesu Kristo naña omligan inu nepitom. ⁴ In na nemligan ko nepitomin nakilaen kionña kia ve keviu e yomarava nini, ana nemiyuñāen mña sur nene pano-o p̄isi, naña lavis netaulu yuñāena la naña sinomān osape nekila.

⁵ Ana Ata, sineun nesape neviuñ sane sa nevañāšu nesuñalu si e maramña, oliganu sina nemio ko ita lua teve suñen si naurarena nae ma e peni sa naña tekila nanua pogos naña tesii yomarava nini.”

Yesu mlenwo kiena nalogena lala

⁶ Ana Yesu mlen mña, sape “Ata, e lepas na lala na yomarava nini naña ko okilologia la ape kionña, ko na otamān la panu, omligan la e lumāu, ana nekilia nevisa van ko nesape in na nepisayu ko pan la rui. Ana nanagane apuarar ke kionña Visena Wa mārera.

⁷ “Lala apisuluṣar pa rui sane sur wo punu ga naña sike e inu, ape sane kionña nalaena lala pan inu, ⁸ vanon kionña visena la naña oṣar pan inu, nepisalelein pan la, ana la atol punu pa rui, kila sane amlelaga mārera asape in na nomolue pun ko nepitom, ko na omiilanu.

⁹ “Nemlen pan ko nanagane, nomon nalenwoen yeririna punu ga na yomarava wetelu veraga ga, ana nesape nelenwo manene laa lala naña otamān pan inu, komin apimi ape kionña rui.

¹⁰ La punu ga naña ape kiau, ape kionña, a la punu ga naña ape kionña, ape kiau, a lala naña otamān la pan inu, ape purṣes nen kiau naurarena.

¹¹ “Ana nanagane na pimi tol pog naña nevañās si pun ko, naña sane ve nesu re si e yomarava nini, ana kieta yeririna la nene asuñara ga. Ve sanene, Ata Wa, awis ovisuar la naña otamān la pan inu, ouarar ruru la loyuña e mratava pun ita, vena akilia aim ave taaga, sa naña ita lua tepe taaga.

¹² Pogos naña nesuñña nemio la, nepisuar ruru la, nepuar ruru la vatanon kioñña kia. Nepisuar la pano-o la punu ga asu ruru ñña amio inu, taaga ga naña monar vetan inu, sa ga naña Nasiriena Wa pisawalia, nane yar naña pe sisi nakovioena.

¹³ “Lavisi ga nowasuñe puñña narui, ana nesape nevisa plan visena la nene pogos naña nesike e yomarava nini wa, vena kilaen sane pupia kekarena naña teke e inu nanagane yoko kilia imi ve keviu ñña van li tañena la nene. ¹⁴ In na nemla kioñña visena pan la rui, ana pogos naña yeririna tañena la na yomarava nini apisu la, sinela karla pañisi. Nanene komin apim sane pe ape na yomarava re si po laa rui, sa naña in na pe nepe nae re yomarava poli. ¹⁵ Ana nemlenin la pan ko, pe nepiun re nesape oure plan la vetan yomarava, nepiun nesape pogos naña asike yomarava wa, ko na yoko ovisuar ruru la, vena yar viowa nene ve kila kare la re. ¹⁶ Awis ovisuar ruru la, komin la na sa ga inu, imimi mepe wolawa ga lala na yomarava nini. ¹⁷ Nemlen ñña sane ovian kioñña visena na lela-gaena van la, vena yawawo kiela malena lala aim ave wa, ave kioñña ga ko ga taaga. ¹⁸ Nemlen wo la sanene, komin sa ga naña ko na omliganu nepim e yomarava nini, ñisi na in ñña nemligan la ke avava sanene

ea. ¹⁹ Nemiawawo kiau malena wetelu pan ko vanon la, vena ñisi na lala ñña ayawawo kiela malena lala van ko ve lelaga.”

Yesu mlenwo li nalela-gaena lala

²⁰ Ana Yesu mlen ñña, pisape “Ata, nemlen ke pan ko, pe nemlen wo re ga la nene poli, nemlen wo ñña lala tañena naña alelaga e inu vanon kiela visena la naña pisayu inu. ²¹ Nemie awis pan ko Ata, sane la punu ga nene aim ave taaga, maran taaga sane ita lua. Ko, ko na e inu, a inu na e ko, ana lala ñña monar e ita, vena yomarava wetelu kilia lelaga sape in na nemolue puñña, ko na omilanu nepitom tano. ²² Pupia naurarena naña omla pan inu, nemla pan la, ñisi na lala akilia aim ave taaga, sa naña ita lua tepe taaga. ²³ Ko na e inu, a in na e la, ñisi na akilia aim ave taaga e sur la punu ga, ana pogos naña yeririna na yomarava la avisuia, akilia sane pe lelaga ga, ko ga naña omliganu nepitom, akilia sane sinemña sii la keviu sa naña sinemña sii inu.

²⁴ “Nanagane Ata, nepis maro sanene, sineun pañisi nesape la naña otañan panu, yoko sirau akilia amio inu ma e leleta. Sineun nesape amionu vena akilia avisuveve pupia kiau naurarena nene, naña ko na omla panu nanua sumo e nasiiena na yomarava nini,

vanon ko na sinemña sii inu pañisi. ²⁵ Ata, ko na ope wa a omesmes, ana yeririna tañena la na yomarava nini pe akilia ko re poli, ana in na nekilia ruru ko lue ga. Nekila sane nanagane na kiau nalogena lala akilia sane in na nepetan ko, ko na omligan inu nepimi. ²⁶ In na nekila sane nanagane na, lala moki akilia ruru kionña ðelaga wo rui, ana yoko nekila va laa sane na wa, vena pupia sinesiena naña sinemña sii inu ea kilia sike e la, a vena inu mñena nemio la lue ga.”

Ana leniena kiena Yesu pan arimana maro ga e nene.

18

Atarar Yesu mñarera

Matiu 26:47-56; Mak

14:43-50; Luk 22:47-53

¹ Yesu pisa plan visena la nene, mlen pae na, ðisi na suñalu sumon imimi nalogena la mepetan si Yerusalem, memial ga kolemallo mepito tano e ðalu naña Kitaron lepas na vano. Memial mepa metol narin los nen purolip lala naña Yesu pa lue ga ea yam moki mña rui, ana mesu li mña yam plas ga ea.

² Lele nene na, Yutas taveve imimi memio Yesu mesuñña mepa ke ea nene yam moki rui, a naga kilia sape e pogos nene, imimi memio Yesu mesike e nene yo. Sanene na e pogos nene, naga pa pa sumo narui pi-sawal Yesu pan yar keviu la,

ana la amiila kiela yar ðasia asiraunia, ana naga sumon la apim e lele nene vanon Yesu. ³ La naña yerkawa kiena ne yar wa lala amio Varasi la amiila la, la nanene na ðegas na mara nae Rom tai, amio ðegas na yar na kiravawoen Yumña Wa lala. Ana amial ke apimi amio kapi vivaga lala, amio kiela sur na mara lala. ⁴ Apimi asape atarar Yesu, ana naga kilia ruru pa ðisi rui sur la naña yoko vim katenia, a pogos naña pisu la pe milan re poli, pa ga naña pitawe la, pis pan la, piunia sape “?E, amiu akale ke ai?”

⁵ Ana la naña asuñal ga asuñña amio Yutas, yar na wilwilinwanen Yesu, ana apisatañña, asape “Imimi makale ke yar naña Yesu, nae Nasaret.”

Yesu pisatañña la, pisape “Naga naña apisa ke ne, in ke narui.” ⁶ Ana pogos naña Yesu pisa visena nene pan la, amilania naña kila la apuresula veraga, amloloru kar ga lala e porotano.

⁷ Ana yam si tai Yesu piun ke sina ga tan la, sape “? Amiu avisali sina ga, akale ke ai?”

Pisi na apisa ke sina ga, asape “Makale ke Yesu naña nae Nasaret.”

⁸ Ana Yesu pisape “Sa naña nepisa pa rui, in ke nanini narui. Ana visae amiu apimin inu ga taaga, popon atañan kiau la tañena nini akilia ava ga sanene, ve atol la re.”

⁹ Naga pisa sanene pan la, kila kiena visena tai pimi pe lelaga, naþa pialua mare ga e kiena leniena pan arimana, naþa pisa sanini, sape “E la naþa otamãan pan inu, pe nekila pal re tai poli.”

¹⁰ Asumã ga sanene, ana memilan ga naþa Saemon Pita þarlua kiena playu na mara, mligan mñene þarin yar tai kiena þarin yar wa lala, ana tetereria ga, telua kiligan yar nene lepas na þamarua. Yaru nene kiena kia Malkus.

¹¹ Ana Yesu pisa pa Pita, pisape “Pita, osuan ruru si kioãa playu vito si e kana pias nen paos nena. ? Sanape, pe sinoãan re nowar ro e pog mñarera na loge viowaena naþa Ata nae ma e peni mla pan inu? Peraga, monar nowar ro e naþa!” ¹² Yesu pisa sa nene, þisi na yar na mara la, amio kiela na sumonena, amio nakiravawoena la na Yumã Wa, apim atarar Yesu, apiar ruru limana luwoka, aþure apano.

Aþure Yesu pa e yo kiena Parin Yaru Wa

¹³ Ana aþure Yesu pano, apa atol kove kiena ne Parin Yaru Wa, ana suri na sumo naþa akila, aþure Yesu pa tol yo puna ne yermarua nene Anas. Anas nene naþa sumo na naga pe Parin Yaru Wa, ana naga sike e yo nene wa amio Parin Yaru Wa viu, komin Parin

Yaru Wa viu nene naga talopa amio narina naþa sira. ¹⁴ Yaru nene kienã kia Kaeþas, a naga naþa nanua sumo, pisawal mrapa tai pan li nasumonena kiena le Yu lala. Naga sape visae avisu sane monar aweãar yar ve taaga vena tamaliaen malena kiena yeririna la ve moki, naga kilia tamãan van la vena akila ve sanene na woga ga.

*Navisawan þesanena
kiena ne Pita e Yesu
Matiu 26:69-70; Mak
14:66-68; Luk 22:55-57*

¹⁵ Sanene na aþure Yesu apa e lepas naþa Anas sike ea, ana e pogos nene, imimi lua Saemon Pita mesiraun la. Inu nemio yermarua Parin Yar Wa na sumo nene, imimi lua mepe erau, þisi na atamãan inu nepa loyumã siraun Yesu, ana apisaluþar Pita asape taþatete imi loyumã. ¹⁶ Asape naga monar sumãlu ga sumã e mratava vanua, ana pogos naþa nepisu sanene, neþasuþe si nepa nepis pan sira mñee na yumãena kiena yar keviu nene tai, naþa sumãl sike e mratava. Þisi na sira nene tamãan sape nekilia noure mñena Pita imi loyumã. ¹⁷ Ana pogos naþa Pita pimi ke loyumã, sira naþa pisuia ana piun tania, sape “?Ana ko mñena nalogena tai kiena ne yar nene, ne?”

Pita mloge, ñisi na miila, pisatamē kotalia ga, sape “E, peraga.”

¹⁸ Pisi na Pita pisu yar na yuñāena la amio naki-ravawoen lala akila kap tai na kilamemego, asuñal asu-vivia ategania, ana naga pa lavisin la, naga mēna tega-nia.

Parin Yar Wa na sumo nene Anas piun naviunena la pa Yesu

Matiu 26:59-66; Mak 14:56-64; Luk 22:66-71

¹⁹ Amligan Yesu suñal e marana ne yermarua Parin Yar Wa na sumo nene Anas, ana naga piun sur la moki petania. Naga piun tan Yesu sanape e nalogena la naña amlelaga ke e naga, a piun mēna e lepas navianena la naña pianlania. ²⁰ Ana Yesu pe pisa re sur mok pan poli, ana pisa ruru ga pania sape “Sur la naña nepian la ke ea, in na pe nekila vinaun re poli, ana nepisa plan ke ga é yometava merarava pan yeririna punu ga. Nepian lue ga kieta le Yu lala e yuñā na lotuena, pona e Yumā Wa, ana lala moki amiyagogan inu silaga. ²¹ ?Ve sanene na, komin ya ne opiun tan inu, osape nepian la sanape? Visae sinomān osape okilia, popon oviun tan la naña amiyagogan inu lue ga. Lala akilia ruru ga ne.”

²² Ana pogos naña Yesu pisa visena nene, yar na ki-ravawoen tai naña suñal mā lavis puna, mloge sane Yesu pisa kare ke yerkawa nene,

ñisi na mlipa Yesu, pis pania, sape “Ei, ositom osape po ne opisatamē kieta yar wa e visena na sanene? !Ovisuar ko!”

²³ Pisi na Yesu pisatamē pania, pisape “Ositomveve ruru li kiau visena. Visae nepisokan, popon ovisawal e maran yeririna la nene, okilia ovisave nepisokan sanape. Ana visae pe nepisa re sur tai naña piowa poli, vanon ya ne omlipa inu?”

²⁴ Ana ñisin nanene aþure Yesu, naña limana la apiar ruru ga sike ga wa, amligan lepas nene puna ne yermarua Anas, aþure apa e kumali kiena Parin Yaru Wa Kaeþas, vena naga kila kotena vania.

Navisawanen na lua kiena Pita pa kiena Suþe

Matiu 26:71-75; Mak 14:69-72; Luk 22:58-62

²⁵ Ana Saemon Pita suñal suñā amio la naña asike atega ke kapi wa, ana la apisu kilia li mā naga, apiun asape “?Sanape, pona ko mēna ope nalogena kiena ne yaru nene tai?”

Ana naga pisawoia, sape “Peraga, in na pe nepe kiena re poli.”

²⁶ Pita pisatamē sanene, ana lala yar tai naña asuñal asike ne, naga pe yar tai na yuñāena kiena ne Parin Yar Wa, naña naga pe namratava tai puna ne naga naña Pita telua kiligana komþasa. Ana naga māreran manene laa sane naviunen si tan Pita, sape “?”

Ko na pe ope kiena re poli yo, ana in na nesitom sane nepisu ko amio naga gare pun purolip la rui?"

27 Ana Pita pisaluþar m̄arera sina, piro yam telun narui sape pe kilia re Yesu poli, ana e nena e aora nene, amloge lakaporo kokoreko.

Aþure Yesu pa suñalu e marana ne yerkawa nae Rom nene, Paelat

Matiu 27:1-2,11-14; Mak 15:1-5; Luk 23:1-5

28 Ana kolulag wa ke ga wa, pe yo-merarava ruru re poli wa, ana Kaeþas pisi pa Yesu pano þisi, ana aþure si naga apetan yo nene, apa e pulkumali kiena ne Paelat, pupia yar keviu nene naþa le Rom la apisirlua naga suñalu ve suþen purvanua kiena ne le Yu lala.

Ana pogos naþa apim lavisin kiena pulkumali, nasumonena kiena ne le Yu lala asitom̄al asape amlon yuñã nene, sane visae ava loyuñã ea þisi na kila la aim sane ve ayekiki re sina e marana ne Ntewa, taþatete ayakol e kinanena na Paþagena na Sitom̄alen na Tamaliaena. Sanene, vanon sur nene, aþure Yesu apim asuñalu ga asu vanua, pe apa re loyuñã poli.

29 Pisi na apisawal pan Paelat, ana naga pimi pisu la vanua, piun tan la, sape "Pogaga, ana amiu avisawal li sane yaru nene kila ya ne piowa, nane aþure pimi

suñal sike e marau kolulag wa ke sanene."

30 Ana apisatamea, asape "Yerkawa, mekilã mevisa van ko sane yar nene, pe yar na kilaen ve woweena þisa! Visae peraga na, taþatete moure imi pun ko."

31 Ana Paelat pisape "Visae sanene, amiu ga akilia ava ala nakoena ya naþa mesmesun kiamiu navisaluaena vania."

Ana nasumonena kiena le Yu la apisa pania, asape "E kiamimi navisaluaena, mekilã meliþere naga sape akove momar naga, ana nanagane na navisaluaena nae Rom pisawo imimi sina, sape ve mekila re ve sanene. Ko ga taaga, yar keviu kiena ne þarin suþe na e Rom, okilia okila, okilia otam̄an osape ala nakoena na marena vania ma e laki torovia."

32 Ana pogos naþa apisa visena nene pa Paelat, la amninue ga, ana la akila ke visena kiena Yesu tai nanua sumo pimi pe lelaga. Nanene komin naga pisawal pa kiena marena rui, pisayu ruru mesmesun nena ya naþa le Rom la akila ke, naþa awear yaru pa e laki torovia.

33 Ana Paelat sinenan sape vis towe re amio Yesu lalua ga, pa si loyuñã e kiena kumali, pio Yesu sape va puna. A lala akila Yesu pa loyuñã, Paelat piun petania, sape "Sineun nesape ovisa ruru van inu. ?Ko na Þarin

Suŕe kiena le Yu la lelaga, po pere?"

³⁴ Ana Yesu pe pisataŕne mesmes re pan poli, ana naga pisataŕnea e naviunena tai, sape "?Kioŕna naviunena nene, opiun ruru ga ne, pona opiun ke pan inu vanon ya naŕa omloge lala taŕena nene apisalele kare in ke ea?"

³⁵ Pisi na Paelat pisataŕnea, pisape "Aulai, nemninue ga amiu le Yu lala, in na pe amiu re tai poli. Nekilia ga sane kiamiu yeririna lala amio yar keviu kiena kiamiu yar wa lala, aŕure ko opimi vena neliŕere ko. Sanene na, nesape nekilia ga nesape omiyuŕaen ya ne naŕa la apisu pe mesmesu re poli?"

³⁶ Ana Yesu pisataŕnea, sape "Sinelan asape oliŕere inu, vanon la pe sinelan re neve suŕen la poli. Ana kiau nasuŕenena pe sa re nasuŕenena na yomarava nini poli. Kiau yeririna lala pe akila re mara amio la naŕa apimi atararnu rui, vena ve neva re e limana ne kiamimi li kawa le Yu la. Imimi pe mepe yaru na kilaen re mara sanene poli, vanon kiau nasuŕenena pe pe na yomarava re nini poli."

³⁷ Ana Paelat pis pania, pisape "? A, ana nemloge opisayu ke kioŕna nasuŕenena, sane ko na ope ŕarin suŕe pa tai rui, po peraga?"

Ana Yesu pisape "Nagane e! Otol ruru pa ŕisi ne, sane opisane. In na nepim e

yomarava nini, nepaeme ea, vanon sur ga nene, a nepimi vena nevisawal sur na lelaga lala van kiena yeririna lala. Yar naŕa suŕalu se e lepas na lelagaena, yoko yagogon ruru kiau visena lala."

³⁸ Pisi na Paelat piun ke sina ga petania, sape "Ana ane kilia, nalelagaena naga ya ne?"

Paelat sinenan sape taŕnan ga Yesu va si sanene

Matiu 27:15-31; Mak 15:6-20; Luk 23:13-25

Ana pogos naŕa Paelat pisa pa visena nene, suŕalu pa sina ga vanua, pisawal pan le Yu la naŕa asuŕalu asike vanua, sape "Yar naŕane, nepisuveve pa naga rui, pe nemal re nenaga narin sur tai piowa teke e naga. Popon sane naga va sina ga ve sa ga nene. ³⁹ Ana visae amiu asitoŕnal ke e kas punu ga, e paŕagena la nene, nepure ke amiu yar tai naŕa sike e yuŕa nakoena, netaŕnan naga imi si pun amiu ve sa ga nene. Ana nepisu sane e kas nini na, popon sa netaŕnan yar nene, kiamiu ŕarin Suŕe amiu le Yu lala, iŕasu pun amiu sa ga nene."

⁴⁰ Naga pisa sanene, ana la pe akekarana re poli, apion ŕarera, asape "Pere, peraga, pe sinemimin re yaru nene poli. Otaŕnan taŕena nene Panaŕas imi van imimi sina." Panaŕas nene naŕa asape, naga pe le Yu tai naŕa

sumo naga pepeyu pa le Rom lala.

19

Paelat tañan sape awe Yesu

¹ Ana Paelat sitom ke sape kila Yesu molue sina ga, ana yerkawa kiena ne le Yu lala amāreran naña apisaluþaria. Ana Paelat sinenan sape kila

suri tai naña akekarān naga vanonia, ana pisape kiena yar na mara lala awe li naga sumo wa. ² Pisi na yaru na mara la aþure naga pano, aþar nonos nen kilsirili, aþan ruruia, amiyen te þarina, sane karo na þarin yar keviu tai. Ana aþar pupia kulkota wo tai naña memaena sane kulkota mñana ne þarin suþe, amiyen ea. ³ Ana la peve taaga apivim ke lavisinia, apisa kare ke naga, asape “!Þarin suþe kiena le Yu lala, o! ! Mepatanon ko!” Apisa visena nene pania, amlilipa ke marana.

⁴ Ana siraunia, Paelat pa sina molue puna li kerkeviu kiena le Yu la naña asuñal asike vanua wa, pisawal pan la, sape “Pogaga, nanagane na sineun nesape amiu avisuluþar naña nemal re sane yar nene, pe naviowaena tai to re e naga poli, ana nanagane neligan si iñasu van amiu.” ⁵ Naga pisa pa sanene, þisi na Yesu pimi vanua, suñalu se marala, þarar karo na nonos nen kilsirili e þarina, amio kulkota

naña amiyen ea. Ana Paelat pisa pan le Yu la, sape “! Nagane, kiamiu yerkawa ne nanene!”

⁶ Ana li kawa kiena ne yar wa lala, amio li nakirawoena lala na Yumña Wa, pogos naña apisuluþar sur naña Paelat sape kila, pe akekarān re nena poli, apion ke, asape “!Awear mare e lak torovia! Awear mare e lak torovia!”

Ana Paelat taþatete taulu la narui, þisi na tañan ga, sape “Pogaga, e nakiravaena kiau, yar nene pe kila re nena napiowaena tai poli, ana visae amiu sinemiunia, amiu ga aure naga, ava awear naga e lak torovia.”

⁷ Ana pogos naña amloge, pe akekara re poli, asape “Peraga yo! Okilia rui osape taþatete mekila ve sanene. Ana lelaga, popon yar nene mare, vanon naga kilaro kiamimi navisaluaena. Naga miyeluar ke naga pa lue ga metava, sape naga pe narina ne Ntewa. Ana ko ga narui okilia okila mare.”

⁸ Ana pogos naña Paelat mloge visena nene, pupia marauena tai pan si naga, sitomveve ke sina ga sape Yesu naga pe yar na sanape, ⁹ þisi na pa si loyumña e kiena kumali, pisape Yesu imi, piun tania, sape “?Ko, kioñā yo wawa nape?”

Naga piunia, ana Yesu pis re poli, pe pisa re sur tai pan poli.

¹⁰ Pisi na Paelat sape “Ei, ve ovis re sanene, ko ga okila kare ko ke si ne. Popon ovisa

sur tai van inu, vanon in ke narui, teke e inu nakilaen sur ya naña sineun nesape nekila van ko. Visae sineun nesape omolue sina ga ve sanene, nekilia nekila, pona visae sineun nesape omare e laki torovia, nekilia nekila. ? Ko okilia mā sur nene yo?”

¹¹ Ana Yesu naga pis narui, pisa-tañea, sape “? Pona sanene yo, ana a ne tañan sur nene pan ko sape okila ve sanene? Visae Yar Keviu na mava ve tañan re van ko, ko na tañatete okila sur tai van inu. Visae ovisa osape nemare, na nene kioma napiowaena tai narui, ana naga naña mligan inu e lumoma, naga kila piowa manene laa, nanene kiena pupia mlamulena viowa tai nene.”

¹² Ana pogos naña Paelat mloge Yesu pis sanene, naga paryo mareran ke sinenan sape ligand Yesu va sina ga, ana li kawa lala kiena le Yu la apion sina ga, asape “Yar nene miyeluar ke naga pa metava, sape pe parin supe tai, sinenan sape kila naga to metavan kioma yerka nene Parin Supe Sisa. Sanene na, visae ko oligan va ga sanene, okila ke yumaena tai naña pisi na Sisa ve kekanan re, yoko kovenlua ko e kioma yumaena nene.”

¹³ Apisa sanene, kila Paelat kiena sitomena peve lua sina ga, pisi na kila apure Yesu molue pulkumali pimi vanua. A pisi na pa totano metava e kiena lele

na naliþereena, naña apio asape Kilavaru Yotop, naña le Yu la apio asape Kapata. ¹⁴ Ana e pogos nene, pimi tol kolpae rui, nanene e legiena na kilaruruen sur punu ga na legiena na peni naña pe pupia legiena na Paþagenan na Sitomalen na Tamaliaena.

Ana Paelat totano ke pa metava rui, kiiar Yesu e marana ne yerka kiena ne le Yu lala naña asumal asike tano ne, sape “!Naga ke narui, pe pupia kiamiu parin supe!”

¹⁵ Ana la amon ga, amamagawoia keviu, asape “! Aurelua vano! ! Asuar metava e lak torovia, aweñaria!”

Pisi na Paelat pisatame pan la, sape “!Ke! ?Sanape, amiu sinemiun asape nekila aweñar kiamiu parin supe nene?”

Pisi na li kawa kiena yar wa lala apisatame, asape “? Ane pisa sape naga pe kiamimi parin supe? Yar keviu Sisa naga taaga pe kiamimi parin supe.”

¹⁶ Pogos naña Paelat pisa amarana laa sanene, pisi na naga tañan ga Yesu pan la narui, mligan naga e limala vena asuar e laki torovia, sa ga naña la sinelania.

*Asuar Yesu e lak torovia
Matiu 27:32-50; Mak
15:21-37; Luk 23:26-46*

¹⁷ Paelat mligan Yesu e limala, pisi na apurelua naga pano. Pogos naña apa ke narui, akila naña Yesu

kus ke sina ga kiena lak torovia, ana la asumonia apa atol narin kunus naña kana kilavaru ne sane puriu na ãarin yaru, naña apio e visena nae Epru, Kolkota. ¹⁸ E yo ne nanene narui asuar Yesu e laki torovia, amio mēna yar la lua, tai e lepas komþasia, a tai e lepas komþasia, a naga mon ga likan lalua.

¹⁹ Ana visena kiena Paelat tai, naga sape yoko asiria visena tai, asuar e lak torovia metavan ãar Yesu, naña sape “Yesu nae Nasaret, Parin Suþe kiena ne le Yu lala.” ²⁰ Visena nene asiri e visena la telu, Epru naña kiena le Yu lala, Latin kiena le Rom lala, a Krik kiena le Kris lala, añear mon metava e lak torovia kiena Yesu. Yo naña lak torovia nene sike ea, lavisin ga pulkumali, ana yeririna la naña amial ke aþaro e yo nene apisu visena nene apuloia. ²¹ Ana yar keviu kiena yar wa kiena ne le Yu lala pe akekan re visena nene poli. Apisawal pa Paelat, asape “Yerkawa, ko na opisa osape asiri sanene sape ‘Parin Suþe kiena le Yu lala,’ ko opisa pe mesmes manene re poli. Sinemimin mesape avilopu sina, asiri ve sanini, avisave ‘Nanene, pisa sape naga pe Parin Suþe kiena le Yu lala.’”

²² Ana Paelat pe sinenan re poli, sinenan sape toña ga ve sa naña pisa, ãisi na pisa mesmes ga pan la, sape

“Sur naña nesiria, nesiri pa narui.”

Yar na mara la amlireure kulmrae mēna ne Yesu e la

²³ Li na mara la añear Yesu amio la lua nene e kiela laki torovia lala, ãisi na apa ruru la. Yar na mara la nene la vari, ana aþarar kulmrae mēna ne Yesu, apisayuia, asape aliureure e la ãegas ve vari, tai kiena yar tai, tai kiena yar tai, sanene. Amlireure mē sanene pano-o, tol pupia kulkota mēna ne Yesu, ana amon vitol wowaena e lepas ve vari, vanon kulkota nene pe kana lele na yakolen re poli, amiyumēan ga e pupia kinas nen kulmrae taaga. ²⁴ Vanon sanene, apisasa si pan la, asape “Piowa naña tevitól kare kulkota nene, yoko telili ga mēpilania.”

Ana la amninue ga, akila ke ga mesmesun visena na yauena tai e Tus na Yauena Wa Lala na susumoru. Visena nene pisa sanini, sape

*“Amlireure mēau kulmrae lala e la, amlil mēpila vanon mēau kulkota.”
Yauena 22:18*

Visena nene pisa sanene, mesmesun ga ya naña li na mara la akila.

Yesu pis pa anena

²⁵ Yesu tamalele mēke pa metava e kiena laki torovia sanene, ana e la naña asuñal asike lavisin apisu ke e pogos nene, sira la vari. La nene, anena Yesu, amio anena na ve

tokak tai, amio Maria naña wona na yermene kiena kia Klopas, amio Maria nae Maktala. ²⁶ Ana Yesu kira pito tano, pisu anena, pisu inu mēna, naña sane imimi lua mepe puruvi, nesuṃal nesike lavisinia, ana pisayu inu pan anena, sape “Sira marua, naga nene na pe naruṃa narui.” ²⁷ A pis mēna pan inu, sape “Naga nene pe anomā narui.”

Ana siar e pogos nene nepure sira marua nene pam momalio ke uṃa mēau, nepisuar ruru naga sane pe aneu.

Yesu mare

²⁸ Yesu mloge ke piowa metava e lak torovia pano-o pisuluṃar sane kiena yuṃaena punu ga ṃisi narui, ṃisi na pisawalia sape “In na moto karnu.” Nanene pe kiena visena si tai naña pisa ana kila visena tai na Tus na Yauena Wa Lala pimi pe lelaga.

²⁹ Ana pogos naña amloge sape moto karia, amla lum-lum, aputon e mēala kuruta na munen tai naña mēke e pialo tai, amiyurar e laki tai, akian pa metava tol gona ne Yesu. ³⁰ Akian pae, ana kuruta na munena nene kee pa gona ṃisi, ana pi-sawal visena tai, sape “Ṗisi narui.” Ana pogos naña pisa pae visena nene, telan ṃarina pito tano, taṃan nin-una pano, pure maron kiena yalua, mare.

Amiyurṃe mraṃanena ne Yesu

³¹ Pogos naña Yesu mare, naga kolpae e legiena na kilaruruen sur punu ga na Ṗaṃagena na Sitoṃalen na Tamaliaena. Sanene, legiena na peni, naga pe pupia legiena na ṃaṃagena nene, ana e legiena nene, taṃatete atol tas nen yar mare. Nanene kila sane yar keviu kiena le Yu lala sinelan asape monar akus plan tas nen la telu nene sumon naña mrae vato tano. Ana amaraun mēna asape sa ṃisi la telu nene pe amare ruru re poli wa, ṃisi na amligan visena pa puna ne Paelat, apiunia asape aweroro lala lala vena amare vilaga. ³² Ṗisi na Paelat taṃania, ana kiena yar na mara la apa aṃero lan naga naña asuar e lak torovia lepas tai, ṃisi na akila pan taṃena. ³³ Ṗisi na apanon vena akila mēna va Yesu, ana apisu naña naga marṃantop pa rui, ana pe akila re si pan poli.

³⁴ Ana lala yar na mara tai kus kiena kalie, miyurṃe mraṃanena ne Yesu, susun pano-o apisu pupia kuruta amio wii pinin molue pito tano. ³⁵ Ana sur nene pe lelaga kemua paṃisi, vanon nepisu e kilamarau, nekilia nesape pe lelaga, ṃisi na nesape nevisawal van amiu, vena amiu mēna alelaga ea asape sur nene pe lelaga ga. ³⁶ Sur la nene molmolue sanene vena kilaen visena la na Nasiriena Wa na susumo la aim ve lelaga ga. Visena tai naña pisa sanini, pisape

*“Pe puriu na yepena re nena
tai poli naña yoko
worovia,” Yauena
34:20*

37 a tañena pisape

*“Amiyur kare naga, ñisi narui
na asun avisusu ña
naga.” Sek 12:10*

Ana p̄elaga na marena
kiena ne Yesu naga sa ga
naña visena la nene api-
sawal na konua konua rui.

*Amligan tasnena ne Yesu
e kana puluve*

38 Pisi na pupia yerkawa
kiena ne le Yu la tai, kiena ki
Yosop, nae pulkumali naña
Arimateia, naga pe nalogena
tai kiena ne Yesu nanua ña
rui, ana kilawan ke kiena
nalelagaena komin mama-
raun ke li kawa tañena lala.
Ana pogos naña kiena Suñe
mare pae, marauena neñe
kovio, pa puna Paelat, piun
tasnena ne Yesu. Ana Paelat
tañania, pa kuslua tasnena
ne Yesu petan lak torovia.

39 Ana yar tañena tai naña
amio Yosop e pogos nene,
naga Nikotimas naña nanua
tapolou ga pimi puna ne
Yesu kolemalou tai vena sun
amio. Ana Nikotimas nene
naga pimi e pogos nene, p̄ar
ñena sur la na liluaren tas-
nena ne Yesu, amio pupia
pias nen sirveve na pono-
taninu tai, naña kana kilo
miyuve lualima yam telu
[30]. 40 Pisi na akus tasnena
ne Yesu, apiar e kulmrae
yuwowo lala, amio ponotan-
inu la nene, sa naña le Yu
la amiyuñen ke e kiela
marena lala. 41 Amlular

pae naga, ana lavisin ga
e naña añear naga e laki
torovia, lokove tai moña ga,
ana loyuma e lokove nene
puluve viu tai ñeke ea, naña
atemare ga na wa vena liga-
nen tas nen yar mare va ea,
ana pe tai pa li re e poli wa.
42 Pisi na amligan tasnena
ne Yesu mon loyuma e nene,
vanon apisu pog p̄arovia,
lavis legiena na kilaruruena
sur punu ga ñisi, ana pogos
naña sa mrae vato kovio,
Legiena Wa siaria.

20

*Puluve korena ga ñeke
narui*

*Matiu 28:1-8; Mak 16:1-8;
Luk 24:1-12*

1 Amligan tasnena Yesu
ñene puluve nene, ñisi na
moña pano tol legiena p̄esia
na wik tañena. Ana sira la
p̄asia, sane Maria nae Mak-
tala lala, asuñal kolulag wa
ke ga wa, amial malo ga
apam e puluve.

Ana pogos naña apam ke
lavisi, amilan naña apisu
pupia kilavaru pe mono re
si e pulus nen puluve poli,
amelilivin lua pae rui pa
ñeke ga yepasia. 2 Ana po-
gos naña Maria pisuia, p̄ilon
sina ga kiriri pimi, p̄isu Sae-
mon Pita amio inu, inu naña
imimi lua Yesu mepe sa ga
puruvi ga lala, pisawal pan
imimi lua, sape “!Aulai, tas-
nena ne Yesu kovio! Akuslua
kom ko yo tai, memninue ga
sane ñeke pe narui.”

³ Imimi lua memloge, mesuñalu, mepa iroro ga ma puluve. ⁴ Imimi luwoka mekirir ke mepavin, p̄isi na nemiyuve Pita, nepa netol p̄esan yo nene, a Maria taveve imimi lua, naga m̄ena pimi sina. ⁵ Nepa netol puluve, nepa lavisinia nekira pa loyuñã e lele naña amligan tasnena ne Yesu m̄ene ea. P̄isi na pe nom̄al re si Yesu poli, nepisu ga kulmrae la naña amluluar tasnena ea, akekapili ga sike sanene, ana pe nepa re loyuñã poli. ⁶ Ana pe piavi re nena ga Saemon Pita siraun inu pam, naga pa loyuñã e puluve. Pisu kulmrae la nañane, sa ruru ga naña amluluar Yesu e nanua yemlagi nakoneva. ⁷ Ana tawol tai naña apiar e p̄arina Yesu, naga pe to re amio kulmrae la poli, akawe ruru si naga taaga teke.

⁸ Pita pisuveve ke sur la ne sanene, ana inu m̄ena nepa loyuñã nepisuia. Imimi lua mepisu veve ke sanene, mekilia ga narui, memlelaga mesape Yesu suñal si taulu marena rui, lelaga na lelaga.

⁹ Sumo, imimi nalogena la pe mesitom re mesape p̄isi na ve sanene poli, vanon pe mekilia re naña Nasiriena Wa la apisawal ke rui asape kieta Navisaarena monar mare, siraunia mal sina. ¹⁰ Nanua na memninue ga, ana nanagane imimi lua nene mepisu e kilamaramimi. Mepisu m̄ã sanene

pano-o, p̄isi na moþasuþe si uñã.

Maria nae Maktala p̄isu Yesu

Matiu 28:9-10; Mak 16:9-11

¹¹ Imimi lua moþasuþe si uñã, ana Maria suñal ga suñã e pulgon puluve suñã ga, wamarana mlalau ke. Naga tag m̄ã sanene pano-o, p̄isi na kira si pa e puluve, ¹² milan si navisi lua, amiyen kulmrae naña miyuwowo paþisi, atotano ateke metava. Tai totano e naña sumo amligan p̄arina Yesu pa ea, tai totano e naña lana la pito ea.

¹³ P̄isi na lalua apis pa Maria, asape “?Erau, ko otagin ke ya?”

Pisatam̄e sape “Akuslua kiau Suþe kovio, nemninue amligan m̄eke pe narui.”

¹⁴ Naga pisa pa visena nene, p̄isi na kirawelesina, p̄isu yar tai suñalu sike na. Pe pisuluþar re poli, ana Yesu ke narui.

¹⁵ P̄isi na Yesu m̄ena piuntania, sape “?Erau, ko otagin ke ya? Okale ke a ne e nini?”

Ana Maria sitom m̄ape yar na yuñãena ga nae e nene, pisatam̄ea, sape “Yarkeviu, visae ko na okuslua naga petan e nini, awis, ovisawal van inu e nape naña omligan tasnena m̄eke ea. Sineun nesape neva nekusia, neligan ruru sina m̄eke e lelana.”

¹⁶ Siraunia Yesu pio Maria, pio kiena kia, sape “!Maria!”

Naga mloge, pilonia, pisuluþar sane Yesu, pa

lavisinia, pio e kiela visena, sape “! Raponi!” naþa kinas nen visena nene “Navianena.”

¹⁷ Pisi na Yesu pisa pania, sape “Maria, toko, ve otolnu re sanene. Inu taþatete nesu e nini, komin pe neþasuþe re metava puna ne Ata poli wa. Ana popon ko na owasuþe si puna ne kieta puruvi lala, ovisa van la osape nepisa sanini, nesape nanagane, nepa ke si metava puna naga naþa pe arimau, a pe arimamiu, naþa pe kiau Ntewa, a pe kiamiu Ntewa.”

¹⁸ Siraunia Maria nae Maktala nene kila sanene, þasuþe si pu imimi nalogena lala, pisawal, pisape “Nepisu Suþe e kilamarau,” a pisayu pan imimi e sur la naþa Yesu pisa pania.

Yesu m̃alivin kiena nalogena lala

Matiu 28:16-20; Mak 16:14-18; Luk 24:36-49

¹⁹ Ana e legiena þesia na wik ke nene wa, ko yepekilavi, imimi nalogena la mesike lele taaga loyuma e yo naþa metapolou ke ea. Mekiar ruru mratava lala, vanon memaraun ke mesape sa þisi yerka kiena le Yu la sinela kar imimi m̃ena, sa naþa sinela kar Yesu rui. Mesuma sane na, veraga ga, Yesu m̃alivi pimi sunal likan imimi, sape “! Sunarena sike amio amiu!”

²⁰ Naga pisa sanene, þisi na pian lologia imimi e lepas na mrapototo la naþa e limana

amio pupia piakapila naþa e mramanena. Mepisua, ana pogos naþa mekilia mesape naga Suþe nene, mekekara na mekekara. ²¹ Pisa ke sina ga pan imimi, sape “! Sunarena sike amio amiu!” A miakol ke sina ga, sape “Sa ga naþa kiau Ata miilanu vena nekila kiena yumaena, ana inu towe neila amiu re vena akila sanene.”

²² Siraunia, miyu yalua pimi e imimi, sape “Amiu atol Ninuna Wa. ²³ Yar a naþa visae amiu aviewoia vanon kiena mlamulena viowa, yoko naviowaena nene kovio vetania, ana yar a naþa visae amiu ve aviewo re vanon kiena mlamulena viowa, yoko naviowaena nene to lue ga e naga.”

Tom̃as pisuia, mlelaga

²⁴ Ana pogos naþa Yesu m̃alivin imimi, imimi yaru tai pe su re poli, naþa Tom̃as Kaora. ²⁵ A suraunia, mepisu naga, mepisawal pania, mesape “! Suþe m̃alivin imimi, mepisu naga rui!”

Ana naga pe mlelaga re e poli, pisape “Peraga, in na monar nevisu e kilamarau. Visae ve nevisu re piakapila na mrapototo e limana, netol e mrasilmou nini, a visae ve neligan re lumau nini e piakapila e mramanena, yoko taþatete nelelaga nesape naga mal sina ga.”

²⁶ Tom̃as pisawal kiena sitomena nene, þisi na wik tai þaro pano, mesike si lele taaga e yo naþane. Ana

e pogos nene Tomās mēna mesike memio, ana akiar mratava la mārera, p̄isi na Yesu pimi mālavin imimi yam si tai, sape “!Sumārena sike amio amiu!”²⁷ Ana pis pa Tomās, pisa pania sape “Lumāu na nini, okian mraslumomā, otol luṗaria. Mraṁaneu nanini, oligan lumomā te ea. Ve ositom p̄ele re sina, oviawa mārera e inu.”

²⁸ Tomās mloge na kira pisu Yesu, pisatamēa sape “!Kiau Suṗe, ko ope kiau Ntewa!”

²⁹ Pisi na Yesu pisa pania sape “?Sanape, opisunu ana omlelaga e inu? Nanene naga po, ana pupia navisa ruruena sike e la naṗa pe apisunu re nena poli wa, ana amlelaga ke pa e in rui.”

Visena maro tai

³⁰ Sur la moki naṗa Yesu kila, nesiri plan pa e tusi nini rui, ana naga miyumāen mēna kile taṗena la moki e maramimi naṗa pe nesiri plan re poli. ³¹ Ana visena la punu ga naṗa asike e tusi nini, ve naiila amiuena vena alelaga asape Yesu naga pe Navisaarena, pe narina ne Ntewa na lelaga. Ana kiamiu nalelagaena e kiena kia nene, yoko ve kiamiu mrapa na tolen malena e naga.

21

Yesu mālavin sina kiena nalogena la olua

¹ Ana siraunia, imimi nalogena la p̄asia mesumā garo pupia lapa na garo Taepirias, pona Kalele, p̄isi na Yesu pimi mālivi. ² Imimi naṗa mesike e pogos nene, Saemon Pita, Tomās Kaora, Nataniel nae pulkumali naṗa Kana ma Kalele, inu nemio olai na sumo Semes, amio sina imimi lua. Ana navaemeena kiena ne Yesu pan imimi e pogos nene sanini.

³ Susumo na Saemon Pita pisawal, pisape “Aulai, in na neva neure lilivi metava narui.”

Pisi na mesumālu mepisape “Poga, ita punu ga.” Pisi na mepatove mokus waa mepa mokuan lilivi. Mesumā e sive pano-o yemlagi, ana pe metol re nena ika tai.

⁴ Ana pogos naṗa yemlagi merarava ruru ke narui, Yesu patom su ura e nene, ana mepisu sane sa ga yar tai ne sike ne, ana pe mepisuluṗar re poli mesape naga ke narui. ⁵ Ana Yesu pion pan imimi, piunia sape “?Naruu lala, aṗar mā ika laṗasia, po pere?”

Pisi na mesape “Peraga rui.”

⁶ Pisi na pisa, pisape “Pogaga, akila sanini. Ava akuan si lilivi, ana ve akuan re si sa naṗa akuan ke ne, aluṗarli va e lepas na p̄amarua sumo wa, ana nekilia nesape yoko atol ika p̄asia.”

Ana pe mepisu kilale re poli wa sane Yesu na pis ke ne, ana mepa melupar lilivi sa ga naña naga pisa. Ana veraga ga pulen ga ika na ika, ana pogos naña mesape mourelua va metava mepure p̄ele ga, pulen manene la ika lala.

⁷ Pisi na mepisu kilale narui mesape Yesu, ana inu naña imimi lua Yesu sane mepe puruvi, nepisa pa Saemon Pita, nesape “Pita, ovisuia, Supe nama!”

Pogos naña Pita mloge sane na, sunalu veraga, miyen sina ga m̄ana kulkota, pula tano e sive, miye pa ura.

⁸ Pe mesu re perinan ura poli, sur sane tasme ponotia taaga ga [100], ana Pita sumon imimi mokus waa mesirau mopure yalolog ke lilivi naña pulen ika.

⁹ Ana pogos naña mepim ura, mepisu kap tai moña ga, naña amlega ika p̄asia e mopulusia, mepisu narin kilaparavi lañas manoa ruru pa sike rui. ¹⁰ Ana Yesu pisa, sape “Ika la naña amiu añar ga na wa, awar p̄as vam ve kata.”

¹¹ Ana Saemon Pita pitove, pa metava e waa, p̄erelua lilivi, p̄ere pimi ura. Ika mok pañisi, memaraun mesape sa p̄isi lilivi wororowa lawea, ana peraga, mep̄ere pimi pogaga. Pogos naña moñar plan ika la nene, mopuloia tol ponotia taaga lualima yam lima pa telu [153].

¹² Ana pogos naña ika la manoa ruruia, Yesu pio, sape “Aimi akinana.”

E pogos nene mepisu kilale ruru mesape Supe ga nene, pe mesitom re si meviun mesape naga ai.

¹³ Mepim mesike pa lele taaga narui, Yesu mla kilaparavi, pion pan imimi, amio m̄ena ika lala, ana makania.

¹⁴ Naga nene sane pe Yesu kiena navaemeena natelu pan imimi kiena nalogena lala, siraun naña Ntewa tamalia sina naga petan marena.

Yesu amio Pita

¹⁵ Ana pogos naña memla pae kamimi kinanena na kolulag, Yesu pisape sun re amio Saemon Pita. Piun tania, sape “Saemon, narina ne Yoane, sanape? ?Ko na sinem̄a sii inu keviu, taulu naña la nene sinela sii inu, po peraga?”

Pita pisatam̄e pania, sape “Supe, sur nene okilia pa rui, nekekan ko pañisi.”

Ana Yesu pisa pania, sape “Pogaga, ovagan narin kiau sipsip lala.”

¹⁶ Pogos tañena sina ga, Yesu pisa pania, sape “Saemon narina ne Yoane, ko na sinem̄a sii inu po pere?”

Pita pisatam̄e ke sina, sape “Supe, sur nene okilia rui. Sa naña nepisaaria, nekekan ko pañisi.”

Ana Yesu pisa pania, sape “Pogaga, ovisuar kiau sipsip lala.”

17 Ana yam si tai, kila yam telun narui, Yesu piunia, sape “?Saemon narina ne Yoane, ko na okekaran inu kemua lelaga, po peraga?”

Ana pogos naña Pita pisu Yesu piun m̃a sanene pano tol yam telu, mloge piowa, pisa pa Yesu sape “Suñe, ko okilia make sur punu ga, okilia naña nekekaran ko pañisi.”

Ana Yesu pisa pania, sape “Pogaga, ovagan kiau sipsip lala. 18 Ana nevisa ve lelaga van ko sanini, sane nanua sumo, pogos naña ope m̃ee ke ga wa, ko na okila ke ga sa naña sinom̃an osape okila. Ko ga taaga omiyen moña kulsota omialoro opa e lele la naña sinom̃ania. Ana nekilia nevisa van ko, pogos naña ovim ove yermarua, yoko yar tañena la ayenwo ko e moña kulmrae, atarar lum̃oña aure ko ova e lele la naña ve sinom̃an re ova ea.”

19 Visena kiena ne Yesu nene, sane pisawal ke sape sanape naña yoko awem̃ar Pita. Ea kiena marena, naga kila ãelaga tai naña mligan naga pito tano, a pisirlua kia kiena ne Ntewa pa metava.

Ana siraun naña Yesu pisa pa sanene pa Pita, ãere ke sina ga naga, pisape naga kilia siraun si naga, pisape “Ovim, otaveve inu lue ga narui.”

20 Ana siraun naña Yesu sun pae amio Pita, Pita pilonia, pisu inu, erau wo kiena ne Yesu, nesike lavisin la luoka. Inu ke narui naña nanua, e kinanena maro, netotano lavisin Yesu, nepiuntania nesape e imimi nalogena lala, ane yoko vielua.

21 Ana pogos naña Pita pisu inu, piun tai Yesu, sape “?Suñe, sanapen erau nene?”

22 Ana Yesu pisa pania, sape “Visae nasinenanena kiau sane yoko naga ve kovio re, ana sum̃a sanene vano neim sina ga, sur nene naga pe kiau, pe pe kioña re naña ovisa sur tai e poli. Sur naña pe kioña na kilaena, nepisa pan ko ãa rui, nesape otavevenu silaga.”

23 Ana suraun pogos nene, pog naña nalelagaena tañena la amloge naña Yesu pisa sanene, amlogepalia, amape Yesu pisayu inunia, sape tañatete nemare pogos tai. Ana Yesu pe pisa re sanene poli, pisa ga sape visae naga sinenania, yoko kilia ve sanene. Sanene, kaña kinasia sane sur nene naña Pita piunia, pe kiena re poli, ana pe kiena Yesu ga.

Visen maro

24 Ana inu naña nepisawal ke sur la nene, nesiri plan ruru ke vena akilia auloia. Ana ita punu ga tekilia telaga tesape visena la nene pe lelaga pañisi.

25 Poga, tusi nene pimi ãisi ga e nini narui. Sur la moki naña Yesu kila sike ea, ana

sur la moki na moki naŕa
Yesu kila pe su re e poli.
Visae tesiri punuia, nepisu
sane pona yoko kana tus la
ve mok vaŕisi, vano-o yo ve
tokak e yomarava nini.

YUMAENA Kiena ne Li Nalologena Lala Visayuena Na Tusi Nene

Kompasnen suniena plas na tusi nini

Tusi nini “Yumãena Kiena Ne Li Nalologena Lala”, Luk siri pan yaru tai, kiena kia Teopilas. Nane tusi na lua naña Luk siria, pimi siraun kiena tusi na sumo, naña kiena kia “Lologena Wo Kiena Yesu Kristo Naña Luk Siriyuia”. Tusi nini “Yumãena Kiena Ne Li Nalologena Lala”, kiena kia na plasa sanene, sape “Yumãena Lala”. Naga pisayu yumãena p̄esa kiena li nalologena lala kiena Yesu, naña Ninuna Wa naga sumon la e yumãena na visawalen lologena wo, siar garu Yerusalem a e yo punuga garu Yutea a Samaria, pano pano-o p̄ar make yo e yomarava (Yumãena Lala 1:8).

Tusi nini naga suniena tai kiena li nalelagaena p̄esa, naña siari e p̄egas kiena lus nae Israel lala naña amlelaga, a kapuru pimi keviu kalo make yo la e yomarava.

E tusi nini, Luk sinenan sape kilologia naña lala naña amlelaga e Yesu, ve akawe re P̄arin Supe nae Rom naña naga pe supen make yo la e pogos nene. A naga sinenan sape kilologia naña suri

makega naña lus nae Israel lala amlelaga ea asape yoko imi m̄alivi, nane apimi m̄alivi rui kome lologena wo naña ita li nalelagaena lala temlelaga ke ea.

Tusi nini komsus telu, naña kilologia sanape naña lologena wo sumã p̄ar make ke e yo punuga narui, a sumãre sumã kapuru ke silaga. Komsus na sumo, pisayu sumãre naña siari garu Yerusalem, siraun naña Ntewa p̄erelua Yesu pa ma e peni. A na lua, pisayu naña yumãena kapuru pimi keviu, kalo make yo lua nene Yutea amio Samaria. A komsus na maro, pisayu naña yumãena pano pa kalo yo punuga e puruvanua lala na yo na pawa sive naña apio asape Sive Naña Metiterenian, pa tol yo Rom.

Pupia suri keviu tai naña tusi nini pisayuia, nane yumãena kiena ne Ninuna Wa. Pogos naña li nalologena lala asike garu Yerusalem wa e pogos na legiena na Pentikos, Ninuna Wa pitom ana mla m̄areraena pala. A siraun e pogos nene, Ninuna Wa sumã miila ke yumãena na sumãre, a miila m̄ena li na sumonien yumãena lala e kiela yumãena. Tusi nini pisawal visena la p̄asa naña li nalologena lala apisawalia, a kila meraravan naña kiela visena la m̄arera po, pilon malena kiena la naña amlelaga, a miila li

nalelagaena lala vena aimi
aviran la lele taaga.

Kom̃pasnen tusi la na nini

Yesu pis maro pan kiena
nalologena lala 1:1—14

Amligan lua yaru naṣa kus
lelena Sutas 1:15-26

Amlologon lologena wo
garu Yerusalem 2:1—8:3

Amlologon lologena wo pa
Yutea a garu Samaria
8:4—12:25

Yum̃aena lala kiena Pol
13:1—28:31

Yalena na sumo kiena ne
Pol 13:1—14:28

Apiora lele taaga garu
Yerusalem 15:1-35

Pol miyaloro yam lua
15:36—18:22

Pol miyaloro yam telu
18:23—21:16

Visena na sumo

¹ O, kiau erau Tiopilas,
inu nekekara paṣisi naṣa
nevitawe ko e tusi taṣena
nini. E kiau tusi na sumo
naṣa nesiri pan ko, nesiriyu
suniena na suri la naṣa
Yesu naga sum̃a kila, a naṣa
naga sum̃a pian ke e sumo,
naga nene naga siar e pogos
naṣa naga siar ṣesan kiena
yum̃aena, ² pimi tol e pogos
naṣa e nam̃areraena kiena
ne Ninuna Wa, naga mla
maron kiena visena maro pa
kiena li nalologena lala naṣa
naga mligan plan la rui, ana
siraunia Ntewa ṣere naga pa
si metava.

³ Ana pogos naṣa naga
mali sina ga e marena, naṣa
naga pe pa re si metava poli

wa, ana pogos moki, naga
sum̃a m̃alm̃alivin la pa tol
legiena lualima yam vari,
naṣa kila meraravan ruru
pan la naṣa naga mali sina
ga e marena lelaga. E pogos
la nene, la asuña apisu ki-
lale ruru naga, a naga sum̃a
pisayu mrapa lala na na-
suṣenena kiena ne Ntewa
pan la.

⁴ Pogos tai, naṣa naga
sum̃a veraga amio la, naga
mla visena nene pan la, naga
pisa, pisape “Amiu na monar
ve aṣr matan re yo nene
Yerusalem, amiu na monar
asum̃ate m̃a ga wa vena atol
Ninuna Wa nene naṣa Ata
pisaar ṣisi rui sape naga la
van amiu, sa naṣa nepisa
m̃ena ga pan amiu rui. ⁵ Sa
nanua sumo, Yoane Nakeena
naga kee yeririna lala e ga
e wii, ana ve ve piavi re,
legiena ga laṣasia warovia,
ṣisi na Ntewa naga kee amiu
ve lelaga, na nene e Ninuna
Wa.”

Yesu pa metava ma e peni

⁶ Ana e si e pogos tai,
naṣa li nalologena lala la
apimi sina ga lele taaga amio
Yesu, la apiun tania, apisape
“? Suṣe, sanape, nanagane
naga pogos ruru naṣa ko
okila naṣa ita le Israel lala
ita ve kieta ṣarin suṣe sina
ga tai, pona pe kana pogos
nen re poli wa?”

⁷ Ana Yesu pisatam̃e la,
pisape “Naga nene pe pe
kiamiu re naṣa amiu akilia
pogos la nene poli, pona

legiena la nene poli, naña Ata ga naga taaga mligan ruru pisape ve sanene, a ve sanene. ⁸ Ana siraunia, Ninuna Wa naga vim e amiu, ana e pogos nene narui akus nam̃areraena, ana p̃isi na amiu na monar ava avisawal inu garu Yerusalem nene, a e yo tañena punu ga lala garu Yutea amio Samaria, ana vano vano-o tol m̃ena ga yo tañena la punu ga e yomarava nini.”

⁹ A pogos naña naga pisa pa visena la nene p̃isi, naña la asike apisu ruru ke naga wa, Ntewa p̃erelua pa metava, a lul tai pitomi kalovia, ana la pe aña re si poli. ¹⁰ Pogos naña la asum̃a akirakira ke pa metava e sinapane wa, veraga ga amilan ga, naña añal yaru la lua naña m̃ala kulsota lala miyuwowo pañisi, lalua apimi asum̃alar la asike amio la, lalua apisape ¹¹ “! E, le Kalele lala! Amiu ve sinemiu viowa re, ve akirakañar re va metava e sinapane sanene. Yesu nene naña Ntewa naga p̃erelua naga petan amiu pa metava e peni, p̃isi na naga monar wasuñe sina vitomi, a naga yoko wasuñe sina e p̃elaga ga nene naña apisu ga nanagane p̃isi ne.”

Pegas kiena ne nalologena lala

¹² Ana li nalologena lala amligan kunus nene,

naña Kunus Na Purolip lala, añasuñela apito garo Yerusalem, pe perina manene re poli, sane tasme na manu taaga ga. ¹³ La nene la apimi atol yo Yerusalem, ana la apa ke sina ga loyuna e yo naña metava naña la asusukemua e rui. A la nene kiela kia sanini: Pita, Yoane, Semes a Antru; amio Pilip, Tom̃as, Patalomiu, a Matiu; amio Semes naña narina ne Alpeas, amio Saemon naña naga lala yaru tai naña sumo akila politik pa le Rom lala, amio Sutas naña narina ne Semes. ¹⁴ Ana e pogos nene, la nene amio sira lala, la apalue ga lele taaga vena alen. A Maria, anenane Yesu, amio m̃ena ga wenla Yesu lala, asum̃a apa lele taaga amio la.

Yaru na kusen lelana ne Sutas

¹⁵ Legiena lañas p̃arovia p̃isi, ana li nalelagaena lala apimi lele taaga, naña la punu ga atol suri sane yaru ponotia taaga lualima yam lua. Ana e pogos nene, Pita naga sitom sape visayu van la vena akila sanape naña alual yaru na kus lelen yaru nene Sutas. ¹⁶⁻¹⁹ Naga nene vanon naña siraun naña Sutas naga sane kila kiena yum̃aena viowa nanua sumo, naga pul ke sina ga porotano tai amio kilavaru naña naga tauluia,

ana naga ga mloru e yo nene, ana m̃eṣena m̃apo, a sinena la molmolue, ana naga mare. A yeririna lala nae Yerusalem amloge lologena nene, ana nane kila la apio kinakinas nen porotano nene e kiela visena asape “Akeltam̃a,” naga nene visena tai naṣa naga pisape “Yo Na Kuruta.”

Sanene, Pita naga sitom pisape visayu suri nene van li nalelagaena lala, ana naga suṃalu e marala, pisi pan la, pisa pisape “Erau lala, nanua sumo, Ninuna Wa naga pisi kome pulgona ne Tepet, naga pisayu yum̃aena kiena ne Sutas nene naṣa naga sumon yeririna lala apimi apuarar Yesu, a visena la nene apimi ape lelaga ṣisi rui, sa naṣa Visena Wa naga monar ve lelaga silaga. Sutas nene naga imimi yaru tai naṣa, naṣa Suṣe mliganar naga vena tarar yum̃aena amio imimi, ²⁰ ana nanagane, naga sa naṣa visena lalua nene naṣa teke e Tusi Kiena ne Yauena Lala, naṣa tai pisa, pisape

‘Naga popon naṣa m̃ana yum̃a mon korena ga, ṣisi na taṣatete yaru tai mono ea,’ Yauena 69:25

a taṣena sina ga, naṣa pisape

‘Popon yaru taṣena tai kus lelana.’ Yauena 109:8

²¹⁻²² “Komin suri ne na nene, ana monar yaru si tai naga imi sukol imimi sina vena navisawalen Yesu,

kieta Suṣe, visave naga mali sina ga e marena. Yaru nene naga monar lala yaru tai naṣa la amio imimi nanua sumo, e pogos la naṣa Suṣe suṃa mialoro ke amio imimi. Naga monar ve yaru tai naṣa naga sike e poglis naṣa Yoane naga mlologonyu ke kiena nakeena, pimi tol legiena naṣa Ntewa naga ṣurelua Yesu petan ita, vena va si metava.”

²³ Ana la apisawa kia kiena ne yaru la lua. Tai, kiena kia Yosop, naṣa la apio asape Pasapas, a kiena kia taṣena sina, kien kia asape Sastas. A yaru taṣena, kiena kia Mateas. ²⁴ Ana la amlen, apisa, apisape “Ntewa, Ntewa namanmaruaena, ko ga okilia m̃a ya naṣa sike e los nen yeririna lala. Narui imimi na siñimimin mesape ko okipian imimi e lalua nene, nape naṣa ko oṣere rui, ²⁵ vena naga tarar yum̃aena kiena ne nalologena nene, naṣa Sutas naga mligan rui vena naga va ruru nena ga e kiena lele na kovioena.”

²⁶ La amlen pae, ana akila sur sa naṣa la amlil m̃apila, ana kia kiena ne Mateas naga kate. Ana la amligan lua naga, ana asikol naga amio la lualima taaga pa taaga nene, kila la lualima taaga pa lua ke sina ga.

2

Ninuna Wa pimi

¹ E legiena na Paḡagena Na Yui Marua, li nalelagaena lala la apimi asu mā ga lele taaga, ² a veraga ga, māagena tai molue ma e sinapane, sa ga naḡa pupia lagi tai māi, ana māagena nene naga kalo punu yo na loyūma nene naḡa la ateke tano ea. ³ Ana la apisu suri tai sane kapi mluamene, ana kapi nene naga mliḡerea, ana peve taaga pa sike e la punu ga nene. ⁴ Ana la punu ga, Ninuna Wa naga pimi pulemamaga e la, kila la apivisi e visena taḡena lala, sa naḡa Ninuna nene naga kila akilia apisi komea.

⁵ Ana garu Yerusalem, le Israel la asu mā ga, naḡa la ape li nalenena lala. La nene na la amolue e yo la moki na yomarava nini apimi. ⁶ Ana la nene amloge māagena nene, lala amio yeririna taḡena lala, la moki paḡisi naḡa la apimi e yo nene. Ana la nene sinela kurkur paḡisi, komin naḡa yaru la naḡa Ninuna pimi e la, la pogos naḡa asum̃a apisi sanene, ana yaru make ga amloge nena kiela visena la naapo. ⁷ Ana la amilan paḡisi, a amiyuwawa, apisa apisape “!Aulai! Yaru la nene naḡa asu mā apivisi ke sanene, ana lala na ape le Kalele ga lala. ⁸ ? Sanape naḡa ita punu tesu mā temloge ke naḡa apivisi ke e kieta visena la sanene? ⁹⁻¹¹ Ita tepe yaru na purvanua la moki na tesike ne, nae Patia, nae Mitia, nae

Elam, nae Mesopotemia, nae Yutea, nae Kapatasia, nae Pontas, nae Esia, nae Pirisia, nae Pampilia, nae Isip, nae Krit, nae Arepia, nae Lipia e lepas na vaen Saerin, a nae m̃ena pupia pulkumali naḡa Rom. Ita laḡasia tepe le Israel ruru ga, a laḡasia pe ape le Israel re sumo poli, ana sirau la apimi ataveve kieta nalelagaena. Ana ita punu ga, ita punu peve taaga temloge ke naḡa la apivisi ke kome kieta visena lala ita punu ga, la asum̃a apisa ke pupia yum̃aena la nene naḡa Ntewa naga kila.” ¹² Ana la amilan paḡisi, kiela sitomena la kokovio, ana la amninue kare narui asape sanape narui, ana la asum̃a apiuviun ke tan la apisape “!Aulai! ?Ya ne sanene?”

¹³ Ana laḡasia asu mā apitalia la nene naḡa Ninuna pimi e la ḡisi rui, la apisa apisape “E, la nene amun ga kuruta nene, nane kila ape wowe ke ne.”

Visena kiena ne Pita pan la

¹⁴ Ana Pita amio li nalologena taḡena la lualima taaga pa taaga nene, la aḡariplan la asum̃alu, apimi ase e nene, ana naga pisi manene pan la, naḡa naga pisawal sanini, pisape “Erau lala, naḡa amiu le Yu lala, a amio amiu yeririna taḡena lala naḡa amiu asike Yerusalem, amiu na ayagogon ruru inu vena nevisawal sur nene van amiu. ¹⁵ Yeririna la nene na pe amun re wii

poli, sa naḡa amiu asu m̃a apisa ke ne, peraga, komin nanagane, aora ovari ga na kolulagi nini na wa. ¹⁶ Ana suri nene naḡa amiu apisuia, naga suri nene naḡa Navisawalena Soel naga pisayu sumo rui, naḡa pisape

¹⁷ *Ntewa naga pisa, pisape*
“E legiena la nene na
pog maro nene, ḡisi na
nela ninuu van yeri-
rina la punu ga.

Ana ḡisi na narimiu lala la
avisawal kiau visena,
a ḡisi na kiamiu yar viu lala
yokorena avisu sur
lala,
a kiamiu yermarua lala,
la am̃eni nam̃eniiena
lala.

¹⁸ *Lelaga ḡa, e pog nene, ḡisi*
na neligan Ninuu,
naga vitomi ve keviu e
yarū m̃ee lala amio
sira m̃ee lala na kiau
yum̃aena,
ana ḡisi na la avisawal
kiau visena.

¹⁹ *Pisi na nekila suri lala*
nailanena e yo yau,
amio kile lala na yomar-
ava nini,
ana yoko kuruta a kapi
a pupia m̃au naḡa piu
asum̃a ga.

²⁰ *Sumo na, mrae naga imi*
malolo, a kupario
naga ḡisi na imi vivaga
sane kuruta.

Ana siraunia, legiena keviu
nene kiena ne Ntewa,
naḡa wo vaḡisi, naga
kilia imi.

²¹ *A e pogos nene narui, yaru*
ai naḡa naga vio kia
kiena ne Ntewa,
ḡisi na Ntewa tamalia
naga.”’ Soel 2:28-29

²² “Amiu le Israel lala, amiu ayagogon ruru kiau visena la nini. Yesu nene nae Nasaret, naga pe yaru naḡa Ntewa naga kipian ruru naga merarava pan amiu sape naga pe Navisaarena. Ntewa naga kila sanene nane e yum̃aena na nam̃areraena lala, a e suri nailanena lala, a e kile lala naḡa naga kila Yesu naga miyum̃aenia e maramiu nanua sumo rui. Suri la nene amiu asum̃a akilia ke ḡisi rui, ²³ ana pogos naḡa Ntewa naga mligan naga e limamiu, amiu asum̃alu am̃em̃ar naga mare, naḡa amiu atam̃an li viowa lala la asuar naga e laki torovia. Pogos naḡa amiu na pe akila re suri nene poli wa, ana Ntewa naga kilia ḡisi rui pisape ḡisi na ve sanene, ana naga tam̃ania, komin naḡa naga taveve sa naḡa naga sitom ruru nanua sumo rui veḡa kila. ²⁴ A siraunia, nam̃areraena na marena pe torokin re naḡa uarar manene Yesu poli, ana Ntewa ḡerelua naga petan nasinelaea lala na marena, kila naga mali ke sina ga. ²⁵ Naga nene naga sa naḡa visena tai kiena ne Tepet nanua sumo, naḡa naga pisayu Kristo, naḡa naga pisa, pisape

*'In na nepisu naṣa Ntewa
naga sum̃a amio inu
silaga,*

*naga sike e lepasneu na
marua, ana kila sineu
pe kurkur re nena ga.*

²⁶ *Kila sanene narui, sineu
kekara, a purmeneu
naga miau,*

*in na nepe yeririna ga, ana
neṣasine ga Ntewa
m̃arera.*

²⁷ *A Ntewa, ṣisi na ko na ve
oligan re ninuu e yo na
m̃arena,*

*a ṣisi na ko ve otam̃an re tas
nen kioṃa Yaru Wa na
yum̃ae kioṃaena me-
nunu.*

²⁸ *Ko okipian inu e mrapa lala
na malena ṣisi rui,*

*a ṣisi na sineu naga pulen
nakekarena ve keviu,
naṣa ko osuṃa omio
inu.' Yauena 16:8-11*

²⁹ *Wolai lala, in na nesape
nevisawal meraravan suri
nene van amiu. Repita ne
na nene naṣa Tepet, naga na
mare nakonua rui, la asin
naga ṣisi rui. Naga nane
kiena tampona ne nane
m̃eke e kieta yo ne, mon m̃a
pimi tol nanagane. ³⁰ Ana
pogos naṣa naga mali ke
ga wa, naga kilia rui naṣa
Ntewa pisaar m̃arera pania
pisape ṣisi na pogos tai na,
kiena lus tai naga monar
to sina ga tano e kiena
pupia lele natotanoena, sa
naṣa naga kiena lus nene
naga imi ve ṣarin suṣe va
yeririna lala, sa naṣa Tepet
nene naga pe ṣarin suṣe
sumo. Ana Tepet naga pe
navisawalena tai, ³¹ a pogos*

*naṣa suri nene naga pe
m̃alivi re poli wa, naga pisu
naṣa ṣisi na Ntewa kila
Navisaarena nene naga mali
ke sina ga e marena. Suri
nene na Tepet pisa e kiena
visena nene, naṣa pisa,
pisape Ntewa pe mligan re
ninuna e lelen marena poli,
naga pe tam̃an re tasnena pa
menun poli.*

³² *Suri ke na nene narui
naṣa imimi mesuṃa mepi-
sawal ke ne, naṣa Ntewa
naga pisirlua ke sina ga
yaru naṣa Yesu nene petan
marena. ³³ Ntewa pisirlua
naga, ana ṣerelua naga pa
metava rui, mligan naga sike
e kiena lepas na marua. Ana
sa naṣa Ntewa Arimata nene
naga pisaaria, naga mla Ni-
nuna Wa pania, a nanagane
Yesu taroṃ Ninuna Wa nene
pan imimi, ana Ninuna Wa
nene naga suṃa miyumũaen
ke suri la nene naṣa amiu
na asuṃa apisuia a naṣa
amiu na asuṃa amloge. ³⁴ E
visena kiena ne Tepet la
nene, naga pe pisayu re naga
poli, komin naṣa ve naga
re naṣa naga va metava e
peni, ana naga pisayu ga
Navisaarena nene. A kiena
visena taṣena sa m̃ena ga
nini, naṣa naga pisa, pisape*

*'Ntewa na Mava pis pa kiau
Suṣe, pisape*

*"Ko ototano e kiau lepas
marua, otom̃atea,*

³⁵ *ṣisi na inu nekila kioṃa
nasinekar lala ve sa
takue naṣa ko oviawa
ea." ' Yauena 110:1*

³⁶ Komin suri ne la nanene narui, inu sineun nesape nevisawal ruru merarava van amiu, amiu mratava nae Israel la wetelu, sane Yesu nene naṣa Ntewa mliganar naga sumo rui pe kieta Suṣe a pe Navisaarena, ana amiu asuar naga e laki torovia rui.”

Yeririna la moki naṣa amlelaga e Yesu

³⁷ Pogos naṣa yeririna lala la amloge visena nene, amloge sa naṣa miyur sinela, pano pa tol ruru nena puriu, ana la apiun tan Pita amio li nalologena taṣena lala, la apisape “?Wolai lala, ṣisi na mekila kan imimi narui?”

³⁸ Ana Pita pisa pan la, pisa pisape “Amiu punu ga, amiu avilopu amiu, ana amiu ava e nakeena e kia kiṣa ne Yesu Kristo, vena ṣisi na Ntewa naga viewo kiamiu mlamulena viowa lala. A ṣisi na Ntewa naga ligan Ninuna Wa van amiu, sane kiena nalaena tai van amiu, ³⁹ komin naṣa navisaarena naṣa Ntewa naga kila, naga kila pan amiu, a naga kila pa narimiu lala, a naga kila m̃ena ga pa yeririna taṣena lala naṣa la asike perina wa. Navisaarena nene naga sike e la naṣa kieta Ntewa na Mava naga sum̃a pio la m̃a ga.”

⁴⁰ Ana Pita sum̃a pisa ke visena wo nawere laena la moki pan la vena aimi, a naga pisa pisape “Amiu na monar aligan mlamulena

kiena ne yeririna viowa lala na nanagane, amiu na atamalia amiu vetan nakoena naṣa naga sum̃a pimi ke pan la.”

⁴¹ Ana la moki liu naṣa la amloge visena nene kiena ne Pita, la amlelaga ea, ana la apa e nakeena. A e yeririna la punu ga naṣa asike e legiena nene, la moki pe suri sane manu telu la apimi apiran la amio kiela ṣegas nene.

Li nalelagaena lala apiran la e nasinewo

⁴² Ana li nalelagaena la nene, la asum̃a apurari ke ṣelaga la nene m̃arera paṣisi, naṣa la amiyagogo ruru po silaga naṣa li nalologena lala la apian la, a lala apiran la silaga e nasinewo e kiela ṣegasia, a la asum̃a akinana lele taaga silaga, a la yepela m̃aen aora na leniena lala silaga. ⁴³ Ana li nalologena lala la amiyum̃aen suri nailanena la moki paṣisi, amio kile la moki, ana yeririna la apisu suri la nene, sinela kurkur paṣisi. ⁴⁴ Ana li nalelagaena lala, la sinela sum̃a maran taaga ga pano-o, a la asum̃a atam̃an kiela suri lala ve kiela pae ga. ⁴⁵ Sanene, la asum̃a aṣiliwilin kiela porotano lala a kiela suri make ga lala, vena la avion kana kilaveru la naṣa la atolia, va lala ai naṣa limala plasan suri laṣasia. ⁴⁶ Legiena punu ga, la nene la asum̃a apiran la

sane p̃egas taaga loyum̃a e Yum̃a Wa m̃ana ne Ntewa, a la asum̃a akinana ke lele taaga e m̃ala loyum̃a lala. A silaga nãpa la asum̃a apimpae ke sanene, ana la akekara pãpisi, a silaga lala apito ga tano e Ntewa, a la apotena pãpisi pania komin malena wo nene nãpa naga mla pan la, ⁴⁷ ana amieluar naga vanonia. A e pogos nene, yeririna tãpena m̃ena ga lala akekaran kiela p̃elaga viu wo nene p̃isa, a e legiena punu ga, Ntewa na Mava naga sum̃a tamalia si yeririna la p̃asia, naga sum̃a sikol la ke e p̃egas nen li nalologena lala.

3

Laulu tai sum̃alu mial

¹ Ana legiena tai, e nena e pog na leniena e mrae telu, ko yepekilavi, Pita amio Yoane, lalua asum̃a apa ke metava e Yum̃a Wa m̃ana ne Ntewa. ² Ana yaru tai nãpa naga paeme naga pe laulu, a e legiena punu ga la asum̃a akus naga pimi amligan naga e mralaea nene nãpa apisape “Mralaea Wo,” naga nene e Yum̃a Wa m̃ana ne Ntewa. Ana laulu nene naga tom̃a mlogi ke pan la nãpa apa ke loyum̃a. ³ Ana naga pisu Pita amio Yoane, nãpa lalua asum̃a apa ke loyum̃a, ana naga mlogin nalaena tai vetan lalua vena lalua ala suri tai vania. ⁴ Ana Pita amio Yoane, lalua atamaria yeririna nene, ana Pita pisa

pania, pisape “Mara, okira ovisu imimi sumo wa.” ⁵ Ana naga pisu manene lalua, naga m̃ape p̃isi na lalua nene ala suri tai vania. ⁶ Ana Pita pisa pania, pisape “Erau, in na pe kiau kilavaru re nena ga, ana in na kiau suri wo ga tai nãpa inu na kiau, nela van ko. Nane suri ne nanene: e kia kiena ne Yesu Kristo nae Nasaret, nevisa van ko, osum̃alu narui, oyali.” ⁷ Ana naga pulun tarar limana na p̃amarua, miila laulu nene tarlua sum̃alu, ana lana luwoka pimi po veraga. ⁸ Ana naga sum̃alu ke veraga e pogos nene, sum̃alu su, ana mialial lia. Ana pogos nãpa lalua apavini, naga taveve la, ana la ga teloka apa loyum̃a e Yum̃a Wa m̃ana ne Ntewa, nãpa yaru nene kekara pãpisi nãpa naga mial ke narui, naga sum̃a pulaula, sum̃a mieluar ke Ntewa.

⁹ Ana la nãpa asike loyum̃a apisu nãpa naga mial, a naga sum̃a mieluar ke Ntewa, ¹⁰ a pogos nãpa la apisu kilale yaru nene la apisa apisape “!Apisu ke ne! !Nanene na laulu nãpane-e! Sila ga naga sum̃a mlogin ke kilavaru vanua e mralaea nene na Yum̃a Wa, ana naga pimi po sina, naga sum̃a mialoro ke narui.” Ana la amiyuwawa ruru e suri nene nãpa pimi m̃alivin yaru nene.

Pita pisi pan la loyum̃a e Yum̃a Wa Mana ne Ntewa

11 Ana komin naṗa yeri-
rina lala la sinela kurkur
paṗisi, la akiriri apimi puna
ne la telu nene e kopkop
nene na Yum̃a Wa m̃ana
ne Ntewa, naṗa kiena kia
“Kopkop m̃ana ne Solomon.”
E yo nene, yaru nene naga
sum̃a tawa ke e Pita amio
Yoane na wa. 12 Pog naṗa
Pita pisu yeririna la nene
apimi lavisi, ana naga pisi
pan la, pisape “?E, ita le
Israel lala, sanape ne? ?
Sanape na amiu amilan ke
suri nene, ana amiu apisu
ke imimi lua sanene? ?
Pona amiu na amape imimi
ga lua mekila yaru nene
naga kilia mial e ga e
naṗareraena ga kiamimi
imimi lua yo, pona amiu
na amape imimi lua mepe
yaru wa yo, pona sanape?
!Peraga! 13 Ana Ntewa ga
naga kila suri nene, nane
pupia kieta Ntewa na naṗa
pe Ntewa kiena ne Epraam,
Aisak, a Sekop, a naga
pe Ntewa kiena ne kieta
yermarua taṗena m̃ena ga
lala. Naga kila suri wo
nene vena visirlua kia kiena
ne kiena yaru na yum̃aena
nene Yesu, e maramiu. Ana
Yesu ke ga nanene narui,
naṗa amiu aṗure naga pa
e kieta kumali keviu, ana
Paelat naga pisu sane Yesu
naga poga ga, naga pisa
pisape naga kilia molue,
ana e pog ke nene narui
amiu na apisawal m̃areraena
e marana ne Paelat asape
Yesu na pisokan ga, amiu

yepemiu mavin naga. 14 Pe
suri korena ga naṗa naga
ṗar kia naṗa asape Yaru
Wa a Yaru Mesmesu, ana
amiu na apisa sanene e pog
nene narui, asape yepemiu
mavini naga. Ana amiu na
apisa ga pa Paelat asape
sinemiun yaru nene naṗa
naga m̃em̃ar yaru mare ṗisi
rui naga kilia molue, ana
Yesu naga sum̃a ga, ana
Paelat taṗania. 15 Visae
sanene, amiu ke narui, naṗa
aṗem̃ar Purṗes nen Malena
mare rui, ana siraunia,
Ntewa naga kilamalia sina
ga naga e marena, a suri
ne na nene imimi mepisu e
kilamaramimi, ana imimi na
mesum̃a mepisawalia. 16 Kia
kiena ne Yesu ne nanene
naga kila ruru laulu nene
naṗa amiu akilia ruru naga,
naga pimi po, sa naṗa amiu
asum̃a apisu ke ne. Komin
naṗa imimi na mepiawa
m̃arera e naṗareraena na
kia nene kiena ne Yesu
narui, ana lana ne yaru
nene luwoka naga m̃arera
ruru nena ga e maramiu
nanagane.

17 “Poga ga, wolai lala.
Inu nekilia m̃a naṗa suri
la nene naṗa sumo amiu
amio kiamiu yerikawa lala
akila pa Yesu, amiu punu ga
akila komin naṗa aminue
ga. 18 Ana naga nene naga
pe mrapa kiena ne Ntewa
naṗa naga kila visena la
naṗa naga pisawalia nanua
sumo rui pimi pe lelaga. E
visena lala kiena ne kiena

navisawalena lala, naga na pisawal p̃isi rui, naṗa p̃isi na kiena Navisaarena naga monar loge viowa e tasnena. ¹⁹ Poga ga, ana amiu na monar avilopu amiu, a monar awasuṗe amiu aimi puna ne Ntewa, vena naga p̃isi na yumu plan kiamiu mlamulena viowa lala. ²⁰ Visae amiu na akila ve sanene, p̃isi na Ntewa naga kilia la nam̃areraena viu e kiamiu malena lala, a naga kilia ligan kiamiu Navisaarena nene naṗa naga mliganar ruru p̃isi rui, naga nane Yesu, naga wasuṗe ke sina ga imi. ²¹ Ana Yesu naga monar suṃa metava e peni sumo wa, vano vano tol pog naṗa yoko Ntewa sinenan sape kila suri la punu ga aimi ave urviu ke sina ga, sa naṗa naga pisawal p̃isi rui e visena lala kiena ne kiena navisawalena wa lala nanua sumo. ²² Ana lala yaru tai naṗa naga pisa sanene naga nane Mosis, a naga pisa pisape

‘Ntewa na Mava naga p̃isi na naga kila kiamiu navisawalena tai naga suṃalu su likan amiu sa naṗa kila inu na nesuṃalu p̃isi rui. Navisawalena nene p̃isi na naga ve yaru tai nae ga kiamiu yo, a amiu na monar ayagogon ruru kiena visena lala.

²³ Yeririna la naṗa la ve alogear re kiena visena lala, p̃isi na Ntewa

naga ligan plan la vetan kiena yeririna ruru la napo, vena la ava akovio.’

²⁴ Suri nene Mosis naga pisa, a navisawalena taṗena m̃ena ga lala, sane Samiuel, amio m̃ena ga la naṗa apimi mare ga, e kiela visena lala, asuṃa apisayu ke suri lala na kieta legiena nanagane la nene. ²⁵ Navisaarena lala naṗa Ntewa naga mla nanua sumo e visena lala kiena ne kiena navisawalena lala, la ape kiamiu, a amiu na asike m̃ena ga loyuṃa e naviranarena nene naṗa Ntewa naga kila p̃isi rui amio kamiu yermarua lala na sumo, sa naṗa Ntewa naga pisa pan Epraam, pisa pisape

‘Pisi na in na nekila naṗa navisa ruruena naga imi e yeririna lala na yomarava nini, naga imi kom ga e kioña lus lala.’

²⁶ Mesmesun navisaarena nene, Ntewa naga kila Yesu naga suṃalu rui sane yaru tai na kilaen kiena yum̃aena, ana naga pe mligan re pan le taṗena la poli, naga mligan ga pimin amiu p̃esia. Naga mligan Yesu naga pimi vena kila wo van amiu vaṗisi, naṗa p̃isi na naga vilopu amiu, vena amiu aligan kiamiu ṗelaga viowa lala.”

4

¹ Ana Pita amio Yoane, lalua asuṃa amlologo ke pan yeririna lala wa, ana

yaru wa lala, amio nasumonena kiena ne li nakirawoen yo lala e Yum̃a Wa Mana ne Ntewa, amio Satusi lala, la apimi lavisin la. ² La nene sinela mimi paṽisi, komin naṽa lalua asum̃a apian ke yeririna lala asape sa naṽa Yesu naga mali sina ga e marena, yeririna m̃ena ga lala akilia amal sina ga ve sa ke ga. ³ Ana atarar la luoka, apano amligan la apa e yum̃a naloge viowaena vena asum̃ate tol legiena na peni, komin naṽa yepekilavi rui. ⁴ Ana yaru taṽena la mokliu naṽa amloge visena kiena ne lalua, amlelaga ea, ana pimi tol pogos nene maran kiena ne la make ga naṽa amlelaga rui apim ape moki manene la narui, lavis tol manu ve lima, nanene sane yerm̃ene ga la ne [5000].

La aṽure Pita amio Yoane apa e kumali keviu kiena ne le Yu lala

⁵ A e kana legiena taṽena, yerkawa kiena ne le Israel lala, amio kiela nasumonena lala, amio navianena navisaluaena lala, la apimi lele taaga garu Yerusalem. ⁶ Ana la apa atotano e pupia kumali amio Anas, naṽa naga pe ṽarin li wa lala, a amio m̃ena ga li kawa taṽena laṽas, naṽa sane Kaeṽas, a Yoane, a Aliksanta, a yeririna taṽena lala na mratava m̃ana ne ṽarin li wa la nene. ⁷ Ana la akilali nalologena lalua nene asum̃alu likan la, ana la apiun naviunena tan

la luoka. Apiunia, apisape “?Ane pisape amiu lua nene akila sanene e laulu nene? ?Amiu lua akila e nam̃areraena nae pe?”

⁸ Ana Ninuna Wa pitomi pule e Pita, ana Pita pisi pan la, pisape “Inu nesum̃alu e maramiu, amiu yerkawa kiena ne le Israel lala, a nasumonena lala, ⁹ a in na nepisu sane amiu asum̃a apiun ke tan imimi imimi lua, apisape sanape e kiamimi yum̃aena wo nene naṽa imimi lua na mekila e laulu nene, a sanape naṽa imimi lua mekila naga pimi po sina. ¹⁰ Poga ga, in na nekekarar ga naṽa nela navisatam̃eena na kiamiu naviunena nene van amiu, vena amiu akilia, a vena yeririna nae m̃ena ga Israel lala la akilia. Nesape laulu ne nanene, naga nane sum̃alu sike e maramiu nam̃a, sum̃alun ke lana luwoka ga naṽa po, naga pimi po rui e nam̃areraena na kia kiena ne Yesu Kristo nae Nasaret. Yesu nene naga naṽa sumo amiu am̃em̃aria mare e laki torovia, ana naṽa Ntewa naga pisirlua ke sina ga naga mali si petan marena. ¹¹ Naga na sa naṽa Visena Wa naga pisayu naga, pisa pisape

‘Amiu li nakilaena yum̃a lala, amiu na akovenlua lawe laki tai,

naṽa nanagane naga pimi pe pupia kemraṽe na mava rui na mon lika e yum̃a.’ Yauena 118:22

12 Ana pe mrapa tañena re si tai naña ita tekilia tetol malena e poli, komin naña Ntewa naga pe mla re nena kia tañena pan ita e yomarava nini poli naña naga kilia tamalia ita ea.”

13 Ana yerkawa la nene la amilan pañisi, komin naña la apisu naña Pita amio Yoane, ape yaru kari ga, lalua pe ape yerkawa re nenaga, a lalua pe akilia re m̃ena ga suri moki poli, ana lalua nene pe sinela kurkur re nena ga. Ana la apisu kilale m̃ena ga sa naña sumo, lalua nene na amiyal loro amio Yesu silaga. 14 Ana la tañatete si awem̃ar visena kiena ne Pita narui, komin naña yaru naña lana luwoka po si rui, sum̃alu sike amio lalua nene.

15 Ana la apisa pa la telu nene apisape la ava vanua sumo wa, vena la akilia avisayu suri nene. 16 La telu nene apa vanua, ana yerkawa la nene apisayula, apisa apisape “? Pisi na ita tekila ve sanapen lalua nene? Le Yerusalem la punu ga la amloge make ãisi rui naña lalua nene akila ke pupia yum̃aena tai nene e laulu nene ne, ana ita na tañatete si tevirovia. 17 Ana popon ita tekilali sane tekila visena nene na ve va manene re si e yeririna lala, ana ve sanene ãisi na ita tevisaluñar lalua nene vena ve avis re si va yeririna lala, ve avisa re kia naña Yesu van la.”

Kumali keviu naga pialuñar Pita amio Yoane

18 Ana la apio ke sina ga la telu nene apimi loyum̃a, ana apisi m̃arera pa li nalologena la lua nene, la apisa apisape “Amiu lua nene ve avisayu re si kia kiena ne Yesu va yeririna lala, pona avian la ea.”

19 Ana Pita amio Yoane, lalua apisatam̃ela, apisa apisape “? Sanape? ? Pona mesmesu ga naña e marana ne Ntewa naña imimi ve melogear re naga, imimi na melogear amiu ga? Naga nene na popon amiu na avisali suri nene, 20 ana imimi nini, na imimi tañatete meva ruru imimi mesum̃a ne. Imimi monar mevisawal m̃a suri la nene naña imimi mepisu e kilamaramimi, a naña imimi na memloge e kiligamimi.”

21 Ana yerkawa la nene la apisi manene sina ga pa lalua, apialuñar la sa si nanua sumo, siraunia la apisa apisape lalua na akilia ava vanua, komin naña la pe aña re si mrapa nalaen nakoena van lalua poli, vanon naña yeririna lala la asum̃a amieluar ke Ntewa komin ya naña pimi m̃alivi e laulu nene, 22 naña e pogos nene, yaru nene naga kiena kas na taulu pa lualima yam vari ãisi rui.

Leniena kiena ne li nalela-gaena lala

23 Pogos naña Pita amio Yoane, lalua apa vanua, na añasuñela ke sina ga apa

e p̃egas nen li nalelagaena lala. Ana lalua apisawal visena lala nãpa yerkawa lala kiena ne yaru wa lala a nasumonena lala apisa,²⁴ a pogos nãpa li nalelagaena la nene la amloge visena la nene p̃isi, la amlen pa Ntewa. La apisa, apisape “Ntewa na Mava, ko osii sinapane a porotano a sive, a suri punu ga nãpa sike e yomarava nini.²⁵ Imimi mesitom̃al s̃i kioṃa Visena Wa tai, nãpa yermarua repimimi Tepet, nãpa naga na pe kioṃa yeririna tai, naga pisawal e nam̃areraena kiena ne Ninuna Wa, nãpa naga pisa sanini, pisapenua

‘?Komin ya ne yaru la nãpa pe amlelaga re poli sinela mimi manene sanene?’

?Komin ya ne yeririna lala la asuṃa asitom ke asape akila yum̃aena viowa, ana komin ya ne la akila p̃ele ga?

²⁶ *Parin sũpe lala na yomarava nini, la asuṃalu asururuia vena akila mara, a yerkawa lala apimi lele taaga vanonia,*

ana la amninue nãpa akila ke mara amio Ntewa na Mava, a amio kiena Navisaarena.’ Yauena 2:1,2

²⁷ Ntewa na Mava, imimi mepisu visena nene pe lelaga, nãpa mesmesun nena

ga e kiamimi pogos nana-gane, vanon nãpa mesmesu ruru e pulkumali nini, Erot amio Ponses Paelat, amio le Israel lala, amio yaru tãpena la nene, la sinela kari manene la yeririna na yum̃ae kioṃaena nene nãpa Yesu, nãpa naga pe Navisaarena nãpa ko omiawawo naga, ana la asitom ke asape akila viowa manene vania.²⁸ La nene la apimi lele taaga vena akila sanene, ana la akila mesmesu ga e ya nãpa ko ositom ruru sumo rui ana ko omliganaria osape naga monar ve sanene.

²⁹ “Ana Ntewa na Mava, imimi na mepiun mesape ko ositom̃al ruru ke visena m̃arera la nãpa la asuṃa apisa pan imimi, ana imimi mesitom mesape ko oila imimi, kioṃa yeririna na yum̃aena lala, vena kila imimi na mevisawal kioṃa visena, nãpa kiamimi sitomena lala ve yuyuwawa re, a nãpa ve memarau re.

³⁰ A imimi na meviun m̃ena ga tan ko okianlua lumoṃa, vena okila namaiena lala awo sina, a vena mekila kile lala pona suri nailanen lala, e kia kiena ne kioṃa Yaru Wa na yum̃aena, nãpa Yesu.”

³¹ A pogos nãpa la amlen sanene p̃isi, yo nene nãpa la apiora ke ea naga kululu, ana Ninuna Wa naga pitomi pulen la, ana kila la apano apisawal visena kiena ne Ntewa, nãpa kiela sitomena lala m̃arera la e naga

sane.

Li nalelagaena lala la amiila la ga e kiela suri lala

³² Ana e poglis nene, p̃egas nen li nalelagaena la nene, kiela malena pimi po pãisi, sane la sinela taaga ga, a kiela sitomena m̃ena ga taaga ga, kila na sane pe yar re tai nãa naga m̃areran sitom visave kiena suri lala la ape kiena ga, ana la asum̃a atam̃an kiela suri lala vena ve kiela pae ga.

³³ A li nalologena lala la asum̃a apisawal ke e maran yeririna lala, nãa kieta Sũpe Yesu, naga mali sina ga e marena rui, a visena nene kiena la nene, naga nam̃areraena keviu sike ea, a li nalelagaena lala la apisu nãa e pogos nene, Ntewa naga sum̃a pisa ruru la pãisi e kiena lemamiena pan la. ³⁴ Pe lala yar re tai nãa e kiela p̃egasia nãa naga limana plasan suri tai poli, komin nãa yaru la nãa la kiela porotano lala pona m̃ala yum̃a lala, la asum̃a apuliwilin plan ke suri la nene, ana la asum̃a ãpar kana kilavaru ne lala apimi, ³⁵ amligan e limana ne li nalologena lala. Ana siraunia, li nalologena lala la asum̃a amlip̃ere kilavaru la nene pan li nalelagaena la nãa limala plasan suri la p̃asia.

³⁶ Lala yaru tai nene nãa naga taveve p̃elaga nene naga yaru nãa Yosop, nãa

naga molue e lus kiena ne Livae, naga paeme e purvanua nene Saepras, a nãa li nalologena lala la amligan ke sina ga kiena kia tãena tai, asape Panãas, nãa kia nene kana kinasa asape “Yaru na visirluaen sĩtomena kiena ne yaru tãena lala.” ³⁷ Naga kila yum̃aena wo tanea sanene narui, nãa naga p̃iliwilin lua kiena kinakinas nen porotano tai, ana naga mla kana kilavaru pimi, ana naga mligan e limana ne li nalologena lala.

5

Ananaias amio wona Sapira

¹ Ana yaru tãena tai, kiena kia Ananaias, nãa naga wona kiena kia Sapira, naga m̃ena ga p̃iliwilin lua kinakinas nen porotano tai nãa lalua kiela, ² ana mla kana kilavaru kom̃asa, mla pimi mligan e limana ne li nalologena lala. Ana naga p̃arwan kilavaru na porotano nene kom̃asa, pe kiela ga lalua, ana wona m̃ena ga kilia m̃a suri nene, nãa lalua apranaria. ³ Ana Pita pisa pania, pisape “? Ananaias, sanape nãa ko otam̃an Yermare pimi kila kare sinem̃a sanene, ana ko opisa kotalia Ninuna Wa, nãa ko osum̃a omlarar ke kilavaru na porotano nene kom̃asa wa? ⁴ !Opisu ke ne! Poglis nãa ko pe opilwilin lua re kinakinas nen

porotano nene poli wa, ana pe kiena ai? Naga pe kioṃa ga. A pogos naṓa oṓilwilinia, kana kilavaru ṃena ga punu ga sike e limana ai? Sum̃a ke e lumoṃa wa. Ana pogos naṓa ko opisaar osape owar punu va Ntewa, ko monar okila ga sanene narui. ? Ana ya ne kila kioṃa sitom-ena naṓa okila si visokanena sanene? !Ko na pe opisa kotalia re ga yaru la poli, ko na osuṃa opisa kotalia ke Ntewa narui!”

5 Pogos naṓa Ananaias mloge visena nene, veraga ga naga mloru pito tano e porotano, naga marṓantop nenaga. A la naṓa la amloge kiena lologena nene, la amiyuyuwawa paṓisi. 6 Ana kiela yaru viu lala la asuṃalu, la amluluwo tasnena, akus pa vanua, ana apa asinia.

7 Lavisi aora ve telu warovia, ana wona nene Sapira, naṓa naga mninue ke suri ya naṓa pimi e wona na yerm̃ene wa, naga towe pimi loyumuṃa. 8 Ana Pita piun tania, pisape “Sapira, ko ovisawal van inu. ? Nanene na kilavaru punu nene na kinakinas nen kiamiu porotano nene, pona peraga?”

Ana sira ṃena ga nene pisokan, pisataṃea, pisape “Peraga, naga ga nene.”

9 Ana Pita pisi pania, pisape “?Sanape na amiu lua apisokan sanene? !Amiu lua na apiranaria naṓa asape akilali Ninuna kiena ne

Ntewa na Mava! ?Omloge ke yaru la ne amial ke apimi e pulutava ne? !La nene asin woṃa na yerm̃ene rui apimi, a ṓisi na nanagane ga ne la aviar ko ṃena ga ova vanua!”

10 Ana pogos naṓa sira nene mloge visena nene kiena ne Pita, naga ṃena ga mloru mesmesu ke e lana ne Pita veraga, marṓantop nena ga. Ana yaru viu la nene apimi si loyumuṃa, la apisu naṓa sira ṃena marṓan ṓisi rui, ana la apiar ke ṃena ga tasnena pa vanua, la apa asinia ṃeke ga e yepas nen wona na yerm̃ene. 11 Ana li nalelagaena na suṃare lala, amio yeririna taṓena ṃena ga lala naṓa la amloge suri nene, la sinela kurkur, amiyuyuwawan paṓisi.

*Kile lala amio suri naila-
nena lala*

12 Ana e pogos nene li nalologena lala la asuṃa akila ke kile la moki na nam̃areraena kiena ne Ntewa, amio ṃena ga suri nailanena la moki, e marana ne yeririna lala. A silaga, la nene amio li nalelagaena taṓena lala la asuṃa apimi veraga e Kopkop ṃana ne Solomon, e Yumuṃa Wa Mana ne Ntewa. 13 Yeririna taṓena lala la asuṃa apatanon la, ana yeririna la naṓa la pe amlelaga re poli, la moki amaraun naṓa ava akuspran la amio la. 14 Ana silaga, yerm̃ene laṓasia amio sira lala la amlelaga e Yesu,

la apimi ape moki naŕa moki manene laa, ana la nene, Ntewa na Mava sum̃a sikol la ke e ŕegas nen li nalelagaena lala. ¹⁵ Komin suri m̃ena ga la nene, yeririna lala asum̃a aŕure kiela li namaiena lala apimi, ana la amligan la aŕeke e m̃ala tog a m̃ala takue lala e isinen mrapa. Ana lala akila sanene vena visae Pita war ro e yo nene, visae ninuna ga, ana visae tol laŕasia, ŕisi na la aloge wo sina. ¹⁶ A puna lala naŕa e narin pulkumali lala naŕa la lavisin Yerusalem, la m̃ena ga apimi, a aŕereari kiela li namaiena lala apimi, amio laŕas naŕa yermare lala apa e la, ana li nalologena lala la akila ruru la sina ga amloge po.

Yerkawa lala nae Israel la apuarar li nalologena lala

¹⁷ Ana ŕarin yaru wa, amio kiena erau lala, naga nene na ŕegas nen Satusi lala nae e yo nene, la apieluen manene la li nalologena lala, ¹⁸ ana la apa apuarar la, akuan la e yum̃a nakoena amio li viowa lala naŕa la asike e ŕisi rui. ¹⁹ Asum̃a pano-o kolemallo, ana navisi kiena ne Ntewa naga pimi, pietava e mratava na yum̃a na koena nene, ana naga sumon li nalologena lala amolue sina ga. ²⁰ Naga pisa pan la, pisape “Amiu ava si asum̃alu asu loyum̃a e Yum̃a Wa Mana ne Ntewa, amiu avisawal si visena lala na

malena viu nene va yeririna lala.”

²¹ Ana li nalologena lala la amlogear visena nene, a pogos naŕa yemlagi merarava, la apa si loyum̃a e Yum̃a Wa Mana ne Ntewa, la asum̃a amlologo.

Kumali keviu nae Israel naga pisi pa li nalologena lala

Ana kolulagi ke ga nene na wa, ŕarina ne yaru wa amio kiena erau la nene, la apio nasumonena taŕena lala nae Israel vena la aimi atotano e kiela kumali keviu. La nene am̃ape li nalologena la asike e yum̃a nakoena na wa, a pogos naŕa la apimi veraga sanene ŕisi, la amligan visena pa e yum̃a na koena vena li nakirawoen yo lala aure la aimi.

²² Ana pogos naŕa apa atol yum̃a nakoena, la pe aŕnal la re poli. Ana la aŕasuŕe ke sina ga apimi kumali, apisawal pan la, apisape ²³ “Pogos naŕa mepa metol yum̃a nakoena, moŕnal pulutava m̃arera ga, akiar ruru ga mon m̃aga, a li nakirawoen yo na yum̃a nakoena lala asum̃alu asum̃a e mratava nene. Ana pogos naŕa mepietava, mepa loyum̃a, pe moŕna re yaru tai poli.” ²⁴ A pogos naŕa yerkawa lala kiena ne yaru wa lala a nasumonena kiena ne nakirawoen yo e Yum̃a Wa Mana ne Ntewa, la amloge visena nene, la aminue kare ga e li

nalologena la nene narui, m̃a sanape na sanene.

²⁵ A e pogos nene, yaru tai pimi pisa suri tařena tai pan la, pisape “!Aulai! Yeririna la nene nařa amiu amligan la e yuńa nakoena, la asuńalu asike loyuńa e Yum̃a Wa, la apian ke si yeririna la rui.”

²⁶ Ana pogos nařa nasumonena nene mloge, ana naga amio kiena li nakirawoen yo lala, la apa ařere nalologena la nene apimi ke sina ga, ana la akila ga e řelaga nařa malumu ga, komin nařa la amaraun asape sařisi yeririna lala nae e yo nene řisi na la akovela vanonia.

La ařure li nalologena lala apa ke sina ga e kumali keviu

²⁷ La nene ařere li nalologena lala apimi loyuńa, ana la akila la asuńalu ase marana ne yerkawa la nene. Ana řarina ne yaru wa naga piun tan la, naga pisi pan la, pisa pisape ²⁸ “? Sanape na sanene? Imimi na mepisalupar amiu m̃arera rui, mesape řisi na amiu na ve avisayu re si kia kiena ne yaru nene va yeririna lala, pona avian la ea. ? Ana nanagane sanape? Amiu na akila m̃aga pano-o yo nene nařa Yerusalem naga pulen kiamiu visena la rui, a amiu na asuńa apisa ke asape imimi ke nařa mepe purřes nen marena kiena ne yaru nene narui.”

²⁹ Ana Pita amio li nalologena tařena lala

apisatańela, apisa apisape “Imimi na monar melogear Ntewa taulu nařa melogear yeririna.

³⁰ Amiu na ańeńar Yesu rui, amiu asuar naga e laki torovia, ana Ntewa na Maya kiena ne kieta yermarua lala naga kila si naga mali ke sina ga petan marena. ³¹ Ntewa nene naga pisirlua naga rui, vena naga suńa e lepasnena na řamarua, vena naga ve kieta Nasumonena a vena ve kieta Natamaliaena. Ntewa naga kila sanene vena le Israel lala akilia avilopu la, a vena naga kilia viewo kiela mlamulena viowa lala. ³² A imimi, imimi navisuen suri la nene e kilamaramimi rui, a navisawalena va yeririna lala, naga nene imimi memio Ninuna Wa nene nařa Ntewa naga mla rui pan yeririna la nařa amlogearia.”

Kameliel naga pisi e kumali keviu

³³ Ana pogos nařa la nae pupia kumali nene la amloge visena nene, miyur la pa řisi, ana kila sane la sinela kari li nalologena la pařisi, ana la sinelan asape alipere la sa nařa la monar amare.

³⁴ Ana lala yaru tai, nařa la asuńa apatanon ke naga, nařa naga pe Varasi, naga pe navianena navisaluaena tai, kiena kia Kameliel, naga suńalu pisapenua aure li nalologena lala la ava vanua sumo wa. ³⁵ Ana naga pisi e kumali keviu nene, naga

pisa pisape “Yerkawa nae Israel lala, amiu amaram̃e amiu, amiu na monar asitom ruru suri nene naṓa amiu na sinemiun asape akila van la nene. ³⁶ Amiu asitomyuli yaru naṓa Tutasi. Nanua ga ne, pe nakonua manene re poli, naga suṃalu, naṓa naga pisa pisape naga pe yaru m̃a tai ne, a suri sane yaru la ponotia vari naṓa la apa apiran la amio. Ana la aṃem̃ar naga rui, la aṃenetetain kiena yeririna lala, a kiena ṓegas nene naga pimi pe suri korena rui. ³⁷ Siraun naga nene, nane e poglis nene naṓa la apolo viraviran yeririna lala, Sutas nene naṓa nae Kalele, naga m̃ena ga suṃalu, naga ṓere yeririna lala ataveve naga. Ana sir-aunia, la aṃem̃ar m̃ena ga naga mare, a la aṃenetetain m̃ena ga kiena yeririna lala apa apeve taaga.

³⁸ “Poga ga narui, a e suri nene naṓa ita tesuṃa tepisayu ke ne, inu nepisa ke sanini, nesape ṓisi na ita na teligan yeririna la nene la asuṃa ga sanene, ṓisi na ita ve tekila re suri tai van la. Naga nene komin naṓa visae kiela sitomena pona kiela yum̃aena nene naga molue ga kome yeririna, ṓisi na suri m̃ena ga nene monar loru ne, ³⁹ ana visae naga molue e Ntewa, ita na taṓatete tevisaluṓaria. A visae ita tekilali naṓa tevisaluṓaria,

pona ita na tevisu naṓa sane tesuṃa tesuwo ke yum̃aena wo kiena ne Ntewa tai.”

La amlil li nalologena lala

⁴⁰ Ana kumali keviu naga mloge visena namasisuena kiena ne Kameliel nene, naṓa pisapenua ve akila re suri tai va li nalologena la nene, a la apisa apisape ṓisi na la ataveve ga ve sa naṓa naga pisa. Ana la apio li nalologena lala apisape aimi si loyuṃa, ana la amla narin nakoena pan la, amlil la, apisi m̃arera ke sina ga pan la, apisape la ve avian re si yeririna lala e kia kiena ne Yesu, ana siraunia, la amligan plan la apano.

⁴¹ Ana li nalologena lala apa vanua e pupia kumali nene, ana la pe amloge re piowa poli, amloge ga po paṓisi komin naṓa Ntewa naga pisu la sane la atorokin kemua naṓa atol memawaena e maraṓa ne yeririna lala, vanon kia kiena ne Yesu. ⁴² Ana lala pe amlogear re nena kiela yerkawa la nene, ana legiena punu ga, loyuṃa e Yum̃a Wa Mana ne Ntewa, a loyuṃa lala e yum̃a m̃ana ne yaru lala, la pe amligan re nenaga naṓa la apian ke yeririna lala, a la amlologon ke Nalologena Wo nene kiena ne Yesu, asape naga pe Navisaarena.

6

La apu ṓarin yeririna nai-laena la olua

¹ Ana e pogos nene, nalogena kiena ne Yesu lala apimi ape moki manene la narui, ana nasinemimiena tai pimi likan la. E lepas tai, le Yu la naṣa apisi ke kom Kris, a e lepas taṣena, le Yu la naṣa apisi ke ga kome kiela visena, naṣa Epru. Ana la nene naṣa la apisi kom Kris, la asum̃a apisimumun ke apisape e legiena punu ga, pogos naṣa la apion kiela narin naiilaena la pan letano lala, ana la akila pe po re nena ga poli pa kiela letano lala. ² Ana li nalogena la lualima taaga pa lua amloge visena nene, la apio viraviran make nalogena lala punu ga vena aimi lele taaga, ana la apisi pan la, apisa apisape “Wolai lala, pe pon re naṣa imimi meligan yum̃aena na visawalen visena kiena ne Ntewa poli, vena imimi mesum̃a mevisuar ga yum̃aena taṣena la nene. ³ Visae ve sanene, amiu na monar akilali naṣa akale kiamiu yeririna la ṣasia ve olua, naṣa la kiela kia po e maran yeririna lala, a naṣa la apulen Ninuna Wa, a naṣa la yepela m̃aen yum̃aena, vena ṣisi na mevisiri plan la la ave narin ṣegas na visuar ruruen yum̃aena taṣena la nene. ⁴ Ana sanene, ṣisi na imimi li nalogena lala, sinemimi la wetelu kilia sum̃alu m̃arera su silaga e yum̃aena na leniena a navisawalen Visena Wa kiena ne Ntewa.”

⁵ Ana la ne e ṣegas ke-viu nene, la amloge sitomena nene, ana la akekaran manene paṣisi, ana la am̃al yeririna la olua sa naṣa la apisa. La olua nene naṣa la am̃alia, ana Stipen tai, naṣa naga pe yaru m̃arera tai naviawaen e Ntewa, a naga pulen Ninuna Wa, amio m̃ena ga Pilip, a Pokaras, a Nikeno, a Timon, a Pamenas, a yaru nae Antiok naṣa Nikolas naṣa naga pe pe Yu re poli, ana naṣa naga m̃elaga e Ntewa kiena ne le Yu la rui. ⁶ Ana la aṣure yeririna la olua nene la apimi asum̃alu e marana ne li nalogena lala, vena la aligan limala te ṣarila, a la ayawawo la.

⁷ Ana suri nene naṣa la akila, kila sane silaga, visena kiena ne Ntewa naga sum̃a telivi laa e yaru la narui, a ṣegas kiena ne nalogena lala garu Yerusalem pimi moki laa narui, naga pa tawa m̃ena ga e yaru wa kiena ne le Yu la moki narui, ana la m̃ena ga akus nalelagaena.

Le Yu laṣasia aṣere Stipen pa e kiela pupia kumali

⁸ Ana la olua nene, lala yaru tai naṣa Stipen, naga pe yaru tai naṣa naga pulen lemamiena kiena ne Ntewa, a naga pulen ke m̃ena ga pupia nam̃areraena kiena ne Ntewa, kila sa naṣa naga miyum̃aen kile la moki a suri nailanena m̃ena ga pa yeririna lala. ⁹ A le Yu laṣasia naṣa asike e yo nene,

la pe akekaran re nena Stipen poli, ana la sinelan asape akila veveyuena vania. La nene, le Saerin lala, a le Alikantrea lala, naṣa la asike Yerusalem e pogos nene, amio m̃ena ga le Silisia laṣasia a le Esia laṣasia, naṣa la apimi asikolila. La moki nene la sane ṗegas taaga ga, naṣa la asum̃a api-ora ke lele taaga silaga e yum̃a tai na leniena kiena ne le Yu lala. ¹⁰ Ana la nene la akilali naṣa avisaluṗar Stipen, pano pano-o peraga, komin naṣa Ninuna Wa naga sum̃a kila ke Stipen naga pe manmarua ruru po e kiena visena lala, ana kiela visena na sinekar lala taṗatete nena ataulu naga narui. ¹¹ Ana la apa am̃al sina yeririna laṣasia vena la ava avisa kotalia yerkawa lala, ana la nene la apa apisawal pan la, apisape “Imimi memloge yaru nene naga pisi na, pisa kare Navisaluaena kiena ne Mosis paṗisi wa, a naga ṗarnena kare m̃ena ga suri wa kiena ne Ntewa paṗisi.”

¹² Ana e ṗelaga nene, la akila nasumonena lala, a kiela navianena ṇa navisaluaena lala, amio m̃ena ga yeririna taṗena la moki, la sinela pilulun Stipen paṗisi. Ana la apimi apuarar naga m̃arera, aṗure pa e pupia kumali kiena ne le Yu lala. ¹³ Ana e pogos nene narui, visena na visokanena la molmolue pimi pe moki laa sane, naṣa apisayu kare Stipen, apis-

apenua “Sila ga yaru nene ṗarnena kare luen ga kieta Yum̃a Wa m̃ana ne Ntewa, a e m̃ena ga e Navisaluaena kiena ne Mosis. ¹⁴ Imimi memloge naṣa naga pisayu Yum̃a m̃ana ne kieta Ntewa nene, naṣa naga pisa pisape ṗisi na yaru suri nene nae Nasaret naṣa Yesu, ṗisi na naga we plan Yum̃a Wa nene, a ṗisi na naga vilon m̃ena ga kieta ṗelaga marua lala naṣa Mosis naga mla kemua pan ita nanua sumo laa rui, naṣa ita tepuarar ruru la asum̃a ga pimi tol nanagane. !Yaru suri nene naṣa Stipen naga sum̃a pisawal ke suri la nene, naga kila kare ruru ita paṗisi ne!”

¹⁵ La amloge visena nene, ana apilon ṗarila lala akirava apisu Stipen vena naga visataṃe visena la nene, ana pogos naṣa la apisuia, la apisu marana na sa ga marana ne navisi narui.

7

*Visena kiena ne Stipen:
Naga sunyu ṗesan Epraam sumo*

¹ Ana ṗarin yaru wa naga piun tan Stipen, pisa pisape “?Ana ko, ko na opisa ya? ? Lelaga naṣa ko osuṃa opisawal ke visena la nene sa naṣa la asum̃a apisa ke ne, pona peraga?”

² Ana Stipen pisataṃea, pisape “Ata lala a wolai lala, amiu ayagagon kiau navisataṃeena sumo wa. Pisi na in na nevisayu repita marua la sumo wa.

Nakonua konua rui, yer-marua Epraam naga sum̃a e kiena purvanua naña Koltea, e pupia lepas nen yo nene naña Mesopotemia, ana kieta Ntewa na Naurarena naga pimi m̃alivinia, ana pisawal pania, pisape ³ ‘Ko na monar omolue e mom̃a mratava, a e kioṃa yo, vena ova e purvanua tai naña p̃isi na in na nevisa van ko.’

⁴ Ana Epraam naga molue e Koltea, naga pa sike e pulkumali naña Aran sumo, vano vano-o tol pogos naña arimana naga mare, ana Ntewa p̃ere naga pimi sike e purvanua nini naña ita tesike e nanagane.

⁵ “Ana poglis naña Epraam naga pimi tol yo nene, ana Ntewa naga pe mla re nena nariṃ kinakinas nen porotano tai pania, a e pogos nene Epraam naga pe p̃ar re m̃ena narina la poli wa, ana naga p̃uarar m̃areran ga navisaarena naña Ntewa naga pisaar m̃arera pan sumo rui, naña naga pisaar pisape p̃isi na purvanua wetelu nene naga ve kiena ne Epraam amio kiena lus lala naña aimi siraunia.

⁶ Ana visena naña Ntewa naga pisa pa Epraam e poglis nene, sanini, naña Ntewa naga pisa pania, pisapenua ‘Kioṃa lus la nene p̃isi na la ava ase purvanua taṓena, ana yoko la ayum̃ae korena van kana suṓe lala, naña p̃isi na la akila viowa manene van la vaṓisi,

vano-o tol kas ponotia ve vari.

⁷ Ana siraunia, p̃isi na in na nela naliṓereena van purvanua nene, a p̃isi na nela m̃ena ga nakoena van kiena yeririna lala, a p̃isi na inu neure plan ke sina ga kioṃa lus la nene, vena la awa-suṓela aimi alotun inu e yo nena naña in na nemla pan amiu.’

⁸ “Ana e poglis nene Ntewa naga pisa p̃elaga na p̃aviu pa Epraam, sane totou na navi-ranarena nene naña Ntewa naga kila amio naga, ana pogos naña narina naña Aisak naga paeme, legiena olua p̃arovia, ana Epraam kila p̃aviu e naga. Ana siraunia, Aisak naga m̃ena ga kila sa ke ga nene pa narina naña Sekop, a p̃isi na Sekop m̃ena ga naga kila pa narina la lualima taaga pa lua nene, naña nanagane ita tesum̃a tepio la ke sane la ape p̃arin arimata nasumo lala.”

Stipen pisayu Yosop

⁹ A Stipen naga sum̃a pisi ke ga wa, naga pisa pisape “Ana Yosop naga pe p̃arin arimata la nene tai, ana wenla taṓena la nene la apieluen naga paṓisi, ana la aṓiliwilin lua naga vena vanon yum̃ae korena e purvanua naña Isip. Ana Ntewa naga sike amio naga e yo nene, ¹⁰ a miila naga e kiena pogos m̃arera lala, panopano kila

naña p̃arin supe nae Isip nene, naña kiena kia Pero, naga pisu manmaruaena kiena ne Yosop po paṽisi, ana Pero nene mligan pupia yum̃aena lala navisuaren kiena purvanua e limana ne Yosop naga taaga.

11 “Ana e pogos nene narui, ana pupia pogos na viso tai garu Isip a e yo kiena ne m̃ena ga repita lala naña Kenan, ana la amloge pi-owa vanon paṽisi, a la apisu sane peraga narui, pe kala kinanena re si po laa rui. 12 Ana yermarua Sekop, naga mloge naña kinanena laṽasia na wilwilinena suṽa ke ma Isip wa, ana naga mligan narina la nene, naña la ape p̃arin arimata lala, vena la ava metava ma Isip vena awar kala kona laṽasia. Naga nene naña sane la apa p̃esan ga ma Isip na wa. 13 Ana yam luan naña la apa ma Isip sanene, Yosop naga pisa lologia naga pa wenla lala, a suniena na mratava la nene kiena ne Yosop naga pa tol m̃ena ga Pero. 14-15 Ana Yosop naga mligan visena pa pa arimana naña Sekop, pisape naga amio la punu ga na mratava m̃ana la monar avami asike amio naga, ana Sekop amio na mratava m̃ana lala apavini, la punu ga la lualima olua pa lima, la apa asike ma Isip. La apa asuṽa pano pano-o, ana siraunia Yosop nene amio kieta yermarua taṽena la nene la amarmare ga e yo

nene. 16 Ana ko pa taṽena ga rui, la aṽar si puriula lala aṽasupe sina e yo kiena ne la nene, e yo tai kien kia Sekem, ana la asinila e lotap tai naña yermarua Epraam naga pul lua nanua sumo rui tan le Amaro lala.”

Stipen pisayu Mosis

17 Ana Stipen naga suṽa pisi ke na wa, pisape “Ana kieta yeririna lala asike garu Isip tol si kas moki paṽisi, ana la akapuru apimi ape moki manene la narui, ana Ntewa naga pisu sane naga torokin ruru kana pogos naña naga kila sa naña naga pisaar pa Epraam sumo p̃isi rui, pisape p̃isi na naga were plan kiena lus lala e kiela nayum̃ae korenaena. 18 Ana e pogos nene p̃arin supe viu taṽena tai naga suṽalu garu Isip rui, naña naga mn-inue suniena kiena ne Yosop nanua sumo amio kiena na mratava m̃ana lala, 19 ana naga kila kare manene laa kieta lus la nene na nanua sumo, naña naga m̃areran la ga vena la aligan kare ga narila lala asuṽa ga vena amarmare, vena ve akapuru re si avim ave moki.

20 “Ana e ke e pogos nene, Mosis naga paeme, naña naga pe sisi tomtom tai naña pe sisi tanea po paṽisi. Ana arimana amio anena, lalua apisuar wan ga sisi nene e m̃ala loyuṽa pano pano-o tol kupario telu, 21 ana sirau-nia, lalua akila p̃ele si yonia, ana lalua monar aligan lua naga. Ana siraunia, loñearu

kiena ne p̃arin suṣe ga nene naga m̃alia, ana naga sane kuslua Mosis, pisuaria vena ve narina. ²² Naga sum̃a kapuru m̃a sanene pano-o, ana la asum̃a apian naga e manmaruaena kiena ne le Isip lala, ana naga kapuru pa pe yaru m̃arera tai a pe yaru na visena na manmaruaena a yepen m̃aen m̃ena ga yum̃aena.”

Mosis naga sinenan sape tamalia le Israel lala

²³ Ana Stipen naga sum̃a pisa ke, pisape “Ana pogos naṣa Mosis, kiena kas pa tol sane lualima yam vari, naga sitom̃al si le Israel taṣena la naṣa la asike na, naṣa la sa ga wenla ga lala, ana naga sum̃a siar pa m̃alivin la towe m̃aga. ²⁴ Ana pogos tai naga pano, m̃al naṣa yaru nae Isip tai sum̃a m̃e ke yaru nae Israel tai, ana naga pa miila yere Israel nene, ana naga kilamaran pa yaru nae Isip nene, m̃em̃ar naga mare. ²⁵ Naga nene komin naṣa Mosis naga sitom ke pa p̃isi rui pisape p̃isi na Ntewa naga ligan lua naga vena natamaliaena kiena ne kiena yeririna la nene, ana e pogos nene le Israel lala la pe apisu kilale re poli wa naṣa asape p̃isi na Mosis kila sanene van la.

²⁶ “Ana yemlagi ke sina ga e legiena taṣena, naga m̃al le Israel lalua asum̃a asu la a aṃe la m̃aga, ana naga panon pisape visaluṣar naṣa lalua ve awela re sina, a naga pisape kilali naṣa lalua

atalopan la sina. A naga pisa pan la, pisape ‘E, amiu lua ayagogo. ?Sa ga naṣa amiu lua nene ape welelai ga rui, sanape na amiu lua akila kare amiu ke sanene?’

²⁷ “Ana naga naṣa pe kila mesmesu re pan naga komṣas nene poli, naga suponlua Mosis pa perina, ana pisa pania, pisape ‘?Sanape? ?Ane mligan lua ko pisape ko ove kiamimi yerkawa, a vena ko oliṣere imimi sanene? ²⁸ ?Pona ko sinom̃an osape owem̃ar inu ve sa naṣa om̃em̃ar yaru nae Isip nene nakoneva, ne?’

²⁹ “Ana poglis naṣa Mosis naga mloge visena nene, mloge piowa paṣisi, naga sum̃alu, pionlua petan Isip, pure pa sike e purvanua taṣena tai, kiena kia Mitian, ana naga sike e yo nene piavi laa sane, a narina na yem̃ene luwoka ga, apaeme e yo nene.”

Mosis mloge Ntewa pisi pania

³⁰ Ana Stipen pisa pisape “Ana Mosis sike e yo nene pano tol si kas lualima yam vari, ana legiena tai naga sum̃a e yokorena tai, lavisin pupia tavie naṣa Sinae. Ana e yo nene naga mali navisi tai pimi m̃alivinia e kapi naṣa kekan purlaki wetelu tai. ³¹ Ana Mosis naga milan suri nene ana sinena kurkur paṣisi, ana naga pa laa lavisin purlaki nene vena visu ruruia. Ana naga mloge pulgona ne Ntewa,

³² naña pisa pisape 'In na nepe Ntewa kiena ne repim̃a lala, sane Epraam, Aisak, a Sekop.' Ana Mosis telm̃anin pañisi, naga maraun visuena. ³³ Ana Ntewa na Mava naga pisa si pania, pisape 'Ko oyenlua kiom̃a kulus nen lam̃a, komin yo na ko osuñalu osike e ne, naga pe yo wa tai naña. ³⁴ Ana in na nevisa van ko sanini, nesape inu nepisuveve ruru naloge viowaena kiena ne kiau yeririna la garu Isip ñisi rui, a nemloge kiela tagiena ñisi. In na nepimin ke nesape neure plan la narui, a opisu ke ne, inu nesuñā nemligan ko m̃ena ga nesape ko owasuñe si ova garu Isip sumo wa, vena ove kiau yeririna nakilaen yum̃aena nene.' "

Le Israel lala yepela mavin Mosis

³⁵ Ana Stipen naga sum̃a pisi ke pan la na wa, naga pisa pisape "A Mosis nene, naga ke nanua sumo yepela mavin naga narui, naña la apisa visena ne nanene narui, apisape '?Sanape, ane mligan lua ko vena ko ove kiamimi yerkawa, a vena ko oliñere imimi sanene?' Ana Ntewa ke ga naña naga mligan kiena navisi naga pimi teke e purlaki naña kapi kekan ke ne, vena ligandar si Mosis naga ve suñe a ve natamaliaena kiena ne le Israel lala. ³⁶ Ana Mosis ke ga nanene na wa, naña naga sumon le Israel lala amolue garu Isip, la apimi. A silaga,

garu Isip, a e Sive Naña Pivaga, a kas lualima yam vari ke sina ga e ga e yokorena, naga sum̃a kila kile lala na nam̃areraena kiena ne Ntewa, a suri nailanena lala pan la. ³⁷ A Mosis ke ga nene na wa, naña naga pisawal pa le Israel lala, naga pisa pisape 'Ntewa naga ñisi na naga ligandar ga amiu yaru ga tai, sane kiamiu navisawalen tañena tai, sa naña naga mligandar inu sumo rui.' ³⁸ A Mosis ke ga nene na wa naña naga sum̃a amio repita marua lala a amio le Israel tañena lala, poglis naña la amialoro ke e ñegas taaga e yokorena, a naga ke ga naña sum̃a amio navisi nene naña pisi pania meta e tavie naña Sinae. E pogos nene narui, Ntewa mla visena namalena pa Mosis ne na nene, ana Mosis kus pitomi kian pan la.

³⁹ "Ana repita la nene yepela mavin nena logearen Mosis, a la akoven lua kiena visena nene, ana e kiela sitomena lala, la sinelan ga asape awasuñe la sina ga ava Isip. ⁴⁰ Pogos naña Mosis petan la, pa sike yam piavi ma tavie naña Sinae, ana la asitom̃al ke sina ga kiela malena marua nanua asike garu Isip sumo, ana la apisa pa Aron nañani, apisape 'Imimi na sinemimin mesape ko oyum̃aen kieta nono lañasia, vena la akilia asumon ita tevano, komin Mosis nene naga perelua ita garu Isip ana naga sumon ita tepimi e yo nini, ana ita temn-

inue kare ga naga sike pe narui, pona aña sanape e naga.’⁴¹ Ana la apa akila sanene, la amiyum̃aen nono na narin puluk tai naña pe purwolu, ana la akila nakuṗaṗaena pania, a la akila pupia ṗaṗagena tai pa kiela nono nene naña la ga amiyum̃aenia e ga e limala.

⁴² “Ana pogos naña Ntewa pisu suri nene, naga pilopu m̃asina pan la, a naga mli-gan la vena la ava alotun verue lala. A suri nene naga sa naña visena wa kiena ne Ntewa nene naña Navi-sawalena Amos naga pisa e Visena Wa, naga pisa pisape ‘!Le Israel lala!

?Sila ga e kas lualima yam vari e yokorena,
amiu aṃe moṃar suri mali lala vena kilaen nakuṗaṗaena,

ana nakuṗaṗaena nene pan inu, pona pan ai?

⁴³ Peraga kemua rui, pe akila re pan inu poli, ana amiu na amlotun ke ga nono la naña amiu ga akila ne,

sa naña Molek nene,
naña amiu na amialoro amio kana silparpara nena,

a Repan m̃ena ga sa ke ga,
naña amiu akus nono na kiena verue nena naga pa sumon amiu.

Komin suri ne nanene, ṗisi na in na nem̃ene plan amiu ava koperinan ki-amiu purvanua, ava asuṃa garu Papiilon

lepas na vano.’” Amo 5:25-27

Stipen pisayu naña Ntewa naga miila manene laa le Is-rael lala wa

⁴⁴ Ana Stipen pisa pisape “Ana e pogos naña kieta yer-marua la nene la asike e yokorena nene, Ntewa naga pisa pa Mosis pisape naga monar yum̃aen m̃ana sil-parpara tai, sane kile tai naña pisawal pisape Ntewa naga sum̃a amio la. Ana la amiyum̃aenia torokin ruru sa naña Ntewa naga pi-sawal pania, ana la asuṃa amlenlelein m̃a silparpara nene pimi.⁴⁵ La akila m̃a sanene pimi tol pogos naña Yosua sumon kieta yer-marua lala apimi aṃene plan yolai taṗena la naña apimi asike e kieta porotano nene, rui. Ana Ntewa naga ṗere kieta yermarua lala apimi si loyum̃a e kieta pur-vanua nene a e poglis nene, la akus silparpara nene pimi loyum̃a amio la, mon m̃a amio la pimi pimi tol pogos naña yermarua Tepet naga pe ṗarin suṗe.

⁴⁶ “Ana Tepet pisu naña Ntewa naga kekarania e suri la moki liu, ana naga piu-nia pisape visae Ntewa naga taṃania, vena naga yum̃aen m̃ana yum̃a wa tai, vena lus kiena ne Sekop lala akilia ava ea alen vania.⁴⁷ Ana Ntewa naga pe taṃan re Tepet naga yum̃aen yum̃a tai sanene poli, ana siraunia narina nene naña Solomon

naga miyum̃aen m̃ana pupia
Yum̃a Wa nene. ⁴⁸ Ana ita
monar tesitom̃al m̃ena ga,
sane Yer Kawa Na Metava
Manenea, naga taṗatete se
yunĩa tai naṗa yaru ga la
amiyum̃aenia, sa naṗa Nav-
isawalena Aisea naga pisa
pisape

⁴⁹ *‘Ntewa Na Mava naga pisa
pisape*

*“Ma ga e peni naga sane leleu
natotanoena,*

*a yomarava nini naga sane
le lena liganen lau su
metava ea.*

*?Amiu na asitom asape ak-
ilia ayum̃aen yunĩa ya,
vena neva nese ea?*

*?Pona amiu asitom asape
akilia ayum̃aen e yo
nape, naṗa neva neva
ruru inu ea?*

⁵⁰ *Suri la punu ga na sike
ne, ana in ga na nesii
make punu ga.” ’ ” Ais
66:1,2*

*Stipen pisi m̃arera pan la
pisape le Israel la pe amlo-
gear re Ntewa poli*

⁵¹ Ana Stipen sinenan pis-
ape kila make kiena visena
nene narui, ana naga pisi
pa yerkawa kiena ne le Yu
lala naṗa la asike e ku-
mali, ana naga pisa pan
la, pisape “Ana amiu na,
amiu atorokin ruru nenaga
kieta yermarua la na nanua
sumo ne. Amiu na ape
kuruṗil paṗisi wa, ṗarimiu
m̃arera, a kiligamiu poṗe
m̃ena ga, yepemiu mavin lo-
geen visena kiena ne Ntewa,
a sinemiu lala naga sa ga
sinen yaru la naṗa la pe

ape ṗaviu re poli wa. Amiu
na ape yaru na suwoen
luen ga Ninuna Wa silaga.
⁵² Navisawalena lala kiena
ne Ntewa nanua sumo, kieta
yermarua lala akila make
kemua piowa pan la punu
ga rui, a la am̃e mom̃ar la
moki, pe sur koren ga naṗa
ape yaru la naṗa Ntewa
naga mligan la apimi vena
avisawal avisave Yaru Wa
Nayum̃aena kiena ne Ntewa
nene naga ṗisi na imi. Ana
amiu na apiowa laa sane,
komin naṗa pogos na yaru
nene naga m̃alivin ita rui,
ana amiu apielua naga a
am̃em̃ar naga mare. ⁵³ Amiu
ke narui naṗa amiu atol Nav-
isaluena kiena ne Ntewa
ṗisi rui, naṗa navisi lala
amla pimi sumo, ana amiu
na pe amlogear re nena
poli, akilaroro kare make ga
silaga.”

La akoveñar Stipen

⁵⁴ Visena kiena ne Stipen
ṗisi e nene narui, a po-
gos naṗa li navioraena lala
na kumali la amiyagokon
naga, visena la nene miyur
manene sinela paṗisi, ana la
sinela mimi paṗisi, la asum̃a
akar ke maluela vanonia.
⁵⁵ Ana Stipen, naga Nin-
una Wa pimi pulenia, ana
naga kira pa metava ma e
peni, kirava ruru m̃a sanene,
pisu pupia naurarena naṗa
kilawo ke Ntewa, a naga
pisu m̃ena ga naṗa Yesu
naga suñalu sike e yo na
metava lavisinia, nanene na
e lepasnena na ṗamarua.
⁵⁶ Ana naga pisu suri nene,

naga pisa pa la naḡa asike ne, pisape “! Ake-e aulai! Inu nepisu naḡa sinapane naga suwowo ga mon māga, ana Narina ne Yeririna naga suḡalu sike e lepasnena ne Ntewa naḡa ḡamarua.”

⁵⁷ Ana yerkawa la nene la amloge ya naḡa Stipen pisa, ana la amloge sa naḡa naga pisa kare Ntewa, ana amlokai keviu pa metava, a apuwo pulkiligala lala, vena la ve aloge re si visena kiena ne Stipen, ana la punu ga akiriri apa puna veraga, ⁵⁸ ana atararia, aḡereyalolon naga petan pulkumali keviu nene pa vanua. Aḡure matan pulkumali keviu nene, vena la akoveḡaria, ana la apisa asape yeririna la naḡa amligan la sumo veḡa la avisawal visena la naḡa kila Stipen kus naloge viowaena, apisape la ke nene narui la monar akoven ḡesan kilavaru. Ana la amien plan māla kulsota lala, ana la amligan sike e limana ne yaru viu tai naḡa naga sike amio la e pogos nene, naga kien kia Sol, ana la nene asun ke naḡa akove Stipen narui.

⁵⁹ Ana pogos naḡa la asuḡa akove ke naga sanene, ana naga mlen, pio Ntewa, pisa pisape “Suḡe Yesu, awis, otam̃an ninuu vam̃asu, nesike nemio ko.” ⁶⁰ Ana naga kinai mloru mon tano, mlokai keviu, pisape “Suḡe, awis, ve ola re si nakoarena van la e kiela mlamulena viowa nene

naḡa la akila ke pan inu ne.” A siraun naḡa naga pisa sanene ḡisi, mloru pito tano, naga māre nena ga.

8

¹⁻³ Ana Sol nene naḡa naga sike e pogos nene, naga pisu suri nene, naḡa akoveḡar Stipen mare, a naga pisu sa ga naḡa la akila ke ga yum̃aena wo tai. Ana pe yam piavi re poli, yaru mārera na leniena laḡasia, la pe amarau re poli, la sinela miye paḡisi, ana la apimi akus tasnena ne Stipen, ana la ataginia ḡisa ataginia, ana la apa asinia.

Sol naga m̃ene kare la naḡa amlelaga e Yesu paḡisi

Ana siar e pogos nene, ana Sol lala, la apilamoluen kare ḡegas nen li nalelagaena lala garu Yerusalem. La am̃ene kare la pano-o kila narui la moki naḡa aḡure e yo nene, apa asike e yo taḡena lala garu Yutea amio Samaria, ana li nalologena ga lala, la pe apa re poli, la asuḡa ga Yerusalem. Ana Sol la sinela kar manene laa li nalelagaena lala va laa na wa, ana la asuḡa apa ke ga e māla yum̃a lala, a aḡere plan la, amligan la e yum̃a naloge viowaena, naga nene yerm̃ene amio sira.

Pilip pa mlologo garu Samaria

⁴ Ana la naḡa la amlelaga e Yesu, la moki naḡa apuretetai petan Sol lala e pogos nene, ana pogos naḡa

la asum̃a apa tetai sanene, ana la asum̃a amlologon ke visena kiena ne Yesu pano. ⁵ Ana lala yaru tai naga yaru naña Pilip, naña la amliganaria pe tikon sumo, naga pitomi tano e pulkumali keviu tai garo lepas naña Samaria, ana naga mlologon p̃esan ke Navisaarena Yesu pa yeririna lala nae e yo nene. ⁶ Ana yeririna la moki pañisi naña la amiyagogon ruru ke kiena visena lala, a la apisu kile la naña naga kila, ⁷ sa naña yermare lala amolue petan yeririna la moki, naña pogos naña la amolue, ana la amlokai manene pañisi ana apureure. Ana la apisu m̃ena sane yaru la naña yepela la kom̃pas marmare, a amio m̃ena laulu lala, la apimi apo sina. ⁸ Ana e yo nene, a p̃ina lala la akekara naña akekara pañisi komin suri la naña amloge a naña apisuia.

Yaru na purm̃aki tai, kiena kia Saemon

⁹ Ana nanua sumo, naña Pilip naga pe pimi re Samaria poli wa, ana yaru na purm̃aki tai naga sike e yo nene, naña naga kiena kia Saemon. Siar e pogos la nanua sumo rui, naga pe yaru naña naga kiena kimi moki pañisi a naga sum̃a miyum̃aen ke suri la moki sanene, ana naga kila sa naña naga sum̃a pisawal ke naga pisape naga pe yaru tañena tai, ana yeririna

lala nae e lepas nene la silaga sinela kurkurun naga pañisi. ¹⁰ Kiela yerkawa lala, amio yeririna tañena lala, la asum̃a amlelaga ke e kiena visena lala, a la apisa ke sanini, apisape “!Aulai! Yaru nene, naga nam̃areraena kiena ne Ntewa kemua tai sike e naga. Naga nene naga monar nam̃areraena nanene narui naña ita tesum̃a temloge ke naña asum̃a apisayuia, apio apisape ‘Nam̃areraena Keviu.’” ¹¹ La amilan manene naga sanene narui, komin naña naga kila suri nene yam piavi rui, ana kila narui la amlelaga ea.

¹² Ana siraunia, pogos naña Pilip naga pa mlologon nasuñenena kiena ne Ntewa pan la, a mlologon m̃ena ga kia kiena ne Yesu Kristo, ana la amlelaga e kiena visena narui, ana yerm̃ene lala amio sira lala, la punu ga apa e nakeena. ¹³ Pimi tol m̃ena yaru nene Saemon, naga m̃ena ga mlelaga, ana la amligan naga pa e nakeena. Siraun naga nene, silaga naga su ga lavisi, pe sinamaran pa Pilip, naga sum̃a milan manene luen ga kile lala a pupia yum̃aena lala nam̃areraena kiena ne Ntewa naña Pilip naga sum̃a kila ke ne.

¹⁴ Ana pe yam piavi re poli, visena na suri la nene naña molue e nini, pano o tol li nalologena lala garu Yerusalem, apisape le Samaria m̃ena ga lala, nanagane la amlelaga e

Ntewa rui. Ana li nalologena la nene la apisayuia, apisu sane popon avitetalia Pita amio Yoane vena lalua ava akaten la, ana lalua akilali naḗa avisuveve suri la nene.¹⁵ Ana pogos naḗa la apito aḗalivin la garo Samaria sanene, ana lalua apu ḗarila, a lalua amlenwo la vena Ntewa ligan Ninuna Wa vitom van la.¹⁶ Ana lalua amlenwo la sanene, komin naḗa sumo ana Pilip naga kila nakee laena e kia kiena ne Suḗe Yesu, ana Ninuna Wa naga pe pitomi re e la poli wa.¹⁷ Ana sanene, Pita amio Yoane, lalua akila sanene pan la narui, ana Ninuna Wa pitomi e la e poglis nene narui.¹⁸ Ana purm̃aki naḗa Saemon nene, poglis naḗa naga pisu nalologena la lua nene apu ḗarina ne yeririna la, naḗa amlelaga mare ga na wa, ana kila naḗa Ninuna Wa pitomi pan la sanene, ana naga pieluen kiela nam̃areraena nene. Ana naga pa mla kilavaru tai pimi, kian pan lalua nene vena ul lua nam̃areraena nene naḗa sike e lalua nene,¹⁹ pisa pan la, pisape “Nanene na, in na sineun nesape amiu lua ala re nam̃areraena nene komḗas van inu, vena inu m̃ena ga nekilia nowu ḗarin yaru lala, vena la akilia atol Ninuna Wa.”

²⁰ Ana Pita naga miyelu kapuruia Saemon, naga pisi m̃arera pania, pisape “Aa, in na taḗatete nela

kioḗa kilavaru naḗa ko ositom ke osape okilia oul lua nam̃areraena kiena ne Ntewa ea. ? Ko na okilia oul nalakorenanena naḗa Ntewa naga mla ga sa ga nene pa yaru lala? In na nevisa van ko, kioḗa kilavaru nene ḗisi na amiu lua ava akovio e lele na loge viowaena e kapi.²¹ Nanagane mepisu kilale ko narui, ana taḗatete metaḗan ko okila yum̃aena nene amio imimi, komin naḗa kioḗa malena pe mesmesu re nena e maraḗa ne Ntewa poli.²²⁻²³ Peraga, ko na sinem̃a pule ga e vielueena lala, a kioḗa mlamulena viowa lala apiar kioḗa malena m̃arera paḗisi. Ko na monar ovilopu ko e kioḗa sitomena viowa la nene, ana ko na monar olen va Ntewa vena naga viewo ko ea.”

²⁴ Ana Saemon naga pisa-taḗe Pita lalua Yoane, pisape “!Ake suwala! Visae sanene, inu sineun nesape amiu lua alenwo inu, vena Suḗe naga iila inu vena suri m̃arera la naḗa apisa ke ne, ḗisi na ve imi tol re kiau malena.”

²⁵ Ana nalologena lalua nene Pita amio Yoane, asu towe laa amio yaru la nene, ana asum̃a apisawal suri la naḗa Kristo naga kila, amio visena lala naḗa Ntewa naga pisa, ana siraunia aḗasuḗela, amlilu sina ga kiela mrapa apa Yerusalem. Ana e kiela mrapa komsusa, ana lalua asum̃a amlologon ke nalologena wo kiena ne

Yesu e pulkumali lala kiena ne le Samaria lala, ana siraunia lalua apimi aporu ke sina ga garu Yerusalem.

Pilip pisi amio yaru malo tai nae Itiopia

²⁶ Ana poglis naṽa Pilip naga miyuṽae ke gar Samaria wa, ana navisi kiena ne Ntewa tai pimi ṽalivinia, pisi pania, pisape “Pilip, inu nevisa van ko, nevisave osuṽalu oyali ova otaveve mrapa naṽa kom Yerusalem, pa metava ma pulkumali nae Kasa.” Ana mrapa nene naga mrapa naṽa pa metava ṽaro e lepas naṽa e yokorena.

²⁷⁻²⁸ Sanene, Pilip mloge visena nini suṽalu, naga siar pisape va narui. Naga suṽa mial ke pa sanene, ana milan yaru malo tai naṽa sike e kiena kat naṽa wosi ṽere ke pimi e mrapa nene. Yaru nene suṽa pulo ke Tusi Wa naṽa Aisea naga siriyuia. Yaru nene, naga pe yerkawa tai kiena ne pupia sira tai nae Itiopia, naṽa la apio sira nini asape Kantes, naṽa kana kinasa apisape naga ṽarin suṽe na kiela purvanua. Yum̃aena kiena ne yaru nene, naga pe navisuaren pupia yum̃aena lala e lepas na kilavaru kiena ne pupia sira kawa nene, a yaru nene, naga pe yaru ṽena ga tai naṽa sumo rui la akila naga pe kalmaite. Ana e pogos nene, na pito garo Yerusalem rui vena len va Ntewa, ana naga taveve

kiena mrapa vena wasuṽe sina va kiena. ²⁹ Ana Pilip naga mlilu ṽa mrapa pano, a yerkawa ṽena ga nene mialoro e kiena lele na totanoena naṽa wosi ṽere ke ne, ana Pilip pisi naga. Ana Ninuna Wa pisi pania, pisape “Ko otaveve yaru nene, ova ga lavisin kiena kat nene.”

³⁰ Ana Pilip kiriri taveve naga pano, ana pa lavisinia, naga mloge naṽa yaru nene suṽa pulo ke tusi kiena ne Navisawalena Aisea. Ana Pilip piun tan yerkawa nene, pisape “?Sanape, ko na okilia ke kinas nen visena la ne ko opuloyu ke ne, pona pe opulokilale re poli?”

³¹ Ana yerkawa nene pisa-taṽea, pisape “?Pisi na in na nekilia ve sanape ne, naṽa pe yaru re tai naṽa visawal kana kinasa van inu poli?” Ana naga pisa ke sina ga pa Pilip, pisape “Visae sanene, oula ovami metava e lele na totanoena e nini wa, oto omio inu e nini.” Ana Pilip pa totano amio e kat.

³² Ana visena na Tusi Wa nene naṽa Aisea siriyuia, a naṽa yerkawa nene kilali ke sape wulovia e pogos nene, nane visena ne nane pisa sanini, pisape

*“Yaru nene naga sane sipsip tai, komin naṽa visae atararia vena aweṽaria, naga pa ruru ga moṽa ga,
pona naga sa ga ninus nen sipsip ga tai,*

*naña pogos naña añe
plan ãesan ke vilulusia
ana pe mlokai re poli.*

*Ana yaru nene naga sa ke
nene narui, naña naga
e pogos ñarera na
kiena malena,
naga pe pisa re nena
kiena visena tai poli,
naga pa ruru ga ñeke
na.*

³³ *Ana la akila ñena ga
memawaena pan naga
pañisi,*

*ana pogos naña la am-
liãere naga, la akila pe
mesmesu re pan poli.*

*Pisi na la apisu sane ve nar-
ina re si tai naña naga
la kiena kia narui,*

*komin naña lala la ak-
ilaro kiena malena e
yomarava nini, pimi
plas ga rui.” Ais
53:7,8*

³⁴ Ana yerkawa nene piun
kinas nen visena la nene
tan Pilip, pisape “Mara,
sineun nesape ovisayuli van
inu, ane navisawalena nene
pisayu ke ne? ?Naga pisayu
ke sina ga naga, pona naga
pisayu ke ga yaru taãena
tai?”

³⁵ Ana Pilip naga pisayu
ruru pa yaru nene, siar
ruru e marana Tusi Wa
naña naga puloyu ke ne,
a naga taveve pano-o, pi-
sawal wetelun ñena ga lolo-
gena wo kiena ne Yesu pa-
nia. ³⁶ Ana e pogos nene
akiriri ña ke e kat wa,
lalua ataveve mrapa apano,
apimi atol e yo tai naña wii
tai ñeke ea. Ana poglis
naña yerkawa nañani ñal

wii nene, pisa pa Pilip, pisa
pisape “Inu sineun nesape
okila nakeena van inu na,
okira, wii tai ne ñeke ne. ?
Sanape, suri laãasia suwo ke
italua na wa, naña taãtete
neva e nakeena e nene, ne?”

³⁷ [Ana Pilip pisatañea,
pisa sanini, pisape “Visae
ko olelaga kemua e sinema
wetelu, inu nekilia nekila
nakeena e ko.”

Ana yerkawa nene pisape
“Ee, inu nemlelaga e Yesu
Kristo naña naga pe narina
ne Ntewa kemua lelaga.”]

³⁸ Ana naga kila kiena kat
pa ruru e nene, ana lalua
amligan metava e lele na
totanoena nene atapul apito
tano, apito asumãlu ase e
wii, ana Pilip kila nakeena e
yere Itiopia nene.

³⁹ Ana pogos naña lalua
amolue sina ga e wii nene,
ana Ninuna Wa pimi ãerelua
Pilip veraga pano, ana
yerkawa nene pe ña re si
poli. Ana naga pa si teke
e kiena kat, mla ke sina
ga kiena mrapa pano, ana
kekara a kiena sitomena
mloge po pañisi. ⁴⁰ Ana Pilip,
sa naña pa narui, milan ga
naña naga sike garu pupia
pulkumali naña Astoto rui.
Ana naga sumã mialoro
ke pito garove, mlologon
nalologena wo kiena ne Yesu
e pulkumali la moki e lepas
nene, a naga pa ñena ga
tol pulkumali keviu naña
Sisaria.

9

Ntewa pilon Sol pimi pe

yeririna kiena ne Yesu

Yum̃aena 22:4-16, 26:9-18

1 Ana e pogos nene, Sol ne nanene naṗa sumo ana naga sum̃a kila kare ke li nalelagaena la garu Yerusalem paṗisi, naga sinena kar ke nalogena kiena ne Suṗe la nene na wa, ana naga sum̃a pisaar ke ga wa pisape ṗisi na naga we mom̃ar la. Sanene e pogos tai, naga pa pisu yerkawa kiena ne yaru wa lala, ² ana piun naiilaena laṗas tania. Sol naga sine-nan pisape yerkawa nene naga siri m̃aki laṗasia vano va li nasumonena lala na yum̃a na leniena kiena ne le Yu lala, nae garu Tam̃askas, vena visawal van la visave la monar atam̃an Sol vito garo pula, vena kale yeririna lala naṗa la asike loyum̃a e ya naṗa la apio e pogos nene asape “Mrapa Viu,” nane li nalelagaena lala. Sol na kila sanene komin naṗa naga kiena sitomena pisape vito uarar la, yerm̃ene lala amio sira lala, ana were la si awasuṗe ava ma Yerusalem, e naṗa la ase sumo ṗisi na apureure, vena koven la ava e yum̃a nakoena. Ana yerkawa naṗani siri sa naṗa Sol piunia, kian pania.

³ Ana Sol naga ṗar m̃aki la nene, ana mligan yo Yerusalem, ana pito ke garo Tam̃askas. Ana Sol lala la amial m̃a apano-o e legiena laṗasa, a pogos naṗa apimi lavisin pulkumali nene Tam̃askas, ana naga milan ga naṗa pupia yomerarava

kiena ne Ntewa tai molue metava e sinapane tegoli yo naṗa naga mial ke ea.

⁴ Pogos naṗa yomerarava nene tegoli Sol sanene, ana kila naga mloru pito tano e porotano, ana naga mloge pulgon yaru tai pis pania, pisa pisape “! Sol, Sol! ? Vanon ya ne ko osum̃a okila manene piowa pan inu sa naṗa ko osum̃a okila ke ne?”

⁵ Ana pogos naṗa Sol naga mloge naviunena nene, ana naga piuntam̃e sina ga, pisape “? Ana Suṗe, ko anene ṗa?”

Ana naga pisatam̃ea, pisa pisape “Inu Yesu nini naṗa ko osum̃a okila kare ke naga, in ne na nini.” ⁶ Ana Yesu pisa sina ga pania, pisape “Ko, osum̃alu, oyali ova garu um̃a Tam̃askas, ana ṗisi na yaru tai imi visawal van ko visave ṗisi na ko okila ve sanape.”

⁷ Ana yeririna la naṗa la asum̃a ataveve ke Sol e pogos nene, la m̃ena ga amloge visena la nene, ana la pe am̃a re yaru naṗa pisa poli, ana la sinela kurkur paṗisi, la asum̃alu wowe ga asikena, la pe kiela visena na visaen re si poli. ⁸ Ana siraun suri nene, Sol naga kila sa naṗa Yesu pisa. Naga sum̃alu sina ga, ana pogos naṗa pikeṗa kilamarana, naga pe pisu re si suri tai poli, naga sa naṗa pe kilamara ṗala ga narui. Suri nanene kila narui ana la atarar limana, apure naga, ava garu Tam̃askas. ⁹ Ana la apa aporu garu um̃a e

yo nene, ana Sol naga pe kilamara p̃ala m̃aga sanene pano tol legiena telu, a e m̃ena ga e pog nene, naga pe kinana re poli, a pe mun re m̃ena ga sur tai poli, naga monsilu ga.

Ananaias pa mlotuwo Sol

¹⁰ Ana e yo naṗa Tam̃askas, nalogena tai sum̃a ea, kiena kia Ananaias, ana naga pisu suri tai sa naṗa m̃eniena tai naṗa Suṗe Yesu naga kila lologia naga pania, naṗa pio naga, pisape “Ananaias.”

Naga pisatam̃ea, pisape “Ya ne Suṗe, in nanini.”

¹¹ Ana Suṗe pisa pania, pisape “Osum̃alu, oto garo likan pulkumali nene, ana otaveve narin mrapa naṗa la apisa apisape ‘Mrapa Mesmesu,’ ana ova e yum̃a m̃ana ne yaru nene Sutas. E m̃ana um̃a, ana oviun yaru nae Tasas tai, naṗa kiena kia Sol. A yaru nene, nanagane ga ne naga mlen ke e nene, ana naga pisu m̃ena ga suri sa naṗa m̃eniena, ¹² naṗa e kiena navisuenta nene, naga pisu ko ke narui, ana naga m̃al ko opa loyum̃a puna, ko omligan lumom̃a e naga, vena kilamarana imi wo sina.”

¹³ Ana pogos naṗa Ananaias mloge visena la nene, naga sitom paṗisi, naga pisa pisape “Suṗe, yaru la moki naṗa apisayu p̃elaga viowa kiena ne yaru nene pan inu p̃isi rui, naṗa naga kila ke piowa pa kioña

nalelagaena wa lala garu Yerusalem, ¹⁴ ana nanagane, nemloge naṗa naga pimi Tam̃askas rui, naṗa yerkawa kiena ne yaru wa lala la ataṃan rui vena naga imi uarar imimi la naṗa memlotun ko.”

¹⁵ Ana Suṗe pisa pa Ananaias, pisape “Ve omarau re, ova ga, komin naṗa nemligan lua naga sum̃alu rui, nepisaar nesape naga ve kiau yaru na yum̃aena tai, a p̃isi na naga kilia war kiau kia va e yo punu ga va yolai la naṗa pe ape le Israel re la poli, a visawal va tol kiela p̃arin suṗe lala, a visawal towe m̃ena ga van le Israel lala. ¹⁶ A yoko in na nekila naga visu kilale m̃ena suri m̃arera si tai nene, sane pogos naṗa yoko naga sum̃a visawal ke kiau kia, yoko naga monar loge viowa e suri viowa la ve moki naṗa la monar aimi vania, vanon ga kiau kia nene.”

¹⁷ Ana Ananaias mlogear visena la nene, naga pano pa tol yum̃a nene naṗa Suṗe pisa pania, naga pa loyum̃a, pisu Sol, pu p̃arina. Ana naga pisa pania, pisape “Wolai Sol, kieta Suṗe, naṗa Yesu, naṗa naga porun ko garo mraplepa, naga ke nane mligan inu nepam narui, vena nelenwo ko ana kilamaram̃a kilia imi wo sina, ana vena Ninuna Wa vitomi kokonia ko.” ¹⁸ Ana naga mlenwoia, a veraga ga, narin suri naṗa sane kilekilerla na ika mloru petan

kilamarana veraga, ana kilamarana pimi po sina ga. Ana Sol suñalu, ana e ruru e poglis nene, aņere naga apano akila nakeena pania. ¹⁹ A naga kinana sina ga, ana pimi mloge si po, puriuna m̃arera sina.

Sol siar mlologo garu Tam̃askas

Ana Sol sike si legiena la p̃asia garu Tam̃askas amio nalogena lala kiena ne Yesu la naņa la nae e yo nene. ²⁰ Ana pe piavi re poli, naga suñã pa loyũã e yum̃ã na lotena lala kiena ne le Israel lala e yo nene, naga pa loyũã ana mlologon ke Yesu pisape naga narina ne Ntewa kemua lelaga. ²¹ Ana yeririna la mokliu naņa amloge visena kiena ne Sol, ana la amilan paņisi, ana la apiuviun ke tan la, apisape “! Kee suwala! Nanua sumo na yaru ne nanene naga m̃e kare yaru la garu Yerusalem paņisi, vanon naņa la apisa ke kia ne nane naga suñã mlologon ke si ne. A naga pimin m̃ena ga suri nene e yo nini, vena naga uarar yaru la nene, vena were la na awasuņe si ava puna ne p̃arin yaru wa lala garu Yerusalem, naga pimi pe taņena narui. ? Nanagane na ya ne kila naga sanene narui?” ²² Ana Suņe naga mila visena kiena ne Sol pimi m̃arera ruru po laa narui, a naga suñã taulu yaru la moki laa narui, naņa naga

suñã pisa ruru merarava po paņisi pan la naņa pisape Yesu, naga Navisaarena kemua lelaga napo. Ana le Israel taņena la naņa asike garu Tam̃askas, la pe kiela suri na visatam̃een re si poli, vena la avisaluņar visena kiena ne Sol la nene, ana kiena visena lala la ataulu make ruru nena kiela sitomena vjowa lala. ²³ A pogos laņasia p̃arovia, ana Sol naga suñã mlologo ke sanene, ana le Israel la nene asum̃alu apimi lele taaga, ana apiran ruru asape aweņar naga mare. ²⁴ Ana legiena punu ga a lemalo punu ga la apa asum̃ate ke naga e yepas nen pupia pulutava lala e pupia purkove na pulkumali keviu nene, visae naga kilali visave ure, ana la akilia aweņar naga. Ana visena nene pimi tol Sol, ²⁵ ana yemalo tai, la naņa asike amio naga la atar naga, amligan m̃ene pupia karo tai, ana la amligan malumun naga pito pito tol yo tano lepas na va vanua e pupia purkove na kumali keviu nene. ²⁶ Ana Sol mligan yo nene Tam̃askas, ana p̃asuņe si pa Yerusalem.

Sol p̃asuņe pa Yerusalem

Ana pogos naņa Sol pam tol sina Yerusalem, ana kilali naņa va viranar naga amio li nalogena lala, ana la nene pe amlelaga re e naga asape naga pe nalogena lelaga

kiena ne Yesu poli, ana la yepela p̃ilinia, amaraun naga pãp̃isi. ²⁷ Ana lala tai nene, kiena kia Panãpas, naga p̃isu sane Sol naga pe lelaga, ana kilali nãpa miila naga, ana naga kila kiena mrapa nãpa naga kilia sũmalu se marana ne nalogena lala. Ana lalua apano, ana Panãpas pisawal pan la sanape nãpa Sol naga p̃isu kieta Sũpe e mrapa a nãpa kieta Sũpe p̃isi pan naga, a naga p̃isawal m̃ena ga nãpa Sol naga m̃areran manene nãpa mlologon kia kiena ne Yesu garu Tam̃askas. ²⁸ Ana lala amloge kiena visena, ana la akekarania, ana Sol sike amio la, a naga sũma pa e yo punu ga garu Yerusalem, sũma mlologon ke kia kiena ne kieta Sũpe Yesu, nãpa naga pe sinena kurkur re nena ga. ²⁹ Ana naga p̃isi ke amio le Israel la nene nãpa la asũma ap̃isin ke ga visena nae Kris, ana naga amio la asũma ap̃ilup pan la e visena pãp̃isi, pano pano asitom asape popon awem̃ar naga mare. ³⁰ Ana pogos nãpa kieta wolai la p̃asia amloge suri nene, ana la ãpure Sol p̃ito poga ga garo e pulkumali nãpa Sisaria, ana siraula la ap̃isi maro amio, ana la amligan lua naga p̃asũpe si pa kiena yo, pulkumali nãpa Tasas.

³¹ Siraun e pogos nene, ana nalelagaena lala nãpa asike yo punu ga gar e lepas nae Yutea, a garu Kalele,

a garu m̃ena ga Samaria, la ap̃isu sane pog malumu towe pan la narui. Ana Ninuna Wa naga sũma kila po pan la, miila la, kila kiela sũmare kapur p̃imi m̃arera, a kila ke m̃ena ga nalelagaena lala la ap̃imi ape moki la sane, ana nalelagaena la nene punu ga asũma ap̃atanon ke kieta Sũpe silaga.

Garu Lita, nalogena Pita naga kila ruru lana ne Aeneas

³² Ana Pita naga sũma mial e pulkumali la moki e lepas nene, naga sũma mlologo, ana e si e pogos tai, naga p̃itomi p̃isu li nalelagaena wa la nãpa asike garu pulkumali nãpa Lita. ³³ Ana pogos nãpa naga pa tol yo e nene, naga m̃al yaru tai nãpa yepena kom̃pas mare, m̃eke ga e m̃ana tog tol kas orelu rui, pe mial re si poli. Yaru nene kiena kia Aeneas. ³⁴ Ana pogos nãpa Pita p̃isua, p̃isi p̃ania, p̃isape “Aeneas, nevisa van ko, nevisave nanagane Yesu Kristo kila tasnem̃a wo si narui. Osum̃alu, osiloar mom̃a tog.” Naga p̃isa sanene, ana Aeneas naga sũmalu veraga, yepena po nenaga. ³⁵ Ana yeririna la punu ga nãpa asike e pulkumali nãpa Lita, amio la nãpa asike e yotop nãpa Seron, ap̃isu yaru nene naga p̃imi po sina, la ap̃ilon kiela malena lala ava e Ntewa.

Garu Sõpa, Pita kila Toreka mali sina

³⁶ Ana e yotop nene ana pulkumali tai m̃eke ea, kiena kia Soṽa, ana nalelagaena la tai naṽa sike ea, naga sira naṽa kiena kia, Tapita. Naga nene kia tai naṽa e visena kiena ne le Kris lala la apisape Toreka, naṽa kana kinasia, kia kiena ne suri mali nowo tai naṽa tia. Sira nene, naga pe sira tai naṽa naga suṽa kila ke yum̃aena nowo la silaga, naga suṽa miila luen ga yaru la naṽa pe kiela suri re poli. ³⁷ Ana e pogos nene, maiena tai tol sira nene, ana mai m̃aga pano pano-o mare, ana akevan tasnena, ana amligan naga m̃eke e m̃ana loyumuṽa na metava, vena ataginia. ³⁸ Ana pogos naṽa nalogena lala nae e yo nene Soṽa la amloge visena naṽa apisape Pita naga sike g̃a lavisi, e ga e pulkumali taṽena nene Lita, la apitetalia yaru la lua amiyal kawa apanonia. Ana lalua apano-o aporun Pita, la apiun m̃arera pania, apisape “Imimi sinemimin manene mesape oimi pun imimi vilaga.”

³⁹ Ana sanene Pita suṽalu, amio la lua nene, apano. Pogos naṽa pimi m̃alivin la, la aṽure naga pa e loyumuṽa na metava e naṽa la amligan sira naṽa m̃eke ea. Ana letano lala apimi, amiyervivia, la asum̃a atagin ke rui, a pogos naṽa Pita pimi, la apian naga e kulsota nowo la naṽa Toreka naga soluia e pogos naṽa naga mali ke ga wa amio la. ⁴⁰ Ana ṽisi

na Pita pisa pan la pisape la amolue ava vanua sumo wa, a pogos naṽa la apa vanua, ana naga kinai, ana mlen. Ana ṽarlua ṽarina kira pisu tasnena ne sira naṽani, naga pisi pania, pisa pisape “! Tapita, osuṽalu!” Ana sira nene pike ṽa kilamarana veraga, ana pogos naṽa pisu Pita, naga ṽarlua toṽalu totano. ⁴¹ Ana Pita tarar limana, miila naga suṽalu, ana naga pio nalelagaena lala, amio letano la nene. Ana la apimi loyumuṽa, ana naga pisa pan la, pisape “Nanene narui, kiamiu sira nanini, naṽa Ntewa naga kilamalia si naga.”

⁴² Ana lologena na suri keviu nene telivi piora e yo naṽa Soṽa, ana yeririna la moki naṽa amlelaga e kieta Suṽe vanonia. ⁴³ Ana siraunia, Pita naga su piavi towe laa garu Soṽa sane, puna yaru tai, kiena kia Saemon, naṽa naga pe yaru na yum̃aenen suri lala e kulus nen suri mali lala.

10

Ntewa pis pa Konilias

¹ Ana pulkumali keviu taṽena tai m̃eke garo losi e lepas nene, kiena kia Sisaria, a yerkawa tai kiena ne yaru na mara lala nae Rom naga sike e yo nene, kiena kia Konilias. Naga suṽa pisuar ke ṽegas nen li na mara la nene tai, naṽa yaru la tol ponotia taaga, a la apio kiena ṽegas nene apisape “ṽegas Nae Italia.”

² Yerkawa nene, naga pe yeririna wo tanea tai nene, a naga amio namratava la m̃ana, la silaga amlen pa Ntewa, a la amlotun naga, a silaga la asum̃a amiila ke le Israel la naṣa pe kiela suri re poli, ana la asum̃a aṣarpel ga pupia nalaena la pan la.

³ E legiena tai, e ruru e pog na leniena na yepekilavi, e mrae telu, ana naga pisu suri tai sa ga naṣa m̃eniēna, naṣa Ntewa naga kipian naga ea. E kiena navisuena nene, naga pisu meraravan paṣisi, naṣa naga pisu navisi kiena ne Ntewa tai pitomi e m̃ana loyum̃a, ana pio naga, pisa pisape “!Konilias!”

⁴ Ana pogos naṣa Konilias naga pisu navisi nene, naga sinena kona paṣisi, ana naga pisu manene navisi nene, naga pisa pisape “?Ya ne?”

Ana navisi nene pisa-tam̃ea, pisape “Ntewa naga sum̃a mloge ke kiom̃a leniena la rui, ana naga pe sinena ṣesan re kiom̃a ṣelaga wo la poli naṣa ko okila ke pa la naṣa limala korena, ana naga kekarania a sitoṃal ko ke na wa. ⁵ Ana naga pisa pan ko, pisape ko na monar oligan kiom̃a yeririna laṣasia ava garu kumali naṣa Soṣa, vena avio yaru tai, naṣa kiena kia wetelu, kien kia Saemon Pita, vena naga imi e yo nini.

⁶ Ana yaru nene naga sike puna yaru taṣena tai, naga kiena kia m̃ena Saemon, naga m̃ana yum̃a m̃eke garo lavisin sive, naga yaru na

yum̃aenen suri lala e kulus nen puluk.”

⁷ Ana navisi kiena ne Ntewa nene pisawal pa pania, ana kovio sina ga. Ana Konilias pio kiena yaru na yum̃aena la lua, amio m̃ena ga kiena yaru na kilaen mara tai naṣa naga m̃ena ga pe yaru na lotunen Ntewa, naṣa naga sum̃a amio naga silaga, pisuar naga, ana yeririna la telu nene apimi puna.

⁸ Ana naga pisawal sur punu ga nene pan la telu nene, siraunia ana naga mligan la apa garu pulkumali naṣa Soṣa, vena aure Pita imi.

Pita m̃ena ga pisu suri tai sa naṣa m̃eniēna

⁹ Ana legiena na peni, pogos naṣa la nene amial ke apimi Soṣa na wa, Pita naga sike na, ana naga sinenan pisape kila leniena na kolpae, ana sa naṣa silaga, naga pa metava e yotop na wosoyum̃a naṣa naga sike ea. ¹⁰ Naga sike e nene wa, ana naga mloge visokaria, ana naga pisape la aviran kapi. Ana pogos naṣa la asum̃a akila ke kana kinana wa, ana Ntewa pian naga e suri tai sa naṣa naga m̃enia. ¹¹ Naga pisu naṣa ma e peni pike, ana m̃al suri tai sa naṣa pupia kulmrae, sum̃a pitomi ke tano e yomarava nini. Naga pisu naṣa la asum̃a atarar ke mrapuna la varoka, ana la amligan malumun ke pitomi tano. ¹² Ana loyum̃a e kulmrae nene, Pita pisu sur mali

taṭena la punu ga asike ea, a amio m̃ena ga suri taṭena la naṭa Ntewa naga kila ape suri wa naṭa ve le Israel la ve akan re, sane lom̃ara lala, a nopi lala, a manu lala. ¹³ Ana naga mloge m̃ena ga pulgon yar tai pisa pania, pisape “Pita, osum̃alu, oweṃar suri mali tai nene, ana okania.”

¹⁴ Ana Pita pisa, pisape “E Ntewa, peraga yo, taṭatete nena ga ve sanene, komin suri mali la naṭa asike e nene ana pe nakanli re laṭas poli wa, naṭa imimi le Yu lala mepalia ga pe makakan re poli.”

¹⁵ Ana naga mloge ke sina ga pulgon yar naṭani, pisa pisape “Suri naṭa inu Ntewa nepisa rui nesape mekiki ga, ana ko na taṭatete si ovisa ovisave namname.” ¹⁶ Ana suri nene molue pimi yam lua sanene, ṗisi, sirauinia, yaru telu nena, ana Pita pisalup̃ar m̃aga, ana sirauinia, pupia kulmrae nene ṗasupe ke sina ga pa metava ma e peni.

Pita tol kinas nen suri naṭa naga pisua

¹⁷ Ana Pita suña mloge piowa paṗisi, naga suña sitom manene laa pisape popon sa tol kinas nen sur naṭa m̃alivinia, ana pogos naṭa naga sitomveve ke ga wa, yaru kiena ne Konilias la telu naṭa naga pitetalia la apimi, apimi aporu Soṗa. Ana la apiun yum̃a kiena ne Saemon tan yaru la ṗasia,

ana la akipian la ea, ana la apimi, asum̃alu asum̃a e mratava na yum̃a m̃ana ne Saemon. ¹⁸ Ana la apio apisa apisape “?Ei, yaru tai kiena kia Saemon, naṭa kiena kia taṭena apisape Pita, naga sike amio amiu e nam̃a, pona peraga?”

¹⁹ Ana pogos nene Pita naga toṃa sitomyu ke kinas nen suri naṭa pisa sane m̃eniena wa, ana Ninuna Wa pisa pania, pisape “?E, ko omloge m̃aga? Yaru la telu asum̃a akale ko ke naganane, la ne nane asum̃alu asike vanua, apio ko ke ne. ²⁰ A ko osum̃alu, oyal kawa ga ototano vena ovisu la telu nene, ana visae avisave otaveve la, ana ve okilali re naṭa ovisalup̃aria, ko na monar otaveve la, vanon in na nemligan la apimin ko.”

²¹ Ana Pita sum̃alu pitotano vanua, ana pisa la telu nene, ana naga pisi pan la, naga pisape “Inu naṭa akale inu ke ne. ?Amiu sinemiun inu vanon suri tai yo?”

²² Ana la apisatam̃ea, apisape “Ee, yerkawa na kilaen mara nene, Konilias, naga pitetalia imimi mepimin ko, vena oimi garu m̃ana, vena naga loge re visena laṭas tan ko. Navisi kiena ne Ntewa tai naga pisa pania pisape naga vio ko oimi puna sanene. Kiamimi yerkawa nene, naga pe pe yere Yu re tai poli, ana naga pe yaru mesmesu tai naṭa naga tarar luen ga kiamiu pogos na leniena la punu ga

silaga, ana le Israel m̃ena ga lala nae e kiamimi yo nene akekaran naga paṽisi. Naga ke naṽa pitetalia imimi mepimin ko narui, nane mesike e nini vanon ne.”
²³ Ana vanon naṽa mrae pito ke tano rui, ana Pita ṽerear la nene aṽeke amio naga e yuṽa naṽa naga sike ea, vena kolulagi ke ga wa ana la punu ga atove.

Pita pa mialiali Konilias

E yemlagi ke sina ga, Pita pa amio la nene, amio ke m̃ena ga nalelagaena taṽena laṽasia nae Soṽa, la apa m̃ena ga amio la.
²⁴ La apano, yemalo wola ga mrapa komsusa, la amono, ana yemlagi ke sina ga la apa aporu ga Sisaria nene na wa. E yo nene, Konilias sike amio namratava m̃ana lala, a naga pio ke m̃ena ga kiena erau laṽasia vena la aimi asuṽate Pita lala. ²⁵ Pogos naṽa Pita pimi tol uṽa m̃ana ne Konilias, Konilias pa pitawea, mloru pito tano e lana, sa naṽa mlotu naga. ²⁶ Ana Pita tarlua ke sina ga pa metava, pisa pania, pisape “E, awis, ko osuṽalu. Opisu ke ne, in na nepe yeririna ga.” ²⁷ Ana Konilias suṽalu, ana lalua asiar asunu lilue, ana apa loyuṽa, naṽa e pogos ke nanene narui Pita pisu yeririna la mokliu naṽa asuṽate ke naga loyuṽa.

²⁸ Ana Pita pisi pan la narui, pisa pisape “Amiu asuṽa akilia ke naṽa e lepas

nen kiamimi lotuena imimi le Yu lala, naṽa imimi na taṽatete meva loyuṽa e yuṽa m̃ana ne yaru taṽena la naṽa la pe ape le Yu re poli, pona meve erau wo memio la. Ana nagane, Ntewa naga pian inu merarava po, pisape pe pon re nevisu viowa e yaru laṽasia naṽa nevisave la apiowa ga, pona la ape kororaki ga. ²⁹ Komin suri ne nanene naṽa Ntewa naga pian inunia, inu pe nepisaluṽar re la nene e pogos naṽa apimin inu poli, nesape taṽatete neim̃asu, ana nepimi ga. ? Ana in na sineun nesape amiu avisawal li van inu, avisave amiu apio inu asape neimi vanon ya?”

³⁰ Ana Konilias pisatam̃e Pita, pisape “Ee, potena paṽisi. Nanagane legiena telu ṽaro pa rui, mesmesun e pog suri nene narui, e mrae telu naṽa yepekilavi, in na netoṽa ga m̃au loyuṽa, nesuṽa nekila ke leniena na yepekilavi. Nesuṽa nemlen ke sane, ana nemilan ga navisi tai naga pitomi suṽalu ga sike e marau, naṽa naga m̃ana kulsota pilavila po na po. ³¹ Ana naga pisi pan inu, pisa pisape ‘Konilias, Ntewa naga suṽa mloge ke kioṽa leniena la ne, a naga suṽa sitoṽal ke m̃ena ga kioṽa ṽelaga wo la naṽa ko osuṽa okila ke pa la naṽa pe kiela suri re poli. ³² Ana ko na monar okila sanini: ko na monar oligan yaru laṽasava Soṽa, komin yaru tai,

vena naga wasuṽe ke sina ga amio la aimi puṽa. Yaru nene, kiena kia wetelu Saemon Pita, a naga pa sike e yuṽa ṽana ne yaru taṽena naṽa naga ṽena ga kiena kia Saemon, naṽa naga, kiena yuṽaena naga miyuṽaen ke suri lala e kulus nen puluk. Pisi na kioṽa yeririna lala akilia alual yuṽa ṽana ne Saemon nene garo lavisin sive.’³³ Navisi nene pisi pan inu sanene, ana nane kila na nepitetalia ke yaru la nene apitoṽasun ko vilaga, a nepisa potena pan ko paṽisi komin kioṽa nasinewoena naṽa ko opam pun imimi e yo nini. Ana ita punu ga tesike e yo nini e marana ne Ntewa, vena imimi meloge visena naṽa Ntewa pisa pan ko vena ko ovisa van imimi.”

Pita pis pa Konilias lala

³⁴ Pita mloge visena la nene, ana naga pisa pan la, pisapenua “Po paṽisi, a nepisa potena paṽisi naṽa amiu amla pogos nene pan inu, vena nekilia nevis van amiu. Nekekara paṽisi, komin naṽa nanagane nepisu kilale sa naṽa lelaga paṽisi naṽa Ntewa naga pe ṽaveve re yaru taṽena la poli.³⁵ Yere Israel, pona yaru naṽa pe molue re kome lus nene poli, pona yer pe ke sina ga, ana visae naga vatanon Ntewa, kila ga sur la naṽa Ntewa naga sinenania, ṽisi na Ntewa kekaran naga.

³⁶ “Visena naṽa Ntewa naga mligan pimi pan imimi le Israel lala, amiu akilia ṽisi rui, naṽa naga lologena wo tai naṽa pisawal pisape yeririna kilia tol suṽare naṽa pe lelaga e Yesu Kristo, naṽa naga pe Suṽe kiena ne yeririna punu ga na yomarava nini.³⁷ A amiu akilia kana suniena nena, naṽa nanua sumo, ana Yoane Nakeena naga pimi mlologon kiena nakeena nene, a siraun naga nene, ana pupia suri ne ṽalivin ita, siar garo Kalele, pano pano tol make ga yo punu ga e lepas naṽa Yutea.³⁸ Pupia suri nene, nane Yesu nae Nasaret nene amio yuṽaen kerkeviu la naṽa naga, naṽa Ntewa naga mligan kiena Ninuna Wa pan naga, pulemamaga ruru keviu e naga, a naga mligan naṽareraena keviu pania, ana Yesu naga suṽa pa kare ga e yo punu ga, kila ke yuṽaena wo lala a kila ruru ke ṽena ga la naṽa Yermare naga suṽa kila kare la ke paṽisi. Yesu kila ke suri la nene, komin naṽa Ntewa naga sike amio naga.

³⁹ “Ana suri la nene naṽa naga kila garu Yerusalem, a e lepas taṽena ṽena ga lala e kiamimi purvanua imimi le Yu lala, imimi li nalologena la, mesuṽa mepisawal ke suri la nene pan yeririna lala. Imimi mesuṽa mepisawal ke naṽa kiamimi yerkaṽa lala la asuar naga e laki torovia, ana naga mare,⁴⁰⁻⁴¹ ana e kana legiena na

telu, Ntewa kilamalia sina ga naga. Ana Ntewa naga kila imimi laḡasia mepisu naga, a imimi metotano memio naga, imimi mekinana a memun wii memio naga. Ana Ntewa naga pe taḡan re naga imi vaeme sanene va yaru la punu ga poli, ana naga vaemen imimi ga la naḡa Ntewa naga mliganar imimi sanene, vena mevisawal va yeririna taḡena lala mevisave Yesu naga mal si rui. ⁴² A pogos naḡa Yesu sike amio imimi sanene, naga pisi pan imimi, pisape imimi monar melologon kiena lologena wo va yeririna punu ga, a imimi monar mekila merarava van la mevisave Ntewa mliganar naga taaga vena naga liḡere yeririna lala, sane la naḡa amare ḡisi rui a amio ḡena ga la naḡa yokorena la amal ke e pogos naliḡereena wa. ⁴³ Nanene naga Yesu ke ga naḡa navisawalena lala apisawal naga nanua sumo rui, naḡa la apisape ḡisi na Ntewa naga viowo mlamulena viowa lala kiena ne yeririna la naḡa la amlalaga e kiena kia, la aviawa e naga.”

Ninuna Wa mloru pitomi e la

⁴⁴ Pogos naḡa Pita sum̃a pisi ke sanene wa, ana amilan ga naḡa Ninuna Wa pitomi tano pa tol la nini naḡa asum̃a amiyagogon ke naga. ⁴⁵ Ana li nalelagaena taḡena la naḡa amligan yo Soḡa la amio Pita apimi, ape le Yu

lala, ana lala amilan manene la suri nene, komin naḡa pimi tol pogos nene, ana lala aḡape Ninuna Wa naga pe nalaena tai naḡa Ntewa mligan ga pan le Yu lala. ⁴⁶ Ana nanagane, ana apisu la nini naḡa pe ape le Yu re poli, apisi e visena taḡena lala, asum̃a amiyeluar manene ke Ntewa keviu paḡisi, ana akilia asape Ntewa mla ḡena ga Ninuna Wa pan la naḡa pe ape le Yu re la poli.

⁴⁷ Ana Pita pisi pan la naḡa amio naga, pisape “! Amiu apisu ke ne! Nanagane, lala nene akus Ninuna Wa sa ke ga naḡa ita tokus sumo. Sanene, ana tetaḡatete ḡena ga tevisaluḡar la tevisa ve tekee la re e wii.” ⁴⁸ Ana Pita pis pan Konilias lala, pisape akeela e kia kiena ne Yesu, ana ḡisi na, la akeela.

Ana la aḡareran ḡena ga pa Pita vena naga sike re laa amio la wa e legiena si laḡasia.

11

Pita mla navisayuena pan nalelagaena lala garu Yerusalem

¹ Ana pe yam piavi re poli, ana lologena nene pano-o tol nalologena taḡena lala garu Yerusalem amio ḡena ga nalelagaena taḡena lala e lepas wetelu na yo Yutea, pisape yeririna laḡas naḡa pe ape le Yu re poli naḡa lala amlalaga e lologena wo kiena ne Ntewa rui. ² Ana nalelagaena laḡas nae garu Yerusalem lala

asitom manenea apisape nalelagaena taḑena lala naḑa pe ape le Yu re poli, la m̃ena monar ave ḑaviu vena ave sa le Yu lala, ana pogos naḑa Pita naga pavini ma Yerusalem la apisa nene kare naga piowa paḑisi. ³ Lala apisa pania, apisape “?Sanape naḑa ko opa osike omio yeririna kar lala naḑa pe ape ḑaviu re poli, naḑa ko okinana ke m̃ena ga omio la?”

⁴ Ana Pita naga pisi pan la, siar e kana purḑes nena, naga pisawal ruru suri punu ga pan la, naga sun pan la sanini, pisape ⁵ “Nanua sumo, nesike Soḑa, ana pogos tai nesum̃a nemlen. Nesum̃a nemlen sanene panoo netopopog ga neteke narui, ana nepisu suri tai sane pupia kanus tai, naḑa naga molue metava ma e peni pitomi tano, naḑa asu m̃a atarar ke mrapuna varoka, asu m̃a amligan malumun ga pitomi tano, naga pitomi taḑo lavisin inu. ⁶ Ina nepisu ruru loyum̃a e kanus nene, ana nepisu sur mali lala na um̃a amio suri mali lala na yom̃arua, amio lom̃ara lala a nopi lala, amio manu lala, la asike loyum̃a ea. ⁷ Nesum̃a nepisuvisu ke sanene, ana nemloge pulgona yaru tai pisi pan inu, naga pisape ‘Pita, ko osum̃alu, owem̃ar suri tai nene, okania.’ ⁸ Ana nepisape ‘!Peraga Suḑe, taḑatete ve ḑanene! Suri la ne sanene naḑa pe mesmesun re nena

akan poli, a naḑa imimi le Yu lala memlonia, nesum̃a nemilon ruru silaga.’

⁹ “Ana nemloge pulgona naḑa pitomi metava e peni naga pisi sina pan inu, naga pisape ‘Suri naḑa inu Ntewa nepisa rui nesape naga mekiki ga, ko ve ovisa re si ovisave naga namname.’ ¹⁰ Nemloge visena na m̃alivin inu sanene yam telu ḑisi, ana kanus nene amio suri la naḑa asike ea aḑure si pa metava.

¹¹ “Ana e ruru nena ga e pogos nene, yeririna la telu apimi aporu e yum̃a naḑa imimi mesike ea, naḑa yaru nae garu Sisaria tai naga pitetalia la telu nene apimi vena aure inu neva sina nemio la. ¹² Ana Ninuna Wa naga pisi pan inu, pisa pisape ‘Ko na ve ositom re ovisave ve okekarar re naḑa ova omio la telu nene,’ ana inu nepa ga, a orueta taḑena la orai nena nini nae Soḑa la m̃ena ga apimi amio inu. Imimi mepano-o, meporu Sisaria, ana lala aḑure imimi mepa e yum̃a m̃ana ne yaru nene, Konilias.

¹³ “Ana mepa loyum̃a, naga sun pan imimi, pisayu sanape naḑa naga pisu navisi tai m̃alivinia sum̃alu nenaga se marana loyum̃a e m̃ana yum̃a, ana navisi nene pisi pania, pisa pisape ‘Ko oligan visena va garu Soḑa, vena yaru naḑani Saemon Pita naga monar imi visu ko. ¹⁴ Yaru nene naga imi visawal lologena tai van

amiu ana visena nene naga kilia tamalia ko amio na mratava moma lala.'

15 "Ana pogos naña Konilias naga pisi p̄isi, inu towe re nepisi pan la, ana e ruru nena e pogos naña nesuñña nesiar nepisi ga na wa, ana Ninuna Wa pitomi e la sa ga naña pitomi p̄esan e ita nanua sumo rui. 16 Nepisu suri nene, ana nesitoñal visena kiena ne kieta Supe, naga pisa nanua sumo, pisape 'Yoane naga kee amiu e wii, ana ve ve piavi re, ana amiu akus nakeena naña e Ninuna Wa.' 17 Ana ita le Yu lala, naña ita temlelaga rui e kieta Supe Yesu Kristo, Ntewa naga mla kiena Ninuna pan ita, sane nalaena tai, ana pogos naña nepisu naña Ntewa mla m̄ena ga nalaena na sanene pan la naña pe ape le Yu re poli, ana suri nene kila merarava ruru pan inu naña sane nanagane, pe pe pon re naña nevisave yeririna la nene la taapatete aimi loyuna amio ita. !In na nepe ai nini naña vena nevisaluñar Ntewa sanene, visae naga sinenan visave kila sanene van la?"

18 Ana pogos naña le Yerusalem la nañani amloge visena kiena Pita, ana la pe apisa re si suri tai pan poli, ana la akekarania, amiyeluar Ntewa pañisi, la apisa apisape " !Lelaga pañisi naña ne! Nanagane ga ne ita tepisuluñar rui naña Ntewa

naga kekara m̄ena ga pañisi pan la naña pe ape le Yu re poli, ana naga mla m̄ena ga pulmas pan la vena lala akilia avilopu la, a vena akilia atol malena lelaga e naga."

Pegas nen li nalelagaena lala nae garu Antiok

19 Ana nanua sumo, pogos naña Sol lala amem̄ar Stipen naga mare rui, Sol la nene la akila kare ruru m̄ena ga nalelagaena tañena lala garu Yerusalem pañisi, p̄isi na nalelagaena la nene la moki apuretetai apeve taaga. Lañas aPURE manene laa apa perina apano-o atol lepas naña Ponisia, lañas aPURE asum̄a akus waa lala apano atol purvanua naña Saepras, a lañas apa laa ga waa, apa e kumali keviu tai, naña kiena kia Antiok. A pogos naña lala asike e yo la nene, la asum̄a amlologon ke Nalologena Wo nene, ana la asum̄a amlologo ke ga pan la naña ape le Yu ga sa naña lala. 20 Ana siraunia, gar yo naña Antiok, nalelagaena tañena lala naña amolue e lepas na Saerin a purvanua naña Saepras, lala apimi m̄ena ga, amlologo, ana la asum̄a apisasawal ke Nalologena Wo kiena ne kieta Supe Yesu pan m̄ena ga la nae Antiok naña la pe ape le Yu re poli. 21 Ana nam̄areraena kiena ne Ntewa sum̄a pimi keviu e la nene, a yeririna

la moki naŋa amloge kiela visena lala, ana lala amlelaga e Yesu, la apilopu la apimi e naga.

²² Ana nalologena na suri nene pimi tol kiligana ne ƣegas nen li nalelagaena lala garu Yerusalem, sape visena kiena ne Ntewa pa tol pa li taŋena la rui la naŋa pe ape le Yu re poli, ana la apitetalia Panaŋas pa garu Antiok vena naga visuli sur la nene wa. ²³ Pogos naŋa Panaŋas naga poru e yo nene, naga pisu suri nene pe lelaga paŋisi, naŋa Ntewa naga pisa ruru malena kiena ne yeririna la nene keviu paŋisi, ana kila naga kekara keviu paŋisi ea, ƣisi na naga sukol visena lala pan la vena la atarar Suŋe m̃arera e losinela lala wetelu, e pogos naŋa po a pogos naŋa piowa. ²⁴ Panaŋas naga kila sanene komin naga pe yaru tanea tai, naŋa Ninuna Wa naga pule e naga, a naga piawa m̃arera e Ntewa, ana sanene, yeririna la moki apimi e Ntewa e pogos nene.

²⁵ Ana Panaŋas naga pisu sane yum̃aena keviu garu Antiok, ana naga pisu sape popon va tol garo pupia pulkumali naŋa Tasas, vena kaleli Sol, vena were naga imi iila yum̃aena. ²⁶ Pogos naŋa naga m̃alia, ana pure naga la lua aŋasuŋe si apimi apa Antiok. La lua asike amio nalelagaena lala e yo nene, ana lala apian yaru la

moki, amiyum̃ae m̃a sanene pano-o tol kas wetelu taaga. E kumali keviu nene Antiok, ana li taŋena lala la apisa kare towe la nalologena lala, lala apio la asape “La yeririna Kristo lala” pona “Kristin lala,” a nane la apisa ƣesan ke kia ne nanene narui.

²⁷⁻³⁰ Ana e pogos nene, nalelagaena laŋasia naŋa ape navisawalena, amolue Yerusalem apimi atol garu Antiok, ana la nene tai, kiena kia Akaŋas, naga suŋalu, pisi e nam̃areraena kiena ne Ninuna Wa, naga pisape “Ana ƣisi na ve ve viavi re, ana visokarena tai ve keviu imi tol yeririna make ga e purvanua punu ga e kieta lepasia.”

Ana pogos naŋa nalogena lala nae garu Antiok la amloge visena nene, la apisayuia, ana lala apranaria apisape ƣisi na monar la punu ga akoan kilavaru ya naŋa la akilia alavia, vena aligan vano van kiela wolai lala naŋa asike e lepas nae Yutea, vena iila la vena lala asum̃ate ruru pogos m̃arera nene. Ana lala akoan kilavaru la nene, ana lala amligan nalaena nene sike e limana ne Panaŋas amio Sol, vena lalua nene awar vano van nasumonena kiena ne nalelagaena lala garu Yerusalem.

A visena kiena ne navisawalena nene pe lelaga, komin naŋa sirau ana pupia pogos m̃arera tai tol yo la

nene, sa ga naṗa naga pi-sawalia, ana nanene e pogos naṗa Klotias naga suṃa pe ṗarin suṗe ke garu Rom.

12

Yerkawa la aṃe li nale-lagaena lala, akila kare la manene laa

¹ E pogos nene, naṗa lalua aṗar nalaena nene pimi garu Yerusalem, Ṗarin Suṗe Erot suṃa ṃe kare ke ṗegas nen li nalelagaena laṗasia. ² Kiena yaru na mara laṗasia la apa atarar wenla Yoane nene, Semes, ana la aṃeṃar naga e kiela playu na kilaen mara.

³ Ana yerkawa lala kiena ne le Yu lala la akekaran manene suri nene paṗisi, ana kila Ṗarin Suṗe Erot naga kila ṗelaga nene pa laa sanene, ana naga pisa pa kiena yeririna la nene vena ava atarar ṃena ga Pita. Naga kila nena ga nene e pogos na ṗaṗagena kiena le Yu lala, naṗa la akila Paṗagena Na Sitom̃alena Natamaliaena, amio ṃena ga Paṗagena Na Kanen Tamṗa. ⁴ Erot suṃa sitom ke pisape visae pogos na ṗaṗagena nene war ro pae, yokorena naga were Pita va suṃalu se marana ne yeririna lala, vena la avis vania, a vena la avisa avisave naga monar mare.

Naga narui, yaru la nene apa atarar Pita, ana akoven naga pa e yuṃa na koaena, a la amligan ṗegas nen yeririna na mara la vari

vena akirakiravan ruru naga, naṗa ṗegas la nene kiela yaru na kilaen mara la pepe vari ea. ⁵ Ana pogos naṗa Pita sike loyuṃa e yuṃa na koaena sanene, nalelagaena lala la amlen ke ṃarera silaga pa Ntewa vanon naga.

Navisi pimi ṗerelua Pita petan yuṃa na koaena

⁶ Pita pa suṃa e yuṃa na koaena pano-o, pa tol nena yemalo naṗa Erot naga suṃa sitom ke pisape e kolulagi, ṗisi na naga were Pita va suṃalu se marana ne yeririna lala vena la aliṗere naga. E yemalo nene, Pita naga momalio, ṃeke ga likan yaru na mara la lua nene, naṗa la apiar Pita panon lalua nene amio sen lua. A li na mara taṗena lalua, naṗa la ṃena asuṃa apisuar ke mratava lala na yuṃa nakoena nene. ⁷ Ana verakorena ga, navisi kiena ne Ntewa tai naga suṃalu sike loyuṃa e yo nene, a pupia yomerarava nenaga e naṗani paṗisi. Ana navisi nene pa kululun purkaunena ne Pita, pio ṗegea, ana pisape “! Ovi-taṗili, osuṃalu vilaga!” Ana sen lua nene la ga amluṗa petan limana ne Pita veraga, luoka ga mloloru pito sike e porotano. ⁸ Ana navisi nene pisape “Oviteran ruru kioṃa kilika na kararen mopom̃a, oyen kioṃa kulus nen laṃa a mom̃a kulsota, italua tevano.” Ana Pita kila sanene, ⁹ ana naga

taveve navisi nene, lalua apano. E pogos nene, Pita pe kilia re pisape suri nene na lelaga poli, pona sanape, komin naga sitom ke pisape naga m̃eni ke ga naña. ¹⁰ Ana lalua apa m̃a sane, lalua amiyuve mratava na sumo naña yaru na mara sike ea, lalua apa m̃aga amiyuve m̃ena ga mratava nalua naña yaru na mara sike ea, ana lalua apimi atol pulutava maro na keviu naña mrapa na vaen vanua vetan yum̃a nakoena. Pupia pulutava nene la amiyum̃aen e pototo, ana pogos naña lalua apimi lavisinia, pupia pulutava nene naga ga pietava, ana lalua aparo apa vanua. Lalua amialoro la ga e mrapa apa sane, ana Pita milan ga, navisi nene mligan ke naga veraga, ana Pita naga ga taaga sike na.

¹¹ Ana e ke e pogos ga nene, Pita pisu kilale ya naña navisi nene kila ke pania, ana naga pisape “!Aulai! !Lelaga kemua nañane! Nekilia narui, naña nesape Ntewa naga mligan kiena navisi nene pimi vena vinaunlua inu vetan limana ne Erot, a vena tarlua inu vetan suri viowa la naña le Israel lala la asum̃a asitom ke asape akila van inu.” ¹² Pita pisu kilale suri nene narui, ana naga pa mesmes ga e yum̃a m̃ana ne anenane Son Mak, kiena kia Maria. E yum̃a ke ga nene narui, la moki naña la asike pa e rui

vena alen wo naga.

¹³ Ana Pita tol yum̃a nene, naga sigariga mratava, ana sira m̃ee nae yo nene tai, kiena kia Rota, naga pimin vena vietava. ¹⁴ Naga pe pietava ruru re poli wa, ana naga mloge kilale pulgona ne Pita naña pisi pania, ana naga kekara na kekara, naga mligan mratava nene m̃eke na, kiriri pa pisawal pan la, pisape “!Pita nañani! !Pita nane sum̃alu sike vanua e m̃ata pulutava rui!”

¹⁵ Ana la apisa pania apisape “!Ko na ve ovisi wowe re sanene!” Ana naga pisa ke sina ga pan la, pisape “!Peraga kemua rui! Nepisokan-lae re poli, nepisa ke lelaga ne!”

Ana la apisa ke sina ga pania, apisape “!Peraga! Visae sanene, pona kana yermare ga nene yo?”

¹⁶ La asum̃a apivis ke sanene, ana Pita sike vanua na wa, naga sigariga mratava suluen ga sike na pano-o, ana la apa apietavanja. Pogos naña la apietava, la apisu kilale Pita, ana la amilan manene pano-o pañisi. ¹⁷ Ana Pita sisi ga pan la, kuan limana pisape vena avarurula, ana naga sunyu pan la sanape naña Ntewa naga p̃erelua naga petan yum̃a nakoena. Ana naga pisa pan la pisape “Popon naña amiu ava avisawal suri nene va Semes nanagane, amio m̃ena ga arueta tañena la nene.” A siraunia, Pita molue ke sina

ga, pa tapolou e yo taḗna tai.

¹⁸ Ana kolulagi, yaru na mara lala amiyuyuwawa paḗsin naḗa Pita pe mon re si e sen la nene poli, ana la amarau a amninue kare ga asape ḗisi na aḗa akila ya narui, la asum̃a apiuviun tan la, asape “?Ana yaru pure sanape, aḗa naga pa sike pe narui?” ¹⁹ Ana visena pa tol Parin Suḗe Erot pisape Pita kovio, ana Erot mligan kiena yeririna lala apa akale pano-o, akale ḗele ga. Ana Erot pisi pa kiena yeririna la naḗa la apisuar Pita, ana la nene taḗatete si avisa suri tai vania, ana Erot pisape akoven plan la nene, la awe moḗar la amarmare.

Ana siraunia, Erot mligan si yo naḗa Yutea, pito garove sike e pupia pulkumali keviu naḗa Sisaria.

Suniena na marena kiena ne Parin Suḗe Erot

²⁰ Ana e pogos naḗa Erot naga ḗene ke nalelagaena lala wa, ana naga sum̃a peveyu keviu ḗena ga amio yeririna na pupia pulkumali lua nene Taea amio Saeton, pano pano-o kila yeririna na kumali keviu lua nene amarau paḗisi, naḗa asape visae veveyuena nene imi viowa ḗisi na yoko ḗarera van la vaḗisi. La nene asitom sanene komin naḗa la asum̃a amalin ke ga kinnanena la naḗa la aḗar ga e porotano tai kiena ne Erot nene. Ana la amligan kiela yerkawa laḗasia

vena la aimi akila mara wo amio Erot. Ana la nene apa ape erau wo amio yerkawa kiena ne Erot tai, naḗa naga kiena kia Plastas, vena naga kilia iila la a naga kilia kila mrapa naḗa la akilia avis amio Erot vena asu ruru sina e sum̃arena amio naga.

²¹ Ana Erot pisawal legiena tai pisape la akilia aimi avisu naga ea, ana e legiena nene la apimi. E pogos nene, Erot mien ḗana pupia kulsota wo lala, sa naḗa naga pe pupia ḗarin suḗe, a naga totano e kiena pupia yo na totanoena, ana naga toḗa mligan ke visena tai pan la.

²² Ana la nene amloge kiena visena nena, ana la sinelan asape akila kotalia yo pona aḗa sanape, ana la apioni manene pa metava, la apisa apisape “!Ee, nanene pe yeririna re na pisi nene poli, pona na nene na Ntewa ga nene yo, aulai!”

²³ Ana Erot mloge visena nene, ana kekarania, a naga ḗarwar ḗena ga naḗa la apisape naga Ntewa, ana mesmesu e pogos nene, navisi kiena ne Ntewa tai pimi ḗe naga, komin naḗa naga pe pialuḗar la re poli, pisape la monar ayeluar ga Ntewa, a la monar ve ayeluar re yaru. A pe piavi re poli, ana pulen ga kular viowa lala akaria akaroro sinena ana naga mare.

²⁴ A e pogos nene, pe suri koren ga naḗa yeririna la ne sane Erot nene la asum̃a akilali naḗa akila yum̃aena

kiena ne Ntewa vito tano, ana visena kiena ne Ntewa naga sum̃a kapuru kekei ke pa e yo punu ga, a sum̃a p̃ar ke mras moki liu.

²⁵ Ana Panañas amio Sol, lalua amla nalaena naña li nalelagaena lala nae garu Antiok la akuan rui, amla pa nasumonena lala kiena ne nalelagaena lala garu Yerusalem, p̃isi ana lalua apitove, lalua añasuñela sina ga apa Antiok, a e pogos nene, lalua appure Son Mak taveve la.

13

Amiyawa Panañas lalua Sol

¹ E p̃egas nen li nalelagaena lala garu Antiok nañani, ana yeririna lañasia la asum̃a naña ape li navisawalena lala, a lañasia naña la ape li navianena lala. La nene ana lañasia la kiela kia sanini: Panañas, a Simion Kuluyepe Malolo, a Lusias nae Saerin, a Man-aen naga nanua sumo, naña namratava m̃ana Parin Supe Erot la akuslua naga pogos naña lalua Erot ape sisi ke ga wa, a amio la nene Sol naga m̃ena ga pe lala yaru tai.

² Ana pogos tai, la nene amio li nalelagaena tañena lala, la amonsilu ga, ana asum̃a amlotun ke Ntewa, ana Ninuna Wa pisi pan la, pisape “Amiu akilalua Panañas amio Sol vetan amiu nanagane, ana amiu avisir plan lala lua naña akila yum̃aena tai naña

in na sineun nesape lalua monar akila.”

³ Ana siraunia, lala amonsilu ke sina ga pogos tai vena alen, ana la apuarar p̃arina ne Panañas lalua Sol, ana amlenwo lalua, p̃isi na amila lalua apano vena akila yum̃aena kiena ne Ntewa.

Panañas lalua Sol aporugaro Saepras

⁴ Ana sa naña Ninuna Wa miila Panañas lalua Sol sanene, lalua amligan yo Antiok, ana lalua apitomi e pulkumali naña Selusia naña m̃eke garo losi, ana lalua amiyai e waa tai, apa aporu e purvanua naña Saepras. ⁵ E purvanua nene, ana lalua apa ura e kana pupia pulkumali nena naña Salamis, ana lalua apa e yum̃a lala nalotena kiena ne le Yu lala, ana lalua asum̃a apisawal ke visena kiena ne Ntewa. Ana e pogos nene, Son Mak naga sikol ke lalua nene na wa, ana naga sum̃a miila la ke e yum̃aena.

⁶ Ana la telu nene amiyal ke e purvanua nene, apitom atol kana luas tañena, e kana pulkumali keviu tañena tai naña Papos. Ana e yo nene, apisu yaru tai naña kilia kilaen m̃aki m̃eke e yo nene, naña naga pe Yu tai, kiena kia Payesu, ana apio m̃ena ga naga e visena kiena ne le Kris lala asape Elim̃as. Yaru nene naga sum̃a pisokan kar ga sape naga pe yaru navisawalena tai kiena ne Ntewa. ⁷ Ana yaru na kiliaen

m̃aki nene, naga pe yerkawa m̃ena ga tai e yum̃aena kiena ne p̃arin supe na purvanua nene, naṗa Sese Polos. Ana p̃arin supe nene, naga pe yaru tai naṗa naga kilia ruru suri po, ana naga pio Panaṗas lalua Sol sape aimi avisu naga, komin naṗa naga sinenan sape loge visena kiena ne Ntewa tan la. ⁸ Ana pogos naṗa lalua apimi, ana yaru na kiliaen m̃aki nini naga kawē kiela visena, taṗali naṗa visaluṗar la, a taṗali naṗa kila kare sitomena kiena ne p̃arin supe nene naṗa naga taṗatete kus lelagaena e Yesu. ⁹ Ana Sol, naṗa naga asum̃a apisa m̃ena ga kiena kia asape Pol, naga pimi pulemamaga e Ninuna Wa, ana kiena natamariaena m̃arera nene miyur yaru na kiliaen m̃aki nene, ¹⁰ ana pisi pania, sape “! Ko na ope narina Yermare ruru nena ga napo! Suri punu ga naṗa po, ana ko pe sinom̃an li re nena ga, ana ko na opulen ga visokanena a p̃elaga piowa ga lala. Visena lelaga lala kiena ne Ntewa, ana ko na osum̃a opilon la silaga apimi ape visokanena ke sina ga. ¹¹ Nanagane ga ne, yoko ovisu limana ne Ntewa imi tol ko ruru nena ga. Nanagane yoko kilamaram̃a imi ve kilamara p̃ala, p̃isi na ko otaṗatete ga ovisu legiena ve piavi li m̃a ga.”

Ana veraga ga, ana yaru nakiliaena m̃aki naṗani naga pisu sa naṗa m̃au tai na

yom̃arua naṗa malolo manene pimi kalwo kilamarana, ana naga mom̃a mial wowe ga sanene narui naṗa taṗali sape lual re yaru tai naṗa tarar limana ana were vano. ¹² Ana pogos naṗa p̃arin supe naga pisu suri la nene, ana naga mlelaga e visena kiena ne Ntewa narui, ana pogos naṗa Panaṗas amio Pol apian naga e visena wa la nene, ana naga milan manene paṗisi, pisu po na po.

Pol lalua Panaṗas apa si Antiok taṗena, e yo lepas naṗa Pisitia

¹³ Ana Pol la amligan yo Papos, ana akome waa apitove, ana apa ura e yo lepas naṗani Pampilia, ana la amiyal apano atol pulkumali keviu nene Peka. Ana e yo nene, ana Son Mak naga mligan la, naga pe taveve la re si poli, ana naga p̃asupe sina pa Yerusalem.

¹⁴ Ana Pol lalua Panaṗas, lalua amligan yo Peka, ana amiyal apa re laa sane apano aporu e yo lepas naṗa Pisitia, apa atol m̃ena ga pulkumali keviu tai naṗa kien kia m̃ena ga Antiok. La asum̃a e yo nene, ana e Legiena Wa, ana apa loyom̃a e yum̃a na leniena kiena ne le Yu lala, ana atotano amio yeririna lala. ¹⁵ Ana li nasumonena lala la akila lotuena, pano tol pogos naṗa apuloyu Visena Wa, ana apuloyu nawuloena tai e navisaluaena kiena Mosis, a tai e tusi kiena navisawalena lala.

Ana pogos naṗa nawuloena la nene ṗisi narui, ana li nasumonena lala apiun tai Pol lalua Panāṗas, la asape “Wenlamimi lala, visae amiu lua amlarar ke visena tai naṗa kilia iila malena kiena ne yeririna lala, ana imimi sinemimin mesape amlua avisa van imimi.”

¹⁶ Ana Pol suṗalu, ana koan limana, naṗa sape ava ruru la ana ayagokon naga, ana naga pisi pan la, pisape “Poga ga, ana in na sineun nesape nevisa ve sanini, amiu le Yu lala, amio li taṗena la naṗa amiu ṗena ga asuṗa amlelaga ke e kiamimi Ntewa, ana amiu punu ga ayagokon ruru kiau visena nini. ¹⁷ Kieta Ntewa nene, naga ke narui naṗa naga pisir plan kieta li marua la nanua sumo, a naga ga naṗa kila la apimi ape moki paṗisi e pogos naṗa amiyuṗae korena ke ga garu Isip, a naga ga ke sina ga naṗa ṗere plan la e pogos ṗarera nene, e kiena naṗareraena keviu. ¹⁸ Ana naga sumon la amolue apa e yokorena, ana amiyal ṗa e yo nene pa tol kas lualima yam vari, ana yam moki naṗa e pogos nene ana apilopu ṗasila pan Ntewa, ana naga pe mligan la re nena poli. ¹⁹ Ana pogos naṗa la apimi atol purvanua nene Kenan, naṗa Ntewa pisaar pisape taṗan van la, ana naga ṗene plan lus la olua kiena ne li taṗena la naṗa apimi asike e yo nene

rui, ana siraunia ana mla porotano nene pan repita lala, la ape ṗarunia, ana lala apa asu wawa asike ea. ²⁰ Siar e pogos naṗa apa garu Isip sumo, ana pimi ṗa pano-o tol pogos naṗa aṗasuṗe la sina apa loyuṗa e kiela purvanua, tol kas pe suri tai sane ponotia vari lualima yam lima.

“Ana e pogos naṗa asu wawa asike e kiela porotano sanene, ana Ntewa pisir plan kiela suṗe lala, naṗa asumon la a aliṗere la, ana suṗe la nene la amiyuṗae ṗa sanene pano-o tol lala yaru maro nini, Navisawalena Samiuel. ²¹ Ana la apisawal asape la pe sinelan re si suṗe la ne sanene poli, ana la apisa pa Samiuel asape naga lual re yaru tai naṗa naga kilia ve kiela ṗarin suṗe keviu. Ana Ntewa kilologia Sol, narina ne Kis, pan la, naṗa naga pe lus kiena Pensiman, ana Sol naga pimi pe kiela ṗarin suṗe keviu nasumo, ana naga pisuar la pano-o tol kas lualima yam vari. ²² Siraunia, ana Ntewa kilalua sina Sol, ana mligan Tepet kus lelana, ana Ntewa naga kekarmanene Tepet paṗisi, naga pisayu sape ‘E Tepet nini, narina Sese, ana nepisu nesape netol yaru tai naṗa kiena ṗelaga torokin ruru nena ga kiau sitomena, ana nekilia nesape naga ṗisi na naga yuṗae ga va sa naṗa in na sineunia.’ ²³ Ana Ntewa pisaar pan repita la

nanua sumo sumo laa rui, sape ñisi na naga werelua lus tai kiena ne yermarua Tepet nene, ana ligan naga van ita le Yu lala, ve kieta Natamaliaena, ana suri nene Ntewa kila pa e yaru naña Yesu rui.

²⁴ “Sumonia, pogos naña Yesu nene pe pimi re poli wa, ana Yoane Nakeena suña mlolog ke pan ita, sape ‘Amiu monar avilopu amiu, ana amiu monar ava e nakeena.’ ²⁵ Ana pogos naña Yoane nene lavis ga kila punu yurñaena la naña Ntewa mla pan narui, ana naga suña piun ke tan yeririna lala, pisape ‘? Amiu amape in na nepe Navisaarena? Inu nevisa van amiu, in na pe nepe yaru re nena naña amiu asuña asuñate ke poli, peraga. Ana siraun inu, ana naga suña pimi ke ne, a naga po naña po, a naga pe yaru wa manene laa, ana in na nepisu sane inu pe nemesmesu re naña neve yaru na kiena yurñaena ga poli, inu pe netorokin re neva lavisi puna poli naña nowar plan kiena kulus nen lana.’ ”

Pol pisape yerikawa kiena ne le Yu lala, la ke naña amañar Yesu narui

²⁶ Ana Pol pisa pan la, pisape “Wolai lala, amiu lañas naña ape le Yu ruru

lala, naña amñalivi e lus kiena Epraam, a amiu lañas naña ape li taña lala, ana amlelaga ke e kiamimi Ntewa imimi le Yu lala, ana sineun nesape monar avisu kilalea avisave ita ke narui naña Ntewa mla visena na natamaliaena pan ita rui, kila nesuña neñar ke pimi pan amiu ne. ²⁷ Lala nae Yerusalem amio kiela yerikawa lala, la pe apisu kilale re nena Yesu poli e pogos naña naga pimi, a pe apisu kilale re asape naga pe Natamaliaena poli naña li navisawalena la apisayu e Visena Wa la naña apuloyu silaga e Legiena Wa lala. Sanene, ana pe apisu kilale re poli, naña la akila visena kiena ne navisawalena la moki apimi ape lelaga, komin naña la ke nene narui la amliñere kiela Navisaarena nene asape naga monar mare. ²⁸ La pe añal re nena suri tai poli naña torokin naga mare vanonia, ana la amñareran pa Paelat vena naga monar tamñan visave la akilia awemñaria. ²⁹ Ana la akila piowa ga pania taveve ga ya naña li navisawalena lala apisawal nanua sumo la rui naña asape ñisi na yeririna la akila vania, vano vano awemñar naga e laki torovia, ana siraunia la akus tasnena pano, amligan mñeke e puluve. ³⁰ Ana

Ntewa tamalia ke sina ga naga petan marena, ³¹ ana e legiena laṗasia, moki li m̃a ga, ana naga sum̃a m̃alm̃alivin kiena yeririna lala naṗa sumo lala asu amio naga garu Kalele, a naṗa ataveve naga apami metava ma Yerusalem. Ana la naṗa apisu Yesu sa nene rui, nanagane la ke nene narui la asuṃa apisasawal ke pan yeririna lala asape naga mali sina petan marena.

³² “Ana nanagane, e yo nini, imimi lua mepimi pun amiu naṗa memla Lologena Wo nene pimi pan amiu. Imimi lua mepisawal pan amiu, mesape suri wo la naṗa Ntewa pisaar pan repita la na sumo, pisape ṗisi na kila van kiena yeririna lala, ³³ ana nanagane suri la nene apimi ape lelaga rui e ita narin mapila lala, a e ita li taṗena m̃ena ga la naṗa temlelaga e naga. Ana ita tetol suri wo nene e ga e kieta pogos nini, naṗa Ntewa mligan Yesu pimi tano e yomarava nini, ana tamalia ke sina ga naga petan marena.

“E Visena Wa, Yauena marana lua naga pisayu suri nene, naṗa sape

‘Kiau sisi, nepisu sane ṗane ko opimi ope naruu, a nepimi nepe arimoṃa kemua lelaga.’ Yauena 2:7

³⁴ Ana e lepas naṗa Ntewa kila Yesu mali sina e marena, naṗa naga taṗatete va sina ga e puluṗili pogos taṗena, e lepas nene ana visena lua

na Visena Wa la apisa rui. E visena tai, ana Ntewa pisa sanini, pisape

‘Navisa ruruena wa la nini naṗa in na nepisaar pan Tepet sumo rui,

la asuṃalu m̃arera asike ga wa,

ana nanagane nela van amiu narui,’ Ais 55:3

³⁵ ana visena na lua na lepas nene, sike sina ga e Yauena tai, naṗa yaru naṗa siria pisi pa Ntewa, pisape

‘Pisi na ko na taṗatete okilia otaṃan kioṃa yaru wa visu marena,

pona tasnena menun pogos tai.’ Yauena 16:10

³⁶ “Ana visena la nini pe apisa re yermarua Tepet nanua sumo poli, komin naṗa siraun naṗa naga kila yum̃aena kiena ne Ntewa pan kiena yeririna la pano pano-o, naga mare ga, ana asin naga m̃eke amio repina lala, ana tasnena mon m̃a pano menun. ³⁷ Ana visena la nini apisayu ga Yesu nini, apisayu naṗa naga tasnena pe pa piowa re sanene poli, naga Ntewa pisirlua sina ga naga mali sina.”

Pol sape naviewoena naga m̃eke ga e Yesu

³⁸ Ana Pol sape “Wolai lala, visae sanene, inu sineun nesape monar akilia ruru suri nene, sape e ga e Yesu nene, ana Ntewa suṃa kila pan ita lua sape naga piowo punu kieta mlamulena piowa lala.

³⁹ Navisaluaena kiena ne Mosis taṗatete were plan ita lua vetan kieta ṗelaga na

mlamulena viowa lala, ana ko ai, naña visae olelaga m̄arera e Yesu, ana p̄isi na naga war plan kioma p̄elaga na mlamulena viowa nene vetan ko. ⁴⁰ Sanene, ana monar avisuar ruru amiu, komin naña visae peraga, ana p̄isi na amiu ve sa naña visena tai kiena ne navi-sawalena lala, ⁴¹ naña naga pisa pisape

‘Amiu apisu ke ne! Amiu asuñã apitalia kare suri wa lala, ana nanagane ga ne ana yoko avisu kilale ga na wa, siraunia amare. Komin naña in na nesuñã nekila ke yurñaena tai likan amiu e pogos naña amal ke ga wa, ana asuñã apisavan ruru merarava pan amiu, ana amiu na pe sinemiun re alelaga e poli.’” Aña 1:5

Yeririna nae Antiok lala akekaran visena nene kiena ne Pol

⁴² Ana Pol pisi pan la p̄isi, ana la apa vanua, ana yeririna la apimi apiun m̄areran tan Pol, asape “Imimi sine-mimin mesape e Legiena Wa naña pimi ke ne, ana p̄isi na amlua awasupe amiu si aimi, ana avian imimi re laa ga wa e suri la nene.” ⁴³ Ana pogos naña Pol lalua Panañas apano, ana le Yu la moki amio m̄ena ga yeririna tañena la naña apimi sa ga ape le Yu la rui, apimi amiyaloro ataveve lalua apano naña asape asun re laa sane wa.

Ana nalologena lua nene apisi amio la, ana apisa pan la asape la monar awasine manene laa Ntewa sane wa, a lala monar atañali naña ava re laa loyurña e kiena lemamiena.

⁴⁴ Ana sa naña la apisa pa Pol amio Panañas rui, e Legiena Wa tañena naña sirau pimi, ana pulen ga le Yu lala, a pulen m̄ena ga yeririna tañena lala e pulkumali nene apimi sina lele taaga, naña asape ayagolon Pol lologon Visena Wa kiena ne Ntewa. ⁴⁵ Ana pogos naña yerikawa kiena ne le Yu lala apisu yeririna moki tañena la nene, ana apielue narui, ana la asuñã apisa kare Pol, asuñã apisa pan yeririna lala asape naga suñã pisokan ke ga nene. ⁴⁶ Ana Pol amio Panañas lalua pe sinela kurkur re poli, ana lalua asuñã apisi molmolue ga narui, a lalua kiela visena pa m̄arera laa narui, a la apisa pan le Yu la nene, asape “Imimi mepisu mesape popon naña Visena Wa kiena ne Ntewa naña imimi mesuñã mepisawal ke pan amiu, naga imi tol p̄esan amiu le Yu la sumo, sumon naña tol yeririna tañena lala. Ana amiu na pe sinemiun re alelaga e poli, asuñã akuwan plan kare ga pano, sa ga naña amiu atañatete si akilia atol malena naña ve uro re narui. Ana poga ga, teke ga e amiu, ana sanene p̄isi na imimi meva ga melologon va la naña pe ape le Yu

re la po la rui. ⁴⁷ Komin naṽa Visena Wa tai pisa rui naṽa imimi monar mekila sanene, naṽa Ntewa naga pisa, pisape

'In na nepisirlua ko vena ovivaga sane kapi tai, vena tegoli la naṽa pe amlelaga re e inu poli wa.

Pisi na ko okus kiau natalialiaena va tol yo punu ga e yomarava.'”
Ais 49:6

⁴⁸ Ana pogos naṽa lala naṽa pe ape Yu re poli amloge visena nene, ana amloge po manene laa ea, la apisape “!Suwala, visena kiena ne Ntewa nene naga po naṽa po, imimi sine-mimin paṽisi wa!” ana lala naṽa lala laṽas naṽa Ntewa pisaar la sape ṽisi na la atol malena naṽa ve uro re, la ke nene narui naṽa amlelaga e Yesu e pogos nene. ⁴⁹ Ana siar e pogos nene, ana visena kiena ne Suṽe suṽa mlenlelein pa ṽar make yo e lepas nene.

Le Yu la sinela kar Pol amio Panaṽas

⁵⁰ Ana le Yu la naṽa apielue apa apisu sira kawa lala na kiela yuṽa na leniena amio li naṽumoneṽa lala na pulkumali, ana apis pan la akila kare kiela sitomena lala, pano pano-o yerkawa la nene amiila yeririna la apa aṽenelua Pol lalua Panaṽas petan kiela yo. ⁵¹ Ana pogos naṽa lalua asuṽa apa ke narui, ana

lalua akila kile tai pan la ne na pulkumali nene, lalua aṽevan puluyavi na mrapa naṽa sike e lolala lalua.

Ana lalua apetan yo Antiok, lalua apa atol pulkumali naṽa Ikoniam, ⁵² ana nalogena viu la naṽa asike garu Antiok, la sinela kekara keviu, a Ninuna Wa pimi pulemamaga ruru nenaga e la.

14

Pol lalua Panaṽas, lalua amlologo e yo naṽa Ikoniam

¹ Ana e kumali naṽa Ikoniam, suri punu ga aṽalṽalivi sa ga naṽa Antiok narui. Lala aporu e yo nene, ana siraunia Pol lalua Panaṽas, lalua apa loyuṽa e yuṽa na leniena kiena ne le Yu lala, ana lalua amlologo. Lalua amlologo amio naṽareraena kiena ne Ntewa, ana yeririna la moki naṽa asike e yo nene, lala amlelaga e Nalogena Wo nene, naṽa lala ṽasia ape le Yu, a lala laṽas ape le Kris. ² Ana le Yu taṽena lala naṽa asuṽa ga, lala pe sinelan re naṽa alelaga poli, ana siraunia la nene apano akilayon naṽa avilonkare sitomena kiena ne yeririna taṽena lala naṽa pe ape le Yu re poli, la akila sinela la pimi kari la naṽa amlelaga mare ga na wa. ³ Suri ne nanene narui kila Pol amio Panaṽas, lalua asike e yo nene yam piavi la

sane, vena akilali naþa aiila nalelagaena lala. Ana pogos naþa lalua asike amio la sañene, ana pe amaraun re la naþa sinela kar la ke poli, ana la asuñã amlologon Suþe Yesu pan la, a apisayu kiena pupia lemamiãna pan yeririna lala. Ana Suþe naga kila yeririna lala apisu kilale naþa kiela visena lala ape lelaga, komin naga tañan pan lalua vena akila kile ve moki e yo nene a suri nailanena lala.

⁴ Ana yeririna lala na kumali nene la amlipere la e þegas lua narui, naþa laþas akekarã le Yu lala, ana laþas akekarã nalologena lua naþani. ⁵ Lepas lua nene lalua asu ñã apepeyun la sanene, pano-o ana le Yu lala amio li taþena lala naþa pe sinelan re si li nalelagaena la poli, amio mña kiela yerkawa laþasia, la ke naþa apisa ruru narui vena la asu nalologena la nene a akove moñar la amare.

⁶⁻⁷ Ana nalologena lua naþani lalua amloge suri nene, ana apisu sane popon naþa aure vetan yo nene, vena ava atapolou e yo tai. Sanene, lalua asuñãlu petan yo nene, apa e lepas taþena naþa Likonia, ana lalua apa amlologon Nalologena Wo e lepas nene, amio kana pulkumali ne luwoka, naþa lalua kiela kia sanini, Listra amio Tepe.

Pol lalua Panaþas lalua amlologo garu Listra

⁸⁻⁹ Ana e narin pulkumali nene naþa Listra, pogos tai ana Pol naga suñã mlologo ke pan yeririna lala, ana yaru tai pe laulu naga toñã tano, ana naga toñã miyagogon Pol. Yaru nene, siar e pogos naþa naga paeme, naga pe mial re pogos tai poli, komin naþa naga lana luwoka ga pulu.

Ana Pol pisu naþa yaru nene suñã miyagogon ruru ke naga, a naga mlogelupar naþa sane yaru naþa pe laulu ne naga suñã mlelaga e Yesu sape yoko naga kilia kila ruru lana luwoka. Ana Pol pisu manenea, ¹⁰ pio naga, pisape “! Laulu, ko oula ova metava, osuñãlun lañã luoka!” Ana yaru nene mloge Pol pisi pan sanene narui, ana naga pula pa metava veraga, ana naga suñã mial ke amio lana luwoka naþa apimi amãrera ruru narui.

¹¹ Ana pogos naþa yeririna lala apisu suri nene naþa Pol kila e laulu nene, la asuñã apiovion e kiela visena, apisape “! Ake! !Kieta ntewa lala akus maran yeririna, apitom tano pun ita sa ga yaru narui!” ¹² Ana la asikia Panaþas, apio naga asape Susu, naþa naga pe kia kiena ne þarina suþe kiena ne kiela ntewa lala, a amligan kia kiena ne Pol, la apio naga asape Emis, naþa naga pe kia kiena ne yaru nawaren visena kiena ne kiela ntewa lala, komin apisu naþa Pol naga suñã pisi manene laa

sane taulu Panañas.

¹³ Ana vanua e mralaea na kumali nene, yum̃a wa tai m̃ana ne kiela ntewa nene, Susu, naga mon m̃a ga, amio kana yaru wa nena, ana yaru wa nene naga sitom sape kila ruru naña vena yeririna lala monar akila kuṗaṗaena van Pol amio Panañas, naña la asitom asape yaru lua nene lala ape kiela ntewa. Ana yaru wa nene kila la apitaṗilin naña apanon aṗure puluk lala apimi, ana apaia la e meme, vena awe moñar la e kove na yum̃a wa nene narui.

¹⁴ Ana Panañas amio Pol, lalua pe akilia re kiela visena poli, naña la asum̃a apisayu ke suri la nene, ana pogos naña lalua amloge ya naña asum̃a asitom ke naña asape akila, lalua amloge piowa paṗisi wa. Nalologena lua naṗani, lalua pe akekarana re nena naña yeririna la nene sinelan asape alotun lalua poli, kila sanene lalua apitolwowa m̃ala kulsota lala, ana lalua akiriri apano asum̃alu asike likan yeririna la nene, apionia, apisape ¹⁵ “! Avisaluṗar la, avisaluṗar la! !Ve akila re ve sanene van imimi! ! Imimi lua mepe yaru ga sa naña amiu, pe mepe ntewa re poli! Mepimi ga memio Nalologena Wo, mepimin naña mevisawal van amiu monar aligan kiamiu ṗelaga marua la ne sanene sike na, amiu ve alen re si va kamiu ntewa moki la naña

amarmare ga ne. Mepimin mesape mevisawal van amiu naña Ntewa mali taaga ga naña sike na, a mesitom mesape mevilon amiu vania, naña naga ga naga sii sinapanane, amio porotano, amio sive, a naga sii suri la punu ga naña asike e yo punu ga e yomarava nini. ¹⁶ E kas kiena ne teras la moki naña aṗaro apa rui, Ntewa naga tañan naña yeririna lala na yomarava, sane amiu, la asum̃a amiyaloro ataveve ṗelaga la naña peve taṗena lala, a la pe akilia re naga poli, ana akila lotena sa ga naña la asitom apisape mesmesun naña akila. ¹⁷ Nepisu naña amiu akila sanene komin naña amiu pe akilia punu re naga po, ana e lepas naña puna, naga pe tapoloun punu re naga pan amiu poli, komin naña pogos punu ga naga sum̃a kilologia naga ve torokaki ga pan amiu pisape naga pe lelaga, a naña kiena ṗelaga e amiu na po paṗisi. Naga ke narui naña naga sum̃a kila ke kiena yua mloloru pitomi e yo yau, a naga ke narui naña naga sum̃a kila ke suri punu ga akapuru e kamiu lokove la ne, lala aṗar kala kinas lala e kana pogos ruru nena napo. Naga ke narui naña naga sum̃a kila amiu akekara a amiu amloge po keviu e kinanena wo la naña amiu asum̃a aṗar ke e kamiu lokove la nene.”

¹⁸ Pol amio Panañas lalua

apisa visena la ne sanene
 ĩisi, ana lavis ga naĵa
 taĵatete akilia avisaluĵar
 yeririna la nene naĵa lala
 sinelan manene naĵa akila
 lotena van lalua nene pona
 akila kuĵaĵaena van la.
 Ana siraun naĵa la amloge
 visena kiena ne lalua nene,
 ana la pe akila re si poli.

¹⁹ Ana siraunia, le Yu
 laĵasia naĵa aĵene Pol
 amio Panaĵas rui garu
 Antiok a e yo naĵa Ikoniam,
 ana nanagane la nene apimi
 aĵalivi ke sina ga narui e yo
 Listra nene. Ana la asuĵa
 asun pan le Listra lala, pano-
 o aĵure plan ke sina ga kiela
 sitomena lala pa pe taĵena
 ke sina ga, ana siraunia,
 ana lala apanon Pol, ana
 la akove naga pano-o apisu
 amape naga mare rui. Ana
 lala aĵurelua tasnena petan
 pulkumali pa vanua, akoan
 kare ga naga mon ĵa ga
 sa ga ne, ana la aĵasuĵe
 sina apano. ²⁰ Ana nalogena
 laĵasia apimi amligan ruru
 Pol, ana la asuĵa amio naga,
 ana siraunia, naga tavolo
 sina, ana naga pa sina uĵa
 amio la. Ana kolulagi, naga
 amio Panaĵas, lalua amiyal,
 lalua apa e narin pulkumali
 taĵena nene naĵa Tepe.

*Pol amio Panaĵas, lalua
 apa sina, aĵasuĵe sina ga
 apa akome yo la nene*

²¹ Ana garu Tepe, Pol amio
 Panaĵas, lalua amlologo,
 ana e yo nene la aĵere yeri-
 rina moki apimi amlologa,
 apimi ape nalogena lala

kiena ne Yesu. Ana siraunia,
 ana lalua amolue ke sina
 ga e yo naĵa Tepe, la asiar
 apa sina, ana lala ataveve
 ĵa ke sina ga mrapa naĵa
 la akom ea apimi. Sanene,
 la aĵasuĵe ke sina ga apa
 garu Listra, sirau, Ikoniam,
 yokorena apano aporu garu
 Antiok nae Pisitia. ²² Ana e
 yo make la nene, la apian
 ke sina ga nalelagaena lala,
 ana amla visena wo la
 pan la vena iila la, a la
 apisape “Pe suri korena
 naĵa pona ita tekilia tetol
 pogos ĵarera lala, pona
 yeririna la ve moki akawe
 ita, ana naĵa ita teva loyurĵa
 e navesuĵenena kiena ne
 Ntewa naga monar ve sa ga
 nene narui. Visae sanene,
 amiu ve amalumu re, ve
 aursu amiu re sina, ana
 asuĵalu asuwawa ĵarera
 e Kristo pogos punu ga.”
 La apisa visena la ne
 sanene, kila nalelagaena
 lala la apuarar naviawaena
 ĵarera. ²³ Ana e kumali la
 nene punu ga, la apu ĵarina
 ne yeririna la ĵasia vena ave
 nasumonena la e ĵegas na
 nalelagaena la veve taaga,
 ana lalua amonsilu ga vena
 alenwo la. Ana amligan la
 asike e limana ne Suĵe, naĵa
 lalua amlologa asape yoko
 naga iila la silaga.

²⁴ Ana la aĵasuĵela
 sanene, ana la aĵaro e lepas
 na yo Pisitia, ĵisi na apimi e
 lepas na yo Pampilia. ²⁵ E
 lepas nene, la amlologo e
 kumali naĵa Peka, siraunia
 la apito garo Atalia, garo

losi, ²⁶ ana la akus waa, aḗasuḗela si apa aporu garu Antiok, nanene e yo naḗa Seria. Nanene kumali keviu naḗa sumo rui, la amlenwo Pol lalua Panaḗas, apisape vena lemamiēna amio navisuarena wo kiena ne Ntewa naga sike amio lalua, ana la amligan plan lalua vena ala Lologena Wo avano. Ana nanagane narui, lalua akila make nena ga pupia yum̃aena nene ḗisi, ana apimi si rui. ²⁷ Ana lalua apio nalelagaena lala vena la punu ga aimi lele taaga, ana lalua apisawal yum̃aena la pan la naḗa Ntewa miyum̃aen pan lalua, a lalua apisayu ruru pan la sanape naḗa Ntewa naga pietava pan la naḗa pe ape le Yu re poli, pisape la m̃ena ga akilia alelaga, a la akilia aviran la lele taaga e kiena nasuḗenena.

²⁸ Ana lalua asu m̃ena tol kupario lua pona telu suri tai sanene amio nalelagaena lala garu Antiok.

15

?Li nalelagaena viu lala la monar ataveve navisaluaena kiena ne Mosis pona peraga?

¹ Ana pogos naḗa Pol amio Panaḗas lalua asike garu Antiok wa, li nalelagaena laḗasia na lepas nae Yutea, naḗa la ape le Yu, la apitomi garo e yo nene. A pogos naḗa la amlologo pa li nalelagaena taḗena lala nae Antiok, la apisawal kiela navianena tai, asape “Visae amiu

li nalelagaena laḗasia, la pe ape ḗaviu re poli taveve ya naḗa navisaluaena kiena ne Mosis pisa, ḗisi na Ntewa naga taḗatete tamalia la.”

² Ana Pol amio Panaḗas, lalua pe akekarān re nenaga visena nene poli, komin naḗa la akilia asape Lologena Wo kiena ne Suḗe naga pe pisa re sanene poli, ana la apisi m̃arera pan la nene, la apepeyu amio la nene yam piavi laa sane, vena akilali naḗa avisaluḗar la vena ve avian wowaen re si yaru la sanene.

Ana li nalelagaena lala nae Antiok, la asitom manene laa visena la nene narui, ana peraga, la apisu sane popon manene naḗa la avitetalia Pol amio Panaḗas amio m̃ena ga laḗasia, la apa ma meta Yerusalem vena ava avisu li nalologena lala amio nasumonena lala, vena alogeli naḗa sane yerkawa la nene la asitom ke sanape e lepas na suri naḗa la apepeyu vanonia.

³ Naga narui, li nalelagaena lala apitetalia la apitove, apitove akome lepas la ne sane Ponisia, ḗisi na apa Samaria, a e pulkumali punu ga naḗa la apa akome, la asum̃a apiora amio li nalelagaena lala, a asum̃a asun amio la apisayu sanape naḗa apa atelivi e la naḗa la pe ape le Yu re poli, a apisawal Lologena Wo pan la, a sanape naḗa la moki apilon la apimi e Ntewa rui. A kiela navisawalena la nene

la akila li nalelagaena lala la amloge po paḡisi, amieluar Ntewa vanonia.

4 La akila liluen sanene pano pano-o, apito atol garo Yerusalem, ana la apa apisu ḡegas nen li nalelagaena lala, amio nalologena lala a nasumonena na suḡare lala, ana la nene la akekaran naḡa apisu Pol amio Panaḡas lala, ana la apisa visena na worworen pan la. Sanene, Pol amio Panaḡas lalua apisawal ḡena ga e la naḡa garu Yerusalem, apisape sanape naḡa Ntewa naga kila yum̃aena moki rui pa lalua naḡa lalua apa atol la naḡa la pe ape le Yu re poli, ana amlologon pan la, apisape visae la alelaga ga e Kristo, ḡisi na Ntewa naga tamalia la.

5 Ana pogos naḡa lalua apisawal suri la nene sanene, li nalelagaena laḡasia naḡa ape le Yu, naḡa ape Varasi, la asuḡalu la apisawal ke sina ga kiela navianena nene, apisape “Popon visae la naḡa la pe ape le Yu re poli, visae la sinelan asape alelaga e Kristo, ana la monar ave ḡaviu ḡena ga, a la monar ataveve ḡena ga visena taḡena lala na navisaluaena kiena ne Mosis, ana visae ataveve kieta ḡelaga ita le Yu la sanene, naga nene ana ḡisi na ita tekilia tevisa tevisave ḡisi na Ntewa naga kekaran la.”

Pupia viorena garu Yerusalem

6 Ana la asuḡa apisayu manene laa suri nene, kila sanene li nalologena lala amio nasumonena lala la apisa apisape monar akila viorena tai vena avisayuia. 7 Ana e viorena nene, la apisi manene pano pano-o kila Pita suḡalu, pisi pan la, pisape “Wolai lala, amiu akilia ḡisi rui, nanua na Ntewa naga mligan inu vena in na nevaḡesan nelologon Lologena Wo va la naḡa pe ape le Yu re poli, ana nanagane ita tesuḡa temloge ke naḡa la moki asuḡa amlelaga ke e Kristo rui. 8-9 Ntewa naga kila sanene, komin naḡa naga pe mliḡere re la nene petan ita poli, ana naga pisu ke losinela lala maran taaga ga sa naḡa naga kilia ruru ya naḡa sike e losineta. Naga kila merarava pan ita sa naḡa naga kekaran vena la akilia alelaga ke e mrapa ḡa nenaga naḡa ita tesuḡa temlelaga ke ea, naḡa naga mla Ninuna Wa pan la, a naga kevan ke ḡena ga losinela lala mekiki, komin naḡa la aḡasine naga, sa ke ga ita. 10 Ntewa naga kila po manene laa pan la rui, ana nanagane, ita laḡasia la sinelan asape akila ke sina ga ḡarera van la. Visae ita sinetan tesape toḡareran la nene vena la awar suri urmi lala na kieta navisaluaena e ḡasila, sa naḡa la asuḡa apisa ke ne, sanene na pi-

owa ne, ita tekilawo ke sina ga Ntewa ne. Repita lala la apisu sane navisaluaena nene naga m̃arera pañisi wa, a ita m̃ena ga tepisu sane tařatete yaru tai kilia logear kana visena ne la punu ga. ¹¹ Ana la amlelaga, a ita m̃ena ga temlelaga temio la, tesape ita punu ga towasine ga Suře Yesu, a tetol malena e naga, pimi kom ga e kiena lemamiēna.”

¹² Ana la nařa e viorena la pe apisi re si po laa rui, ana la asu puru, ana amla pogos na visena tai pa Pol amio Panařas, la sinelan asape aloge re si kile lala amio suri na ilanēn lala nařa lalua akila e nařareraēna kiena ne Ntewa pa la nařa pe ape le Yu re poli, pogos nařa lalua apa atelivi pula.

Semes sikol kiēla visena lala

¹³ Ana pogos nařa lalua asunyu suri la nene řisi, Semes nene, nařa naga pe kiēla yerkawa tai garu Yerusalem, naga sum̃alu sikol visena pa yeririna lala, pisape “Wolai lala, sineun nesape ayagogon inu sumo wa. ¹⁴ Ita temloge ga řisi na wa nařa Saemon nene, nařa Pita, naga pisawal ruru pan ita rui sanape nařa Ntewa naga m̃alm̃alivi řesan pa la nařa pe ape le Yu re poli, a nařa naga pure lařasia apimi ave yolai viu tai nařa kiena kia sike ea. ¹⁵ A e Visena Wa, visena kiena ne kiēta navisawalēna lala nanua sumo, pisa pisape

yoko ve sanene narui. Lala tai nařa pisa sanene, naga Emos, nařa naga pisawal visena kiena ne Ntewa tai, nařa pisa sanini, pisape

¹⁶ *řisi na, inu nowasuře inu sina neimi, neyum̃aēn ruru si lus kiēna ne Tepet nene nařa mloru, vena mali řina.*

Naga sa ga yum̃a tai nařa kekapili kar ga sike ne, ana řisi na nevisirlua sina.

¹⁷ *Ana ve sanene, yeririna tařena lala nařa pe ape kiau re poli wa, řisi na la akale inu Ntewa Namava,*

a yeririna lala na purvanua punu ga na yomarava nini,

nařa nemligan kiau kia sike e la rui,

la aimi ave kiau yeririna.

¹⁸ *Inu Ntewa Namava, nařa nekila yeririna lala la apisu kilale suri la nene siar nanua sumo laa rui,*

kiau navisaarena sanene narui.” *Amo 9:11,12*

¹⁹ Ana Semes pisi manene laa sane, pisawal kiena sitomena, pisape “E kiau navisuena, naga sanene narui. Pe pon re ita tekila yum̃aena m̃arera pona tekila kare manene la nařa la pe ape le Yu re poli, nařa la apilon la ga apimi puna ne Ntewa na wa. Pe pon re tevisave la monar ave řaviu poli, pona la monar ataveve kiēta Navisaluaena sanene pona sanene. ²⁰ A ya ga nařa popon ita tekila

van la, naga sanini, sane p̃isi na ita tesiri m̃aki tai, tevisawal suri ve telu van la. Suri na tevisaṗesania, tevisave la ve akan re si tata la naṗa yaru taṗena la akila ke kuṗaṗaena ea pan kiela nono lala, la monar avaliania. A sur nalua, la ve akila re si ṗelaga viowa, sa naṗa kolau pona lau. A natelu, p̃isi na ve akan re m̃ena ga kuruta na suri mali, sane tata na suri mali naṗa kuruta pe mlau make re poli wa. ²¹ Yaru lala la asuṃa akilia make ke suri la nene naṗa pe mesmesun re naṗa akila po laa rui, komin naṗa Navisaluaena kiena ne Mosis naga suṃa pisa, a la asuṃa apulolua ke Navisaluaena nene a amologon silaga e Legiena Wa lala e kiela yum̃a na lotuena e kiela pulkumali lala, siar nakonua rui pimi tol ṗane.”

Yerkawa lala nae Yerusalem la asiritam̃e pa la nae Antiok

²² Ana siraunia, la apisu sane la apisi toroki, ana li nalologena lala a nasumonena lala, amio m̃ena ga li nalelagaena la punu ga, la apisu sane popon aligan laṗas ava ke sina ga amio Pol lalua Panaṗas, ato garo Antiok. Ana la apisaar kiela yerkawa nayum̃aena lalua nene, Suta Pasapas amio Saelas, apisape p̃isi na lalua nene atove. ²³ Ana la asiri m̃ena m̃aki tai vena lalua akilia alarar vitove, a m̃aki nene pisa sanini, pisape

“Imimi li nalologena lala memio nasumonena lala nae Yerusalem, naṗa imimi mepe wolai memio amiu e Yesu, imimi mekekara paṗisi naṗa mevitawe amiu e m̃aki nini. Imimi mesiri m̃aki nini piṃasu, amiu na pulkumali nae Antiok, a e kana lepas naṗa Seria, a van amiu m̃ena ga e lepas nae Silisia, nanene na amiu la naṗa pe ape le Yu re poli, naṗa nanua sumo ana amiu na asike ga e yemalolo. ²⁴ Visena pam tol imimi p̃isi rui, pisape sumo, imimi laṗasia mepitoṃasu garo pun amiu, a la apian amiu asape amiu na monar ataveve kiamimi Navisaluaena imimi le Yu lala, visae peraga, p̃isi na Ntewa naga taṗatete tamalia amiu. Imimi mekilia mesape visena nene naga kila kare manene kiamiu sitomena la paṗisi, a kila amiu amloge piowa paṗisi, ana visena nene naṗa la apisa, imimi memninue ga, imimi pe mepisa re pan la mepisape la monar atoṃasu avian amiu ve sanene poli. ²⁵⁻²⁶ Ana kieta wolai wo lalua nene, Pol amio Panaṗas, naṗa lalua na pe asitom re kiela malena poli ana lalua asuṃa sinela urmin ga visawalen kia kiena ne Suṗe Yesu Kristo, amiu apitetalia lalua nene apami apisu imimi vanon suri nene. Ana imimi mepiora vanonia, imimi mepisuveve-e pano-o, ana imimi mepranar mesape p̃isi na imimi meligan wolai ve lua e yo nini awar m̃aki

nene, la amio Pol a Panaņas la atom̃asu pun amiu. ²⁷ Lalua nene, Suta amio Saelas, ƣisi na lalua asunyu ruru manene laa van amiu, maran ve taaga ve sa m̃a nena naņa imimi mesiriyu pan amiu e m̃aki nini. ²⁸ Ana e kiamimi navisuena, a e navisuena kiena ne Ninuna Wa m̃ena ga, imimi mepisu sane piowa naņa imimi moņareran amiu vena amiu monar alogear kiamimi Navisaluaena imimi le Yu lala. Ana imimi mepisu sane suri laņasia, naņa imimi le Yu lala imimi yepemimi mavin paņisi, a popon manene naņa amiu m̃ena ga ve asum̃a akila re, vena kila sane amiu akilia asu ruru amio arueta taņena la naņa ape Yu. ²⁹ Suri la nene, tai pisa sanini, pisape ƣisi na amiu monar alon tata naņa yaru taņena lala la akila kuņaņaena ea pan kiela nono la rui. A nalua nena, ƣisi na amiu ve akan re kuruta, pona tata na suri mali naņa kana kuruta pe mlau re petan poli wa. A natelu nena, ƣisi na amiu ve akila re ƣelaga viowa lala, sane kolau a lau.

“Visae amiu aligan ruru make suri la nene, imimi mepisu sane ƣisi na wo vaņisi van amiu punu ga. Pogaga, kiamimi visena e lepas nene ƣisi ga e nene.”

³⁰ Ana la amligan Pol a Panaņas amio lalua taņena nene, la apito garo Antiok. Pogos naņa la nene aporu e yo nene, la apio ƣegas nen

li nalelagaena lala la apimi lele taaga, ana amla m̃aki nene pan la. ³¹ Ana la nae Antiok apulo m̃aki naņani, ana la akekara paņisi e visena wo la naņa la nae Yerusalem asiri pimi pan la. ³² A lalua nae Yerusalem nene, Suta amio Saelas, lalua nene ape navisawalena, ana lalua asum̃a amlologon ke pa la nae Antiok, apisape la monar awasine manene ga Yesu silaga, ana lalua akila sinela la sum̃alu m̃arera, e kiela visena wo moki naņa lalua apisa.

³³⁻³⁴ La asum̃a apisi ke pan la sanene e legiena moki, ana siraunia, la nae Antiok la amligan lalua e kiela mrapa, la amlenwo lalua, asape “Sum̃arena kiena ne Ntewa sike amio amluoka.” Ana lalua aņasuņe sina apa ma Yerusalem. ³⁵ Ana Pol amio Panaņas, lalua asike garo Antiok tol si kuņar laņasia, lalua asum̃a amila yaru taņena la naņa la asum̃a amlologo a asum̃a apian ke yaru lala e Visena Wa kiena ne Ntewa.

Pol amio Panaņas, lalua apeveyu

³⁶ Ana siraunia, Pol pisa pa Panaņas, pisape “Ei, sanape, ƣisi na italua teva teyaliali ke sina ga arueta amio vineta lala e yo la nene naņa italua teva temlologon Visena Wa kiena ne Ntewa e nanua sumo rui? Pisi na italua teva tevisu la li sane am̃a la asike sanape.”

³⁷ Ana Panaþas pisape “!Po paþisi ne, nekekanan paþisi wa! Ana sineun manene nesape þisi na italua toure Son Mak nene imi temio.”

³⁸ Ana Pol naga sum̃a sitom̃al ke ga wa naþa la amialiali la þesan sanene sumo, Son Mak nene naga purmatan la yam tai rui, nene garu Pampilia, naþa pogos naþa yum̃aena pe þisi ruru re poli wa ana naga þasuþe ke sina ga pano. Sanene, Pol pisu sane, peraga, pe pon re Son Mak imi amio la ke sina ga e kiela yalena taþena nene poli.

³⁹ Suri nene kila Pol amio Panaþas lalua apeveyun la ruru nenaga, ana lalua amliþere la narui. Panaþas pa þere ga Son Mak, ana la ga lua apa akome waa, lalua apa amiyum̃ae garu Saepras, ⁴⁰ ana Pol naga pa kilalua Saelas. Ana li nalelagaena lala amlenwo lalua nene apisape þisi na lemamiena a navisuarena wo kiena ne Ntewa sike amio la. ⁴¹ Ana lalua amialoro apa atelivi e lepas lua nene Seria amio Silisia, amiyum̃aen ke sanene vena akila þegas nen li nalelagaena lala la aimi am̃arera manene la sane.

Nanene sane pupia yalorena kiena ne Pol yam lua ne.

16

Timote m̃ena ga pa amio Pol lalua Saelas

¹ Ana e kiena pupia yalena na lua nene, Pol pimi tol sina kumali lua nene Tepe, amio Listra. Ana e yo Listra nene, ana nalogena tai sike ea, nanene yaru m̃ee naþa Timote. Timote nene, anena pe sira re Yu tai, naþa naga mlelaga e Yesu rui, ana arimana naga pe pe yere Yu re poli, naga pe yere Kris tai. ² Ana arueta lala nae yo kiena ne Timote, amio lala nae pulkumali taþena naþa m̃eke lavis ga ne Ikoniam, la apisu naþa Timote naga kila yum̃aena kiena ne Suþe po paþisi pan la. ³ Ana Pol naga sitom pisape were Timote va amio naga e kiena yalena nene, ana suri taaga ga naga piowa, naga ga naþa Timote naga pe pe þaviu re poli, nanene komin arimana naga pe pe yere Yu re poli. Ana Pol naga kilia naþa visae Timote taveve naga sanene, ana visae e yo ya naþa la ava ea, ana yoko le Yu lala, avisaluþar naga vena ve va re loyum̃a e kiela yum̃a na leniena lala, a yokorena la ve akekanan re aloge kiena visena lala. Ana komin suri ne na nene, ana Pol kila Timote pano ana la akila þaviu e naga, ana siraunia, la telu nene Pol, Saelas, a Timote, apano. ⁴ Ana pogos naþa la asum̃a atelivi ke e kumali lala, la asum̃a apisalelein ke visena la pan nalelagaena lala, apisawal pan la e navisaluaena la naþa nalologena a na-

sumonena nae Yerusalem la apisa e kiela viorena sumo rui, ana Pol lala apisa pan la naña monar ataveve visena la nene narui. ⁵ Ana pogos naña Pol lala asum̃a amiyalyal li laa a la apian ke pegas nen nalelagaena la sanene, kila sa naña pegas la nene asum̃alu asu m̃arera ruru laa, a la apisu sane silaga naña nalelagaena lala apimi ape moki manene laa narui.

La asike garu Troas, ana Ntewa pis pa Pol e nam̃eniēna tai

⁶ Ana Pol la asitom naña asape ava awar ro e kumali la ve moki e lepas nae Esia, ana Ninuna Wa pialuṣar la vena la ve ava re avisawal Nalologena Wo e yo nene, kila sanene apa atol ga e lepas na yo Prisia amio Kalesia. ⁷ Asum̃a apa ke sanene, ana pogos naña la apimi lavisi e lepas naña Misia, la akilali naña ato garo e lepas keviu naña Pitinia, ana pogos si tai, ana Ninuna ne Yesu pe tañan re pan la naña la ava sanene poli. ⁸ Ana lala apa aṣaro ga e yo Misia nene, apa m̃a pano-o la atol kana kumali ne tai garo losi, kiena kia Troas. ⁹ Ana e yo nene, ana kolemallo, Pol naga momalio pisu sane yaru tai nae lepas keviu nae Masitonia e sive lepas p̃as, naña yaru nene naga pimi puna, naga tagi pania, piuntania, pisape “Awis Mara, imimi sinemimin mesape ko oimi owar ro pun imimi,

vena oiila imimi.” ¹⁰ Ana e poglis nene, inu Luk nesike m̃ena ga nemio la, ana pogos naña Pol naga pisawal naña naga pisu yaru nene pisi pania, veraga ga imimi mepanon makale mrapa vena mekilia meva mokusro yo meva Masitonia, komin imimi mekilia naña Ntewa naga pio imimi rui vena meva melologon Nalologena Wo nene van la.

Asike garu Piliṣae, ana sira naña Litia naga mlelaga

¹¹ Sanene, imimi mokus waa, memligan yo Troas, meṣure mepano-o metol purvanua nae Sametres. Ana imimi momomalio e yo nene, ana kolulagi, ana mepano-o metol lepas nae yo Masitonia, ana mepa ura e kana kumali nene Niapoles. ¹² Ana e lepas na Masitonia nene, pupia pulkumali taṣena tai mon m̃a ga, naña naga m̃eke vatanon navisuarena kiena ne p̃arin supe nae Rom. Kumali nene kiena kia Piliṣae, ana imimi memial mepano-o meporu ea. Imimi mesike e yo nene legiena lua pona telu, pano-o tol Legiena Wa. ¹³ Ana imimi memloge rui naña apisa apisape e Legiena Wa, le Yu lala nae yo nene la asum̃a akila ke lotena e yo na leniēna tai garo e wii tai, e pulkumali lepas na vano. Ana imimi m̃ena memolue vena metoven mevisu la e yo nene, ana imimi mepa metotano mesun memio

sira laṗasia naṗa la asumo apitom asike e yo nene rui.

¹⁴ Sira la nene tai, naga pe pe Yu re poli, ana naga sum̃a mlelaga e Ntewa. Naga pe nae kumali nae Tuatira, ana ṗuarar ke kiena pupia yum̃aena keviu tai, naga sum̃a ṗiliwilin kar ke kulmrae tai naṗa maran lavis malolo, naṗa po na po naṗa la amiyum̃aen e kiena yo. Sira nene, kiena kia Litia. Ana e pogos nene, Suṗe pietava e kiena sitomena narui, ana naga mlarar ruru visena la naṗa Pol naga sum̃a pisa pan la, a naga tarar m̃arera po e losinena. ¹⁵ Ana e pogos nene, Litia nene amio la naṗa e m̃ana um̃a, la punu ga apa e nakeena. Pisi, naga m̃areran imimi, pisa pisape “Visae amiu apisu sane nesuñalu kemua m̃arera lelaga e Suṗe, sineun nesape amiu aimi asu re garu m̃au wa.” Sanene narui, ana naga pure imimi mepa mesike e m̃ana um̃a.

Akuan Pol amio Saelas apa e yum̃a nakoarena

¹⁶ Ana e legiena si tai, ana memio Pol mepitom sina e kiela yo na leniena, ana imimi mepitawe narin sira m̃ee tai e mrapa. Narin sira m̃ee nene, yeririna laṗasia apulua naga vena yum̃ae kiela, ana ninuna viowa tai sike e naga, naṗa apio asape ninuna ne loṃara, naṗa pe ninuna navisuen suri la naṗa aimi aṃalivi sirau.

Ana yeririna la moki apimi apiun ke sira m̃ee nene tan yerkawa lala, vena naga visawal van la sanape e kiela malena lala. Ana pogos naṗa sira m̃ee nene pisawalia, ana la asu m̃a aṗar ke naiilaena pan kiena yerkawa lala, kila sanene ana pogos punu ga la asum̃a ataulu kilavaru moki na moki vanonia. ¹⁷ Ana imimi memial mepa laa sanene, ana narin sira m̃ee nene taveve imimi naga sirau, naga sum̃a piovion manene pan yeririna kar ga la punu ga, naga sum̃a pisawal ke, pisape “!Ei, apisu ke ne! Yaru la nene la ape nayum̃aenen yum̃aena kiena ne Ntewa mali na metava manenea. La ke narui naṗa akilia avisawal mrapa na tamaliaena van amiu.”

¹⁸ Ana sirau, naga sum̃a kila ke sanene pan imimi e legiena moki, kila Pol mloge piowa pano pano-o, tol pogos tai, ana naga sinena kar ninuna viowa nena, ana naga kira pa varau, pispania, pisape “!E, toroki! Nepisa mesmesun pan ko, nesape e kia kiena ne Yesu Kristo, ko omolue tan narin sira m̃ee nene nanagane.” Ana veraga ga, naga mligan narin sira m̃ee nene naga pano.

¹⁹ Ana pogos naṗa yerkawa lala kiena ne narin sira m̃ee nene apisu naṗa mrapa nene natauluen kiela kilavaru ea pimi piowa rui, la sinela kar Pol amio Saelas paṗisi. Ana la aṗure

lalua nene apano asum̃alu ase marana ne naliṗereena lala nae Rom garu kumali. ²⁰ Ana la apisawal pan la, apisape “Le Yu la nene, la apimi e kieta yo, la akila kare ita manene laa na wa. ²¹ La asum̃a sinelan asape am̃areran ita vena tetaveve kiela ṗelaga laṗasia, ana e navisaluaena nae Rom naṗa ita tesike vatanonia e yo nini, pe mesmesu re nena ga naṗa ita tekila sa naṗa la asum̃a apisa ke ne poli.” ²² Ana yeririna la akila pupia m̃aagena, ana la akila kare Pol amio Saelas paṗisi, asitom asape asu lalua, ana naliṗereena la nene apisa apisape la avitolwowa kulgota m̃ana lalua nene, ana awe la e laki. ²³ Ana la añe kare lalua nene pano pano-o ṗisa, ana aṗure lalua apano akuan la apa loyum̃a e yum̃a nakoena, ana apisaar m̃arera pan yaru na visuaren yum̃a nakoena, apisape naga monar visuar ruru la, lalua ve aure re sina, visae peraga, ana yoko viowa vania. ²⁴ Ana pogos naṗa yaru nene naga mloge visena nene, naga pure lalua nene apa manene loyum̃a, e yo m̃arera tai naṗa la apuarar ke yaru la naṗa ape ṗarm̃arera paṗisi apa ea, a naga piar lala lala panon pupia laki naṗa m̃eke e yo nene.

Yemninu kululun yum̃a nakoena nene

²⁵ Ana asuña pano-o tol kolemalu yepelilika, Pol

amio Saelas lalua asum̃a amlen ke pa Ntewa e yauena wa lala, a yeririna taṗena la naṗa asike amio la e yum̃a nakoena la asum̃a amiyagogon lalua. ²⁶ Ana la amilan manene paṗisi, naṗa veraga ga, pupia yemninu tai pimi, kila yum̃a nakoena nene miyuyuwawa make ga, naga kululun make kana nin kinakinas la punu ga. Ana la apisu mratava punu ga apietava, a sen punu ga naṗa apiarar limala lala a lala lala akekapil ga sa ga ne. ²⁷ Ana yaru na visuaren yum̃a nakoena nene naga tavolo, ana kiriri pimi pisu mratava la punu ga pietava ga sike na, ana naga m̃ape la naṗa asike loyum̃a, la make ga apuretetai apava make rui. Ana suri nene kila naga marau paṗisi, ana naga mlalua kiena playu na mara, ana sinenan pisape yalm̃ar ke sina ga naga mare. ²⁸ Ana Pol naga pisu ke ne, ana pio manenea, pisape “!Ei, ko osuwa, ko ve okila kare ko re! !Imimi punu ga mesike ga wa!” ²⁹ Ana yaru nene naga pio sape awar kapi vivaga imi, ṗisi na naga kiriri pa loyum̃a e yo naṗa Pol amio Saelas asike ea, ana naga mloru pito tano e lan lalua nene, naṗa naga sinen kurkur na kurkur. ³⁰ Ana sirau, naga ṗere lalua na apa ke sina ga vanua, ana naga piun tan lalua nene, naga pisape “Ei, yerkawa luwoka, ana monar

nekila ya naṗa ṗisi na nekus natamaliaena?”

³¹ Ana lalua nene apisa pania, apisape “Ko monar olelaga e Suṗe Yesu, ana otol natamaliaena, ko omio la naṗa e mom̃a mratava.”

³² Ana la apisawal visena kiena ne Suṗe pania, a apisawal m̃ena ga pan la naṗa asike m̃ana um̃a, ³³ ana e ke e kolemallo ga nene, yaru nene naga kila ruru yepe sirorop la naṗa sike e yepena ne Pol amio Saelas, ana e ke m̃ena e pogos nene, lala akee naga amio la naṗa asike e m̃ana mratava. ³⁴ Ana naga ṗere lalua nene apa loyum̃a e m̃ana yum̃a, ana naga mla kinanena pan la, ana naga amio lala na m̃ana um̃a la asum̃a akekara na akekara, komin nanagane la am̃al Ntewa e kiela malena la narui.

³⁵ Ana pa tol kolulagi, ana naliṗereena lala amninue ke suri nene wa, ana la ato si tano, ṗisi la apitetalia kiela yeririna lala apimi apisawal, apisape “Yeririna lua nene akilia amolue ga sane.”

³⁶ Ana yaru na visuaren yum̃a nakoena nene naga pimi pisawal pa Pol, pisape “Naliṗereena lala amligan visena pimi apisape amlua akilia amolue ga sa ga ne, sanene ana amiu aimi, ava ga sane. Ana ita ve tekila re si visena van ita vanon suri nene.”

³⁷ Ana Pol pisa pa la naṗani pisape “Ei, taṗatete ga, pe sa re nene poli. Imimi m̃ena mesike vatanon

ṗarin suṗe nae Rom nene, a e kiena navisaluaena, naliṗereena la nene akila pe mesmesu re pan imimi nene poli. Pe am̃a re naṗa imimi mekila suri tai piowa poli, ana siraunia la am̃e imimi e marana ne yeririna lala, a akoan imimi mepa loyum̃a e yum̃a nakoena, ana nanagane la sinelan asape am̃ene plan vinaun imimi ga sanene. !Taṗatete ga, awasuṗe amiu ava avisa van la avisavenua la ke narui la monar aimi aure plan imimi e yo nini, a monar aimi avisa visena tai van imimi sumo wa!”

³⁸ Ana yeririna kiena ne naliṗereena lala amla visena nene kiena ne Pol aṗasuṗela si apano, ana pogos naṗa amlogeyu naṗa Pol amio Saelas, lalua m̃ena asike vatanon navisaluaena nae Rom, la amarau narui. ³⁹ Ana la apimi apisa visena laṗas pan lalua, ana aṗure la apa mrapa, apisape la sinelan asape lalua monar amolue e yo nene. ⁴⁰ Ana Pol amio Saelas, lalua aṗasuṗe la sina, lalua apa am̃aliviṗesan e yum̃a m̃ana Litia sumo, a siraunia, ana la apisu sina arueta lala, a la amla visena wo lala vena iilaar laena, a siraunia, ana lala amolue petan pulkumali nene.

17

Pol amio Saelas, lalua asike garu Tesalonaika

¹ Ana ṗisi na Pol amio Saelas, amiyaloro apano,

ana akome pulkumali lua nene Ampipolis amio Apolonia, ana lalua apimi atol pulkumali nene, Tesalonaika. Pulkumali nene yum̃a na leniena kiena ne le Yu la tai m̃eke ea, ² ana sa naṽa Pol mon m̃a kila e yo punu ga naṽa naga pa ea, naga pa sikol la nae e yo nene, ana suṽa pa ke loyumũa amio la e kiela yum̃a na leniena, e pogos na leniena punu ga. Ana e Legiena Wa telu, naga kila sanene, a naga pisi yam moki amio la e ya naṽa Visena Wa naga suṽa piania. ³ Ana Pol suṽa pian la ea, a naga suṽa pisawal meraravan po pan la pisape taveve ya naṽa Visena Wa pisa, ana mesmesu ga naṽa kiela Navisaarena, yeririna la akila viowa ga vania, va m̃a va m̃aga naga mare, ana siraunia naga monar mal sina e marena. Ana Pol pisawal pan la, pisape “Yesu nene, naṽa nesumũa nepisayu ke ne, naga ke naṽa pe kieta Navisaarena narui.”

⁴ Ana laṽas naṽa la asumũa amiyagogonia, apisu asape visena nene pe lelaga, la amlelaga e Yesu, ana apimi e lepas kiena ne Pol lalua Saelas. Ana e yo nene, yeririna laṽasia naṽa pe ape Yu re poli, la amlelaga e Ntewa rui, ana lala moki m̃ena ga naṽa amlelaga e Yesu narui, amio m̃ena ga li nasumonena kiena sira la moki.

⁵ Ana yerkawa kiena ne le Yu la pe akekara re poli,

la apielue, ana la apisayu asape akilali suri tai. Ana la apa apisu ṽegas kiena ne ṽarkawa lala nae yo nene, ana aṽere laṽasia naṽa apiowa laa ga wa, ana apa aṽere sina yeririna la moki ana akila pupia ṽina ga nene, ana la apa akila kare ke pupia veveyuena e pulkumali nene na. Ana la aṽape Pol amio Saelas lalua asumũa ke e yum̃a m̃ana yaru tai, kiena kia Seson, ana la apanon lalua e yum̃a nene, vena awere la ava kumali. Ana la apimi atol yum̃a nene, ana la akila kare ruru nena ga, akilaroro kana mratava nena, ⁶ ana pe aṽal re lalua asu loyumũa e poli. Ana apuarar ga Seson nene, amio arueta taṽena laṽasia, ana aṽere la apano asumũalu ase marana ne li nasumonena lala na pulkumali nene. La apisi keviu, asape “Yeririna la nene naṽa asumũa apilontapon ke kieta yomarava, la apa e yo taṽena la moki rui, ana nanagane la apimlein asike pun ita narui. ⁷ Ana yaru nene, Seson, naga ṽere la apa m̃ana, ana la nene apiowa ga, asumũa akilaroro ke navisaluaena kiena ne ṽarin suṽe nae Rom nene, Sisa. Sisa nene pisa rui pisape monar telotun ga naga, ana la naṽani asumũa apisa ke asape ṽarin suṽe taaga ga na yomarava nini, naga yaru tai, kiena kia Yesu.” ⁸ Ana yeririna punu ga amio li nasumonena lala na pulkumali

nene, pogos naṗa amloge visena nene, ana la sinela mimi, ana la asum̃a akiikii a asum̃a apisi piowa keviu manene la. ⁹ Ana li nasumonena la nene asape Seson lala la monar aligan pupia kilavaru tai sike pula, naṗa kila sane ṗisi na Seson la ve aure re si Pol imi sike amio la pog tai, visae peraga, ana la taṗatete si akilia awarmaran kilavaru nene. Ana siraun naṗa amligan kilavaru nene sike na, ana la ataṃan la apetan yo nene apano.

Pol amio Saelas, lalua asike garu Perea

¹⁰ Ana kole malo ga, ana arueta la nae e yo nene apa amligan vinaun ga Pol lalua Saelas e kiela mrapa, ana lalua apa sina metava e pulkumali tai, naṗa Perea. Ana yam si tai, lalua asum̃a apa ke loyum̃a e yum̃a na leniena lala kiena le Yu lala e yo nene. ¹¹ Ana le Yu make ga la nae e yo nene la apo, a nalogearena sike e la, lala pe sa re le Tesalonaika la poli, lala kiela sitomena la po naṗa la akilia amiyagogo ruru po e navianena kiena Pol amio Saelas. Ana legiena punu ga, sinelan manene asape avisuveve loyum̃a e Visena Wa kiena ne Ntewa, vena akirawal asape lalua apisa pe lelaga pona pa sanape. ¹² La akila m̃a sanene pano pano-o, pe yam piavi re poli, ana la asiar naṗa amlelaga narui, a nasumonena lala

kiena ne sira yere Kris m̃ena ga lala amio yere Kris la moki, la m̃ena ga amlelaga.

¹³ Ana siraunia, visena ṗasuṗe sina pa tol le Yu la garu Tesalonaika nanua ne, ana sape nanagane ana Pol m̃e ke mlologon ke m̃ena ga visena kiena ne Ntewa garu Perea, ana la sinela mimi sina. Ana apam ma metava Perea, ana akila kare ke sina ga sinena ne le Perea taṗena lala vena kila la aveveyu van lalua, aṃenelua lalua avano. ¹⁴ Ana arueta la apisu suri nene, ana apisu asape popon aila Pol naga vito sina ga garo losi vilaga wa, ana apisu asape Saelas amio Timote, lalua akilia asum̃a ga wa, lalua na poga ga. ¹⁵ Ana aṗere Pol e kiena mrapa, apito garo losi, ana la akus waa tai ana apa atol pupia pulkumali naṗa Atens. Ana pogos naṗa amligan Pol e yo nene ana la asape awasuṗe la sina, ana Pol pisa pan la pisape ṗisi na Saelas lalua Timote, la m̃ena ga luwoka monar ato garo puna vilaga ve viavi re, vena ayum̃ae sina ga lele taaga amio naga.

Pol sike garu Atens

¹⁶ Ana Pol sike garu Atens, sum̃ate ke Saelas lalua Timote vena lalua aimi, ana pogos naṗa naga pisuveve yo la um̃a e pulkumali nene, ana pisu ga naṗa yo pulen ga nono lala, ana suri nene miyur sinena paṗisi. ¹⁷ Ana naga sum̃a pa ke loyum̃a na leniena kiena ne le Yu lala, ana sum̃a kila visena

la moki komin suri nene amio la a amio m̃ena ga li taḡena la naḡa amlalaga e Ntewa. Ana legiena punu ga, ana naga sum̃a pa m̃ena ga e yo metava na pulkumali, vena sun amio yaru ai naḡa visae naga lual e yo nene. ¹⁸ Ana garu Atens, ana pupia yum̃a lua naḡa na navianen namanmaruaena, naḡa yaru navianena la na yum̃a lua nene, a pio la asape le Epikuru, amio le Stoiki lala, ana la asum̃a apiora ke m̃ena ga amio Pol.

Ana laḡas nene, asum̃a apismumun Pol, asape “! Yaru naḡa pivis kaḡar ne, ana naga pe kilia ruru re suri wo tai naḡa kilia visa van ita poli.” Ana lala m̃ena ga laḡas, amloge naḡa Pol sum̃a pisayu ke Yesu amio nasum̃alena, ana la asitom ke asape nanene na yeririna lua nene, ana la apisa, apisape “Peraga, imimi mepisu mesape yaru nene naga sum̃a pisayu ke ntewa taḡena lala a ninuna taḡena lala na purvanua nae ga gare tai.”

¹⁹ Ana siraunia, le Atens la apio Pol asape naga va totano amio la e kiela pupia kumali, metava e pupia kunus nae yo nene, naḡa kiena kia, Areoḡakas. Ana apiun tan Pol, asape “Imimi sinemimin mesape ko otaḡali ovisayu navianena viu nene naḡa osum̃a opisawal ke pan yeririna lala, ovisa van imimi wa.

²⁰ Imimi mesum̃a memloge ke navianena nene pe taḡena ruru nena ga, ana sinemimin mesape mekiliasuri la naḡa osum̃a opisa ke ne, ana kala kinas sanape.”

²¹ Ana pogos naḡa akila sanene, ana asum̃a ataveve ke kiela ḡelaga m̃arera tai, komin naḡa le Atens lala amio yeririna taḡena la naḡa asike e yo nene, ana la sinelan manene ga naḡa silaga, ana asum̃a aloge pona asun e navianena viu pona visena viu, pona sitomena taḡena lala pona lelagaena kiena ne yeririna lala.

²² Ana Pol sum̃alu se marala e kumali naḡa ma metava garu Areoḡakas nene, ana naga pisi pan la. Naga pisa pan la, pisape “Yerkawa lala nae Atens, nepisu sane amiu sinemiun manene laa nalotena lala, taulu naḡa yaru taḡena la sinelania. ²³ Pogos naḡa nesum̃a nemialoro ke e kumali nene, ana nepisu punu ga yo wa lala a wonta lala, a kiamiu nono la moki manene laa, ana pogos tai ana nepisu wonta tai naḡa ate siriena tai sike ea, naḡa pisape ‘Wonta kiena ne ntewa naḡa temninue naga.’ Ee, amiu amlenin ke ntewa nene, ana amiu apisa lelaga ga, pe akilia re nena naga poli, naga a ne. Ana Ntewa naḡa pe lelaga ga taaga sike na, ana naga ke narui naḡa sineun nesape nevisawal

van amiu vena akilia naga. ²⁴ Naga nene naga pe Ntewa keviu naña sii yomarava nini, a suri punu ga la naña tepisu sike ea. Naga na, naga pe Parin Suņe nae ma e peni, a pe Parin Suņe na yomarava nini. Naga na, naga pe su re nena e yo wa la poli, a pe su re e suri wa la naña yeririna ga la akila poli, ²⁵ a naga pe p̃asine re yeririna poli, vena tevagania pona tevisuaria. Peraga, komin naña naga ke narui, naña naga mla malena, a mla yalua, a mla suri make ga pan yeririna punu ga. ²⁶ Ntewa ke na nene narui, naga kila yolai la punu ga aṃalivi e yeririna na sumo naña naga siia, ana nanua nanua sumo laa rui, ana naga pisaar pogos punu ga a yo punu ga e maran yomarava nini, naña p̃isi na yolai la nene akilia amal ea. ²⁷ Naga kila sanene naña kila sape ita punu ga, monar tesitoṃal tesape ita monar telual Ntewa nene, ana kila ita tesuṃa tekian kare ga limata pa e yemalolo, vena topoporog welen kiena kapi vivaga. Ana popon naña tesitoṃal ṃena ga, tevisave Ntewa nene, naga pe su manene re koperin poli, naga moṃa ga lavisi pun ita ita make ga peve taaga. ²⁸ Yeririna na siriena kiamiu yauena lala la apisayu suri nene rui, naña lala tai naga pisa sanini, pisape 'Ita temal e naga, ita temial e naga, ita na e ga e naga silaga,' ana

ta ṃena ga tai pisa sanini, pisape 'Ita punu ga ita tepe kiena li viu lala.'

²⁹ "Ana komin naña ita punu nena ga tepe narina ne Ntewa nena sanene, ana pe mesmesu re naña tesuṃa tesitom tesape naga sa ga nono tai naña liman yeririna miyuṃaen e kol, pona e selpa, pona e kilavaru, naña amiyuṃaenia taveve ya naña sike ga e kiela nasi-nenanena. ³⁰ Nanua sumo laa rui, e yemalolo, ana yeririna la pe akilia re suri poli, ana Ntewa sinen po pan la, naga pe pulo re kiela naviowaena la e pogos nene poli. Ana nagane narui, ana Ntewa pisawal mesmesun ga pan yeririna punu ga e yo punu ga, pisape monar avilopu la, ³¹ komin naña naga pisaar legiena rui, naña p̃isi na naga liṃere yomarava nini, ve sa naña torokin naga kila, a naga pisaar ṃena kiena yaru tai rui naña p̃isi na naga kila kiena yuṃaena nene. Naga kila suri nene merarava ruru pan yeririna make ga p̃isi rui, naña kiena yaru wa nena, aṃeṃar pa naga rui, ana siraunia Ntewa pisirlua ke sina ga naga mal sina."

³² Ana pimi tol pogos nene, la asuṃa amiyagogon ruru Pol, ana pogos naña amloge naga pisayu pisape yaru tai mare, ana Ntewa kila naga mali sina, ana la laṃas apitalia kare naga vanonia, ana laṃasia apisa pania, apisape "Poga ga, toṃa sanene wa.

Pona visae p̃isi na imimi mela pulmas tai van ko vena ko osunyu sina van imimi pogos tai yo.”³³ Ana Pol pisu sane la nene yepel mavin yagogonen naga, ana naga petan la, p̃asupe sina pito garo tano,³⁴ ana yeririna laṗas nae lele nene la amlelaga, ana asuṃa apimi akuspran la apa lele taaga amio Pol, naṗa lala yaru tai, naga pe yerkawa tai na kumali nae ruru nena Areoṗakas nene, kiena kia Tionisia, ana ta ṃena ga, naga pe sira tai, a naga kiena kia Tamaris, a la taṗena ṃena ga la laṗasia.

18

Pol sike garu Koren

¹ Ana siraun e suri la nene naṗa Pol kila garu Atens, naga purmatania, naga pa e pupia pulkumali taṗena naṗa Koren. ² Ana e yo nene, naga ṃal yere Yu tai, naṗa naga pe yaru tai nae lepas nae Pontas, a naga pa sike ga e purvanua naṗa Italia, e kana pulkumali keviu naṗa Rom, ana nanagane, naga amio wona, lalua apimi ga asike Koren na wa, komin Parin Suṗe Koltias nae Rom naga koven plan le Yu lala e kiena yo. Yaru nene, kiena kia, Akwila, a wona, kiena kia Prisila.

Sanene, Pol pa pisu lalua nene,³ a lalua apisape popon Pol suṃa amio la, la ayuṃaen re laa kilavaru sane wa, komin naṗa lalua amio Pol, la telu, kiela yuṃaena taaga, naṗa kiela

yuṃaena nasuluen kanus na yuṃa. ⁴ Ana la amiyuṃae ṃa sanene pano-o, ana e Legiena Wa lala, Pol naga suṃa pa ke e yuṃa na leniena kiena ne le Yu la, a suṃa kila ke visena la moki paṗisi amio le Yu lala, a amio ṃena ga le Kris lala naṗa asike ea, ana naga kila ṃa sanene pano-o taulu la moki.

⁵ Ana siraunia, Saelas amio Timote la apimi mare ga rau atol ga yo e nene na wa, ana e pogos nene, Pol naga taṃan make kiena pog punu ga e yuṃaena kiena ne Suṗe, naṗa suṃa mlologo, suṃa pisawal ke pa le Yu lala pisape kiela Navisaarena lelaga naṗa la asuṃate ke asape imi, naga nane Yesu nene naṗa pimi rui. ⁶ Ana visena nene kila le Yu laṗasia sinela kar Pol, ana la apisataṃe kare naga paṗisi, ana la akila ṃa pano-o kila narui pogos tai Pol kila kile tai pan la, naṗa naga kululun plan yavi nae yo nene petan ṃana kulsaket, naga pisa pan la, pisape “Visena lelaga kiena ne Ntewa nepisawal ruru pan amiu le Yu la rui. Ana visae yepemiu mavin logearena, sinemiun asape ava akokovio ga, nevisa van amiu sanini nesape kamiu kuruta naga sike ga e limamiu, pe su re si e luṃau po laa rui. Siar nanagane, neligan amiu, p̃isi na neva nevisawal ga Lologena Wo nene va la naṗa pe ape Yu re poli.” ⁷ Ana Pol molue

petan la e kiela yum̃a na lotuena, ana naga pa sike ga e yum̃a tai naṣa m̃eke ga e lepas nen yum̃a na lotuena nene. Yum̃a nene, m̃ana ne yaru tai naṣa naga pe pe Yu re poli, ana nanagane naga mlelaga e Ntewa rui, kiena kia Titias Sastas. ⁸ Ana nasumonena na yum̃a na lotuena nene e pogos nene, naṣa kiena kia Krispas, naga tai naṣa mlelaga e Suṣe Yesu, naga amio la ne e m̃ana mratava, a le Koren m̃ena ga la moki naṣa pogos naṣa la amloge visena lala kiena ne Pol, ana la amlelaga, a siraunia akee la.

⁹ Ana sirau, e yemalo tai, Pol momalio pisu Suṣe pisi pania, pisape “Pol, ko na ve omarauñ re yaru, ana ova ga, osum̃a ovisawal kiau visena. Ve okila re naṣa yaru taṣena la akila ko omalum̃u, ¹⁰ komin naṣa in na neṣike nemio ko. Pisi na taṣatete yaru nae e pulkumali nene tai naṣa kilia su ko pona m̃ene ko, komin naṣa in na kiau yeririna la mokliu asike e yo nene rui.”

¹¹ Ana Pol sike e yo nene yam piavi m̃aga, pa tol kas taaga kupario orai, a silaga naga sum̃a pian ke visena kiena ne Ntewa pa yeririna lala.

Le Yu la aṣure Pol pa kumali

¹² Ana e pogos nene, ṣarin suṣe nae Rom naga mli-gañ yaru tai vena naga ve suṣen lepas nen yo kiena ne le Kris la nene, a yaru

nene kiena kia ne nanene Kalio. Ana e pogos nene le Yu la apisayuia ana la apiranari apisape la monar akila suri tai vena akila wo Pol naga ve lologo re sina, ana la apa atarar Pol, aṣure pa e kumali kiena ne Kalio nene. Ana le Yu lala apisawal pa Kalio amio kiena naliṣereena lalua, la apisape ¹³ “Yaru nene, naga sum̃a kilali ke pisape were yaru lala vena ava aḷotun Ntewa e mrapa tai naṣa pe mesmesu re nenaga e lepas na ki-amimi navisaluaena.”

¹⁴ Ana Pol sum̃a sinenan ke pisape la navisatam̃een visena kiena ne la nene narui, ana naga pe pisi re poli wa, ana Kalio nene suwo marana, pisli m̃a pa le Yu lala. Naga pisa pan la, pisape “Le Yu lala, visae avisa van inu avisave yaru nene naga kila ṣelaga la naṣa piowa manene paṣisi, pona naga m̃e yaru tai, pona naga pinau, pona suri tai sanene, pogaga, pona nekilia neyagogon amiu yo. ¹⁵ Ana ya naṣa amiu apisa, nemloge sane pe pe suri re tai poli, pe suri korena ga nene na e kiamiu lepas navisaluaena amiu le Yu ga lala. Ve sanene, ṣisi na amiu ga avisuveve e naga, in na pe nekekaran re naṣa neyagogo e suri la nene poli pona nekila naliṣereena tai vanonia.”

¹⁶ Ana e visena la nene naga m̃ene plan la ke sina ga petan kiena kumali. ¹⁷ Ana suri nene kila narui la sinela mimi manene la sane, ana

pogos naṗa la apa vanua, atarar kiela nasumonena viu naṗa na kiela yum̃a na lotuena, naṗa kiena kia Sostinis, ana la asu kare naga paṗisi mon ga e mratava na kumali nene. Ana Kalio sum̃a pisu ke ne, ana naga pe sitom ṗele re poli, naga pe kila re nena suri tai pan la poli.

Pol sike Episas, siraunia pa si ma Antiok

¹⁸ Ana siraun e naga nene, Pol naga sike amio arueta lala nae Koren yam piavi towe laa sane, ana sirauria, naga mligan la, sitom sape va si Seria, a e pogos nene, Prisila amio Akwila, lalua amio naga. Ana la apito garo losi, e pulkumali naṗa Kenkria, ana e yo nene, Pol pisape awe vilṗarina. Naga nene komin naṗa naga kila navisaarena m̃arera pa Ntewa rui nanua sumo, ana nanagane, suri punu ga e navisaarena nene la ṗisi rui, ana la am̃e ga viluna e pogos nene na wa. Ana la amiai e waa tai, naṗa sum̃a pa ke garu Episas. ¹⁹ Ana pogos naṗa apimi atol Episas, la apa ura, ana Pol pisape ṗisi na Prisila amio Akwila la asum̃a ayum̃ae e yo nene sumo wa. Ana naga, naga mligan lalua, pa loyum̃a na lotuena kiena ne le Yu lala e yo nene, ana naga kila visena moki amio la. ²⁰ La akekarana naṗa asun amio Pol, ana la sinelan asape naga su re laa amio la wa vena la akilia avis amio

naga, ²¹ ana Pol pisa pan la, pisape “Potena paṗisi, ana in na monar nowasuṗe si neva garu Seria sumo wa. Ana visae Ntewa naga kiena naliganarena visave neimi sina, ṗisi na ve ve piavi re, nowasuṗe si pun amiu e yo nini Episas.” Ana naga taaga mligan si la nene, kus waa pano.

²² Ana pogos naṗa naga pimi tol ke sina ga Seria, naga pa ura e pulkumali naṗa Sisaria, ana naga pa si ma metava Yerusalem. Pisi na naga pa m̃alivin ṗegas nen li nalelagaena lala, a siraunia, naga pitomi si garo Antiok. Nane, Pol kila make kiena pupia yalena yam lua nene narui.

Pol mial ke sina ga, yam telu narui

²³ Ana Pol pa sum̃a garu Antiok pano-o ṗisi, ana naga mligan si yo nene, naga ṗasuṗe si pa e pulkumali kar ga la punu ga e lepas nae Kalesia nene amio Prisia. Naga pa komli e yo la nene yam tai rui, ana naga pa ke sina ga vena iila li nalologena lala vena aviawa m̃arera la sane.

Apolos mlologo garu Episas amio Koren

²⁴ Ana pogos naṗa Pol pe pimi tol re si Episas poli wa, yere Yu tai pimi e yo nene, naga nae pupia pulkumali nene Aliksantrea. Yaru nene, kiena kia Apolos, naga pe yaru tai naṗa ṗarina po paṗisi, naṗa naga kilia make visena la naṗa sike

e Siriena Wa lala, a naga pe yaru tai naḡa mlologo po naḡa po. ²⁵ La apian ruru naga e mrapa kiena ne Suḡe rui, ana naga taḡan kiena malena wetelu vena naga lologo pona vian ruru yeririna la e suri la e Yesu. Suri la punu ga naḡa naga pisa pe mesmesu paḡisi, ana suri ga tai, naga pe mlogeli re poli wa naḡa apisape yaru la monar ava e nakeena e kia kiena ne Yesu, naga kilia ga nakeena naḡa Yoane Nakeena naga kila nanua sumo. ²⁶ Ana pogos naḡa naga suḡa pa mlologo ke loyuma e yuma na lotuena kiena ne le Yu lala, ana naga pe maraun la re poli, naga pe sitom ḡele re suri tai poli. Ana pogos tai, Prisila amio Akwila, lalua amloge naḡa naga mlologo ke sanene, ana lalua amloge kilale sane yaru nene pe kilia ruru re suri laḡas poli wa e mrapa kiena ne Ntewa, ana lalua aḡure naga pa akilapian ruru si e suri la moki.

²⁷ Ana siraunia, Apolos naga sinenan sape va e yo kiena ne le Kris lala, garu Akaea, ana arueta lala nae Episas la apisa apisape po paḡisi naḡa visae naga va sanene, ana la asiri maḡaki tai pa li nalologena lala e lepas nene naḡa Apolos naga kilia war vano, vena la akekarana naḡa aurear naga sike amio la. A pogos naḡa naga pa tol yo nene, naga miila ruru la naḡa lemamienna kiena

ne Ntewa kila la amlelaga rui. ²⁸ Naga miila la naḡa sane e marana ne yeririna lala, naga kipian la pisape sanape naḡa le Yu lala la akila pal mrapa, komin naḡa naga kipian la e visena la moki naḡa sike e Siriena Wa naḡa la apisa meraravan rui apisape Yesu naga pe Navisaarena kemua lelaga. Ana pogos naḡa le Yu la amloge kiena vianena la nene, la pe apisa re si suri tai poli.

19

Pol sike sina ga garu Episas

¹ Ana pogos naḡa Apolos pa sike ma Koren wa, Pol suḡa mialoro ke e kiena mrapa naḡa kom ke e lepas naḡa pa ma metava e kunus lala, ana naga mlilu ma mrapa nene pano-o naga pimi tol Episas. Ana e yo nene, naga pa malivin narin ḡegas nen li nalelagaena la naḡa asike ea, ² a pogos tai, naga piun tan la, pisape “? Pogos naḡa amlelaga e Yesu, amninu Ninuna Wa pimi e amiu e pogos nene, pona pe amninu re poli?”

Ana la apisatamaḡe naga, apisape “?Ana Ninuna Wa ya nene? Imimi pe memlogeli re suri tai sanene poli wa.”

³ Ana Pol piun ke sina ga tan la, pisape “?Ana pogos naḡa akee amiu, amiu apisu sane naga nene na kana kinas sanape?”

Ana la apisatamaḡea, pisape “La akee imimi, imimi

mepisu sane sa ke ga e nakeena nene naŋa Yoane suŋa kila ke nanua sumo.”

⁴ Ana Pol naga pian ruru la, pisape “Ee, naga nene naga poga ga, ana nakeena naŋa Yoane naga kila nanua sumo, naga kila pa yaru lala sane kile ga tai naŋa sane yaru la nene la apilon la rui, ana naga nene na kana kinasa na pe sa re naŋa amlelaga e Yesu po laa wa. Yoane naga m̃ena ga kilia m̃a suri nene, komin naŋa naga pimi sumo, a naga suŋa pisa ke pa yeririna lala, pisape la monar alelaga van naŋa p̃isi na imi raunia, sane Yesu.”

⁵ A pogos naŋa le Episas la amloge naŋa Pol pisayu ruru suri nene pan la, la apisu sane popon la ava si e nakeena, ana la akeela e kia kiena ne Suŋe Yesu. ⁶ A e pogos nene, Pol pu p̃arila, ana Ninuna Wa pitomi e la, kila la asum̃a apisi ke kome visena taŋena lala, a kila m̃ena la asum̃a apisawal ke m̃ena ga visena laŋasia naŋa Ntewa mla pan la. ⁷ E kiela narin p̃egas nene, pe la moki re poli, la atol ga lualima taaga pa lua.

⁸ Ana Pol na sike garu Episas tol sina ga kupario telu, a pogos punu ga naga pa kila ke lotuena loyuma e yuma kiena ne le Yu lala, a naga kila ke visena moki pan la. Pogos tai, naga pe sitom p̃ele re poli, naga pisi m̃arera pan la, pogos

tai naga peveyu pan la, a pogos tai naga tagin la vena aimi loyuma e nasuŋenena kiena ne Ntewa. ⁹ Naga kila m̃a sanene pano-o, ana naga pisu naŋa peraga, la ape p̃arm̃arera ga, la pe sinelan re nena naŋa alelaga poli. Ana la p̃asia la asum̃a apisayu kare Mrapa Viu nene pa yaru taŋena lala loyuma e yuma na lotuena nene, ana Pol sum̃alu p̃ere plan si li nalogena lala, la amolue petan le Yu taŋena la nene, ana legiena punu ga la apa akila viorena a amlol-ogo pa yaru lala e yuma na viorena kiena ne yaru nene Tiranas. ¹⁰ Naga nene, Pol sum̃a kila m̃a ga sanene pa tol ke sina ga kas lua, ana kila sanene yeririna lala nae lepas keviu nene Esia, le Yu lala amio yaru taŋena lala, la punu ga amloge visena kiena ne Suŋe.

Yaru laŋasia la amlenpal ga e kia kiena ne Yesu

¹¹ Ana pogos naŋa Pol sum̃a miyuma e ke sanene garu Episas, Ntewa miyuma e naga, kila kile kerkeviu la moki ve na iilaen yeririna lala. ¹² Visae narin kulmrae tai, pona kulsota tai, ana yaru la aŋar pimi Pol pilivili sumo wa, p̃isi na aŋar pano akila tol ga yepena ne li namaiena lala, a kulmrae la nene am̃ene plan kiela maiena lala, pona ninuna viowa la naŋa asike e la.

¹³ Ana e pogos nene, le Yu m̃ena ga laṗasia ami-
aliali ke yaru lala, la asuṃa
aṃene plan ke ninuna viowa
petan la. La nene pe am-
lelaga re e Suṗe Yesu poli,
ana pogos naṗa amloge sane
Pol miyuṃae ke sanape, la
m̃ena ga asitom asape ṗisi
na la akilali naṗa ayuṃae
e naṃareraena na kia nene.
Ana pogos naṗa aṃene plan
ninuna viowa, la apisi pania,
apisape “Mepisa mesmesun
pan ko e kia kiena ne Suṗe
Yesu naṗa Pol suṃa mlolo-
gon ke ne, pisape ko oura
vetan yaru nene.”

¹⁴ Ana e pogos tai, m̃ee
m̃ena ga laṗas sinelan asape
akilali ve sanene. La nene,
la olua nene la na narina
ne ṗarin yar wa kiena ne
le Yu naṗa kiena kia Skeva.

¹⁵ Ana la naṗani apimi am-
lenwo yaru tai naṗa ninuna
viowa sike e naga, ana la
apisi pa ninuna viowa nene
vena ligania, ana ninuna
viowa nene sinena kar la,
pisape “Ee, nekilia ṃa kia
naṗa Yesu, a nemloge ke
m̃ena ga kia naṗa apisape
Pol, ana amiu na ai? !
In na nemninue amiu nena
ga, avisuar amiu!” ¹⁶ Ana
veraga ga, yaru nene pula
pimi pula, kila mara amio
la su la pano pano-o, taulu
la olua nene, kilapel la naṗa
kilapel la pitolwowa make
ṃala kulsota lala. Ana apur-
matan yo nene aṗar kuruta
paṗisi. ¹⁷ Ana yeririna la
apisayu suri nene pano tol le
Yu lala amio m̃ena ga yaru

taṗena lala, le Episas lala la
punu ga amloge, a suri nene
kila narui la sinela kurkur
towe la sane, a kila narui
amieluar kia kiena ne Suṗe
Yesu pa laa sane.

¹⁸ Ana siraunia, la moki
naṗa nanagane la apimi ape
li nalelagaena la ṗisi rui, la
apimi apisawal apisape la
aṗar ke kimi, a la apisawal
suri la naṗa la amiyuṃaen
ke e purkol. ¹⁹ A laṗas
naṗa ape purṗes nen kimi
kemua lelaga, aṗar polo suri
la naṗa amiyuṃaen ke amio
la apimi lele taaga, sa naṗa
kana tus ne lala, ana e
marana ne la naṗa apisu
ke e pogos nene, la akoven
make ga pa e kapi. Tusi la
nene moki paṗisi, ana pogos
naṗa asitoṃal kana kilavaru
ne la punu ga naṗa apul la
e sumo, ana la apisu sane
keviu paṗisi, taulu tenario
na kilavaru moki paṗisi.
²⁰ Ana pogos naṗa suri la ne
sanene pimi ṗarwowo ke yo,
la apisu sane naṃareraena
kiena ne Ntewa naga suṃa
miyuṃae ke ṃarera paṗisi,
a la apisu naṗa visena kiena
ne Suṗe naga suṃa kulkul-
ulu pano taulu yaru la moki
laa narui e yo punu ga.

*Veveyuena keviu garu
Episas*

²¹ Ana Pol pisu kilale naṗa
yuṃaena kiena ne Ntewa pa
ke metava narui, ana naga
mninukilale pisape naga
m̃ena ga monar yuṃae va
re laa na wa, vena naga
va telivi visuveveli sina ga

lepas la nene Masitonia amio Akaea, gare Kris, a sirau, p̃isi na naga wasuṽe ke sina ga va Yerusalem. A naga pisaar m̃ena ga e pogos nene, pisape “A siraun naṽa nowasuṽe neva si Yerusalem, p̃isi na monar neyaloro si neva re laa na wa, monar neva m̃a neva m̃a netol ma Rom.”²² Ana naga pisu sane p̃isi na naga monar su re laa yam ve plas laa sane sumo wa e lepas nae Esia amio kana pupia pulkumali nena naṽa Episas, ana yaru naiilaen lalua nene, Timote amio Erastas, naga mligan la asumo apa Masitonia.

²³ Ana e pogos nene, naṽa Pol sike gar yo naṽa Episas wa, ana pupia veveyuena tai molue e lepas na Mrapa Viu kiena ne Yesu.²⁴ Suri nene, kana purṽesia naṽa le Episas lala, la apisa apisape kiela ntewa, naga sira tai, kiena kia Atemis, a la amlotun ke kana pupia nono nena e kana pupia yum̃a wa nena. Ana yaru tai nae e yo nene, kiena kia Timi-trias, naga p̃ere yaru moki liu apimi amiyum̃ae kiena, naṽa la asum̃a amiyum̃aen ke narin nono lala na yum̃a m̃ana ne sira ntewa nene, la amiyum̃aen e selpa, a yaru la asum̃a apul ke tania, naṽa naga amio kiena yeririna lala la asum̃a aṽar manene kilavaru e paṽisi.

²⁵ Ana sirau, naga pisu yum̃aena naṽa Pol kila ke ne sum̃a m̃e moñar

ke kiena yum̃aena nene narui, ana pogos tai naga pio kiena yeririna la nene, amio yaru taṽena la naṽa la amiyum̃aen ke suri la e selpa, ana pogos naṽa apimi lele taaga, naga p̃isi pan la, pisape “A, aulai, amiu akilia m̃a naṽa sane ita temali ke ga e kieta yum̃aena nene naṽa ita tesum̃a temiyum̃aen ke suri la e selpa. Yum̃aena ga nene kila na ita tesum̃a toṽar ke kilavaru laṽasia.²⁶ Ana nesitom nesape amiu na amloge narui, pona ita laṽasia tepisu e kilamarata rui, naṽa yaru suri naṽa Pol nene naga sum̃a pilon ke sitomena kiena ne yeririna la pa pe taṽena. Naga sum̃a kila ke e nini, a sum̃a kila ke m̃ena e lavisin pulkumali punu ga na pupia kieta lepas nini Esia, naṽa naga sum̃a pian ke yaru lala pisape nono la naṽa yaru miyum̃aen e limana, la pe ape ntewa re nena poli.²⁷ Ana in na nepisu sane visena kiena ne yaru nene p̃isi na kila kieta yum̃aena vito tano vaṽisi, naṽa p̃isi na yaru la ve akekaran re si auli suri la naṽa ita temiyum̃aen ke narui. A metavana, ita temio le Esia lala, amio m̃ena ga yeririna taṽena kar ga lala e yomarava nini, ita tesum̃a temlotun ke ntewa wo tanea tai nene naṽa Atemis, pona yaru nene sinenan pisape kovenlua kare naga yo, pona sinenan pisape kila m̃ana yum̃a wa

imi ve suri korena tai yo.”

²⁸ Ana pogos naña naga p̃alelar kare kiela sitomena la sanene, kila la sinela mimi manene laa narui, ana la asuñña apiovionia, apisape “!Atemis nae Episas naga po, tepinaia naga taaga-o!”

²⁹ Ana la sane am̃arera laa narui, ana la apa akila pupia m̃aagena gar kumali, ana apa atarar Kaias amio Aristakas, yere Masitonia lua naña amialoro amio Pol apimi asike e yo nini, ana la apurela, akiriri amio la apa loyum̃a e pupia lelen viorena nae Episas nene, a le Episas m̃ena ga lala apa amio la, apa akokonia yo nene p̃isa.

³⁰ Ana Pol m̃ena ga sine-nan pisape va loyum̃a vena kilali naña visi amio pupia p̃ina nene, ana nalogena nae Episas lala amaraun asape sa p̃isi awem̃arlaea, ana apisalup̃ar naga. ³¹ A yerkawa lañas na Lokol Kansel kiena ne le Esia lala, la ape erau ruru po amio Pol, ana la m̃ena ga amligan visena pimi, apiun manene pa Pol vena naga ve va re loyum̃a, akila sanene naga pe pa re si poli.

³² Ana loyum̃a e yo nene, yeririna lala la akila ke pupia m̃aagena pañisi, la moki liu naña apisi veraga, lañasia apisi pa sanene, lañasia apisi pe tañena, a la moki naña am̃inue nena ga sane am̃a akila ke viorena na ya wa.

³³ Ana le Yu lala la amaraun asape sa p̃isi yaru la

asitom asape la ke naña la ape purp̃es nen veveyuena nene narui, ana la asupon lala yaru tai, kiena kia Alik-santa, naga pa suñalu se maran yaru lala vena visli van la vena la ve sinela kar re le Yu lala. Naga kuan limana kila avarurula, ana la am̃ape naga ke tai naña pe yaru na veveyuena narui.

³⁴ Ana siraunia, pogos naña la apisu kilale asape naga pe yere Yu ga tai, m̃aagena pe pito re nena tano poli, ana la asuñña apio manene ke e kia kiena ne kiela ntewa naña sira nene, la asuñña apiovion ke veraga, apisa apisape “!Kiamimi Atemis imimi le Episas lala naga po pañisi-o! !Kiamimi Atemis naga taaga po pañisi-e!” Ana la apio m̃a sanene pano-o tol mrae lua pe suri tai.

³⁵ Ana siraunia, supe kiena ne le Episas la nene suñalu se marala, naga kilali naña aimi amalumu sina pano-o p̃isi, ana naga pisa pan la, pisape “Yeririna nae Episas lala, ita punu ga tekilia ruru rui tesape kieta pulkumali nene, naga pe kumali ke-viu tai, a pe pulkumali wa tai. Ita ke narui naña tesuñña tepisuar ke yuñña wa kiena ne pupia kieta ntewa nene, Atemis, a tekilia tesape kieta lelagaena pe lelaga, komin nanua sumo verue ta nene mlai, ana kana pupia kilavaru wa nena mloru ma e peni pitomi, naña pe mloru re e yo tañena la poli, mloru ga e ita rui, ana ita tesuñña

tepisuar ruru m̃a ga. ³⁶ Suri la nene tekilia rui tesape lelaga make ga, yaru taṣena lala taṣatete nena ga avisa karea. Ana sanene na, pe pon re tekila manene ṣarita poli, popon tekilali naṣa tesu ruru ga tesu m̃aga. ³⁷ Ana e lepas kien la nene naṣa amiu aṣure la apimi e nini, in na pe nemloge re naṣa amiu apisa apisape la apa apinaun suri wa tai e yum̃a wa m̃ana ne kieta ntewa poli, pona la apiuelin kiena kia, ana visae ve sanene ita taṣatete tekila suri tai va lalua nene e yo nini.

³⁸ “Ana visae yaru na ki-laen selpa la nene, sane Tim-
itrias lala, visae la kiela suri na visaen laṣasia sike ga wa vena avisa van lalua nene, poga ga, kieta kumali la sum̃a ga, a kieta naliṣereena la sum̃a ga, ana visae avisu ve sanape, la akilia aurela ava avis van la e kana yo nena. ³⁹ Ana visae amiu asitom avisave suri si laṣas sike ga wa vena ita punu ga tevisuveve sina, poga ga, tekilia tevisuveve ga e kieta viorena si tai.

⁴⁰ “Naga nene, komin ṗelaga naṣa tekila ke nanagane, ita tepa manene laa narui. Pe pe suri re tai naṣa mesmesun tekilia tekila manene m̃aagena nene vanon poli, pona tekila naveveyuena keviu sanene vanonia, a visae peraga, pona ṗisi na yerka wa kiena ne le Rom lala la ṗisi na akoven ita e yum̃a nakoarena

na wa vanon kieta yum̃aena na nanagane.”

⁴¹ Ana pogos naṣa naga pisa visena nene ṗisi, sitomena kiena ne yeririna lala pimi pa ruru ke sina ga po narui, ana naga kalo visena, naga pisa pan la pisape la akilia aviaṣa ke sina ga.

20

Pol mialiali sina li nalelagaena lala garu Masitonia a garu Kris

¹ Ana legiena si laṣasia, pogos naṣa pupia m̃aagena naṣa le Episas la nene akila, pito si tano, Pol naga pio nalelagaena lala apimi lele taaga, ana naga mla visena wo pan la vena asuṃalu m̃arera va laa sane, ṗisi na naga pisi maro pan la, ana mligan la, pa si garu Masitonia. ² Ana e yo nene, naga pa mial kome kana lepas ne lala, ana e yo punu ga naga sum̃a miila ke yeririna lala e kiena visena wo lala, ana siraunia, naga pa si metava ma Kris, naṣa kana pupia pulkumali nena, naṣa Koren. ³ Ana Pol naga sike e yo nene pano-o tol kupario telu, ana ṗisi na naga sum̃a sitom sape kome waa tai naṣa m̃eke pa rui, wasuṗe sina ga va garu Seria. Ana lavisi naṣa aure vano, ana visena pimi tol Pol pisape le Yu lala nae e yo nene, la asuṃa akila ke sitomena viowa tai vena akila van ia e pogos naṣa naga sum̃a m̃eke e mrapa

komsusia, ana kila naga pe pa re si e waa nene po laa rui, ana naga mla mrapa piavi tai, naga mial p̃asupe si pa telivi garu yo Masitonia.
⁴ Ana e pogos nene lapas apa amio naga, sane Sopata nae Perea, naṗa narina Piras, amio Aristakas a Sekantas, lalua nae Tesalonaika, amio Kaias nae Tepe, amio Timote, a amio m̃ena Tikikas a Tropimas, lalua nae Esia.

Pol lala asike garo Troas

⁵ Ana lapas nene naṗa asike amio Pol, la asumo apano aporu garu Troas.
⁶ Ana Pol naga sirau pimi, ana inu Luk, nesikol inu sina nemio la garu Piliṗae, a imimi mekila Paṗagena Nakanena Tamṗa e yo nene. Pogos naṗa paṗagena nene p̃isi, ana mokus waa, ana mekiriri m̃a pano-o tol legiena lima, p̃isi na imimi mepimi metol yo Troas, la naṗa apa sumo la asum̃ate imimi ke e nene. Ana imimi punu ga mesike garu Troas tol legiena olua.

⁷ Ana e Legiena Wa, pogos naṗa mrae pito pa tano na ṗa rui, sa naṗa legiena p̃esia na legiena olua siar narui, imimi mepiora memio nalelagaena lala nae yo nene, imimi memlotu a makawero kilaparavi wa. Ana Pol naga sitom sape imimi meial ke kolulag ga, ana komin naṗa pe kiamimi viorena maro memio la, ana la akila visena la moki, ana kila Pol m̃ena ga pisi yam piavi, pisi m̃a pano tol yemalo pa ko yepe lilika

narui. ⁸ Ana e pogos nene, imimi mesum̃a mepiora ke e lele tai metava e yotop naṗa na telu, ana yeririna lala aṗar kiela kapi vivaga moki pimi, kila yo loyum̃a nene yo pisusun keviu paṗisi.

⁹ Ana yaru m̃ee tai, kiena kia Yutikas, naga tom̃a tano e pulutava na lagi, ana pogos na Pol naga mlologo m̃a pa sanene pano-o, m̃ee nene mloge momalena na mloge momalena. Naga tekavito na tekavito, kila m̃a sanene pano-o, p̃isi na naga momalio ruru nena naapo, ana la amilan ga naṗa naga mloru e pulutava na lagi nene, naga mloru pito koan vanua e porotano. Yo nene naga mon manene laa metava, ana pogos naṗa la akiriri apitove, atol naga, ana la apisu naṗa naga mare pa rui. ¹⁰ Ana Pol m̃ena pito tano vena visulia, naga pulu pito tano kutarar e limana luwoka, ana naga pisa pan la, pisape “Ve aloge re viowa, ve atagin re naga, nanagane kiena malena p̃asupe si pimi e naga rui.”

¹¹ Ana Pol lala apa sina ga metava, ana la amla Kinanena Wa nene, siraunia la akinana, ana siraun nanene, la asun ke sina ga pano-o yemlagi, ana Pol mligan la pano. ¹² Ana e lepas na ninis yerm̃ene nene, aṗar naga mali ruru sina amio apa um̃a, a la amloge po paṗisi naṗa Pol naga kila ruru naga pan la.

Pol lala asike mrapa vena awasupe la sina

¹³ Ana Pol naga pis pan imimi rui pisa pisape imimi mesumo mokom e waa, imimi meva mesum̃ate naga e pulkumali nene Asos, ana naga sirau imi, naga yali ga kom ura. ¹⁴ Ana imimi mepano metol garu Asos, ana naga sirau pimi, ana naga miai e waa, ana imimi punu ga mepano metol pulkumali naṗa Maetilin e narin purvanua tai.

¹⁵ Ana siraunia, imimi mekiriri si e legiena wetelu tai, mekiririn narin purvanua tai, kiena kia Kios, ana siraunia e legiena taṗena, metol e narin purvanua nene Samos, ana legiena taṗena sina, imimi metol e kumali nae Maelitas e purvanua keviu, ana imimi mepa ura e yo nene. ¹⁶ E pogos nene, imimi moṗaro ga yo Episas sanene, pe mepa re ura e poli, komin Pol naga pisu pisape pe pon re naṗa ita tokus pogos ve moki e lepas nae Esia nene poli, komin naga sum̃a sitom ke sape visae imimi mekilia mekilia sanene, ana popon moworu garu Yerusalem mesmesun pogos na Paṗagenana na Yui Marua.

Pol naga sike garu Maelitas, naga pis maro pan nasumonena lala nae Episas

¹⁷ Ana garu Maelitas, Pol mligan visena pa garu Episas, naga pisape nasumonena nalotena lala aimi avisuia. ¹⁸ Ana siraunia la

apimi, ana Pol pisa kiena visena maro pan la. Naga pisa sanini, pisape “Amiu, amiu akilia ruru inu rui, naṗa siar e pogos naṗa nepimi ṗesan e kieta lepas nini, naṗa Esia, pimi tol nanagane, nesum̃a nemio amiu pogos piavi paṗisi rui. Ana akilia ruru m̃ena ga kiau ṗelaga a yum̃aena kiena ne Suṗe la naṗa nekila rui. ¹⁹ Akilia m̃a naṗa yum̃aena la nene, nekila ke naṗa kiau sitomena pito ga tano, a nekila ke m̃ena ga amio wamarau, a nekila m̃ena e pogos m̃arera naṗa le Yu la akila pan inu, naṗa m̃alivi e kiela sinemimiena lala pan inu. ²⁰ Ana akilia ruru m̃ena rui, naṗa visena punu ga naṗa mesmesun navisaena, naṗa kilia iila amiu, visena la nene pe nemawan re naṗa nevisawal van amiu poli, pona pe nemaraun re naṗa nevian amiu e poli, nanene e poglis la naṗa ita tesike e yo metava temio yeririna moki lala, pona e pogos la naṗa netelivi ke e m̃amiu um̃a lala. ²¹ Ana nepis pan le Yu lala pona nepis pan la naṗa pe ape le Yu re poli, ana pe nesitom ṗele re naṗa nevisawal van la poli, ana nom̃areran la, nepisawal ruru nena pan la, nesape la punu ga monar avilopu la ava puna Ntewa, la monar alelaga e kieta Suṗe Yesu Kristo.

²² “Ana nanagane, nepa ke sina ma Yerusalem, pe

nekilia re ya naḗa le Yu la yoko akila van inu poli e pogos naḗa noworu e yo nene, ana nemlogelup̃ar e inu naḗa Ninuna Wa naga suḗa pure inu ke sanene, ana monar neva ga. ²³ Ana Ninuna Wa naga suḗa kila merarava pan inu rui naḗa e pulkumali punu ga la naḗa nepa ke ea, ana monar netol pogos m̃arera lala, a yeririna la asuḗate ke ga vena akoan inu neva e yum̃a nakoarena. ?Sanene nepisu visae neva garu Yerusalem, pona ve sa ke m̃ena ga nene yo? ²⁴ Ana poga ga nene, komin naḗa pe nepisu re kiau malena naga pe suri tai poli, pona tasneu, vena monar nesitom manenea, peraga. Ana nesitom ke suri taaga ga, vena nekilia nekiriri m̃aga vano-o netol luas nen kiau yum̃aena naḗa Suḗe Yesu mligan sike e lum̃au, naḗa monar nevisawal Nalologena Wo na nalemamiena kiena ne Ntewa va e yo punu ga.

²⁵ “Ana nanagane, nekilia m̃ena rui, amiu naḗa nesuḗa nemiali amiu, naḗa nemlologon ke navesup̃enena kiena ne Ntewa pan amiu, nekilia naḗa amiu punu ga taḗatete si akilia avisu marau pogos tai. ²⁶ Visae amiu yaru tai naga pe mla re visena lala kiena ne Ntewa nene e kiena malena poli wa, naḗa nepisa pan amiu rui, ana yokorena naga va kovio, ana visae

naga va kovio, kiena kuruta teke ga e naga, ana pe to re e inu poli, ²⁷ komin naḗa in na nepisawal m̃rapa pan amiu rui, ana pe nekilawan re sitomena kiena ne Ntewa pan amiu poli.

²⁸ “Ana amiu li nasumu-nena lala, komin naḗa Ninuna Wa pisir plan amiu sa naḗa yeririna lala navisuarena sipsip lala na nalotena kiena ne Ntewa nene naḗa naga pul lua e tana ne narina, ana amiu na monar avisuar ruru amiu, a amiu monar avisuar ruru la nene. ²⁹ Ee, sineun nevisave nevisa van amiu, pogos naḗa nevetan amiu pa narui, ana nekilia m̃aga naḗa yoko lokul tetan lala aimi, akila kare kiamiu sipsip la vaḗisi, akilayon naḗa aḗenetetain la, ava aveve taaga. ³⁰ Ana nekilia nevisa m̃ena ga, nevisave siraunia, ana amiu yerkawa ga laḗasia, ana asuḗalu, ana avisokan kar ga la ve moki vaḗisi, vena akilayon ga naḗa asape aurelua nalogena lala ava ataveve la ga. ³¹ Sanene, monar asururuia, a monar avisururuia, a monar asitomiḗal naḗa ayuḗae m̃arera ve sa naḗa nekila pogos naḗa nesike nemio amiu pano-o tol kas wetelu telu, naḗa pogos punu ga, e legiena a kolemallo, nesuḗa nepian ke yeririna lala, a nepisawal nena visena kiena ne Ntewa pan la, pano-o wamarau kekapili vanon la.

32 “Ana nanagane, pe su re si e luñau poli vena nevisuar amiu, nemligan amiu asike ga e limana ne Ntewa. A nemlen nesape yoko Lologena Wo na lemamiena kiena, naga suña iila amiu, kila amiu asuñalu m̃arera, a kila naña amiu m̃ena ga, akilia awar navisa ruruena wo lala naña Ntewa naga yokorena war sirau va kiena yeririna wa lala.

33 “Ana sineun nesape asitom̃al m̃ena ga, pogos naña nesike nemio amiu, nesuñae nemiyuñae korena ga sanene, a pe sineu sun re kiamiu suri wo la naña sane kiamiu kilavaru la poli, pona kiamiu kulmrae lala.

34 Ana pe nepisa re nesape avisuar inu e suri la nene poli, ana inu ga nepisuar inu e yum̃aena na luñau luwoka nini, a nepisuar m̃ena la naña amiyuñae ke amio inu e pogos nene. 35 Ana e mrapa nene, a e p̃elaga tañena m̃ena ga lala, nepian amiunia nesape popon ita teyuñae m̃arera teiila yaru lala naña yepela malumu, apisu p̃ele narui, komin naña monar tesitom̃al m̃ena ga visena kiena ne Supe Yesu tai, naña naga pisape ‘Visae ko otol kioñae nalaena tai, ana ko ologe wonia, ana visae ko ola nalaena tai vano, ana ko ologe wonia va ve keviu laa sane, ana navisa ruruena sike e ko.’”

36 Ana pogos naña Pol naga pisa visena la nene p̃isi,

ana akinai, naga mlen amio la. 37 Ana la asiar naña atag narui, ana la atalopan Pol, akulkalil e yepena, amlipalipa naga pano pano-o pañisi, 38 komin naña la asuñae asitom ke kienae visena taaga ga nene, naña naga pisape ve avisu re si marana pogos tai. Kienae visena ga nene narui kila la sinela miye naga keviu pañisi. Ana siraunia, la amiyal amio naga, aṗure naga pitomi si e waa naña imimi mokusia mokomkom ke ea.

21

Luk pisayu naña naga amio Pol lala, apa atol yo Yerusalem

1 Ana imimi memligan la asike e yo nene Maelitas, ana imimi meṗere m̃ale, mepa mesmesu ga mepa metol narin purvanua naña Kos, ana imimi momomalia e yo nene. Yemlagi kolulag, ana imimi mepetan ke sina ga yo nene, mepa m̃a mepa m̃a pano-o metol sina purvanua tañena naña Rots, ana imimi momon sina, ana yemlagi kolulag, meṗure sina ga, mepa metol pulkumali nene Patara e purvanua keviu. 2 Ana kiamimi waa nene naga pa tol ga yo nene, ana mepa ura. Ana pogos naña mom̃al si waa tañena tai naña p̃isi na va garu e yo nene Ponisia, ana memiai ea, aṗere m̃ale, ana mesike sina ga e kiamimi mrapa. 3 Imimi mekirir

mepa m̃a sanene e sive ke-
viu nene, va ko yotena ne,
pano-o mom̃al pupia pur-
vanua naḗa Saepras, ana
memligan sike ga e kiamimi
lepas na ḗam̃eli, ana mepa
m̃a sanene mesape meva
metol yo naḗa Seria naḗa
sinemimin mesape meva ea.
Waa nene ḗar ke tegaki la
naḗa sape va ligan e pulku-
mali naḗa Taea, ana pogos
naḗa mepa metol yo nene,
ana mepa ura ea. ⁴ Ana
mepa makale li nalologena
lala e yo nene, ana siraunia,
mesum̃a memio la pano tol
legiena olua. Ana e pogos
nene, la apisu naḗa Ninuna
Wa pian la naḗa ḗisi na
va ve sanape e Pol garu
Yerusalem, a la apisi pania,
sinelan asape avisaluḗaria
asape ve va re si tol yo nene.
⁵ Ana Pol mninu e naga, sape
monar va ga, ana siraunia,
mepa sina e kiamimi mrapa.
Ana e pogos nene, yerm̃ene
lala a sira lala amio nin
sisi lala, amiyal amio imimi,
mepa vanua e kiela pulku-
mali, ana aḗere imimi sina
mepito garo e kiamimi waa.
Ana imimi punu ga mekinai
tano e none, ana memlenwo
imimi, ḗisi na metalopan la.
⁶ Ana memiai sina e kiamimi
waa, ana la aḗasuḗela si apa
um̃a.

⁷ Ana meḗure petan yo
Taea, mepa metava e pulku-
mali naḗa Tolimeas, ana e
yo nene ana mepa mepitawe
arueta lala, mesike memio la

e legiena taaga nene. ⁸ Ana
kolulagi, mepetan sina yo
nene, ana mepimi metol
pulkumali naḗa Sisaria,
mepa ura ana e yo nene,
mepa mesike e yum̃a m̃ana
yaru na Lologena Wo nene,
Pilip, naḗa naga lala olua tai
naḗa apisiriplan la ḗesania
asape la aiila yum̃aena, nane
garu Yerusalem. ⁹ Ana Pilip
nene, narina na sira la vari
asike um̃a, ana la pe atalopa
re poli wa, ana la nene,
yam moki liu naḗa Ntewa
mla ke visena pan la, ana
la apisawal pa yeririna la.
¹⁰ Ana mesum̃a memio la
legiena laḗas ḗaro rui, ana
navisawalena tai mligan yo
Yutea pitomi tano e yo nene,
yaru nene naga kiena kia
Akaḗas. ¹¹ Ana naga pimi
pun imimi, sinenan sape
kila kile tai va Pol, ana
naga mla kulmrae kiena
ne Pol tai, ana pavinar
e limana amio lana, ana
pisawal pisape “Ninuna Wa
pisa, pisape ‘Yaru naḗa naga
kiena kulmrae nini, yoko
le Yu lala garu Yerusalem,
aviar naga ve sanini, a
siraunia, akila naga va e
limana ne la naḗa pe ape
le Yu re poli, vena akila
viowa vania.’ ” ¹² Ana pogos
naḗa memloge visena nene,
memio la naḗa asike e nene,
metagin Pol, mom̃areran
pania mesape naga ve va re
si metava m̃a Yerusalem.

¹³ Ana Pol pisatañe imimi,
pisa pisape “Ei, aulai, asum̃a
atagi ke sanene, kila nem-

loge sane sineu sape wororo ga narui. Ana suri punu ga nene poga ga, visae le Yerusalem lala aligan inu e yum̃a nakoarena komin kia kiena ne Suṽe Yesu, ana naga poga ga, ana visae m̃arera m̃a sanene vano-o nemare, ana nekekara ga.”

14 Ana metaṽali naṽa mepisalup̃ar sanene pano-o, mepisalup̃ar ṽele ga, ana mepisa ga, mepisape “Poga ga, yoko monar ve sa ga naṽa Suṽe naga sinenania.”

15 Ana mesike sina legiena laṽas gar Sisaria nene, ana siraunia, mekila ruru ke sina ga kiamimi karo lala, ana mepetan yo nene, memial mepa metava ma Yerusalem.

16 Ana li nalologena laṽas nae Sisaria ataveve imimi m̃ena ga, ana pogos naṽa mepimi metol yo Yerusalem, ana aṽere imimi mepa e yum̃a m̃ana yere Saepras tai, vena mesike memio naga. Ana yaru nene, naga m̃ena pe nalogena ṽes tai naṽa amlelaga e Yesu sumo, ana naga kiena kia, Nason.

Garu Yerusalem, Pol pa pisu Semes

17 Ana pogos naṽa arueta lala apisu naṽa mepimi metol si yo Yerusalem rui, ana la akekara paṽisi. 18 Ana memono-o, yemlagi kolulagi, imimi memio Pol mepa meṽalivin Semes, ana li nasumonena taṽena m̃ena ga lala na suṽare nae Yerusalem, la m̃ena asike e pogos nene. 19 Ana

metalopan la, ana Pol pisi pan la, naga pisawal suri punu ga peve taaga la naṽa Ntewa kila pa rui m̃alivi e kiena yum̃aena, nanene e la naṽa pe ape le Yu re poli, naṽa naga pa telivi ke e kiela yo lala.

20 Ana pogos naṽa la amloge visena na suri la naṽa Pol naga pisawalia, kila sanene la amloge po manene la, la amieluar Ntewa vanonia. Ana e pogos nene, visena la moki m̃ena ga garu Yerusalem kana Pol, ana la akilia m̃a suri nene, ana apisa pa Pol, apisape “Wolai Pol, ko okilia rui naṽa osape yaru la e nini la sane manu pe suri tai naṽa la amlelaga mare ga na wa, la nene ape le Yu ga lala, ana sa naṽa ko okilia, yeririna la ne sanene la akilia asum̃alu m̃arera manene la e kieta navisaluaena marua lala.

21 Ana lala amloge pa rui, naṽa yaru la asum̃a apisayu kare ko ke asape ko opa opiankare ga kieta lus la naṽa asike gare purvanua taṽena lala. La asape ko osum̃a opian ke la nene osape popon aligan rui navisaluaena kiena Mosis amio kala ṽelaga marua ne lala, ana asape osape popon manene m̃ena naṽa ve akila re si ṽaviu e narila lala. 22 ? Ana ṽisi na ita tekila ya narui, komin naṽa visena la nene kila la sinela kari ko manene pa rui? Ana nanagane, ve ve piavi re, ana ṽisi na monar la aloge

m̃ena naṗa asape ko opimi osike pa e yo nini rui. ²³ Ana poga ga, ṗisi na ko okila ga ve sa naṗa ṗisi na mevisa van ko, kom̃in naṗa mepisu pa mrapa tai rui naṗa okilia okila naṗa owe plan kiela sinemim̃jena nene. Pisi na monar okila ve sanene: e yo nene, ana imimi yeririna la vari naṗa nanua sumo, ana la akila navisaarena m̃arera tai pan Ntewa, apisape ṗisi na la avalia suri laṗasia va tol pogos ve sanene.

²⁴ Ana peni, la kiela pogos naṗa ṗisi na monar ava e Yum̃a Wa m̃ana Ntewa, naṗa vena la akila suri la e lepas na kiela navisaarena nene, sane leniena lala, amio nalaena naikikena, a suri la ne sanene, naṗa sane la akilia awe ke sina ga vilula lala. Ana mepisu mesape popon sane ko m̃ena ga ova omio la nene, ova osum̃a omio la e pogos naṗa la akila suri la nene, ana popon m̃ena ga naṗa visae suri la punu ga naṗa la monar aul e pogos nene, ko ga ovisuvevea. Ana visae okila sanene, ana ṗisi na yeririna la avisu asape ko ope yaru tai naṗa osum̃a okekan make navisaluaena kiena Mosis amio kana ṗelaga la na wa, ana ṗisi na la akilia asape visena naṗa amloge, naṗa pisayu ko, ana pe pe lelaga re poli. ²⁵ Ana e lepas kiena la naṗa pe ape Yu re poli, naṗa la amlelaga rui, ita tepisayu pa suri nene nanua

rui, ana kieta visena la nene nanua tepisa ne, ana imimi mesiri pa e m̃aki tai pa pan la rui. Imimi mepisawal pan la, mepisape la monar avalia tata la naṗa li taṗena lala akila pa kuṗaṗaena ea pa kiela nono la rui, a la monar ve akan re kuruta, pona akan tata na suri mali naṗa kana kuruta pe mlau re poli wa, a yokorena la monar ve akila re ṗelaga viowa, sa naṗa la ataṗa lau, pona kolau.”

²⁶ Ana Pol pa kila ga sa naṗa la apisa, naṗa e legiena taṗena, ana naga ṗere la vari naṗani, ana naga pa kila nalaena naikikena amio la, a naga pa m̃ena ga loyum̃a e Yum̃a Wa m̃ana ne Ntewa amio la, vena loge asape ṗisi na kiela navisaarena naga ṗisi na va tol legiena ve via, ana ṗisi na monar la awar kiela nalaena navisaarena la veve taaga nene e legiena ya. Ana apisape visae legiena ve olua warovia, ana ṗisi na la asiar akila suri la nene.

Atarar Pol mon loyum̃a e Yum̃a Wa m̃ana ne Ntewa

²⁷ Ana e pogos nene, le Yu laṗas asike e Yum̃a Wa m̃ana Ntewa, la nene akom perina e lepas nae Esia la apimi, nanene e yo la naṗa Pol tetelivi e nanua sumo rui. Ana pogos naṗa legiena olua navisaarena kiena Pol la nene lavis ga ṗisi, ana le Yu la naṗa am̃al naṗa Pol m̃eke loyum̃a e Yum̃a Wa m̃ana Ntewa. Ana la

akila pupia m̃aagena, la apa atarar Pol, ana asunyu kare naga pan yeririna lala, ²⁸ la apion pan la, apisape “!Ei, amiu le Israel lala, aiila imimi e yaru nene! !Yaru ke nanene narui naṗa naga suṃa pa make e yo punu ga, ana naga suṃa pisa kare ke ita le Yu lala, naṗa ita yeririna wa kiena ne Ntewa lala, a suṃa pian kare yeririna la pisape kieta navisaluaena amio kieta Yum̃a Wa nini, la pe ape suri re tai poli. Ana imimi mekilia m̃ena ga mesape naga ṗerevinaun ga yeririna laṗasia naṗa la pe ape le Yu re la poli, ana apimi loyum̃a e yo wa na Yum̃a Wa nini. !Yaru nene naga ṗarnena kare manene Yum̃a Wa m̃ana ne Ntewa paṗisi, popon tekila suri tai vania!” ²⁹ Apisa sanini, apisape Pol ṗere yaru naṗa pe pe Yu re poli pimi loyum̃a e yo wa, komin naṗa apisu Pol vanua e mrapa naṗa naga mial ke amio Tropimas naṗa nae Episas, naṗa naga pe pe Yu re poli, ana amape pona Pol ṗere naga pa loyum̃a.

³⁰ Ana la asum̃a akila ke sanene loyum̃a e Yum̃a Wa, ana m̃aagena nene naga pa m̃ena ga ṗar make yo la e pulkumali nene, ana kila yeririna taṗena la akiriri apimi. Apimi aṗuar kare ga Pol, ana aṗere naga pa vanua e Yum̃a Wa nene, ana pogos naṗa la apa vanua rui, ana li wa la akotava ruru e kana mratava kerkeviu ne

lala. ³¹ Ana pogos naṗa asum̃a aṗere Pol pa ke naṗa asape aweṃaria, ana visena pimi tol yaru keviu kiena li na mara lala nae Rom naṗa asike garu Yerusalem, pisape pupia mara kapuru ke gare. ³² Ana yerkawa nene suṃalu veraga, pio kiena yeririna lala, amio kiela yaru na mara lala, ana la akiriri apito tano e yo naṗa asum̃a akila ke pupia m̃aagena nene ea. Ana pogos naṗa yeririna la apisu apisape yerkawa na mara nene pimi tol yo nene, ana la amligan Pol, la pe asu re si poli. ³³ Ana yerkawa nene pimi, pisi pan kiena yeririna lala, pisape ava atarar Pol, ana aviar limana tai va e lala yaru tai, limana taṗena va e lala yaru tai, aviar e sen. Pisi na naga piun tan la, pisape “?Ana yaru nene, naga ai? ? A naga kila ya ne pan amiu?”

³⁴ Ana yeririna la moki naṗa asum̃a apiovion manenea, laṗasia apisape sanene, laṗasia apisape sanene, pa m̃a pa m̃a ga yerkawa nene naga pe mloge kilale re si visena tai e lepas nen ya naṗa la asum̃a akila ke ne, ana naga pisa pan kiena yeririna lala pisape awere Pol wasuṗe va e kiela kove.

³⁵ Ana pogos naṗa asum̃a apa ke e narin mrapa tai, ana mrapa nene ve tokak yokuskusun ga yeririna lala nene naṗa la asum̃a sinelan ke asape asu si Pol wa. Ana

yaru na mara lala aṗure ga Pol pano, ³⁶ ana ṗegas nen yeririna lala asuṃa asirau apimi, la asuṃa apiovionia, apisape “!Aweṃar yaru viowa naṃa! !Aweṃar ga naga mare!”

³⁷ Ana la asuṃa apano, ana lavis ga aimi atol mratava naṗa navaen loyuṃa e lokove kiena ne yeririna na mara la nene, ana Pol piun tan kiela yerkawa, pisape “Awis, ko otaṃan inu neviun suri tai tan ko sumo wa.”

Ana yerkawa nene milan naṗa Pol pis kome Krik pania, pisape “!A, ana ko okilia ṃa naṗa opis kom e Krik! ³⁸ ?Visae ve sanene, nesitom nesape ko ope yere Isip nini naṗa pe yam piavi re poli naga taṗali sape kila politik nene, ana naga ṗere yeririna lala manu vari apa e kiena ṗegas naweena yeririna nene, ana aṗure apa atapolou e yo korena. ?Ko na yaru ne na nene, ne?”

³⁹ Ana Pol pisataṃea, pisape “Ei, peraga, in na nepe yere Yu ke tai nini narui, ana in na nekilia nepisin visena nae Krik komin naṗa in na nae pupia pulkumali naṗa Tasas, e lepas naṗa Silisia. Ana in na sineun nesape neviun tan ko, naṗa ko otaṃan nevisi ke ne va ṗina moki la nene sumo wa.” ⁴⁰ Ana yerkawa nene taṃania, ana Pol suṃalu su metava, ana kuan limana sape ava ruru la, ana la

apimi apa ruru la nenaga paṗisi. Ana naga pisi pan la, pisi nena ga kome visena kiena ne le Yu lala.

22

Pol pisi pa la naṗa asape aweṃar naga mare

¹ Ana Pol pisi pan la, pisape “Wolai lala, amio ata lala, in na sineun nesape ataṃan vena nekilali naṗa nevisa ruru suri make ga van amiu. Ayagogon ruru inu sumo wa.” ² Ana pogos naṗa la amloge Pol pisi ke pan lae kiela visena, naṗa visena nae Epru, la apa ruru la narui, la sinelan asape aloge kiena visena.

Ana naga pisa, pisape ³ “In na yere Yu ga nini, sa ke amiu, a in na nepaeme e pulkumali naṗa Tasas, e lepas nae Silisia. Ana pogos na nepe sisi ke ga wa, in na nepimi e yo nini, e Yerusalem, in na yaru naṗa Kameliel naga pian inu, naṗa akilia ruru naga rui. In na netotano e lana, naga pian ruru inu e navisaluaena punu ga kiena ne kieta yermarua lala, pano pano-o inu towe nepimi nepe navianena tai na navisaluaena nene. A sane amiu nanagane, amiu asitom manene asape akila kia kiena ne Nṗewa imi ve keviu, inu ṃena ga, e pogos la nanua sumo, nekila yum̃aena kiena ne Nṗewa amio kiau malena

wetelu. ⁴ E pogos nene, inu m̃ena ga pe sineun manene re nenaga la naṗa ataveve ke Mrapa Viu nene poli, naṗa nesuṃa neteteliwi ke sanene nakale ke la naṗa la asuṃa ataveveia, ana nesuṃa netarar la, a nesuṃa nokoven la ke apa e yuṃa naloge viowaena, yerm̃ene lala amio sira lala. E pogos nene sineun nesape la monar amarmare ga, a sineun nesape kiela Mrapa nene monar ṗisi vilaga. ⁵ Suri nene, akilia aviun tan ṗarin yaru wa amio kiena nasumonena lala na kiena kumali, komin la akilia ruru inu naṗa nekila sanene. A e pogos nene, la asiri m̃aki laṗasia, vena kila sa naṗa nekilia neva nom̃ene yaru na Mrapa Viu la nene e kiela yo lala.

“Ana e pogos tai, nemla m̃aki tai sanene, ana sineun nesape neto garo tano Tam̃askas vena netarar la nene e yo nene, vena neviar la e sen, ana neligan plan la awasuṗe si aimi e nini vena kieta yerka wa lala la ala nakoena van la.

⁶ “Ana e pogos nene, nemialoro m̃a nepa sane, ana tol kolpae, lavis ga netol Tam̃askas, ana nemilan ga naṗa pupia yomerarava tai pimi veraga tegoli yo naṗa nemial ke nepa ea. ⁷ Ana suri nene kila nemloru nepito tano e porotano, a nemloge visena tai, pisape ‘!Sol o, Sol o! ?Komin ya ne ko okila kare inu ke sanene sa naṗa osuṃa okila ke ne?’

⁸ “Ana nepiun tania, nesape ‘?Ana Suṗe, ko ko ai?’

“Ana nemloge naga pisi ke sina ga pan inu, pisape ‘Yesu nae Nasaret nene, naṗa ko okila ke piowa pania, nene inu ga ne.’ ⁹ Ana la naṗa asike varaun inu e pogos nene, la apisu pupia yomerarava nene, ana la pe amloge re pulgona nene naṗa naga pisi ke pan inu poli. ¹⁰ A siraunia, nepiun ke sina ga, nesape ‘?Ana Suṗe, ṗisi na nekila sanape narui?’

“A Suṗe pisa pan inu pisape ‘Ko osuṃalu, oyali ova ga loyuṃa Tam̃askas rui, a ṗisi na yaru tai iṃasu visawal van ko e yuṃaena la naṗa nemligan ruru ṗisi rui vena ṗisi na oyumuṃaenia.’ ¹¹ Ana nemloge visena nene, ana pe nepisu re si suri poli, komin pupia yomerarava nene kila kilamarau ṗala, ana la atarar ga lum̃au, asumon inu e mrapa, mepa meporu Tam̃askas.

¹² “Ana pe yam piavi re nena ga, yaru nae e yo nene tai pimi pisu inu. Naga pe yaru tai naṗa naga pe yaru kiena ne Ntewa kemua lelaga, a naga mlogear kieta Navisaluena, a kieta le Yu lala nae e yo nene, la apisu naga sane naga pe yaru wo tanea tai paṗisi, a kiena kia Ananias. ¹³ Ana naga pimi suṃalu su lavisi pun inu, ana pisi pan inu, pisape ‘!Wolai Sol, nanagane, nesape kilamaruṃa imi wo sina!’ Ana e ke ga e pogos

nene sa nena nene, ana nekilia nepisu kilale marana ne Ananias nene. ¹⁴ Ana naga pisi ke sina ga pan inu, pisape 'Ntewa Na Mava kiena ne repita lala, naga pisaar ko sumo rui, pisape ko ke narui naña p̃isi na ko okilia kiena nasitomwanena keviu tai, a vena ko ke narui naña ko ovisu kiena Yaru Mesmesu a ologe kiena visena. ¹⁵ Ntewa pisaar ko p̃isi rui, pisape p̃isi na ko ova ovisawal va yeririna lala e yo make ga, suri make ga la naña opisuia a omloge. ¹⁶ Ana nanagane ga ne, ita monar tekila suri tai sumo wa. !Monar osuñalu, monar akee ko e kia kiena ne Yesu, ana kia ga nene kee plan kioñã mlamulena viowa lala, oimi oikiki e marana ne Ntewa!'

¹⁷ "Ana siraunia, in na neñasuñe inu ke sina ga e nini Yerusalem, ana nepa e Yum̃a Wa m̃ana ne Ntewa, sineun nesape nekila leniena. Ana pogos naña nesuñã nemlen ke sanene, nemloge sane kiau sitomena pa kovio, ¹⁸ ana nepisu Suñe pisi pan inu, pisape 'Ovitap̃ili, omolue Yerusalem vilaga, komin la nae e yo nini, visae ko osunyu van la e ya naña inu nekila pan ko, p̃isi na tañatete nena ga alelaga e ko.'

¹⁹ "Ana nepisa pania, nepisape 'Ana Suñe, la akilia ruru inu p̃isi rui, amio ya naña in na nesuñã nekila p̃esania. La akilia m̃aga asape inu ke ga narui

naña nesuñã netetelivi ke e yum̃a lala nalotena kiena ne imimi le Yu lala, a nesuñã nepuarar ke la naña amlelaga ke e ko. A la apisu ke rui naña in na nesuñã nom̃e la nene, a nesuñã nokotawe la ke e yum̃a nakoarena, ana in na nesitom ke nesape la monar alelaga e inu sa naña nepe lelaga ga. ²⁰ A nanua ne, pogos naña kioñã yaru nene Stipen, kana kuruta mlau, la akilia ruru po pañisi naña asape in ke naña nesuñã nemio la e pogos nene narui. Pogos naña la akoveñaria, in na nemiila la, in na nepisuar ruru m̃ala kulkota lala. !La monar alogenu!'

²¹ Ana Suñe pisa ga pan inu, pisape 'Omolue e yo nini, sineun nesape neligan ko ova koperina vañisi, ovanon la naña pe ape le Yu re poli.' "

²² Ana pimi tol aora nene, la naña asuñã amiagogon ke Pol la asuñã amiagogon ruru ga, ana nanagane, kiela sinemimiena e naga pimi ke sina ga, la apisape " !E, popon aweñar ga yaru na piowa lepa ga sanene! ! Ita pe sinetan re yaru na sanene naga mali sike e yomarava nini poli!" ²³ Ana la asuñã apiovion sanene, a la asuñã atatanogin Pol e m̃ala kulkota lala, a la asuñã akoven puluyavi na mrapa pa kar ga e yo punu ga. ²⁴ Ana yerkawa kiena

ne yaru na kilaen mara lala pisape la aurelua Pol vetan p̃ina nene va loyum̃a e kiela kove, a naga pisape alili re naga wa, la aṃareran naga vena alual li suri ya naṃa naga kila p̃ina la sinela kari manene naga sanene.

²⁵ Ana pogos naṃa la apiar Pol p̃isi, la asape awe narui, ana Pol pisa pa kiela nasumonena tai, pisape “?Sanape, mesmesun ga naṃa awe yaru tai sanene naṃa naga sike vatanon navisuarena nae Rom, a naṃa naga pe pali re kumali yam tai poli wa vena la aliṃere ruru naga, pona akilia awe ga naga sa ga nene?”

²⁶ Ana pogos naṃa nasumonena naṃani mloge naviunena kiena ne Pol nene, naga pisape ve awe re si naga wa, ana naga pa pisu kiela yerkawa veraga, pisape “? Ei, p̃isi na ko okila ve sanapen yaru nene narui? Naga sum̃a pisa ke pisape naga sike vatano e navisuarena nae Rom ne.”

²⁷ Ana yerkawa nene pimi si sape visu Pol, viun tania, visave “!Ei, ko na opisa ruru ke ne! ?Ko na osike vatanon navisuarena nae Rom, pona peraga?”

Ana Pol pisatam̃ea, pisape “Ee, in na sanene narui.”

²⁸ Ana yerkawa nene pisa pa Pol, pisape “?Ana ko na sanene na sanape ne? Naṃa in na sanini, in na nopol pupia kilavaru tai ne.”

Ana Pol pisa sanini, pisape “Pona ve sanene yo. Ana inu, ata na sa kemua nene rui, ana in na nepaeme, in na sa ke m̃ena ga nene.”
²⁹ Ana pogos naṃa yaru la naṃa asape awea amloge visena nene, akilia narui asape Pol naga pe yerkawa ta ne sanene. Ana la apur matan veraga, akilia asape taṃatete si awe naga narui, a yerkawa m̃ena ga nene, nanagane naga m̃ena ga marau li laa narui, komin naga yaru na kilaen mara nae Rom, ana naga kila piowa pa Pol rui naṃa naga m̃ena ga sike vatanon navisuarena nae Rom.

La aṃere Pol pa e pupia kumali kiena ne le Yu lala

³⁰ Ana kolulagi, yerkawa kiena ne yaru na kilaen mara la nene naga sum̃a sinenan ke na wa sape popon sa kilia ya ne pe purṃes nen veveyuena nene, ana naga pio yerkawa lala kiena ne yaru wa lala amio nasumonena lala kiena ne le Yu lala, pisape la monar asum̃ate naga gare kiela pupia kumali. Ana naga pisa pisape akila plan sen la e Pol, ana naga p̃ere naga pito garo tano e kumali nene, naga mligan Pol sike likan la.

23

¹ Ana Pol naga tarlua marana pa metava tamaria yerkawa la nene, ana naga pisa pan la, pisape “Wolai lala, e kiau malena wetelu pimi tol p̃ane, e yum̃aena

punu ga kiena ne Ntewa naña nekila, in na pe nemloge re suri tai miyur sineu poli, naña pisape in na nekila pe mesmesu re poli. ! Peraga rui!”

² Ana pogos naña ãarin yaru wa nene Ananaias naga mloge visena nene, naga sinena kari Pol pañisi, a naga pisa pan la naña asike lavisin Pol sape alipa gona.

³ Ana Pol pisi towe laa pan naga narui, pisape “!Ei, ko ovisuar ko, yokorena Ntewa weñar ko na wa! Ko ototano ke e yo na kieta navisaluaena, e yo na nalipereen yaru, ana siraunia ko ke ga naña okilaro si navisaluaena nene narui, naña ko opisa osape la alipa inu sanene. Ko ope kulupopos ga na oteke ne.”

⁴ Ana la naña asike lavisi apisape “?Ei, ko osape poga ga naña ko opisa kare Ñarin Yaru Wa kiena ne Ntewa sanene, pona peraga?”

⁵ Ana Pol pisape “! Ke, lelaga o! Wolai lala, inu nemloge kiena visena, ana pe nekilia re si po laa rui, in na pe nesitom re si nesape naga pe Ñarin Yaru Wa nene poli. Ana sane amiu apisawal ruru pan inu narui, ana nekilia naña nepisa suri pe po re pan poli, komin Visena Wa kiena ne Ntewa naga pisawal ruru rui, pisape pe pe pon re ita tevisi viowa van yerkawa kiena ne kieta yeririna la poli.”

⁶⁻⁸ Ana Pol naga pe kilia re si ya naña yoko naga visa po laa rui, ana naga pisu sane la naña asike loyurña e viorena e pogos nene, la ãasia ape Varasi, a la ãasia ape Satusi. Pegas lua nene asurña apepeyu pañisi, komin Satusi lala apisa ke asape yeririna lala tañatete amal si vetan namarena, ana apisa suri la ne sane navisi lala, pona ninuna lala, apisape suri la nene, pe sur ta sa re nene poli, ana Varasi lala amlelaga e suri la nene. Ana Pol kilia narui, yoko visa sanape ne, ana naga pio yerkawa la nene, naga pisape “Wolai lala, in na nomolue ruru nena e lus kiena ne Varasi lala. Arimau lala la ape Varasi, a inu mēna nepe Varasi. Ana amio Varasi lala, in na nemlelaga naña nesape pogos naña yaru mare, siraunia, ana yoko naga kilia mali sina. Ana nesitom nesape nesurñalu nesu vamo e maramiu nanagane komin naña yaru lañasia asitom ke asape avis van inu komin kiau nalelagaena nene.”

Ana visena kiena ne Pol nene kila Varasi la naña asike e neñe ana la asiar ke sina ga naña apeveyu amio le Satusi la naña asike ne, kila sanene la punu ga naña asike e viorena nene la amlipere la ke sina ga. ⁹ Akila mña sanene pano-o, mñaagena pimi keviu pañisi, a siraunia, navianena lañas e lepas na

puna ne Varasi lala asuñalu, apisi m̃arera pañisi, apisape “Imimi mepisu sane yaru nene naga poga ga, pe suri re ta naña ita tekilia tevisi van naga vanon poli. ?Ana ane kilia, pona pe lelaga ga naña ninuna wo tai, pona navisi tai naga pisi pan yo?”

¹⁰ Ana sinemimiena nene naga pano keviu laa narui, la asu m̃a asitom ke asape asulania, ana yerkawa kiena ne li na mara lala naga pisu sane piowa laa narui, naga maraun sape sa p̃isi la nene akarkare manene laa Pol, ana naga pitetalia kiena yaru lala apito tano, aḡerelua Pol petan yeririna lala, ana aḡere naga pa si e kiela kove.

¹¹ Ana siraunia, kolemalō, Pol pisu naña Suḡe suñalu sike ga lavisinia, naña suñā pisi pania, pisape “Pol, ve omarau re. Ko opisawal ruru inu pan yaru m̃arera lala nae e nini rui, ana sineun nesape p̃isi na ko monar okila m̃a si sanene yam tai, naga nene garu Rom.”

Le Yu laḡasia asape akilali naña aweñar Pol

¹² Ana kolulag, le Yu laḡasia apim vinau ga lele taaga, vena avisayu ve sanape naña akilia aweñar Pol. Ana pogos naña amal mrapa ta narui, ana la apisaar e kia kiena ne Ntewa naña aligan kinanena amio namunena lala, vano-o tol naña la monar aweñar Pol sumo wa. ¹³ Ana la naña

apiranar la e visena nene a naña akila navisaarena sanene, la ataulu yaru la lualima yam vari.

¹⁴ Ana siraunia la apano apisu yerkawa kiena ne yaru wa lala, amio nasumonena lala, ana apisawal suri nene pan la. Apisape “Imimi mepisaar m̃arera pan Ntewa rui, naña imimi mevalian kinanena punu ga vano-o tol pogos naña imimi mekilia moweñar yaru nene. ¹⁵ Ana sinemimin mesape aiila imimi, naña amiu amio la naña e kieta kumali, amiu aligan visena vano van yerkawa kiena ne yaru na mara la nene, avisave naga were si yaru nene vato si garo tano kumali, avisa kotalia ga naga avisave asitom asape avisuveve sina visena la nene. Ana imimi mesuñate ga e mrapa, a pogos naña atomi, moweñaria, naña naga sike perinan kumali wa.”

¹⁶ Ana siraunia, narina ne vinena Pol tai, naga mlogewal naña asuñā apisayu ke asape p̃isi na la akila ve sanene ve sanene, ana sisi nañani pa mesmesu ga e kove kiena ne yaru na mara lala, pa pisawal suri nene pa Pol. ¹⁷ Ana Pol pio yaru na mara la tai, naga pisape “Ei, awis, ko oure yaru viu nene vano visu kiamiu yerkawa, naga kilia ke sur tai naña popon yerkawa nene naga monar loge.”

¹⁸ Ana naga ḡere mearu kiena ne Pol nene pa puna ne kiela yerkawa, pis pania,

pisape “Pol naḡa sike garo e yum̃a nakoarena, naga pisape noure kiena mearu nene im̃asu visawal suri tai van ko.”

¹⁹ Ana yerkawa nene naga tarar limana ne yaru viu nene, ḡere yapen ga pa sanene, ana piun tania, pisape “?Ana ko ositom osape ovisa ya ne van inu?”

²⁰ Ana mearu kiena ne Pol nene pisa plan pania, pisape “Ko opisu ke ne, yerkawa kiena le Yu lala apisirilua kiela sitomena ta rui, naḡa asape aweḡar meruou naḡa, Pol. La apisa rui apisape yoko aligan visena im̃asu van ko, asape la sinelan avisuveve re laa visena la nene e lepas nene wa, ana aviun tan ko vena peni, ana oure si Pol vitove garo e kiela kumali. ²¹ Ana pe pon re naḡa okila sanene poli, komin naḡa la asum̃a akila kokan ke ga nene. Apisa ruru rui apisape pogos naḡa visae asike mrapplepa, ato ke garo tano, ana lala lualima yam vari nene awulan amiu, aweḡar meruou nene. La nene apisaar pa Ntewa rui apisape yoko aligan kinanena amio namunena vano-o avisu naḡa sane la aweḡar naga ḡisi, a la nene na asum̃ate amiu ke rui, vena visae otam̃an naḡa amiu ato si garo tano.”

²² Ana yerkawa nene, pisa pan mearu kiena ne Pol nene, pisape “Poga, ana nevisa mesmesun van ko, ve ovisawal re si van yaru tai

naḡa ko opimi opisawal suri nene pan inu. Ana potena paḡisi, ko okilia ova si um̃a narui.”

Amligan Pol pano pan ḡarin suḡe tai nae Rom garu Sisaria

²³⁻²⁴ Ana yerkawa kiena ne li na mara la nene naga pio kiena yaru lua, naga pisa sanini, pisape “Suri lala naḡa e lepas na yaru nene naḡa Pol, la apimi m̃arera paḡisi. Nanagane, yoko in na neligan naga va e limana ne kieta ḡarina suḡe naḡa Vilikis, naḡa naga sike garo tano Sisaria. Amiu lua, akila ruru ḡegas tai na kieta yaru na mara lala, vena amiu akirakirava ruru wo e Pol, amiu aure naga vito garo tano. Amiu akilia aure yaru na mara la ve ponotia ve lua, amio la lualima yam olua naḡa la akus wosi, amio si la tol ponotia ve lua naḡa la awar pupia kalie na mara lala. Ana akus m̃ena ga wosi kiena ne Pol tai vena naga kilia va totano ea. In na sineun nesape aligan kotap̃a kolemallo, e pogos naḡa yemalolo rui.”

²⁵ Ana yerkawa nene siri m̃aki tai vena alarar amio la avano, naga siri sanini, pisape

²⁶ “Maki nini, inu Klotias Lisias, naḡa nesiri pim̃asu pan ko, Parin Suḡe Vilikis, naḡa ko ope yerkawa nae Rom naḡa ko opisuar ke kieta pupia lepas nene. ²⁷ Inu nekekara

keviu naña nevitawe ko sina e mñaki nini.

Yaru naña aþere pimãsu pan ko nene, kiena suniena nena sanini: sumo, le Yu lala nae e nini atarar naga, lavisi aweñaria. Ana sirau-nia, nemlogewal naña naga sike vatanon kieta navisuarena nae Rom, ana imimi mepato garo tano, ana meþerelua naga petan limana ne le Yu la nene. ²⁸ Ana sineun nesape nekilia ya naña naga pe miasin suri nene, ana neþere naga pito e kiela kumali keviu. ²⁹ E pogos nene, nepisu naña naga pe kila re sur tai naña torokin aweñar naga poli, pona ala nakoena vania, ana nepisu sane la asumña apepeyu ke amio naga e ga e lepas na navisaluaena na kiela nalotena ga.

³⁰ Ana siraunia, visena tai pam tol inu, pisape apisayu rui a añal mrapa rui vena akilayonli sina vena aweñaria mare. Ana nepisu sane popon vena nevitetalia naga iñasu punña vilaga, ana nepisawal mēna ga pan la naña sinela kari naga, nesape la monar aimãsu avisawal suri la naña la asitom ke asape

aliþere naga vanonia e maramña.”

³¹ Ana li na mara la akila sa naña kiela yerkawa nene pisa, ana kolemalo la aþure Pol, ana pupia þegas nene amligan yo Yerusalem, apano atol yo garu Antipatris. ³² Ana kolulag nena, yaru na mara la naña amial ga, la aþasuþe la sina apa ma Yerusalem, ana la naña la akus wosi, lala amio ke Pol na wa, la apito ke sina ga e kiela mrapa, apito garo Sisaria.

³³ Ana pogos naña apimi aporu e yo nene amla mñaki nene pa þarin suþe nene narui, a siraunia aþere Pol, apano amligan naga sike e limana. ³⁴ Ana þarin suþe nene pulo mñaki naþani þisi, ana naga piun tan Pol, pisape naga pe yaru nae lepas nape. Ana Pol naga pisape naga pe yaru nae ga yo garo Silisia, ³⁵ ana þarin suþe nene naga pisa sina, pisape “Ana poga ga, ita monar tesuñate ga yaru la naña yoko avis van ko, ana pogos naña aimi, ana nouarar visena nemio amiu.” Ana naga pisa pan kiena yaru na mara lala, pisape “Yaru nene naga kilia sike amio ita na wa e yurña marua mñana ne Parin Suþe Erot nene, naña ita tesike e nanagane, ana amiu akirawo ruru naga ea.”

24

Le Yu lala la apimin apisape avis va Pol e marana ne Pilikis

¹ Ana Pol sum̃a ga sanene, tol legiena lima p̃arovia, ana siraunia, p̃arin yaru wa nae Yerusalem na p̃a Ananias pitomi garo tano Sisaria, naga amio nasumonena ta p̃ena lala kiena ne le Yu lala, amiowar ke yaru na navisaluaena tai, vena naga visi kiela, kiena kia Tetalas. Ana la nene apa apisu Parin Su p̃e Pilikis vena avisawal suri la punu ga na p̃a la sinelan asape avis va Pol vanonia. ² Ana la apio m̃ena ga Pol pimi loyuma, ana Pilikis mla pog pa Tetalas vena naga kilia vietava e kiela visena.

Ana naga pisi pa p̃arin su p̃e na p̃ani, naga pisape “Parin Su p̃e Pilikis, imimi mekekara pa p̃isi na p̃a mesum̃alu mese maram̃a p̃ane, kom̃in mepisu na p̃a ko osum̃a opisuar ruru imimi po pa p̃isi. Siar e pogos na p̃a ko opuarar ke yum̃aena nene, pimi tol nanagane, kio m̃a manmaruaena naga kila sum̃are wo sike e purvanua nini, a ko osum̃a okila ke suri ṽiu la moki vena iilaen yum̃aena e yo nini. ³ Sanene, mepisa potena keviu pan ko na p̃a silaga osum̃a okila ke po pan imimi sanene. ⁴ Ana ko, kio m̃a yum̃aena moki, pe pon re mekila kare ko e kiamimi visena la ve moki poli, in na sineun nesape neviun tan ko vena ko owo van imimi, oyagogon kiamimi narin visena tai na p̃a plas laa ga.

⁵ “E lepas kiena ne yaru

nene, mepisu sane naga pe p̃arkawa towe laa sane. Naga sum̃a telivi ke p̃iora e le Yu lala e purvanua ta p̃ena lala, a e yo punu ga na p̃a naga pa ea, ana naga kila ke yaru la apia p̃a a apeveyu. A naga pe nasumonena na p̃egas kiena ne yaru la na p̃ani, na p̃a apisape naga molue garu Nasaret, na p̃a pona naga pe nalotena ta p̃ena, pona visae peraga, la asum̃a akila ke ga politik yo.

⁶⁻⁷ A pogos na p̃a yaru nene pimi sike garu Yerusalem, naga kila piowa pano pano o p̃isa, naga sinenan pisape kila kare sur wa na kiamimi Yum̃a Wa nene, ana kila narui mepa metararia. ⁸ Visae ko oviun ga tania, p̃isi na okilia ologe sur la na p̃a imimi mepisa naga pe lelaga nena ga.”

⁹ Ana pogos na p̃a naga pisi ke sanene, le Yu ta p̃ena lala la asum̃a asisilin p̃arila, la asum̃a apisa ke apisape “Naga ke nene narui, sa ke ga nene, lelaga p̃a.”

Pol pisata m̃e la

¹⁰ Ana siraunia, p̃arin su p̃e nene naga kira p̃isu Pol, naga mla pog tai pania vena naga kilia la kiena navisatam̃eena. Ana Pol pisape “Parin Su p̃e Pilikis, sa na p̃a ko okila m̃a nalip̃ereena pan imimi e purvanua nini e kas moki p̃aro pa rui, in na nekekaran na p̃a nesum̃alu nese maram̃a vena nekila kiau navisatam̃eena. ¹¹ Nesape nevisa ga van

ko sanini, in na nepa m̃a Yerusalem nanua ga ne. Visae oviun ruru tan yaru lala, p̃isi na olual naṣa sane in na nepa e yo nene vena neva ga nelen e Yum̃a Wa m̃ana ne Ntewa, pe tol re legiena lualima taaga pa vari po laa wa. ¹² A pogos naṣa nesike e yo nene, pe apisu re naṣa nekila suri tai poli. In na pe nepepeyu re nemio yaru tai poli, a pe nepisa re pa yaru lala nesape akila suri tai poli. E Yum̃a Wa m̃ana ne Ntewa, pona e yum̃a na leniena lala, pona e pulkumali e nape, ana in na pe nekila re nena suri tai poli. ¹³ A sur la naṣa apisa mare ga pan ko nanagane, apisape in na nekila sanene sanene, naga nene na visena na kiela p̃egas ga nene, ana la pe apisa re suri tai pan ko poli vena iilaen kiela visena nene, vena kila na ko ovisu sane kiela visena nene na pe lelaga.

¹⁴ “Ana sur taaga ga nekilia netam̃ania, nekilia nevisa van ko nevisave lelaga, in na nekila kemua naga nene. Sur nene, naga sa naṣa in na nesum̃a netaveve ke Mrapa Viu nene, naṣa la apisape naga nalotena taṣena. Ana naga pe sa re nene poli, komin naṣa e Mrapa nene, imimi mesum̃a memlotun ke Ntewa taaga ga, naga pe Ntewa kiena ne repimi marua lala na sumo, a mesum̃a memlelaga ke ga e

sur la naṣa kiamimi navisaluaena pisa, pona naṣa kiamimi navisawalena lala la asiria. ¹⁵ Ana tayeve suri la nene, in na neṣasine ga Ntewa, maran taaga sa ke ga naṣa la m̃ena ga apisu ga naga, asape p̃isi na naga kila yaru la make ga am̃al ke sina ga e marena, naga nene na la naṣa la amesmesu e marana, a la naṣa la pe amesmesu re e marana poli. ¹⁶ Ana komin naṣa nekilia m̃a nesape p̃isi na Ntewa kila sanene, in na pe nesitom re nena nesape nekila p̃elaga viowa tai sanene poli, ana e pogos punu ga, in na noṣaryo pap̃isi vena narin suri tai ve yur inu re pogos tai visave in na nekila ke piowa e marana ne Ntewa pona e mara yeririna lala.

¹⁷ “Ana kas laṣasia p̃aro pa rui, in na nepa nesike e purvanua taṣena lala, ana siraunia, nanagane ga ne, in na neṣasuṣe inu ke sina ga nepimi Yerusalem. Ana yaru nae gare lala, la akuwan nalaena tai vena iilaen kiamimi yeririna lala nae Yerusalem, ana in na noṣar nalaena nene nepimi, neṣar pan la, a in na sineun nesape neva nekila ke m̃ena ga kuṣapaena laṣasia e Yum̃a Wa m̃ana ne Ntewa. ¹⁸ Ana pogos naṣa nesike e Yum̃a Wa, nekila kuṣapaena na ikikiena rui, ana la nene la apimi apisu inu. E pogos nene, pe yaru taṣena re la asike amio inu

poli, a pe visena re poli pona m̃aagena re nena poli, peraga, ana siraunia, le Yu laṗasia nae Esia apimi, ana la ke nene narui naṗa asiar veveyuena nene. ¹⁹ Ana la nene naṗa ape purṗes nen sur nene, visae la asitom asape in na nekila sur tai piowa, ana popon visae la m̃ena asike amio ita e nini nanagane vena la avisawal li van ko, ana pe noṃal la re poli. ²⁰ Visae peraga, popon oviunli tan yaru taṗena la ne asike ne, ovisave pogos naṗa la aṗere inu nepa e kiela kumali, aṃal sane in na nekila ya. ?In na nekila ya ne pe mesmesu re poli, pona nepisa visena ya naṗa piowa? In na pe noṃal re poli. ²¹ Ana visena taaga ga naṗa nepisa, nepisa sanini, nesape: Inu na nepisu sane sinemiun asape avis van inu ṗane, komin ga kiau nalelagaena nene, naṗa pisape pogos naṗa yaru mare, ṗisi na, naga kilia mali ke sina ga. Nepisa visena nene ṗisi, ana kila la ga asum̃a apeveyu ke sina ga pan la.”

²² Ana Parin Suṗe Pilikis nene, naga kilia towe m̃a sur moki rui e lepas na Mrapa Viu nene, ana pogos naṗa naga pisu sane veveyuena nene, le Yu lala amio Pol akila vanon ga sur nena ga la nene, ana naga kalo nena visena, pisape “Poga ga, ṗisi na ita tesum̃a e nini sumo wa. Pisi na nesum̃ate ke ga yerkawa kiena

ne yaru na kilaen mara la nene Lisias vena kom ma Yerusalem vitomi neloge ruru kiena visena nene wa, ṗisi na nela kiau naliṗereena van amiu.” ²³ Ana naga pisa pan kiena yaru na kilaen mara lala, pisape la atarar ga Pol, apisuar naga, ana naga pisape ve akila manene re m̃arera vania, la monar ataṃan naga yaloro m̃aga, a ve avisaluṗar re kiena erau lala vena aimi ayaliali naga avisuarua.

Pol pisayu Yesu pa Pilikis amio wona

²⁴ Ana Parin Suṗe Pilikis, naga wona sira re Yu tai, kiena kia Trusila, ana lalua nene la sinelan asape asun re amio Pol wa. Ana legiena laṗas ṗarovia, ana lalua apimi e yo naṗa Pol sike ea, ana aṗere Pol pimi pula, ana Pol pisi amio lalua, naga pisayu kiena nalelagaena naṗa e Kristo Yesu. ²⁵ Ana Pol mligan visena la moki la sane pan lalua, naga sitom ṗele la ga, naga pisayu sanape naṗa yaru monar kila ṗelaga mesmesu, a naṗa yaru naga monar kawē ruru kiena malena mesmesu, a pisayu m̃ena ga naliṗereena kiena ne Ntewa naṗa ṗisi na imi e Legiena Maro. Ana pogos naṗa Pilikis mloge visena la nene, naga mloge sane miyur manene kiena sitomena paṗisi, kila narui naga marau towe laa sane, ana naga pisa pa Pol, pisape “Poga ga, toroki narui.

Ko ova si loyum̃a e nene sumo wa, ana visae nelual si kiau pogos tai, p̃isi na neligan si visena viṃasun ko.”²⁶ Ana pogos naṓa Pilikis pisa visena nene, naga kiena sitomena viowa ṃena ga tai toṃa ga, naṓa naga sitom ke pisape p̃isi na Pol naga war kilavaru keviu tai vania, vena kilia visa va Pol visave Pol kilia molue sina. Ana kiena sitomena nene kila narui naga mligan luen ga visena panon Pol, a naga sum̃a sun amio naga yam mokliu.²⁷ Ana naga kila ṃa sanene panoo tol kas lua, ana naga p̃isin kiena yum̃aena nene. Ana naga pe tam̃an re Pol molue si e yo naṓa apuarar naga sike e poli, komin naṓa naga sinenan pisape kila le Yu la akekarar naga. A siraunia, yaru taṓena tai pimi kus lelenena ne Pilikis nene, kiena kia Posias Pestas.

25

Pol pisape Sisa ga naga monar liṓere naga

¹ Ana p̃arin suṓe viu nene Pestas, naga pimi garu Sisaria, pimin vena visuar kiena lepasia nene, ana siraun naṓa legiena telu ga p̃arovia, ana naga pisu naṓa naga monar vavini visuveve yo ma metava Yerusalem.² Ana pogos naṓa naga pa tol yo nene, ana naga piora amio yerkawa lala kiena ne yaru wa lala, amio yerkawa taṓena lala kiena ne le Yu lala, ana apisa kare Pol

pania. Ana am̃areran pania,³ apisape visae naga sitom sape kila suri wo tai van la, ana lala sinelan naga ligan Pol wasuṓe sina imi pula, vena la akilia aure naga va kumali avis vania. La apisa sanene, ana la asum̃a asitomwan ke rui asape visae Pol imi, ana la ava asum̃ate naga gare, a vena awem̃ar ga naga mare ṃeke mrapa komsusia.⁴ Ana Pestas pisape “Poga ga, ana ve ve piavi re inu ṃena nowasuṓe sina neva garu Sisaria, naṓa la asum̃a atarar ke yaru nene sike ea.⁵ Sanene, ana amiu yerkawa laṓasia, akilia ataveve inu teto garo ne, tevisu ve sanape. Visae yaru nene kila suri laṓasia naṓa pe mesmesu re poli, ana tekilia tekila kana visena nena e pogos nene.”

⁶ Ana Pestas sike amio la gar Yerusalem pe tol re legiena lualima yam taaga pa vari poli, ana naga pito si garo Sisaria, amio yaru laṓas naṓani. Ana e ga e legiena na siraunia, naga pa totano ke e kiena yo naliṓereena, ana naga pisape avano aure Pol imi.⁷ Ana pogos naṓa Pol pimi loyum̃a, ana le Yu la nae Yerusalem naṓa ataveve Pestas apimi, asum̃alu asu, ana asum̃a apisawal ke pupia suri viowa la moki liu naṓa apisape Pol naga kila, ana kiela visena la nene pe sum̃alu re nena ga.

⁸ Ana pogos naṓa Pol sinenan sape la kiena navisa-

tam̃eena, naga tero plas ga, pisape “In na pe nekila re nena suri tai poli, naŋa nekilaro navisaluaena kiena le Yu lala, a pe noŋarnena kare re Yum̃a Wa nae Yerusalem poli, a pe nekilaro re m̃ena ga navisaluaena kiena ne ŋarin suŋe nae Rom poli, naŋa Sisa.”

⁹ Ana Pestas nene, naga sinenan sape le Yu lala la aloge wo e naga, ana naga sitom sape kilayonli kila ve sa naŋa la apisa pania, ana piun tan Pol, pisape “? Sanape, pona popon neure ko teva nevisi ga van ko ma kumali nae ma Yerusalem, ana yoko ko osuṃalu sina ga ose marau e yo nene yo?”

¹⁰ Ana Pol pisatam̃ea, pisape “Nanagane, e yo nini, in na nesuṃalu rui nesike e maraṃa, ko yaru nalip̃ereena navisaluaena kiena Sisa nae Rom. Visae suri nakilaena tai van inu, ana yo ke nini narui naga mesmesun ga naŋa ko okila. ?Ana yoko nevavin si ya ne ma Yerusalem ne? Ko opisu kilale rui naŋa e lepas kiena ne le Yu lala, ana pe kiela visena tai suṃalu re nena e inu poli, peraga. ¹¹ Ana visae ko opisu nekila suri tai piowa torokin naŋa monar nemare vanonia, ana poga ga nene, in na pe nekilayonli re naŋa noure vetan poli. Ana visae la nene, pe kiela visena re si tai naŋa kilia suṃalu suṃa poli, ana pe mesmesu re nena naŋa ko oiila inu nowasuŋe sina

neva e limala vena la akila ya naŋa la sinelania van inu. Ana nanagane, sa naŋa nekilia nekila, sane nesike vatanon navisuarena nae Rom, ana nepisa ruru ga pan ko nesape sineun Parin Suŋe Sisa nae Rom, naga ga monar liŋere inu.”

¹² Ana visena nene kila Pestas pano pis amio kiena kansel la sumo wa, ana sir-aunia, pimi sina ana pisape “Ko opisa rui opisape sinom̃an Sisa ga liŋere ko. Ana nepisape poga ga, yoko osuṃalu ga ose marana ne ŋarin suŋe nene narui.”

Pestas sunyu Pol pan suŋe keviu taŋena nene Akriŋa

¹³ Ana siraunia, legiena laŋasia ŋaro sina, ana suŋe keviu na yo taŋena tai pimi garu Sisaria. Naga kiena kia ne na nene, Akriŋa Nalua, ana naga pimi amio vinena naŋa Penis. Lalua amloge naŋa Pestas siar ga kiena yum̃aena na wa naŋa pe ŋarin suŋe nae lepas nene, ana la sinelan asape aimi aialialia. ¹⁴ Ana la lua asike e yo nene panoo, ana yam moki naŋa la asuṃa asun amio Pestas nene, ana legiena tai, ana Pestas sunyu ga lepas na puna ne Pol pan lalua. Naga pisa pan la lua, pisape “In na kiau yaru tai suṃa e kiau yum̃a nakoena, naŋa sike e limana ne Pilikis nanua sumo rui, sumon naŋa nepimi e nini. ¹⁵ Ana siraun naŋa nepimi, ana nepa ma Yerusalem, ana

yerkawa kiena ne li wa lala, amio nasumonena tařena kiena le Yu lala, la apimi apisayu yaru nene pan inu, la sinelan asape nevisawal kiena naliřereena tai vana. ¹⁶ Ana nepisa ruru pan la, nepisape tařatete nekila ga sanene, ana monar noure lepas luwoka aimi lele taaga sumo wa, ana la nařa akila navisawalena, monar avisawalia e marana yaru nařa akila ke navisawalena pania, a monar nela pogos van yaru nene vena naga m̃ena la kiena navisatameena. Nepisa pan la nepisape kiamimi řelaga na navisaluaena nae Rom naga sa ke nene narui. ¹⁷ Sanene, in na neřasuře sina nepimi e yo nini, ana le Yu lala la akom ma Yerusalem apitomi vena mekila visena. Ana pogos nařa nekilia nesape la apimi atol yo nene ko yepekilavi, pe nemla re si pog tai pan la poli, ana kolulag ga, nepa netotano e yo naliřereena, ana nepio yaru nařa Pol pimi loyuma. ¹⁸ Ana pogos nařa le Yu lala asumalun navisawalena suri lala na yaru nene, inu nesitom nomape yoko neloge pupia suri viowa lařas nařa la apisape naga kila, ana nanene na peraga. ¹⁹ La apisa ga narin suri lala e ga e lepas na kiela nalotena, nařa la asumia apepeyun ke amio yaru nene. Naga nene e ga e lepas na kiela řelaga marua ga lala, a e lepas na yaru tai, kiena kia

Yesu, nařa naga mare rui, ana Pol sumia pisa ke pisape naga mali sina. ²⁰ Ana la apisayu ke suri la nařa pe nekilia re nena poli, ana nemninue kare narui nesape ařia yoko nekila ya ne, ana nepiun tania nepisape visae naga sinenania, wasuře si va ga ma Yerusalem, vena la akila ga kiela visena e yo nene. ²¹ Ana siraunia, yaru nene pisape peraga, ve va re sanene, ana naga sumalu pisape sinenan pisape Parin Suře ga Sisa naga liřerea. Naga kiena visena nene kila netarar naga sike e yo nini na wa, vena nelual mrapa tai neila naga va garu Rom, vena Sisa naga visuvevea.”

²² Ana Akriřa pisa pan Pestas, pisape “Ana inu m̃ena sineun pařisi nesape neloge re visena kiena ne yaru nene.”

Ana Pestas pisape “Poga ga, peni ga na amlua asun.”

Pestas řere Pol pimin vena Akriřa yagogonia

²³ Ana kolulagi, akila suri punu ga su ruru sike e kiela pupia yumia na viorena tai, la akila sane pe pupia suri tai. Ana suře keviu nene Akriřa la lua vinena nene Penis, la lua apimi nařa amiyowa ruru la rui, ana apimi loyuma nařa yerkawa kiena li na mara lala amio yerkawa tařena lala la amiyal ke varaun la. Ana la akila suri punu ga pa la lua nene sa nařa la akila ke e pogos keviu la

ne sanene. La akila m̃a pano-o, ana siraunia, ana Pestas pisape aure Pol imi loyuma. ²⁴ Ana la aṗere pimi, ana Pestas pisi narui, pisape “A Parin Suṗe Akriṗa, amio yerkawa taṗena lala naṗa tesike e nini ṗane, nanene yaru ne nanini narui naṗa le Yu lala la apim apis pan inu vanonia. Garu Yerusalem, a e yo nini, la apimi apiun m̃areran tan inu apisape neliṗere naga, asum̃a apisi keviu apisape yaru nene, naga pe ṗon re si mali va re laa sane poli, la sinelan asape naga monar mare ga vilaga. ²⁵ Ana nepisuveve suri nene pano-o, pe noṃal re sur tai naṗa torokin naga mare vanon poli. Ana siraunia, yaru nene naga m̃ena piun pisape kieta ṗarina suṗe keviu nae Rom, naga ga liṗerea, ana nanagane nesuma nepisuveve nesape yoko monar neila naga va ga e limana ne Siṣa narui. ²⁶ Ana monar nesiri m̃aki tai va amio yaru nene va van kieta ṗarina suṗe nene, ana pe nekilia ruru re m̃ena nesape am̃a nesiri ya ne te m̃aki nene wa. Nanini narui, nekekara naṗa neṗere naga piṃasu vena suṃalu se maram̃a, Suṗe keviu Akriṗa, amio amiu yerkawa taṗena la nene, vena ita tevisuveve ke sina ga kiena visena la nene, pona amiu akilia aiila inu navisaen ya naṗa nesiri te m̃aki nini. ²⁷ !Pe popon re neligan yaru nene va e pupia

naliṗereena nene poli, naṗa pe nepisawal ruru re visena ya naṗa kila narui nemligan naga pano!”

26

Pol pis e marana Parin Suṗe Akriṗa

¹ Ana Akriṗa pisa pa Pol, pisape “Poga ga, nela pog van ko narui vena osunyu ko e lepa na suri la nene.”

Ana Pol koan limana sanene, ana siar kiena visena narui, vena la navisatameena na suri la nene. ² Ana pisa sanini, pisape “Parin Suṗe Akriṗa, nepisu sane po paṗisi naṗa nekilia nesum̃alu e maram̃a ṗane, vena netaṗali naṗa nela navisatameena laṗasia e visena la naṗa le Yu lala akila pan inu. ³ Nepisa visena nene komin naṗa ko ke narui, okilia ruru kieta ṗelaga ita le Yu la rui, a okilia ruru m̃ena suri la naṗa pogos punu ga kieta yeririna lala asum̃a apepeyun la ke vanon rui, a naṗa la asum̃a amliṗere la ke vanonia. Ana inu nepiun tan ko vena ko ve ṣinem̃a kar inu re, komin naṗa yoko kiau suniena naga tawa manene e suri la ne sanene narui, a ve piavi towe m̃ena ga.

⁴ “Kiau suniena naga siar sanini, sane inu, nesiar e pogos naṗa nepe nisisi ke ga wa, nesu luen ga nemio le Yu lala, nanene e kiau yo, ana siraunia, garu m̃ena Yerusalem. Ana lala la akilia ruru kiau ṗelaga

lala nanua rui, a akilia m̃a naṗa pogos naṗa nepe yaru viu ke ga wa, ⁵ ana nesikol inu e ṗegas kiena ne Varasi lala, naṗa la ke narui naṗa atarar manene kieta navisaluaena taulu ṗegas taṗena lala. Ana visae la m̃ena ga akekarar naṗa la asum̃alu ase maram̃a, ana yokorena la akilia avisawal li van ko, avisave suri naṗa nepisa ke ne naga pe lelaga puṇu ga.

⁶ “?Ana komin ya ne la sinela kar inu si sanene? Nanene komin naṗa nesum̃alu m̃arera nesike e navisaarena tai naṗa Ntewa naga kila pa repita lala nanua sumo rui, naṗa pisawal sape naga yoko kila yaru la naṗa amare amal sina. ⁷ Ana navisaarena nene, kieta lus m̃ena ga la lualima taaga pa lua [12] nene la asum̃a amlen ke ko legiena a kolemallo vena yoko la akilia atolia. !Parin suṗe, opisus ke ne! Sur nene Ntewa naga pisaar pan le Yu la rui, ana le Yu lala sinelan asape avis si van inu komin nemlelaga ea. ⁸ ?Pe nekilia re poli, ana komin ya narui naṗa yaru la nene asum̃a asitom ke asape Ntewa naga taṗatete si kilia kila yaru naṗa mare rui naga mali sina?

⁹ “Ana pe lelaga, nanua sumo, in m̃ena sa ke ga nene, pe nemlelaga re e suri la nene poli. Na nanua na, in na sineu kar laa

la naṗa amlelaga e Yesu nae Nasaret paṗisi, a nepisu sane monar nekilali m̃arera vena nekila kia nene vito tano. ¹⁰ Ana garu Yerusalem, nesum̃a nekila suri moki sanene. Yerkawa kiena ne li wa lala, la atam̃an pan inu, ana nepa nekila nalelagaena wa la nene, la moki naṗa apa e yum̃a nakoena, ana pogos naṗa la amlipere la asape monar la amare, in m̃ena ga nesike loyum̃a ea. ¹¹ A nesum̃a netetelivi e yum̃a na leniena lala, pogos puṇu ga nesum̃a nekila ke piowa pan la, a nesum̃a nekilali la m̃ena ga, nesum̃a nekilayon naṗa vena la aviuelin kia kiena ne Yesu. Ana nesum̃a nekila m̃a sanene pano-o yepeu pisunun paṗisi, ana nom̃ene plan la apuretetai apeve taaga e purvanua taṗena lala, ana siraunia, nepanon la ke sina ga e kumali la naṗa la apa asike e la.”

Pol pisayu sanape naṗa Yesu paemenia

¹² Ana Pol sum̃a sun pano-o, pisape “Ana e pogos tai, nesum̃a nepito ke garo Tam̃askas vena nekila ke sina ve sanene van la naṗa asike e yo nene. Yerkawa kiena ne yaru wa lala, la amiila inu nepitove, a la amla m̃aki pan inu naṗa asape nekilia nekila sanene. ¹³ Ana mesum̃a memial ke mepato garo tano, ana kolpae ga, nepisu pupia yomerarava tai metava ma e

peni, naña tego taulu mrae, ana yomerarava nene tegoli nena yo naña mesike ea. ¹⁴ Ana yomerarava nene naga merarava keviu sanene narui, naga kila imimi mekekapil mepito tano e porotano, ana siraunia, nemloge pulgon yar tai, pis pan inu pis ga kome visena nae Epru, naga pisape ‘Sol o, Sol o! ?Komin ya ne ko osum̃a okila kare inu ke sanene sa naña ko osum̃a okila ke ne? Ko osum̃a lam̃a te p̃ataun inu ke sanene, ana kila lam̃a mlaea p̃isa.’

¹⁵ “Ana nepiunia, nepisape ‘?Ana Suñe, ko a nene?’

“Ana Suñe pis ke sina ga pan inu, pisape ‘Yesu naña ko osum̃a okila ke piowa pania, nane in ne nanini narui. ¹⁶ Ana osum̃alu sina, komin naña yoko oyum̃ae kiau. In na nem̃alivin ko sanene komin suri nena nene narui. Pane opisu kilale inu sane ovisave in na ai, a siraunia, yoko ovisu inu nesum̃a nem̃alivin ko e suri la ve moki e legiena lala naña pimi ke sirau. Suri la naña nepian kon ke ne, naga ke narui naña ovano ovisawal van yeririna lala. ¹⁷ Ana yoko ovanon ovisawal va le Yu lala, a va m̃ena yaru tañena la naña pe ape le Yu re poli, ana p̃isi na ovisu naña la nene, yoko akila viowa van ko, ana ve sinem̃a pepe re, yoko nem̃alivin ko e pogos la ne sa nene, vena netamalia ko.

“ ‘Nanene narui, nevite-talia ko ovanon la nene, ¹⁸ vena ovikepa kilamarala, vena ovilon la amolue vetan yemalolo naña la asike ea, aim e yomerarava, a vena aligan m̃areraena kiena ne Yermare sike na, aim ga puna Ntewa. Ana pogos naña aviawa ga e inu sanene, ana yoko Ntewa viewo kiela mlamulena viowa lala, a yoko naga sikol la e p̃egas nen kiena li wa lala.’ ”

Pol pisayu kiena yum̃aena

¹⁹ Ana Pol pis ke na wa, pisape “Naga narui, Suñe Akriña, pogos naña nepisu pupia suri naña molue ma e peni pitomi e inu, in na tañatete si nekila sur tai narui, ana nemlogear ga visena kiena ne Suñe narui. ²⁰ Ana nepa Tam̃askas sumo, nemlologon pa yeririna lala, nepisape monar avilopu la ava puna Ntewa, a kiela malena monar awo make nena ga, torokin navilopuena nene. Ana sirau-nia, nepa ke sina ga ma Yerusalem, nemlologon ke sina ga sanene pan la, sirau-nia nepa nekila sanene e kumali tañena lala e lepas nae Yutea, a siraunia, nepa kar ga e yo kiena ne la naña pe ape Yu re poli, nemla ke ga visena maran taaga sanene pan la. ²¹ Ana komin ga kiau yum̃aena nene narui, kila le Yu lala apimi atarar inu loyum̃a e Yum̃a Wa M̃ana ne

Ntewa, ana la sinelan asape aweñar inunia.

²² “Ana pimi tol ãane, naiilaena ga naãa pimi kome Ntewa naga suña amio inu silaga, a nanagane nekilia nesuñalu nese maramiu amiu yerkawa lala, a amiu li taãena mñena ga lala, a in na kiau pulmas nini naãa nekilia nevis van amiu. Ya naãa Mosis amio navisawalena lala apisa nanua nanua sumo rui, la apisape yoko ve sanene ve sanene, ana suri ga nene, nane nesuña nepisawal ke pan amiu nanagane. ²³ Naga nene naga sanini, naãa Navisaarena, pogos naãa naga imi mñalivi, ana yeririna lala monar akila viowa vania, ana siraunia, yoko naga ve yaru naãa naga mal ãesania petan marena. A kiena nasuñalena si nene petan marena, ana suri ne nanene narui ve mrapa nawaren yomerarava na tamaliaena imi tegoli yeririna la punu ga, Yu lala, a la naãa pe ape le Yu re poli.”

Pol sinenan sape monar alelaga e Yesu sane naga

²⁴ Ana pogos naãa Pol suña mla ke kiena navisatameena sanene, Pestas suñalu tero kiena visena lala, naga pisi keviu, pisape “!Pol, ko ope wowe ga nene! Ko sinomñan osape ove manmarua e nakiliaena taãena lala, ana kila ãaruña pano-o pe wowe ga narui.”

²⁵ Ana Pol pisape “Nepatanon ko, ãarin Suãe Pestas, ana in na monar nevisa van ko, in na ãaruu poga ga. Kiau visena la naãa nesuña nepisawal ke e yo nini, la ape purães nen nalelagaena naãa ape lelaga paãisi. ²⁶ Suri la naãa nesuña nesunyu ke ne, nekilia ruru nesape Suãe Akriãa naga kilia ruru rui, la apimi atol kiena navisuena rui, nanene narui kila pe nemaraun re naãa nevisawal e marana poli. Suri la nene, pe apimi amñalivi re ga e narin yo ta naãa yaru la pe akilia re poli, peraga, yeririna la punu ga akilia rui, asuña apisayu paãisi. ²⁷ ?Ana Suãe Akriãa, ya naãa pe kiomña sitomena lelaga e suri la nene? ?Nepisu sane ko mñena ga omlelaga e visena kiena ne navisawalena lala nanua sumo, ne?”

²⁸ Ana Akriãa pisa pa Pol, pisape “!E, peraga, peraga! ? Pona opis yam plas ga nene, osape okilia oure inu mñena neiñasu neve yeririna kiena ne Kristo, ne?”

²⁹ Ana Pol pisatameña, pisape “E, nemninue ga, pona nevis ve plas ga pona nevis ve piavi, ana suri taaga ga nemlen nesape Ntewa kila ãane, sineun nesape ko, omio yaru taãena la nene, naãa asu mña amiyagogon ke kiau visena, sineun nesape aimi ave sa ga inu. Pe nepisa re nesape awar sen la nene

ve sa naŕa noŕar ke poli, ana nepisape popon aimi ave sa ga inu, naŕa nemla Yesu Kristo e kiau malena, nepimi nepe yaru viu e naga.”

³⁰ Ana Parin Suŕe Akriŕa kalo visena e nene, ana naga, amio Pestas, amio Penis, amio yerkawa taŕena lala naŕa la ateke tano ma metava amio la, la nene asusum̃alu, apava si vanua.

³¹ Ana pogos naŕa apava vanua rui, asum̃a apisayu ke pan la, apisape “Yaru nene naga pe kila re nena suri tai piowa poli, naŕa torokin naga mare pona war nakoarena nena yanonia.”

³² Ana Akriŕa pisa pa Pestas, pisape “Visae yaru nene ve visa re visvae Sisa ga lip̃erea, vera naga kilia molue ga va vanua sanene rui.”

27

Aŕere Pol amligan yo Sisaria vena ava garu Rom

¹ Ana e pogos nene, in Luk, in m̃ena nesike nemio Pol garu Sisaria, ana nepisape in m̃ena ga yoko neva nemio naga garu Rom. Ana pogos naŕa yerkawa lala apisu sane meva narui, ana aŕere plan Pol amio yaru taŕena laŕasia naŕa asike loyum̃a e yum̃a nakoarena, amligan la apa e limana ne yerkawa na mara tai. Yaru nene, kiena kia Sulias, a naga pe nasumonena na ŕegas na li na mara la nene naŕa apio asape “Pegas kiena ne Okastas.” ² Ana

naga ŕere imimi mepano, mepito garo losi, ana aŃal waa tai nae Atramitiam, ana memiai meta ea. Ana e pogos nene, Aristakas nene nae Tesalonaika e lepas nae Masitonia, memio m̃ena ga naga. Ana mokus waa nene mepano, naŕa kiena mrapa nena naga pano kome lowe lala e lepas nae Esia.

³ Ana kolulag, mepimi metol yo Saeton, ana e yo nene, Sulias naga kila po paŕisi pa Pol, naga taŃan naga pa ura vena visu kiena erau lala, a naga taŃan naŕa amiila Pol e suri laŕasia e kiena mrapa. ⁴ Ana memligan si yo nene, mekiriri m̃a e sive pano-o, ana makawe lagi e pogos nene, kila sane pogos naŕa metol purvanua nae Saepas, ana mepa mokom varaun lepas ŕasia, lepas navano. ⁵ Ana mokusro pupia sive nene naŕa va ko yotena narui vanua e lepas nen yo lua nene Silisia amio yo Pampilia, ana mekiriri mepimi metol kumali nae Maera, e lepas nae Laesia. ⁶ Ana waa nene naga mligan imimi e yo nene, ana yaru na mara nene Sulias naga pano kale mrapa taŕena. Ana naga mali waa tai nae Aliksantrea naŕa naga sum̃a pa ke e purvanua naŕa mesitom ke mesape mevanea, Italia, ana naga miila imimi mepa mesike e waa nene narui.

⁷ Ana mepa sina metava e sive, ana lagi piowa ga, kila

mekiriri malumu ga pano-o legiena la laḡasia, ana moḡar yo paḡisi, mepilolou m̃a m̃ale sanene pano tol kunus nae Nitas, ana lagi monwo ruru imimi nenaga narui. Ana mepilon imimi, mekirilologia kunus taḡena nae Salmone e purvanua naḡa Krit, ana mepa varau-nia e lepas na sive malumu.⁸ Imimi mokom ga lavisin purvanua nene, mesum̃a mekeveve m̃a mepano, ana lagi m̃e kare imimi ke na wa, ana mepa m̃a pano-o metol lowe tai naḡa apio asape “Lowe Tanea,” lavisin kumali naḡa Lasea.

⁹ Ana mesu towe la e yo nene yam plas ga, ana la apisu sane piowa ga narui, komin naḡa lagi kila ke sanene pan imimi, ana mesike mrapa yam piavi laa rui, ana mrapa piavi ke ga wa, a nanagane, pogos na lagi amio pupia miava narui. Sila ga la apisape pog piowa nene siar e kupario na Paḡagena na Naviewoena, ana ḡaḡagena nene ḡaro pa rui. Ana Pol mloge piowagan suri nene, naga pisa ruru pan la, pisape¹⁰ “Yerkawa lala, in na nemninuluḡar naḡa visae tevano, ana viowa vaḡisi, yoko suri la punu ga akilia akokovio. Nepisu sa naḡa yoko waa nene naga kilia talilu ga warar kana tegaki lala, a ita m̃ena ga, kieta malena lala akilia akokovio e sive.”

¹¹ Ana yaru na mara nene

naga pe miyagogon re Pol poli, ana naga miyagogon ga yaru naḡa kus ke waa, amio yaru naḡa naga kiena waa nene. Ana lalua apisape “Peraga, woga ga ne, yoko teva ga,¹² komin naḡa taḡatete tekilia tesike e yo nini vano-o tetol ke sina ga pog wo.” Ana apisayuia, la moki naḡa apisu asape popon meligan si yo nene, moureli ga mevano metol lowe taḡena tai kiena kia Pinikis, e purvanua m̃a nena nene, naḡa la apisu asape e nene narui popon mesike ea, tol pogos naḡa yoko pupia lagi na miava nene ḡisi.

Pupia lagi miyusesa kare la apano

¹³ Ana pogos naḡa apisu lagi pilonia, ana lagi marua naga molue towe narui, apisu apisape po narui, ana asitom asape lagi ke nene narui naga yu imimi meva e lowe naḡa mesitom ke mesape meva ea. Ana aḡere kilavaru pam metava, ana meḡure mepano, mekeveve ga yo ura.¹⁴ Ana pe yam piavi re poli, memilan ga pupia lagi ura tai molue pimi miyu imimi.¹⁵ Lagi nene miyui keviu sanene, ana taḡatete si mekilia moure naḡa mokus lagi nene, ana apilon ga waa narui, ana atam̃an ga lagi nene supon imimi ga mepa yotena, ana lagi nene miyusesa imimi sanene mepano.¹⁶ Ana mekiriri mepano, metapolou

towe la sane e narin purvanua tai, kiena kia Kaota, ana e yo nene memiyurñaen kana narin wa nene pano-o, ana aþurelua pam metava. ¹⁷Ana la amaraun apisape sa þisi waa nene wurorowaia, ana aþere pupia kilika lala akom va tanon waa, ana apiar rurua vena tarar rurua.

Ana apisu naþa lagi moña miyusesa kare imimi mepa ke na wa, ana amaraun asape asurña apa ke lavisin piame lala nae Saetis narui, lavisin yo Lipia, ana aþere si ñale. Ana lagi miyusesa kare imimi sanene mepano metaulu yo nene, ana yemalo, ana mekirir malo ga mepano.

¹⁸Ana kolulagi, ana lagi ñarera ke na wa, a sive moña kokovenkare imimi, ana la asiar naþa akoven plan tegaki pito e sive. ¹⁹Ana legiena taþena sina, yo piowa ke ga wa, ana apano amluþar plan kilika lala a ñale lala a suri la ne sanene, akoan ñena apito e sive. ²⁰Sa ña ke sina ga nene tol legiena moki, naþa sinapane naga malo ga ñeke na, pe mepisu re verue la poli, a pe mepisu re maran mrae poli. Mepisu sane mesike loyurña e lagi tai nene naþa pe yaru tai sitom re si sape yoko memal poli.

²¹Ana yaru na waa lala pe akinana re poli legiena moki rui, amloge piowa keviu paþisi, ana Pol pimi pisu la,

pisa pan la, pisape “Suwala, visae ayagogon ruru inu ga nanua rui, e pogos naþa ita tesike garu Krit wa, ana yoko pupia loge viowaena a pupia nakilaluen suri la nene taþatete imi tol ita. ²²Ana nanagane, yoko nevisa si suri tai van amiu, vena akilia aloge si wonia. Nepisawal pan amiu, nesape yoko kieta waa nene naga talilu na wa, ana taþatete ita yaru tai kovio. ²³Nekilia suri nene komin na kolemalu, kiau Ntewa naþa nemlen ke pania, nepisu naþa naga mligan kiena navisi tai pitomi ñalivin inu. Navisi nene pimi surñalu sike lavisin inu, ²⁴ana naga pisape ‘Pol, ve omarau re. Ana monar ovano-o oworu garu Rom, monar osurñalu ose marana ne Sisa na wa, ana nekilia nevisawal van ko sanini, malena kiena ne la naþa asike e waa nene amio ko, Ntewa naga sitom sape tañan ga van ko sape yoko amal ga, taþatete tai kovio.’ ²⁵Na nene narui, ve aloge re si viowa, in na neþasine manene Ntewa paþisi nesape yoko ve sa ga naþa kiena navisi nene pisawal pan inu. ²⁶Ana suri taaga ga, yoko monar tokus kieta waa vano teyalar ga yo ura e narin purvanua tai.”

La apim lavisin purvanua tai

²⁷Ana lagi nene naga surña miyusesa kare imimi mepa ke ga wa, tol wik lua narui naþa mesurña mekirir

ke e pupia sive nae Metitere-nian nene. Ana kolemalo pogos tai, yaru na waa la nene apisu kilale sane mesum̃a mepimi ke lavisin purvanua tai ko yo tai. ²⁸ Ana amligan kilika pito tano, la apulo merorol na sive nene panoo tol meta lualima yam vari, siraunia, asu laa yam plasga, ana akila sina, apulo asape meta lualima yam telu. ²⁹ Ana amaraun asape sa p̃isi mekirir m̃a sanene meyvane lawe pupia kilavaru laḡasia pona ya, ana akoan kilavaru vari naḡa sike varau e ḡeren waa, ana asum̃a amlen ke asape vena kilavaru lala nene monar atarar imimi, a vena yelagi imi vilaga.

³⁰ Ana yaru na waa lala apisayua, apisape yoko avisa kotalia imimi ke sina ga laḡasia, ana yoko la akilayon naḡa akus kana narin waa nene ana aure akom ea ava ura. Ana apisa kotalia imimi, apisape “Oe, yoko mokusli kilavaru nene va gare sumo wa, vena metaḡali naḡa uarar kieta purgon waa.” Ana asum̃a amligan narin waa pito tano e sive.

³¹ Ana Pol pisu kilalea, ana pis pan yaru na mara lala, pisape “Visae asitom asape amali, monar avisaluḡar la nene asum̃a ga amio ita e waa nini.” ³² Ana yaru na mara la nene amloge, asum̃alu veraga apano ateroro kilika na narin waa nene, ana lagi miyulua ga tan waa, korur mian pano.

³³ Ana lavisi yemlagi merarava, ana Pol sitom pisape monar akan suri tai, ana naga pisa pan la, pisape “Ei, pimi tol ḡane, ana wik lua narui naḡa tesike e pogos piowa nene, pe tekinana ruru re poli. ³⁴ Ana popon ḡane na tekinana ruru sina, vena yepeta lala akilia aimi m̃arera sina, ana sanene yoko tekilia temali. Sa naḡa nepisa rui, ana yoko taḡatete narin vilḡarita tai kovio, ana yoko ita punu towoga ga.”

³⁵ Ana siraun naḡa pisayu suri nene p̃isi, pano mla kilaparavi tai, ana mlen e marala, pisa potena pan Ntewa vanonia, ana kawewowaia, sum̃a kania. ³⁶ Ana pogos naḡa lala taḡena apisu naḡa Pol sum̃a kinana ke sanene, la m̃ena ga amlelaga asape pe lelaga kemua, yoko lala awoga ga ne, ana la m̃ena ga akekarana asape akinana sina, ana akinana. ³⁷ Ana imimi punu ga naḡa mesike e waa nene, metol ponotia lua lualima yam olua pa orai. ³⁸ Ana pogos naḡa la punu ga akinana p̃isi, apisu asape popon akila waa melala va laa sane, ana aḡar plan mras nen wit la nene naḡa sane kamimi kinanena, akoakoan plan pito e sive.

Waa pa tawa m̃eke ga yotena, ana akulkul ga apa ura

³⁹ Ana pogos naḡa yemlagi narui, ana mepisu m̃a yo ura lavis ga rui, ana pe mekilia re yo nene poli. Ana

apisu pululus tai naña pe lowe m̃eke ea, ana ura e yo nene none tanea m̃eke ea, ana apisayua, apisape yoko la akilayonli naña vena akila kiamimi waa kiriri va ura ea. ⁴⁰ Ana ate plan kilika na kilavaru lala, amligan la asike e sive, a amluñar plan kilika la naña apiar ke ðeligas nen waa, ana aþere narin m̃ale naña teke e purgon waa, vena lagi yu imimi meva meialar none.

⁴¹ Mesum̃a mekirir m̃a mepano-o, memilan ga, naña waa mialarlar pupia none tai naña koruru þerepoloia sike lele taaga tanon sive. Purgon waa mialarlar none nene, ana tawa ruru nenaga m̃arera m̃eke ea, pe kululu re si po laa rui. Ana pupia sive lala asusum̃alu aþanwowola apimi asusu þeren waa nene, asuwowaia.

⁴² Ana yaru na mara lala asum̃a apisayu rui, asape visae suri tai sanene, ana awe mom̃ar ga yaru na yum̃a nakoena la naña asum̃a akirawo la ke na, visae peraga, pona laþasia akilayonli naña awula ato tano e sive, vena akulu ava ura, aure. ⁴³ Ana kiela yerkawa pisaluñar la, pisape ve akila re, komin naña naga sitom ke sape Pol naga monar mali ga. Ana naga pisa ga pan imimi punu ga, pisape “Poga ga, ita naña tekilia tokulu, tesumo, towula ga e sive, ana teyenli ura. ⁴⁴ Ana ita naña temiye

þele ga, ana tokus kulutaki, pona ya naña tekilia telual e waa, vena tokusia tokulu, ana ita sirau tevano.” Ana e ga e mrapa nene, imimi punu ga mepano-o mepa ura e yo nene, naña imimi punu ga memali po ga, pe imimi yaru tai kovio re poli.

28

Pol lala la asike e purvanua naña Molta

¹ Ana pogos naña imimi punu ga mepimi mesu ruru ke pa ura rui, yeririna lala nae e yo nene apimi apisu imimi, ana apisa ga pan imimi na wa apisape yo nini naga pe purvanua tai, kiena kia Molta. ² Ana akila po manene laa pan imimi, la sinela po pan imimi paþisi. E pogos nene, yua powo m̃a ga, ana la apisu naña imimi memloge miava tol imimi paþisi, ana la apirani kapi, apisuar ruru imimi sanene.

³ Ana Pol pa þar lukilar na yato tai, pisape kuan va e kapi, ana pogos naña kuan pa e kapi, narin lom̃ara tai talinar naga teke likan yato la nene, pogos naña mloge kapi mlege, ana molue e lukilar na yato nene, talinar naga e limana ne Pol, karia. ⁴ Ana pogos naña yaru nae e yo nene lala apisu lom̃ara nene na kilam̃aren yaru telan teke e limana ne Pol sanene, la apisamun ga pan la, apisape “! Ovisu yaru na yum̃a naloge viowaena nene, pona naga pe yaru tai naña m̃e mom̃ar

ga yaru la moki yo! Sive pisape kilam̃ar naga, ana naga pure ga, ana nanagane na, lom̃ara nene tol ruru nena naga na teke ne.”

⁵ Ana Pol silinlua si lom̃ara nene petan limana mloru pa e kapi, ana mloge re nena suri tai poli, limana pe mlae re nena ga. ⁶ Ana asum̃a apisuar m̃a naga, asitom asape p̃isi na yepena la monar sirop ve keviu va p̃isi yo, a visae peraga, pona loru vito tano na mare, ana asum̃ate m̃a sanene pano-o peraga, apisu suri nene pe kilam̃ar re nena ga naga. Ana pogos naṗa apisu naga pogaga, asitom pe taṗena narui, asitom asape pona Pol naga pe ntewa tai yo.

⁷ Ana e yo naṗa mepa ura ea, naga lavisin lokove lala kiena ne suṗe na purvanua nene, kiena kia Puplias. Ana p̃ere imimi mepa um̃a m̃ana, a pisuar ruru imimi e legiena telu naṗa mesike memio. ⁸ Ana pogos naṗa mesike memio la nene, yermarua naṗa arimana ne suṗe nene naga momalio m̃eke m̃ana tog, naga mai, naṗa yepena la pisun, a m̃eṗena piowa p̃arwowea. Ana Pol pa pisu yermarua nene, ana mligan limana tea, mlotuwoia, kila naga pimi po sina. ⁹ Ana pogos naṗa yeririna taṗena lala amloge naṗa Pol kila sanene e yermarua nene, la m̃ena ga naṗa amai apimi, ana la m̃ena ga kiela maiena la p̃isi. ¹⁰ Ana akekara keviu paṗisi e

suri la nene, ana asum̃a aṗar korenan suri la moki pan imi. A mesum̃a e purvanua nene pano-o tol kupario telu, a pogos naṗa mepiaṗa sina, la aṗar kinanena mokliu a suri la naṗa aṗar korenan ga pitomi, amligan e kiamimi waa taṗena vena iila imimiena e kiamimi mrapa.

Pol la apa atol yo Rom

¹¹ Ana waa taṗena naṗa yoko mokom ea, naga wa tai nae Aliksantrea naṗa naga m̃ena ga m̃eke e purvanua nene yam piavi rui, monm̃ate ke ga visae pogos na lagi war ro narui. Waa nene, la asikia kiena kia “Kasto a Polakis,” naṗa kia lua nene na kia kiena ne kiela ntewa lua naṗa lalua ape kaora, naṗa la ate kana nono nena sike e purgon waa nene. ¹² Ana memligan yo nini mepano metol ke sina ga yo tai, kiena kia Saerakius, ana mesike e nene legiena telu. ¹³ Ana momolue ke sina ga, mokom varaunia mekirir mekeveve m̃a yo sanene pano-o metol Resiam. Mesum̃a e yo nene tol legiena wetelu tai, p̃isi ana lagi marua tanea tai miyui na po paṗisi, ana mekiriri manene laa sane tol legiena lua, mepa metol lowe nae Puteoli. ¹⁴ Ana mepa ura memligan waa m̃eke e nene narui, ana mom̃al wolai laṗasia, ana aṗure imimi mepa mesike pula tol wik taaga. Ana sir-aunia, mepisu sane pupia kiamimi yalena e pogos nene

lavisi p̄isi narui, mepimi ke lavisin pupia pulkumali na yomarava nini narui, naṣa Rom.

¹⁵ Ana wolai la naṣa asike Rom, visena pa tol la apisape imimi na memial mepito ke pula narui, ana la amiyalilu mrapan imimi. La apam manene laa perina paṣisi, naṣa laṣasia apam asuṃate imimi e pulkumali nene naṣa pupia lelana wilwiliena kiena ne Apias ṃeke ea, a laṣas apami manene laa sane, apam yalensilau atol pulkumali nene naṣa yuṃa telu ṃana ne wolawa lala sike ea. A pogos naṣa Pol pisu asuṃate ke naga sanene, naga kekara paṣisi, a pisa potena pa Ntewa naṣa suri nene kila naga mloge po paṣisi, a kila naga mloge sane naga ṃarera sina. ¹⁶ Ana pogos naṣa mepimi metol yo Rom, la pe amligan re Pol pa e yuṃa naloge viowaena poli, ana la apisape naga kilia lual yuṃa tai naga va sike ea, ana la amligan yaru na kirakiravanena tai naga sike amio.

Kas lua naṣa Pol sike garu Rom

¹⁷ Ana Pol sike garu Rom legiena telu, p̄isi na mligan visena pa pa li na sumonena kiena ne le Yu la naṣa asike e yo nene, ana pogos naṣa la apim lele taaga, Pol sun pan la. Naga pisa pan la, pisape “Wolai lala, kiau suniena sanini: inu

nepim e nini komin naṣa e kas nanua ṣaro ne, nesike garu Yerusalem, ana kieta yerkawa la akuwan inu nepa e yuṃa na loge viowaena, siraunia la amligan inu e limana ne yaru nalipereena lala nae Rom naṣa la apisuar ke kieta purvanua. E inu, pe nekila re nena suri tai pa kieta yeririna lala, a pe nekila re suri tai naṣa pe mesmesu re e kieta ṣelaga poli, pona e visena kiena ne repita lala, ana la akila sanene pan inu narui. ¹⁸ Ana pogos naṣa nalipereena lala nae Rom la apisuveve ruru suri nene, la sinelan asape nekilia nomolue ga narui, komin la pe aṃal re suri tai naṣa kila na ala nakoena van inu vanon poli, sane monar nemare. ¹⁹ Ana sirau- nia, kieta nasumonena lala nae Yu la apisin sina, ana pa piowa ga ṃeke na. La akila sanene, ana nepisu sane pe yo re si po laa rui naṣa nekilia neva ea, ana mrapa ga naṣa nekilia neva ea, ana nepisawal nesape Parin Suṣe ga Sisa nae Rom nene, naga ga monar lipere inu. In na pe sineun re nesape neligan la nae kieta purvanua ava e pupia kumali nae e nini poli, peraga, ana komin naṣa la akila ṃarera manene laa pan inu sanene, nane kila narui nepisape la monar awere inu neimi e yo nini Rom. ²⁰ Nane nesike e nini narui, ana sineun nesape monar akilia suri la

nene, ana nepio amiu vena aimi tesu lele taaga sanene vena inu nekilia nesunyun van amiu. Sineun nesape monar akilia naña sen la nene naña asumã apiar inu ke sanene, pe komin re kiau napiowaena lañas poli, ana komin kieta Navisaarena naña ita le Israel make ga tepisape tesumã toņasine ke ga naga.”

²¹ Ana nasumonena kiena ne le Yu la nene naña asike Rom apisa pa Pol, apisape “Suri la naña osumã opisa ke ne, imimi memninue ga. Imimi pe momã re maki tai naña pisayu ko poli, naña molue garu Yerusalem pimi pun imimi, a kieta wolai lañasia naña la akom e namã apimi, ana pe apisayu ko re pan imimi poli apisape okila ke sanene sanene. ²² Ana memloge kioña visena la nene narui, ana sinemimin mesape meloge re laa si kioña sitomena na wa pona kioña nalela-gaena, komin naña pe lelaga, memloge towe maga e lepas na nalotena viu nene, ana memloge ga naña yaru lala la asumã apisayu kare ga e yo punu ga.”

²³ Ana la asitere apisape pisi na aimi avisu si Pol vanonia e yo nene naña naga sike ea. Ana sirau-
nia, pogos naña la apimi, la moki na moki, ana asumã amiagogon ke Pol, naña siar kolulagi pa ne tol pogos naña mrae pito tano ana naga sumã pisi ke pan la

na wa. Naga pisawal pan la sanape naña yaru kilia va loyumã e nasuņenena kiena ne Ntewa, a naga sumã pian la ke sanape naña navisaluaena kiena ne Mosis amio visena kiena ne navisawalena na sumo lala, la akila merarava ruru naña asape Yesu ga narui, naga pe kieta Navisaarena, naña la mēna asumate ke naga vena imi tamalia la. ²⁴ Ana lañasia amloge visena lala kiena ne Pol sane pe lelaga, ana lañasia pe amlelaga re e poli. ²⁵ Ana naga nene kila na la asike e lepas lua narui, ana asitom pele ga apisape popon apisi ga rui, ava umã wa. Ana Pol pisa maron suri tai pan la, pisape “Ei, in na nepisu naña Ninuna Wa naga pisa suri na pe lelaga paņisi ne, nanua sumo, naga pisa visena tai pa repita lala, naña Navisawalena Aisea naga pisawal pan la. Naga pisa, pisape

²⁶ *Ovanon kieta yeririna la nene, ovisawal van la sanini, ovisave “Pisi na aloge vano vano-o, ana taņatete aloge kilale pogos tai, pisi na avisu vano vano-o, ana taņatete avisu kilale pogos tai,*

²⁷ *komin naña amiu na sa ga yaru la naña kiela sitomena lala marmare, sa naña aposino pulkiligala, a sane la aņelawa pisi rui.*

*Visae la ve akila re ve
sanene,
vera na kilamarala lala
kilia visu kilalea,
a kiligala lala kilia loge
kilalea,
a kiela sitomena kilia
sitom kilalea,
ana ve sanene la akilia
avilon la aimi pun inu
vena nekilia netamalia
la.”’ Ais 6:9,10*

28-29 A nanagane, nevisa van amiu, nevisave monar akilia sane natamaliaena kiena ne Ntewa nene naga molue rui pano pa tol la naña pe ape Yu re poli, ana la asum̃a amloge ke ne a p̃isi na la ke narui la alogearia!”

Ana pogos naña Pol pisa maron kiena visena nene pan la, la apiapa, naña la asum̃a apeveyun la ga narui.

³⁰ Ana Pol sike e yo nene sanene pano-o tol kas lua, a naga ga pul m̃ana yum̃a, naga ga sum̃a pisuar naga. A yaru ai naña pimi pisuia, ana kekaran ga naña were va um̃a m̃ana,³¹ ana sanene, naga sum̃a mlologon ke nasuṣenena kiena ne Ntewa silaga pa yaru la punu ga naña naga m̃al la. A naga sum̃a pian ke Suṣe Yesu Kristo pan la, naña pe yaru tai pisi re si pan vanon poli, pona pisaluṣar naga pisape naga ve kila re sina.

**Maki Naña Pol
Siria
Pa Pan Li
Nalelagaena Wa
Lala Nae Garu
ROM
Visayuena Na
Tusi Nene**

*Kom̃pasnen suniena plas
na tusi nini*

Pol siri m̃aki nini vena kila ruruen kiena mrapa, naña sinenan sape va visu li nalelagaena lala gar Rom. E kiena sitomiena, naga sinenan sape yum̃ae re yam ve plas ga amio li nalelagaena la nae yo nene, vena siraunia aiila naga naña sinenan sape yalen silau va garu Spen. Pol kilia ruru naña visae yaru lelaga e Yesu Kristo, a imi ve yaru kiena Yesu naña taveve kiena ðelaga e kiena maliena, yaru nene yoko ve yaru mesmesu e marana Ntewa. Ana komiñ suri ne na nene, naga siri m̃aki nene vena visawlaen ðelaga na lelagaena naña po van li nalelagaena lala gar Rom. Tusi nini puara purþesnen sitomiena kiena Pol e mrapa la naña yaru kilia lelaga e Kristo.

Sumo, naga pisa pokolemalo pan li na sum̃are lala nae Rom, a pisawal panla sape naga sum̃a mlotu wola. Ana siraunia, pisawal si purþesnen sitomiena na

m̃aki nini, naña pisape “Lologena wo nene naga sum̃a kilologia ke ðelaga lala naña yaru kilia imi mesmesu e marana Ntewa. Siar e purþesia va tol luwasia, ðelaga nena m̃alivi ke e ita kom ga e lelagaena.” (1:17)

E tusi nini, Pol pisayu ruru va moki kiena purþesnen sitomiena. Naga sape yaru make ga, pe suri korena ga naña visae ape lus nae Israel pona pe ape lus nae re Israel poli, ana ita punuga maran taaga, tesike vatanon m̃areraena na milamulena viowa.

A yaru kilia imi ve yaru mesmesu e marana Ntewa, visae naga lelaga ga e Yesu Kristo. Suri si tai, Pol pisayu maliena naña yaru sikol ruru naga amio Kristo, e malena viu naña yaru pimi mesmesu e marana Ntewa. Yaru naña lelaga e Kristo, naga pe marawo amio Ntewa, a Ninunane Ntewa kilia visaruru kiena maliena, naña kilalua naga vetan milamulena viowa, a kila naña m̃areraena na milamulen viowa amio marena pe aþuar re si naga poli. A siari e marana na keviu 5 pa tol marana na keviu 8, Pol pisawal sanape naña Ntewa mila navisaluaena pa kiena yeririna na sumo lala, a pisawal m̃ena ðelaga naña Ninunane Ntewa sum̃a miyum̃ae ke e malena kiena yaru naña mlelaga e Yesu Kristo.

A naga pisayu m̃enaga naña lus nae Israel lala, a

la naŭa pe ape lus nae re Israel poli, la punuga akilia asikol la e namaplarena naŭa Ntewa Kila vena yaru na yomarava la atavevea. Pogos naŭa sape visi ŝisi narui, naga sape ŝelaga naŭa lus nae Israel la asuŝa apilon mŝasila pa Yesu, Ntewa naga kilia sape yoko ve sanene, ana kila naŭa naga sinena miyee makega yeririna na yomarava, ana pitetalia Yesu pimi, vena ita naŭa telelaga ea, tekilia teimi mesmesu e marana Ntewa. A Pol mlelaga sape lus nae Israel lala, yoko la na taŝatete avilon masilia va Yesu silaga, monar avilopu la yam tai.

Pito e luwasnen mŝaki nini, Pol pisayu ŝelaga naŭa li nalelagaena la monar atavevea e kiela maliena lala, a metavan mŝena nanene pisayu ŝelaga naŭa ita monar sineta si yaru taŝena lala. Pisayu ŝelaga naŭa yaru tavevea e yuŝaena kiena Ntewa, a ŝelaga naŭa li nalelagaena la monar akila van ŝarin suŝe lala na purvanua, pona va yerkawa taŝena lala. A naga pisayu ŝelaga naŭa li nalelagaena la monar asitom ruruia vena re akila kare re sitomena kiena yaru taŝena. E luwasnen kiena mŝaki, naga amio kiena erau lala apisa kiela visena na potena pan kiela erau taŝena lala garu Rom, a kiena visena maro, pisawal visena tai na yeluaren

Ntewa.

Komŝasnen tusi la na nini
Visena ŝesa amio
purŝesnen sitomiena na
mŝaki 1:1-17

Yaru makega monar awar
malena viu naŭa Ntewa
kian pimi 1:18—3:20

Mrapa kiena Ntewa na
tamaliaen yaru 3:21—
4:25

Maliena viu kiena yaru
naŭa sikol naga amio
Kristo 5:1—8:39

Namaplarena kiena
Ntewa pa kiena lus nae
Israel lala 9:1—11:36

Pelaga wo naŭa li nale-
lagaena la monar
ataveveia 12:1—15:13

Visena maro 15:14—16:27

Visen ŝesia

¹ Erau nae Rom lala:

Inu Pol nevisa pokolulagi pona pokolemalo van amiu e kia kiena Yesu Kristo, naŭa in na nepe kiena yar na yuŝaena, in na nepe nalologena ke naŭa Ntewa pio inun narui, mligan lua inu vena neyuŝaen navi-sawalen kiena lologena wo viu nene.

² Lologena wo nene, naga sike loyuŝa e visena lala na Nasiriena Wa kiena ne Ntewa rui, nane e visawalena lala naŭa kiena navisawalena lala apisawal na konua konua rui pimi.

³ Pupia sur naŭa lologena viu nene pisawalia, nane Yesu Kristo kieta Suŝe, naŭa pe narina ne Ntewa naŭa mligan naga pimi mŝalivin ita e yomarava nini. Naga

ke narui naþa e lepas na mratava puna, tekilia tevisave naga molue nenaga e lus kiena ne yermarua Þarin Suþe Tepet. ⁴ Ana e lepas na ninuna, naga pe wa paþisi, naga molue ruru nenaga kome lus kiena ne Ntewa. Añemñar naga mare, ana e kiena pupia mñareraena, Ntewa kila naga mal ruru sina ga. Ana tekilia tevisu kilale ruru tesape lelaga, kieta Suþe nene naga pe narina ne Ntewa kemua lelaga.

⁵ Naga ke narui naga pisirlua inu nepe nalologena, a mligan lua inu vena nevano e þegas nen yeririna taþena la naþa pe ape Yu re poli, vena la mñena ga akilia alega e Ntewa, vena akilia alogear kiena visena. Yuñnaena na sanene naga pe nalaena wo tai naþa Suþe mla pan inu, ana nekekarana naki-laena vena kiena kia va metava.

⁶ A nagane, nesuñna nekila ke yuñnaena nene e amiu, komin naþa amiu mñena kiamiu kia sike loyuna e, amiu mñena amio li taþena la nene naþa Ntewa pio la, vena aim ave yeririna kiena Yesu Kristo. ⁷ Amiu yeririna mñena la naþa naga sinensi amiu paþisi, naþa naga pisirlua amiu ape kiena li nalelagaena wa lala e pupia pulkumali naþa Rom, nane nekekarana manene narui nesiri mñaki nini piñasu pan amiu.

Nesiri sanene, nemlen

nesape lemamiena a nasinesiena kiena ne Arimata Ntewa amio kieta Suþe Yesu Kristo, pimi keviu e kiamiu malena la peve taaga.

Pol sitom manene paþisi vena va mñalivin la gar Rom

⁸ Sumon naþa nevisawal sur laþas van amiu, nemlen e kia kiena ne Yesu Kristo, nepisa potena keviu pan kieta Ntewa vanon amiu. Nesape nekila ve sanene, komin nanagane, visena e lepas na kiamiu þelaga wo na suñalun mñareraena e lelagaena e Kristo, naga suñna pa mlewo make yo moki narui. ⁹ Sur nene kila nekegara paþisi, komin naþa nemiyuñnae kiena ne Ntewa nakonua rui nemio kiau malena wetelu, nemiyuñnaen visawalen lologena wo naþa pisayu narina. A naga kilia mñnaþa nesuñna nesitoñnal amiu silaga e kiau leniena, ¹⁰ a nesuñna nepiun ke mñenatania nesape visae mesmes ga e kiena nasinenanena, yoko naga kila kiau mrapa vena nekilia neim nomñalivin amiu. ¹¹ Sineun manene naþa neim nevisu amiu vaþisi, a visae nekilia neim nelipere re nalaena kiena Ninuna Wa vena kila amiu añarera laa sane, vera na wo vaþisi. ¹² Nemlelaga nesape kiau viawaena kilia iilar amiu, a sineun neimi vena kiamiu viawaena kilia iila inu mñena ga, a visae sanene ita tesuñna temiila ruru ita ke sina ga.

13 Erau lala, sineun ne-sape akilia naña sane yam mok liu, noñion vimāsen pun amiu pañisi, ana silaga mrapa pe po re poli komin sur lañas suwo ga yo, kila narui pe nepimās re poli wa. Ana sineun imāsen pañisi, vena kiau yuñāena kilia war mrasa e amiu naña amlelaga rui, sa naña p̄ar mras rui e la naña pe ape Yu re poli e yo tañena lala. 14 Yumāena naña sike e luñāu naga sanini, sane monar nelologo nenaga van ita, ita le Yu lala, a van mēna yeririna tañena lala, a monar nelologo van la naña akilia suria a la mēna naña pe akilia re sur poli, 15 nane kila narui sineun neim nevisawal lologena wo van amiu e kiamiu pupia pulkumali naña Rom.

16 Lologena wo nene, nane mrapa taaga ga naña namāraena kiena ne Ntewa miyūmae ea vena la tamaliaena van yaru, kila sane silaga pe nemawan re visawalen poli. Lologena wo nene pimi māliv p̄esan pun ita le Yu lala, siraunia mlewo palilue pun la naña pe ape Yu re poli, ana yar ai naña lelaga, yoko lual malena ea. 17 Lologena wo nene naga pe kieta mrapa na kilaen naña teim temesmesu sina e marana Ntewa, vena ve tetol re si nakoena vanon kieta mlamulena viowa lala, ana popon tekilia sane monar tesiar amio

naviawaena, a yoko toñisin amio naviawaena, komin naña sane visena marua tai kiena ne navisawalena Aṗakuk pisa, pisape

“Yaru naña visae wasine ga Ntewa,

yoko Ntewa kila naga imi memes ruru nenaga, nane mrapa nenaga nene vena tolen malena.”

18 Mrapa na tolen malena toña ga, ana p̄armārera a napiowaena pule manene laa likan yeririna la naña pe ape Yu re poli e yomarava nini, kila sane asuwo manene visena lelaga lala kiena ne Ntewa, ana sanene tepisu naña Ntewa sike ma e peni, kiena sinemimiena monar imi māliv kilapel la nenaga. 19 Naga suña p̄i plan ke kiena p̄elaga wo lala pimi māliv e yometava e maran yeririna la rui, ana popon avisu kilalea, ana pe sinelan re kiliaena poli. 20 Lelaga sane Ntewa naga pe pe yar re poli, ana yar tañatete visuia, ana siar e nasiiena yomarava nini pimi tol nagane, yar la asuñā apisu ke kiena p̄elaga wo lala, ana akilia apisu kilale asape naga pe Ntewa kemua lelaga. Visae avisu ga kiena nasiiena lala vera na tañatete si aviun avisave aña naga ai.

21 Visae peraga, akilia asape Ntewa suña ga, ana pe akilali re naña sinelan akila kiela sitomena su vatanon

poli, pe akilali re naña sinelan visaen potena van poli vanon kiena nawoena la pan la. La pe asitom re sur ta poli, pano pano-o kiela sitomena lala pulen make ga yemalolo. ²² Asitom ke asape ape manmarua, ana apa ape wowe make la, ²³ a pe amlotun re si Ntewa naña tařatete si mare pogos tai poli. Yepel mavin ga naga, ana amiyuñāen ga nono la naña ařar maran yaru pona maran manu pona maran sur mal la ne sane nopi lala pona ya, ana asitom ke asape alotun ga sur la ne sanene narui.

²⁴ Pogos naña akila sanene, Ntewa sinen maren kiela řarnarera la nene, ana mligan la vena asuñā akilakila ga napiowaena ya naña la sinelania. E pogos nena nene narui tevisu naña yar la asuñā akila řelaga na mawaena lala e tasnela, ²⁵ a monar ve sanene, komin akovenlua visena lelaga kiena ne Ntewa, amligan visokanena kus lelana, a pe amlotu re si Ntewa naña popon ayeluar kiena kia wa silaga, ana apatanon ga sur la naña naga sii la.

²⁶ Apilopu kare suri make sanene, ana Ntewa pe pialuřar la re si poli, ana tañān la apa akila řarila amio kiela nařinenanena viowa lala. Sa naña sira lala pe apa re si amio yernene poli, ana apa amio ke sina ga sira, ²⁷ a yernene mēna lala pe asitom re si asape popon

atalopa amio sira poli, sa naña Ntewa pisa pisape popon akila, ana la asuñā sinelan ga yaru, asuñā apa amio la ke sina ga e řelaga naña temawan visayuena. Yuñāena la ne sanene pe memes re nena poli, a la naña asuñā akilakila ke sanene, yoko e kiela malena lala, alual ga nakoena la naña torokin yar naña kila sanene monar kusia.

²⁸ Yar sur la ne sanene, pe asitom re Ntewa poli e kiela malena lala, pe sinelan re mēna kiliaena poli, ana Ntewa pe pialuřar la re poli, ana mligan la vena kiela sitomen viowa lala were la ava nena e řelaga viowa lala. ²⁹ Akila mēna sanene pano-o opisu kiela malena pimi pulen řelaga na kilaroen navisaluaena, amio napiowaena lala, navinayaena, amio sitomen viowa lala na kila kareen yar tařena. Amloi, amēmōmar yar lala, apeveyun la, apisokani, sinela kar yar tařena lala, asuñā apisas-ayu la, ³⁰ apisatañela, a e lepas kiena ne Ntewa, la pe sinelan re nena ga. A amio řelaga viowa la nene, ape řarnarera pařisi, ařarwar la, apis vilave, amaplar na kilaen sur viu viowa lala naña nanua sumo na peraga, a pogos naña kiela yermarua la apis pan la, pe sinelan re nena loge laen poli. ³¹ Yar la nene tekilia tevisave la pe ape manmarua re poli, pe apuarar ruru re kiela

navisaarena poli, pe ape lemam re poli, pe kiela nasineyeena re nena poli.

³² Akilia ruru visena kiena ne Ntewa, akilia mā naṣa Ntewa pisaar marena pa yeririna la ne sanene rui, ana pe asitom re nena ga. Asumā akila luen ga sanene, a metavana, akekaran manene paṣisi naṣa visae avisu kiela erau taṣena la asuṃa akila ke viowa sanene amio la.

2

Ntewa naga taaga liṣere yaru lala

¹ Sanene, visae ko na yere Yu tai naṣa osuṃa opisu ke napiowaena kiena yaru taṣena la nene, yoko ositom ve sanape? Pona ositom osape ko na opo, la apiowa ga, ana peraga, napiowaena naṣa teke e ko maran taaga, ana taṣatete si ovisa sur tai. Ko ope yar na liṣereen yar taṣena lala, ana osuṃa omliṣere ko ke ga ne, komin osuṃa okila ke sur torokin ke naṣa omliṣere la vanonia.

² Ana sane tekilia māga, yoko Ntewa la nakoena va la make naṣa akila piowa sanene maran ve taaga.

³ Pona ko tai naṣa ositom ke osape ko na opo yo, komin naṣa opis ke pa yar na kilaroen navisaluaena, ana ko mēna ga osuṃa okilarovia, ana pe pon re ositom ovisave yoko nakoena naṣa Ntewa lavia taṣatete tol ko. ⁴ Pona ositom

ke osape Ntewa pe lemam paṣisi yo, naga sinen miye yaru, pona kiena sitomena piavi, nane ositom ke osape taṣatete kila sur tai van ko yo? Ee, Ntewa po paṣisi sane osuṃa opisa ke ne, ana kiena lemamiena pe taṃan ko re naṣa osuṃa okilaroro navisaluaena poli, ana vena were koena ovilon ko vetan mlamulena viowa naṣa osike ea.

⁵ Ana ko na pe otamān re nena naṣa ovilon ko poli, okila luen ga ṣar māraera pa māga, ana sanene osuṃa okila naṣa omiuponpolo ke kioṃa nakoena lala vano tol pogos naṣa yoko sine-mimiena kiena ne Ntewa liṣere nena yar lala. ⁶ E pogos nene narui yoko naga vion plan van yar lala toroki taveve sa naṣa la asuṃa akila ke ne.

⁷ Sane yeririna la ṣasa, apa rurula ga, asuṃa akilakila ke ga ṣelaga wo la silaga vena kiela kia la wo e marana Ntewa, akilia kila naṣa atol naurarena nae peni. Ya naṣa Ntewa la van la, naga malena naṣa ve uro re.

⁸ Ana la ṣasa, ape yar na veveyuena, pe amlelaga re e visena lelaga po, asike ga vatanon māraeraena viowa. Ya naṣa yoko Ntewa la van la, naga naliṣereena naṣa molue e pupia kiena nasinemimiena ga. ⁹ Yoko pogos māraera amio naloge viowaena imi tol make yeririna la naṣa akila ke piowa,

siar e la naŭa Ntewa pisir plan la ŝesania, nane le Yu lala, va tol yar taŝena la naŭa pe ape le Yu re poli.

¹⁰ A la naŭa kiela malena po, yoko atol navisa ruruena kiena ne Ntewa, yoko kiela kia su ruru amio naga, kiena suŝare sike amio la. A naga ŝena nene siar e le Yu lala, va tol yar la naŭa pe ape Yu re poli, ¹¹ komin Ntewa naga pe pisuveve re sane yar tai pe taŝena poli, ana naga kila po maran taaga pan la.

¹² Le Yu la asike vatanon navisaluaena rui naŭa Ntewa mla pan la, ana visae akilaro navisaluaena nene, yoko Ntewa la nakoena van la. A yar la naŭa pe ape Yu re poli, pe atol re navisaluaena nene poli, pona pe akilia re ya naŭa navisaluaena nene pisa poli yo, ana visae akila viowa, yoko la akovio. Sanene, mlamulena viowa sike e ita punu ga maran taaga, ana yoko Ntewa monar liŝere make ita ga.

¹³ Yar la naŭa amesmesu e marana Ntewa, pe la re naŭa akilia ga ya naŭa navisaluaena pisa poli, ana la naŭa Ntewa kekaran sape were la, naga la naŭa kiela malena taveve ruru ke ya naŭa navisaluaena pisa narui. ¹⁴ Yar laŝasa pe ape le Yu re la poli, amninue navisaluaena kiena ne Ntewa, ana pe sur koren ga, kiela malena po pano-o, kiela ŝelaga sa ga naŭa navisaluaena kiena ne Ntewa sike amio la rui.

¹⁵ La sa ga naŭa ya naŭa navisaluaena suŝa pisa ke ne, sike e losinela rui. Sanene, pogos naŭa amloge visena kar lala apisa pan la asape ova e nene pona ova e nene, ana kiela sitomena wo suŝa pisawal ruru ke pan la e ya naŭa po a ya naŭa piowa.

¹⁶ Sa naŭa lologena wo naŭa nesuŝa nemlologonia pisa, pupia legiena naŝani suŝa pimi ke ne, a e pogos nene, yoko Ntewa la va Yesu Kristo vena visuveve ruru sitomena kiena yar lala, vano-o tol sur naŭa amlawan ruru teke e losinela, a liŝere sur la naŭa akila, vano tol nena naŭa asitom asape pe yar kilia re poli.

Le Yu lala amio navisaluaena kiena ne Ntewa

¹⁷ Nepisu sane popon nevis si va laa sane wa e lepas na sur la naŭa ita le Yu lala tesuŝa tepisa. Tesuŝa tepisayu ke sanape naŭa ita ke narui ita na tetaveve ke navisaluaena kiena ne Ntewa, tesitom ke tesape ita ke narui naŭa Ntewa sinenan ita pa laa sane wa, ana kila narui kieta sitomena la pa manene laa metava.

¹⁸ Tepisa ke tesape tesukul ruru po e navisaluaena kiena ne Ntewa, kila narui tesitom tesape ita ga tekilia ruru Ntewa amio kiena nasinenanena, ita ga tekilia ruru sur la naŭa lelaga pona naŭa mesmesu napo. ¹⁹ Ita tesuŝa tepisa ke tesape ita le Yu ga lala topon naŭa

tesumon la naña pe ape Yu re poli, komin naña tepisape la ape kilamara ãala naña pe akilia re mrapa poli. Tomape ita ga tepe yomerarava kien la naña asike e yemalolo, ²⁰ ita ga topon naña takawe ruru yaru naña kila pal mrapa, ita ga tetorokin naña tevian ruru la naña asa ga sisi lala, pe akilia re sur poli.

Ana sineun nesape nevis re e lepas nene, sane pogaga naña tepisu kilale sane navisaluaena kiena ne Ntewa pulen make kiliaena wo lala a visena wo make la rui, ana piowagan ga naña tesuãa tesape naga pe kieta ga. ²¹ A sur si tai naña piowa manenea metavan nene, tomãareran vianen yar taãena lala, ana nepisu sane pe tepian ruru ita re si poli. Visae ologogon naña ovisave yar ve vinau re sina, ana popon naña ko na osuãa ovinau mãaga? ²² Ko naña opian ke yaru osape monar ve akila re kolau, komin ya ne ko mēna okila? A ko naña opisa ke osape nono la naña la amiyuãaenia, apiowa ga, opisa tanea, ana ko mēna ga, pona osuãa opinaun ke sur la ne pe kol naña amligan sike e kiela lele wa lala, a?

²³ E lele nene monar tevisave piowa paãisi wa, komin ita la naña toãarwar ita vanon naña toãar Navisaluaena kiena ne Ntewa, ana tesuãa tekila kare ke sina kia wa kiena kieta Ntewa ne, komin

naña tesuãa tekilaroro ke kiena navisaluaena la nene. ²⁴ Visena Wa pisayu ke kieta ãelaga nene rui, pisa sanini sape

“Amiu yeririna lala kiena ne Ntewa, kiamiu navisokanena kila sane yar taãena lala asuãa apisa kare ke kiena kia.”

Yaru naña pe yere Yu kemua lelaga

²⁵ Ko osape ope ãaviu rui, ana ope Yu kemua lelaga, nanene na po paãisi. Ana sur nene miila ko visae olgear ga navisaluaena kiena ne Ntewa. Ana visae okilarovia, ko ope Yu korena ga, ko opiowa pa Ntewa sa ga la naña pe ape ãaviu re poli. ²⁶ Ana pona yaru tai pe sa re le Yu la naña ape ãaviu poli yo, naga pe pe ãaviu re poli, ana visae yar nene logear ruru Navisaluaena lala, e navisuena kiena ne Ntewa naga imi torokin ga yere Yu narui. ²⁷ Yere Yu naga pe ãaviu rui a mla ke navisaluaena, ana visae pe mlogear re poli, monar visuar ruruia, visae peraga, yoko Ntewa kovenlua naga, a were taãena naña pe pe ãaviu re poli ana mlogear kiena navisaluaena.

²⁸ Nanene komin e navisuena kiena ne Ntewa, naga naña pe yere Yu kemua lelaga, pe naga re ga naña pe Yu e kulus poli. Ana ãaviu naña Ntewa pisu sane lelaga napo, pe naña re ga e tas nen yar vanua poli.

29 Yar naña pe yeririna kiena ne Ntewa lelaga, pe naga re ga naña pñarar nasiriena wa e limana poli, ana naga yaru naña Ninuna Wa miyumãe ke e losinena, naña kiena malena pilonia pimi po. Yar na sanene, pona yeririna la asitom ke asape naga pe pe yar re tai nene poli yo, ana Ntewa kekaran naga pañisi.

3

Sur wo naña sike e le Yu lala

1 Nepis ke sanene, pona naviunena tai mñalivi yo, viun sanini, visave “Visae yere Yu maran ve taaga ga amio yar tañena lala, sa naña osumã opisa ke ne, komin ya ne kia naña Yu naga po, a tesitom ke tesape ita na tepe sur tai? Naña tekila pñaviu e ita, vena teim teve le Yu kemua lelaga, ana pona pe sur koren ga yo?”

2 Naviunena nene mesmes ga, ana nevisatañea nesape, Peraga, toñar kia na Yu, naga pe pupia sur wa tai naña po manene laa pan ita. Lus kiena yeririna ai sina naña Ntewa mligan kiena visena wa sike e limala? Pe yar tañena kar re la poli, ana ita le Yu ga lala. 3 Pe lelaga naña kieta yeririna la pñasa pe amlogear re visena kiena ne Ntewa nene poli, ana naviunena sike na sape: Sanape, pona yoko Ntewa ve viša ruru ita re sina sa naña naga pisaaria sape yoko kila? Ana pe sa re nene

poli. Pe sur koren ga naña lañas pe apuarar ruru re visena kiena ne Ntewa poli, ana pe Ntewa purmatan li re kiena navisaaren e ita pogos tai poli wa. 4 Pona ita yeririna lala ita tepisokan lue ga, ana Ntewa naga pe lelaga lue ga, sa naña Parin Supe Tepet pisa e kiena Tus na Yauena lala, naña pisa sape

“Yoko avisu naña ko ope lelaga kemua e kioñia visena lala vena liñerelaena,

a yoko sinelan liñere koena sina ga, ana ko na omesmesu ga na osike ne.” Yauena 51:4

5 Kieta napiowaena lala apioyowa ga, ana sur tai naña po towe laa ga, napiowaena la nene akila merarava e maran yeririna lala asape navisaluaena kiena ne Ntewa la naña apisalupar ke napiowaena la nene, apo na apo. Nepisa sanene, pona visae yoko yar lañas naña pñarila pe wowe asumãalu avisave “Visae kieta napiowaena la akila sur wo nene, komin ya ne Ntewa sinena kar ita sape la si nakoena van itania?” Ana peraga, nanene sitomena kiena yaru ga, 6 pe sa re nena nene poli! Visae Ntewa ve liñere ita re le Yu lala, ana pe pon re naga liñere li tañena la naña pe ape Yu re poli, ana peraga, naga mesmesu nena ga, a naga taaga torokin liñereena.

7 Naviunena si tai ve sa nene kilia vim, naña pisa

sanini, sape “Nanua sumo nesape nemlelaga e Ntewa, ana siraunia pe nemlogear re poli, ana sa naŋa nesuŋa nepisokan ga. Ana kiau visokanena nene suŋa pisawal ke sape visena kiena ne Ntewa ga pe lelaga paŋisi, a sanene na suŋa kila kiena kia pa metava. Ana visae ve sanene, komin ya ne naga sinena sape liŋere in ke na wa, sape in na nepiowa ga?”⁸ A ŋisi na yar la ŋasa avilon visena la ne sanene va ve taŋena laa na wa, avisave “Visae ŋelaga viowa visawal visave visena kiena ne Ntewa pe lelaga, popon tesuŋa tekilakila ŋa mlamulena viowa la ve moki silaga, vena kilaen visena kiena ne Ntewa ve lelaga laa sane.” Laŋas apisape nesuŋa nemlologon ke sanene, ana naga nene na visokanena ga, a la naŋa asuŋa apisa, yoko akus naliŋereena torokin kiela visen viowa la nene.

⁹ Nesape nowasuŋe in sina e sur naŋa tepisayu ke ŋa rui, tesape yar na ŋar kia na Yu, yoko ve sanapenia? Pona yar laŋasa, naviunena sike e la yo sape yoko wo vaŋisi vania taulu yar naŋa pe ŋar re kia nene poli, pona peraga? Pogaga, kiau navisatameena nesape ve sa re nene poli. Sa naŋa nepisa ŋa rui, le Yu amio le Kris lala, la make ga asike vatanon mareraena na mlamulen viowa maran taaga.

¹⁰ A sane visena na Tus Wa pisape

“Pe yar re nena tai naŋa kiena malena po poli.

¹¹ *Peraga, pe yar re nena tai naŋa pisu kilale mrapa poli,*

pe yar re nena tai naŋa suŋa kilali ke sape lual Ntewa e kiena malena poli.

¹² *Yeririna make ga apilipal ga mrapa naŋa mesmesu, apa apiowa manene laa.*

Pe tai re nena naŋa miyuŋaen po poli. Yauena 14:1-3

¹³ *Kiela visena piowa ga, sa ga yar mare naŋa kona rui,*

purmenela suŋa miyuŋaen ke ga visokanena,

navisa kareena la naŋa suŋa ŋalivi ke e kulugola lala, sa naŋa lomara viowa karmar yaru. Yauena 5:9

¹⁴ *Lelaga ŋa, gola lala pulen ga viaiena amio visen melkalka lala. Yauena 10:7*

¹⁵ *Lala lala suŋa ŋar la akirkirir kar ga la ne vena kilaen kuruta lau,*

¹⁶ *kiela yalorena lala apa akila kare make suria, akila yaru la amloge piowa.*

¹⁷ *Pe asitom re asape mrapa na suŋare tai sike poli, Ais 59:7,8*

¹⁸ *pe apisu kilale re nena asape Ntewa suŋa pisu la ke poli.” Yauena 36:1*

¹⁹ *Ee, visen la nene amolue kome Navisaluaena kiena ne*

Ntewa, a tekilia tevisave ya naña Navisaluaena kiena ne Ntewa pisa ke ne, kiar ita ga le Yu lala. Ita tesike vatanon Navisaluaena nene, a yar naña pisu kilale ya naña navisaluaena nene pisa, naga pe kiena visena na visaen re si po, naga kilia sape yomarava wetelu kilarovia, yar make ga akus nakoena vanonia. ²⁰ Pe yar re tai naña logear Navisaluaena kiena ne Ntewa torokin vena naga kilia mesmesu e marana, ana Navisaluaena nene kila sane yar make ga akilia ruruia asape mlamulena viowa sike e la.

²¹ Ve sa nene, mrapa na logearen visaluaena, yar la tapatete atayu nena aimi amesmesu e marana Ntewa, a nane kila sane Ntewa pisu popon kila ruru mrapa viu tapena tai naña tekilia tetavevea.

Mrapa viu nena naga po papisi, komin pe kana navisaluaen re la naña yar monar logear la poli. Mrapa nena, nasiriena marua wa lala amio visena kiena ne navisawalena lala, apisawal mā ve torokak nanua sumo rui, ana nagane Ntewa kilologia pan ita rui.

²² A mrapa nena naga sanini: pe mrapa nalelagaena. Sanene, yar ai naña viawa e Yesu Kristo, yoko Ntewa kila naga imi wo e marana. Mrapa nena pe kiena yar re ga lañas poli, ana pe kien yaru make ga, ²³ komin yar make ga

amlamla piowa, pe ta re poli naña kiena malena mesmesu va torokin naña tol malena wo naña Ntewa sinenania.

²⁴ Ana pogaga, komin Yesu Kristo pul lua ita rui, kila naña Ntewa kila ita tepim temesmesu e marana, sane kiena nalaena tai pan ita, naña mlavia pimi ga kome kiena lemamiena. ²⁵ Naga pul plan ita komin naña Ntewa pisirlua naga sane kuḡapaena tai naña kana kuruta mlau kee plan kieta mlamulen viowa ita la naña temlelaga ea.

Ana sanapen yeririna la naña siar e kas la nakonua rui pimi, pogos naña Yesu pe pimi re poli wa? Pe tepisu re naña Ntewa mla nakoena pan la vanon amlamla piowa poli, pona sitomena tai sape pona Ntewa mla ga nakoena pan mlamulen viowa kien yar lañas yo, ana yar lañas pe mla re nakoena pan kiela mlamulena viowa la poli. Ana peraga, naga pe sa re nene poli. Nakonua manenea, Ntewa kila ke ga kiena sitomena piavi, sumā piro ke ga kiena sinekar, a kila mā sanene pano-o tol pogos naña Yesu maren mēna mlamulena viowa kien la na sumo. ²⁶ Sanene Ntewa pisawal meraravan pan ita nagane narui sape naga miyūmae po silaga, kila sane yar ai naña viawa ga e Yesu, yoko ekik ruru nena e

marana.

²⁷ Visae sanene, yoko tekilia towarwar ita komin si ya ne? Pe sur re si ta poli, komin ya ne kila ita si tepim topo temio Ntewa? Pe ñelaga wo re na tai nalo-gearen kiena navisaluaena poli naña tesitom ke tesape tekila yo, ana peraga, kana purþesa, kieta lelagaena ga e Yesu. ²⁸ Kiamimi lologena pisa sanene narui, sape visae yar imi mesmesu e marana Ntewa, naga wasine ga kiena naviawaena e Yesu. Taþatete wasine kiena yuññaena wo la naña naga mlogear ruru navisaluaena make ga kiena le Yu silaga, komin naña taþatete yaru tai kila ve sanene.

²⁹ Sanene, tepisu sa naña Ntewa pe pe Ntewa kiena ne re ga ita le Yu la poli, ana pe Ntewa kiena ne mñena li taþena lala. ³⁰ Ee, Ntewa naga taaga ga, ana pe kien yar make ga, ana visae yere Yu, naga kilia imi mesmesu e marana Ntewa visae viawa ga e naga, pona visae yar naña pe pe Yu re poli, naga mñena ga kilia imi mesmesu e marana Ntewa visae viawa ga ea.

³¹ Ana visena la nene pe pisa re sape ñelaga na lela-gaena kiena Yesu koven-lua navisaluaena kiena ne Ntewa naña sike ne poli, sape pe kiena yuññaena na kilaen re si poli. Pe sa re nene poli, ana kana kinasa sane pogos naña tesuñña

temlelaga ke e Yesu, tesuñña tepatanon ruru ke e sur la naña navisaluaena pisa, tekila ke naña ape lelaga.

4

Epraam tepo yomñarua na vianen mrapa na viawaena van ita

¹ Tesuñña tepisayu ke sane ñelaga na lelagaen e Kristo naga pe mrapa na tolen natamaliaena, ana sanapen kata apua la nanua sumo, sane pupia apua na kieta lus naña yermarua Epraam? ² Naga kila yuññaena la moki naña Ntewa kekarania, ana yuññaena la nene taþatete kila naga mesmesu e marana Ntewa. Visae naga imi mesmes komin kiena yuññaena lala, pona naga kilia warwar si e yo, ana pe sa re nene poli. Pe yar re tai naña kilia warwar e marana Ntewa vanon yuññaena la naña naga kila, ³ ana naviawaena ga kilia kila yaru mesmesu amio Ntewa, sa naña suniena kiena Epraam pisayu e Tusi na Siiena, naña sape

“Epraam naga piawa mñarera paþisi e navisaarena kiena ne Ntewa, ana Ntewa kekaranja, mla viawaena nene kiena Epraam, kila narui pimi mesmesu e marana.” Nas 15:6

⁴ Ositomlia, sane yar naña miyuññaen kilavaru, pogos naña kupario þisi monar waria ve kiena. Ana ve

tevisa re tevisave kilavaru nene naga pe nalaena tai naŋa kiena yerkawa mla pania molue kome kiena sitomena, ana kilavaru nene, yar na yuŋaena nene, piyon paŋisi naŋa, ana popon kemua naga waria ve kiena.

5 Ana lepas naŋa yaru imi mesmesu e marana Ntewa, naga pe pe sur re tai naŋa teyuŋae vanon poli, naŋa tekilia towaria sane sur tai naŋa ita ga tetauluia ve kieta. Ita, kieta yuŋaena la piyowa ga, ana monar towasine ga Ntewa, naŋa naga ga kilia war plan napiowaena e kieta malena. Visae towasine ga naga, ana yoko kila ita temesmesu e marana.

6 Yermarua Āarin Suŋe Tepet kilia sur nene nanua rui, ana kiena yauena tai pisayu sanapen naŋa yoko wo vaŋisi van yar naŋa pe ŋasine re ke sina ga kiena yuŋaena poli, ana ŋasine ga Ntewa sape yoko naga kekara naŋa kila naga mesmesu e marana. Yauena nena pisa sanini, sape

7 *“Yar naŋa Ntewa piwo
kiena napiowaena
lala,*

*naŋa yumu plan kiena mla-
mulen viowa,*

*na nene navisa ruruena tai
naŋa yoko wo van
vaŋisi.*

8 *Yar naŋa Ntewa pisu naga
sane pe namname tai
to re si e poli, naŋa
monar war nakoarena-
nia,*

*naga yoko kilia loge wo na
loge wo.” Yauena
32:1,2*

9 Ana la naŋa akilia aloge wo sa naŋa yauena nene pisape, a la nene? Navisa ruruena nene, yoko taŋatete imi ga va ŋaviu lala, sa naŋa ita le Yu ga lala, ana yoko imi mŋena va la naŋa pe ape ŋaviu re poli, na nene naga merarava ruru po paŋisi, komin sa naŋa tepisape, Epraam pimi mesmesu e marana Ntewa, pe komin re naŋa naga pe ŋaviu poli, ana pimi mesmesu e marana Ntewa komin ga naŋa mlelaga mŋarera ea.

10 Ana tekilia sur nene sanape? A Ntewa sape Epraam mesmesu e marana na pogwai? Naga pisa e pogos naŋa Epraam pe ŋaviu pa rui, pona pisa e pogos naŋa pe pe ŋaviu re poli wa? Visae teva si e kiena suniena, yoko tevisu naŋa Ntewa pisape Epraam mesmesu e marana pogos naŋa naga pe pe ŋaviu re poli wa.

11 Sanene, viawaena kiena Epraam e Ntewa, naga ga nene kila naga mesmesu e marana. E poglis nene naga pe ŋaviu re poli wa, ana siraunia, Ntewa mla ŋaviu pania sane kile tai naŋa pi-sawal sape viawaena ga e Ntewa nane mrapa naŋa yar imi mesmesu amio naga.

Epraam naga pe yar ŋesa naŋa sanene, ana yar moki apim sirau naŋa pe ape ŋaviu re poli, ana amlelaga e

Ntewa ana Ntewa pisu sane amesmesu e marana. La pe amolue re e lus kiena Epraam naapo poli, ana naganane apisu naga sane pe kala apua marua mēna tai, ¹² maran taaga sa ke naṣa naga pe apua kan la naṣa ape ṣaviu.

Ana nanua sumo, ita le Yu lala tesitom tesape yar naṣa pe ṣaviu sane yermarua Epraam, lelaga kemua naṣa naga ke narui naga molue kome kiena lusa. Ana naganane, sitomena tai mālivi naṣa pisape yaru naṣa kilia visa visave Epraam naga pe kana apua marua kemua lelaga, nanene pe yaru naṣa mlelaga e Ntewa sa ke naṣa Epraam mlelaga ea, pogos naṣa pe pe ṣaviu re poli wa.

Naviawaena kiena yaru kila navisaarena kiena ne Ntewa imi ve lelaga

¹³ Nakonua konua rui Ntewa pisaar pa Epraam sape yoko kiena navisa ruruena lala amolue akome Epraam amio kiena lusia avava vanua va va yeririna make ga na yomarava. Ana komin ya ne Ntewa kekaran sape kila kiena navisaarena nene va Epraam? Pe vanon re ga naṣa Epraam mlogear ruru kiena navisaluaena poli, komin pogos naṣa Ntewa kila navisaarena nene, pe navisaluaena re poli wa, pogos kiena ne Ntewa na laen navisaluaena va Mosis sike koperina wa. Sanene, tekilia tevisave

naviawaena kiena Epraam ga kila naga mesmesu e marana Ntewa, nane Ntewa kekaran naṣa la navisaarena wo nene vania. ¹⁴ Visae navisaarena nene pe kiena yar ga la naṣa asmāl amlogear ke navisaluaena, yoko kila sane yar naṣa mlelaga, mlelaga korena ga ne, a kila sane navisaarena kiena ne Ntewa pe suṃal re si poli. ¹⁵ Suri taṣena ke sina ga nini, naṣa kila meraravan pan ita sape navisaarena wo kiena ne Ntewa lala taṣatete amālivi e ṣelaga nalogearen navisaluaena. Naga nene komin pogos naṣa navisaluaena sike na, ana ṣelaga na kilaroen navisaluaena monar mālivi, ana siraunia monar kana nakoena nena, komin naṣa pe yaru tai tokon re kilaroen navisaluaena pogos tai poli.

¹⁶ Ve sanene, navisaluaena taṣatete kilia iila ita vena tekila ruru kieta napiowaena e marana Ntewa, ana Ntewa pe lemam manene laa pan ita, ana naga ga kila. Naga pisu naṣa toṣasine ga naga, tevisu ga naga, ana naga kila tetol kiena navisaarena wo lala. Nanene na pe le Yu re ga la naṣa navisaluaena pitomi ṣesan pan la poli, ana yeririna taṣena mēna la asikola amio la. Yer pe lala, ana visae akus ṣelaga na lelagaena e Ntewa maran ve taaga sa ke naṣa Epraam mlelaga ea, naga sane la

m̄ena amoluē e kiena lusa. A ita make m̄ena ga e p̄egas nen nalelagaena teliv piora e yomarava, tepisu sane naga pe pupia kata apua.

¹⁷ A nanene mesmesun ga naḡa Ntewa pisaar pa Epraam nanua rui, naḡa pisa pania sape

“In na nepisirlua ko, ko ope purḡes nen lus nen yeririna lala na purvanua moki.” Nas 17:5

Pogos naḡa Ntewa pisaar sanene pa Epraam, Epraam pe sinen kurkur re poli, ana p̄uarar ruruia, komin naḡa naga kilia sape Ntewa nena naḡa naga pisa visena nene pania, naga pe Ntewa naḡa kilia kila ya naḡa mare imi mali, kilia kila sur naḡa pe su re poli wa vim m̄alivi. ¹⁸ Pe lelaga, Ntewa pisa sur ta pania m̄arera paḡisi naḡa naga lelaga ea, komin naḡa pisaar pania, sape

“Kiom̄a lus lala yoko aim ave moki na ave moki vaḡisi e yomarava nini.” Nas 15:5

Ana pogos naḡa Epraam mloge, mlelaga ea sape monar ve sa ga nene narui.

¹⁹ E pogos nene, naga kilia sape naga amio wona Sera, kiela mrae lalua lavis vito tano narui, naḡa kiena kasa lavis tol ponotia ve taaga [100], a wona pe p̄arli re sisi poli wa, ana kiena naviawaena pe mlor re nenaga. ²⁰ Naga pe sitom re nena suri ta poli, ana kiena sitomena sike ga e ya naḡa Ntewa pisaaria.

Kiena naviawaena sum̄a pimi m̄arera laa narui, a silaga sum̄a mieluar ke Ntewa a pisa lue ga potena keviu pania vanon ya naḡa yoko kila. ²¹ Naga pe sitomli re pogos ta poli sape Ntewa naga pe torokin re naḡa yum̄ae taveve ruru kiena navisaarena poli, ²² a kiena p̄elaga na viawaena nene narui kila Visena Wa pisayu si naga, sape Epraam p̄asine ga Ntewa, ana Ntewa pisawal sape naga mesmes ruru e marana.

²³ Ana visena nene pisayu ga Epraam naga taaga, ²⁴⁻²⁵ ana popon tela sane visena tai naḡa pisayu ita make ga, komin ita m̄ena ga temlelaga e Ntewa tesape yoko naga kila ita teim temesmesu e marana sa naḡa naga kila pa Epraam. Temlelaga sane naga ke narui naḡa mligan Yesu pitomin vena tol marena vanon kieta mlamulen viowa lala, a temlelaga tesape Ntewa p̄ere lua ke sina ga Yesu petan marena vena kila merarava ruru van ita sa naḡa tekila si mara wo temio naga rui.

5

Tepe mara wo si temio Ntewa rui, tepisu sum̄are a lemamiēna

¹ Pogaga, nagane merarava ruru po pan ita sane sur naḡa kila ita tepe mara wo sina temio Ntewa, naga kieta naviawaena e ya naḡa Yesu kila vena tamalia itaena. A pogos naḡa tepisu kilale

tesape tepe mara wo temio Ntewa sanene, kila naŋa tepisu suŋare sike likan ita temio naga, ² a kila naŋa tesu ruru ga tesike e kiena lemamiena silaga. Visae ve sanene, kieta sitomena m̄areran sape siraunia, yoko ita monar teva loyũna e naurarena kiena ne Ntewa, temio kekarena keviu.

³ A pe tekekararan re ga malena wo naŋa yoko imi sirau poli, a tekekararan m̄ena pog m̄arera la naŋa tesuŋa tepisu ke nagane. Pona temloge piowagan yo, ana teloge won ga komin naŋa tekilia tesape naloge viowaena kilia kila sitomena ve piavi vaŋisi, ⁴ a sitomena piavi kila ŋelaga wo va laa e marana Ntewa, a ŋelaga wo nene kila nawasineen Ntewa va laa na wa, ⁵ a nawasineen Ntewa kila taŋatete kieta sitomena lorun sur tai pog tai. Nanene komin naŋa Ninuna Wa naŋa naga mla pan ita, silaga suŋa kokonia ruru ke sinesiena kiena ne Ntewa va loyũna e ita vano vano-o toulen ruru nenaga.

⁶ Tekilia tesape Ntewa sinen si manene ita sanene komin naŋa sumo, temloru e ŋiliŋili ta rui naŋa taŋatete si tekila sur tai vena tamalia ita, ana e nena e kana pogos naŋa pisaar pa rui, naga pitetalia Yesu pimin marewo ita yeririna viowa lala.

⁷ Ita na, pe tepisu manene li re naŋa yar tai kilia taŋan kiena malena vena tamalia yar taŋena poli, pona yam peve taaga yar tai kilia

taŋan kiena malena vena tamalia yar tai naŋa asitom asape naga po paŋisi, ana sur ne nanene narui Kristo kila pan ita make ga naŋa ita li viowa lala. ⁸ Nasinesiena kiena ne Ntewa keviu sa ke nene narui, komin pogos naŋa ita yar na kilaen mlamulena viowa tekila ke ŋarm̄arera wa, Kristo pitomin mare wo itania.

⁹ Kana kuruta mla kevan ita temekiki rui, ana tepim temesmesu e marana Ntewa, a kila naŋa pe sur re si tai sike e ita poli naŋa yoko naga la nakoena van itania.

¹⁰ Nanua, pogos naŋa tepe nasinekar kiena ne Ntewa ke lala wa, marena kiena narina kila mara wo temio, a nagane, komin naŋa tepe erau wo temio rui, yoko malena kiena narina kila ita m̄ena ga temal lue temio.

¹¹ Sanene, tekekararan paŋisi naŋa Ntewa pisirlua kieta Suŋe Yesu Kristo, komin naŋa naga kila kieta mrapa na mara wo temio, tesu si veraga temio naga.

Atam kila marena pimi, Kristo mla malena

¹² A sur lua nene marena amio malena, lalua apim e yomarava nini sanape? Yar ŋes na yomarava nini nane Atam, a naga pe purŋes nen mlamulen viowa, a kila naŋa nakoena na mlamulen viowa, sane marena, monar imi m̄aliv e yomarava. A yeririna la naŋa asiraunia, la m̄ena ga atol mlamulen viowa, ana marena tol la make m̄ena ga.

¹³ Sumon pogos kiena Mosis, Ntewa pe mla re navisaluena poli wa, ana pe sur koren ga naña pe navisaluena re poli wa, ãelaga na mlamulena viowa sike pa rui. Sanene, Ntewa pe mliþerela re e pogos nene poli sape akilaro ke kiena navisaluena, komin naña pogos nene, navisaluena naga pere wa, ana kiela mlamulena viowa la narui kila sane la monar akus nakoena na marena na wa. ¹⁴ Tekilia tesape sanene, komin siar e pogos kiena Atam, pimi tol pogos kiena Mosis, pe navisaluena re poli, ana yar la asuña amarmare mña, komin nakoena na mlamulena viowa sike e yomarava rui. Pona lañas akila piowa sane Atam kila yo, pona akila mña sur taþena lala, ana e navisuena kiena ne Ntewa, kiela napiowaena make la nene ape mlamulena piowa torok ga.

Sanene, tepisu ya naña yar taaga ga nene naña Atam kila, tol make malena kien yeririna na yomarava, sa ke ga naña ya ne Kristo naga taaga kila sirau, naga mña ga tol make kieta malena ita punu ga naña temlelaga.

¹⁵ A yuñaena wo naña Ntewa kila naña molue kome kiena lemamiena, naga po paþisi, kilia taulu yuñaena viowa naña Atam kila naña molue kome kiena mlamulena viowa. Mlamulena kiena Atam naga taaga kila yar la monar amare,

ana nawoena kiena Yesu Kristo naga taaga kila tepim temesmesu e marana Ntewa. Sur nene sane nalaena wo tai naña toþar korenan ga sa ga ne. ¹⁶ Mlamulena kiena Atam pe kila re nena sur wo tai, ana nalaena nene po pan ita paþisi. Ntewa mliþere mlamulena kien yar taaga nene, pisape yoko pupia kiena nakoena va e yar make ga, ana siraunia, Ntewa pisu nalaena naña Yesu mla pan ita, naña pul plan kieta mlamulena piowa lala, ana sape temesmesu ruru e marana rui.

¹⁷ Lelaga kemua naña mlamulena kiena yar taaga ga, naña Atam, kila sane marena suña taulu ita, naña kilia war plan make malena kien yar lala. Ana yoko, lemamiena kiena si yar taþena, naña Yesu Kristo, mla nalaena wo nene pan ita nanagane, kila sane temesmesu e marana Ntewa, tetaulu marena rui, ana siraunia yoko tetol malena wo temio naga. ¹⁸ Sanene, kana kinas sane mlamulena viowa nene kiena Atam naga taaga þere yeririna make ga apa e nakoena, ana siraunia yuñaena wo mesmesu taaga ga nene kiena Yesu, kilia kila plan la make ga e nakoena nene, ana mligan la ase malena naña ve uro re. ¹⁹ Ana sa ke sina nene, yar taaga pe þarmarera, pe miyagokon re Ntewa poli, ana kila yar make ga ape yar na kilaen mlamulena viowa,

ana siraunia, yar taþena mlogear ya naþa Ntewa pisa pania, ana mare e lak torovia kila narui ita moki naþa tepim temesmesu e marana Ntewa.

²⁰ Nanua, Ntewa mla navisaluaena pa Mosis, a navisaluaena nena suña kilologia ke yeririna lala sape kiela mlamulen viowa la pule paþisi. Ana pogos naþa mlamulena viowa la suña pimi pe moki manene lue ga, Ntewa mēna ga pa laa sane, kila sane kiena lemamiēna pimi keviu manene laa.

²¹ Nanua sumo, mlamulen viowa þar marena pimi, a marena nena suña kila mlamulen viowa tolue ga metava silaga. Ana siraunia, Ntewa kila kieta mrapa vena teim temesmesu e marana, ana nane kila sane nagane kiena lemamiēna taulu make suria, komin naþa suña kila ita make ga naþa temlelaga e kieta Suþe Yesu Kristo, yoko tetol malena naþa ve uro re.

6

Popon toþisin mlamulen viowa, temal temio Kristo

¹ Sa naþa nepisa ga na wa, ita tepe yar na kilaen mlamulen viowa lala, ana Ntewa pe lemam pan ita piewo ita, ana vanon sur nene, popon kieta malena nanagane ve sanape? Pona yaru laþas apisape popon tesuña tekilakila mlamulen viowa ve moki yo, vena kila sane lemamiēna kiena

ne Ntewa mēna ga suña imi manene laa, sa naþa naga suña pieviewo ke kieta mlamulen viowa la nene? ² Ana peraga, taþatete nena ve sanene! Tekilia tevisave e lepas na sinenanen viowa na kilaen mlamulena viowa, ita sa ga yar mare lala, monar toþisin nena ga, ve tekila re sina.

³ Ositomli pogos naþa akee ita vena teve taaga temio Kristo Yesu. E poglis nene, ya naþa māliviēn ita naga torokin ke ya naþa māliviēn naga nanua rui. Sane nanua sumo naga mare wo kieta mlamulen viowa, ana nagane, pogos naþa akee ita, kieta malena marua na mlamulena viowa mēna lala monar mare. ⁴ Sumo, amligan tasnena mēne lele na marena, ana nagane, pogos naþa akee ita, monar teligan kieta þelaga na mlamulena, toþisin ruru nena ga. A nanua mēna sumo, Ntewa kila yuñāena na iila-nena nene, naþa kila Kristo suñalu mal sina, a nanagane, pogos naþa akee ita, tesuñal sina temialoro e malena viu tai.

⁵ Sanene, tepe taaga temio Kristo rui komin naga mligan kiena malena mare e yomarava nini, ana ita mēna ga monar teligan kieta malena marua. Ana tekiliar ruru sane yoko teve taaga si temio ke na wa, komin naþa naga þar si kiena malena viu tai, a yoko ita mēna ga towar kieta malena viu.

⁶ A monar tesitomãal silaga, sane ðelaga na kilaen mlamulen viowa naña tepaememio, naga sa naña asuar sike e lak torovia amio Kristo. Sanene, kila naña ve tekila re si mlamulena viowa la naña tasneta la sinelan kilaena, a mlamulena viowa taðatete kilia ve suþen kieta malena sape tepe kiena yar nayumãena ga. ⁷ Popon toþisin mlamulen piowa, nagane m̃areraena na sinenanen kilaena mlamulena viowa monar þisin ita, komin ita na sane yar mare naña sitomena viowa na mlamulen viowa taðatete kila sur tai van ita. ⁸ Lelaga kemua, nanua sumo, sa naña temare temio Kristo rui, ana nagane, kieta lelagaena m̃arera sape yoko temal lue temio naga narui.

⁹ Tekilia tesape Ntewa kila Kristo mal si petan marena, kila sane yoko Kristo mal m̃a vano-o yoko taðatete si mare pog tai, nam̃areraena na marena taðatete si kilia tol naga pogos tai. ¹⁰ Kiena marena nanua ne, naga pe marena tai na war plan makeen nakoena na mlamulen viowa, a kiena malena nagane, naga pe malena tai na visirluaen kia kiena ne Ntewa, ¹¹ a yoko monar ve sa ga nene van ita. Monar tesitomãalia tevisave ita m̃ena ga popon toþisin ruru ðelaga na mlamulen piowa, a silaga monar tevisirlua kia kiena ne Ntewa e malena viu naña tesike ea temio Kristo Yesu.

¹² Sanene, kiau visena urmi e lele nene sanini, sane ve atamãan re kiamiu sitomena la nakilaen mlamulena viowa imi ve sa naña nam̃areraena m̃arera tai naña sumã ve suþen amiu. Visae peraga, tasnemiulala, naña ape na yomarava ganini, yoko asumã alogear ga nasinenanena viowa la na ðelaga naña ita yeririna la tepaememio. ¹³ Ana sanene pe po re poli, komin lepas nen tasneta lala, pe pon re aim sane sur na yumãena naña napiowaena miyumãe amio vena kilaen kiena ðelaga viowa ne lala. Sumo, ita sane yar mare lala, naña malena na Ninuna pe su re nena e ita, ana nagane Ntewa kila ita si temali, ana monar teyawawo kieta malena viu nene va si vania vena naga lavia vena kilaen kiena yumãena. Sanene, yoko lepas nen tasneta lala apim sane sur na yumãena naña Ntewa miyumãe amio, vena kilaen kiena ðelaga mesmesu lala.

¹⁴ Sumo, tesike vatanon navisaluaena naña Ntewa mla pa Mosis, amio kana nakoena nena lala, ana ita toþion logearen pano-o, ana peraga, pe tetorokin re natolen kana natamaliaena poli. Sanene, Ntewa sinen miye ita a nagane sumã mila ita vena nasinenanena na kilaen mlamulen viowa taðatete nena uarar ita.

Mlamulen viowa taðatete si uarar ita, ana ita yar na yumãena na ðelaga wo

¹⁵ Nepisa ke ga yam tai p̄isi ne nesape pe tesu re si vatanon navisaluaena naṗa Ntewa mla pa Mosis poli, ana nemarau nesape pona yar laṗasa amla kiau visena nene pa piowa yo. Pona asitom asape, “Ke, Pol pisape ita na pe tesu re vatanon navisaluaena poli, a nagane ita tekilia tekila ya naṗa piowa naṗa sinetania, tekila naga pogaga, ana yoko Ntewa sinen ye ita, viewo ita.” Ana peraga, pe nepisa re nena poli p̄isa. ¹⁶ Monar asitoṃal sane pogos naṗa yar tai sike vatanon suṗe tai, monar logear suṗe nena a monar imi sa naṗa yar na yuṃae kienaena tai. A ve sa ṃena nene e kieta malena. Visae nasinena-nena viowa suṃa ve suṗen kioṃa malena, yoko monar okila mlamulena viowa la naṗa naga sinenan sape okila. Ana visae kioṃa suṗe naga Ntewa, yoko osuṃa okila kiena yuṃaena wo lala. Mrapa lua nene, tai yoko kila ko omio Ntewa amlua aviaṗa lue, ana taṗena yoko kila ko omesmesu omio naga.

¹⁷ Nanua sumo, amiu ṃena yar na yuṃaena vatanon ṃareraena na kiamiu nasinenanena viowa ga lala, ana potena paṗisi pa Ntewa naṗa nepian amiu, ana amligan ruru sike e losinemiū lala, ataveve ruru e kiamiu malena lala. ¹⁸ Sanene, amiu amolue vetan suṗe viowa nene nanua sumo, pe ape kiena

yar na yuṃaena re si la poli, ana nagane ape yar na yuṃaena kiena ne Ntewa, naṗa amiu asuṃa akila ke sur mesmes lala sa naṗa naga sinenania. ¹⁹ Nekilia nesape navianena la nene ṃarera li ṃaga komin sitomena kiena yar naga pe sa re sitomena kiena ne Ntewa poli, nane kila nemiila amiu ke ne, nepis kome ṗakaiwa naṗa pisayu ga yeririna lala na yomarava nini, sane suṗe lala amio kiela yaru na yuṃaena lala.

Ana monar avisu kilale ruru kinas nen visena la nene, sane nanua, sitomena na kilaen sur viowa, naga keviu manene laa e amiu, naṗa suṃa ṃareran ke yepemiū lala vena kilaen mlamulena viowa naṗa apiowa na apiowa, ana nagane pe sa re si nene poli. Nagane, sitomena na kilaen ṗelaga wo monar ve keviu e amiu, naṗa kila sane kiamiu malena imi ve wa naṗa ve wa.

²⁰ Pogos naṗa sane ape yar na yuṃaen ga na mlamulen viowa, ṃareraena na sitomena na kilaen ṗelaga wo taṗatete yuṃae e amiu, ²¹ ana akila ke ga yuṃaena viowa lala. Ana sur la nene, pe amiila re nena kiamiu malena poli, ana amligan amiu nena e mrapa na marena, a nagane, visae asuṃa asitoṃal la sina, yoko amawan vaṗisi ya naṗa akila. ²² Ana nagane, Ntewa ṗerelua amiu petan ṗelaga na sinenanen kilaen mlamu-

lena viowa la nene, amiu apim sane ape yar na kilaen kiena yuññaena, kila naña po manenea e kiamiu malena naña apim ape wa ruruia, a nagane asike e mrapa na malena naña ve uro re.

²³ Wulena naña mlamulena viowa kila yar waria, nane marena naña ve uro re, ana kieta Suñe Yesu Kristo kila naña towar malena naña ve uro re, naña pe topul re poli, ana pe nalaena tai naña Ntewa mla korenan ga pimi pan ita.

7

Ita li nalelagaena lala pe tesu re vatanon Navisaluena poli

¹ Erau lala, nekilia naña amiu akilia ruru navisaluena lala na kiamiu purvanua, ana yoko nevisayu sur tai e lepas na visaluena la nene naña kilia iila kieta sitomena e lepas navisaluena kiena ne Ntewa naña tesuña tepisayu ke ne.

Sur nene sanini, sape e navisaluena, pogos naña temal ke ga wa, monar telogearia, ana visae temare, pe tesu re si vatanon po laa rui.

² Ositomyuli ñelaga kiena yaru naña ñere sira, lalua atalopa. Visae sira tai, pogos naña wona mal ke ga wa, navisaluena ñareran sape sira nene monar su ruru lue ga amio wona na yermene nene. Ana visae yar nene kovio, navisaluena pe pisa re si sur tai e lepas na sira nene poli, sape naga

monar suña ve wona yar ke nene na wa. ³ Ve sanene, visae sira nene, wona mal ke ga wa ana naga va vinaun yar taña, yoko navisaluena visave naga taña ke kolau. Ana visae wona na yermene mare tania, navisaluena tañatete si visa sur tai ea. Naga kilia va talopa si amio yar taña woga, naga pe pe kolau re nene poli.

⁴ Pogaga, erau lala, sitomena nene naga sa ga nono ga na kilologia itaena temio navisaluena naña Ntewa mla pa Mosis. Nanua sumo, yar la asike vatanon navisaluena nene, naña monar alogearia vena atol nataliaena, ana nagane, ita li nalelagaena lala temare petan navisaluena nene. Nagane pe tesu re si vatanon navisaluena poli, ana tekilia teva tesu vatanon yar taña, nane Kristo naña mare wo ita. Ntewa kilmalia sina, ana kila sane ita korowas nena lala yoko towar mras wo lala naña naga sinenania.

⁵ Nanua sumo pogos naña tesike vatanon ñareraena na ñelaga viowa naña tepaeme temio, kieta nasinenanena viowa lala amiyuñae e tasneta, akila tekila manene laa mlamulena viowa lala. Ana pogos naña tekilia tesape navisaluena kiena ne Ntewa suña naña pialuñar ke mlamulen viowa la nene, pisape ve okila re nene, ve okila re nene, ana sur nene kila kieta nasinenanena piowa lala pa

laa metava narui. Sanene navisaluaena na kilawoen p̄elaga viowa nene sum̄a kila ke sane tepim tepiowa manene laa narui, a mligan ita nena ga e mrapa na marena. ⁶ Navisaluaena nene p̄uarar ita m̄arera sanene, kila tepim tepe yar na yum̄ae korenaen kiena navisaluaena marua la na p̄a asiripolo la asike rui. Ana nagane to p̄isin ruru nenaga mrapa nene, tomolue tokom ea ana tepim tepe yar na yum̄ae korenaena e mrapa viu wo nene kiena ne Ninuna Wa.

⁷ Ana kam na asitom ya ne e kiau visena la nene, na p̄a nesape navisaluaena kiena Moſis sum̄a kila ke kieta nasinenanen viowa pa laa metava narui? Pona kam na asitom ke asape sanene na nesum̄a nepisa ke nesape navisaluaena kiena ne Ntewa piowa ga?

Ana peraga, kiau navisaena pe naga re nene poli, komin navisaluaena naga kiena yum̄aena wo to m̄a ga. Visae ve navisaluaena re, yoko ta p̄atete tekilia na p̄a nakilaroen navisaluaena naga sanape. Sane navisaluaena pisaar m̄arera sape “Ve ovinaia re sur ken yar ta p̄ena,” ana visae navisaluaena ve visa re, yoko ta p̄atete tekilia tevisave navinayaena naga ya ne, pona navinayaena naga kana p̄elaga sanape.

⁸ Ana lelaga, pogos na p̄a navisaluaena kilaro navinayaena nene, nagane

narui sitomena na kilaroen navisaluaena sum̄alu m̄al kiena narin pulmas tai, kila navinayaena lala pimi moki loyuma e ita. Ve sanene, navisaluaena kiena yum̄aena to m̄a ga, komin visae ve navisaluaena re, yoko ta p̄atete tevisu kilale p̄elaga viowa nakilaen mlamulena na p̄a te paeme temio.

⁹ Sane nanua sumo, nemninue navisaluaena, a pe nesito m̄al re poli, nesum̄a ga sanene. Ana siraunia, nepisu kilia na p̄a navisaluaena pisape, Ve ovinaia re sur ken yaru ta p̄ena, ana nagane nepisu kilia narui nesape nesum̄a nekilaro ke navisaluaena, ¹⁰ a nekilia sane monar nokus nakoena vanonia, nemare.

Sanene p̄elaga na logearen navisaluaena pe pe mrapa na tolen re si malena poli, ana navisaluaena naga pimi sane pe kieta mrapa na marena rui. ¹¹ Nanua sumo, to m̄ape navisaluaena naga pe mrapa na malena, ana nanene naga kieta nasinenanena viowa na kilaen mlamulena ga na p̄a kilali ita, kila tesitom sanene. Ana pe sa re nene poli, komin na p̄a tekilaro navisaluaena nene, ana mligan ita e mrapa na marena rui. ¹² Naga ke narui yum̄aena na p̄a navisaluaena sum̄a kila, ana pe nepisa re nesape piowa poli, komin navisaluaena naga pe wa na pe wa, a kana visena lala apo a amesmes ruru nenaga.

13 Ana pona laḡasa aviun naviunena yo, avisave visae lelaga naḡa navisaluaena naga pe sur wo tai, ana sanape naḡa kila ke yar la monar awar nakoena na marena? Ana peraga, pe nepisa re nesape navisaluaena nene monar kilamaḡ ita poli, ana kieta nasinenanena viowa nakilaroen navisaluaena la nene, naga ga kila. Visena na visaluaena la apogaga, ana pogos naḡa nekila mlamulen viowa, in ga nemligan inu e mrapa na marena. Visae ve navisaluaena re nene, taḡatete tekilia tevisave mlamulen viowa naga ya ne, a yoko teninue tevisave ya ne po a ya ne piowa. Ana pogos naḡa navisaluaena sumalu sumā ga, kila meraravan ruru pan ita sape ḡelaga na kilaen mlamulen viowa naḡa sike e ita, piowa na piowa.

Suri lua apilup loyuma e sitomena kiena yaru

14 Sa naḡa nepisa, navisaluaena kiena Mosis na pe wa paḡisi, molue kome Ninuna ne Ntewa pimi, ana in na nepisu sane kiau ḡelaga pe pe wa re nenaga, in na nesuma nemiyumaḡe taveve ga kiau nasinenanena viowa lala. 15 Sur viowa la naḡa nesuma nekila ke ne, pe nekilia ruru re poli ama nekila sanape, pona ama nekila vanon ya, komin sur wo naḡa sineun nesape nekila, ana pe nekila re poli, ana

sur viowa naḡa pe sineun re kilaen poli, naga ke nane nekila ke narui.

16 Nanene narui, nesape navisaluaena kiena ne Ntewa po paḡisi, komin naḡa monar navisaluaena sumā ga vena visaluḡaren kiau napiowaena la nene, naḡa sa naḡa nepisa ke nene, yepmavin kilaena, ana nesuma nekila maḡa. 17 Sanene, pe in re naḡa nesitom kilaen napiowaena la nene poli, ana ḡelaga nasinenanena kilaen mlamulen viowa naḡa sumā miyumaḡe manene laa e kiau malena, naga ke narui naga sumā kila. 18 A kiau ḡelaga na kilaen mlamulena viowa nene, pe nepisuli re nesape naga kila sur wo tai se kiau malena poli wa. Yam moki kiau nasinenanena pisape nekila sur wo, ana siraunia, pe nekila re poli.

19 Sa ke naḡa nepisa ke narui, pe nekila re na-woena naḡa sineun kilaen poli, ana napiowaena la naḡa pe sineun re kilaen poli, sur nene naga ke nane nesuma nekila ke narui. 20 A visae nesuma nekila ke napiowaena la naḡa pe sineun re kilaen poli, nanene kana kinasa sane pe nekila re po poli, ana sur taḡena sumā maḡaran ke sape nekila, nane ḡelaga na kilaen mlamulena viowa naḡa sike e kiau malena.

21 Pelaga na kilaen mlamulen viowa nena, nepisu sane naga navisaluaena

m̄arera taḗena sina ga tai naḗa suḗa miyuḗae ke e inu. Pona pogos tai sineun nesape neyuḗaen suri wo tai yo, ana sitomena viowa sike ga lavisi, kilali naḗa were inu neva neviowa sina ga. ²² Pogos moki, e kiau sitomena in ga taaga, nesuḗa nesitoḗal ke suri la naḗa Ntewa pisa, a nepisu kiena visena lala apowo paḗisi, ²³ ana nemloge e inu sane visena taḗena si tai naga ḗena suḗa pis. Naga nane ḗelaga na mlamulen viowa, naḗa naga suḗa m̄areran inu vena nesu vatanon m̄areraena na kiau nasinenanena piowa lala. Naga sane nasinenanena viowa la nene asike e tasneu, asuḗa akila ke pupia mara amio nawoena la naḗa asike e kiau sitomena.

²⁴ Kei, sitomena wo amio ḗelaga viowa, lalua asuḗa apeveyu ke e in sanene, nemloge piowa paḗisi, nepisu kieta malena e yomarava na tolana marena nini m̄arera paḗisi. Ana ane yoko kilia iila ita, ane yoko werelua ita e naloge viowaena nene? ²⁵ Kieta malena m̄arera paḗisi naḗa, komin e kana lepas ne tai, kieta sitomena sinenan sape logear navisaluena kiena ne Ntewa, ana e kana lepas ne komḗasa, ḗelaga na kilaen mlamulen viowa suḗa miyuḗae ke e tasneta.

Ana lelaga, potena paḗisi pa Ntewa, komin naḗa naga pitetalia kieta Suḗe Yesu Kristo pitomi, naḗa yoko iila

ita, werelua ita vetan naloge viowaena nene, tamalia ita.

8

Malena wo amio Ninuna Wa

¹ Kristo Yesu pitomin tamalia ita, ana kila sane ita naḗa kieta malena su ruru sike amio naga rui, yoko Ntewa taḗatete la nakoena van ita pog tai.

² Nanene komin nanua sumo, tesike e malena viowa naḗa ḗelaga na mlamulen viowa pa metava, a naḗa pisaar marena pan ita, ana siraunia, Yesu Kristo ḗerelua ita petan malena nene, mligan ita tesike e mrapa viu taḗena tai naḗa tekilia tetol malena wo naḗa Ninuna Wa mlavia.

³ Yar la asuḗa aḗion ke nalogear ruruen navisaluena kiena ne Ntewa vena atol natamaliaena ea, ana akila ḗele ga vanon yaru naga ḗarin m̄arera paḗisi. Ana ya naḗa akila ḗele ga, Ntewa ga kila. Naga mligan narina Yesu pitomi e yomarava, kila tasnena a kiena malena maran taaga sa ke ita li na mlamulen viowa lala. Ana Yesu pitomi tam̄an tasnena a kiena malena nene, sane kupāpaena tai vena weluaen nakoena na kieta mlamulena viowa lala. ⁴ Nakoena na kieta nakilaroen navisaluena, naga ga ḗaria, kila ita temesmesu rui e visuena kiena ne Ntewa, ana nagane pe temial re si e ḗelaga naḗa mlamulena viowa suḗa

þuarar itania, ana tekilia teyaloro ga e þelaga naþa Ninuna Wa suþña susumon ita ke ea.

⁵ Yar naþa suþña mialoro taveve ke þelaga na mlamulena naþa naga paeme amio, kiena sitomena suþña pulen nasinenanena viowa na yomarava, ana yar naþa suþña mialoro taveve ke Ninuna Wa, kiena sitomena pule mamaga e sur wo la naþa Ntewa sinenania. ⁶ Nasinenanen maneneen þelaga viowa lala e yomarava nini, naga pe mrapa na marena, ana nasinenanena maneneen þelaga wo kiena Ninuna, naga pe mrapa na suþñare, pe mrapa na malena.

⁷ Yar naþa kiena sitomena sinenan manene þelaga na sinenanena viowa, naga pe nasinekar kiena ne Ntewa nenaga. Pona pe sinenan re vatanonen navisaluaena kiena ne Ntewa la poli yo, pona visae peraga, pona sinenan mña vatanon yo, ana komin naþa naga pa piowa manene la rui pano-o, ana yoko vatanon þele sina, ana naga pe yar na sanene narui.

⁸ La naþa amiyaloro ataveve ke þelaga na mlamulen viowa naþa apaeme amio sanene, taþatete akila sur tai naþa yoko Ntewa kilia kekarania.

⁹ Ana ko naþa visae Ninuna ne Ntewa teke e ko, ve oyal re si e þelaga na mlamulen viowa naþa opaeme

omio, ana monar osumña oyal e mñareraena kiena Ninuna naþa Kristo mla pan ko. Ana visae yaru tai suþña ga naþa Ninuna nene ve to re si e naga, yar nena pe pe kiena re Ntewa poli. ¹⁰ Pelaga na mlamulen viowa na yomarava nini kila sane ita make ga tasneta monar mare pogos tai, ana ita naþa Kristo sike e ita, naga kila ita temesmesu e marana rui, ana yoko ninuta mal lue ga. ¹¹ Ninuna ne Ntewa naþa kila malia si Yesu petan marena, nane ninuna ne nane teke e ita narui, a yoko kila mñena wo ve sanene van ita. Pe sur korena ga naþa tasneta mare, ana Ninuna Ntewa naþa sike e ita yoko kila malia ita sina.

¹² Erau lala, Ntewa kila po paþisi na pan ita sanene, ana kila sa naþa kieta pupia lapui sike e naga narui. Sanene, popon telamaran si sur wo vania, ana pe pon re si teyaloro tetaveve kieta þelaga na sinenanen mlamulena viowa poli. ¹³ Pelaga na mlamulena viowa naga pe mrapa na tolen marena, ana yar naþa sinenan yali taveve mrapa na malena, naga monar tamñan Ninuna yuþñae ea, iila vena te plan nasinenanena viowa nakilaen mlamulena viowa vetan kiena malena.

¹⁴ A ita naþa temlogear pulgona ne Ninuna Ntewa sanene, ita ke la nene narui tepe narina ne Ntewa lelaga.

15 Nanene komin naña Ninuna ne Ntewa pe kila re tepim sane tepe yar na yuñae korenan re poli kiena ne Ntewa, ana naga kila sane Ntewa kuslua ita tepe kiena, tepim tepe narina lala. Sanene, monar ve temaraun re Ntewa, ana pogos naña tevis vania, tekilia tevio sane arimata, tevisave "Ata." 16 Mesmesun ga naña tevio ve sa nene komin Ninuna Ntewa suña pian ita ke narui ana ninuta mēna kilia sape lelaga, ita tepe narina ne Ntewa.

17 Ana komin ita tepe narina ne Ntewa sanene, navisa ruruena wo la naña Ntewa mligan ruru sike ne ve kiena ne narina napo naña Yesu Kristo, yoko ave kiena ne ita narina tañena mēna lala, yoko towaria tevion pae temio. Lelaga naña sane ita mēna monar towar naloge viowaena sa ke ga naña naga p̄aria, ana visae tekekara ga, yoko Ntewa kila wo vaṗisi van ita maran taaga ve sa naña kila po pa Kristo.

Yoko wo vaṗisi va yeririna lelaga kiena ne Ntewa

18 Nagane e yomarava nini tesuñia tepane ke pog m̄arera la nene moki, ana visae kieta sitomena la su ga e naurarena naña yoko imi sirau, nekilia nevisa nevisave e kiau visuena, naloge viowaena la na nagane, ape suri korena ga. 19 Naloge viowaena la nene suña tol ke sur

make ga naña Ntewa siia, a sur punu ga suñate ke ga wa, sinelan manene la asape popon legiena maro imi, vena Ntewa kipian ga na wa naña sape a la ne ape narina kemua lelaga. 20 Nanua sumo, pe naloge viowaena re poli, vanon Ntewa si sur punu ga apoga ga, ana siraunia, asuñia apim apililua, apororowaia, apioyowa sanene pano-o, sur make ga pe su re si sa naña naga sinenan poli. Naga tañan sape ve sa nene e yomarava, vena kilaen ve sa naña yoko yeririna lala monar asitom asave monar awasine ga naga. 21 Sitomena nene yoko monar sike e narina lala, naña monar alelaga avisave yoko sur la taṗatete asu m̄a sanene silaga, monar asitom̄al asave pogos tai yoko naga kila sur la punu ga naña naga sii la aim awo sina, atol kiena naurarena, sa ke ga naña ita narina la nene yoko tetolia.

22 Ana nagane tepisu ke yomarava nini na wa, naña siar nanua sumo pimi, sur la naña asike ea asuñia amloge piowa sa naña sira tai sape war narina. 23 A maran taaga sa ke mēna ga ita naña tetol Ninuna Wa sane nalaena p̄esia tai naña Ntewa mla pan ita, naña kila tesitom̄al naña p̄isi na nalaena keviu imi sirau na wa. Ita mēna ga, tagena sike e losineta la na wa, a tekilia

sa naþa yoko teloge viowa mña vano-o tol pogos naþa Ntewa wereplan ita vetan yomerava. Sinetan manene sur nene paþisi, komin ita na sane ninis la naþa kus plan la ga. Ana e poglis nene, yoko teloge ga wo na wa sane ita tepe narin kemua la lelaga naþa teva tesike nena temio e kiena yo napo.

²⁴ Sur ne nanene naga tamalia ita vanonia, a siar e pogos nene pimi, tesuþña temlelaga ke mñarera e kiena navisaarena naþa sape yoko naga kila wo van ita ve sanene. Temlelaga mñarera e naga komin pe tepisu re poli wa, ana pogos naþa imi mñalivi, yoko taþatete si tevisave telelaga tevisave ve sanape, vanon sane ve sanene narui. ²⁵ Ana pe tepisu re sur nene poli wa, ana monar telelaga mñarera sane yoko ve sa nene, a monar tekila kieta sitomena la ve piyavi vena suþñateen vano-o kilamarata la visu ga na wa.

²⁶ Pogos naþa tesuþñate ke sanene, pogos tai sineta marenia a yepeta malumu, ana silaga Ninuna Wa suþña miila ita, pogos tai sinetan tesape telen wo pog mñarera lala, ana temloge piowa manene narui tekilali naþa tepis, toþmal þele visena napo navisaena. Ana e pogos nene Ninuna Wa kilia imi, kus leleta narui naga lenin kieta e tagena la naþa apisawal ke kieta sitomena la naþa visena la pe torokin

re avisa poli. ²⁷ E pogos na sanene, Ntewa kilia make ya naþa sike e losineta lala ita kiena li na lelagaena lala, a kilia naþa Ninuna suþña mlenwo ita ke lala, naþa suþña pisa ke ga sur la naþa mesmesun nasinenanena naþa sike e sitomena kiena ne Ntewa rui.

²⁸ A e pog mñarera naþa tepanea, e ya naþa yoko imi mñalivin ita, tekilia tesape yoko Ntewa kila sane e kana luasa, yoko woga ga van ita naþa sineta si naga. Naga kila sanene komin naþa mligan plan ita sumo rui vena kila kiena yuþñaena wo lala e kieta malena. ²⁹ Naga kilia ruru ita nakonua konua rui pimi, mligan ruru kieta mrapa nakonua rui, ana kila kieta malena þar nono na narina naþa Yesu. Sanene, ita tepe puruvi a tepe vineta lala e mratava taaga, naþa Yesu naga sane kieta puruvi nasumo.

³⁰ Nane yuþñaena wo ne nane Ntewa kila pa yeririna la naþa mliganar la vena ave kiena namratava lala. Naga pio la vena aim puna, kila la ape mara wo amio naga, a kila sa naþa yoko atol kiena naurarena e legiena naþa yoko imi.

Sinesiena wo kiena ne Ntewa

³¹ Sur la nene akila merarava sane Ntewa sike amio ita, suþña kila ke po pan ita, a visae ve sa nene yoko tevisa si ya ne? Visae Ntewa sitom visae visir plan ita, yoko ane

kilia kila si teloru? ³² Tepisu naña Ntewa sinen miye ita manene pano-o tañan sape aweñar narina vanon ita, ana visae kekaran naña kila pupia yuññaena wo van ita sanene, yoko kekaran mēna la sur nowo tañena la van ita. ³³ A nanene Ntewa suña kila ke pan ita rui. Naga ga mligan lua ita vena teve kiena narui, ana yoko a si naña visave ita pe tetorokin re toñalivi e marana poli?

Ntewa ke narui naña suña pisa ke sape ita temesmesu temio naga rui, ³⁴ ana a si naña visave monar towar nakoena vanon kieta mlamulena viowa? Pe yar re tai po, okilakan naña Navisaarena Yesu kila sur make rui. Naga mare wo ita, siraulia mal si petan marena, siraulia pāsūpea pa teke tano e kiena lele wa ma metava amio Ntewa, a nagane pisawal ita ke pa Ntewa vena Ntewa viewo ita. ³⁵ Kristo sinen si ita manene sanene, sur ya si naña yoko kilalua ita si vetan kiena sinesiena nene? Pe sur re tai poli.

Pogos tai, yuññaena la urmi pan ita, pona yar la akila piowa pan ita. Pogos tai, tetol pog mārera, pona pe kata kinanena re poli, pona pe mātata kulsota re poli. Pogos tai temaraun kieta malena, pona takan playu na mara, ana peraga, silaga Kristo sinen sii ita, a kieta malena su ruru sike e limana. ³⁶ Nanene sa naña Parin Suñe Tepet pisa nakonua rui, e pogos

naña naga mēna kus ke pog mārera, naña sape:

“Kioña kia sike e imimi, ana sinelan asape awe moñar imimi lue ga, apisu imimi sane sipsip la naña asvilevilesan vena asiro kolmekila.”
Yauena 44:22

³⁷ Ana sur kar la ne sanene, akilia aimi añalivi pun ita, ana pe suri korena ga, e sur punu ga na sanene, sinesiena kiena Kristo sike e ita, ana tesulue ga metava, tetaulu silaga. ³⁸ Nekilia nevisaar nena van amiu, nevisave pe sur re si tai poli naña kilia kila Ntewa pe sinen sii ita re si poli. Visae temali pona temare, visae navisi la asike amio ita pona yermare la apimin ita ke yo, visae tevang sur la naña asuñña añaliv ke nagane yo pona tevang sur la naña yoko añalivi e legiena na pimi ke ga wa, ³⁹ a visae namāreraena wo lala na yo na metava asike amio ita, pona namāreraena viowa na yo tano asuwo ita, ana pe sur re nena tai naña Ntewa siia kilia lalua kiena sinesiena vetan ita. Kristo Yesu kieta Suñe mligan sinesiena kiena ne Ntewa sike e kieta malena la rui, ana sulue na sike ne.

9

Pol mloge piowagan naña le Yu la pe sinelan re alelaga sane Yesu naga pe kiela Navisaarena poli

¹ Erau lala, nagane sineun nesape nevisayu e lepas nene naña ita le Yu lala,

tesape ita na yeririna kiena ne Ntewa lala, ana ita mokliu naña pe sinelan re Yesu poli. Ana yoko ve sanapen la nene? Pogaga, tařatete nevisokan, monar nevisawal van amiu e sitomena wo lařasia naña Ninuna Wa kian pan inu e lepas nene rui, ² ana lelaga, visena la nene, akila sane kiau sineyeena a kiau naloge viowaena keviu pařisi, pe pito re nena tano poli.

³ Nanene komin nagane, kiau malena sikol amio Yesu rui, ana nepisu sane nam-ratava tařena na Yu la naña ita kuruta taaga, kiela malena pe sikol ruru re amio naga poli wa. Visae nek-ilia nourelua in sina vena la akilia aimi akus leleu, yoko nekekara ga, ana tařatete ve sanene. ⁴ Asitomyuli sur wo la naña Ntewa kila pan ita le Yu la rui, naña la na sanini:

ita ke narui naña Ntewa mliganar kata apua lus nae Israel lala sape ape kiena yeririna lala,

ita ke narui naña Ntewa pisawal sape kuslua ita sane tepe narina lala,

ita ke narui naña Ntewa mligan kapi vivaga na kiena urarena sumon kieta yeririna lala e yomema nanua sumo,

ita ke narui naña Ntewa suña kila ke navi-ranarena lala amio kieta yermarua lala,

ita ke narui naña Ntewa mligan kiena navisaluaena sike e ita,

ita ke narui naña pupia

yuña wa na lotunen Ntewa sike pun ita, ita ke narui naña Ntewa pisaar navisa ruruena moki pan ita,

⁵ ita ke narui naña tepio yermarua wa nasumo lala, sane Epraam, Aisak, amio Sekop, ape kata apua lala,

ana metavan sur make la nene, ita ke narui naña Yesu molue kome kieta lusia, naga paeme e yomarava nini sane pe yar ga, ana naga mēna pe Navisaarena, naña naga Ntewa naña pe suřen sur make ga, naña popon teyeluar naga silaga vano-o ve uro re.

Sur wo ne naga ke la nene narui naña Ntewa kila ve kiena ne kiena yeririna lala, ana ita mokliu naña tepisui a sane ape sur koren ga.

⁶ Nane la naña pe asikol la ruru re amio Kristo poli, a pona yeririna lařasa asitom asape suri nene kila sane navisaarena naña Ntewa mlařesania pe mālivi re sa naña naga pisa poli, komin naña naga pisaar sape yoko kiena navisa ruruena su make amio lus kiena ne le Yu lala. Ana pe sa re nene poli, komin sur tařena tai naña pa sanini, sape la naña amolue akome lus kiena Sekop, naña tepio la le Israel lala, pe la make re naña Ntewa sape la ape kiena yeririna la poli. ⁷ Pona tevisa si visena nene kome mrapa tařena, tevisave la

naþa apisape la kala apua Epraam, pe la make re naþa tesape la amolue e kiena lus nena napo poli. Visena tai naþa sike e Visena Wa pisa sanene rui, naþa Ntewa pis pa Epraam, e lepas na narina lua nene Ismael amio Aisak, pisape

“Kiomã lus napo lala yoko amolue ga akome narumã naþa Aisak.”

8 Ana visena nene, kana kinasia sape la naþa Ntewa pisu sane asike loyumã e þegas nen lus kiena ne Epraam kemua lelaga, la ape ai? Pe yeririna make re naþa amolue e lus kiena ne sisi taþena la naþa naga þar la poli, ana la naþa amolue e lus na nisisi naþa Aisak, naþa Ntewa kilologia naga, pisaaria sape yoko kiena navisa ruruena lala sike e la.

9 Tekilia tesape sanene, komin nanua sumo Epraam mla sisi pa kiela sira na kilavanen yo mla naþa Aka, ana sisi nene pe naga re naþa Ntewa sape yoko lus kiena ne Epraam napo la amolue akome poli. Ana Ntewa piranar ruru sina ga amio Epraam, pisape “Epraam, yoko nekila van ko omio womã Sera, sane e kas na sirau, e pogos na sanini, yoko amiu lua awar narimiu tai, ve yermene.” Ana siraunia, sanena naþa Ntewa pisaaria, ana narina ne Epraam nene, Aisak, naga ke narui naþa ita lus kiena ne le Yu lala tomolue tokom

ea.

10 A pogos naþa tepisu Aisak pimi keviu, naga narina tai, a maran taaga ke sina ga, wona naþa Repeka naga þar kaora Sekop amio Esau, 11 a pogos naþa lalua pe apaeme re poli wa, Ntewa pisawal ya naþa maplar pe kiela lalua. Naga pe sitom re sape kila taveve kiela yumãena lalua poli, sape lalua akila suri piowa pona po, ana kila ga taveve ya naþa sinenania. 12 Ana pogos naþa lalua apaeme, Esau na paeme þesa a Sekop paeme maro, ana Ntewa pisa pa kala auia, pisape

“Naga naþa paeme maro yoko taþatete logearia naga naþa paeme sumo, ana naga naþa paeme sumo, naga monar logear naga naþa paeme maro.”
Nas 25:23

Sanene, pe þelaga marua nataveveen re nene poli, ana kila meraravanja sape Ntewa pisirlua yaru, pe taveve re sitomena kiena yaru poli, ana taveve ga ya naþa Ntewa maplaria. 13 A sur nene merarava po paþisi e lepas kiena kaora lalua nene, komin naþa visena taþena sike e Nasiriena Wa rui, naþa Ntewa pisape

“In na nemligan Esau naþa naga paeme þesa, naga sike vatano, a nemligan Sekop naþa naga paeme maro, naga to metava.” Mal 1:2,3

14 Pogaga, Ntewa pisawal kiena sitomena merarava ruru sanene, ana yoko tevisa si ya narui? Pisi na tekilia tevisave p̄elaga kiena ne Ntewa nene piowa ga, pona naga kila pe mesmes re e lepas kiena lalua nene poli yo? Ana peraga, tařatete tevisa kare Ntewa sanene. 15 Nanene sa ke sina visena tařena tai nařa pisa pa Mosis nanua sumo rui, nařa sape

"In na nepe Ntewa, sike ga e inu sane nekilia sineu ye yar ai nařa sineun nesape sineu yea." Nau 33:19

16 Sanene na Ntewa sumã pisa plan kiena yeririna lala, pe taveve re nařa la ga apisape naga monar visa plan la, a pe komin re nařa la ařion asape akila sur lařasa nařa sane pona naga kekarana la vanon yo, ana naga pisa plan yar lala taveve ga kiena sineyeena e yar la nařa asuã amloge ke piowa.

17 Pelaga kiena ne Ntewa nene, nařa kila ke pa yaru taveve ga kiena sitomena, tepisu naga kila m̄ena pa Parin Supe Pero nae Isip, e pogos kiena Mosis nanua sumo. Pero nene naga yaru tai nařa naga kawē ke yeririna kiena ne Ntewa, ana Ntewa pialua naga m̄ena ga vena kilaen kiena yuãaena tai, sa nařa Nasiriena Wa pisape, nařa Ntewa pis pa Pero, sape

"In na nepisirlua ko vena ovisuar kionã pur-

vanua. Yoko ne-tarman ovilaven kionã mareraena sumo wa, ana nekila vena yoko ovisu ga kiau mareraena na wa nařa naga marera manene taulu kionã narareraena, a sineun nesape yeririna la nae yo make ga yoko akilia sane narareraena make ga sike ga e inu." Nau 9:16

18 Sanene, tepisu yar nařa Ntewa sinenan sape ve lemam vania, yoko monar ve sa nene, ana visae yar tai ve sa Pero nene nařa Ntewa sinenan sape kila kiena sitomena marera vania, ana monar ve sa ga nene narui.

Sinemimiena kiena ne Ntewa, amio kiena lemamiena

19 Nepisa sanene, yoko monar sitomena tai va metava nařa yaru kilia viun sanene, visave "Visae e yaru lařasia, Ntewa ve lemam van la, a e yar tařena lala, naga sumã kila ke nařa kiela sitomena marera, yoko ve sanape narui? Visae Ntewa naga ga narui nařa sumã kila sape teim towo pona teim teviowa, ana pe pon re naga liřere ita si poli. A visae Ntewa sinenan kila van ita taveve ga kiena nasinenanena, yoko tařatete tevisaluřar tevisave ve kila re."

20 Ana yoko nevisatame visena la nene, nevisave: Peraga Mara, ko na ope yaru ga, ko ope sur tai nařa Ntewa siia, ana ve okilali

re naŕa ovisatamē kioṃa visena tometavan si naga. Naga sa naŕa visae yaru tai suṃa yuṃaen porotano ve piaki. Pogos na yuṃaen pae porotano ve piaki ŕisi, ana piaki na porotano nene taŕatete kilia suṃalu vis siṃa vania, visave, “Ei, komin ya ne omiyuṃaen kare in ga sanene?”

²¹ Ana taŕatete ve sa nene, komin yar naŕa miyuṃaen piaki naŕa e porotano, sike e naga kilia yuṃaen taveve kiena sitomena. Visae la narin porotano tai, kilia yuṃaen piaki taŕena ve lua ea. Tai, piaki nowo tai naŕa popon ŕaŕagena lala, a taŕena, naga piaki tai na uṃa ga.

²² Ana Ntewa ṃena ga kila sa ke nene, naga ṃena ga kiena sur lua naŕa naga sinenan sape kila. Naga sinenan sape kila yar la avisu kilale naŕa naga sinen kar ke kiela mlamulen viowa lala, vano-o yoko kilia la ruru nakoena van la amio kiena naṃareraena. Na konua rui, naga kila kiena sitomena piavi pan la, ana nagane sike ga e naga kilia kila van la ya naŕa naga sinenania. ²³ A sur taŕena naŕa naga sinenan sape kipian la, naga kiena ŕelaga wo la naŕa naga sinenan sape kila van ita la naŕa naga pe lemam pan ita. Nanene naga sane nakonua rui, naga kila ruru kiena navisa ruruena nowo lala, a nagane miyuṃaen ita sa naŕa pias

nen sur naŕa kon la vito ea. ²⁴ Naga kila po pan ita sanene komin ita ke narui naŕa naga pio ita, naŕa ita laŕasa tomolue e lus kiena ne le Yu lala, a ita laŕasa pe tomolue re e lus kiena le Yu la poli. ²⁵ A ŕelaga nene sane visena kiena ne Ntewa tai naŕa Navisawalena Osea pisawal e kiena tus, naŕa Ntewa pisa sanini, sape

“Pegas nen yeririna la naŕa nanua sumo la pe ape kiau re poli,

a nagane nepio la, nesape ape kiau yeririna lala.

Purvanua nene naŕa nanua sumo pe nesitoṃal re poli, a nagane nesape nekekanan paŕisi.”
Ose 2:23

²⁶ A yam si tai, Osea pisawal taŕenan si visena kiena ne Ntewa tai, naŕa pisape

“Nanua sumo nepisa pa yeririna nae e yo nini lala nesape la pe ape kiau yeririna re la poli,

ana nagane, yoko aloge naŕa asuṃa avio la asape naruu lala, in na nepe Ntewa naṃareraena, nepe Ntewa naŕa nemali.”
Ose 1:10

²⁷ A visena taŕena pisa ke ṃena sanene, naŕa sike e tus naŕa Navisawalena Aisea siriyuia. E yo nene, naga mloge piowagan le Israel, pisape

“Pegas nen yeririna nae Israel lala la moki manene laa, la moki na moki, la sane mras nen

*none naḗa yar wolo
ḗele ga.*

*Ana suri piowa tai, yoko la ve
lua la ga naḗa Ntewa
tamalia la.*

²⁸ *Ana e pogos na liḗereena,
yoko naga la nakoena
va yeririna lala na
yomarava. Yoko ki-
lapel ga la ve moki
naḗa pe amlelaga re
poli.” Ais 10:22,23*

²⁹ *A nanene yoko ve sa
ga visena taḗena naḗa Aisea
siriyu nanua sumo rui, naḗa
pisayu pogos na liḗereena
naḗa yoko imi, naḗa visae
Ntewa ve sinen ye re yaru,
yoko la punu ga akokovio.
Visena nene pisa sanini,
sape*

*“Ntewa pitomi amio kiena
yar na mara lala, lav-
isi we moḗar make
ita. Visae ve sinen ye
re narita la naḗa ave-
torokaki, ana mligan
la asikena, yoko kieta
lus la akokovio make
nenaga.*

*Lavisi naga kila van ita
maran ve taaga
torokin ke ya naḗa kila
pa yar viowa la e pupia
yo lua nene nanua
sumo, Sotom amio
Komora, ana siraunia
kila sane ita laḗas
tekilia temal tesike ga
wa.” Ais 1:9*

³⁰ *Pogaga, visena la nene
kana kinasa sanini, sape la
naḗa pe ape Yu re poli, pe
aḗi re yon naḗa ataveve
navisaluaena kiena ne
Ntewa poli vena amesmesu e
marana, ana siraunia, pogos*

*naḗa amlelaga e Yesu, Ntewa
kila la ga apim amesmesu e
marana na wa. ³¹ Ana le
Yu lala, aḗionli naḗa aimi
alogear navisaluaena vena
aimi amesmesu e marana
Ntewa, ana akila ḗele nena
yonia, ana la apiowa ga
narui. ³² Nepisape piowa
pan la sanene, komin
naḗa la aḗilion naḗa aimi
amesmesu e marana Ntewa,
ana la akom e mrapa taḗena,
apa amlor ruru nena ea. La
akome mrapa naḗa asitom
ke sape kiela yuḗaen wo
lala kilia kila aim awo amio
Ntewa, ana pe sa re nene
poli. Monar tesuḗal ga
tese e ya naḗa Yesu kila,
naga ke nene narui kieta
mrapa naimen towo si temio
Ntewa.*

³³ *Visena si tai sike e tus
kiena Aisea, naḗa Ntewa
pisawal ḗakaiwa tai, naḗa
pisayu kilavaru na ḗeren
yuḗa tai, ana kilavaru nene
naga Yesu, sane Navisaarena
naḗa Ntewa mligan naga
pimi. Visena nene pisayu sa
naḗa yar laḗasa pe sinelan
re kilavaru nene poli, ana
laḗasa amlelaga ea, ana pisa
sanini, pisape*

*“Avisu ruruia!
Nesuḗa nepisirlua ruru
kilavaru wo na ḗeren
yuḗa tai, nane metava
e kunus naḗa Saeon e
pupia pulkumali kiena
kiau yeririna lala nae
Yerusalem.*

*Kilavaru nena ḗarera ruru
po, ana yoko yar la
ve moki naḗa yepela
mavinia, atan ḗa lala*

*ea vano-o kila alolor
kar ga va ke ne.*

Ana yeririna la naña ale-
laga e kilavaru nene,
asumálarla aseá, yoko
nekila wo van la
vapísi.” Ais 8:14, 28:16

10

Yesu ga kilia kila ita
temesmesu e marana Ntewa

¹ Erau lala, nemloge
piowagan naña kiau lus
ruru nena lala, sa naña
le Yu lala, pe amlelaga re
poli. Ana sineun manene
nesape monar atol natamali-
aena, nane nesumá nemlen
manene ke pa Ntewa vanon
la ne. ² Asumá aþikeyon
naña akale Ntewa e kiela
malena, ana nepisa lelaga,
amninue mrapa, yoko
taþatete alualia. ³ Nanene
komin ga naña asumá
ataveve ke ga kiela sit-
omena lala, ana yepela
mavin taveveen mrapa naña
Ntewa miyumaenia vena
kilaen yaru imi mesmesu
sina e marana. ⁴ Asumá
amáreran ke ga naña asape
nalogearan ga navisaluaena
naga pe mrapa, ana mrapa
nene piowa rui, komin
naña ita make ga tekilaro
navisaluaena lala. Mrapa
naña tesape temesmesu
temio Ntewa komin naña
temlogear navisaluaena,
Kristo suwo rui, a naga
miyumaen kieta mrapa viu
tai. A nagane, visae telelaga
tevisave Kristo þar plan
kieta mlamulen viowa lala,

ana Ntewa kilia kila ita teim
temesmesu e marana.

⁵ Visae ve tekilaro re
navisaluaena, yoko woga
ga, tekilia teim temesmes
e marana Ntewa komin naña
temlogear navisaluaena,
komin Mosis pisa visena tai
e lepas nene rui, pisape

*“Yaru naña taveve ruru sur
make ga naña nav-
isaluaena nene pisa,
yoko tol malena.” Lev
18:5*

Ana pe yar re tai naña kiena
malena po sa naña Mosis
pisa poli, ana taþatete tetol
malena kome kieta yumaena
wo la naña tekila. ⁶ Nakilaen
sanene, naga mārera paþisi,
ana visae telelaga ga e Kristo
tekilia teim temesmesu e
marana Ntewa, a naga pe pe
sur re tai naña mārera poli.
Sane visena tai naña Mosis
pisa, naña pisape

*“Pe pon re asitom avisave sur
nene mārera paþisi,
ana asumá aviuviun
avisave ane yoko
kilaþesan mrapan ita
vena vaen ma e peni?”
Nav 30:12*

Naviunena nene kana ki-
nasa sape ane kilia va tol
ma e peni were Kristo vitom
tano e nini vena tamalia ita,
ana sitomena na sanene pi-
owa ga. ⁷ Pona aviun nav-
iunena taþena naña sike e
Nasiriena Wa la yo, naña
sape

*“Ana ane kilia vito tano vito
tol yo kiena yar mare
lala ana wasuþe sina?”*

Naviunena nene, kana
kinasa asitom sape Kristo

mare e lak torovia, ana naga m̄ena ga pito sike e lelen marena, ana asitom asape taṭatete yar tai kilia vito si werelua naga e yo nene vena vam tamalia ita, ana tekilia tesape visena la nene pe po re poli. Tekilia ruru rui tesape Kristo molue ma e peni pitomi tano rui, a siraunia mare, ṽisi na naga suṁalu mal sina a pa si ma e peni rui. ⁸ Visae ve sanene, tekilia tevisatam̄e naviunena la nene, tevisa visena taṭena naṽa Mosis pisa nanua sumo, naṽa pisa pisape

“Visena kiena ne Ntewa naṽa pan ita ita yeririna lala sike amio ita rui. Sike e limata, ana tekilia teligan se gota, tekilia teligan ruru se kieta sitomena lala.” Nav 30:14

A visena kiena ne Ntewa naṽa visena nene pisayuia, nane Lologena Wo naṽa mesuṁa melologon ke ne, naṽa pisawal ke sape yar lala monar alelaga e Yesu Kristo.

⁹ A ko ai naṽa olelaga e Yesu Kristo e losineṁa, ovisave Ntewa naga kila naga mal si petan marena, a okekanan naṽa ovisawal e yo metava ovisave omla Yesu pe kioma Suṽe, yoko otol malena. ¹⁰ Nanene komin naṽa visae yar naṽa lelaga e losinena visave Yesu naga mal sina petan marena, a visawal e yo metava visave Yesu naga pe kiena Suṽe, yoko Ntewa ve la re si

nakoarena vania komin kiena mlamulena viowa lala, yoko tamalia naga. ¹¹ Naga nene sane viṽena tai na Siriena Wa, naṽa sane pisayu naṽa temlelaga e Kristo, naṽa pisape

“Yaru naṽa mlelaga ea, naga taṭatete kiena sitomena loru pog tai.” Ais 28:6

¹² Yaru naṽa mlelaga naga pe Yu yo, pona naga pe pe Yu re poli, ana Suṽe naga taaga pe kiela suṽe la punuga, kila make po pan la naṽa atag ke pania. ¹³ Naga sane visena tai naṽa Navisawalena Soel siriyu nanua sumo, naṽa sape

“Yaru ai naṽa vio kia kiena Suṽe, yoko tamalia naga.” Soel 2:32

¹⁴ Ana lelaga, le Yu la mok liu naṽa pe apio re Kristo asape tamalia la poli, ana sanape na sanene? Nanene komin taṭatete avio naga visae ve alelaga re ea, a taṭatete alelaga ea visae ve alogeli re kiena kia pogos tai, a taṭatete aloge kiena kia visae ve yar va lologon re van la. ¹⁵ A taṭatete yar va lologo visae Ntewa ve ligam lua re naga vano, ana visae yaru nene kekanan naṽa vano, yoko ve sa naṽa Siriena Wa pisayu rui, naṽa sape

“Potena paṽisi pa Ntewa naṽa kiena nalologena lala, temloge la amial tam̄in ke ava e kiela mrapplepa la ne, asuṁa apava ke amio kiena

*lologena wo.” Ais
52:7*

16 Nane visena naña yar lañas asuñña apisasa, ana nekilia nesape Peraga, Ntewa suña pitetalia kiena nalologena lala apava ke rui, ana piowa pañisi naña le Yu la mok liu yepela mavin ga logeena. Nanene taveve ke sina ga visena na Siriena Wa tai, naña Navisawalena Aisea tagi pa Ntewa na mava, sape

*“Ake Suñe, mesuñña memlologon mña kiomña visena pano-o, ana sane yar la yepela mavin ga logeena.” Ais
53:1*

17 Ana nagane imimi sanene, mesuñña memlologon ke Yesu Kristo pan la, a pogos naña mesuñña memlologo, lañasa amloge, a pogos naña amloge, lañasa amlelaga.

Komin ya ne omlologon ke pa le Yu la naña apuloyu ke Siriena Wa la rui?

18 Nane nesuñña nemlologon ke pa le Yu la ne, ana yoko naviunena tai kilia kate e nene, sape Pona osuñña omlologon ke pan la sanene komin naña ositom osape pona la pe amloge re ya naña Siriena Wa pisayu poli yo? Ana yoko nevisatañña nesape, Peraga, visena kiena ne Ntewa tol la nakonua rui. La make ga akilia marantaaga torokin ke naña la make ga apisu ke mrae amio kupario a verue lala, sa ke ga naña visena tai e Tus na Yauena pisayuia, pisape

*“Yeririna make ga na yomarava nini wetelu apisu sur la meta e sinapane, a apisu kilalea sane Ntewa sike na, pano-o tol yeririna la e yo la naña asike koperina, la mña apisu kilale asape kiena mñareraena keviu pañisi.” Yauena
19:4*

19 Sanene, sane le Yu lala apisu kilale sur mokliu rui, ana sur viowa tai, la asitom asape Ntewa tamalia la ga yo. A pe apisu kilale re asape Lologena Wo naga kiena yar make ga, komin Ntewa sinenan sape tamalia mña yeririna la naña pe ape Yu re poli.

Ana popon avisu kilale sur nene, komin kiela navisawalena marua lalua apisayu nakonua rui e Siriena Wa lala asape yoko ve sa nene. Mosis ñesa, naña pisayu visena tai naña Ntewa pisa pa le Israel lala, naña sape

“Apisu piowa e la naña pe ape Yu re la poli, sa naña la ape sur korena ga, ana yoko amiu avielue e navisa ruruena la naña yoko nekila van la.

*Amiu asitom asape tañatete la nene akilia akila sur wo tai, ana yoko sine-miu kari la e pogos naña amiu avisu netamalia la mña ga.”
Naw 32:21*

20 A nalua nena, naga Navisawalena Aisea, naga mña suñalu pisawal nena visena

taþena si tai kiena ne Ntewa e marana kata apua ita le Yu lala, naþa Ntewa pisayu la naþa pe ape Yu re poli, pisa pisape

“Nanua sumo, pe akale in re poli, ana siraunia, yoko atañian inu,

nanua pe apiunin re poli, ana yoko siraunia, sinelan asape neva nakaten la.” Ais 65:1

²¹ Ana Aisea siri plan taþenan sina visena kiena ne Ntewa tai, naþa Ntewa pisayu la naþa pe ape Yu re poli, pisape

“Yar la nene asuñã amlogelu inu, asuñã akovenlua inu silaga.

Nakonua rui nepikeþa ga lumãau pan la, sineun nesape awasuþela aimi si pun inu, ana la na peraga narui.” Ais 65:2

11

Le Yu la yepela mavin Yesu, ana Ntewa pe pilon re ñasina pan la poli

¹ Naviunena taþena suñã ga, nane e lepas kiena le Yu lala, sa naþa pe amlelaga re e Ntewa poli, ana naga ñena ga suñãlu pilon ñasina pan la, pona peraga?

Nekilia nesape peraga, naga pe kila re sanene poli komin in na nepe yere Yu na nesike ne, inu ñena ga yermarua Epraam naga pe repiu marua, a in na nomolue e lus kiena yermarua Pensiman, a

nekilia ruru po naþa Ntewa pe koven lua in re poli.

² Sanene, nekilia nesape peraga, Ntewa pe koven plan ita re ita naþa pio ita tepe kiena. Popon tesitoñal Siriena Wa tai nanua sumo rui, e pogos kiena navisawalena Elaisa. E pogos nene, Elaisa mloge piowagan þarmãrera kiena yeririna lala kiena ne Ntewa, ana pisimumu pa Ntewa, sape

³ *“Suþe, kioñã navisawalena lala, kioñã yeririna la asuñã amemoñar la, a kioñã wonta wa lala, asuñã akilarovia, a piowa pano-o nepisu sane in ga taaga nepatanon ko ke narui,*

a nagane in ñena ga, ataveve in ke ne asape alalua kiau malena.” Suþe1 19:1

⁴ Ana e poglis nene, Ntewa pisatañea, sape

“Peraga Elaisa, pe ko ga taaga re poli. Pe okilia re poli, ana e yo nene in na kiau yeririna la tol mañu olua [7000] la asuñã sane ko, naþa pe akila re lotena pa nono navisokanena poli, naþa Paal nene.” Suþe1 19:18

⁵ A nagane, e kieta pogosa, maran taaga ga amio nene. Yar moki liu naþa pe amlelaga re poli, ana ita ke narui naþa tesike ne, ita narin þegas nen le Yu lala, naþa Ntewa pe lemam pan ita,

kian plan ita, narui temlelaga ea. ⁶ Ana popon tekilia ruru tesape Ntewa kian plan ita vanon ya? Pona yar laḡasa asitom ke asape naga kian plan ita komin tekila ke yuḡaena wo la moki naḡa naga kekaran yo. Ana peraga, komin visae ve sanene, kana kinasa sane lemamiēna kiena ne Ntewa pe kila re nena sur tai poli. Ana Ntewa kian plan ita pe e re ga e naḡa tekila sur wo la moki poli, ana kian plan ita e ga e kiena lemamiēna wo pan ita.

⁷ Tekilia tesape ita le Yu lala, ita make ga tesuḡa takale ke mrapa naḡa teim temesmesu temio Ntewa, ana ita lua la ga naḡa toḡalia. Ana visae ve sa nene, yoko ve sanapen taḡena la nene? Nanene kaḡa kinaḡa sane la mokliu naḡa ape ḡaḡarera paḡisi, ana pe amal re mrapa nene po la wa. ⁸ Visena na Siriena Wa tai pisayu la ne sanene, sape

*“Ntewa taḡan la asuḡa ga amio kiela wowe lala,
Ais 29:10*

*ana pimi tol nagane sa naḡa kilamarala la sike na,
ana pe apisu kilale re sur poli,*

*kiligala la sike na, ana pe amlogē kilale re sur poli.”
Naw 29:4*

⁹ A sa ḡena visena kiena Parin Suḡe Tepet nanua sumo, pogos naḡa sinenan sape Ntewa lalua ḡareraena kiena nasinekar lala naḡa asuḡa aḡareran ke naga.

E pogos nene naga piun tai Ntewa, sape

*“Suḡe, kiau nasinekar la nene silaga asuḡa amlogē ke pon kiela pupia ḡaḡagena lala,
ana nesape neviun tan ko vena okila sane kiela na logewoena la nene vim sane suri tai naḡa kila kare ruru la nena, kan la ke sina ga, kila sane pe apisu kilale re sane kiela nasinekar la asike ga lavisin la poli.*

¹⁰ *Ana popon sane okila kilamarala imi ḡala, vena ve akilia re si avisu kilale sur lala,*

*a okila naḡa kiela nasinekar la aḡareran naḡa ayuḡae koren ga, awar sur urmi la e ḡasila.”
Yauena 69:22,23*

¹¹ Ana e lepas kiena ne le Yu lala, Ntewa pe koven plan la re poli, ana pe lelaga naḡa, la apiowa towe ḡaga. Ana napiowaena kiena la nene, kila narui Ntewa tamalia la naḡa pe ape le Yu re la poli, a pogos naḡa le Yu la apisu Ntewa sinena miye ḡena yaru taḡena la nene, apisu piowa ga, apieluen la, ana kila aḡareran vena la ḡena ga monar aim amesmesu ke sina ga amio Ntewa. ¹² Ana na nene kana kinasa sane le Yu lala kiela ḡelaga nene, naḡa pe amlelaga re e Yesu poli, nanene kila mrapa na viewoena a navisa ruruena kiena ne Ntewa kilia imi tol la naḡa pe ape Yu re poli.

A visae le Yu lala, la mēna alelaga, alelaga vano-o tol marana naŕa Ntewa pisaaria, yoko kilia kila naŕa kiena navisa ruruena lala aim ave keviu manenea.

¹³ Pogaga narui, sineun nesape nevisa narin visena tai e lepas na pun amiu la naŕa pe ape Yu re poli. In na nepe nalologena naŕa Ntewa pisirlua inu vena navanon nevisawal kiena lologena wo van amiu, a naga pe yuŕaena tai naŕa noŕareran ruru kilaena, komin naŕa nepisu po paŕisi. ¹⁴ Nanene komin naŕa nepisu sane pog naŕa nemlologon ke pan amiu naŕa pe ape Yu re poli, asuŕa amlelaga, a kila naŕa imimi le Yu laŕasa sinelan asape la mēna monar ava loyuŕa ea, ana la mēna amlelaga.

¹⁵ Sumo na, Ntewa pilon māsina pa le Yu lala, a nanene kila naga pisu la naŕa pe ape Yu re poli la rui, naga sitom sape kilia kila kiela mrapa aim ave mara wo sina amio naga.

Ana visae le Yu la avilon la a la mēna awasuŕela puna Ntewa, vera wo na wo, komin nagane la sa ga naŕa amarmare rui, ana visae alelaga e Yesu, yoko aim sa naŕa amal sina. ¹⁶ Yoko nevisa ŕakaiwa tai e yo nene e lepas na mralaki ŕesia naŕa tesuŕa toŕar pa e yuŕa na leniena, tepisa potena vanonia pa Ntewa, tewardwoia ve sur wa. Ana

pogos naŕa toŕar ŕesan mralaki pa Ntewa, kila sane mralaki taŕena mēna la naŕa pe toŕar re poli, lala mēna ape wa, ape kana Ntewa. Ana yermarua kiena le Yu lala, la sane mras ŕesia naŕa apa ŕesan e yuŕa mēna Ntewa, a kila sane le Yu la naŕa aim sirau, la mēna ga ave kiena ne Ntewa. A yermarua la nene, la sane purlaki tai naŕa suŕa kapur ke e lokove kana Ntewa, a visae purŕesa ve kana Ntewa, yoko korowas la naŕa avim sirau la mēna ave kiena ne Ntewa.

¹⁷ Sanene, purŕes nene amio korowas lala naga kana kinasa yeririna kiena ne Ntewa lala, sane le Yu lala. Ana siraunia, Ntewa pisu korowas laŕasa piowa ga, ana peve plan la, a pa te plan ruru korowas nen laki taŕena tai naŕa sike ga yoŕarua, ana ŕar pimi, a teruruia piar la panon purŕesia naŕa sike lokove, veŕa kus lelen korowas la naŕa peve plan la rui.

Ana korowas taŕena la naŕa pimi sikol e purŕes nene, kinasa sane kam la naŕa pe ape Yu re poli. Amiu na pe amolue re e purŕes nen yeririna kiena ne Ntewa napo poli, ana naga sine-nan sape amiu mēna monar asikol amiu amio la loyuŕa e kana lokove, vena amiu punu ga awar kiena navisa ruruena lala.

La naŕa pe ape Yu re poli,

la tařatete akilia awarwarlan nařa Ntewa řere la

¹⁸ Sanene kam nařa pe ape Yu re poli, kam na monar ve awarwar amiun re nařa Ntewa piran amiu amio kiena yeririna lala, komin nařa amiu na pe ape purřes re poli, ana kam na ape korowas ga la nařa Ntewa sikol amiu e purřes nene nařa sike pa sumo rui. Korowas lala pe kila re purřes mali poli, ana purřes ke narui naga sumã kila korowas la amali. ¹⁹ Sa nene, pe pon re kam na asitom asape kam apo poli, ana asape, Ke, Ntewa na sinenan imimi pařisi, ana peve plan korowas lařas petan purřes nene vena kila sane mekilia mesikolia.

²⁰ Lelaga nařa Ntewa peve plan korowas lařasa, ana kila ga pa le Yu la nařa pe amlelaga re e Yesu poli, a pe lelaga nařa sinenan sape amiu akilia asikol amiunia, ana nanene pe komin re nařa akila yumãena wo lařas poli, ana komin nařa asumãl m̃arera e kiamiu viawaena e naga. Sanene, ve avilaven re nařa apimi sane yeririna lala kiena ne Ntewa, ana monar ava ruru amiu asumã asitom ruru sur wo nene nařa Ntewa kila pan amiu. A monar maramãe amiu ruru m̃ena ga, ²¹ komin nařa sane Ntewa koven plan korowas marua la nene nařa kiena yeririna la nařa pe amlelaga re poli, yoko naga kilia koven plan

amiu m̃a nenaga korowas viu lala maran va taaga sa ke ga, visae ve amiu awar re mras wo lala. ²² Sanene, e nene tevisu řelaga kiena ne Ntewa e lepas ga luwoka. E kana lepas tai, kiena sine-mimiena m̃arera na m̃arera pan la nařa amloru, nařa pe asmãl re m̃arera e naga poli, sane le Yu lala. Ana e kana lepas tařena, naga pe lemam pařisi pan la nařa pe ape Yu re poli, naga la nařa akekarania a asumã ataveve ruruia. Ana la m̃ena ga visae ve asumãlu re m̃arera, naga kilia te plan la sina ga vetan purřes wo nene nařa asumã asikol la ea.

²³ Nanene naga kila pa le Yu la rui. Pe amlelaga re poli, ana te plan la, ana visae avilopu la ga, akilia awasuřela, ana Ntewa kilia sikol rurula sina e purřesa sane kiena yeririna ruru nena la napo. ²⁴ Naga kila sanene rui pan amiu nařa pe ape Yu re poli, komin nařa amiu na sane korowas nen laki na yomãrua, ana naga řere amiu apimi, sikol amiu e purřesa nařa sike e kana lokove, ana asikol amiu amio navisa ruruena nařa naga sinenan sape la van kiena yeririna lala. A visae kila van amiu řisi, yoko kilia kila m̃ena van le Yu la nařa naga te plan la, komin naga kekarãan sikol ruru la sina e purřes nene nařa asikol e naga nanua sumo rui.

Ntewa sinenan sape le Yu lala atol natamaliaena

25 Erau lala, sineun ne-sape nevisawal van amiu la naña pe ape Yu re poli, sane monar avisu kilalea sa naña Ntewa pe koven plan re kiena yeririna la nene poli, naña le Yu lala.

Lelaga sane asumã ape ðarmãrera ke ga wa a yepela mavin lelagaena, ana naga mligan la towe mña ga sumo, a sumã kila ke naña amiu naña pe ape Yu re poli akilia alelaga, akilia aim ave moki loyumã vano-o tol pupia maran naña Ntewa sinenania. Sur nene sane sur tapolou tai naña yar la pe akilia ðesan re poli, ana nagane Ntewa kila meraravan ruruia. A monar akilia sur nene, komin pe pon re awarwar amiun poli, asitom asape Ntewa sitom amiu ga, ana pe kekaran re si le Yu la poli. 26 Pe sa re nene poli, ana yoko naga tamalia la na wa, sane visena na Siriena Wa tai, naña pisa sanini, sape

“Yar na tamalia itaen yeririna lala kiena ne Ntewa yoko málivi ga e kieta yo,

e kieta pupia pulkumali nene Yerusalem metava e tavie naña Saeon.

Ita lus lala kiena Sekop, ita le Yu lala

naña kieta napiowaena la moki pañisi, ana yoko naga ke narui imi war plan make kieta nakoena lala, kila ita towo sina.” Ais 59:20,21

27 Visena tañena na Siriena Wa tai pisawal navisaarena kiena ne Ntewa tai e mña e lepas nene, naña pisa sanini, sape

“Kiau navisaarena pan la sike pa rui,

sape yoko nowar plan kiela mlamulena viowa lala, neviewo la make ga.” Ais 59:20,21, 27:9

28 Pogos naña Lologena Wo pimi málivin le Yu lala, la pe sinelan re poli, ana e lepas tai naga po, komin naña kila sane kam la naña pe ape Yu re poli, Ntewa mla towe pulmas pan amiu vena alelaga. Ana e kana lepas tañena, naga mña piowa ga, komin naña kila le Yu la apim si sane nasinekar kiena ne Ntewa lala. Ana Ntewa tapatete kilia visu la ave kiena nasinekar silaga, naga monar sinena ye la sina, komin naña naga tapatete sinen ðesan kiena visaarena wo la naña kila pan li marua lala kiena ne kiena yeririna la nene, le Yu lala. 29 Ntewa pisaar navisaar ruruena la pan la ðisi rui, a naga pio la ape kiena rui, a yoko naga tapatete kilia vilon sina ga kiena sitomena pogos tai.

30 Sanene, naga miyumãe e ita sanene. Nanua sumo, kam naña pe ape Yu re poli, kam na pe amlelaga re e Ntewa poli, ana pogos naña imimi le Yu la imimi pe melelaga re e Lologena Wo poli, nanene kila kiena mrapa vena sinena ye amiu.

³¹ A pogos naña naga sinena miye amiu sanene, kila naña imimi mña memlelaga e Lologena Wo, ana yoko naga kilia sinena ye imimi sina.
³² Nane sitomena kiena ne Ntewa sanene narui. Nanua sumo naga tamān naña ita punu ga teyal e mrapa naña pe sinetan re logeen kiena visena poli, kila sane naga kilia sinena ye ita, kilia were ita punu ga teim teve kiena.

³³ Erau lala, navisa ruruena lala kiena ne Ntewa e ita keviu pañisi! Kiena manmaruaena a kiena kiliaena apa manene laa metava! Kiena sitomena la merorol pañisi, a kiena pelaga la apowo manene laa! ³⁴ Sa naña visena na Siriena Wa tai pisa, pisape

“Pe yar re nena tai naña torokin tol ya naña teke e sitomena kiena ne Ntewa.

Pe yar re nena tai naña torokin kilia la visena na ilarena va Ntewa.

³⁵ A pe yar re nena tai naña kila po pa Ntewa torokin naña kilia kila Ntewa monar lamaran si navisa ruruena wo la vania ve sa naña naga suña par ke pan ita.” Sop 41:11

³⁶ A nesikol visena nene, nesape: Kieta Ntewa, naga taaga pe purpes nen sur make ga, naga taaga pe mñaraena na sur make ga, naga taaga pe luas nen sur make ga, ana popon ita punu

ga teyeluar luen ga naga vano ve pñisi re pogos tai.

12

Pelaga wo kiena yaru naña mlelaga

¹ Erau lala, sa naña Ntewa sinena miye amiu ruru nena ga, kila po pan amiu pañisi, sineun neviun manene van amiu vena monar atamān kiamiu malena wetelu vania. Monar aye wa ruru wo, sa naña amiyawawo tasnemiun pania sane kuñañaena tai naña amla pania. Naga pe pe kuñañaena re sane sur mali tai naña amemmar mare, ana naga pe kuñañaena naña sane mali, a yoko Ntewa kilia kekarān manenea. Naga ke narui pelaga mesmesu na kilaen lotena va Ntewa naña mesmesun naña akila. ² A ve atamān re sane naviowaena lala na yomarava nini awere amiu vena ataveve kiena pelaga, ana silaga, monar atamān Ntewa kila kiamiu sitomena la imi ve urviu sina. Sanene, yoko kiamiu pelaga kilia vilonia, kilia imi wo silaga, a yoko akilia ayaloro ataveve nasinenanena kiena ne Ntewa, naña po, merarava a mesmesu naña mesmesu silaga. ³ Nepisawal visena la nene pan amiu, komin naña Ntewa pe lemm pan inu, mligan lua inu, mligan yumāena nene e lumau narui. A nesape nevisa re mña suri tai van amiu, sane pe pon re si naña asuña

akila kiamiu sitomena apa manene metava poli. Tekila kiena yuñäena sanape, ana kieta sitomena la monar mesmesu, monar su ga tano. ⁴ Tařatete tevisave ita na tepo laa taulu tařena lala, komin ita na sane tas nen yaru taaga, nařa kana korowasa la asuñä ga, ana korowasa la peve taaga nene kiela yuñäena na kilaena la susuñä ga. ⁵ Sane ita moki, ana Kristo řere ita make ga tepim tepe taaga, ana sane inu neřasine ko, a ko ořasine inu. ⁶ A Ntewa pe lemam pan ita, a tañan nakiliaena tařena lala pan ita, nařa sane nalaena lala nařa naga kian plan pan ita vena teyuñäe temio. A ita veve taaga monar toñareran teyuñäe temio ya nařa mla pan ita. Sanene,

visae Ntewa tañan van ko sape kioñä, ko na ove navisawalen visena nařa mla pan ko, ana monar okila omio pupia lelagaena nařa sape sane kiena visena nene pe lelaga pařisi,

⁷ pona visae kioñä, ko na ove naiilaen yuñäena na suñare, monar okila omio kioñä ñareraena wetelu,

pona visae kioñä, ko na ove navianena yaru e visena kiena ne Ntewa, ko na monar yepeñä ñäen ruru kilaena,

⁸ pona visae kioñä, ko na ove naiilaaren sitomena

kiena yaru lala, ko na monar ositom urmin kilaen,

pona visae kioñä, ko na ve nalaen naiilaena, monar owar ve moki,

pona visae kioñä, ko na ove nasumonen yaru lala e yuñäena kiena ne Ntewa, ko na monar ve omalum re,

pona visae kioñä, ko na ve naiilaen la nařa asike e pog ñarera, ko na monar okekaran kilaena.

⁹ A naga ke nene narui řelaga wo tařena la nařa akila:

kiamiu sinesiena e yaru tařena lala monar ve lelaga,

monar aure vetan řelaga viowa lala,

monar auarar ruru řelaga wo la ñarera,

¹⁰ monar avinaia amiu sane ave namratava taaga ga,

monar akilali nařa avisu sane ane yoko kilia kila ruru řelaga navatanonena va la ga wa,

¹¹ ve atañan re nařa kiamiu sitomena ñarera na kilaen suri wo la kovio sina vetan amiu,

monar akila sane kapi vivaga sa Ninuna Wa suñä vivaga ruru e amiu,

¹² monar akekaran navisařena kiena ne Ntewa nařa kiamiu sitomena wasinea sane yoko kila wo van amiu sa ga nařa naga pisa,

pogos naŕa avane naloge
viowaena, monar akila
kiamiu sitomena ve pi-
avi,

monar alen silaga,

¹³ pogos naŕa li nale-
lagaena taŕena lala
limala plasan suri
laŕasa, monar akekara
aliureure suri van la,

a monar akekaran vi-
suaren yaru taŕena lala
e m̄am̄iu uŕa.

¹⁴ A nanene suri si laŕas
nanini narui naŕa monar
asitom ruruia vena kilaen va
yaru taŕena lala:

visae laŕasa asum̄a akila
kare amiu komin naŕa
amlelaga e Yesu, monar
akila wo van la. Ve
avis re viowa van la, ana
aviun Ntewa visa ruru
la,

¹⁵ visae laŕasa amloge
po komin suri nowo
tai, amiu m̄ena monar
akekara amio la,

visae laŕasa asum̄a atagin
ke sur tai, amiu m̄ena
monar atag amio la,

¹⁶ visae amiu amio taŕena
lala, monar asu ruru ga
amio la naŕa kiamiu sit-
omena ve faaga ga,

visae ayum̄ae amio taŕena
lala, ve aligan amiu re
metavan la, sane amiu
na apo, ana akekaran
ga narin yum̄aena lala,
a akekaran ayakol amiu
amio yar la naŕa ave
torokaki,

visae akila suri laŕasa, ana
ve asitom re avisave ape
manmarua, ana akila ki-

amiu sitomena vito su
ga tano,

¹⁷ visae yaru laŕasa ak-
ila viowa van amiu, ana
ve akila maran re si
naviowaena van la, ana
silaga monar asitoŕalia
vena akila suri punu ga
naŕa yoko yaru la akilia
avisu kilale asape po a
mesmesu,

¹⁸ a visae kiamiu suri
viowa tai sike likan
amiu amio yar taŕena
lala, monar akila suri
make ga naŕa sike e
limam̄iu vena were si
sum̄arena imi sike pun
amiu punu ga.

¹⁹ Erau lala, sineu si amiu
paŕisi nane nepisa sur la
nene pan amiu. Laŕas sina
sanini, sane:

“Visae laŕasa akila viowa
van amiu, ana ve aki-
lali naŕa ala nakoena
van la. Akilia aligania
van Ntewa vena naga
liŕere mare la sirau,
komin visena tai sike
e Siriena Wa rui, naŕa
Ntewa sape,

*in ke narui naŕa yoko nela
nakoena van yeririna
lala, inu ke narui naŕa
yoko nelamaran va la
naŕa akila ke piowa.”*
Nav 32:35

²⁰ A sanene, visae ki-
amiu nasinekar la asum̄a ga,
monar akila ruru la, sa naŕa
visena na Siriena Wa pisa,
naŕa sape

“Visae kion̄a nasinekar
visokaria, ola kina-
nena vania, visae
moto karia, ola wii

vania. Visae okila sanene, yoko okila naga mawan kiena p̄elaga viowa vaṗisi,

vano vano-o pona kekaran naṗa amiu lua ave erau wo sina yo.” Pakaiwa 25:21,22

²¹ Taveve suri la nene, nepisa sanene pan amiu, nesape ve ataṃan re p̄elaga viowa taulu amiu, ana monar ataulu p̄elaga viowa e kiamiu p̄elaga wo lala.

13

Li nalelagaena la monar avatanon yerkawa lala amio p̄arin suṗe lala naṗa Ntewa pisir plan la

¹ Nagane sineun laen visena laṗasa e lepas kiena li nasumonena lala. Tekilia tesape Ntewa na mon manene laa metava, naga pe suṗen ke suri punu ga, a naga ke narui p̄arin suṗe taṗena la naṗa asike ne, mla m̄areraena pan la. Sanene, ita li na lelagaena make ga monar tevtanon p̄arin suṗe la nene, monar telogear la. ² Yaru la naṗa visae asuṃa akilali naṗa avisaluṗar p̄arin suṗe lala, asuṃa apisalūṗar ke suri naṗa Ntewa pisirplan, a yoko Ntewa taṃan p̄arin suṗe lala akilia ala nakoena van la vanonia. ³ Parin suṗe lala, Ntewa pe pisirplan la re poli vena kilaen yeririna wo la amarau, ana naga pisirplan la komin

la naṗa asuṃa akilaro ke navisaluaena. La ke nene narui monar amarau, komin naṗa visae p̄arin suṗe tol la yoko la nakoena van la. A visae sinoṃan sane ve omaraun re p̄arin suṗe, yoko monar okila mesmas ga e ya naṗa yerkawa la apisa, ana yoko ve akila re viowa van ko, yoko akekaran ko.

⁴ Ntewa pisirplan la sane ape kiena yaru na yuṃaena lala, vena kilaen yuṃaena wo naiilaen yeririna lala, a visae sinoṃan kilaen p̄aruṃa, monar ovisuar ruruia, komin naṗa asuṃa aṗarar ke ṃena plaki, ana pe aṗarar korenan re poli. Ntewa pisirplan la, mligan e limala vena ala nakoena van la naṗa akila piowa.

⁵ Sanene, popon tevtanon p̄arin suṗe lala, komin naṗa pe pon re tekila viowa poli vena ala nakoena van ita. A nekilia sane kieta sitomena suṃa pisu kilale ke ṃena rui sape popon manene visae tesuṃa tekila ke sur make ga wo mesmesu silaga. ⁶ Taveve visena la nene, popon tekekaran toul takis lala naṗa monar tela va p̄arin suṗe, komin pog naṗa p̄arin suṗe kila kiena yuṃaena, suṃa kila ke yuṃaena naṗa Ntewa mligan vena akila.

⁷ Sanene, monar akila sur punu ga naṗa mesmesun akila. Visae kilavaru na takis e lepas na kilavaru naṗa tesuṃa tetauluia, pona

kilavaru tai naŕa monar tokoan vanon sur laŕasa, na monar toulia. A la naŕa apuarar ke yuŕaena kerkeviu lala, pona kiela kia pa metava loyuŕa e ŕarin suŕe lala, monar tekekaran la, mesmesun ga naŕa tewatanon la.

Li na lelagaena lala monar akila wo va yaru taŕena lala

⁸ Suri taŕena tai, naga e lepas na lapui la naŕa yaru la asuŕa akila. Visae kioŕa lapui teke e yaru tai, monar olamaran vania torokin ga ya naŕa amiu lua apisaaria. A popon ositomyuli ŕena sane kioŕa lapui teke ŕena e Ntewa, komin naga mla suri tai pan ko keviu maŕene rui. Suri nene naga sinesiena, a ko na monar olamaran ruru va yeririna taŕena lala. Monar sinema sisi la naŕa asike lavisin ko, komin yaru naŕa kila ke sanene, naga sane naga mlogear make navisaluaena kiena ne Ntewa rui.

⁹ Visena kar la moki sike loyuŕa e navisaluaena, sane la naŕa apisa sanini, asape: Ve okila re kolau, pona ve owerar re yaru mare, pona ve ovinau re, a ve sinema sun re suri kiena yaru taŕena, a suri taŕena la ne sanene. Ana visena na visaluaena make ga, asike vatanon pupia purŕes nen navisaluaena tai naŕa pisa sanini, sape: Monar sinema si yaru naŕa sike lavisin ko, okila wo vania sa naŕa

osuma okila ke sina ga pan ko. ¹⁰ Yaru naŕa visae sinena si kemua yaru taŕena lelaga, yoko naga taŕatete nena kila sur naŕa viowa vania. Sanene, ŕelaga na sinesiena yaru naga kilia kila sa naŕa sane okilia ologear make visena la naŕa Navisaluaena pisa. ¹¹ Ita na monar tekila ga ŕelaga wo la naŕa, komin nagane, pog pa ke narui. Monar tevisu kilale sane lavis pogos naŕa tesuŕal ruru narui, ve tomo-malio re sina. Pogos naŕa ita temlelaga mare ga na wa, ita tesitom tesape yoko Ntewa tamalia ita vetan yomarava nini pogos piavi ke ga wa, ana nagane, pimi ke lavisi rui.

¹² Nekilia nevisa sanini nesape lavis yemalo ŕisi, yomerarava suma pimi ŕalivi, ana popon toŕisin ŕelaga viowa lala na yemalolo, a monar towar sur na kilaen mara na ŕelaga mesmesu na yomerarava, vena tekilia tomolue tevano vena tekila mara van sur viowa la nene. ¹³ Kieta malena monar mesmesu ruru wo, torokin naŕa tepe yeririna lala naŕa tesuma temial ke e yomerarava, a yoko monar teligan ŕelaga viowa lala. Ve tekila re ŕaŕaŕena kar la naŕa apulen ga kekarena na yomarava a yaru la amun wii vano-o akilalu ŕarila lala. Ve tesuma tekila re suri naŕa yerŕene lala amio sira lala asuma aureurela kar ga sa ga nene, a asuma akila ke

ṗelaga namname lala. Ve tesuṃa teveveyun ita re, a ve tesikol ita re e vielueena lala. ¹⁴ Monar teligan ṗelaga viowa naṗa tepaeme temio, a pe tesitomāl re na taveveen kiena nasine-nanena poli, ana sa naṗa tesuṃa temiyen ke ṃata kulgota nowo e marana yeririna lala, monar teyen ṗelaga mesmesu lala kiena ne Suṗe Yesu Kristo e kieta malena, vena yeririna la avisu sane ita tepe kiena yeririna kemua la lelaga.

14

Popon li nalelagaena lala ve asuṃa avisa kare la re sina vanon ga narin sur laṗasa

¹ Erau lala, sineun nesape akilia sa naṗa nemloge rui sane pupia visena tai sike e amiu nagane. Sane laṗasa, kiela sitomena mok liu e sur laṗasa, asape popon akila, pona viowa ga naṗa akila, pona amaraun asape visae akila, sa ṗis Ntewa ve kekaran la re sina.

Sineun nesape la ne sanene, nepisu sane la pe apiawa re ṃarera poli wa, ana pogos naṗa asike amio ita, ve tekilali re naṗa takawe manene laa, tekekanan naṗa toure la. ² Sanene, yar laṗasa akan kare ga kinanena lala amio ṃena tata punu ga lala, a yar laṗasa asitom asape Ntewa sinenan sape avalia kinanena laṗasa, pona

avalia tata. ³ Ana sineun nesape nevisa van amiu visae ko tai naṗa okan ke ga tata, ve ovisu re viowa e yaru naṗa palia, a visae ko tai naṗa opalia tata, ve oliṗere re naga naṗa suṃa kania, ovisave yoko Ntewa liṗere naga vanonia. Ntewa kekaran make ita ga, ana amiu ṃena ga monar akekaran amiu. ⁴ Li nalelagaena make ga asuṃa apisu ke ga Ntewa asape naga pe kiela suṗe, ana naga ga kilia visa van la visave la veve taaga akila nene pona ve akila re nene. A sanene, pe pon re ita ga telipere ita si poli. A Ntewa pisu yeririna laṗasa akan tata, a laṗasa pe akan re tata poli, ana naga kekaran la make ga, komin naga kilia naṗa sape yoko Suṗe Yesu kilia suṃa iila la silaga vena asuṃa asuṃal ṃarera e naga.

⁵ A naga nene maran taaga e lepas na legiena lala. Yar laṗasa amla legiena tai asape pe kiela legiena wa, a yar laṗasa apisu legiena lala asape maran taaga. Naga nene naga pogaga, ana ita make ga monar ita veve taaga tekila kieta sitomena lala, ana tesu ea, ana ve toṃareran re yaru taveve kieta sitomena. ⁶ Yar naṗa ṃareran sape la legiena tai sane kiena legiena wa, naga kila vanon sinenan sape visirlua kia kiena ne Ntewa ea. Yaru naṗa kekaran sape kan suri make ga, naga

pisa ke potena pa Ntewa vanonia, ana pogos naña kinana, suña pisirlua ke kiena kia. Yar naña kila sane palia kinanena lañasa, naga mñena ga suña kila ke naña pisirlua kia kiena ne Ntewa, ana naga mñena suña pisa ke potena pa Ntewa e kinanena tañena la naña suña kania.

⁷ Monar tesitomañalia, sane pe yar re tai naña kilia sike e yomarava nini sane yar taaga ga poli, vena kilaen sur make ga sa naña naga taaga sinenania, a pe ita yar re tai naña visae mare, ana sur nene pe kiena naga taaga ga.

⁸ Pe sa re nene poli, komin visae temali, temali naña tevisirlua kia kiena Suñe, a visae temare, temaren naña tevisirlua kiena kia. Sanene, sur make naña tekila, monar tekila amio sitomena naña sane pe tekila re ga ki-eta nasinenanena poli, ana ita tepe kiena ne Ntewa, monar tetaveve ga kiena nasinenanena. ⁹ Nanene komin nanua ne, siraun naña Kristo mare, na suñalu mal sina, ana kila naga pimi pe suñen kiena yeririna la naña amare, a pe suñen kiena yeririna la naña amali, ana silaga monar tesu ga vatanon kiena nasinenanena.

¹⁰ Ana sanene, pogos naña nalelagaena tai suña kila sur la taveve ðelaga marua kiena ne le Yu lala, ana suña mliþere ke nalelagaena tañena naña pe asuña

akila re poli, naga nene na piowa manene laa pañisi. A pogos naña yar tai ve kila re sanene, ana naga suña pisu ke piowa e yar tañena naña kila, naña sane kiena puruvi tai loyuma e nam-ratava kiena ne Ntewa, na nene pe ðelaga na mawaen tai.

Ve tesuma teliliþere ita re, komin naña yoko ita make ga tesumañalu tese marana Ntewa na wa, a yoko naga ke narui naña visuveve ruru ya naña ita make ga tekila.

¹¹ Sur nene sike e Nasiriena Wa la rui, naña Ntewa pisi, pisape

“In na nemal na nesike ne, ana nekilia nevisa ruru sane pogos na pimi ke ne naña yoko yar make ga akinai vamon inu,

a yoko yar make ga avisawal avisave in ga taaga nepe Ntewa.” Ais 45:23

¹² Sanene, yoko ita make ga teim e marana Ntewa, a yoko monar ita make ga veve taaga tevisawal sur la naña tesumañ tekila, a naga ke narui yoko visuvevea.

Monar ve okila re kiomañ erau tai kiena naviawaena loru

¹³ Taveve sitomena la nene, ve tevisuveve manene ita re sina ga, tevisayu ya naña yar tañena kila, tesape po pona piowa ga. Ana ya naña ita li nalelagaena lala monar tesitomia vena tekila sina van ita, naga sanini, sane monar ve tekila

re sur tai naŕa kilia kila nalelagaena kila pal mrapa pona kilia kila naga loru e mlamulena viowa. ¹⁴ Sane visae nesitomveve inu, nekilia nesape nesum̃alar m̃arera ruru na nesike ne nemio Suŕe Yesu, ana nemlelaga m̃arera nesape taŕatete sur tai naŕa monar tevalia, ve takan re. A visave nalelagaena tai war sitomena visave kinanena tai pe torokin re kan po, naga pogaga, ana kana kinasa sane monar valia ruru nenaga, a ita taŕena lala monar tetam̃an naga taveve kiena sitomena nene. ¹⁵ A visae ositom ovisave kinanena la torokin ga nakanena, okilia osum̃a okania, a visae kiom̃a puruvi taŕena tai naga valia, ve okilali re naŕa ovisave naga m̃ena ga monar kania. Visae peraga, yoko okilia okila kare nena kiena sitomena, a naga nene naga pe ŕelaga wo re kiena ne ita yar la naŕa sineta sisi ita poli. Monar tesitom̃al tevisave Kristo maren nakilaen kieta malena imi wo, ana pe pon re tetam̃an narin sitomena e lepas na kinanena imi ve sur keviu naŕa sum̃a kila kare si kieta malena poli.

¹⁶ A taŕena sina, visae sur tai naŕa ko opisu sane pogaga vena kilaena, naga pogaga, ana pe pon re naŕa osum̃a okila ŕisi na kila kare sitomena kiena nalelagaena taŕena tai, vano-o kila yar taŕena lala avisa kare kieta kia ita li nalelagaena lala

vanonia. ¹⁷ E lele nene tesum̃a tepisayu visena la na lepas nene naŕa sape yoko tekilia tomun ya pona takan ya, pona monar tevalia namunena ya pona kinanena ya, ana monar ve sineta ŕesan re tesape nanene naga pe sur keviu re tai nene poli loyum̃a e nasuŕenena kiena ne Ntewa. Ana kana pupia sur ne lala, nane naŕa ita tekila ŕelaga wo na malena mesmesu, a tese sum̃are temio yar taŕena lala, a tetol kekarena naŕa Ninuna Wa sum̃a mlavia. ¹⁸ A pogos naŕa tela sur la nene ve keviu e kieta sitomena, tekila ke yum̃aena wo naŕa Kristo sinenania, ana yoko Ntewa kekarana ita vaŕisi vanonia, a yoko yar taŕena lala avisu sane po paŕisi.

¹⁹ Sanene, silaga ita make ga monar tom̃areran li naŕa tekila ŕelaga wo naŕa kilia ligan sum̃are sike e ita li nalelagaena lala, a naŕa aiila ita make ga kieta sitomena la imi marua nena napo. ²⁰ Kinanena naga sane pe sur re ta nene poli, ana pe pon re tekila naga imi ve sur ta naŕa kila kare ke sina ga yum̃aena wo naŕa Ntewa kila e malena kiena nalelagaena taŕena la rui. Nepisa sanene, nesape kinanena make ga po torokin kanena, ana pe pon re okan sur tai narui yar taŕena visuia ana kila naga loru, naga kila sur tai naŕa sitom sape pe popon re naga kila poli. ²¹ Ana kana ŕelaga wo na

kilaena naga sanini, sane ve okan re tata, pona ve omun re kuruta, pona ve okila re si sur tai, visae pogos naŋa kioṃa puruvi visuia, kilia kila kare naga, kilia kila naga loru. ²² Sanene, visae kioṃa sitomena laŋasa e laŋas na narin sur naŋa ositom osape pogaga naki-laena pona ositom osape pe pon re okila poli, naga pogaga, ana owārar ruru suṃa ve kiamiu ga amiu lua Ntewa, ve ova olologon re e yo make ga. Yar naŋa kila ga ya naŋa naga kilia sape mesmesun ga naŋa kila, yoko Ntewa kekarania, a naga pe mloge re piowagan poli sape kila sur piowa. ²³ Ana visae yar nene kiena sitomena veve lua e lepas na ya naŋa kilia kania, ana kan ga, yoko Ntewa taŋatete kekarania. Nanene komin naŋa yar nene sitom rui sape kila sur nene, pona pe po re e marana Ntewa poli yo, ana pe sur korena ga, naga kila ga. Sanene, naga kila pa mlamulen piowa narui, komin naŋa naga pe miyuṃae re amio kiliaena e ya naŋa po pona piowa e navisuena kiena ne Ntewa.

15

Amāreran li naŋa akila ke sina ga wo van amiu

¹ Ita mokliu naŋa tesuṃalu mārerera ga tesike e Kristo, a pe kieta sitomena peve lua re poli e lepas na narin sur lala naŋa

li nalelagaena taŋena lala asuṃa apeveyu ke ea. Ana ita na sanene, monar ve tekila re ga ya naŋa sinetan kilaena, ana monar tekila kieta sitomena la ve piayavi ruru wo va nalelagaena taŋena lala naŋa asitom ke asape taŋatete akila sur laŋasa naŋa tesitom tesape tekila woga ga. ² Ita make ga, monar tesitomaṃal li nalelagaena taŋena la naŋa asike lavisin ita, a monar tekila ya naŋa la asitom asape po, vena akekarania, a vena iilaen kiela malena amio Suŋe. ³ Visae tesitomaṃal Kristo, naga sike e yomarava naga pe kila re ya naŋa naga sinenan sape kila poli, ana naga pane pog mārerera yam mokliu, akila pania sa naŋa visena tai na Tus na Yauena pisa, naŋa yar tai pis pa Ntewa, sape

“Visen viowa la naŋa akoven pan ko, akoven ṃena pan inu maran taaga.”
Yauena 69:9

⁴ Visena la ne sanene, naŋa asike e Nasiriena Wa la nanua sumo, asiria vena vian ruru itaen la naŋa teim sirau, ana touloia, akilia kieta kieta sitomena la mārerera ruruia vena ita ṃena tekilia teva teyupor e pog mārerera lala. Visena la nene vena iila itaena, akila tekilia ruru tesape yoko monar tetaulu sur make la naŋa Ntewa pisaaria.

⁵ Sanene na, nemlen ke pa Ntewa vanon amiu, komin naga ke narui naga pe purŋes nen sitomena viavi,

naga ke narui naña kilia iilar malena kiena yaru, a nemlogin ke tania vena kila sane asuña ataveve þelaga kiena Kristo Yesu, asuña ruru ga veraga amio þelaga na ve taagaena, ⁶ naña kiamiu sitomena ve taaga a kiamiu visena ve taaga, ana yoko ayeluar ruru Ntewa, naña naga pe armanane kieta Suþe Yesu Kristo.

⁷ Sanene, amiu le Yu lala, amio kam la naña pe ape Yu re poli, pogos naña asuña apim ke lele taaga, ana akekarana ga naña aworworun amiu punu ga aim loyuma, sa ga naña Kristo kekarana worworun itaena. Pogos naña visae akila ve sanene, naga pe mrapa si tai naña vena visirluaena kia kiena ne Ntewa. ⁸ A popon naña akila ve sa nene, komin Kristo pitomi e yomarava, pe kila re ga yumaena pan le Yu la poli, ana kila mēna pan la naña pe ape Yu re poli. Sane e laþas kiena le Yu lala, kila ya naña Visena Wa kiena ne Ntewa pisa, kila naña navisaarena lala naña Ntewa kila pa apua kana le Yu lala, pimi pe lelaga. ⁹ A e lepas kiena la naña pe ape Yu re poli, naga kipianli lemamiēna kiena ne Ntewa pan la, kila vena ayeluardia, maran taaga e naña Siriena Wa la apisa. Tai naña pis þesania sike e Tus na Yauena, naña sape

*“Nesike likan wolawa lala,
nemieluar kioña kia,*

yoko nelotun ko e yauena wa lala.” Yauena 18:49

¹⁰ A taþena, sike e Tus Navisaluena lala, pisape

*“Kam wolawa lala, aimi vai amio nena yeririna lala kiena ne Ntewa naña le Yu lala, amiu make ga akekara!”
Naw 32:43*

¹¹ A tai sina sike sina e Tus na Yauena lala, sape

“Amiu naña pe ape Yu re poli, avisirlua kia kiena ne Ntewa,

Amiu yeririna na yo make ga aieluardia.” Yauena 117:1

¹² A na maro molue kome Tus kiena Aisea, pisayu Navisaarena kiena le Yu lala, sape yoko naga sumon mēna la naña pe ape Yu re poli. Ana visena nene pisa sanini, sape

“Yoko lus kiena yermarua Sese tai mālivi,

naña yoko Ntewa ligan lua naga metava ve suþen li taþena la naña pe ape Yu re poli,

ana yoko awasinea vena naga kila navisa ruruena kiena ne Ntewa imi mālivin la.” Ais 11:10

¹³ Ana nemlenin amiu sina pa Ntewa, naña tekilia towasine ga kiena visaarena lala, nemlogin vena awasine mā naga vano-o kiena kekarena make ga a kiena sumare imi ulemamaga e kiamiu malena, ana kila vena māreraena kiena Ninuna Wa kilia yumaē e amiu vena kila sa naña amiu asuña aþasine ke kiena

navisaarena lala, imi uleule va va sa nene.

Pol pisayu pa le Rom lala e lepas na kiena yuññaena naña kila pa la naña pe ape Yu re poli

¹⁴ Erau lala, pe nesitom ðele amiu re poli, ana nekilia ruru nesape amiu sinemiu la po pañisi, akilia ruru sur la moki rui, a kam na atorokin naña akilia avian amiu sina e visena kiena ne Ntewa la ve moki. ¹⁵ Sanene, pona ailan towe laa ñak ñini yo, apisu naña nesumalu nepisayu sur ñarera la moki towe laa pan amiu sane, a nepisayu ke sina ga sur lañasa naña pona kam na asape akilia yo rui. Ana nepisu sane monar nekila ve sa nene, komin Ntewa mligan nakiliaena nakilaen yuññaena nene e luñiau vena nekila, sane nalaena wo tai, ¹⁶ vena neim sane yar na yuññaena kiena Yesu Kristo vena visawalena Lologena Wo kiena ne Ntewa va yar la naña pe ape Yu re poli. Nekila yuññaena nene, in na sane yar wa tai naña nemiyuñae ke loyuma e Yuma Wa ñana Ntewa, nekila la naña pe ape Yu re poli vena aim ave wa ruru nenaga, neyawawo la e kia kiena Ninuna Wa, vena akilia aim sane nalaena wo tai naña pa Ntewa naña yoko kekaran vañisi. ¹⁷ Sanene, imimi lua Kristo Yesu memiyuñae ke veraga, a nekekaran naña inu ñena nekila ke yuññaena kiena

ne Ntewa komþasa. ¹⁸ Ve nevisin re kulin wowe, ana nekilia nevisave noþarwar inu pañisi e ya naña Kristo miyuñae pimi ñalivi kome inu, komin nagane, imimi lua moþere la naña pe ape Yu re poli apim lavisin Ntewa, asuñña apatanonia. Nepisawal visena lala, nekila yuññaena moki, ¹⁹ Ntewa kila kile la naña peve taþena, namareraena kiena Ninuna Wa miyuñae, ana kila sane lologena wo kiena Kristo pa vanua make nenaga e yo la moki, siar gar Yerusalem pa nena perina yalen silau pa tol pupia lepas naña Lirikam. ²⁰ Ana nepisu sane pe torok re poli wa, kiau siþomena ñarera tai toñña e inu naña sape monar neva laa sane wa. Ana pe nesitom re nesape neva e naña kia kiena ne Kristo pa pa e rui, komin pe sineun re nesikol yuññaena naña yar taþena siar pa rui, ana sineun nesape neva e yo naña yar la pe akilia re naga poli wa. ²¹ Nanene sane visena tai naña navisawalena Aisea pisawal nanua rui, naña pisayu Navisaarena, pisape
“La naña pe yar pisawal re naga pan la poli wa, yoko akilia avisu kilalea,
la naña pe amlogeli re kiena kia poli wa, yoko alogekilalea.” Ais 52:15

Pol maplanar ruru naña va ñalivin le Rom lala

²² Sa naþa nepisa þa rui, yam mokliu naþa sineun nesape neim nomalivin amiu gar Rom, ana nesuþa nekila ke yuþaena la e yo taþena lala, a sur taþena mþena la moki paþisi pano-o pe nomal re kana pulmas tai poli wa. ²³ Ana nagane, nepisu sane kiau yuþaena e lepas nini naþa Esia sane þisi narui, a sitomena naþa sike e inu kas mokli rui, sane sineun nesape neim nomalivin amiu re, nomape pona woga ga yo narui. ²⁴ Nekila ruru ke nesape noure matan e nini neva yalen sila u gar pupia purvanua naþa Spen, ana nesitom ke nesape yoko nokom pun amiu, vena tekilia tesu re veraga telual pog wo tai sanene temio ita sumo wa. Yoko taþatete nesike ve piavi ve sa naþa sineunia, ana visae akilia akila sur laþasa vena iila inuena e kiau mrapa, yoko nela sina ga kiau mrapa nevano. ²⁵ Ana nanene pe nagane re poli, komin naþa yoko neva nokom ke ne Yerusalem sumo na wa, komin naþa kiau narin yuþaena tai vena kilaen va li nalelagaena kiena ne Ntewa la naþa asike e nene sumo. ²⁶ La asike e pog mþarera tai nagane, naþa la mokliu pe kiela sur re poli, limala korena ga, ana þegas nen li nalelagaena la nae yo make ga naþa Masitonia

amio Kris, amloge, ana la ga aþar sitomena nene naþa asape popon akuan kilavaru tai vena iila laena. ²⁷ Nanene sur wo tai naþa akila taveve ga kiela sitomena, ana nepisu sane naga pe sur wo tai naþa monar akila kemua. La nene pe ape Yu re poli, ana e kiela malena amio Suþe, aþar navisa ruruena moki kiena ne Ntewa pimi e la, kome le Yu lala, ana pogos naþa le Yu la nene atol mþena ga pog mþarera, popon la naþa pe ape Yu re poli, akila maran towe van la, aiila la e sur laþas naþa limala plasia.

²⁸ Ana kilavaru nene naþa amiyuwon poloia, amligan e luþau vena nowar vano, ana pogos naþa neva neligan ruru sike amio le Yerusalem la narui, yoko nowasuþe in sina neim nokom pun amiu gar Rom, siraunia yoko neva yalen sila u gar Spen. ²⁹ A nemninu rui visae pogos naþa noworun amiu, yoko wo na wo van ita make ga, yoko neim nemio navisa ruruena wo kiena ne Kristo la ve moki naþa nevion van amiu.

³⁰ Erau lala, sineun nesape neviun manene van amiu e kia kiena kieta Suþe Yesu Kristo, nesape asitomal in mþa e kiamiu leniena lala. Nekilia nesape apulemamaga amio sinesiena naþa Ninuna Wa mlavia, ana popon alen wo inu manenea, asikol kiamiu leniena amio

kiau leniena naþa noþion ke nesape nelen silaga. ³¹ Pogos naþa nepa netol lepas naþa Sutea vena neva Yerusalem, la mokliu naþa pe sinelan re naþa alelaga e Lologena Wo poli asike ea, ana pe nekilia re nesape yoko la asitom akila ya ne van inu, ana nemie awis pan amiu vena alen va Ntewa kilawo inu e kiela sitomena viowa lala e inu. A monar alen mēna ga sane li nalelagaena wa lala naþa asike gar Yerusalem, yoko akekarana ala narin kilavaru naþa yoko nekian van la. ³² Ana visae sur make ga torokin nasinenanena kiena ne Ntewa, yoko nekilia nomālivin amiu amio pupia kekarena na losineu, a yoko nekilia nesu ruru nemio amiu, neva ruru inu sumo wa. ³³ A in mēna nesumā nemlen wo amiu, nesape yoko kieta Ntewa, purþes nen sumāre, sike amio amiu vano-o ve uro re.

16

Pol pisawal sur laþasa pa li nalelagaena lala gar Rom

¹ Erau lala, sineun kaloen kiau maki e visena laþasa e lepas na kam laþasa. E lepas na vineta naþa Vipi, naþa naga ke narui þar mak nene pimi mālavin amiu, sineun akilia sa naþa naga pe yaru na visuaren yumāena wo tai na þegas kiena ne li nalelagaena lala nae pulkumali naþa Kenkria, ² ana popon akekarana naþa aworworun

naga, aure naga sane vine-miu tai loyumā e namratava mēna Suþe, sane torokin nenaga naþa ita li nalelagaena lala tekila van ita. Awis aiila naga e ya naþa naga limana plasania, komin naþa naga pe sira wo tai naþa pe erau wo amio imimi moki, miila ruru imimi po paþisi.

³ Sineun mēna ga nesape avisa kiau pokolulagi pona pokolemalo va sira wo taþena nene Priska, amio wona na yermene Akwila, naþa mepe yar na yumāevaena e yumāena kiena Kristo Yesu. ⁴ Lelaga naþa, pogos tai nanua ne, nesike e lepas na marena rui, ana lalua akila naþa lavis akilalu kiela malena naþa apim atamalia inu, ana nepisa potena pan la vanon paþisi. A pe in ga taaga re poli, ana þegas nen li nalelagaena taþena mēna laþasa e lepas nene la mēna apisa potena pan lalua vanon ya naþa akila ne. ⁵ A pokolulagi pona pokolemalo naþa nepisa pan lalua, sineun nevisa mēna va taþena la naþa asumā loyumā e narin þegas nen li nalelagaena lala naþa apiora ke lele taaga e mēla loyumā lalua.

Sineun nesape nevisa mēna ve sa nini va la nene, sane kiau erau wo naþa Eþanatas, naþa naga pe yar þesa e pupia lepas na Esia naþa naga mlelaga e Yesu, ⁶ a Maria, naþa naga kila

yum̃aena wo moki likan amiu, ⁷ a yar lua taņena na kiau yo nene Antronikas amio Sunia, naņa nanua ne imimi make ga mesike e yum̃a na koena veraga. Nalologena lalua nene, lalua amlelaga e Yesu nanua rui, sumon inu, a lalua aņar kia wo paņisi e nalologena taņena lala.

⁸ Laņas ke sina ga, nane Ampliatas, naņa Suņe kila sane imimi lua mepe erau wo, ⁹ a Uņanas, naņa memiyum̃ae lele taaga memio e lologena wo kiena Kristo, a kiau puruvi wo nene Stakis, ¹⁰ a Apelesi, naņa pe sur koren ga naņa pupia na kilaliena pimi pania, ana naga sum̃alu m̃arera e Kristo.

A nevisa m̃ena pokolu-lagi a pokolemalo va la ne mratava puna Aristopeulas, ¹¹ a taņena naņa imimi lua kiamimi visena taaga nane Erotian, a li nalelagaena kiena namratava puna Narsisas, ¹² a sira wo lalua na yum̃aena kiena Suņe nene, Traepina amio luena Traeposa, a vineta m̃ena naņa Pesis, naņa sineta si naga paņisi, a naga kila yum̃aena kiena Suņe moki manene laa rui, ¹³ a Rupus, nasumonena wo na yum̃aena kiena Suņe, amio anena naņa naga kila inu sa ga narina nenaga.

¹⁴ A laņas sina nane Asinkritas, Plekon, Emes, Patroņas, a Emas, amio

m̃ena puruvi taņena la naņa asike amio la, ¹⁵ a naga sina, pe sineu Ńesan re Pilologas, Sulia, Nereas amio vinena, a Olimņas, amio li nalelagaena wa taņena la naņa akila lotena pa lele taaga.

¹⁶ Nekekaran naņa nepitawe amiu make ga e kiau m̃aki nini, a amiu m̃ena monar aworworun ruru amiu, akila kiamiu sinesiena imi kate e namunen pipimiu e sinewoena. A Ńegas nen li nalelagaena kiena Kristo m̃ena lala e lepas la nene apisawal asape asum̃a asitom̃al amiu ke e kiela leniena lala.

¹⁷ Erau lala, nepiun m̃areran ke sina ga pan amiu nesape monar avisu ruru la naņa asum̃a asiar ke veveyuena, akila ke li nalelagaena la amliliņere la, a asum̃a akawe ke visena na vianena la naņa amiu atol pa rui. A pogos naņa apisu ruru la, ve ava re lavisin la. ¹⁸ Na nene komin naņa yaru kar la ne sanene, pe akila re yum̃aena kiena kieta Suņe Kristo poli, ana la asum̃a ataveve ke ga kiela sinenanena viowa lala. Akilia avisawal sur ve moki naņa wo na wo, ana visen kiki ga la ne, a asum̃a akilali neņa sitomena ken yar la naņa pe akilia ruru re sur poli. ¹⁹ La punu ga akilia ruru rui asape amiu asum̃a amlogear ruru ke visena lala kiena ne Ntewa, a nanene kila nekekara paņisi, ana monar avisuar ruruia

e lepas na sur naŕa po, monar yepemiu m̃ae ruruia, a e lepas na sur viowa lala, monar ve kala narin namname tai to re nena e amiu.

²⁰ A visae akila ve sa nene, yoko kila mrapa kiena kieta Ntewa na sum̃are, kila Yermare sike vatanon lolamiu lala vena aviemumuia. A kiau leniena nesape yoko lemamiena kiena kieta Suŕe Yesu Kristo sike amio amiu.

²¹ Erau naŕa Timote naŕa imimi lua memiyum̃ae lele taaga, pisa pokolulagi a pokolemalo pan amiu, a la telu nene nae kiau yo, Lusias, Sason, amio Sosipata, la m̃ena apisa.

²² In naŕa nemlarar sur na siriena, nesiri m̃aki kiena Pol nini pan amiu, kiau kia Tesias, a in m̃ena ga sineun nesape nekekara paŕisi naŕa nevitawe amiu e m̃aki nini, e kia kiena Suŕe.

²³⁻²⁴ Pogaga, inu si Pol nene nesiri ne, ana lavis nesiri make kiau m̃aki narui, a pokolulagi a pokolemalo piŃasu ke pan amiu, pimi kome la telu nene, Kaias, naŕa nesike e m̃ana um̃a, a naŕa li na lotena nae e yo nene asum̃a apim ke lele taaga e m̃ana um̃a, a Erast, naŕa naga yerkawa na visuaren kilavaru na pulkumali nene, a kieta puruvi naŕa, Kotas.

²⁵ Ana e kiau visena maro, sineun nesape nela maran si nayeluarena make ga va

Ntewa. Nemlen nesape yoko naga la visena la na Lologena Wo, amio navianena wo la naŕa apisayu Yesu Kristo naŕa nemla pan amiu rui, ligan ruru sike e kiamiu malena lala, vena asum̃al m̃arera e legiena na pimi ke ne. Visena wo lelaga la nene, yar la pe akilia re poli e kas la moki ŕaro pa rui, ana nagane Ntewa kipian ita. ²⁶ Nanua, yar la apulo visena lala kiena navisaluaena lala, amninue asape visen lelaga la nene asike loyum̃a e la, ana nagane, mepisawal meraravana, a ita punu ga tekilia telogekilalea. A Ntewa, sane naga naŕa sike nakonua rui a yoko sike sike nena, naga pisaar sape Lologena Wo nene monar va vanua va yeririna na purvanua make ga, vena la m̃ena akilia aloge, a akilia alelaga ea.

²⁷ Naga taaga pe Ntewa, naga taaga pe purŕes nen manmaruaena, a naga taaga naŕa Yesu Kristo kila kieta mrapa na lotunena, vano vano ve uro re pogos tai.

Inu, Pol.

**Maki Nasumo Naþa
Pol Siri
Pa Pan Li
Nalelagaena Wa
Lala Nae Garu
KOREN
Visayuena Na
Tusi Nene**

*Komþasnen suniena plas
na tusi nini*

Maki nini pe maki naþa Pol siri þesa pa le Koren lala naþa amlelaga e Yesu. Naga siria komin suri viowa la suñalu e maliena kiena li nalelagaena lala nae yo nene, a naga mligan maki nene pano vena iila la. Suñare nae Koren, Pol ke narui naga siaria.

Koren naga pupia pulku-mali kiena le Kris lala, a naga pe pulkumali keviu na lepas naþa Akaea, naþa mneke vatanon þarin suþe nae pulkumali naþa Rom. Yaru nae purvanua taþena la moki asike e nene, a naga pe yo tai naþa yaru la akila ruruia e lepas na kilaen yuñæna na tauluen kilavaru, a e lepas na kiela þelaga marua. A la nae yo nene, kiela kia keviu e yomarava komin kiela þelaga viowa lala, a naþa amlotun ke ntewa taþena la moki.

Suri kerkeviu la naþa Pol pisayu e kiena maki nene sanini:

pisayu napiowaena naþa yaru na suñare la asuñæ amliþere la,

pisayu napiowaena naþa la asuñæ akila ke piowa pa sira lala,

pisayu mrapa mesmesu na kilaen talovaena,

pisayu sanape e kinanena lala naþa akila kuþaþæna e la van nono lala.

Pol pisatañe kiela nav-iuniena laþasa, ana pian la e mrapa mesmesu na taveveena vena alotu e suñare, amio mareraena la naþa Ninuna Wa suñæ kian ke pa suñare, a nalelagaena naþa yaru kilia mali sina. Pol kila meraravan naþa kilia ruru napiowaena a navisatañeena la nene, a pisa meraravan naþa lologena wo kiena Yesu ga kilia la navisatañeena van la.

E marana na keviu 13 pisayu þelaga na sinesien Ntewa amio yaru lala naþa pe þelaga keviu tai naþa yeririna kiena Ntewa la monar atavevea. Marana na keviu nene pe komþasnen visena kiena ne Ntewa naþa yaru la akilia ruruia, taulu komþas taþena la na tusi nene.

*Komþasnen tusi laþas
nene*

Visena þesa 1:1-9

Yaru na suñare la amliþere la 1:10—4:21

Mlamulena viowa amio sira, a malena na mratava 5:1—7:14

Li nalelagaena lala a yaru la naþa aminue Ntewa 8:1—11:1

Mrapa kiena li nalelagaena lala na kilaena lotena 11:2—14:40

Yesu mali sina, a yaru la naña alelaga ea akilia amali 15:1-58

Nalaena naña aligan va van li nalelagaena lala nae Yutea 16:1-4

Visena maro 16:5-24

Pol sike gar Episas, pisa pokolulagi pona pokolemalo pan le Koren lala

¹ Erau nae Koren lala, inu naña nesiri maki nini piñasu pan amiu, inu Pol, naña Ntewa sinenan sape neimi neve nalologena tai kiena narina Yesu Kristo, ana pio inu, pisirlua inu vena nouarar yuñae na sanini.

Nesike e yo nini nemio kieta erau Sostinis, ana imimi lua mepisa pokolulagi pona pokolemalo pan amiu punu ga, ² nae sumare kiena ne Ntewa e pupia pulkumali nene Koren. Kam ke narui naña Ntewa pio amiu aimi vena asikol amiu amio kiena li nalelagaena tañena lala, naña asutetae asike e yo punu ga naña asuñña amlotun naga naña kila ita tepe wa ruru rui, nane Yesu Kristo naña naga pe kieta Suñe ita punu ga.

³ Memlen mesape lemamiena kiena ne Yesu Kristo a sumare kiena ne Ntewa arimata sike amio amiu.

Pol pisa potena pa Ntewa komin naviawaena kiena le Koren lala

⁴ Nepisu sane pogos naña apim ape yeririna kiena Kristo Yesu, lemamiena kiena ne Ntewa suñña miyuñae keviu e kiamiu malena lala, ana silaga nesuñña nepisa potena keviu vanonia.

⁵ Asumña apim apo manene laa e lepas na visawalen Lologena Wo, a asuñña apa ke metava e lepas na kiamiu nakiliaena, e ñena ga e lepas na ñelaga wo tañena make ga lala. ⁶ Pogos naña nepisu nene, nepisu sa ga kiau yuñae na nanua ne, naña nepian amiu e Kristo, nagane suñña ñar ke pupia mrasa.

⁷ Nalaena lala pona namareraena lala naña Ninuna Wa suñña kian pan amiu, pe tai re naña pe atol re poli wa, ana asuñña amiyuñae ke amio la po pañisi, komin akirakiravan ke naña kieta Suñe Yesu Kristo kilia imi mālivi si e yomarava nini.

⁸ Naga pe pimi mālivi re poli wa, ana naga suñña miila ita silaga vena tesuñalu mārera tesuñña ga vano o tol legiena maro nene, ana pogos naña tesuñalu tese marana ne Ntewa, yoko naga kila naña naviowaena tapatete se ita.

⁹ Ntewa pisaar rui vena viewo ita, ana tekilia towa sine ruru kiena visena nene, komin naga pio ita, ñere

ita sikol ita teve erau wo temio narina, Yesu Kristo ki-eta Suḗ.

Suñare sumã mliliḗere paḗisi

¹⁰ Kiau namratava lala kiena kieta Suḗ Yesu Kristo, nesape neviun manene van amiu e kiena kia, nesape aḗionli naḗa aim ave taaga sina. Popon ve aliliḗere amiu re, ana amiu, kiamiu sitomena a kiamiu visena monar ve taaga.

¹¹ Nepisa visena la nene, komin la naḗa puna yaru nene Kloe apim apisawal pan inu asape veveyuena sike likan amiu, olai lala a vineu lala.

¹² Nemloge naḗa amiu pepe taaga asumã apisasa ke kiamiu ḗegas lala asape “In na yoko netaveve Pol,” pona taḗena sape “O, in na nepe kiena Apolos,” pona tai sina, sape “O, in na nesikol inu e ḗegas kiena Keḗas.” A laḗas sina, apisirilua si kiela narin ḗegas laḗasia, akoven plan taḗena lala, asape “O, imimi ga mepe yeririna kiena Kristo lelaga.”

¹³ Ke, ya ne akila ke sanene? ?Pona popon tete-wowa Kristo ve kinakinasa, teliwerwere e kiamiu narin ḗegas la sanene? ?Pona laḗas asape ape kiau Pol, komin naḗa asitom asape in ke narui naḗa netelan inu e laki torovia vena netamalia la? ?Pona laḗasia sinela ḗesan naḗa akeela e

kia kiena Yesu, ana asitom asape akeela e kiau kia?

14-16 Sanene, nepisu pogaga naḗa nanua ne, pe nekee amiu re nena tai poli, Krispas ga lalua Kaias, pona sineu ḗesania, nekee mēna Steḗanas amio namratava puna, a pe nesitomāl re si po laa rui, sane la ga nene, pona laḗas sina? Nepisa sanene komin naḗa visae nekee amiu ve moki, pona asumālu avis vilaveena rui, asumã avisave “!O, imimi ke narui, naḗa Pol kee imimi e kiena kia!”

¹⁷ Sanene piowa ga, komin Kristo pe mligan inu re nepimin keen yar la poli, ana mligan inu nepimin lologonen kiena Lologena Wo van la. A pogos naḗa nemlologon ke sanene, pe nekila re nemio māreraena na manmaruaena na yomarava nini poli, ana nekila amio māreraena na laki torovia kiena ne Kristo.

Kristo kipian manmaruaena a māreraena kiena ne Ntewa

¹⁸ Ana yaru la naḗa asumã ataveve ke mrapa na kovioena, amloge visena na laki torovia kiena ne Kristo sane suri tai naḗa pe sur korena ga pan la, ana ita la naḗa tetaveve ke mrapa na malena, temloge visena na kiena laki torovia sane māreraena kiena ne Ntewa natamalia itaena.

19 Naga nene sane visena kiena Siriena Wa tai, naþa Ntewa pisa sanini, sape

“Yoko nowe plan manmaruaena kiena la naþa asitom ke asape ape manmarua,

yoko nekilawo nakiliaena kiena la naþa asitom ke asape akilia suria.”
Ais 29:14

20 Ana visena nene pe lelaga paþisi, komin naþa tepisusu yomarava, tekilia teviun tevisa sanini tevisave awa kiena yaru na manmaruaena lala? Awa yaru la naþa apisuveve ruru kiliaena la naþa sike e tus lala? Awa yaru la naþa akilia avisayu ruru sitomena la naþa pe taþena pe taþena naþa tetelivi ke nagane? Tepisu sane peraga yo, a tepisu sane Ntewa kila manmaruaena lala na yomarava nini apimi sane sur wowe ga tai rui.

21 Ntewa ga pe manmarua, a e kiena manmaruaena, naga kila sane manmaruaena na yomarava nini taþatete kilia kila yaru kilia naga. Ana naga pisu sane po laa sane vena kila naþa kiamimi lologena lala, naþa yaru la asitom ke asape pe wowe ga, kilia tamalia yaru naþa mlelaga ea.

22 Le Yu la moki liu naþa yepela mavin lelagaena, asuþa apisavisa ke asape visae mekila kile lala, yoko alelaga ga na wa, a le Krik la moki liu yepela mavin lelagaena, asuþa apisa ke

asape visae mevis mesmesu nena e kiela nakiliaena marua lala, yoko alelaga ga na wa, ²³ ana pe mekila re sanene pan la poli. Memlologon ga Yesu pan la, mesape naga marewo kiela mlamulena viowa lala e laki torovia, ana visena nene, le Yu lala asape taþatete alelaga ea, a le Krik lala, asape visena na wowe ga nene.

24 Ana e lepas kiena ne la naþa Ntewa pio la vena ave kiena, sane ita, naþa ita laþas tepe le Yu a ita laþas tepe le Krik, pe sa re nene poli. Ve tesitom re tesape tevisu kile taþena, komin naþa tepisu kilale m̄areraena kiena ne Ntewa e yuþaena kiena Kristo rui, a ve tesitom re tevisave tetaveve kiliaena taþena, komin naþa tepisu kilale namanmaruaena kiena ne Ntewa e mrapa kiena Kristo natamalia itaena.

25 Yaru taþena lala apisu naþa Ntewa taþan Kristo mare e laki torovia, asitom ke asape Ntewa malumu ga, ana peraga. Sur nene kila meraravan kiena m̄areraena naþa m̄arera laa sane, taulu m̄areraena kiena yaru. Apisu sur nene, asitom asape Ntewa pe wowe ga, ana peraga, kipian kiena manmaruaena naþa po manene laa taulu manmaruaena kiena yaru.

26 Wolai a vineu lala, asito-myuli sane kam na sanapen naþa Ntewa pio amiu ape kiena? Pe ita moki re poli

naña e lepas na visuena na yomarava, ita temanmarua, pona tepe yaru m̃arera, pona tepe yaru kerkeviu lala. ²⁷ Yomarava nini sape tepe wowe, ana Ntewa p̃ere ita, ana kome ita suña kila plan ke manmaruaena na yomarava. Yomarava nini sape ita temalum ga, ana Ntewa p̃ere ita, ana kome ita, suña kila ke m̃areraena na yomarava pito tano. ²⁸ Yomarava nini pisa ke sape ita yaru korena ga naña tesike tano, ana Ntewa p̃ere ita, ana kome ita, suña kila ke pupia sur kerkeviu la pito tano, kila apimi ape suri korena.

²⁹ Sanini, pe yar re nena tai naña kilia visirlua naga e marana Ntewa, sape naga pe manmarua, pona naga m̃arera, pona naga yar tai ne, ³⁰ ana Ntewa ga pe purp̃es nen kieta malena viu temio Kristo Yesu. Naga ke narui pitetalia Yesu pimi kilologia mrapa pan ita, ana Yesu pul plan ita, kila ita temesmesu e marana, kila ita tepimi tepe kiena yaru wa lala.

³¹ Ana komin suri ne nanene, tepisu naña visena kiena ne Tusi Wa tai pe lelaga paḡisi, naña pisa sanini, sape

“Yaru naña sinenan sape warwaria, naga kilia warwarian ga kieta Suḡe.” Ser 9:24

2

Pol mlologon lak torovia kiena Yesu e m̃areraena kiena Ninuna Wa

¹ Erau lala, nanua kam na amninue visena kiena ne Ntewa lala, ana nepim nepisawal pan amiu. Ana sa ga naña apisuia, pogos naña nepimin nekila, pe nekila re naña nepilaven visena piayavi lala pona manmaruaena kiena yaru. ² Nekila kiau sitomeña m̃arera nesape pogos naña nesike likan amiu, yoko ve nesitoḡal re si sur taḡena, ana yoko nelologon ga Yesu Kristo, amio kana marena e lak torovia. ³ Nesike nemio amiu, nemloge sane yepu malumu paḡisi, nemarau, sineu kurkur, ⁴ a kiau visena a kiau suniena pe pulen re nena manmaruaena pona kiliaena kiena yaru. Ana e pogos nene, amloge naña kiau visena lala apulen m̃areraena kiena Ninuna Wa, ⁵ a kila sane kiamiu naviawaena pe suḡal re su e visena na manmaruaena kiena yaru poli, ana suḡalu su e m̃areraena kiena ne Ntewa.

Manmaruaena kiena ne Ntewa

⁶ Lelaga naña kiau visena pe pulen re visena lala na manmaruaena na yomarava nini poli, pona kiliaena kar la naña yerkawa na yomarava nini la akekaran poli, ana pogaga, komin yomarava nini amio kiena yerkawa lala yoko avano amap ga. Ana kam la naña

kiamiu sitomena marua ruruia, apisu kilale naña kiau visena lala pulen ruru nena manmaruaena kiena ne Ntewa. ⁷ Kiena manmaruaena nene, naga þarpolo ruru sike pa rui sumon naña naga si yomarava nini, ana manmaruaena nene tapolou ruru sumã ga, yar la pe akilia re nena ga, ana nagane narui molue merarava ruru ga pan ita na wa sane pupia visaruruena tai naña Ntewa mlavia vena kila ruruitaena. ⁸ A kiena manmaruaena nene m̃alivin ita e mrapa naña Yesu pimi tamalia ita, ana yerkawa na yomarava lala pe apisu kilale re sur nene poli, ana atarar Yesu, naña naga pe pupia Suþe na urarena nae ma e peni, la atelanñar naga metava e laki torovia. ⁹ Yeririna la pe apisu kilale re sitomena kiena ne Ntewa sanene poli, naga sane Siriena Wa tai, naña pisa sanini sape

*Sur nowo la naña kilamara
rana yaru pe pisuli re
poli wa, pona kiligana
yaru pe mlogeli re poli
wa, pona los nen yaru
pe sitomli re poli wa,
ana sur ke la nene Ntewa kila
ruru sumã ga pe kiena
ne kiena yaru la naña
sinela si naga. Ais
64:4*

¹⁰ Ana ita, ita na tekilia navisa ruruena la nene, kom̃in Ninuna ne Ntewa naña pisu kilale make suria, a kilia make sitomwanena kiena ne Ntewa, naga kipian itania. ¹¹ Sa ga ita yeririna,

naña yar taþena mninue ya naña sike e kieta sitomena, ana ninuta ga kilia ruru po. Ana maran taaga m̃ena sa nene e Ntewa. Pe tekilia re ya naña sike e kiena sitomena poli, ana Ninuna ga kilia m̃aga, ana pisawal pan ita. ¹² Pe ninuna na yomerava re ga nini tai poli naña pisawal pan ita, ana Ninuna Wa nene naña molue ma puna Ntewa pitomi, naga ke narui naña kila ita tepisu kilale ruru nalaena wo la naña Ntewa sumã kian ke pan ita.

¹³ Sanene, popon avisu kilale m̃ena sane kiamimi visena la naña pimi ke pan amiu, pe amolue re e manmaruaena kiena yar poli, ana Ninuna Ntewa ga sumã pian itania. Sanene, mesumã moþar ke visena lelaga lala kiena Ninuna Wa nene, ana memligan sike e amiu naña Ninuna nene sike e kiamiu malena rui. ¹⁴ Yar naña Ninuna pe su re e kiena malena poli, naga taþatete visu kilale sur lala na Ninuna, naga sane pe yar tetan ga e la, ana naga taþatete nena tol m̃areraena la naña Ninuna kiania. ¹⁵ Yaru naña Ninuna sike e naga, yoko naga kilia visu kilale ruru sur make ga, ana yar naña Ninuna pe su re e naga poli, naga taþatete visu kilale ruru ya naña sike e malena kiena yaru naña Ninuna sike ea. ¹⁶ Visena Wa pisa sanini, sape

*Pe yar re nena tai naña kilia
ya naña sike e sito-*

*mena kiena ne Ntewa poli,
pe yar re nena tai naña kilia
vian si sur va Ntewa poli.* Ais 40:13

Visena nene pe lelaga pañisi, ana e ita naña Ninuna sike e ita, tetol sitomena kiena Kristo rui.

3

Pe pon re veveyuena su likan nalelagaena la poli

¹ E pogos naña nesike nemio amiu nanua ne, sineun nesape nevis ruru nemio amiu sa naña kam na ape yeririna naña Ninuna ne Ntewa sike e kiamiu malena rui, ana peraga. Nepisu sane kam na pe atoroki re poli wa, nane kila narui nepis pan amiu sa naña kam na ape yar na yomarava ke ga wa, naña e lepas na kiamiu malena amio Kristo, kam na sa ke sisi tomtom lala wa. ² Sanene, nepagan amiu e ga e yu, tařatete nela kinanena řarera van amiu, komin kam na pe atorokin re poli. Ana pimi tol nagane, nepisu sane kam na pe atoroki re poli wa, ³ komin naña řelaga na yomarava nini mok liu sike likan amiu wa. Pona kam na pe apisu kilale re poli yo, ana pogos naña vielueena amio veveyuena sike e amiu, kana kinasa sane asike e yemalolo na wa, kiamiu řelaga sa ga řelaga kiena yaru. ⁴ Merarava ruru po pañisi naña amiu na sanene, komin naña asuřa

amliřere amiu ke sanene. Kam lařasa asuřa apisa inu, asape “Aulai, imimi na mekekan Pol, metaveve naga,” a kam lařasa asuřa apisa ke erau nalologena Apolos nene, asape “Ke, imimi na mekekan Apolos, metaveve naga,” ana sitomena sur la ne sanene, sitomena kien yar ga.

⁵ Visae sinemiun avisayu kiamimi kia imimi lua Apolos, popon asitom ruruia avisave imimi lua mepe yar sur na sanape? Imimi lua mepe yar kiena Suře ga, vena kilaen yuřaena naña mligan sike e limamimi, vena kila sane akilia alelaga ea. ⁶ E lepas na yuřaena nene, in ke narui nemapila kurusia, a Apolos ke narui naga řeleule susia, ana Ntewa ga naña kila purřesia kapuru pimi kerkeviu řar mrasa. ⁷ Ana monar tevisu kilale sane yar naña mapila kurusa, a naga naña řeleule susia, lalua pe akila re pupia sur tai poli, ana naga naña kila purřesa pimi keviu řar mrasa, naga ke narui kila pupia suria. ⁸ Ana imimi lua, naña tai mapila kurusa, a tai řeleule susia, imimi lua memiyuřae maran taaga ga, a yoko imimi luoka ga mowar kiamimi nařaena torokin kiamimi yuřaena. ⁹ Pe sa re naña imimi lua, imimi yar tai naga po, a tai piowa ga, ana imimi lua mepe yar na yuřaevaiena

lele taaga kiena ne Ntewa, a amiu na sane porotano naþa memiyuþmae ea.

Pona kana totou taþena na visaena, nekilia nevisave kam na sane yuþa tai naþa Ntewa suþa miyuþaenia. ¹⁰ Ntewa mla kiliaena wo pan inu, ana nemiyuþmae sane yar tai naþa yepena þmaen yuþaena, nemiyuþmaen þeren yuþa tai naþa mþarera ruruia sike na. Ana siraunia, pe in re naþa nepisirlua yuþa metava e þerena nene poli, ana erau taþena nene pimi suþa miila nayuþmaenen yuþa. A kam ke sina ga laþasa akilia aiila nakilaen yuþa metava e kana þerena nene, ana yaru naþa yuþmaen sanene monar visuar ruru kana þelaga na yuþmaenena. ¹¹ Naga monar taþatete ligandli si þerena taþena, komin nemligan þerena napo rui, nane Yesu Kristo. ¹² A pogos naþa amiyuþmaen yuþa metava e þerena nena, pona laþasa amiyuþmaen e kol pona selpa pona kilavaru mþarera, pona laþasa amiyuþmaen e laki pona mþaero pona mþakururuye. ¹³ Ana sirau-
nia, yoko kapi na legiena maro kekania kilali kiela yuþaena lala, kila yuþaena la naþa akila, mþalivi e yo metava. ¹⁴ Visae kapi tol yuþa naþa yar tai pisirlua metava e þerena nene, ana kekan þele ga, yuþa suþalu

ruru suþa ga, yoko yar nene war kiena nalaena wo tai. ¹⁵ A visae yar taþena, kapi kekan make kiena yuþaena, yoko yar nene kilalu make kiena suria. Lavis kapi nene kilia kekanmþar mþena yar na yuþaena nene, ana pona naga purmatan kapi nene, tamalia kiena malena.

¹⁶ A kam na monar aviþu kilale sane yuþa nene naþa amaplar metava e þerena nene, naga kam li nalelagaena lala, a sane yuþa na lotena wa tai mþana Ntewa, naþa Ninuna suþa loyuþa ea. ¹⁷ Yuþa na lotena kiena ne Ntewa naga kam ga ne, a visae yar tai sinenan sape kila kare yuþa nene, yoko Ntewa welua nena naga, komin kiena yuþa na lotena nene naga pe wa paþisi.

¹⁸ Amiu monar ala ya naþa nepisa ke ne, pe pon re asitom avisave naga pe sur korena ga. Visae amiu yar tai sitom ke sape naga pe manmarua ruru po e nakiliaena na yomarava nini, popon manene naga ligandli sitomena navisokanena la nene sike na. E lepas nakiliaena na yomarava nini, naga monar kila naga sane yar ga tai naþa pe wowe, ana visae naga kila sanene, yoko naga kilia ve manmarua ruruia e nakiliaena lala kiena ne Ntewa. ¹⁹ E Visena Wa, tepisu visena tai naþa kila meraravan sape manmaruaena na yomarava nini sane sur wowe ga e

marana Ntewa, naña pisa sanini, sape

La naña asitom ke asape la ape manmarua ruru po e yomarava nini, asitom ke asape la akilia suria, ana e marana Ntewa la ape wowe ga, naga pisu kilale la ruru rui. Sop 5:13

²⁰ A visena tañena sina sanini, naña sape

Suñe pisu kilale ruru sitomena lala kiena li na manmaruaena la na yomarava nini, sape ape sur korena ga. Yauena 94:11

²¹ Sanene na, ve tevilaven re sitomena na yomarava lala. Tañatete akila sur wo tai van amiu, komin naña Ntewa kian kiena navisa ruruena wo punu ga pan amiu rui. ²² Inu Pol nemio Apolos a Keñas, mekila yuñæna wo punu ga pan amiu rui, a nagane yomarava nini sike e limamiu. Visae amal pona amare, visae asuñæ nagane pona ase legiena naña pimi ke ga wa, ana sur punu ga ape kiamiu rui, ²³ a amiu ape kiena Kristo, a Kristo pe kiena ne Ntewa.

4

Yuñæna kiena Pol amio Apolos sane nalologena kiena Yesu

¹ Sanene na, amiu ve aligan imimi re meva metava, ana popon avisu imimi sa ga yar na yuñæna kiena Kristo lala, naña naga mligan visawanena lala kiena

ne Ntewa e imimi, vena mevisawal va la naña pe akilia re poli.

² A pupia sur naña sike e kiamimi sitomena, mekilia sane monar memasisun ruru wo e yuñæna nene naña kiamimi yerkawa mligan e limamimi.

³ Pe nesitom manene re nesape aña amiu asitom ke sanapen inu, po yar la aliñere inu ve sanape, a in mñena pe nepilevilen in re sina poli nesape in na sanene pona sanene.

⁴ Lelaga, pona nepisu in ke sina ga nesape nemiyuñæ pogaga ne, ana nanene kiau sitomena ga ne. Kiau sitomena nene tañatete kilia kila inu nemesmesu, a Suñe ga naga pe yar naña torokin liñere inuena.

⁵ Ve sanene na, ve tokoskosin re liñereen yar tañena, ana monar tesuñæte Suñe wasuñe e kana legiena na liñereena nena. E pogos nene, yoko naga la sur la naña atapolou asike e yemalolo, kila naña amolue e yomerarava, a yoko la sitomwanena la naña atapolou ke e los nen yaru, kila naña amolue e maran yeririna make ga. Yoko Ntewa waveve sur la nene, ana yoko naga vis va yeririna lala torokin ya naña naga ñal e kiela malena.

⁶ Erau lala, visen la ne nesuñæ nepisa ñisi ne, nesuñæ nepisayu ke ga imimi lua Apolos ne, ana nekila sanene komin sineun nevian ruru amiu, sane ve avisusu re ve

taþena e kiamiu navianena lala. Amiu laþasa apilave komin navianena na kiela þegasa, a asumã apisusu ke piowa e navianena na þegas taþena, ana sanene na pe mesmes re poli.

7 Kam punu ga maran taaga, kam na pe apo manene re taulu taþena la poli, a visae sur wo tai sike e amiu, pe kam re na amiyumãen poli. Ntewa ga kian pan amiu sane nalaena tai, ana sanene na pe pon re si avis vilave vanon poli.

8 Lelaga, nekilia nesape asumã asitom ke asape kam na limamiu pulen sur wo lala kiena ne Ntewa rui, ana amloge po, asitom ke asape kam na ape kiena yerkawa lala na yomarava nini rui, naþa akoven imimi mesike nena varau. Visae lelaga naþa sane kam na ape þarin suþe lala kiena ne Ntewa na yomarava nini, po paþisi, ana pe nesitom re nesape sanene poli.

Ana visae pogos tai ve sanene, pona pe kam re ga poli yo, ana yoko Ntewa visu sane imimi lua mēna ga metorokin meto metava memio amiu vena ve suþenen kiena yeririna lala.

9 Ana nagane, imimi li nalologena lala pe mesu re e yo wo na sanene poli. Sane Ntewa mligan imimi mesike laa varau tano, naþa yeririna na yomarava nini amio mēna navisi lala apisu kare

imimi, sane metorokin ke ga yaru lala naþa amla koena na marena pan la.

10 Memlogear ke Kristo, mekila ke kiena yumãena, ana li taþena la apisu imimi sa ga mepe wowe towe ga, ana asuñã apisayu amiu asape ape manmarua ruru nena e malena kiena Kristo. Apisu sane imimi na memalum ga, ana kam na añarera. Apisu imimi piowa ga, ana amligan amiu asike metava.

11 Imimi na pe sa re nena amiu poli, komin siar nanua pimi tol nagane, viso kar imimi, moto kar imimi, pe mãmimi kulsota wo re poli, mesumã mepane ke pog mārera lala, mãmimi yumã wo re naþa memon e poli, 12 ana mesumã memal ke ga e yumãena na limamimi. Yar la apiuelin imimi, ana mepisa ruru la ga. Akila kare imimi, ana metamian ga. 13 Apisa kare kiamimi kia, ana mekilali naþa mepe erau ruru ga memio la. Mekila po sanene, ana akila imimi sa ga kororaki na yomarava nini. Lelaga, pimi tol nagane apisu imimi sa ga sur korena ga.

Pol piun sape ataveve lana

14 Pogaga, pe nepisa re visena la ne ne vena kila amiu amawa poli, komin kam na sa ga naruu lala naþa sineu sii amiu paþisi, a sineun nevian ruru amiu. 15 Nekilia nesape yerkawa

taþena la mok liu naþa apisuar amiu a amiila ki-amiu lelagaena e Kristo, ana popon asitoñal sane inu ga taaga nepe arimamiu. In na noþar þesan Lologena Wo kiena Kristo pimi pan amiu, ana in na sane arimamiu e kiamiu malena amio naga.

¹⁶ Sanene na, nepisu sane mesmesun ga naþa nevis van amiu, noñareran amiu nesape ataveveli lelen lau sumo.

¹⁷ Sitomena ne nanene kila nesape nevitetalia Timote iñasu pun amiu. Nepisu sane Suþe tañan naga pan inu sa ga naruu tai, komin naga miyuñae ruru po e yuñae lala a nekekan naga paþisi. Ana pogos naþa visae imi ñalivin amiu, sineun nesape naga kila amiu asitom ruru si kiau þelaga nayalena naþa nataveveen Kristo, sa naþa nesuñ nepian ke pa yar lala na suñare make ga la naþa nesuñ neteteliv ke e la. ¹⁸ Nekilia sane pogos naþa apisu sane pe noñalñaliv re si pun amiu poli, kam laþasa akilali naþa amligan la sina asu metava.

¹⁹ Ana pogaga, komin naþa visae Suþe tañan van inu, yoko ve ve piavi re neim noñalivin amiu. E pogos ne nanene narui, yoko yepu mavin logeen visena kiena la nene, ana sineun nesape nevisu sane kiela ñareraena na kilaen yuñae ñarera sanape.

²⁰ Nanene komin naþa visena kiena yaru pe pe sur re tai poli loyuñae e nasuþenena kiena ne Ntewa, ana ñareraena kiena Ninuna ke narui naga pe pupia suria.

²¹ Pogaga, sineun nesape asitom ruru sumo, sane visae noñalivin amiu, yoko ve sanape? Visae sinemiunia, nekilia neiñasu pun amiu nemio kiau visena ñarera lala na veveyuena, ana po manene laa visae akila kiamiu sitomena la su tano sumo wa, ana nekilia neiñasu nemio ga visena la naþa malumu, e þelaga na sinesiena.

5

Pelaga viowa loyuñae e suñare

¹ Visena pimi tol kiligau sape sur tai sike likan amiu naþa piowa manene laa. Apisape kam yar tai, arimana pa talopa amio sira taþena, ana siraunia, yar nene pinaun wona arimana nena pimi sike amio. Lelaga kemua naþa, yaru na yemalolo lala taþatete akila þelaga nene, ana sanape na kam li nalelagaena tai suñ kila?

² Kam li nalelagaena lala asuñ apisir plan amiu, asape kam na amiyuñae ke po, ana sanape asuñ atañan ke þelaga na sanene suñ miyuñae ke likan amiu? Popon aloge viowagan sur nene, a popon

akovenlua yaru nene vetan kiamiu sumare.

³ Ee, lelaga naŋa nagane nesike e yo nini nesike laa perinan amiu, ana e ninuu nemloge sa ga nesike ga nemio amiu. Sanene na, e kia kiena Suŋe Yesu, nesuŋa nepisawal ke nalipereena tai kiena yar nene sa ga nesuŋal ke ga nesike e maramiu. ⁴ Sanene na, pogos naŋa aim si lele taaga, monar avisu sa naŋa ninuu sike ga amio amiu, a monar akilia sane Suŋe Yesu mēna sike amio kiena māreraena, ⁵ ana monar akovenlua yar nene vetan sumare. Naga monar ure sina, wasuŋe si e yomarava va e limana Yermare, ana popon ŋelaga lala na mlamulena viowa na yomarava akila naga loge viowa vano vano-o va ŋisi, ana suraunia pona wasuŋe si imi yo, vena Suŋe kekarān tamalia ninuna e legiena maro.

⁶ Erau lala, pe pon re asuŋa awarwar manene amiu poli, avisave kam na amekiki, komin kororaki nene sike e amiu na wa. Kam na akilia rui sa naŋa narin is ga, ana kilia kila kilaparavi punu ga lapa. ⁷ Sanene na, popon vena awar plan is viowa nene naŋa sike e amiu, vena amiu punu ga aim aekiki ruru sina. Monar tesitoŋal sa naŋa yermarua lala asuŋa akila ke kuŋaŋaena e narin sipsip vena kilaplanen kiela mlamulena viowa lala, ana

Kristo pimi mare e laki torovia vena warplanen kieta mlamulena viowa lala, ana pe pon re kororaki suŋa e ita poli.

⁸ Ana pogos naŋa yermarua la akila kuŋaŋaena ŋisi, akila kana ŋaŋaena nena, a ita nalelagaena mēna lala ita mēna kieta ŋaŋaena tai. Ana pe pon re tesike e ŋaŋaena nene poli, takan kilaparavi tai naŋa is marua sike ea. Visena nene kana kinasia sane pe pon re sane mlamulena viowa a ŋelaga viowa na malena marua suŋa ga e ita, komin loyuŋa e malena na sumare, sur make ga monar ikiki ruru wo, ve lelaga ruru wo, a ve wa ruru wo.

⁹ Kiau visena tai pan amiu sanene rui. E mŋaki tai naŋa nesiri piŋasu pan amiu nanua rui nepisawal nesape pe pon re ava lele taaga amio yar la naŋa akila ke ŋelaga viowa la poli, pona asuŋa akiriri kar ke vanon sira lala. ¹⁰ Ana pona kam laŋasa amlogepal kiau visena nene yo, komin pe nepisa re e lepas kiena yar la naŋa pe amlelaga re poli. E la nene, la moki akila kolau, la moki ape puluvis lala, la moki apinau, la moki amlotun kiela nono lala, ana visae sinetan tevisave tesu perinan la, pona monar teligan ga yomarava nini narui, komin naŋa ita make ga tesike e yomarava, a tesuŋa tepitawe ke yar sur na sanene silaga. ¹¹ Pe

nepisaluþar re nene poli, naþa tesuþa tepitawe ke yar kar na sanene e kieta yalorena, ana ya naþa sineun nesape nevisa, sineun nesape visae yaru tai suþa ga, neþa naga pe nalelagaena lelaga tai, ana apisu ke naþa e kiena malena naga suþa taþa ke kolau, pona suþa pe puluvis lue ga, pona suþa mlotun ke nono lala, pona suþa piuel, pona suþa mun kuruta namunena, pona suþa pinau, ana pogaga, yar sur ne nanene narui ve akila re nena sur tai amio naga. Yoko ve ava re lavisinia, ve akinana re lele taaga amio.

¹² Ve sanene na, e lepas kiena la naþa asike vanua e suþare, pe pe kieta re naþa teliþere kiela malena poli, ana e lepas kiena la naþa asike loyuþa e suþare, monar tevisuveve ruru la. Visae laþasa asuþa akila ke þelaga na mlamulena viowa la naþa sane nepisa ke ne, monar teliþere la, a monar tekila sur tai van la.

¹³ Ntewa ga yoko liþere la naþa pe asu re loyuþa e suþare poli,

ana e lepas kiena yar nene naþa suþa kila ke þelaga viowa likan amiu, kam ke narui monar akoven lua naga vano. Naw 17:7

6

Pelaga wo na kilaruruen veveyuena

¹ Nemloge mþena sane pogos tai, kieta puruvi tai na suþare naga pepeyu amio amiu taþena tai, ana naga suþalu þere taþena nene pa e pupia kumali apis pania. Nepisu sane sur nene pe memes re nena poli, komin naþa pe pon re yar la naþa amlelaga e Ntewa ava asuþalu e marana yerkawa la nene naþa pe amlelaga re e Ntewa poli, vena yerkawa la nene aliþere la.

² Pogos naþa li nalelagaena lala aveveyu, popon li nalelagaena taþena ga lala akila ruruia, komin naþa monar tesitoþal tevisave ita li nalelagaena ke la narui naþa teliþere yeririna lala na yomarava e legiena maro. Ana visae ita ke narui naþa yoko tekila pupia yuþaena na sanene, pona amiu atorokin naþa akila ruru kiamiu narin veveyuena la ne sanene. ³ Yoko Ntewa ligan ita vena teliþere navisi lala nae peni, ana pogos naþa li nalelagaena taþena lala avisin sur na yomarava nini, sanape? Apisu sane mþarera paþisi, taþatete akila ruruia?

⁴ Peraga, monar akila. A visae peraga, pona asitom asape popon amiu li nalelagaena lala aligan kiamiu visena e limana yar taþena la naþa pe asuþa apim re e suþare poli?

⁵ Nepis mþarera sanene komin naþa sineun nesape nekila amiu amawa towe laa ga! Ee, nemilan manene

paḡisi navisuena sa naḡa pe amiu re nena tai naḡa pe manmarua poli, naḡa kilia kila ruru kiamiu veveyuena la nene. ⁶ Pona sur ne nanene narui kila sane kieta puruvi taḡena na suḡare suḡalu mligan puruvi taḡena nene pa e pupia kumali, ana suḡa pisawal ke kiena napiowaena lala e marana pupia yerkawa lala e totanoena nene, la naḡa pe amlelaga re e Ntewa poli?

⁷ Nesuḡa nepis ke pan amiu sanene e lepas na mrapa naḡa monar atavevea vena kilaruruen veveyuena la naḡa sike likan amiu, ana po manene laa visae ve veveyuena re ḡena ga. Veveyuena la ne sanene, kaḡa kinasa sane Yermare suḡa taulu amiu rui. Pona pe akilia re poli yo wa, naḡa visae womla tai kila viowa van ko, pona vinaun kioḡa sur tai, ve ositom re, otaḡan ga, komin mlamulena viowa naga kiena. ⁸ Ana visae osumḡalu sinoḡan oligan yar nene e pupia kumali vena ala nakoena vania, ko ke narui ko osuḡa okila ke piowa pan womla nene.

⁹ Monar asitomḡalia sane la naḡa kiela malena pe memes re poli, yoko taḡatete avisu nasuḡenena kiena ne Ntewa imi ḡaliyi pu la. Pe pon re akilali akila sa naḡa amninue ke sur nene na wa, komin akilia rui asape Ntewa pe kekaran re nena la naḡa asuḡa amiyaloro kar ga, pona la

naḡa amlotun ke ga ntewa navisokanena lala, pona la naḡa akila ke kolau, pona la naḡa asuḡa aḡiliwilin ke tasnela, pona yermene pona sira la naḡa asuḡa aḡere la ke sina ga, ¹⁰ pona la naḡa asuḡa apinau, pona la naḡa pe apion re kiela sur pa yar taḡena la poli, pona la naḡa asuḡa amun wii, pona la naḡa apiueli, pona la naḡa akila urlelai.

¹¹ *Lelaga naḡa*, nanua sumo kam laḡasa akila sanene rui, ana potena paḡisi naḡa Ninuna Wa kevan amiu amekiki, kila amiu ape wa, a kieta Suḡe Yesu Kristo kila ita temesmesu ruru sina e marana Ntewa.

Tasneta monar ikik ruru wo

¹² *Nepisawal ḡelaga viowa la nene, naḡa pe pon re tekila poli, ana yar laḡasa pe sinelan re kiliaen poli. La apisa sanini, asape “E, kiau malena naḡa, nekilia nekila ya naḡa sineun nesape nekila.”*

Ana nevisataḡe la, ne-sape “Lelaga, pona kiamiu malena yo, ana avisuaria, komin sur moki liu naḡa sinoḡan kilaena, akilia akila kioḡa malena imi viowa ḡena ga. Sur mok liu naḡa sinoḡania osape suḡa e kioḡa malena, ositom osape okilia okawe ruru woga, ana peraga, yoko ovisu naḡa sur ke la nene narui yoko akawe ruru si kioḡa malena.”

13 A yar si laḗasa naḗa sinelan asape akila ya naḗa la sinelania e tasnela, la asuḗa apisa ke visena taḗena tai, asape “Kinanena, naga na mēḗeu, a mēḗeu, naga pe na kinanena.”

Ee, lelaga, ana ovisuar ruru sina, komin naḗa yoko Ntewa kila sur lua nene ava akovio na wa. Sanene na, Suḗe mla tasneta pan ita vena ve kieta, ana ita monar tela tasneta tela si vania. Tasneta vena kilaen kiena yumaena, ana pe nava kareena re ga poli. 14 Visae tetamaḗan tasneta vena kilaen ga yumaena wo lala, yoko e legiena maro Ntewa kilia visirlua si tasneta, sa naḗa pisirlua tasnena ne kieta Suḗe Yesu rui, e kiena pupia māraena. 15 Monar tekilia sane tasneta lala la sane komḗas nen tasnena Kristo. Ana sanape, popon komḗas nen tasnena ne Kristo tai va sikol si amio sira na mrapa tai? Taḗatete ve sanene ḗisa!

16 Ana Visena Wa pisa sanini, sape “Yoko yermene amio sira, lalua aim ave taaga,” ana yar naḗa va amio sira na mrapa tai, kila naḗa tasnena pimi pe taaga amio tasnena sira nene. 17 Pe mesmesun re yar tai kila sanene poli, ana monar tesikol ita temio Suḗe, naḗa ninuta imi ve taaga temio Ninuna. 18 Monar tevisuar ruru wo e mlamulena viowa la naḗa yar la akilia akila amio tasnela, e lepas na yermene

amio sira. Mlamulena viowa taḗena la naḗa asuḗa akila, asuḗa akila ke piowa ga pa e yepen yar taḗena, ana yar naḗa kila mlamulena viowa amio sira, suḗa kila ke sina ga piowa pa e yepena.

19 Ve sineta ḗesan re, sane tasneta na sane yuḗa wa na lotena tai naḗa pulen Ninuna Wa naḗa Ntewa mligan sike loyuḗa e ita. Ana tasneta nene, pe pe kieta re mēna poli, 20 ana pe kiena ne Ntewa, komin naḗa naga pul lua kieta malena e marena kiena Yesu. Sanene na, monar teyuḗae temio tasneta vena kilaen ga sur la naḗa asuḗa avisirlua kiena kia.

7

Talopaena

1 Pogaga, nagane yoko nevisawal sitomena laḗasa e naḗa apiun tan inu e lepas na talopaena, asape popon tetalopa, pona popon tesuḗa ga sanene?

Ana pogaga, yoko nevisa ve sanini. Visae yaru tai sitom ke sape ve talopa re, naga nene pogaga, pe pe sur re tai poli. 2 Ana komin naḗa tepisu naḗa nataḗaliena pimi māraera, a nataḗaena lau pule manene la, popon manene yar make ga aure wola lala.

3 Sanene na, visae yar sinenan sape va lavisin wona na sira, wona nene monar kekarania, a pogos naḗa sira sinenan sape va

lavisin wona na yermēne, wona nene monar kekaranina. ⁴ Sira naṗa talopa taṗatete visave tasnena pe kiena naga taaga, ana wona na yermēne kilia visave naga pe kiena mēna ga. Ana yaru naṗa talopa taṗatete visave tasnena pe kiena naga taaga, ana wona na sira kilia visave naga pe kiena mēna ga. ⁵ Sanene na, tai ve visaluṗar re taṗena visave ve imi re lavisinia.

Ee, pona pogos tai lalua apisayu yo, lalua ataṃan naṗa lalua aligania, ve amon re lele taaga e narin pogos tai, vena kila lalua akilia alen mārera vanon sur tai wa, ana nanene na pogaga. Ana siraunia, lalua monar sinelan si aim lele taaga, komin visae peraga, pona Yermare visu kilale naṗa tai malum ga, taṗatete uarar naga, ana kila loru e nataṗaliena koyo tai.

⁶ Sur la naṗa nesuṃa nepisa ke ne, pe nepisa re sane navisaluaena mārera tai poli, sane yar monar talopa, pona monar ve talopa re, ana nemla ga sitomena naiilaena laṗas nene. ⁷ Visae yar make ga akilia asuṃa ga sane inu, naṗa pe netalopa re poli, nesuṃa ga sanene, pona yoko vera na wo na wo, ana sur nene sike ga e sitomena naṗa Ntewa mlavia pan ita peve taaga.

⁸ Nesape nevisa visena tai van la naṗa asu m̃aga

sanene, sane la naṗa pe atalopa re poli wa, amio letano lala. Nepisu sane visae akilia asuṃa ga sanene, sane naṗa in mēna nesuṃa nekila ke ne, yoko wo na wo. ⁹ Ana visae laṗasa apisu sane peraga, yoko mārera van la vaṗisi vena auarar la lue ga sanene, pogaga, po paṗisi naṗa visae alual tai naṗa atalopa amio. Pe pon re nataṗaliena suṃa kar la sanene vano-o asuṃa aloge viowagania silaga.

¹⁰ Visena taṗena si tai naṗa sineun nesape nevisa, naga van la naṗa atalopa rui, naṗa pe kiau sitomena re ga poli, ana naga pe visena tai naṗa Suṗe mlavia sane visena mārera tai pimi pan ita. Pisa sanini, sape sira monar ve ure matan re wona na yermēne. ¹¹ A visae pogos tai sira tai ligan wona na yermēne, ure matan sina, naga monar ve talopa re sina, ana monar suṃa ga sanene. Pona visae peraga, popon naga amio wona na yermēne lalua akila ruru marala, lalua asu si lele taaga. A yermēne lala, ve aṃene plan re si wola na sira lala.

¹² Pogaga, yoko nevisawal si suri taṗena laṗasia. La pe sa re navisaluaena kiena Suṗe poli, ana sane kiau sitomena ga laṗasa vena iila itaena.

Suri ṗesia, naga e lepas naṗa yaru tai naṗa mle-

laga e Yesu sike amio wona sira tai, ana sira nene mlelaga re poli. Ana visae sira nena kekaran ga naña lalua asuñña veraga, po pon re yaru nene sitom sape mñenelua si sira nene poli.

¹³ A maran taaga mñena ga visae sira tai mlelaga e Yesu sike amio wona yermene tai, ana yermene nene pe mlelaga re poli. Visae yermene nene kekaran ga naña lalua asuñña veraga,

po pon re sira nene sitom sape mñenelua si yermene nene poli. ¹⁴ Nanene komin naga e lalua naña mlelaga kilia kila suri wo tai van naña pe mlelaga re poli, ana kiena ðelaga wo kilia kila kiela talopaena lalua imi wo vañisi sane talopaena kiena yaru lalua naña amlelaga.

A naga e lalua naña mlelaga kilia kila suri wo tai va narila lala, komin naga yoko kilia ligán ruru narila lala e mrapa na malena wa, yoko akapuru loyuma e mratava tai naña po sa ke ga ninis tañena la naña arimala amio anela la ga luwoka amlelaga. ¹⁵ Ana e lepas kiena lalua nene naña tai mlelaga a tai pe mlelaga re poli, visae naña pe mlelaga re poli sinenan sape ligán lua si naña mlelaga, ita li nalelagaena tañena lala monar tetamñan ga sanene narui. Visae naña pe mlelaga re poli yepen mavin naña mlelaga, tañatete tekilali naña tomáreran naña

mlelaga suñña amio wona naña sinenan sape ligania, komin Ntewa sinenan sape tese malena tai naña pulen ðelaga na suññare.

¹⁶ Ko sira naña omlelaga, pona ko yermene naña omlelaga, pona ositom osape okilia otaulu si womña naña pe mlelaga re poli, ana peraga, pe okilia ruru re naña osape yoko ve sanene poli, komin pona tañatete nena otauluia ðisa, peraga.

Monar teva ruru ita tesuñña e malena naña Ntewa mligan ita tesike ea

¹⁷ Ana ya ga naña monar tekila, ita make ga monar teligan ruru kieta malena ita punu ga su ruru e naña kieta Suñe mligan ita tesike e rui, pona monar teyali ga e mrapa naña Ntewa pio itania vena teyal ea. Nanene naga visena tai naña nemligan sike e kieta suññare lala. ¹⁸ Visena nene kaña kinasa sane e nape naña osike ea nanua, sumon naña omlelaga, monar okekaran osuñña ga ea wa, pogos naña osiar omlelaga. Sanene visae lañasa ape le Yu la yo, naña asuñña ataveve ke kiela ðelaga marua lala, sane ðaviu pona ya sina, nanene na pogaga, pe nepisa re nesape visae pogos naña alelaga ana monar avilopu kiela ðelaga marua la naña asuñña ataveve ke poli. A maran taaga mñena ga sa ke la naña pe ape le Yu re poli, naña pe akila re ðaviu

poli ana asuṃa ataveve ke kiela ṗelaga marua taṗena lala. E ṃena e kiela leṗasia, pe nepisa re nesape visae alelaga monar avilopu la e kiela ṗelaga marua la poli. ¹⁹ Yaru taveve ṗelaga marua ya, sane ve ṗaviu pona ve ve ṗaviu re, naga pe pe suri keviu re tai poli e navisuena kiena ne Ntewa, ana Ntewa sinenan ga sape tetaveve kiena visaluaena. ²⁰ Nane nepisa ke pan amiu narui nesape pogos naṗa olelaga, ova ruru ko ga osuṃa e yo naṗa osike ea pogos naṗa pe omlelaga re poli wa. ²¹ Sa ke ga naṗa visae omiyuṃae korena kiena yaru tai nanua sumo, ana nagane omlelaga ga na wa, nanene pogaga, monar okekarana naṗa oyumuṃae korena ga sanene. Ana lelaga, visae pog tai olual kionṃa pulmas tai naṗa okilia ourmatan e naṗa omiyuṃae korena ke ea, naga ṃena nene popon oṗisia. ²² Visae ko na omiyuṃae korena kiena yaru tai, monar ositoṃal sane pogos naṗa Suṗe vio ko, naga visirlua ko ligan ruru ko nenaga e namratava puna. Ana e kana leṗas ne tai, visae ko pe omiyuṃae korena kiena yaru tai poli, osuṃa ga sanene, ko ṃena monar ositoṃalia ovisave pogos naṗa Kristo vio ko, ko na monar oimi sane kiena yaru na yuṃae korenaena tai narui, vena kilaen kiena yuṃaena make ga. ²³ Naga nene komin Kristo pul

plan ita e pupia suri tai, sane kana kuruta, vena ita teve kiena, ana monar tevisu kilale ga narui sane mesmesun ga naṗa teyuṃae koren ga vania, po pon re teyuṃae korena van yaru taṗena poli, pona tesike vatanon sitomena kiena yaru taṗena naṗa temiyuṃae ke pania.

²⁴ Erau lala naga ke nene narui, yo naṗa osike ea pogos naṗa pe okilia re Ntewa poli wa, yo ke nanene narui monar osuṃa ga ea, ana nagane omlelaga rui, yoko Ntewa suṃa ga amio ko e nene silaga.

Naviunena e leṗas kiena la naṗa pe atalopa re poli wa, amio letano lala

²⁵ Pogaga, nesape nela narin visena tai van amiu e leṗas kiena la naṗa pe atalopa re poli wa. Visena nena, taṗatete nevisave nanene navisaluaena tai kiena Suṗe naṗa pisa pan inu, ana visena nene naga sane kiau sitomena ga tai. Ana kam na akilia rui sane Suṗe naga po paṗisi pan inu, naga mla manmaruaena lala pan inu naṗa yoko amiu akilia awasine ruru la, ana popon asitom urmi e kiau visena nini narui. ²⁶ Nagane, tesike e pog viowa tai naṗa tesuṃa tepisu ke suri ṃarera la naṗa tepane la, ana popon nevisa si visena naṗa nepisa metava rui, naṗa nesape popon teva ruru ita tesuṃa ga e malena naṗa tesike pae e

rui. ²⁷ Sanene, visae ko yaru tai naŕa otalopa rui omio sira tai, popon osu ruru ga osumã sanene, ve ositom re ovisave oligan lua naga. Visae ko pe opure re sira tai poli wa, ko m̄ena ga osumã ga sa ga nene, pe ositom re osape otalopa omio tai poli.

²⁸ Ana visae ositom sane peraga, sinoñan manene osape oure sira tai, pe nepisa re nesape piowa poli, a visae sira m̄ee tai talopa amio yaru tai, naga m̄ena nene pe sa re kiena mlamulena viowa tai poli, nanene na pogaga nene. Ana la naŕa sinelan talopaena, la monar avisu kilale sane yoko taŕatete kiela malena memea, yoko avane pog m̄arera la ve moki vaŕisi e yomarava nini, a visae otaveve kiau visena, naŕa ve otalopa re, yoko nekekara vaŕisi.

²⁹ Erau lala, nepisa ke sanene komin naŕa narin pog plas ga sike ga wa vano-o tol pogos naŕa sa Suŕe wasuŕe si vitomi, a pe yaru la moki re poli na kilaen kiena yuñena. Ve sanene popon manene visae la naŕa aŕure wola la rui, akila sa naŕa pe atalopa re poli wa, ana akilia akila yuñena lala kiena Suŕe ve moki. ³⁰ A la m̄ena ga naŕa asumã atagin ke suri tai, popon sinela ŕesan suri naŕa atagin ke ne, a la naŕa amloge ke pon kekarena lala na yomarava, popon ve asitom̄al re sina. La m̄ena naŕa amiyuñen

ke kilavaru, popon akila sa naŕa limala korena ga. ³¹ La naŕa akila yuñena taŕena lala na yomarava nini, popon akila sane pe kiela sur re tai sike e poli, komin yomarava nini amio kiena suri make ga naŕa sike ea sun ke naŕa yoko va kokovio narui.

³² Nepisa ke visena la nene pan amiu komin nesitom amiu paŕisi, pe sineun re naŕa silaga aligan lue ga kiamiu sitomena se suri la ve moki poli. Yaru naŕa pe wona re poli, naga kilia sitom urmi e yuñena kiena Suŕe silaga, sape yoko naga kila ve sanape naŕa yoko Suŕe kekarania, ³³ ana yaru naŕa sike amio wona, naga sumã sitom manene suri na yomarava la paŕisi, ana kila ve sanape naŕa yoko wona na sira kekarania, ³⁴ a yoko kilia kila m̄ena sa naŕa kiena sitomena la ve ve lua. A sira m̄ee naŕa pe wona re poli, naga m̄ena ga kiena sitomena m̄arera ruru po vena kilaen yuñena kiena Suŕe, a kiena yalena amio kiena yuñena kilia ve wa ruru lue ga. Ana sira naŕa wona sumã ga, kiena sitomena monar su ga e yuñena na yomarava nini, sane monar kila suri la naŕa wona na yerm̄ene loge wonia. ³⁵ Kiau visena la nene, pe sineun re visaluŕar amiuena e suri tai poli, naŕa sinemiun asape akila, ana nepisa kiau visena kilali naŕa iila kiamiu malena. Sineun ga nesape

suri na suñare punu ga kirir ruru wo, a sineun nesape ita li nalelagaena lala ve teki-rakirai re, ana tekira tevisu ga kieta Suḡe naga taaga.

³⁶ Ita laḡasia akila naḡa akilawo kiela sira tai, ana asitom asape popon asutowe laa sane wa, pe asitom re talopaena poli komin naḡa sinelan kilaen yuñæna kiena Suḡe. Ana visae lala tai visu sane sitom manene la sira nene naḡa akilawoia, sa naḡa sitom manene vano-o visu sane yoko uarar ḡele si naga, naga popon akila ga lalua atalopa narui. Nanene naga pogaga ne, naga pe mlamulena viowa re tai nene poli ḡisa. ³⁷ Ana visae tai kila ruru sitomena m̄arera naḡa m̄arera sape naga sinenan vena naga amio sira nene naḡa akilawoia vena ve kiena, lalua asum̄a sanene sumo wa, a visae naga visu kilale sane naga kilia kawean ruruia, nanene naga kila po paḡisi visae ve talopa re ga amio wona nene rui. ³⁸ Sanene, naga naḡa talopa mare ga amio naga naḡa akilawoia asape ve kiena, naga kila suri wo tanea tai paḡisi, a naga naḡa suñaga, pe talopa re amio naḡa apisawo poli, naga kila sur tai naḡa po manene laa sane. ³⁹ E lepas kiena la naḡa atalopa rui, monar ve aure matan la re sina. Sira naḡa talopa naga monar su ruru ga amio wona na yerm̄ene naḡa wona nene mali ke ga

wa. Ana visae yaru nene mare, sira nena kilia talopa sina, akilia talopa amio yaru tai naḡa naga sinenania, ana monar ure ga naḡa naga m̄ena mlelaga e Suḡe. ⁴⁰ Sanena naḡa nepisa ke ne, naga kilia talopa, ana nepisu sane yoko wo laa vania, pona kiena kekarena keviu laa sane, visae naga ve talopa re sina. Nanene inu ga kiau sitomena, ana nesitom nesape Ninuna Ntewa ga mla sitomena marua la nene pan inu, ana popon asitomruruia.

8

Sanapen tata la naḡa am̄em̄aria pe na kilaen lotena van nono lala?

¹ Nagane sineun visataḡeen kiamiu naviunena e lepas na tata la naḡa yar la naḡa pe amlelaga re poli akuḡapaḡain la ke pan kiela nono lala. Ana amiu asum̄a apiun ke asape popon ita li nalelagaena la takan tata la nene, pona peraga?

Pogaga, yoko kiau navisataḡeena visayu sur ve lua, ḡelaga na kiliaena, a ḡelaga na sinesiena. E lepas na kiliaena, yar la mok liu naḡa la asape akilia ruru navisataḡeena na kiamiu naviunena nene, a akilia avilaven towe m̄aga naḡa asitom asape akilia suria. Pelaga na kiliaena kilia kila yaru ligan kiena sitomena va metava, ana ḡelaga na sinesiena pe sa re nene poli, suña miila ruru

ke ga malena kiena yaru. ²Yaru naŋa sitom manene ke sape naga tol ruru ŋelaga na kiliaena, naga pe kilia ruru re Ntewa poli wa sane popon kilia naga. ³Ana yaru naŋa tol ruru ŋelaga na sinesiena, naga ke narui naŋa Ntewa pisu kilale ruru naga.

⁴Pogaga, nane kiau visena lua si ne nanene narui, e lepas na tata la naŋa akuŋaŋain pa nono lala. Suri na sumo pisa sanini, sape akilia asape sane nono la nene ape totou ga, a pe ape totou na sur lelaga re nena tai poli. A sur na lua naga sanini, sane kieta Ntewa naga taaga nena naŋa pe lelaga sike na. ⁵Yar la asumã apisayu ke kiela ntewa taŋena lala pona kiela suŋe taŋena lala naŋa asape asike ma e peni pona e yomarava nini, a apisayula ke sa ga la yo pulen la ga asumã ga, ⁶ana e ita, tekilia ruru tesape Ntewa na taaga ga sumã ga. Naga nane Ata Ntewa, naŋa naga pe purŋes nen sur make ga, naŋa ita tepe kiena. A Suŋe taaga ga naŋa sike na, nane Yesu Kristo, naŋa naga sii make suria, a naŋa temal ke m̄ena ga e naga.

⁷Naga nene kiliaena napo naŋa ita li nalelagaena la moki tetol rui, ana sur tai piowa ga, ita laŋasa pe tekilia ruru re sur la nene poli wa. La nene, nanua sumo la m̄ena asumã amlotun nono lala, ana pimi tol ŋane, m̄arera paŋisi naŋa

avisu kilalea sane naga nene pe sur na visokanen ga. Sanene na pogos naŋa yaru la akukin tata la naŋa akila kuŋaŋaena ea pa nono lala, tekilia takania sa ga pe pe sur re tai poli, ana ita taŋena la nene, pogos naŋa akania, akan amio sitomena naŋa asape tata nene naga kana nono lala, a siraunia yepela ŋilinia, amloge sane akila sur tai naŋa pe mesmes re poli e marana Ntewa.

⁸Ana monar tekilia sane kinanena, naga pe pe sur re tai naŋa kilia kila Ntewa visu ita sane topo pona tepiwawa. Visae ve takan re tata nene, pe kana kinas re nane topo e kiena navisuena poli, pona visae takania, pe kana kinas re nane tepiwawa poli.

⁹Sike ga e ita visae sine-tan takania pona yepeta mavin kanena, ana pe pon re tekila sur tai naŋa nalelagaena taŋena sitom sape pe mesmesun re kilaen poli. Pona ita tekilia tekila sur nena woga ga yo, ana pe pon re naga visu naŋa tekila poli, ana kila kare kiena sitomena.

¹⁰Sane e lepas na tata la nene, pona e kiomã sitomena, okilia okan woga yo, ana okilia okila pe pe sur re tai poli. Ana visae pogos tai osike omio yar lala loyumuã e kiela yumuã na lotunen nono lala, ana ala tata van ko ana okan omio la, yoko ve sanape naŋa visae nalelagaena taŋena tai visu ko? Pona naga tai naŋa pisaar

pisape naga mlon ke tata la nene yo, ana pogos naña naga pisa ke naña okania, yoko naga visave “Suwala, yar nene naga pe yar na sumare tai naña kilia ruru suria, ana naga sumã kan ke ga tata la nene. Sanape, popon in mēna ga nakania.” Naga pisa sanene narui, ana naga mēna ga kania, ana sir-aunia yoko kilia loge viowagania vaḡisi komin naña sitom sape naga kila pupia mlamulen viowa tai.

¹¹ Naga nene kana kinasane sane ko na osumã otaveve ke kiomã kiliaena napo, opisus kilale sane okilia okila sur nene. Ana monar ositom ovisave yar taḡena nene, naña naga pe womla tai naña Kristo mare vena tamalia naga, naga maraun kilaen paḡisi. Sanene, visae naga visu naña okila pogos tai, yoko kilia kila naña okila kare nena kiana naviawaena. ¹² Visae ve sanene, yoko Ntewa visu ko sane ko ke narui okila mlamulena viowa pa womla nene, komin naña okila naga kila sur tai naña e kiana sitomena piowagan kilaena. Naga nene piowa ga, sane okila ke ga mlamulena piowa pan Kristo.

¹³ Komin sur nene, in na nekila kiau sitomena tai, sane visae kiau ḡelaga na kanen tata nene naga pe sur tai naña kila kare naviawaena kiana wolai nene, yoko neligan ga narui. Ve netol re sina, komin naña yepmavin naña in ke narui

nekila wolai nene loru.

9

Pol pisayu kiena ḡelaga na yuḡaena

¹ Erau lala, sineun nevisa van amiu nevisave in na pe nesu re vatanon e sitomena kiana yar taḡena poli, ana nemiyuḡae taveve ke ga ya naña nekilia nesape mesmesun nakilaena. In na nepe nalogena tai naña nepisu kieta Suḡe Yesu e kilamarau, a amiu ke narui naña sane mras nen kiana yuḡaena naña nemiyuḡaenia. ² Nekilia nesape yar la ḡasia yepela mavin visu kilale inena sane nepe nalogena tai, ana amiu na pe sa re nene poli. Nagane kiamiu malena su ruru sike amio Suḡe rui, a sur nene kila apisu kilale asape nemiyuḡae ke pan amiu sane nepe kiana nalogena lelaga tai.

³ Ana e la naña sinelan liḡere inena sane asape nekila ke piowa sanene sanene, kiau navisatamēena la sumã ga. ⁴ Nekilia sane asape asuḡa apisuar imimi panoo sinela mare, ana sanape? Apisuar mña taḡena la nanua sumo ne, ana pe apis re sanene poli, ana pogos naña nepimi, apisa sur taḡena narui. Pona asitom asape visae ve mekinana re pona ve momun re ana mekilia memal ga ve sanene vena kilaen yuḡaena pula?

⁵ A apisayu imimi laṣas naṣa atalopa rui, apiun asape komin ya ne wola mēna la apim asuṃa ataveve imimi? Ana ane sape nene naga piowa ga? Nalologena taṣena la ne apim ṣesa, amio wenla Suṣe lala, amio Keṣas, pogos naṣa amiyalin ke yuṃaena sanene, wola na sira lala asuṃa ataveve la, ana e poglis nene, yar la nene pe apisa re sur tai e lepas nene poli.

⁶ Ana asape avisaluṣar imimi ke sina ga ve meyuṃaen re kilavaru vena ulen kiamimi suri lala. Visae imimi lua Panaṣas ve meyuṃae re ga woga ga rui, ana komin ya ne apisa ke ga sanene pan imimi lua Panaṣas, ana pe apisa re pan taṣena la poli?

⁷ Asitomyuli yaru na mara lala na purvanua taṣena tai. Pogos naṣa apanon mara, ana ane pul ke kiela sur lala? La ga apulia, pona kiela ṣarin suṣe naga pisuvevea? A asitomyuli la naṣa amapla kinanena e lokove. Visae akinana e lokove nene, taṣatete yar tai vis van la vanonia. A sanapen mēna yar naṣa pagan ke surmal lala? Pona naga pe kanli re nena kala tata ne tai poli yo?

⁸ Nepisa sur la nene vena kila amiu avisu kilale sa naṣa visae yar tai kila yuṃaena tai, popon yar la naṣa naga miyuṃae kiela monar avisuar ruruia. A nepisa sanene, pe molue re ga e kiau sitomena poli,

ana kieta navisaluaena wa pisayu mēna ga sanene. ⁹ Visena tai sike loyuṃa e navisaluaena kiena Mosis rui, naṣa pisa sanini, sape

Pogos naṣa kioma puluk tai suṃa yaloro ke metava e kioma mralaki sane kona vena vie plan kurusnela, ve oviar re gona, ana monar otaman naga yaloro ea ana kinana lilue maga vano. Naw 25:4

Pogos naṣa Ntewa pisa visena nene narui naga pe suṃa sitomaṃal re sur mal la poli, ¹⁰ ana naga sitomaṃal ita naṣa temiyuṃae, sape la naṣa temiyuṃae kiela, monar avisuar ruru ita. Yaru naṣa miyuṃae e porotano, mesmesun naṣa naga sitom visave pogos tai yoko kan ya naṣa naga mapila, a yar naṣa va lokove war kinanena vitomi, mesmesun naṣa naga mēna sitom visave yoko ataman ve tokaki vania. ¹¹ Ana e lepas na kiamimi yuṃaena pun amiu, memapila mras wo la mok liu rui e kiamiu malena, ana popon vena amiu akekaran naṣa avisuar imimi a akian navisa ruruena laṣas naṣa Ntewa mligan e limamiu van imimi. ¹² Amiu asuṃa amiila ke yar taṣena laṣasa sanene rui, ana popon akekaran manene laa sane nakilaen wo van imimi naṣa imimi mekila ṣesan po pan amiu sumo rui.

Ee, popon akila sanene

van imimi, ana tol nagane pe mepisa re nena pan amiu mesape monar akila. Memaraun mesape sa p̄isi mevisawal sanene p̄isa, yoko asitom viowa e imimi narui, sa p̄isi kilawo lawe mrapa na Lologena Wo imi pun amiu. Kila narui mepis re si poli, a visae meloge viowagan naṗa pe apisuar imimi re poli, pogaga.

¹³ Ana popon asitomyuli m̄ena ga sane e Yum̄a Wa m̄ana Ntewa, la naṗa amiyum̄ae ke loyum̄a ea amio li na kuṗaṗaena lala, asum̄a akan ke sur la nene, a asum̄a amal ke e sur la naṗa yar la amla ke sane kiela nalaena pa Ntewa. ¹⁴ A Suṗe pisawal m̄ena ga sa ke nene e lepas kiena ne kiena yeririna la naṗa asum̄a amlologon ke Lologena Wo. La m̄ena ga, mesmesun naṗa akilia amal e nalaena la naṗa yaru la ne amloge ke Lologena Wo nene asum̄a ala van la.

¹⁵ Pogaga, in na yar la ne tai ne sanene, ana siar nanua sumo pimi pe nepisali re nesape yar la monar ala sur tai sanene van inu poli, pona monar akila ve sanape na van inu. A nesum̄a nepisakol ke ga sur la ne e m̄aki nini, pe naga re ga naṗa nesape neviun sur tai tan amiu poli. Pe sineun re nesape asiar naṗa ala sur van inu poli, ana aṗarwar amiu asape amiu ke narui apagan inu, ana

sineun nesape in na nekilia nesum̄a nowarwar inun nesape Ntewa ga sum̄a pisuar inu silaga. Pogos naṗa nekilia nesape kiau malena sike ga e limana, nesum̄a nemloge po paṗisi, a visae ve naga re naṗa sum̄a visuar inu, pona yoko neloge sane popon sa nemarṗan ga rui. ¹⁶ Nesape noṗarwar inun naṗa naga pisuar inu sanene pogos naṗa nemlologon ke kiena Lologena Wo, ana e lepas na pun inu, lelaga paṗisi pe sur re tai naṗa nekilia noṗarwar inun poli. Taṗatete nevisirlua si kiau kia va metava, nesape in ke narui nepe yar na lologonen Lologena Wo, vanon Ntewa ke narui naga mligan e lum̄au, ana nepisu sane monar nekila ga narui. Visae pogos tai nourenia ve nekila re sina, yoko viowa van inu vaṗisi. ¹⁷ Visae nekila ke yum̄aena nene e ga e kiau sitomena tai, inu ga nesape popon nekila, vena Ntewa kekarania, pona yoko kilia la nalaena tai van inu komin yo, ana pe sa re nene poli. Pe inu re naṗa nesitom nesape nekila poli, ana Ntewa ga pisawalia, mligan e lum̄au, ana monar nelogearia, nekila ga ve sanene narui. ¹⁸ Ana sanene, nesitom p̄ele nesape nela nalaena tai vanonia, ana naga nene pogaga, komin naṗa Ntewa sum̄a kila ke sur taṗena tai sane pul inu e sur wo tai rui. Sur

nenana, naga pupia naloge-woena nene naña netolia, pogos naña nesuñña nemlologon ke lologena wo pa yar lala, naña nekila korenan ga sanene pan la. Pona nekilia nevisa van la nevisave ala sur van inu vanonia, pona avisuar ruru inu e pogos naña nemiyuñña ke sanene, ana pe sineun re nene poli, sineun nesape akilia atol ga sa ga nene, pe suri tai suwo la re poli.

Pol naga miyuñña korena ga pa yaru lala sane nalologena wo tai kiena ne Ntewa

¹⁹ Sitomena ne nanene sike e inu, a nesuñña nemiyuñña ke e ðelaga tai naña yoko nevisa meraravan van amiu nagane.

Sane, inu na pe nemiyuñña kiena yar re tai poli, a pe yar re tai naña pe yer kawan inu poli, ana inu na nekila inu nepimi sane yar na yuñña korenenana van yar taña lala, vena kila sane nekilia netaulu la ve moki aimi alelaga.

²⁰ E lepas kiena ne le Yu lala, nesuñña nekila inu nepim nepe yere Yu nena napo, vena kila sane nekilia noure lañaasia aimi.

E lepas kiena ne la naña pe ape Yu re poli, ana ataveve ke navisaluaena kiena Mosis, nesuñña nekila inu nepim sane yar tai naña nataveven ñena ga navisaluaena nene. Pe nepisu re sane nesike vatanon navisaluaena nene poli, ana nekekan naña

nevatania ve sanene, vena tauluen la nene naña sinelan suen vatanonia.

²¹ E lepas kiena taña lala naña pe ape Yu re poli, naña pe ataveve re navisaluaena kiena Mosis poli, nesuñña nekila inu neve taaga nemio la, komin nesape netaulu la ñena ga. Pe nepisa re nesape nesuñña nekilaro navisaluaena marua kiena ne Ntewa poli, peraga, ana pogos naña nesike nemio la, nesuñña netaveve ke navisaluaena viu kiena Kristo vena kila kila la alual malena.

²² E lepas kiena ne la naña nepisu sane pe asuñña ruru re ñarera poli, pe nepis ñarera re pan la poli, ana nekila ke sa naña in ñena nemio la, nesuñña nemiila la, vena pona netaulu la yo.

Sanene, inu na nesuñña netaveve ke mrapa make ga nakilaen suri make ga naña nekilia nekila van yar make ga, vena kilaen sanene vano-o yoko nekilia netamalia lañaasia aimi alelaga e Yesu.

²³ Nekila sanene, pe nekila re ga pan inu poli, pona vanon suri taña tai, ana nekila vanon ga naña sineun nesape Lologena Wo monar war mrasa e malena kiena yaru lala, a pogos naña nepisu navisa ruruena naña Lologena Wo kila pan la, nemloge po na po.

²⁴ Asitomyuli pogos naña yaru na kiririena lala akiriri ke veraga. E pogos nene, la make ga monar akilali

naña akiriri koskos veraga avano, ana la ve via aim p̄es vamon la, a kilia taulu taņena lala? Yoko ve taaga kilia koven make laņasa, kiriri vano yuve la, la kiena nalaena vanonia. Ve sanene narui, kam make ga monar aņareran yuņaena kiena Suņe, monar aņareran akiriri avano vena ala kiamiu nalaena.

²⁵ Yar na kirakiraena la asuņa aņion ruru la silaga, a asuņa apalia ke suri make ga la naña kilia kila tasnela ve m̄arera ruru re. Asuņa akila ke sanene komin kiela sitomena lala m̄areran sape monar atauluia, atol nalaena. Ana pogos nate-lanen meme e yaru na kirakiraena la nene, yam plas ga meme la nene pioyowa sina, ana meme naña popon toņion naña atelan e ita, naga yoko sike sike nena.

²⁶ Sanene, in na nekila ke sanene narui e yuņaena kiena Suņe naña nekila ke ne. Pe nekiriri koren kar re ga poli, a pe nekirakirai re ga sanene poli, ²⁷ ana nesuņa nakawean inu, nesuņa nepisuar ruru tasneu silaga, komin naña pe pon re nesuņa nelologo ruru van yaru lala, nesape la sanene, sanene, ana siraunia, in ke narui nekila pal mrapa, pona pe netorokin re naña nekila make ruru kiririēna naña nekiriri ke ea.

10

La naña asitom asape la

amesmesu rui, akilia akila pal mrapa, sa naña apua kana le Yu la akila sumo rui

¹ Erau lala, popon tesitomyuli ya naña kata apua la akila. Naga nene e pogos naña yermarua Mosis sumon la amolue gar Isip, amio naga ataveve lul nene naña suņa sumon la apa akusro pupia sive nene naña mliņere pan la. ² Aņal pogos m̄arera laa nene, ana Mosis p̄ere la apa aņarpoyo ea, ana apim sane ape kiena yeririna kemua lelaga. ³ Kas moki asuņa amialoro ke e yokorena, la make ga akan kinanena nene naña Ntewa kian pan la, ⁴ a pogos naña moto kar la, Ntewa kila wii kate e pulus nen kilavaru nene vena amunia. E poglis nene, sane Kristo ga sike amio la, suņa pisuar ruru la e sur make ga.

⁵ Ntewa kila m̄a po pan la sanene pano-o, ana yepela mavin suņalen m̄arera se ea. Apilon m̄asila pania, ana naga pe taņan la re apa loyuņa e yo naña naga pisaar pan la poli, kila naña asuņa amarmare tetai kar ga e yomema.

⁶ Ana ita nagane, pe pon re teve p̄arm̄arera ve sa repita la nene poli, ana visae tesitom ruru e ya naña pimi paemen la, kilia vian ita ea. ⁷ Visae ve sanene, monar ve teligan re sur taņena sumon Ntewa e kieta malena, sane nono tai naña telotunia, sa naña repita la nene akila.

Visena tai naŕa pisayu kiela ŕelaga e poglis nene, pisape
“La pe asitom re si sur taŕena poli, sinelan ga kilaen paŕagena, amun wii marala tetelivi, a aŕure nŕena sira lala e wolena lala, naga ga nene.” Nau 32:6

⁸ La asitom asape malena wo ne nanene narui, ana ve sineta ŕesan re legiena nene naŕa Ntewa kila lomara viowa la apim akar yermene lala amio sira lala naŕa akila lau, ana e legiena taaga ga nene la manu lualima yam lua pa telu [23,000] amare veraga e legiena taaga, sane kiela nakoena m̄arera tai. Visae ve sanene monar tevisuar ruruia, pe pon re ita laŕasa ava kar ga sanene poli. ⁹ Yar naŕa pilave, kila mlamulena viowa sanene, a naga sitom sape pogaga ne, ana sum̄a miyur kare Suŕe paŕisi. Yoko Suŕe kilia kila sur tai vania, yoko yar nene ilania, lomara iminia sane yar na sumo la nene.

¹⁰ A pe pon re tevisumun Ntewa poli, sane la naŕa asum̄a akila nanua sumo e pogos kiena kata apua lala. E poglis nene, Ntewa pitetalia navisi tai na visaaren marena pimi pula, m̄emom̄ar la.

¹¹ Tepisu naŕa la asum̄a akila ke mlamulena viowa sanene, ana tepisu naŕa nakoena pimi m̄alivin la ke sanene, ana pe suri tai naweŕege itaena. La

asirilua kana suniena nena nakonua konua rui, ana tekilia tesitomyu si suri nene nagane, e legiena maro la ne tesike e ne. ¹² Sanene, visae yar tai visuveve si kiena malena naga taaga, a sitom sape naga sum̄a sum̄alu ruru ke m̄arera rui, popon naga visuar ruruia, komin viowagan naŕa visae naga kila si viowa pogos tai, ana loru.

¹³ Apisu nakilaliena la imi, ana ve sinemiur kurkur manene re. Pe kam re ga apane ke nataŕaliena la nene poli, ana asum̄a am̄alivi ke e malena kiena ne yaru make ga. Ana akilia awasine Ntewa, komin naŕa yoko naga taŕatete kila ko ovane nataŕaliena naŕa ko pe otorokin re otaulu poli, ana pogos naŕa nataŕaliena imi kilali ko, yoko naga vian kon kiom̄a mrapa nam̄areraena naŕa nasuwoen nataŕaliena, vano-oure matan nam̄areraena na taŕaliena nene.

¹⁴ Kiau erau wo lala, monar ve ava re nena lavisin ŕelaga naŕa yar la asum̄a amlotun ke nono na visokanena lala. ¹⁵ Nekilia nesape kam na yar sur la naŕa akilia suria, ana pogos naŕa nepisaar mesmesun nena pan amiu sanene, nemlelaga nesape kam na amninu kilale ya naŕa nesum̄a nepisa ke ne. ¹⁶ Nepisa visena la nene komin naŕa pogos na ova oyakol amio yar la naŕa

asumã amlotun ke nono tai, sa ga naþa ko mēna omotun ke nono nene narui. Naga nene maran taaga amio ita la naþa temlelaga ke e Kristo. E pogos na þaþagena wa, temlenin namunena wa, temlavia, a na nene sa naþa ita tepisawal tesape tesikol ita e þegas kiena yar la naþa kana kuruta mlau komin la. Ana siraunia, takawero kilaparavi wa, temlavia, a na nene sa naþa ita temio la naþa akila kare tasnena naþa tamalele metava e lak torovia.

¹⁷ Nanene lelaga pan ita punu ga naþa tesumã tepim lele taaga e þaþagena wa nene, komin naþa tepim sane þegas taaga, a takan pae ga kilaparavi taaga nene.

¹⁸ A sa ke mēna ga nene pa le Israel lala, pogos naþa amemomã suri na kuþaþaena lala. Laþasa pe akila re kuþaþaena poli, ana aþekaran kanen tata na kuþaþaena nene naþa yaru taþena ga la akila, ana kila sa naþa ape þegas taaga naþa akila lotena na sanene pan Ntewa.

¹⁹ Pogaga, visena la nene kana kinas na ya? Nesumã nepisayu ke nono lala amio nakuþaþaena la nene, ana e kiau sitomena kana kinas pe nepisa re nesape sur la nene na lelaga poli, pona apowo liu. ²⁰ Pe sa re nena nene poli, ana popon nekila meraravan van

amiu, nesape la naþa akila ke lotena kar la ne sanene, pe amlelaga re e Kristo poli, a kuþaþaena la naþa asumã akila ke ne, pe asumã akila re pa Ntewa lelaga poli, ana asumã akila ke ga pa yermare lala. Sanene, pe pon re ava lavisin la naþa asumã akila ke poli, komin pe sineun re nesape asikol amiu amio yermare la poli. ²¹ Ko naþa ototano ke e lele na kinanena kiena Suþe, osumã omun ke e mēna piala wa, a osumã okan ke kana kinanena wa, taþatete okilia ova ototano e lelen kinanena kiena yermare lala vena omun kiela namunena a okan kiela kinanena. ²² Yar na kila sanene naga sumã miyur ke Suþe, kilia kila Suþe vielue vaþisi, sinena karia. A pona yar nene sitom ke sape visae Suþe sinena kar sanene, pe pe sur re tai poli, komin naga m̃arera manene taulu Suþe? Pe nesitom re nena sanene poli.

Li nalelagaena lala monar ve akila re sur naþa kilia kila li nalelagaena taþena lala aloge viowa

²³ Visena tai sumã ga, naþa yar la mokliu apisa apisape, yaru kilia kila ga ya naþa naga sinenan sape kila. Pona visena nene pe lelaga yo, ana sur laþasa sike na naþa nekilia nekila, ana yepmavin ga kilaena, komin e kiau navisuena, la pe asumã amiila inu re e kiau

malena poli, a pe asumã amiila re malena kiena yar la naþa asike lavisin inu poli. ²⁴ Nepisa sanene komin naþa pe pon re yar tai sumã sitoñal ga naga taaga poli, ana monar sitoñal mēna yeririna la naþa naga sike lavisin la.

²⁵ Pogaga, nagane yoko nevisa sur laþasa e lepas na tata na sur mali lala naþa akila kuþaþaena ea pan kiela nono na visokanena lala. Visae awar tata la nene imi, aligan su amio tata taþena lala, vena awilwilin la, tekilia toulia takan woga ga. Nanene komin naþa taþatete tekilia tevisu kilale sane tata na ya la ne sanene, tesape tata ya naþa akila kuþaþaena ea, pona tata ya naþa pe akila re kuþaþaena e poli, ana ve tesitom manene re, ve teviun re, toul ga narui. ²⁶ Telavia, takania, komin naþa sane visena tai pisa sanini sape yomarava nini,

amio sur make ga naþa sike ea, naga pe kiena ai? Naga pe kiena kieta Suþe. Yauena 24:1

²⁷ A visae yaru tai naþa pe mrelaga re poli, vio ko vena ova okinana e mēna yumã, pona omaraun vaena yo, osuñã ositom ke osape pona awar kinanena laþasa van ko naþa akila pae lotena na kiela nono la e yo rui. Ana peraga, visae osuñã ositom ke naþa ovano, ova ga, a ve oviun re naviunena sanene, ola ga ya naþa visae

ala van ko. ²⁸ Ana sur ga tai, visae ova osike pae e naþa rui, a nalelagaena taþena tai teke ea, ana pona naga visa van ko sanini, visave Wolai, tata nene, italua monar telonia, komin nekilia rui nesape akila pae e rui pa kiela nono lala. Visae naga visa ve sanene van ko, ana sanene yoko ko mēna ga ve okan re. ²⁹ Lelaga, e lepas na kiomã sitomena, okekarana ga kanena, ana e lepas na womla taþena nene naþa pisa sur nene pan ko, viowa vania, ana pe pon re si otol poli, komin visae peraga, yoko okila sur tai naþa kiena sitomena pe mesmesun re nenaga þisa.

Ana visae ko ga taaga, a pe yar tai pisawal re sur la sanene pan ko poli, okilia okila ya naþa ko sinoñan osape okilia okila.

Nane kiau sitomena sanene e lepas nene. Nesitom nesape pe mesmesun re naþa yaru taþena ga kilia m̄areran inu visave monar nekila nene, pona ve nekila re nene. ³⁰ Visae kinanena ya, nevisu sane visae nelenwo sumo, yoko nekilia nakania woga ga. Pe pon re yaru taþena sinena karinun poli, naþa nakan ke tata naþa nepisa potena pa Ntewa vanon rui.

³¹ Pogaga, naga kana kinasa sanini, sane visae tekan suri tai, pona tomun sur tai, pona ya si naþa tekilia tekila, ana monar tekila make ga e þelaga tai na visirluana kia kiena ne Ntewa. ³² Pe

pon re akila sur naþa kila kare sitomena kiena le Yu la poli, pona le Kris lala, pona kieta li nalelagaena taþena laþasa, ³³ ana popon amiu akilali sa naþa in na nesuþa nekila ke pan la. E sur make ga naþa nesuþa nekila, pe nekilali re ya naþa yoko wo van inu poli, ana noþikeyon naþa wo van la, vena kila sane pona laþasa akilia atol natamaliaena.

11

¹ Lelaga erau lala, sa naþa nesuþa nekilali ke naþa neyaloro nelilu lana Kristo, popon akilali ayaloro alilu lelen lau.

Pelaga wo kiena yeririna la pogos naþa ava e suþare

² Erau lala, nemloge sane asuþa asitoþal ke yuþaena la naþa nekila pan amiu na wa, a asuþa atarar ruru ke þelaga lala na yuþaena nene naþa nepian amiyunia.

³ Ana e sur la nene, tai sike ga wa naþa sineun nesape monar akilia ruruia, naþa pisayu yermene amio sira, naþa lalua kiela yuþaena pe maran taaga re poli. Sa naþa Ata Ntewa naga pe þarun Kristo, a Kristo naga pe þarun yaru, ana yermene naga pe þarun wona.

⁴ Ana taveve kieta þelaga, visae yar tai lotu, pona visi e marana li nalelagaena lala, naga monar ve yan re karo na þarina e þarina. Visae naga yania, tevisu naga sane wowe tai

naþa mninue þelaga na vata-noena, ⁵ Ana sira lala na pe taþena. Visae sira tai lotu, pona visi e marana li nalelagaena lala, tepisu sane popon naga yenwo þarina e karo na þarina pona kulm-rae tai. Visae ve yenwo re þarina sanene, naga mēna ga kila piowa, tepisu naga maran taaga visae akervan þarina ve þarmu ga rui suþal se maran yaru lala.

⁶ Visae sira tai ve þarmarera, yepen mavin kaloen þarina sanene, popon avisa vania avisave popon naga kervan vilþarina, ana yoko kilia suþal ga na wa su loyuþa e suþare ana lotu. Ana yoko naga mawa vaþisi nakilaen sur nene, komin pe pon re sira la aweroro vilþarila ve plalas manene poli, pona akervan þarila ve þarmu. A visae ve sur na kilaen sira mawa sanene, popon sira la akekan tararen kieta þelaga na vatanoena, monar ayenwo þarila la sanene pogos naþa aim alotu e suþare.

⁷ Ana komin ya ne yermene lala la monar ve ayenwo re þarila lala? Nanene komin Ntewa sike metava, a naga pe þar pa rui, ana naga kila yermene sane naga, pisirlua yermene kila naga pe þarun sira. Nane sa ke nene narui, yermene taþatete kalo þarina, ana sira monar kalo þarina.

⁸ Tekilia sane yermene naga monar ve þarin sira sanene, komin Ntewa sii

þesan yermene, siraunia sii sira molue kome lepas nen yermene, ana pe sii re yermene molue kome sira poli, ⁹ a naga sii sira vena iilaen yermene, pe sii re yermene poli vena iilaen sira. ¹⁰ Sanene, sira monar kalo þarina, vena kilaen sa naþa naga patanon ke wona. Ana pogos naþa naga kila sanene, navisi lala nae ma e peni apisuia, a kila naþa apisu kilale sa naþa sira kekaran vatanonen wona na yermene, a la mēna monar akekaran vatanonen kiela yerkaiva keviu naþa Ntewa.

¹¹ Lelaga naþa sira monar vatanon yermene sanene, ana nanene kana kinasa sane pe sa re naþa sane lalua pe atoroki re poli. Ita naþa tesike loyuma e þegas nen kieta Suþe, tekilia rui tesape sira na taþatete suma naga taaga, a yermene taþatete suma naga taaga, ana lalua monar asma ayuma lele taaga vena aiila la maran ve taaga. ¹² Nanua sumo la e nasiiena, sira nasumo molue e tasnena yermene, ana siraun na nene, yeririna punu ga amolue akome tas nen sira tol nagane, ana tekilia tesape purþes kemua lelaga, naþa sur punu ga molue komea, naga Ntewa ga.

¹³ Pona laþasa pe akekaran re kiau visena poli yo, naþa nesape popon sira lotu monar kalo þarina, ana asitomyu rurulia. E kiamiu navisuena, apisu

sane sira naþa ve kalo re þarina, mesmesun ga naþa sumalu lotu va Ntewa? Peraga, e kieta þelaga na pe mesmes re poli. ¹⁴ E kieta malena na yomarava nini, merarava ruru pan ita rui sane pogos naþa yermene ligan vilþarina kapuru vim ve piyavi manenea, piowa pan paþisi. ¹⁵ Ana pogos naþa sira tamān vilþarina ve piyavi ruruia, po pan paþisi, a viluna na piyavi ne, Ntewa mla pania sane sur tai naþa miyowauia ruru yepena.

¹⁶ Ana sa naþa nepisa, li nalelagaena laþas asma apisliu, pe akekaran re sitomena nene poli, sane sira naþa sinenan sape lotu monar kalo þarina. Pogaga, kiau visena sanini, nesape imimi li nalologena lala, memlologon ga sanene, pe mekekaran re þelaga taþena poli, a sumare kiena ne Ntewa taþena la ne asike ne, la mēna ga asape ve sa nene.

Mrapa mesmesu nakilaen þaþagena wa

¹⁷ Sur si tai sike ga wa naþa sineun nela sitomena laþasa ea van amiu. A piowa ga, komin naþa naga pe pe sur re tai naþa nekilia nevisir plan amiun poli, ana naga pe sur tai naþa monar nevis van amiunia. Naga e lepas na pogos na sumare, naþa popon vena sur tai naiilaen kiamiu malena, ana akila sa naþa pimi pe purþes nen sur viowa

si tai. ¹⁸ Nepisa sanene komin naña nemloge rui sane pogos naña amiu li nalelagaena lala apim lele taaga, pe ape taaga re poli, ana naliþereena sumã pa ke metava likan amiu. Visae visena la nene navisokanena ana po, ana peraga, nepisu sane monar ve lelaga ga. ¹⁹ Ana pe nekilia re poli vanon ya ne sinemiun asape akila sanene? Pona yar tai sinenan sape yuve tai, tai sape yuve tai sanene yo? Pona sinoñan osape otauluia vena yoko yar la avisave ko ke narui ope lelaga, pona ko ke narui naña Ntewa sike amio ko?

²⁰ Ana e lepas na þaþagena wa, nemloge sane naga mñena nene asuñã akila ke piowa ga. Pogos naña apim lele taaga vena kilaen þaþagena wa nene, pe akila re si sane nasitomwalena kieta Suþe poli, ana akila ke ga sa naña kamiu kinanena taþena lala. ²¹ Visae tai imi loge viso karia, yoko naga suñalu kian limana la kilaparavi ve keviu, pona taþena mun kuruta na munena ve keviu, ana ve torokin re si laþasia! ²² Pona pe kamiu lelana viranen re kapi e poli yo, þisi na aim vena akinana loyumu e sumare? Pona asuñã akila sanene komin naña asuñã asitom korenan ke ga sumare kiena ne Ntewa, pona asuñã asitom korenan ke ga erau na lelagaena taþena lala? Nemninue kare

narui aña nevisa ya ne van amiu e sur nene, yoko nevisa ga nevisave pe nekekaran re nena poli.

²³ Mrapa mesmesu na kilaen kinanena wa, Suþe ga pisa pan inu, ana siraunia in ke narui naña nemla lein pan amiu. Pa sanini, sa naña Suþe Yesu, kiena yemalo maro nene, naña Sutas pielua naga ea, naga mla kilaparavi nene, ²⁴ ana mlen pisa potenania, kawerorovia, ana pisape “Tasneu ke nini narui, naña netamñania vanon amiu. Ana monar asuñã ala luen ga kilaparavi sanini silaga, sa naña sur na sitomñalinena tai.”

²⁵ Ana siraunia, pogos naña akan pae, mla piala na kuruta, kila ke mñena sanene, pisa pan la, pisape “Piala nini, naga kau kuruta, naña vena kilaen naviranarena viu naña Ntewa kila amio yaru suñalu. A pogos punu ga naña ala piala nene, awis, monar asitoñal inu.”

²⁶ Erau lala, nane visena kiena Suþe e lepas nene, ana kila sane pogos naña tela kilaparavi a tela piala sanene, tesuñã tepisawal ke nasitomñalena na kiena marena, a monar tekila mña sanene vano tol pogos naña naga imi mñalivin ita sina.

²⁷ A nalaen kilaparavi kana Suþe nene amio mña piala, naga pe sur tai naña pe wa paþisi. Visae yar tai la e þelaga tai naña ve mesmesu re, yaru neñe

kila piowa ga, þarnena kare tasnena Suþe amio kana kuruta, sa ga naþa naga ga m̄memoñaria. ²⁸ Ana pogos nakilaen þaþagena wa sanene, monar ita make ga veve taaga tevisu ruru kieta malena lala, þisi na, tela kilaparavi amio kuruta nene. ²⁹ A pogos naþa telavia, monar tevisu kilale sane sur nene kana pupia kinasa suñã ga, naþa pisayu kieta Suþe naþa naga tañan kiena malena vanon ita. Ana visae yar tai lavia, ve sitom re urmi sane ita make ga tepe tas taaga e Kristo, naga la korenan ga, ana yoko naga visu sa naþa viowa manene laa vania. ³⁰ Sur nene suñã kila amiu ke rui, naþa amiu mokliu yepemiu la miaiai a amai, pano-o tol naþa kam laþasa amare. ³¹ Ana visae tevisu ruru kieta malena silaga, yoko Ntewa ve la re nakoena sanene van ita. ³² Ana ita naþa Ntewa kila sanene pan ita, ve tela re sa naþa nakoena tai, tela sa naþa navianena tai naþa Ntewa kila pan ita sape tekirava, vena la pulmas tai van ita e legiena maro, naþa yoko ve akoven ita re teva temio yar na yomarava taþena la naþa yoko ava e lele naloge viowaena.

³³ Erau wo lala, kiau visena ne na nene e lepas na kilaen þaþagena wa. Pogos naþa aimi lele taaga sanene, ana akila ga e þelaga napo. Ve yar tai kilali re naþa la þesania vena kan ve keviu,

ana ava ruru amiu ga, pogos naþa amiu make ga asike lele taaga narui, ana akilia akila ga na wa. ³⁴ Yaru naþa viso karia sitom manene laa kinanena, popon naga suñã ga uñã, kinana ruru kana. A monar ataveve ruru kiau visena e lepas nene, visae peraga, pogos naþa aimi lele taaga, ana yoko taþatete suri tai wo van amiu.

Sur taþena si laþasa sike e inu vena visawalen van amiu, ana yoko nevisayu la van amiu e pogos naþa neim nom̄alivin amiu.

12

Mareraena la naþa Ninuna Wa kian ke sa naþa nalaena tai

¹ Wolai a vineu lala, pogaga, sineun visayuen ñareraena la naþa Ninuna Wa kilia kian van ita li nalelagaena lala sane nalaena tai. E lepas nene, ve ave wowen re, ana sineun nesape monar akilia ruru toweli ñaga. ² Ana popon asitom si wasuþe va e pogos naþa kam na pe amlelaga re poli wa. E poglis nene, nañareraena na ninuna taþena lala asuñã amiyuñae ke e amiu, aþure kare kiamiu sitomena la pa pe wowen ruru nenaga nalotunen nono kar la naþa pe apis re poli. ³ Nane ninuna sur ne la naþa akilia akila yaru vis viowa va Yesu, viuelin kiena kia, ana Ninuna Wa kiena ne Ntewa naga taþatete la visena la ne sanene. A ninuna la

nene, tařatete akilia akila yaru visa visena wo lala, nařa sape Yesu naga pe Suře kemua lelaga, ana yar nařa visa sanene, tekilia tesape Ninuna Wa miyuńae ke e kiena malena, mla visena na sanene pania.

4 Sanene, pogos nařa tepisu māreraena wo la nařa li nalelagaena la akilia amiyuńae amio, tekilia tevisave nane sane nalaena la nařa Ninuna Wa mla ke pan la. Mareraena mokliu nakilaen yuńaena la sike ne, ana Ninuna ne Ntewa naga taaga pe purřesan make ga. ⁵ Sa ga nařa řelaga na yuńaena la mokliu sike ga wa, ana kieta Suře naga taaga pe řarun la make ga, ⁶ a sitomena wo na kilaen yuńaena la sike ne, ana Ntewa ga naga taaga kila la apa ke metava pan ita make ga. ⁷ Sanene, e lepas namāreraena lala nařa Ninuna Wa kiania, li nalelagaena lala ařar peve taaga sane tai mla tai, tai mla tai, taveve ga ya nařa Ntewa pisu sape yoko iila manene řegas nen li nalelagaena lala.

8 Pan tai, Ninuna kian visena la nařa amanmarua pařisi.

Pan tai, kian navisukiliaena nowo lala.

9 Pan tai, kian pupia naviawaena, pan tai, kian nařa kilia kila ruru maiena.

10 Pan tai, kian nařa kilia yuńaen kile lala.

Pan tai, kian navisawalena suri la nařa pimi ke ga wa.

Pan tai, kian nařa kilia mńene plan yermare lala.

Pan tai, kian nařa kilia vis e visena tařena lala.

Pan tai, kian nařa kilia vilon viřena kiena la nařa apis ke e visena tařena lala.

11 Nane nalaena la nařa Ninuna Wa naga taaga kilia ligan se malena kiena yaru, kian plan ke pan ita peve taaga taveve ga ya nařa naga sinenania.

12 Li nalelagaena lala ařar nalaena tařena la ne sanene, sa nařa tasneta lala kiela kinakinas tařena lala mokliu. Kinakinas tařena la nene, amiyakolkol la asuńa amiyuńae ruru ke veraga e tas taaga, a sa mńena ga nene loyuńa e řegas kiena ne li na lelagaena lala, nařa la na sane kinakinas nen tasnena Kristo. ¹³ Pona ita tepe yere Yu pona tepe yere Krik, pona tepe yerkawa pona tesuńa temiyuńae korena kiena yerkawa tai, ana Ninuna ne Ntewa naga řere ita make ga, kila akee ita vena teimi teve kinakinas nen tasnena ne Yesu komřasa, ana Ninuna ne nane naga taaga sike e kieta malena peve taaga.

14 Popon tesitom manene laa totou nařa tesuńa tepisa

ke ne, sane ita li na lela-gaena lala ita na sane tas-nena Kristo. Ana e lepas na tasneta lala, tekilia tesape kana kinakinas la mokliu. ¹⁵ Ana sanene, pe mesmesun re naña kinakinas komþasa sane lana, mloge piowa, suñalu pisape “Ke, in na nepe lana ga, in na pe nemiyuñae ruru re sane li mana miyuñae poli, pona in na pe pon re ga neve kinakinas nen tas komþas poli.” Ana peraga, lata pisa þele sanene, komin naga pe pupia kinakinas na tasneta komþas rui. ¹⁶ Ana pe mesmesun re naña kiligata loge viowa poli, suñalu pisape “Ke, in na nepe kiligana ga, pe nepisu kilale re sur sa naña kilamarana kila ke poli, pona in na pe netorokin re nesikol nemio tasnena poli yo.” Ana peraga, kiligata taþatete visa sanene, komin naña naga kiena yuñae napo e tasneta sike pa rui. ¹⁷ Naga nene komin naña visae tasneta ve kilamarana ga, yoko taþatete teloge kilia suria, a visae tasneta ve kiligana ga, taþatete telopon suria. ¹⁸ Ana e tasneta, Ntewa kila taveve kiena sitomena, mligan ruru kinakinas make ga su mesmesu ruruia sike nena e lelela lala, vena la veve taaga akila nena kiela yuñae lala. ¹⁹ Visae kinakinas nen tasneta make ga maran ve taaga, yoko taþatete tevisu sane tas tai, ²⁰ ana kinakinas taþena la monar asikol la lele taaga vena kila sane

tas nen yaru. ²¹ Kilamarata taþatete visa kare limata, visave “Ke, pe sineun ko re poli,” a þarita taþatete mñene lata, visave “Ke, pe nesitom ko re si poli.” ²² Pe sa re nena nene poli, ne! Kinakinas nen tasneta la þasia amalumlum paþisi, ana tekilia sane asuñae akila ke pupia yuñae. ²³ Kinakinas nen tasneta taþena laþasa, pe tesitom re tesape aña la apo sanape wa, ana tesuñae tepisuar ruru la. Kinakinas nen tasneta taþena lala, pe sinetan re yar taþena visu poli, ana tesitom urmin naña teyenwoia. ²⁴ A kinakinas nen tasneta taþena laþasa, la atorokin ga naña yar la akilia avisuia, ana ve teyenwo re. Sanene tepisu ke naña Ntewa mligan ruru make kinakinasnena mesmes ga, a mligan sitomena tai sike e ita sape pe sur korena naña kinakinas laþasa amalumlum, po pe akila re yuñae keviu poli, ana tesitom urmi e la a tepisuar ruru la. ²⁵ A naga nene kila naña kinakinas make ga pe apeveyun la re poli, asu ruru ga, asuñae amiila la ke sina ga silaga. ²⁶ Visae kinakinas nen tasneta tai loge viowagan sur tai, kinakinas taþena make ga monar aloge viowa amio, a visae avisirlua kinakinas taþena tai akila wo vana, kinakinas make ga akilia aloge wo amio.

²⁷ Ana visena la nene la kala kinasa sanini, sane ita li nalelagaena lala, ita na

sane tasnena Kristo, a ita peve taaga tepe kana kinakinas lala. ²⁸ A Ntewa mligan ita kinakinas na tasnena Kristo, ve nakilaen yuñäena lala na sumäre. Na sumo, Ntewa pisirplan lañasia ape nalologena, a nalua, lañasa ape navisawalena, a natelu, lañasia ape navianena, a suraunia, la mñena ga ðasia naña ave nakilaen kile lala, pona akila ruru maiena lala, pona avisuar yuñäena na sumäre, pona avis e visena tañena la, sanene. ²⁹ Ana ðegas nen li na lelagaena lala, tepisu naña la make ga ape nalologena? Pona la punu ga ape navisawalena? Pona la make ga navianena? Pona la make ga ape nakilaen kile? Peraga, sa re nene poli. ³⁰ Pona la make ga nakilaruruen maiena? Pona la make ga akilia avis e visen tañena lala, pona avilon visena tañena lala? ³¹ Pe sa re nena nene poli, ana popon vena la make ga akekaran naña atol pupia namareraena ya naña Ninuna kilia kian van la.

A e ðareraena la nene, tai sumä ga naña monar imi ðesa e kieta malena ita punu ga, naña po taulu make tañena lala, naña sineun visayuen van amiu, nane ðelaga na sinesiena.

13

Sinesiena

¹ Sinesiena, naga sur tai naña monar ve sur nasumo e kieta malena. Pona nekilia nevisi kome visena kiena yar tañena la woga yo, pona nekilia nevisin visena kiena navisi la woga yo, nanene pogaga, ana visae ve sineu sii re yar lala, nekila ke sane kiau visena make ga sane ðe tai naña aña miyelu wowe korena ga. ² Pona pupia ðareraena sike e in yo vena visawalen visena kiena ne Ntewa, pona nekilia ruru sur moki naña yar tañena la pe akilia re poli yo, pona kiau naviawaena keviu manenea torokin nelotu ana sur la imi ðalðalivi yo, sur la nene po manene pañisi, ana visae ve sineu si re yaru lala, nepe sur korena ga. ³ Pona nekian kiau sur make ga pa yar la naña limala korena yo, pona nesumälu ðarera ða pano asikap tasneu komin naña nepe yaru kiena Kristo, naga mñena nene po na po, ana visae ve sineu sii re yaru, nekila korenan ga.

⁴ Ana pupia sur nene, ðelaga na sinesiena, naga sanape? Kiena sitomena piavi, a naga sinewo. Naga pielue re poli, naga pilave re poli, a naga pisirlua re si naga poli. ⁵ Kiena ðelaga po, naga puluvis re poli, naga sinena mimi koskos re poli, a naga tarar re sitomena viowa piavi poli. ⁶ Naga pe sinenan re sur viowa poli, ana naga kekaran ga sur wo. ⁷ Sinesiena naga sumälar lue

ga, sinesiena naga lelaga lue
ga, sinesiena naga wasine
lue ga, a sinesiena naga
taulu lue ga. ⁸ Sinesiena
naga pe sinena mare re po-
gos tai poli.

Lelaga paṽisi, nam̄areraena
taṽena lala, sane navi-
sawalena lala, pona nav-
isaen visena taṽena lala,
pona nakiliaena lala, yoko
taṽatete sike lue, ana
nasinesiena ga naga su lue,
naga taṽatete ṽisi pogos tai.
⁹ E kieta pogosia, asum̄a
apisawal ke visena kiena
ne Ntewa, a asum̄a apian
ke nakiliaena la ne sanene,
ana ya naṽa asum̄a akila ke
nagane, naga komṽas nena
ga, pe wetelu re nenaga ṽisa.
¹⁰ Sur la nene ape nanagane
ga, a e pogos naṽa Ntewa
yoko kila sur make ga imi wo
ruruia, sur taṽena la nene
yoko aṽisi, ana sinesiena
yoko su lue.

¹¹ Naga maran taaga ga
amio kieta malena. Pogos
naṽa tepe sisi ke ga wa,
kieta visena amio kieta sit-
omena mla ke ga ṽelaga
kiena sisi. Ana pogos naṽa
tepe yerkawa, pe tesa re
si ninis poli, kieta ṽelaga
marua ruru nenaga. Ana ki-
eta malena am̄jo Ninuna Wa
monar ve sa m̄ena ga nene.

¹² A maran taaga m̄ena ga
e kupito naṽa tepisu ke
marata ea. Pogos tai, visae
kupito nene namname pona
pe urmarua, ana taṽatete si
tekilia tevisu ruru marata
ea. Ana e pogos naṽa Ntewa
kila ruru make sur la imi

wo, yoko tevisu kilale make
suria, a yoko tevisu nena
marana Ntewa e kilamarata.
A e m̄ena e lepas na kieta
kiliaena, nagane tekilia vi-
tokak ga, ana e pogos naṽa
pimi ke ne, yoko Ntewa kila
naṽa tekilia ruru naga, amio
sur taṽena make ga, maran
ve taaga sa ke ga naṽa naga
kilia ruru ita nanua sumo
rui pimi tol nagane.

¹³ Sanene, sur taṽena lala
yoko ṽisi, ana sur la ve telu
ga yoko kilia sulue, nane
naviawaena, nawasineena,
a sinesiena. A e sur la
telu nene, naga naṽa ke-
viu manenea, nane nepisa
maron ne, naga sinesiena.

14

*Pol pisayu sina m̄areraena
lala kiena Ninuna Wa, sa
naṽa avis kome visena
taṽena lala*

¹ Ana komin sinesiena
naga pe sur tai naṽa keviu
maneṽe sanene, monar
aligan naga su ṽesia e
kiamiu malena. A amio naga
nene, monar aligan kiamiu
sitomena se nam̄areraena
la naṽa Ninuna Wa sum̄a
kiania, akekarana naṽa
atolia. A e m̄areraena la
nene, tai naṽa po manenea,
na naṽa yar visawal visena
kiena ne Ntewa.

² Visae yar tai sum̄alu vi-
sawal visena kome visena
taṽena naṽa Ninuna Wa mla
pania, pona wo van yo,
ana sa naṽa pis ke ga pa
Ntewa, naga pe sum̄a ṽisa
re visena naṽa yar taṽena
la akilia aloge kilale poli.

Pona naga sumã pisawal ke pupia visena la naã Ninuna Wa mla ke pan yo, ana visena la nene pe merarava re pan ita poli, tapolou ga, taãatete tetolia. ³ Ana visae yar tai visawal visena lala kiena ne Ntewa van ita, vis van ita kome kieta visena, kiena visena wo la nene akilia akila ita tomãrera, akilia avisir plan kieta sitomena, akilia akila luãeluãelosineta. ⁴ Sanene, yar naã pis ke kome visena taãena naã Ninuna Wa mla pania, sumã pagan ke sina ga naga taaga, ana yar naã pisawal ke visena kiena ne Ntewa naã yar la amloge kilalea, naga sumã pagan ke sumãare make ga.

⁵ Pogaga, nekekarã naã visae avis kome visena taãena la ne sanene, ana nepisu sane popon manene visae asumã avisawal ke visena kiena ne Ntewa van yar taãena lala. Naga naã sumã pisawal ke visena kiena ne Ntewa, kiena yumãena po manenea taulu yumãena kiena yar naã sumã pis ke kome visena taãena. Naga nene komin yar naã sumã pis ke kome visena taãena, kiena yumãena taãatete kilia war mrasa e malena kiena yar taãena. Kiena yumãena taãatete vagã sumãare visae yar re tai naã sumã vilon kiena visena vena yar taãena lala akilia alogekilalea.

⁶ Erau lala, asitomyulia visae inu, pogos naã nepim

ke pun amiu nesumã nemlologo kome visena taãena naã Ninuna Wa mla pan inu. Ana yoko taãatete nena kiau visena la ne sanene kilia iila amiu. Ana pogos naã nepis kome visena naã akilia amloge kilalea, kila sane ya naã nemla pan amiu, sane sur viu tai naã Ntewa kipian inunia, pona kiliaena tai, pona navisawalena tai na visena kiena ne Ntewa, pona vianena tai, ana kilia iila ruru kiamiu malena.

⁷ Naga sane plaãe amio kana laki naweena naã amãe apolu, visae sur lua nene amenunu, ana pogos na wolena taãatete ologe yauena pona pialu yelu. ⁸ Ana visae suãe tai sinenan visave we ãe na kumali, ana ãe nene menununu, taãatete yelu ruru ve keviu, yoko yeririna la taãatete akilia aloge kilale avisave suãe mãe ãe na ya. ⁹ Ana sa ke mãena nene e kiamiu sumãare gar e namã. Visae yar tai sumã pisa ke visena lala kome visena taãena naã yeririna la akilia re poli, yoko taãatete nena atol narin sur tai e ya naã naga sinenan sape visa van la. Kiena visena yoko va kovio ga e yepesinas na mãeke ne.

¹⁰ Sa naã tekilia, visena mokliu sike e yomarava, a kiela visena lala kala kinas la sumã ga. ¹¹ Ana visae neva ko yo tai, neninue kiena visena, in na sane nepe wolawa ga e yo

nena, a la mēna ga ave wolawa ga e inu. ¹² Ana visena nene, kana kinasa e amiu naṗa asuṃa aṗion ke asape māreraena lala kiena Ninuna Wa ayuṃae likan amiu. A kana kinasa sanini, ve akila re naṗa kam veve taaga asuṃa avisir plan amiu ga, ana monar awionliā vena amiu make ga asuṃa avisirlua suṃare imi mārera ruruia. ¹³ Ana visae amiu yar tai kilia visi kome visena taṗena tai sanene naṗa Ninuna Wa mla pania, popon naga lenin va Ntewa vena Ntewa la māreraena vana vena vilon kiena visena la nene ava e kiamiu visena. ¹⁴ Nepisa sanene komin naṗa visae nelotu kome visena taṗena na sanene, nepisu sane nesuṃa nelotu ke ga e ninuu, ana loyuṃa e kiau sitomena nemninue ya naṗa nesuṃa nepisa ke ne. ¹⁵ Visae ve sanene, yoko popon tekila ve sanape? E kiau navisuena, popon tekila e lepas ga luwoka veraga. Visae nesuṃa nelotu, pona nesuṃa neyau, ana popon nekila e visena naṗa molue kome ninuu, a popon mēna nekila e visena naṗa molue kome kiau sitomena. ¹⁶ Visae peraga, pona osuṃa olotu ga kome visena naṗa molue kome ninuṃa, osuṃa ovisa potena va Ntewa komin sur laṗasa, ana yar taṗena naṗa loge ṗele visena nene, yoko taṗatete kilia, yoko taṗatete visa “Sanene” e kioṃa leniena. ¹⁷ Pona osuṃa om-

lotu ke sanene, opisa ke suri wo la moki yo, ana kioṃa lotena nene taṗatete kilia iila sitomena kiena kioṃa erau ṗisa.

¹⁸ In na nekekara paṗisi naṗa Ntewa mla namāreraena nene pan inu vena nevisi kome visena taṗena naṗa Ninuna Wa mlavia, nepisa potena pan paṗisi, a nepisu sane inu na nekila keviu paṗisi taulu amiu make ga. ¹⁹ Ana nesuṃa nekila ke e pogos naṗa inu ga taaga nesiau, pe nekila re e maran yaru la poli e pogos na suṃare. E kiau navisuena, visae nevisa visena tai ve tokaḡ ga kome visena tai naṗa yar la akilia, naṗa kilia vian kiela malena, naga nene po manene laa taulu naṗa visae nekila visena la ve moki kome visena taṗena tai naṗa la pe amloge kilia re poli.

²⁰ Erau lala, awis akilali naṗa asitom ruru e sur la nene, kiamiu sitomena ve ve sa re ga ninis. Pe lelaga naṗa e lepas na ṗelaga viowa lala, popon ave sa ga ninis, ve akilia make re sur ea. Ana e lepas na ṗelaga wo, kiamiu sitomena lala monar marua ruruia. ²¹ Visena tai sike e Siriena Marua, pisawal visena tai naṗa Ntewa pisa sanini, sape

Yoko noure yar la naṗa apimi e purvanua taṗena lala, naṗa apisi kome visena taṗena lala, neligan plan la avano vena avisawal

*kiau visena van kiau
yeririna lala.*

*Ana kiau yeririna lala ape
p̄arm̄arera paṗisi,
yoko taṗatete aya-
gogon kiau visena la
naṗa wolawa la nene
avisawal van la. Ais
28:11-12*

²² E visena nene, nepisu naṗa Ntewa pisawalia pisape naṗareraena na visinen visena taṗena lala naṗa Ninuna Wa kiania, naga na ya? Mareraena nene pe pe kieta re poli ita la naṗa temlelaga pa ṗisi rui, ana naiilaen la naṗa pe amlelaga re poli wa. Pogos naṗa aloge, avisu kilalea sane lelaga. Ana naṗareraena navisawalen visen kiena ne Ntewa, naga kilia iila manene ita naṗa temlelaga rui, naṗa tekilia teloge ruru merarava wo. Ana naṗareraena nene taṗatete iila manene la naṗa pe amlelaga re poli, komin yepela mavin yagogonen visena lala kiena ne Ntewa.

²³ Ana pogos naṗa aimi lele taaga vena kilaen suṃare sanene, pe pon re asuṃa avis manene kome visena la naṗa Ninuna Wa mla ke pan amiu poli. Visae pogos tai, yar tai naṗa pe kilia ruru re sur nene poli yo, pona pe mlelaga re poli, visae naga imi loyuṃa e kiamiu suṃare, yoko naga visa ve sanape? Yoko naga monar sitom visave kam make ga ape wowe la. ²⁴ Ana visae imi loyuṃa, visu naṗa asuṃa apisawal ke visena

kiena ne Ntewa kome visena naṗa amiu punu ga akilia, yoko naga yagogon ruru kiamiu visena wo lala, ana kilia yur kiena malena, kilia kila naga visu kilale kiena mlamulena viowa. ²⁵ A pogos naṗa yagogon mā sanene vano-o, yoko naga loge visena kiena ne Ntewa tol kiena malena, va yupor e sur la naṗa naga p̄arwan sike e kiena sitomena, a yoko kila naga sinena ye si naga, kinai tano lotun Ntewa, visawal visave lelaga, Ntewa sike likan amiu.

*Monar teyuṃae e
naṗareraena kiena Ninuna
Wa e p̄elaga mesmesu*

²⁶ Taveve visena la nene e lepas na naṗareraena lala naṗa Ninuna Wa kiania, yoko akila ve sanape e pogos na kiamiu lotena lala? Pogos naṗa aimi lele taaga, popon vena ali-ureure kana yuṃaena lala van amiu. Sanene, yar tai la yauena tai, yar tai la naviana tai, yar tai la sitomen viu tai naṗa Ntewa pisawal pania, yaru tai la visena tai e visena taṗena tai naṗa Ninuna Wa kian pania, a taṗena kilia vilon visena nene vena yeririna la make ga akilia kana kinasia, ana suri punu ga kilia vagan ruru malena kiena li nalelagaena la naṗa asike ne.

²⁷ Ana sa naṗa nepisa, visae e pogos nene, yar tai sinenan vis kome visena taṗena naṗa Ninuna Wa kian pania, nanene pogaga.

Visae ve lua pona ve telu naga pogaga mēna ga, ana monar ve yuve re telu. A ve avis re veraga, ana ala pogos van la, tai sumo, siraunia taḡena sanene. A tai mēna ga, visae tai vis pae, yar taḡena monar vilon kiena visena, vena la make ga akilia. ²⁸ A visae šinelan visen kome visena taḡena sanene, ana visae pe tai re sumā ga naḡa tol naḡareraena na visawalen kinas nen visena la nene poli, yoko la ve avivis re si kome visena taḡena la ne sanene e maran yaru lala. Yaru na sanene, yoko topur ga, a kilia vivis ga kome visena taḡena e ga e ninuna, naḡa naga ga amio Ntewa lalua akilia aloge.

²⁹ E lepas kien la naḡa apisawal ke visena kiena Ntewa, popon sane la ve lua pona ve telu ga avis. A pogos naḡa avis pae, popon li nalelagaena taḡena lala avisawal kiela sitomena ea. ³⁰ Visae tai sumā mlologo māga, ana Ntewa kila sitomena viu tai imi van nalelagaena taḡena naḡa totano teke ne, naga naḡa sumā pis ke ne monar ḡisi kone wa vena la pulmas van taḡena nene. ³¹ Sanene, amiu punu ga akilia atol pulmas na visawalen visena kiena ne Ntewa, naḡa tai visawal tai, ḡisi taḡena visawal tai, sanene. Ana visena la nene yoko kilia visirlua sitomena kien yaru make ga, a la make ga akilia atol sur wo ea.

³² Visena wo tai sike ne,

naḡa torokin la naḡa aḡar ke naḡareraena naḡa Ninuna Wa kian pan la. Visena nena pisa sanini, sape Ninuna naḡa mla visena pan yaru naga pe māreran re yaru poli, ana naga monar logear ga manmaruaena kiena yaru nene naḡa pisawal ke visena nene. ³³ Visena nene kana kinasa asape monar teyumaē e ḡelaga wo sa naḡa Ntewa naga sinenania, komin naga pe sumā miyumaē kar re poli amio kiena naḡareraena, ana sumā miyumaēn ke sur punu ga torokin ḡelaga na sumārena.

A popon akila ve sa naḡa ḡegas nen li nalelagaena wa taḡena lala asuma akila, ³⁴ naḡa pogos na lotena, akila naḡa sira lala apa ruru la ga asuma ga. Pe ataḡan re sira la asuma poli vena avis e marana yermene lala, komin sa naḡa navisalu-aena marua pisa, sira lala monar ve asu re metava taulu yermene lala. ³⁵ Visae sira la sinelan kiliaen suria, pe pon re aviun manene naviunena poli pona avisawal maḡene kiela sitomena loyuma e sumare, ana visae ava uma narui, akilia aviun ga va wola la na wa.

³⁶ Nanene kiau visena laḡasa naḡa pan amiu, ana pe pon re kam laḡasa asitom asape nepisa sur nene pe mesmes re poli. Pe kamiu re naḡa Visena Wa kiena ne Ntewa pimi ḡes pan amiu poli, a pe kam re ga naḡa

atol poli. ³⁷ Visae kam yar tai sitom visave naga yar na visawalen visena kiena ne Ntewa, pona naga pe yar naña sitom ke sape naga taveve ke mrapa naña Ninuna Wa kila pe merarava pania, naga ke narui naga po, ana visae ve sa kemua nene, yoko naga monar visu kilia visave sur la naña nesuñña nesiriyu ke pan amiu, ape visena kiena Suñe kemua lelaga. ³⁸ Ana visae naga ve visu kilale re sane kiau siriena la nene ape visena lelaga kiena Suñe, yoko monar ve atañan re si naga yumñae amio amiu.

³⁹ Pogaga, monar asitom ruru kiau visena lala, nesape amñareran naña vena atol namñareraena na visawalen visena kiena Suñe, ana visae la pñasa atol namñareraena na visena kome visena tañena naña Ninuna Wa kian pan la, monar ve avisaluñar la re avisave kilaen toko. ⁴⁰ Ana visae akila nene, pona ya sina, ana monar akila sur make ga taveve kana mrapa naña mesmes ruru po.

15

Suñalen sina e marena

¹ Erau lala, sineun nesape nevisayu si Lologena Wo naña nepim nemlologon pan amiu rui, naña amlavia, asuñña asuñnal ke mñarera ea, vena kila amiu ve sinemiu pñesan re. ² Lologena Wo nene na naña visae asuñña

amlarar ke mñarera yo wa, naga suñña kila ke naña atol kiamiu natamaliaena. Ana visae ve atarar re si mñarera torokin ya naña nemlologon pan amiu, pona visae avilon ve ve tañena, kana kinasa sane amlelaga nanua sumo ana amlelaga korenan ga.

³ Lologena Wo naña amla pñesan pan inu nanua sumo, nane nemla narui, nepisawal ke pan amiu ne. Kana pupia visena ne lala apisayu Kristo, naña naga kila maran taaga sa ke naña Nasiriena Wa pisayu nakonua rui sape yoko naga kila, pogos naña naga pe pitomi re poli wa. Pa sanini, sape Kristo, naga mare wo ita vanon kieta mlamulena viowa lala, ⁴ siraunia amligan naga mñene puluve, siraunia e kana legiena na telu suñalu mal sina, ⁵ a siraun naga nene naga mñalivi pñesan e marana Keñas, siraunia, naga mñalivi ke sina ga e marana la lualima yam taaga pa lua. ⁶ A siraun naga nene, pogos si tai naga mñalivi e marana pñegas nen li na lelagaena lala, la taulu ponotia lima [500], naña la mok liu amal ke ga wa tol nagane, ana lañasa akokovio rui. ⁷ Ana siraunia, naga mñalivi sina ga e marana Semes, siraunia mñalivi e marana nalologena tañena lala, ⁸ ana siraun nene, naga pñasuñe si pa ma e peni. In

na pe nesu re e poglis nene poli, ana potena paḡisi naḡa siraunia, Suḡe ḡalivi si yam tai, naḡa naga ḡalivi maro nenaga, ḡalivin inu. ⁹ In na pe netorokin re naḡa naga kila sanene van inu poli, komin naḡa e nalologena make ga, in na nesumaro tano, a in na pe netorokin re nena kia nene poli, komin nanua ne in ke narui naḡa nesuḡa noḡene ke ḡegas nen li na lelagaena lala kiena ne Ntewa. ¹⁰ Ana Ntewa naga pe lemam pan inu paḡisi, pisirlua inu e yo naḡa nesike e nagane, a naga pe lemam korena re sanene pan inu poli, komin naḡa nekila ke kiena yuḡaena kerkeviu la moki. Lelaga, pona nekilia nevisave in na nekila ke yuḡaena pa laa sane taulu make taḡena lala, ana pe in re naḡa nekila ke poli, ana lemamiena kiena ne Ntewa ne nanene narui naḡa sike e inu, naga ke narui miyuḡae ḡarḡoyo kome kiau malena. ¹¹ Ana in na pe nesitom manene re nesape in na nemiyuḡae ke sanape, pona nalologena taḡena lala amiyuḡae ke sanape, ana pupia sur nena sane memlologon Lologena Wo pan amiu, ana amlelaga ea.

¹² A pogos naḡa memlologo ke sanene pan amiu, mepisawal meraravan ruru pan amiu mesape Kristo, naga mare, ana siraunia mal sina. Ana komin naḡa

mekila ke sanene, nemilan paḡisi naḡa nemloge sane kam la ḡasa asuḡa apisape pogos naḡa tokovio, asin ita, ana yoko temare lue, ve temal re si pogos tai. ¹³ Sitomena na sanene pe mesmes re poli, komin naḡa visae asuḡa avisave pe yaru re tai naḡa kilia suḡalu si poli, kana kinasa sane Kristo ḡena pe suḡalu re si poli. Ana peraga, Ntewa pisirlua naga mali si rui. ¹⁴ Visae naga ve visirlua re Kristo, kila sane memlologon korenan ka ga Kristo pan amiu, a amiu ḡena amlelaga korenan ga. ¹⁵ A visae ve sanene, kila sane pogos naḡa memlologon ke sanene pan amiu mesape Ntewa pisirlua Kristo mal si rui, mepisokan paḡisi e kia kiena ne Ntewa, pona mepian amiu ke e sur tai naḡa pe lelaga re poli. ¹⁶ Visae lelaga naḡa sane yar mare taḡatete si mali, kana kinasa sane Kristo ḡena ga taḡatete si mali. ¹⁷ A visae Kristo mare mon ḡaga sanene, kana kinasia sane kiamiu naviawaena pe sur korena ga, a kana kinasia sane kiamiu mlamulena viowa la sike e amiu na wa. ¹⁸ A visae Kristo ve mal re ḡena ga si sanene petan marena, kana kinasa sane kieta erau la naḡa amlelaga ana akovio rui, apa e yo viowa rui, komin pe yar re tai naḡa kilia tamalia la poli. ¹⁹ A visae kieta lelaagaena e Kristo suḡa miila

ita e ga e yomarava nini, ana tařatete iila ita e pogos nařa tokovio ea. A visae Kristo tařatete tamalia ita e pogos nařa tokovio e yomarava nini, yoko viowa manene van ita, sineta ye kare ita vařisi.

²⁰ Ana peraga, pe sa re nena nene poli, nekilia nevisa mesmesu nevisa ve lelaga, Ntewa kila si Kristo mal si petan marena, a pisirlua naga sane pe mras řesa kiena li na lelagaena make ga, nařa visae akovio pogos tai, ana yoko Ntewa kilia kila amal sina ga vetan marena. ²¹ Nanua e purřesa, yar řesa nařa Atam řere marena pimi e yomarava, ana nagane, yar tařena nene nařa Kristo řerelua malena petan marena pimi.

²² Taveve ya nařa Atam kila, yeririna make ga na yomarava monar amare, ana taveve ya ne Kristo kila, yeririna make ga na yomarava akilia alual malena. ²³ Ana sur make ga kala pog mesmesu sike ne, komin nařa Kristo naga sumon nařa suřalu řesa e marena, ana ita li na lelagaena lala yoko tesuřate řa vano-o tol pogos nařa naga wasuře sina, ana yoko ita řena tesuřalu e marena. ²⁴⁻²⁵ Ana siraun nene yoko naga wereplan ninuna viowa lala amio yermare lala na yomerava, a yoko naga taaga ve řarin suřen sur make ga, vano-o taulu nařareraena viowa

tařena lala asike vatanon lana. Pisi yoko naga war nasuřenen wetelu e sur make ga wasuře si va Ntewa Arimana. ²⁶ A e nasinekar la nařa yoko Kristo taulu e pogos nene, nařa yoko naga taulu maronia, sur nene marena, amio kiena nařareraena viowa lala. ²⁷ Kristo monar taulu marena nene, komin visena na metava ne pisa sanene rui, sape yoko Ntewa ligan sur make ga su vatanonia. Ana visena nene kana kinas pe pisa re sape Ntewa mligan ke sina ga naga sike vatanon Kristo poli, ana pisayu sur tařena lala, nařa yoko Kristo taulu make la nenaga. ²⁸ A pogos nařa Ntewa mligan sur make ga sike vatanon Kristo sanene rui, yoko Kristo, sane narina Ntewa, mligan sina ga naga vatanon Ntewa, ana yoko kila nařa Ntewa naga taaga ve Ntewa na sur make ga.

²⁹ Nowasuře si neva e visena nařa nepisayu nesape visae temare, yoko siraunia tesuřal sina. Ana lařas nařa amlelaga sa nene, la asitom manene kiela erau la nařa pe akeela li re poli wa, ana amarmare. Asitom ke asape la nene tařatete atol malena, kila narui akee la sina e kia kiena ne kiela erau lala nařa amare rui. La akila ke sanene, komin nařa amlelaga řarera asape visae temare, yoko tesuřal sina.

³⁰ A imimi řena ga maran taaga, asitomli sane komin

ya ne mesuňa moňal pog m̄arera lala e pogos make ga? Mesuňa moňar ke naloge viowaena la sanene komin ga memlelaga m̄arera mesape visae yaru tai mare, yoko naga kilia mal sina ga vetan marena.

³¹ Lelaga erau lala, mesuňa memiyuňae ke sanene, nekilia nevisa mesmesun sane nemloge sane nesuňa netam̄an ke kiau malena vanon amiu e legiena make ga. Ana nanene pogaga, komin nekekara na nekekara e malena naňa atolia amio kieta Suđe Yesu Kristo. ³² A pogos naňa nesike e pulkumali naňa Episas, p̄arm̄arera lala nae yo nene la asaga lokul tetan lala, asuňalun inu lue ga, ana komin ya ne nesuňa nepisalup̄ar la? Nesuňa nekila ke sanene, pe netaulu re nena sur wo tai na malena na yomarava nini, ana nesuňa nekila ke sanene komin nesitom̄al ke malena na pimi ke sirau.

Visae ve malena re nene, popon teve sa ga yar kar taņena la naňa pe amlelaga re poli, naňa la asuňa apivis ke sanini, asape, “Pane, tekila p̄aņagena, ve tesitom re sur tai, komin naňa peni, ane kilia? Visae temare na p̄isi narui, yoko taņatete tekila sur tai.”

³³ Ana monar ve ataveve re sitomena na wowe la ne sanene, visae peraga, yoko visena taņena nene imi ve lelaga e amiu, naňa pisa sanini, sape “Oyaloro omio

erau viowa lala, yoko kiela napiowaena kila kare kioňa p̄elaga wo.” ³⁴ Monar aim ave manmarua, a monar aligan kiamiu mlamulena viowa lala. Nepisa sanene, pona asitom ke asape nekila kare kiamiu kia yo, ana monar nevisa, komin kam laņasa pe akilia ruru re nena mrapa mesmesu lala kiena ne Ntewa poli.

³⁵ Ana e lepas na malena si e marena, yoko laņasa aviun sanini, avisave “Yoko akila si yar mare la amal e marena ve sanape?” Pona yoko aviun sanini, avisave “La naňa amare nakonua rui, yoko asuňal sina amio tasnela na sanape?” ³⁶ Ana naviunena la ne sanene ape naviunena kiena yar naňa pe kilia re sur poli. Visae tesitomli narin kurus nen sur la naňa tesuňa temapila ke ne, yoko telual kana navisatameena. Pogos naňa omapila narin kurus tai vito e porotano, okilia rui osape kurus nene monar menun, monar mare, ana sirunia, yoko sirus viu kilia kapur komea. ³⁷ Sur naňa omapila, naga kurus ga tai naňa yoko sike e porotano, ana sur naňa yoko kapur marea ve urviu sina, naga ve sur taņena. ³⁸ Sa naňa omapila ke kurus la peve taņena ana Ntewa suňa kila sirus viu lala peve taņena, ³⁹ a maran ve taaga e sur mali lala, naňa tasnela la peve taņena. Tasnena yaru kana tata pe taņena, a sur-

mali lala sane na porotano, na si, po na metava, la peve taaga tata tañena la sike e la. ⁴⁰ A surmali la nene, tasnela lala pe tañenan manene laa e tas nen sur tañena la naña asike ma e sinapane, ⁴¹ sane mrae, kupario, amio verue lala. La telu nene, tai marana pe tañenan maran tañena, a maran taaga mēnaga e lepas na verue lala, naña tai, marana pe tañenan tañena.

⁴² Ana sur make ga la nene, tepisu naña Ntewa kila la ape tañena manene laa, a sur nene p̄ar totou na tasneta, kiena ita la naña tokovio, naña tekilia tokusia pogos naña tesuñalu temal sina. Tasneta vito e pulus nen porotano, sane kurus tai naña amapla, naña monar menun, ana siraunia, tasneta viu naña molue yoko taṭatete si imi viowa pogos tai. ⁴³ Tasneta naña vito e porotano, tepisu piowa ga, a pororovia, ana tasneta viu naña m̄alivi sirau, yoko tevinaia vaṭisi, a m̄arera ruru wo. ⁴⁴ Sur naña vito e porotano, naga e lepas na tasneta ga ne, ana sur naña m̄alivi sirau, naga e lepas na ninuta. ⁴⁵ A tekilia tesitoñal mēnaga yar na sumo naña Ntewa siia, naña Atam, amio Atam maro naña mligan e yomarava, naña Kristo. Visena tai pisape Atam, Ntewa kila naga pimi amio tasnena tai naña

mali, ana Kristo, Ntewa kila naga pimi amio ninuna tai naña pe purṭes nen malena. ⁴⁶ Taveve nene, tepisu naña sur na lepas nen tasia pimi p̄esa, ana sur na lepas na ninuna, pimi maro. ⁴⁷ Yar na sumo naña Atam, Ntewa sii naga molue kome porotano na yomerava nini, ana yar na lua naña Kristo, Ntewa mligan naga kom ma e peni pitomi. ⁴⁸ Ana ita yeririna tañena lala, ita naña tepe na yomarava, tokus ke p̄elaga kiena yar na sumo na yomerava nini, ana ita naña tepe nae ma e peni, tokus ke p̄elaga kiena naga naña pitomi ma e peni. ⁴⁹ A ita naña temlelaga, sumo tokus maran yaru na yomerava, ana nagane tokus ke maran yaru nae ma e peni. ⁵⁰ Erau lala, sur naña kate ga e yomarava nini, sane tasneta, taṭatete va loyuma e nasuṭenena kiena ne Ntewa nae peni, a sur naña yoko va kovio, taṭatete va tol yo naña sike sike lue.

⁵¹ Ana yoko ve sanapen li na lelagaena lala naña amal ke ga wa, pogos naña Kristo wasuṭea? Sur nene, pe yar mok re naña akilia poli, ana yoko nevisawal mesmesun van amiu. Lelaga, ita li na lelagaena laṭasa yoko ve temare re e yomarava nini, ana e pogos nene, yoko tasneta vilopu nena veraga sa ga yekarpla. ⁵² Sa naña toṭelawa ve plas ga, yoko

teilan ga kumasua yelu, a yoko li na lelagaena la naþa amare pa rui yoko asumal amal sina amio tasnela viu, a ita mēna naþa temal ke e pogos nene wa, tasneta mēna lala yoko imi ve urviu.

⁵³ Tasneta marua monar vilon ve sanene, komin naþa sur na yomerava monar imi ve sur nae peni a sur na marena monar yoko imi ve sur naþa mal nalue. ⁵⁴ Ana pogos naþa toþar tasneta viu na sanene, yoko kila visena na Siriena Marua tai imi ve lelaga nenaga, naþa sape

“Namareraena na malena kiena ne Ntewa menelua nena na mareraena na marena.” Ais 25:8

⁵⁵ E pogos nene, yoko tevisa lele kare sur naþa marena þisa, tevisa sanini tevisave

“Marena, ko sinoñan osape otauluia, ana nagane kioña kap mare. Kioña nenos naþa nayur imimiena sike pe nagane?” Ose 13:14

⁵⁶ Yoko tevis sanene komin navisaluaena naþa sike pa rui, naga mla mareraena pan þelaga na mlamulena viowa loyuña e kieta malena, naþa kila ita tepim sane yar lala na kilaroen navisaluaena, a kieta þelaga na mlamulena viowa nene mla na mareraena pan marena vena ve sa nenos naþa kilia yurmār ita. ⁵⁷ Ana potena pa Ntewa paþisi, komin naþa naga kila naþa kieta Suþe Yesu Kristo taulu

māraeraena navisaluaena a māraeraena na mlamulena viowa a mareraena na marena, kila tetol malena naþa ve uro re.

⁵⁸ Erau nowo lala, komin naþa Ntewa kila po pan ita sanene, asumalu māraera, ve akulkulu kar re, a ayuñāen ruru yuñāena kiena kieta Suþe amio kiamiu namāraeraena wetelu. A pogos naþa akila ke sanene, popon asuñā asitoñal sane kiamiu yuñāena nena ve ve sur korena re, ana yoko monar war mrasa sa naþa Suþe sinenania.

16

Kilavaru naþa akoania va li na lelagaena lala nae Yerusalem

¹ Sineun nesape nela visena laþasa van amiu e lepas na warpoloen kilavaru vena iilaen li na lelagaena lala nae Yerusalem, naþa apane ke pogos māraera, limala korena ga e poglis nene. Nemla visena pan sumāre kar make ga e lepas nae Kalesia rui, a nagane sineun nesape nevisawal van amiu narui. ² Sineun nesape nevisa sanini, nesape ve asusu koren re asuñā sanene va tol pogos naþa neiñasu nomālivin amiu ana awarpolo ga nalaena na wa, ana sineun nesape siar nagane, e legiena þesa na legiena olua make ga, kam veve taaga monar ala narin kinakinas nen ya naþa amlavia, ana monar

aligan ruru tomã ga. ³ Ana pogos naãa neiãasu, yoko towarpolo narin kilavaru la nene imi lele taaga, a yoko akilia akilalua yar laãasa awar nalaena nene va gar Yerusalem. A yoko nesiri maki laãasa awararia va va li na lelagaena lala gar ne, vena visawal amiuenta van la. ⁴ Nemninue ke ga wa pona inu mēna nemio la yo, ana yoko nevisulia wa.

Mrapa kiena Pol

⁵ Pogaga, kiau mrapa sanini, sineun nesape neva nokom e lepas nae Masitonia sumo, ana suraunia yoko neiãasu nomãlavin amiu. ⁶ Nemninue ke ga wa nesape yoko nesike nemio amiu va tol pogwai, ana nesitom ke nesape nesike nemio amiu e pogos na miava na pimi ke ne, ana siraun naga nene, akilia aligan inu si e kiau mrapa, vena neva si e nape naãa yoko neva ea. ⁷ Pe sineun re nokom pun amiu nagane poli naãa nesumã nepanon ke Masitonia, komin visae ve sanene, yoko nekilia nesu yam ve plas ga ne, ana yoko neva ke ne gare sumo wa, siraunia neiãasu, komin naãa visae Suãe taãania, nekekarana naãa yoko nesu towe laa nemio amiu ve piavi. ⁸ Nagane nesike Episas, a yoko nesu towe laa e nini na wa, tol pogos na Paãagena na Yui Marua warovia. ⁹ Kiau pulmas na

kilaen yuãaena wo la e nini moki ke wa, a suri si tai, nasinekar m̃arera m̃ena la mokliu asike e nini, ana pe nekilia re poli naãa nekilia neyal pogwai.

¹⁰ Visae avisu Timote imi m̃alivin amiu, awis, awo vania, akila naga logewon naãa sike amio amiu, komin naãa naga kila ke yuãaena kiena Suãe, maran taaga sa ke inu. ¹¹ Ve ataãan re kam laãasa avisusu viowa e naga, ana avisuar ruruia e ãelaga na sumare, siraun aligan naga e kiena mrapa vena naga kilia wasuãe ruru imi pun inu, komin nesumate ke nesape vena naga amio wolai taãena lala aim aworu e nini.

¹² E lepas kiena ne kieta puruvi naãa Apolos, nepiun manene pania vena naga taveve puruvi taãena la nene aimãasu pun amiu, ana kiena sitomena m̃arera sape naga nene pe kana pog memes re poli naãa m̃alivin amiu, ana visae kana pog nena, pona yoko naga sirau imãasu.

¹³ Erau lala, lavis ke kiau visena ãisi narui, ana sineun nesape nevisa van amiu sane amiu avisuar ruru amiu, asumãl ruru ase kieta lelagaena, ve sinemiu kurkurun re suria, ana aãarera. ¹⁴ A suri make ga e naãa akila, monar akila e ãelaga na sinesiena.

¹⁵ Popon avisu kilale Steãanas nene amio kiena

namratava lala, amio yuũaena nařa asuũa akila ke ne. E yeririna nae make ga e kiamiu lepas nene, Akaea, la ke nene narui la amlelaga řesa. A siraun nařa amlelaga, asuũa akila ke yuũaena wo pařisi, asuũa amiila ke li na lelagaena lala pimi tol nagane. ¹⁶ Yar nowo la ne sanene, popon avisir plan la vena asumon amiu, a popon avatanon řena yeririna tařena la nařa amiyuũae ke lele taaga amio la. ¹⁷ Steřanas nene pimi řalivi e nini rui, naga pimi amio Posanatas a Akaekas, a nekekarana la telu pařisi. La asuũa amiila inu ke e suri moki, torokin ke ga nařa amiu řena akilia akila visae asike e nini. ¹⁸ La telu nene akila po pan amiu rui, ana pogos nařa apam e nini akila inu řena nemloge po pařisi, apisirlua kiau sitomena. Popon avisa potena ve keviu van la komin kiela pupia yuũaena wo na sanene.

¹⁹ Sumare make ga lala na lepas nini nae Esia asape asuũa asitom amiu pařisi. A kieta erau lua nene, Akwila amio wona na sira Prisila, amio yeririna lala na sumare nařa e řala uũa, la apisa pokolulagi a pokolemalo pan amiu e kia kiena Suře. ²⁰ Kieta erau lala nae yo nini akekarana navitawe amiuena e řaki nene, a amiu řena, pogos make

ga nařa avitawe amiu, popon asuũa atalopan amiu a asuũa aviran pipimiu, vena akekarana amiu amio sinewo.

²¹ Ana siar e narin yo nini, inu Pol nemlarar ke pensel nesuũa nesiria vena nevisa kiau visena maro van amiu. ²² Monar sinemiu sii ke řena Suře ve lelaga, visae peraga, yar nařa ve sinena sii re naga, visaarena na marena sike e naga. Nesuũa nemlen ke sanini, nesape Suře Yesu, awis, otom vilaga, ²³ a nesuũa nemlotuwo amiu ke řena ga, nesape lemamiena kiena kieta Suře Yesu sike amio amiu. ²⁴ A sane silaga, nekilia nevisa e kia kiena Kristo Yesu sane kiau sinesiana van amiu keviu sulue ga suũa ga.

Kiau řaki řisi ga e nene narui,

Inu, Pol.

**Maki Nalua Naña
Pol Siri
Pa Pan Li
Nalelagaena Wa
Lala Nae Garu
KOREN
Visayuena Na
Tusi Nene**

*Komņasnen suniena plas
na tusi nini*

Maki na lua nene naña Pol siria pa li nalelagaena lala nae Koren, ana naga siria e pogos naña pane ke pogos m̄arera amio li nalelagaena lala e sum̄are nene nae Koren, naña laņasia sinela kar manene naga paņisi, ana akawelan naga. Ana Pol kila mareravan panila sape naga kiena sitomiena m̄arera ke na wa vena kila ruruen napiowaena nene. Naga sinenan sape naga amio la aimi ave erau wo sina, ana pisawal panila pisape kerara paņisi naña amlogear naga.

E komsusnen m̄aki na sumo Pol pisayu komin yane naga pis m̄arera e m̄aki na sumo tai naña siri pa pan la. A pisa naña naga kerara paņisi naña mloge sape apilon kiela sitomiena komin kiela milamulena viowa lala, a kila ruru napiowaena la naña sike pula, ana ape erau wo sina amio.

A siraunia, pisa panila sape monar akuwan kilavaru vena waren van kiela erau na lelagaena lala

nae Yutea, la naña pe kiela sur re poli. E komņasnen luwasnen m̄aki nene, Pol pis m̄arera pa yaru laņas nae Koren naña la asape ape li nalologena wo kemua lelaga, ana asum̄a akila kare li nalelagaena la nae yo nene e kiela vianiena la naña pe mesmesu re poli. Asum̄a apisa ke asape Pol naga pe nalologena kiena ne re Yesu Kristo lelaga poli,ņisi na Pol pis m̄arera vena suwoyon laena, a kila meraravan sane naga pe nalologena kemua lelaga kiena ne Yesu Kristo.

Komņasnen tusi la nini

Visenaņesa 1:1-11

Pol amio li nalelagaena lala nae Koren 1:12—7:16

Kilavaru naña na warena va li nalelagaena lala nae Yutea 8:1—9:15

Pol kila meraravan naña naga pe nalologena kemua lelaga 10:1—13:10

Visena maro 13:11-14

Visenaņesia

¹ Erau lala, inu Pol nemio kieta puruvi naña Timote; imimi lua mekekaranaña mevitawe amiu sina e m̄aki nini, nane amiu sum̄are kiena ne Ntewa e pupia kumali nae Koren amio m̄ena li na lelagaena taņena lala naña asutetai asike e pupia lepas naña Kris.

Ntewa kiena nasinenana, naga pisirlua inu Pol vena neim sane nalologena tai kiena ne Yesu Kristo, kila

narui kiau suri moki naŕa nevisawal van amiu e maki nini, ana sumon nanene,² nevisa sanini nevisave kiau leniena nesape yoko Ntewa Arimata amio Suŕe Yesu Kristo aligan lemamiena a sumarena, lalua asike e amiu punu ga.

Pol pisa potena pan Ntewa vanon kiena sinewoena

³ Sineun manene paŕisi neyeluar kieta Ntewa nene naŕa naga pe Arimana kieta Suŕe Yesu Kristo, a naga pe Arimata nowo tai naŕa naga pe purŕes nen ŕelaga na sineyeena, a naga pe Ntewa nowo tai naŕa naga pulen ŕelaga na kila luŕeluŕeena.

⁴ Pogos ya naŕa visae tevane pog mārera, Ntewa sumā kila luŕeluŕe ita ruru nenaga, ana kila tomārera ruru sina ga. Ana siraunia, tekilia tela ŕelaga na kila luŕeluŕeena naŕa naga kila pan ita, tekila towe va kieta erau taŕena lala naŕa apane ke kiela pogos mārera lala, teiila la sanene.

⁵ Pe lelaga paŕisi sane pogos moki tesumā ga toŕar ke naloge viowaena maran taaga sa naŕa Kristo ŕaria, ana naga kila naŕa tekilia towar mēna kiena kila luŕeluŕeena nowo lala.

⁶ Pogos naŕa mepane pog mārera lala, metamān ga narui, vena kila sane amiu akilia aloge wo a alual malena. A pogos naŕa mevisu sane Ntewa kila

luŕeluŕe imimi, naga mēna ga po paŕisi, komin naŕa kila sane imimi mēna ga mekilia mekila luŕeluŕe amiu sina ga, a mekilia meiila amiu vena akilia kiamiu sitomena ve piavi vena akilia awar ro e napiowaena la naŕa amiu mēna ga akilia alualia.

⁷ Mesitomyu ya naŕa amiu aŕarpoyo e ŕisi rui, kila sane e lepas na pun amiu, pe kiamimi sitomena kurkur re nenaga, sane yoko amiu na ve sanape. Nanene komin naŕa imimi mekilia ruru ŕisi rui sane pe sur korena naŕa amiu monar avisu naloge viowaena maran taaga sa ke naŕa mepisuia, ana yokorena amiu akilia atol mēna ga pupia kila luŕeluŕeena kiena ne Ntewa ve sa ke ga naŕa imimi metolia.

⁸ Pona pe amloge kilia ruru re poli yo wa, e pupia pogos naloge viowaena lala naŕa mepisuia pogos naŕa mesumā memiyumae kar ke ga e pupia lepas nene naŕa Esia, ana nekilia nevisa nevisave piowa na piowa paŕisi. Sur la urmi manene la pan imimi, imimi pe metorokin la re si poli, pano pano-o mesitom mesape naga narui monar kiamimi luas nen malena narui. ⁹ Lelaga, memloge sa naŕa visae yerkaawa na kumali tai visawal visave awe momar imimi memarmare, yoko mevisu sane sa ve sanene na wo laa

sane, komin naþa mepisu rui sane taþatete si mekila sur tai, moþasine imimi þele sina mesape yoko imimi moñarera ve sanape. E pogos nene, memligan kiamimi malena sike ga e limana Ntewa, moþasine ga naga komin naþa naga taaga ga pe Ntewa naþa kilia kila yaru naþa mare imi mali sina.
¹⁰ A moþasine naga sanene, mepisu naþa pe lelaga paþisi naþa naga tamalia imimi, a nagane kiamimi sitomena mñarera ruru po sane naga kilia tamalia imimi sina, pe yam taaga re ga poli, ana yoko naga sumã kila lue ga silaga.

¹¹ A monar amiu aiila imimi naþa asitomãl imimi silaga e kiamiu leniena lala. Sa nene, pogos naþa Ntewa loge kiamiu leniena moki nene, yokorena visa ruru imimi narui, tamalia imimi sina vetan pogos mñarera la nene, a yoko amiu ve moki avisa ga potena vaþisi va naga vanon ya naþa yoko naga kila van imimi.

Pol pisa meraravan ruru sur naþa kila naga pe pimi mialiali la re si poli

¹² Moþar naloge viowaena la sanene, ana sur tai sumã naþa kila imimi memloge pon imimi paþisi. Nane sitomena tai naþa teke e imimi naþa pisa sanini, sape e lepas na kiamimi þelaga e maramiu, a e maran yeririna taþena lala

na yomarava nini, mekila sur make ga pe wa ruru nenaga, a kiamimi malena pe lelaga nena na po, sa naþa Ntewa sinenania. Pe memiyumãe re memio sitomena na yomerava nini poli, ana memiyumãe ga memio lemamiena kiena ne Ntewa. ¹³ Sur make ga naþa mesiriyuia e kiamimi mñaki la nini, naga pe sur la naþa mekilia mesape aulo woga, a mekilia mesape akilia aulo kilalea. Ana visae sur laþas naþa amiu akilia ga komþasa, sineun nesape e legiena la ne pimi ke ne, yoko monar akilali naþa akilia ruru make la ga.
¹⁴ Visae ve sa nene, pogos naþa ita punu tesike lele taaga e legiena keviu nene naþa Suþe Yesu wasuþe sina, ana yoko amiu akekaran imimi vaþisi a imimi mña ga mekekaran amiu vaþisi.

¹⁵ Ana komin naþa nekilia ruru nesape sitomena wo na sanene sike likan ita rui, sineun manene nesape pogos naþa neva e lepas nene Masitonia, yoko neiñasun nomãlavin amiu. ¹⁶ Lelaga, nesumã nesitom ke nesape neiñasu nokom pun amiu yam ve lua, naþesia e pogos nene naþa nesumã nepa ke Masitonia, a yam ve lua nena e pogos naþa noþasuþe inu, naþa nesitom nesape amiu akilia aligan ruru inu e kiau mrapa vena nowasuþe si neva Sutea, ana per-

aga. Sineun nesape nekila wo van amiu sanene, ana sa naþa akilia rui, taþatete nekilia nekila.

¹⁷ Ana sineun nesape amiu monar akilia ruru sane pogos naþa nesitom ke nesape neimi pun amiu, naga sur tai naþa sineun manene paþisi nesape nekila, naþa kiau sitomena m̄areran paþisi ve na kilaena. Naga pe pe sur re tai naþa kiau sitomena peve lua e poli, naþa nesitom ke nesape yoko nevano pona ve neva re. Peraga, inu na pe nesa re yeririna taþena la poli, naþa taþatete olelaga e kiela visena, ¹⁸ ana sa naþa amiu akilia awasine ga visena kiena ne Ntewa, akilia awasine m̄ena kiamimi visena. Kiamimi "Ore" pe kana kinas re naþa asape "Peraga" pona "Ana yo," ¹⁹ ana pogos naþa mevisape "Ore," naga "Ore" ga. Monar meve lelaga sanene, vena meve maran taaga memio narina Ntewa, Yesu Kristo, naþa imimi telu Silvanus amio Timote mepimin memlologon pan amiu nanua rui. E pogos nene mepisawalia mesape kiena visena make ga pe lelaga silaga, komin kana "Ore" pe "Ore" nena napo, ²⁰ a navisaarena make ga naþa Ntewa pisawalia e lepas kiena ne Yesu, pe tai re naþa pimi sane pe navisokanena poli, ana punu ga pe lelaga. Sur ne nanene kila sane pogos naþa tesuþa

temlen pa Ntewa, e kana nasiarena pitomi tol naþa tepisape "Sanene," tekila ga e kia kiena ne Yesu Kristo. ²¹ Kristo ke nanene narui naþa memlologon pan amiu, a Ntewa ga pisirilua imimi pe na kilaen kiena yum̄aena. A amio naga nene, Ntewa kila imimi memio amiu, ita punu ga tepim lele taagania. ²² Ntewa kiar ita tepe kiena, ana naga mligan Ninuna e losineta, sane navisaarena tai naþa sape yoko temio naga e pogos la naþa sum̄a pimi ke ne.

²³ Kieta Ntewa nene naga pe lelaga silaga, a naga kilia iila visena nene naþa sineun nesape nevisawal van amiu. Sane nanua ne nepisa m̄a nesape yoko nom̄alivin amiu gar Koren nene, ana sirauania pe nepiþas re si poli, a pona asitom piowagan inu e yo. Ana nesape nevisa van amiu naþa pe vanon re kiau sur tai poli, ana vanon amiu ga, komin naþa nekilia nesape visae neiþasu yoko monar nevis m̄arera van amiu komin kiamiu þelaga laþasia. Ana pe sineun re nesape yoko nekila amiu aloge viowa poli, nane kila sane pe nepim re si poli. ²⁴ Nepisa pan amiu sanene, awis monar ve asitom re avisave mesitom ke mesape mesike metavan amiu, vena meve þarun kiamiu lela-gaena. Pe sa re nene poli, ana sinemimin mesape teyuþae ga lele taaga, vena

kila amiu akilia aloge wo silaga, asuñalu ruru m̄arera ase kiamiu naviawaena.

2

¹ Sa naña nepisa, nanua nepim sumo, sur lañasa suña ga naña monar nepis pan amiu panon narui, ana kila amiu amloge piowagania. Ana nagane pe sineun re neim nekila amiu aloge viowa yam si tai poli, a sitomena ne nanene narui kila sane ve neim̄asu nakaten amiu re sumo wa.

² Visae neim̄asu nevis van amiu, nekila aloge viowa, yoko inu m̄ena ga neloge viowa, ana pogos naña ita punu ga teloge viowa sanene, yoko tañatete si naña tai kilia iila tai vena loge wo sina. ³ Sitomena ne naga nene naña nepisa p̄esan e m̄aki tañena naña nemligan piñasu nanua rui. Sineun nesape akilali akila ruru sur viowa la nene sumo wa, vena kila sane visae pogos naña neim̄asu, yoko ve sur re si tai sike likan amiu naña monar neloge viowagania. Ana visae akila ruru kiamiu yuñena wo, yoko nekilia neim̄asu naña nevisu naña apim apo si rui, a visae ve sanene, yoko nekekara vañisi, a yoko kiau kekarena nene kila kiamiu kekarena m̄ena ga ve keviu vañisi.

⁴ Nepisa sanene komin naña pogos na nesiri piñasu pan amiu nanua ne, nemloge piowagan manene laa. Nemloge sane losineu

lavis worovia, a wamarau la suña mlalau. Visena m̄arera la naña nepisa pan amiu e m̄aki nene, pe nekila re poli komin naña sineun amiu m̄ena ga aloge viowa, ana sineun nekila amiu avisu kilale sane sineu sii manene amiu silaga.

⁵ Ana sa naña ita make ga tekilia, tai sike likan amiu naña naga kila pupia naloge viowaena nene. Sineun nesape sane sur viowa naña naga kila, kila inu nemloge piowa, ana pe in re ga poli, kila amiu m̄ena ga moki liu amloge piowa. Ana pe sineun re si nevisave monar ala manene si nakoena van poli, ⁶ komin nekilia sane amiu punu ga apis pan p̄isi rui.

⁷ Apis pania toroki narui, ana nagane pe pogos naña aviewo naga, sine-miu ye si naga. Visae peraga, yoko naga loge viowagan manene sina vano vano-o viowa vania. ⁸ Ore, nom̄areran vena neviun van amiu ve sa nini, sane monar akila merarava ruru vania sane sinemiu si ke naga na wa.

⁹ In na nesiri m̄aki tañena nene nanua ne, sineun nevisuveve sane yoko amiu akekara naña alogear kiau visena lala naña sike loyuña ea, pona peraga. ¹⁰ Pogos naña nepisa nesape popon aviewo yar tai, nemlelaga nesape yoko akila, a naga naña aviewoia, in m̄ena ga neviewoia. A nemninue ga, pona naga kila ma sur lañasia piowa pan inu yo, ana nekekaran naña

nevisawal e marana Kristo nesape nepiewo naga, ana sanene, iila amiu mēna ga vena akekaran aviewo yar taḡena. ¹¹ Monar tevisuar ruruia, komin naḡa tekilia ruru sitomena viowa lala kiena yermare vena kila kare itaena, ana visae tesuḡa teviewiewo ita silaga, yoko naga taḡatete nena taulu ita piḡa.

Pol pisayu kiena mrapa navaen ma Troas amio Masitonia

¹² Ana pogos naḡa nepam re si pun amiu ma Koren poli, nepito ga nemlologon lologena wo kiena Kristo garo kumali naḡa Troas, ana e yo nene, nepisu sane pulutava pietava ruru nena pan inu vena nekila yuḡaena kiena Suḡe. ¹³ Ana sur viowa tai e pogos nene, nesitom ke nesape yoko nelual wolai naḡa Taetas e yo nene, ana naga pe su re poli. Ana kiau sitomena nesitom manene naga paḡisi, kila sane pe piavi re poli nemligan la nene, nemla si kiau mrapa yalen silau ma lepas nene Masitonia.

¹⁴ Kiau yalena pa sanene narui, ana potena paḡisi pa Ntewa komin naḡa silaga mligan Kristo naga suḡa sumon ita. Nanua sumo ita tepe kiena nasinekar ga lala, ana naga taulu ita rui, ana tetaveve naga tepa kar ga e yo make ga, ana pogos naḡa yar la apisu ita, yoko avisu kilale sane Kristo

naga pe kieta Suḡe. Pona nekilia nevisa sanini, sane ita na sane ponotaninu wo tai naḡa asikapia, ponos miyere ḡar make yo, ana pogos naḡa yar la amloponia, yoko alopon kilalea sane Kristo suḡa pimi ḡalivin la. ¹⁵ Ntewa kila ponotaninu nene pa vanua e yar make ga, pano tol la naḡa asuḡa apanon ke mrapa natamaliaena, a pano tol la naḡa apanon ke mrapa na kovioena. ¹⁶ Ana e la naḡa apanon ke akovio, ponotaninu nene naga ponos piowa sane sur mare tai naḡa kona, ana e la naḡa asuḡa aḡal ke malena, naga sane ponos nen ḡaḡes wo na tamaliaena.

Nanene narui ita teviḡu yuḡaena naḡa mesuḡa mekila naga pe pupia yuḡaena paḡisi, komin memlologon visena kiena ne Ntewa naḡa kilia kila yar tol malena pona tol marena. ¹⁷ Nalologena la ḡasa pe asitom manene re urmi e yuḡaena nene poli, asuḡa amlologon ke visena kiena ne Ntewa vena ataulu ga kilavaru ea, ana imimi na pe sa re nene poli. Ntewa pisir plan imimi ana memiyuḡae ga e yo metava e marana, a mepian visena lelaga kiena Kristo pa yar taḡena lala, ḡarpoyo ga e ḡareraena naḡa mla pan imimi.

3

Imimi na yar na kilaen

yum̃aena na viranarena viu

¹ Nepisayu kiamimi yum̃aena keviu na metava ne, pe pon re asitom avisave nepis vilave ke sane navianena taĉena lala navisokanena. La

nene apim pun amiu amio m̃aki la naĉa apisayula asape la apo pa sanape, a pogos naĉa amolue petan amiu, a m̃areran asape monar amiu asiri si m̃aki laĉasia vena visawalen kiela yum̃aena naĉa aĉar ke pano.

Ana visae ŝinemimin meva si e lele taĉena, pe mesitom re m̃aki tai ne sanene poli vena visawal imimiena.

² Visae yaru tai sinenan kilia visave imi sanape, popon imi visu ga mras nen kiamimi yum̃aena e kiamiu malena lala. Amiu na sa ga m̃aki tai narui, naĉa Kristo siria navisawalen kiamimi yum̃aena. Yaru taĉena lala akilia aim auloia, vena akilia ya naĉa mesiria e losinemiulala. ³ Yoko avisu amiu sane ape m̃aki tai naĉa Kristo naga mligania, ana moĉar pimi, a yoko avisu kilalea sane lelaga, mekila yum̃aena e amiu po paĉisi. Ana m̃aki nene naga pe m̃aki re naĉa wii na kilamemego na kapi naĉa asiri e m̃as nen tus tai poli, ana naga m̃aki naĉa Ninuna Ntewa siri e los nen yaru.

⁴ Visae ve sanene, kiau visena la nene pe visen vilave re poli, ana mekilia mevis sanene komin Kristo ga naga taaga kila naĉa moĉasine Ntewa keviu pa

ĉisi. ⁵ Visae imimi ga, yoko taĉatete mevisave imimi metorokin mekila sur tai, komin sur make ga naĉa mekila, Ntewa ga kila sane imimi mekilia mekila. ⁶ Naga ke narui mla m̃areraena amio kiliaena pan imimi, kila imimi mepim mepe kiena yaru na yum̃aena e lepas na viranarena viu naĉa naga kila amio ita yeririna lala na yomerava. Naviranarena ĉesa asiri plan kana visena ne lala e tus lala navisalu-aena lala kiena Mosis, ana visena la nene amiila ita ana pe torok ruru re poli. Apowo, ana ya naĉa akila, akila meraravan ga asape ita yaru nakilaroen navisalu-aena, naĉa yoko monar telual marena vanonia. Ana naviranarena viu, naga visena ne lala apim a m̃alivi e Ninuna Wa, a Ninuna nene narui kila ita tetol natamaliaena.

⁷ Mrapa marua nasumo nene, naĉa ate kana navisalu-aena lala e kilavaru la naĉa pe lepalepas nene, naga su m̃a pisaar ke ga kieta marena, ana naga pe sur tai naĉa pe wa paĉisi. Pogos naĉa Mosis ĉar lepalepas nen kilavaru la nene, naurarena kiena ne Ntewa pimi e naga, ana pogos naĉa ĉar maran si kilavaru la nene pa le Israel lala, m̃areraena naurarena nene su m̃a pito ke tano rui, ana la apisu ĉele marana komin naĉa pilavila na pilavila. ⁸ Sanene, visae

naurarena kiena ne Ntewa miyũmae m̃arera e pogos naŋa apisawal mrapa na tolen marena, yoko yũmae ve sanape e pogos naŋa yoko avisawal mrapa na tolen malena? ⁹ Yoko naurarena kiena ne Ntewa monar yũmae ve keviu va manene va ŋisi e pogos nene, a tesuŋa tepisu ŋisi rui naŋa kapi vivaga na mrapa viu suŋa tego kar ga, suŋa taulu kapi na mrapa marua nene naŋa suŋa pito ke tano rui. ¹⁰ Lelaga, kapi viaga na mrapa marua nene naga suŋa tego ruru nanua sumo, ana nagane, tepisu naŋa kana kapi nena sane pe tego ruru re si poli, komin kapi na mrapa viu pimi ŋarpoyo, suŋa tego keviu e yo make ga. ¹¹ Kapi naŋa suŋa pito ke tano nene, lelaga naŋa naga pitomi ŋesa, pitomi amio kana pupia naurarena nena. Ana nagane kapi viu naŋa naga pimi mare ga sirau, yoko naga sulue na sike ne, a kana naurarena nena yoko ve keviu manene lue.

¹² Visae tesitomyuli nene, yoko kila kieta sitomena m̃arera ruruia, a ve temaraun re si naŋa tekila kapi vivaga kiena Suŋe tegoli yo kar lala. ¹³ Ana tesitomyuli m̃ena yermarua Mosis, naŋa naga pa metava e tavie, ana Ntewa pimi lavisinia, kila marana pilavila paŋisi. Ana pe pon re ita teve sa naga poli, komin pogos naŋa ŋasuŋe si pitomi pu le Is-

rael lala naga kalo marana e kulmrae vena ve aviŋu re, vano-o tol pogos naŋa kana tegoena suŋa vito m̃a tano vano ŋisi. ¹⁴ E pogos nene, pe apisuli re kapi nene poli wa, komin naŋa ŋarila m̃arera paŋisi, ana tepisu naŋa pimi tol nagane, la sa m̃a ke nene na wa. Apulo ke visena lala e tus marua naŋa sike ne, ana sane kulmrae na sike ga wa, suŋa kilawo ke kiela sitomena lala. Ana visae alelaga ga e Kristo yoko naga kilia tarlua kulmrae nene vena akilia avisu kilale kiena yomerarava viu. ¹⁵ Pogos naŋa apulo ke navisaluena kiena Mosis, naga sa naŋa sur tai kalo ke ŋarila, ¹⁶ ana pogos naŋa visae yaru tai imi e Kristo, a warlua sur nene naŋa kilawo ke kiena sitomena, ana naga kilia visu kilale suria. Sa ga visena na Nasiriena Wa naŋa pisayu yermarua Mosis nene, naŋa pisape “Pogos naŋa Mosis pilon naga, kira pisu Suŋe, kulmrae nene mloru si petania.” ¹⁷ Ana pogos naŋa visena nene sape Mosis pilon naga kira pisu Suŋe, visena naŋa Suŋe, kana kinasia naga naŋa pe Ninuna Wa kiena ne Ntewa. A tekilia tesape e nape naŋa Ninuna Wa kiena ne Ntewa sike ea, yaru lala akilia aurmatan m̃areraena na viowaena, alual malena.

¹⁸ Sanene, ita make ga naŋa temlelaga rui, pe kulmrae tai towo re si marata poli, ana tesuŋa

tepisu ruru nena pupia nauraraena kiena ne Ntewa. A pogos naþa tesuþa tepisu mña pano, nauraraena nene pimi puleule e ita, pano tol naþa tepim tepe sane kupito vena tegoliaena kiena kapi vivaga va va yeririna taþena lala. Ana kapi vivaga nene pe molue re kome kieta malena poli, molue kome kieta Suþe, naþa naga Ninuna nanene naþa sike e ita.

4

Pol amio nalologena lala amlologon kapi vivaga nalologena wo

¹ Mesuþa mekila ke kapi vivaga kiena ne Ntewa pilavila ke sanene, naga pe kiamimi pupia yuþaena tai vena iilaena yaru taþena lala. Losinena Ntewa pulen sineyeena, a naga ke narui naþa mla yuþaena nene pan imimi, a pogos naþa mesitoþal nene, kila sane pe sinemimi maren re yuþaenen pogos tai poli.

² A pogos naþa memiyuþae, mesuþa memiyuþae ruru po silaga. Yaru laþasa, amiyuþae vinau e ga e nakilakotaliaena lala pona akilali naþa awere sitomena kiena yaru lala, a akilia avilovilon mña visena kiena ne Ntewa va ve taþena, a imimi na pe mekila re þelaga la sanene poli. Mekilia mesape pogos naþa mesuþa memiyuþae, mekila ke ga e marana Ntewa, a monar meyuuþae

wo. Yeririna taþena mña lala asuþa aþaveve ke kiamimi yuþaena a asuþa amloge ke ponía, komin naþa asuþa apisu kilale asape mesuþa mepisawal make visena lelaga kiena ne Ntewa lala mesmes ga.

³ Memlologo sanene, pe yaru re tai naþa kilia visave naga pe mloge kilale re lologena wo poli, naþa mesuþa mepisawalia. Ana visae yaru tai visave pe merarava re pan poli, naga pe yar re tai naþa suþa mialin ke yomerarava poli, ana monar ve yar tai naþa suþa mialin ke ga yemalolo, naþa monar sur tai kilawo ke kiena sitomena, sane kulmrae naþa tepisayu rui.

⁴ E lepas kiena ne la naþa pe amlelaga re poli wa, suþe viowa na yomerava nini naga kilawo kiela sitomena rui, naga kila la sane ape kilamara kata, komin naþa naga yepen mavin sape avisu pupia kapi vivaga na lologena wo kiena Kristo. Kristo nene, kiena naurarena tego paþisi, komin naþa naga þarnena marana Ntewa lelaga. ⁵ Mesuþa memlologon ke nene narui, nane Yesu Kristo, kieta Suþe. Pe mesuþa mepisiri plan imimi re sina pan amiu poli, ana mepe kiamiu yar na yuþaena ga lala vena lologonen Kristo van amiu vena akilia naga.

⁶ A sur make ga la nene naga pe yuþaena kiena ne

Ntewa ga. E nasiiena, Ntewa pisa sanini, sape “Yoko kapi imi tegoli yemalolo naña m̄neke ne,” a suña kila ke sanene pan ita na wa. Ntewa ke ga nanene narui naña suña miyuñae ke nagane, kila kiena kapi vivaga tegoli losineta lala, kila tetol kapi nene naña suña tego molue kome marana Kristo, naña molue nena e naurarena kiena ne Ntewa naña sike ea.

7 Nakiliaena lala na naurarena kiena ne Ntewa sike e ita sanene, naga pe sur wo tai naña pe wa pañisi. E imimi naña memiyuñae ke yuñae kiena kieta Suñe, mepisu sane imimi na sa ga sur korena ga, a pe metorokin re naña kiena nawaena la naña powo nene ase e imimi, ana Ntewa naga po, suña kokonia ke e kiamimi malena la silaga. A nanene kila sane visae pogos tai meyuñae sur wo la ãasia, ana yoko mevisu kilale ga sane pupia ñareraena na kilaen sur la nene pe pe ñareraena na yomarava re tai nene poli naña ãar po yo kome imimi, ana naga ñareraena tai nae ma e peni naña kom ga e Ntewa pitomi.

8 Nagane memiyuñae ke memio ñareraena nene naga miila imimi keviu, komin naña mepane ke pog ñarera la moki, ana pe memloru re poli wa. Sur la moki naña akila imimi mesitom ãele pañisi, ana kiamimi sitomena la pe

kovio re poli. ⁹ Yaru la moki naña akila kare imimi pano pañisi, ana silaga Ntewa pisuar ruru imimi. Moñar magka lala, ana tañatete awe plan imimi, memal ke na wa. ¹⁰ Lelaga, pogos ñarera pan imimi sanene narui, pano pano naloge viowaena na marena sike e yepemimi sa naña Yesu ãaria e kiena marena. Ana metañan ga, komin naña visae marena kiena Yesu sike e imimi, yoko kiena malena m̄neka ga sike e imimi. ¹¹ Memiyuñae kiena Yesu sanene, kila sane pogos naña memal mesike e yomerava nini, ana silaga mesike ga lavisin marena, ana nanene kila m̄neka ga sane amiu akilia avisu kilale sane malena kiena Yesu suña ñalm̄alivi ke keviu e yepemimi na marena ga lala. ¹² Lelaga naña mesuñae mepanon ke kiamimi marena, ana mekila sanene vena amiu akilia avano alual kiamiu malena.

¹³ Visena tai sike e Tus na Yauena Wa lala, naña yaru tai pisi pisape “In na nemlelaga rui, nane kila narui nekilia nevisawal visena,” a mepisu sane ninuna na viawaena naña sike e yaru nene, nagane keviu m̄neka ga e imimi. Mesa ke ga naga, naña imimi m̄neka ga memlelaga, a sur ya naña memlelaga e naga, nanene mepisu sane mekiliala mevisawalia. ¹⁴ A pe memaraun re nena visawalen poli, komin naña mekiliala ruru sane kieta

Ntewa naþa naga kila kieta Suþe Yesu mali sina e marena, yoko naga kila imimi mēna memali sa ke ga Yesu, a yoko naga kila amiu mēna amal sina sane imimi, ana yoko were ita punu ga teva tesike temio naga.

¹⁵ Lelaga, mepa moþarpoyo e pogos mārera la moki sanene, ana pogaga, komin naga kiamimi mrapa ke ga tai nanene narui naþa mekilua miila amiunia. Sanene sinemimin ga lemamiena kiena ne Ntewa monar momolue silaga va yar kar ga lala e yo punu ga, vena kila sane ayeluar Ntewa silaga, asuñā avisa potena vania vano vano-o vena kila kiena naurarena imi lapa ve keviu.

¹⁶ Sitomena wo la nene kila sane pe sur korena ga naþa viowa van imimi ve sanape, ana mesuñalu moñarera ruru mesuñā ga. E lepas na yepemimi lala, pimi pe yermarua, suñā pimi pororovia, ana e lepas na ninumimi lala, Ntewa suñā kila pimi pe urviu, mārera ruru lue ga e legiena make ga.

¹⁷ Narin pog mārera lala e yomarava nini, la ape na yam plas ga, ana asuñā akila ita tesururuia vena teva toñalivi tese e naurarena nae peni, naþa keviu paþisi, po pano-o po manene laa, naþa teloge ke wonia vano vano ve uro re.

¹⁸ Nagane ve kieta sitomena la ve su re e sur la naþa kilamarata visuia, ana kieta sitomena la sike e sur la

naþa kilamarata pisu þele ga, komin naþa sur la naþa kilamarata kilua visuia, la ape na yam plas ga e yomarava nini, ana sur la naþa kilamarata pisu þele ga, la ape na sulueena ma e peni.

5

Leleta ma e peni

¹ Tekilia rui tesape tasneta na yomarava nini taþatete sulue. Naga sane narin silparpara tai naþa tesuvania, naþa yoko pogos tai monar mawowo make ga, pona yar taþena lala aimi aweplania. Ana tekilia mēna tesape pupia mātā yuñā mārera tai mēke ga wa, naþa pe amiyuñāen re e yomarava nini poli, ana Ntewa ga kila ruru monmāte ita ke ma e peni ana siraunia tekilia teva tesu ea. ² Yomarava nini naga sa ga lele na tagiena ga, a tekekaran ga naþa tourmatania, sinetan teva tetapolou e mātā yuñā ma metava, ³ a pogos naþa teva tesike ea, yoko ve teloge re si sane pe mātā uñā re poli, ana tevisu ga na wa sane kieta yo nena napo nane suñā ne.

⁴ Lelaga, tasneta naga sa ga silparpara tai naþa tesuvania e yomarava nini, ana lelaga naþa, pogos naþa tesike e sanene tesuñā takar malueta silaga komin naloge viowaena lala na pog mārera la naþa tesuñā toþarwowo ke yo ea. Pona pe pon re aimin awe kare tasneta poli, ana sitomena

tai monar sumã ga e ita sane visae akila, pogaga, komin naþa popon sane toure matan silparpara nini, teva tese yumã wo tai sumo wa. Monar tevisu kilale ruruia sane popon sa tas nen marena nene þisi, ana yoko tas viu tai kilia imi kus lelenã. ⁵ Nakonua rui, Ntewa sumã miyumãe ke e ita vena kila ruru ita teva e kiena yo sanene narui. Naga mligan Ninuna sike e ita vena kila ita tesitoñal silaga sane kiena visaarena na kilaen van ita sanene yoko imi ve lelaga.

⁶ Tesumã tesitoñal ke nanene, kila sane silaga toñarera. Tekilia tesape nagane, tesumã tekila ke mñata umã e silparpara nene, naþa tasneta, ana pe tesu re e mñata umã wo temio Suþe ma metava poli wa. ⁷ Sanene, pogos naþa tesike e yomarava nini wa, monar ve tekilali re naþa tesumãlu e ya naþa kilamarata ga kilia visuia, ana monar tesumãlu mñarera e naviawaena. ⁸ A e lepas na pun imimi, moñarera ruru ke ga wa vena suen e yomarava nini vena mesumã mekila kiena yumãena, ana mepisu sane po mñena ga visae mekilia meligan tasnemimi la na yomerava nini, meva mesu neña e mñamimi umã memio Suþe. ⁹ Sanene, visae tesike e yomarava nini, pona tesike ma metava, ana silaga monar tekilali ya naþa yoko naga kekarania. ¹⁰ Monar

tesitom sane pogos naþa Kristo pa totano metava e kiena yo wa na liþereena, yoko ita make ga veve taaga teva tesumãlu tese marana. Ana e pogos nene, yoko naga ga kila sane wo van ita, pona viowa van ita, taveve ga ya naþa tesumã tekila e pogos naþa tesike e tasneta e yomarava nini.

Kristo kila ruru marata temio Ntewa

¹¹ Pogos naþa mesitoñal naþa yoko Kristo liþere yaru lala, memarau, a mepisu sane popon meyumãe mñarera vena metaulu yar lala vena ve akovio re. Ntewa pisu kilale ruru þelaga na kiamimi yumãena la nene, a nesitom sane amiu mñena apisu kilale sane memiyumãe sa ga naþa naga kekarania. ¹² Nesumã nepisa ke sur la nene, pe nekila re poli komin naþa sineun vena amiu avisirlua imimi sina, ana popon vena akilia akekara e ya naþa mesumã mepisa. Visae atol ruru kiamimi visena lala, yoko kila sane visena la nene kilia se amiu, ana yoko akilia avisatamñe la naþa asitom ke asape apo rui. Ana la nene akila la ke apa metava komin ga ya ne akila ke e maran yaru lala, ana pe asitom re ya naþa sike loyumã e kiela malena poli.

¹³ Nekilia nesape pogos naþa nepisa visena la nene, yoko la þas naþa asike amio amiu monar avisave nepe

wowe, ana na nene na poga ga. Visae lelaga naña mepe wowe, mepe wowe komin naña mekila manene laa yuñae kiena ne Ntewa, ana visae ãarimimi la woga ga suña ga, ãarimimi la po komin naña mesitoñal amiu, ana monar ayagogon imimi. ¹⁴ Sur taaga ga naña suña kaweruru ke kiamimi malena vena mekila ruru yuñae wo la kiena Kristo, nane kiena sinesiena. Memlelaga ñarera mesape kiena marena naga taaga tamalia kieta malena ita make ga, visae peraga, yoko ita punu ga monar temare ga, yoko taãatete ita yaru tai kilia mali. ¹⁵ A naga mare wo ita punu ga sanene, naga sinenan sape ita la naña temlelaga ea pona temal ke e yomerava nini wa, ve teyuñae kieta re ga, ana teyuñae kiena, naña naga mare vena tamalia kieta malena, siraunia Ntewa pisirlua si naga.

¹⁶ Sanene, popon ve tevisuveve re si yaru lala taveve sitomena na yomarava nini. Nanua, pog naña Kristo sike e yomarava nini, yaru la apisuveveve taveve sitomena na yomerava nini, ana nagane pe tepisu re si naga sanene poli, a pe pon re tevisuveve yaru taãena lala taveve ñena sitomena na yomerava nini poli. ¹⁷ Na nene na komin naña visae yaru a naña mlelaga e Kristo, naga pimi sane pe yaru viu ruru nena ga. Kiena

malena marua na sumo kovio nena ga, ana nagane kiena malena viu pimi ñalivi rui. ¹⁸ Ntewa ga kila sane tekilia tevilopu kieta malena sanene, komin naña naga ke narui mligan Kristo pitomi e yomerava ve na kilaen kieta mrapa towasuãe si teimi puna, a sinenan sape monar toure yar taãena lala la ñena ga awasuãe si aimi puna. ¹⁹ Visae ve sanene, Ntewa miyuñae ãarpoyo e Kristo vena wereen yar na yomerava lala awasuãe sina vena aim ave taaga sina amio, naña naga pe sitom re si sape la nakoena van la vanon kieta mlamulena viowa la poli. A amio ñena nene, naga sinenan sape ligan kiena visena lala e limata, vena tela va va yar taãena lala vena la ñena ga awasuãe si aim puna. ²⁰ Sur ne nanene narui kila sane mepim mepe yaru kiena ne Kristo vena waren visena kiena ne Ntewa vano. Sanene, pogos naña mepisawal visena pan amiu, sa ga naña Ntewa ga suña pis, ana sinemimin paãisi mesape meviun manenea van amiu punu ga mesape awis, e kia kiena ne Kristo, monar awasuãe amiu aim puna Ntewa. ²¹ Naga ke narui sinena miye ita, ana mligan narina nene Kristo, naña naga pe kilali re mlamulena viowa poli, kila naga pimi sane yaru na waren kieta mlamulena viowa ita make ga. Ntewa

kila sanene vania vena kila sane ita yar na kilaen mlamulena viowa, tekilia teim teve yaru mesmesu lala e marana ne Ntewa.

6

Malena m̄arera kiena yaru na yuṁaena kiena ne Ntewa

¹ Mesuṁa memiyuṁae ke sane yar lala na yuṁaena lele taaga memio Ntewa, a mekilia sanape naṁa naga pe lemam paṁisi pan ita make ga. Sanene, mesape meviun manene van amiu, sane kiena lemamiena wo naṁa pimi e amiu, pe pon re imi korena ga poli. Monar alavia, a monar ataṁania kila kiena yuṁaena e kiamiu malena. ² Visena tai teke e Tus Marua pisa sanene rui, naṁa Ntewa sape,

“Mesmesun pogos naṁa po pan amiu, neyagogon kiamiu tagena, a mesmesun legiena natalialiaena, neim neiila amiu.” Ais 49:8

Ana e kiamimi navisuenā, mekilia mevisawal mevisave nagane narui pe kiamiu pog mesmes narui, nagane narui pe legiena na natamalia ami- uena.

³ E lepas na kiamimi yuṁaena, mesuṁa moṁikeyon naṁa mekilā wo lue ga, vena ve mekilawo re mrapan yaru kar ga naṁa sinenan sape imi. Pe sinemimin re naṁa yar laṁasa asape mekilā sur tai piowa, pona mekilā pal

yuṁaena koyo tai. ⁴ Mesuṁa mekilā ke sur make ga vena kilologia sane mekilā ke yuṁaena mesmesu sane yar wo lala na yuṁaena kiena ne Ntewa, ana mesuṁa metaṁan imimi vena mevane sur ve moki. Mesuṁa makawean imimi vena meva mowarpoyon luas nen yuṁaena lala, pe suri korena naṁa mepane sur viowa lala, pog m̄arera lala, a sur nailanen viowa lala.

⁵ Asumṁalu akawe imimi, a aṁe imimi, a akoven imimi e yuṁa nakoena. Pogog moki, memiyuṁae na memiyuṁae, pe momomalio ruru re poli, a kamimi kinana pe po re poli.

⁶ Piowa manene laa pan imimi sanene, ana mesuṁa ga memiyuṁae mesmes ga, a mesuṁa memiyuṁae memio kiliaena, a sitomena viavi, a sinewoena. Yeririna la apisu naṁa kiamimi malena pulen Ninuna Wa, a kiamimi ṁelaga pulen sinesiena naṁa lelaga, ⁷ naṁa mepisawal visena la naṁa pe apisokan re poli, naṁa memiyuṁae e m̄areraena kiena ne Ntewa, a naṁa e limamimi lala, e lepas na ṁamarua a e lepas na ṁameli, mopuarar sur na mara lala vena kilaen mesmesuena taulu naviowaena. ⁸ Yeririna la ṁasa apisir plan imimi, a laṁasa amligan imimi mesike laa tano, laṁasa apisa ruru imimi, laṁasa apisa

kare imimi paḡisi, ana pe mesitom re poli, mekila ga. Pe mepisa kotalia re yar tai poli, ana asuḡa apisu imimi sane pe mepe lelaga re nenaga. ⁹ Akilia ruru imimi ḡisi rui, ana asuḡa akila ke sa naḡa pe sinelan re akilia imimi poli. Memal ruru mesuḡa ga, ana asuḡa sinelan asape visae memare ga rui.

Nane suḡa pa sanene pan imimi narui, ana pe sur korena naḡa moḡar ke nakoena lala, la taḡatete akilalua kiamimi malena na wa. ¹⁰ Pe sur korena ga naḡa naloge viowaena la moki paḡisi, ana sinemimi la kekara silaga. Pe sur korena naḡa limamimi korena ga silaga, ana mesuḡa mekila ke yar taḡena la aḡar ke sur moki. Ana pe sur korena naḡa pe kiamimi sur re la poli, ana mepisu naḡa sur make ga pe kiamimi ga.

¹¹ Erau nae Koren lala, pe kiamimi sitomen viowa re tai e amiu poli, naḡa mekilawania pan amiu suḡa ga. Mepisawal sur make ga pan amiu rui, a sinemimi sii amiu paḡisi. ¹² Pe mekila re suri tai naḡa pona kilawo kieta erau wo poli, ana visae kilawo e lele tai, nanene komin naḡa amiu ga apuarar sitomena viowa laḡasa e imimi suḡa ga. ¹³ Ana visae ve sanene, monar nevis van amiu sa ga naruu la narui, nesape awis, ve akilawan re si ki-

amiu sitomena laḡasia, ana monar akilali losinemiu vike van imimi.

Avisuar ruru e la naḡa pe amlelaga re poli

¹⁴ Sineun neviḡa van amiu nesape ve asuḡa akilali re naḡa aimi ave taaga amio la naḡa pe amlelaga re poli. Popon asitomaḡalia sane ḡelaga na mesmesu amio ḡelaga na mlamulena viowa, lalua taḡatete aviran la aim lele taaga, a legiena pe erau ḡele ga amio yemalolo. ¹⁵ Kristo kiena sitomena ve taaga ḡele ga amio Yermare, a yaru naḡa mlelaga pe kiena sur re tai poli teke amio yaru naḡa pe mlelaga re poli. ¹⁶ Nono na visokanen lala asu ḡele loyuḡa e yuḡa wa ḡana Ntewa pogos tai, a visena nene kana kinasa komin yuḡa wa ḡana Ntewa, naga pe yuḡa re ga tai poli, ana ita li na lelagaena kiena ne Ntewa naḡa mali. Naga nene taveve ga kiena visena laḡasa, naḡa pisa sanini, sape

“Inu yoko nesike e la, yoko neyaloro likan la.

Inu yoko neve kiela Ntewa, yoko aimi ave kiau lus nena lala. Lev 26:12

¹⁷ *Ve sanene, sane kiela Suḡe, nepisa pan kiau la nene nesape monar amolue vetan taḡena lala, monar aviaḡa vetan yar viowa lala.*

Monar aim ave wa nenaga, a monar ve atol re kororaki lala,

sanene yoko nekilia nowor-worun la aim asike amio inu.

¹⁸ *Yoko inu, sane Ntewa na mava, nekilia nevisa van la nevisave*
'Amiu aim vena neve Ari-mamui, a vena amiu ave naruu nena lala.' ”

7

¹ Erau lala, nanene navisaarena wo lala kiena ne Ntewa naŋa pisape yoko naga were ita sane kiena namratava lala. Naga kila sanene pan ita po paŋisi, ana popon monar tevatanon naga silaga, naŋa monar towe plan make kororaki e kieta malena lala. Mlamulena viowa laŋasa tekila e tasneta, a laŋasa tekila ga loyuna e losineta, ana monar toŋisin la make ga, monar tevim naŋa teve wa naŋa teve wa sa naŋa naga sinenania.

Pol kekaran paŋisi naŋa Ntewa miyuna e la

² Sineun nesape neviun si tan amiu nesape ve sinemiu kar imimi re, ana aligan ruru lelemimi tai e sinemiu lala, vena nekilia nevisa re si sur laŋasa van amiu sumo wa. Popon akila sanene, komin naŋa pe amiu re tai poli naŋa mekila piowa pania, pona mekila karea, pona mekila kotalia e sur laŋasa. ³ Ana pogos naŋa nepisa visena la nene, pona asitom ke asape nesitom ke piowa e amiu, pona nesape nevisa kare amiu, ana pe

sa re nena nene poli ŋisa. Peraga, sa ga naŋa nepisa rui, nesape amiu na asike e losinemimi rui, a tesuna tepim tepe taaga pano pano tol naŋa sanena naŋa tesike ga e malena taaga, pona visae ita tai vane marena, yoko teloge sane ita make ga temare. ⁴ Lelaga nekilia nevisa sanini nevisave in na noŋasine amiu keviu na keviu, noŋarwar inun amiu pa ŋisi, a pogos naŋa nesitomial kiamiu yunaena wo lala, suna miila ke kiau sitomena keviu pa ŋisi. Lelaga naŋa nepane sur viowa moki, ana asuna akila pan inu naŋa nalogewoena a kekarena suna pule manene paŋisi e losineu.

⁵ Nepisa sanini komin sanene narui naua sumo ne, pogos naŋa mepa momalivi e lepas naŋa Masitonia. E yo nene, moŋar ke si veveyuena marera lala, kila sa naŋa memarau towe maŋa, a tasnemimi pe pulmas re tai naŋa va ruru e poli. ⁶ Ana kieta Ntewa naga pe Ntewa na kila luŋeluŋeen sitomena kiena yaru lala naŋa amloge piowa, ana naga sitomial imimi, kila kiamimi erau wo naŋa Taetas pimi malivin imimi, a pogos naŋa mepisu si naga memloge po paŋisi. ⁷ A pogos naŋa sun pa imimi, naga pisawal sur wo la naŋa amiu akila, miilaar imimi keviu paŋisi. Naga pisayu sanape naŋa naga maŋa ga,

pogos naþa naga pimi m̃alivi pun amiu, naga m̃al sur mok liu e amiu naþa miila naga, a pisawal sape akila mara wo e kiamiu visena la nanua ne, naþa nagane apilopu kiamiu sitomena, asum̃alu asike e kiau lepasa. Pisawal sape sinemiun manene laa paþisi naþa neiñasu neyaliali amiu, a suwala, pogos naþa nemloge nene nemloge po na nemloge po!

8 Pogos naþa nesiri m̃aki taþena nene pimi pan amiu, nemligan pae pano ana pe piavi re poli nesitomyu sina, nesape visae ve neligan re ga rui. Nanene komin naþa nekilia nesape kiau visena m̃arera lala yoko monar kila amiu aloge viowagan towe m̃aga. A poglis naþa memloge navisawalena kiena Taetas, nepisu sane lelaga ga na wa, kiau m̃aki kila kare kiamiu sitomena þisa. Ana nanene na yam plas ga, siraunia avilopu amiu sina, ana kila sane nekekarãna sina naþa nemligan m̃aki nene piñasu. ⁹ Sane pe nepisa re nesape nekekarãna naþa m̃aki nene kila amiu amloge piowa poli, ana nekekarãna ga naþa naloge viowaena nene kila apilon amiu. A kiamiu naloge viowaena nena, pe imimi re naþa mekila pimi m̃alivin amiu poli, ana Ntewa narui naga kila pimi m̃alivi. ¹⁰ Sanene, naloge viowaena nene naga naloge viowaena wo tai naþa pitomi ma e peni,

naþa kila yaru vilonia vena tol natamaliaena. Ana naloge viowaena taþena, naga naloge viowaena na yomerava nini, naþa naloge viowaena viowa tai naþa yoko kila yaru loge viowagan m̃a vano vano va tol marena. ¹¹ Amiu m̃ena akilia avisu kilale sane naloge viowaena naþa Ntewa tamãan pimi pan amiu, naga kila yuñena wo tai paþisi. Kila sane asitom urmi manenea e kiamiu malena, am̃areran ke paþisi vena kiamiu kia imi wo sina. Sumo na, sinemiun mimin naþa apisayu napiowaena naþa sike likan amiu, ana pogos naþa nepis pan amiu vanonia, apisu kilale ga mrapa na wa, ana amaru. Amiu ga asum̃alu apisi ke sina ga pan amiu, a amla nakoena pan la naþa akila piowa, vena ve naviowaena tai su re si pun amiu.

¹² Sineun nesape nevisa m̃aki nasumo, nemligania komin naþa nepisape nevis va lalua nene naþa akila piowa, a sineu miye m̃ena yermarua nene naþa lalua akila kare manene laa naga. Nemligan m̃ena ga komin naþa sineun nesape monar avisu kilale sane lelaga, sine-miu si imimi, ana pogos naþa mevis van amiu e kia kiena ne Ntewa, amiu akekarãna naþa avatanon ya naþa mevisa. ¹³ Ana poglis naþa Taetas pimi pisawal pan imimi sape amiu akila sanene rui, kilalua kiamimi

sitomena pa metava paĥisi.

Mekekaran manene laa nene rui, ana pogos naĥa Taetas pisayu sina pan imimi, pisayu sa naĥa amiu akila manene po pania, mekekaran pa laa sane. Naga pisa ke naĥa sike amio amiu, amiila naga a apisirlua kiena sitomena, a akila si naga kekara pa ĥisi. ¹⁴ Nepisayu amiu pania nanua sumo rui, nesape nekekaran kiamiu ĥelaga wo la pa ĥisi, ana pogos naĥa piĥasu ĥalivin amiu, ana pisu ga na wa sane pe nepisokan re poli, nepisa ga lelaga. Sa ke ga nanua sumo, nepisa ke ga sur lelaga la pan amiu silaga, ana nagane, akila kiau visena naĥa pa Taetas e kiamiu lepasa pimi pe lelaga ruru ĥena ga. ¹⁵ Naga taĥatete sinen ĥesan pogos naĥa piĥasu, amiu amarau paĥisi a sinemiu kurkur, ana poglis naĥa pis pan amiu, amlogearia, apatanon ruru nena kiena visena. Kiamiu ĥelaga wo na sanene, kila sane pogos naga ĥasuĥe sina, sitomĥal amiu lue ga silaga. ¹⁶ A e kiau lepasa, nepisa ga nesape nekekara naĥa nekekara, a nagane nepisu sane nekilia nowasine ruru amiu e sur make ga e pogos make ga.

8

Popon ala nalaena

¹ Erau nae Koren lala, sinemimin mesape amiu

aloge lologena na sur wo tai naĥa suĥa ĥarwowo ke yo e suĥare lala na pupia lepas naĥa Masitonia, naĥa Ntewa miyumuĥaen ke e kiena lemamiena. ² E yo nene, apa aĥarpo yo e pog ĥarera lala naĥa sur moki liu kilali kare la, a pano tol naĥa pe kiela sur re si poli, ana la nene, pe aĥis re nena e kekarena ga e ya naĥa la apisuia. Limala korena ga, ana memilan paĥisi sane pogos naĥa amloge asape nalelagaena taĥena la gar Jerusalema apane ĥena pog ĥarera, sinela miye la ana sane limala pimi pule ruruia amio sur lala vena laen vano sane kiela nalaena van li taĥena la nene. ³ Pe yar re tai poli naĥa pisape monar akila ve sanene, ana la ga asape akila, a nekilia ruru sane amla sur make ga naĥa akilia alavia, vano tol naĥa laĥasa amlavia taulu ya naĥa akilia alavia. ⁴ A pogos naĥa aĥar viraran punu pae rui, amligan e limamimi, amareran asape melual mrapa tai vena liganen nalaena nini vano, komin naĥa asape visae akilia alual si pulmas naiilaena na lelagaena wa taĥena la sanene, yoko ve sur wo manene laa tai van la, naĥa yoko akekaran vaĥisi. ⁵ La apo paĥisi, komin nanua sumo atamĥan make kiela malena sane kiela nalaena tai pa Suĥe, a amligan la asike vatanon kiamimi

visena, ana siraunia amla ya naña la kiela sane nalaena tai pimi pan li na lelagaena taņena lala. Akila po taulu manene ya naña mesitom mesape yoko akila, ana lelaga, akila mesmesun ga e nasinenanena kiena ne Ntewa.

⁶ Ana pogos naña mepisu le Masitonia taņena lala akila sanene, mesitom mesape popon meligan si Taetas iņas pun amiu, vena iilar amiu vena akila mēna ve sa nene. Mekilia mesape pogos naña naga piņasu sumo, naga sumā pis pan amiu aña amiu asiar ki-laen yuņaena wo na sinewo nene rui, ana popon naga imi kila make ruru nena ga amio amiu. ⁷ Mepisu naña yuņaena taņena lala, asuņa akila ke po rui, naña kiamiu viawaena keviu paņisi, apisawal ke visena lelaga po paņisi, akilia sur moki rui, asuņa yepemiu mēan ruru yuņaena, a asuņa sinemiu sii imimi li nale-lagaena taņena lala keviu paņisi. Akila yuņaena la nene pano taulu ya naña mesitom mesape atorokin akila, ana popon akila mēna ve sa ke ga e lepas na yuņaena nakianen nalaena nene.

⁸ Nepisa sanene, ana visena nene naga pe sa re navisaluaena tai naña yoko monar atavevea. Sur nene sike ga e amiu, ana nesitom nesape popon sa nevisayu taņena laņasa ve sanene, nepisawal sur wo la naña

akila ke rui. A pogos naña yoko aloge, yoko kila amiu avisuveve amiu towe li laa mņaga sane, sane kiamiu sinesiena keviu mņaga yo, maran taaga sa ke kiena la nene pona peraga? ⁹ A popon tesitoņal lemamiena kiena kieta Suņe Yesu Kristo ve keviu silaga, naña sumo, naga sa naña kiena sur make ga, ana naga sitom ita e yomarava, naga pitomi sa naña pe kiena sur re tai poli, vena kila sane tekilia teim teve yar na sur moki.

¹⁰ Pogaga, nanene kiau sitomena tai nene e lepas nene. Nepisa ga nesape nepisu sane sur nene sinemiu asape akila e kas nanua rui, a nane asiar asape akila ne, ana popon manene laa naña asuņalun sina vena akila make ruruia. ¹¹ Kiamiu sitomena nakilaen sanene naga mārera ruruia nanua pā rui, a nagane popon amāreran ruru nakilaena, a vena akila va aņa pe naña atorokin akila. ¹² Ntewa pe pisa re pisape monar tela nalaena taulu ya naña teke e limata vena tekiania, ana naga sinenan ga sape tekekan iilaen yaru taņena, a tela nalaena torokin ya naña tekilia telavia.

¹³ Ana poglis naña nepiuntan amiu vena akekan iilaena sanene, pe nesitom re nesape nekila sane yoko yuņaena urmi van amiu poli, ana imi melala ga van li taņena lala. ¹⁴ Nesuņa nesitom ke ga sane popon ita make ga teve maran taaga

ga. E pogos nene, kiamiu sur mok liu, ana lala na peraga, pe kiela re poli, ana popon kiamiu sur komþasia vano ve kiela, vena kiela sur m̃a tai ve tokak ga. A pona yam laþasa visae kiamiu sur re e kas laþasa naþa pimi ke ne, kiela sur komþasa kilia imi kila sane kiamiu narin sur m̃a tai. Pogos naþa tesuñña teiila ita ke sanene na po, kila sane ita make ga tesuñña marana taaga, ¹⁵ a yoko ve sa visena na Tus Marua tai, naþa pisa sanini, sape

“Yar naþa war kinanena ve moki vim,

yoko naga kan vano kan make nena ga, ana siraunia visu sane pe kana re si tai poli,

a naga naþa pa þar kinanena vitokaki ga, naþa pisu sane torok ga, yoko naga ve ve plasan re sur tai.” Nau 16:18

Yoko Taetas wasuþe si va gar Koren

¹⁶ Nakonua rui pimi, nesuñña nesitom amiu paþisi, a nagane, nepisa potena paþisi pa Ntewa naþa naga kila pa Taetas sape sitomena m̃arera tai sike e naga rui, sane naga monar iñasu iila amiu. ¹⁷ Ana pogos naþa mepisayu mesape iñasu m̃alivin amiu, naga kekaran ga, komin naþa kiena sitomena tai sanene sike pa e naga rui. ¹⁸ A pe naga re ga taaga poli, ana yoko meligan imimi yar taþena tai iñasu amio naga, naþa naga kieta puruvi tai

naþa sum̃are la na yo moki akilia ruru naga, komin naþa naga yar wo nalologonen Lologena Wo. ¹⁹ Sum̃are make ga la akekaran kiena yuññaena, ana amligan lua naga vena suñña yaloro amio imimi metelivi e kieta lepasa, pogos naþa mesuñña mekilapolo ke kilavaru na iilaen li nalelagaena lala gar Yerusalem. Mekila yuññaena nene komin naþa sinemimi sii la paþisi, a pogos naþa atol nalaena nene yoko ailan ruru vaþisi e þelaga naiila laena naþa tekila pan la, yoko avisirlua kia kiena Suþe va metava. ²⁰ A mekekaran paþisi naþa kieta puruvi taþena nene taveve imimi, komin naga kilia iila imimi vena visuar ruruen pupia kilavaru nene naþa asuñña akoan poloia. Sine-mimin mesape mevisuaria taveve ga kana mrapa wo ne lala, pe sinemimin re si meloge visena laþasa imi sirau poli. ²¹ Sinemimin mesape mekila yuññaena nene sa naþa yoko mesmesu e navisuena kiena Suþe, a yoko mesmesu m̃ena e visuena kiena yar taþena lala.

²² Ana amio lalua Taetas nene, yoko meligan puruvi taþena iñasu visu amiu. Naga m̃ena ga pe yaru tai naþa memligan sur moki sike e limana rui, a mekilali m̃a naga sanene pano mepisu naþa naga yepen m̃aen make sur la nene. Naga pe yaru wo tai na yuññaena, a pogos naþa

nepisayu kiamiu p̄elaga wo la pania, naga p̄asine amiu paṗisi sape visae imi yuṁāe re amio amiu vera wo vaṗisi. ²³ Sanene, e lepas puna kiau erau wo nene Taetas, monar avisu naga sane imimi ke lua narui naṗa memiyuṁāe veraga vena iila amiuena, a e lepas na kieta puruvi taṗena lua nene naṗa yoko aimi amio naga, monar avisu la sane aim pun amiu e kia kiena suṁare taṗena lala na lepas nene, a aimi e kia kiena Kristo naṗa kiela malena suṁa kipian ke kiena p̄elaga wo lala. ²⁴ Ana sineun nesape nevisa van amiu sane pogos naṗa la nene aim aṁalivin amiu, kiamiu malena lala monar kipian ṁena kiamiu p̄elaga wo lala. Nesuṁa nemlologon amiu ke pan la rui, ana popon manene sane la avisu kilale ruru ga na wa e kilamarala sa naṗa nepisa ga sur na lelaga, nesape kiamiu sinesiena keviu manene paṗisi, a akilia ala navisawalena wo tai naṗa visayu amiu va va suṁare taṗena lala.

9

Nalaena naiilaena va li na lelagaena taṗena lala

¹ In na nesiri plan visena moki rui e lepas na laena na kilavaru naṗa toṗar viravirania vena iilaen li na lelagaena taṗena lala nene kiena ne Ntewa, ana nesitom ke nesape asuṁa asitonāal ke sur la nene na

wa. ² In na nekilia ruru sane amiu akekaran naṗa asikol e yuṁāena nawar viraviranen kilavaru nalaena nene, komin naṗa e kas nanua p̄aro pano, asuṁa akila ruru ke naṗa ataulu kana narin kilavaru rui. A poglis naṗa nepa e lepas nene Masitonia nepisayu amiu pan la, nepisape amiu le Akaea lala asiar rui, a pogos naṗa la amloge miyur la towe ṁaga, kila sane miilaar kiela sitomena pa metava vena monar aṁareran laa sane vena kilaen kiela komṗasia. ³ Nepisayu amiu ke pan yaru taṗena lala rui, sane amiu na amiyuṁāe po sanene sanene, ana sa ve akila re na piowa ga! Naga ke nanene narui kila sineun neligan kieta puruvi telu nene aiṁasu avisuveve ruru amiu lia, komin naṗa nepisa pan la nesape monar awar viraviran kilavaru la nene rui, ana la akilia aiṁasu alual sane sanene pona pere wa. ⁴ Visae pere wa, monar amiu akila vilaga, komin naṗa lavis ke inu ṁena neiṁasu narui, a yoko neiṁasu nemio le Masitonia laṗasa, naṗa nepisayu amiu pan la rui. Ana visae meiṁasu melual naṗa pe akila ruru re poli wa, yoko kieta kap mare, pupia mawaena van inu, a van amiu ṁena ga, a yoko monar la avisave nepisa koskosin manene nayeluaren kiamiu kia pan la. ⁵ Nane kila narui nepisu sane monar nevisa van Taetas lala aiṁasu

sumon inu, ana ayum̃ae amio amiu vena war vi-raviranen kilavaru la naþa amiu apisaar asape awaria, awarpolo ruru sum̃a ga, ana yoko meim̃asun mowaria mowar vano. Nepisa sanene, ana ve asitom re sane nesum̃a nom̃areran amiun ke nesape monar awar nalaena nene. Waren nalaena na sanene, naga sur tai naþa ape sinewo, ana kiamiu sitomena ga kekaran nakilaena.

Navisa ruruena na þelaga nalaen suria

⁶ Ana visena tai ne nek-ilia nevisa manene van amiu sanini, yaru naþa mapila ve tokaki, yoko naga war ve tokaki, ana yaru naþa mapila ve moki, yoko naga war ve moki. ⁷ E lepas na kianen nalaena van yar taþena, ita make ga veve taaga monar tela ga ya naþa kieta sitomena pisaar sape tekila, ana pe pon re olavia naþa pe okekaran re laen poli, pona olavia komin naþa yaru taþena m̃areran sape monar olavia. Ntewa pe sinenan re nene poli, ana naga kekaran manene yaru naþa mla suria molue kome kiena sinewo a e ga e kiena sitomena naga taaga. ⁸ Ana visae ko tai naþa osum̃a omla ke nalaena pano, ve ositom manene re, komin naþa Ntewa kilia lamaran si nalaena wo la imi van ko, ve moki na ve moki. Naga kilia kila naþa silaga owar toroki e sur make ga

naþa sinom̃ania, a metava-nia owar torokin naþa owar sina ve na iilaen yum̃aena wo taþena lala. ⁹ Nanene sane visena tai na Tus na Yauena Wa lala naþa pisayu sinewo kiena ne Ntewa, sape “*Naga sum̃a kiakian lua ke nalaena wo lala pa yar la naþa limala korena, kiena þelaga wo lala sulue na sike ne.*” *Yauena 112:9*

¹⁰ A Ntewa, naga ke narui mla mrasa pan ita vena temapila e porotano, a naga ke narui naþa kila kurusa þar mrasa nakilaena kata kinanena ea, a ve sanene, yoko naga la ya naþa sine-tania vena kilaen yum̃aena ea, a yoko kila kieta sur la imi ve moki, a yoko kila naþa kieta yum̃aena mesmesu lala awar mras-nela ve moki. ¹¹ Yoko naga visu kilale kiamiu þelaga wo nene, naþa silaga akekaran kianen suria, ana yoko naga lamaran sina ve moki vim van amiu, a pogos naþa mowar kiamiu nalaena va taþena la nene, yoko kila naþa ita punu ga tevisa pupia potena tai va Ntewa komin navisa ruruena nowo naþa naga sum̃a kian ke pan ita. ¹² Nalaena nene naþa yoko ala vano, yoko iila li nalelagaena wa taþena la ve keviu naþa asum̃a apane ke pogos m̃arera, a yoko kila ayeluar m̃ena Ntewa ve keviu vaþisi, avisa manene potena vania vaþisi.

¹³ Yoko ayeluar Ntewa sanene komin naþa yoko

avisu naþa pe asuþa am-
lologon re ga lologena wo
kiena Kristo poli, ana asuþa
amlogear mēna ya naþa
pisa, a yoko avisu nalaena
naþa amlavia keviu paþisi,
naþa yoko kilia iilala ve
keviu a iila li taþena mēna
lala. Ana pogos naþa apisu
sur la nene, yoko avisu kilale
mēna sane kiamiu yuþaena
suþa kipian ke sane kiamiu
viawaena mārera ruruia a
pe lelaga na sike ne. ¹⁴ Yoko
avisu naþa lemamiena kiena
ne Ntewa pule manene
sanene e losinemiu, a yoko
asitom amiu vano vano þisa,
yoko sinela ye amiu, yoko
asuþa alen wo amiu silaga.

¹⁵ Popon avisa potena van
amiu komin kiamiu nalaena
wo na sanene, ana po mēna
ga vena ita punu ga tevisa
manene potena van Ntewa
silaga komin nalaena tanea
naþa naga mla pan ita, naþa
narina ne nane Yesu Kristo.

10

*Pol mla navisatameena pa
la naþa apisa kare kiena
yuþaena*

¹ Erau lala, akilia sane
in ga Pol nesuþa nesiri
piþasu, ana sineun nesape
ala kiau visena e þelaga mē
nena naþa sike e Kristo,
naþa naga moþau po a
malumu po. Naga ke nene
narui þelaga naþa nesuþa
noþikeyon kilaena pan amiu
nanua sumo, ana nekilia
mē sane yaru laþasa asuþa
apisa kare in ke vanonia.
Asuþa apisa ke asape pogos

naþa nesike nemio amiu,
in na nemalumu manene
laa, a nemaraun visena,
ana asape pogos naþa nesiri
piþasu, nekila ga sane in
na yaru tai naþa nekilia
nevis mārera, komin ga
naþa nesike perinan amiu.

² Na nene na pogaga, ana
monar akilia sane pogos
naþa neim nomalivin amiu,
visae nevisu sane popon
nevis mārera, nekilia nekila
ga narui. Ana sur ne
nanene narui nesape nevisa
van amiu, a nepisa awis
pan amiu, neviun manene
van amiu vena akilali
napiowaena la nene vim
wo towe laa ga wa, pogos
naþa pe nepim nomalivi re
pun amiu poli wa. Visae
ve sanene, pogos naþa
neimþasu, yoko ve sur re si tai
naþa monar nevis mārera
ea, ana visae peraga, in
na pe nemaraun re nena
nakuanen visena laþasa
naþa mārera na mārera
van la naþa asike loyuma
e napiowaena la nene poli,
a naþa apisa kare imimi
ke ne, apisape memiyuþae
taveve ke ga sitomena na
yomarava.

³ Lelaga, ita make ga tesike
e yomarava nini, ana imimi
pe metaveve re kiena þelaga
poli. A lelaga, mesuþa mek-
ila ke mara tai e yomarava,
ana mara nena na pe nae
re e yo nini poli. ⁴ Mesuþa
mesikol ke mara tai naþa
māreraena lala nae ma e
peni asuþa akila ke pan
māreraena lala na yo naloge

viowaena, a suri na mara la naþa mesuþa moþaria, pe ape na yomarava re nini poli, ana mekila ke mara moþar ke mareraena kiena Ninuna Wa naþa kilia yumu plan make yo marera la naþa sur viowa la asuþa atapolou ke ea. ⁵ Visae avisa visena viowa laþas na kaween yuþaena kiena Suþe, ana mekilia metaulu woga. A visae avilaven, akilali naþa avisaluþar kiena yuþaena, ana mekilia meva mowarpoyo vena kilaen yar la akilia naga e kiela malena. Visae asuþalu amio sitomena viowa lala, ana mekilia mevilon yar la nene aimi naþa kiela sitomena imi marera vena ataveve ga Kristo. ⁶ Yoko mekilia mekila ve sanene van amiu vano vano ataman amiu, vena aligan amiu asu vatanon visena kiena Suþe, a sirau-
nia, yoko mekila ma vano va e yo taþena la naþa yaru na kaween naga asike mena ea.

⁷ Ana e lepas na yaru nene naþa pe purþes nen napiowaena nene, pona amiu asuþa apisa ke asape sur punu ga pogaga komin naþa yaru nene pisape naga pe yeririna tai kiena Yesu yo? Ana awis, ve avisu re ga kulyepena, aþionli avisuveve sur lelaga naþa sike pae e maramiu rui. Naga pisape pe yeririna kiena Yesu na pogaga, ana naga suþa kila ke piowa, a popon naga visu ruru si kiena malena. Sinemiun ke

yagogonen naga na wa, ana sanape, inu mena ga nepe yeririna kiena Yesu, ana komin ya ne yepemiu mavin yagogon inuena? ⁸ Nepisa sanene, pona yoko laþasa avisa kare in sina avisave in na sineun ga netaulu luen suria, ana pe sa re nene poli. Pona lelaga sane pogos laþasa noþarwar inu paþisi yo, pona nesuþa nepisayu manene sane imimi ke narui mesuþa mepisuar amiu, ana pe nesitom re nesape nekila sur tai piowa naþa monar nemawania. Nesuþa nepisayu amiu sanene komin naþa Suþe ga mligan amiu e limamimi nanua rui vena mekila kiamiu malena amio naga va metava. Visae amiu asitom avisave mesuþa mepis ke pan amiu vena kila kareen si kiamiu malena, pe sa re nena nene poli. ⁹ A visae asitom ke asape in na nepe yar na sinemimiena tai naþa nesuþa nesiri ke maki la nene pimasu vena kila sane monar amaraun inu, naga mena nene pe mesmesu re poli. ¹⁰ Nekilia nesape laþasa asuþa apisayu in ke sanene rui, asape "Suwala, Pol sur nene, naga ga kiena maki lala apulen visena urmi la naþa marera, ana visae ovisu naga, naga sane pe yar malmale kar ga tai, a visae ologe naga visi, melala ga." ¹¹ Ana sineun nesape nevisa van la nene sane popon avisu kilale sane ya naþa mesiriwal

ke e m̃aki, pogos naṽa pe mesu re memio amiu poli, naga maran taaga ga sa ke e ya naṽa yoko mesuṽa mekila e maramiu, pogos naṽa mesike memio amiu. ¹² Nepisa sanene, ana pe sineun re visaen sur ve moki poli vena kilaen si kiamimi kia va metava. Pe sineun re naṽa meim sane yaru taṽena laṽas poli, naṽa apilaven manene visawalen si kiela sur wo lala. Yar la ne sanene asuṽa apisuveve ke kiela erau lala, a asuṽa apisuveve ke m̃ena yar taṽena lala, ana asitom asape la apo taulu la, ana naga nene pe yuṽaena na wowe ga tai, komin naṽa pona la punu ga nene apiowa maran taaga yo.

¹³ Sanene, yoko ve nevisayu manene imimi re va sanene, ana monar nevisa sur laṽasa van amiu naṽa atorokin yuṽaena lala naṽa Ntewa mligan e limamimi, a loyuṽa ea, pano tol sur laṽasa e lepas navisuar amiuena naṽa mesuṽa mekila. ¹⁴ Pe mesitom re naṽa meva manene poli vena mekilali naṽa mesu metavan amiu, ana mesmesun naṽa mekilia mela visena laṽasa naṽa monar avatanonia, komin naṽa ve sinemiu ṽesan re sane imimi ke narui naṽa moṽar ṽesan lologena wo kiena Kristo pimi pimi yalen silau pimi tol amiu. ¹⁵ Visae taṽena laṽasa la apimṽes pun amiu, yoko ve mesitom

re navisuar amiuena, pona nalaena visena la ne sanene van amiu. Ana siraun naṽa mesiar yuṽaena memio amiu, monar meva re laa na wa memio amiu. Sinemimin ga naṽa kiamiu naviawaena suṽa kapuru silaga, a mekekarān manenea visae kiamimi yuṽaena kilia imi ve keviu laa sane, ve e re ga e kiamiu yo, ¹⁶ ana yoko mekekarān vaṽisi visae amiu akilia aiila imimi vena kilaen sane teva re laa ga wa vena lologonen lologena wo va e purvanua taṽena lala na pun amiu lepas ṽasa na vanō, vena tevā tetepo yoṽarua e yo naṽa yar taṽena lala pe apa amlologo re e poli wa. Sanene, visae pogos tai tevisayu yuṽaena lala naṽa yoko tekila e yo la nene, yoko taṽatete si avisa kare ita avisave tesuṽa tepilaven ke ga mrasa naṽa molue e lokove kana yar taṽena! E pogos nene, yoko la akilia sane tesuṽa tepisayu mrasa naṽa molue ga e kata lokove naṽa ita ga tempila.

¹⁷ Sitomena la nene apowo paṽisi, ana popon ve towarwar itan re sur naṽa tekila, komin Tus Wa pis rui, sape

“Yaru naṽa sinenan vilaveena sur tai, monar vilave ga e ya naṽa Ntewa kila.” Ser 9:24

¹⁸ A pe pon re ita ga teyeluar ita si poli, komin yar wo naṽa lelaga, pe naga re naṽa naga ga pisa si

sape naga po, ana naga naña Ntewa ga pisa sape naga po.

11

Le Koren lala ataveve nalologena lala navisokanena

¹ Pona apulo visena la p̄asa naña nesiri rui, asitom asape nepis wowe yo, ana awis, sineun nesape akila kiamiu sitomena ve piavi li laa sane e inu, ana yoko nekilali naña nevisa si laḡasa.

² Ana monar nevisa visena la nene komin naña silaga nesuña nesitom amiu paḡisi. Yoko nevisa ve sanini, sane nepisu amiu sane amiu na kiau sira m̄ee tanea tai, naña nepisarar vena talopa amio kiena yar mesmesu nene naña Kristo. Nemloge sane nepieluen ruru amiu nenaga, komin naña sineun visuar ruru amiuena vena ave lelaga e visaarena nene, a naga nene sa ga Ntewa, naña naga m̄ena ga pieluen ruru ita, pe sinenan re sape teligan naga poli vena teva si varau. ³ A inu m̄ena ga nemarau towe m̄aga sane saḡisi yar taḡena imi were si kiamiu sitomena va ve taḡena. Sa nanua sumo ne, loḡara nene pimi pisa kotalia sira naña Iv, kila kotalia kila mloru e mlamulena piowa, ana pe sineun re nenaga vena pogos tai ve alelaga re si e Kristo, sa ḡisi ve sinemiu sii ruru re si naga taaga.

⁴ Nepisa sanene komin naña nepisu kilale towe m̄a ḡarimiu rui. Pogos naña

nalologena tai im̄asu visayu Yesu taḡena tai naña pe Yesu re naña memlologon ke poli, ana alelaga ke e naga veraga. A pogos naña ninuna taḡena imi m̄alivin amiu naña ve Ninuna re nene naña Ntewa mligania, apulan amiyopua ga. Pona pogos naña lologena wo taḡena tai imi m̄alivin amiu, yoko akekaran logearen naga veraga. ⁵ Nalologena taḡena la apisa kotalia amiu ruru nenaga e sur la nene, ana nepisu naña amiu asum̄a asitom urmi manene laa e la. Amiu akila sa naña la ga ape nalologena e kieta yomarava nini, a amligan inu nesike tano, ana pe nesitom re nesape nanene naga mesmesu poli. ⁶ Lelaga, nekilia nesape yar laḡasa asitom ke asape in na pe nemlologo ruru re po poli, ana nekilia nesape pe yar re si tai naña kilia sur taulu inu poli, a nesitom nesape amiu apisu kilale suri nene rui, komin naña suña m̄alivi ke e yuḡaena punu ga naña nekila ke ne e maramiu.

⁷ Nekilia nesape e lepas na warpoloen kilavaru nene, yar laḡas pe akekaran re nenaga, ana nemninue ga komin ya ne sanene. Pona asitom asape nepiun ke kilavaru nene ve kiau ga? Peraga rui, komin pogos naña nepimin nemlologon Lologena Wo kiena ne Ntewa pan amiu, pe nepisali re nesape ala sur tai van inu poli. In na nemligan

inu nesike laa tano, vena nekilia nevisirlua amiu ava metava, ana pona amiu p̄asia sinemiu karinun naṗa nekila sanene? Pona asitom asape in na nekila piowa ga naṗa pe nepiun re suri tai pan amiu e pogos nene poli yo? ⁸ Nekilia nevisa mesmesun van amiu nevisave e poglis nene, sum̄are taṗena lala asuṗa amligan nalaena pimi vena iila inu, a nesuṗa nakan ke ga kilavaru nene pogos naṗa nemiyuṗae kiamiu ke ne. Ana pe nekila re sur wo tai pan la nene poli e pogos nene, ana nemloge sane sa ga nesuṗa nepinaun la ke ga. ⁹ A pogos naṗa nesike nemio amiu, luṗiau plasa pano pano p̄isa, ana puruvi la lua naṗa akom Masitonia apitomi apisu kilale naṗa nemloge ke piowa sanene ana apisuar ruru inu. Pe nepim netag li re pan amiu poli vanon sur tai, a nepisaaria sane yoko taṗatete nekila kare amiu naṗa noṗareran amiu nesape monar akila sanene pona sanene pan inu.

¹⁰ Nepisalar sanene komin naṗa yepmavin yar la asuṗa avisa kare inu asape visokar inun kiamiu kilavaru, ana yoko nevisawal kiau navisaarena nene va kar ga e yo punu ga e lepas nene Akaea. Pe nemarau re nenaga, nepisaaria e kia kiena ne Kristo naṗa kiena visena lelaga sike e inu sane yoko

nekila ga narui. ¹¹ Ana pogos naṗa nepisa sanene, pona yar laṗasa yoko avisave sineun ga kila kareen kiamiu kia, pona asitom asape pe sineu sii amiu re poli yo, ana in na pe sa re nena nene p̄isa. Ntewa kilia ruru sane sineu sii amiu paṗisi. ¹² Ana monar noṗareran ga sane visaarena naṗa nepisa, yoko monar nekila ga narui, komin naṗa sineun kemaren kapi kiena taṗena la nene naṗa asuṗa apilave kar ke sanene. Asuṗa apisali ke pan amiu asape asuṗa amiyuṗae lele taaga amio imimi, asape akila ga yuṗaena ṗa nena naṗa mesuṗa mekila ke ne, ana pe sa re nene poli.

¹³ Yar la ne sanene ape nalologena navisokanena ga, amiyuṗae pe mesmes re nena poli, ana asuṗa akila kotalia amiu ke ga li na lelagaena lala, sane aṗar marana nalologena lelaga lala kiena Kristo. ¹⁴ Ana monar ve ailan re naṗa akila sanene, komin kiela yerkaṗa naṗa Yermare, naga ṗena ga suṗa kila ke sanene rui. Naga kilia kila sane naga imi ve navisi wo na yomerarava, ¹⁵ ana tepisu naṗa kiena yar lala na yuṗaena akila kotalia ke ṗena yaru lala, akila la sane la ape yar na kilaen p̄elaga mesmesu. Ana pogaga, tekilia sane yoko ava ga narui aṗisi e yo naṗa mesmesun ga kiela yuṗaena

viowa lala.

¹⁶ Ana sa naþa nepisa rui, pe sineun re sane nevisi ana kila laþasa asape nepe wowe, ana visae sinelan visaena, ataþan avisa. Ana visae ve sanene, popon la akila van inu sa naþa akila pa wowe lala, sane ve avisaluþar in re sumo wa, ana ataþan nevisa ya naþa sineun nesape nevisa.

¹⁷ Pogos naþa nesuþa nepisayu ke ki-amimi yuþaena, visae nevis vilaveena manenea, kila sane pe lelaga kemua naþa nesuþa nepis wowe, a yoko Suþe taþatete kekarania.

¹⁸ Pe pon re tevis vilave manene poli, ana in na pe nesa re yaru taþena la naþa asuþa apis vilaveena kiela sur lala na yomarava nini, komin naþa visae nevis vilave, nesuþa nepisayu ke ga sur wo lala.

¹⁹ A nepisu naþa asuþa sinemiu miye ke yar taþena lala naþa amiu asitom ke sane la ape wowe, komin naþa apisu sane la ape taþena, pe atol re manmaruaena wo nene poli naþa amiu asitom ke asape asike ea. Ana visae asitom ke asape in mþena nepe wowe, komin ya ne taþatete akila kiamiu sitomena ve piavi laa sane e inu mþena?

²⁰ Nepisu naþa asuþa ataþan ke pa nalologena navisokanena taþena la nene vena akila sur viowa la ve moki van amiu. Akila

van amiu sa naþa amiu ape kiela yar na yuþaena lala, la amiyelelain amiu, aþar kiamiu sur lala, amligan la asu metavan amiu, a visae sinelania akilia alipa maramiu. Amiu asuþa ataþan akila sanene, ana sanape? Ana pogos naþa nepisa ga visena tai pan amiu, komin ya ne yepemiu mavin yagogonena? ²¹ Pona popon manene visae in mþena nesuþa nekila þelaga kar la ne sanene van amiu, ana pona kila amiu akekarana inu ga yo na wa? Ana pe sineyeena, in na nemalum laa paþisi yo, in na pe netorokin re nekila nene poli yo?

Pogaga, nepisa visena nene, nekilia sane yoko yar laþasa avisave nesuþa nepis wowe ke sina ga, ana sineun nesape visae nalologena taþena la nene asitom sane akilia avis vilave komin naþa asitom asape sur laþasa na lepas pula naga po, ana in mþena nekilia nevis vilaveena sur laþasa na sanene. ²² Visae asuþa avisir plan la ke asape la ape yer Epru, ana in mþena nepe yer Epru. Visae asuþalun avisave la ape yaru na lepas nene Israel, ana in mþena nae yo nene. Visae aligan la metava komin naþa apisape la ape lus kiena Epraam nena ga, ana in mþena nepe lus nene. ²³ Ana yoko neviun naviunena tai van amiu narui, sane la

nene amiyuñae kiena Kristo pa tol yuñae naña inu nemiyañae? Peraga, inu nesitom sane in na nekila po manene laa taulu la. Piowa ga naña nesuñae nepisayu inu ke sina sanene, ana þarimiu la mārera pañisi kila sane in mēna lavis þaruu ve wowe, nane nesuñalu nepis sanene. Ana sur nene na lelaga pañisi, naña in na nekila pupia yuñae la taulu la, yerkaawa la akoven inu e yuñae naloge viowaena yam moki taulu la, añe inu yam via nopulo þele sina, a yam moki mēna ga naña pano-o lavis ga nemare. ²⁴ Nekilia sane yam lima rui, yerkaawa kiena ne le Yu lala añe inu naña yam taaga, kovilva kakapuru e mosineu yam lualima yam telu pa ovaru [39], ana akila sanene yam lima. Apisaluþaria asape ve akila re va tol lualima yam ve vari [40], komin visae peraga, vena marena ga narui. ²⁵ Ana yam telu añe inu e laki lala, a yam si tai akove inu e kilavaru pano pano lavis nemare. Yam telu nokulu e sive naña waa talilu, e pogos la tai nene, sive mian inu mēga tol lemalo wetelu tai a legiena wetelu si tai. ²⁶ Pupia yalena piayavi lala, nemialoro e la yam moki manene laa, a e pogos la nene nepane sur la moki liu naña namarena ga. Wii lala na þalu lavis

ayanlua inu nevano, yar la naña añevinaun ke yar lala añene inu, kiau yeririna ga lala sa naña le Yu lala apisu piowa e inu, a la naña pe ape le Yu re poli akila kare inu mēna ga. Nepa e yo nape, sane pulkumali, pona yomārua, pona losi, ana nepane pog mārera, ana silaga, puruvi navisokanena la nene, asuñae akawe inu. ²⁷ Sila ga nepa nemio yuñae mārera a pog mārera, nepano naña nomalio þele ga, nepano naña moto kar inu pañisi a viso kar inu naña pe kinanena re nena poli, a nepano naña pe nomāl re yo natapolounen miava poli. ²⁸ A metavan pog mārera la nene, silaga nesuñae nesitoñal luen ga kiau yuñae nemio suñae lala, naña sane sur tai naña urmi na urmi e kiau malena. ²⁹ A nesitom amiu mēna ga pañisi, naña visae nevisu amiu li na lelagaena yaru tai imi malumu, yoko kila neloge sane yepeu malumunia, a visae neloge naña amiu tai loru e mlamulena viowa, yoko kila naña neloge sineu laea pañisi.

³⁰ Nanene sur viowa la naña nesuñae nepisuia, ana nepisu sane nemalumun manene laa yuñae kiena Suþe, ana pe nekila re sur wo tai naña nekilia nevis vilaveena poli, kila sane nesuñae nepis vilave

e pog viowa la nene naña nepanea. ³¹ A kieta Ntewa, naña naga pe Arimana Suñe Yesu, naña yoko teyeluar luen ga kiena kia, naga kilia sape pe nepisokan re poli, sur la naña nepisa ke ne ape lelaga make ga.

³² A pupia sur viowa si tai naña nomãlia, pe nepisa re ma metava poli, nanene e poglis naña nepa e pupia pulkumali naña Tamãskas. E poglis nene, ãarin suñe nae lepas nene naga yar naña Aretas, a kiena yerkawa naña naga pisirlua vena visuaren kiena pulkumali sinenan sape tarar inu, ana pitetalia kiena lokul na taren yaru lala apa asuwo make mralaea punu ga e yo nene vena ve noure re. ³³ Lavis atol inu, ana erau lañasa amiila inu, akonwan inu e los nen pupia karo tai, ana apiar e kilika, asuñalu metava e pupia arman kove na yo nene, amligan malumun pito tano vanua e yepas nen kove nene, pito malum ña pito tol tano, ana nomolue e karo nene nopure nepano.

12

Sur la naña Pol pisu e ñeniãna

¹ Poga, nepisu sane visae nesuñã nepisayu in ke sanene wa, yoko tañatete vilon kiamiu sitomena imi wo sina, ana pogaga, nemloge sane sineun nesikol si visena nevisayu sur la

naña nepisuiã pona sur la naña Suñe kilologia pan inu e ñeniãna lala. ² Ana yoko nesunyu yar kiena Kristo tai sumo wa, naña nekilia ruru naga, naña kas lualima taaga pa vari [14] ãaro rui, naga suñã ga milan añere naga pa kate ma e peni ma metava. Nemninue ga pa amio tasnena wetelu, pona apitom añerelua ga ninuna pavini, Ntewa ga kilia. ³ Ana pe sur korena ga naña visae pa e tasnena pona pa e ninuna ga, nekilia nesape lelaga sane yar nene pavini yalen silau pisu loyuñã e ñata uñã tanea e yo nene. ⁴ Naga mloge sur mok liu naña pe navisawalen re si poli, naña pe visena re si na yomarava lañas poli naña torokin navisayuena.

⁵ Ana pogos naña nepisayu yar nene, pona amilan yo, apisape ke, yar nene, naga pe yar tanea tai naña ne. Ana sanape, visae nevisave pe yar tañena re poli, ana nepisayu in ke ga, pona yoko avisa ga avisave nanene naga pe pe sur re tai poli a? Sanene, nepisu sane visae sineun nevisayu pupia sur lañasa sanene van amiu, popon nevisa ga e kia kiena yar tañena, vena akekarãna naña alelaga ea, ana e kiau kia, yoko nevisayu ga kiau narin sur lañasia. ⁶ A visae sineun nevis vilave e pupia sur la naña nekila, yoko tañatete si yar tai kilia visave nesuñã

nepis wowe, komin sur la punu ga ape lelaga make ga. Ana pe sineun manene re nevisa sur la ne sanene poli, komin naña pe pon re nekilali aligan inu metava vanon sur lañasa naña pe apisuli re poli wa pona pe amlogeli re poli wa, ana in ga nesuñña nepisa. Sineun nesape asuñña avisuveve inu e yuññaena ya naña apisu nekila ke pan amiu, a e visena ya naña nepisa pan amiu.

⁷ A nepisu sane Ntewa mñena naga yepen mavin sape kiau sitomena va manene laa metava vanon mñeniena lala pona sur la naña naga pisa lologia ke pan inu, a naga mligan napiowaena tai sike e tasneu naña nemloge sane kurumol tai naña Yermare suñña miyur inu ke e silaga, naña suñña kila tasneu mlalaea, a suñña kila kiau sitomena suñña ga tano. ⁸ Nepiun tan Suñe vena lalua sur nene vëtan tasneu, ana pe kila re poli, ana yam lua sina nemleninia, yoko kana yam telu nena, ana peraga rui. ⁹ Ana naga pis ga pan inu, pisa sanini sape “Yoko kiau lemamiëna ga torokin uarar ko, komin kiau mñareraena kilia yuñña ve keviu manenea e pogos naña yuñña amio kiomña malumuena.” Visena ne nanene narui kila sane nekekarän nevisayu manene in laa sane, ana yoko nevisayu ga kiau malumuena lala, vena kila sane mñareraena

kiena Kristo kilia yuñña kome inu sanene, sa naña naga pisa. ¹⁰ Sanene, vena kila kiena kia imi ve keviu manene laa sane, netamñan sane nekekarän malumuena la se tasneu, pona avisu viowa e inu, pona nelual pog mñarera lala, pona akila kare inu, pona neva nowarpoyo e sur viowa lala, komin naña nekilia sane pogos naña yepeu malumu, Kristo ga yoko kila nomñarera.

¹¹ Suwala! Nesitomñal ke visena la naña nepisayu e yo nini, nepisu sane lelaga, nepisi sa naña nepe wowe pañisi. Aviewo inu, ana po mñena ga naña apisu kilale sane amiu ke narui naña akila nepisi sanene. Nesitom ke nesape amiu ke narui yoko asuñña avisayu ruru inu, naña akekarän sur wo la naña nekila pan amiu rui, ana peraga, asuñña apisa kare ruru inu nena ga. Nekilia nesape in na nepe sur korena ga, ana pe nesitom re nesape in na nepiowa taulu nalologena navisokanen tañena la poli, ana vanon ya ne asuñña amieluar la sanene?

¹² Popon asitomñal si sur la naña nekila likan amiu, naña pisawal inu sape in ke narui nepe nalologena lelaga. Sila ga, kiau sitomena piavi rurui vena yuñña malumu amio amiu, a nekila amiu apisu kile lala, amio sur nailanena lala, amio kile lala na namñareraena kiena ne Ntewa. ¹³ Nekila sur make ga pan amiu po pañisi,

maran taaga e ya naña nekila pan sumare taņena lala, ana la pe apismumun re sur tai poli, ana amiu na apis liu wa. Sur ga tai naña nekila nemio la ana pe nekila re nemio amiu poli, pe nepiun amiu re poli nesape avisuar inu pona aiila inu, sa naña la akila, ana pona nane nekila pal e nene yo? Visae ve sanene, aviewo inunia, komin naña visae pona neviun ga sur ve moki vetan amiu vera na yoko akekaran in ga na wa?

¹⁴ Pogaga, nagane narui nesuņa nekila ruru ke nesape neiņasu nevisu amiu sina, naña kana yam telu ne narui. Nepisaar nesape yoko ve nekila re yuņaena van amiu, komin naña ve neiņasun re vena kiamiu sur la iila inu, a neiņasun vena neiila amiu. Nanene sane ata lala a auya lala amio narila lala, naña pe yuņaena kiena re nin sisi la poli naña avisuar kiela yermarua lala, ana yermarua ke la narui monar avisuar ruru narila lala, ¹⁵ ana visae sanene, in na nekekaran ga naña nekian make kiau suria, amio mēna kiau malena, vena iila amiuena. In na nekilia nekila sanene komin naña sineu sii amiu manene paņisi, ana nemloge piowa komin naña nepisu sane pog naña kiau sinesiena e amiu suņa pa manene ke metava, ana kiamiu sinesiena e inu suņa pito lilue ke ga tano. ¹⁶ Nepisa nanene komin

nemloge visena taņena e amiu. Asumņa apisu kilale ke asape pogos naña nesike nemio amiu, pe nekila re yuņaena tai mārera pan amiu ve navisuarinena poli, a pe nakan re nena kamiu kilavaru poli, ana sitomena tai teke ga e amiu wa. Amiu apisa apisape in na nepe manmarua po e lepas nakilakotaliaen yaru, ana asitom ke asape nesuņa nekila vinaun ke mrapa na visa kotalia amiuena vanon kiamiu sur lala. ¹⁷ Ana pe sa re nena nene poli ũisa. Asitom ruruli la naña nepitetalia la apiņas pun amiu. Apisu naña akila kare amiu e sur tai, pona aņar kiamiu sur laņasa pe kiau? Pe nesitom re poli. ¹⁸ A sanapen mēna pogos naña nomāreran Taetas sane naga amio kieta puruvi taņena nene, lalua monar aņalivin amiu? Apisu naña lalua akilakokanin ga naña awar kiamiu kilavaru laņasa? Peraga, komin imimi sane ũegas taaga ga, naña Ninuna taaga ga sike e imimi, a mesuņa metaveve mrapa na yuņaena taaga ga, naña pe mesitom re nena naña nakilaen yuņaena kiena Suņe vena mowar sur laņasa ve kiamimi.

Pol sitom manene paņisi sape pogos naña va gar Koren yoko ve sanape?

¹⁹ Nesuņa nepisayu ke kiau yuņaena la sanene, pona asitom ke asape

noŕikeyon nekilalua kiau kia va metava e maramiu yo vena ve asitom re si viowa e inu. Ana peraga, in na pe nesitomāl inu re poli, ana nesumā nesitomāl amiu ga, a visena la naŕa nepisa, nepis sane yar kiena Kristo tai, e marana Ntewa, vena iilaen kiamiu malena.²⁰ Nepisa visena la nene komin nemarau paŕisi sane pe pon re naŕa nomālavin si amiu poli, ana nevisu naŕa amiu asike e yo tai naŕa piowa paŕisi e kiau sitomena, a nemaraun mēna ga sa ŕisi yepemiu mavin inu. Visae ve sa nene kilia kila sane teveveyun ita, pona tesitom ita viowa, pona sineta kar ita, pona ve tesitom re si yar taŕena ana tesitomāl ita ga veve taaga. E pogos la ne sanene, yar kilia viueli, kilia vismumun yar taŕena, kilia vis vilave, a kilia māga manene mēna ga. Visae va sanene, ana viowa narui.²¹ A nemaraun manene mēna ga sane pogos naŕa nowasuŕe si neim pun amiu la nene, yoko nevisu kiau yumāena lala e amiu sane aviowa ruru make nenaga. A visae ve sa nene, yoko kila inu nemawan Ntewa vaŕisi, yoko kila inu neloge sane naga mligan inu nepito tano keviu paŕisi e maramiu. Ana nepisu sane yoko monar ve sa ga nene narui, komin pupia mlamulena viowa naŕa amiu laŕasa asumā akila ke ne naga pe ŕelaga

na kororaki na kolau naŕa kilaro navisaluaena naŕa Ntewa mligan pa yermēne amio sira vena atavevea, a pe apilon la re nena ea ŕisa, ana amiu ataŕan ga naŕa la asumā akila.

13

Visena maro na weŕege laena

¹ Erau lala, sa naŕa nepisa ne, nanene yam telun naŕa nemialoro naŕa yoko nekila vena neimi neyalial li mā amiu, a pona yoko yam ve telun naŕa nevisi van amiu komin napiowaena nene. Nanene kila narui nesitomāl visena tai na Tus Wa naŕa pisa sanini, sape

“Pogos naŕa apa kumali apis pa yar tai vanon mlamulena viowa tai, monar yar ve lua pona ve telu naŕa akilia avisawal mlamulena viowa nene, vena kila sane avisu sane lelaga.” Naw 19:15

² Nesitomāl nene komin pogos naŕa nepim ŕesan noŕarpoyo pun amiu yam lua nanua sumo ne, nepis nemio amiu la naŕa akila mlamulena viowa nene, nanene naga pogos naŕa nekila ŕesania. A nagane nesumā nepis ke sina ga yam lua pan la e māki nini, a visae neim nevis sina, naga nene kila kana yam telu nena. A sineun nesape nevisa van la nene, amio la naŕa asike e yepas nela, visae neiŕasu

nevis sina, nanene yoko ve nasineyeena to re si e inu narui, yoko neliḗpere la e nakoaeḗna m̄arera tai. ³ Amiu asuḗna apisa ke asape popon nekilologia inu towe m̄aga sane ve lelaga naḗa Kristo suḗna pis ke ḗarpoyo e kiau visena lala, ana visae sinemiun sanene, popon aim ayagogon inu e poglis nene, ana yoko avisu ga na wa. Yoko avisu sane pogos naḗa Kristo sinenan kilaen kiena yuḗnaena e amiu, naga pe malum re nena ga, ana naga kilia yuḗnae amio kiena m̄areraena make ga. ⁴ Pogos naḗa aḗear naga mare e laki torovia, tepisu naḗa tasnena pimi malumu nenaga, ana pogos naḗa suḗnalu e marena mali sina, naga pule ruru nenaga e m̄areraena kiena ne Ntewa. Ana imimi m̄ena memalumu sane naga, ana pogos naḗa mekila kiena yuḗnaena naiila amiuena, mesuḗna memiyuḗnae ke memio m̄areraena naḗa Ntewa taḗan pan imimi.

⁵ Sineun m̄ena nevisawaḗ nesape nevisu sane amiu asuḗna amlip̄ere inu manene laa, ana sanape narui, taḗatete naḗa amiu ga akilia aliḗpere amiu re sina, sane kiamiu viawaena suḗna m̄arera ke ga wa pona sanape? Avisu ruru amiu, sane asuḗna apisu kilale ke sane Yesu Kristo suḗna miyuḗnae ke e kiamiu malena wa, pona peraga? A visae peraga, pona laḗasa

asike nena e malena naḗa Suḗpe pe su re nena e poli, a pe ape nalelagaena re naḗa pe lelaga poli. ⁶ A visae pogos tai visae sinemiun avisuveve m̄ena kiamimi malena, naga pogaga, ana sineun manene paḗisi sane yoko avisu kilale naḗa Suḗpe suḗna miyuḗnae ke e kiamimi malena ana pe mekila pal re kana nin kinakinas tai poli.

⁷ A mesuḗna memlen ke pa Ntewa vena yuḗnae e kiamiu malena vena amiu m̄ena ve akila pal re suri tai. Visae ave sanene, yoko kilia kila m̄ena kiamimi kiau, komin imimi ke narui mepian amiu, ana pe memlenwo amiu re poli komin ga kiamimi kia. Visae yar lala avisu sane memiyuḗnae piowa sanape, nanene na pogaga, ana kiamimi pupia sitomena, sinemimin naḗa asuḗna akilalue ga mesmes silaga. ⁸ A imimi m̄ena ga, sinemimin naḗa kiamimi yuḗnaena make ga mesmes ga e visena lelaga kiena Suḗpe, ve sinemimin re si kilaen sur tai naḗa welua si kiena visena lelaga vito taḗo. ⁹ Mesuḗna memiyuḗnae kiena ke ga, a visae pogos tai kila imimi meim memalumu, mekekarana ga, komin naḗa mekilia mesape pogos naḗa meim memalumu, ana amiu aim aḗarera. Mesuḗna memlotun ke ga na nene, sane yoko asuḗna aimi awo manene silaga. ¹⁰ Sitomena ne nanene kila nesiri m̄aki nene piḗasu pan amiu

nagane e pogos naŕa nesike perinan amiu wa. Sineun nesape alogearia, a visae akila, yoko pogos naŕa neiŕasu taŕatete nevis ŕarera van amiu. Suŕe mligan amiu e luŕiau vena nevisuar amiu, pe nakila kare amiuen re poli, ana nakila amiuena ava metava. A visae neiŕasu nevisu ve sanape, yoko monar nekila ŕarera van amiu e ga e ya naŕa mesmesun nekila.

Pol pisa pokolemalo pan la

¹¹ Erau lala, nepim e kiau visena maro narui, nevisa ga pokolemalo van amiu. Awis, akilali naŕa akila ruru kiamiu mrapa mesmesu. Alogear ruru suri la naŕa nepiun tan amiu. Amiu punu ga atarŕan ga aviranar amiu e sitomena wo tai. Asururu ga e ŕelaga namalumena, ana yoko Ntewa na sinesiena a ŕa sumarena sike amio amiu. ¹² Pogos naŕa asuŕia avitawe amiu, atalopan ruru amiu, aviran pipimiu e kekarena wa. ¹³ Nalelagaena wa lala nae e nini apisa ŕiena kiela pokolemalo pan amiu.

¹⁴ Ana kiau leniena nesape yoko lemamiena kiena kieta Suŕe Yesu Kristo, amio sinesiena kiena ne Ntewa, amio ŕaŕagena kiena Ninuna Wa, asike amio ita make ga.

Inu na, Pol.

**Maki Naña Pol
Siria Pa Pan
Li Nalelagaena Wa
Lala Nae Garu
KALESIA
Visayuena Na
Tusi Nene**

*Komþasnen suniena plas
na tusi nini*

Kalesia naga lepas keviu tai naña ñeke vatanon Parin Suþe nae Rom, a ñeke e purvanua naña nagane kiena kia Teki.

E pogos naña nalogena kiena Yesu la asiaria vena ava alogogon kiena lologena wo, yaru la naña pe ape lus nae re Israel poli lala akekaran lologena wo nene paþisi.

Ana yaru laþasa asumãaga, naña e kiela sitomienna lala, asape visae yaru tai sinenan sape naga imi ve yaru lelaga nalelagaena kiena ne Yesu, naga monar taveve ke navisaluaena marua lala naña sumo na Ntewa mila pa Mosis. Ana Pol pis mārera kawē sitomienna nene, pisawoia sape þelaga nene pe mesmesu re nenaga. Naga pisawal merarava sape visae yaru naña sinenan tolen maliena e Kristo, purþesnen suri nene na sanene, naga monar lelaga ga e Kristo. E ga e þelaga nene, yaru makega akilia aimi amesmesu e marana Ntewa.

Ana e sumãare lala e pulku-mali lala nae lepas nae Kalesia, yaru laþasa apimi akawe Pol e visena lala, apian lina-lelagaena lala asape visae yaru tai sinenan sape imi mesmesu e marana Ntewa, naga monar taveve ke navisaluaena lala kiena Mosis.

Maki nini, Pol siria pan la naña asumãa ataveve ke vianena nene naña pe po re poli, vena urela awasupe si aimi e lelagaena na lelaga, a e þelaga la naña mesmesu. E kiena ñaki, naga siar visena, pisawal sape naga kilia vis vanla sanenen komin naga puarar yumãena sane nalologena kiena Yesu Kristo, a li na lelagaena lala e yo pinuga apisukilia naga sanene. Naga pisa ñaga sape pe yaru la re apisa pania asape imi ve nalologena tai poli, ana Ntewa ke naña pisirlua naga narui, pio naga vena visawalen lologena wo va yaru la naña pe ape lus nae re Israel poli. A naga pisa luwega visena na kawēna vianena viowa la nene, naga sape lelagaena kiena yaru ga kilia kila yaru mesmesu e marana Ntewa. E maran tusi maro na ñaki nini, Pol kila meraravan sape þelaga wo naña li nalelagaena la asumãa akila, molue kome þelaga naña yaru sinensi wenlai a vinena, komin nanene nau naga þelaga po na malien kiena ne la naña amlelaga e Kristo.

Komþasnen tusi la na nini

Visena nasumo 1:1-10
 Nam̄areraena sike e Pol
 komin naga pe nalolo-
 gena tai 1:11—2:21

Ntewa suṃa miila ita e
 kiena lemamiēna 3:1—
 4:31

Li nalelagaena la apimi
 po, ana kiela yuṃaena
 suṃaga 5:1—6:10

Visena maro 6:11-18

*Pol siar kiena visena pan
 la*

¹⁻² Inu Pol nesiri ṃaki
 nini piṃasu pan amiu, amiu
 ṗegas nen li nalelagaen
 lala garu laṗas nae Kalesia,
 a inu nemio kieta wolai
 lala nae e yo nini, imimi
 mepiun tan amiu mesape
 sanape amiu asuṃa pogaga
 pona amiu asike sanape?
 Inu nena nini naṗa Yesu
 Kristo, amio Ntewa Arimata,
 naṗa naga pisirlua sina ga
 Yesu e marena, lalua ne na
 nene lalua amligan inu nepe
 yaru nalologena, ana in na
 sanene, pe yaru re naṗa pio
 inu poli, a pe yaru re ṃena
 ga naṗa naga mligan lua inu
 sanene poli. Ee, amiu na
 monar ayagogon ya naṗa
 nevisawalia.

³ Inu sineun nesape
 Ntewa Arimata amio Suṗe
 Yesu Kristo, lalua amligan
 lemamiēna amio suṃare
 sike e amiu.

⁴ Yesu Kristo, naga kila
 mesmesu sa naṗa Ntewa Ari-
 mata naga sinenania, naṗa
 naga taṃan naga mare vena
 war plan kieta mlamulena
 viowa lala, vena kilia were-
 lua ita e mlamulena viowa
 naṗa tesike ea. ⁵ Vanon

sur ne na nene, ṗisi na ita
 teyeluar manene kia kiena
 ne Ntewa nene va metava
 silaga, vano vano taṗatete
 ṗisi. Sanene.

Lologena Wo, taaga ga

⁶ Inu nemilan amiu paṗisi,
 naṗa Ntewa naga pio amiu
 rui, a Kristo kila po pan
 amiu paṗisi rui, ana pe e
 re ga e pogos nene poli
 ana amiu asuṃa aṗure
 ke sina ga petan Ntewa,
 naṗa amiu asuṃa ataveve
 ke sina ga visena tai naṗa
 sane lologena wo taṗena tai.

⁷ Ana taṗatete si lologena
 wo taṗena tai ve sanene,
 komin naṗa lologena wo
 taaga ga nene naṗa sike
 na. Inu nemloge apisa
 sanini, vanon naṗa yar laṗas
 naṗa akila ke sinemiu la
 pilovilopuia, naṗa la sinelan
 avilopu lologena wo kiena
 ne Kristo imi ve taṗena.

⁸ Ana visae imimi yaru tai,
 pona navisi nae peni tai,
 pona a re ṃena ga, naṗa
 naga lologon nalologena wo
 tai, naṗa pe toroki re amio
 naṗa imimi mepisawal pan
 amiu sumo rui, ve sanene
 popon manene naṗa yaru
 nene akoven vitove e lele
 na logeen viowa. ⁹ Ee,

in na nevisawal ke sina
 ga nene, van amiu narui,
 nesape visae yaru ai naṗa
 pisawal visena na lologena
 wo taṗena tai pan amiu
 sumo rui, naṗa pe taṗenan
 lologena wo nene naṗa amiu
 amla ṗisi rui, ana ṗisi na
 yaru nene naga monar ala

nakoarena viowa vania e kapi.

¹⁰ In na nekilia nesape yaru laŕasia apisa kare inu yam mok rui, apisape in na sineun ga nesape yaru lala aloge wo e kiau visena lala, ana amiu amloge kiau visena m̄arera nene sanape? Pona yoko yaru laŕasia sinela kar inu yo, ana pogaga, komin naŕa ya ne in na sineunia, in na sineun ga nesape Ntewa, naga kekaran kiau visena, komin naŕa visae in nemlologon ga vena yaru la aieluar inu, ve sanene in na pe nepe yar lelaga na yuŕaena kiena ne re si Kristo poli narui.

Pol pisayu naŕa Ntewa pio naga

¹¹ Wolai lala amio vineu lala, popon nevisa meraravan van amiu, sane, lologena wo nene naŕa nepisawal ke ne, naga pe visena re tai naŕa yar la asiar poli. ¹² In na pe nemla re lologena wo nene tan yaru tai poli ana pe yar re tai naŕa pian inu e poli, peraga. Ana Yesu Kristo naga ga kipian ruru inu e lologena wo nene merarava.

¹³ Nanene na sa naŕa amiu amloge rui, naŕa kiau namalena nanua sumo na sanape, e pogos naŕa in na nesike loyur̄a e lotuena kiamimi imimi le Yu lala. E pogos nene, inu silaga sineu kari luen ga p̄egas nen nalelagaena lala kiena ne Yesu, ana nem̄ene la

nekila kare la naŕa pe nesitom la re nena poli, komin naŕa sineun nesape nalelagaena la ne sanene na monar toko ga. ¹⁴ E pogos nene, netaveve ruru p̄elaga na lotuena kiamimi imimi le Yu lala, taulu yaru taŕena lala naŕa imimi na sane teras taaga, a inu nepuarar visena marua lala kiena ne repimimi la m̄arera, naŕa kiamimi apua le Yu lala naŕa asum̄a ataveve pimi tol nanagane.

¹⁵ In na nekila ke sanene pano pano-o, ana inu pe nekilia re naŕa nesape Ntewa naga pisaar inu p̄isi rui, e pogos naŕa in na pe nepaeme re poli wa. Ana e ga e kiena lemamiena, naga pio inu vena neve kiena, a e kiena sitomena wo, ¹⁶ naga kila narina m̄alivin inu vena nevisu kilale naga, vena nevano nelologon Yesu nene van la naŕa pe ape Yu re poli. E pogos nene, ana pe nepa re nepisu yaru taŕena la p̄as poli vena nela nakiliaena laŕas tan la e lepas na lologena wo nene, ¹⁷ a pe nepa re m̄ena ma Yerusalem poli vena nevisu nalogena la naŕa la ape nalogena sumon inu vena neviun tan la nevisave “?Pisi na nelologon ya ne, pona nevisawal visena ve sanape?” Peraga, pe nepa nepiun re sanene poli, komin naŕa Kristo naga kila make sur la nene merarava pan inu p̄isi rui. E pogos nene in na nemligan

la vilaga, nepa perina pařisi e purvanua nařa Arepia, a siraunia neřasuře ke sina ga nepimi, nepa yalensilau ga nepa garu e pulkumali nařa Tařaskas. ¹⁸ Siraun nařa kas telu řarovia, ana e pogos ga nene narui in na nepa si ma Yerusalem. Nepa ma Yerusalem nepa nakaten Pita, ana pe nesu re nemio naga piavi poli, ana nesuřa nemio tol ga legiena lualima taaga pa lima. ¹⁹ A e pogos nene, in na pe nepisu re řena nalologena tařena lařas poli, ana nepisu ga kiela nasumonena naga taaga, nařa Semes nařa naga wenla kieta Suře. ²⁰ Naga nene narui, ya nařa nepisa ke pan amiu, naga lelaga pe nepisokan re nene poli, Suře kilia řaga.

²¹ Sanene narui, inu nesike ma Yerusalem pe piavi re nena poli, a siraun nene, inu nepa nemial vivia lepas lua nene nařa Seria amio Silisia, ²² kila sanene narui e pogos nene, nalelagaena lala nae ma e lepas tařena nařa Yutea, amio kana pulkumali keviu nena nařa Yerusalem, la nene pe akilia ruru inu re poli wa. ²³ La amloge ga ya nařa yaru la asuřa apisa ke, nařa apisape, "Yaru nene nanua sumo naga řene kare ita pařisi, naga suřa kilali nařa kila kare kieta nalelagaena, ana nanagane naga suřa mlologon ke řarera e kieta nale-

lagaena nene pařisi." ²⁴ A komin suri ne nanene, la asuřa amieluar Ntewa keviu nařa naga pilon kiau malena sanene. Ana la asuřa apisirilua kia kiena ne Suře vanon inu.

2

Nalologena tařena lala apiran ruru amio Pol

¹⁻² Siraun kas lualima taaga pa vari řarovia, ana Ntewa pisa pan inu sape monar neva si ma Yerusalem. Nemloge Suře pis sanene narui, ana imimi lua Panařas, imimi lua mepavini, a nepure řena Taetas pimi taveve imimi lua. Metol ma Yerusalem, ana metotano e viorena tai, memio nasumonena lala na suřare nařa la ga apimi loyuřa ea. E viorena nene, nepisawal visena lala nařa inu nemlologon ke pan yaru la nařa pe ape le Yu re la poli. Inu nepisayu ruru sur punu ga nařa nekila pan la, komin nařa pe sineun re nesape yoko la asitom avisave in na pe nemiyuřae mesmes re poli, ana pe pon re avisa kare kiau yuřaena imi tol pogos nini poli, ana kila sane kiau yuřaen nanene imi ve sur korena ke sina ga. ³ Sumo in na nomape pona řisi na la ařareran van inu, vena nevisa nevisave yar la nařa pe ape le Yu re poli la řena ga monar ave řaviu. ?Ana viorena nene pisa sur ya?

E lepas na kiau erau nene Taetas, naga pe nae re Yu poli, naga yaru nae Kris tai, naþa naga pe pe þaviu re poli, ana la pe apirurua re naga asape naga monar ve þaviu poli. ⁴ Ana e viorena, yaru laþas naþa sinelan asape Taetas naga monar ve þaviu, ana nepisu yaru la nene sa naþa la apisa apisape ape kieta wolai lala, ana la apisokan ga. La nene la apimi vinau ga loyuna e viorena vanon la sinelan ga visu imimiena, naþa imimi mepian ke mesape imimi mepimi mepe taaga memio Yesu Kristo rui, ana þelaga marua la nene pe piar imimi re si poli ana imimi moþisin rui. Ana la nene pe akekaran re nena kiamimi visena nene po, la sinelan asape akila navisaluaena la nene na lotuena kiena ne le Yu lala monar aviar punu ita mþaga. ⁵ Ana imimi pe metaþan re naþa la ato metavan imimi poli, vanon naþa imimi mesitom paþisi naþa mouarar ruru visena na lelagaena na lologena wo nene, vena þisi na amiu atol ruruia.

⁶ Ana e viorena la þasia naþa yeririna la apisape ape kiela nasumonena la asuma, ana inu pe nesitom re nesape la ape yerkawa pona la pe ape yerkawa re poli, nanene na pe pe sur re tai nene poli, vanon Ntewa naga sitom korena ga kia la ne sanene. Ana nasumonena ne la nanene, pe la apian inu re e sur viu tai poli

vena nelologonia. ⁷⁻⁸ Peraga, pe sa re nene poli. La apisu kilale ga asape Ntewa, naga e kiena puriukawa, naga mligan inu nepe yaru nalologena tai, vena inu nevisawal lologena wo van la naþa la pe ape le Yu re poli, sa naþa e kiena puriukawa mþena ga, naga mliganar Pita þisi rui, vena naga ve nalologena tai vena naga mþena ga visawal nalologena wo va le Yu lala. ⁹ Ana Semes amio Pita a Yoane, naþa yeririna lala la apisa apisape la telu nene la ape kiela nasumonena, la telu nene la apisu kilale naþa Ntewa naga mligan yumaena wo nene e luþau e kiena lemamiþa. Ana la telu nene la apim atalopan imimi lua Panaþas, sa naþa imimi mepe þegas taaga memio la, ana imimi punu ga metaþania vena imimi mevion yumaena lala, sa naþa sane imimi lua meva melologon e yo kiena ne yar la naþa la pe ape Yu re poli, a lala na yoko la alologon e yo kiena ne le Yu lala. ¹⁰ A la nene amla ga visena taaga ga pan imimi, asape imimi lua monar mesitomaþal kiela yar la naþa pe kiela sur re poli, vena meiila la, ana nanene, naga sur tai naþa e pogos nene in na nekekaran þisi rui vena neyumaen ve sanene.

Pol pis mþarera pa Pita vena visaluþar naga

¹¹ Siraun na nene, inu nepito ke sina ga nesike

garo e pulkumali nene Antiok, ana pogos naña Pita mñalivin imimi e yo nene, nesumalu e marana ne nalelagaena lala, nepisaluparia, vanon naña merarava ruru nena po naña ya ne naga kila, ana pe mesmesu re poli. ¹² Nanua sumo, Pita kila mesmes ga naña naga sumo kinana ke ga amio kieta wolai lala naña la pe ape le Yu re poli, ana sir-aunia, Semes mligan kiena yeririna la pñasia apim gar Yerusalem, ana la apis pa Pita, apisa apisape “La naña pe ape le Yu re poli, la mñena ga monar ave pñaviu, ana visae peraga, Ntewa naga tañatete tamalia la.” Visena nene naga pe taveve re nena ya naña viorena keviu naga pisa pñesan poli, ana kila kare sitomena kiena ne Pita kila naga marau, ana naga pe kekaran re si su lele taaga amio nalelagaena la nene naña la pe ape pñaviu re poli. ¹³ A pe Pita re ga naga taaga poli, ana kieta wolai mñena la nae e yo nene, naña la ape le Yu, pimi tol mñena ga Panañas, la nene ataveve mñena Pita e sitomena na maraena nene. ¹⁴ Ana pogos naña nepisu la nene asuñña amial ke e mrapa tai naña pe mesmesu re amio ya naña lologena wo pisa poli, inu nepis mñarera pa Pita e marala, ne pisa sanini nepisape “Pita, lelaga kemua naña ko ope le Yu tai, ana po pañisi ana ko osuñña naña nanua

sumo rui, naña okekaran mñena ga pñelaga kiena ne yar tañena la rui, naña ko okinana ga lele taaga amio la pñisi rui. ?Ana sanapen nana-gane narui, naña ko osape oñareran ke sina ga la nene naña la pe ape le Yu re poli opisape la monar ataveve kieta pñelaga ita le Yu lala, naña opisape la mñena ga la monar ave pñaviu ve sa ke ga ita?”

Yaru ai naña piawa e Yesu, Ntewa tamalia naga

¹⁵ A e pogos nene, in na nepisa ruru pan la sanene nepisape, “Ita punu ga na, ita tepe lus kemua kiena ne le Yu lala. Ita na pe tepe yaru tañena re la poli, sane la naña le Yu la moki asitom asape ape kororaki ga.” ¹⁶ Peraga, ita tepe le Yu kemua lelaga, ana nana-gane, ita tekilia rui, sa naña yaru tañatete mesmesu amio Ntewa, vanon naña naga suñña taveve ruru ke ga navisaluena kiena ne Mosis. Yaru ga naña naga mlalaga e Yesu Kristo, naga ga kilia mesmesu amio Ntewa. Sitomena nena nene narui kila ita le Yu lala ita mñena ga monar telelaga ga e Yesu vena ita mñena ga temesmesu temio Ntewa. Ana amiu monar akilia ruru visena nene naña Visena Wa kiena ne Ntewa pisa, naña pisa pisape pe yaru re tai naña naga kilia mesmesu amio Ntewa poli vanon naña naga suñña

taveve ruru ke navisaluaena nene.

¹⁷ Ana ita le Yu lala, ita tesitom ke tesape temesmesu temio Ntewa narui, ana pe sa re nene poli. Ana visave lelaga kemua naña ita tepe le Yu mēna ga, ita monar telelaga ga e Yesu Kristo vena ita temesmesu temio Ntewa, in na nesitom nesape pona yaru lañasia amloge piowagan visena nene, pona la apisali naña apisape visena nene kila sane ita le Yu lala ita tepimi tepe yaru lala na mlamulena viowa maran taaga ga temio la naña pe ape le Yu re poli. Ana pona akilali mēna ga naña apisape ve sanene, nanene naga kana kinasia sane Kristo ke nene narui naga kila ita le Yu lala ita tepimi tepe yaru na mlamulena viowa ga. Ana peraga, pe sa re nena nene poli. ¹⁸ Nanene vanon nanua sumo, in na nesuñia nekilaroro ke ðelaga marua lala navisaluaena nene rui, ana visae nagane nevisirlua ke sina ga ðelaga na taveveen navisaluaena nene, naña nesape ita monar teve ðaviu a ita monar tekila ve sanene vena ita temesmesu temio Ntewa, naga nene kila sane nanua sumo in mēna ga nepe yar na kilaroen navisaluaena narui. ¹⁹ Lelaga, Navisaluaena nene naga sinenan pisape kila inu nemare, vanon naña nekilaroro ke navisaluaena lala. Ana nanagane Navisaluaena nene naga sa ga sur mare ga

tai e inu, inu neñisin naga rui. Nemligan Navisaluaena nene rui, vena kiau malena su ga e Ntewa narui. Sa naña asuar inu e laki torovia nemio Yesu, nemare nemio naga, ²⁰ a nanagane sa ga naña pe in re si naña nemal ke ne poli, ana Kristo na mal ke e inu. A kiau malena nanagane, naga komin naña nepiawa ke e Narina Ntewa, naña naga sitom inu pañisi, naga tañan kiena malena, naga mare wo inu. ²¹ E ðelaga nene, tepisu naña lemamiēna kiena ne Ntewa keviu pañisi, ana in na tañatete naña nekila kiena lemamiēna imi ve sur korena tai, komin naña visae yar tai kilia mesmesu kemua amio Ntewa vanon taveve navisaluaena, nanene sane Kristo mare kemua na pe suri korena ga.

3

Le Kalesia lala akilalu mrapa

¹ In na nepisu amiu le Kalesia lala sa ga naña ðarimiu pe wowe pa rui. ? Pona yaru lañasia akila male e amiu yo, ana nane amiu apa akila pal mrapa sanene? Inu nepisawal ruru merarava e maramiu ðisi rui, sanape naña Yesu Kristo mare e laki torovia, a nanagane narui amiu apano ape tañena narui. ² In na sineun nesape neviun naviunena tai van amiu sumo wa. Naviunena ne sanini, sape “? Amiu nene, naña amla

Ninuna Wa nanua sumo rui, Ntewa mla pan amiu vanon ya? ?Amiu amlavia komin naþa amiu amlogear navisaluaena la nene kiena ne Mosis?" Peraga, amiu amlavia komin naþa amloge nalologena wo, ana asumã amlalaga ea. ³ Sumo, amiu asiar malena viu amio Kristo e namareraena na Ninuna ne Ntewa, a nanagane asitom asape apisin ga e kiamiu namareraena ga? ! Taþatete ve sanene, peraga! !Amiu asumã apa ape wowe la narui! ⁴⁻⁵ E kiamiu namalena viu nene, suri wo la moki naþa pimi ñalivi e amiu rui, sa naþa Ntewa naga mla ke kiena ninuna pan amiu, a naga sumã kila ke kile lala e maramiu, ana sanape, pona amiu na pe apisu kilale re poli yo wa sa naþa sur la nene apimi e amiu komin ya. Amiu monar akilia ruru sa naþa Ntewa naga kila ke sanene, pe komin re naþa amiu amlogear ke navisaluaena nene poli, ana komin naþa amiu amloge ga lologena wo, ana amiu amlelaga ea.

?Ya ne po? Navisaluaena, pona naviawaena e Kristo?

⁶ Amiu asitom li yermarua Epraam, naþa Visena Wa kiena ne Ntewa pisayu naga, pisape

"Vanon naga piawa e Ntewa, ana kila naga mesmesu amio Ntewa." Nas 15:6

⁷ Ana yaru taþena la naþa apimi sirau naþa la aþasine Ntewa sanene, la ape lus kiena ne yermarua Epraam kemua la lelaga.

⁸ Ita tekilia tevisu e Visena Wa naþa lologena wo nene naþa ita tesumã temlelaga ke e nanagane, Ntewa naga pisawal nanua sumo sumo la rui, pogos naþa pisa pa Epraam pisa pisape

"E ko þisi na Suþe kilia visa ruru lus kiena ne yeririna lala na yomarava nini."

Taveve visena nene, Visena Wa kiena ne Ntewa pisaar mēna ga rui pisape þisi na Ntewa kilia kila yaru lala naþa pe ape le Yu re poli a mesmesu amio naga, visave apiawa e naga. ⁹ Ana la naþa la apiawa ke e naga sanene, ana kana kinasa sa naþa Ntewa naga pisa ruru la ke nanagane, sa naþa naga pisa ruru Epraam sumo, komin naþa naga piawa e Ntewa.

¹⁰ Ana la naþa asitom ke asape yoko akilia atol malena komin naþa la asumã akilali ke naþa alogear navisaluaena lala, la nene la asike vatanon nalipereen tai rui, komin naþa pe yaru re tai naþa mlogear make navisaluaena la nene poli, a Visena Wa kiena ne Ntewa pisa pisape,

"Yaru la naþa la pe amlogear re sur la punu ga naþa

asike e tusi navisaluaena poli, la monar atol nakoarena."

¹¹ Sanene narui ana merarava ruru pan ita naña yaru tařatete imi mesmesu amio Ntewa komin naña naga logear ga navisaluaena nene ana sa naña Visena Wa kiena ne Ntewa naga pisa naña pisa pisape

"Yaru naña naga mesmesu amio Ntewa komin naña naga piawa e Ntewa, naga ga kilia mali."

¹² Visena ne na nene naga pisayu řelaga naviawaena, a ita tekilia tevisu naña řelaga kiena ne naviawaena nene amio řelaga na nalogearena e navisaluaena, lalua pe maran taaga re nenaga. Nanene komin naña řelaga na logearena Navisaluaena, naga suřalu se lepas na suri la punu ga naña yaru ga kilia kila sa naña visena wa pisa, naña pisape yaru ga naña kila punu sur la naña navisaluaena pisa, naga kilia tol malena ea.

¹³ Ana komin naña ita na pe yaru re tai naña naga kila punu sur la naña navisaluaena nene pisa poli, ana Navisaluaena nene naga pisaar nakoarena amio marena pan ita punu ga. Ana Kristo naga pitomi narui, řurelua ita e naliřereena nene, tařan naga kus leleta, ana naga pa sike vatanon naliřereena nene, naga nene na sa naña Visena Wa pisa, naña pisape

"Yaru naña apiar naga atelania mon metava e purlaki, vena mare komin naña naga sike vatanon e naliřereena kiena ne Ntewa."

¹⁴ Kristo tařan naga sanene, vena la naña pe ape le Yu re poli, la řena ga akilia atol navisa ruruena la nene naña Ntewa naga pisaar pan Epraam, ana suri nena nene kila sane nanagane ita naña tepiawa řarera e Kristo, ita tekilia tela Ninuna Wa nene naña Ntewa pisaaria pisape la van yeririna lala.

Navisaarena pimi sumo, Navisaluaena naga pimi sirau

¹⁵ Wolai lala a vineu lala. Yoko nevisa suniena tai e ga e kieta malena naña kana kinasa pa lavisin ga navisaarena nene kiena ne Ntewa naña pa Epraam. Visae yaru tai visawal maron kiena visena, visave pogos naña nemare, yoko kiau sur lala naga monar ve sa nene ve sa nene, ana naga siriar kiena navisaarena nene siķe e řaki tai, ana pogos naña visave naga kovio, la tařatete avilopu kiena navisaarena nene.

¹⁶ Pogaga, ana sanene, Ntewa kila kiena navisaarena pa Epraam, a e kiena lusia. Ana e visen nene pe pisa re pisape Ntewa naga kila kiena visaarena e "Lus kiena ne Epraam la poli," naña kana kinasa sane yeririna moki, naga pisa sanini, pisape "E

kiena lus tai,” naŕa naga pisa sane yaru taaga ga, a yaru nane, naga Kristo.

¹⁷ Kiau visena e lepas nene kana kinas sanini nanua sumo Ntewa naga pranaria amio Epraam, a Ntewa pisaar pisape uarar kiena naviranarena lalua nene marera. Ana siraunia kas ponotia vari lualima yam telu parovia pisi rui, ana navisaluena kiena ne Mosis pimi malivi ana navisaluena nene naga tapatete kilaro naviranarena nene naŕa sike pa rui, tapatete si kilia yumulua naviranarena kiena ne Ntewa. ¹⁸ Ana visae ita tekilia tetol navisa ruruena lala kiena ne Ntewa komin naŕa ita tesuŕa tetaveve ke ga Navisaluena nene, naŕa naga pe sur tai naŕa pimi ga sirau, nanene naga kana kinasa sa naŕa navisaarena kiena ne Ntewa nene naŕa su la nanua sumo rui, naga pimi korena ga. Ana ita tepisu naŕa Epraam naga tol navisa ruruena lala kiena ne Ntewa nene, komin ga naŕa naga puarar ruru navisaarena kiena ne Ntewa, pe komin re Navisaluena poli, komin e kiena pogosia, Navisaluena pe pimi malivi re poli wa.

Navisaluena naga kiena yuŕaena suŕa ga

¹⁹ Poga, ana pona kana naviunena toŕa ga, naŕa pisa pisape “? Ve sanene, Ntewa mligan Navisaluena kiena ne Mosis nene pe na ya pona komin ya?”

Pogaga, nevisa van amiu narui, sanini, Suŕe naga mligan ke sina ga Navisaluena nene to metavan kiena naviranarena, vena iila ita yeririna lala tekilia tevisu kilale kieta mlamulena viowa lala. Ntewa mligan navisaluena nene vena suŕalu su maga, vano vano tol pogos naŕa yar nene naŕa pe lus kiena ne Epraam, naŕa Ntewa pisaar pan imimi pimi malivin ita.

Ana ita tepisu naŕa Navisaluena naga kiena yuŕaena wo tanea toŕa ga. Ana ita monar tesitoŕalia sane Navisaluena nene, pogos naŕa pimi malivi, kom pesan puna ne navisi kiena ne Ntewa lala, siraunia amla pan yaru tai, naŕa Mosis, ana naga mla pimi mla pan yeririna lala. Ana pogos naŕa Ntewa naga kila naviranarena nene amio Epraam, nanene na pe sa re nene poli. ²⁰ Ana pogos naŕa lalua nene apiran ruru ke kiela visena lele taaga, ana pe navisi re poli pona yaru tapena naŕa suŕa likan lalua vena la visena, ana Ntewa naga ga taaga naga pisawal kiena navisaarena nene mesmesu e marana ne Epraam.

²¹ A nanene naga pe sa re naŕa asape Navisaluena nene kilali naŕa kalwo navisaarena kiena ne Suŕe poli, peraga. Komin naŕa visae Suŕe naga kilia la si navisaluena tapena naŕa visae ita telogear make ga

ana kilia kila ita temali, pona naga mligan navisaluaena nene pimi yo rui vena ita tekilia temesmesu temio naga. ²² Ana pe sur tai sa re sanene poli, komin naña Visena Wa pisa p̄isi rui pisape ita punu ga tesike vatanon nam̄areraena na mlamulena viowa, ita tesuñā tekilaro ke ga navisaluaena lala. Ana navisa ruruena naña Ntewa pisaar pisape yoko ligan imi, la akilia aimi la añalivi e ita komin ga naña ita tepiawa ke e Yesu Kristo.

Pogos na wasineen Kristo pimi m̄alivi rui

²³ Sumo rui, pimi tol nanagane tekilia tepiawa e Kristo, navisaluaena kiena ne Mošis nene piar ita m̄arera pa p̄isi, sa ga naña tesike e yuñā na koena rui. ²⁴ Navisaluaena nene, naga sane pisur ita, sa ga kieta navianena tai, pimi tol pogos naña Kristo pimi, vena e pogos nene, ita tekilia teviawa e naga narui ana tekilia temesmesu temio Ntewa. ²⁵ Ana nanagane, Navisaluaena nene taṭatete si kilia visuar ita, komin naña pogos na viawaena e Kristo naga pimi n̄alivi p̄isi rui.

Amiu punu ga ave taaga e Kristo narui

²⁶ Ana komin naña amiu apiawa e Kristo Yesu, ana amiu punu ga amio Kristo ape narina ne Ntewa. ²⁷ Akee amiu p̄isi rui, ana amiu apimi ape taaga

amio naga, sa naña amiu akus p̄elaga wo kiena ne Kristo lala e amiu, sa naña amiu amien kulgota lala e yepemiu. ²⁸ Nanagane amiu punu ga apimi ape taaga ga e Kristo Yesu, suri ne na nene narui, amiu punu ga atorok ga. Popon ita monar ve teliṭere re si yaru lala, tevisave nanene pe Yu, a nanene pe yaru nae ga lele taṭena, pona tevisave nanene pe yerkaawa, a nene naga pe yar nayuñāena ga, pona sane nanene pe yermene, ana nanene naga pe sira ga. Ana p̄elaga nene monar ve to re si e amiu. ²⁹ A komin naña amiu ape kiena ne Kristo sanene, amiu ke la nanene narui amiu ape lus kiena ne Epraam kemua lelaga, a ve sanene, navisa ruruena lala naña Ntewa naga pisaaria pa lus lala kiena ne Epraam, p̄isi na amiu ke narui amiu akusia.

4

Ita tepe narina ne Ntewa

¹ Ana p̄isi na nevisa re laa e kieta p̄elaga nene sane vena nevisa ruru laa merarava sane e lepas nen Navisaluaena nene. Visae yaru tai, ana naga mare, p̄isi na narina naga kus kiena suri lala. Ana visave nisisi nene vitokaki ke ga wa, p̄isi na naga taṭatete kilia visuar sur la nene. Naga sa ga yaru na yuñāena kiena ne ariman ga, ² naña p̄isi na naga monar suñā ga vatano

e liman yaru tařena ga lala, sane arimana tařena la nene, vano vano tol mesmesun nena pogos nařa arimana naga pisawal sumo rui, pisape naga kilia uarar sur la nene e pog nene. ³ E mřena ga e ita sanene, nařa sumo, ita na sa ga nisisi, nařa ita kieta sitomena lala sike ga vatano e yermare lala na sumo na yomarava nini. ⁴ Ana pimi tol ruru kana pogos nena, Ntewa naga mligan narina pimi, nařa sira tai naga řaria, paeme e yomarava nini, nařa naga paeme vatano e Navisaluaena kiena ne le Yu lala. ⁵ Naga paeme vatanon Navisaluaena nene, kapur ea, vena naga kilia wereplan imimi la nařa la asike vatano e Navisaluaena nene rui, vena Ntewa kuslua ita, teimi teve narina lala.

⁶ Ana nanagane, sa nařa ita tepim tepe narina lala, naga mligan Ninuna kiena ne narina pimi e losineta lala, nařa kila ita tekilia tevio Ntewa, tevisave "Ata Ata." ⁷ Komin sur ne nanene, amiu na pe sa re si yar na yuřaena ga la poli, ana amiu na ape narin Ntewa kemua lelaga, nařa řisi na naga la suri wo van amiu sa nařa naga pisaar pa narina lala pisape řisi na la akusia.

Pol sinena mie le Kalesia lala

⁸ Nanua sumo, pogos nařa amiu pe akilia re Ntewa poli wa, amiu asike ga

vatanon namřaraena kiena ne yermare la nene nařa pe ape Ntewa re nenaga, ⁹ ana nanagane, amiu akilia Ntewa řisi rui, pona popon nevisa nevisave nanagane, Ntewa kilia amiu rui. Ana inu sineun nesape neviun tan amiu, nesape komin ya ne amiu sinemiun awasuře sina ga ava puna ne yermare la nene nanua sumo, nařa la pe amřara re poli, a nařa la tařatete akilia akila wo van amiu pogos tai? ?Vanon ya ne amiu sinemiun asape asu ke sina ga vatanon kiela namřaraena? ¹⁰ ?Sanape na amiu asuřa asitomřal ke legiena wa lala kiena ne la nene, a kiela kupario wa lala, a kiela pogos wa lala, a kiela kař wa sanene? Asitom asape řisi na Suře kekaran amiu vanonia? ¹¹ !Aulai, akila inu nemaraun amiu pařisi! !Pona nemiyuřae mřaraena pan amiu pařisi ana nepisu sane pe sur korena ga!

¹²⁻¹³ Wolai lala a vineu lala, nanua sumo kam na pe asu re vatanon navisaluaena poli, ana pogos nařa nepim nesike nemio amiu, in na nekila inu mřena ga nesa ga amiu. Ana nanagane, nemloge asape amiu sinemiun asape awasuře si ava e řelaga na navisaluaena nene, a vanon sur ne nanene nepiun mřaran tan amiu vena amiu na aimi ve sa ga in narui, nařa in na pe nesu re si vatanon Navisaluaena nene poli. Amiu

asitomāli pogos naṣa in na nemlologo pan amiu sumo, naṣa kiau maiena ga kila narui nomāl pulmas naṣa nesike nemio amiu, ana pe sur korena ga naṣa nemaī e pogos nene, ana amiu na pe akila re nemloge piowa poli.

¹⁴ Peraga, ana kiau maiena nene kila kare amiu keviu wa, ana amiu pe amloge re piowa e inu poli, a pe asitom re mēna piowa e inu poli, peraga. Amiu aṣure inu nepa e māmīu yuṁa lala, sa naṣa visave in na neve navisi kiena ne Suṣe tai, pona sa ga in na Yesu Kristo lelaga.

¹⁵ Sumo, amiu akekarān inu paṣisi, naṣa nepisu sa naṣa visave amiu akilia akila, pona amiu akekarān naṣa aurelua kilamaramiu vena aligan te kilamarau, vena iila inu. ?Ana sanape nana-gane narui? ¹⁶ Pona nena-gane, kiau visena lelaga la nene, akila inu nepimi sane kiamiu erau viowa sina. ?Ana ya ne sanene?

¹⁷ Yaru taṣena la nene naṣa nemloge apisape la asike amio amiu nanagane, ana la nene asuṁa apilonvilon ke lologena wo kiena ne Kristo, la apimi asuṁa veraga amio amiu vena ave erau wo amio amiu, vena akila amiu asu vatanon la, ana nanene la akila kotalia amiu ga ne. Komin naṣa la sinelan asape aure lua amiu ga vetan inu. ¹⁸ Ana pe nepisa re nesape vena in ga taaga ga nekilia nesuṁa nemio amiu

poli, vena in ga taaga teve erau wo, komin naṣa ṣelaga nene naṣa na erau wo amio yaru taṣena, naga wo silaga, ana popon sane nakilaen ga yuṁaena wo lala.

¹⁹ Naruu lala, inu na sane sira tai naṣa mēṣena mlaea vena war sisi, sa naṣa nesuṁa nemloge piowa paṣisi vanon amiu, nesuṁa nemiyuṁae mārera pan amiu paṣisi vena amiu ala Kristo amio kiena ṣelaga wo lala e kiamiu malena. ²⁰ Aulai, visae nesuṁa nemio amiu nanagane, nanene na kila inu neloge wo paṣisi. Visae ve sanene, ṣisi na nekilia nevilon li laa kiau visena vito tano sane, ana nana-gane naṣa nesike perinan amiu sanene, inu pe nekilia re si po la rui sane aṁa sanapen amiu narui.

Suniena kiena Eka amio Serai

²¹ Amiu laṣas naṣa sinelan asape ita na monar telogear kieta Navisaluaena vena ita ve sa ke Ntewa, inu sineun nesape la avisataṁe kiau naviunena tai, sape “?Navisaluaena naṣa apisayuia, la asuṁa amloge kilale ke ya naṣa Navisaluaena nene pisa pona pe apisu kilale re poli?” ²² Visena wa nene pisayu ke yermarua Epraam nene, naṣa naga narina na yermēne lua, naṣa tai, sira naṣa miyuṁae kiena ne wona naṣa Eka naga ṣaria, a narin taṣena tai naga wona ruru napo naṣa Sera naga ṣar maronia.

23 Naga naþa paeme sirau, kiena kia Aisak, naga paeme komin naþa Ntewa pisaaria, a naþa naga paeme sumo, kiena kia Ismael, naþa sira na yuþaena nene naga þaria, naga paeme ga sa ga nene.

24-25 Ana ita tekilia teþa suniena nene sa naþa þakaiwa tai, naþa sira la lua nene, lalua na sa naþa naviranarena lua naþa Ntewa naga kila. Sira naþa Eka naga sa ga naviranarena naþa Ntewa kila e tavie keviu nae Sinae, nanene na e purvanua naþa Arepia, yo ne nanene naþa Ntewa mla Navisaluaena nene pa Mosis ea. Eka nene, naga pe sira na yuþaena ga tai, a narina mþena ga lala la ape yaru na yuþaena ke mþena ga lala. Sanene, Eka mþena ga naga na sa mþena ga pulkumali keviu naþa Yerusalem, naþa kana yaru ne lala apuarar Navisaluaena lala mþarera, ana la sa naþa ape yaru na yuþaena ke mþena ga, komin naþa la asike vatanon navisaluaena nene narui.

26 Ana sira taþena nene, naþa Sera, pe yaru re tai naþa þuarar e yuþaena poli, naga ga, a naga nene naga sane Yerusalem taþena nene, naþa pe Yerusalem nae ma e peni. A narina ne Sera lala, la mþena ga la pe yaru re tai naþa þuarar la vena ayuþae poli ana la mþena ga asuþa ga sanene, kila sane Sera nene sane aneta naþa ita tepiawa e Kristo. 27 Visena Wa pisayu

li mþa sur la nene naþa pisa pisape,

“Sira nene, ko naþa sumo na ko ope luþalumþa ga, naþa mopomþa pe mlaeli re pogos tai poli vena waren sisi,

nanagane ko omloge po, ko okekara ko omiau,

komin naþa woþa na yermþene mligan ko rui ana nanagane narumþa lala apimi ape moki la narui, ataulu la naþa sira naþa wona suþa amio naga silaga naga þar la.” Ais 54:1

28 Visena nene naga sa naþa Ntewa naga pisaaria pisape yoko narina la ve moki, na ve moki a amiu kiau wolai lala a vineu lala, ita ke ga na ita tepe narina ne navisaarena kiena ne Ntewa nene narui, sa ke ga naþa kiena navisaarena nanua sumo naþa kila Sera þar narina naþa Aisak.

29 Ana pogos naþa Aisak paeme sumo, sisi taþena nene naþa Ismael naga paeme sa ga nene, naga suþa mþene nisisi nene naþa Aisak naþa naga paeme e yuþaena na Ninuna Wa kiena ne Ntewa. Ana pimi tol nanagane, tepisu þelaga sa ke ga nene na wa. 30 ?

Ana Visena Wa pisa sanape? Naga pisape Ntewa pisi pa Epraam, pisa pisape “Ko monar okuwanlua sira naþa naga pe sira na yuþaena ga nene amio narina, komin naþa narina nene, naga pe torokin re si naþa la sur tai

e kioma sur la poli. Sur la punu ga monar va ga e limana narina naŭa sira naŭa naga ga naŭa woma naapo.”

³¹ Poga, erau lala, Ntewa pisa sanini, a inu nevisa van amiu nagane nesape ita nini, ita pe tesa re narina ne sira naŭa na yumaena poli, naŭa ita tesike vatano e Navisaluaena kiena ne Mosis, ana peraga, ita na sane tepe narina ne sira naŭa naga suma ga sanene, sa naŭa sane ita na temlelaga ga e Yesu. A sur la naŭa Ntewa naga pisaar pa narina na lelaga lala, ŭisi na ita ke ga na yokorena tokus narui.

5

Yesu pure plan pa nalelagaena la rui

¹ Pogos naŭa Kristo ŭirelua ita, naga kila sanene vena tomolue, naŭa ita tomolue lue, ana vena ita ve towasuŭe ita re si teva tesuma vatanon Navisaluaena kiena ne Mosis nene poli. Ve sanene, monar aviawa marera, vena ve amareran amiu re si sa naŭa amiu na sa ga yaru na yumaen lala, naŭa Navisaluaena nene piar manene ruru amiu ke sina ga.

² Amiu na ayagogo ruru e visena nene naŭa inu Pol nesuma nepisa ke pan amiu. Visae amiu ataman la amareran amiu avisave amiu ave paviu, ŭisi na yumaena nene naŭa Kristo naga kila ŭisi rui taŭatete

iila amiu. ³ Ee, nepisa ke sina ga visena marera nene pan amiu, nepisape visae yaru naŭa taman naga ve paviu, naga ga suma mligan ke sina ga naga sike vatano e Navisaluaena nene. A yaru naŭa sike vatanon Navisaluaena sanene, naga monar visuar ruru naga naŭa naga lo-gear sur punu ga naŭa Navisaluaena nene naga pisa, visae peraga, yoko naga tol nakoena. ⁴ Amiu la pasia nene naŭa suma akilali naŭa alogear Navisaluaena nene rui, vena amesmesu amio Ntewa vanonia, amiu la nene suma ate plan amiu ke e Yesu rui, amiu apilon masimiu rui e lemamiena kiena ne Ntewa. ⁵ Ana ita na, ita tesuma sinetan manene tesape ŭisi na Suŭe kila ita temesmesu ruru temio naga, komin ga naŭa ita tepiawa ga e naga, a pogos naŭa ita tesumate ke ga wa, Ninuna Wa naga suma miila ita temlelaga marera, tesape ŭisi na Suŭe naga monar kila sanene van ita. ⁶ Pogos naŭa ita tepimi tepe taaga temio Kristo Yesu sanene pe sur korena ga naŭa yaru naga pe paviu pona pe pe paviu re poli, ana sur keviu na e lepas nene nane kieta naviawaena e Kristo naŭa naviawaena nene naga kila ita tesitom Suŭe, a ita tesitom mena ga yeririna taŭena lala.

⁷⁻⁸ Sumo na nepisu amiu akiriri na po paŭisi wa, ana nanagane, pe sa re si nene poli. Suŭe naga pio amiu

sumo p̄isi rui, ana sineun neviun nevisave yeririna ai nene naṗa naga suwo amiu sina ga, naga kila amiu pe amlelaga re si e visena lelaga poli? !Pe Ntewa re nena poli! ⁹ Navianena viowa nene naṗa kila kare ki-amiu sitomena naga sa naṗa visena pisa pisape “Narin korme ga, ana naga kilia kila kare kilam̄iu la melkal-ka vaṗisi.” ¹⁰ Ana sa naṗa amiu amio inu, ita tepimi tepe taaga e Ntewa, nesum̄a nemlelaga m̄arera ke e amiu na wa sa naṗa p̄isi na ita kieta sitomena ve taaga, sa naṗa ita ve tom̄areran re si li na lelagaena lala naṗa la pe ape Yu re poli tevisave la monar ave p̄aviu. A nemlelaga m̄ena ga m̄arera ke ga wa nesape yeririna nene naṗa sum̄a kila kare amiu ke sanene pe sur korena ga naṗa naga pe yeririna ya, p̄isi na Suṗe naga la nakoena vania.

¹¹ Puruṗi lala a vineu lala. Visena laṗasia pisa ke pisape inu m̄ena ga nesum̄a nemlologon ke ga wa nesape li nalelagaena m̄ena ga lala monar ave p̄aviu vena Ntewa kilia tamalia la, ana visena nene pe pe lelaga re poli. Visae nelologon ve sanene p̄isi na yeririna la nene naṗa asike amio amiu akekan in ga. Ana amiu apisu ke ne, la asum̄a sinela karin ke na wa, komin naṗa kiau navisawalena e laki torovia naga sum̄a yumulua kiela sitom-

ena lala. ¹² Inu na nesitom ke nesape yar la nene naṗa la asum̄a apilovilopu amiu ke sanene, akila ke sine-miu kurkur naṗa la sinelan manene asape monar ave p̄aviu, popon ala playu ana asila ke sina ga, akila kare rurula ke sina ga.

¹³ Ana amiu naṗa kiau erau lala, lelaga paṗisi naṗa Suṗe pure lua amiu rui, amiu pe asu re si vatano e Navisaluaena kiena ne Mosis la nene poli. Ana maram̄e amiu, avisuar ruru amiu, ve asitom re avisave, “Pogaga nene narui, in na nomolue e navisaluaena nene rui, inu ga taaga narui. Pisi na nekilia nekila sur punu ga naṗa kiau sitomena sinenan narui.” Amiu ve avisa re sanene, ana p̄isi na kiamiu sitomen wo naga monar kila amiu akekan naṗa aiila yeririna taṗena.

¹⁴ Pelaga na sanene naga taveve ruru visena tai naṗa Navisaluaena naga pisa, naṗa naga kalo ruru visena taṗena lala e Navisaluaena nene, naṗa pisa pisape, “Ko ositom nalavis pum̄a lala, akila wo van la, ve sa ke naṗa ko ositom ko m̄aga.” ¹⁵ Ana visae amiu ave sa suri mali tetan lala, naṗa amiu ga agorua amiu, ana amiu ga asum̄a akarkare amiu sanene, ana monar avisuar ruru amiu, p̄isi na p̄elaga nene naga kila kare punu amiu ke sina ga.

*Pelaga kiena ne Ninuna
Wa amio p̄elaga kiena ne*

yeririna

16 Inu sineun nesape nevisa visena nene van amiu. Amiu nene na Ninuna Wa naga monar sumon amiu, amiu na ve ataveve re si kiamiu þelaga marua naþa apaeme amio.

17 Vanon þelaga nene naþa ita tepaeme temio, naga pe sinenan re þelaga kiena ne Ninuna Wa poli, a þelaga kiena ne Ninuna Wa naga pe kekaran re þelaga nene naþa ita tepaeme temio poli. Suri nene naga sa naþa þelaga la lua nene sane la lua ape nasinekar la ga, ana sur ne na nene narui, visae Ninuna Wa sumã sumon amiu, taþatete si amiu akilia akila ga ya naþa kiamiu sitomena sinenania. 18 Ana amiu monar ve sinemiu þesan re m̃ena ga naþa visae Ninuna Wa naga sumã sumon amiu, ana amiu ve asu re si vatano e Navisaluaena nene narui.

19 Yumãena la na þelaga nene naþa yeririna lala la apaeme amio naga merarava ruru ga. Yumãena la nene la ne nanene narui sa naþa nataþaen lau, a sur la naþa namawaena, a þelaga namname ga lala, 20 amio nalotunen nono lala, amio nawarena kimi. Amio m̃ena ga, nagorualaena lala, nama-raena lala, navielueena lala, nasinekarena lala, napuluviseena lala, nalilipereena lala, nakaween yaru lala, 21 a nasinesuniena lala, amio namunen wii keviu, a namãagena viowa lala, amio

m̃ena sur taþena la sanene. Ana nevisawal sina ga van amiu, sa naþa nepisawal pan amiu sumo rui, nesape amiu avisuaria vanon yaru naþa sumã kila ke þelaga la sa nene, þisi na naga taþatete su e nasuþenena kien Suþe pogos tai.

22 Ana mras naþa Ninuna Wa kila pitovi e malena kiena ne yeririna naga sane: nasitomiena, a nakekarena, a nasumãareena, a namalumenena, a nasinewoena, a nawoena, a nayepemãena, 23 a navatanoena, a nawanaren sine. Pelaga la nene na po paþisi, a pe visena navisaluaena re tai naþa pisa luþar amiu pisape amiu ve akila re si suri la nene. 24 Ana þelaga naþa ita tepaeme temio, amio kiena nasinenanena viowa la nene, ita tesuaria e laki torovia þisi rui. Nanene, ita naþa tepe kiena Kristo Yesu, ita temligan sur la nene þisi rui.

25 Ana komin naþa ita temali e Ninuna Wa, popon ita teyali m̃ena ga e kiena þelaga wo lala. 26 Pe pon re towarwar ita poli, pona ita ga tekilaweke ke sina ga naþa sineta mimi, pona ita ga tesumã tepieluen ita ke sina ga.

6

Amiu punu ga monar aiila amiu

1 Kiau wolai lala a vineu lala, visae amiu yar tai naga

loru e mlamulena viowa, pon amiu naña Ninuna ne Ntewa teke e amiu, amiu monar aiila naga vena akila ruru ke sina ga naga. Ana amiu monar avis malumu ga vania, sa naña amiu sinemiu miye naga, a amiu monar avisuar ruru amiu mēna ga, vena sur naña amiu akila ruru yaru tañena nene vanonia ve imi kila li amiu re mēna ga. ² Amiu na monar aiila amiu ve sa nene narui vena akuspae ga naurmiena kiena ne amiu tañena lala. Ve sanene sane amiu asuñña amlogear ke ya naña navisaluaena kiena Kristo naga pisa ke narui. ³ Ana tañatete si avilave van amiu, sa naña yaru tai suñña sitom ke naga pisape “In na yar tai nini.” Visae ve sanene yaru nene naga suñña pisa kotalia ke sina ga naga ne, komin naña naga pe pisu kilia re sape naga pe pe yaru re tai nene poli. ⁴⁻⁵ Ana amiu punu ga monar amiu veve taaga avisu veve ruruli kiamiu yuññaena lala naña akila. Visae sanene, yaru tai tañatete kilali visu veveli sa naña kiena yuññaena po taulu yar tañena lala, ana naga monar visu veve kiena yuññaena naga taaga. A visae kiena yuññaena nene po, naga kilia kekara narui, komin kiena yuññaena wo nene. Komin naña yaru punu ga pe marañ taaga re poli, la kiela naurmiena tañena lala peve taaga naña la akus ke e kiela malena lala.

⁶ Amiu naña asuñña apian amiu ke e visena nalelagaena, pogos naña visae amiu alual narin sur tai pon amiu avion van amiu amio kiamiu navianena lala.

⁷ Amiu avisuaria, ve avisa kotalia amiu re sina ga. Ko tañatete ototoroun Ntewa. Kurus nen ya naña omapila e kioma lokove, naga kana mras ke naña pisi na ko ga okan narui. ⁸ Yar naña mapila ðelaga naña naga paeme amio, yoko naga sane kurus neñ sur tai e kiena malena, pisi na naga war mras viowa lala e ðelaga nene, naña marena napiowa ga, ana visae naga mapila ðelaga kiena Ninuna Wa e kiena malena, pisi na Ninuna Wa naga la kinanena marua lala naña po vania, naña naga pe malena naña ve uro re. ⁹ Ana pisi na ita tekilia towar kinanena wo lala e ruru e kana pogos naña marua, visave ita ve teligan re yuññaena. Ve sanene, ita na monar ve sineta maren re naña tekila ðelaga wo lala, ¹⁰ ana ita na monar sineta wo va yaru lala silaga, a monar sineta wo va laa sane va la naña ita tepe mratava taaga temio la e Kristo.

Visena maro kiena ne Pol

¹¹ Poga, pisi na inu nesiri maron kiau visena la nene e ga e luñau, nane amiu akilia avisu kana mras nen visena lala kerkeviu sanene. ¹² Inu sineun nesape nevisa sanini, la naña sinelan asape añareran amiu ave ðaviu,

nanene naga sa naña la sinelan ga vilaveena komin sur la naña na kulus nen yaru ga. Ana la sinelan asape akila sanene komin sur taaga ga, naña la sinela asape la akilia aligan nalologonena na laki torovia kiena ne Kristo naña kilia tamalia ita. Visena nene la yepel mavinia komin naña la amaraun asape sañisi la asumña alogon lologena wo na marena kiena ne Yesu naga mesmesu ve sa nene, ñisi na yar tañena lañasia amene la. ¹³ A la nene naña la sinelan asape amiu monar ave ñaviu, la sinelan mēna ga ve sanene vena ñisi na la akilia awarwar lan avisave la ataulu amiu ñisi rui, naña la amligan amiu apito si vatano e Navisaluaena kiena ne le Yu lala. Ana amiu na avisu ruruia, komin naña la mēna nene la pe asumña alogear re si sur la punu naña Navisaluaena nene pisa poli.

¹⁴ Ana e inu, pe sur re tai naña sineun nesape nowarwar inu e poli, ana e ga e laki torovia kiena ne kieta Suñe Yesu Kristo, in na neñarwar inu ea, komin kiena marena nene kila ñelaga lala na yomarava nini la apimi sane sur mare ga e inu, a kila inu mēna ga nepimi sa ga yar mare ga tai e ñelaga lala natañaliena na yomarava nini.

¹⁵ Naña yar tai imi mesmesu amio Ntewa, ana pe sur korena ga naña yar nene naga pe ñaviu pona pe

pe ñaviu re poli, ana visae Ntewa naga sii ke sina ga yar nene imi ve yar viu sumo wa, ana ñisi na yar nene kilia imi mesmesu amio naga. ¹⁶ A naga narui in na nelen wo la naña ñisi na alogear visena la nene, naña ñisi na aimi ave le Israel kemua lelaga lala kiena ne Ntewa, nesape sunārena kiena ne Ntewa a kiena nasineyeena sike amio la.

¹⁷ Kiau visena naga loka ga nene. Ana in na pe sineun re si naña ñisi na yar tai kila ke sina viowa van inu sanene poli, komin naña nesumña noñar ke piakapila kiena ne Kristo e tasneu rui, sa naña la akove inu a la añe inu.

¹⁸ Wolai lala a vineu lala, nemlen nesape ñisi na nasineyeena kiena ne kieta Suñe Yesu Kristo naga sike amio ninumiu la punu ga, Sanene.

Maki Naþa Pol Siria Pa Pan Li Nalelagaen Wa Lala Nae Garu EPISAS Visayuena Na Tusi Nene

*Komþasnen suniena plas
na tusi nini*

Purþesnen sitomiena naþa Pol pisayuia e maki nini naþa naga siria pan li nalelagaena lala garu Episas, nanini visena tai naþa siria teke marana na keviu taaga na vetokaki lualima [1:10], naþa pisayu na maplarena keviu kiena Ntewa. Pisape Ntewa sinenan sape suri la naþa naga kila, yoko aimi aviranar la lele taaga. Naga sinenan sape suri nae mae peni a nae yomarava yoko asikolia ga amio Kristo, naþa naga pe þarin suri makega. Pupia maplarena kiena Ntewa nene, naga miliganaria sape ve kiena yaru makega na yo punuga aimi aviranar la e þegas ve taaga ga e yomarava nini. Visae alelaga e Yesu Kristo, akilia akila sanene, a naga pisa ruru pa yeririna lala kiena Ntewa vena asiar naþa akila meraravan maplarena nene e kiela maliena.

E komþasnen maki þesa nini, Pol pisayu mrapa naþa Ntewa arimata miyuþae ea vena kilaen yeririna makega aimi ave taaga. Naga pisayu

þelaga naþa Ntewa mligan lua kiena yaru lala, a pisayu naþa e Yesu Kristo narina Ntewa, Ntewa piyewo la, a þar plan kiela milamulena viowa ea, kila apimi amesmesu apo. A pisayu mnea naþa Ntewa mila Ninuna Wa pan kiena yeririna lala, vena kila meraravanen naþa yoko naga la sur la van la, sanaþa naga pisaar sape yoko kila. E komþasnen maki na lua, Pol pisa pan la naþa yoko aulo maki nini, sape la monar akila meraravan naþa ave taaga amio Kristo, e þelaga naþa akilia asikol la ruru amio li nalelagaena taþena lala.

Pol pis pan la e þakaiwa lala, vena kila meraravanen þelaga naþa yeririna kiena Ntewa lala asumia asikol ruru la ke amio Kristo. Naga pisape sumare naga sane tas tai, naþa Kristo naga pe þarunia, pona sane yuþa tai, naþa Kristo naga pe kemraþe keyowo po na mrapun yuþa nena, pona sane sira tai naþa Kristo naga pe wona.

Ntewa sinen sii manene yeririna na yomarava la paþisi, a yaru la apisu kilia sinesiena nene pim kome Kristo. Pupia sinesiena nene kiena Ntewa miyuri sitomiena kiena Pol, ana naga pisawal kiena lelagaena e Kristo e maki nini. Maki nini kila meraravan þelaga kiena Kristo naþa sinen sii ita paþisi, mare vena ulplan ita, viyewo ita, sumia iila ita

e kiena lemamiēna, a kila ita temesmesu ruru nena ga e marana Ntewa.

Kom̄pasnen tusi la na nini

Visena p̄esa 1:1-2

Kristo a kiena sum̄are 1:3
—3:21

Malena viū e Kristo 4:1—
6:20

Visena maro 6:21-24

*Pol siar kiena visena pan
la*

¹ Inu Pol, naṗa Ntewa ga naga mligan inu vena neve yaru nalologonen Lologena Wo kiena ne Kristo Yesu, inu nesiri lum̄aki nini piṁasu pan amiu, amiu li nalelagaena lala nae pupia pulkumali naṗa Episas, naṗa amiu apiawa m̄arera e Kristo Yesu.

² Inu nemlenwo amiu ke nesape p̄isi na lemamiēna a sum̄arena kiena ne Ntewa Arimata a amio m̄ena ga kiena ne Yesu Kristo kieta Suṗe, sum̄a amio amiu.

*Ntewa naga visa ruru ita
e Kristo*

³ Popon naṗa ita teyeluar Ntewa, naṗa naga Ntewa kiena ne kieta Suṗe, Yesu Kristo, a naga pe Arimana m̄ena ga, vanon naṗa ita, naṗa tepe taaga temio Kristo, ana Ntewa naga kila po paṗisi pan ita e navisa ruruena wo lala nae ma metava. ⁴ Nanene naga sa naṗa pogos naṗa yomarava nini naga pere wa, ana Ntewa naga pisaar ita p̄isi rui vena ita teve taaga

temio Kristo, vena ita teve kiena, a vena kieta malena ikik ruru wo e marana, naṗa pe kororaki re e poli. ⁵ Nanua sumo laa rui, kome pupia kiena sitomena, ana Ntewa naga mliganar ita vena kuslua ita sane narina lala, kome Yesu Kristo. Suri nene, Ntewa naga kila sane mesmesun e ya naṗa naga pisu sape po, a naga kekaran m̄ena ga paṗisi naṗa naga kila. ⁶ !Teyeluar Ntewa vanon kiena pupia lemamiēna nene a vanon m̄ena ga nalakorenanena wo nene naṗa naga mla korenan ga pan ita, naṗa pimi kome narina naṗa naga sitom paṗisi!

⁷ Tana ne narina nene mlau, ana vanon suri nena nene, ita naṗa tepe taaga temio Kristo nene, Ntewa naga pure plan ita, naṗa naga piewo kieta mlamulena viowa lala. !Lelaga p̄a, lemamiēna kiena ne Ntewa e ita keviu manene paṗisi, naga pa re laa na wa!

⁸ Ntewa naga pe manmarua paṗisi wa, a naga pisu kilale make suria, ⁹ ana naga kekaran naṗa tam̄an ita tekilia kiena sitomena tai naṗa naga sane navisawanena tai pan ita sumo. Naga kila sitomena nene pimi merarava ruru e ita narui, a kiena sitomena nene, nayum̄aenen suri wo la ve moki imi m̄alivi ga e Kristo. ¹⁰ E sitomena nene narui na, Ntewa naga sikol ruru suri punu ga va

lele taaga, naŕa naga sii la sike ma e peni, a e mēna ga e yomarava nini, la aimi lele taaga vatanon Kristo, ana Ntewa naga yumāen ruru make suri punu ga torokin kiena sitomena nene, vano vano kilamake ruru ga e kana pog nena naapo.

¹¹ Ana ŕisi na suri punu ga monar imi mālivi mesmesun nena ga naŕa Ntewa naga sitom ruru ke pisape kila. Ana vena taveve kiena sitomena nene nanua sumo, naga pisaar imimi le Israel lala veŕa imimi meve kiena, naŕa imimi meve taaga memio Kristo. ¹² Imimi ne nanini, Ntewa naga mliganar imimi vena imimi naŕa memligan ŕesan kiamimi sitomena mārera e Kristo, a visae sanene, popon imimi monar meieluar Ntewa silaga, komin naga po paŕisi.

¹³ Ana amiu yeririna taŕena mēna ga lala, naŕa pe ape le Yu re la poli, amiu amloge visena lelaga nene ŕisi rui, nanene Lologena Wo naŕa amiu atol kiamiu natamaliaena e naga, a amiu amlelaga e Kristo ŕisi rui, ana amiu apimi ape yeririna kiena ne Ntewa ŕisi rui. A vanon naŕa amiu na ape kiena, Ntewa naga mligan kana kile na suri nene tai e amiu, naŕa naga mla Ninuna Wa pan amiu, sa naŕa naga pisaaria. ¹⁴ A Ninuna Wa nene, naga sane komsus nen navisaarena na sumo kiena ne Ntewa e ita,

vena ita tekilia ruru tesape metavan Ninuna nene, ŕisi na ita tokus lalimana punu ga ve kieta, nanene na e pogos naŕa Ntewa naga wereplan yeririna lala ava puna, nanene na la ga naŕa naga pul plan la ŕisi rui ana la ape kiena. !Ita teyeluar Ntewa, pe mias naga po paŕisi!

Leniena Kiena ne Pol

¹⁵⁻¹⁶ Komin suri ne la nanene, silaga e kiau leniena lala, nesuŕa nesitoŕal amiu luen ga, a nepisa luen ga potena pan Ntewa vanon amiu. Pelaga nene, nesiar e pogos naŕa nemloge naŕa amiu apiawa mārera ke e Yesu, kieta Suŕe, a naŕa asitom manene mēna ga nalelagaena wa taŕena lala, ana pimi tol nanagane, nesuŕa nemlen ke sanene. ¹⁷ Sila ga naŕa nesuŕa ga nemlen ke pa Ntewa, naŕa naga pe Ntewa kiena ne Yesu Kristo kieta Suŕe, a naŕa naga pe Arimata naŕa pe naurarena keviu, nesuŕa nepiun ke tania vena naga ligan Ninuna na manmaruaena naŕa Ninuna na kipianaena van amiu, vena akilia Ntewa va ve keviu laa sane.

¹⁸ A nesuŕa nepiun ke tania vena naga vike kiamiu sitomena lala, vena avisu kilale kiena yomerarava, vena akilia suri nene naŕa Ntewa naga pio amiu vanonia, a naŕa kiamiu sitomena monar mārerania vena atol suri nena. Suri la nene, naga lalimana la nene naŕa pe

kiamiu, sa naþa suri wo la moki naþa Ntewa naga kila ruru sike na, naga pe kiena ne nalelagaena wa lala. ¹⁹ A amio mēna ga naga, monar avisu kilalea a monar akilia ruru pupia nañareraena kiena ne Ntewa, naþa naga suñā miyumāe ke e kieta malena lala, naþa ita temlelaga e naga. ²⁰ Nanene naga nañareraena keviu ke ga nene naþa Ntewa naga miyumāe ea e pogos naþa naga pisirlua Kristo suñalu mali sina ga e marena, ana naþa siraunia, naga þere naga pa mligan naga teke tano e kiena lepa marua ma e peni. ²¹ Nañareraena nene, naga pa laa metavan māraeraena taþena lala, amio mēna ga suri māraera taþena lala, amio yerkawa taþena lala, amio nasumonena taþena lala nae ma e peni. Kia kiena ne Kristo naga mon manene laa metavan make kia taþena lala, pe e re ga e yomarava nini poli, ana e mēna ga e yomarava taþena nene naþa yoko imi. ²² Ntewa naga mligan suri la punu ga asike vatano e lana ne Kristo rui, a naga mligan lua Kristo pa e kiena suñare wa, ana naga pe þarin suri la punu ga. ²³ A kiena suñare wa nene, naga sane tasnena ne Kristo, naþa naga pule ruru e Kristo, a naþa Kristo ga rui naga pule ruru e suri punu ga e yo punu ga.

2

Nanagane ita temal e Kristo

¹ Nanua sumo, ana sa ga naþa amiu amare ga, vanon naviowaena lala, a kiamiu mlamulena viowa lala, ² naþa e pogos nene, amiu amial ga e þelaga viowa na yomarava nini. A nanua sumo, ataveve ga suþe nene na nañareraena na yo yau lala, amlogear ga naga narui, naþa naga ninuna nene naþa naga suñā kila ke kiena yuñāena e la naþa pe amlogear re Ntewa poli. ³ Ana nanua sumo, imimi le Israel mēna ga lala, imimi na maran taaga ga memio yeririna taþena lala, naþa imimi mesuñā memialoro metaveve ga nasinenaena na þelaga viowa kiena ne yeririna lala. Imimi mēna ga mesuñā mekila ke ga suri la naþa kiamimi sitomena la sinemiminia, a suri la naþa imimi memloge po ea. Komin suri la nene, imimi na sa ga yeririna taþena ga la nene, naþa þisi na Ntewa naga sinena kar imimi mēna ga, taþatete kila si suri tai van imimi narui, vano vano þisi na naga monar la nakoena van imimi.

⁴ Ana Ntewa, kiena siney-eena a kiena nasitomiēna naga keviu paþisi e ita, ⁵ ana pogos naþa sane ita na temare þisi rui vanon kieta mlamulena viowa lala, ana naga kila ita temali temio

Kristo. Nanene na lelaga, Ntewa naga tamalia ita kom ga e kiena lemamiēna. ⁶ Ana sa naŋa ita na temali temio Kristo, Ntewa pisirlua ita temio mēna ga naga, ana Ntewa naga mligan ita teto tano temio mēna ga naga e yo nametava.

⁷ Ntewa naga kila sanene vena e pogos la naŋa apimi ke ne, ŋisi na yeririna lala, la akilia avisu kilale sane kiena lemamiēna nene naga keviu manene paŋisi, naŋa naga sitom ita sanene kome Kristo Yesu. ⁸ Ntewa naga tamalia amiu e ga e kiena lemamiēna, vanon naŋa api-awa e naga. Suri nene naga pe pimi mālivi re e kiamiu yuŋaena wo laŋas poli, peraga, Ntewa naga mla korenan ga pan amiu. ⁹ Ana nanene naga pe suri re tai naŋa yaru kilia yuŋae vanon poli, komin visae ve sanene, ŋisi na towarwar itan vaŋisi, tevis vilavenia, tevisave “O inu, in ga neta-malia in e kiau yuŋaena.” ¹⁰ Ita na sane suri wo tai naŋa Ntewa miyuŋaen ruru po paŋisi, naŋa naga sii ita tepimi tepe yaru viu lala e Kristo Yesu, a Ntewa naga kila sanene vena ita tekila mēna ga yuŋaena wo lala, naŋa naga mligan ruru sumo rui, vena ita teyuŋaenia e kieta malena lala.

Ita na teve taaga e Kristo

¹¹ Amiu na monar asitomali pogos naŋa

apaeme, ana amiu na pe ape yeririna kiena ne Ntewa re poli sane le Yu lala, amiu na ape yaru taŋena ga lala. Komin suri ne nanene, le Yu lala, la asitom ke asape la ape yaru wa, komin naŋa la apuarar manene ŋaviu mārera, ana la apisa kare amiu apisa “Kulpaona” pan amiu. Ana ŋaviu nene naga pe suri korena ga na vanua ga e tas nen yermēne ne. ¹² Ana komin nanua sumo, amiu na sa ke nene narui. Amiu ve sinemiu ŋesan re naŋa nanua sumo, amiu asike laa koperinan Kristo paŋisi, amiu na asike vanuan ŋegas nen le Israel lala, amiu na ape wolawa ga, naŋa amiu na taŋatete akilia atol suri la naŋa Ntewa naga pisaar pan kiena yeririna lala. Ana amiu naŋa asike e yomarava nini, amiu na peraga ape suri korena ga narui, a amiu na pe akilia re nena Ntewa poli. ¹³ Ana amiu, naŋa nanua sumo asike laa perina, nanagane amiu apimi lavisi rui komin tana ne Kristo, nanagane narui amiu na ape taaga amio naga.

¹⁴ Kristo naga pe kieta suŋarena, ana naga kila ki-eta ŋegas lua nene apimi ape taaga. Nanua sumo, imimi le Yu lala memio amiu yeririna taŋena lala, naŋa ita sineta kar ita mŋaga silaga, sa ga naŋa pupia kove tai mliŋere ita, ana Kristo naga mē plan suri nene e kiena

marena. ¹⁵ Naga pisaluþar navisaluaena kiena ne le Yu lala, amio kana narin visena ne lala, a naga kila sanene naþa kila kieta þegas lua nene lalua aimi ave yaru taaga e naga, sane lalua aimi ave suri viu tai. Visae ve sanene narui, Kristo naga kila sumarena van ita. ¹⁶ E kiena marena e laki torovia, naga kilalua sinemimiena e ita, naga kila kieta þegas lua nene apimi ape yeririna taaga, ana naga pure ita sina ga toþasuþe si puna ne Ntewa, naga kila ita tepe mara wo temio naga. ¹⁷ Pogaga, e þelaga nene narui, Kristo naga pimi, pisawal lologena wo na sumarena nene pa yeririna la punu ga, nanene na amiu naþa pe ape le Yu re poli, naþa amiu asike laa perinan Ntewa, amio imimi mþena ga le Yu lala naþa imimi na mesike lavisin þisi rui. ¹⁸ Ana komin suri ne la nanene naþa Kristo naga kila rui, nanagane ita punu ga kieta mrapa taaga e Ninuna taaga, naþa teimi e marana ne Arimata.

¹⁹ Ve sanene, ana amiu na pe ape wolawa la re si poli narui, a amiu na pe ape yaru re si naþa pe kiela yo re poli, peraga. Nanagane, amiu na sa ga yeririna na yo kiena ne Ntewa, amio li nalelagaena wa taþena lala, a amiu asike loyuma e mþana mratava. ²⁰ Amiu na sane kemraþe lala na yuma tai,

naþa li nalologena lala amio li navisawalena lala, la sane kemraþe na mrapun yuma lala. E yuma nene, Yesu Kristo naga sane kemraþe wo naþa pe keyowo mþeke lika, ²¹ naþa naga sumþa þuarar ruru ke kemraþe taþena la nene. Naga puar la, ana la asumþalu mþarera, ana yuma nene naga sa naþa sumþa pimi pe yuma wa mþana ne Ntewa. ²² Ntewa naga miyumaen amiu ke sanene narui, vena e Kristo amiu li nalelagaena lelaga lala, amiu asumþa apimi ke sane yuma tai, naþa naga kilia va sulueen ga loyuma ea e Ninuna.

3

Pol kila yumaena kiena ne Suþe pan la rui

¹ Ana komin suri la nene naþa nepisa þisi rui, inu Pol, nemlen wo amiu pa Ntewa. Nanagane nesike e yuma na koaena, vanon naþa nemiyumaen ke yumaena kiena ne Kristo Yesu pan la naþa pe ape le Yu re poli, sane amiu, a in na nemlen wo amiu ke na wa pa Ntewa. ² ?Pona amiu na apisu kilale mþaga naþa sane nesumþa nemiyumaen ke vanon amiu sanene, pona peraga? Kiau yumaena naiila amiuena nene, Ntewa naga mla pan inu e kiena lemamiena, ³ ana naga sane kiena sitomena tai naþa sumo naga mlawania, ana siraunia naga kipian inu ea.

Ana suri nene nesiriyu ñisi rui, ⁴ a visae amiu auloia, ñisi na amiu atol kiau kiliaena e lepas nen sitomena nene kiena ne Ntewa, naña nanagane suña pimi ke merarava e Kristo. ⁵ E teras nasumo lala, yeririna lala la pe akilia re suri nene poli sane nanagane, naña nanagane Ntewa kipian ke e li nalologena wa lala amio mēna ga kiena navisawalena lala kome Ninuna Wa. ⁶ A visena nene naña naga pimi merarava, naga sanene narui, naña pisa sanini pisape, yeririna tañena mēna lala, la amio le Yu lala, la ga luwoka ga la atol navisa ruruena lala kiena ne Ntewa, a naña la sa ga ape lepas nen tasnela taaga ga, a naña navisaarena kiena ne Ntewa lala, la ga luwoka kiela. Suri wo la nene la apimi añalivi komin lologena wo kiena ne Kristo Yesu.

⁷ Ana Ntewa naga kila inu nepe yaru na yuñāena kiena ne lologena wo nene tai narui, ana yuñāena nene naga pe nalaena wo tai naña Ntewa naga mla pan inu, naña kiena nañāeraena suña miyuñāe ke kome inu. ⁸ Inu neto manene laa tanon nalelagaena wa tañena lala, ana nekekara pañisi naña e lemamiena kiena ne Ntewa, naga mligan e luñāu vena nelologon kiena lologena wo van la naña la pe ape le Yu re poli. Ve sanene narui, nesuñā nepisawal ke pan la e suri wo kiena ne

Kristo lala, naña aulo ñele ga, ⁹ a nekipian la ke mēna ga sanape naña Ntewa naga suña kila ke kiena sitomena nene pimi ñarpoyo. Siar e pogos naña Ntewa naga sii suri punu ga, pimi tol pogos la naña añarō pa ñisi rui, Ntewa naga mlawan kiena sitomena nene toña ga, ¹⁰ ana e kieta pogos nini narui, naga kila navisi lala amio nañāeraena lala e yo na metava ma e peni, la avisu kilale kiena namanmaruaena tañena lala, e suri la naña naga miyuñāenia e lotuena kiena ne Kristo. ¹¹ Suri la nene na, la torokin sitomena kiena ne Ntewa, naña naga sitom ruru kemua sumo rui, pogos naña yomarava nini na pere wa, ana naga kila suri la nene la apimi añalivi rui kome Kristo Yesu, kieta Suñe. ¹² Ana komin naña ita tepiawa e Kristo, a komin naña ita tepe taaga temio naga, ana ita tekilia teimi tesuñālu e marana ne Ntewa narui, naña kieta sitomena ve yuwawa re, a monar sineta māraera e naga tevisave ñisi na naga kekaran ita. ¹³ Komin suri ne nanene, nepiun māraeran pan amiu, nepisape, awis, amiu na ve atañān re sinemiū la aloru pogos tai, naña ve aloge manene re viowagan inu e pog māraera la nene naña nekus ke vanon amiu e yuñā nakoena nene, naña la akilali inu ke pañisi. Suri la nene na, la vena

iilaar amiuena vena atol naurarena kiena ne Ntewa.

Leniena kiena ne Pol

¹⁴ Sanene, komin suri ne la nane nepisa ke ne, nek-inai, nemlen wo amiu pa Arimata, ¹⁵ naþa naga pe Arimata kemua lelaga, naþa ata taþena lala na mratava lala nae ma e peni amio mena ga nae yomerava nini, la asua amla ke þelaga wo a kiela kia wo lala, e ga e naga.

¹⁶ Nesua nepiun ke tan Ntewa, nesape sa naþa naga kiena naurarena keviu paþisi, þisi na ligan kiena naareraena e losinemiu kome kiena Ninuna, vena sinemiu lala asualu marera asulue.

¹⁷ Inu nesua nemlen ke mena ga, nesape Kristo naga sua pumi silaga e losinemiu lala kome kiamiu naviawaena, a nemlen wo amiu mena ga vena þelaga nasitomiena imi sane purþes nen kiamiu malena lala.

¹⁸ Visae ve sanene, þisi na amiu, amio nalelagaena wa taþena lala, akilia u atorokin naþa avisu kilale pupia nasitomiena kiena ne Kristo, sanape naþa pe lepalepasa, pona piavi, pona pa metava, pona merorol sanape. ¹⁹ Lelaga þa, kiena nasitomiena nene naga keviu manene paþisi, ita taþatete tevisave tekilia ruru rui. Ana pe suri korena ga, nemlen ga vena þisi na amiu na akilia avisu kiena nasitomiena nene e kiamiu

malena lala, vano vano-o þelaga wo kiena ne Ntewa lala, a kiena malena wo, aule ruru e amiu.

²⁰ Ana nanagane, teyeluar Ntewa, naþa e kiena naareraena keviu naþa naga sua miyuae ke ea e losineta lala, naga kilia yuaenia taulu manene ya naþa tekilia teviun tania, pona ya naþa tekilia tesitomia. ²¹ Ana nanagane, nalotena kiena ne Ntewa wetelu miyeluar naga komin Kristo Yesu, nanagane, a e mena ga e teras lelein lala na pogos la naþa apimi ke ne, vano vano-o ve uro re, sanene.

4

Ita na sane tepe tasneta taaga e Kristo

¹ Sa naþa nesike e yua naloge viowaena, komin yuaena kiena ne kieta Suþe, neareran amiu, nesape kiamiu malena lala monar mesmesu ruru e þelaga nene naþa Ntewa naga pio amiu vena amiu ayal ea. ² Ve sanene, amiu avatanon amiu, a amoau silaga. A kiamiu sitomena lala monar malum ga van amiu, naþa ve sinemiu mimi koskos re van amiu. Pelaga na nasitomiena ne nanene. ³ Amiu na akilayonli naþa auarar ruru suare nene naþa naga sua sikol ruru amiu, ana ve sanene, akilia avisuar ruru navetaagaena naþa Ninuna Wa naga sua mla ke pan amiu. ⁴ Amiu na

sa ga ape tasnemi taaga ga, a Ninuna mēna ga taaga ga sike e amiu, a e ke e pēlaga nene ana navisaarena taaga ga, naṗa kiamiu sitomena kilia sumālu mārera se ea, naṗa Ntewa naga pio amiu vanonia. ⁵ Ana Suṗe Yesu naga taaga ga, a kieta nalelagaena taaga ga, a nakeena mēna ga taaga ga, ⁶ a Ntewa mēna ga taaga ga naṗa sike na, naṗa naga pe Arimanane yaru punu ga, a naga pe suṗen suri punu ga, a naga miyuṗaen kiena yuṗaena ṗarpoyo e yo punu ga, a naṗa naga sike e malena kiena ne yeririna punu ga.

⁷ Ana e ita punu ga pepe taaga, Kristo naga mla nalaena taṗena lala e kieta malena lala, naṗa la apowo paṗisi, mesmesu e kiena pupia lemamiena. ⁸ Nanene na sa naṗa Visena Wa naga pisa nanua sumo rui e Yauena Lala, naṗa pisa pisape

“Pogos naṗa naga pa metava e yo na metava mane-nea,

naga ṗere kiena nasinekar lala naṗa naga taulu la rui, ataveve naga,

a naga mla nalaena pan kiena yeririna lala.”
Yauena 68:18

⁹ ? Ana visena naṗa pisa pisape “Naga pa metava,” naga kana kinasia na ya? Kinas nen visena nene sape nanua sumo, naga pito manene laa tano rui, naṗa naga pitomi tano e

yomarava nini, naga pito tano e kana ṗiliṗili merorol ne lala. ¹⁰ A yeririna nene, naṗa sumo naga pitomi tano, naga pe yaru mā ke sina ga nene naṗa sirau naga pa laa metava, metava ma e peni, ana ṗisi na, naga pa ke laa metava na wa, vena naga kilia kokonia yo la punu ga naṗa Ntewa sii la. ¹¹ A naga yaru ke ga naṗa naga mla nalaena pa kiena yeririna la narui, naṗa laṗasia, naga mligan la ape li nalologena lala, laṗasia, naga mligan la ape navisawalena lala, laṗasia, naga mligan la ape nayalinen Lologena Wo, a laṗasia, naga mligan la ape yaru na visuaren li nalelagaena lala, ana laṗasia, la ave navian laena mēna ga lala. ¹² Kristo naga kila sanene vena kiena li nalelagaena wa lala akilia akila kiena yuṗaena, vena ṗegas kiena ne li nalelagaena lala e yomarava nini, naṗa sane tasnena, kilia kapuru manenea, a imi mārera laa sane. ¹³ Ve sanene, ṗisi na ita punu ga tekilia teimi teve taaga ga e kieta naviawaena e Narina ne Ntewa, a ita teimi teve taaga mēna ga naṗa tevisu kilale ruru naga e kieta malena lala. Naga ke nanene narui, tekilia teimi teve sa naṗa yaru na marua, vano vano tol naṗa temarua ruru sane Kristo, naṗa ṗisi ita teimi teve yerkawa kemua lelaga sane naga.

¹⁴ Sanene, ṗisi na ita ve

teve sa re si sisi, naña navia-
nena tañena kiena ne yaru
na visokanena lala aure ki-
eta sitomena lala va ve
tañena, a naña kiela nav-
isa kotalia itaena lala la
apilovilon ita, sa ga naña lagi
miyu ita, pona sive sumā
kuakuankare ita tepa sane,
tepa sane, peraga. ¹⁵ Ana
monar towarar nalelagaena
e p̄elaga nasitomiēna, a e ki-
eta mrapa la punu ga, monar
tekapuru vena teimi teve
yerkawa lala e Kristo, naña
naga pe p̄arin p̄egas nen
kiena nalelagaena lala. ¹⁶ A
ita na sane kinakinas nen
tasnena lala, a naga sumā
kila ke kinakinas la nene
apimi ape tas taaga ga e
naga, naña kiena merpu lala
la asumā asikol ruru kana ki-
nakinas la nene van p̄arina.
A pogos naña kana kinaki-
nas nen tasnena la nene, la
ataveve ruru kiela yuñāena
lala, a la asumā asitomila,
ana tasnena nene naga kilia
kapuru, kilia imi m̄arera va
laa sane.

Malena viu e Kristo

¹⁷ E kia kiena ne kieta
Suñe, nom̄areran amiu ke
sina ga, nesape amiu na
monar avisuar amiu, p̄isi na
amiu na ve ataveve re si
p̄elaga kiena ne la naña pe
amlelaga re e Ntewa poli.
La nene, kiela sitomena lala
apiowa rui, ape mias pa rui,
¹⁸ ana asike ga e yemalolo.
Ana la asike manene laa
perinan malena nene naña
Ntewa naga mligan ke pimi,
komin naña la p̄arila m̄arera

pañisi sa ga kilavaru, la pe
amloge kilia re suri poli.
¹⁹ Sinela lala tañatete si
amawan kiela navioawaena
lala, ana la atamān la ga
e lau narui, a e p̄elaga na
kororaki lala, naña la asitom
korenan ga.

²⁰ Ana e Kristo, pe apian
amiu re nenaga e p̄elaga
tai ne sanene poli, peraga.
²¹ Ana la apisayu kiena suri
wo la moki pan amiu p̄isi
rui, pan amiu naña ataveve
ke naga, a la apian ruru
amiu e nalelagaena la nene
naña sike e Yesu. ²² Sanene,
ana amiu na monar ali-
gan lua p̄elaga marua naña
apaeme amio. Pelaga nene
naga sumā kila ke kiamiu
malena na sumo pimi pi-
owa, a sumo, kiamiu nasi-
nenanena viowa na p̄elaga
la nene asumā apisa kotalia
amiu, ana asumā akila kare
manene kiamiu malena la
keviu pañisi. ²³ Ana nana-
gane, sinemiu lala a kiamiu
sitomena lala monar imi ve
urviu nenaga, ²⁴ a amiu na
monar akus p̄elaga viu lala
na kiamiu malena viu e Yesu
nene, naña Ntewa naga sii e
amiu, sa ga kiena, naña yeri-
riña lala la akilia avisu sa
naña mesmesu ruru kemua,
a pe suri wa.

²⁵ !Sanene narui, visoka-
nena toko! Komin naña ita
tepe kinakinas nen tasnena
ne Kristo ga, ana monar teve
lelaga lue ga va nalavisin ita
la silaga.

²⁶ A visae sinemiu mimi

pogos tai, ve akila re naþa nasinemimiena nene were amiu ava e namlamulen viowa, a kiamiu nasinemimiena nene monar vito tano sumo, þisi na mrae vito tano. ²⁷ Amiu na monar ve ala re pulmas tai va Yermare, vena naga imi kila kare amiu, ava aviowa laa sane.

²⁸ Yaru naþa sumo naga pe yaru na vinauena, naga monar þisin vinauena. Naga monar yuñae m̄arera e limana, e þelaga na mesmesu, ana þisi na naga kilia visuar ruru naga, a iila m̄ena ga yaru la naþa limala korena.

²⁹ E kiamiu visena lala, ve avisa re visena kar lala, ana avisa ga visena la naþa naga kilia iilar kiela sitomena lala, naþa la aloge kiamiu visena nene, naþa naga toroki ga, a naþa mesmesu, a naþa kilia iila la. ³⁰ Amiu ve akila re Ninuna Wa memawa, pona loge viowa vanon kiamiu visena viowa la nene, komin naþa Ninuna Wa nene, Ntewa naga mligan e amiu sane kiena kile tai, vena naga visawal visave amiu na ape kiena, a vena visawal m̄ena ga visave þisi na naga wereplan amiu e legiena maro.

³¹ Sanene, popon ve akila re si sinekarena lala, a sinemiu ve uarar re si simimiena, a sinemiu ve melkalka re sina. Amiu aligan þelaga na vilupena a navisviowaena, a aligan þelaga na sinekarena.

³² Ana amiu na awo van amiu, a sinemiu lala

malumu ga van amiu, aviewo amiu, sa naþa Ntewa naga piowo amiu rui kome Kristo.

5

Amiu na ayal e yomerarava

¹ Ana komin naþa amiu ape sisi wo kiena ne Ntewa lala, amiu akilali naþa ataveve kiena þelaga.

² Amiu na monar ayal e nasitomienna, sa naþa Kristo naga sitom amiu, naga tañan kiena malena pan amiu, sane ponotaninu tai naþa po pan Ntewa, a sane nakuþaþaena tai naþa Ntewa kekarania.

³ Komin naþa amiu ape nalelagaena wa kiena ne Ntewa, ana pe mesmesun re nenaga naþa pogos tai, suri laþasia imi kakate e amiu sane lau, pona suri na memawaena lala, pona þelaga nasinesuniena suri lala, a suri la nene pe pon re m̄ena ga ava atakorkoron poli. ⁴ A pe pon re naþa amiu avisa visena kar la poli, a visena namname lala, a visena na totorouena viowa. Ana popon amiu na asuñña avisa ga potena van Ntewa. ⁵ Nesape nevisa meraravan van amiu sanini:

la naþa la asuñña ataþa ke lau, a la naþa asuñña akila ke suri na memawaena, a la naþa sinela sun manene suri la silaga, la nene þisi na akokovio. Yaru na sinenan manene laa suri la silaga,

naga maran taaga ga amio yaru naþa naga mlotun ke suþe taþena lala. Amiu na monar alelaga e visena nini silaga, pisape la naþa apuarar ke þelaga viowa la nene, þisi na la taþatete nena akilia ava loyuma e Nasuþenena kiena ne Kristo amio Ntewa.

⁶ Amiu na ve atamañan re yaru la aure amiu ava e mrapa taþena lala, naþa la avisa kotalia amiu ga e kiela visena kiki lala. Suri ne la nanene naga kila Ntewa naga sinena karla rui, sa naþa visae la pe amlogear re naga poli, ana þisi na naga la nakoena van la. ⁷ Þisi na amiu ve ava ave þegas re nena amio yeririna la ne sanene. ⁸ Nanua sumo na, amiu la nene ape yeririna na yemalolo ga lala, ana nanagane naþa amiu asike e kieta Ntewa narui, ana amiu asike mēna ga e kiena yomerarava. Ve sanene na, amiu monar ayal silaga ve sa naþa amiu na ape yeririna na yomerarava nene narui, ⁹ komin e yomerarava nene, þisi na kiamiu malena wo, a mesmesu, a ve lelaga, ana þisi na kilia war mras la naþa po ve moki. ¹⁰ Amiu na monar akilayonli naþa alual þelaga ya naþa kieta Ntewa naga kekarania. ¹¹ Pisi na amiu na ve amio re yeririna la naþa la akila ke suri viowa lala, naþa pe yumaena korena ga lala na yemalolo. Ana popon visae

amiu avietavan suri viowa la nene aimi e yomerarava. ¹² Ita na tememawanli mēna ga vena tevisayu suri la naþa la apa akilawania, ¹³ ana pogos naþa Ntewa naga vietavan suri la punu ga nene, aimi e yomerarava, þisi na yomerarava nene naga kila þelaga la nene la amolmolue. ¹⁴ A pogos naþa yomerarava naga kila suri la punu ga imi molmolue e yometava sanene, suri mēna ga la nene þisi na imi ve sa yomerarava. Nanene na sa ga yauena nene pisa, naþa naga pisa, pisape
“Ko nene naþa omomalio rui, otavilo, osuñalu e marena, omal sina, ana þisi na Kristo naga tegoli ko.”

¹⁵ Komin suri nene, amiu na monar avisuar ruru amiu, sane þisi na yoko ayal ve sanape. Pisi na amiu na ve ave sa re la naþa la pe þarila re poli, ana amiu na monar akila þelaga kiena ne yeririna la naþa ape manmarua ruru po. ¹⁶ Amiu na monar ava ayuporu e pulmas punu ga naþa amiu amalia, vena kilaen yumaena wo lala ea, komin naþa ita tesike e pogos na viowaena. ¹⁷ Pisi na amiu ve ayumaē wowe re, ana monar amiu na akilali akilia suri punu ga la naþa kieta Suþe naga sinenan sape akila.

¹⁸ Pisi na amiu na monar ve amun re si kuruta na

munena vano vano-o aki-lalu p̄arimiu, vanon p̄elaga nene, p̄isi na naga kilia kila kare make ke sina ga ki-amiu malena lala. Ana amiu na monar aule ga e Ninuna Wa. ¹⁹ Popon naṣa amiu asunyu visena na Tus na Yauena lala, a yauena wa lala, a yauena na yeluarena Ntewa lala van amiu, a amiu monar ayau e yauena wa lala, vena aieluar kieta Suṣe e sinemiu la wetelu. ²⁰ A vanon suri la punu ga, silaga amiu asuṃa avisa potena va Arimata Ntewa, e kia kiena kieta Suṣe, Yesu Kristo.

Pelaga na talopaena

²¹ Amiu li nalelagaena lala, yerm̄ene a sira, monar avatanon amiu, sa ke ga naṣa asuṃa apatanon ke Kristo.

²² Amiu sira la naṣa atalopa, monar avatanon womiu lala, sa naṣa asuṃa apatano ke pa kieta Suṣe, ²³ komin naṣa yerm̄ene naga pe p̄arin wona, naga sa naṣa Kristo naga pe p̄arin kiena lotuena, naṣa lotuena nene naga pe tasnena, naṣa naga tamalia. ²⁴ Komin suri nene, sira lala la monar avatanon wola lala e suri punu ga, sa ke naṣa lotuena kiena ne Kristo suṃa patanon ke naga.

²⁵ A amiu yerm̄ene la naṣa atalopa, monar asitom manene womiu lala, sa naṣa Kristo naga sitom manene kiena lotuena, ana naga taṃan kiena malena

vanonia. ²⁶ Naga kila kiena lotuena mekiki, a naga kevania e wii, a e kiena visena, ana naga miawa pa Ntewa. ²⁷ Kristo naga kila sanene vena kilia were kiena lotuena imi puna, naṣa naga pe wa naṣa pe wa ruru manene laa sike na, sane sira m̄ee tai, naṣa naga suṃate ke sape talopa, naṣa naga mekik ruru po, a naga pe namname re poli, a sa naṣa amiyowau ruru tanea naga po na po. ²⁸ E p̄elaga m̄ena nene, yerm̄ene naga monar sitom manene wona, visuar ruruia sa ga naṣa naga pisuar ruru ke ga tasnena. Yerm̄ene naṣa naga sitom manene wona, naga suṃa sitom ke sina ga naga. ²⁹ Yaru la ve asuṃa avisu kare re tasnela lala, pona akila kare la, peraga, ana yeririna la asuṃa apagan rurula, a la asuṃa apisuar ruru ke tasnela lala. Naga nene naga sa ke ga naṣa Kristo kila ke pan kiena lotuena, ³⁰ a ita na tekilia ruru suri nene po pap̄isi, komin naṣa ita na tepe kinakinas nen tasnena lala. ³¹ Visena Wa naga pisayu m̄ena ga p̄isi rui, naṣa yerm̄ene amio wona, lalua na aimi ave tasnela ve taaga ga, naṣa naga pisa pisape

“Komin suri ne nanene, yerm̄ene ligan ari-mana amio anena, vano vilolar wona na sira, ana lalua aimi

sane ave taaga ga narui.”

³² Visena Wa nene, visena urmi tai naga sumã ea, naña sumo naga sane navi-sawanena ga tai, ana nana-gane, nekilia nesape visena nene naga sumã pisawal ke Kristo amio kiena lotuena ne. ³³ Ana ve asitom re avisave visena nene naga pe pisa amiu re m̃ena poli, peraga, pisa amiu ke m̃ena ne. Ee lelaga p̃a, amiu yerm̃ene lala, monar asitom manene womiu lala, sa ga naña asitom amiu ke ga, a amiu sira m̃ena ga lala, monar avatanon womiu lala.

6

Pelaga kiena ne sisi lala amio arimala lala a anela lala

¹ Sisi lala, amiu na ape sa naña li nataveveena Kristo, amiu alogear arimamiu lala a anemiua lala, sur ne nanene na mesmesun naña amiu akila. ² Navisaluaena tai e Visena Wa kiena ne Ntewa pisa sanini, naña pisape “Amiu na ato ga tano e arimamiu amio anemiua lala,” a naga nene navisaluaena na sumo naña kiena navisaarena tai teke metava e a, ³ naña naga pisa, pisape visae akila sanene, *“p̃isi na sur na kiamiu malena lala kilia kiriri wo, a vena p̃isi na kiamiu malena e porotano nini naga ve piavi.”* Naw 5:16

⁴ Amiu arimala lala a anela lala, sinemiua la ve vilul re va narimiua lala silaga, vano vano la sinela kar amiu ke sina ga. Ana amiu na monar akawe ruru la mesmesu, a amiu avian la, a akipian la e mrapa na kieta nalelagaena e Kristo.

Pelaga kiena ne yaru na yumãena amio kieta yerkaawa lala

⁵ Amiu yaru na yumãena lala, alogear kiamiu yerkaawa lala na yomarava nini, sa naña amaraun la, a avatanon la, a amiu monar akila sanene e sinemiua la wetelu, sa naña amiyumãe ke kiena ne Kristo. ⁶ Amiu na pe pon re asumã akila ve sanene e pogos ga naña la asike amio amiu poli, vena amiu akilali ga naña la akekaran amiu, ana monar akila suri la naña Ntewa naga sinenania silaga, amio kemua sinemiua lelaga, sa naña amiu na ape yaru na yumãena kiena ne Kristo. ⁷ Amiu na monar akekaran kiamiu yumãena lala, a popon ve akila re si yumãena sa ke naña amiyumãe ke ga pa yaru, ana akila sa naña amiyumãe ke pa kieta Supe. ⁸ Amiu na asitomli sa naña visae yaru tai naga pe yerkaawa tai, pona naga pe yaru na yumãena ga tai, ana pe suri korena ga, p̃isi na Supe naga lamaran suri wo vania torokin kiena yumãena wo lala.

⁹ A amiu yerkawa kiena ne yeririna na yuññaena lala, amiu mña ga akila mesmesu va kiamiu yeririna na yuññaena lala, a ve avisin re sinekar van la silaga. Amiu na asitoñña, naña amiu amio la, amiu punu ga kiamiu Yerikawa taaga ga naña sike ma e peni, a naga suña kila maran taaga ga pa yeririna la punu ga.

Tekila mara pa yermare

¹⁰ Lavisi ke nekila make kiau visena narui, ana nesitom nesape nevisa van amiu sanini, amiu añareran manene li naña amiu añarera e kieta Suñe, amio kiena pupia namareraena.

¹¹ Amiu na ayen kulsota mñarera na mara lala naña Ntewa naga mla pan amiu, vena amiu akilia asuññalu, a akilia asuwo mraai kiena ne Yermare, amio kiena navisokanen viowa lala naña naga suña kila ke pan amiu. ¹² La naña ita tesuñña tekila ke mara pan la e kieta malena, la pe ape yeririna re poli. Ita tesuñña tekila ke mara pa namareraena tañena la ne, amio yerikawa lala kiena ne yermare lala, amio suñe lala kiena ne la naña nanagane la ape purñes nen yemalolo e yomarava nini, a tesuñña tekila ke mña mara temio kimi viowa la nene, naña la moki liu, naña asuñña ke e yo punu ga.

¹³ Ana popon ayen ruru suri na kilaen mara kiena ne Ntewa la nene narui, ana

pogos punu ga a e legiena punu ga, naña Yermare naga imi vena kila mara van ita, ñisi na ita tekilia tekila mara va nasinekar la nene, vano vano ñisi, ana ita tesuññalu mñarera ke tesike na wa.

¹⁴ Pogos naña amiu asuññalun kilaen mara sanene, kiamiu sur mñarera nakilaen mara lala na sanini narui. Kulka naña apereari e mñeñmiu, naga sa naña amiu apuarar ñelaga na lelagaena. A kulsota mñarera na kilawoen yepemiun vanon mraai lala, nanene na sa naña amiu apuarar ruru ñelaga mesmesu suña e kiamiu malena lala wetelu.

¹⁵ Ana pupia kulus nen lamiu na yalena, naga na sa naña amiu asun ke asape ava avisawal Nalologena Wo na suññarena.

¹⁶ Kulñave nene naña amiu na apuararia nakilawoen mraai kiena ne Yermare la nene, naña kapi pivavaga ke e la, nanene naga sane kiamiu naviawaen mñarera e Ntewa.

¹⁷ A kiamiu kulparimiu na mara, naga sane natamaliaena, naña Ntewa naga mla pan amiu, a playu na kilaen mara kiena ne Ninuna Wa naña amiu awaria, naga sane Visena Wa kiena ne Ntewa.

¹⁸ A amio suri la nene, amiu na monar alen mña ga, monar aviun tan Ntewa vena iila amiu. A silaga monar alen e namareraena kiena ne Ninuna Wa, a ñisi na monar asitoññal li nalelagaena wa tañena la silaga e kiamiu leniena lala, naña

maramiu ve kawa re pogos tai. ¹⁹ A naga ke sina ga, amiu na monar alenwo inu m̄ena ga, vena p̄isi na Ntewa naga la pulmas na visena tai van inu vena nevis, vena ve nesitom p̄ele re naḡa nekilia nelologon Nalologena Wo kiena ne Kristo, naḡa sumo naga su tapoloun yeririna lala, ana nanagane, p̄isi na nem̄areran naḡa nevisawal van la. ²⁰ Inu na nepe yaru na lologonen Nalologena Wo nene, ana nesike e yuḡa nakoarena, ana amiu na monar alenwo inu vena ve nesitom p̄ele re naḡa nelologon Nalologena Wo nene e nini, sa naḡa mesmesun ga naḡa netaḡa.

Suḡe Yesu Kristo, naḡa p̄isi na ita tesitom naga vano vano-o, ve uro re, sanene.

Inu, Pol.

Visena maro kiena ne Pol

²¹ Inu sineun nesape vena amiu na akilia kiau suniena lala, ana komin sur ne nanene yoko neligan kieta erau wo nene, Tikikas, im̄asu pun amiu. Naga na p̄ar yepe m̄aen yuḡaena lala kiena ne kieta Suḡe e yo nini, ²² ana p̄isi na naga visawal van amiu visave imimi mesike sanape, vena amiu na akilia aloge wo si e imimi.

²³ Ana sun̄arena, sitomena a naviawaena la apitom kome Ntewa Arimata, a Yesu Kristo kieta Suḡe, la asuḡa amio ita, amio m̄ena li nalelagaena la punu ga. ²⁴ A lemamienna kiena ne Ntewa naga sike e amiu, a e m̄ena ga e ita punu ga naḡa tesuḡa tesitom manene laa kieta

Maki Naĵa Pol Siria Pa Pan Li Nalelagaen Wa Lala Nae Garu PILIPAE Visayuena Na Tusi Nene

*Komĉasnen suniena plas
na tusi nini*

Pol siri ĉmaki nene pa e ŝumare nae Piliĉpae naĵa la nene ape yaru ĉesa nae Yurop naĵa Pol mlologon ĉesan lologena wo pani la, ana apimi ape li nalelagaena. Piliĉpae naga pulkumali keviu tai na lepas ne Masetonia, naĵa sike vatanon Parin Suĉe keviu nae Rom. Pol siri ĉmaki nini e pogos tai naĵa ĉeke e yuĉa naloge viowaena, a e poglis nene li nalelagaena laĉasa asuĉa akawe naga, a naga miloge piowa ĉnena e vianena na visokanena naĵa sike loyuĉa e ŝumare nae Piliĉpae. Maki nini kila meraravan naĵa Pol naga ĉasine ga Ntewa, a naga kekara na kekara, ana tekilia sane naga sanene komin naĵa naga mlelaga ĉarera e Yesu Kristo.

Pol siri ĉmaki nini vena visan potena van li nalelagaena lala nae Piliĉpae naĵa amiila naga e ya naĵa naga sinenania. La nene amligan kilavaru laĉasa pa pania vena iilaen naga, a naga siri ĉmaki nini pani la,

vena visirluaen kiela sitomiena vena alelaga ĉarera e Yesu Kristo. Naga kila sanene komin naĵa visae aloge sane naga ĉeke yuĉa naloge viowaena, ana pe aloge viowagan vaĉisi.

Naga pisa pan la vena akila kiela sitomena la ŝumaga tano, sane sitomena kiena Yesu Kristo. Pe pon re avilave poli, a asuĉa asitom la ga. Naga pisa panila sape kiela maliena viu naĵa sike e Yesu Kristo, naga suri naĵa Ntewa mla korenan ga sanene pan la e kiena lemamiena, a atol ga e kiela lelagaena lala. Pe atol re kome naĵa amlogear navisaluena kiena lus nae Israel la poli, peraga, atolia komin amlelaga ga e Yesu Kristo.

Pol sinenan sape li nalelagaena lala nae Piliĉpae monar atol ĉelaga kiena Yesu Kristo. Naga sape la naĵa asikol la ruru e Yesu, Ntewa mla ŝumare na lelaga sike e kiela maliena, a kila la asuĉa akekara luwega.

Pupia suri tai naĵa Pol pisayu e ĉmaki nini, naga sape li nalelagaena lala monar asikol ruru la amio Kristo, monar akekara, a kiela sitomena lala a kiela lelagaena lala ŝumal ĉarera e naga silaga. Maki nini kila merarava pan ita naĵa Pol naga sinen sii paĉisi li nalelagaena na ŝumare lala nae Piliĉpae.

*Komĉasnen tusi la na nini
Visena ĉesa 1:1-11*

Suri la naḗpa Pol sumḗa
mloge ke piowagania
1:12-26

Malena kiena yaru naḗpa
mlelaga monar taveve
maliena kiena Kristo
1:27—2:18

Pol sape vitetalia Timote
va gar pun la, a pitetalia
Epaprotætas ḗpasuḗe si
pa umḗa 2:19-30

Le Piliḗpae lala monor avi-
suar la e kiela sinekar
lala 3:1—4:9

Pol amio kiena erau lala
nae Piliḗpae 4:10-20

Visena maro 4:21-23

Visena na sumo

¹ Maki nini, yar na yumḗae
korenena la lua kiena ne
Yesu Kristo, nane imimi lua
Pol amio Timote, imimi lua
mesiri pimḗasu pan amiu,
naḗpa asike e pulkumali naḗpa
Piliḗpae, nane amiu naḗpa ki-
amiu malena su ruru ke
amio Kristo, sane ape li nale-
lagaena wa lala, amio ki-
amiu nasumonena lala amio
kiamiu yaru naiilaena lala.

² Imimi lua mekekaran nav-
itawe amiuena sina ga e
mḗaki nini, e kia kiena ne
Ntewa arimata a Suḗe Yesu
Kristo, a imimi lua mepiun
tan lalua nene, vena aligan
lemamena a sumḗarena sike
amio amiu nanagane.

Pol mlenwo la

³⁻⁴ In na nesitoḗmal amiu
lue ga e kiau leniena, a
nekekara lue ga nalenwo
amiuena van kieta Ntewa,
a navisaen potena paḗisi
vania vanon amiu. ⁵ In
na nesitoḗmal ke kiamiu

navisuarinena, amio mḗena
kieta nayumḗae veragaena
e lologena wo, siar e naḗpa
nesiar kiau yumḗaena e
amiu, pimi tol nanagane,
ana nepisa potena paḗisi
vanonia. ⁶ In na nemlelaga
sane Yarkeviu, naḗpa siar
kiena yumḗaena wo tai pan
amiu rui, naga kilia yumḗaen
mḗa vano, vano-o kila ruru
punu ga, nane e pog maro
e pupia legiena nena kiena
Yesu Kristo. ⁷ Vanon sanene,
avisu naḗpa in na nesitom
amiu manene laa, nepisu
sane nanene na mesmes
ga, vanon tepa lele taaga
loyumḗa e lemamena kiena
ne Ntewa rui, ana amiu
amio inu e sur la mok rui,
e pog wo a e pog mḗarera.
Nanagane, nepuarar ruru
amiu asike e loyumḗa e inu,
kila sane nanagane pogos
naḗpa nesike e yumḗa na
koaena, sa ga naḗpa ita mḗa
nena ga. Pona visae aure
inu neva e kumal na visen
van inu vanon lologena wo
naḗpa nepisawal ke ne, ana
sa ga amiu amio inu ke na
wa. ⁸ Nanene pe lelaga ne,
ana Ntewa kilia sape sineun
mḗena nesape nevisuli si
maramiu wa. Awe, sineu
miye amiu paḗisi ne, e
sinesiena make ga kiena ne
Yesu Kristo. ⁹ Nemlenwo
amiu sanini, nesape kiamiu
sinesiiena monar kapuru
lue ga, a visae na kiliaena
wo a namanmaruaena a
navisuveve ruruena sike e
amiu, kilia iila sinesiiena
nene imi ve keviu lue van

amiu. ¹⁰ Visae amiu ave sanene, yoko akilia atol make ga þelaga wo lala, a aligan la naþa piowa, ana yoko kiamiu malena la kilia merarava ruruia, taþatete sur tai te amiu e legiena kiena ne Kristo naþa pimi ke ne. ¹¹ A kiamiu malena la yoko kilia war mras nen mesmesuena naþa Yesu tañan pimi, ana sane kieta mrapa tai naþa tekilia teyeluar Ntewa vanonia, a Ntewa mēna þarwarinia.

Pol sike e yumā na loge viowaena a kila ke yuñāena kiena Suþe

¹² Wolai a vineu lala, nesape nevisawal sur nene van amiu, sane pog mārera la naþa pimi pan e inu ke narui, pe akilawo re kiau yumāena poli, peraga. Ana la amiilaar ke lologena wo kilia va manene laa sane e yo taþena la ve moki. ¹³ E lepas nen yo naþa nesike ea, nepisu sane yar na mara lala amloge lologena wo na rui, a pa tol yar na mara e yumā mēna ne Þarin Suþe Sisa, amio yeririna taþena lala. Nanagane na la apisu kilale rui sane noþar ke sen la nene vanon ga Kristo. ¹⁴ A nekekara mēna paþisi navisuen pogos naþa apuarnu e yumā na koena sanene, ana sur nene pe kila re li nalelagaena taþena la e nini amarau poli, kila la asumāl mārera laa sane e Suþe, a

aþaryon ke ga navisawalen visena kiena ne Ntewa.

¹⁵ Lala amlologon visena kiena ne Ntewa, pe sur wo tai, ana sur taaga, nekilia sane lala þasia amlologon Navisaarena Kristo e sitomena wo, a þasa amlologon e sitomena na vielueena a e sitomena na vilaveena. ¹⁶ A la naþa amiyumae po, apisuluþar sane nesike e yumā na koena vanon nemiyumāen lologena wo, ana sinela piowagan inu, a sinela piowagan la naþa pe amloge re poli wa, þisi na amlologo e sitomena wo. ¹⁷ Ana lala taþena nene, amlologon Kristo ana pe ape lelaga re poli, aþarwar la paþisi, asape akila sa naþa lala towe ava metava. Sitomena viowa na sanene sike e la, ana pogos naþa apisu naþa apiar ruru inu e sen la nene nesike e nini, apisu sane pe kiela pog naþa akilia avisayu kare kiau kia e maran yar lala, ana akila kiela kia la pa metava. ¹⁸ Ana ane kilia, pona pe pe sur re tai poli. Kiela sitomen po yo, po piowa ga, ape lelaga pona apisokan, ana pupia sur keviu, kia kiena ne Kristo monar molue lue ga silaga.

Pol sape mal pona mare, ana sinenan ga Yesu

¹⁹ Sur ne na nene, pogos naþa nemloge asape kiena kia momolue ke pa rui, nekekara paþisi, ana sa pogos tai neloge sane kiena

yumãena pa po manene laa ke sane, yoko neloge won vaþisi. Nanagane na nepisu sane amligan nu nemëke ga e marena, a pe mrapa re naþa nekilia nemolue si vetan poli, ana pogos naþa nemloge sane kiena yumãena pa ke meta sanene, miilalua si kiau sitomena sane, kila nemlelaga manene laa sane e kiamiu leniena lala, amio naiilaena wo kiena ninuna ne Suþe Yesu Kristo, sane yoko wo van inu na wa. ²⁰ Sanene na, nanagane na nemlelaga ke m̃arera sane akilali ya ne van inu, ana taþatete akila nekila sur tai na piowa pona nevisa visena tai naþa yoko nemawan sina e marana ne Ntewa. Visae nemal po nemare, pe pe sur re tai poli, ana sane pogos punu ga, sineun ga nesape nem̃areran ga kilaen kia kiena ne Kristo va manene laa metava wa, e sur ya naþa yoko vim katen inu po e tasneu. ²¹ Sur naþa teke e inu sanini, visae nemali, malena wo kiena Kristo sike amio inu, a visae nemare, neva nesike nemio naga, naþa wo manene laa sane. ²² Visae ve kiau naþa nemal ve piavi re laa sane e yomarava nini, naga nene sane kiau yumãena wo þas sike ga wa nayumãenena, naþa kilia war mras wo lala. Sanene na, nepisu sane visae nesumã, woga ga, a nepisu m̃ena sane visae nevano, naga m̃ena

poga ga. Pisi na nemninue narui, popon netaveve nape narui. ²³ Marera pan inu paþisi navisuveveen mrapa lua nene navisa lologiaena tai, komin e kana lepas tai, sineun manene laa paþisi vena nevetan yomarava nini, neva nesike nemio Kristo, naga po manene laa sane, ²⁴ ana nepisu m̃ena sane popon manene nesu re laa e nini sane, vena neiila amiu re laa ga wa. ²⁵ Sitomena ne sanene m̃arera ruru pan in rui, kila sane nanagane nepisu sane nekilia nevisaar van amiu sane nesike si nemio amiu na wa, vena kila amiu akilia aloge wo e kiamiu viawaena e Kristo Yesu, a vena akilia ava re laa sane amio naga. ²⁶ Ve sanene, yoko visae pogos tai neim nekaten amiu, nemlelaga sane yoko kila amiu akekan Kristo va laa sane na wa, a yoko wo vaþisi van amiu, kila ne kiamiu sur la ve moki sina na visaen potena vania a ve nayeluaren naga vanonia.

Monar teyakolkol ita ruruia, teve taaga na kilaen mara van sinekar lala

²⁷ Ana pe tekilia ruru re poli wa sane yoko ve sanapen inu, ana pe sineun re asitom̃al in poli, asitom̃al amiu ga. Ayal ruru e mrapa na po, memes sane ave yar na lologena wo kiena ne Kristo. Pona nekilia neim nakaten amiu, po taþatete neim̃asu, ana popon visena tai tol kiligau sane apiawa m̃arera ruruia,

naḡa ninumi ve taaga, kiamiu sitomena taaga ḡa na suḡalen lele taaga, amiu aḡareran sane nalelagaena e lologena wo monar tauluia. ²⁸ Ana ve amarau re, asitom korenan sur la naḡa sane yoko nasinekar la akila van amiu. Pogos naḡa neloge sane akila ke sanene, yoko wo na wo, vanon yoko ve kile kiena ne Ntewa van nasinekar lala vena welualaen, a ve kile kiena ne Ntewa van amiu vena kiamiu natamaliaena. ²⁹ Lelaga, yoko monar akila mara amio sinekar la sanene, vanon pogos naḡa Kristo ḡere amiu ape kiena, pe naga re ḡa naḡa aviawa ḡa e poli, ana yoko akus ḡena naloge viowaena vanonia. ³⁰ Monar ve sanene, vanon nanagane tokus pae ke pupia mara nene naḡa nanua apisu ke nokusia, pona naḡa asuḡa amloge ke asape nokus ke ḡa wa.

2

Pelaga wo naḡa popon tekila van ita

¹ Sineun nesape amiu asitom veveli kieta malena wo temio Kristo. Kiena ḡelaga miilalua ke kieta sitomena, ne! Kiena sinewoena kila temloge po paḡisi, ne! Ninuna kila tesu ruru ke temio ita, ne! A naga kila naḡa malumuena a sineyeena pulen ita, ne! ² Ana komin naḡa kila po pan ita sanene narui, nesape

neiakol visena, neviun van amiu vena ḡa re laa sanene. Awis, ataḡan sane kiamiu ḡelaga pan amiu, yoko maran ve taaga ḡa sane kiena ḡelaga pan amiu. Ana popon sinemiu iyeiye amiu, maran taaga ḡa sa naḡa naga sinen miye amiu, a kiamiu visena a kiamiu sitomena ve taaga. Visae nevisu akila ve sanene, yoko neloge wo, nekekara na nekekara. ³ Ve sanene na, ve teyuḡae re si e ḡelaga na puluvisena, a ve tekila re si suria e nawarwarena, ana monar temalumu, tekila ita tesu ḡa tano, tevisu yar taḡena la sane apo taulu ita. ⁴ Ve tesitoḡal ita re ḡa, amio ya naḡa pe kieta, ana monar tesitoḡal ḡena yar taḡena lala, amio ya naḡa pe kiela. ⁵ Popon sitomena wo amio ḡelaga wo su lue ḡa e ita, komin naga nene naḡa tepisu e Kristo Yesu rui, naḡa pō na po.

⁶ Naga sa naḡa yauena tai naḡa pisa, sape Naga pe nono na Ntewa, sa ḡa Ntewa, ana pe ḡareran re sape naga maran taaga ḡa sane naga poli.

⁷ Naga mligan kiena nau-rarena sike ma e peni, pitomi sane pe sur korena ḡa tai, paeme e yomarava nini pe yeririna pimi sane yaru na yuḡaena naḡa pe kiena kia re poli.

8 Lelaga, yaru nae ma e peni
pimi pe yeririna nae
yomarava,

kila naga pito tano, sike
ga tano vatanon
nasinenanena kiena
ne Ntewa,

pano-o tol marena e laki
torovia.

9 Mlogear Ntewa, þisi na
Ntewa pisirlua naga

kila kiena kia pa metava
manene laa taulu kia
taþena la punu ga.

10 La nae peni, a la nae
yomarava, a la nae yo
tano, yoko la punu ga
avatanon kia nene,

yoko akinai vania.

11 Yoko gola la punu ga
ayeluar Ata Ntewa,
avisawal e marala,
asape Yesu Kristo
naga taaga ga pe Suþe.

12 Erau lala, e yo nene
tepisu naþa Yesu mlogear
arimana, a amiu mþena,
nanua nepisu sane amlogear
ruru mþena naga po na po. A
nanene pe nakilaen re ga
e pogos naþa nesike nemio
amiu, komin nanagane pe
nesu re si nemio amiu poli,
pe nepisu re si sane asike
sanape, ana sineun nesape
asumþa akila mþa wo va laa
sanene.

Amiu atol pa natamali-
aena rui, ana piowa naþa
atotano korena amio, ana
monar asitom urmi ea.
Monar avisuar ruru pupia
yumþaena wo naþa Ntewa
kila, na amiu mþena monar
ayumþaen lili mþaga yumþaen
wo lala na malena viu nene
naþa naga mla pan amiu.

13 Ana nemlelaga sane tekilia
tekila, vanon Ntewa ga
nene miyumþae ke e kieta
malena la ita peve taaga,
miila ruru ita naþa kieta
sinenanena lala kekaran na
kilaen kiena sinenanena, a
kila ita ke tetorokin nakilaen
suri nene.

14 Ve sanene, sur ya
naþa sike e lumomþa na
kilaena, okila naþa sane
ve ovis mumu re pona ve
ovisamaran re sina. 15 A
tesike likan yeririna la
naþa akuspal mrapa, kiela
sitomena la pe taþena, ana
ita monar teyumþaen kieta
yumþaena la wo a mesmes.
Ita tepe narina ne Ntewa
lala, naþa popon kororaki
ve to re e ita, a monar tepe
sane kap tego na tegolien
mrapa kiena yeririna la na
yomarava nini. 16 Amiu

auarar ruru visena na-
malena vanla, vano-o tol
pogos naþa pupia legiena
naþa Kristo yoko wasuþe
sina ga. Sanene yoko nekilia
nevisu sane pe nekikir
korena re poli, ana nekilia
nevilaven amiu, nekekaran
amiu sane ape pupia mras
nen kiau yumþaena tai.
17 Pona vano-o tol sane kau
kuruta monar lau vanon
amiu, a visae ve sanene,
nepisu sane pogaga. Nepisa
sanene vanon nepisu sane
amlogear Yesu, akila amiu
sane pe kuþaþaena tai pan
rui, ana popon in mþena
nekekaran nataþanen kiau
malena vanon yumþaena
kiena Suþe.

18 Nane
nepisa, sane nekekaran ve

sanene, a popon amiu mēna akekarania, komin naþa visae Ntewa kekaran sape nekilia netarlu kiau malena vanon yar taþena lala, naga pe sur wo tai naþa naga kila van inu.

Pol sinenan sape vitetalia Timote va pula

¹⁹ Nesape nevisawal mēna van amiu sane e lepas kiena ne wolai nene Timote, kiau sitomena mārera e Suþe Yesu sane yoko ve ve pi-avi re, yoko nevitetalia naga iņasu pun amiu. Nekekaran naga paþisi sane popon sa naga iņas visu amiu, þisi na war kamiu lologena þasia imi si pun inu, naga nene yoko kila neloge wo vaþisi ne. ²⁰ In na nepisu sane pe nekirawal re si yar tai e nini poli sane naga, po torokin naþa nevitetalia iņas pun amiu. Naga kiena sitomena maran taaga ga amio inu, ana nekilia sane visae naga sike amio amiu, neþasine sane yoko naga sitom lue ga nakilaen wo manene laa van amiu. ²¹ Lala taþena la asikena, ana pe asa re naga poli. In na nepisuluþar la rui, sane sur naþa keviu e kiela sitomena, nane sur la naþa pe kiela ga, ana sur kiena ne Yesu Kristo, asitom korenan la ga, pe asitom re urmi e poli. ²² Ana Timote tekilia sane naga po paþisi, akilia rui sanape naþa imimi lua memiyuñae veraga e lologena wo, pano-o nepisu naga sane pe naruu,

a naga pionu pe arimana. ²³ Sanene na, nepisu sane pe yar mesmes naþa nevitetalia iņas pun amiu, ana taþatete iņas na wa. Sineun nesape nevisuli sane yoko ve sanape van inu e nini sumo wa, þisi na naga kilia iņas visawal van amiu. ²⁴ Visae yoko imi wo van inu e nini, nekilia sane yoko ve naga taaga re kilia vim katen amiu, ana nemligan ke e kiau leniena, nemlelaga e Suþe sane yoko ve ve piavi re na yoko akilia avisu mēna marau neiņas nakaten amiu.

Pol pisu sane popon Epa-protætas wasuþe si pula

²⁵ Sur taþena si tai na vi-sawalen van amiu, sane ki-eta puruvi naþa Epaprotætas, naga mai paþisi pano-o nepisu sane popon neli-gan naga wasuþe si pun amiu sumo wa. Amli-gan naga pimi sane kiamiu naiilaena tai van inu, þisi na memiyuñae veraga po, mesuñal veraga e mara na po na po. ²⁶ Ana sur taaga ga, maiena nene tolia, kila kare naga paþisi, kila naga sinenan pisape iņas si uña pun amiu. Ana po-gos naþa naga mloge sane lologena na kiena maiena nene tol pa pulkiligamiu la rui, kila naga mloge pi-owa li mñaga, sinenan pis-ape visu amiu. ²⁷ Lelaga ga, maiena nene kila naga piowa pano-o mepisu sane yoko taulu naga, þisi na Ntewa sinen miea, pe mare

re poli. Ana in na nesitom ke sane Ntewa pe sitom re ga naga poli, a sitom in mēna ga, komin visae naga mare, yoko mārera mēna van inu vaþisi, yoko yakol si pupia naloge viowaena metavan si naloge viowaen taþena la naþa nokus ke pa rui. ²⁸ Ana pogos naþa mai sanene, sike amio in e nini wa, nemloge piowagan naga paþisi. Ana sineun nesape neligan naga wasuþe sina pun amiu sumo wa, a nemlelaga sane amiu mēna akekarān navisuen si marana. ²⁹ Sineun awor-worun naga e kia kiena ne Suþe, avisuar ruru naga sa naþa apisuluþar naga amio kiena yuṁaena la naþa kila e nini. Yar sur la ne sanene, popon tevisuar ruru la, po tewatanon la, ³⁰ vanon akila yuṁaena kiena ne Kristo po paþisi. Epaprotætas naga sanene narui, naþa sitom manene laa yuṁaena nene, kila sane pe sitom re nena kiena malena, lavis marena. Naga kila sanene vanon sinenan sape ve masisu e yuṁaena naþa amligan e limana. Amiu taþatete aim aiila inu, ana amligan naga kus kiamiu kia, pimi miyuṁae ke amio inu. Naga nene aure si naga, akila wo vania.

3

Sineun nesape nekilia ruru Kristo va laa sane, amio kienu puriu kawaena

¹ Wolai lala a vineu lala, poga ga, nesape nesiar

nokotawe kiau visena narui. Visena maro tai na po na visaen van amiu sa nini, amiu akekarā silau e malena wo naþa Suþe mla pa pan amiu rui.

Pona visena nene nepisa pa pan amiu yam moki yo rui, ana ve sinemiu kar in re, pe nesitom re sane piowa navisaen sur wo la van amiu yam ve moki poli. Naga poga ga pan inu, a nesitom sane kilia iila amiu mēna ve keviu va laa sane.

² Ana visena viu si tai naþa nesitoṁalia navisaen van amiu sanini, sane monar avisuar ruru amiu e la naþa amlologon manene ke þaviu. Na nene komin naþa aṁareran ke asape þaviu nene naga ga pe mrapa naþa yar kilia va loyuṁa e nam-ratava puna Ntewa, ana na nene na pe lelaga re poli. In na pe nekekarān la re nena ga, nepisu la sane amiyuwon polo la asu kar ke ga sa ga lokul tetan lala.

³ Sur naþa tesike ea, naga pe sa re nena nene. Ve tevisu re sur la naþa sike e kulu yepeta, sane sur ne la nene kila ita temerarava e marana ne Ntewa, komin temlotun ke naga e ninuta, a tekekara silaga na sitoṁalen Yesu Kristo kila ruru ki-eta mrapa. !Visae asun avisasa ke asape þaviu ga kila Ntewa kekarān yeririna, monar tevisa tesape naga pe na yepela ga. A naþa nalelaga nena, nane ita tesike e ne, naþa tete plan ke þelaga viowa a sitomena viowa vetan kieta malena lala!

⁴ A visae aņareran ke asape Ntewa yoko kekaran ita e sur ga la naþa sike e ita, pona nekilia nevisawal kiau sane yoko wo taulu si kiela yo. ⁵ Visae nevisa plan kiau sunena lala, yoko amiu avisu punu ga mesmes ga a po, taveve þelaga mesmes a ya naþa navisaluaena pisa. Sur na sumo, e kiau lus lala, in na nemolue mesmes ga e pupia lus nae Israel, nepe kuruta mal mesmes e luþ kiena ne yermarua apua naþa Pensiman. Ata amio auia, lalua ape Yu, kila in mēna nepe Yu nena napo. A ta sina, in na nepaeme, tol kana wik taaga ga, nepe þaviu. Sur taþena, e lepas na navisaluaena kiena le Yu la, in na nepim nekeviu nepe kana Varasi tai, nepian ke pan yar taþena lala. ⁶ A nanua sumo, e lepas na iilaaren lotena kiena le Yu la mārera, in ke narui naþa netaulu punu la la sane, nekilaþel ke ga li nalelagaena na sumāre la paþisi. Ana na maro naþa nekilia nevisa, e lepas na þelaga mesmes, pe visen re nena tai e navisaluaena kiena le Yu lala naþa nekiarovia pona nekila palia.

⁷ Sur la nene, kila apisu sane in na nepo paþisi, amligan inu nemon laa metava paþisi. Ana pogos naþa Kristo pio inu, pe nepisu re si sur la nene sane pe sur wo la pan inu poli, nepisu la sane pe sur na kokovioena ga, þisi na nemligan punu

ga sike na, nesiraun ga naga. ⁸ Lelaga, nekilia nevisave ve sa nene narui, sane nepisu ke sur la punu ga nene pe sur na kokovioena ga, ana sineun ga nesape nekilia Kristo Yesu sane pe Suþe e kiau malena, va re laa sane. Sur taaga ga nene nepisu po, naþa kana napoena po taulu sur taþena la punu ga, ana naga ga nene sineunia. Sineun manenea na tolen naga e kiau malena, ana nekilalu kiau sur taþena la punu ga kominia, ana woga ga, nepisu sur la nene sane pe kororak ga pan inu.

⁹ !Visae kiau malena kilia yakol ruruia e kiena malena yoko wo na wo! Naga nene in ga taaga taþatete neyumāenia, komin naþa sa nelogear navisaluaena, yoko navisaluaena taþatete kila sane netorokin naþa nemesmesu e marana ñe Ntewa. Ana kieta mrapa taþena natolen namesmesena sumā ga. Na nene, naviawaena e Kristo, a naga pe mrapa namesmesena naþa Ntewa ga pietavan ita ke la naþa temlelaga e narina.

¹⁰ ! Visae nekilia naþa nekilia ruru ga naga, amio pupia puriukawaena kiena ne Ntewa naþa kila naga mal sina ga e marena, yoko wo na wo! In na nekekaran ga na kuspaen naloge viowaena la naþa naga kusia, a visae nekilia netorokin naþa nemaren

marena ta ne sane kiena marena, yoko nevisu wo manene vaŕŕisi van inu. ¹¹ Sur mŕarera ya na sa nene naŕŕa monar nowaro ea, na woga ga, ana monar nekila ga ya naŕŕa nekilia vena netol malena viu na sumŕalen sina e marena.

Sur naŕŕa tesuŕŕa toŕarwaryon ke ne

¹² Nepisayu inu ke sina ga sanene, pe sineun re nesape asitom ke asape in na nesape nepo punu pa rui, pona netol pa kana mŕak rui. In mŕena pere ke ga wa, ana komin nekilia sane Kristo Yesu ŕure inu nepe kiena pa rui, sineun nesape nowaryon lue ga vena netol lele tai naŕŕa naga kilia kekarania. ¹³ Wolai a vineu lala, monar nevisa ruru van amiu, nepisu in sane pe netol re lele nene poli wa, ana yuŕŕaena taaga ga nene teke e kiau sitomena silau, sane in na monar sineu ŕesan sur ya naŕŕa sike varaun inu, ana monar newaryon natauluen sur ya naŕŕa sike e marau. ¹⁴ Sur naŕŕa neŕaryon ke ne, naga sanini, sane kiau malena monar yoko wo ruruia amio Kristo Yesu, vano o yoko in mŕena neve yar tai naŕŕa neloge vioena wo kiena ne Ntewa naŕŕa visa van inu, sape “!Pogaga, ko ovam metava osike amio inu narui!” Sur nene sa naŕŕa tropi tai naŕŕa amligan ruru mŕeke rui, ana tekiririn ke, vena tetaulu ve kieta.

¹⁵ Visae ita ŕŕasia kieta sitomena la marua ruru ŕŕisi, popon teyuŕŕae ve sanene narui, ana visae e sur la ŕŕasia, ita ŕŕasia kieta sitomena la pe marua ruru re sanene poli wa, nemlelaga sane Ntewa yoko kila sur la nene merarava ruruia van la. Pona e sur la moki pe tepim tepo re e poli wa, ana yoko naga iila ita e na wa. ¹⁶ Ana monar towarar ruru naga naŕŕa tepim tepo pa e rui, sane piowa naŕŕa teloru teviepal sina ga vetania.

Ataveve lau

¹⁷ Wolai a vineu lala, nepisa awis pan amiu sane monar ayakolkol ruru amiu, ataveve li lelen lau e mrapa na kiau malena. Visae avisu kilale amiu ŕas sane akila ke po sanene rui, amiu taŕŕena towe lai, ayal ataveve lala lala. ¹⁸ Nepisawal visena nene pan amiu yam mok li rui, a nanagane na nepisa ke sina ga naŕŕa nemloge piowagania, amio wamarau mlau. Nanene komin naŕŕa nepisu ke amiu ŕŕasia sane aŕar ke kia naŕŕa ape li nalelagaena, ana kiela malena ŕarlologia ga sane ape sinekar amio Kristo, amio kiena lak torovia. ¹⁹ Kieta nasinekar la nene, sur naŕŕa amlotunia, naga meŕela ga. Kiela naviowaena lala, popon amawania, ana apilaven manene laa. Sur naŕŕa pulen kiela sitomena, sur

na yomarava ga la nini, ana luasnela, akovio viowa ga.

²⁰ Ana ita, pe tepe yeririna na yomarava re la nini poli, kieta purvanua napo, nane ma e peni metava. Yar keviu nae e nene, nane Suþe Yesu Kristo, kieta natamaliaena, ana tesike e yomarava nini wa, tesuþmate ke naga, tepisusu ke sane yoko ve ve piavi re vitomiñ ita sina. ²¹ Ana pogos naþa visae naga vitomi, yoko yuþmae amio kiena pupia puriukawaena naþa torokin nakilaen sur punu ga su vatanon kiena nasuþenena, ana yoko vilopu ita. Nanagane, tesike temio yepeta marua la na yomarava nini wa, naþa menuu pororowa ga, na ape sur na marena ga, ana yoko naga la tas viu la van ita naþa po sane tasnena, naþa merarava, tego, m̃arera, suþma wo sulue ga.

4

¹ Ve sanene, wolai lala a vineu lala, popon amiu asuþmal m̃arera sanene e kieta Suþe. Nepisa sanene vanon nesitom amiu, sineun amiu paþisi, amiu akila inu nekekara keviu, noþarwarin amiu paþisi, ana sineun nesape yoko wo van amiu silaga.

Visena kiena yeririna þasia

² Nemloge piowa komin nepisu sane monar nevis ve tokaki van kieta sira lua nene, Yuotia amio Sintike. Lalua apis vitawa

pan la paþisi, ana nepisa pan amiu sane sineun lalua monar akila kiela sitomena vito ga tano, vim ve taaga vatanon kieta Suþe. ³ Sira lua nene, nanua nemiyuþmae veraga nemio la po paþisi, amio m̃ena yaru nene Klemen amio yar taþena lala, naþa moþaryon lologena wo pano-o imimi punu ga kiamimi sitomena taaga ga. Nekilia sane kia kiena ne yeririna nayuþmaena punu ga nene asiriar sike pa e tus na malena rui, ana pogos naþa amliþere la sina, nemloge piowa paþisi. Ve sanene, kiau naviunena tai van ko ne, kiau erau naþa nanua sumo tepe yar na yuþmaen veragaena konua rui pimi. Neviun tan ko vena ko na oiila sira lua nene vena aim ave erau wo sina ga.

Visena na iilarena lala

⁴ Ana kiau visena si tai van amiu punu ga, nesape amiu akekara e Suþe, akekaran naga silau. ⁵ Pogos naþa alual pog m̃arera, ava ruru ga, akila sa naþa yar la avisu kilale sane kiamiu sitomena la piayavi ruruia. Akilali naþa asitoþmal lue ga sa naþa ve ve piavi re na, Suþe wasuþe sina. ⁶ Amiu ve akila re sinemiu la pepen sur lala, a e sur ya la naþa imi kate e kiamiu malena, avisa siþa van Ntewa vanonia. Avisaawal vania e sur ya naþa apilasania, aleninia, atagin vania, ana nanene monar akila silau e sitomena na visaen potena.

⁷ Ana pogos naþa aligan sur punu ga e limana sanene, yoko avisu naþa Ntewa yoko ligan kiena suñare e amiu, iila amiu. Kiena suñare nene keyiu paþisi, kilia kila wo vaþisi van ita taulu ya naþa tekilia tesitomia, vano-o kila naþa uarar ruru sineta po kieta sitomena vena mārera e Suþe Yesu.

⁸ Wolai lala a vineu lala, lavis nevisa make kiau visena van amiu narui, ana nesape neiilaar amiu vena kiamiu sitomena la ulen ga sur la naþa Ntewa sinenania. Sur ya na pe lelaga, po sur ya na mon metava, po sur mesmes ya, po sur merarava ya, po sur nowo ya, po sur ya navinaiaiena, po sur ya na yeluarena, po sur taþena ya napo, nanene kana sur ne la naþa po asulue ga e kieta sitomena lala. ⁹ Naga nene pe þelaga la naþa noþaryon ke vena neviani amiunia, pona atol tan inu, pona metavana, apisu e kiau malena. Ana visae avisu sane pe lelaga sane þelaga wo laþas nene sike e kiau malena, nemiye awis pan amiu vena amiu mēna aligan ruru e kiamiu malena lala. Ana visae akila sanene, nemlelaga sane kieta Ntewa nasuñareena yoko sike amio amiu, iila amiu.

Potena e nalaena

¹⁰ Nesape nevisa van amiu nesape pupia kekarena pan inu, sane yam piavi li m̄a ga pe nepisu re sur tai poli, þisi

na netol ga narin nalaena naþa amligan pimi. Nemlelaga sane asitom in m̄a ga, ana nekilia sane amiu pe mrapa re ga naþa akilia akila sur imi tol inu e nini poli. Ana pogos naþa nepisu kiamiu nalaena nene, nepisu sane kiamiu sitomena naiilaena kiau yuñarena mal sina ga, ana nemiyeluar Ntewa vanonia. ¹¹ Nepisa sanene, a pe naga re ga naþa sane nepisape pe kiau sur re poli, vanon sur nene neþarpoyo e rui, sane sur ya na vim katen inu, po nesike sanape, nekekaran ga. ¹² Nesike tano po nesu metava, visokar inu po kau kinanena moki, luñau korena po luñau pule, in na nokom e sur la punu nene rui. Pog viowa pona pog wo, ana mrapa kien Ntewa navawarpoen ea teke ne, a naga pian inu ea, kila neþarpoyo e sur la nene rui. ¹³ Ve sanene, nanagane na nepisu sane nekilia netaulu sur la punu ga naþa þisina vim e inu, nane e pupia puriukawaena naþa Kristo kila ke nemārera ea.

¹⁴ Nesape nevisa sanene, amiu nae Piliþāe, asitom na iila inuena e pog mārera la ne sanene, amiu ape lemam paþisi ne. ¹⁵ Sa naþa apisuluþar pa rui, pogos naþa nesiar kiau nayalinen lologena wo nene, pogos naþa nepetan Masitonia nepano, pe suñare re nena tai naþa miila inu, peraga, amiu ga. In na neþar sur

wo la moki pan la paþisi, a pe lala yar re tai naþa sitom sape ligan sur tai vim poli vena iilaen kiau mrapa pona kiau yuþaena. ¹⁶ Ana amiu apo paþisi, pogos naþa luþau plasia amiilala inu, amligan nalaena la pimi pan inu yam mok li mþaga, pano tol pogos naþa nepa nemiyuþae ke gare gar Tesalonaika. ¹⁷ Nepis ke sanene, pe naga re ga naþa nesape nowar lue nalaena la poli, ana vanon naþa sineun nevisu naiilaena la molue e suþare lala na iilaena yuþaena kiena Suþe. Nanene vanon sane visae akila wo sanene van yar taþena lala, ana kiamiu þelaga wo nene yoko war mrasa, kila sur punu ga wo laa sane van amiu sina ga. ¹⁸ Vanon nagane, nepisa potena pan amiu paþisi e nalaena la naþa apitetalia Epaprotætas þar pimi, netol la punu pa rui. Nalaena la nene pimi, pa taulu ya naþa sineunia, ana nepisu sane nanagane po laa pan inu. Kiamiu naiilaena la nene, sane ponotaninu tai naþa ponos po paþisi, la sane kuþaþaena tai naþa akila pan Ntewa naga pisu po paþisi, kekarania. ¹⁹ Ana nekilia sane visae limamiu plas pogos tai, yoko kiau Ntewa visuvevea lue ga, vanon Yesu Kristo kila pa rui naþa naurarena lala kiena ne Ntewa nae mae peni akeviu paþisi. ²⁰ Sanene,

yoko tesuþa teyeluar kia kiena ne arimata Ntewa silau, yoko teyeluar mþa naga vano-o ve þisi re pogos tai, sanene.

Visena maro

²¹ Aliganlelein kiau visena nene van li nalelagaena wa lala naþa asike ne, avisawal van la apisape nesitoþal la ke silau. Wolai taþena lala amio vineta taþena lala naþa asike amio inu e nini, lala mþena asape avisa pokolulagi po pokolemalo van amiu. ²² Pas si naliganen visena sanene imþasu van amiu, nane li na lelagaena wa la punu ga e nini, amio mþena la naþa amiyuþae kiena þarin suþe nene Sisa e mþana pupia yuþa nene.

²³ Kiau leniena, sane lemamiena kiena ne Suþe Yesu Kristo sike e ninumi u lala, sike likan amiu silaga.

Inu, Pol.

Maki Naþa Pol Siria Pa Pan Li Nalelagaena Wa Lala Nae Garu KOLOSI Visayuena Na Tusi Nene

*Komþasnen suniena plas
na tusi nini*

Kolosi naga pupia pulkumali tai na lepas nae Esia naþa nanua sumo na mēke vatanon Parin Suþe keviu nae Rom. Pulkumali nene sike e purvanua naþa nagane kiena kia Teki. Pulkumali nene mēke yepasnen pulkumali taþena naþa Episas e lepas naþa mrae molue ke komea. A maki nini Pol siria pan yaru na suñare lala nae yo nene. Pol pe siar re suñare nae Kolosi poli, ana pulkumali nene sike lavisin Episas, naþa pupia pulkumali na lepas nene, naþa Pol miyuñae ke e silaga. Pogos naþa Pol sike garu Episas, naga mligan plan ke kiena yaru lala apa amlologon ke lologena wo e yo lala na lepas nene, a Kolosi naga tai naþa mēke e yo la nene. Ana komin suri ne nanene, Pol pisu sane yuñae na visuaren yo nene Kolosi naga mēna sike e limana.

Pol mloge visena tai asape navianiena lala na suñare

nene, asuñae apisa ke asape yaru lala monar alotun ga yerkaawa lala a nasumonena kiena yermare lala, vena akilia ruru Ntewa, a vena akilia atol maliena naþa pulen suri makega. A apiyan ke yaru lala, asape monar ataveve navisaluaena marua e lepas na kinaniena, a suri taþena si laþasa, a monar ave þaviu vena atol maliena.

Ana Pol siri maki nini vena visaluþaren sitomiena viowa la ne sanene, a pisawal visena lelaga kiena Yesu Kristo pan la. Purþesnen sitomena naþa pisa na sanini, sape Yesu Kristo naga taaga kilia la maliena naþa ulen suri makega van ita, a vianena viowa la nene asuñae aþere plan yaru lala aþure matania. Kristo miyuñae yuñae kiena Ntewa na sien yomarava nini, a naga miyuñae kiena Ntewa vena wereplan si yaru la aimi ea. Yaru monar sikol naga e Kristo vena kilia tol malena, a pe mrapa taþena re si poli. Pisina siraunia, Pol pisawal panila e suri la naþa akilia atol e kiela maliena komin naþa amlelaga e Yesu, a naþa asikol la ruru amio naga.

Pol mla maki nene pan yaru tai kien kia Tikikas vena la va van li nalelagaena la garu Kolosi. Tikikas nene, naga yaru mēna nena naþa lalua Onesimās apano, naga mla Onesimās þasuþe si pa kiena yo. Suniena nene sike

e m̄aki kiena Pol naṓa pite-
talia pa puna Pilimon.

Komṓasnen tusi la na nini
Visena ṓesa 1:1-8

Pelaga kiena Kristo, a
kiena yuṓaena 1:9 —
2:19

Malena viu e Kristo 2:20—
4:6

Visena maro 4:7-18

Pol siar kiena visena

1-2 Inu Pol, naṓa in na yaru
nalologena kiena ne Kristo
Yesu naṓa Ntewa naga mli-
gan inu, a nekekara naṓa
nevitawe amiu e m̄aki nini,
naṓa nesiria piṓasu pan
amiu li nalelagaena wa lala
nae Kolosi, naṓa amiu punu
ga ape kiau wolai lala a
vineu lala e Kristo, naṓa
asum̄a apiawa m̄arera e
naga. In na nemio Timote,
naṓa naga sike amio inu, im-
imi lua memlen mesape ṓisi
na lemamiēna a sum̄arena
kiena ne Arimata Ntewa sike
amio amiu.

Pol pisa potena pan
Ntewa vanon la

3 A silaga e kiamimi
leniēna lala, imimi lua
mepisa potena pan Ntewa
Arimana ne kieta Suṓe, Yesu
Kristo, vanon amiu. 4 Naga
nene vanon naṓa imimi
lua mekekaran amiu paṓisi,
naṓa visena tol imimi sape
kam na asum̄a apiawa ke
m̄arera e Yesu Kristo, a
asum̄a sinemiu sii manene
ke m̄ena li nalelagaena
taṓena lala. 5 Pelaga wo
nene naga sum̄a molue ke ga

e kiamiu malena lala komin
naṓa sinemiun manene
naṓa ṓisi na akilia atol suri
wo la naṓa Ntewa mligan
ruru sike ma e peni vena
ve kiamiu. Suri wo la ne
sanene, amloge lologena wo
pisaar pan amiu ṓisi rui.
6 Visena lelaga nene pimi
pun amiu ṓisi rui, a nagane,
sum̄a pa vanua manene
ke m̄ena ga e yo taṓena
lala e yomarava nini narui.
Sum̄a pava ke sanene, ana
sum̄a kapuru a sum̄a ṓar
ke m̄ena ga mras la naṓa
powo, torokin ke naṓa kila
pan amiu e ke e pogos naṓa
amloge ṓesania, naṓa apisu
kilale sane lemamiēna kiena
ne Ntewa e ita naga keviu
a lelaga paṓisi. 7 Sur la
nene Eṓaṓras naga pian
amiu e rui, pogos naṓa
naga kus lelemimi imimi
lua, ana naga pimi pisawal
ṓesan lologena wo nene pan
amiu. Naga pe yaru tai
naṓa imimi memiyuṓae ke
lele taaga, a naga masusun
yuṓaena wo lala kiena ne
Kristo. Imimi mekekaran
naga paṓisi, 8 a nanagane,
naga ṓasuṓe si pimi pun
imimi rui, mla lologena
wo tai pan imimi, naṓa
pisayu sanape naṓa kiamiu
malena lala sum̄a pule luen
ga e pupia sinesiiēna naṓa
Ninuna Wa mla pan amiu.

9 Komin sur nene, pogos
naṓa imimi lua memloge
visena nene kiena Eṓaṓras,
memlen wo amiu silaga
pimi tol nagane, a mesum̄a

mepiun ke tan Ntewa mesape ĩisi na Ninuna Wa la manmaruaena a nakiliaena wo lala van amiu, vena akilia ruru nasinenanena wo punu ga kiena ne Ntewa. ¹⁰ Ve sanene, ĩisi na yoko akilia ayal mesmesu e mrapa napo naĵa popon yeririna kiena kieta Suĵe la ayal ea, a ĩisi na akilia akila naĵa naga kilia kekaran make kiamiu ĵelaga punu ga. A yoko mras wo lala kilia imi mĵalivi e kiamiu malena lala a e mĵena ga e kiamiu yumĵaena lala, a ĩisi na kiamiu kiliaena e Ntewa kilia va merorol manenea. ¹¹ Imimi lua memlen mesape ĩisi na pupia puriukawaena kiena ne Ntewa sumĵa kila amiu mĵena ga amĵarera, vena akilia asumĵalar amiu e pog mĵarera, a vena kiamiu sitomiena ve piavi, a akekara ga e pog la ne sanene. ¹² Ita na monar tevĵa potena va Arimata, naĵa kila ita mĵena ga temio li nalelagaena wa taĵena lala, tekilia tokus lalimana loyumĵa e kiena nasuĵenena na yomerarava nena, ¹³ komin naga ĵurelua ita rui petan mĵareraena na yemalolo, ana naga mlen plan ruru ita tepa e nasuĵenena kiena ne narina nene, naĵa naga kekaran naga paĵisi. ¹⁴ Ore, Ntewa naga ĵerelua ita ĩisi rui, naĵa piowo ita komin kieta mlamulena viowa lala.

Kristo pe ĵarun yo yau

1:14 Epis 1:7 1:18 Epis 1:22,23

wetelu

¹⁵ Narina nene, naga Kristo nene, naĵa naga pe nono tai naĵa tekilia tevisuia, naga kiena ne Ntewa naĵa taĵatete tevisu naga, naĵa naga pe mĵearun make suri la punu ga naĵa Ntewa sii la.

¹⁶ E ga e Kristo nene, Ntewa sii make sur punu ga, naĵa ma e peni a e yomarava, naĵa tekilia tevisuia a naĵa taĵatete tekilia tevisuia,

amio sur la naĵa apisuar ke yo yau, sa naĵa ĵarin suĵe lala, namĵareraena lala, yerkawa lala, a navisi lala.

Ntewa sii make suria e Kristo,

a Ntewa sii make suria pe kiena ne Kristo.

¹⁷ Kristo naga sike pa sumon sur taĵena la rui, a naga mligan ruru make sur la nene, asumĵa amiyumĵae ruru ga e lelela.

¹⁸ Kristo pe purĵes nen malena kiena nalotena,

a naga pe ĵarin lotena nene, sa naĵa lotena nene naga pe tasnena.

Naga sumon ĵes yaru la naĵa amal sina e mĵarena,

ana sanene naga kila sane nanagane naga sike laa metavan make sur taĵena lala.

- 19 Kristo to metavan make sur la sanene, komin naña Ntewa tañan kiena naurarena sike e naga, sa naña kiena malena wetelu a kiena nañareraena sike ea.
- 20 E ke e Kristo nene na wa, Ntewa ãar ke sina ga sur nae ma e peni amio yomarava nini awasupe ke sina ga vania.
- Naga kila yo yau wetelu kilia imi ve mara wo ke sina ga amio naga, nanene e ga e tana ne Kristo naña mlau e laki torovia.

Amiu ave marawo ke sina ga amio Ntewa

21 Nanua sumo, kam na ape wolawa ga, a asike laa perinan Ntewa, a ape kiena nasinekar ga, komin kiamiu sitomena viowa a kiamiu pelaga viowa lala. 22 Ana nanagane, naña Kristo pimi pe yaru sane ita, kiena marena kila ita teve mara wo ke sina ga temio Ntewa. Ntewa kila sanene, vena kilia were amiu aimi puna naña ave yar wa kemua lelaga, a ayekiki ruru wo, a naña ve sur viowa re nena tai teke e amiu. 23 Ana nanene na kilia ve sanene, visae asuñalu ga ñarera ase Kristo, a visae amlelaga ke e naga wa. Popon amiu ve auresun amiun re naña auarar manene lela-gaena e navisaarena lala kiena ne Ntewa, monar alelaga sane yoko naga monar la sur punu ga van amiu

naña amloge rui e nalololona wo nene, naña yeririna na yomarava la amloge rui, naña inu Pol in na nepe yaru na lololonena.

Pol miyuñae ñarera komin li nalelagaena lala

24 Nanagane nemloge piowa e tasneu komin amiu, ana in na nekekara ga ea. Nanene naga sa naña nesuñña nemiyuñan sur na loge viowaena make ga e tasneu, naña Kristo naga mliganar inu vena nowaria, sa naña naga ãar ãisi rui, vena neiila ãegas nen li nalelagaena lala vena asuñalu ñarera. 25 Ntewa mligan inu vena neimi ve sa yaru na yuñana tai na ãegas nen li nalelagaena lala, a nagane nekilia neiila amiu e yuñana nene naña Ntewa mligan e luñau, nanene vena nevisawal kiena visena va yeririna lala vena akilia make ga. 26 Kiena visena nene sane visena tai naña nakonua konua rui, tapoloun ga e yermarua lala, naña la pe akilia re nenaga, ana nanagane Ntewa kila pimi merarava pan kiena li nalelagaena wa lala. 27 Kiena sitomena naga pe na kilaen sanene narui, sane visena nene naña kiena yeririna la naña le Yu lala, la pe amloge kilale re poli, ana ãisi na naga visawal kana sur nowo ne lala, naña po manene laa, va la naña pe ape le Yu re poli. ?A visen

tapolou nene pisa ya? Naga pisa sanini narui, pisape Kristo naga kilia sumã e losinemi lala, a amiu akilia alelaga asape ãisi na Kristo naga kilia kila amiu akilia asikol Ntewa e kiena malena wo nae ma e peni.

²⁸ Imimi lua mesumã memlologon ke Kristo ne nanene narui pan yeririna lala, mesumã mepisa ke pan la mepisape la monar avisuar ruru la, a mesumã mepian la ke e manmaruaena lala. A visae laþasia naþa kiela sitomena lala a kiela lelagaena lala marua ruru wo, la akilia aimi asumãlu amio imimi lua e marana ne Ntewa. ²⁹ Nesumã nemiyumãe ke m̃arera paþisi komin sur ne nanene, ana silaga nesumã nemiyumãe ke e pupia nam̃areraena nene naþa Kristo naga kokonia inu ea.

2

Monar amiu alelaga m̃arera e Kristo

¹ Ee, naga sa naþa nepisa ne, naþa nesumã nemiyumãe m̃arera komin amiu, a komin m̃ena ga la naþa nae Laotisia a amio m̃ena ga yeririna taþena lala naþa la pe apisuli re marau pogos tai poli wa. ² Sineun nesape nekila kiela sitomena sumãlu m̃arera sumã ga, a vena kiela sinesiena lala kilia sikol ruru sinela lala la aimi ave taaga. Sineun manene nesape ãisi na la atol pupia nakilia wanen suri nene

naþa sumo na la pe akilia re poli, naþa naga Kristo ke narui, ana ãisi na kiela sitomena lala ve veve lua re sina. ³ Naga nene komin naþa e Kristo, yeririna lala la akilia alual sur la naþa powo na manmaruaena amio na kiliaena kiena ne Ntewa, naþa naga þarwania sumã ga e Kristo.

⁴ Nesumã nepisa ke visena nene pan amiu, vena taþatete yeririna lala akila gola kiki van amiu vano-o aure kiamiu sitomena lala va ve taþena, e kiela visokanena na manmaruaena lala. ⁵ Nepis sanene pan amiu komin naþa nesitom manene amiu paþisi. Pe sur korena ga naþa tasneu sike laa perinan amiu, ana silaga kiau sitomena sike amio amiu. Ana nekekarã manene amiu m̃ena ga, naþa nemloge asape amiu na pe asu re ga sanene poli, ana asumã amiyumãe mesmesu ruruia, a asumã apa veraga aþasine ke Kristo m̃arera.

Kieta malena monar sumãlu se Kristo

⁶ Komin naþa ita tokus Kristo Yesu naga pe kieta Suþe rui, silaga monar teyal ga e naga, ⁷ a naga monar ve sa naþa þeligas nen kieta malena, pona yumã na kieta malena monar sumãlu su metava e naga. Ve sanene, kieta naviawaena e naga kilia imi m̃arera laa sane silaga, sa naþa apian ita e ãisi rui. Ana silaga, monar tevisa luen ga potena vania.

⁸ Ana amiu monar avisuar ruruia vena p̄isi na taṭatete yeririna lala aimi aviar amiu e visena la naṭa taveve ga namanmaruaena kiena ne yeririna, pona navianena la naṭa pulen ga nakiliaena na yomarava nini. Visena korena la nene pe navisokanena ga, a la amolue ga kome sitomena marua kiena ne yeririna lala, a la amolue e lepas kiena ne yermare lala amio kimi lala, ana la pe amolue re e Kristo poli.

Kristo naga pe p̄arin sur punu ga

⁹ Ntewa naga mligan kiena malena amio kiena naṭareraena make ga sike e tasnena ne yeririna nene naṭa Kristo, ¹⁰ naṭa naga pe p̄arin sur la punu ga, a naga su metavan naṭareraena taṭena lala. A e p̄elaga mānenaga nene, Ntewa mligan kiena sur tanea lala asike e kiamiu malena lala, amiu naṭa asike e Kristo. ¹¹ Ana komin naṭa amiu asike e Kristo, naga te plan p̄elaga viowa lala a sitomena viowa lala vetan amiu, sa naṭa naga kila p̄aviu e amiu, ana pe nepisa re p̄aviu nene naṭa yaru la asumā akila ke poli, nepisa ke p̄aviu taṭena tai naṭa Kristo naga kila, sa naṭa naga p̄ar plan napiowaena lala e kiamiu malena. ¹² A pogos naṭa la akee amiu, naga sa naṭa Ntewa sin amiu amio Kristo, a naga kila amiu amal m̄ena ga amio Kristo, naga nene

komin naṭa amiu aṭasine naṭareraena keviu nene kiena ne Ntewa naṭa kila Kristo mali sina ga e marena rui. ¹³ Ana amiu la nene, nanua sumo Ntewa pisu amiu sa ga naṭa kiamiu mlamulena piowa lala kila amiu amare pa rui. Amiu na pe ape p̄aviu re sane le Yu la poli, ana Ntewa pisu amiu sa naṭa kiamiu malena pe pe p̄aviu re m̄ena ga poli, sa naṭa kiamiu malena pe pilon ruru re poli wa, a p̄elaga viowa lala sike e amiu wa. Ana nagane, naṭa asikol amiu amio Kristo, Ntewa mla malena viu pan amiu p̄isi. Ita tetol malena viu nene komin naṭa Ntewa na piewo ita vanon kieta mlamulena piowa lala, ¹⁴ a naga miyumu plan kieta lapui la rui. Nanua sumo, lapui la nene la asike e tus nene naṭa navisaluaena m̄arera kiena ne Ntewa sike ea, naṭa la apiar ita paṭisi, ana Ntewa mlalua sur la nene. Amio kana tus ne lala, sa naṭa sane suar make ga e laki torovia amio Kristo, ana pe lapui re si la nene poli. ¹⁵ E laki torovia nene, Kristo taulu sur taṭena la naṭa puriula m̄arera, a naga kilaro nena naṭareraena kiena ne yermare lala, sa naṭa naga taulu la e pupia mara tai, ana naga kila kiena nasinekar la nene aimi ave sur korena ga e marata ita yeririna lala, vena ve tesitom re si tevisave la ato

laa metava.

Kristo naga pe ħarimiu

¹⁶ Visae ve sa nene, amiu na monar ve atamān re yaru tai visaluĥar amiu visave ve akan re suri nene, pona ve amun suri re nene. A amiu na monar ve atamān re naĥa yaru tai māraran amiu vena ataveve kiela ĥelaga marua lala e lepas na sur sane legiena wa la na kasa, pona e lepas nen ĥaĥagena na kupario viu, pona e lepas na legiena na olua.

¹⁷ Navisaluaena la ne sanene, yeririna lala la apisa vena akilali naĥa alual mrapa naĥa mesmesu, ana la sa ga ninun sur ga naĥa naga pimi ĥarĥo re yo poli wa, ana purĥes nen sur lelaga punu ga, naga Kristo ga.

¹⁸ Yeririna la ĥasia asumā ga naĥa la asitom ke asape la apo manene taulu amiu, komin naĥa la apisu sur la moki e kiela mēniēna lala, ana la asitom ke asape la akilia manene e lepas nen navisi lala. Ana asitom ke asape la apo, akila kiela sitomena lala sike ga tano yo, taulu yeririna taĥena lala, ana peraga, la nene la sa ga keriko. La asumā apilave ga e kiela visena lala, naĥa la apisayu manene laa ke sina ga paĥisi, ana kiela sitomena lala pulen ga vilaveena amio kiela sitomena korena taĥena laĥasia, vano vano-o tol naĥa la asumā amieluar la ke sina ga. Ve sanene, amiu ve atamān re si la nene

aliĥere amiu avisave amiu na pe atol re sur nene poli wa naĥa la asike e ĥisi rui, ¹⁹ komin naĥa la nene la amligan Kristo ĥisi rui, la pe apuarar ruru re si naga mārera poli sa naĥa naga pe ĥarila. Ana Kristo naga sumā ĥuarar ruru ke ga la naĥa la sane komĥas nen tasnena, a naga sumā pagan ruru la, sumā kawē mesmesun ruru kilamerpu amio kana kowiu lala, ana tasnena naga sumā miyumāe po a sumā kapuru po sa naĥa Ntewa naga sinenania.

Amiu na atol malena viu e Kristo

²⁰ Inu nekilia nesape sa naĥa Kristo naga mare nanua sumo rui, amiu mēna ga amare amio naga, kila naĥa e lepas na ĥelaga viowa, amiu amare e ĥisi rui, a pe pon re si ĥelaga viowa imi tol kiamiu malena poli. A Kristo naga ĥurelua amiu mēna ga rui e māreraena na sitomena nasumo lala na yomarava nini, amio kiena yermare lala. Sanene narui, sineun nesape neviun tan amiu sanini: ? Sanape asumā amialoro ke sa naĥa amiu ape yaru na yomarava ke ga wa? ?A komin ya ne amiu asumā amlogear ke navisaluaena marua la naĥa apian e sumo, naĥa la apisa apisape: ²¹ “Amiu ve auarar re sur nene,” pona “Amiu ve amunli re sur nene,”

pona “Amiu ve atol re sur nene.”²²⁻²³ Ana pe lelaga naña yaru la amloge visena la nene, ana la asitom asape navisaluaena la ne sanene ape manmarua ruru po, ana navisaluaena la nene la amolue ga kome sitomena kiena ne yar lala, la pe ape lelaga re poli e vianena kiena Kristo. La apisayu ga sur na yomarava la nini, sa naña kinanena, pona sur na munena, ana sur la nene tařatete iila amiu, a la tařatete mēna ga akila kare kiamiu malena, komin naña visae olavia pona oyumāenia, řisi na sur la nene yokorena akokovio.

Pona yaru la apisirilua visaluaena la nene vena akilali yumāena wo lařas yo, naña la apisa apisape yaru monar len sanene pona sanene, a pona la apisa apisape yaru monar ligan kiena sitomiena su ga tano sanene pona sanene, a pona la apisa apisape yaru monar kilali naña kawē ruru tasnena sañene pona sanene e sur la naña mārera pan naga.

Ana nevisa van amiu, sane visaluaena la ne sanene, la pe puriula mārera re nena poli vena suwoen sitomena viowa lala a řelaga viowa la naña sike e los nen yaru.

3

Malena naña mekiki ruru po a pe wa ruru nenaga

¹ Amiu la nene, Ntewa naga pisirlua amiu amal sina ga e marena amio

Kristo, ana sanene na monar ařionli ga sur la naña nae ma e peni, e yo nene naña Kristo naga tomā tano e lepas nen Ntewa na řamarua.² Amiu na monar asitomāal ga sur lala nae e yo nene, ve asitom re si sur na yomarava la nini,³ komin naña sane amare e řisi rui. Nanagane kiamiu malena viu naga tapolou amio Kristo e Ntewa,⁴ komin naña Kristo pe purřes nen kieta malena nagane, ana suraunia, e pogos naña naga kate e maran yeririna lala, yoko ita mēna ga takate temio naga e kiena pupia naurarena.

Kiamiu malena na sumo monar řisi

⁵ Amiu na monar awe plan punu ga řelaga lala na yomarava nini e kiamiu malena lala, sane natařaena lau, sur na mawaena lala, nasinenanena viowa lala, nakekaranen mlamulena viowa, a navinavinayaena mēna ga. řelaga la nene pioyowa ga, a navinavinayaena nene, naga sa naña yaru kila sane sur la naña naga sinenan manene laa pařisi apimi sa naña kiena ntewa tařena lala.⁶ Komin řelaga ne la nanene narui, Ntewa sinena mimi pařisi, ana kiena nalipereena naga sumā pimi ke pan la naña la pe amlogear re naga poli.⁷ Sumo na, kiamiu malena sa ke nene narui, naña amiu amiyal ke ga e řelaga la nene,⁸ ana nagane,

pogos na liganen þelaga la nene, pogos na sur la nene aþisi e kiamiu malena lala. Ve sanene, amiu taþatete sinemiu mimi, a taþatete avis kapuru va yaru taþena, a taþatete asuþna ave erau viowa van amiu. Pisi na taþatete avismumun yar taþena, a ve avisa re visena la naþa pe kororaki. ⁹ A ve avisa kotalia amiu re mþena ga, nanene komin naþa amiu na amlalua þelaga marua naþa apaeme amio naga þisi rui, ¹⁰ a amiu na amiyen þelaga viu tai e amiu, sa naþa malena viu tai naþa Ntewa naga siia pe kiamiu. A pogos punu ga, Ntewa naga suþna kila ke malena nene pimi pe urviu ke sina ga, vena kila amiu akilia ruru kemua naga lelaga, a vena kila amiu aimi laa ve sa naþa ave kiena totou. ¹¹ Komin sur ne la na nene, ita na ve teliþere re si yaru lala, sa naþa tevisave laþasia ape le Yu, ana laþasia ape li na yo taþena ga lala, pona laþasia la ape þaviu, ana laþasia pe ape þaviu re poli, pona laþasia la ape suþe, ana laþasia ape li nayuþnaena kiena ne suþe ga lala. A ita na ve tevisa re mþena ga tevisave yaru laþasia la apian ruru la ana akilia suria, a laþasia ape yer ura ga, pe akilia re sur tai poli. Ana pupia suri taaga ga naþa tekilia tevisuvisu yaru

ea, tevisave naga mlelaga e Kristo pona ve lelaga re, komin Kristo naga sike e sur punu ga a e yar punu ga.

Amiu aligan malena viu nene e amiu

¹² Pogaga, sa naþa Ntewa naga sinenan manene amiu paþisi, ana naga ligan amiu vena ave kiena yeririna wa lala, monar ayen þelaga viu nene e amiu sa naþa naga sinenania. Pelaga viu nene naga sa naþa sur la nene asike e kiamiu malena, sa naþa nasineyeena yaru, nasinewoena, navatanoena, namomþauena, a namalumenena. ¹³ Amiu na monar ve sinemiu kar amiu re vilaga, a visae amiu yar ve lua, sur tai sike likan lalua nene, þisi na monar aviewiewo lalua. Ana monar amiu aviewiewo amiu, e ke e þelaga nene naþa kieta Suþe naga piwo amiu. ¹⁴ Ana amio þelaga wo taþena la nene naþa monar ayenia, monar ayen mþena sitomena e amiu, komin sitomena naga kilia sikol ruru þelaga wo la nene vena la ayuþnae ruru ve raaga, vena la aimi ave taaga. ¹⁵ Pisi na suþare naþa Kristo naga mligania naga kilia visuar sinemiu lala, komin naþa Ntewa naga pioproan amiu vena ave taaga, naþa amiu punu ga asikol ruru amiu amio naga e þegas tai naþa naga pe þarunia, vena silaga suþare nene kilia su

luen ga amio amiu. A silaga avisa potena e sur punu ga.

¹⁶ A visena wo kiena ne Kristo, silaga naga monar imi sa naña mali e sinemiu wetelu, komin naña kiena visena la nene naga po tanea wa. Amiu monar asuñña avian amiu ea, a amiu ga asuñña akila ruru amiu ke sina ga e kiena manmaruaena wo lala. A popon asuñña ayau va Ntewa e sam lala, a yauena wa lala, a e yauena lala na yeluaeren Ntewa, ana e pogos naña asuñña ayau ke sanene, p̄isi na sinemiu la punu ga ulen visaen potena vania. ¹⁷ Sur punu ga naña amiu akila, a visena punu ga naña avisa, ana monar akila e kia kiena ne Yesu, naña kieta Suḡe, a pogos punu ga na monar avisa potena kome naga va Ntewa Arimata.

Malena viu kiena yaru lala

¹⁸ Amiu sira lala naña atalopa rui, monar avatano e womiu lala, sa naña mesmesun naña sira naña mlelaga naga kila.

¹⁹ A amiu yerm̄ene la naña atalopa, monar asitom manene womiu lala, a ki-amiu p̄elaga lala monar ve melkalka manene re silaga van la.

²⁰ Amiu sisi lala, monar alogear arimamiu lala amio anemiu lala, komin naña kieta Suḡe naga kekaran p̄elaga nene paḡisi.

²¹ A amiu arimala lala a anela lala, p̄isi na sinemiu lala ve vilul re va narimiu la silaga, komin naña visae ve sanene, akila kare la, akila kiela sitomiena lala loloru.

Suḡe lala a kiela yar na yuññaena lala

²² Amiu yar punu ga na yuññaena kiena ne suḡe lala, silaga monar alogear kiamiu yerkaawa la nene. Pisi na ve akila re sanene e ga e pogos naña la asike amio amiu, vena akilali naña la akekaran amiu, ana silaga monar ayuñña naña kiamiu sitomena la ve lelaga make ga, sa naña e yuññaena nene, asuñña amlogear ke kieta Suḡe silaga. ²³ E yuññaena ya naña amiu akila, monar akila naña akekarania, sa ke naña asuñña amiyuñña kiena ne Suḡe, pe kiena yaru re ga la poli. ²⁴ Popon asitom̄al sa naña Suḡe ke nene narui p̄isi na naga la kiena lalimana van amiu, sa naña naga pul amiu, komin yerkaawa ruru napo naña ayuñña vania, naga Suḡe Kristo. ²⁵ Ana yaru naña suñña kila ke pe mesmesu re poli, p̄isi na naga kilia la maran ke sina ga vanon kiena napiowaena nene lala, komin Ntewa pisuveve yuññaena kiena ne yar la punu ga mesmesu ga.

4

¹ Ana yerkaawa lala, amiu

m̃ena ga monar akila mesmesu ruru wo va yaru lala e kiamiu yuññaena lala, komin naña amiu m̃ena ga kiamiu Suḡe tai sike ma e peni naña ḡisi na naga liḡere kiamiu ḡelaga lala.

Pol naga pian la

² Amiu na monar aḡarera e leniena pogos punu ga, a monar alen naña asitom ruru e sur la naña avisa e leniena, a naña kiamiu sito-mena lala naga sum̃a pisa ke potena pan Ntewa. ³ Sineun m̃ena ga nesape monar alen wo imimi, vena ḡisi na Ntewa vike kiamimi mrapa mekilia melologon sur wo nene naña sumo na tapolou, naña visena kiena ne Kristo, naña nanagane na nesike e lokap vanonia. ⁴ Awis, sineun nesape alen naña ḡisi na nekilia nevisi wo, vena kila visena la nene merarava, sa naña mesmesun ga naña yoko monar nekila. ⁵ E ḡelaga la nene naña asum̃a akila ke e maran yar la naña la pe amlelaga re e Kristo poli, monar ave manmarua wo vena akilia ataveve kiamiu pulmas lala, vena aurela aimi e Kristo. ⁶ Amiu na monar avis ruru amio la, e ga e visena lala naña nasinewo a kiki, ana la aloge visena la nene aloge wo, a monar akilia mrapa na visataññaena visae aviun naviunena kar ga lala e lepas na kiamiu viawaena.

Pol mligan yaru la lua apa pula

⁷⁻⁸ Kieta wolai wo nene Tikikas, naña naga sike amio inu, ḡisi na neligan naga la m̃aki nene im̃asu pun amiu vena visawal van amiu visave imimi mesike sanape, vena akilia aloge wo. Nekekaran manene kieta wolai nene paḡisi, naña pogos punu ga naga m̃areran naña iila inu e yuññaena kiena ne Suḡe. ⁹ A kieta wolai taḡena naña erau wo nene Onesim̃as, naga m̃ena ga ḡisi na taveve Tikikas im̃asu pun amiu. Onesim̃as naga nae ga kiamiu yo, a naga m̃ena ga sum̃a mlelaga ke e Kristo. Lalua nene ḡisi na avisawal van amiu, e sur la punu ga naña kakate ke e yo nini.

Visena maro kiena ne Pol pan la

¹⁰⁻¹¹ Aristakas naña naga sike e lokap amio inu, a Mak nene naña naga wenla Panaḡas, a Sisas naña apio naga Sastas, la telu nene apisape asitom amiu paḡisi. Mak nene, kana visena pim̃asu tol amiu pa rui, a pisape visae naga imi kome lepas nen yo na pun amiu, monar akekarania vena aure naga sukol amiu.

E le Israel la naña amlelaga e Kristo ḡisi rui, la ga telu nene amio inu, imimi memiyuññaen ke yuññaena nasuḡenena kiena ne Ntewa, a la telu nene la amiila inu

keviu paḗisi rui e pogos m̄arera lala. ¹² Eḗaḗras nene naḗa naga m̄ena ga amiu kiamiu yar tai, naga pe yar wo tai na yuḗaena kiena ne Kristo Yesu, a naga m̄ena ga pisa pokolulagi pona pokolemalo pan amiu, pisape silaga naga suḗa mlenwo amiu ke m̄arera paḗisi, vena akilia asuḗalu m̄arera, vena amarua ruruia e Kristo sane keyowo, a vena asuḗa am̄arera naḗa akila ga sur la naḗa Ntewa sinenania. ¹³ Sineun nesape nevisa mesmesun van amiu, nevisave yar naḗa Eḗaḗras naga suḗa miyuḗae m̄arera manene paḗisi komin amiu, a komin le Laotisia lala, a le Erapolisi m̄ena ga lala. ¹⁴ Kieta erau wo nene, naḗa Tokta Luk, amio kieta wolai taḗena nene Timas, la m̄ena lua asikena a lalua apisa apisape lalua na asuḗa asitom amiu paḗisi.

¹⁵ Sineun nesape aligan kiau visena van kieta wolai lala a vineta lala nae Laotisia, amio sira nene Nemeva amio ḗegas nen nalelagaena lala naḗa asuḗa apiora ke e m̄ana yuḗa, avisave in na nesuḗa nesitom la ke paḗisi. ¹⁶ Ana yoko pogos naḗa amiu aulo kiau m̄aki nene ḗisi, awis sineun nesape aligan van le Laotisia lala, vena auloia van ḗegas nen li nalelagaena lala e yo nene, a monar aulo m̄ena ga kiau m̄aki taḗena nene naḗa ḗisi na le Lao-

tisia lala la aligan imi van amiu. ¹⁷ A kiau visena tai naga va Akiḗas, nesape “Ko ovisuar ruru yuḗaena nene naḗa Suḗe naga mligan e lumoḗa, monar okila make ruru yuḗaena nene.”

¹⁸ Ana nanagane, nelalua kilamemego e limana ne yar na sirien m̄aki, ana inu ga Pol, nesiri kiau visena maro nini van amiu e ga e luḗau, nevisa pokolulagi pona pokolemalo van amiu. Amiu ve sinemiu ḗesan re sen la naḗa apiar manene inu ke ne, a lemamiena kiena ne Ntewa sike make e amiu.

Inu, Pol.

**Maki Nasumo Naña
Pol Siri
Pa Pan Li
Nalelagaena Wa
Lala Nae Garu
TESALONAIKA
Visayuena Na
Tusi Nene**

*Komþasnen suniena plas
na tusi nini*

Pulkumali keviu nene Tesalonaika naga pulkumali keviu na provens nene Masetonia, naña mēke vatanon Parin Suþe keviu nae Rom sumo. Pogos naña Pol molue Piliþae, pa ma Tesalonaika mlologon lologena wo e yo nene, ana sumāre nene siaria. Ana siraunia pe yam piyavi manene re poli, lus nae Israel laþasa e yo nene apisa karea, la apieluena komin naña apisu sane yaru moki naña pe ape lus nae re Israel poli, nanua sumo la amloge kiela vianiena lala, ana pogos naña amloge lologena wo naña Pol pisawalia, ana amlelaga e Yesu. Ana lus nae Israel la nene sinela kari Pol, ana amēnelua e yo nene, ana pae pulkumali si tai, Perea. Siraunia, naga pa tol pupia pulkumali naña Koren, naga mloge lologena kiena li nalelagaena lala nae Tesalonaika e kiena erau Timote, naña miyuñae ke amio naga.

Pol siri þesan kiena maki nini pa li nalelagaena lala

nae Tesalonaika vena visirluaen kiela sitomiēna, a vena kila meraravan va li nalelagaena lala nae yo nene sape naga sitom la mñaga, a Ntewa sike amio la. Naga pisa potena pa Ntewa komin naga mloge sape asuñā amlelaga ke mārera e Ntewa, a sinela sii ke yaru lala, a pisa panila vena la asitoñal si kiena þelaga wo e pogos naña sike amio la, vena atavevea.

A naga pisa tamē kiela viunena lala naña apiyun tania, asape yoko Yesu wasuþe si ve sanape. Sinelan asape akilia meraravan sane visae yaru naña marþan þesa ana Yesu ve vitom re wa, yoko tol malena naña ve uro re, pona peraga. A sinelan akilia naña yoko Yesu wasuþe pogwai. Pol pisaruru panila, sape monar ayuñae ga, naña kiela sitomena la varuru ga sumāga, a naña aligan kiela sitomena lala sumālu mārera e Yesu vena asumātea, vano vano- o tol pogos naña naga wasuþea.

*Komþasnen tusi la na nini
Visena þesa 1:1*

Pol kekaran la a pisa potena pa Ntewa vanon la 1:2—3:13

Pol piyani la e þelaga kiena yaru naña lelaga 4:1-12

Pol piyani la sape yoko Kristo wasuþe sina 4:13 —5:11

Pol kila make kiena vianena lala 5:12-22

Visena maro 5:23-28

Visena na sumo

¹ Inu Pol, nemio Saelas a Timote, imimi telu mekekara pañisi nasirien mñaki nini imi van amiu, pegas nen li na lelagaena lala e suñare na pulkumali naña Tesalonaika. Memlelaga sane kiamiu malena lala asike ruru ga e Arimata Ntewa amio kieta Suñe Yesu Kristo, ana memlen ke sane lemamiena a suñarena sike amio amiu punu ga.

Pol lala akekara komin namasisuena kiena le Tesalonaika lala

² Lelaga, silaga na memlen ke pan Ntewa Armata, monar mevisa potena vania vanon amiu. ³ Mesitoñal amiu ke e kiamimi leni-ena lala sanini, tañatete sinemimi pñesania sanape naña kiamiu naviawaena, amiyuñae mñarera tavevea, a sanape naña kiamiu na sinesiiena pimi plamolue ke e kiamiu pñelaga wo lala, a sanape naña kiamiu sitomen piayavi lala kila amiu asuñal mñarera ruru ga po e kieta Suñe Yesu Kristo.

⁴ Erau lala, mepisuluñar sane Ntewa pe sinen sii amiu re ga poli, ana naga kologia amiu mñena sane ape kiena lelaga, ⁵ komin pogos naña memlologon lologena wo pan amiu, naga sa ga pe visena korena re kiena yaru poli, ana naga pimi pan amiu sane visena urmi tai naña mñarera. Mareraena kiena ne Ninuna Wa sike ea,

a naga miyur ruru sinemiu la pano-o amlelaga.

Amiu akilia kiamimi pñelaga la pogos naña mesike memio amiu, moñaryon pañisi na kilaen sur punu ga naña mekilia mekila na kilaen naña alelaga, ⁶ pñisi na atolia, apimi sa naña ape kiamimi nataveveena lala, ana pe kiamimi re ga poli, apim ape nataveveena kiena Suñe. Pe sur korena ga naña lala tañena la akila pupia naloge viowaena a akila amiu atol pog mñarera e pogos la nene, ana aporworun ga lologena wo, ana pupia kekarena kiena ne Ninuna Wa sike e amiu. ⁷ E kiamiu pñelaga wo la nene, sane akuspo yomñarua, asumon vena kipianen mrapa van li nalelagaena tañena lala e lepas na yo la naña Masitonia amio Kris. ⁸ Lologena wo kiena Suñe molue e amiu pa vanua, pe e re ga e yo lua nene poli, a pa mñena yo punu ga la ne, kila yeririna la amlogeyu kiamiu nalelagaena e Ntewa pñisi rui.

Naga nene po pañisi, ana nanagane sane e yo ya naña visae meva si ea, pe sur na visaen re si poli, komin visena la punu ga pimi e amiu pa tol la rui! ⁹ Pe mesun re si pan li tañena la nene poli, ana lala asun ke sina ga pan imimi, apisayu sanape naña amiu le Tesalonaika lala añpure imimi pimi pun amiu, a sanape naña apilopu amiu,

amiu sanene pařisi wa, sinemimin mevisawilwilin lologena wo kiena ne Ntewa van amiu, ana memloge sane mepinaia amiu pařisi, vano-o mesuđa metađan kiamimi malena vena iilaen kiamiu malena.

⁹ Erau lala, nepisa sanene, pe nepisokan re poli, komin akilia asitođal sanape nađa imimi memninu e yuđaena urmi na limamimi e pogos nene. Memiyuđae ea legiena a kolemallo, vena kilaen sane pogos nađa mesike memio amiu memlologon lologena kiena ne Ntewa, pe mekila re urmi pan amiu poli. Imimi ga mepisuar imimi, pe amiu yar re nena tai nađa pisuar imimi poli, peraga.

¹⁰ Imimi mesitom mesape e maramiu, a e marana ne Ntewa, mekilia mevisawal mesape pogos nađa mesike likan amiu li nalelagaena lala, kiamimi malena pe sur tai piowa re e poli, mesmes ga, a pe wa ruruia. ¹¹ Pona asitođal ke yo wa, nađa mekila pan amiu sane ata tai nađa naga kila po pařisi e naiilaen malena kiena ne narina lala.

¹² Mekila sinemiu la malum ruruia, memla visena na iilaaren la pan amiu, a memiilaar kiamiu sitomena lala vena monar akila kiamiu malena la mesmes ruruia e řelaga lala kiena ne kieta Ntewa, nađa naga ga pio amiu vena aim

loyuđa e naurarena wo na kiena nasuřenena.

¹³ Sur tařena si tai nađa silaga mepisa ke potena pan Ntewa pařisi vanonia, nane kiamiu řelaga pogos nađa lologena wo pimi porun amiu. Amiu amlogeyuia, ana pe akovenlua re poli sane pe visen kien yar ga tai, ana apisuia sane pe lelaga, pe visen kiena ne Ntewa lelaga. A amiu nađa amlelaga ea, apietavan losinemiu pania pano-o suđa miyuđae ke e kiamiu malena pimi tol nanagane.

¹⁴ Wolai a vineu lala, nekilia sane pogos nađa amlelaga, pe piavi re poli nađa yar la nae ke sina ga pun amiu asuđalun na kilaen viowa van amiu, kila apane pogos mārera tai pařisi. Sanene na piowa ga, ana e lele nene amiu amiyal ke ga e mrapa taaga ga nađa li nalelagaena kiena Yesu Kristo e suđare kiena ne Ntewa e lepas nae Yutea amiyal e nanua susumo rui. La mēna, pogos nađa amlelaga, ana le Yu mēna la akila kare la pařisi! ¹⁵ Ana řelaga nene, le Yu la asuđa akilakila kemua nanua susumo rui pimi. Susumo, pe sinelan re navisawalena la poli, siraunia, lala ke sina nađa akila aņemār kieta Suře Yesu mare, a lala ke sina ga nađa asuđa aņene imimi yam mok rui. Sur la nađa

asumã akila ke ne, Ntewa pe kekaran la re nena vanonia, komin asumã akakawe visena silaga. ¹⁶ Mesumã memlologon ke lologena wo pan la ga naþa pe ape le Yu re la poli, ana pe sur korena ga naþa pulmas nene na tamaliaen kiela malena, ana le Yu la nene asumã apisawo imimi ke ga, pe sinelan re naþa meva mevisawal van la poli.

Kiela þelaga viowa la nene, asumã amiyakol ke sina metavan kiela mlamulena viowa la naþa amiyumãen la nanua pimi, kila sane nanagane kiela naviowaena la nene piowa manene laa. Amiyumãen sanene pano-o pe asitom re sur tai poli, ana tekilia sane pupia na sinekar kiena ne Ntewa pitomin la ke rui.

Pol naga sitom la paþisi vena visu la si yam tai

¹⁷ Erau lala, mesape mevisawal van amiu, mesape memligan amiu nanua ga ne, meþure mepa li ve tokak ga, sinemimi miye amiu ga, sinemimin mesape mevisu si maramiu. Lelaga, tesutetai e tasneta, ana e losineta, tepe taaga ga. ¹⁸ Mesike sanene, mesape mekirawal si mrapa tai na imãsen pun amiu, ana inu Pol neþaryon yam moki paþisi, ana yar viowa naþa Yermare, naga kila wo ke silaga. ¹⁹ Ana komin ya ne mesape meim mevisu amiu sina? Naga nene

komin a sina naþa mowa-sine la? A si naþa kila imimi mekekara? A si naþa ve kiamimi mras nen yumãena wo, naþa mekilia melogewonia pogos naþa visae kieta Suþe Yesu vim sina? Pe yar taþena re si po, amiu ga narui! ²⁰ Pe lelaga paþisi, amiu na sane tropi nowo tai naþa metauluia, apim sane pupia purþes nen sineyeena na kiamimi malena.

3

Pol pisayu naþa pitetalia Timote pa katen la nanua rui

¹ Mesitomaãl amiu mã sanene pano-o, mepisu sane peraga, imimi yar tai monar imi katen amiu sina. Pisi na mepisa mesape imimi lua Saelas monar mesu Atens sumo wa, ² ana yoko Timote imãsu pun amiu. Wolai nene, memiyumãen yumãena kiena ne Ntewa veraga memio naga, vena kilaen lologena wo kiena ne Kristo va vanua, ana nepisu sane naga pe yar wo tai na katen amiuena. Nekilia naþa naga kilia iilaar amiu, kilia iila amiu vena kiamiu naviawaena sumãlu mãrera silaga, ³ vena ve sinemiu la kurkurun kare re pogos naþa avane pogos mãrera la naþa asumã apimi. Pog mãrera na sanini, tekilia ruruia sane pe lepas na kieta malena tai, naþa ita li nalelagaena lala taþatete toure tania. ⁴ Ana visae tesitomaãl ke ga wa, tekilia sane pogos

naþa mesike memio amiu, mesuþna mepisawal ke pan amiu, mesape mepisusu ke pa rui sane yoko ve ve piavi re, yoko monar akila viowa van ita. A nanagane, sur nene pimi kate sa ke ga nene rui, naþa amiu nena akus ke paþisi. ⁵ Sur ne na nene kila sane in na nemloge sane pe pon re nesuþna sanene poli, ana monar nekila sur tai vena neloge lologena tai sane amiu asike sanape. In na nemarau li mþaga sane yar viowa na taþalien yar nene, sa lual kiena mrapa tai nakila amiuen aloru rui, þisi na nesape nelogelia sanape, asuþnal mþarera ke ga wa po sanape, komin piowa ga naþa kiamimi yuþnaena wo lala e amiu imi ve sur korena sina ga. Sanene nepitetalia Timote piþnasu.

Timote þasuþe si puna ne Pol amio navisaplanena wo e lepas puna ne la nae Tesalonaika

⁶ Timote piþnasu pisu amiu, ana nanagane ga ne naga þasuþea pimi katen imimi. Pogos naþa pimi, þar lologena wo, pisayu sanape naþa kiamiu naviawaena amio þelaga na sinesiena keviu ga sike na wa, suþna poga ga, þisi na kila sineu kekara keviu. Naga mla kiamiu visena pimi pan imimi, sape asitoþnal imimi ke silaga, ana sinemiun visuen si maramimi paþisi, sa ga naþa imimi mþena

mesape mevisu si maramiu. ⁷ Ana pe sur korena ga naþa mesike memloge piowa sanene e yo nini komin naviowaena naþa akila ke pan imimi, ana pogos naþa memloge lologena na kiamiu masisuena amiu kiamimi erau lala, memloge sane pisirlua si kiamimi sitomena. ⁸ Memloge naþa asuþnal ke mþarera e Suþe, þisi na kila memloge sane memal ruru sina.

⁹ Pogos naþa memlen wo amiu ke sanene, mepisu sane pe imimi re naþa mekila ke sur wo tai pan amiu poli, peraga, ana amiu na akila ke sur wo tai pan imimi, komin amiu akila ke naþa mokus pupia kekarena e losinemimi, pano-o pe kiamimi visen re si tai navisaen potena van Ntewa vanon poli. ¹⁰ Naga nene kila sane sinemimin manene paþisi vena melen kolegiena a kolemallo, sane sa mekilia mevisu amiu sina ga, visae narin lele tai naþa kiamiu naviawaena tai kulkulul li mþaga, ana yoko mekekaran vaþisi naiilaen si naþa kilia mþarera ruru sina silaga.

¹¹ Sur ne nanene naþa nemlenin ke mþarera nanagane, sane kata Ata Ntewa amio kieta Suþe Yesu, avietavan kiamimi mrapa vena mekilia meim meialiali amiu sina. ¹² Pano tol pogos nene, nemlen ke pa Suþe, nepiun ke sane yoko naga kila kiamimi sinesiiena kapuru ke

imi sane kokonia ruru kiamiu malena vano-o tataroi va tol si yar taþena lala, imi ve keviu manene maran taaga ga sa naþa kiamimi sinesiiena e amiu. ¹³ Ana amio naga nene, nemlen sane naga ligan sitomena wo tai naþa m̄arera ruruia e amiu, vena akilia auarar ruru kiamiu malena vano-o tol pogos naþa kieta Suþe Yesu imi kate sina amio kiena li wa lala, ana e pogos nene akilia asum̄alu e marana ne Ata Ntewa naþa amerarava po, ape wa ruru ga asum̄a ga.

4

Pelaga na malena naþa Ntewa sinenania

¹ Erau lala, pogos naþa mesike memio amiu, mepian ruru amiu sanape naþa amiu akapuru laa sane e þelaga na malena naþa Ntewa sinenania, ana memloge sane akila lili m̄a rui, naga po paþisi. Ana e kia kiena Suþe Yesu, moñareran van amiu sane ve aligan re, awaryon ga kilaen vano. ² Suþe Yesu mligan kiena navianena lala e limamimi na visawalen van amiu, ana akilia ruru la rui. Sanene, popon atavevea.

³ Poga, sur ne laþas nanene naþa Ntewa sinenan kiena yeririna la monar ayuñañenia. Kieta malena monar ve wa ruruia, sane ve tekila re þelaga viowa e lepas na yerm̄ene amio sira.

⁴ Ita punu ga monar tetaveve ruru mrapa mesmes na

talopaena, vena yerm̄ene kilia su amio wona na sira naapo e þelaga naþa merarava ruruia, vena ve akila kare re si kiela kia lalua. ⁵ Sanene, pe pon re yaru talopa koskos poli taveve ga kiena sinenanen sira m̄arera, komin nanene pe þelaga ken yaru na yemalolo ga lala, naþa pe akilia ruru re Ntewa poli. ⁶ Visae yar la akila ke ga þelaga wo silaga e nini, yoko wo vaþisi, yoko ve akila kare re si sur nowo naþa pe kiena kiela puruvi taþena lala. Amiu monar avisu ruru yo nene, vanon Ntewa mla ke nakoaeña silaga pan yeririna la naþa amlor ke e mlamulena viowa kar la ne sanene, sa naþa mepisawal pan amiu rui, mesape maram̄e amiu.

⁷ Asitomveveli naga nene. Pogos naþa Ntewa pio ita tepim tepe kiena yeririna lala, naga pe kila re vena kieta malena imi ulen si þelaga la naþa pe merarava re poli, a naga kila vena sane kieta malena imi ulen þelaga la naþa ape wa ruruia. ⁸ Sanene na, yar naþa pe kekaran re navianena la nene poli, naga monar visu kilale sane pe pe visen ken yeririna re la naþa naga mi-aslua poli, ana miaslua ke visena kiena ne Ntewa, naþa mligan kiena Ninuna e ita naþa sane Ninuna naþa pe wa.

⁹ Sur si tai naþa nesape nesunyu van amiu, naga kieta þelaga ita li nalelagaena lala,

naþa monar tekekaran ita tepe namratava taaga. Sur nene amiu akilia ruru þisi rui, pe pon re nesiriyu si van amiu poli, vanon Ntewa kilapian ita make ga rui sane naga nene pe sur wo tai po tanea paþisi. ¹⁰ Nekilia sane amiu akila ke pa sanene rui pan li nalelagaena lala nae Masitonia po paþisi, a nesape nevisa ke sina ga, nesape amiu auarar ruru þelaga wo nene, akila imi ve keviu laa sane likan amiu.

¹¹ Nanagane na nesape nesiri si sur laþasia naþa popon sane awaryon na kilaena. Nasumo, ve oulaula kar re, ana osu ruru ga. Nalua, ve okian re kunuþa va e kove kiena yar taþena lala, ana ovisusu ga kioþa malena. A tai sina ga, ve ove yowen re, ana oyuþae mþarera wo e yuþaena naþa sike e lumuþa, sa naþa mepisawal susumo rui. ¹² Visae okila sanene e kioþa malena legiena punu ga, yoko la naþa pe amlelaga re poli akilia avisu ruru ko, apisuluþar naþa pe yaru taþena re la apisuari ko poli, a ko ga osuþa opisuar ruru ko.

Nawasupeen si kiena ne Suþe

¹³ Ana erau lala, nepisu sane popon amiu akilia lili mþa sur la þasa e lepas kiena ne ita þas naþa amomalio rui, sa naþa akovio e yomarava. Yaru la moki naþa pe amlelaga re poli, amaraun

marena, asitom asape yar la akovio yoko viowa vaþisi van la, ana kila sane pogos naþa lala tai kovio, atagin paþisi.

¹⁴ Ana ita na sa re nene po, komin temlelaga sane siraun naþa Yesu mare e lak torovia, naga suþal mal sina ga, ana e þelaga mþa ne nanene, temlelaga mþena sane lala naþa ape taaga amio naga amare, yoko Ntewa kila la ave taaga amio naga amal sina, ana awasuþe aimi sina amio naga.

¹⁵ Nekilia nevisa ve lelaga van amiu, sane taveve visena tai naþa Suþe ga pisa, ita naþa temal ke ga wa tol pogos naþa nawasuþeena sina, ita taþatete teva metava sumon lala naþa akokovio rui. ¹⁶ Peraga, ana sur naþa kate e pogos nene sanini. Parin navisi nae ma e peni vion manene va metava, a kumasua kiena ne Ntewa yelu, ana kieta Suþe vetan ma e peni vitom tano, yoko li nalelagaena la naþa amarmare asike ne, yoko asuþal si sumo. ¹⁷ Pisi na, ita naþa temal ke ga wa tesike yomarava, naga wereplan ita mþena teva metava temio la, tekom likan lul meta e sinapane, teva tevitawe kieta Suþe meta e yo yau. Teva sanene, ana yoko tesike lue ga temio naga.

¹⁸ Navisaarena nene naga po paþisi, ana popon teila

ita silaga e sitomen wo la nene.

5

Monar tesururuia, teki-rava; ve ve piavi re na naga yoko vim

¹ Erau lala, nekilia sane yeririna la moki sinelan asave akilia sur la nene yoko vim kate e legiena ya, pona pogwai. A naga nene pe pe kiau re nene naña nesiriyu van amiu poli, ² komin akilia pa rui sane sur nene pe kiena re yeririna na kilia poli. Naga þarlologia ga sa naña yar na vinauena kila kiena yuñæena kole-malo. Naga taþatete visawal þesania pog ya naña naga imi!

³ Pona naga imi e pogos tai naña yar la apisa ke pan la, asape “O, nanagane pe pog na sumæarena pa rui!” Pona asape “O, nagane tesike e pog wo narui!” Lala amninue ga, ana sur nene naga sa naña auia tai veraga ga mloge sa naña kiena sisi vaeme narui. Ana pogos nawasuþeena ve sa ke ga nene, naña yoko yeririna la aila ga, sane pe asitoñal re poli, ana pupia pog viowa imi katen la, naña sane taþatete nena aur matania.

⁴ Ana amiu erau lala, pe asu re si e pupumalko poli, ana visae pupia legiena nene imi kate, nesitom pule ga sane amiu akilia ailania, sa naña pe yar na

vinauen tai pimin kiamiu sur lala. ⁵ Pe tepe yeririna na yemalolo na kole-malo re si poli, ana tepe yeririna na yomerarava na legiena rui. ⁶ Sanene na, kieta sitomen la monar tavolo ruru silaga, touarar ruru kieta malena, vena ve teve sa re yeririna taþena lala na yemalolo. ⁷ Yuñæena la naña asumña amiyuñæenia, la asumña amun ña wii pano-o wii ñe la, þisi na asumña amomomalion ga, ⁸ ana ita naña tepe yeririna na yomerarava, monar tekila kana yuñæena mesmes lala. Tekila kieta malena la mesmes ruruia, tekilawo yepeta e þelaga na viawaena amio þelaga na sinesiiena, a monar teyanwo þarita e nalelagaena ñarera naña tesape yoko Ntewa monar tamalia ita. ⁹ Naga nene pe pon re naña kieta sitomen veve lua poli tesape Ntewa tamalia ita pona ve tamalia ita re, komin naga pe kiena sitomena re naña sape yoko kiena li nalelagaena lala atol nakoæena poli, ana naga pisaaria sape yoko tetol natamaliaena nene naña Suþe Yesu Kristo tauluia pe kieta. ¹⁰ Naga marewo ita, vena kilaen sane visae wasuþe sina, pe sur korena ga naña visae tomomalio, sane tokovio pa rui, pona tavilo, sa ga naña temal ga tesuñæ ga, ana kieta malena su ruru ga amio naga silaga.

11 Visena ne na nene popon amiu avisasa vena iilaaren kiamiu sitomena, aiila amiu vena yuñāenen kiamiu naviawaena imi mārera ruru laa sane, sa naña nekilia sane amiyuñāen ke pa rui.

Visena maro

12 Erau lala, nesape neviun mēna van amiu vena avisu kilia ruru li la naña amiyuñāe mārera ke e yuñāena kiena ne Suḻe likan amiu. Nanene komin naña naga mligan la vena ave suḻen amiu, avian amiu. Amiu monar avatanon ruru la, ¹³ aligan la asu metava e kiamiu sitomena lala, akekaran la, vanon yuñāena la naña amiyuñāen ke ne. A ḻisi na, amiu ve akakawe amiu re, ana sinemiu la monar ve lemam van amiu silaga.

14 Nepiun māreran tan amiu puruvi a vineu la, visae amiu ḻas ape yowena, popon avis van la vena yepela mñae la sane. Visae amiu ḻas amarau, avis van la vena akilia asuñālu mārera. Visae laḻas yepela mavi, avis van la vena iila laena. Ana e la punu ga nene akila sane kiamiu sitomen la viayavi ruruia.

15 Amiu awaryonli sane visae yar tai kila viowa van amiu, ve akilamaran re si viowa vania. Ita monar tekilali sane sineta wo ruru van ita silaga, a sineta wo ruru mēna van yar taḻena lala.

16 Pe sur korena ga e sur ya naña imi katen ita,

ana tekekara silaga, ¹⁷ telen silaga, ¹⁸ tevisa potena van Ntewa silaga. Na nene kiena sinenanena naña sape teyuñāenia, e lepas pun ita naña tepe kiena Yesu Kristo.

¹⁹ Sur si tai, visae kapi kiena ne Ninuna ne Ntewa vivaga ruru ke yo tai, yoko weñāren toko, ²⁰ ana visae yar tai suñā pisa plan ke navisawalen lala, ve avisalele kare re naga, ²¹ ana asitomveve ruru sur punu ga. Naga naña po, auarar mārera, ²² ana naga naña piowa, aligania. ²³ Nanagane nelen sane Ntewa ga, naña pe Ntewa na suñārena, kila sinemiu amio kiamiu sitomena a kiamiu malena ve wa naña ve wa ruruia. Sineun manene nesape pogos naña visae kieta Suḻe Yesu Kristo wasuḻe sina ga, yoko ninumi wetelu, losinemiu wetelu, amio tasnemiu wetelu, ve narin kinakinas nen kororak re nena tai se e la. ²⁴ Naga naña piolua amiu naga pe masisu lelaga, a naga yoko yuñāe mñaga ve sanene vano.

²⁵ Sur maro, nevisa van amiu erau lala, neviun tan amiu sane ve sinemiu ḻesan imimi re e kiamiu leniena lala. ²⁶ Avisu pokolulagi po pokolemalo van li nalelagaena wa taḻena lala naña asike ne, ²⁷ a e kia kien Suḻe, nepisa sane luñaki nini, aulolua e marala.

²⁸ Lemamiēna kiena ne kieta Suḻe Yesu Kristo sike amio amiu.

Inu, Pol.

**Maki Nalua Naþa
Pol Siri
Pa Pan Li
Nalelagaena Wa
Lala Nae Garu
TESALONAIKA
Visayuena Na
Tusi Nene**

*Komþasnen suniena plas
na tusi nini*

Yaru lala na suþare nae Tesalonaika amloge piowa komin amloge ke visena la mokliu, naþa asape Yesu þasupe rui, a amininuwe kare narui aþa visena nape naþa lelaga. Ana Pol siri kiena maki na lua nini pano pa li nalelagaena la garu Tesalonaika vena visawalen visena na lelaga vani la. Naga pisape yoko Yesu wasupe sina, ana sumonia þelaga viowa lala monar imi viowa manene la vatanon nasuþenena kiena yaru tai naþa yoko imi malivi, naþa kiena kia "Yaru na kilaroen navisaluaena," a yoko naga visakare Kristo amio li nelagaena lala.

Pol pisawal meraravania sape yaru la naþa aulo maki nini monar asuþalu marera e kiela lelagaena lala, pe suri korena ga visae avane suri viowa la ve moki, pona aloge viowa manenea vaþisi. A naga sape monar ayuþae ga marera vena atol suri la naþa limala plasia e

kiela maliena lala, sanaþa naga amio yaru la naþa amiyuþae ke amio naga, la asuþa akila kene, a monar akila luwe ga yuþaena wo lala.

Komþasnen tusi la na nini

Visena þesa 1:1-2

Pol pisawal sape kekaran la paþisi 1:3-12

Pol pian la sape Yesu yoko wasupe si ve sanape 2:1-17

Pol pian la e þelaga kiena li nalelagaena lala 3:1-15
Visena maro 3:16-18

Visena na sumo

¹ Pegas na li nalelagaena lala kiena ne Ntewa Arimata a kieta Suþe Yesu Kristo, naþa asike e kumali nene Tesalonaika, imimi telu Pol, Saelas a Timote, mekekara paþisi navitawe amiuena sina e maki nini. ² Lemamiena a suþarena kiena ne Ntewa Arimata amio kieta Suþe Yesu Kristo sike amio amiu.

Pol siar kiena maki e leniena na visaen potena

³ Sur tai naþa popon meyuþaen silaga, monar mevisa potena van Ntewa vanon amiu kiamimi erau wo lala. A nanagane, mekekaran mesape meyuþaen sanini, komin memloge ke kiamiu lologena lala, sane kiamiu naviawaena pam manene laa meta sane silaga, a amiu punu ga akekaran amiu taþena lala pimi keviu manene la. ⁴ Naga nene

po pañisi, ana pogos naña mepa metelivi ke puna pegas nen li nalelagaena tañena lala kiena ne Ntewa, memieluar amiu ke pañisi pan la. Mepisa meraravan ke pan la sane amiu añar ke pelaga mārera kiena li nasinekar lala, ana amiu apa aņarpoyo ke e yo mārera tai naña kila kare amiu pañisi, ana pe akukulul re poli, kiamiu naviawaena pe mlor re nenaga.

⁵ Pogos naña asumāl ke mārera sanene, mepisu sane pogos naña Ntewa kilologia amiu, naga kila mesmes ruru ga, komin naña pisuluņar sane amiu ape yeririna la naña taņatete aloru. Nanagane, naga pisuluņar rui naña aņar ke naloge viowaena lala komin kiena nasuņenena, a siraunia yoko naga visu amiu atorokin vaen loyuma ea.

⁶ Naga, silaga miyumaes mesmes ga, a yoko kilamaran viowa van la naña akila piowa pan amiu. ⁷ Lala akila amiu akus naloge viowaena pañisi, ana naga yoko kila pñisi, naga yoko iila amiu gar ne, a iila imimi mēna e nini naña mepane ke sur laņasia. Pogos naña tevisu pupia kapi tego ma e sinapane, tekilia tesape kila ke mrapa naña Ntewa ligan lua Suņe Yesu ma e peni vitom tano e yomarava, amio kiena navisi mārera lala, naña yoko wereplan ita vetan naloge viowaena lala na yomarava.

⁸ Naga mālivi, yoko liņere la naña yepela mavin Ntewa, naña yepela mavin logearen lologena wo kiena ne kieta Suņe Yesu.

⁹ Naloge viowaena kiena ne la naña yoko akusia, yoko akokovio lue ga narui, yoko akilawo la taņatete nena asike amio Suņe pogos tai e yo nowo naña kiena māreraena miyumaenia mon māga. ¹⁰ E pogos naña naga mālivi, yoko kiena yar wa lala ayeluar vañisi, la naña amlelaga ea avisu naga sane po na po pañisi, ana amiu amio la akilia ataveve naga. Akilia akila sanene komin amlelaga e kiamimi lologena, ana li tañena la nene, taņatete nēna atavevea.

¹¹ Mesuma mesitomveve ma sur la nene pano-o, kila imimi moņarera ruruia na lenwo amiuena silaga. Mepiun ke tan kieta Ntewa naña iila amiu vena atorokin malena wa naña naga pio amiyunia. Memlen ke sane kiamiu naliganarena wo la naña sike e kiamiu sitomena vena taveveena, amio yumaena wo la naña kiamiu naviawaena kilia kila, yoko Ntewa yumaes e kiena māreraena vena kila awar mrasa. ¹² Memlen ke sanene vena ayeluar kia kiena ne kieta Suņe Yesu imi ve keviu likan amiu, a vena akapur manenea amio kiena pelaga wo lala. Visae akilia akila sanene vano-o maran taaga amio lemamiena wo kiena

ne Ntewa kieta Suře, nane Yesu Kristo, yoko wo na wo.

2

Yar viowa nene, Nasinekareena Navisalu-aena, yoko imi mālivi

¹ Nesape nevisayu sina ga nawasuřeen sina kiena ne kieta Suře Yesu Kristo, amio sanape nađa yoko were ita lele taaga tesike temio naga. Erau lala, e lele nene nesape nevisa sanini, ² sane ve sinemiu pepe re, ve amarau re. Nekilia sane visena tai tetelivi ke sape yar laņasia apisasawalia pona amlologon ke asape nanagane legiena na nawa-suřeen si kiena ne Suře naga pimi kate rui, ana laņasia apisasa ke asape imimi ke nalologena la narui mepisawal sur nene e kiamimi lumaki tai rui. Ana amiu ve alelaga re e visena nene, ³ ve ataman re nađa avisa kotalia amiu sanene. Sur na apisa ke ne, pe sa re nenā nene, komin pupia nakawelanan van Ntewa monar va meta sumo. Siraunia yoko

yar viowa na kovioena, nađa apio Nasinekareena Navisalu-aena, naga mēna monar imi kate e yometava.

⁴ Yar nene naga piowa paņisi, naga pilolon kare make ga sur wo lala, a naga mligan ke naga mon metavan sur make ga nađa kia kiena ne Ntewa sike ea, amio sur wa taņena la nađa

yeririna la apatanon ruruia. Yoko naga kila mā sanene vano-o, naga ga visirlua si naga sike e lele wa loyuma e Yuma Wa mana ne Ntewa, visawal naga sape naga ga pe Ntewa rui. Ana pogos nađa kila sanene, nanene naga e pogos ke nađa lavis ke towarpoyo e legiena maro narui.

⁵ Visae amiu asitomal ke ga wa, pogos nađa nesike nemio amiu, nepisasawal ke suri nene pan amiu yam mokli rui. ⁶ Ana taveve ya nađa nepisa meraravan ke ne, akilia avisu kilale sane yar nene, kan pog mesmes nađa vim kate sike ga wa, ana apisawo ke ga wa komin kan pog nena na pere wa.

⁷ Ana pe sur korena ga nađa Nasinekareena Navisalu-aena pe kate re poli wa, ana kiena māreraena suņa miyuyunāen wan ke kiena pelaga viowa lala e yomarava nini rui. Taņatete imi kate e yometava amio kiena pupia māreraena na wa, komin Ninuna Wa suwo ke naga, ana pogos nađa Ninuna Wa ure si vavini, ⁸ yoko naga suņalu amio kiena māreraena make ga. Naga yoko kila mara vano lavis taulu make sur narui, ana yoko Suře Yesu vim kate, yoko lagi na kiena visena lelua yar viowa nene veraga ga, pupia yomerarava nađa pimi amio, mēnelua yar nene va kovio e pupumalko. ⁹ Pogos nađa Nasinekareena

Navisaluaena nene vim kate, yoko naga yuñae amio ñareraena kiena Yermare, ñisi na naga kila pupia kile lala amio sur na ilanen lala, ana ape navisokanen ga lala. ¹⁰ Naga yoko kila ve sanene komin sinenan werekareen sitomena kien yeririna la naña ave na kovioena. A yoko kila ñena ðelaga viowa lala naña kilia were kare kiela sitomen la va ve taþena, komin ape yeririna la naña pe sinelan re akekaran visen lelaga lala kiena ne Ntewa poli, pe asitoñal re nena sane yoko naga kilia tamalia kiela malena poli. ¹¹ Ana pogos naña Ntewa pisu kiela sitomen la ñarera sanene, yoko naga ligan la ga, tañan naña sane pupia visen navisokanena la kilia taulu la ga sane, yoko alelaga ruru e visokanena la nene.

¹² Ana siraunia, yoko naga liþerela mesmesu nena, sape ape yeririna la naña yepela mavin lelagaen e kiena visen lelaga, ana sur naña la akekarania, naga ðelaga na kilaen viowa la naña akilakila ke pa rui.

Asumñal ñarera ruru silau

¹³ Sur wo tai naña popon meyuñae silaga, monar mevisa potena van Suþe Ntewa vanon amiu kiamimi puruvi a vinemimi lala naña naga kekaran amiu pañisi. Siar nanua susumo rui, naga kilologia amiu vena kam na ape mras þesia naña amlelaga e kiena visen nalelaga,

a Ninuna myuñae e kiamiu malena lala ana apim amerarava e marana, þisi na naga kilia tamalia amiu.

¹⁴ Naga pio amiu kome lologena wo naña mokus pimi, komin naga sinenan pisape amiu ñena ayakol e pupia naurarena vena yeluren kia kiena ne kieta Suþe Yesu Kristo. ¹⁵ Ve sanene erau lala, pe pon re amiu yar tai kila pal poli. Monar asumñal ñarera ruru silaga, a monar auarar ruru nakilapianen la naña mekila pan amiu rui e kiamimi visena lala pona e ñaki la nene.

¹⁶ Armata Ntewa kekaran ita pañisi, pe lemam pan ita a miilaar si kieta sitomena e kiena navisaarena wo tai, sane ita na tesu wo lue ga temio vano-o taþatete þisi pogos tai. Ana nemlen pania, sane narina, kieta Suþe Yesu Kristo, ¹⁷ iilaar kiamiu sitomena lala, kila amiu añarera ruruia e visen wo punu ga lala a e kiamiu yuñae wo punu ga lala.

3

Pol piun vena alenwoia

¹ Erau lala, sumon neþisin kiau visena nesape neviuntan amiu punu ga ve sine miu þesan imimi re e kiamiu leniena lala, vena mekilia meyuñae ñarera laa sane vena visena kiena ne Suþe kilia momolue vilaga e yo la punu ga. Visae ve sanene, yoko yar taþena ñena la akilia aloge kiena visena nalelaga, akilia avisirlua kiena kia, sa ga naña amiu

amiyuñaenia pogos naña pimi mālavin amiu sumo ne. ² Ana pogos naña visae alen, popon asitomāl mēna sane pe amiu punu re amlelaga poli, a yeririna viowa pās asike naña añar ke sitomen taņena lala, ana amiu akilia alen vena Ntewa suwo ruru imimi vena taņatete atol imimi.

³ Ita tekilia sane tekilia towasine Suņe silaga, ana pe sur korena naña Parin Yar Viowa taņali kila ya ne van ita, a nemlelaga sane yoko Suņe kila ita tomārera ruruia, yoko visuar ruru ita vaņisi. ⁴ Kiau sitomena nekiliaar sane naga yoko kekarān naiila amiuen sanene, komin sur la naña mepisawal pan amiu, nemlelaga sane amiu akila ke pa rui, a nemlelaga sane amiu yoko awaryon naki-laena e legiena la ne pimi ke ne. ⁵ Amiu akila sanene po paņisi, ana kiau leniena sane kieta Suņe Kristo sumon amiu vano tol naña kiamiu sitomena la viayavi lelaga sane kiena, a losinemiū la va ulemamaga e sinesiena kiena ne Ntewa.

Visena e lepas na yowena a na su korenena ga

⁶ Erau lala, e kia kiena ne Yesu Kristo nesape nevisawal van amiu, sane visae puruvi tai pe miyuñaē ruru re poli po pe taveve ruru re navianena la naña mepian amiun poli, popon asu perinan li laa ga naga sane. Yowena la ne sanene, ve

ava re lavisin la, ⁷ komin pogos naña mesike likan amiu, pe mesu koren re ga sanene po. Mekila meraravan mrapa wo pan amiu, ana amiu akilia ruruia sane popon asiraunia. ⁸ Pog naña visae memla kinanena tai, ana monar moul ga, komin memiyuñae legiena a kolemalo natauluen narin kilavaru vanon sur ya naña sinemiminia. Imimi na memninu sanene sane ve mekila re yuñāen keviu van amiu na visuar imimiena. ⁹ Visae amiu avisuar re imimi ve tokaki pona mesmesu yo, ana moņaryon mesape imimi ga mevisuar imimi, vena kilapian amiuen e pēlaga wo naña akilia atavevea. ¹⁰ Pogos naña mesike memio amiu, amloge ke naña mepisa ke sur nene, sane pe kiamimi navisaluaena tai, ana memla mēna pan amiu, mesape yar na yepen mavin yuñāena, naga taņatete kinana. ¹¹ Nepis ke sanene komin narin visena tai pimi tol kiligau sane kiamiu yeririna pāsia pe amiyuñae re la poli, asusu korena ga asuñā sane, ana asuñā apisimumu e sur la naña yar taņena ga la amiyuñāenia.

¹² Kiamimi visena e yar la ne sanene pa sanini, sape ve asu kare re sanene, akilia ava ruru amiu la sane, ana akila towe li la yuñāena na tauļuen kamiū kinanena sa naña amla ke legiena punu ga. ¹³ Ana visena pan amiu punu ga puruvi lala a vineu

la, sane ve ita yar re tai naña loge yepen malumun yuññaena wo la naña sike ne vena teyuññaenia.

¹⁴ Mepisawal sur la moki e mñaki nene, ana visae yar tai ve kekaran re, popon avisu ruru yar nene. Yoko ve akilali re naña ayuññae veraga amio naga sumo wa, vena kila naga mawa towe la sane, vena visu kilale kiena viowaena. ¹⁵ Ana ve akila re suri tai vania sane naga ve kiamiu sinekar tai, ana awepege si naga sane imi ve kiamiu puruvi wo ga tai.

Visena maro

¹⁶ Kiau visena maro, nemlen nesape yoko Supe na sumñarena ligan kiena sumñarena sike e amiu e kiamiu mrapa la punu ga, nemlen nesape naga sike amio amiu punu ga silaga.

¹⁷ Narin yo na tano yoko ovisu sane in ga nesiri visena la nene e lumñau. Sineun nesape nekila ve sanene e kiau mñaki lala vena akilia avisu kilia lumñau sane in ke narui nemligan mñaki nene piñasu. Naga kiau nasiriena ga nane teke ne, nesape:

¹⁸ Lemamena kiena kieta Supe Yesu Kristo sike amio amiu punu ga.

Inu, Pol.

Maki Nasumo Naña Pol Siria Pa Pan TIMOTE Visayuena Na Tusi Nene

*Komņasnen suniena plas
na tusi nini*

Timote naga pe yaru viu tai nae pupia pulkumali naña Listra, a naga mlelaga e Yesu Kristo. Anena naga pe lus nae Israel tai a arimana naga yaru nae Kris. Timote na erau kiena Pol tai naña tavevea apa ke e yo makega vena visawalen lologena wo kiena kieta suņe Yesu Kristo. Pol siri maki nini pa Timoti, e pogos naña sike garu provens naña Masetonia, a Timote naga sike Episas.

Pol siri maki nini pan Timote, pisa pania sape visuar naga e vianiena na visokanena lala naña kilia imi loyuma e sumare. Vianena na visokanena nene moļue kome sitomena tai naña pisape suri makega na yomarava piyoyowaga pona pe namname. Yaru la naña apian ke yaru la e vianiena na visokanena nene, asape yaru kilia tol malena visae ga viyon sape tol kinasnen kiela vianena la naña tapolou, a monar lon kinanena laņasa, kan ga kinanena la naña asitom sape torokin akania, a yoko naga

ve talopa re, a taveve kiela ŗelaga taņena si laņasa.

E maki nini Pol pisayu ŗelaga wo la naña li nalelagaena lala akilia atavevea vena akila lotena, a vena visuaren sumare. A naga pisa ŗelaga wo laņasa naña nasumonena na sumare lala a li nalelagaena lala monar atavevea. A suri maro naña Pol pisa, naga pisa pa Timote sape naga monar imi ve yaru wo tai vena kilaen yumaena kiena Yesu Kristo. Naga pisa pania sape kiena ŗelaga monar ve senape, pogos naña naga yalin ŗegasnen li nalelagaena taņena la a naña vianila.

Komņasnen tusi la na nini

Visena ŗesa 1:1-2

Vianena e lepa na sumare
a nasumonena lala 1:3—
3:16

Visena lala na iilaren Timote e kiena yumaena
lala 4:1—6:21

Visena na sumo

¹ Naruu Timote, inu navisawalena Pol nesiri maki nini piņasu pan ko, naña Ntewa kieta natamaliaena amio Yesu Kristo kieta nawasineena amligan inu vena neyuma e lologena wo. ² Nekekara navitawen ko si e nini, vanon nepisu ko sane ko ope naruu wawa loyuma e namratava na kieta naviawaena. Nemlenin ko ke, sane Ntewa arimata, amio kieta suņe Kristo Yesu yoko aligan

lemamiena, sineyeena, amio kiela suñarena sike amio ko.

Okilawoli nakilapianen visokanen lala

³ Nesape nevisawal si van ko sur naña tepisayu nanua ga ne, pogos naña nesike nemio ko gar Episas, sumon naña nemligan ko navaen Masitonia. E pogos nene tepisu ke naña þar m̄arera laþas asuñã ga, naña tekilia ruru la, ana nesape osuñã ga e yo nene wa, vena okilali naña okilawo la. Sur ne nanene nesape nevisawal si van ko, sane osuñã e nene wa, vanon la nene, asun akilapian ke sur la naña pe memes re poli. ⁴ Sila ga kiela sitomena la mlor ke ga e kiela suniena marua ga lala, ana sinelan ke ga navisayuen lus kiena ne kiela li marua la na nanua sumo sumo, ana popon aligan sur la nene sike na. Visena sur la ne sanene kila ke yeririna la kiela sitomena peve lua paþisi, ana taþatete nena ai-ila la vena atol malena wo naña Ntewa sinenania, naña tekilia tetolia e ga e lela-gaena e naga.

⁵ Sanene na, popon tevisawo la, vena kilaen sane yoko kieta yeririna lala, losinela kilia merarava ruruia, kiela sitomena kilia memes ruruia, a kiela navi-awaena ve lelaga, komin sa ve sanene, yoko þelaga wo na siñesii itaena kilia imi ve keviu sina vaþisi likan ita.

⁶ Ana nanagane piowa ga, komin la þas e neñã, aterere akuspal mrapa wo

nene, amial m̄ã e mrapa naviswoween lala. ⁷ La apilave, sinelan asape avim ave navianena na navisaluaena wa, ana asuñã api-sawal ke kana visena m̄arera ne lala, pe akilia ruru re sur la naña apisa ke poli, taþatete avisa meraravan ruruia.

Navisaluaena kiena ne Ntewa pe na ya?

⁸ La nene apisin manene navisaluaena kiena ne Ntewa, ana tekilia tesape navisaluaena, visae teyuñãe ruru ea, naga pupia kana yuñãena sike ea. ⁹ Ita monar tekilia tesape navisaluaena naga apisirlua pe naiilaen re la naña amesmes ruru pa rui, ana naiilaen yar taþena lala, sane la naña akilarovia amio la naña yepela mavin logearena. Lala nene, nane la naña pe akekarã re Ntewa poli, la naña asitom korenan ga sur wa lala, la naña þar m̄arera ga lala, a la naña añe arimala lala amio anela lala, po añe m̄ena yar taþena lala. ¹⁰ Amio yar la nene, þasia naña ataþa kolau, amio naña yerm̄ene were si yerm̄ene po sira were si sira, þasia apinaun nisisi vena awililinia, lala na visokanena, amio lala na kilawanen kiela naviowaena. Navisaluaena nene pe kien la nene narui, amio la naña akila ke þelaga taþena la ne sanene, vanon yepela mavin kieta navianena wo lala. ¹¹ Pe ataveve re nena lologena wo kiena

kieta Ntewa wa nowo, naña mligan sike e inu vena nevisawal van amiu.

Lemamena kiena Yesu pa Pol

¹² Yumãena nene sike e lumãu vena neyumãenia, ana nesape nevisa potena ve keviu va kieta Suñe Kristo Yesu. Naga ga naña pisuveve ruru kiau malena, pisu sane nekilia nema-susu wo e yumãena nene, ñisi na pisirlua inu vena neyumãenia, ana monar nevisawalia nesape naga ga mla ke puriukawaena pan inu silaga vena neyumãen sa naña naga sinenania. ¹³ Nanua sumo, in na nepe yar tai naña nepepeyun kare ke kia wa nene naña Yesu, ana nekila kare ke naga pañisi, naña nekila piowa manene laa pañisi pan kiena nalelagaena lala, mesmesun ga naña la nakoana van inu vanonia. Ana peraga, pisu sane nemial ke ga e pupumalko, pe nemlelaga re e naga poli, ana pe nekilia re sur naña nemiyumãen ke poli, ñisi na naga kila po manenea, sinen miye inu.

¹⁴ Sanene na, nepisu sane kieta Ntewa mligan kiena lemamiena nowo e inu keviu pañisi, kokonia kiau malena e naviawaena a e sinesiiena naña pe kieta ita punu ga naña tepe taaga temio Yesu Kristo.

¹⁵ Visena tai tomã ga, naña tekilia towasinea, popon yar

punu ala e kiela malena, naña pisa sanini, sape Kristo Yesu pitomi tano e yomarava nini vena tamaliaen malena kiena ne yar ai naña taña mlamulena viowa.

Ana e la naña amiyumãen mlamulena viowa sanene, nepisu sane in ke nanini naña nepe kiela nasumonena, nepiowa manene laa taulu la make ga, ¹⁶ ana potena pan Ntewa naña sinen miye inu. Nepisu sane pe pon re naga viewo inu sanene poli, naña nepe nasumonena kien yar na mlamulena viowa lala. Ana naga kila pan inu sanene, vena yeririna la akilia avisu kilale sane Yesu Kristo, kiena sitomena naga piavi pañisi vena sinen ye yar viowa lala. Ana visae la naña aim sirau avisu naña Ntewa kekaran were inuena sanene, yoko avisu kilale sane la mña akilia alelaga ea vena atol malena naña pe luas re poli.

¹⁷ Nesitomãal kiena ñelaga wo nene, kila nemiyeluar naga, nepisa nesape naga pe ñarin suñe na nanua sumo, ana naga mal sulue ga narui. Naga sike e yo punu ga ana yar tañatete visuia, naga taaga pe Ntewa, pe yaru re si tai poli. Sanene popon tewatanon naga, teyeluar kiena kia vano-o ve ñisi re pogos tai, sanene.

Osumãalu m̃arera, ve oloru re

18 Timote, in na nepio ko ke sane ko na ope naruu, ana nešitomaľ navisawalena la naĵa apisayu ko nanua ne, naĵa akila meraravan ko pan inu. Akila sane nepisu kilia ko sane ko na ope yar tai naĵa nekilia nowasinea. Sanene na, visena urmi la ĵasia pona pupia na via-nena ĵasia sike na naĵa sineun nesape neligan e ko. Visena la nene kilia iila ko omarera vaĵisi e mara wa naĵa tesuma tekila ke ne, 19 vena yoko aiila ko nauarar ruruen ĵelaga na nalelagaena a akilia akila ko naĵa kionma sitomena merarava ruruia silaga.

Yar la ĵasia, sa naĵa apilolon ke waa, ana kiela sitomena wo pisawal pan la sape mrapa nanene, ana yepela mavin yagogenena, ana akuspalia, kiela naviawaena pa tawa ruruia e piamē tai. 20 Pona ko okilija lalua nene Aemeneas amio Alikšanta, ana pe sineyena naĵa nesape nevisawalia sane lalua sanene rui. Akila ma piowa pano-o, pe sinelan re si yagogen poli, ana nekuan plan lalua apa si e liman Yermare sumo wa, ana vena lalua avisu kilale si yo, sane popon ve asuma akila kare re kia wa kiena ne Kristo sa naĵa asuma akilakila ke ne.

2

*Nakilapianena ĵasia e
lepas na lotena*

2:7 2Tim 1:11

1 Pogaga, nevisawal nakilapia-nena nene narui. Sur nasumo, nemiilaar amiu sane e pog na leniena la, monar avisa potena van Ntewa vanon yar taĵena lala, a monar alen wo la marera, monar aviun mareran tania vena iila la. 2 Naga nene monar akila mena e lepas kiena ne yerkawa lala, sa naĵa ĵarin yar wa lala amio nasumonena la naĵa asu metavan ita, vanon sa ayumaē ruruia, yoko wo laa van ita. Tekilia tese e malena wo, naĵa nawaena amio sumarena sike ea, ana tekilia teyumaen yumaena wa kiena ne Ntewa la punu ga, e ĵelaga wo sa naĵa naga sinenania. 3 Pelaga la ne sanene apo paĵisi, pe ĵelaga naĵa Ntewa natamaliaena kekaran visuena e kilamara, 4 vanon sinenan sape yeririna punu ga atol kiena natamaliaena, sinenan sape yeririna punu ga akilia kiena visena na lelaga. 5 Pe mrapa re si tai poli, komin naga taaga pe Ntewa suma ga, a yar taaga ga naĵa kilia kila mara wo temio naga, nane Kristo Yesu, 6 naĵa pimi pe yeririna, siraunia kus leleta, tamān si kiena malena, pul plan yeririna punu ga na yomarava petan limana ne yar viowa.

Yumaena naĵa Yesu miyumaenia, kila navisaarena lala kiena ne Ntewa na susumo apim ape lelaga, apaeme e kana pog nena

napo, ⁷ ana mloru e luñau narui, vena nevisawal van yeririna lala. Pas asitom ke asape nepisokan ga yo, ana peraga, nepisa ke pe lelaga narui. Apisirlua inu sane yar tai nawaren visena pona nepe lologena tai, vena nevian yolai lala e ðelaga na viawaena a e mrapa na visena nalelaga.

⁸ Vanon sitomena la nene, sineun nesape yeririna la punu ga monar asumã alen lue ga e yo punu ga, ana sa asumãl vena alen, monar ave wa ruruia, naþa sinekar ve su re e la, a sinemimiena ve su re likan la amio yeririna taþena lala.

Pelaga kiena ne sira lala

⁹ E lepas kiena ne sira lala, sineun nesape visae avim loyuña e yuña na lotuena, monar la avisu ruru kiela ðelaga lala. Popon ayowauia ruru la wo, ana piowa naþa ava laa sane, monar torok ga e yo wa naþa apa ke loyuña ea. Pe sineun re akila manene vilula la ve taþena ve taþena sanene poli, po atelan manene kol la se yepela lala, a pe pon re avilaven manene kulmrae la naþa apul e pupia kilavaru poli. ¹⁰ Sur taaga naþa kilia yowauia rurula, nane kiela yuñaena wo lala, naþa mesmesun ga malena kiena ne sira naþa mlotun ke Ntewa. ¹¹ Sira la monar atotano ruruia, avarurula na yagogon ruruena navianena

la naþa apisa ke pan yeririna lala.

¹² In na pe netamãan re sira la avian yermene la poli, pona ave þarun la, monar avarurula ga. ¹³ Nanene mesmes ga, vanon Ntewa sii þesan yar nene Atam, sirau sira nene Iv, ¹⁴ a pe Atam re naþa Yermare kila kotalia naga poli, ana Iv, naga kilaro þesan navisaluaena.

¹⁵ Yermare kila kotalia Iv, ana Ntewa sinen miye ke sira la na wa, mla yuñaena wo pan la, sane yoko la ke narui awar sisi viu lala aim e yomarava nini. Ana visae sira tai naga viawa m̄arera, kiena ðelaga ulen sinesiiena, kiena malena ve wa ruruia, a kiena sitomena to ga tano, yoko Ntewa kekarã tamalia naga.

3

Nasumonena na sumãre lala

¹ Visae yar tai, naþa sitomena tai teke e naga sinenan sape war kia naþa nasumonena, nanene na po paþisi ne, komin pe lelaga kemua, naga pe yuñaena wo tai naþa naga sape yuñaenia. Ana kieta nasumonena lala, yoko nevisawal van la sane lala monar ave yar la ne sanape.

² Sur na sumo, nasumonena naga monar ve sur viowa tai to re e kiena malena.

Naga monar were sira ve taaga a ve lelaga wo van silaga.

Naga monar kawe ruru
kiena ðelaga lala,
monar ve manmarua,
yeririna la monar
avatanonia,

monar kekaran na vi-
suaren yeririna la e
mãana umã,
a monar kilia ruru ðelaga
nakilapianena.

³ Amio sur la nene, naga
monar ve ve yaru na-
mun maneneen re wii
va ve torog,
naga ve suru re,

kiena sitomena monar vi-
avi
sinena monar malum ga.
Naga monar ve vilup re,
a ve sinenan manene re
kilavaru.

⁴ Tai m̃ena ga sanini,
monar ve suþen ruru
m̃ana umã, naþa narina
la vatanon ruru naga e
sur la punu ga, ⁵ vanon
sane visae yar ta ne
sanene ve sumon ruru
re m̃ana umã, ve sanape
na kilia visuar ruru
sumãare kiena ne Ntewa?

⁶ Yar nene monar marua
li m̃aga, sane mla Yesu
e kiena malena yam pi-
avi li m̃aga, visae pere
na yoko þarina kilia
imi ulen vilaveena, þisi
na kila naga kila pal
mrapa lor vito e þilipili
m̃a nena naþa Yermare
mlor pito e nanua sumo.

⁷ Na sumonena na sumãare
lala monar ave yar la
naþa yeririna punu ga,
vito tol la naþa pe am-
lelaga re poli, avisave
lala ape yar mesmesu
wo, vanon Yermare ki-

layon ke paþisi naþa kila
kotalia la, sinenan sape
kila vena yar la asitom
asape sur tai piowa teke
e la.

⁸ Na nene na sumonena
lala, ana nagane neva e
lepas kiena ne yaru na vi-
suaren yumãena lala. Yar
naþa þuarar yumãena na vi-
suaren yumãena,

kiena sitomena monar su
ga tano,

naga ve yar naþa visa
visena la ve lelaga ga,
a naga taþatete purme-
nena ve lua.

Naga ve mun re kuruta
silaga,

monar ve sinenan manene
re sur lala,

⁹ ana monar uarar ruru
ga ðelaga na lelagaena
e kiena malena, taulu
naþa yaru taþena la ato-
lia.

¹⁰ Yar naþa na uararen
yumãena na visuaren
sumãare, monar avisusu
ruru naga, akilali kone
naga sumo wa, a visae
yumãe wo, kiena ðelaga
mesmesun yumãena
nene, akilia ala kiena
kia, siar yumãena narui.

¹¹ Wona yaru na vi-
suaren yumãena, naga
m̃ena kiena sitomena
la monar varuruia,
ve visamumun re yar
taþena lala, monar ve
sira tai naþa kilia warar
ruru kiena ðelaga lala,
a monar kila yumãena
punu ga wo.

¹² Yaru na visuaren
yumãena la monar aure

sira ve taaga ga,
monar ave yar la naña ak-
ilia asumon ruru narila
lala, akilia avisuar ruru
m̃ala um̃a.

¹³ Yaru na visuaren
yum̃aena la naña yepela
m̃aen ruru kiela yum̃aena,
p̃isi na avisu sane yeririna
la akekarana la vaṗisi, ana
aloge naña Kristo Yesu miila
la ke vena ve amaraun re
na sum̃alen m̃arera e kiela
yum̃aena nena.

*Pupia visawanena na ki-
eta lelagaena*

¹⁴ Timote, nesape neiṃasu
nevisu ko ve ve viavi re
navisaen visena la nene van
ko, ana nepisu sane peraga,
monar nesiriwal ko ne ga
van ko sumo wa. ¹⁵ Pona
sur la p̃as auarar inu e nini
yo na wa, ana sineun nesape
monar otol navianena la
nene vilaga, vena okilia ruru
p̃elaga la naña mesmesu
vena akila e mratava wa
m̃ana Suṗe. Namratava
wa nene, na ne pe sum̃are
kiena ne Ntewa mali, naña
monar tarar kiena visena
na lelaga silaga, sane p̃eren
yum̃a p̃uarar kana kemraṗe
lala. ¹⁶ Lelaga, p̃elaga na
kieta lotuena sum̃al sike e
nalelagaena tai naña sane
pe visawanena tai, naña pito
ruru tano, urmi ruru po.
Tepisawal ke kieta nalela-
gaena nene sanene, tesape
Yesu, naga pe Ntewa naña
paeme e yomarava
nini e tas nen yeririna,
m̃areraena kiena Ninuna
miyum̃ae manene ea,
a navisi la asike amio
naga,

amlologon naga pa tol yolai
taṗena lala, kila sane
amlelaga e naga telivi
e yomarava,

siraunia Ntewa pure naga
pa si metava e kiena
pupia naurarena ma e
peni.

4

*Avisuar ruru amiu e na-
vianena na visokanena lala*

¹ Ninuna Wa pisawal
visena tai merarava paṗisi,
naña pisape e pog maro lala,
na lala p̃as naña amlelaga
sumo rui, yoko ayagogan
ninuna na visokanena lala,
ana ataveve navianena
kiena ne yermare lala,
ana kila la aure ava e
malena naña pe po re
poli. ² Navianena viowa
la nene, yoko amolmolue
e yeririna na visokanena
lala naña la asitom ke asape
la akilia suria, ana kiela
sitomena naga malolo sa
ga kilamemego. ³ Sur la
p̃as naña yoko avisa sanini,
sane yar taṗatete talopa, ana
avisaluṗar manene yeririna
lala e kinanena wo lala naña
Ntewa sii la vena tekekarana
na kanena. Komin ita naña
temlelaga a tekilia sur naña
pe lelaga, tekan ke suri la
nene silaga rui, a tesum̃a
tepisa lue ga potena pania.

⁴ Naga nene vanon sur
punu ga naña Ntewa sii la,
pe tepisa re tesape piowa
poli, ana tepisu sane po na
po paṗisi. Pe sur re tai naña
tepisusu ke piowa e poli,
ana tekekarana nawaren sur

punu ga, tevisa potena van Ntewa vanonia. ⁵ Ana pogos naña tekila sanene, kila sur la nene pimi pe wa. Visena kiena ne Ntewa amio kieta leniena la kila merarava pa rui.

⁶ Navianena la nene, visae ovisa merarava va li nalelagaena lala, naga sa naña opisawal ke osape ko na ope yar na viawaruruen e yuñæna kiena Navisaarena Yesu. Pogogos naña apisu ko omiyuñæ po sanene, yoko akilia asape ko osuñæ opa ruru metava rui sane yar tai naña marua ruru e visena lelaga na kieta viawaena. Yoko akilia ruru naña ko mēna osuñæ otaveve ruru ke navianena wo ya naña osuñæ opisawal ke pan la, ana yoko akekara vañisi.

⁷ E lepas na suniena marua wowe la nasusumo, naña apisayu sur kar ga lala, ana pe kioñæ sur tai to re e la poli. Oligan la sike na, ana ko na monar okilarar ruru ko omārera e malena wa. ⁸ Yar la sinelan ke akilarar tasnela mārera ruruia, ana naga nene pogaga e lepas p̄asia, ana pogos naña okilarar ruru ko omārera e malena wa, naga kila po manene laa sane e lepas punu ga. E lepas na malena na nanagane, malena wa naga kilia iila ko, ana e lepas na malena naña pimi ke sirau wa, yoko malena wa kila kioñæ mrapa okilia ova loyumuñæ puna.

⁹⁻¹⁰ Sur nene, temiyuñæen

keviu, toṗaryon ke pañisi, vanon temligan kieta sitomena sike e Ntewa mali naga taaga ga, naña pe natamaliæna kiena ne yeririna punu ga, sane la naña amlelaga ea. Visena nene pe lelaga pañisi, okilia olelaga ea e sinenña wetelu.

¹¹ Kiau visena la nene naña nepisa ke pan ko, sur ne la nanene monar ovian van yeririna tañena lala, omāreran van la vena alogearia. ¹² Visae yeririna p̄asia avisu ko piowa ga vanon ko na ope teras ga tai, ve omarau re, ova ga. Lelaga, sane ope teras ga, ana sa naña osuñæ okila ke rui, monar ovike mrapa van li nalelagaena tañena lala. Popon naña ataveve lamña, naña okila pian ruru la e malena wo, e lepas na visena, e lepas na p̄elaga wo, e lepas na sinesiiena, naviawaena, a mekikena.

¹³ Vano tol pogos naña visae neiñasu neiñalivin ko, ouarar pog na lotena la mārera. Oulolua visena wa e maran yeririna lala, olologonia, ovian lania.

¹⁴ Ve sinenña p̄esan re puriukawaena wa naña Ntewa mla pan ko e pogos naña p̄egas nen nasumonena lala apu p̄aruñæ. Visena kiena navisawalena tai e pogos nene pisawal sape puriu kawaena nene naga pe kioñæ, ana omāreran oyumuñæ omio. ¹⁵ Ko na monar okilarar ko e yuñæna la nene naña amlor asike e lumonña, monar

owarwaryon nakilaena silaga, ana yoko yeririna punu ga akilia avisu kilale sane ko na opa manene laa ke amio Ntewa e kionã malena. ¹⁶ Monar ovisuar ruru ko, a ko mēna monar otaveve ruru nakilapianena la naña omla ke pan yeririna taņena lala. Visae ouarar ruruia, yoko okila sane ko omio la naña amiyagogon ko ke ne, amiu punu ga akilia atol natamaliaena.

5

Pelaga wo na kilaen van li nalelagaena lala

¹ Timote, visae ovisu yer-marua tai naña kila suri tai pe memes re poli, ve ovisin re sinemimiena vania. Omomãu woga vania, okila vania ve sa ga naña naga pe arimomã narui. Popon okila mēna sanene van taņena lala. Ovisu teras lala sa ga womla, ² ovisu sira marua lala sa ga anomã, a ovisu sira mēe lala sa ga vinerã. Visae okila ve sanene, yoko kionã sitomēna kilia mekiki ruru silaga.

Letano lala

³ E lepas kiena ne letano lala, ita na suñare monar sineta iye ruru la, monar tevisuar ruru la naña asike lala ga, pe ola re tai naña iila la poli. ⁴ Ana visae letano tai, narina la asumã ga, pona mapina lala, yoko la nene monar avisuaria. E mrapa nene, akilia awar

maran sina ga vania navisu warena wo lala a naiilaena naña naga kila pa pan la e kas lala naña ĩaro rui. Lala monar avisu kilale sane naga nene pe yumãena memes tai, po suri wa tai nakilaen van yaru tai na mñala mratava memes, a naga pe ĩelaga wo tai naña Ntewa sinenan paņisi.

⁵ Letano naña pe yar re tai naña visuar poli, naña lala amarmare tania pano-o naga taaga ga sike na, naga monar wasine ga Ntewa naga taaga. Naga kilia sitorñal ke Ntewa legiena a lemalo vena len vania vena kirakira visu ga naga e sur ya naña naga sinenania. ⁶ Ana visae letano tai sitom ke ga naieluaren naga e malena na yomarava nini, naga sa naña naga mare tan Suņe sa ga naña namratava la puna amare tania nanua sumo rui.

⁷ Nemloge sane amiu li nalelagaena lala asitom asape akila mrapa tai na iilaen letano lala. Na nene po paņisi, ana nemaraun sa ĩisi visena ve keviu lawe vanonia, ana sineun laen visena laņas van amiu e lepas nene sumo wa.

⁸ Visena na sumo naga sanini, sape visae li nalelagaena lala tai, ve visuar ruru re la na kiena lusia, a na keviu nena, ve visuar ruru re kiena namratava memes lala, yar nene naga sane pe pe yeririna kiena Kristo re poli. Naga piowa manene laa narui, nepisu sane naga

piowa manene laa taulu la naña pe amlelaga re poli.

⁹ Ana nalua e lepas kiena ne letano lala, na sanene. Pegas kiena ne letano la naña sumñare visuar la sumña ga, a visae letano tai naña sinenan sape kiena kia va loyuma, monar naga ga naña pe sira marua, sa naña kiena kas siar e lualima yam orai [60] va metava.

Tapena, naga sira ga tai naña talopa yam taaga, pure wona taaga ga, a pe lelaga pania silaga.

¹⁰ Yam si tai, monar ve sira tai naña yeririna la avisu kilia sane pe sira tai naña miyumaen yumaena wo la pañisi, naña naga pian ruru narina lala, naga tai naña kekaran na visuaren yeririna tapena lala e mana uma. Pogos naña li nalelagaena wa tapena lala aim amalivinia, naga kevan lala lala, a naga miilaar ke la naña amlolor e naloge viowaena kar lala. Sira marua letano naña paryon yumaena wo la naña sanene, naga ke narui naña kiena kia kilia va loyuma.

¹¹ Ana visae letano lañas naña asike ga wa pe ape sira marua re poli wa, popon ve owar re kiela kia. Naga nene komin akilia avisaar va Kristo sane yoko asumña ga sa nene amio naga vano-o tol luas nen kiela malena, ana siraunia, ve ve piavi re, pona sinenanena na talopaena imi marera sina ga, ana pñisi

na ailan ga, letano nene sumñalu were si yar tai.

¹² Visae kila sanene avisu viowa e naga, vanon naga kila pal kiena navisaarena, kilaro sina ga. ¹³ Ana amio naga nene, letano viu la nene akilia ayowo pona yepela mavin kilaruruen yumaena, ana asun atetalivi akakate ke e yuma mana yar lala, ana metavanja asun apisasayu ke lala tapena, akian ke kunula pa e sur la naña pe pe kiela visena su re loyuma e poli.

¹⁴ Ana e kiau navisuena, nepisa nesape letano la naña ape mee ke ga wa, popon tetaman la ga atalopa sina ga wa, popon awar sisi, avisuar mala uma lala, ana yoko ve sur re naña yeririna la avis viowa van la vanonia. ¹⁵ Nepisa nanene vanon lala pas akuspal pa mrapa rui, ataveve ke mrapa na marena naña pa puna ne Yermare.

¹⁶ Sanene na, visae ita yar tai naña pe nalelagaena ana letano tai teke e mana mratava, naga ga monar iila ruruia. Visae naga kila, yoko sumñare tapatete visuyonia, ana kilia visuveve ga letano tapena lala naña pe yar nailalaena re poli.

Kilavaru kiena ne nasumonena lala na sumñare

¹⁷⁻¹⁸ E lepas na narin nalaena naña temla ke pan kieta nasumonena lala, neure ita teva si e visena lua na Tusi Wa. Nasumo, pisayu

puluk la naþa temligan la amial atalivi metava e þegas nen wit lala vena avie plan mras lala. Visena nene pisa sanini, sape

“Ve oviar re gon kioþa puluk naþa þie plan ke kioþa wit lala, otarþan naga kan re ña ve tokak ga.” Naw 25:4

A visena na lua pisa sanini, sape

“Yar naþa miyuþae, memes naþa naga visu sur tai naþa molue e limana vanonia.” Luk 10:7

Sanene na, popon tekila ñena van nasumonena na sumare lala. Ana lala naþa amiyuþae po, aþaryon nalologonen lologena wo a nakilapianen yeririna lala, popon atol ve keviu li laa sane, va yam ve lua.

¹⁹ Visae yar tai imi visawal nasumonena tai, sape naga kila sur tai piowa naþa monar avis van e kumali vanonia, visena kiena yar nene naga taaga pe torokin re naþa akila sanene poli. Visena na sanene, monar yar ve lua po ve telu vena aiilaaria, þisi na akilia aure va kumali. ²⁰ Ana visae nasumonena tai taþa lue ga mlamulena viowa, yoko monar ovisaluþar nena vana e maran þegas nen nalelagaena lala, ana pogos naþa nasumonena taþena la avisuia, marauena tol ruru la, sane lala ñena ve alor re sanene.

²¹ Italua tekilia sane Ntewa amio Kristo Yesu amio kiela navisi wa lala apisu ita ñaga, ana e

marala, nevisa van ko sane ouarar ruru kiau viþena la nene. A nepisa ñena ga nesape pogos naþa sa oyumþaen ke sur la nene, ve ovisu re yar la veve taþena, ana ko na monar okila maran taaga ga van la punu ga.

²² Visena si laþasia naiilaena sanini, ve okoskosin re wuen þarin yaru vena imi ve nasumonena tai, ana ovisu ruruli kiena malena sumo wa. Pe pon re naga kilawan mlamulena viowa naþa sumþa miyuþaenia. A ko na owaryon ruru ga vena losineþa merarava, a ve wa silaga.

²³ Sa naþa nesumþa nemloge ke rui, nekilia sane ko na osumþa omai lili ñaga, ana nesape nevisa van ko ve ovalia re si munen kuruta. Ve osumþa omun re ga wii, a okilia omun narin kuruta pogos þasia, þisi na pona kilia iila mopomþa yo.

²⁴ Ta sina sanini, sane yar þasia, akila naþa kiela mlamulena viowa sike e marata merarava ga, þisi na tevisu kilia sane yoko atol nakoþena vanonia. A yeririna taþena laþasia, akila naþa kiela mlamulena viowa tapolou ruru ga sumþa ga, a siraunia, naga ñena yoko vim kate e yo metava sirau.

²⁵ Yumþaena wo ñena la ne sanene. Laþasia, asike e marata merarava ruruia, a laþasia, atapolou ruruia, pe tekilia re poli. A naþa tapolou sike ne, taþatete tapolou lue, a naga ñena

monar kate e maran yaru lala.

6

Yaru la naþa amiyumãae koren ga kiena yar tai

1 Nagane nesiri e lepas kiena ne ita þasia naþa asumã sane pe kiela sur re poli, silaga asike e limana ne yerkawa tai, amiyumãae koren ga pania e mñana uña.

Malena na sanene mñarera, sa naþa sur urmi tai mon lue ga e mñasila, ana taþatete sinela kar kiela yerkawa, monar avisu naga sane mesmesu ga naþa avatanonia. Visae akila ve sanene, yoko kiela yerkawa taþatete visu viowa e kia kiena ne Ntewa naþa teke e la.

2 Nekilia sane yeririna laþas naþa amiyumãae koren sanene, kiela yerkawa mñena la amlalaga. Sanene, yaru na yumãena amio yerkawa, lalua ape wenla ga e Kristo, ana naga nene pe pe naga re ga naþa yar na yumãena kilia kirakirai e yumãena kiena kiena yerkawa. Peraga, monar ayumãae ruru laa sane, monar akekaran ga naiilaen yar naþa amiyumãae kiena, komin naga lala tai e þegas kiena ne li nalelagaena a naga mñena pe lala tai naþa monar sinela siia.

Navianena na visokanena
Naga nene navianena þasia naþa avisa lelein van lala taþena, naþa monar

oiilaar la ea vena ataveve ruruia.

3 Yar naþa kila navianena taveve sitomena taþena, naga tarlu visena nowo lala kiena ne kieta Suþe Yesu Kristo, kiena visena ve maran taaga re si amio navianena naþa kilia were þelaga kiena ne yeririna imi ve sa þelaga kiena ne Ntewa.

4 Yaru naþa taveve kiena sitomena va ve taþena sanene, tepisu naga þarwaria, þarina keviu paþisi, ana pe kilia re nena suria. Naga to lue ga e sinenan manene vilupena, pis liu, ana pe sur wo tai kate re e lele nene poli. Pelaga viowa ga la akakate e naga, sane vielueena, wankareen visena, visena mumu amio sitomen viowa lala van yar taþena. 5 Yar la naþa amiyumãaen nene asumã apilup kare ga, naþa sitomena naþa wo amio visena naþa pe lelaga pe su re nena e la poli. Ana apa apiowa re laa sane wa, vanon asitom ke asape nayakolen sumãare naga pe mrapa wo tai natauluen kilavaru. 6 Ana pe sa re nene poli, vanon yar naþa kiena þelaga po sane Ntewa, a naga kekaran ga sur ya naþa Ntewa mla pania e kiena malena, yar ke nanene narui naga taulu sur wo tai naþa po rui.

7 Pogos naþa tepaeme e yomerava nini, tepe plamoni ga tepimi, limata korena ga, ana yoko tevetan

sina ga sa mña nena ga nene tevano, pe sur re tai naña tekilia towarar poli.
 8 A pogos naña temal ke e yomerava nini wa, visae telual narin kinanena tai, amio narin kulmrae nakalo itaena, nanene naga torok ne, tekilia tekekaran ga, sinetan ke si ya?

9 Ana lala naña sinelan manene laa sur lala, sinelan asape ave yar na sur moki, pona pe apisuluþar re poli yo, naña asike pa e yo nataþaliena rui, ana Yermare suña tol la ke rui e kiena nakilakokanena la.

Yoko nasinenanena viowa naña na kila kareen malena kien yeririna lala vim ve moki e la, vano-o aure la ava viowa laa, akuspal sur punu ga, ava atalilu e lele na kovioena.

10 Lelaga, þelaga nasitom maneneen kilavaru naga pe purþes nen þelaga viowa kar la punu ga. Nasinenan maneneen waren kilavaru ve moki naga karmo sineta ita þasia, þere la amial lili mña apano, ana amilan ga naña amolue punu ga petan mrapa na viawaena rui.

Siraunia, akus viowaena moki vanonia, a kila naloge viowaena la tol la, ana asiar ga apisuluþaria, asitom sina ana piowa ga rui.

Pelaga wo

11 A Timote, ko na sane yar kiena ne Ntewa lelaga, monar ovilon masuña van nataþaliena viowa punu ga

na sanene. Sur ya naña monar oligan to vamon ko silaga, naga pe þelaga na mesmesuena, þelaga naña yar imi wo sane Ntewa, þelaga na viawaena, þelaga na sinesiiena, þelaga na uarar ruruen yuñaena, a þelaga na momauena.

12 Ko monar osuñalu mñarera e kieta mara wa na lelagaena. Ve sinemña þesan re pogos naña osuñalu e marana ne li nalelagaena la moki, naña opisawal kioña navisaarena nanua ne. Ntewa pio ko vena okus malena nene naña ve þisi re, ana mla pan ko e pogos nene, ana ko na monar ouarar ruru vano-o ve lor re sina ga vetan lumoña.

13 Ntewa naga pe purþes nen malena na sur make ga, a Yesu Kristo, pogos naña aþure naga aþaro pa puna yaru naña Pontis Paelat, ana naga pe marau re poli, ana mñareran ga pisawal ruru kiena naviawaena, ana sa naña italu tesike e marana lalua Ntewa amio Yesu, sineun nesape nela si pupia visena tai van ko.

14 Nevisa ve sanini, nevisave nomñareran ko nesape monar olarar ruru visena kiena ne Ntewa la nene, naña pe kioña kororaki pona kioña nakila palen re tai poli, vano tol pogos naña kieta Suþe Yesu Kristo wasuþe ea. 15 Kiena nawasuþeena nene, yoko mñalivin ita e kana pog ne napo, sa naña Parin Suþe wa

na mava sinenania, komin Parin Suḗ wa nene naga taaga pe suḗ kiena suḗ la make ga, a pe yerkawa kiena yerkawa la punu ga. ¹⁶ Naga taaga mal lue na sike ne, naḗ sike loyuma e kiena pupia naurarena naḗ pisalupaḗ sape taḗtete yar va lavisinia, pe yar tai pisuli re pogos tai poli wa, a taḗtete yoko yar tai visu pogos tai. Kieta Ntewa nene, tevatanon naga, a popon navesupeen sur make ga ve kiena naga taaga, vano-o taḗtete ḗisi pogos tai, sanene.

Nalelagaena la naḗ kiela sur moki

¹⁷ Pe lelaga naḗ ita laḗasia, kiela kilavaru moki, limala pulen ruru make nena suria. Nanene pogaga, ana monar ovian la māraera ovisave ve avilave re, ve awarwar lan re sina vanonia. A pe pon re awasine ga kiela kilavaru la nene poli, naḗ pona pogos tai ailan ga, avisu sane kokovio make nenaga, ana monar awasine ga Ntewa. Naga ga pe purḗes nen sur make ga la nene, suma ḗar ke nalaena la nene mokliu pimi mālivin ita, mok paḗisi, vena iila ita tekekara e kieta malena lala.

¹⁸ La naḗ limala pulen kilavaru, kiela malena monar ulen yumaena wo la naḗ amiyumaen ke amio. Ve asitom manene re avisave monar auarar manene kilavaru nene ve kiela ga, ana popon akekaran naḗ

avion va yar taḗena naḗ kiena pe torok re poli. ¹⁹ Visae akian plan va ve sanene, yoko Ntewa kila naḗ asuma amiyuwon polo ke kiela navisa ruruena ma e peni, sa naḗ asuma apisirlua ke mala yuma nowo tai monmate pog na pimi ke ne. E mrapa ne nanene, asuma apanon ke naḗ awarpoyon atol malena naḗ pe lelaga.

Visena maro

²⁰ Ake Timote, olarar visena wo make ga naḗ nepisa piḗasu pan ko, naḗ nemligan e lumoma vena okian lelein va laa sane.

Ve ova re loyuma e visena la naḗ taḗtete aiila kionia malena amio Ntewa. Yar moki apian la ga e kiliaena na yomarava, ana apisape kieta lelagaena amio visena wa kiena ne Ntewa, sur la naḗ pe lelaga re poli sike ea. Ana kiela kiliaena nene pe lelaga re nena poli, naga pisokanin ke sina ga kiela sitomena lala.

²¹ Laḗas atol ruru manmaruaena na yomarava nini, amlologon ruruia pa e yo make ga, ana sur taaga, akila pal mrapa na lelagaena naḗ akila pal ruru nenaga.

Kiau visena ḗisi e nene, ana sane silaga, nemlen nesape lemamiena kiena ne Ntewa sike amio ko.

Inu, Pol.

Maki Nalua Naña Pol Siria Pa Pan TIMOTE Visayuena Na Tusi Nene

Sunienu plas na tusi nini

Maki na lua nene naña Pol siri pan Timote, ana pulen visenu wo lala na iilaen Timote naña kienu erau viu naña sumu miila naga. Sitomenu keviu naña sike e maki nini, Pol pisa pan Timote sape sumalu marera vena visawal lologenu wo kienu Yesu Kristo. A pisa pania sape naga monar uarar vianenu lelaga na lologenu wo, a na Tusi Marua. Naga pisa pan Timote sape monar kila luwe ga yumaenu na vianen yaru lala, a vena kila yumaenu na wereen yaru lala, pe suri korenaga visae yaru la avisakare naga pona avisakare yumaenu na sumare naña naga sumu kila ke ne.

Pol pisa pan Timote vena ve va sikol re naga e visenu wowe lala a visenu na veveyenu naña tapatete kila suri wo tai, ana vena kila kareen ga yaru lala.

E maki menaga nini Pol pisa pan Timote sape taveve palaga wo la sa naña naga kila ke ne e kienu malienu. Nanenu pelaga kienu Pol sa naña mlelaga marera, a kienu sitomienu piyavi, a

sinen si yaru lala, a kienu pelaga naña pa parpoyo e pogos marera lala naña yaru la akila miloge piowa e tasnenu, ana naga pe paruru re poli, sumu pisawal luwenu ga lologenu wo kienu Yesu Kristo.

Kompasnen tusi la na nini

Visenu pesa 1:1-2

Pol mieluar Ntewa vanon Timote ana pian Timote 1:3—2:13

Pol mila visenu na iilaen malienu kienu Timote 2:14—4:5

Pol pisayu naga amio kienu yumaenu 4:6-18

Visenu maro kienu Pol 4:19-22

Visenu pesia

¹ Naruu Timote, in Pol naña nesiri mak nini pinasu pan ko, naña nasinenanenu kienu ne Ntewa ga naga pisirlua inu nepim nepe nalogenu kienu Kristo Yesu. Kristo Yesu naga pe purpes nen malenu naña Ntewa pisaar pan la naña amlelaga pania.

² Timote, kiau lenienenu ne sape yoko Ntewa Arimata a kieta Supe Yesu Kristo, lalua aligan pupia lemamienenu, sineyenu, a sumarenu su lue ga pun ko.

Visenu na potenu pa Ntewa

³ Sa naña kau apua lala ataveve nanua rui pimi, in na nomareren lue ga kilaen yumaenu kienu ne Ntewa, a in na nesumu

noþikeyon naþa nelotun naga amio losineu wetelu. Ana legiena a lemalo, e pogos na leniena lala, nesitomāl ko m̄aga, nesum̄a nepisa lue ga potena paþisi pania vanon ko. ⁴ Nesum̄a nesitomāl ke wamaram̄a lala nalogeen viowa, ana kila narui sineun manene paþisi naþa neiñasu nemālivin ko sina. Visae nevisu sina ga maram̄a, yoko neloge wo na neloge wo! ⁵ Nesum̄a nesitomāl m̄ena ga kiom̄a naviawaena lelaga, naþa nanua se kom̄a apua naþa sira marua Lois, siraunia se kom̄a m̄am̄a naþa Yunis, a sa naþa nepisu kilale rui, nagane sike e ko.

⁶ Naga ke narui nesum̄a nesitomāl m̄ena ga nalaena naþa Ntewa mla pan ko, pogos naþa nopolu þarum̄a nemlotuwō ko. Sineun nesape nevisa van ko sanini, ve otam̄an re kapi na nalaena nene vito tano, ana monar osum̄a okila lue ga vivaga ruru silaga. ⁷ Monar ositomāl Ninuna naþa Ntewa mla pan ita, naga pe ninuna re naþa na maraunen yaru poli, ana naga pe Ninuna na m̄areraena, pe Ninuna na sitomena, a pe Ninuna naþa kila yaru kawē ruru kiena malena.

⁸ Visae lelaga kemua naþa Ninuna ke nanene narui sike e kiom̄a malena, monar ve omawan re visawalen lologena wo kiena Suþe va yar lala, pona monar ve

omawan re naþa ovisawal va yaru lala ovisave lelaga sane ko na ope kiau erau wo tai. A amliganin nesike e yum̄a naloge viowaena vanon kiena yum̄aena, ana pe pon re omawan inu vanon sur nene poli. Kiom̄a suria naþa yoko okila, monar okekarān ove þegas omio inu e naloge viowaena vanon Lologena Wo, vano tol naþa m̄areraena kiena ne Ntewa kila ko otorokin oyum̄aenia. ⁹ Ntewa ke narui, naþa naga tamalia ga ita luwoka rui, a pio ita ga luwoka teyaloro e mrapa na kiena malena wa, ana silaga kilia iila ita. Nanene pe vanon re ga naþa italua tekila kiena yum̄aena wo poli, pona italua tekila ya, ana naga kila ga molue kome kiena sitomena amio kiena lemamiēna wo pan ita. Kiena lemamiēna nena, naga kila ruruia, mligan ruruia sike amio Kristo Yesu nanua sumo rui, sumon naþa siar kieta pogos ita yeririna lala na yomarava.

¹⁰ Ana lemamiēna nene sum̄a sanene pano-o tol nagane towe ga, naþa m̄alivi mare ga e yomarava naþa kate e marata kome kieta natamaliaena Kristo Yesu. Naga pitomi e yomarava, kila make nam̄areraena na marena pimi pe sur korena ga tai, a kiena nalologena wo kila naþa nagane tesike e yomarava nini wa, tekilia telual malena wo. Ana naga kila m̄ena naþa sirau-

nia, yoko tekilia teva loyumã e malena naþa taþatete þisi pogos tai.

¹¹ Lologena wo nena, naga ke narui naþa Ntewa pisirlua inunia nepe kana navisawalena nena, nepe kana nalologonena nena, nepe kana navianena m̃ena ga.

¹² Kiau yumãena nena nane kila nepane ke pogos m̃arera lala loyumã e yumã naloge viowaena nini vanonia, ana pogaga naþa, pe pe sur re tai pan inu poli. Pe nemawa re poli, komin nekilia nesape yar naþa nemlelaga ea, naga pe lelaga, kiau nalelagaena ea m̃arera ruru po paþisi sane ya naþa nemligan e limana, yoko uarar ruru m̃arera sumã ga vano-o tol Legiena maro.

¹³ Sanini Timote, nesape nevisa van ko sanini, monar otaveve ruru mrapa na visena mesmesu lala naþa nemla pan ko, monar osumãlu m̃arera e Yesu Kristo silaga, a monar oligan ruru kiena sinesiena sumã ule e kioãna malena. ¹⁴ Ninuna Wa sumã kokonia ruru losineta, ana ve oligan re navisa ruruena la naþa naga mligan ruru sike e kioãna malena rui, ana oloun ruruia.

Pol pisayu Onesiporas

¹⁵ Nekilia nesape omloge lologena viowa tai rui, naþa asape li na lelagaena lala nae pupia lepas naþa Esia, apilon m̃asila pan inu rui,

a la nena amio m̃ena kieta erau lua naþa Paekelus amio Emosenisi.

¹⁶ Ana kieta wolai wo naþa Onesiporas, naga kila po paþisi. Pe sur korena ga naþa apiar inu e sen lala loyumã e yumã naloge viowaena nini, ana naga pe mawan re naþa imi katen inu poli, ana nemlen pa Suþe vena visa ruru naga ve keviu amio kiena namratava lala. ¹⁷ Naga pimi m̃aliv Rom nini, pe yam piavi re nenaga naga þiyon naþa sape lual inu, pano-o pimi tol inu e yo nene. ¹⁸ Naga sumã kila manene ke sina ga suri wo la paþisi pan inu e Rom nini, sa ke ga naþa miila ruru inu sumo rui pogos naþa nesike gar Episas nanua ne, sa naþa kam na akilia ruru rui. Naga po pan inu sanene, nemlelaga nesape yoko Ntewa sinen ye ruru nena naga e legiena maro.

2

Yaru na mara kiena Yesu monar war naloge viowaena

¹ Naruu Timote, nesape nevisa van ko sanini, popon ola lemamiena kiena Kristo Yesu ve keviu e kioãna malena, ana yoko okilia oñarera ruru wo vena osumãlu osulue. ² Yam moki rui naþa omiagogon kiau visena lala naþa nepisawal ke e maran yeririna lala, ana monar olual yar laþasia naþa auarar ruru yumãena, ola visena la nene van la, ana siraunia, la m̃ena ga

akilia avian liluen la vano tol yeririna taþena lala. ³ Ita yar na kilaen mara lala kiena ne Kristo Yesu, yoko ita veve taaga monar kieta pogos na lualen pog m̃arera la sike ne. Ana visae nagane kioṃa pogos narui, monar ola ga ve sa naþa kioṃa lepa na yuṃaena tai.

⁴ Ositom ruruli yar na mara lala. Kiela yuṃaena monar akila kare m̃areraen na sinekar kiena ne kiela yerkawa vito tano, ana pe asikol la re amio yuṃaen kar la poli, sa naþa yar taþena la asuṃa amiyuṃaen ke ne.

⁵ A monar ositomyuli ṃena yaru viu la naþa akila kiriena. La aṃareran ke naþa atauluia, vena atol kiela nalaena tai, ana visae akilaro navisaluaena na kiriena, yoko akila plan la, taþatete atol sur tai piṣa.

⁶ A ositoṃal ṃena yaru na yuṃaenen lokove lala. Yar na m̃areran yuṃaenen lokove mapila ve moki, nane yar ne nane popon war kinana ea.

⁷ Sur la ne nesuṃa nepisa ke ne, visae ositom ruru la, yoko Suþe iila ko vena otol kiena manmaruaena wo lala a kiena kiliaena lala ea.

Popon yar na lelagaena la asuṃa asitoṃal lue ga Yesu

⁸ Naga naþa yoko ositom manene laa naga, nane Yesu Kristo. Naga paeme e yomarava molue kome lus kiena yermarua Ðarin Suþe Tepet, a sirauinia, aṃeṃar naga, ana naga mal sina

sa naþa Lologena Wo piṣa. Nane Lologena Wo ne nane nemlologon ke ne, ⁹ a nane Lologena Wo naþa netol pupia kana naloge viowaena e yo nene, naþa kila narui nagane apiar tasneu la wetelu e pototo, sa naþa in na yar viowa na kilaroen navisaluaena. Ana sur tai naþa yar la taþatete aviaria, nane visena wa kiena ne Ntewa, komin momolue ke ga wa taþatete avisaluþaria.

¹⁰ In na nesuṃa sineu miye manene yeririna la naþa Ntewa mligan plan la vena nekila la atol malena kome Kristo Yesu. A sitomen ne na nene narui kila sane pog m̃arera ya naþa nokom ea, ana in na nesuṃa nakawean inun ga vena nekila make suria, vena la ṃena ga akilia atol naurarena nae ma e peni naþa taþatete piṣi pogos tai.

¹¹ Yauena tai pisayu sur nene, kana visena ne lala lelaga paþisi, naþa piṣa sanini, sape

“Visae teva e marena temio naga, yoko temal temio naga.

¹² Visae tesuṃal m̃arera e pogos m̃arera, yoko teve suþen yo temio naga. Visae tevilon ṃasita vania, yoko naga ligana ita,

¹³ ana visae tekila pal naþa teloru, yoko naga tarar ita m̃arera suṃa ga, komin naga kuslua ita tepe kiena, ana naga taþatete visokan,

taĉatete si kovenlua
ita.”

*Yaru wo na yuĉaena
kiena ne Ntewa monar uarar
mareran visena lelaga*

¹⁴ Nalelagaena la ne asike
ne, monar oŝuĉa ovian la
mĉaga vena ve sinela ĉesan
re sur la nene. A monar
ovis marera van la ovisave
e kia kiena ne Ntewa, ve
aveveyun la re. Apepeyun
ke kinas nen visen la sane
aŝuĉa akila ke ne, pe akila
re sur wo tai poli, a pe ami-
ila re nena la taĉena naĉa
aŝuĉa amiagogon ke poli.

¹⁵ Sur wo ya la naĉa
okilia okila sane yaru wo
tai na yuĉaena kiena ne
Ntewa, monar okila make
ga vena wo vaĉisi e kiena
navisuena. Viŝae okila wo ve
sanene narui, yoko taĉatete
omawan mras naĉa kioĉa
yuĉaena waria, a okilia oim
ove yar na vianen visena
lelaga lala kiena ne Ntewa va
yaru lala mesmesu a wo.

¹⁶ Ovisuar ruru e visena
korena la naĉa yar la aŝuĉa
apisayu kare ke ne. Visena
la ne sanene pe nasuen re e
sitomena kiena lelagaena la
poli, komin naĉa akilia aure
la ava manene laa e ĉelaga
naĉa Ntewa pe sinenan re
poli. Popon ve ova re lavisin
yar la naĉa akila ke sanene,
¹⁷ komin visena kien la nene
sa naĉa magka wa tai, naĉa
kar ke tas nen yaru taĉatete
imi wo pogos tai.

Nepisu sane monar nevisa
sane lalua nene Aemeneas
amio Paelitas, lalua sa towe
mĉa nene rui, ¹⁸ komin naĉa

apur matan mrapa na visen
lelaga, aŝuĉa amlologon ke
kiela lelagaena tai naĉa pe
pe lelaga re nenaga. La
aŝuĉa apisasa ke asape
e luas nen yomerava,
nasuĉalen si e marena
na peraga, komin e kiela
sitomena, asitom asape
Ntewa kila ke rui, nane e
pogos naĉa naga miyuĉae
e kieta malena. Ana pogos
naĉa amlologon ke kiela
visokanena nene, aŝuĉa
akila kare ke lelagaena
kiena yeririna la moki, kila
narui kiela sitomena pimi
peve lua sina. ¹⁹ Ana ko
mĉena ga monar ve sinemĉa
kurkur re, komin yuĉa naĉa
Ntewa suĉa miyuĉaenia,
miasin namaplarena la nene
suĉal marera ruru suĉa
ga. Visena lala e siriena wa
kiena ne Ntewa sike ne naĉa
torokin e lepas nene, a tai
pisa sanini, sape

“Ntewa kilia ruru po paĉisi
a la naĉa ape kiena
yeririna lelaga.”

A nalua nena, pisa sanini,
sape

“Yaru naĉa mla kia kiena
Suĉe teke e kiena
malena,

naga monar ligan ĉelaga lala
na mrapa nakilaen
mlamulena viowa.”

²⁰ Ositomyuli pupia yuĉa
mĉana yar na sur moki lala.
Loyuĉa e yuĉa la nene, tek-
ilia tevisu pias nen sur na
kinanena lala, naĉa laĉasa,
amiyuĉaen e kol pona selpa,
a laĉasa, amiyuĉaen ga e
porotano pona e laki. La

naþa apisu sane po, asuñã apio kinanena pa ea, e kiela pupia þaþagena kerkeviu lala, ana laþasa, asuñã akinan kai ga ea. ²¹ A ita yeririna lala ita maran taaga sa ke ga nene. Yar naþa kila kiena malena merarava ruru po, a pe wa, a pe kila re yuñãena viowa la poli, yoko kiena yerkawa were naga kila kiena yuñãena wo la ve moki e maran yar lala.

²² Visae sinomãan osape ko ove sanene, monar ovisa luþar kioñã naninuena m̃arera lala a nasinenanena viowa lala naþa sitomena kiena m̃ee lala kilia ulenia. Monar oþionli naþa kioñã sitomena ulen nawoena, a viawaena, a sinesiena, a suñarena, ana sanene yoko wo vaþisi van ko omio taþena la naþa kiamiu sitomen taaga, naþa asuñã amlen ke pa Suþe vanon kiena naiilaena.

²³ Yam mokliu, yar la akilia aveveyu vaþisi van la komin sur wowe lala pona kiela sitomena kar lala, sa naþa pe akilia re suri tai poli. Pogos tai veveyuen la nene va m̃aga tol naþa asulania, akilia aliþerela sina, ana ko na pe pon re ova loyumuã e visen la ne sanene poli. ²⁴ Yar nayumuãena kiena kieta Suþe, naga monar ve sinena kar re yar taþena lala, ana naga monar visuar ruru la, monar kilia ruru mrapa na vian malumunlaena. Naga monar ve sinen mimi re vilaga, ana

kiena sitomena ve piavi ruru wo van la.

²⁵ Pona pogos tai laþas ve aloge re naga yo, yepel mavinia, ana visae kilali naþa were ruru kiela sitomena, ana naga monar malum ga van la. E mrapa ne nanene pona Ntewa yoko kilia la narin pogos tai van la vena vilonen kiela sitomena, vena atol kiena visena lelaga. ²⁶ La ne sanene, Yermare suñã þuarar ruru la ke rui, suñã m̃areran la ke vena akila ya naþa naga sinenania. Ana visae akilia atol maran si kiela kiliaena wo, yoko akilia aure vetan kiena pova a kiena visokanena lala.

3

Pelaga na þarm̃arera lala na legiena maro

¹ Timote, monar ve sineta þesan re sane e legiena maro la nini, yoko monar pog m̃arera la ve moki aimi añaliv. ² Monar ve sa nene narui, komin naþa e pogos nene yoko þelaga kiena yar lala va viowa manene laa. E pogos nene, yoko ave sanini: yoko ave yaru na sitoñal laen ga, yoko asitom manene ga kilavaru, yoko avilave a awarwarla vaþisi, yoko ave yar na veveyuena, yoko taþatete alogear visena kiena kiela yermarua lala, yoko taþatete nena avisa potena e sur tai,

yoko asitom korenan ga
sur wa lala,

³ yoko tařatete awo van
yaru tařena,

yoko ave řarmarera
vařisi,

yoko aviueli a avisa kare
sur wo lala,

yoko sinela kar yaru lala,
asu la,

yoko yepel mavin sur wo
lala,

⁴ yoko avisa kotalia kiela
erau lala,

yoko ve asitom re suri tai,
yoko asitom asape la ga na
apo,

yoko ve sinela si re Ntewa,
ana sinela si ga malena
wo ya nařa la sinelania,

⁵ a visae akilali nařa
auarar towe laa narin
yumaena na sunare
lala, ana na nene e
ga e kulusa, komin
nařa kiela malena
pisawal ruru rui sape
mareraena lelaga na
lelagaena e Ntewa pe to
re nena e la poli.

Nane řelaga na malena
kiena yaru na legiena maro
lala, a monar ve osu re
lavin la. ⁶ Sineu miye řena
sira la nene pařisi wa nařa
navianena navisokanen lařa
asuma ateteliv ke mala uma
lala. Sira la nene lařasa
asuma ařar ke urmiena
namlamulen viowa rui, a
lařasa sitomen tařena la
sike e la, kila sane visae yar
la aimi vinau sanene, ana
sira la nene ameu pařisi, pe
puriula re si nařa avisaluřar
la poli. ⁷ Ya nařa yar la
nene apisa, ana amlelaga

ga narui, akila ma sanene
pano-o ana pe atol ruru re
kiliaena napo poli e visen
lelaga kiena ne Ntewa.

⁸ Yar la ne apivim ke
sanene, nepisu la sane ape
nasinekar kiena ne visena
lelaga napo, sane e pogos
kiena ne yermarua Mosis
nanua sumo, lalua nařa
Sanes amio Sampres, apim
apian kare sitomena kien
yar la moki. Yumaena ne
nanene yar la nene asuma
akila ke na wa, nařa kiela
sitomena la pilolon kare pa
piowa, pe apuarar re si ki-
eta viawaena poli, ana apur-
matan apa e tařena. ⁹ Ya
nařa la akila naga piowa
manene laa, ana pogos na
waren kana nakoena nena
yoko imi maliv pogos tai na
wa, sa nařa malivin lalua na
nepisa ga na wa. Pogos tai,
amilan ga kiela visokanena
kate ga yometava, ana yar la
apisu kilalea.

*Pelaga wo lala kiena ne
Pol*

¹⁰ Timote, tesu lele taaga
nakonua rui, ana nekilia ne-
sape ko na opisuveve inu po
pařisi. Okilia inu sanene,
nařa

okilia ruru ya nařa nepian
ke pan yar la ea,
okilia ruru kiau řelaga,
okilia ruru ya nařa sineun
nesape neyumaen e
kiau malena,
opisu kiau viawaena e
Kristo keviu sanape,
okilia ke osape kiau sitom-
ena piavi,

opisu ke sinesiena naña teke e inu pa yar taņena keviu,

okilia ke osape pog m̄arera ya naña pimi pan inu, ana nesuñalu ga,

¹¹ okilia ruru napiowaena la naña kiau nasinekar la akila pan inu, sane e pupia kumali telu nene, Antiok, Aekoniam amio Listra,

a okilia ke yepe lalaea naña noņaria e limala e pogos la nene.

Naloge viowaena la nene aņarera paņisi, ana nakawean inu ga pano-o noñal naña Suņe pimi ųerelua inu e napiowaena make la nene.

¹² Ee, ita punu ga naña sinetan Kristo Yesu se ita, pona telual malena wo temio, monar tekilia tesape yoko towar naloge viowaena e yar taņena lala. ¹³ Nanene na pogaga, ana naloge viowaena taņena sike ga wa naga piowa ga, naña yaru viowa lala amio yar navisokanena yoko awaria. Nagane asuñia akila manene ke piowa rui, a yoko akila ña viowa sanene vano vano-o viowa manene la, vano vano viowa naña viowa.

¹⁴ Ana ko Timote, okila ga omio kiliaena wo la naña otol rui, ana oyuñae va sanene omio lelagaena wo la naña opiawa ruru m̄arera e rui. Ve sinema ųesan re sane imimi ai naña mepian

ko, ¹⁵ siar e pogos naña ove tokak ke ga wa gar moña, pimi tol nagane, ana kila sa naña okilia ruru Tusi Wa, naña kilologia mrapa na tamaliaena kiena yar naña mlelaga e Kristo Yesu.

¹⁶ Siriena Wa la nene, Nipununa ne Ntewa sike e la, ana akilia aiila ita ve keviu vano-o vaņisi. Avian ruru ita, aweņeņe sineta, akawe ruru kieta ųelaga, a akila kieta malena wo nenaga, ¹⁷ vano vano-o ita yeririna lala kiena ne Ntewa teim towo a tetorokin nakilaena kiena yuñena wo lala.

4

Pol miilaar Timote

¹ Timote, sane italua tesike e marana Ntewa, a e kia kiena Kristo Yesu, nepiun tan ko nesape owarar ruru sur laņasa naña sineun nesape nevisa van ko. Italua tekilia tesape kieta Suņe yoko liņere la naña amar-mare rui amio la naña amali, a italua ųesuma tesitom ke urmi paņisi e kiena nawa-suņeena sina, amio kiena nasuņenena naña yoko naga visirlua, ana monar ologe ruru visena la nene.

² Ya naña yoko okila na ve sanini, monar ologon Visena Wa silaga. Visae pog wo pona pog viowa, ana monar osuñalu m̄arera vena visawalena, monar oņion tauluen yeririna lala, monar oure ruru la naña akom ke e mrapa taņena, a

monar oiilaar yaru la naṣa amlelaga.

A pogos naṣa okila yuṁaena la nene, silaga kionṁa sitomena monar ve piavi ruruia, a ve sinema maren re vian laena. ³ Pogos la ne pimi ke ne yoko yeririna la yepela mavin vianen wo lala, ana yoko kiligala lala vikiraran sitomen kar lala, a yoko asumia aure navianena la ve moki naṣa asitom ke asape yoko akilia avisa sur wo lala vena kilaen alogewonia. ⁴ Yoko aligan logeen visen lelaga, a yoko akila pal mrapa ava ataveve suniena lala naṣa yar ga la akila.

⁵ Ana ko na ve ove sa re nene, ana okila ga kionṁa sitomena va ruru sumṁa ga, okawean ko e pogos mārera lala, okila kionṁa yuṁaena na lologonen Lologena Wo, a oyumṁae taveve ya naṣa Ntewa pio kon sape oyumṁaenia.

Pol pisu sape lavisi awemār naga narui

⁶ E lepas naṣa pun inu, nemloge sane nagane nepim ke lavisin luas narui, nepimi ke e lele tai naṣa yoko monar nokuṣaṣain kiau malena vanon Lologena Wo narui. Ee, nepisu sane kiau pogos na liganden yo pimi ke lavis narui. ⁷ Ana pogaga, komin naṣa nekilia sane nekila mara, noṣaryon

mārera po; nekiriri, nekila make nenaga; a nopuarar lelagaena, pe nemligan li re pogos tai poli.

⁸ Yar napo lala kiena ne Suṣe yoko atol karo wa na ṣarila, a nesitom sane naga mligan ruru kiau sike ma e peni rui, vena yoko e ga e legiena maro ana la van inu.

E pogos nene, yoko naga liṣere yaru make ga, a yoko naga la nalaena van ita make ga naṣa kieta sitomena māreran naṣa tekrakravan kiena nawasuṣeena.

Visena maro

⁹ Timote, sineun manene nesape owarlion naṣa oyal kawa oim e nini. ¹⁰ Sineun ko paṣisi, komin wolai naṣa Timas, sur na yomarava la aṣere kiena sitomena pano-o pure pa garu Tesalonaika. Kresens mēna ga pa garu Kalesia rui, a Taetas pe su re si amio inu poli, naga pito ke Telmesia. ¹¹ Erau ga tai sike amio inu nagane, nane Luk. Ana visae okilia olual Mak, yoko oure naga imi amio ko, komin naṣa nepisu naga sumṁa miila inu keviu paṣisi e yuṁaena kiena Suṣe naṣa sineun nesape nekila. ¹² Taekikas, nepitalia naga pa garu Episas rui.

¹³ Yoko nevisa kiau sur laṣasa, sanini pogos naṣa ovam e nini, yoko owarar la avami. Mau kulkota na miava, nemligan mēke

4:10 Kolosi 4:14; Pilimon 1:24, 2Kor 8:23; Kal 2:3; Taetas 1:4 **4:11** Kolosi 4:14; Pilimon 1:24, Yuṁaena 12:12,25, 13:13, 15:37-39; Kolosi 4:10; Pilimon 1:24 **4:12** Yuṁaena 20:4; Epis 6:21,22; Kolosi 4:7,8 **4:13** Yuṁaena 20:6

puna Karþas pogos naþa nesike gar Troas, a kiau tus lala amio mñas nen tus lala, sineun nesape owarar sur la nene imi.

¹⁴ Okilia ke yar na yumnaenen piaki naþa Alik-santa, naga kila visena viowa la mok liu pan inu. Yoko Suþe ga visuvevea vena kila ya ne vania, ¹⁵ ana monar nekila mña okilia naþa naga kawe manene ke kieta Lologena Wo, ana monar ovisuar ruru ko ea.

¹⁶ Yer kawa nae Rom lala apis pan inu kumali yam tai rui. E pogos nene, kiau erau taþena lala apureure make ga, pe la yar re tai naþa pimi e lepasneu poli. Ana nanene na pogaga, popon sane Ntewa ve sinen karla re vanonia. ¹⁷ E poglis nene, Suþe ga naga taaga amio inu, ana nemloge sane naga mla pupia namareraena pan inu, ana nomareran visawalen sur make ga na Lologena Wo e maran yeririna lala, kila narui þegas nen la naþa pe amlelaga re e Ntewa poli amloge. E pogos nene, lelaga, nesike pae e logon laion rui, ana naga þerelua in sina petania.

¹⁸ Nemninue narui aña nelual naviowaena ya ne yoko nevan ea, ana nemligan inu e limana Suþe, nesape yoko naga tamalia inu vena nesike nemio e kiena yo wo ma e peni, a silaga yoko nelasuþe si naurarena

la vania, vano vano-o ve uro re, sanene.

¹⁹ Sur si laþasa navisaena, awis ovisa pokolulagi pona pokolemalo va sira nene Prisila amio wona Akwila, a va mña namratava puna ne Onesiporas. ²⁰ Erastas pe pam re si e nini poli, sike ga Koren, a pogos naþa mepam, metol yo Maelitas, ana Tropimas mai, nemligan naga sike e yo nene.

²¹ Timote, sineun manene paþisi nesape monar okilayonli ovam e nini vilaga, komin pogos na miava pimi ke lavis narui.

La ne e nini asape nevisawal van ko, la asape asitom ko paþisi, nane Yupulus, Putensa, Linas, Klotia, amio erau taþena lala.

²² Noþisi e nene narui, nesape Suþe sike amio ninuña, kiena lemamiena sike amio amiu make ga.

Inu, Pol.

Maki Naña Pol Siria Pan TAETAS Visayuena Na Tusi Nene

Suniena plas na tusi nini

Taetas, naga pe yaru viu naña naga pe pe lus nae re Israel tai poli, ana naga pimi pe yaru tai naña mlelaga e Yesu, ana naga suma taveve Pol vena ila naga e yuñae a na visawalen lologena wo kiena Yesu Kristo. Pol mligan Taetas sike e purvanua naña Krit vena visuar yuñae na sumare e yo nene, a naga siri maki nini pania vena visayuen suri telu.

Nasumo, Pol pisa pa Taetas vena sitomāl pēlaga naña nasumonena na sumare la monar atavevea. Naga pisa sanene, komin le Krit la moki, kiela pēlaga a kiela maliena pe mesmesu re poli.

A na lua, Pol pisawal mrapa pa Taetas naña monar tavevea vena vianen yaru lala e pēgas tañena lala loyūña e sumare. Nane yermarua lala, a sira marua lala, a yaru viu amio yaru na yuñae korenen lala. A naga sape sira marua lala monar avian ruru sira mēe lala.

A namaro, Pol pisawal pa Taetas e navianena naña naga monar la van yaru lala, a monar ave erau ruru wo amio la, naña asumā ve apeveveyu rē, a yaru

na sumare lala monar ve aliṗerela re.

Komṗasnen tusi la na nini

Visena ṗesa 1:1-4

Na sumonena na sumare lala 1:5-16

Yumāena kiena yaru tañena lala loyūña e sumare 2:1-15

Visena na vianen yaru lala 3:1-11

Visena maro 3:12-15

Pol porworun Taetas

¹ Kiau erau Taetas,

In na Pol, nekekaran nevitawe ko sina e maki nini, e kia kiena ne Ntewa, naña in na kiena yar na yuñae, a e kia kiena ne Yesu Kristo, naña in na nepe kiena nalologena.

Nesike e yo nini, nesumā nemiyūñae ke ga wa, nemio yeririna la naña Ntewa pisaar la sape ape kiena, komin sineun nesape popon kiela viawaena imi mārera laa ga wa, a kiela nakiliaena e visena lelaga imi ve keviu laa ga wa. Visae ve sa nene, yoko kiela pēlaga kilia imi torokin pēlaga kiena yar wa tañena lala kiena ne Ntewa, ² a yoko akilia atol malena naña ve uro re.

Kieta sitomena mārera pa rui sape yoko tetol malena nene, komin Ntewa pisaar na konua konua rui sape yoko monar ve sa nene, a tekilia sane naga pe pisokan li re pogos tai poli. ³ Naga pe kieta Ntewa natamaliaena, ana pogos naña pisu sane kana pog ruru napo, naga

mligan kiena visena imi m̄alivi vena kilaen mrapa na kieta malena, a nagane mligan sike e inu vena neva nelologon va e yo make ga.

⁴ Ana Taetas, nane kiau m̄aki nene pan ko. Nepisu ko sane ope naruu ruru nenaga naṽa ita lua kieta naviawaena taaga, ana kiau leniena pan ko pa sanini, sane lemamiēna a suṽarena kiena ne Ntewa Arimata a Kristo Yesu kieta natamaliēna sike amio ko.

Yum̄aena kiena Taetas e purvanua naṽa Krit

⁵ Nesiri piṽasu pan ko, sineun iilar koena e yum̄aena naṽa omiyum̄aen ke gar Krit wa. Nanua sumo, ita lua toṽar ṽesan lologena wo pimi m̄aliv e yo nini, ana pogos naṽa nepetan ko, pupia yum̄aena komṽas m̄eke ga wa, ana nemligan ko osun ke naṽa okila ruru ke ne yum̄aena la imi wo laa sane wa.

Sa naṽa nepisa pan ko e poglis nene, sineun nesape ova oteliv make e kumali lala, owu ṽarin kiela yaru laṽas, aim ave li nasumonaena wa lala.

⁶ La nene, la monar ave yaru la naṽa pe naviowaena re e kiela malena poli, monar atalopa amio wola ve taaga ga, a narila lala, la m̄ena monar alelaga e Yesu, pe pon re tevisu la ave ṽar m̄arera poli, pona asum̄a apilon ke visena kiena kiela yermarua luwoka. ⁷ Monar

ve sa nene komin naṽa ape yerkawa na suṽare lala. La ape yar na visuaren yum̄aena wa kiena ne Ntewa, ana monar ave yar mesmesu. Ve asitom re asave la na yar tai ne, ve sinela mimi koskos re, monar ve amun manene re wii m̄arera, monar ve ave yar na kilaen re mara, a monar ve asitom manene re sur lala toko.

⁸ Ana visae ve sa nene, yoko nasumonena naga kiena malena ve sanape? Yoko popon naga kekaran visuaren wolawa lala e m̄ana um̄a, amio ṽelaga wo taṽena la ne sanene. Popon naga sumon ruru yum̄aena lala, ve manmarua ruruia, kiena sitomena mekiṽa ruruia, a naga kawē ruru kiena malena meṽmesu. ⁹ Visena lelaga la naṽa apian ea, naga monar uarar ruru m̄arera, vena kila sane naga towe kilia vian liluen vano.

Ovisuar lelagaena navi-sokanena lala

Yeririna la ṽasa asitom asape kieta lelagaena pe navisokanena ga, ana kieta navianena wo lala kilia kila kiela visena lala taṽatete suṽal ruruia.

¹⁰ Yar la mok liu asike ne naṽa yepel mavin loge itaena, ana apis m̄arera paṽisi, pona asum̄a akilali ke naṽa aure sitomen kien yar la va ve taṽena. Garu e neṽa Krit, ita lua tekekara paṽisi pan le Yu la moki naṽa tetaulula apim ape

yeririna kiena Yesu rui, ana nagane li taþena la nene sinelan asape aure kare la ava aviowa sina. ¹¹ Sa nene, popon sa sur tai mono logola, komin akila kare ke mratava wetelu laþas rui. Asumã apian ke sur laþas naþa pe mesmesun re naþa avisayu poli, ana asumã añareran ga asape akila, pe na sitomen wo re poli, ana komin ga sitomena viowa naþa asape pona ala narin kilavaru la e yo.

¹² Pona le Krit lala, kiela þelaga sa ga nene yo, komin yar nasirien suniena tai nanua sumo, naþa naga pe yar nae nena kiela yo tai, pogos tai pisayu la sape

“Le Krit lala, la ape yar na visokanena, apiowa taulu nompui, ape yar na yowena, ape yar na sitomalen ga mēþela.”

¹³ Yar nene, kiena visena mārera li m̄aga, ana in na nepisu sane pona lelaga yo, ana po paþisi naþa ovis mārera van la, visae peraga, yoko kiela nalelagaena taþatete imi wo ruru pogos tai. ¹⁴ Nagane asumã apuarar ke sunena marua na sumo kiena le Yu lala, aþuñã akekaran ke visen kiena ne yerkawa taþena la naþa akoven lua visen lelaga, ana komin ya ne pe sinelan re lelagaen e visen wo kiena ne Ntewa naþa tesuñã temla ke pan la?

¹⁵ Yar naþa kiena sitomena merarava ruru nena po, sur naþa namname pe

torokin re kila kiena sitomena imi namname poli, ana sur make ga merarava ga pania. Ana yar naþa pe mlelaga re poli, naþa kiena sitomena namname, pona sur tai merarava m̄a yo, ana taþatete kilia kila kiena sitomena imi merarava, a pe sur re tai naþa merarava ruru e naga poli. Nanene komin naþa kiena sitomena pona losinena apa apiowa rui.

¹⁶ Yar la naþa nesiriyu la ke ne, asumã apisawal ke asape akilia Ntewa, ana kiela yuñãena lala kila meraravan pan ita sape pe akilia re nenaga. Losinela la menun a melkalka, ape þar mārera paþisi, pe atorokin re nena kilaen si sur wo ta poli.

2

Navianena wo kila þelaga wo m̄alivi

¹ Ana Taetas, nekilia nesape ko na yoko ve ove sa re nene, ana yoko ko na monar osuñã ovisawal van la visena la naþa torokin navianena la napo.

² Visen laþasa nalaen van yermarua lala naga sanini, sape monar ve aulaula re, avarurula ga, a popon asitom urmi e kiela malena, amio kiela sitomena na manmarua ruruena. E lepas na lelagaena e Yesu, e lepas na sinesien yar taþena, a e lepas na suñal ruruen mārera e yuñãena, monar aulen þelaga mesmes silaga.

³ Visena na sanene kiena sira marua m̄ena la suñã ga,

sape monar aulen ðelaga na vatanonen Ntewa, ve asumã re ga avis kar viowa va yar taþena lala, a sitomena na laen wii m̃arera ve sukaþara re e la silaga. Yumãena naþa popon akila naga sanini, sape monar avian taþena lala e sur ya naþa po vena ayumãenia.

4 Keviu manene paþisi e lepas na sira m̃ee la naþa atalopa mare ga na wa, monar akipian la ruru e mrapa wo na sinesi ruruen wola lala amio narila lala. ⁵ Sira marua la nene, kiela sitomena la monar manmarua, kiela malena monar ekiki, monar avisuar ruru m̃ala umã, ave sinewo lala, a monar avatanon ruru wola lala. Visae akila sur la nene, yoko yar la visu kilalea sane visena kiena ne Ntewa naþa pisawal mrapa wo la nene, naga pe nasiriena wa tai naþa po paþisi.

6 E m̃a nenaga e ðelaga nene, sineun nesape om̃areran yar viu lala, ovisave la monar akawe ruru kiela malena lala. ⁷ Po paþisi visae pogos naþa avisu ko, alual naþa osumã omiali osumon la ke e mrapa na malena na po, naþa pulen make yumãena wo lala, ana la akilia ayal e lelen lamã.

Ya naþa ovian lania, monar sike e kiomã malena rui, a monar naþa akilia avisu kilale asave ko m̃ena osumã ositom ke si urmi ea. ⁸ Ya naþa aloge ovisawalia, monar ve ve visen re tai naþa yoko akilia avis van ko

vanonia. Visae ve sa nene, yar la naþa sinela kar ita, yoko akilali naþa asuwo ita, ana yoko akila wowen ga suria, yoko kiela visena tai taþatete si sumãlu.

⁹ E lepas kien la naþa amiyumãe korena ga kiena ne yerkawa tai, okila la akilia ruru asape monar avatanonia, a monar aþionli naþa akila sane kilia kekaran yumãena naþa akila pania. Monar ve avistam̃e re si vania, ¹⁰ a pe pon re asitom avisave akilia avivinaun kiena narin sur laþasa ve kiela. Monar ave lelaga ruru napo, vena kila naþa kiela yerkawa kilia wasine la e kiena sur make ga. Pogos naþa li nalelagaena la ayumãe ruru wo sanene, akilia akila kiela vianena e lepas kiena ne kieta Ntewa natamaliaena va manene metava ve keviu e visuena kien yar taþena lala.

¹¹ Popon sane yar la avisu kilale kieta lelagaena, vanon Ntewa naga pe lemam e yomarava nini, mla natamaliaena pimi m̃alivin þegas nen yeririna make ga peve taaga.

¹² Ana ita naþa tetolia, tepisu kilale naþa Ntewa sumã kilapian ita ke e kieta malena lala, sape monar teligan ðelaga viowa kiena yeririna la naþa pe akilia re naga poli, a monar tevilon m̃asita van nasinenanena viowa lala na yomarava nini. Yomarava ne nane yo naþa temal tesike e ne, ana

kieta malena monar mom̃au ruru wo, a monar mesmesu, monar torokin nena yeririna lala kiena ne Ntewa. ¹³ Monar tesum̃a ga sane, a monar tesum̃a tesum̃ate ga pog wo naṣa kieta sitomena sike ea, naṣa kieta Ntewa keviu, kieta Natamaliaena Yesu Kristo yoko imi m̃alivi ea, amio kiena pupia naurarena.

¹⁴ Naga ke narui naṣa tam̃an kana kuruta mlau vanon ita, p̃ere plan ita petan m̃areraena naviowaena, kevan ita temekiki tepim tepe p̃egas wa na yepemaenen yum̃aena wo lala sa naṣa naga sinenania.

¹⁵ Visena ne naga ke la na nene narui yoko osum̃a ovisawalia. Yar naṣa popon aiilaria, oiilaaria, a yar naṣa popon avis vania, ovis vania. Pogos make ga oyum̃ae omio nam̃areraena amio m̃areraena, a ve otam̃an re avisa kare ko pona asitom korenan ko.

3

Pelaga wo kien yaru naṣa mlelaga e Yesu Kristo

¹ Popon ovian li na lelagaena lala vena silaga asitoñal p̃elaga wo naki-laena. E lepas na kiela suṣe lala, amio kiela yerkawa la naṣa asike ne, monar avatanon la, alogear la, a akekaran kilaen yum̃aena wo punu ga. ² A monar okila pian la m̃ena ga, ovisave la nene, ve asum̃a avisa

kare la re sina, a pe pon re ava e veveyuen poli. Ana p̃elaga naṣa monar akila va yar taṣena ve sanini, sane monar amom̃au, ve akila re p̃elaga m̃arera, a monar akila p̃elaga navatanoena ve keviu silaga.

³ Visena la ne sanene pan ita make ga, komin naṣa nanua sumo pe yar taṣena re ga la poli, ana, ita m̃ena tesu ga e malena viowa. Tekila wowe pa Ntewa, a tepe p̃ar m̃arera pania. Pelaga viowa p̃ere kare ita pano-o tepim tepe yar na suen vatanon m̃areraena nasinenana viowa lala amio nakekarena viowa na yomarava. E poglis nene, kata kinanena na kanen e legien punu ga nane sine-mimiena amio vielueena lala. Kieta sitomena lala piowa pan yar taṣena lala, a metavana, tepiowa ke sina ga pan ita.

⁴ Tesum̃a e malena viowa sanene pano-o, ana sirau-nia, kieta Ntewa natamaliaena, kiena nasinewoena a kiena nasinesiena wo pimi m̃alivin ita, ⁵ naga tamalia ita ruru nenaga. Tamalia ita sanene, pe komin re ga ki-eta yum̃aena wo naṣa tekila poli yo, ana vanon ga kiena nasineyeena wa pan ita.

Naga sinena miye ita, ana kevan ita temekiki, ana kiena Ninuna Wa kila tepaeme sina e malena viu, ⁶ e kuruta kana Yesu Kristo kieta natamaliaena, naṣa mlau kalo ita.

⁷ Naga mrapa ke nene narui naþa e kiena lemamiena, tepim temesmes ruru e marana. A pe naga re ga nene poli, ana metavana, naga kila ita tepim tepe narina lala, naþa yoko towarpae ga kiena lalimana, naþa yoko war van ita, nane malena naþa ve uro re.

⁸ Potena paþisi pania, visena la nene ape lelaga paþisi.

Pol miilaar Taetas

Sineun nesape om̄arera, om̄areran li nalelagaena lala kiena ne Ntewa, sane monar auarar ruru visena la nene, a monar aþilion naþa auarar ruru yum̄aena lala naþa po, a naþa akilia aiila m̄ena yarunia.

⁹ Pogos tai asum̄a apisasa ke ga visen koren lala naþa taþatete iila malena kien yaru, sa naþa asum̄a apeveyu wowe ga e sitomena la naþa pe kana kinas re poli, pona asum̄a apeveyu komin sur lala kiena ne kiela yermarua la naþa apuarar ruru kiela kia la sum̄a ga. Pogos tai asum̄a apiuelinila, pano-o tol naþa kiela sitomena la kilia liþere m̄ena e visena naþa navisaluaena kiena ne Ntewa pisa. Ana popon ovisa va li nalelagaena ovisave la monar ve aviran la re e visena la ne sanene.

¹⁰ Visae yar tai sum̄a sikolia, kawekapin m̄a visena silaga, akilia avis vania yam

tai, sa pere yam ve lua, ana visae sitom korenan ga, sum̄a kila m̄aga, pe pon re si akilavain sur tai amio naga poli.

¹¹ Tekilia yar la ne sanene rui, sane kiela malena pilon pe taþena, a kiela sitomena pulen ga mlamulen viowa. Pe ita re naþa tesape naga piowa poli, ana kiena yum̄aena pisawal kiena napiowaena e marata ita punu ga.

Visena maro lala

¹² Taetas, sineun nesape nevisa van ko sane visae olual neligan lalua nene tai Artemas pona Tikikas im̄asu m̄alivin ko, e pogos nene narui okilia ourmatan yo nam̄a, owaryonli naþa oim ovisu inu gar Nikopolis. Na nene komin naþa ve ve piavi re, yoko neligan e nini, sineun nesape neva nesum̄a e yo nene vano-o tol pogos na miava warovia.

¹³ Lalua taþena naþa asike amio ko nagane, yar na navisaluaena nene Sinas, amio Apolos, yoko okilali okila sane lalua akilia ala si kiela mrapa lalua ve ve piavi re, vena ava m̄ena e yo taþena laþasa. Awis, oiila lalua e ya naþa limala plasinia.

¹⁴ Sike m̄ena e ko vena oiilaar kieta yeririna lala sane nepisa ga na wa, la monar awion naþa atarar yum̄aena wo lala. Visae ve sa nene, pogos naþa sur na ilanen tai, ana kiela naiilaen la sike

ruí, a kila m̃ena nãpa kiela malena kilia war mras ve moki sa nãpa Ntewa sinenania.

¹⁵ La nãpa asike amio inu nagane apisa pokolulag pona pokolemalo van ko. A yeririna la nãpa asike amio ko nãpa asitoñal imimi asape ita punu ga teve taaga temio la e kieta viawaena ve taaga, awis, ovisawal van la sane imimi m̃ena ga mesuñã mesitoñal la m̃aga.

Kiau leniena nesape yoko lemamiãna kiena ne Ntewa sike amio amiu make ga silaga.

Inu, Pol.

Maki Naña Pol Siria Pan PILIMON Visayuena Na Tusi Nene

Suniena plas na tusi nini

Pilimon naga pe yaru na lelagaena tai, a naga supe kiena yaru na yuñae korenena tai naña kiena kia Onesimās. Onesimās pure petan kiena supe naña Pilimon, pa sike garu pulkumali keviu naña Rom, ana e lele nene naga meke loyuña na logeviowaena ea. A e yo nene naga pitawa amio Pol, a pogos naña sike amio Pol naga pimi pe yaru kiena Yesu. Ana Pol siri maki tai pa Pilimon, piyun tania vena naga monar were Onesimās wasupe inasu sike amio naga. Pol pisa pa Pilimon, sape nagane Onesimās pimi pe yaru kiena Yesu rui, a popon naga sinena kar re, ana naga viewoia a werrear sina vena ve yaru na yuñae korenaen sina. Ana yoko naga ve ve yaru na yuñae koren rega, naga imi ve wenla ruru napo komin lalua asikol la amio Yesu Kristo.

Kompasnen tusi la na nini

Viena pesa 1-3

Pol mieluar Pilimon
komin kiena yuñae
4-7

Pol piyun māraran pa
Pilimon vena were si
Onesimās 8-22
Visena maro 23-25

Pol siar kiena visena pa Pilimon

¹ Inu Pol, nesiri ke maki nene pan ko Pilimon. Nana-gane nesike e pupia pulkumali nae Rom, a komin naña nekila ke yuñae kiena ne Yesu Kristo, la amligan inu nesike e yuñae naloge viowaena e nini na wa. Kieta wolai naña, Timote, naga sike amio inu e nini na wa, ana imimi lua mepisa pokolulagi pona pokolemalo pan ko, naña ita ga teloka temiyuñae ke pa Supe taaga ga, ² a kiamimi visena imimi lua sanene pan ke mēna ga vineta nene, Lewia, a yaru na kieta pegasia nene, Akiņas, naña naga pe yaru mārara na kilaen mara e lepas na yuñae kiena ne Supe, amio pegas kiena ne li nalelagaena taņena lala naña asuñae apiora ke e moña yuñae.

³ Imimi lua memlen mesape Arimata Ntewa, a kieta Supe Yesu Kristo, lalua aligan kiela lemamiēna a sumārena sike amio amiu e yo naña asike ea.

Sinesiena a naviawaena kiena ne Pilimon naga keviu manene paņisi

⁴ Wolai Pilimon, pogos naña nesitoñal ko e kiau leniēna lala, silaga nesuñae nepisa ke potena pan Ntewa

vanon ko. ⁵ Na nene komin naþa nemloge rui naþa la apisayu kioṃa þelaga wo, asape kioṃa naviawaena e kieta Suþe Yesu ṃarera po paþisi, a kioṃa sinesiena pan nalelagaena lala, keviu manenea. ⁶ Nemlen wo ko ke, nesape pogos naþa ko osumṃa okianlua ke kioṃa naviawaena pa yaru taþena lala, þisi na kila la akilia manene laa sane e navisa ruruena nowo la naþa ita kieta, naþa temla Kristo e kieta malena lala. ⁷ Ee, Pilimon, kioṃa sinesiena wo naga sumṃa kila ke li nalelagaena wa lala, la sinela la amloge po paþisi, a pogos naþa nemloge, suri nene kila nemloge po sina, a kila inu ṃena nekekara paþisi.

Pol naga piun ṃareran pa Pilimon vena were si kiena yaru na yuṃaena nene Onesimṃas

⁸ Ana Pilimon, sineun nesape neviun suri tai van ko. E pupia yuṃaena kiena ne Kristo naþa nesumṃa nekila ke ne, poṃa mesmesun ruru ga naþa nevisa ruru ga van ko nevisave popon ko okila ve sanene ve sanene, ⁹ ana taveve þelaga na sinesiena, pe sineun re nevis ṃarera ve sanene van ko poli. Nanagane, in na nepimi nepe yermarua ke narui, nesike e yuṃa nakoena vanon Yesu Kristo, ana sineun nesape neviun ga tan ko, visae ko okekaran naþa otamṃan suri

nene naþa nesape neviun tan ko.

¹⁰ Yaru tai sike e nini, pogos naþa nesike pa e yuṃa naloge viowaena sanini rui, ana nesumon yaru nene pimi e Kristo, a nanagane nesumṃa nepisu ke yaru nene sa ga naruu tai. Yaru nena Onesimṃas, naþa sumo pe kioṃa yaru na yuṃaena tai, siraunia naga pure petan ko, pimi e yo nini. ¹¹ Ee, yaru nene, kiena kia kana kinas sape “kila yuṃaena wo,” ana nesitom nesape nanua sumo, naga sumṃa kila kioṃa yuṃaena pe po ruru re poli. Ana nanagane, naþa pilon kiena malena rui, nemlaga nesape naga kilia kila yuṃaena wo lala na iila koena, a naga kilia kila ṃena ga yuṃaena na iila inuena.

¹² Ana, nanagane nesape neligan si Onesimṃas wasuþe ke sina ga imṃasu puṃa narui, sa naþa nemlalua ga kiau malena komþasia nane nemligan piṃasu puṃa ne. ¹³ In na nekekaran nesape popon naga sumṃa ga amio inu e nini, vena iila inu e pogos ṃarera nini naþa neṃeke e yuṃa naloge viowaena vanon lologena wo, a visae naga kila sanene, sa naþa naga kus leleṃa, naga kila yuṃaena tai pan inu naþa torokin ko okila van inu.

¹⁴ Ana pe pon re nomṃareran naga vena naga sike amio inu sanene poli, vanon naþa ko na omninue

ga. Sineun nesape visae ko okila kiau yuṁaena wo tai sanene van inu, ƣisi na ve vanon re ga naƣa nemareran kon poli, ana vanon kioṁa sinesiena wo a kioṁa sinewoena ga. Ya naƣa yoko Onesimās kila, naga pe kioṁa naƣa ovisawalia.

¹⁵ Lelaga naƣa Onesimās naga pur matan ko, ana ane kilia, pona Ntewa kila naga pur matan ko yam plas ga sanene yo, vena visae wasuƣe ke sina ga imi puṁa, ƣisi na naga ve kioṁa lue narui, vano vano-o taƣatete ƣisi. ¹⁶ Sanene komin naƣa nanagane, ƣisi na naga wasuƣe ke sina ga puṁa, naga ve ve sa re si yaru nayuṁae kioṁaena, ana naga wasuƣe puṁa sane womla tai e Yesu, naƣa sanene na po mane-ne. Sineu si naga keviu paƣisi rui, sa ga wolai tai, a nemlelaga nesape ƣisi na sineṁa si naga vano vano-o vaƣisi, komin naga pe kioṁa yaru ƣisi rui, a metavana, nanagane naga pimi pe womla ṁena ga.

¹⁷ Suri ne na nene nesape neviun tan ko. Visae ko opisu inu sa naƣa ita lua tepe wolai, a ita lua tepe yaru nakilaen yuṁaena taaga ga, sineun nesape oure si Onesimās wasuƣe iṁasu puṁa, sa ke ga naƣa visae neiṁasu puṁa, ƣisi na ko okekara vaƣisi naƣa oure inu neiṁasu e moṁa yuṁa.

¹⁸ A visae Onesimās naga pinaun kioṁa suri tai, pona

kila kare kioṁa suri tai, pona ya sina, ana ƣisi na inu ga nevisuveve suri la nene.

¹⁹ Visena nene inu ke ga Pol narui nesiri ke ga e luṁau, sane kiau navisaarena tai van ko, nesape visae sinoṁania, ƣisi na neul plan make kiena lapui vetan ko. Ana pona ko osuṁa ositoṁal ke naƣa ko ṁena ga kioṁa pupia lapui tai naƣa sike e inu, naƣa kioṁa malena wetelu, komin naƣa inu na nekila ko otol malena nene e pogos naƣa nemlologon lologena wo pan ko.

²⁰ Ve sanene, sineun nesape okila yuṁaena wo nene van inu naƣa nesuṁa nepiun ke tan ko e kia kiena ne Suƣe. Wolai, visae okila ve sanene, ƣisi na neloge sineu wo sina vaƣisi, naƣa malena wo kiena ne Kristo naga suṁa miyuṁae ke sanene e kieta malena lala.

²¹ Pe nemaraun re naƣa nesiri visena la ne sanene van ko poli, komin naƣa nekilia ruru po rui naƣa ƣisi na ko okila taveve ya naƣa nepiun tan ko. Ee, nekilia ṁena ga nesape pona ƣisi na okila ṁena ga wo laa sane yo, vano taulu kiau naviunena nene.

²² A nesape neviun ke ṁena ga suri taƣena tai tan ko, nesape awis, okila ruru ṁau lele na monena tai e moṁa yuṁa, komin naƣa nesuṁa nekila ke kiau sitomena ṁarera nesape ve ve piavi re, ƣisi na Ntewa naga taṁan inu nowasuƣe ke sina ga neimi pun amiu, sa naƣa

amiu asuñã apiun ke tania e
kiamiu leniena lala.

*Visena maro kiena ne Pol
pa Pilimon*

²³ Epaþras nene, naþa
naga mēna ga imimi lua
mesike e yuñã nakoena e
nini vanon Yesu Kristo, naga
pisa pisape Ntewa visa ruru
ko. ²⁴ A yaru taþena la nene,
Mak, a Aristakas, a Timas,
a Luk, naþa la amiila inu
keviu paþisi e yuñãena, la
mēna ga apisape la asitoñal
ko ke e kiela leniena lala.
²⁵ A nanagane, kiau leniena
sanini, nesape lemamiena
kiena ne Suþe Yesu Kristo
naga sike e losinemiu la
punu ga.

Inu, Pol.

Maki Naña Pa Ke Pan LE YU LALA Naña Amlelaga Visayuena Na Tusi Nene

Suniena plas na tusi nini

Yaru naña siri maki nini, naga siri pano pa pegas tai kiena li nalelagaena lala naña asuñña añal ke pog mārera lala e kiela maliena, komin yaru la naña pe amlelaga re poli asuñña akawela ke amio la. Pelaga naña yaru la akawela manene amio la sanene, kila sane añal mārera, a lavis aligan kiela lelagaena e Yesu Kristo. Ana yaru nene pisa panila sape monar asuññalu mārera e kiela lelagaena lala. Naga pisa panila sape Yesu Kristo ga pe yaru wo naña pisa meraravan Ntewa pan ita. Ana na visa meraravaneñ suri nene, naga pisayu suri telu.

Suri na sumo, naga pisayu sape Yesu naga pe narina Ntewa kemua lelaga naña suñña vano vano tařatete řisi pogos tai. Pe lelaga naña naga pe narina Ntewa rui, ana naga mēna suñña řikeyon kinasinen řelaga nene na logearen Ntewa, e sur la naña kila naga mloge piowa e tasnena. Ana komin naña naga pe narina Ntewa, naga mon la metavan navisawalena lala,

pona navisi lala, pona Mosis mēnaga.

Suri na lua, Ntewa pisawal rui sape Yesu, naga pe řarin yaru wa naña naga mon manene metava naña suñña vano vano tařatete řisi pogos tai. Naga pe řarin yaru wa naña taulu make řarin yaru wa na sumo lala.

A suri na telu, e yuññaena kiena Yesu naña naga pe řarin yaru wa na mon manene metava, naga maren natamaliaen yeririna makega, řarplan kiela milamulena viowa lala, kila la pe amarau re si poli, a mla malena naña ve uro re panila. Na kuřařaena nasumo lala, la ape totou na kuřařaena ga naña Yesu Kristo kila.

E marana na keviu lualima taaga pa taaga, yaru naña siri maki nini naga pisayu yaru lařasa e Tusi Marua naña amlelaga mārera e Ntewa. A naga pisa pa la naña naga siri maki nini panila, sape popon ataveve malena kiena la nene, vena akilia asuññalu mārera silaga, vano vano-o tol luwasnen kiela maliena. A silaga, monar akira avisu Yesu, vena akilia ava awarpoyo e pog mārera lala, naña asuñña atol ke e yaru la naña asuñña akila ke mārera panila pařisi. A na kilamakeen kiena visena, naga pis ruru pan kiena yaru lala, pisa panila sape monar avisuar ruru kiela maliena lala.

Komþasnen tusi la na nini
Visena þesa. Kristo
kila meraravan Ntewa
panita 1:1-3

Kristo naga mon laa meta-
van navisi lala 1:4—2:18

Kristo naga mon laa meta-
van Mosis amio Yosua
3:1—4:13

Kristo naga mo laa meta-
van þarin yaru wa lala
4:14—7:28

Naviranarena viu naga
mon laa metavan navi-
ranarena marua 8:1 —
9:28

Kuþaþaena naþa Kristo
kila naga mon laa meta-
van kuþaþaena marua
lala 10:1-31

Þelaga na lelagaena naga
po paþisi 11:1—12:29

Visena la naþa kila yaru
la asumalu mārera, a
visena maro 13:1-25

*Yesu na mon la metavan li
navisawalena lala*

¹ Kiau erau le Yu lala,
nakonua konua la rui Ntewa
pisawal kiena visena yam
mokliu pa kieta yermarua
lala, e mrapa la moki a
e þelaga wo la naþa peve
taþena, pimi molue kome
kiena navisawalena lala.

² Ana nanagane, e legiena
maro la naþa tesike e ne,
naga pis mesmes nena pan
ita pimi kome Narina Yesu.
Narina ne nane nanua sumo,
e nasiien yomarava, Ntewa
miyuñae kome naga, lalua
amliganar make pog a yo
lala, a siraunia, Ntewa
pisirlua Narina nena, mligan
sur punu ga sike e limana,
naga pe þarun la. ³ Narina

nene, naurarena kiena ne
Ntewa tego e kiena malena,
sane kus nena marana ne
Ntewa veraga, pe totou
na þelaga kiena ne Ntewa.
A namāreraena na kiena
visena mārera paþisi, naga
ga þuarar sur make ga na
yomarava nini, a yo taþena
mēna lala su ruru sumā
ga. A naga ke narui naga
tañan naga pimi kilavan
make kieta mlamulen viowa
lala, a pogos naþa kila make
ruru kiena yuñāena nene
e yomarava nini, þasuþe si
pa ma e peni, pa to metava
e lepas nen Arimana na
þamarua, Parin Suþe nae ma
e peni.

*Yesu na mon la metavan
navisi lala*

⁴ Yesu totano e nene
sanene, naga mon manene
la metavan navisi la naþa
asike ne, komin kia naþa
naga þaria vanon kiena
yuñāena, po manene la
taulu kiela kia. ⁵ Visae tevisu
e Siriena Wa lala, visena
moki naþa sike ea naþa
asape Ntewa kila Narina
mon manene la metavan
navisi lala. E visena la ta
nene, Ntewa pis pa kiena
Navisaarena nena, sape

*“Ko na, nepisu sane þane
opim ope naruu
nenaga, a nepim
nepe Arimoña kemua
lelaga.” Yauena 2:7*

A ta sina pisa mēna sanini,
sape

*“Yoko in na neim neve Ari-
mana, a yoko naga ve
naruu.” Sam2 7:14*

Visena lua nene, Ntewa pe pisa re nena pa kiena navisi la ta poli, sape pe Narina Wa, ana pisa ga pa Yesu.

⁶ A visen si tai, pisayu pogos naña Ntewa sinenan sape ligan narina mearu nene imi e yomarava, ana pisape

*“Popon navisi make ga alotu-
nia.”* Naw
32:43

⁷ E lepas kiena ne navisi lala, la akila yumãena wo la mokliu, ana Visena Wa pisayu la, sape

“Navisi kiena ne Ntewa lala aþar kiena visena, asa ga lagi, amiyumãe kiena ne Ntewa, asa ga kapi.” Yauena
104:4

⁸ Ana pogos naña Visena Wa pisayu Narina ne Ntewa, sape naga mon manene la metavan navisi lala, pisayuia sane naga maran taaga sa ke Ntewa, pio naga Ntewa. Pisayu naga, sape

“O Ntewa, kioãa lele wa na totanoena naga mon lue ga na mēke ne. Plaki na kioãa nasuþenena, naga þelaga wo ke narui.

⁹ *Ko okekarãan manene la þelaga naña po, ana yepmavin visuen þelaga viowa, ana kioãa Ntewa na mava naga mligan ko opa metava, opa manene la metava otaulu kioãa erau lala, kila ko okekara keviu sa naña miyowauia ruru ko e ponotaninu wo tai.”* Yauena 45:6-7

¹⁰ A e visen si tai, tepisu naña Ntewa na mava pio Narina sape Suþe, a pisayu pupia sur kerkeviu la naña naga sii la, sape

“Suþe, ko ke narui ko opisirlua purþes nen yomarava, lumoãa ga miyumãen sinapane ma metava.

¹¹ *Ana sur la nene, yoko amenunu makea, akokovio, ana yoko ko na osike osike lue.*

¹² *Sane takue marua tai, yoko osulowar la owar plan la nenaga, a sane moãa kulsota marua tai, yoko oyenlua nenaga, ana yoko ko na ove urviu maran ye taaga silaga, a kioãa kas la taþatete þisi pogos tai.”* Yauena
102:25-27

¹³ A visen kiena ne Ntewa tapena si sike ga wa, naña pe pisali re pa navisi tai poli wa, ana pisa ga pa Narina naga taaga, sape

“Ototano e lepasneu na þamarua, otomia sanene, vano-o yoko neligan kioãa nasinekar lala aim ave takue na vilanvanen lamãa ea.” Yauena
110:1

¹⁴ Nane visena maro e lepas nene narui, naña pisayu sanape naña navisi kiena ne Ntewa lala la na amiyumãe kiena ga, la ape ninuna na waren kiena visena, a ape naiila itaena vena tetol natamaliaena, ana yaru tai sike ga wa naga mon metavan la make ga, nane Narina Wa ne nane

Yesu, naþa Ntewa pis maro pan ita ea.

2

Nalologena wo viu kiena ne Yesu mon la metavan navisaluaena marua kiena Mosis

¹ Sanene, visena wo lelaga nalologena wo la naþa temloge pa narui, monar tesitom urmi manene e la, monar touarar ruru m̄arera. Visae peraga, tevisuaria saþisi korur yan plan ita si vetania.

² E lepas nen navisaluaena marua nasumo lala, navisi ga la aþar pimi, ana kana visena ne lala amesmes ga, a aþarera paþisi. Ana na kilaroen kana visena make ga, a kana nalogeluen make ga, kana nakoena ruru napo sike þa rui. ³ Ana nanagane, nalologena wo viu pimi tol ita þa rui, a naga keviu taulu manene navisaluaena marua nasumo. Sanene, visae tesitom korenan mrapa na kieta natalialiaena naþa sike ea, yoko taþatete nena toure vetan kana nakoena nena-a þisa. Kieta Suþe ke narui naga kila þesan lologena wo pimi m̄alivi, a la naþa amloge pisawal e kiligala, la apisawal liluen pimi pan ita, akila merarava van ita apisape lelaga. ⁴ A Ntewa m̄ena miila naga e visena nene, naþa naga kila kile lala, a sur nailanen lala, a yuþaena lala na kiena nanareraena, a metavana, naga kiakian plan nalaena lala kiena ne Ninuna Wa pan

ita ai naþa naga sitom sape la vania. Ana tepisu sur la nene, tekilia tesape lologena wo kiena ne Yesu Kristo naga pe visena tai naþa naga po manenea taulu kieta navisaluaena marua ita le Yu lala.

Yesu ve Suþe e yomarava naþa yoko imi na wa

⁵ Tekilia tesape Yesu naga mon la metavan navisi lala, komin naþa e lepas na yomarava naþa pimi ke ne, yoko Ntewa taþatete ligan navisi la ave suþenia, ana mligan sike vatanon Narina.

⁶ Sur nene Tus Marua m̄ena pisa, e visen tai kiena ne Þarin Suþe Tepet naþa pisa pa Ntewa, sape

“? Sur wo ya na sike e yaru, naþa kila ositom manene naga sanene?

?Pona ya ne kila oþalivi ke e narina ne yeririna?

⁷ Nanua, omligan naga sike tanon navisi lala, ana nanene na yam plas la ga,

a nanagane, opisirlua si naga rui. Omligan naga metava e yo wo tai amio kana pupia naurarena a nawarwarena nena,

⁸ ana omligan sur make ga sike vatanon kiena nanareraena.”
Yauena 8:4-6

Ana pogos naþa Ntewa kila yaru ve þarun sur make ga, kila sane pe sur re nena tai naþa naga pe pe suþen re poli. Naga kila sane sape ve sanene, ana pimi tol nanagane, pe tepisu make re

sur la e yomarava nini poli wa e kilamarata pa mapin sa naña Ntewa sinenania. ⁹ Sur la pere wa, ana silaga tekira tepisu ga Yesu, naña Ntewa pisirlua naga pa mon manene la metava. Nanua sumo Ntewa sinen miye ita pañisi, ana kila Yesu pito tano yam plas la ga, kila naga patanon navisi lala, a kila naga ãar manene pupia naloge viowaena na namarewoitaena, ana siraunia, pisirlua sina, paia ruruia amio naurarena nae peni.

Yesu pe kieta natamaliaena, pe kieta ãarin yar wa

¹⁰ Pelaga na yuññaena kiena ne Ntewa na tamaliaena nene naga mesmesu, komin naga sii sur make ga, a sur make ga pe naga kiena, ana sinenan sape taulu maran si pupia ãegas nen narina la tai vetan yomarava nini, aim si ave kiena. Naga sinenan sape kila sanene, ana nakilaena na ñarera pañisi, ana ñal mrapa taaga ga nakilaena, naga sanini: mrapa naloge viowaena kiena ne Yesu, naña Ntewa kila ga naga pimi pe yeririna, naga pe yar natepoen yomaru vena taulu kieta natamaliaena. ¹¹ Yesu kilia sumon ita sanene komin naga ke narui naña kila ita temekiki, kila narui naga kekarana naña pisu ita sane tepe mratava taaga ga temio. ¹² Visena telu e lepas nene apisa sanini. Tai sike e tus kiena

ne Yauena lala, sane Yesu pis pa Ntewa, sape

“Yoko nevisawal ruru kioña kia va wolai lala, yoko neieluar ko likan yeririna lala.” Yauena 22:22

¹³ Ta sina, pisawal naña Yesu mlelaga e Ntewa sa ke naña temlelaga e naga, visena naña sike e tus kiena ne Navisawalena Aisea, sape *“In ke narui, naña kiau nawasineena, nemligan sike e naga.” Ais 8:17*

Namaro, visena si tai kiena ne Aisea, pisayu Yesu amio wenla lala, sape

“Nane in ke nane ñesike nini narui, nemio narina ne Ntewa tañena lala naña naga mligan la e lumau.” Ais 8:18

¹⁴ Ana ita narina ne Ntewa la nini, ita make ga tepe yeririna, temio tasneta a kata kuruta, ana naña Yesu imi ve wenla kemua lelaga e ita, naga pimi e yomarava nini, naga tasneta a kana kuruta sa ke ga ita. Sanene, pogos naña tañan si naga mare wo ita, ana kiena marena nene ñelua puryukawaena kiena ne ãarin suñe na ñareraena na marena, nane Yermare. ¹⁵ Naga ñelua ñareraena kiena ne Yermare, mluñar plan kilika lala naña añararia kararkare ruru ita nenaga, sane maraunen marena naña temloge viowagania e kieta malena wetelu. ¹⁶ Lelaga nañane, yuññaena wo na iilaena kiena ne Yesu,

pe kila re pa navisi nae ma e peni la poli, ana kila ke ga pan ita na yomarava nini. Visena la mokliu apisa visena sanini, asape

“Naga sum̃a miila ruru ke lus kiena ne yermarua Epraam lala.” Ais 41:8-9

¹⁷ Nane sitomena kiena ne Ntewa sanene. Naga pisu sane Yesu monar imi sane ita wenla lala e sur make ga, vano-o kilia kilia ruru ita, kilia sinen ye ita. Ana tekilia towasinea, sa naña yoko naga masisun yuñæna naña yoko naga kila va Ntewa komin kieta mlamulen viowa lala, naña kila kieta marawo temio Ntewa, sane pe kieta Parin Yar Wa. ¹⁸ Naga pisu pupia nakilaliena pimi m̃alivin kiena malena, mloge piowagan pano-o tauluia, ana kila naga kilia iila ruru ita sina e pogos naña nakilaliena imi m̃arera m̃ena ga van ita.

3

Yesu mon la metavan yermarua Mosis

¹ Wolai a vineu wa lala, naña amlogear navioena nae peni rui, nepisa pan ami rui nesape Yesu kilia iila ruru ita, ana nenagane nom̃areran amiu, sineun nesape popon asitomyu manene naga va laa sane wa, sane naga pe nalologena a naga pe p̃arin yar wa na kieta nalelagaena. ² Tevisu veve ruru li Yesu amio yermarua Mosis nanua. Yermarua Mosis nanua

sumo, naga masisun kiena yuñæna la pañisi e mratava m̃ana ne Ntewa, a Yesu m̃ena masisun yuñæna la pañisi naña Ntewa pisirlua naga sape naga yuñænia. ³ La ga luwoka amasisun yuñæna, ana Ntewa pisirlua Yesu pa manene la metavan Mosis, komin naña sane Mosis naga sike ga loyuma m̃ana ne Ntewa, kila ke kana narin yuñæna ne lala, ana pupia yuñæna na visirluaen yuñæ nena, Yesu ga kila.

⁴ Yuñæ make ga, monar yar tai naña yuñænia, ana Yesu ke narui naga miyuñænen yuñæ m̃ana Ntewa, ana Ntewa naga pe p̃arun yuñæna nene. ⁵ Sanene, Mosis naga pe yar na yuñæna, masisun ruru kiena yuñæna make ga loyuma e mratava m̃ana Ntewa, pano tol naña naga pe yar na visawalen pupia visen kiena ne Ntewa lala naña apisawal liluen ke pimi tol nanagane, ⁶ ana Kristo naga kila pa manene la sane, komin naga masisun visuaren pupia yuñæna make ga na yuñæ nene, sane naga pe m̃earu na pupia kana p̃ar nena.

? A yuñæ nene na pisa ke ya ne, pona pisa ke ai? Sum̃a pisa ita ke ga ne, komin visae ve temarau re, a visae tekekaran kiena navisaaren lala, touarar ruru kieta nawasineena e la, ita teve kiena namratava wa ruru nena lala.

Yesu mon la metavan Mosis, a monar telelaga manene va la sane taulu la naþa Mosis sumon la

⁷ *Visena ta teke e Siriena Wa, naþa pe visena kiena ne Ninuna Wa na kilapege itaena, naþa pisa sanini, sape*

“Pane, visae aloge pulgon Ntewa,

⁸ *pe pon re si kiamiu sitomena la imi si m̄arera poli, sa naþa kiamiu yermarua la akila rui.*

Nanua sumo, e yomema, asike e pog na kilalien tai paþisi, asumã pano-o asumãl ke sina ga akila þarila.

⁹ *Ana Ntewa pisu la, pisa sanini, sape*

Nayalena kena la nene naþa tol kas lualima yam vari ne, nesike nemio la silaga, apisu kiau naiilaena wo la pan la, ana þelaga kien la nene na kilali in paþisi.

¹⁰ *Kiela þarm̄arera kila sineu pikirara paþisi, ana nepisu sane peraga, la nene na, silaga asumã apa e nene apa e nene amiyepe ke petan kiau mrapa mesmes lala.*

¹¹ *Sineu maren la ne sanene narui, sineu kar la paþisi, ana nesumãlu narui, nepisaar pan la nesape purvanua wo navaruruena naþa nekila ruru sumate la nesape ve kiela, yoko ve ava re si loyumã ea.” Yauena 95:7-11*

¹² *Wolai a vineu lala, komin sur ne la nanene, popon kam na avisuar ruru amiu. Pe pon re visae amiu yar tai, sitomen viowa sike e naga, pona sinena ve lelaga re si narui, kila naþa naga werelua si naga vetan malena wo kiena ne Ntewa mali. ¹³ Pe sinetan re ita yar tai loru sanene poli, ana monar tela visena naiilaaren van ita silaga e legiena punu ga, vena ve ita yar re tai naþa þelaga na mlamulen viowa la visa kotalia kare re naga vano-o naga manin nenaga. Visena naþa meta ne sape “Pane, visae aloge pulgon Ntewa,” ana naga pe visena nasumo tai, ana sumãl sumã ga, pulgona pio ke na wa, tesike e kana legiena na logearen la na wa. ¹⁴ Popon touarar kieta lelagaena m̄arera ve sa nena ga naþa temlelaga þesan ea, popon tesumãl m̄arera tesumã vano-o tol luasa. Ana visae tekila ve sanene, yoko temio Kristo, teve yar na war viraviranan naurarena wo lala kiena ne Ntewa. ¹⁵ Lelaga naþane-e, Visena Wa naþa metava pisa sanene, sape pe pon re si sinemiu la im m̄arera poli, sa naþa yermarua lala akila e pogos na kilaliena lala e yomema, naþa asumãlu akawe visena kiena Mosis.*

¹⁶ *? Ana la ne akila þar m̄arera sanene, a la nene? La naþa akila sanene, la naþa akekaran amlogear þesan pulgona Ntewa, þis narui apatanon kiela yar*

keviu yerkawa Mosis, naga sumon la apetan Isip. Naga sumon la amolue petan yo nene ana pe yam piavi re poli, akawe ke sina naga. ¹⁷ ?A la naþa akilali Ntewa, amiyuyur sinena e kas lualima yam vari nene e kiela nayalorena, pano-o sinen kar manene la la, la ke nene na wa? Ee, la naþa akila sanene, la ke ga nene na wa, naþa naga tamalia la, ana siraunia akila luen ga mlamulena piowa e marana, pano naga kila amarmare ga, puryula la sutetai kar ga sike e yomema. ¹⁸ ?A la naþa naga pisaar sape yoko la taþatete ava loyuma e kiena purvanua wo tanea navaruruena naþa kila ruru sape ve kiela, la ape yeririna la ne sanape? La naþa taþatete ava ea, naga la naþa akilakila ke þarila, naþa pe amlogear re sur ta poli. ¹⁹ ? A ya ne kila narui taþatete ava loyuma e yo wo na varuruena nene? Taþatete avavini vanon pe amlelaga re e Ntewa poli, a pe aþasine re naga poli.

4

Navaruruena wa kiena ne yeririna lala kiena ne Ntewa

¹ Nanua sumo, Ntewa kila ruru tanea yo na varuruena tai kiena ne kieta yermarua lala, ana nanagane mēna ga kila ruru si kieta yo wo na varuruen rui. Nasiiena tere nene naga mal ruru ga sike na wa, ana pe pon re feve sa yermarua la nene poli, naþa

akilalu kiela navaruruena nene, la moki naþa pe apa re loyuma e poli. Peraga, pon ita tevisu ruru ita yo, pe pon re naþa vano-o þisi na ita laþasa, la mēna akilalu kiela pulmas, Ntewa visu veve ruru la sa þisi ve ava atol re kiela navaruruena. ² Naga nene komin naþa ita maran taaga ga sanē yermarua la nene, naþa lologena wo kiena ne Ntewa tol ita, sa naþa tol la, ana akila sa naþa amloge, ana pe amla re si lelagaena to metavan poli. Pe amla ruru re si kana visena la nene e kiela malena la poli, þisi pe þar re mras e la poli. ³ Ana e lepas kiena ne la nini naþa pe amlelaga re sanene poli, Ntewa pis mārera rui, pisa visena naþa nesiri metava yam tai rui. Visena nene, pisape

*“La nene akila sineu kar la paþisi,
ana nepisaar nesape yoko
la taþatete akilia atol
kiau navaruruena
nene.” Yauena 95:11*

Ana ita naþa temlelaga kemua e lelaga, navaruruena nene naga pe kieta naþa teva loyuma ea.

Navaruruena kiena ne Ntewa nene, naga kila ruru pe kieta su nakonua rui, komin e pogos nasiiena, naga miyumaē pano-o tol kana legiena orai ana þisi nena ga, ⁴ ana sa naþa Visena Wa pisa e yo laþasa, sape e kana legiena olua, naga pa ruru e kiena yumaena ne lala, pe

miyuñāen re si sur la nene poli.

⁵ Ana sur si tai, visena na metava pisayu naña Ntewa pisape yoko yar laḡasa taḡatete nena atol kiena navaruruena, ⁶ ana visena nene kila meraravan sape sane monar yar si laḡas asike koyo tai naña yoko Ntewa tañan la ava loyuñā. La nanua sumo, amloge lologena wo kiena ne Ntewa amio purvanua wo naña pisaar pisape ve kiela, ana pe asuñal re m̄arera poli, pe amlogear re poli, ana akila pal ruru nena ga, pe apa re loyuñā e poli. ⁷ Ana kieta navaruruena sike na wa sike ne, a Ntewa pisaar kana legiena na tolena, komin kas mok ḡaro rui, Parin Suḡe Tepet pisawal visena la naña sike meta rui, naña pisa sanini sape

“Nanagane visae aloge pulgona, pe pon re kiamiu sitomena la imi m̄arera si poli.”
Yauena 95:7,8

Popon tevisu kilale sane “nanagane” naña pisa e nini, nane kieta pogos ne nanini narui, naña Ntewa kila ruruia vena tetol natamaliaena. ⁸ Asitomyuli yermarua Yosua nanua. Naga sumon kieta yermarua la komḡasa apa loyuñā e purvanua wo naña Ntewa pisaaria, ana visae naga ke narui navaruruena kiena ne Ntewa naña akus rui, yoko Ntewa taḡatete si visayu pogos taḡena tai va

Tepet, visave pe legiena na vaen loyuñā e kiena navaruruena. ⁹ Ana peraga, naga suñā pisa ke pisape navaruruena wa nowo tai sike ga wa kiena ne kiena yeririna lala, ¹⁰ ana visae a naña va loyuñā ea, yoko wo naña wo vana vaḡisi, yoko naga kilia va ruru e kiena yuñāena make ga, sa ke ga naña Ntewa m̄ena pa ruru e kiena.

¹¹ Visae sanene, popon toḡareran li naña tetol navaruruena wa nowo nene, ana pe pon re m̄ena ita yar tai ve logear re Ntewa, yoko kilapalia.

Visena kiena ne Ntewa po paḡisi

¹² Tesike vatanon visena kiena ne Ntewa, vanon kiena visena naga mali, miyuñāe ke m̄arera paḡisi, kilia yur malena kien yaru, mal paḡisi taulu playu na mara naña mal lepas luwoka. Visena kiena ne Ntewa kilia va warpoyo va loyuñā e losineta, kilia va liḡere sur ya naña teke e kieta sitomena, pona visuveve ya naña teke e ninuta. ¹³ Lelaga, naga naña yoko visuveve kieta malena, kilamarana tol make suria, taḡatete ita yar tai tapolounia.

Yesu pe kieta ḡarin yaru wa

¹⁴ Ntewa kilia make sur la ne lepas na e ita, ana potena pania naña narina, pupia ḡarin kieta yaru wa naña Yesu, naga mligan yo

nini pa yalen silau ma e kiena yo ma metava e peni, pa kila ruru si mara wo pan Ntewa vanon ita. Ana vanon naña kila ruru ita ke temio Ntewa sanene, popon touarar nalelagaena m̄arera ea, a popon ve teligan li re si naga pogos tai. ¹⁵ Kieta ãarin yar wa nene, naga pe yar ta naña pe m̄ninue re kieta ursuen la poli, ana kilia ruru po pañisi naña ita pe tesuñal re m̄arera poli. Naga sinen miye ita, yoko iila ita, komin nanua naga m̄ena ga, natañaliena lala apim ke e naga m̄arera pañisi pania e lepas punu ga, sa ke ga naña apim ke e ita. Naga sa ga ita, ana sur ga tai, natañaliena pe ãere re nena naga m̄loru e mlamulena viowa poli. ¹⁶ Visae ve sanene, tepisu sane toñal kieta m̄rapa narui vena tekilali naña telen ita teva la lavis pun lele natotanoena wa kiena ne Ntewa, naña pe purpes nen lemamiena. Ve temarau re sina, tekekarar naña teim puna Ntewa, ana yoko tekilia tetol kiena sineyeena e kieta malena, yoko tevisu naña kiena nasinewoena iila ita e pog m̄arera ya naña tesike ea.

5

Yesu pe ãarin yar wa na sineyeen yar lala

¹ La naña apuarar yuñena na ãarin yar wa, apisiriplan la petan li wa

tañena lala vena kilaen yuñena na sanene narui. Yaru naña pe ãarin yar wa, naga suñalu su likan yeririna lala a Ntewa, vena waren kiela nalaena lala amio nakuñañaena lala vana, vena naga kilia viewo kiela mlamulena viowa lala. ² ãarin yar wa nene pisu kilale ruru naña yar la asuñamiyuñae piowa ga, asuñamiyepe ga petan m̄rapa, komin naña naga m̄ena pe kumpui ga, naga m̄ena kilia malum, kila sane sinena kilia ye ruru nena yeririna tañena lala, naga moñau ruru nena pan la. ³ Naga sa ga yeririna tañena lala, ana pogos naña kila nakuñañaena lala, monar kila ve vanon re ga mlamulena kiena ne yeririna lala, ana vanon m̄ena kiena mlamulena viowa lala. ⁴ Komin sur ne nanene, pe pon re yar tai ligandar si naga poli visave popon imi ve ãarin yar wa, ana Ntewa ga kilia ligandar yar vena war pupia kia na sanene, sa naña naga mligandar yermarua Eron nanua sumo pe kieta ãarin yar wa ãesa.

⁵ A e lepas kiena Kristo, sa ke m̄ena nene. Naga pe kieta pupia ãarin yar wa, ana naga pe pisirlua re naga pa metava sape naga sanene poli, ana Ntewa ga pisirlua naga. Visena kiena ne Ntewa naña pisa sanene sike e nasiriena wa na sumo lala, naña ta pisa sanini, sape

“Ko na nepisu sane ðane opim ope naruu nenaga, a in na nepim nepe arimoña kemua lelaga.” Yauena 2:7

⁶ Taþena, pisa sanini, sape

“In na nemligan ko sane yermarua Malkusteke, ko na yaru wa maro e kiena lus, naþa yoko ouarar ña yuñæna nene vano-o ve uro re.” Yauena 110:4

⁷ Ntewa mligan yuñæna nene pa Yesu, ana tepisu e pogos na kiena malena e yomarava nini, naga kila ke pa rui. Sila ga naga sitom manene yomarava nini paþisi, ana tagin pa Ntewa, wamarana mlau vanonia. Naga sumalar ñarera sike e Ntewa sape visae kiena malena kovio, yoko Ntewa kila malia sina, ana naga ñareran la sane naþa mlenwo itania.

Ana Ntewa pisu þelaga wo na momæuena a navatanoena kiena ne Yesu, ana sinena myea, mloge kiena naviunena lala. ⁸ Lelaga naþa Yesu naga pe narina ne Ntewa rui, ana Ntewa tañan naloge viowaena na pogos ñarera lala pimi pania, sape vian Yesu vena tol ruru þelaga na logearena e kiena malena. ⁹⁻¹⁰ Naga patanon make nasinenanena lala kiena ne arimana, pano-o kila make yuñæna la naþa Ntewa mla pania, kila narui pisirlua naga sane yermarua Malkusteke. Sanene, Yesu

pimi pe Ntewa kiena þarin yaru wa, pim pe purþes nen malena naþa ve uro re kieta ita punu ga naþa temlogearia.

Popon teimi temarua ruru wo e Kristo

¹¹ Ana kia naþa Malkusteke, kiena suniena marua wo la sike ne, naþa akilia akila meraravan ruru van amiu sanape e yar nene amio kiena yuñæna. Mareran navisayu ruruen merarava van amiu, komin naþa yam tai sa naþa kiligamiu poþe towe la sane. Ana visae kam na asitom asape aloge kilalelia, ¹² yoko wo vaþisi, komin naþa kam na amlelaga nakonua rui, ana atorokin naþa aim ave navianena na visena wa kiena ne Ntewa rui. Ana peraga, asumia ga sa ga nene, ana monar avian amiu si ea, siar si e kana purþes nen visena ne lala.

! Lelaga naþa, kam na nakanen kinanen ñarera la rui, ana sa ga naþa asumia sinemiun ke amun yu na wa! ¹³ La naþa amun ke yu sanene wa ape sisi ke ga wa, ana taþatete ave manmarua e visena na mrapa lelaga, ¹⁴ ana la naþa akan ke kinanen ñarera, la amarua ruru rui. La ne sanene, kiela sitomena la miyuñæ ruru pano-o apisu veve ruru make sur punu ga, ana akapur apimi po tol naþa apisu kilale ruru sur ya naþa po a sur ya naþa piowa.

6

Popon tevisuar ita ve towasuþe re si teva varau

¹ Komin sitomena la nene, popon teligan þelaga na sisi sike na, teva re laa sane wa e navianena m̄arera kiena ne Kriřto na atorokin sitomena naþa marua.

Tepilopu ita e kieta yuþaena piowa namarena la rui, tetol naviawaena e Ntewa rui, ana popon ve tesuþa teva re si ea. Naga sa naþa tekilavan lelen yuþa rui, pe pogos na visirluaen narui. ² Apian ita e nakeena rui, apu þarita rui, temlelaga rui tesape yoko tesuþal si e marena, a tekilia rui nalipereena ta sike ne amio kana nakoena nena naþa yar viowa la akus vano-o taþatete þisi pogos tai. Sur la nene toþaro make e rui, ana pe pon re tesuþa teteteliv m̄aga e sur la nene silaga poli, ana popon tesuþa teva re laa sane temio kieta Suþe. ³ Sur nene m̄arera paþisi, ana visae Ntewa taþan ga van ita, yoko tekilia teyuþaen wo ga. ⁴ Lelaga, yoko tekilali naþa teva re laa ga wa temio naga silaga, ana sanapen la naþa amloru, apa si varau rui?

La nene, la amial ruru þes e yomerarava asuþa akinan ke e lokove nae ma e peni rui, a Ninuna Wa pimi m̄ena e la, a pogos naþa apa si apiowa sanene, yoko taþatete si avilopu la awasuþe aim e malena. ⁵ Visena Wa kiena ne Ntewa miila la e kiela

malena rui, a atol towe m̄a nam̄areraena na suþenena naþa pimi ke ne, ⁶ ana pogos naþa apilopu si m̄asila, akila þarila sanene, yoko aim awo si sanape? Peraga, yoko viowa van la vaþisi, komin naþa akila ke sane asuar ke si Narina ne Ntewa meta e lak torovia, sa naþa asuþa apisirilua ke naga e maran yar lala vena aviuelin kare si kiena kia.

⁷ Asitomyuli na nene. Porotano naþa mun yua naþa mloloru ea, ana þar manene kinanen kan la naþa amiyuþae ke ea, ana Ntewa kekaran paþisi, kiena navisa ruruena sike ea. ⁸ Ana porotano naþa pe þar re sur wo poli, þar ga viluþini viowa lala, naga sa ga naþa apiain ga maren pania, ana taþatete akila sur wo ta ea, yoko asikap ga narui.

⁹ Erau lala lelaga paþisi, visena la ne sanene am̄arera paþisi, ana e lepas na pun amiu, in na pe nesitom re nesape kam na sanene poli. Peraga, noþasine amiu, sane mras nen malena viu naþa po kapuru ke e amiu na wa. ¹⁰ In na nemlelaga nesape yoko taþatete Ntewa sinen þesan kiamiu yuþaena wo lala, a yoko taþatete sitom korenan vinayaena a sineyeena naþa kam na akila pania, pogos naþa kam na amiila kiena nalelagaena wa taþena lala. Kam na amiyuþae po sanene, ana kila Ntewa kekaran paþisi,

yoko naga mēna kila ruruia a kila wo van amiu.

¹¹ Sanene, nesape neiilaar amiu sina, vena ve ava re si varau, kam na amāreran ava re laa ga wa, ava māga atol ga luas rui, vena akilia atol sur punu ga naŕa kiamiu sitomena sike ea.
¹² Kam na ve ave yowen re, ve yepemiu malum re, ana monar avesinaia e yuŕaena maran ve taaga sa ke kieta yermarua wo la naŕa amasusun ruru yuŕaena, kiela sitomena la piayavi pano-o atol sur punu ga la naŕa Ntewa pisaar pēsan pan la.

Visaarena kiena ne Ntewa pe lelaga paŕisi

¹³ Navisaarena ta naŕa Ntewa kila, naga kila pa yermarua Epraam, pisaar mārera pania e lepas na lus la naŕa yoko amolue rauria. Pe kia taŕena re si naŕa Ntewa kilia visa vena kila kiena navisaarena nene mārera poli, komin kiena kia naga mon metavan make kia taŕena lala, ana Ntewa pisaar ke sina e ga e kiena kia, sape

¹⁴ *“In na Ntewa, yoko nevisa ruru ko ve keviu vaŕisi, nekila kioŕa luŕ la aim ave moki vaŕisi e yomarava nini.”*

¹⁵ Ana Epraam lavisi sitom pēle visena nene, ana pisu naŕa Ntewa kila kiena navisaarena nene mārera ruru po paŕisi, ana pe sur koren ga naŕa Epraam tol pogos mārera la mok paŕisi, ana pe mligan re navisaarena nene

poli, pŕuarar ruru mā pano-o pisu naŕa siar tol ya naŕa Ntewa pisaar pania.

¹⁶ E lepas na pēlaga naki-laen navisaarena mārera, yar la asumā apisa kia kiena yar wa tai pona sur wa tai. Ana pogos naŕa yar taŕena la aloge, la monar alelaga ea, taŕatete si avisin sinekar vania, komin kia naŕa apisa kila visena mārera.

¹⁷ Ana sanapen Ntewa? Naga mēna sinenan sape kila kiena visena van ita mārera ruruia, vena telelaga ea, ve tesitom pēle re. Ita na sane narina lala na waren kiena lalimana, ana naga sinenan sape tekiliaar ruru tesape kiena sitomena wo naŕa teke e ita taŕatete pŕisi pogos tai, ana kila kiena navisaarena pan ita mārera paŕisi.

¹⁸ Navisaarena kiena ne Ntewa naŕa pan ita mārera ruru sanene rui, komin naga pe pisokan li re poglis tai poli wa, kiena visena taŕatete vilovilopu karea, ana metavan kiena navisaaren nene, pisa si amio kiena kia wa, vena kilaen kiena visena nene mārera nenaga. Ana sur lua nene, kiena navisaarena amio kiena kia, lalua amiyuŕae lele taaga vena kila ita tesuŕal mārera tese kiena visena. Ita topur matan yo viowa naŕa tesu pēs ea, takalewele ke yo na suvanena, ana navisaarena lala kiena ne Ntewa akila kieta sitomena la piayavi ruru po. Sanene yoko tekilia

teva tetol ruru yo wo naḡa Ntewa kila rurua a mligan sike e marata woga ga naḡa.

¹⁹ Kieta nalelagaena māraera nene, naḡa tesape yoko Yesu tamalia ita, naga sitomen ta naḡa sane kilavaru na tararen waa. Yoko uarar ruru kieta malena, vena ve sur re si ta naḡa kilia werelua ita, vano-o tol pogos naḡa teva varaun pupia kulmrae loyuma e Yo Wa naḡa pe Yo Wa paḡisi. E yo nene teva tesumaḡal nena tese marana ne Ntewa, yoko kieta sitomena lala akilia amaraera ruru ke na wa asape woga ga van ita.

²⁰ Naga nene komin naḡa Yesu sumon ita pa e yo wa nene rui, pa kila kiena yumaena sane kieta ḡarin yar wa, vena kila kieta mara wo temio Ntewa.

Sa naḡa tepisa rui, naga sane pe ḡarin yar wa maro na lus kiena ne yermarua yaru wa Malkusteke, ana naga pul plan kieta mlamulen viowa la rui, a yoko kila ma kiena yumaena na sanene vanon ita vano-o taḡatete ḡisi pogos tai.

7

Malkusteke na sumo naga mon la metavan make ḡarin yar wa taḡena lala

¹ ? Ana yermarua Malkusteke nene, naga ai, a kana suniena naga pa sanape? Tus naḡa Nasiarena pisayua, pisape naga pe yar na pogos kiena ne Epraam

nanua sumo, pe ḡarin suḡe na kumali marua wa naḡa Salem, a naga pe pupia yar wa kiena ne Ntewa na mava. Ana pogos tai, yermarua Epraam pa kila mara pa kiena nasinekar lala, naḡa ḡarin suḡe taḡena lala, ana taulu la, ḡasuḡe ke si narui, pitawe Malkusteke kinae patanonia, ana Malkusteke pisa rurua. ² Ana Epraam mla nalaena pania, mlalua lualima petan ponotia na sur make la naḡa taulu e pogos na mara naḡa ḡarar ke sape wasuḡe si va maḡa. Pupia yar wa nene naga pe yar tai, sa naḡa kiena kia ga luwoka apisa. Kiena kia ḡes nena, Malkusteke, kana kinsa pisape “ḡarin suḡe na mesmesu,” a kiena kia na lua pisa sanini, sape “ḡarin suḡe na sumare,” komin naga pe ḡarin suḡe nae pulkumali naḡa Salem, naḡa kana kinasnena na sumare. ³ Yar nene, kana suniena nena pe taḡena ga, komin naḡa pe temloge re apisape kiena yermarua lalua na sanape, pona ma repina lala la ape lus nae pe wa. La pe apisawal re kiena maliena poli asape ma siar sanape, a pe suniena na kiena marena re poli. !Sa naḡa naga pe mare re nena poli, suma ḡuarar ke kiena yumaena na wa! Sanene, naga sa ga narina ga Ntewa narui, naḡa yoko naga ve kieta yar wa ma vano-o taḡatete ḡisi pog tai. ⁴ Komin

sur la nene, tepisu e visena marua kiena ne Ntewa naña kia na Malkusteke, naga pe kia tai naña pa metava pañisi, pano-o tol repita yermarua Epraam, naña asitom ke asape naga mon la metava rui, naga mēna patanonia, p̄ar nawaren pania e komp̄as nen sur la naña taulu e mara.

⁵ Ana p̄elaga na laen nawarena na sanene, naga p̄elaga ta naña navisaluaena pisape le Israel lala la monar akila luen ga. Kiela yar wa lala na lus kiena ne Livae, la monar avisuar ruru la, awarplan lualima petan ponotia e kiela sur make ga van la, komin la na sa ga namratava taaga, naña ape lus kiena ne Epraam. ⁶ Ana Malkusteke nene, naga pe nae re mratava puna ne yermarua Epraam poli, ana Epraam pisu kilalea sape naga yaru wa tai, mliṗere nawarena komp̄as pania. Yermarua Epraam nena naña Ntewa pisaar sur wo la pania, ana naga patanon Malkusteke.

Ana pogos naña Malkusteke tol nalaena nene, kekara, pisa ruru Epraam, a nanene kila meraravan si pan ita sane naga mon manene la metavanja, ⁷ komin yar naña torokin visa ruru yar taṗena, naga monar mon laa metavan yar nene. ⁸ Ana Malkusteke amio yar wa taṗena la nene, la make ga atol kiela nalaen la torok ga, ana la ape taṗenan sur

tai. Suri nene sanene, sape yaru wa lala aṗar kiela, ana siraunia amarmare, ana Malkusteke mla kiena, asape naga sum̄a pano-o pe mare re poli. ⁹ Ana sanaña Malkusteke mon la metavan yermarua Epraam, naga mon mēna metavan pupia kia taṗena naña Livae. Lelaga kemua, Livae naga p̄esan naña pe repina ne lus kiena ne yaru wa lala, ana naga mēna ga molue kome lus kiena ne Epraam, ana pogos naña Epraam patanon Malkusteke, mla nalaena pania, sa ga naña Livae mēna patanon Malkusteke mla nalaena pania. ¹⁰ Suri nene naga sane pogos naña Epraam m̄alivin Malkusteke, kila pania, Livae pe paeme re e repina nene poli wa, ana sa ga naña naga mēna kila.

Yesu pe molue re e lus kiena ne yaru wa la poli, ana molue ga kome lus viu tai

¹¹ Ana visena la ne ma metava apisawal ke pupia sur ta ne pañisi. Akila meraravan asape Ntewa p̄ere plan lus na yaru wa lala kiena ne Livae, pisirilua lus taṗena tai kiena ne yar wa lala, kus lelana. Yermarua Eron mēna pisirlua yuṁaena na lus kiena ne yar wa lala, ana Mosis p̄ar kiena navisaluaena nene pimi m̄alivi, ana visae Ntewa visu sane sur lua nene torokin kila ita temesmes ruru nena temio, vera na ligān sum̄a ga. Ana peraga, naga pilopuia, mligān si

řarin yar wa viu tai pimi mřalivin ita, nařa pe lus kiena ne yermarua tařena nene Malkusteke. ¹² Ana komin Ntewa pisirilua řarin yar wa viu nene, mesmesun mřena nařa visirlua kana navisaluaena viu tai. ¹³ Monar ve sanene, komin e nene naga pisayu kieta Suře, nařa naga mřalivi e lus ta nařa pe la re nena ta suřal se wonta ana kila yuřaena kiena ne yar wa poli. ¹⁴ Lus nařa Yesu mřalivi ea, tekilia tesape naga lus nae Suta, ana pogos nařa Mosis pisawal kia kiena ne lus kiena ne yar wa lala, naga pe pisawal re nena kia nařa Suta poli.

¹⁵ Ana lus na yar wa tařena lala suřa ga, nařa Yesu molue komea, nane lus kiena ne Malkusteke nařa tepisasa ke narui. Sur ne nane kila narui tepisu sane Yesu pe sa re yar wa tařena la poli, ana naga sa nena Malkusteke ne narui. ¹⁶ Tařena la nene, apim ape yar wa komin ga nařa sane ape kana lus na kuruta mal nene, sa nařa navisaluaena marua pisa, ana Yesu pimi pe kieta řarin yar wa e pupia namřareraena na kiena malena nařa tařatete akila karea, nařa sike sike lue narui. ¹⁷ Tekilia tesape naga su lue sanene, komin nařa visena kiena ne Ntewa pisa rui, nařa sape

*“In na nemligan ko sane yer-
marua Malkusteke, ko
ope yar wa maro na*

*kiena lusa, nařa yoko
ouarar yuřaena vano-
o tařatete řisi pogos
tai.” Yauena 110:4*

¹⁸ E nene, pimi merarava ruru pan ita sane Ntewa pilopu kiena mrapa na yuřaena. Mrapa marua naga navisaluaena kiena Mosis na sumo, nařa suřal sukařar pařisi, ana sa nařa kiena namřareraena naga pe torokin re kila sur wo ta yan ita poli. ¹⁹ Naga kila řele yon nařa kila mesmesun ruru ita, ana Ntewa mligan mrapa marua nena sike ga narui, kila si sitomen viu ta pa metava, kus lelena. Mrapa viu nane tekilia telelaga mřarera tesape naga pe mrapa namalena nařa pe lelaga, nařa kilia sumon ita teim lavisin Ntewa.

²⁰ Ana mrapa viu nena, navisaarena kiena ne Ntewa tai kilarar suřalar mřarera su lue na sike ne. Yar wa tařena na sumo lala, poglis nařa apuarar řarila, amiyawawo la vanon kiela yuřaena, pe navisaarena re tai sanene poli. ²¹ Ana pogos nařa Ntewa pisirilua Yesu pimi pe kieta řarin yar wa, kila amio kiena navisaarena mřarera tai. Naga sa nařa visena tai na Tus na Yauena Wa Lala pisa, nařa sape

*“Ntewa pisaar mřarera rui,
ana tařatete si vilopu
kiena visena nene,
visave*

*‘Ko na yoko ouarar
yuřaena sa nařa
řarin yar wa kiena
ne kiau yeririna lala,*

vano-o tařatete ořisin pogos tai.' " Yauena 110:4

22 Ana Yesu řuarar ruru kiena yuřaena nena sanene, pe kile na naviranarena viu kiena ne Ntewa amio ita, nařa po manene la taulu na sumo, a pe nasiaren suri la nařa Ntewa pisaaria pan ita, yoko kila make ruru nena van ita sirau.

23 Nanua sumo na yar wa la moki, komin nařa ta miyuřae pano-o kovio, tařena kus lelana, miyuřae řa pano-o, naga řena kovio, la akilakila sanene. La tařatete asu lue, 24 ana Yesu, naga yoko su lue ga narui, ana yoko naga taaga ga uarar kiena yuřaena sa nařa kieta řarin yaru wa vano-o tařatete řisi pog tai. 25 Sanene, naga sike ga e marana ne Ntewa silaga, mlen lue ga pania vanon ita, ana kila sane ita nanagane, pona ita la nařa tepim ke rau wa, ana naga ke narui nařa yoko tamalia make ruru ita punu ga nařa teva tokom puna teim lavisin Ntewa.

Yesu na pe řarin yaru wa nena napo

26 Tekekara pařisi nařa Ntewa pisu sane popon ligan řarin yaru wa ta nařa po manene sanene imin ita. Naga pe yar ta nařa pe yaru wa pařisi, pe napiowaena ta to re nena ea řisa, merarava pařisi, kiena řelaga

pe sa re nena yar na ki-laen mlamulen viowa la poli, kiena kia pa manene laa to metavan punu ga sur nae peni. 27 Yar wa tařena la nene, la monar akila luen ga kuřařaena na ikikena legiena punu ga. Sumo, monar akila vanon si kiela mlamulena viowa lala, a sir-aunia, akilia akila vanon mlamulena viowa kiena ne yeririna tařena lala, ana Yesu na pe sa re nene poli. Naga kila kuřařaena na ikikinen mlamulena viowa na yomarava wetelu yam taaga, nanene e pogos nařa kuřařain si tasnena vanon ita.

28 Lelaga kemua nařa navisaluena marua pimi sumo, ana kiena řarin yar wa pe yar ga, malum ga, ana naviranarena viu nařa pimi marea, kiena řarin yar wa naga mesmes lue ga, nane Yesu narina ne Ntewa.

8

Naviranarena viu: yuřaena kiena ne kiena řarin yar wa naga po manene la

1 Ana vianen la nařa meta ne apisa sur mok liu e lepas na řarin yaru wa lala. Ana pupia purřes nen visena tai suřa ga, nařa popon tesitom urmi ea, nařa pisa sape kieta řarin yaru wa wo tanea ta sike rui. Naga Yesu, nařa řasuře si pa ma e peni, ana Yerkawa Keviu na Yo na Ma Metava mligan naga totano teke e lepas nena na řamarua. 2 Naga

sike e yo nene, kila ke kiena yuñāena wa lala, sa naña yaru wa la nanua sumo akila lotena e yuñā kanus wa naña e yo mema. Ana len kilaen lotena nene, yarga la amiyuñāenia, ana kieta p̄arin yaru wa Yesu naga miyuñāe ke loyuñā e yo na lotena naña po, pe lelaga ruruia, naña Ntewa ga miyuñāenia. ³ A p̄arin yaru wa tañena la nene, kiela yuñāena, silaga apisir plan la vena waren nalaena va Ntewa, a akila kuñāpaena la pania, ana popon teviun tevisave kieta p̄arin yaru wa nene, pona naga mēna mla nalaena pa Ntewa, a kila kuñāpaena pania? ⁴ Visae e ga e yomarava nini, yoko tañatete avisu naga sane yaru wa tai, komin naga pe molue re kome lus kiena ne Livae poli, naña navisaluaena pisalua pan la sape lala ga akilia awar nalaena va Ntewa. Sanene, kieta p̄arin yaru wa nene sumā miyuñāe ke ga e yo wa na ma e peni.

⁵ Yo wa na yomarava nini, amio yuñāena la naña akila ea, naga sa ga kana yanen ga, ana naga naña ma e peni, naga napo nena ga lelaga. Ntewa mēna pisa sa ke ga, pisa kilale pa Mosis, ve sanape naña yoko yuñāen yuñā kanus wa, pisape yoko yuñāen taveve kaña nono nena torokin naña naga pisuia poglis naña pa ma e tavie. ⁶ Ana sanene tepisu naña Yesu

kieta p̄arin yaru wa pe lelaga napo, a kiena yuñāena punuga powo la sane. Naga totano likan ita temio Ntewa, miyuñāen naviranarena viu tai van ita temio naga po manene la sane, naña sike e navisaarena lala kiena ne Ntewa naña po laa sane, pano-o tepisu naña sike ma e yo wa na peni kila yuñāena po manene laa sane. ⁷ Visae naviranarena p̄es nene naga woga ga rui, vera na tañatete si nalua nena, ana peraga, kila narui nanagane Ntewa pisirlua naviranarena viu amio ita naña po manene rui.

Naviranarena viu: Ntewa pisaar nanua rui

⁸ Naviranarena naña na sumo, Ntewa pisu sane pe miyuñāe po re poli, pe torokin re kiena sitomen poli wa, ana kila naga pisaar sina na urviu tai. Naga pisawal sanene e visena ta naña mla pa Navisawalena Seremāea vena visawalia. E visena nena, Ntewa pisaar sanini, sape

“Ayagogo ruruia. Sineun ne-sape nevisa van amiu nevisave pogos ta pimi ke ne, naña yoko nekila naviranarena viu tai nemio amiu kiau yeririna lala, kam na lus kiena ne Suta amio lus nae Israel.

⁹ *Yoko naviranarena nena ve maran taaga re amio naña nekila nemio kiamiu yermarua la nanua sumo ne. Naviranarena na urmarua*

nene, naga e pogos
naña sineu mie la,
nořere plan la e pogos
mãrera gar Isip, ana
siraunia, pe asitoĩal
re si naviranarena
nene poli, pe amlogear
re si poli, kila narui in
mĩena nepilopu mĩasuu
pan la.

10 Ana nanagane, yoko
nevisirilua si navi-
ranarena viu tai nemio
si kiamiu lus lala. E
naviranarena nene,
yoko nekila sanini:

Yoko neligan ruru kiau
navisaluaena lala sike
e kiela sitomena lala,
yoko nesiri kiau visena
la sike e losinela lala,
yoko neim neve kiela
Ntewa kemua lelaga,
a yoko aim ave kiau
řegas nen yeririna.

11 E pogos nene, tařatete
si akilali naña avian
la, sane ta kilali naña
pisawal van nalavis
puna, visave 'Ke,
mrapa nanene,' pona
ta pisawal va wenla,
visave 'Ntewa, naga
sanene sanene.'

Peraga, yoko tařatete si ak-
ila ve sanene, komin
yoko la punu ga veve
taaga avisu kilale inu
e kiela malena, siar e
la naña pe kiela kia re
poli, vano-o tol kiela
yerkawa ne lala.

12 Nepisaar nesape kiela na-
piowaena lala, yoko
nevewo nena ga, a
kiela mlamulen viowa

lala, yoko ve nesitoĩal
re si na rui.

Nane kiau naviranarena viu
ne nanene narui ne-
mio kiau yeririna lala."
Ser 31:31-34

13 Ana e kiena visena nene,
Ntewa pisayu naviranarena
viu nene, kila ita tepisu ki-
lale sane naga pisu ke kiena
naviranarena na sumo nene
sane pe urmarua rui. A
sitomena ta sumã ga sane
sur naña Ntewa pisa ne sape
pe urmarua rui, nagane pito
la tano narui, ve ve viavi re
yoko kovio make nenaga.

9

Naviranarena viu: kiena
lele na lotuena naga po
manene la

¹ Ana tekilia ruru po naña
sane naviranarena marua,
naga kana mrapa lala na ki-
laen lotena asumã ga, amio
mĩena kiena lele na kilaen
lotena tai, naña sike ga
yomarava nini. ² Lele na ki-
laen lotena nene, naga kana
yumã kanus wa nena, naña
ařere pupia kulmrae ea, ak-
ila řerea sane loyumã lua.
Lepas tai, naña apio asape Yo
Wa, purřes nen kapi vivaga
tai naña kana koruas olua
sike ea, amio varvara tai
na kilaparavi lualima yam
taaga pa lua, naña apio kila-
paravi na vianen van Ntewa.

³ A varaun kulmrae nene,
lepas řas na vano, naga
apio asape Yo Wa naña pe
Yo Wa pařisi. ⁴ Loyumã e
yo nena, naga kana wonta
na ponotaninu nena naña
amiyumãen e kol, amio pias

nen navisaluaena. Pias nene amiyuṁaen kana kulusa e kol, yepas na loyuṁa a vanua, naṁa e kana loyuṁa nena, amligan ruru sur telu sike ea. Nasumo, naga pialora naṁa pe kol, naṁa kinakinasnen kinanena na yo mema naṁa asape ṁana teke ea, a sur na lua, naga plasgai kiena ne yermarua Aron naṁa nanua na pitovi, a sur na maro, naga kilavaru lua naṁa pe lepalepasa naṁa Ntewa siri kiena navisaluaena sike e la. ⁵ A e wos nen pias nen navisaluaena nene, naga pe keplamarana, naṁa asape lele na totanoena na sineyeena kiena ne Ntewa. A nono lua na navisi asumal asike meta ea, naṁa akian kupela suvivi yo naṁa naurarena kiena ne Ntewa pitom ke tano ea. Ana yo wa na lotena naviranarena marua naga kana sur ne la powo paṁisi, ana taṁatete si tevisa sur ve moki e lepasnela. Ana sur na visaena taaga, tesape yo na lotena nena, amio kana sur ne lala, naga amiyuṁaen ga e sur na yomarava la nini, taṁatete nena sike sike lue, naga pe po re sane yo na lotena na naviranarena viu poli.

Naviranarena viu: kana nakuṁaṁaena nena naga po manene la

⁶ Sur la ne sike meta ne, nane sur ke la nene narui naṁa amligan ruru sike loyuṁa e yuṁa kanus wa na sumo nanua ne, ana poglis naṁa yar wa la apa loyuṁa, amiyuṁae amio la.

Ana silaga, apava ke e ga e yo wa naṁa mon ṁesa, ⁷ ana e yo wa na lua naṁa pe yo wa manenea, yar wa lala pe apa li re nena loyuṁa e poli. Yo nene yar taaga kilia va loyuṁa ea, nane kiela ṁarin yar wa, a naga pe pa re silaga poli, kilia va ea yam ve taaga ga e kasa. A visae pogos naṁa vavini, taṁatete va koren ga sanene, ana monar taveve kana mrapa ne lala.

Sumon naṁa vavini, monar kila kuṁaṁaena e sur mal tai, ana monar war piasnen kana kuruta nena va loyuṁa sane nalaena tai, nanene na e lepas nen kiena mlamulen viowa amio kiena ne yeririna lala. ⁸ Ana pogos naṁa akila ke sanene, naga sane pe kile na Ninuna Wa naṁa kila meraravan pan ita sape pog naṁa visae yuṁa kanus nene susu ṁa ke ga wa, vera na ita yar kar la pe kieta mrapa re nena ta poli naṁa teva toworu e yo naṁa Ntewa sike ea.

⁹ Kanus na yuṁa wa naṁani, amio kana kulmrae nena naṁa telan liṁere loyuṁa, a kana sur ne lala, la na ape sur na konua na ṁa rui, ana apisa ke pupia sur ta ne pan ita na nagane ne. Akila narui tesuṁa tepisu kilale tesape nalaena la naṁa yaru wa lala amlavia pan Ntewa, amio kuṁaṁaena la naṁa akila ke ne, akila poga ga, ana sur la nene taṁatete kilia kila yeririna la aloge sane kiela sitomena la mekiki ruru nenaga e

navisuena kiena ne Ntewa.
¹⁰ Akila sur la nene, amio ya la naña narin navisaluaena la apisa, naga nene e lepas na mrapa na yuñanen kinanena amio namunena, a e ñelaga na kevanen sur lala. Ana sur la nene ape na yepas nen yar ga na vñua, ana pe atol re losinena pona kiena sitomena poli. Kieta yermarua la apuarar ña ñelaga marua na sanene pano-o, ana sur la nene na ve nauarar laen ga vano-o tol pogos naña Ntewa kila kieta mrapa viu, naña kana naviranarena viu nena naña pimi ñaliv rui.

Tana ne Kristo kevan ita mekiki rui

¹¹ Ana pogos naña Kristo pimi ñalivi, naga pimi sane kieta ñarin yaru wa, naña pe na ñelaga marua re poli, ana pe na mrapa viu, vena kila narui tekilia tetol navisaruruena wa la naña Ntewa mligan ruru sike na. Naga pe pa miyuñae re e yuñ wa kanus marua na sumo poli, miyuñae e ta naña po manene la pañisi, pa la metavan nene. Yo wa naña kila ke yuñae ea, pe yar re miyuñae e limana po, a pe su re ñena e yomarava nini poli, sike nena e yo merarava e marana ne Ntewa nae peni. ¹² Ana pogos naña Kristo pa loyuñae e yo wa nene, naga pano pano-o tol nena kana yo wa naña pe yo wa nena napo, aña pa yam taaga ga, pe navaen re si pogos tañena poli. A

pogos naña pa loyuñae, kuruta naña naga ñaria pe pe kuruta na nane re poli pona kuruta na narin puluk, ana kana kuruta nena napo naña mlau e lak torovia. Ana kurutana sike e marana ne Ntewa sanene, taulu naul luaen kieta mlamulen viowa la, naña tapatete pis pog tai. ¹³ Monar ve sanene, komin naña e ñelaga marua, visae yar tai kila sur ta viowa, amla narin kuruta na nane pona puluk, amio posnoyavi na narin puluk naña askapia, amla pa e yo wa. Ana e pogos nene asitom asape nalaena na sanene kilia kila yar nene ikiki si e marana ne Ntewa. ¹⁴ Ana visae kuruta na sur mal ga la akila sanene, yoko kuruta kana Kristo naga kilia kila va ve keviu laa sane. Kristo pe yaru wa tai, naga mekiki ruru nena ga, pe kororaki ta to re e poli, ana naga tañan kiena malena vena Ninuna Wa la va Ntewa sane nalaena tai, ana naga pim pe kieta nataliaena. Sanene, yoko kuruta kana Kristo kilia kila sineta la ikiki, kilia wereplan ita vetan kieta yuñae na marena lala, pisir plan ita vena tekila yuñae lala kiena ne Ntewa mali.

Tana ne Kristo kila naviranarena viu sumalu marera

¹⁵ Ana komin naña Yesu kila yuñae wo pan ita sanene, tekilia tevisu naga, sane naga pe yar na waren sur wo lala na viranarena viu imi ñalivi e ita. Nanene naga

miyumaen e kiena marena, naña sane marena ta naña pul plan make maliena kiena ne yeririna lala naña akilaro navisaluaena lala na viranarena nasumo. Ana komin naña naga pul plan ita sanene, kila sane visae ita a naña Ntewa vio ita, tekilia tetol kieta lalimana naña yoko tařatete řis pogos tai. ¹⁶ Visae Yesu ve mare re, tařatete tetol kiena lalimana la nene, ana sa naña sane mare kemua lelaga, navisaarena make ga naña na naviranarena nena apim sane visena maro kiena Yesu, ana sur make ga pimi e limata. ¹⁷ Komin naña visae yar tai visaar maron sur tai sa naña kiena visena maro, ana pogos naña naga mal ke ga wa, apuarar ruru kiena visaarena nene suna ga, ana pe amiyumaen re poli suna pano-o tol pogos naña visae naga mare narui, yoko ayumaen ga na wa. ¹⁸ Sa ke mēna naviranarena naña Ntewa kila řesania, naña visae kuruta na kuřařaena lau, ana visena naviranarena sumalu.

¹⁹ Sur nene Mosis mēna kila, naña Ntewa kian kiena navisaluaena la pania ma e tavie, ana pitomi tano pisawal make kana visena ne lala pa yeririna lala, ana pogos naña pisawal make pae, mēmomar nakuřařaena ne lala, vena kila sa naña visena navisaluaena nena amali, a asumalu. Ane momar narin puluk lala a nane la nařani

ana naga mla kala narin kuruta ne lala, taron narin wii pito amio, ana mla narin laki tai, apio asape isop, piar vilus nen sipsip naña pivaga pa ea, ana puton pito e kuruta nařani, peven ve tokak ga e tus navisaluaena nena, a peven mēna e yeririna lala, pisawal pan la, sape

²⁰ “Naga nene kuruta na sur mare naña vena ki-laen navisaluaena kiena ne Ntewa mali. Ana monar tewatanonia a telogearia.”

²¹ A sa naña peven kuruta nene e la, ana peven mēna ve torokaki e yuma tapolen nene, amio sur la naña asike loyuma ea, naña asumā akila ke kiela lotena amio la.

²² Mrapa na yumaena la naña na navisaluaena marua nene la sa ke nene narui, naña lavis sur make ga naña amiyumaen ke amio la, monar aveven kuruta ea vena akila aim ave sur wa silaga. Naga nene sane kila meraravan pupia sur ta ne pařisi van ita, sane visae kuruta ve lau re, mlamulen viowa tařatete aviewoia.

Naviranarena viu: kana kuřařaena řar plan make ga mlamulena viowa lala na yomerava

²³ Sanene, sur la naña li wa la amiyumaen ke ea, monar akila mekik lue ga taveve kana narin řelaga ne lala. Ana yuma wa kanus nena, amio kana sur ne lala, la ape sur na yomara-ava ga nini, ana sanapen yo wa naña na lelaga, naña

nane Ntewa teke ea ma e peni? ?Naga mēna monar kana kuḡaḡaena na viewoen tai? Ee sanene, naga mēna monar kuruta lau vena kila make kana sur ne la ve sur wa, amio mēna yeririna la naḡa apa ke ea. Ana kuḡaḡaena na yo wa nae ma e peni, naga pe sa re kuḡaḡaena na sur mal la naḡa akila ke e yo wa na yomarava nini poli, naga pe kuḡaḡaena tai naḡa keviu manene la, a po lue ga. ²⁴ A kuruta na kuḡaḡaena nene sike e marana ne Ntewa rui, komin kieta ḡarin yaru wa Kristo ḡar pa loyuma e yo wa rui, naḡa pe yo wa re ga naḡa yar la amiyumaen poli, ana yo wa nene yo wa lelaga napo, nane ma e peni. ²⁵ A pogos naḡa kila kiena kuḡaḡaena nena, naga pe sa re naḡa ḡarin yaru taḡena wa la akila ke poli. La akuḡaḡain ga kuruta na sur mal lala, ana naga kuḡaḡain ke si na kana kuruta. A silaga apa akila e kana yo wa nena yam taaga e kasa punu ga, la akila luen ga sanene pa ke ne, ana naga kila yam taaga nena ga, pe nakilaen re si pogos tai poli. ²⁶ Visae Yesu monar kila luen ga kiena kuḡaḡaena nene vanon mlamulen viowa la naḡa yeririna la asuma akila lue ga pa ke na, kana kinasane siar e nasijena na yomarava nini pimi tol nanagane, naga tamalele ga meke e lak torovia mloge piowagan naḡa kana kuruta mlau lue silaga.

Ana e naliganaren naḡa Ntewa pisir lua naga pe sa re nene poli. Naga pisu naḡa luas nen pog naḡa tesike e nanagane pimi ke lavis narui, ana kila Yesu pimi paemen ita mare ga na wa. Naga pimi malivin ita, kuḡaḡain make nena kiena malena, mēne plan ḡelaga na mlamulen viowa.

²⁷ E lepas naḡa ita yeririna lala, Ntewa kila sape temal e yomarava nini, ana yoko tokovio ea ḡisi na temal sina vena teva e nalipereena, ²⁸ a e lepas kiena ne Kristo, naga mēna sa ke ga. Naga pimi malivi e yomarava nini, siraunia kuḡaḡain naga ve na waren kieta nakoena na mlamulen viowa lala, ana yoko naga imi maliv si yam ta ne, pe na ulen re si mlamulen viowa poli, ana ve na wereplan ita vetan nakoena na kieta mlamulen viowa. Sanene, ita toḡasine ke ga naga, tesape monar naga imi tamalia ita.

10

Nakuḡaḡaena kiena ne Yesu naga po la sane

¹ Tesitomyu li si navisaluaena marua kiena ne Mosis. Naga pisa ma sur wo laḡasa, ana pe pisawal make re navisaruruen wo naḡa Ntewa sinenan sape Kristo kila imi malivin ita poli, kila sane navisaluaena nene sane pe kulus ga, ana pe kana kinas re napo poli. Navisaluaena marua nena, naga

sumã kila ke ga kana kinakinanas la sanene, kana kinas nene sane kiena kuþaþaena la naþa akila silaga, maran taaga ga e kas punu ga, pe atorokin re poli, taþatete akilavan make la naþa akila ke lotena amio. ² Visae peraga, vera na la naþa akila lotena sanene, aim amekiki ruru make wo þisi, ve aloge re si sane mlamulen viowa sike e la, ve asitom re si kilaen kuþaþaena, ana peraga, akila ke sina ga sanene silaga. ³ Kuþaþaena lala, popon naþa kila naþa aninu sane pe kiela mlamulen viowa re si poli, ana peraga rui, e kas make ga apisu sane kuþaþaena la nene akila sane asitomãl si kiela napiowaena lala, ana amloge sane kororak na kiela mlamulen viowa sike e la wa pano-o pimi piowa manene la. ⁴ La amninu ke sanene komin naþa kiela sitomena ta sike na, naþa asape kuruta na purwolu puluku pona kuruta na nane kilia yumu plan kiela mlamulen viowa sanape ne? Sur nene, asitom þele paþisi, pano-o apisu sane peraga, aþi þele yonia, kiela mlamulena viowa su ña ga.

⁵ Ana komin sur ne la nanene, pogos naþa Kristo pitomi ñalivin ita e yomarava nini, naga pisawal kiena mrapa viu narui. Naga mla visena tai naþa teke e tus na Yauen wa lala, pisa pa Ntewa Arimana, sape

“Ko na pe sinomãan re si

kuþaþaena lala amio nalaena lala poli, ana okila ruru tasneu naþa yoko netamãan van ko.

⁶ *Sur la naþa asikap lele ke ne, opisu apiowa ga, a nalaena la nakilaena mlamulen viowa ikiki, pe sinomãan re nena ga.*

⁷ *Ana siraunia, nesumãalu nepisawal ruru pan ko, nesape*

‘Ntewa in na nekekaranga nekila ya naþa ko sinomãania,

sur ne nanene in na nepitominia, sa ga naþa Tus Marua sape yoko nekila.’” Yauena 40:6-8

⁸ Ana popon tevisu ruru visena naþa Kristo pisa ne. Sur þes naþa pisa, pisa ke kuþaþaena lala amio nalaena taþena la naþa asumã akilakila ke ne, pe sur korena ga naþa navisaluaena sape monar akila, ana Ntewa pe mloge re nena pon la, a pe sinenan re si sape akila poli. ⁹ Siraunia, sur na lua naþa Kristo pisa, naga sape tamãan naga narui, vena imi kila nasinenanena kiena ne Ntewa.

E nene, tepisu mrapa na sumo na kilaen kuþaþaena komin mlamulen viowa lala, Ntewa koven lua nena ga, ana kom ga e kiena mrapa na lua. ¹⁰ E mrapa viu ke nanene narui, Yesu Kristo kila sa naþa nasinenanena kiena ne Ntewa pisa, tamãan make tasnena wetelu, nane kila narui tepim temekiki a

tepe wa e marana ne Ntewa, sike sanene sulue narui.

Kuṣaṣaena kiena ne Yesu naga sulue na sike ne

¹¹ Yar wa la naṣa asuṃa amiyuṃae ke e ṣelaga marua, monar la ṣas naṣa e legiena make ga asike e Yo Wa. La asuṃa akila ke narin kuṣaṣaena la silaga, naṣa akila lue ga maran taaga silaga. Kuṣaṣaena la nene akila ke ne komin mlamulen viowa la naṣa yeririna la akilakila ke na, ana pe atorokin re nena naṣa akilia awar plan ṣelaga na mlamulen viowa petan malena ken yar la poli.

¹² Ana kieta ṣarin yaru wa naṣa Yesu, kiena kuṣaṣaena na pe sa re nene poli. Naga kuṣaṣain sur taaga ga panon mlamulen viowa make ga, a kila yam taaga ga, ana pogos naṣa naga kila pae, pa teke metava e yepas nena Ntewa na ṣamarua. ¹³ Ntewa pisu Yesu kila ṃa sanene, na pisawal pisape yoko war nasinekar kiena Yesu lala, ligana la asike vatanonia sane takue tai naṣa yoko vilavan lana ea. ¹⁴ Pe yuṃaena taṣena re si ta naṣa yoko Yesu monar kila sanene poli, komin naga mla nalaen ṣisi rui, naṣa kana kuruta kila ita temekiki, nanagane tepo rui e marana ne Ntewa, tesu ruru tesu ṃa sanene vano-o taṣatete ṣisi. ¹⁵ Ninuna Wa ṃena miakol visena pan ita e lele nene, e visena ta pimi kome Navisawalena

Seremṃaea. E visena nena, Ntewa pisa sanini sape

¹⁶ *“Ana nanagane, yoko nevisirlua si naviranarena viu tai nemio kiau yeririna lala. Ser 31:33*

E naviranarena nena, yoko nekila sanini: neligan ruru kiau navisaluaena lala sike e kiela sitomena, nesiriari kiau visena lala sike e losinela.”

¹⁷ Ntewa pisa pa sanene ana sukol si pa la sane, pisa sanini sape

“Yoko kiela mlamulena viowa lala amio kiela napiowaena lala, taṣatete si nesitoṃalia.” Ser 31:34

¹⁸ Visena nene pisawal ke pupia naviewoena naṣa Ntewa kila pan ita rui, ana visae ve sa kemua nene, pe nalaen taṣena re si ta naṣa tekilia telavia komin naviewoen kieta mlamulen viowa lala pona kieta napiowaena lala, komin naṣa Ntewa kila ruru ṣisi rui.

Ve temaraun re va lavisenen Ntewa

¹⁹ Wolai a vineu lala, sa nena naṣa visena la nene apisa narui, kuruta kana Yesu pike mratavan ita rui, ana pe pon re si temarau poli, popon tokom ea teva loyumuṃa e Yo Wa naṣa Ntewa sike ea. ²⁰ Sumo na pupia kulmrae nene telan mono kieta mrapa, ana pogos naṣa tasnena ne Yesu porovia, kulmrae ṃena nene purṣa lepas lua, pietavan kieta

mrapa na vaen loyuma. Nanagane tesike e mrapa wo ne narui, naña pe mrapa viu tai, a pe mrapa na vanonen malena.

²¹ Ana Yesu kila kieta mrapa navaen loyuma e Yo Wa sanene, naga pimi pe kieta pupia yar wa, naña naga pisuar make ita ga la naña na mratava puna ne Ntewa.

²² Kana kuruta war plan kieta kororak napiowaena la naña sike loyuman ita, kiena wii merarava kevan tasneta imi mekiki nena ga, ana ve temawa re sina, a tekilia teva loyuma. Tekilia teva lavisin Ntewa naña sineta la ve lelaga, teviawa manene marera e naga tesape yoko ve koven lua ita re, yoko naga worworun ita ga.

²³ Tekilia telelaga ruru tevisave yoko Ntewa kila wo ve sanene van ita, komin naña silaga, naga sumã kila nena taveve ya naña naga pisaaria. Ve tesitom pele re sina, ana touarar ruru yumaena wo navisawalen va yar taña lala sur tanea naña naga kila pan ita.

²⁴ Ana e ke sina ga e lepas na pun ita, popon tesitom ruruia, telual mrapa na yuren kieta sitomena lala vena sineta si manene ita la sane, a vena tekilakila ruru yumaena wo la van ita va laa sane. ²⁵ Pe pon re teligan pelaga na viranar ruru itaen poli, sa naña yar lañas akila ke rui, ana popon teilaar ita silaga. Pelaga wo la nene, monar tekila lue ga van ita, a

visae tevisu pogos marera na legiena maro la asike lavisi narui, popon towo lue ga van ita sanene va ma ga.

Ve tesitom korenan re nalipereena kiena ne Ntewa

²⁶ Popon teviun naviunena e lepas na pan ita naña tetol nakiliaen la e visena lelaga rui. Teviunia tesape visae ve tevisuar ruru ita re, sane tesumalun naña tekila ruru ke mlamulena viowa, yoko ve sanapen ita narui? Navisatameena nena, sanini, mlamulen viowa la ne sanene, pe kana kuþaþaena re si tai naña yoko war plan poli. ²⁷ Ya ga naña sike pa rui, nane navisaarena kiena ne Ntewa nalaen nakoena marera vanonia, amio pupia lelen kapi naña yoko kekan make nena kiena nasinekar lala. Nanene naga pe sur tai naña monar temaraun vaþisi.

²⁸ E navisaluaena marua kiena ne Mosis nanua sumo, visae yar tai kilaro kana visena ne tai, a visae yar ve lua pona ve telu avisave lelaga kemua, pe mrapa na sineyeena re si poli, yar nene yoko akilalua kiena malena veraga. ²⁹ Visae

akila ve sanene va yar naña kilaro navisaluaena kiena ne Mosis, ana yoko ve sanapen yar naña pilon ke si masina pa Narina ne Ntewa? Yoko naga kiena nakoena ve keviu manene laa na wa, komin naña naga þarnena kare kuruta naña naviranarena viu naña kila naga mekik

rui e marana ne Ntewa. Yoko Ninuna na lemamiena loge viowagan ðelaga nene vaþisi, sinen kar li yar naþa kila na wa. ³⁰ Yoko monar war nakoarena nena, komin Ntewa pisaar sanene þa rui. Kiena Visena Wa tai sike e Tus na Visaluaena, naþa pisa sanini, sape

“Naliþeren mlamulen viowa, naga kiau in ga taaga.

Yoko nelamaran si van la m̄arera na m̄arera vanon kiela naviowaena lala.”
Nav 32:35 A e ke e lele nene na wa, visena taþena pisa ke m̄ena ga sanini, sape

“Yoko Ntewa na mava liþere kiena yeririna lala.”
Nav 32:36

³¹ Monar tevisuar ruruia, komin yar naþa kila mlamulen viowa, pogos naþa aligan naga e limana ne Ntewa vena visu vevea, nanene na pe narin sur re nene poli, naga pe sur namarauen ke nene narui.

Viawaena m̄arera navi-suen sur naþa yoko imi m̄aliv na wa

³² Teminue kare narui aña yoko ve sanapen legiena la ne pimi ke ne wa, ana popon tesitoñal luen ga mrapa wo la naþa Ntewa miila ita ea, e legiena la naþa þaro pa rui. Nanua pogos na tepim toñaliv e yomerarava, pe piavi re nena poli, tepane pogos m̄arera la paþisi, naþa akila piowa manene la pan ita naþa temlelaga ke e Yesu. ³³ Pogos la þasa, e ga e maran

yar lala, akoven visena viowa la pan ita, a pogos taþena laþasa, akilapel ita ga e ðelaga viowa la naþa piowa na piowa manene la. Pogos laþasa, pe akila re pan ita poli ana akila pa kieta erau taþena lala, ana tepa tesuñal tesu temio la, temiila la.

³⁴ Ita laþasa, akoven la apa e yuña nakoarena, ana sineta miye la paþisi, tepanon teki-lali naþa teiila la vena towar plan re kiela pupia naloge viowaen naþa apisu e yo nene. A pog taþena si laþasa, la naþa sinela kar ita apimin kieta sur lala, aþar plan kare petan ita naþa tekilalu manene la sur lala. Ana e pogos nene, pe sineta kar la re poli, tetam̄an ga, komin naþa nasinekekaren tai sike e ita, sane sur la naþa aþar plan pavano lala ape na yomarava ga nini, ana kieta sur nowo la naþa apowo manenea asike ga wa, naþa taþatete akovio pog tai, yoko ave kieta lue narui. ³⁵ Nane kieta pupia naulua itaena nane nanene narui, naþa yoko Ntewa la van ita, ana komin naþa nalaena tanea nene sike e marata, pe pon re si tekilapal nakiliaaren m̄arera naþa sike e ita poli, ³⁶ ana monar tesuñal ruru nena m̄arera tese Ntewa. Kieta sitomena la monar ve pi-avi ruruia vena tesuña tekila ga kiena nasinenanena ne lala, ana tekilia tetol sur la naþa naga pisaar pan ita. ³⁷ A pog na tolena,

pona ve ve piavi re yo, yoko imi mālivin ita, sa naña visena kiena ne Ntewa tai naña navisawalena Aḗakuk pisawalia, sape

“Yam ve plas la sina, ve ve piavi manene re, ana yerkawa naña yoko imi ne, naga taḗatete si su laa sane, yoko imi mālivi nenaga.

³⁸ *E pogos nene, kiau yar mesmes lala, yoko amal ruru nenaga, komin naña amlelaga e inu,*

ana visae nevisu lala yar tai yepen mavin inu, weresu si naga, yoko taḗatete nena nekekarania-a ḗisa.”
Aḗa 2:3-4

³⁹ Ana pe ita re nene poli. In na pe nesitom re nesape ita yar sur la ne sanene yoko temaraun Ntewa poli. La naña aḗeresula sanene, yoko monar ava akovio ga narui, ana ita naviawaen mārera ea, monar tetol malena.

11

?Naviawaena naga ya ne?

¹ Kieta viawaena nena, yoko tevisave naga sur ya na sanene? Tekilia tevisave naga pe ḗelaga na wasine ruruen Ntewa mārera, naña kilia kila kieta sitomena kapuru ruru wo e ga e naga, a kilia kila kieta lelagaena mārera, tesape sur la naña pe tepisu re poli, ana pe lelaga naña asumā ga.

² Viawaena naga pe pupia

sur tai paḗisi e navisuena kiena ne Ntewa. Siar e repita nasumo lala pimi, mrapa taaga nena nanene naña Ntewa kila sane kilia kekaran yaru. ³ Pelaga

naviawaena ne nanene narui kila ita tepisu kilale sane pe lelaga kemua, visena kiena ne Ntewa ga sii make suria, kila kieta yomarava nini pimi mālivi. Kiena māreraena ne nane mla sur la naña yar taḗatete visuia, miyuḗaen make sur la naña tepisu sike ea. ⁴ Popon tesitomyu si repita na sumo laḗasa, sanape naña la mēna apiawa e Ntewa nakonua.

Ta naña naga yermarua Epol. E kiena naviawaena e Ntewa, naga mlotun e nalaena ta naña mesmes paḗisi, ana Ntewa kekarania, naga pisu po manenea taulu nalaena naña wenla naña Ken sinenan sape lavia. Ana Ken sinen mimi, mēmār wenla nena, ana ḗelaga wo naviawaena kiena ne Epol e Ntewa kila Ntewa pisu sane naga pe yar mesmes tai, a suri nene kilia iila ita ke vim tol nagane na wa.

⁵ Taḗena sina, nane yermarua Inok. E kiena naviawaena e Ntewa, naga pe tol re marena poli. Naga pe yermarua, ana Ntewa ga pitomi ḗerelua naga, kovio e yomarava nini pa metava, ana akale pano-o pe aḗal re poli. Ntewa kila sanene pania komin pogos naña sike e yomarava nini, naga pe

yar tanea tai naþa Ntewa kekaran paþisi.

⁶ Lelaga paþisi, visae navi-awaen e Ntewa ve su re e ita, taþatete tekila naþa yoko Ntewa kekaran ita. Yar a naþa sinenan sape kilia Ntewa e kiena malena, sinenan sape imi lavisinia, naga monar viawa manene sanini. Naga monar lelaga sane pe lelaga kemua paþisi, Ntewa suña ga, a monar wasinea sane yoko Ntewa kila wo vaþisi va la naþa akale ke naga.

⁷ Yermarua si tai naga Noa. E kiena naviawaena e Ntewa, naga kila ya naþa pisa pania. Ntewa pisawal pupia womie nene pania, ana pogos naþa Noa pe pisu re nena kana kile ta poli wa, ana kila ga ya naþa Ntewa pisa pania, kila kiela pupia waa nena vena namratava puna lala akilia amal ea.

Naviawaena kiena ne Noa nene e Ntewa tamalia la nene, kila mēna pupia nakoena pimi mālavin make yar taþena lala e yomarava, komin naþa pe amlalaga re poli. Ana Noa naga pe na þegas kiena ne nalelagaena lala tai e Ntewa, ana Ntewa kila amesmes e marana.

⁸ Taþena si tai, naga yermarua Epraam. E kiena viawaena e Ntewa, naga mlogear ruru paþisi, molue petan yo naþa sike ea, pa e yo taþena tai, naþa Ntewa pisaar sape tañan vania. Naga mialin ke sape va ea, mninue kare sape aña kope

ke na wa, ana komin naþa Ntewa pio, naga pa ga narui.

⁹ Naga mial mña pano-o, pogos naþa pa mālivi ea, sa ga wolawa ga tai, ana purvanua ke naþa Ntewa pisaar pan narui. Ana þere yuñā tapolen mēne yo nena, sike e nene amio na mratava puna lala, sa naþa narina lala, naþa Aisak lala amio mapina lala naþa Sekop lala, naþa la mēna akus porotano nene naþa Ntewa tañan pan la ve kiela lue. ¹⁰ Ana Epraam tol yo nene, sike ea, ana pe kila re pupia mña yuñā ta poli, mēke ga e yuñā tapolen la naþane. Naga nene komin naga kiliar ruru po paþisi sape pe mña uña re napo nene poli wa, ana naga sukoko ga e nene na wa, vena yoko va e pupia pulkumali kiena ne Ntewa, naþa Ntewa pisirlua a miyuñāen amio kana þeren mārera naþa taþatete si wororowa pogos tai.

¹¹ Ta sina, naga sira marua Sera. E kiena naviawaena e Ntewa, naga mēþenan þesan narina naþa Aisak. Nakonua nena, pe þarli re sisi poli wa pano-o pimi pe sira marua, ana suñal mārera sike e naþa sape yoko navisaarena kiena ne Ntewa ve lelaga vania amio wona yermarua Epraam, sape yoko lalua awar narila. ¹² Yermarua Epraam mēna ga sa naþa mrae pito tano rui, ana narina naþa þaria kila namratava puna la apim ape mok paþisi. Ana sirau-

nia aþarliluen la apitom sanene, pano-o kiena lus lala apim ape mok sane verue la metava ma e sinapane, taþatete si aulola, asaga mras nen none la garo losi narui.

13 Ana yermarua make la naþa amlelaga e Ntewa sanene, Ntewa pisaar kiela sur wo lala pan la, ana aþar ga kana narin kinakinas komþasa, ana amar tan yomarava nini. Ana akilia asape Ntewa þar ligan ga laþasa sike ga wa, yoko warpo nakeviu sirau, ana kila apisu kilale asape ape wolawa ga e yo nena.

14 Yomarava nini naga pe kiela yo re nena poli, ana kiela sitomena sike e mala uma taþena naþa napo.

15 Ana visae yo naþa asitom manenea naga purvanua ke naþa amligan apim, visae la sinelania, akilia avilopu la awasuþe si ava e wo ga.

16 Ana peraga, pe kiela sitomena þasuþe re si pa e nanene poli, la asitom ke asape atol yo taþena naþa po manene la sane, sinelan ga uma nae ma e peni. Ntewa kila ruru make kiela pulkumali wo nene rui, ana naga sinenan paþisi sape popon loge avisave naga pe kiela Ntewa kemua lelaga, a naþa avisave mana uma, naga ve mala uma lue narui.

17 Ana e lepas kiena ne yermarua ke la nene na wa, tevisayu si yermarua Epraam, naþa e kiena nakilialiena marera naþa naga

pisuia. E kiena naviawaena e Ntewa, naga tanan nena narina taaga naþa Aisak pania, tanan sape kuþaþain ke sina ga vania. Aisak ke naþa nanua ne Ntewa pisaar marera pa arimana, sape

18 *“E naruna nene, yoko kiona
lus la aim ave moki.”* Jen
21:12

19 Ana pogos naþa Aisak lavis mare, Epraam pe kiena sitomena re poli e navisaarena kiena ne Ntewa nene, ana naga mlelaga ke naþa sape visae monar wenar narina nene mare, Ntewa kilia tamalia si wo ga ne. Ana Ntewa pisu naþa kiena naviawaena pe lelaga sanene, ana Aisak pe mare re si poli, ana ariman pisu ga naþa Ntewa mla maran si malena kiena ne narina nene pania mligan e limana.

20 Ana yermarua taþena si tai, naga narina ne Epraam naþa Aisak. E kiena naviawaena e Ntewa, mla kiena visena maro pan narina lua nene Sekop amio Esau, mlelaga marera sane yoko sirau navisa ruruena imi van lalua sa ga naþa pisaar pan la.

21 Ana Sekop mena nene sanini, e kiena naviawaena e Ntewa, þasine ga naga sane yoko kila wo van kiena lus lelein la naþa avim sirau. Naga þar narina naþa Yosop, ana Yosop þar narina la lua. Ana pogos tai, lavis repila marua naþa Yosop kovio, sunalun kiena plasgai telan

þarina pito tano vena lotun Ntewa, þisi na pisawal navisaarena navisa ruruena pan mapina la punu ga.

²² Arimala marua nene Yosop, naga mēna popon sa tesitomālia. E kiena naviawaena e Ntewa, naga mlelaga mārera sape Ntewa ve ligan re yeririna nae Israel la asulue Isip, ana yoko wereplan la awasuþe si e kiela purvanua wawa. Naga pisawal sanene, ana pogos naþa kiena malena lavis þisi, pisa mēna sape visae naga mare, ve asin re mon Isip, monar akus vano-o asin mēne kiela yo.

²³ Taþena sina naga yermarua Mosis, kiena yermarua lua. E kiela naviawaena e Ntewa, pe amaraun re navisaluaena mārera kiena ne Parin Suþe Pero poli, pogos naþa narila nane Mosis paeme, apinaia naga paþisi, pe ataþan re aþeþar poli, ana akuswan naga mon moþa ga, pano-o tol kupario telu.

²⁴ Ana Mosis nene, naga mēna, pogos naþa kapuru pa keviu pae na, naga mēna pe yar na lelagaena. E kiena naviawaena e Ntewa, pe sitom manene re e kia wo naþa amla pania, sa naþa Parin Suþe Pero narina naþa sira, narina, ²⁵ ana naga sitom manene la kienalus taþena lala, yeririna na mratava kiena ne Ntewa. Naga mligan uþa mēna yar keviu, amio þelaga la na yomarava nini, naþa sane

kana kekarena pe na þane ga ne, þisi na pa miakol amio kiena yeririna lala e malena na pog mārera la naþa le Isip la akila ke pan la. ²⁶ E pogos nene, naga suþa sitom veve ke ga navisaruruena la naþa kilia imi mālavin naga e pogos la naþa pimi sirau. Naga mnunun sape visae kus ke naloge viowaena amio la vanon yumāena kiena ne Navisaarena, naga po manene la taulu naþa naga kus ke sur wo lala na malena memee ga e uþa mēna ne yar keviu nae Isip. ²⁷ E kiena naviawaena e Ntewa, pe maraun re sur ya naþa Parin Suþe Pero kilia kila vania, ana naga mligan ga Isip sa naþa Ntewa pisa pania. Naga pe pisu re marana ne Ntewa poli, ana þar yon ga naþa logearia sa ga naþa pisu nena e kilamarana.

²⁸ Naga ke sina ga, e kiena naviawaena e Ntewa, naga þuarar ruru mrapa nata-maliaena naþa Ntewa pisa pania, a naga kila kiena yeririna lala aplan ke kuruta na sipsip e mēla pulutava lala, ana pogos naþa Ntewa mligan kiena navisi na marena pitomi vena la nakoena va Pero, war ro ga kom metavan mēla uþa lala, pa mēmar mēaru na uþa punu ga nae Isip. ²⁹ Ana siraun nanene, yeririna nae Israel la nene aþure matan Pero, amial apa atol Sive naþa Pivaga. E kiela naviawaena

e Ntewa, akusro pupia sive nene apa lepas p̄asia, amial ke apano-o sa ga amial ke ga e porotano. Ana la nae Isip asirau apimin la, ana la m̄ena amial asape akusro sa ke ga, ana pupia sive nene pimi pranwo la sina, kila talilun make la ga amarmare. ³⁰ Ana pogos naṗa yeririna nae Israel lala amial apa la sane apa atol pupia kumali naṗa Seriko, amio kiena li na mara la naṗa asike loyuma e kana pupia kove naṗa amiyumaen e kilavaru telivi piora. E kiela naviawaena e Ntewa, la nae Israel amial atalivi e kumali nene pano tol legiena orai, pano-o tol legiena na olua, apisu naṗa Ntewa kila kove la nene amloloru veraga.

³¹ Ana loyuma e kumali nene, sira tai suma ga, naṗa nanua sumo pe sira na mrapa, kiena kia Reap. Sumon, yar la lua navisu veveen yo kiena ne le Israel lala, la apa atapolou loyuma Seriko, ana pogos naṗa asike ea, sira nene p̄erewan la e m̄ana yuma, miila la keviu paṗisi. Yaru taṗena la nae kiena yo, pe sinelan re avatanon Ntewa poli, ana e pogos na mara, amarmare, ana e kiena naviawaena e Ntewa, Reap pe mare re poli, atamalia kiena malena.

³² Nane repita marua la p̄asia naṗa ape purṗes nen yar naviawaena nakonua. Ana tekilia teva laa sane, vanon kia moki sike ga wa, sane yermarua la nene

Kition, Parak, Samsen, Septa, amio Parin Suṗe Tepet, amio m̄ena Samiuel amio navisawalena taṗena lala, ana nepisu sane torok ga wa, pe aora torokin re poli naṗa nekilia nesiri plan kiela suniena la veve taaga e la punu ga. ³³ Pe lelaga kemua, visae teloge ga sunena la nene na, apo na apo. E kiela naviawaena e Ntewa, kieta yermarua lala akila pupia sur la moki. Yoko tevisu naṗa akila mara ataulu purvanua m̄arera taṗena lala, ana akila naṗa yeririna na yo viowa lala monar ayuma ataveve navisaluaena na po, ana am̄areran na tolen ya naṗa akilia asape Ntewa pisaar pan la. Yeririna taṗena lala akuwanla apito e p̄ilipili na laion vena akan la, ana pe akan la re poli. ³⁴ Akuan la e pupia kapi, ana taṗatete nena kekan la. Pogos laṗasia apane playu na mara, ana aṗure matan poga ga, a pogos laṗasia li na mara la akila kare la m̄a pano-o pe puriula m̄arera re si poli, lavis ga p̄isi. Ana siraunia, apisu ga naṗa apa sina metava, am̄arera manene paṗisi, akila mara amio kiela li na mara na purvanua taṗena la nene, pano-o ataulu la, am̄ene plan la aṗasuṗe sina.

³⁵ Lala p̄as amarmare e pog m̄arera la nene, ana ola la atagin la, ana amilan ga Ntewa mla si ninula pan la sina, pisir plan la amal sina.

La sina p̄asia, nasinekar la akila yepe lalae moki pan la, a akilali la visae la avisave la pe amlelaga re si e Ntewa poli, yoko aligan la awasuḗ la sina. A visae avisave asuḗ amlelaga ke ga e Yesu wa, yoko akila m̄arera la sane van la na wa.

Ana e pogos nene, yeririna lala kiena ne Ntewa asape visae akila m̄arera la ve sanene van la, poga ga, ana taḗatete aligan kiela Suḗe. Asitom̄al ga asape e pogos naḗa visae naga visirplan la sina, la sinelan suḗalen se marana naḗa akekara, a ve amawan re sina.

³⁶ Lala p̄asia apiar la, aḗure la apa aḗe la e yometava e maran yar la naḗa apisa kare la ke paḗisi. La p̄asia, pogos naḗa apiar la, nane e sen urmi lala, akuan la p̄araria e yuḗa na koaena. ³⁷ Lala p̄as sina ga, akove moḗar la, la p̄as apiliro la komḗas lua e sowa, p̄asia aterḗar la e playu na mara lala. La naḗa visae ve amare re, la m̄ena ga sur m̄arera van la pa ḗisi. Pe kiela sur re poli, limala plas paḗisi, ḗisi na asi plan ga kulus nen nane pona sipsip vena ayenia nakilaen yepela visusun. Sur la punu ga piowa lue ga pan la, a yar taḗena lala pe apisuar la re nena ga, akila kare la keviu ḗisa. ³⁸ Pe m̄ala uḗa re poli, a pe kiela yo re naḗa ava e poli, ḗisi na asuḗa amialaloro kar ga e yo mema a metava e tavie lala, asu kar

ga e pulḗe lala.

Nane yar na viawaena lala na sa nene. Yomarava nini na piowa manene la pan la, sa naḗa tekilia tevisa tesape yomarava nini pe torokin re si yeririna wo la na sanene ase poli, yar la na sanene popon asuḗa ga m̄ala uḗa metava ma e peni. ³⁹ Tepisu sane la punu ga naḗa tepisayu la pa rui, apane pog m̄arera la mok paḗisi, ana pe amlor re poli, asuḗal m̄arera ga, kila temnunu kilale kiela naviaawaena e Ntewa keviu, a pe lelaga. Ana la ape na pog nane naviranarena marua nanua sumo, ana asuḗa amloge navisaarena wo lala kiena ne Ntewa, sane yoko naga kila mrapa naḗa akilia atol malena naḗa ve uro re, ana pe apisu re mras navisaarena nene molue pula poli. ⁴⁰ Ana Ntewa pisuveve sape popon kila mrapa viu tai van ita. Ana pitalia Yesu pitom kila pae kiena yuḗaena, kila sane la nanua sumo ne, amio ita, ita punu ga towar mras na visaarena kiena ne Ntewa nene e mrapa ve taaga ga, a e pogos taaga ga.

12

Kilamarata suḗa ga e Yesu, naḗa naga m̄arera manene pano taulu pogos m̄arera lala

¹ A la punu naḗa tepisayu la p̄aro rui, la na sane

ape pupia purþes nen viawaena lala, asa ga pupia þegas nena naþa asumal asumã apisuveve ita ke ne, asumã apisu ruru ke kieta viawaena, asape yoko tekirir va ve sanape. Sur ya naþa suwo ke kieta mrapa, monar teyaslua, a mlamulen viowa la naþa sumã piar kare ita ke ne, monar towarplania, ana tomãreran kiririen e mrapa piavi naþa sike e marata, naþa sitomiena na liganaena ve su re si e ita, kieta sitomen la ve piayavi ga.

² Tekira tevisuar manene Yesu, naþa sumal sike e luas nen mrapa gare. Naga pe purþes nen mrapa na viawaena, a pe kana luas mña ga, ana pogos naþa tesitomãlia, yoko la mñareraena van ita. Tekilia tesitomyu si pogos naþa naga þar ke yepe lalaea a naloge viowaena meta e lak torovia, naga sitom korenan ga pogos mñarera naþa naga pana. Naga mligan kiena sitomena mñarera su ga e pupia kekarena naþa sike e marana, kila mña pano-o tauluia, ana nanagane teke e lepasnena ne Ntewa na þamarua, e pupia lelenu wa ma e peni. ³ Popon tesitomyu mña Yesu, e pogos naþa yeririna viowa la nene akuan make visen viowa la pania, sinela kar manene paþisi, ana naga tamãan ga naga pano tol luas. Sanene, ita mña popon ve sineta maren re yuñãena vilaga, a taþatete temarau,

ve tesitom re urmatanen ya naþa monar tekila. ⁴ Pona tesitom ke tesape temloge piowagan kilaen mara temio þelaga viowa ana torok yo narui, sineta mare, ana pe tetol re ya naþa Yesu kila poli wa, pe tesu wo li re mlamulen viowa poli wa, pano-o kata kuruta mlau e yepeta. ⁵ A popon ve sineta þesan re visena na iilaren naþa Arimata Ntewa pisa pan ita, sape pio ita sane narina lala, sape

“Naruu, visae nevisu popon sane naloge viowaena tai imi tol ko, ve ositom korenan re,

pona visae yam laþasa nevisu sane monar nela nakoena van ko, kioñã sitomena ve lor re, komin kiau þelaga navian koena naga sanene.

⁶ *Visae la naþa sineu sii la, yam laþasa monar nekila aloge viowa,*

a la naþa nepe Arimala, yam laþasa monar nowela.” Pakaiwa 3:11-12

⁷ Sanene, visae pog tai ovisu sane ve sanene van ko, monar omãrera, otamãan ga sane mrapa ke tai naþa Ntewa sinenan sape vian ko e narui, sinenan sape kila ruru kioñã malena ne. Ita punu naþa tepe ata, tesumã tekila ke sanene pa narita lala, ana visae Ntewa pisu ita sane narina lala, naga monar kila mña ve sa ke nene van ita. ⁸ Sur nene naga yoko ita make tetolia, a

visae ve kila re van ita tai, naga pisu yaru nena sane pe pe narin ruru re napo poli, naga pe narin yar nae ga koyo tai. ⁹ A nanua sumo, ita make ga, pogos naña arimata la amla ke nakoaena pan ita, pe sinetan re poli, ana pe lelaga, nenaga ne tepisu kilale sane amesmes ga, a kila sane tesitom la va la sane. Ve sanene na, popon manene tevatanon Arimata e ninuta, tekekaran ya naña kila pimi m̄alivin ita, vanon naga ke nene narui pe mrapa na malena.

¹⁰ Arimata lala amla ke nakoaena pan ita e kas la naña tepe sisi ke ga wa, akila sanene komin asitom asape yoko wo la sane van la ke sina ga, ana pogos naña Ntewa mla nakoaena pan ita, kila vena yoko wo ke sina ga van ita, vena ita m̄ena ga tekilia tetol kiena malena wa. ¹¹ Nakoaena pe sur tai naña e ke e kana pog na kusena, pe kiki re nena ga, melkalka pañisi. Ana siraunia, visae tetam̄an naga vian ruru kieta malena, yoko war mras napo lala, sane ðelaga na mom̄auena a sum̄arena, amio ðelaga na waena a na mesmesuena. ¹² Ve sanene, visae sur ya naña avitaweia, amiu akilali sane navisawaliena Aisea pisa sumo, naña sape

“Avisir plan limamiu la naña tayoi sike ne, akila la akulul sina, a purpur na lamiu la naña miyuyuwawa ke ne,

akila la am̄arera sina.”
Ais 35:3

¹³ Sanene, amiu m̄ena ga akila ruru si kiamiu mrapa la amesmes ruru wo, ana kiamiu laulu la naña ayaloro atavevea, yoko lala ve viowa manene re la sane, ana yoko imi m̄arera sina.

Avisuar ruruia ve akila pal re mrapa

¹⁴ Sur lua na waryoen silaga la sanini. Tai, naga ðelaga na ve erau woena amio yeririna tañena lala, a ta sina, naga ðelaga na malena wa naña yaru monar se ea visae sinenan sape visu marana ne Ntewa na mava. ¹⁵ Ana monar ayum̄ae m̄arera vena ve amiu yar tai naña kirir m̄a pano-o ðisi ga e mrapa komsusia, naña pe tol re lemamiena kiena ne Ntewa poli wa. Ovisuar ruru m̄ena ga naña ve narin ðeligas melkalka ve imi tawa re e sinem̄a. Visae pere, ðisi na kapuru war mras la ve moki naña piowa e kiom̄a malena, a kana kororak ne la ve kila kare re malena wa kiena ne li na lelagaena wa tañena lala. ¹⁶ Monar ðelaga viowa na yer̄m̄ene amio sira ve imi re e amiu, a monar ve ðelaga nasineñesan rruen re Ntewa, sa naña Esau kila nanua sumo. Esau nene, Ntewa kilologia naga pe m̄earu kiena ne arimana vena kilia war lalimana ve kiena, ana pogos tai naña visokaria, mlopon ponos nen pursi wo naña wenla na vetokaki Sekop

miyuñaenia, ana mias lua sitomiena kiena ne Ntewa e kiena malena, pisa pa wenla, pisape “Ei, ola pursi nene im van inu nagane, a lalimana ne ata make ga naña pe kiau, ana nela vaniko.”¹⁷ Ana sa naña tekilia ã rui, siraunia Esau pisa sape yoko war maran si lalimana ne arimana ve kiena, ana apisalupar ga, vanon naga ãiliwilin plan rui. Ana mloge piowagania, tagi pano-o kila ãele ga rui. Naga sitom ke sina ga, sape sa ve kila re ga, ana nagane kilalu rui.

Tavie naña Sinae na yomarava, amio tavie naña Saeon nae peni

¹⁸ Ana popon tesitomli si ve tokak ga e lepas nen navisaluena na sumo wa, amio lologena wo kiena ne Yesu Kristo naña pimi ga na wa. Sur lalua nene pe tañena pañisi, ana sur nene tekilia tevisu kilale e kala tavie la lua.

Tavie na navisaluena marua, nane Tavie Sinae, naña na yomarava ga nini. Kieta li marua le Yu lala akilia apisu e kilamarala, ana apisu sane pe pupia yo wa na maruena, naña kap ñeke ea a kana pulãalu ne lala yo malolo ga rui, amio kan yaku nena naña yemalolo kalo make ga, a lagi tai miyui lue ga ea.¹⁹ Ana pupia kana kumasua nena miyeyelu ñalia, ana amloge pulgo tai pis naña urmi pañisi, kila sane amarau paño-o, atag

asape ve visa re si sur tai van la.²⁰ Apisu sane yo nene pe wa pañisi, akranwo ruru nena, sane visae sur mal ya naña waro lavisin tavie nene, kus pal laea, yoko monar akoveñaria.²¹ Ana yermarua Mosis pisu sur la nene, naga ñena marau, pisape “Lelaga nañane, nemiyuwawan ga marena.”

²² Naga nene tavie wa na navisaluena marua na sumo, ana nanagane na pe tepa re si e poli, tepim e tavie wa viu na lologena wo nene na Tavie Saion. Naga sike ma e peni, naña pulku-mali kiena ne Ntewa mali ñeke ea, naga pe Yerusalem viu ne nae yo mava. Naga pulen ga navisi lala, mok na mok naña sane apulopule ga, naña asuvileviles kar ga vena kilaen yauena na kekarena.²³ Ana likan la, ita ãegas na li na lelagaena wa la tesike lele taaga ea, naña ita tepe sane ñearu lala kiena ne Ntewa naña teñar lalimana. A amio ita ñena, ninuna ne kieta yar mare lala asike ea, nane la naña amesmes ruru pa rui e yomarava, ana pogos naña amare, aþure plan la apa atol luasnen mrapa natamaliaena, naña apa asu ruru e yo nene. A yaru nalipereena ñena tai totano teke metava e yo nene, naga pe Ntewa na sur make ga.²⁴ A amio sur wo tañena la naña asike e kieta kunus wa nalologena wo nene, tekilia tevisu Yesu, amio kana

kuruta naña mlau, naña apeven pa e losineta lala vena kila temekiki. Kana kuruta nena, pe sa re kuruta kana ne yermarua Epol nanua poli, naña asape kuruta na ween yaru, a kuruta na kilamaranen napiowaena, ana kana ne Yesu naga pe kuruta na tamaliaena yaru, a pe kuruta na viewoena. Yesu kila po pañisi wa, naña suñal su likan Ntewa amio yaru, kila kiela naviranarena viu lalua suñalu ruruia, vena kila lalua ave erau wo sina.

Ayagogon ruru pulgona ne Ntewa

²⁵ Navisaluaena marua, naga sane visena na kilapegeena ta naña paeme e yomarava nini, a lologena wo, naga sane visena na kilapegeena ta naña pitom ma e peni. Ana la naña apilon ñasila pan navisaluaena marua nene, tañatete nena aurmatan nakoena ñisa, ana visae ve sanene, yoko ve sanapen la naña apilon ñasila pan lologena wo? Yoko tañatete nena aur matan ve tokaki. Visae ve sanene, popon teyagogon ruru pulgona ne Ntewa, telogearia. ²⁶ E pogos naña Ntewa pis pa yermarua nasumo la nene, kiena visena urmi pañisi kila yemninu, ana siraunia, kiena visaaren tai pisa si mon metavana, sape

“Yoko yam si tai nokululun make yo punu ga, ve yomarava re ga nini, a

amio make yo la ne ma metava yam veraga.”

Akai 2:6

²⁷ Visena naña pisa e nini, naña sape “Yam si tai,” naga pisa ke sur keviu ta ne. Naga kana kinasa sape Ntewa kululun yo yam tai rui, ana kiena sitomena ñarera sike ga wa sape kululun li si yam tai ana visu ruru li make ga suria. E legiena maro yoko kululun wowa yomarava nini, amio sur make naña naga sii la sike ea, ana yoko sur naña tañatete kululun rovia yoko suñal ñarera sulue na sike ne. ²⁸ Sur ga tai naga kilia su lue na sike ne sanini, nane nasuñenena kiena ne kieta Ntewa nena, a potena pañisi naña mligan kieta malena su ruru sike loyuma ea. Popon silaga tekila lotena wo tai vania naña kilia kekarania, tepisu kilale naña naga pe na wa pañisi, tewatanonia. ²⁹ Komin kieta Ntewa naga kapi ke nene narui, naña kilia sikap van make sur punu ga.

13

Pelaga la naña Ntewa kekarania

¹ Visen si lañas nini vena iila amiuena, naga sanini. Popon asuma akekaran amiu lue ga, sa naña kam na ape mratava taaga ga amio Kristo. ² Ana ve akekaran amiu re ga, akekaran ke mēna wolawa lala, akekaran naña avisuar la e mamiu uma lala. Popon akilakila sanene, komin pog lañasa,

kam na amninue ga, ana wolawa la naña apisuar la ke ne, la na navisi kiena ne Ntewa ke la narui. ³ Asitomāl la naña asike e yumā nakoena, awar pae kiela naloge viowaena lala, sa ga naña akoven amiu mēna apa asike amio la. Kam na ve sinemiu p̄esan re mēna la naña yar taḡena la asuḡa akilakila kare la ke silaga, komin ita punu ga tesike e yomarava nini, a monar tokus pae pogos m̄arera la naña yoko tevisuia.

⁴ Popon yar make ga avisu kilale p̄elaga na talopaena naga pe sur wo a pe sur wa mēna ga, a komin sur ne nanene, pe pon re si kororak tai imi kila kare tog naña aḡaenia pe m̄ala lalua naña atalopa, komin lalua apisaaria asape yoko ve aure re si taḡena. Yoko Ntewa la na lip̄ereena va la naña amiyalyal kar ga, sane li na talopaena naña akila kolau, pona yar viu la naña akila lau.

⁵ Ovisuar ruruia naña ve oligan re kilavaru imi ve suri na sumo e kioḡa malena. Popon okila ko okekaran ga narin ya naña teke e lumoḡa rui, komin navisaarena kiena ne Ntewa naña sike pa rui, pisa sanini, sape

“Taḡatete neligan ko yam tai, taḡatete nevilon m̄asuu van ko.” Lev 31:6

⁶ Ana pogos naña tesitomyu si naga nene, mla si

nam̄areraena pan ita, vena tevisawal visena naña sike e Tus na Yauena lala, pimi pe kieta visena, naña tevisave

“Yar na iila ruru inena, naga Ntewa na mava ga, ana ve nemarau re si narui, yoko yar taḡena kilia kila si ya ne viowa van inu ne?” Yauena 118:6

⁷ Sur taḡena, popon asitomālalar m̄a kiamiu nasumonena lala, naña apisawal p̄esan visena kiena ne Ntewa pan amiu. Avisu veve ruru mras naña molue kome p̄elaga wo na kiela malena, a akila ga nono na kiela lelagaena m̄arera e kiamiu malena lala. ⁸ La amlelaga ruru po, ana ita mēna tekilia telelaga, komin Suḡe Yesu Kristo naga piloulou re pogos tai poli, naga maran taaga sa ke nakoneva, p̄ane, a peni, sulue na sike ne.

⁹ Popon tevisa mēna tevisave avisuar ruru amiuḡ visena kar taḡena lala amio navian wowenen lala ve aim aure plan amiu re vetan kove wo naña kam na asike pae rui. Yar laḡasa asitom manene la e p̄aḡagena wa lala, amio kala kinanena ne lala, ana kinanena la nene taḡatete nena iila kiela malena lala. Sur taaga ga naña kilia kila sineta la m̄arera ruruia, nane lemamiēna kiena ne Ntewa pimi pan ita. ¹⁰ Kinanen la ne tai ne sanene, naga nane kilam̄iu na kuḡaḡaena lala naña yaru wa la akuan

ke e wonta. Amlenwoia, akila pa yum̃aena la e narui, ana siraunia akania sa naṗa akinan kala ke narui. Yar wa la nene la amal ga e kinanena na wonta la nene, ana ita naṗa temlelaga e Yesu, ita na pe tekinan re e wonta nene poli, ita na kata wonta taṗena m̃eke na, naṗa temal e kana kuṗaṗaena nena naṗa akuan su ea, naṗa yar wa la pe apisu kilale re poli, a la taṗatete akinana ea.

¹¹ La asum̃a akila ke kiela kuṗaṗaena la nene, ana tai na pe taṗena towe laa sane, sa naṗa asape kila totou na marena kiena ne Yesu, kuṗaṗaena nena naga naṗa asape na lakorenanena na viewoen mlamulen viowa, ana pogos naṗa ṗarin yar wa kila naga, naga pe kus make re tas nen sur mal pa loyum̃a naṗa pe yo wa manene poli, ana ṗar ga kana kuruta, pa mligan se wonta. Ana tas nen sur mal nena, akuslua si petan um̃a, akus pa vanua, ana askapia.

¹² Naga sa nenaga naṗa Yesu kila, naṗa akus m̃ena naga pa vanua e purkove na pulkumali, akila mloge m̃a piowa pano-o kana kuruta mlau make nenaga, naṗa pe mlau koren re poli, ana mlaun naṗa kila ita kiena yeririna lala tepim tepe yar wa ruru nena napo lala e marana ne Ntewa. ¹³ Ana komin naṗa Yesu kekaran sape kila ve sa nene vanon ita, ita m̃ena ga monar

tekekaran teva tesum̃al tesu temio naga vanua e um̃a, yar la avisu kare ita sa naṗa apisu kare naga, tokus naloge viowaena ve sa ke ga naṗa naga kusa. ¹⁴ Visae viowa ga van ita e yomar-ava nini sanene, sanene na pogaga ne, komin naṗa pe tesitom re tesape yoko tesike e pulkumali tai e nini ana tesulue poli, ana temligan ki-eta sitomena sike ga e m̃ata um̃a napo e pulkumali viu naṗa tepanon ke rui.

¹⁵ Popon kemua tesitom̃al lue ga naṗa Yesu kila po manene la pan ita, naga pietavan ita e mrapa rui ana silaga tekilia tevisa potena va Ntewa vanonia. Ve tekila re kuṗaṗaena e sur mal la vania, ana nalaena tai tom̃a ga naṗa tekilia tela luen ga van silaga, naṗa yoko kekaran vaṗisi, naga nalaena na yeluarena. Tesum̃a tepisirlua ke kiena kia sanene, ana visena na gota ne lala sa ga mralak tai naṗa kiki ruru nena po pania. ¹⁶ Visae sanene, ve sineta ṗesan re naṗa tek-ila yum̃aena wo lala, komin naga sane kuṗaṗaena naṗa tekilia tela va Ntewa. Tai naṗa naga kekaran manene la sane, naga sanini, sape tekila luen ga wo va yar taṗaena lala, tekekaran ga naṗa teviotion kieta sur la temio la.

¹⁷ Sur si laṗasa, sane monar telogear kieta nasumonena lala, monar tekekaran ga naṗa tesu

vatanon kiela visena lala. La aĵion ke paĵisi naĵa avisuar ruru ita, komin naĵa pupia yerkawa kerkeviu la naĵa asu metavan la asumĵa apisu veve ke kiela yuĵaena a kiela ĵelaga mĵena lala. Visae kieta nasumonena lala, kiela sitomena la marmare, ana yoko yuĵaen make ga va viowa nenaga, ana visae telogear ruru la wo, yoko kila yuĵaena ve urmi manene re van la, akekarania, ana yoko wo manene mĵena van ita, yar na yuĵaena lala.

¹⁸ Pogaga, lavis ke visena make la ĵisĵis narui, ana sinemimin mesape meviun mĵena tan amiu mesape asitomĵal imimi e kiamiu leniena lala, vanon yomĵarera naĵa mesike e nanagane. Pe mepisu re sur tai piowa teke e imimi poli, kiamimi sitomena la merarava ruru ga, a mesuĵa mesuĵalu mĵarera lue ga mesike e ĵelaga wo la naĵa mesmesu e maran yar lala.

¹⁹ Ana sineun nesape visena la nene akila ruru vilaga, vena nekilia neviaĵa e nini ve ve piavi re nowasuĵe si neiĵas pun amiu. ²⁰ In na nesuĵa nemlen wo amiu ke mĵena ga, nesape yoko Ntewa iila amiu. Naga pe Ntewa na suĵare, naga pe Ntewa naĵa sinena miye ita kiena sipsip lala, ana pitetalia kieta Suĵe Yesu pitom e yomarava nini, pitom pe yerkawa na visuaren kieta sipsip lala, kana kuruta mlau vena

visirluaen naviranarena viu naĵa yoko sike sike nena. Naga pe Ntewa mĵena naĵa Yesu tamĵan kiena malena pania, ana naga ĵerelua petan marena, pisirlua malia sina, ²¹ ana noĵasine naga nesape yoko la sur nowo make ga naĵa kam na sinemiun ke nanagane vena kilaen kiena yuĵaena e yomarava nini sa naĵa sinenania. Naga suĵa miyuĵae ke e kieta malena la pe ve taaga, komin Yesu Kristo suĵa miyuĵaen ke kieta ĵelaga wo vim ve sa naĵa naga sinenania, ana yoko teieluar manene naga vanon vano-o taĵatete ĵisi, Sanene.

²² Na mratava pun inu lala e Kristo, nesiri mĵaki nini piĵasu pan amiu, pona visae ve ve piavi manene re yo, ana visae avisu ve sanape kam na ve sinemiu karin re, ana kam na ala kiau visena na iilaen la naĵa sike ea.

²³ Sineun nesape nevisawal van amiu aloge kieta wolai naĵa Timote, amligan lua si naga molue petan yuĵa nakoena rui. Visae ve ve piavi re imi kom e nini, yoko imimi lua, meimĵas mevisuveve amiu.

²⁴ Sinemimin mesape avisawal va kiamiu nasumonena lala, amio mĵena yeririna taĵena lala kiena ne Ntewa, avisave mepiun ke mesape la asike sanape, asururuga pona sanape? A le Italia la naĵa asike e

nini la m̃ena sinelan as-
ape avisa pokolemalo van
amiu. ²⁵ Kiau visena maro
nae e nini, nane nesiri van
amiu narui, nesape yoko
lemamiēna wo a sinewo
kiena ne Ntewa sike amio
amiu make ga.

Maki Naña SEMES Siriyuia Visayuena Na Tusi Nene

Suniena plas na tusi nini

Maki kiena Semes, naga kiena visena wo lala naña vena vianen yeririna lala kiena Ntewa naña asu tetai asike e yo punuga e yomarava nini. Semes naga kila totou la mokliu e kiena visena vena iilaen yaru lala, vena atol sitomena a kiliaena wo lala. E mñaki nini, naga pisayu suri moki naña nalelagaena lala monar kiela sitomen tolia a monar akila. Naga sape nalelagaena naña limana korena, naga monar kekara pogos naña visae Ntewa visirlua naga va metava, a nalelagaena naña kiena suri moki, naga monar kekara pogos naña visae Ntewa ligán naga vito su tano. A pisayu ðelaga wo naña yaru monar kila, a naga sape lelagaena a yuññaena, suri lua nene lalua monar akiriri lele taaga. Pisayu mēna sape yaru naña kila ke ðelaga wo na iilaen yaru tañena, yoko kiena lelagaena mārera.

Semes pisayu suri lala na kilalien yaru lala, a naga sape yaru naña suri la aimi akilalia, ana naga suñña puarar ke ðelaga mesmesu, naga kilia loge wo. Pisa

sape nalelagaena monar ve tañan re gona visa suri viowa, ana monar yeluar ga Ntewa ea. A pisayu manmaruaena naña Ntewa kiania, amio ðelaga tañena leñas naña po, sane ðelaga kiena yaru naña kila kiena sitomena pito ga tano, pona kila kiena sitomena piyavi. Pisayu mēna ðelaga lañas naña piowa, sane yaru la asuñña apeveyu, apilave pañisi, amila nakoena pa yaru tañena, pona akila kiela sitomena pa metava.

E mñaki nini Semes pisayu lotena naña navisatañēena sike ea, a suri keviyu si tai, pisawal rurua naña lelagaena amio yuññaena wo, suri lua nene monar asike lele taaga e maliena kiena yaru naña lelaga, ana nanini naga taveve sitomena kiena Ntewa.

Komþasnen tusi la na nini
Visena þesa 1:1

Pelaga na lelagaena a ðelaga na manmarua 1:2-8

La naña limala korena a yaru na suri moki lala 1:9-11

Suri na kilalien lelagaena kiena yaru 1:12-18

Yaru naga monar loge visena kiena Ntewa a monar kila suri la naña visena nini pisa 1:19-27

Visena na kila woena yaru pisu suri piowaga e yaru tañena 2:1-13

Lelagaena a yuññaena wo 2:14-26

Li nalelaga monar visuar
ruruia e kiena visena
3:1-18

Li nalelagaena a þelaga
lala na yomarava 4:1—
5:6

Suri taþena la naþa Semes
pisa 5:7-20

Visen þesia

¹ Inu Semes inu nepe yaru na yumãena kiena ne Ntewa, a kiena ne kieta Suþe Yesu Kristo, naþa inu nesiri lumãaki nini pimi pan amiu naþa amiu lus nae Israel lala lualima taaga pa lua naþa amiu asutetai asu ke e narin þegas lala e yo punu ga e yomarava nini. Inu nepiun nesape sanapen amiu asu pogaga pona amiu na asike sanape?

Naviawaena amio namanmaruaena

² Puruvi lala a vineu lala, pogos naþa na kilaliena lala imi e amiu, amiu na akilia avisu la sa naþa suri nalogewonena. ³ Nanene na sa naþa amiu akilia,

pogos naþa suri nakilaliena naga kilali kiamiu naviawaena lala, ana amiu atauluia, nanene kila kiamiu naviawaena imi m̃arera manenea vena sumãalu sulue. ⁴ A pogos naþa amiu asumãalu m̃arera sanene, nanene naga kilia kila kiamiu maþena mesmesu ruru wo vaþisi marua ruru nenaga a ule ruru e suri wo la punu ga, pe þelaga wo re

tai naþa naga pe kiena re poli.

⁵ Ana visae amiu yaru tai naga sitom pisape kiena manmaruaena ve tokaki ga, naga monar viun tan Ntewa e kiena leniena, ana Ntewa kilia la van naga. Vanon naþa e þelaga kiena ne Ntewa, Ntewa naga taþatete visi viowa va yaru naþa naga viun suri tania, vanon Ntewa naga mlaluen ga nalaena wo silaga e kiena sinewo.

⁶ Ana pogos naþa yaru viun suri sanene e kiena leniena, naga monar lelaga m̃arera, naþa naga ve sitom þele re sina, vanon naþa sitomena kiena ne yaru na sanene naga sane sive naþa lagi miyuia kulkululu, lagi sumã supon kare ga pa e yo punu ga. ⁷⁻⁸ Yaru na sanene, kiena sitomena peve lua, a kiena þelaga lala kar ga, ana yaru na sanene taþatete si sitom visave þisi na la suri wo tai e Ntewa.

Yaru la naþa kiela suri re poli, a yaru la naþa kiela suri la moki

⁹ Kieta puruvi laþasia li-mala korena ga, pe kiela suri re poli, ana la popon awarwar la vaþisi naþa Ntewa pisirlua kiela sitomena pa metava, ¹⁰ a kieta puruvi taþena m̃ena ga lala, naþa la kiela suri moki, ana la m̃ena ga popon awarwar la manene vaþisi, komin naþa

Ntewa naga kila kiela sito-
mena la sike ga tano. Lala
akilia akekara sa naþa la
apisu kilale asape yaru naþa
naga kiena suri moki, naga
sa ga naþa meme tai naþa
to yam plas ga. ¹¹ Pogos
naþa mrae pa metava, naþa
yo pisun paþisi, ana mlege
meme la nene la apimi
ameu, ana akekapili pito
tano ana maran meme la
nene kokovio. A e þelaga
ke nene, e pogos naþa yaru
na suri moki lala asuþa ak-
ilapolo ke kiela kilavaru lala
wa, ana þisi na la aloru
þena ga akokovio.

Nakilaliena lala

¹² Yaru naþa suþalu
þarera e nakilaliena lala
naþa aimi e naga, navisa
ruruena sike e naga, vanon
pogos naþa naga taulu
suri la nene þisi, ana
Ntewa yowauia ruru naga
e nalaena wo tai, naþa
naga namalena nene naþa
Ntewa naga pisaaria þisi
rui pan la naþa la asitom
manene naga. ¹³ Visae
nakilaliena lala imi e amiu,
ana la ataþali amiu, ana
amiu na ve avisa re avisave
“O, nataþaliena la nene la
amolue e Ntewa.” Amiu
taþatete avisa ve sanene,
vanon naþa taþatete suri
viowa naga kilia taþali
Ntewa, a þelaga naki-
laliena yaru Ntewa naga
pe kiena þelaga re nene
poli. ¹⁴ Nataþaliena la
nene apimi þarera e yaru,
e ga e pogos naþa kiena
nasinenanena viowa ga

naþa kila luþeluþe naga, ana
pure naga pano. ¹⁵ Siraunia,
ana nasinenanena viowa
nene naga pitovi pimi
keviu ana naga þar narina,
naþa mlamulena viowa,
a siraunia, pogos naþa
mlamulena viowa nene naga
þena ga pitovi pimi keviu,
þisi na naga þena ga þar
narina, naþa naga marena.

¹⁶ Kiau puruvi wo lala, þisi
na amiu avisuar ruru amiu,
ve atamþan re yaru la aimi
avisa kotalia amiu, naþa la
avisave “Nataþaliena naga
pimi e Ntewa.” ¹⁷ Amiu na
monar akilia sa naþa suri
wo punu ga, a nalaena tanea
punu ga, la amolue ma e
peni la apitomi e ita. La
amolue e Ntewa naþa naga
sii suri lala punu ga naþa
la apivavaga ke e sinapane,
suri vivavaga la nene naþa
la akilia avilolou la silaga,
ana naga kiena þelaga pe
pe taþena re nena pogos
tai poli, naþa naga taþatete
vilon þasina van ita pog tai,
vena ligan ita tesuþa ga e
yemalolo. ¹⁸ Nane Ntewa
ne nanene naþa sane kiena
sitomena ga, naga kila ita
tepimi tepe narina, komin
naþa ita temlelaga e kiena
visena lelaga, vena ita na
sa naþa teve mras þesia na
yeririna moki lala naþa þisi
na lala alelaga mare e Kristo
sirau.

*Ita monar telogear visena
kiena Suþe*

¹⁹ Kiau puruvi wo lala,
þisi na ve sinemiu þesan re

visena nene, naþa apisape yeririna punu ga monar avitaþilin yagogoena, a monar avis male ga. A monar ve avitaþilin re mēna ga sinekarena, ²⁰ komin naþa nasinemimiena kiena ne yaru, naga taþatete nenaga kilia kila þelaga namesmesuena kiena ne Suþe imi kate pog tai, peraga. ²¹ Ve sanene, amiu na monar akoven plan þelaga namname lala, a yuþaena viowa lala e kiamiu malena la wetelu, a amiu monar aligan kiamiu sitomena suþa vatano e Visena Wa naþa naga kilia tamalia amiu, naþa Ntewa naga mapila e losinemiu lala þisi rui.

²² Amiu monar akila ya naþa Visena Wa nene naga pisa, pe pon re naþa amiu asuþa avisa kotalia amiu ga poli, naþa amiu asuþa ayagogonia ana amiyagogo korena ga e Visena Wa nene, amiu pe akila re suri la naþa pisa ke poli. ²³ Nanene sa ga naþa yaru tai pisu marana e wii naþa ato e kilika, ²⁴ naþa pogos naþa naga pure petania, pog plas laa ga nene, naga sinena þesan ke sina ga marana pisape mēna naga marana sanape wa. ²⁵ Ana yaru naþa naga pisu ruru loyuþa e navisaluaena wo nene naþa naga kilia wereplan ita e mlamulena viowa, a naga yagogo ruru ea, naþa naga ve yagogo korena re ga þisi sinena þesania, ana naga logearia

a naga yuþaena, yaru ne nanene narui þisi na Ntewa naga visa ruru naga e kiena yuþaena punu ga.

²⁶ Visae yaru tai naga sitom ke sape naga pe yaru mesmesu nalelagaena tai, ana naga pe þuarar ruru re purmenena poli, naga suþa pisa kotalia ke sina ga naga, a kiena nalelagaena pe suri korena ga. ²⁷ Ana þelaga na lelagaena naþa mesmesu ruru po, a naþa naga pe lelaga kemua naþa po e marana ne Ntewa, naga sanini: þisi na amiu aialiali ninuyu lala a letano lala, vena aiila la e kiela malena mārera lala, a amiu auarar ruru kiamiu malena mārera vena þelaga viowa amio kororaki lala na yomarava ve atolkare amiu re.

2

Amiu na ve awaveve re yaru lala

¹ Kiau puruvi lala a vineu lala, sa naþa amiu apiawa e kieta Suþe Yesu Kristo, naþa naga pe Suþe Nawarwarena, þisi na amiu ve awaveve re yaru lala, naþa amiu akila wo van laþasia, a amiu akila viowa van laþasia. ² Sa naþa visae yaru la ve lua, aimi loyuþa e kiamiu yuþa na leniena, tai naþa kiena suri la moki naþa mēna kulsota miyowau ruru po a naga miyen piataliga tai naþa pe kol teke e mrasilmana, a naþa taþena naga pe kiena suri re poli, naga mēna kulsota la pororo ga, ana þisi na

amiu ve akila re ve taþena van lalua nene. ³ Pe pon re naþa amiu asitom manene yaru naþa naga mien kul-sota naþa miyowau ruru po poli, naþa amiu aure naga va e yo naþa po a avisa vania avisave "Paraga lelema napo nanene, imimi sine-mimi mesape ko ototano e yo nene," a e yaru taþena nene amiu avisa ga avisave "Pisi na ko osuþalu ga osuþa varau e namã, visae peraga oto ga tano e namã." ⁴ Pogos naþa amiu akila ke þelaga la ne sanene, amiu na asuþa apisuvisu yaru laþasia la apo, a yaru laþasia la apiowa ga, nanene na vanon ga suri la naþa la amien ke ne, a kiamiu navisuena na sanene naga pe þarpoyo re nena e sitomena wo nene poli.

⁵ Kiau puruvi lala, amiu aloge inu. Yeririna la naþa na yomarava nini la naþa limala korena ga, Ntewa naga pure plan la nene la ape kiena, vena naga kila sa naþa la kieta suri wo lala e lepas nen kiela nalelagaena lala. A Ntewa kila mēna ga ve sanene vena akilia ava ala kiela lalimana lala e nasuþenena kiena, sa naþa naga pisaar þisi rui pan la naþa asitom manene naga. ⁶⁻⁷ Ana amiu na asuþa apisuvisu ke yaru la naþa la limala korena la sane ape kororak ga. Ana amiu na asitomyulia: ?A la naþa la asuþa amēne amiu ke ne naþa la asuþa apure amiu

ke apa kumali? ?A li pe mēna ga la naþa la asuþa apiuelin amiu ke e kia keviu wo nene naþa Ntewa naga mligan e amiu? Nanene na pe yeririna re la naþa limala korena poli, ana nanene na yeririna la naþa kiela suri moki.

⁸ Mrapa mesmesu naþa amiu ataveve e nene naga sa naþa purþes nen navisaluaena kiena ne nasuþenena kiena ne Ntewa pisa naþa naga pisa pisape "Ko na ositom nalavis puþa lala, okila wo van la, ve sa ke ga naþa ko na ositom ko mþaga." ⁹ Ana visae amiu asuþa avisuvisu ke yeririna lala awaveve la ke sanene, nanene na amiu asuþa amlamula ke piowa nene ne, a navisaluaena kiena ne Ntewa þisi na naga liþere amiu visae amiu na ape yaru na kilaroen navisaluaena. ¹⁰ Komin yaru naþa naga kilaro ga visena kiena ne navisaluaena ve taaga ga, naga kila ke mlamulena viowa ne e marana ne Ntewa, naga sa naþa naga kilaroro make visena kiena ne navisaluaena la nene punu ga þisi narui. ¹¹ Komin Ntewa nene naþa naga pisa pisape "Pisi na amiu ve ataþa re kolau," nanene na Ntewa ke ga nene na wa naþa naga pisa pisape "Pisi na amiu na ve awemþar re yaru." A visae amiu ve ataþa re kolau ana amiu awemþar ga yaru, þisi na amiu na ave yaru na kilaroen ga navisaluaena narui. ¹² E

pogos na liṗereena, ṗisi na Ntewa naga ve la re nakoena van amiu sa naṗa ṗisi na naga la van yeririna viowa lala, ṗisi na naga ure plan amiu e nakoena nene narui. Komin suri ne nanene, kiamiu visena lala a kiamiu yuṁaena lala naga monar ve sa naṗa amiu na pe akila re suri tai naṗa mesmesun naṗa amiu akus nakoena vanon poli. ¹³ Nanene na komin naṗa Ntewa naga sinena mie amiu, a kiena nasineyeena nene naga ṗisi na yumuvanlua naliṗereena naṗa naga mesmesun naṗa amiu akusia. A pogos naṗa Ntewa naga ṗisi na liṗere yeririna la naṗa la pe sinela mie re yeririna taṗena poli, ṗisi na naga ṁena ga taṗatete sinena ye la.

Pelaga na viawaena a na yuṁaena wo lala

¹⁴ ?Puruvi lala, sanapen naṗa visae yaru tai naga suṁa visa ke visave naga piawa ke e Kristo, ana ṗisi na naga pe kila re yuṁaena wo la poli? ?ṗisi na kiena naviawaena ga nene naga kilia tamalia naga, pona peraga? Nanene na, taṗatete suri wo tai kilia molue kome kiena visokanena naviawaena kiena ne yaru na sanene. ¹⁵ ?A sanapen ṁena ga naṗa visae kieta puruvi laṗasia amio vineta laṗasia naṗa la pe ṁala kulsota re poli, a la pe kala kinanena re poli? ¹⁶ Visae

amiu yaru tai naga visin sineyeena van la visave “Ntewa naga visa ruru amiu, amiu na ve miava tol amiu re, a ve viso kar amiu re,” ana naga pe mla re nena suri tai pan la poli vena iila la, visave ve sanene pogaga ne pona pe po re nene poli? Peraga, kiena visena na sanene ana pe visena korena ga. ¹⁷ A kieta naviawaena na sa ke ga nene narui, naṗa visae naga suṁa naga taaga, a ve yuṁaena wo lala ve su re amio, ana kieta naviawaena nene pe naviawaen korena ga, mare ga ne.

¹⁸ Ana pona ṗisi na yaru laṗasia la aloge visena nene, ana ṗisi na la akilali naṗa avisataṁea avisave, “Naga pogaga, ana pe sa re nene poli. Ana naga sa ga naṗa yaru laṗasia, la ape yaru na viawaena, a yaru laṗasia, la ape yaru na kilaen yuṁaena wo lala.”

Ana ṗisi na inu nevisataṁe la nevisave “Visae inu nevisu ko naṗa ko ovisa ovisave ko na ope yaru na viawaena ga, ana ko na pe yaru na kilaen re yuṁaena wo la poli, ana ve sanene ṗisi na taṗatete nevisu kile tai naṗa sane naviawaena kioṁa pe lelaga. Ana visae ko ovisu naṗa nesuṁa nekila ke ṗelaga wo lala, nanene kilia kila merarava van ko sane kiau viawaena naga pe lelaga kemua.” ¹⁹ Ee, inu nekilia ṁaga naṗa ko omlelaga naṗa Ntewa taaga ga sike na, nanene na po

pañisi nene. Ana nevisa van ko, yermare mēna ga lala la amlelaga sa ke ga, ana la asumā amiyuwawa pañisi vanonia. ²⁰ Sa naña nesumā nepisa ke ne, yaru naña naga pisape naga pi-awa māga, ana pe kila re ñelaga wo la poli, kiena navi-awaena nene pe suri korena ga, yaru na sanene na pe wowe ga nene. ?Pona amiu sinemiun asape nevisa mer-aravanli la suri nene sane wa? ²¹ Pogaga, amiu asitomli repita naña Epraam ne. ?Ntewa naga kila Epraam naga mesmesu e marana vanon ya ne? Nanene komin naña Epraam naga ñere narina naña Aisak, piar naga e wonta, ana tamān narina nene pisape kila kuñapaena ea va Ntewa. ²² Amiu apisu ke ne, e lele nene ita tevisu naña naviawaena kiena ne Epraam a kiena yumāena lala, ana suri la lua nene amiyumāe ga lele taaga. Kiena yumāena lala la akila sane kiena navi-awaena naga pe lelaga ruru kemua naña lelaga, ²³ a suri nene naga kila Visena Wa pe lelaga kemua, naña pisa pisape, “Epraam naga pi-awa ke e Ntewa, a pe mi-asi suri ne nanene, Ntewa naga kila Epraam mesmesu amio naga.” A nanagane ita tesumā tepio ke Epraam tesape naga pe erau kiena ne Ntewa. ²⁴ Komin suri ne la na nene, ita tekilia tekirawal sane Ntewa naga kila yaru mesmesu amio naga komin

kiena ñelaga wo na malena mēna ga, pe komin re ga kiena naviawaena poli. ²⁵ A amiu asitomli Reap nene, nanua sumo naga pe sira na mrapa ga tai. ?Ntewa kila naga mesmesu amio naga vanon ya ne? Nanene vanon naña naga pisuar ruru le Israel la lua nene naña lalua apim vinau ga apisape avisu kilia Seriko. Naga ñerewan lalua nene e māna yumā, a ñisi na naga kipian lalua nene e mrapa tañena tai vena lalua akilia aure ana awasupela si akom ea.

²⁶ Pogaga, ana sa naña tas nen yaru naña naga pe nin-una re poli, naga mare, navi-awaena mēna ga, naña pe ñelaga wo re lañas ayumāe veraga amio poli, naga mēna ga mare ga.

3

Ita monar touarar ruru purmeneta

¹ Puruvi lala a vineu lala, pe pon re naña amiu ve moki akilali naña auarar yumāena na vianena e yumā na lotuena la poli, vanon naña amiu akilia māga, e legiena na liñereena, ñisi na Ntewa naga kila nalipereena van imimi navianena lala ana mārera laa sane. ² Visae yeririna tai naga pe kila pal re kiena visena pogos tai poli wa, yaru nene naga po na po, naga kilia ñuarar ruru kiena malena wetelu. Ana peraga, ita punu ga ita tesumā tekila pal luen ga kieta visena lala silaga.

³ Popon ita tesitomli narin pototo nene naña ita temligan pa teke e logon wosi. Pogos naña ita temligania, ita na tekilia tekila wosi nene logear ita, a ita tekilia tevilon pupia tas nen wosi nene naga va e yo naña ita sinetan tesape naga va ea. ⁴ A ita na tesitomli mēna ga waa lala, naña pe suri korena ga naña aurmi pañisi, a pona pupia lagi miyuia ana sine-nan pisape supon vano, ana narin p̄eligas ga, naga kilia kila pupia waa nene va e yo naña yaru na uararen p̄eligasia naga sinenan pisape va ea. ⁵ Purmeneta lala naga sa ke nene narui, naña la ape narin suri ga tai, ana la akilia avis molmolue ve keviu vañisi.

Amiu na asitomli, naña narin māu na kapi ga tai, ana naga kilia kekan ga pupia laki lala e pupia yom̄arua tai. ⁶ Ee, lelaga kemua, naña purmeneta naga sane kapi ta ne. Kom̄pas nen tasneta la moki, ana purmeneta naga ta naña suri viowa punu ga na yomarava nini la apule manene la ea, a kiena naviowaena la nene la asuñā akila kare make kieta malena wetelu. Purmeneta nene na suñā mla ke kapi e lele na loge viowaena, a naga suñā kila ke kapi nene pivaga e kieta mrapa na malena punu ga. ⁷ Ita tekilia tepisu naña yaru naga kilia kila suri tetan lala aimi amom̄au, sane suri mali na yom̄arua lala a

manu lala, lom̄ara lala, a ika lala, ⁸ a pe yaru re tai naña naga kilia kila purmenena mom̄au poli. A purmeneta lala la apiowa la, a tañatete touararia, a kiela visena lala la sa ga mrasuñapo naña kilia kilañar yaru. ⁹ Ita tesuñā tepis ke e kieta purmeneta nene vena teieluar Ntewa Wa nene naña naga pe Arimata, ana siraunia, ita tepis ke sina ga ea ana tepiuelin yaru tañena lala naña ita na pe tesitom re tesape Ntewa naga sii la poli. ¹⁰ E gota taaga ga, ita tesuñā tepis po ea, a tepis mēna ga piowa ea. Puruvi lala, suri nene naga piowa manene la. ¹¹ Pe puluwii re ta naña mon m̄aga ana e pulusa si amio wii lalua akate veraga e poli. ¹² A sa ke mēna ga naña purpik tañatete kilia war mraolip, a kilkerep tañatete war mravik. Tañatete mēna okilia ova ovio wii e pulusive.

*Namanmaruaena wo
naña Ntewa naga mlavia*

¹³ Visae amiu yaru lañasia naña ape manmarua pañisi, la akilia ruru suri po, popon lala akila suri la nene imi merarava ruru wo sa naña la kiela malena mesmesu, kiela sitomena lala monar vito ga tano, a kiela p̄elaga lala monar marua ruru wo. ¹⁴ Ana visae amiu asitom sa naña amiu ape manmarua, ana kiamiu sitomena lala apulen navielueena amio mēna ga nakalawaena, visae ve sanene amiu na apisokani ke ga ne. Amiu

na ve avisvilaven re si vanon kiamiu visokanena na manmaruaena nene, vanon nanene na pe þelaga na manmaruaena re nenaga nene poli. ¹⁵ Nanene naga pe manmaruaena nae re ma e sinapane nene poli, ana naga manmaruaena na yomarava ga nini ne, a naga pe kiena ne yeririna viowa ga lala, naga pe manmaruaena naþa naga molue ruru ga kome Yermare. ¹⁶ Vanon pogos naþa yaru la naþa avielue ana la sinelan asape ato kalawa make yeririna taþena lala, ana suri la punu ga asutetai ga narui, taþatete si akirir ruru wo. ¹⁷ A visae yaru naþa naga tol namanmaruaena nae ma e peni, ana kiena þelaga ve taþena. A metava suri taþena lala, kiena malena ikik ruru wo, a naga ve yaru nasuþareena mēna ga, naga ve yaru moþau, naga ve erau ruru wo van yeririna taþena lala, a naga ve yeririna na sineyeena. A naga ve yeririna mēna ga tai naþa e kiena malena war mras la naþa po. A naga ve waveve re yaru lala, a kiena sitomena ve veve lua re. ¹⁸ Yaru na sanene, suri la punu ga e kiena malena naga mesmesu ruru po paþisi, a þisi na ve sa ke mēna ga e yaru la punu ga naþa la ape yeririna na suþare, naþa la amiyuþae ke e þelaga na suþarena.

4

Yaru naþa naga kila erau

wo amio yomarava nini

¹ ? Ana visae suþarena nene ve su ruru re amio amiu, ana amiu asuþa akila ga mara van amiu, a aveveyun amiu, ana ya ne pe mias nen suri nene? Suri nene naga molue kome kiamiu nasinenanena lala, naþa la asuþa akila amiu amiyuþae mārera paþisi vena akilali naþa aloge wo e suri punu ga naþa sike e yomarava nini. ² Amiu na sinemiun manene la suri la naþa sike e yomarava nini, ana amiu taþatete akusla, ana nane kila amiu na sinemiun asape awe yeririna vanonia. A amiu na sinemiun manene la suri kiena ne yeririna taþena lala, ana taþatete mēna ga akilia akusla, ana kila amiu apeveyu a aþe amiu mēga vanon suri la nene. Ana amiu pe atol re suri laþas naþa amiu sinemiun poli, vanon naþa pe apiun re tan Ntewa poli. ³ A pogos laþasia amiu apiun tan Ntewa, ana pe atol re poli, vanon naþa apiun pal ga. Ana nanene komin naþa amiu asuþa apiun ke ga vena kila kiamiu nasinenanena lala akilia awar ya naþa la sinelania vena aloge wo ea.

⁴ Amiu na sa naþa yeririna la naþa la pe ape lelaga re pa wola poli, naþa amiu pe akekanan manene re si kiamiu Ntewa poli, amiu pe ape lelaga re pan poli. Ana yaru naþa naga sinenan pisape naga ve erau wo amio yomerava nini a amio mēna

ga kiena p̃elaga lala, ana naga sane suṃña kila ke erau viowa amio Ntewa ne, naga sane pe nasinekar kiena ne Ntewa p̃isi narui. ⁵ Visena lelaga tai teke e Visena Wa, naṓa naga pisa pisape

“Ninuta naṓa Ntewa naga mligan teke e ita, naga suṃña sinenan pisape va viowa silaga e kiena nasinenanena viowa lala.”

A nanene naga pe pe visena korena re nene poli, ⁶ a Ntewa naga suṃña mila ita keviu paṓisi e kiena sinewo, vena ita ve tekila re si ve sanene. Ana naga nene sa naṓa Visena Wa naga pisa, naṓa naga pisa pisape “Ntewa naga suṃña p̃isalupaṓar ke yaru naṓa naga p̃arwaria, ana naga pe sinewo pa yaru naṓa naga kiena sitomena to ga tano.”

⁷ Vanon suri ne nanene, amiu monar aligan amiu asuṃña tano, vatano e limana ne Ntewa, a amiu na monar asuwo Yermare Lego, ana p̃isi na naga ure vetan amiu. ⁸ Amiu na monar aimi manene laa lavisin Ntewa sane wa, a p̃isi na naga m̃ena ga imi manene laa lavisin amiu sane. Amiu yeririna viowa lala, amiu monar akevan limamiu lala. A amiu naṓa amiu kiamiu sitomena peve lua, amiu monar akila sinemiū lala imi ikik ruru wo. ⁹ Nanagane kana pogos ruru naṓa amiu sinemiū viowagan kiamiu mlamulena viowa la narui, amiu

aloge viowa vanonia, amiu alokain tagiena. Popon amiu akila kiamiu vitalena imi ve kiamiu tagiena ga, a kiamiu kekarena imi ve kiamiu nasineyeena. ¹⁰ Ana amiu monar akila kiamiu sitomena su ga tano e marana ne Ntewa, naṓa naga mon metava a naga p̃isi na visirlua amiu.

Amiu na ve aliṓere re kiamiu puruvi lala

¹¹ Puruvi lala a vineu lala, pe pon re amiu asuṃña avisa kare amiu poli, a aliṓere amiu ke sina ga. Pelaga nene, Navisaluaena kiena ne Ntewa p̃isalupaṓar p̃isi rui, ana yaru naṓa naga suṃña kila ke sanene pan kiena puruvi lala, naga suṃña pisa kare ke m̃ena ga Navisaluaena nene, a naga suṃña mliṓere ke Navisaluaena nene pisape naga piowa ga. A pogos naṓa amiu apisu Navisaluaena nene apisape piowa sanene, amiu asuṃña amligan amiu apa ke metava e naga, ana amiu pe asure si vatanon naga poli. ¹² Ntewa nene naga kilia tamalia yaru a naga kilia kila yaru kovio, a mesmesun naṓa naga taaga ligan Navisaluaena a naga liṓere yaru. ?Ana amiu na asitom asape amiu ape Ntewa, vena akilia aliṓere kiamiu puruvi la sanene?

Amiu avisuar ruru amiu, ve avis vilave re

¹³ Amiu laṓasia akilia avisa avisave, “Pane pona peni p̃isi na imimi meva e

pulkumali taþena tai. Ana e yo nene, þisi na imimi mesuña ga tol kas wetelu ve taaga, ana þisi na imimi mekila yuñaena na warena kilavaru ve moki.” Ana amiu ayagogon inu. ¹⁴ Amiu na pe akilia re nenaga ya naþa þisi na naga kilia warpoyo e kiamiu malena peni poli. Kiamiu malena naga sa ga mñau naþa pimi kate e tavie a naga su plas ga ana siraunia kokovio ke sina ga. ¹⁵ Ana visena naþa mesmesun naþa amiu avisa, naga sanini, pisape “Visave Ntewa naþa mon metava naga sinenan ve sanene, þisi na imimi mekiliala mesuña memal re la ve plas ga na wa, ana þisi na imimi mekilali ve sanene ve sanene.” ¹⁶ Ana peraga, amiu asuña apisi vilave ga, a amiu aþarwar amiu paþisi wa, ana nanene na piowa nene. ¹⁷ Ana yaru naþa naga kilia ruru þelaga wo lala naþa mesmesu naþa naga kila, ana naga pe kila re poli, nanene naga kiena mlamulena viowa nene.

5

Yeririna na suri moki lala, monar maramñe amiu

¹ Li na suri moki lala, popon amiu mñena ga ayagogon inu. Popon amiu na alokain tagiena vanon pogos mñarera la naþa asuña apimin ke naþa atol amiu. ² E marana ne Ntewa, kiamiu suri wo lala sa ga suri la naþa apililua þisi rui, a mñamiu

kulsota wo mñena ga lala sa ga naþa kirara lala akarwowo þisi rui. ³ A kiamiu suri mñena ga lala naþa sane kilavaru, la sa naþa asuña asiar asape avililua narui, ana þisi na tasnemi mñena ga lala avililua, sa naþa kapi kekania, a nanene naga kila merarava pisape amiu na amiyuñae piowa ga amio kiamiu kilaveru la nene. Ita tesike e legiena maro la ne, ana amiu na asuña apanon aþarpolo manene ke kiamiu kilavaru la pa laa na wa. ⁴ Li na yuñaena lala amiyuñae þisi rui e kiamiu lokove lala, ana amiu na pe apulila re poli wa. Kiela naulena lala naþa amiu apuarar sike na, naga sa naþa suña mlakai keviu vena visawal naþa amiu apisokan ga. Li na yuñaena mñena ga la nene asuña atagi, a kiela tagiena nene naga pa tol kiligana ne Ntewa naþa naga pe Ntewa na mñareraena. ⁵ E yomarava nini, kiamiu malena meme ga, naþa amiu akilia aul ga suri punu ga naþa amiu sinemiunia naþa alogewonia. Amiu na akan ga kinanena wo la silaga, ana inu nevisa van amiu, amiu na sa ga suri mali lala naþa yaru la apagan ruru la po pano-o amlapa ruru po paþisi, nanagane amloge po paþisi, ana legiena na we moñar laena pimi ke lavisi narui, ana suri mali la nene amninue ga. ⁶ Amiu na asuña apisu ke

la naþa limala korena ga la apito ga tano. Amiu amla naliþereena viowa lala pan la, pe suri korena ga naþa la amesmesu ga. Amiu akila kare la mþaga pano-o amiu aþmemoþar la amare. Suri la nene, amiu akila pan yeririna lala naþa taþatete nenaga la akilia avisaluþar amiu.

Amiu monar amalumu ga

⁷ Puruvi lala, amiu na monar amalumu ga vena asumate mþaga kieta Suþe vano vano-o naga wasuþe sina ga. Naga sane yaru na lokove, naþa naga to malumu ga toþa ga toþate pogos wo na yuþaenen kiena lokove lala, a vena yua naga imi kepapania, a vena war kinasa naþa marua sike ea. ⁸ Ana amiu na monar amalumu mþena ga sanene narui, vena asumate kieta Suþe naga wasuþe sina ga imi. A amiu monar kiamiu sitomena lala asumalu mþarera, vanon naþa þisi na naga ve ve piavi re ana naga imi ke sina ga.

⁹ Puruvi lala, amiu ve avisumun amiu re silaga, vena þisi na Ntewa naga taþatete liþere amiu vanonia. Vanon naga pe yaru naliþereena, a sa ga naþa naga suþa suþalu ga sike e pulutava narui vena imi loyuþa.

¹⁰ Puruvi lala, popon ita tesitomli navisawalena na sumo lala kiena ne Ntewa. La apian ita e mrapa wo tai, naþa pogos na yeririna

lala akila piowa pan la, la amalumu ga a kiela sitomena lala pe mloru re poli. ¹¹ La asumalu mþarera asumaga pano pano-o, ataulu suri la nene, a komin suri ne nanene, ita tepisua tepisape Ntewa naga pisa ruru la paþisi wa. Yeririna naþa Sop, naga mþena ga tai naþa naga suþalu mþarera su piavi e suri mþarera la ne sanene, a ita tekilia suri wo lala naþa Ntewa naga kila pania sirau þisi. Nene na lelaga, Ntewa naga pe lemam pan yeririna la paþisi, naga sinena mie la paþisi.

Pelaga na visaena visaena naþa lelaga

¹² Kiau puruvi lala a vineu lala, metavan suri taþena la punu ga, pogos naþa visae amiu apisaar suri tai, pona amiu apisa pupia visaena keviu tai, þisi na amiu ve avisa re amio kia kiena ne sinapane, a kia kiena ne yomarava nini, pona kia kiena ne suri taþena tai, vena kila kiamiu visaena nene mþarera. Visae amiu avisa avisave "Lelaga," monar avisa ga "Lelaga." A visae amiu avisa avisave "Peraga," monar avisa ga "Peraga." Visae kiamiu visaena ve lelaga ruru kemua sanene, þisi na Ntewa naga taþatete liþere amiu vanonia.

Leniena naþa navisa-taþeena pimi ea

¹³ Visae amiu yaru tai naña naga mloge piowagan ke suri tai, naga popon len, a visae amiu yaru tai naga kekara, ana naga popon yeluar Ntewa e yauena.

¹⁴ A visae amiu yaru tai mai, nanene naga mesmesun naña naga vio nasumonena na sumare lala vena aimi avisu naga, ana p̄isi na lala akilia alenwo naga, a la akilia ataron sirveve va e naga e kia kiena ne kieta Supe.

¹⁵ Ana komin naña apiawa m̄arera e Ntewa, ana alen vania, p̄isi na Ntewa naga tamalia namaiena nene, kila ruru sina ga naga. A visae maiena nene naña tol yaru nene naga vanon kiena mlamulena viowa lañasia, a visae yaru nene visa plan kiena mlamulena viowa la nene, p̄isi na Ntewa naga viewo m̄ena ga mlamulena viowa nene.

¹⁶ Komin suri ne nanene, ana popon amiu na asuñña avisa plan kiamiu mlamulena viowa lala van amiu, a popon m̄ena ga amiu asuñña alenwo amiu ana vena p̄isi na Ntewa naga kila amiu awo sina. Pogos naña yaru mesmesu naga len m̄arera, kiena leniena kilia war mrasa ve moki.

¹⁷ Elaisa naga pe yeririna ga sa naña ita, ana naga mlen m̄arera pisape yua p̄isi, ana tol kas telu komsusa ana pe yua re nenaga e kiena yo poli. ¹⁸ Ana siraunia naga kila ke sina ga leniena, ana

yua kove ke sina ga ana lokove lala ape kinas sina ga.

Amiu na monar aure si yeririna naña pure wasupe sina ga imi

¹⁹ Puruvi lala a vineu lala, visae amiu yaru tai molue vetan nalelagaena, ana amiu yaru tai naga vanon ure naga wasupe sina ga imi, naga nene na yuññaena wo ta nene. ²⁰ Amiu na monar asitoñña, sa naña visae yaru naña naga vilon yeririna viowa tai molue e mrapa naña piowa wasupe sina ga imi e mrapa naña mesmesu, naga tamalia yeririna viowa nene narui, ana p̄isi na tañatete yeririna viowa nene naga kovio. A naga kila sa naña p̄isi na Ntewa naga kilia ure plan punu ga mlamulena viowa kiena ne yaru viowa nene.

Maki Nasumo Naña PITA Siriyuia Visayuena Na Tusi Nene

Suniena plas na tusi nini

Maki ñesa kiena Pita, siria pan la naña amlelaga rui, naña naga pio la sape yeririna lala kiena Ntewa, naña naga ga pisirplan la. La naña asu tetai asike sane wolawa lala e provens makega e yo nene naña nagane tepio sape purvanua naña Teki. Sitomena keviu na maki nini, vena visirluaen sitomena kiena li nalelagaena la naña yaru la asuñña akila ke mārera manene panila pañisi, kila la añal ke mārera panila pañisi komin naña amlelaga e Yesu Kristo. Naga pisa panila sape monar asitoñal lologena wo nene, naña Yesu Kristo maren ita, a mal sina, a yoko naga wasuñe si vitomi sina vena were kiena yeririna lala. Sitomena nene kilia iila ita vena tesuñalu mārera, a kieta lelagaena la kilia mārera sumña e Yesu Kristo.

Komin suri ne nanene, pogos naña atol pog mārera, a yaru la akila suri mārera la panila, akilia asuñalu mārera, kiela sitomena tañatete loru, pe suri korena ga naña yaru la akila piowa manene panila. Visae akila sanene, yoko kila meraravan naña la amlelaga

kemua e Yesu, a yoko atol suri wo la naña Ntewa miligan ruru sike mae peni, sape ve kiena kiena yeririna lala, e legiena naña yoko Yesu Kristo vitom mālivi ea.

Amio visena nene na visirplanen kiela sitomena lala, naga pisi mārera mēnaga panila, sape monar akila kiela maliena la mesmesu ruruia, komin naña ape yaru lala kiena ne Kristo.

Komñasnen tusi la na nini

Visena ñesa 1:1-2

Mrapa kiena Ntewa naña tamalia kiena yeririna lala 1:3-12

Maliena kiena li nalelagaena lala monar ve wa 1:13—2:10

Yumñaena kiena li nalelagaena lala pogos naña asike e nalogeviowaena 2:11—4:19

Sitomena kiena yaru na lelagaena monar vito ga tano 5:1-11

Visena na maro 5:12-14

Visena na sumo

¹ Erau lala, inu Pita nevisa pokolulagi a pokolemalo e kia kiena Yesu Kristo, naña in na nepe kiena nalogena.

Maki nini piñasu pan amiu yeririna kiena ne Ntewa lala, naña nanua asike gar kiamiu yo Yerusalem, ana añene plan amiu, nagane kam na ape wolawa ga naña asike e pupia lepas la naña, Pontas, Kalesia, Kapatosa, Esia, amio Pitinia. ² Amloge piowagania, ana sineun nesape nevisawal van amiu,

Ntewa armata naga kilia make mrapa na kiamiu malena nanua nanua rui. Naga mligan plan amiu nanua rui, ana Ninuna miyũmae ke e amiu, amlogear Yesu Kristo, amla e kiamiu malena, kana kuruta kevan amiu amekiki, apim ape kiena yar wa lala.

Kiau leniena nesape yoko naga ligan kiena lemamiena a sum̃are vena sum̃a iila amiu silaga.

Natamaliaena naŋa nalelagaena la atolia

³ Popon tesitom̃al sanape naŋa Ntewa Armanane kieta Suŋe Yesu Kristo, naga kilali po pan ita wa. Temieluar naga paŋisi, komin sinen miye ita laa, kila ita tepim tepaeme tepe urviu si e mratava puna. Sa naŋa naga kila narina Yesu Kristo maŋ si e marena, tekilia naŋa suri naŋa sike vamon ita, pe maren re si poli ana malena naŋa ve uro re. ⁴ Naga sane lalimana ne Ntewa naŋa po naŋa yoko tetol sirau. Naga kila ruru rui, mligan sike ma meta e peni, yoko taŋatete menun, a taŋatete viowa, taŋatete si kovio pog tai. ⁵ Sur nene pe tetol re poli wa, ana temlelaga tesape yoko nam̃areraena kiena ne Ntewa suwo ruru ita nenaga, uarar ruru ita sum̃a vano-o tol legiena maro. Ana e pogos nene, yoko naga kilologia natamalia itaena e maran yar taŋena lala.

⁶ Nekilia nesape nana-gane, asum̃a aŋar naurmiena na loge viowaena e nakilaliena la naŋa asum̃a atol ke ne. Pona yoko sum̃a ga sanene yo e pogos laŋas naŋa pimi ke na wa, ana e sitomen la ne nepisa ŋisi ne, popon kila amiu akekara, sinemiu la loge wo sina.

⁷ Sur na kilalien la nene, apimin ga naŋa kila kiamiu naviawaena sum̃al laa sane, imi m̃arera ruruia. Nanene naga sa naŋa kol naŋa visae sinelan asape ikik ruru wo, monar askap plan kororak la naŋa sike ea, pona omlelege kiai okaweruruia imi mesmesu, ana ita m̃ena ga sa ke ga. Nakilaliena la naŋa tetol ke ne, sane kap tai naŋa kekanvan ke kieta naviawaena vena imi merarava ruruia, a m̃arera ruruia. Visae pogos naŋa Yesu Kristo imi sina, naga lual kieta naviawaen ekik ruru sanene, ana yoko ita make ga tekekekara, tekilia tevisu ruru ita, teloge wo vaŋisi.

⁸ Nesum̃a nepisayu ke Yesu sa nene, nesitom̃al si nanua sumo nesike nemio naga, nekilia ruru naga, kam na peraga. Lelaga naŋa nanua kam na pe amio re naga poli, ana pe sur koren ga, nagane na kam na akekaran paŋisi, a pe apisuli re naga e kilamaramiu poli, ana asum̃a amlelaga ruru ke m̃arera e naga, sinemiu la kekaran e pupia kekarena ta ne keviu paŋisi, naŋa pe

atorokin re avisa meraravan poli. ⁹ Kiamiu kekarena nene, pe kiamiu mras nen nalelagaen wo tai naña akilia akan nagane, ana pe naga re ga nene poli, komin amio mēna, e pogos la ne pimi ke ne, yoko akan tai naña kiki laa sane, nane natamaliaen kiamiu malena.

¹⁰ Sur nene naña tepisayuia, sa naña natamaliaen malena ken yaru, naga sur tai naña navisawalen nasumo la aþion kiliaen paþisi. Akilia ruru navisaarena kiena ne Ntewa po, naña sape yoko naga sinen ye kiena yeririna lala, yoko tamalia la, ana asumã apisawal ke sanene. ¹¹ Apisa ke sanene, ana pe akilia meraravan re asape yoko naga kila ve sanape poli, pona yoko kila pogwai. Amloge ga naña Ninuna Navisaarena sumã kipian la ke sape yoko akila kare þesan naga, siraunia, navisa ruruena lala imi malmaliv, ana aminue asape Navisaarena naga yar na sanape, pona naga ai.

¹² Sumo na asitom asape naga yerkawa yar ga tai na kiela pogos ne, ana siraunia, apisu kilale ga na wa asape sur la naña apisa ke ne, pe e re e kiela pogos poli, a e kieta pogos la ne pimi ke sirau. Ana kam mēna apisu kilale asape suri la naña navisawalena la apisawal nanua sumo, nane apim ape lelaga e visena kiena lologena wo

naña memlologon ke pan amiu e namareraen kiena ne Ninuna Wa nae ma e peni rui.

A pe navisawalen re ga la poli, ana navisi mēna lala sinelan asape akilia sur la nene, ana peraga, pe kiela re naña akilia poli. Sur la nene amalivi ga yo metava e kieta pog na wa.

Monar ove yar wa ruruia

¹³ Ana pogos naña Yesu Kristo pitomi mǎliv e yomarava e nena e kieta pogosa, ita ke narui monar tekila ruru kieta sitomena vena tomãreran ruru naña tekila kiena yumãena. Monar takawe ruru kieta malena, a ve tesitom re yomarava nini, a monar tesitomãl ga navisa ruruena wo naña yoko towaria pogos naña yoko Yesu vitom warpo si yo e yomarava nini. ¹⁴ Yoko monar teim teve sa sisi wo la naña asumã amlogear ruru ke armala, a nasinenanen viowa na wowe lala, pe pon re si tetamãan ave suþen kieta malena poli, sa nanua sumo e pogos naña pe tekilia re sur tai poli.

¹⁵ Armata, naga ke narui naga pio ita, ana monar tekilia tesape naga naña sinenan sape teim lavisinia, naga pe wa paþisi, ana ita mēna monar teve wa ruru e mrapa make ga na kieta malena. ¹⁶ Visen kiena ne Ntewa tai teke e kiena navisaluaena marua, pisa sanene rui sape “*In na nepe wa, kam mēna monar ave wa.*” Lev 11:44,45

¹⁷ A sur si tai, yam mokliu naña tesuñña tepio Armata vena iila ita, ana monar tevisu kilale tevisave naga suñña pisuveve ruru yaru lala mesmesu ga e kiela yuññaena la peve taaga, ana teyaloro e yomarava nini monar kieta sitomen vatanonia, temaraunia. Naga mligan ita tesike e yo nini yam plas ga sane ita tepe wolawa ga ea, ana monar tesitom tevisave siraunia, yoko teva tesuñña nena tesu e marana.

¹⁸ Nanua sumo, kieta li marua lala pe akilia re Ntewa poli, ana akiakian lelein ña kiela malena na yemalolo pitomi pitomi tol pogos naña Yesu Kristo pimi ñerelua ita petania. A sa naña akilia, naga kila sanene, pe pul plan ita re e sur na yomerava sane kilavaru poli pona kol pona ya si naña sane yoko kovio pogos tai. ¹⁹ Peraga, naga pul plan ita e kana kuruta nena napo, komin naga tañan kiena malena kus leleta, naga tañan naga sane narin sipsip tai naña pe narin maran sur tai pe to re e poli, vena kilaen kuññaena ea.

²⁰ Ntewa kilalua Yesu vena tamalia itaena sanene nanua rui. Nanua e pogos naña si yomarava, ana ñuarar narina nene suñña amio pano tol pogos naña sinen miye ita keviu, narui kila naga pitomi ñaliv ga na wa e legien maro la nini. ²¹ Naga pitomi ñalivi, naga pike mrapa pan ita na vaen si puna ne Ntewa

po pañisi. A pogos naña toñal naña Ntewa kila malia si naga, mligan sike amio naga ma e kiena naurarena, toñar sitomena naña tesape, Ntewa ne nanene narui, popon telelaga vania, teviawa ea, towasinea.

²² Siar e nene narui, amelaga e visena lelaga kiena ne Ntewa, a kiamiu malena la mesmes ruru po, a asitom manene laa kiamiu erau tañena lala. Ana ve akilakila re ga, monar añareran li naña akekaran amiu e sine miu lala ve keviu manenea.

²³ Apaeme apim ape urviu sina, atol malena viu rui, ana nanene na pe sa re naña ñañña la añar sisi poli. Kieta malena viu nene naga pimi ñarpo ga yo e visena kiena ne Ntewa, pe visena mali, a visena naña tañatete kovio pogos tai.

²⁴ Malena kien yar tañatete su ve piavi, komin kapur ruru po sane ñaki, kilia imi wo vañisi sane meme, ana siraunia ñak nene kilia mano, ana meme kilia loru. ²⁵ Ana sur taaga naña sike sike lue, nane visena kiena Suñe.

Ana visena ne nane, mesuñña memlologon ke pan amiu siar nanua rui pimi tol ñane.

2

¹ Ana komin naña lologena wo tol amiu rui, monar aligan ñelaga viowa lala. Nasinekareena lala, visokanen lala, namlamulen

wanen viowa lala, vielueen lala, a navis viowaena lala, p̄elaga la ne sanene monar awar plan vetan kiamiu malena.

² Sa naṗa sisi tomtom la sinelan manene munen mala yu vena amal ea, kam mēna monar am̄areran naṗa atol kamiu kinanena a namunena wo naṗa kilia kila ninumi kapur imi marua ruru, torokin p̄elaga kien yeririna la naṗa Ntewa tamalia la. ³ Akan li kinanena kana Suṗe rui, a visae akan kiki, popon akan lue ga, mēp̄emiu ulen silaga.

Yesu naga pe purṗes nen kilavaru na p̄eren yuṗa naṗa mali

⁴ Ntewa sinena sape visirlua yuṗa wa tai, ana naga pisaar kilavaru na p̄eren yuṗa tai naṗa mali, naṗa pisu po paṗisi, nane Yesu. Yar taṗena laṗasa yepel mavinia, akovenlua, ana ita tesitom naga paṗisi, tetavevea. ⁵ Ana Ntewa p̄ere ita, pisirlua ita tesu meta e kilavaru nena, naga pran kolkol ita sane kilavaru mali lala na m̄ana yuṗa nena. Naga pisu ita sane kiena p̄egas nen yar wa na yuṗaena lala, naṗa tekilia towar kuṗaṗaena nowo vania naṗa naga kekaran la, naṗa towar vania komin ga yuṗaena naṗa Yesu Kristo kila rui.

⁶ Sa ga visena tai naṗa sike e tus kiena yermarua navisawalen Aisea rui, naṗa Ntewa sape:

“Apisu kilale rui pona pere wa? In na nepisaar kilavaru wo na p̄eren m̄au yuṗa tai rui, naṗa nekekaran paṗisi. Yokonevisirlua nena se kiau kumali wa naṗa Saeon.

Yaru ai naṗa visirlua kien malena se ea, taṗatete nena loru vito viowa pog tai.” Ais 28:16

⁷ Ana ita naṗa temlelaga e kilavaru nene, tesape kieta visuena po na po, ana laṗasa pe sinelan re poli, akovenlua ga pano. Ana visen taṗena m̄ena kiena ne Ntewa e lepas nene sike e Tus na Yauena lala, naṗa sape:

“Pe sur koren naṗa yar na yuṗaenen yuṗa asape kilavaru nene piowa ga, akovenlua, ana in na nemla kilavaru nena, nekila naga pe kilavaru na p̄eren m̄au yuṗa wa nena napo.” Ais 8:14

⁸ A e ke sina e Tusi kiena Aisea, visen kiena ne Ntewa tai pisayu ke kilavaru nene wa, pisa sanini, sape:

“Kilavaru nene, yoko yar ve mok naṗa lala tau ea, kila ayal wowe.

Naga pe kilavaru tai naṗa yoko kila yeririna na yomarava nini aloloru.” Ais 8:14

Visae teviun tevisave ya ne kila amlolor sanene, naga komin ga naṗa pe amlogear re visena lelaga naṗa amloge poli, yoko akekapil make atotano e lele na kovioena

naña su ruru sike pa rui ve kiela.

⁹ Ana e ita pe sa re nene po, ita tepe pegas taaga naña Ntewa pisirlua, ita tepe li na þarwa lala vena ve suþenen kiena yo, ita tesike loyumi e kiena purvanua wa, ita tepe yeririna na mratava nena puna lala. Ita ke narui tepe yeririna na yeluaren naga vena visawalen kiena sinewo naña kila pan ita, naña þere plan ita petan yemalolo, mligan ita tesike e kiena yomerarava napo. ¹⁰ Nanua sumo ita tepe yeririna kar ga lala, ana nagane tepim tepe pegas kiena ne Ntewa taaga. Nanua sumo pe tetol re kiena sineyeena poli, ana nagane kiena sineyeena pulen ga kieta malena.

¹¹ Erau lala, visae ve sanene, popon avisu kilale naña yomarava nini pe mta unia re napo poli. Sa ga tepe yar taþena ga lala, tepe sane wolawa ga, ana monar teligan þelaga nasinenanen nakilaen mlamulen viowa lala na yomerava nini, komin kiena napiowaena lala ape nasinekar nena na ninuta. ¹² Sila ga tesike likan la naña yepel mavin lelagaena, akawe ita silaga, a pogos naña tesike e marala, kieta malena monar wo na wo. Visae ve sanene, yoko akilia avisu kilale ya naña tesumi tekila ke ne naga po na po, ana visae la mena alelaga, yoko ita make ga temio la teieluar Ntewa e

pogos naña yoko imi malivin ita sina.

Pelaga wo kiena li nalelagaena lala pogos naña asike e yomarava

¹³ Sa naña tepe li nalelagaena kiena Suþe rui, kieta þelaga naña tesike e yomarava nini monar torokin ga kiena kia naña tesumi temlologonia.

Li nalelagaena lala monar avatanon yerkawa la naña apisir plan la vena visuaren yeririna lala. Suþe la yo, pona yerkawa kerkeviu lala, ¹⁴ pona þarin suþe keviu la, ana monar tevisu kilale la sane Ntewa ke narui naga mligan e limala vena lipereen yar lala, vena laen nakoan va naña pe mesmes re poli, a vena yeluaren naña kila yumiæna wo. ¹⁵ Ntewa sinenan sape kiena yeririna la monar ayumiæna wo, komin naña visae akilia mena sanene silaga, yoko yar la naña pe akilia re sur po, naña asumi akoven ke ga visen kar lala kawe ita, yoko taþatete avisa si sur tai. ¹⁶ E lepas tai, lelaga sane tekilia tekila ga ya naña sinetania, a e lepas komþasa, yar naña mlelaga naga pe sitom manene re sanene po. Pona naga sitom ke sape visa ve sa nini yo, visave Ke, sur nene sike ga e in naþane, nekilia nekila ga suri viowa ya naña sineunia. Ana pe sa re nena nene poli þisa, komin monar tevisu kilale tevisave ita la

naña temlelaga tepe yar na yuññaena kiena ne Ntewa, ana monar tekila ya naña naga sinenania. ¹⁷ Li nalelagaena lala monar avatanon yar tañena lala, monar akekarar manene wenla tañena lala amio vinela tañena lala e namratava puna ne Ntewa. Monar amaraun Ntewa, avatanonia, a monar avatanon mña kielasupe lala.

¹⁸ E ñegas nen li nalelagaena lala, lañasa ape kiena ne yerka lala, naña ayuñae korena ga van la. A kiela yerka lala, lañasa apowo pañisi, a lañasa añarera pañisi, ana pe sur koren ga naña yerka naga po pona piowa ga sanene, ana yar na kiena yuññaena monar vatanon ruruia.

¹⁹ Pogos la ñasa, pona yar na yuññaena miyuñae pogaga yo, ana kiena supe kilia sinen karkare vañisi, kilia viowa lue ga vania. Yar nene yoko loge viowagan ñelaga kiena ne kiena supe naña pe mesmas re poli, ana po pañisi visae torokin tañan ga ve sa nene, naña e kiena sitomena ñasine ga Ntewa, ana yoko loge kilale naña Ntewa sike amio vena iilaena.

²⁰ Ana visae yar na yuññaena kila sur viowa ve moki, pona yoko kiena yerka monar visave ala nakoena vania. Ana visae pogos naña ala nakoena van yar nene, naga va ruru ga teke na, yoko ve tevisa

re tevisave naga pa ruruia komin naga pe yar wo tai, ana tekilia tevisave naga pe pis re poli komin pisu kilale kiena napiowaena.

Ana visae okila ga sur wo la sa naña Ntewa sinenania, asumñalu sinela kar ko, ala nakoena mñarera tai van ko, ana ova ruru ko ga, ñelaga wo ke narui naña Ntewa sinenania.

²¹ Sur nene naña yar wo loge viowa ga naña akila piowa pania, naga pe lepas nen kieta malena tai naña Kristo pio itania, komin sa kemua nene pan naga sumo rui. Pe kila re sur tai poli, ana akila naga mloge piowa manene laa, ana naga tañan ga, vanon ita. Ana sa ke ga mrapa naña kieta Supe mial kome nanua sumo rui, monar teyal ga e lelen lana tetaveve tevano.

²² Visena Wa marua pisayu naga sumo rui, naña pisa sanini, sape

*“Naga pe kila re nena mla-
mulen viowa pogos tai
poli,*

*visena na visokanena pe kate
li re e gona poli.” Ais
53:9*

²³ A sa ke ga naña tekilia mñaga, pogos naña akuan visen viowa la pania, pe pisamaran re si poli, a pogos naña aña kare yepen lala, pe pisa re nena sur tai pan la. Pa ruru ga mon mñaga, mligan sur make ga sike ga e limana ne Ntewa Arimana naña kiena nalipereen lala mesmas make ga.

24 Pogos naŭa Yesu telan mēke e lak torovia, nakoena na kieta mlamulen viowa make ga mloru e tasnena, a kiena marena kila naŭa ŭelaga na mlamulen viowa mare petan ita, ana kila ŭelaga na kilaen mesmesu mal suŭa e kieta malena. Lelaga, kiena yepe lalaea lala kila kieta yepe lalaea lala pimi po nenaga.

25 Sumo, tesuŭa temyal wowe sane sipsip la naŭa akila pal kiela mrapa, ana nagane yar na visuaren sipsip mŭal ita si rui, nagane tepim tesu ruru tesike temio naga naŭa pe yaru navisuarena kieta malena.

3

La naŭa atalopa rui monar avatanon wola lala

1 Sa naŭa ita la naŭa temlelaga monar tewatanon ŭarin suŭe na purvanua, ita naŭa tetalopa monar tewatanon mēna wota lala.

Nevis ŭesan van amiu kam sira lala, nesape monar avatanon ruru womiu na yermēne lala. Pona sira tai, wona na yermēne pe mlelaga re e Tus Wa poli, yepen mavin yagongen wona na sira visayu vania, ana visae wona na sira kila lue ga wo vania, pona yoko kilia were mēna naga imi lelaga yo.

2 Visen manenea taŭatete taulu yar nene, ana pogos naŭa visuaveve ŭelaga na sitomena wa a ŭelaga na vatanoena kiena wona sira

nene, yoko naga kekaran naŭa lelaga.

3 Sira lala, popon avisu kilale naŭa sane kiamiu purŭes nen nawoena pe vanon re naŭa avilovilon vilŭarimiu veve taŭena poli, pona atelan mramalela lala, pona ayen kulmrae wo lala.

4 Sur nene, pe komin re naŭa apaia ruru tasnemi la sanene poli, ana ya naŭa yoko kila amiu aim awo ruru napo lelaga nane ŭelaga wo naŭa teke loyumu e amiu. Ee, lemamiēna naŭa malumu a sinemi naŭa vito ga tano, naga ke na kiamiu nawoena narui, a naga taŭatete imi ve urmarua pog tai, nane ŭelaga ne nanene Ntewa pisu po paŭisi.

5 Apua sira marua nasumo lala, la mēna kiela ŭelaga la sa ga nene. La aŭasine Ntewa, ana amlelaga asape naga ga kilia iilala aim awo manene e marana a e maran yar taŭena lala. A pogos naŭa ola na yermēne mēna lala apisu naŭa wola na sira la nene apatanon ruru la sanene, apisu po na po. 6 Sira tai naŭa kilakila sanene naga sira marua Sera, naŭa naga kekaran patanon ruru wona yermarua Epraam, pano pano-o pio ke naga sape kiena suŭe. Sira marua Sera nene, tepisu ke naga sane aneta sira marua tanea, ana kam sira na nagane lala, visae asuŭa akila luen ga wo va womiu

lala, sa naþa naga kila, kam na aim ave nariþa nena napo lala. Pona laþas amaraun asape sa þisi akila ve sa nene va wola na yermene lala yoko ve sanapen la, ana peraga, monar avatanon la ve sa naþa Ntewa sinenania.

⁷ Ana visena van amiu kam yermene lala, sape monar asitom urmi manene e womiu na sira lala. Visae yar tai sike uþa mþana amio wona na sira, monar visu kilale sape naga yermene, naga mþarera manenea, ana wona na sira, naga pe mþarera manene re sane naga poli. Monar sitomþal silaga sane Ntewa pe mla re ga malena viu pa yermene naga taaga poli, ana mla ga pan la luoka, yermene amio sira la ga luwoka maran taaga.

Ana visae yermene tai ve mþarera manene re va wona, ana kiena sitomena vito ga tanonia, malum ruru wo vania, yoko lotena kiena lalua nene ve va map re ga mrapa komsusa, ana yalen silau va tol yo e naþa Ntewa sike ea.

Monar avatanon amiu vena kiamiu sitomen la imi ve taaga

⁸ Visen maro tai e lepas nene, nesape popon ala ruru sitomen la ne nepisawal ma meta ne. Kam punu ga, monar amþareranli naþa silaga asu ruru amio amiu naþa kiamiu sitomen la imi ve taaga ga. Sinemiu ye amiu, akekaran naþa sane kam na ape mratava taaga,

awo van amiu, aligan amiu asike sina vatanon amiu. ⁹ Naga naþa kila piowa pan ko, ve okila maran re si viowa vania, a naga naþa viuelin ko, ve oviuelin maran re sina. Visae ya naþa imi van ko, yoko osuþa ola ga navisatamþeena navisa ruruena wo vano. Pelaga wo la ne sanene Ntewa pio itania, vena tela ve sanene silaga, a visae tela navisa ruruena va yar taþena, yoko Ntewa ligan kiena navisa ruruena sike e kieta malena. ¹⁰ Navisaarena la ne sanene sike e Tusi na Yauena la rui, naþa pisa sanini, sape:

“Yar naþa kekaran sape su ruru suþa wo e yomarava nini, pona sinenan sape kiena malena va wo, ve piavi, monar kilawo visena viowa lala ve molue re kome pulgona, monar visuar ruruia sa naþa ve visokan re.

¹¹ *Monar ligan naviowaena, kila ga wo. Monar mþareran suþare, a monar þiyonli naþa silaga were imi lavisi likan yeririna lala.*

¹² *Suþe suþa pisu manene ruru ke yar naþa kila ke po, ten kiligana pan leniena kien yar wo la ne sanene. Ana la naþa akila ke piowa, maran mþarera pan la, pilon ga mþasina pan la.” Yauena 34:12-16*

Pogos naþa akila piowa pa yeririna wo kiena ne

Ntewa lala

¹³ Visae tom̄areranli naña tekila ruru sur make ga wo na wo, ve tesitom re tevisave yar lañas sinela kar ita vanon poli. ¹⁴ Pona pogos tai avisu naña tesuñña tekila ke po sa naña Ntewa sinenania, ana teilan ga asuññalu akila kare ita vanonia. Ana visae ve sanene, monar tevisu sane naviowaena nene pe pe sur re tai poli, naga navisa ruruena ga tai naña Ntewa mla pan ita. Tekilia tesitomñal visena na tuş kiena ne yermarua navisawalena Aisea, naña pisa sanini, sape:

“Yar kiena ne Ntewa, ve sineña kurkur re,
ve omaraun re ya naña yeririna na yomarava la amaraunia.”

¹⁵ Visena nene sape monar ve temarau re, ana ya naña monar tekila, e losineta, monar teligan Kristo ga su metavan sur make ga, naga taaga pe kieta Suşe. A monar tekila ruru ita silaga, sa naña visae naviunena tai imi viun sape komin ya ne temlelaga, komin ya ne toşasine Yesu, ana monar tekilia ruru ve sanape naña yoko tekilia tela navisatameena tai naña po vano.

¹⁶ A visae navisatameena vano, monar va amio ga şelaga malum, a şelaga navatanonen yaru. La naña sinelan ke kila kareen la naña amlelaga e Kristo, akilia akoan visen viowa ve moki vim van amiu, ana

avisuar amiu, pe pon re si akuan maran si visen viowa la van la poli. Visae akila ve sa nene, siraunia akilia amawan si kiamiu visena marera la nene vapisi, a visae amonñau ga van la, yoko la ga monar amawan si kiela visena marera lala.

¹⁷ Visae Ntewa sinenan sape naloge viowaena kilia vim m̄alivin ita pog tai, pe pon re naloge viowaena nene vim m̄alivi komin ga sur viowa lañas naña ita ga tekila poli. Ana popon manene laa naña visae naloge viowaena nene vim m̄alivin ita, komin ga suri wo la naña temiyuñnen ke ne. ¹⁸ Asitomñali Kristo, naga sanene. Naga pe yar mesmes manene laa, ana naga mloge piowa manene paşisi komin yar viowa lala. Kieta mlamulen viowa ita yeririna na yomarava lala mok liu, ana e kiena marena yam taaga nene kila sur make rui naña kila sane kieta mrapa suñña naña kilia were ita teva lavisin Armata Ntewa. Akila kare nña tasnena Yesu sanene panoo marşan nenaga, ana po paşisi naña siraunia, naga mal sina e namareraena kiena Ninuna ne Ntewa.

¹⁹ Ana sumon naña mal si sanene, naña m̄eke e lelen marena naña, namareraen kiena Ninuna ne Ntewa pimi pulemamaga ea, kila naga pa mlologon meraravan pa ninuna taşena la naña asike e nene, sape nagane Ntewa

taulu la narui, ana Yermare naga kila p̄ele nena yonia.
²⁰ Ninuna la nene, nane yeririna sur la naṣa yepel mavin Ntewa, sane la nanua e pogos kiena ne yermarua Noa. E pogos nene Ntewa sum̄ate la ke sape avilon la, mla pog piavi pan la. La asuṣa ga sane, Noa miyuṣaen ṃa kiena pupia waa nene, ana pe asitom re nenaga, ana pogos naṣa womie pulemaga la atalilu. La mok naṣa akovio e pogos nene, ana yar la lua la ga naṣa amal asike e pulu waa, nane Noa ga la orelu nene.

²¹ Ana pupia wii naṣa kus la amal e kiela waa nene, naga kana kinasnena ya ne pan ita nagane? Naga kila tesitoṃal si wii taṣena, wii na tamalia itaena, nane wii naṣa akee ita ea. Wii nakeena na nene, naga pe kila re sa naṣa yepeta la mekiṣ poli, ana kiar ruru ita sape Ntewa piewo kieta mlamulen viowa lala, ana ve temawan re sina vania.

Nakeena naga mligan kieta malena tesu ruru tesike temio Ntewa narui, ana popon tesitoṃal ṃena tesape ane kila kieta mrapa sanene? Yesu Kristo ga kila, pimi kome kiena nasuṃalen si petan marena. ²² A siraun nene, p̄asuṣe si pa ma e peni, pa totano teke amio Ntewa e liṃana marua ma metava, naṣa navisi lala, a pupia yerkawa lala, amio ṃareraena lala, la make ga asike vatanon kiena

navesuṣenena.

4

Nasinenanena kiena ne Ntewa naga su p̄es e kieta malena

¹ Sa naṣa nepisa rui, Kristo naga taṃan naṣa p̄ar naloge viowaena la moki e yepena, ana ita ṃena ga monar tekila kieta sitomena ve sa ke ga nene. Yar naṣa tasnena mloge piowa, ve visa re visave viowa, komin naṣa visae naga va warpo yo e naloge viowaen ta sanene, kilia kila naga ṃarera manene laa sane, vena liganen p̄elaga na mlamulen viowa lala.
² Yar sur na sanene, naga pe pa manene re si e kiena malena na yomarava nini poli, naṣa sinenanena viowa na p̄elaga kiena ne yeririna imi ve keviu manene e kiena sitomena, ana naga sitom ga sur mesmesu la naṣa Ntewa sinenania. ³ Kieta malena, naṣa tekila kare komṣas keviu pa rui, naṣa tesuṣa tetelivi ke ga temio erau la naṣa pe amlelaga re poli. Ita temio la e malena viowa naṣa pule e nakila maneneen p̄arita, na wereen sira lala, na mun maneneen wii pano tepe wowe, na veveyuena a na kilaen mara, na kilaen ṃaagena kar la pano-o yemlagi, nakilaroen navisaluaen lala, amio nalotunen nono lala.

⁴ Nane kieta malena ke na sumo narui, ana nagane, kieta erau nene amninue asape ita na sanape

narui. Añal naña pe sinetan re si taveve laen poli vena kieta malena talilu e pulmaran kiela sukořene, ana pe akekaran re nenaga, kila sinela kar ita pařisi. ⁵ Ana ve tesitom re suria, yar sur la ne sanene yoko asuñalu ase marana ne naga naña yoko liřere yar mal lala amio mñena yar la naña amarmare rui. Yoko monar avisawal kiela sur la vania, ana e pogos nene narui, yoko avisu kilale kiela napiowaena lala. ⁶ Ana tařatete ve sanene va nalelagaena lala. Pona yar na yomarava la aliřerela ala nakoena na yomarava van tasnela, kilia va tol naña akilalu kiela malena. Ana pogos naña asuñalu ase marana ne Ntewa, yoko naga la nalaena na malena van ninula. A malena ne nane pe pupia sur naña kila tesuñã temlologon ke lologena wo van yaru lala.

Pelaga kiena li nalelagaena lala e pogos naña legiena maro pimi ke lavis

⁷ Nesape nevisa sanini, sane lavis tetol luas nen sur make narui. E pog na sanene, nalelagaena lala monar asmãl ruruia naña kiela sitomen la ekik ruru wo, vena ve aursulan re leniena. ⁸ A metavan sur tařena make ga, monar asitom manene la si vařisi, komin naña visae tesitom yar tai, kila sa naña meme ga na viewoen kiena mlamulen viowa lala. Visena tai pisa sanene rui, sape

mlamulen viowa mok liu, ana nasinesiena kilia kalo la make ga. ⁹ Sur tařena, li nalelagaena lala la monar akekaran ga naña avisuar la sina e mñala uña. ¹⁰ A la make mñena lala monar akilia ruru namareraena amio nakiliaena tařena tařena lala naña Ninuna mla pan la, monar ayuñae ruru amio vena iilaen kiela erau tařena lala. Visae avisuar ruruia, akilia akila naña yoko lemamiena wo kiena ne Ntewa imi warpo yo e la. ¹¹ Yar naña nakiliaena na visena teke ea, naga monar vis ruruia sa ga naña visen kiena ne Ntewa ga lelaga suñã řar wowo ke e pulgona. Yar naña nakiliaen naiilaen yuñãena sike ea, naga monar kila wo amio namareraen make ga naña Ntewa mla pania. Visae silaga tekila make sur wo ve sa nene, yoko yar make akilia aieluar Ntewa vanonia, aieluar naga komin kia kiena ne Yesu Kristo, naña naurarena make ga a namareraen make ga ape kiena ga vano vano ve uro re.

Naloge viowaena kiena ne li nalelagaena lala

¹² Erau lala, nekilia nesape nagane apane ke pog na loge viowaena tai naña kila amloge piowa pařisi. Ana sineun nesape nevisa van amiu, sa naña ve ailan manene re, ve avisu re sur nene sane sur tai naña asitom ke asape tařatete imi mñalivin amiu pog tai

yo. ¹³ Ana ya ga naŕa akila, akekarana ga naŕa akilia ave ŕegas amio Kristo e kiena naloge viowaena lala. Visae sanene, yoko sirau-
nia, pupia kekarena vaŕisi van amiu, naŕa akilia ave ŕegas si amio e pogos naŕa imi m̄aliv amio kiena naurarena. ¹⁴ Visae taŕena la akilia asape kia kiena Kristo sike e ko, yoko akilia akoven viuelen viowa la imi, ana ve ositom manene re. Yoko pupia navisa ruruena suluega e ko, komin naŕa Ninuna ne naurarena kiena ne Ntewa nae ma e peni sike e kioŕna malena. ¹⁵ Visae ala nakoena tai pona naloge viowaen tai imi van ko, pe pon re akila komin naŕa asape ko na yar na weŕaren yaru, pona ope yar na vin-
auena, pona ope yar na kilaroen navisaluaena, pona ope yar na kilaen viowa yo.

¹⁶ A visae akila komin ga naŕa akilia asape ko na omlelaga ke e Kristo, ve okila re sane omawa, ana monar oyeluar Ntewa naŕa pisu ko ke sape ko na otoroki naŕa kia kiena ne Yesu Kristo sike e ko.

¹⁷ Nagane, pogos na liŕereena siar ke rui, a yoko va m̄a tol ŕesan mratava m̄ana ne Ntewa. A tepisu naŕa naga kilia taŕan pog m̄arera laŕasia warpo yo e malena kiena nariŕa lala, ana visae kila ve sa nene va la naŕa amlelaga, teminue kare narui aŕa yoko ve sanapen la naŕa pe sinelan re logearen kiena Lologena

Wo poli. ¹⁸ Nanene na sane visena tai na Tus marua na Visena na Manmaruaena naŕa pisa sanini, sape:

*“Yar naŕa asitom asape naga mesmes rui, pe sur m̄arera tai naŕa Ntewa kilia tamalia.”
Pakaiwa 11:31*

Ana visae ve sanene, ositomyuli yar la naŕa yepel mavin Ntewa, la ape yar na mlamulen viowa ga narui. Yoko ve sanapen la?

¹⁹ Pogaga, e nene nevisa narin visen tai van amiu naŕa Ntewa taŕan naloge viowaena pimi m̄alivin amiu. Nesape asuŕna akilakila ga wo van yeririna make ga, a asuŕna aligan kiamiu malena sike e limana Ntewa. Naga pe Ntewa naŕa sii make suria, naga pe Ntewa naŕa masisun ruru sur make ga, a naga pe Ntewa naŕa tekilia towasine ruru naga silaga.

5

Visena pa pa nasumonena lala

¹ Pogaga, nagane sineun nesape nevisawal sitomena laŕasia van amiu nasumonena lala na suŕare. Nesitom nesape netorokin nevis van amiu sanene, komin naŕa in m̄ena nepe nasumonena, a metavana, in m̄ena tai naŕa nepisu Kristo e kilamarau, pogos naŕa kus ke naloge viowaena metava e lak torovia. Ana nekilia ruru nesape in m̄ena tai naŕa yoko nesike loyur̄a e naurarena la naŕa yoko imi sirau,

nane nepisu sane popon nekila visen la nene vena iila amiu. ² Neviun manene tan amiu sanini, nesape monar avisuar ruru pegas nen sipsip la naþa Ntewa mligan sike vatanon kiamiu navisuarena. Nanene na yuþaen tai naþa keviu paþisi, ana lelaga, pe pon re visae akila naþa pe sinemiun re nakilaena poli. Ana popon akila ga amio sitomena naþa kekaren nakilaena, sa naþa Ntewa sinenania. Ana yuþaena ya naþa akila, ve akila re ga komin narin nalaen tai naþa yoko alavia, ana akila ga komin naþa narin sitomen tai teke e amiu sape akila vena iilaen yar taþena lala.

³ A la naþa asike e limamiu vena avisuar la, ve akila re naþa akilali awarar manene laa, ana monar asumon ruru la, avian la e mrapa, ana akilia ataveve lelen lamiu. ⁴ Visae ayuþae ma sanene vano, yoko þar na visuaren sipsip kiena ne Ntewa yoko kekaran amiunia. Pogos naþa imi maliv sina, yoko visir plan amiu sane kiena þarin suþe lala, yoko vaia ruru amiu naþa kiena pupia navilavilaena naurarena vila e amiu naþa taþatete si vito tano pog tai.

Visena pa yar taþena lala

⁵ Nagane visena imi van amiu kam mee lala. Nepiun manene pan amiu nesape monar akekaran naþa

avatanon kiamiu yermarua lala a kiamiu nasumonena lala. Visen la ne sanene kam punu ga monar alavia, komin naþa popon silaga tekila þelaga na vatanoena van ita. Nanene sane visena tai na Tusi na Manmaruaena tai pisa nanua laa rui, naþa sape

“Ntewa pialuþar þelaga na vilaveena, ana miila þelaga na vatanoena.”
Pakaiwa 3:34

⁶ Sanene, popon tekila kieta sitomena su lue ga vatanon Ntewa. Teligan ita e limana, ana e kiena mareraena yoko kilia visirlua ita si pogos tai. ⁷ Teligan kieta nau-rmiena la sike e masina, komin naga sitom ita paþisi, sinenan sape iila ita.

Avisaluþar Yermare

⁸ Nesape nevisa mena visena na weþege amiuena tai, sane monar avisuar ruru amiu, monar avisu kilale towe laa mrapa. Kieta nasinekar naþa Yermare, naga telivwo ita lue ga, naga sane pupia sur mal tetan tai naþa sane visokarian manene laa nalelagaena lala, visae sumalun la karwowa kare la vitolwowa la vapisi. ⁹ Ana ve ataman re kila sanene, monar asamal marera e kiamiu naviawaena vena avisaluþar ruru naga. Pe kam re ga naþa naga suma kilali amiu ke poli, ana akilia rui sane kieta erau taþena la mok liu teliv e yomarava nini

piora, naloge viowaena la pimi m̄alivin la ke m̄ena ga, ana popon ita make ga tesuñal m̄arera vena Yermare ve taulu re ita yar tai. ¹⁰ Lelaga naña asuñã amloge piowa towe laa e pogos nene, ana kieta Ntewa nalemamiena make ga yoko iila amiu. Naga ke narui naña mligan plan amiu rui vena yoko amiu amio Kristo loyuñã e kiena pupia naurarena, a naga ke narui yoko ligam ruru amiu sina nagane. Yoko sinemiu ve kurkur re, yoko ve akulul re, ana e kiena nam̄areraena, yoko akilia aviawa ruru sina. ¹¹ Nane, teyeluar kieta Ntewa nene, komin kiena nam̄areraena suñã taulu make suria, a yoko suñã taulu vano-o tařatete řisi pog tai, sanene narui.

Visena maro

¹² Nesike e nini nemio kieta puruvi wo naña Saelas, nořasine ke naga e sur moki, a naga miila inu sirilua kiamiu m̄aki nene. Nekilia nesape m̄aki nene plas laa ga, nepis ve tokak ga, ana ya naña sike ea, nekilia nesape pisawal ruru řelaga wo tanea lala na lemamiena kiena ne Ntewa pe lelaga, naña torokin amiu naña asike e nagane. Ve sanene, auloia, alavia vena iilaen kiamiu sitomen lala, silaga asuñalu m̄arera ase ea.

¹³ Lala na suñare nae nini Rom, amio m̄ena Mak,

naña nemla naga sa ga naruu narui, apisa po kolu-lag pona pokolemalo pan amiu. Mesike e nini, mepisu piowa towe ga, memloge sane mesike e pupia pulkumali viowa nasumo naña asape Papilon. Ana naga pogaga, komin naña mekilia mesape Ntewa mligan plan imimi naña memio amiu, ita teve kiena.

¹⁴ Nevisa maron sanini, nesape pogos naña aim lele taaga, aworworun amiu, amun pipimiu sa naña akekarã ruru amiu.

Ana kiau leniena sa naña suñarena wo kiena ne Yesu Kristo sike make amio amiu naña ape kiena.

Inu, Pita.

Maki Nalua Naŝa PITA Siriyuia Visayuena Na Tusi Nene

Sunienu plas na tusi nini

Maki kiena Pita na lua, Pita siria pan li nalelagaena lala e pogos tai naŝa navianiena la asike ne, ana kiela vianiena la pe mesmesu re poli, kila naŝa yaru la ataveve la asumã amloru e mlamulena viowa. Ana Pita pisawal pa li nalelagaena la nene vena monar avisuar ruruia vena yaru la nene ve avilovilon kare re kiela sitomena.

Ana na kila woen ŝelaga viowa la nene, monar yaru kilia ruru Ntewa, a monar taŝan Yesu Kristo, naŝa kieta Suŝe, vimi ve suri na sumo e kiena maliena. Li nalelagaena lala e pogos nene, amloge lologena wo nene e yaru la naŝa apisu Yesu e kilamarala, a naŝa amloge kiena visena lala, e pogos naŝa pian ke yaru lala.

Pita siri maki nini vena visirluaen sitomena kiena li nalelagaena lala, komin naŝa e pogos nene, navianiena la naŝa kiela vianena pe mesmesu re poli, asumã apisawal ke asape yoko Yesu taŝatete si wasuŝea.

Ana Pita sape Yesu pe ŝasuŝe re polua komin naŝa Ntewa pe sinenan re yaru tai kovio poli. Naga sinenan

sape yaru makega monar avilon kiela sitomena vetan kiela mlamulena viowa lala (3:9). Ana yoko naga monar ve ve piyavi re, Yesu wasuŝe si imi.

Komŝasnen tusi la na nini
Visena ŝesa 1:1-2

Malena kiena li nalelagaena lala 1:3-21

Navianena la naŝa kiela vianena piowaga 2:1-22

Yesu yoko wasuŝe sina 3:1-18

1 Mak nini, inu Saemon Pita na nesiria, sa naŝa nepe yar na yuŝaena kiena ne Yesu Kristo, a nepe kiena nalologena. Nesiri ke piŝasu pan amiu, amiu naŝa atol naviawaena e naga rui po paŝisi sa ke ga naŝa metol sumo. Naga pe Ntewa a pe kieta natamaliaena ita punu ga, naga kila lue ga po pan ita silaga. ² Sanene, nesitoŝal amiu, nemlen nesape yoko akilia ruru Ntewa kieta Suŝe naŝa Yesu va re laa ga wa, vano yoko naga kila kiena lemamiena a sumarena ulemamaga e kiamiu malena.

Yesu pio ita vena teve kiena

³ Yesu po pan ita paŝisi, naŝa e m̃areraena na kiena urarena a kiena sinewoena, naga pio ita vena tekilia ruru naga sanene. A pogos naŝa tekilia ruru naga, naga ga kila sur punu ga e kiena nam̃areraena wa nene, naŝa kila malena kiena ne Ntewa a kiena ŝelaga wa ule e

ita. ⁴ Yesu kila na tetol nalaena wo la nene naña apowo pañisi, tepisu naña taveve ruru nena ga kiena navisaarena lala. A e mrapa nene, tepisu naña naga kila kieta malena pa pranar ke amio malena wa kiena ne Ntewa, a sumã miila ita vena toure matan kororak lala na sinenanena viowa lala na yomarava nini. ⁵ Komin sur ne na nene, monar amãraran naña akila kiamiu malena lala imi wo la ve sa nene. E naviawaena naña teke e amiu rui, popon asikol si sinewoena. E sinewoena nene, popon asikol si kiliaena amio manmaruaena. ⁶ E kiliaena amio manmaruaena nene, popon asikol si nawanar ruruena, a e nawanar ruruena nene, popon asikol si sitomena viavi, a e sitomena viavi nene, popon asikol si ðelaga wa. ⁷ E ðelaga wa nene, popon asikol si sitomena wo, a e sitomena wo nene, popon asikol si sinesiena.

⁸ Pelaga wo la punu ga nene, visae asike e amiu, a visae asumã akapur ke silaga, yoko kiamiu malena kilia war mras wo la naña kiki vañisi. Pona kam na akilia kieta Suþe Yesu Kristo rui, a visae ðelaga la nene ve su re e amiu, yoko taþatete nena akila kiena yuñãena tai. ⁹ Yar na sanene pe kilamara þala ga, taþatete visu kilale suria a kiena sitomen plas ga. Naga sinen þesan sape akevan kiena mlamulen marua viowa lala, pe sitoñal re si sape sike e

malena wo tai poli. ¹⁰ Erau lala, pe pon re yar ve sanene poli, ana nomãraran amiu ke nesape kam make veve taaga monar aþionli naña silaga akila yuñãena wo lala vena avisawal ke asape Yesu pio amiu ape kiena, naga pe pe sur na visokanen re nene poli, a pe pe sur na kirakiraen re mñena poli, ana naga pe sur na lelaga. ¹¹ Visae akilakila mña sanene, yoko taþatete aloru pog tai, a pulutava na vaen loyumã e nasuþenena kiena ne Yesu Kristo naña naga pe kieta Suþe a Natamaliaena yoko suwowo ruru nena van amiu. Yoko aworworun ruru amiu vena ava asulue asike amio. ¹² Nekilia nesape visena la nene, pe pe urviu re pan amiu poli, komin naña apuarar ruru yam piavi rui. Ana taþatete neligan naña monar nevisasawal kaþaran mña visena lelaga la nene van amiu. ¹³ Naga nene pe yuñãena na kiau malena, vena iila amiuena vena ve sinemiu ve þesan re, a nekilia yoko monar nekila mña sanene vano vano-o tol pogos naña kiau malena þisi. ¹⁴ Suþe Yesu Kristo pisawal pan inu rui sape in na ve ve piavi re yoko neligan tasneu nini nevavin, ¹⁵ a sumon nene, sineun nesape nesiri plan sur make su ruru sumã ga. Ve sanene, visae nevavin, ana mrapa sike þa rui vena akilia asitoñal visena la nene silaga.

Visena kiena Pita amio nalogena tařena lala pe lelaga

16 Imimi nalogena lala mepian amiu mesape kieta Suře Yesu Kristo yoko wasuře sina amio kiena pupia nařareraena. Ana pe pon re lařas avisayu navianena la nene asave nanene na visena na sitomen kien yar ga, pona avisave nanene na sa ga suniena marua ga lala. Mekilia mevisaar van amiu mesape pe sa re nene poli, komin nařareraen kiena Yesu Kristo naga pe sur lelaga nařa mepisu e kilamaramimi rui. 17 Nanua na, mesike memio e pogos nařa Ntewa mligan nau-rarena nae ma e peni sike e naga, a mieluaria, nařa kiena visena tai molue kom meta pitomi pisayu naga, sape

“Nanene naga naru nena napo nařa sineu si pařisi, nekekan nena ga naga.”

18 Imimi ke narui memloge pulgon nae ma e peni nařa pisawal visena nene, naga nene e pogos nařa mesike memio Suře ma e tavie wa nařani. 19 Ana komin sur la nařa mepisuia a memloge, mekilia ruru merarava e kiamimi sitomen lala, mesape nanene naga sur lelaga la nařa navisawalena nasumo la apisawalia. Kiela visena lala sane kapi vivaga wo tai vena vivagali yemalolo nařa tesike ea,

ana popon touloyuia ana telavia. Sanene yoko kilologia mrapa van ita vano tol pogos nařa legiena viu imi mařivin ita, a verue na kolulag vam metava e kieta sinapane vena tegoli kieta sitomen lala.

20 Ana sineun nesape nevisa si sur tai e lepas na visawalena kiena ne navisawalena marua lala nařa asirilua sike e Tus Wa. Naga sanini, sa nařa navisawalen lala nene, tařatete yar tai sumalu visave naga taaga kilia ruru kala kinasa. 21 Nanene komin nařa visawalena la nene, tařatete amolue vetan sitomen ken yaru, ana Ninuna ne Ntewa naga miyuřae e la, sumon la vena avisawal visawalena kiena ne Ntewa lala.

2

La nařa apian ke visena navisokanena

1 Ana sa nařa tekilia, e pogos kiena ne navisawalena wo la na sumo, pogos lařasia navisokaninen navisawalena mařa mařalivi ke e marana ne yeririna kiena ne Ntewa lala. A yoko ve sa ke mařa nene van ita nagane, nařa pog tai, navianena navisokanena pona aim mařalivo. Navianena kar la ne sanene, yoko awar vinaun ga navianen lařas nařa pe pe lelaga re poli imi, la akilia asape amlelaga e Suře na mava, asape naga tamalia

la, ana kiela navianen la nene akawe ke sina ga naga. Navianen la nene kilia kila kare naviawaena kiena ne nalelagaena lala, ana navisokaninen vianena la nene pe apisu kilale re asape kiela nakoena pimin la ke vilaga narui. ² La apiowa manene pañisi, a temawan tevisayu ya naña akilakila ke ne. La asape amlelaga, ana akila ke ga naña yeririna tañena la apisu kilale kiela ðelaga, asumã apisa kare ke kieta mrapa na lelagaena pañisi. ³ Yar na visokanen lala, sinelan manene la sur lala, yoko akuan visena kiki la ve moki van amiu vañisi, yoko akilayon li naña aure amiu e suniena la naña apule e suri la naña pe pe lelaga re poli. Ana pogaga, Ntewa na pe momalio re poli. Naga mliþerela, kila ruru kiela nakoena su ruru sike nakonua rui.

⁴ Popon tevisu kilale ðelaga kiena ne Ntewa nalipereen yaru a natalialiaen yaru nanua sumo. Nañesa, asitomyuli navisi kiena ne Ntewa la nanua sumo, naña laþasa asumãlu asape asu metavana. Naga sape pe sur re tai nene poli, ana suñalu koven plan la veraga, apito tano e puluyo malolo e kapi na loge viowaena, vena asumã e nene vano tol pupia legiena na lipere maronen yar lala.

⁵ Ana asitomyuli mēna yeririna nasumo la nene, naña e pogos kiena ne yer-

marua Noa. Pogos naña mlologon ke ðelaga wo kiena ne Ntewa pan la, þarila mārera pañisi, yepel mavinga. Ana Ntewa kila pupia womie þere plan la, ana Noa ga amio namratava puna la olua, tamalia la.

⁶ A naga sina, asitomyuli pupia pulkumali keviu lua nene naña Sotom amio Komora. Ntewa māl kiela napiowaena lala, ana sikap mumu la apim ape posnoy-avi nenaga, a naga nene vena visawalen sanape naña yoko kila va la make ga naña asike e malena viowa.

⁷ A nasitoñal maronen la nanua sumo ne, nane yaru naña Lot. Naga pe yar mesmes tai, a naga mloge lue piowagan ðelaga na kororak kiena yar la naña akilaroro ke navisaluaena, naña naga sike likan la. ⁸ Legiena make ga naga suñã pisu ke kiela malena viowa lala, a suñã mloge ke kiela viuelen lala, ana Ntewa kila sanape? Mla nakoena pa yar viowa lala nene, ana tamalia kiena yeririna wo naña Lot.

⁹ Ana visae tesitom ruru e la nene, yoko telual ðelaga kiena ne Ntewa tai, naña sanini. Naga kilia ruru ve sanape naña wereplan kiena yeririna wo lala vetan sur na kilalien lala, a naga kilia uarar ruru yeririna viowa lala asumã awar kiela nakoena lala. Yoko kila la awar malumun mã naganegane sumo wa, ana e legiena

naliṗereena awar make ruru nena napo.

¹⁰ Visena nene tol make yeririna lala, ana tol manene laa naṗa asuṃa ataveve ke nasinenanen viowa lala na ṗelaga na mlamulena naṗa apaeme amio, ana tol ṃena la naṗa pe sinelan re yagogonen poli, ape ṗar ṃarera paṗisi. Yar kar la ne sanene, aṗarwarlan kiela ṗar ṃarera la ne sanene ṗisa, ana aplaven ṃena kiela napiowaena lala, pano pe amaraun re si sur tai poli, ana apisa kare yerkawa kiena ne Ntewa lala. ¹¹ Navisi nae ma e peni aṃarera taulu la nene, ana akilia asape asike e marana ne Ntewa nae ma e peni, ana amaraun visa kareen yaru la nene, ana yar la nene na pe sa re nene poli, la asitom korenan ga sur la nene. ¹² Sur la mok liu naṗa tepisu sane apa laa metava pona ape wa manene laa, ana yar la nene pe apisu kilale re poli, asuṃa aṗarnena kare ga sur wa la nene. Kiela ṗelaga la sanene, kila narui la asaga sur mal tetan ga lala, naṗa akila ke ga ṗarila pe akila re suri wo poli. Akila ṃa wowe sanene pano pano ailan ga sa naṗa yaru la aligan lokulia la, awe moṃar la amare, a yoko ve sa ke ṃena nene van la nene, ailan ga alual kiela marena. ¹³ Yar sur la ne sanene, akekan ga akila ṗaṗagena lala na ve torog kareen ga kolpae,

a e pogos na kilaen kamiu kinanena wa lala apim asike loyumuṃa, kiela sitomena pulen ga kekarena na kiela viowaena lala. La na sa ga kurka pona magka la naṗa akila kare tasnemiwo lala, ana pe asitom re nena asape kiela napiowaena lala yoko kila ke sina ga la aloge viowa manene poli. ¹⁴ Kilamarala pulen ga sira na kilaen kolau, a akan ṃa mlamulen viowa pano-o pe sinela maren re poli. Kam laṗas naṗa amalum towe ga lala, aṗere la narui apa amio la, a ape yar ṃena la naṗa apian ruru la sina e mrapa na vinayaen sur lala. Lelaga naṗane, la nene ape ṗegas tai naṗa yoko nasinemimiena kiena ne Ntewa yumu plan la make na wa. ¹⁵ Amligan mrapa mesmes rui apa ataveve ke narin mrapa la naṗa tekilia tesape mrapa kiena yaru naṗa Palam Peor, naṗa Visena Wa pisayu naga sane yar tai naṗa pe navisawalen ṗesa, ana pano naga kekan manene kan mras nen napiowaena. ¹⁶ Ana pogos tai, milan ga naṗa Ntewa kila narin togki tai pis pania vanon kiena napiowaena lala. Togki lala pe akilia re apis poli, ana nanene naga pis sane yaru, ṗere mesmesun towe laa kiena ṗelaga viowa lala. ¹⁷ Yar viowa la naṗa nepisayu la ke ne, nekilia nevisa ṃena nesape la sa ga pulus nen wii naṗa mema rui, yar naṗa

moto karia tařatete lual wii ea. Pona asaga lul malolo tai, tekekarania tońape yua kove, ana peraga, lagi mlelua pano. Ana yar la nene, lelela napo pe yemalolo ga mēke ga wa, yo ne nanene pe lele na loge viowaena. ¹⁸ Yoko monar awar nakoarena na sanene, komin nařa gola la pulen ga visokanena amiō visvilaveena nařa řere manene sitomena kiena yar tařena la pařisi. Yar tařena la nene, ařure matan yomarava nini apimi ga loyuma na wa, ana nagane yar viowa lala nene asuma apisa ke visena la nařa pagan nasinenanena viowa na mlamulen viowa la nařa sike e la pimi keviu manene laa narui, ana e mrapa ke nene asuma ařere plan la ke sina ga. ¹⁹ Kiela malena sike vatanon yerkawa na kilaen mlamulen viowa rui, ana sanape nařa apisa kotalia ke yar la asape visae atavevela, yoko alual malena wo? Tařatete ve sanene, komin namareraena ya nařa pe suřen kionā malena, ko ope kiena yar na yumaena narui, sane la nene, nařa na nagane apim sa ga yar na yumaena na namareraena na mlamulena viowa narui. ²⁰ Visae lelaga nařa asape amāl kieta Suře Yesu Kristo Natamaliaena e kiela malena, apisu kilale nařa řelaga na yomarava suma kila kare la ga, kila narui ařure matania apim,

sanene na po pařisi. A visae yam ve plas ga awasuře ke sina ava e kiela malena nařa ařure matan ga na wa, nanene na yoko va viowa la narui. ²¹ Visae pe akiliali re nena mrapa na řelaga mesmes po, sanene na po towe laa pan la, ana pogos nařa akilia ruru po, apa li e ve tokak ga, ana siraunia ařasuřela ke sina apa varau, nanene piowa pařisi. Visena wa kiena ne Ntewa la nařa amla pan la, la na akekarān řesan nařa ala e kiela malena lala, ana nagane aplon ke sina māsila pania.

²² Yar la ne sanene, visen lua nařa pisayu la, nařa tai, pisa sanini, sape

*“Lokul ga kilia va kan ke sina ga kana liluaena,”
Pakaiwa 26:11*

a nalua, pisa sanini, sape
“Visae okevan ruru kionā nompui, yoko monar yal mesmesun ga sukořene va kupo ke sina yo mēke ea.”

3

Legiena keviu kiena ne Suře nařa wasuře sina

¹ Erau lala, sa nařa apisu kilalea, nane kiau māak na lua pimi pan amiu. Ya nařa teke e kiau sitomena vena sirien māki la luoka ga nini, sineun visawalen visen wo lařas nařa yoko akilia asike lue e kiamiu sitomena la silaga vena iilaen kiamiu malena lala. ² Sineun nesape popon tesitońal nā visena

kiena ne navisawalena wa la na sumo silaga, amio mēna navisaluaena viu la naña kieta Suḑe Natamaliaena mla pan imimi kiamiu li na lologena lala, naña mepisawal liluen pimi pan amiu.

³ Sur ḑes naña sineun ne-sape nevisa naga sanini, ne-sape monar akilia sa naña e legiena maro lala, yoko yar la naña na visa kareen yuḑaena kiena ne Ntewa akilia aim aḑalivi. Pelaga kien la nene, la sinelan ke ga suri ya naña asitomia, ana asitom korenan ga sitomen kiena yar taḑena. ⁴ Sur tai naña yoko avitalia ita vanonia, naga e lepas na visena kiena kieta Suḑe naña sape yoko wasuḑe si imin ita. Yoko asuḑa aviuvunia, avisave “Nawasuḑeen kiena kiamiu yerkawa naña pisaaria pan amiu, nanape? Siar e pogos kiena kata apua la pimi, sur make ga na yomarava nini suḑa kiriri pogaga. Imimi na pe mepisu re nena sur tai poli wa, pona kam ga apisu yo?”

⁵ Ana pogos naña apisa ke visena la nene, la pe asitom re naña navisaarena kiena ne Ntewa naga pe lelaga silaga, a kana visena nena kana pupia ḑareraena sike ea. Sa naña e pogos na siiena yomarava, kiena visena ga kila sinapane, a kila yomarava nini amio kana porotano lala a kana si lala. ⁶ A siraun nene, kiena visena kila pu-

pia womie kalo sina yomarava nini, naña ḑere plan make nena sur punu ga naña sike ea e poglis nene. ⁷ A kiena visena nena miyuḑae ke nagane na wa, suḑa ḑuarar ruru ke sinapane a porotano na yomarava vena asuḑa vano tol naña pupia kapi na legiena na liḑereen yaru yoko imi kekan plan malena kien yar la naña pe sinelan re Ntewa e kiela malena poli. Nanene pe ḑareraena kiena ne Ntewa, ana yaru la nene pe sinelan re naña akilia poli.

⁸ Ana erau lala, e lepas naña na visaarena na wasuḑeen sina kiena ne Suḑe nene, popon naña ve sineta ḑesa re naña Ntewa naga pe pulo re legiena amio kas sane ita poli. E kiena visuena, kas manu taaga pona legiena taaga, lalua maran taaga ga. ⁹ Pona yar laḑasa asitom asape naga kila malen li sur yo, pe kila re ya naña naga pisaar poli, ana pe sa re nene poli. Naga pe kila malion re sur poli, suḑa kila ke kiena sitomen piavi paḑisi, komin pe sinenan re yar tai kovio poli. Naga sinenan sape la pogos ve piavi sanene vena yar la akilia avilon kiela sitomena. ¹⁰ Ana lelaga, yoko pogos tai pupia legien kiena ne kieta Suḑe imi ḑaliv e yomarava. Yoko ve sa yar na vinauena, naña yomarava ninue sape pimi ke narui, ana yoko

iilan ga naŕa imi worunia. E pogos nene, yoko sina-pane lala akakapuru sane polilu, yoko akokovio nena, a yoko kapi kekan make suria vano-o tol naŕa yomarava amio sur make ga naŕa sike ea, yokorena.

¹¹ Ana komin naŕa yoko yomarava imi ve sur koren ga mēke na, nesape neviun tan amiu, nesape pogos naŕa asike ea wa, popon kam na ave yaru na sanape, a popon ave wa pona akila yuñāena kiena ne Ntewa ve sanape?

¹² Monar akekaran legiena nene imi, a visae kam na ave yar wo lala, ayuñāe mārera yoko akilia akila imi mālivi vilaga.

Yoko kapi kekan ma e peni, kekan makea, a yoko imi kekan mumu make sur naŕa sike e yomarava.

¹³ Ana tesuñalu mārera tese kiena visaarena, naŕa sape yoko mātā uñā viū tai, naŕa peni viū amio yomarava viū, naŕa pe purŕes nen ŕelaga mesmesu make ga.

¹⁴ Erau lala, nane tesuñate ke ne vena imi were ita teva e yo nene, ana pogos naŕa pe tetol re poli wa, monar toñareran teve yar wa tesuñā ga, teyekiki, a tesuñā e suñare.

¹⁵ Lelaga sane Suŕe pimi re poli wa, a ve tesitom re viowa, monar tekekaran naŕa mla pogos pan ita vena tevilon ita, mla mēna pulmas pa kieta erau lala, vena la mēna akilia atol nata-maliaena. Sitomena nene,

kieta puruvi wo naŕa Pol naga mēna pisa pan amiu nanua sumo rui e mākai tai, naŕa siri amio manmaruaena wo la naŕa Ntewa mla pania. ¹⁶ A nane visena ke nene naŕa suñā kiakian ke e kiena mākai taŕena lala, pogos naŕa pisayu si na wasuŕeen si kiena ne Suŕe.

Kiena mākai la nene po paŕisi, ana pogos laŕasa kala navianena la urmi towe māga, kila sane visen laŕas naŕa naga siria yaru laŕasia pe apulokilale re poli. Ana pogos tai, yaru la naŕa pe ŕarila po re poli, naŕa pe akilia ruru re sur poli, apuloia apulolon kare kana navianena ne lala pa pe taŕena, sa naŕa asuñā akila ke yam mok li rui e visen taŕena lala e siriena wa lala. Ana pogos naŕa akila sanene, pe yar taŕena re la naŕa aloge viowagan poli, ana kila la ke ga apa e mrapa na kovioena.

¹⁷ Kiau erau wo lala, komin sur ne la nanene nesitom amiu paŕisi. Nekilia nesape akilia ruru sur la nene rui, ana sineun nesape nela si visena mārera van amiu, nesape monar avisuar ruru amiu. Ve atañan re sitomena navisokanē ken yar la naŕa pe ataveve re navisaluaena kiena ne Ntewa poli aim aure plan amiu sina. Lelaga, pe pon re si alor vetan yo wo na viawaena mārera naŕa asike pa e rui.

¹⁸ Kiau visena maro, nesape akapuru aim amarua

ruru e p̃elaga wo na
lemamiena a namanmaru-
aena kiena ne Yesu Kristo
kieta Suṑe a kieta Natamali-
aena. Ana teḷa maran si
naurarena vania, nagane, a
e pogos la naṑa pimi ke ga
wā, vano vano-o ve uro re,
sanene.

Inu, Pita.

Maki Nasumo Naþa YOANE Siriyuia Visayuena Na Tusi Nene

Suniena na plas na tusi nini

Maki þesa kiena Yoane, naga kiena sitomena keviu lua.

Nasumo, Yoane sinenan sape visirlua sitomena kiena li nalelagaena lala naþa aulo maki nini, vena silaga monar asikol la ruruia naþa kiela sitomena ve taaga ga, a vena asikola ruruia amio Ntewa, amio narina naþa Yesu Kristo.

A nalua, naga vena visaen vanila vena ve ataveve re navianiena la naþa kiela vianena pe mesmesu re poli, komin navianena la nene akilia akila kare sumare e kiela visena na visokanen lala, ana yoko kilia kila naþa li nalelagaena la taþatete si asikol ruru la e sitomiena ve taaga.

Navianena la nene asumã apian ke yaru lala, asape þelaga viowa la apimi amãlivi komin yaru la asike e yomarava, a amiyumãe ke ga e suri na yomarava la ne. Amio nanene, asitom sape Yesu, naga narina Ntewa, ana pe pe yaru ruru re sane ita poli. La asumã apisa ke asape visae Ntewa tamalia yaru, yaru nena taþatete sitomali

si malena na yomarava nini, a pe pe suri re poli visae yaru na sanene kila milamulena viowa po pe kila re milamulena viowa poli a pe pe suri re mēna poli visae naga sinena si yaru taþena pona ve sinena si re, ana suri la nene maran taaga ga, pe suri na yomarava ga.

Yoane siri maki nini, sape kila meraravan naþa naga yepen mavin sitomiena la nene pano-o paþisi, a pi-sawal meraravan naþa Yesu Kristo, naga pe yaru nena sane ita. A naga pisaar mārera sape yaru la naþa amlelaga e Yesu, a sinela si Ntewa, monar sinela sisi la mēnaga.

Komþasnen Tusi La Na Nini

Visena þesa 1:1-4

Legiena a yemalo 1:5 —
2:29

Narina Ntewa lala a narina Yermare lala 3:1-24

Ninuna naþa pe purþesnen visena lelaga a ninuna naþa pe purþesnen visena na visokanena 4:1-6

Pelaga kiena yaru naþa sinena si yaru 4:7-21

Pelaga na lelagaena naþa kilia taulu make suri la silaga 5:1-21

Yar na visawalen malena kiena ne Ntewa van ita, naga pimi e yomarava þisi rui

¹ Sur tai, nanua sumo e pogos naþa yomarava siaria, ana nagane in na nemloge,

nepisu e kilamarau, in na nepisu ruru pano-o, netol nena e lumāu. Sur nene, kiena kia sanini, sape Navisawalen Malena, po Purḡes nen Malena, po Malena Naḡa Ve Uro Re Pogos Tai, nane in na sineun nesape nesiri van amiu.

² Sur nene, nanua sumo pe tekilia re poli, naga suḡa ga amio Ntewa arimata pano-o, nagane na pimi ḡarpooyo merarava e marata e yomarava nini narui, ana imimi moki mepisuiā, a mepisawal pan yeririna lala.

³ Imimi memloge ruru nena e kiligamimi lala, a mepisu nena e kilamaramimi, ana mesape mevisawal van amiu vena kam ḡena ga alelaga ea. Visae kam alelaga ea, yokorena kam ḡena aim ave taaga amio imimi, sa naḡa imimi mepe taaga ga memio arimata Ntewa a narina Yesu Kristo rui. ⁴ Sur nene kila pupia kekarena sike amio imimi silaga, a visae auarar ruru visena la naḡa nesape nevisa van amiu e ḡaki nini, yoko pupia kekarena nene sike ḡena amio amiu, ḡisi na kila ita punu ga teloge wo vaḡisi.

Ntewa naga pe purḡes nen yomerarava

⁵ Visena naḡa narina ne Ntewa mla pan imimi, pisape monar mevisawal van yeririna taḡena lala, sa nene, naga pisa sape, Ntewa pe purḡes nen yomerarava, pe narin yemalolo re nena tai

teke puna. ⁶ Ve sanene, visae tepisawal ke tesape tepe taaga temio Ntewa, ana tekila ke ga ḡelaga na yemalolo la na wa, nanene tepisokan ke ga ne, pe tekila re sur na lelaga nene poli. ⁷ Ana visae tesuḡa teyal ḡa e yomerarava naḡa Ntewa sike e silaga, kila yoko telapran ita ruru wo silaga, ana tevisu tana na narina, Yesu, kilia kevan ita temekiki e kieta mlamulena viowa lala.

Nayalena e yomerarava kiena ne Ntewa: Monar teligan plan ḡelaga na mlamulena viowa lala

⁸ Yeririna naḡa pisawo ke, pisape naga pe naviowaena su re e kiena malena poli, kiena visena nene pe pe lelaga re poli, naga pisa kotalia ke sina ga naga. ⁹ Ana visae tevisa plan ga kieta naviowaena lala, yoko Ntewa viewo ita, ḡisi na war plan kieta naviowaena lala vetan ita, kila ita temekiki. Naga ga kila ruru mrapa na kilaen sanene rui, ana ita towasine ga naga sane yoko kila van ita sanena naḡa pisaaria. ¹⁰ Ana visae tesuḡa tevirovia, tevisa ḡa tesape pe tekila re naviowaena poli na, nanene ita tekila sane Ntewa naga pisokan ga, a ita tekila sane kiena visena nowo na lelagaena, pe tepuarar ruru re nena e kieta malena la poli.

2

¹ Naruu lala, sineun nesape nesiri visena nini van amiu vena iila amiu avisuluṗar sane pe pon re si ataṗa mlamulena viowa poli. Ana visae pogos tai, amiu yar tai kila viowa, monar tesitoṃal silaga Yesu sulue ga sike na, sane pe yar wa tai na waren kieta visena lala. Naga mesmes, a mekiki, naga kilia va suṃal mesmes e mara Ntewa, kilia viun tania vena naga sinen ye ita, viewo itania. ² Ana mrapa na kilaen sa naṗa yoko Ntewa kilia viewo itania sanini, nane Yesu ga ne, komin naga pe kuṗaṗaena na warplanen kieta mlamulena viowa lala, ita yeririna punu ga na yomerava.

Nayalena e yomerarava kiena ne Ntewa: Monar telogear kiena navisaluaena lala

³ Visae yar tai viun ve sanini, visave: ?In na pe nekilia re poli, nekilia ruru Ntewa, pona pe nekilia ruru re naga poli? ?In na nepe kiena, pona pe nepe kiena re poli? Ve sanene na, teviun si tania, tevisave, ?Sanape, ko na omlelaga ke e kiena visena lala, pona pe omlelaga re poli? ⁴ Nanene vanon naṗa visae yar tai visa sape naga kilia ruru sape Ntewa, naga pe kiena, a naga pe kila re sur la naṗa navisaluaena kiena ne Ntewa pisa ke ne, yar nene naga pe pisa re lelaga ne poli, pisokan ga. ⁵ Ana yar naṗa mlogear ruru

visena kiena ne Ntewa, naga kila meraravan sane naga kekaran kemua lelaga, pimi keviu lue ga. Ana e mrapa na sanene narui tekilia ruru kemua tesape ita tepe kiena ne Ntewa na lelaga. ⁶ Yar naṗa naga pisa ke sape pe kie Yesu, yoko monar tevisuluṗar naṗa naga mla kemua Yesu pe lelaga e kiena malena.

⁷ Erau lala, e lepas tai na, navisaluaena naṗa nesiri ke pan amiu, naga pe pe visena viu re tai naṗa na nanagane poli, naga pe visena tai na susumo, pe visena kiena ne Ntewa ga naṗa amloge pa na susumo rui. ⁸ Ana e lepas taṗena tai na, pe lelaga ṃena naṗa navisaluaena nene, naṗa sa ga pe urviu si tai pan ita, komin ita tepisu ke sane nagane ṗere ke yemalolo ṗaro pano, kila ke yomerarava na lelagaena pimi narui. Naga sane e malena kiena ne Yesu narui, a nanagane pimi ke ṃena sanene e kieta malena la narui, ṗisi na kila ita tepisu kilale ke visena viu nene pe lelaga kemua.

⁹ Visae yar tai visa sape mial ke pa e yomerarava rui, ana tepisu naga sinen kar ke wenla, kila ke piowa pania, yar nene sike e yemalolo wa. ¹⁰ Ana yar naṗa kekaran wenla, kila ke po pania, yar nene mial ke pa e yomerarava narui, taṗatete sitoṃal sape ṗisi na yalwowe sina e yemalolo, lolor si pogos

tai. ¹¹ Ana naga naþa sinen kar ke wenla, naga ve ve sa re nene. Naga sike e yemalolo wa, yemalolo kila sane kilamarana þala, mial wowe lue ga e pupumalko, pe pisuluþar re kiena mrapa poli, pisuluþar re lele ne kom ke e poli.

Nayalena e yomerarava kiena ne Ntewa: Ve tekekan re yomarava nini

¹² Amiu naruu lala, amiu kiau nin sisi lala e kieta na lelagaena, in na nesiri ke visena la nene pan amiu komin kam ke narui naþa Ntewa arimata piewo kiamiu mlamulena viowa komin kia kiena Yesu Kristo, ana amiu akilia naga.

¹³ Kiamiu yermarua lala, in na nesiri ke visena la nene pan amiu komin kam ke narui akilia ruru laa naga rui, naþa naga mali sike nanua sumo, sumon na siiena yomarava nini.

¹⁴ Kiamiu yar mēe lala, in na nesiri ke visena la nene pan amiu komin kam ke naþa aþarera ruru po narui, amligan ruru pa visena kiena ne Ntewa teke e kiamiu malena la rui, ataulu pa Yar Viowa nene rui. ¹⁵ Sineun nesape nevisa ve sanene van amiu, ve akekan manene re yomarava nini, pona kiena sur lala. Yar na kekan manene yomarava nini, naga taþatete kekan ruru arimata. ¹⁶ Nanene komin naþa sur na yomarava lala, pona kiena þelaga lala, ape taþena, pe sa re sur

kiena ne arimata Ntewa amio kiena þelaga lala. Sur na yomarava la nene la sanini, lala ape purþes nen nasinenanen sur moki, ape purþes nen nawereen kilamarata, ape purþes nen warwarena e kieta malena. ¹⁷ Yomarava nini, amio kiena sur la naþa yeririna la sinelan manene silaga, naga pimi ke vena kovioena ga, ana yar naþa kila ke mesmes e nasinenanena kiena ne Ntewa, naga yoko sulue ga sike narui.

Nayalen e yomerarava kiena ne Ntewa: Monar tevisuar ruru ita vanon sinekar

¹⁸ Naruu lalo-o, nagane tesike e pog maro narui, sa naþa amloge pa rui, na yar naþa apio asape Nasinekar kiena ne Kristo, yoko kilia vim katenia. Pe tepisu re naga poli wa, ana tepisu pa narin yeririna moki na kila kareen Kristo rui, ana kila tepisuluþaria sane yoko ve ve piavi re na Legiena Maro mālivi. ¹⁹ Sinekar la naþa nepisayu ke ne, kam na akilia ke ne. Nanua, la asu amio ita asu ga likan ita, ana siraunia, asumālu narui, amligan ita aþure matan ita sina apano. Nanagane na, tepisuluþar la ruru nenaga, sane pe apimi re veraga ga amio ita poli, vanon visae peraga, yoko la asu ruru ga amio ita. ²⁰ Ana kam naþa asu ruru ke ga wa, yar wa Kristo pisa ruru amiu pa rui, ana apisuluþar kiena visena,

yoko tařatete aurmatan si naga. ²¹ Ve asitom re asape in na sineun nesape nevisi van ami u vanon sitomena tai nařa asape ami u na amn-inue ga suria, vanon pe sa re nene poli. In na nepisu sane akilia aloge ruru kilale visena na lelaga a visena na visokanen řisi rui, ami u akilia pa rui visena navisokanena tařatete molue e visena nalelaga, ana nesape nevis van ami u ve naiilaar ami uena. ²² ? Ana visokanen ya ne la nene apisa ke ne? Visena ne nane, apisa sanene, asape Yesu naga pe pe Navisaarena re poli nařa Ntewa mligan pimi tamalia yomarava nini. Visena nene naga pe visena kiena yar la nařa sinela kar ke Yesu, ana yar nařa pisa sanene, naga kawe ke Ntewa arimata, a kawe ke mēna narina. ²³ Yar nařa pilopu māsina pa narina ne Ntewa, Ntewa tařatete se e naga, a yar nařa pisawal ruruia pisape naga mla narina ne Ntewa e kiena malena, yoko Ntewa mēna ga sike amio naga silaga.

²⁴ Lologena wo nařa amloge řesania nanua sumo, naga pe visen wo a pe lelaga, ana popon aligan ruruia e kiamiu malena lala. Visae ve sanene, yoko kiamiu malena naga suņa wo e Ntewa amio Narina silaga, ²⁵ nagane akilia atol malena nařa naga pisaaria sape la maran si van ita, nařa ve uro re pogos

tai.

²⁶ Naga ga nene nesape nevisa van ami u e lepas kiena ne la nařa apisa kotalia ami u ke ne, asape aure ami u ava ave tařena sina. ²⁷ Kristo na miawawo ami u pa rui, ana Ninuna Wa nařa ami u atolia e pogos nařa, naga sike amio ami u wa. Naga kilia vian ami u e sur punu ga nařa pe lelaga a mesmes, ana tařatete si akale yar tai nařa naga kilia vian ami u sina ga e sur lařasia. Yoko akilali ga sa nařa Ninuna Wa pian ami un e řisi rui, nařa pisape popon ami u aligan ruru kiamiu malena to ruru lue ga e Kristo. ²⁸ Naga nene, naru lala, visae kieta malena naga su ruru lue ga e Kristo, tařatete teloge viowa pogos nařa naga wasuře sina ga pun ita. Ana visae peraga, pupia memawaena, řisi na tesape tokuswan marata pogos nařa tevisu naga vim. ²⁹ Tekilia tesape Kristo, kiena řelaga punu ga po a mesmesu, ana yar nařa naga mēna sanene, tekilia tesape yar nene naga mēna pe narina ne Ntewa sane Kristo.

3

Ita tepe narina ne Ntewa lala

¹ Asitomveveli sitomena kiena ne arimata Ntewa e ita yeririna viowa lala. Naga kekaran ita keviu pařisi, pano-o kila pan ita sa ga

naþa tepisu ita sane narin ga lala. Ana pe ita re ga tepisu ita sa nene poli, naga mēna pisu ita sanene, komin naþa pure ita tepa loyūma e namratava puna rui, sane narina wawa lala. Yar taþena lala e yomarava pe akilia ruru re arimata poli, sa naþa ita tekilia naga, ana sur nene kila la pe apisu kilale ita re mēna poli, sane ita tepe narina lala. ² Erau lala, ita tekilia tevisa tesape tepe narina ne Ntewa, ana pe tekilia re poli wa, sane þisi na sirau, yoko naga kila ita teim teve ya sina ga. Ana sur tai tekilia ruruia, naþa visae Suþe Yesu warpoyo sina ga, yoko tevisu ruru nena naga e kilamarata napo, tevisu ruru naga, naga ke narui, ana pogos naþa tevisu sanene, yoko teimi teve sa ga naga. ³ Ana yar naþa sinenan sape yoko naga mēna imi ve sa Yesu Kristo, naga monar uarar ruru kiena malena mekiki ruruia a ve wa, sa ga Yesu.

*Ita narina ne Ntewa lala:
Monar teligan þelaga viowa lala*

⁴ Yar naþa taþa mlamulena viowa, kilaro ke navisaluaena kiena ne Ntewa, komin purþes nen þelaga viowa, naga pe þelaga na monen logearen navisaluaena. ⁵ Ana pogos naþa Yesu pimi e yomerava nini, naga pimi naþa pe mlamulena viowa tai to re nene e naga, naga pimin vena war plan kieta

mlamulena viowa lala. ⁶ Ana visae sanene, yar naþa kiena malena teke ruru e naga, yoko mlamulena viowa ve su re si e naga, naga taþatete si kila naviowaena. Ana yar naþa mlamulena viowa teke e kiena malena silaga, naga pe pisu ruru re naga poli wa, naga pe kilia re nena naga. ⁷ Kiau narin sisi lala, piowa naþa avisa kotalia amiu. Yar naþa kiena malena po, naga pe yar mesmesu sane Kristo. ⁸ Yar naþa kiena malena piowa, naga pe yeririna kiena Yermare, naþa naga pe purþes nen mlamulena viowa e yomarava, siaria e nasiiena pimi tol nanagane. Pelaga viowa kiena ne Yermare kila narina ne Ntewa pitomi malivi e yomarava nini, vena we plan kiena yumāena viowa lala a kila kiena puriukawaena naga þisi. ⁹ Yar naþa sike loyūma e namratava kiena ne Ntewa, naga taþatete si taþa mlamulena viowa, vanon malena kiena ne Ntewa te ea. Naga pe narina ne Ntewa, ana monar kus þelaga wo kiena ne arimana nene, þisi na taþatete si kila viowa. ¹⁰ E mrapa ne la nene ita monar tevisu kilia ruru ga sane ane pe narina ne Ntewa, a ane pe narina ne Yermare. Yar naþa pe kila re mesmes poli, pona yaru naþa pe kekaran re namratava puna poli, yar na sanene naga pe pe nin sisi kiena ne re nena Ntewa

poli.

Ita narina ne Ntewa lala: Monar telogear navisaluaena nasitomen yeririna taþena lala

¹¹ Lologena naþa amiu amloge siar e purþesia pimi, na sanini, naþa pisa sape: ita monar tekekaran ita silaga.

¹² Asitoñali yar sa Yermare nanua ne, Ken, naþa pe kekaran re wenla naþa Epol poli, naga mñemoñaria. Piowa naþa tekila sanene, ana popon tesitomvevelia mias ya ne naga kila sanene? Nanene vanon kiena yuñæena lala, Ntewa pisu piowa ga, ana kiena ne wenla, naga mesmes ruru po, ana Ntewa kekarania, þisi na kila Ken pieluen wenla panonia, sinen karia, mñemaria.

¹³ Erau lala, þelaga viowa na sa nene, yeririna la akila ke pimi tol nanagane, ana ve teilan re naþa visae tevisu la avieluen ita mñena ga, avisa kare ita vanon yuñæena wo lala kiena ne Ntewa naþa visae teyuñæenia. ¹⁴ Ana ita naþa pe sineta kar re yar la poli, tekekaran ruru na mratava pun ita, nanene pe mrapa na kila meraravannen sane temligan marena, tepim e malena rui. Ana yar naþa sitomena pe to re e naga poli, naga sike e marena na wa. ¹⁵ Yar naþa sinen kar na mratava puna tai, naga sane pe yar na wemoñaren yar la narui,

ana sa naþa ita tekilia ruru þa rui, yar na wemoñaren yaru, malena naþa ve uro re pe to re e kiena malena poli.

¹⁶ Pona ita yar tai piun ke pisape, ana sur naþane sitomena, naga pe sur na sanape? Pogaga, tekilia tesape sitomena naþa pe lelaga, naga sanini: Yesu Kristo tañan kiena malena wetelu panon ita, ana visae sitomena nene teke e ita, þisi na ita mñena tetañan kieta malena vanon kieta wolai lala. ¹⁷ Yar tai naga limana pulen sur nowo lala a, wenla tai, limana plas kemua lelaga, pe kiena sur re poli. Pisi na naga pisuluþar wenla nene, ana naga kila sinen mñarera laa sane pania, pe miila re poli, yar na sanene sitomena kiena ne Ntewa pe to re nena e poli.

¹⁸ Naruu lala, kieta sitomena ve e re ga e kieta visena lala. Sitomena naþa pe lelaga, naga pe sur re tai na visaen ga poli, pe sur na yuñæenena a na kilaena. ¹⁹ Ana visae kieta sitomena þarlologia ruru marana sanene, nane pe mrapa naþa ita tekilia tesape visena lelaga kiena ne Ntewa þar ke mras e kieta malena. Ana ve sanene na, teloge ga wo vena vaen lavisin Ntewa, ve temaraun re si naga. ²⁰ Pogos laþasia tekilia temaraun naga, vanon naþa yoko kieta sitomena kilia liþere ita sina, kila ita tesitoñal sina tese kieta naviowaena

lala, ana Ntewa naga kilia ruru punu pa rui, ana ki-eta na viewoena na naga keviu manene laa sane, þar plan petan ita. ²¹ Erau lala, visae losineta naga merarava ruru wo, þisi na naga taþatete liþere ita sina, kila pe temaraun re nena na va sumalen se marana ne Ntewa na viunen sur tania. ²² Visae telelaga ma e naga, tekila ma sur la naþa naga sinenania, þisi na tekilia tetol suria la naþa tepiun ke tania. ²³ Navisaluaena kiena ne Ntewa pan ita sanini, pisape: Monar telelaga e kia kiena ne narina, Yesu Kristo, a monar tekekanan ita silaga, sa naþa naga pisa pan ita. ²⁴ Yar naþa mlogear e navisaluaena kiena ne Ntewa, naga sike amio Ntewa. Ntewa teke e kiena malena. ?A yoko ita tekilia tesape naga teke e ita sanape? Sur nene, Ninuna naþa naga mla pan ita naga kilia kila ita teloge kilale sane pe lelaga.

4

Ita narina ne Ntewa: Monar tevisuar ruru vanon sinekar kiena ne Kristo lala amio þelaga na yomarava

¹ Erau lala: visae amiu yar tai visa ke sape Ninuna Wa teke e naga, kila ke naga pisawal ke kiena visena, popon sa amiu avisu ruruia aninuluþar ninuna na teke e naga, pe lelaga ninuna kiena ne Ntewa, po pe kiena re

Ntewa poli. Ita monar tevisu ruruia komin navisawalena navisokanena lala moki asu make yo la ne e yomarava nini rui. ² ?Ana tekilia teninu luþar ninuna la nene ve sanape? Ita tekilia tevisu luþar Ninuna Wa kiena ne Ntewa komin naga pisawal pisape Yesu Kristo pimi pe yeririna, paeme e yomerava, ³ ana visae ninuna tai ve visa re sanene, ninuna nene pe pe kiena ne re Ntewa poli. Ninuna na sanene na molue kome nasinekar kena Kristo, naþa amiu amloge pa rui sane pimi ke rui, pona sike pa e yomarava nini rui. ⁴ Ana naru lala, ve amaraun re navisawalena la nene, komin amiu asike e lepas kiena ne Ntewa, akilia ataulu la ga. Lelaga paþisi, naga naþa teke e amiu naga marera laa taulu naga naþa sike e yomarava. ⁵ Yar na visokanen la ape yeririna na yomarava ga nini, ana visena la naþa apisa ke ne molue ga e sitomena na yomarava nini, ana yeririna taþena la na yomarava nini amiyagogan la. ⁶ Ana ita yeririna na lelagaena, ita na pe na yomarava re nini poli, ita tepe kiena ne Ntewa. Yar naþa kilia ruru Ntewa, naga kekanan yagogon itaena, a naga naþa pe kiena ne Ntewa re poli, mon yagogon itaena. E mrapa ne la nene ita tekilia teninu luþar Ninuna na visena naþa lelaga, a ninuna na visokanena.

Pelaga na sinesiena

7 Erau lala, popon naña tekekan ita silaga, komin sinesiena naga pe ðelaga kiena ne Ntewa. Yar naña sinen si yeririna, naga pe narina ne Ntewa, ðarlologia ga ðelaga kiena ne Ntewa, kilia ruru Ntewa e kiena malena. 8 Yar naña pe sinen si re yeririna la poli, naga kilia re Ntewa poli, komin Ntewa na pe purðes nen nasinesiena. 9 ?Ana tepisu pupia nasinesiena kiena ne Ntewa nene pogwai? Tepisu kiena sinesiena nene e pogos naña mligan narina taaga nene pimi e yomarava, vena kila ita tekilia temal. 10 Nanene nasinesiena naña pe lelaga kemua: pe naga re naña sineta si Ntewa poli, ana naña naga sinena si ita, pano-o tamãan narina pitomi pe kuþaþaena pe na kilaruruen marana ne kieta naviowaena lala.

11 Erau lala, komin naña Ntewa sinen si ita keviu sanene, kila po pan ita sanene, popon ita mña ga sineta sisi ita ve sanene, tekila wo van ita. 12 Yar taþatete kirawal Ntewa, ana visae ita sineta si manene ita, yoko tevisu sane Ntewa teke e kieta malena, ana ðelaga na kiena sinesiena yoko imi ve keviu manene laa sane e kieta malena.

13 Ita tekilia Ntewa teke e kieta malena, a ita tesike ruru ga e losinena, komin naga mla Ninuna mesmes pan ita, pe na kilaen ita

telogekilale tesape sur naña pe lelaga. 14 Tekilia mña ga pe lelaga ga naña Ari-mata Ntewa mligan narina nene pitomi vena natamali-aena na yomarava, ve sa naña ita tepisu pa e kilamarata rui a naña tepisawal ke e yo punu ga. 15 Yar naña pisawal ke sape Yesu pe narina ne Ntewa kemua lelaga, Ntewa teke e losinena, a naga mña teke e losinena ne Ntewa. 16 Tekilia ruru po naña Ntewa sinen si ita, komin naña tekilia teloge kilia e kieta malena lala, ana tekilia telelaga e kiena visena naña pisawal pan ita. Ntewa naga pe purðes nen nasinesiena, ana yar naña ðelaga na sinesiena pimi keviu e kiena malena, naga teke e losinena Ntewa, a Ntewa teke e losinena. 17 Ntewa sinenan sape kila ðelaga na sinesiena vim ve keviu la sane e kieta malena lala, vena kilaen kieta ðelaga lala na yomarava nini ve sa ga ðelaga kiena ne Kristo nanua ne. Ana visae kieta ðelaga lala vim wo ve sa nene, yoko wo van ita vaþisi ne, vanon taþatete si temarau po tememawa e legiena na liþereena na pimi ke ne. 18 Visae yar tai naga marau, nanene vanon naña naga pisu kiena nakoena tai pimi ke rui, a naga mloge kilale re sinesiena kiena ne Ntewa kila ruru kiena malena poli. Ana ðelaga na sinesiena napo

naga kilia m̄nelua nena pupia marauena nene.

¹⁹ Visae sineta si ke yeririna taḗna lala, nanene vanon Ntewa naga sinen si ita ḗesia. ²⁰ Yar naḗa pisa sape naga sinen si Ntewa, ana sinen kar ke namratava tai puna, naga pisokan ke ga. Visae namratava puna naḗa suḗa pisu lue ga ana naga pe sinen si re poli, naga taḗatete sinen si Ntewa naḗa naga pe pisu re e kilamarana poli. ²¹ Navisaluaena kiena ne Kristo e kieta malena naga sanini, sape: yar naḗa sinenan sape ve yar nasinesiruruen Ntewa, naga monar sinen si ruru m̄ena namratava puna lala.

5

¹ Yar naḗa mlelaga sape Yesu na pe Navisaarena, yar nene naga pe narina ne Ntewa lelaga. Ana visae narina ne Ntewa nene visa sape naga sinen si Arimana Ntewa, naga monar sinen si m̄ena narina ne Ntewa taḗna lala. ² ? Ana yoko naga kilia sape sinen si ruru la ve sanape? Visae sinen si Ntewa, ana mlogear kiena navisaluaena lala, yoko naga visu naḗa sinen si kemua narin Ntewa la pe lelaga ga. ³ Pelaga na sinen si Ntewa naga sanini: touarar ruru kiena visena. Kiena navisaluaena lala pe urmi manene re pan ita naḗa teyuḗaen poli, ⁴ komin ita sisi la naḗa tepaeme pu Ntewa, visae

tesuḗal m̄arera e kieta naviawaena, ita tepe yeririna na tauluen pa yomerava nini rui. ⁵ Neviun si vetan amiu: ?Yar naḗa taulu ke yomarava nini naga ai? Naga ga naḗa visae suḗal m̄arera sape Yesu naga pe narina ne Ntewa kemua lelaga.

6-8 ?Ana tekilia ve sanape naḗa Yesu naga pe narina ne Ntewa? Yar la telu naḗa apisawal visena nene pan ita: tai na Ninuna Wa, tai na wii, a taḗna na kuruta, a la telu nene apisawalia sane visena taaga ga. Wii naga pisa sape e ḗelaga kiena ne Yesu Kristo, naḗa paeme e yomarava sanape, naga tol na-keena sanape, ita tekilia tevisuluḗar sane naga pe narina ne Ntewa. Ana pe naga re ga nene poli, ana kuruta m̄ena pisa sape e ḗelaga kiena ne Yesu m̄a ke na wa, naḗa naga mare sanape, ita tekilia tevisuluḗar sane pe lelaga. Ana metavan si nanene, Ninuna Wa, naḗa kiena visena pe lelaga lue ga, pisawal meraravan m̄ena e maran yeririna la nakonua rui. ⁹ Ana visena la naḗa Ninuna Wa kila, la aurumi paḗisi, visae ve sanene monar telelaga ga ea, komin nanene pe pe visena kie yeririna re ga la poli, naga pe visena kiena ne Ntewa navisawalen sape naga pisu Narina sanape. ¹⁰ Yar naḗa naga mlelaga ruru e narina ne Ntewa ve lelaga, visena la nene tawa ruru ga sike e kiena sito-

mena, pe sitom ãele re si poli, ana yar naãa pe mlelaga re e narina ne Ntewa poli, pe mlelaga re e sur naãa Ntewa pisa meraravan ke e narina poli, naga pisu sane Ntewa pisokan ga. ¹¹ Ana visena la naãa monar tesuãal mãrera e silaga, sa nene, asape: Ntewa mla malena naãa ve uro re pogos tai pan ita, ana purães nen malena nene na pe Narina ga. ¹² Yar naãa narina ne Ntewa teke e kiena malena, naga tol pa malena rui, ana naãa narina ne Ntewa pe to re e kiena malena poli, naga pe tol re malena poli wa.

Visen maro: Malena naãa pe luas to re e poli

¹³ Nesiri ke mãki nini pan amiu naãa amlelaga pa e kia kiena ne narina ne Ntewa rui, vena iila amiuenta ve kiamiu sitomena ve veve lua re, vena akilia ruru sane atol pa malena naãa ve uro re. ¹⁴ Pogos naãa kieta sitomena ve pepe re, ita tekilia tesuãalu mãrera e naga, ãisi na sur ya ne teviun tania mesmesun e kiena nasinenanena, yoko naga loge ita. ¹⁵ Ana visae tekilia ruru sane naga mloge ita pa rui, tekilia ruru mẽna sane sur ya naãa tepiuun tania, sa naãa tetol pa rui.

¹⁶ Visae tevisu kieta wolai tai naga kila ke naviowaena, naãa naviowaena nene pe keviu re poli, pe torokin re yar mare vanon poli, pona wereplan si yeririna

lala vetan Yesu Kristo, ita tekilia telenwoia, ãisi na Ntewa kilia taãan ga naga to loyuãa e malena. Ana pe nepisa re nesape poga ga amiu alenwo yar naãa kila pupia naviowaena, vanon naviowaena ãasia naga na marena ga, ana visae yar tai naga kila sanene, yoko ita taãatete si tevisa sur tai. ¹⁷ Sur nataãaviowaena make ga naga mlamulena viowa nene, ana naviowaena ãasia ape na marena, ana ãasia pe na marena re poli.

¹⁸ Ana tekilia pa rui sane yar naãa pimi pe narina ne Ntewa, naga ve kila re si viowaena na marena pona viowaena na pe na marena re poli. Yar na sa nene monar visuar ruru naga, vilon mesmes ruru kiena malena, ãisi na yar viowa nene taãatete si kila sur tai vania, taãatete kila kare si naga. ¹⁹ Yomarava wetelu nini sike vatanon puriukawaena kiena ne Yar Viowa nene, ana ita yeririna lala naãa temlelaga, tekilia ita tepe kiena ne Ntewa ga. ²⁰ Ita tekilia sane narina ne Ntewa pitomi, mla pan ita navisu kilaleeãa vena tekilia Ntewa naãa pe lelaga, ana ita tesike ga e naga ga narui, amio narina nene, Yesu Kristo. Kieta Ntewa nene naga pe lelaga, ana malena naãa mla pan ita naga pe luas re poli.

²¹ Naruu lala: amiu avisuar ruru amiu, amiu alotun Ntewa nene naga taaga ga

silau, ve atañan re nono
tařena lala aimi akus lelana
e kiamiu sitomen lala.

Maki Nalua Naþa YOANE Siriyuia Visayuena Na Tusi Nene

Suniena plas na tusi nini

E maki kiena Yoane na lua, Yoane pio si naga sape “na-sumonena”, a pisa ke sape siria “pa sira tai naþa Ntewa pisirlua naga”, a sape siri mēna “pa narina lala”. Kinasnēn visena lalua nene “sira” amio “narina lala”, tesape naga pe pisa re sira tai amio narina lala, ana pisa ke “sumāre” amio “nalelagaena lala”. Maki nini pisa panila vena sinela sisi la mā silaga, a naga pisa panila sape monar avisuar ruru la, vena navianena la naþa kiela vianiena la pe mesmesu re poli ve aimi akila kare la re e kiela vianiena na visokanena lala.

Komþasnēn tusi la na nini

Visena þesa 1-3

Li nalelagaena lala monar sinela si yaru lala 4-6

Visena na visapegeen li nalelagaena lala 7-11

Visena maro 12-13

Visena þesia

¹ Inu našumonena marua nesiri maki nini pimi pan ko, sane ope sira tai naþa Ntewa pisirlua ko, ana narumā wa mēna lala. Sineu si paþisi na vitawe amiuena sina e maki

nini, nesitom amiu paþisi, ana pe in ga taaga re poli, li na lelagaena taþena mēna lala asitomāl amiu silau. ² Sineta sisi ita ke sanene vanon visena lelaga kiena ne Ntewa teke e kieta malena la rui, ana tomā e ita vano ve uro re sina pogos tai.

³ Nemlen wo amiu, sane lemamena, sineyeena, a sumārena, vim kome arimata Ntewa, amio narina Yesu Kristo, sike e ita, kila þelaga na lelagaena a sitomena vim ve keviu manene laa sane e ita silau.

Ataveve þelaga na sine-siena silaga

⁴ Nesape nevisawal van ko, nepisu narumā la þasia e yo nini rui, ana nekekaran la paþisi naþa nepisu la amial ruru ke e þelaga na visena na lelagaena po paþisi, sa naþa Arimata pisa pan ita. ⁵ Auia, nepisu sur nene, ana nesape neiilaar amiu sina, vena alogear kiena navisaluaena la, naþa ita tetol sumo e purþes rui, sa naþa ve nevisa re sur viu tai van amiu, ana nevisawal ga visena mā nena nene, naþa nesape ita monar sineta sisi ita silau. ⁶ Visae sinetan tesape tekila ve sa nene, naga kana mrapa sa nini: monar telogear visena kiena ne Ntewa. A kiena pupia navisaluaena naþa temloge nanua rui pimi tol nagane pisa sape monar teiali silau e þelaga na sinesiena.

⁷ Yeririna na visokanena lala la mokliu asike pa e yomarava rui, vena vilonen sitomena kiena ne yeririna lala. La apisa ke asape Yesu naga pe yar ga tai maran taaga ga sa ga ita, pe sinelan re asape yar la alelaga e Yesu poli, naña asape pe Navisaarena pimi kome Ntewa a pe natamalia itaena. Yar la na sa nene, ape yar na tañalien yeririna ga lala, ape nasinekar lala kiena ne Kristo. ⁸ Visae ve sanene, monar avisuar ruru amiu e visena la ne sanene, vena ve akila pal re sina ga malena wo naña memiyuñan māraran vanon amiu. Monar asuñal mārera ga, ñisi na akilia atol kiamiu nalaena nowo punu ga sirau. ⁹ Yar naña suñalu, pula petan kove pa vanua, pe mlelaga re si e na vianena na Kristo, naga pe pe kiena ne re si Ntewa poli. Ana yar naña suña ruru ga loyuña e kieta visena na lelaga lala, Ntewa arimata amio narina asike e naga.

¹⁰ Visae akirawal lala tai imi mālavin amiu, ana pe pisa re visena la naña mesmes sa naña kieta na kilapianena poli, aligan lua si naga vano. Ve aure re naga va e māmiu yuña lala, ve aurear re naga su amio amiu, ¹¹ visae peraga, amiilaar ke naga pe na kilaen kiena yuñaena viowa nene pa ke metava ne.

Visena maro

¹² Visena moki navisaena sike ga wa, ana pe sineun

re neligan se e mñaki nene poli. Yoko nekilalia nevim nevisu amiu ga, vena tekilia tevisi ruru ga van ita e ga e marata. Visae ve sanene naga po manene laa sane, yoko ita punu ga tekilia teloge wo vañisi.

¹³ Lueña tañena ta nene, naña Ntewa pisirlar naga suñalu sa naña ko, narina mñena ga lala asike e nini, apisa ke asape Ntewa visa ruru amiu.

Nesape naga ga nene yo, naña nesape nevisa, visena maro ga e nene.

Maki Na Telu Naña YOANE Siriyuia Visayuena Na Tusi Nene

Suniena plas na tusi nini

E maki kiena Yoane na telu, naga pio si naga sape “nasumonena”, a naga siria pa yaru tai, kien kia Kaias, naña naga nasumonena tai na sumare. Mieluar Kaias nene, komin naga miila ke li nalelagaena lala, a pisa pania vena naga ve taveve re pelaga kiena yaru viowa tai naña kiena kia Totriņas.

Komņasnen tusi la na nini

Visena p̄esa 1-4

Nasumonena mieluar Kaias 5-8

Nasumonena naga pisi kawe visena kiena Totriņas 9-10

Nasumonena kekaran pelaga kiena Timitrias 11-12

Visena maro 13-15

Visena p̄esia

¹ In na yermarua nasumonena nesiri maki nini pim̄asu, wolai naña Kaias. Pona ita laņasia apieluen ko ke yo, ana nesape nevisa van ko nekekara paņisi na nepitawe ko sina e maki nini, komin nesitom ko paņisi, taveve pelaga wo na visena na lelaga kiena Suņe.

² Erau, nekilia sane ko na osuņa ga omloge poga ga silaga komin kioņa malena teke pa e limana ne Ntewa rui, ana nemlenwo ko ke silau, vena kioņa yuņaena la wo lue ga silau, a vena inana ve kila kare re yepem̄a.

³ Nanagane na pe yam piavi re poli, wenlaita p̄asia apim atol e nini, la asunyu pan inu sanape naña ko na otaveve ke visena na lelaga kiena ne Suņe, okila ke kiena yuņaena wo lala pano-o yar la apisu sane kioņa malena naga mesmes nenaga. Kiela visawalena kila sineu kekara na kekara paņisi. ⁴ Pe sur re si ta naña kilia kila neloge wo sanene poli, ana pogos naña nemloge naruu la asuņalu ke m̄arera sanene e visena na lelaga kiena ne Suņe, naga nene na nepisu po paņisi.

Kaias naga pe yar tai naña akilia awasinea

⁵ Erau, potena van ko e yuņaena la naña omiyuņaen ke pe na iilaen yar la naña amial ke amio Lologena Wo, pogos naña apim atol amiu. La apim sane ape wolawa ga lala, ana amiu p̄asia amon visuar laena, a ko, ko na okila po pan la paņisi. ⁶ La apim apisawal pan na lelagaena lala e sumare nae e nini rui, asunyu yuņaena wo na kioņa sinesiena. Ana nagane yar taņena si laņasia apim asike amio ko

nanagane, ana nepiun tan ko vena ko oiila la m̃ena ga. A visae akila yuṁaena punu p̃isi, popon akilia avisuvevelia e narin sur tai, vena iila laena e kiela mrapa, sane mesmesun na kilaen van yar naṁa miyuṁaen ke yuṁaena kiena ne Ntewa. ⁷ Lala nene amialin ga sur nene, pogos naṁa la apa amlologon ke visena pan yar la naṁa pe amlelaga re poli wa, la pe sinelan re asape la nene avisuar la e sur tai poli, komin pe amla re Yesu e kiela malena poli wa. ⁸ Ana ita naṁa temla Yesu e kieta malena, teke e ita narui vena iila laena. Popon teiilaar la, teiila la, vena kilaen sane ita m̃ena ga teyakolkol temio la, ita punu ga na yuṁaenen veraga e visena na lelaga kiena ne Suṁe.

Totriṁas naga pisuar suṁare pe po re poli

⁹ Pona ko na okilia pa yo rui naṁa in na nesiri m̃aki panon sur nene pan nalelagaena lala e suṁare rui, ana Totriṁas nene, naga sinenan pisape ve suṁen la, naga pe pisu kilale in re poli, naga pe sinenan re yagogen kiau visena la poli, naga pisawo ke yuṁaena kiena Suṁe naṁa memiyuṁaen ke ne. ¹⁰ Naga pis ke paṁisi, pisa ke visena viowa lala moki pan imimi, pisa kotalia kare imimi paṁisi. A pe pis viowa re ga poli, ana miyuṁae m̃ena piowa ga, vanon naṁa yar la naṁa akila

ke yuṁaen kiena ne Ntewa aṁalivin amiu, pe sinenan la re poli, pisape awasuṁe la sina. A metavan nene, pogos naṁa amiu p̃asia apisuar la, amiila la e yuṁaena naṁa lala apiminia, a naga suṁalu koven plan amiu m̃ena petan suṁare. Sur la naṁa naga kila ke ne pe mesmes re nena poli, pogos naṁa sa neviṁasu nekaten amiu, yoko ita punu ga teva lele taaga tevisaweke tekila ve sanapenia.

¹¹ Erau, nesape nevisa van ko, yar nene kila piowa pan ko paṁisi, a piowa ga naṁa ko m̃ena okila si viowa ṁanene vania. Ve otaveve re p̃elaga viowa, ko na monar otaveve p̃elaga napo. Yar naṁa kila po pan yeririna taṁena lala naga pe yeririna kiena ne Ntewa lelaga, ana yar naṁa kila piowa pan yar taṁena, naga pe pisu re Ntewa poli wa, sike perina wa.

Timitrias naga pe yar wo tai

¹² Ana Timitrias nene, naga yoko iila ko. Yeririna la akekaran naga, apisa asape naga miyuṁae po paṁisi, a visena kiena ne Ntewa pisayu ke p̃elaga la naṁa sike e kiena malena, pisape po paṁisi. Ana in m̃ena nepisu sane pe yar wo tai, a nekilia sane ko na omlelaga e kiau visena, sane nepisa ke sur lelaga pan ko ne.

Visena maro

¹³ Sur la mokliu navisaen van ko sike ga wa, ana pe

sineun re nesiri e m̃aki nini poli. ¹⁴ Ana sineun nesape ve yam ve viavi re na neim̃asu nevisu amiu, p̃isi na tekilia tevis van ita e ga e marata.

¹⁵ Sum̃are sike amio ko. Kiom̃a erau lala nae e nini asape Ntewa visa ruru ko. Ana awis, ovisa van erau la punu ga naṗa amiu asike ne, ovisave Ntewa visa ruru amiu m̃ena ga.

Nesape naga ga nene yo naṗa nesape nevisa, visena m̃aro e neṇe.

Maki Naþa SUT Siriyuia Visayuena Na Tusi Nene

Suniena plas na tusi nini

Maki kiena Sut, Sut siri e pogos naþa navisawalena a navianiena la moki asumaga naþa la asape amlelaga e Yesu, ana kiela vianiena la pe mesmesu re poli. Ana komin suri ne nanene naga pisa pan li nalelagaena lala, vena monar avisuar ruruia vena yaru la ne sanene ve akom re varaun la, vena akila la aloru. Maki na plas ga nini, kana sitomiena naga maran taaga amio maki kiena Pita na lua, naþa sape li nalelagaena lala monar atarar þelaga na lelagaena naþa Ntewa mila panila marera, naþa yoko sike sike luwe vano ve uro re.

Komþasnen tusi la na nini

Visena þesa 1-2

Pelaga a vianena kiena navianena piowa, a kiela nakoena 3-16

Visena na kilapegeen li na lelagaena lala 17-23

Visena maro 23-25

Visena þesia

¹ Inu Sut, naþa nepe yaru na yumaena kiena ne Yesu Kristo, a nepe wenla Semes, nesiri maki nini

piñasu. Nemligan pimi pan amiu yeririna la naþa Ntewa arimata pio amiu ape kiena rui, naþa naga sitom amiu paþisi, a naþa asike vatanon navisuar ruruena kiena ne Yesu Kristo. ² Kiau leniena nesape sineyeena, sumarena, a sitomena, la aim aule e amiu, asumã aim ave keviu manene laa silaga.

Maki nini na e lepas kiena ne la naþa apilon kare ke visena kiena ne Ntewa

³ Erau lala, sumo sineun nesape nesiri maki tai van amiu vena visawalen sitomena laþasa e lepas na nata-maliaena naþa ita punu tetolia, ana nanagane ga ne visena tai kom pun amiu pimi tol inu, ana nepisu sane monar nesiriyu suri taþena nene narui.

Nemloge sane suri laþas pe po manene re poli, ana nesape nevisa van amiu avia-awa marera, amareran naþa atarar ruru kieta nalelagaena. Kieta nalelagaena nene, Ntewa mligan pitomi pan li nalelagaena wa lala nasumo e pogos ta rui, ana pe nakepuen re si poli pona pe nalganen re si taþena mon metavan poli. ⁴ Ana suri naþa nemloge, nepisu sane yaru la naþa apimi aþarpran amiu, la akepu ke kieta nalelagaena rui. La nene, pe mesmesun re awarpran amiu poli, apim vinau ga, pe akom re e pulutava poli, ana nanagane asike pun amiu rui. La

nene ape nasinekareen kieta nalotena, la pe sinelan re Yesu Kristo naña naga taaga pe Yerkawa a pe kieta Supe. Ntewa pisape sanene, sape e kiena lemamiena, naga kekaran viewoen kieta mlamulena viowa lala, ana la nene apilopu ke sina ga kiena visena, asuñña apisa ke asape visae sanene, akilia akila mlamulena viowa ya naña la sinelania, pe pe sur re tai poli, yokorena Ntewa viewo la wo ga ne. Visena nene piowa pañisi, a la naña asuñña apisa ke sanene, Visena Wa pisaar kiela nakoarena nanua sumo rui.

Yeririna viowa la nene yoko monar atol nakoarena

⁵ Popon asitomyuli la ãas naña akila piowa sanene, ana Ntewa mla ruru nena nakoarena pan la. Suniena la nene apian ruru amiu e rui, pona sinemiũ ãesan yo rui, ana yoko nevisa si van amiu.

Nasumo, naga le Israel la nanua amiyuññae korena garu Isip. Ntewa tamalia pupia ãegas nen yeririna la nene, ãere plan la sina ga garu Isip, ana siraunia, la mok liu naña apilopu ãasila pania, ana naga ãe plan la amarmare.

⁶ A nalua, naga navisi la naña asuñes ma e peni. Ntewa mligan la e yo wo tai naña mon meta rui, ana pe sinelan re poli, sinelan asape akus ke sina ga lelana, ana kila sanene narui naga piar

la e sen lala, naña taãatete akekapil vetan la pogos tai. Naga kila lelela taãena e yemalolo, kuan plan la apa asike ea asuñña vano-o tol pupia nakoarena e Legiena Maro.

⁷ A natelu, naga le Sotom lala amio le Komora lala, amio yaru taãena lala na pulkumali la naña lavisin la. La ãena ga sa ke ga navisi la nene, kiela sitomena la pa laa metava. Pe ataveve ruru re ãelaga mesmesu naña Ntewa mligan sike e ita poli, ana asuñña akila ke ga naña yermene pa ãere ke sina ga yermene, ana nasinananena na kororak la ne sanene keviu manene la pu la silaga. Ana monar tesitom ruru ya naña pimi ãalivin la nene. Pupia kapi kekan la, ana asuñña atol ke nakoarena nene na wa e kapi taãena naña ve vito re tano pogos tai.

Yaru viowa la nene la apano-o apiowa manene laa

⁸ Ana yaru viowa la nene naña apim asike amio amiu, la ãena nene akila ke mlamulena piowa sa ke ga. Asuñña apisu ke sur viowa lala e kiela ãenienna lala, ana ya naña la apisuia, sinelan asape akila. Akila suri piowa la e tasnela lala, akovenlua ga visena kiena yaru naña sape visli van la, a asuñña apitalia kare ke nañareraena wo taãena la naña taãatete tevisuia. ⁹ Ana nañareraena

taþena la nene pe nakiraki-raen re nena amio poli. Tekilia tevisu naþa Parnavisi Maikel, pogos naþa pepeyu ke amio Yermare, sape lalua nene ane yoko kus tasnena ne Mosis, ana pe pis re piowa pan poli. Pona tesitom ke tesape naga popon visa visena m̄arera pona visena na sinekarena lala van yo, ana naga pe pisa re poli, pisa ga pisape “Ntewa Namava yoko vis van ko na wa.”

¹⁰ Ana yaru la nene, apis piowa a apisin sinemimiena e suri punu ga. Suri la naþa akilia pona sur naþa pe akilia re poli, ana la apisayu kare pa piowa ga. Kiliaena naþa la atolia, maran taaga ga amio kiliaena kiena ne suri mali, naþa suri ya naþa mloge sape kila, po pona piowa ga, ana kila ga narui. Pelaga piowa la naþa asum̄a akila ke nene, kila sane kiela vianena lala pe na visokanen ga, pe mesmesu re poli, taþatete nena sum̄alu.

Yaru viowa la nene akila kare yum̄aena na sum̄are lala

¹¹ La asum̄a amlulu ke mrapa namarena nene naþa yaru nene Ken mlilu nanua sumo, komin naþa naga sinen kar wenla. Ana yaru viowa la nene amligan la asike m̄ena e yo viowa nene naþa Navisawalena Pelañña mligan naga se sumo, komin naga pisa visena naþa pe mesmesun re vena tauluen kilavaru e poli, ana kiena visena kila yeririna kiena

ne Ntewa lala apa amlotun ntewa taþena. A ta sina, amloru apito akovio e pulus nen porotano naþa Kora nasumo pito kovio ea, na nene e pogos naþa porotano naþa naga sum̄alu sike ea purþaia, komin naþa naga kawe visena kiena ne nasumonena naþa Ntewa naga mliganaria.

¹² A pogos naþa aim lele taaga vena kilaen kinanena naviranaren kiamiu sinewo, ana la nene asike sane piañne tai naþa tapolou m̄eke vatanon sive, naþa visae waa va la lavisinia yoko va velan ga m̄eke ea. Akila kare ga kamiu kinanena la nene, naþa akinan kar ga paþisi, amun wii pano-o akilalu þarila, am̄aaga paþisi, a pe asitom re yaru taþena poli, pe asitom re sur ta poli.

Yaru la ne sanene sa ga lul naþa lagi kus pa þaro ga, pe mligan ruru re kana yua pitomi kove kata lokove poli. La sa ga laki tai naþa atelua mon m̄aga menunu, vanon pe þar re mras poli. ¹³ La sa ga pupia sive naþa þan wowoia kuan kana sirpup amio lakee pe kororaki ga pa sike ura. La sa ga verue naþa mlai e sinapane, naþa asu yam plas ga þisi na akokovio make sina, apa asulue e pupia pupumalo na yemalolo.

Navisawalena Inok nasumo naga pisayu yaru la ne sanene rui

14 Asitomyuli mēna vi-sawalena tai kiena ne yer-marua Inok nanua susumo laa rui, naṣa naga molue kome lus olua kiena ne Atam. Naga pisayu ke yaru viowa la ne sanene narui, naṣa naga pisa sanini, pisape “!Avisuaria! Yoko Ntewa Namava vitom amio kiena navisi wa la ve tenario, 15 vena lipereen yaru viowa na kilaen mlamulena naṣa pe amlogear re naga poli. Yoko naga la nakoarena van la komin kiela yuṣaena naviowaena na ṣarṣarera, a komin kiela visen viowa na sinekar la naṣa akoven e marana.”

16 La naṣa apim asike pumiu, visena nene torokin la nenaga, vanon la ape yar na vis mumuena, la ape yar na kaween visena e sur punu ga, la ape yar la naṣa sinelan la ga, a la ape yar na vilavenen visaen pupia visena lala. Ana visae sinelan atol sur tai pumiu, monar avisuar ruru la, vanon la ape yar na visen kiki a ape yar na visruruena mēna ga.

Nalologena la mēna apisayu yaru la ne sanene

17 Ana amlilu kiau erau lala, popon asuṣa asitomyu mēna ya naṣa nalologena lala kiena ne Suṣe Yesu Kristo apisape yoko imi ṣalivi na wa. 18 Asuṣa apisa ke pan ita apisape “E pogos maro, yoko yar la avitalia lele kare yuṣaena

kiena ne Suṣe amio kiena yeririna lala. Yoko akila ṣarila, akila ga ya naṣa kiela nasinenanena viowa la sinelania.” 19 Yaru la ne sanene la asape kiela ṣegas ga naga po, asape la ga amiyuṣae ke e Ninuna, ana sineun nesape nevisawal van amiu nesape la amiyuṣae ke ga e sitomena na yomarava nini, Ninuna Wa pe su re nena e la nene poli.

Visena na iilaaren li nalelagaena lelaga lala

20 Ana amiu, kiau erau lala, popon kiamiu yuṣaena e kieta lelagaena wa naga suṣa ṣarera lilue va metava. Monar alen silaga e naṣareraena kiena ne Ninuna Wa. 21 Aligan ruru amiu asu luen ga vatano e sinesiena kiena ne Ntewa, a ava ruru amiu asuṣa avisu ga Suṣe Yesu Kristo, vano-o naṣa naga, e kiena sineyeena, wereplan amiu ava e malena na pe luas re poli.

22 Yaru naṣa sitom ṣele ga, aiila naga vena kiena sitomena imi ṣarera siṣa. 23 La moki na sanene asuṣa e is nen kapi, lavis akekapil avito e narui, ana avitaṣilin aure plan la, atamalia la. Popon sinemiu ye yaru lala, ana laṣas naṣa apiowa laa sane, amaraun la towe ṣa ga. Kiela mlamulena a kiela namnamena, tol make ga kiela malena a kila kare kiela ṣelaga punu ga, a suṣa e tasnela make ga, a monar

ve ave erau manene re amio
la, alon la towe māga.

*Visena maro: Leniena na
yeluaren Ntewa*

²⁴ Ana teyeluar Ntewa,
naŋa naga kilia tarar ruru
ita vena ve telor re, vano-o
naga were ita teva tesuñalu
tese e kiena naurarena wa,
naŋa kieta malena ikiki ruru
wo e marana, a tetol pupia
kekarena. ²⁵ Memieluar
ko Ntewa na mava, naŋa
ko ga taaga ope Natamali-
aena. Mepisirilua kioñā
kia, komin nañareraena
a puriukawaena a na-
suŋeena naga pe kioñā ga.
Memieluar ko pimi kome
Yesu Kristo kiamimi Suŋe,
siar e pogos la nakonua rui,
pimi tol nanagane, vano-o
ve uro re, sanene.

NAKILOGIAENA**Naþa Yoane Pisuia****Ana Siriyuia****Visayuena Na****Tusi Nene***Suniena plas na tusi nini*

E tusi nini, Yoani siriyu suri la naþa Yesu Kristo kila meraravan pania. Tusi nene, kiena kia na plas “*Nakilologiaena*”.

Yoane siri tusi nini e pogos naþa le Rom lala akila suri m̃arera manene la paþisi pa li nalelagaena lala, a asum̃a am̃em̃om̃ari la ke amarmare, komin naþa amlelaga e Yesu Kristo. Yoane siri m̃aki nini vena visirplannen sitomiena kiena la nene, vena asum̃alu m̃arera e pogos m̃arera lala.

E tusi nini, tekilia teulo suri la naþa sane m̃eniena naþa Yesu kila meraravan pa Yoane, naga pisayu totou na suri lala vena li nalelagaena la e pogos nene akilia alogekilalea kana kinasa. Ana yaru taþena lala taþatete akilia kana kinasa. Sitomien kiena totou lala na tusi nene sanini. Yesu Kristo, naga pe Ntewa namava, a pe kieta Suþe, a e limana, Ntewa yoko kila kare make nena Yermare amio nasinekar taþena lala. Pogos naþa kila make yuþaena nene, yoko naga la nalaena kiena yaru la naþa asum̃alu m̃arera e kiela lelagaena lala. Yoko were la ava asike

amio naga mae peni viu a e yomarava viu naþa naga kila ruru make rui.

Komþasnen tusi la na nini

Visena þesa 1:1-8

Suri þesa naþa Yoane m̃enia pisuia, ana lum̃aki lala pae sum̃are olua 1:9—3:11

Tusi naþa ve yaru vike re, naþa suri la olua sike ea 4:1—8:1

Kumasua olua 8:1—11:19

Alkita amio suri mali lua naþa la apiowa paþisi 12:1—13:18

Suri na m̃eniena taþena la naþa Yoane pisuia 14:1—15:8

Pialora olua naþa apulen sinemimiena kiena Ntewa 16:1-21

Ntewa kila kare pulkumali naþa Papilon a taulu surmali naþa piowa, amio navisaluaena kokani, amio Yermare 17:1—20:10

Ntewa la nakoena va yaru lala e legiena maro 20:11-15

Peni viu amio yomarava viu, a Yerusalem viu 21:1—22:5

Visena maro 22:6-21

Navisa meraravanen tus nini

¹ Tus nini naga nakilologiaena na sur ya la naþa yoko aim am̃aliv e legiena la naþa pimi ke na wa. Ntewa sinenan yar la naþa amiyuþae kiena ke e yomarava la monar akilia ruru sur la nini, ana naga mla nakiliaena la nene pa Yesu Kristo, yoko Yesu pitetalia

kiena navisi tai pimi m̃alivin
 kiena yar na yuṃaena naṓa
 Yoane, kila sur la nene pimi
 ṓarpoyo e kiena m̃enien tai.
² Yoane tol m̃eniena nene,
 ana pisu kilale sape nanene
 visena kiena ne Ntewa pe
 lelaga, pe visena lelaga nena
 napo naṓa navisa merara-
 vanen ya naṓa yoko Yesu
 Kristo yuṃaen sirau, kila
 narui siriwal ruru make
 sur naṓa naga pisuia, vena
 nasirau takilia tauloia.

³ Ana yoko yar a naṓa
 wolo visena na visawalen
 la nene, pona yagogonia,
 ligan ruru teke e sinena,
 yoko na visaruruena kiena
 ne Ntewa ve keviu e kiena
 malena, komin naṓa pogos
 na legiena keviu nene pimi
 ke lavis manene laa narui.

*Yoane siar viṣawalen
 kiena m̃eniena e visen tai
 nayeluaren Ntewa*

⁴ In na Yoane, nesiri plan
 visena la nini iṃasu van
 amiu ṓegas na lelagaena la
 olua naṓa asike e pulkumali
 lala e pupia lepas naṓa tepio
 tesape Esia. Nekekaran naṓa
 nevitawe amiu e kia kiēn
 naga naṓa sike na konua rui,
 sike nanagane, a yoko sike
 sike lue. Nemlen wo amiu
 ke nesape pupia lemamiēna
 a suṃare sike e kiamiu
 malena la silaga, naṓa yoko
 tol amiu imi kome kieta
 Ntewa nene amio kiena ni-
 nuna olua naṓa asm̃al asike
 vamon kiena lele wa na tota-
 noena. ⁵ A kilia imi m̃ena
 kome Yesu Kristo, naṓa naga

masisu m̃a pano kana ku-
 ruta mlau, siraunia naga ṓes
 naṓa mal si petan marena,
 naṓa nagane naga pe ṓarin
 suṓe kiena ne ṓarin suṓe na
 yomarava lala.

Ee, Yesu Kristo ke nanene
 narui naṓa naga sinen sii
 ita paṓisi pano-o tam̃an kana
 kuruta mlau vena ul plan
 ita vetan koena na kieta
 mlamulen viowa lala, ⁶ ana
 naga pisirlua ita teim teve
 mratava ve taaga na lus
 kiena ne kiena narin suṓe
 lala, a naga mligan plan ita
 vena teilla naga sa naṓa tepe
 yar wa na yuṃaena kiena
 ne arimana, nane Ntewa na
 mava.

Yesu na kila po pan ita
 sanene wa, ana popon
 teyeluar kiena kia, tevisirlua
 naga va manene laa metava,
 vano vano-o ve ṓisi re pogos
 tai, sanene.

⁷ Avisu ruruia! Naga ke
 narui naṓa suṃa kupanpo
 lul la metava m̃alivin sape
 vitom tano! Yoko ita make
 ga kilamarata visuia, ore,
 amio m̃ena la naṓa asuar
 naga e lak torovia, la m̃ena
 yoko avisu kilale si naga.
 Ana yoko pupia sineyeena a
 tagena molue e yeririna na
 yomarava lala pogos naṓa
 asitom̃al si e ya naṓa la ak-
 ila pan nanua sumo. Yoko
 ve sa ke nene narui, nevisa
 “sanene” ea.

⁸ Popon tewatanon Suṓe
 Ntewa, Ntewa na m̃areraena
 nae meta manenea, naga
 naṓa sike kemua rui, sike

nagane, a yoko sike sike lue,
naña kiena visena urmi tai
pisa sanini, sape

“In na nepe purp̄esa, in na
neve luasa.”

Yoane pisu totou na Yesu

⁹ Kam erau make lala, in
Yoane in na nepe wenla
amiu, naña nevisawal sur
make van amiu. Nesape
nevisawal van amiu kom̄in
naña ita ke narui naña
tepe kiena ne Yesu, ita ke
narui naña tesike vatanon
kiena nasuḡenena, ita ke
narui naña tesuḡa toḡar pae
ke nalogeen viowa na pog
ḡarera nene, a ita ke narui
naña tesuḡa takawean ita
ke temio sitomena napi-
ayavi.

Pogaga, kiau sunena va
sanini, sane nanua sumo,
nesuḡa nepisawal ke visen
kiena ne Ntewa, nemlolo-
gon ḡa Yesu Kristo pano-
o, le Rom la amla nakoaena
pan inu, amligan inu nepim
nemiyuḡae korena e narin
purvanua nini, kien kia Pat-
mos. ¹⁰ Ana e Legiena
Wa tai, nesuḡa sane nem-
loge sane Ninuna pimi e
inu, nemloge pulgo tai va-
raun inu, pulgon keviu sane
kumasua mielu, pisa sanini
sape

¹¹ “Ya ne yoko ovisu ne,
ovisuia osirilua va e tus tai,
yoko oligan va teliliv viora
e suḡare punu ga na
lepas nae Esia,

vena akilia auloia.
Suḡare la nene, la olua,
nane Episas, Suḡana,

Pekaḡam, Taeatara,
Satis, Pilatelpia, a
Laotisia.”

¹² Pulgo nene suḡa pis
pan inu sanene, ana sineun
nesape nevisu ane sanene,
noḡarpu inu sane nepisu
lan kantel ga la sike na,
la olua naña amiyuḡaen
e kol. ¹³ Lan kantel la
asm̄al ga asike sanene, ana
yoko nom̄al yar tai suḡal
sike likan la, naña naga sa-
nena naña asape Narina ne
Yeririna. Naga miyen kul-
sota piavi tai, amio kulm-
rae tai naña amiyuḡaen e
kol, atelan ḡaro e yerena.

¹⁴ Vilḡarina, miyuwowo na
miyuwowo manene laa, a
kilamarana tego sane kap
naña mluamene. ¹⁵ Lana
ḡarera ruru po, sane pototo
naña ḡarera ruru po, pilav-
ila, a pogos naña naga pis,
pulgona ḡaaga sane sii naña
ḡanpo e piame.

¹⁶ Naga suḡalar suḡa ga
sa naña e limana marua,
mlarar ke verue olua, a
playu na mara naña mal na
mal e lepas luwoka molue ke
kome logona. Marana ḡena
ga, suwala, miyuwowo na
miyuwowo, sa naña mrae
tego ḡarera kolpae.

¹⁷ Nepisu sanene, lelaga,
kila narui nemare nenaga,
nemlor nena e mialana. Ana
kian limana marua pimi tol
inu, pisape

“Ve omarau re, in naña
nepe nasiarena a nepe
naluasa.

18 Naga naþa pe purþes nen malena, inu, komin nemali, þisna nemare, þisna nemal sina, ana nemal lue narui.

In ke narui naþa ki namarena amio ki na pulukapi viowa kiena ne yar na marena lala sike e lumãau.

19 Ana marauen toko, osiri plan ga ya naþa opisu ke ne, naþa lepas nanagane, þarar lepas naþa na legiena la naþa pimi ke na wa.

20 A nevisa sur ta van ko sumo wa, e lepas na verue olua naþa opisu e lumãau, amio purþes nen kantel olua naþa amiyumãen e kol. Sur la nene sane kiliaen tai naþa tapolou, ana kala kinasa sanini, verue olua nene, naga navisi la olua vena visuaren sumãare la olua.”

2

Lumãaki na sumãare olua

1 Ana Yesu pisa ke sina pan inu, sape “Nagane yoko nevisawal ya naþa okilia osiri va vininua sumãare olua naþani.”

Mak nasumo, naga va e sumãare nae Episas, naga sumãare naþa pe sinesiiena su re e poli

“Osiri þesan mãak va van navisi na sumãare na pulkumali naþa Episas, osiri sanini, ovisave ‘Visena nene pimi pan amiu pimi kome naga naþa mlarar ke verue

olua e limana marua, sumãa mialoro teteliv ke likan miasin kantel la olua naþani.

2 “ ‘Naga pisawal pan amiu sanini, sape, “In na nepisu kilale amiu rui. Nepisu kiamiu yumãena wo lala, nepisu naþa aþio paþisi, nepisu naþa amãareran amiu amio kiamiu sitomena viayavi lala po paþisi. Nepisu m̃ena po paþisi sa naþa pe atamãan re yar viowa la apim akila kare amiu poli, komin naþa laþas, pog naþa apim amãalivin amiu, apisape la ape li na lologena, ana sa naþa kam na akilali la, a apisuveve ruru la, ana akirawal rui sane apisokan ga.

3 Komin ga kiau kia naþa amla ke rui, kam na apane pog m̃arera lala, a la akila kare amiu, ana nekilia rui kam na pe amligan re poli wa, kam na apuarar ke m̃arera wa, a sitomen naþa kam na asape sinemiu male paþisi, pona amloge sa naþa toroki, nanene naga pe to re nena e amiu poli.

4 “ ‘ “Kiamiu þelaga la nene na po paþisi, ana lelaga, sur tai teke naþa kam na asumãa akila ke ne naþa in na pe nekekaran re nena ga, a nanene na popon nevisawal mesmesun nena van amiu. Naga sanini, naþa sane pupia sinesiiena naþa toþesan e amiu, nagane pito laa tano, pe sa re si nanua poli. 5 Akilali naþa sinemiu wasuþe si e pupia þelaga na sinesiiena wo nanua ne, naþa sinemiu sii inu paþisi,

a sinemiu siisii amiu amio yar taņena lala. E pogos nene na po na po, ana naganane na, pito tano na pito tano. Ana pogaga, monar avilon amiu ga, a monar awasuņe amiu e yo wo naņa asu ũes e sumo. Ana visae ve avilopu amiu re, nekilia nesape yoko neim nomalivin amiu, neurelua purņes nen kap vivaga naņa suņal sike ne pivaga ke likan amiu naganane.

6 “ “Lelaga, naga nene naga kiamiu pupia napiowaena tai ne nepisa ga pan amiu na wa, ana sineun nesape nevisawal mēna van amiu sane kam na akila mēna pupia sur wo tai, naņa nekekarana paņisi. Nane naņa kam na asuņa akawe amiu ke amio la naņa akila ke sur nawowe taņena lala, naņa yar naņa Nikolaita mlologon ũesania. Apiowa ga, in mēna ga yepmavin nenaga.

7 “ “Yar naņa kiligan teke ea, popon loge kilale ya naņa Ninuna ne Ntewa pisawal ke pa ũegas nen li na lelagaena lala. Yar naņa suņal mārera suņa vano-o taulu naviowaena, yoko netamān vana vena kilia va su nena loyuņa likan lokove nowo kana ne Ntewa, va kan mrasnen lak na malena.” ’ ’

Mak na lua, naga pa e suņare nae Suņana, naga suņare naņa yar la sinela karia

8 “Monar oņiri māk va va navisi na suņare na pulkumali naņa Suņana, ovisa sanini, ovisave ‘Visena naņa pimi pan amiu, pimi kome naga naņa naga ũesa a naga maro, naņa aņemār mare, ana siraunia mal sina.

9 “ ‘Naga visawal van amiu sanini, sape “In na nekilia ruru pog mārera la naņa kam na apisuia, a nekilia nesape limamiu koren ga. A monar akilia naņa pe limamiu koren re poli, ana ape yar na sur moki paņisi! Ee, nekilia sane la naņa asape la ape le Yu, akuan ke visen viowa mok liu pan amiu, ana ve asitom re, pe nepisu re nena nesape la ape kiau le Yu la poli, peraga, la na ape yar na taveven nena Yermare. 10 A pe lelaga, pona ve ve pivavi re kam laņasa monar awar pupia naloge viowaena la yo, komin naņa amlelaga e inu, ana ve amarau re. Pona Yermare kilia kila naņa yoko akoven amiu laņas ava e yuņa nakoena yo, vena kilali amiu, ana nekilia nevisave naga yoko kila kare amiu vano tol ga legiena ve lualima. Visae sanene, monar asuņal mārera vano-o tol naņa alalua kiamiu yalua, ana visae ve alor re e pogos nene, yoko pogos naņa aim aņalivin inu, yoko nela pupia nalaena van amiu, nane karo naņarila namaliena naņa pe kol.

11 “ “Yar naņa kiligan teke

ea, popon naga loge kilale ya naña Ninuna ne Ntewa suña pisawal ke pa li na lelagaena lala. Yar naña taulu þelaga viowa na malena nene, yoko naga ve va warpo re yo e marena na lua naña yoko imi sirau.” ’ ’ ”

Mak na telu, naga pa e suñare nae Pekañam, naga suñare naña tañan navianena viowa taþena lala apim loyuma

12 “Yam si tai, monar osiri ñak va va navisi na suñare na pulkumali nene Pekañam, ovisa sanini, ovisave Visena naña pimi pan amiu ne, pimi kome naga naña þarar ke playu na mara naña mal ga lepas luwoka.

13 “Naga pisawal pan amiu sanini, sape “Nekilia ruru sane e naña kam asike e ne, naga lepas tai naña likan nena yo naña Yermare pe suþenia! Naga lelana lala sike ga ko pun amiu ne, ana kam na apuarar ke kiau kia na po paþisi. Nanua loyuma e kiamiu pulkumali nene, pona tevisa tevisave pulkumali kiena Yermare, la añeñar kiamiu puruvi naña Antiþas, ana la añareran asape kam na monar aluþar kiamiu lelagaena e inu. Ana peraga, sa naña naga piawa ña ñarera e inu pano tol marena, kam ñena ga yar tai pe purmatan inu re poli.

14 “ “Naga nene naga lepas napo ne, ana sur

laþasa naña sineun nesape nevisa ñena van amiu. Sur þesa, loyuma e kiamiu þegasa, yeririna laþasa asuma naña ataveve ke sitomena laþasa sa ke ga Navisawalena Pelama nanua. Visae asitoñal ñaga, naga ke narui naña pisayu mrapa laþasa pa Pelaka, ana pe piavi re poli Pelaka towea mlavia pa pisayu pa le Israel lala, kila sanene pe piavi re poli, la asuma akan kinanena wa la naña yeririna taþena la akila kuþaþaena ea pa kiela nono lala, a la asuma akila lue ga kolau lala. Akila ke mlamulen piowa la ne sanene, ana taveve visena naña amloge ne, la asitom asape pogaga.

15 “ “A kana na lua nena, laþas si naña kam na atañan la asike likan kiamiu li na lelagaena lala. Naga nene la naña asuma ataveve ke navianena na wowe taþena la nene, naña yar nene Nikola naga mlologon þesania.

16 “ “Visae ve sa nene, kam na monar avilopu kiamiu sitomen vetan naviowaena la nene! Visae peraga, yoko ve ve piavi re neim nakate pun amiu, a yoko visen la naña nevisa e gou van la e pogos nene, yoko ve sa playu na mara naña te kinekinela, kilapel la vaþisi.

17 “ “Yar naña kiligan teke ea, popon naga loge kilale ya naña Ninuna ne Ntewa pisawal ke pa þegas nen

li na lelagaena lala. Naga naña taulu napiowaena, yoko naga la kiena nalaena wo tai. Yoko nela kinanena tai vania, kinanena nena sa naña le Yu la akan e yokorena, ana naga nene na pe kinanena tai naña pe yar pisu re poli wa. A yoko nela kilavaru yuwowo tai vania, naña ate kia viu tai sike ea, naña naga naña waria, naga ga yoko kilia ruru kana kinasa.” ’ ’

Mak na vari, naga pa e sumñare nae Taeatara, naga sumñare naña tañan ga ðelaga piowa sumña loyumña ea

18 “Pogos si tai, monar osiri ñmak va va navisi na sumñare na pulkumali nene Taeatara, ovisa sanini, ovisave Visena na pimi pan amiu pimi kome Narina ne Yeririna, naña kilamarana pila a pivaga sane purmenen kapi, a lana ñarera sane pototo. 19 Naga pisawal pan amiu sanini, sape “In na nekilia ruru kiamiu yumñaena lala, a kiamiu sinesiiena lala amio kiamiu naviawaena, kiamiu yumñaena ñarera a sitomena la naña piayavi, a metavanja nekilia nesape nagane kam na akila pa laa narui, taulu naña akila ðesania.

20 “ “Naga nene naga kana lepas napo ne, ana sur si tai monar nevisa meraravan van amiu. Nanene e lepas na sira viowa nene, Sesepele, naña apisu kilale kiena napiowaena lala, ana atañan ga kila ña wowe e sur viowa

la naña kilakila ke ne. Naga sape naga pe sira tai naña pe navisawalena, a pona kam na amlelaga e naga yo, ana naga pisokan ga ne. E kiena navianena lala, naga sumña ðere yar na kiau yumñaena la apa ape tañena la narui, naña nagane asike e ðelaga na mlamulena na kolauena rui, a asumña akan ke kinanena kana nono lala, a la asitom asape ðelaga la nene na pogaga ne. 21 In na nemla pulmas pania vena sitom ruru sina, vilon naga vetan kororak la nene, ana naga yepen mavin ga.

22 “ “Pogaga, kiau sitomena teke rui sane yoko nekila naga ñene tog tai na maiena ñarera lala, a yoko nekila yar la naña akila kolau amio sira nene, visae ve avilon la re e kiela mlamulena viowa lala, yoko la ñena aloge viowa vañisi na vañisi. 23 Sira nene, yoko tañatete narina mali, yoko sineu kar la make ga. Ana pogos naña la na ðegas nen li na lelagaena la avisu sur nene, yoko avisu kilale sane in ke narui, kiau navisuvevena telivi pano tol ya naña teke e sinen yaru, a kilia lual ya naña teke e kiena sitomena. A yoko avisu kilale ñena sane in ke narui nesumña nekila maran ke pa yar lala torokin ga ðelaga na sur la naña akila ke e kiela malena lala.

24 “ “Ana e lepas na pun amiu kam yar tañena lala nae Taeatara, nekilia ne-

sape kam na pe ataveve re navianena kiena ne sira nene poli. Naga kilali naña koven visen kiki la pan amiu, sane yoko naga vike sitomena urmi la naña tapolou van amiu, ana kam na apisu kilale naña Yermare ga naga pe purp̄esen visena la nene. Yoko ve nevisa re si sur taņena van amiu, ²⁵ ana nevisa ga sane kam na auarar ga visena lelaga la nene m̄arera naña kam na atol rui, ve aligan re, auarar la m̄a vano-o neim si na.

²⁶ “ ‘ “Naga naña taulu na viowaena, kila ga taveve ya naña sineunia vano-o tol luas nen pogos nini, yoko nela pupia nalaena vania. Yoko netañan vania naga ve suņen purvanua lala, ²⁷ sa ga naña Tus na Yawena la pisayuia, naña sape

Naga yoko ve suņen yeririna lala naña laki naña mlarar ke e limana, naga pe pototo m̄arera tai,

a la naña ape p̄arm̄arera, naga yoko kuan wowa la e porotano ave kinakinasia sane piaki tai naña amiyuñāen ga e porotano. Yauena 2:9

“ ‘ “Nam̄areraena na kilaen sanene, Ata tañan pan in rui, ana yoko netañan lein va kiau yaru nene. ²⁸ Ana pe naga re ga nene poli, ana yar nene, yoko neli-

gan verue naña Melag sike e limana.

²⁹ “ ‘ “Yar naña kiligana teke ea, popon naga loge kilale ya naña Ninuna ne Ntewa pisawal ke pa p̄egas nen li nalelagaena lala.” ’ ’

3

Mak na lima, naga pa e suñare nae Satis, naga suñare naña momalio ga mon m̄aga

¹ “Monar osiri si m̄ak va va navisi na pulkumali na suñare nae Satis, ovisa sanini, ovisave Visena nene naña pimi pan amiu ne, pimi kome naga naña pisuar ke ninuna la olua kiena ne Ntewa amio kana verue ne la olua.

“ ‘ Naga pisa pan amiu sanini, sape “In na nekilia ruru kiamiu yuñāena lala. Amiyeluar amiu paņisi, asape kam na suñare tai naña mal ruru po, ana peraga, in na nekilia ruru paņisi kam na amare ga añeke na. ² Nagane pe pogos naña kam na akirava towe narui. Kiamiu yuñāena lala, in na nom̄al sane e visuena kiena ne Ntewa, kam na pe akila make ruru re poli, a kam na akila pe po re nenaga. Kiamiu kapi pe kovio make re poli wa, ana naga suñā panon ke naña lavis mare narui, ana komin sur ne nanene, nepisa ruru pan amiu nesape kam na monar ayuñāen ruruia vena imi wo sina.

3 “ “Visae ve sanene, kam na monar asitoñal si visena wo la naña amloge, a amla rui. Alogear ruruia, a avilon kiamiu malena wasuþe si na, komin naña visae ve atavilo re, nekilia nevisa nena van amiu sanini, yoko neim nomalivin amiu sane yar na vinauen tai naña kam na taþatete akilia.

4 “ “Ana lelaga, nekilia nesape kam nae Satis, kam pe moki re poli naña asumña pogaga, naña pe akila re mñala kulsota la namname poli sane laþasia. La ke narui amekiki ruru nenaga, ana yoko ayen sur yuwowo, ayaloro amio inu meva e kiau yo. ⁵ Yar a naña taulu naviowaena, naga mñena yoko ayowa ruru wo e kulsota yuwowo la ne sanene. Naga, kiena kia taþatete nena neyumulua e tus namalena pogos tai, ana yoko nekilologia naga va Ata amio kiena navisi lala, nevisave yar nene naga pe kiau yar lelaga nena napo.

6 “ “Yar naña kiligana teke na, popon naga loge kilia ya naña Ninuna ne Ntewa suña pisawal ke pa þegas nen li nalelagaena lala.” ’ ’

Mak na orai, naga pa e suñare nae Pilatelpia, naga suñare naña pulmas wo na kilaen yuñaeana sike e marana

⁷ “Monar osiri si mñak va va navisi na suñare na pulkumali naña Pilatelpia, ovisa sanini, ovisave ‘Visena naña

pimi pan amiu ne, pimi kome naga naña pe wa, a pe lelaga, naña naga ke narui naga þar ke ki na kiluaen pulutava mñana Þarin Suþe Tepet nanua. Ya naña naga vietavania, taþatete si yar tai kotawea, a ya naña naga kotawea, taþatete si yar tai vietavania.

8 “ ‘Naga pisawal pan amiu sanini, sape “In na nekilia ruru kiamiu yuñaeana rui. Ana monar avisu ruruia, in na nevietava e pulutava tai van amiu naña yar tai taþatete si kotawea. Nekilia mña naña kiamiu mñareraena ve tokak ga, ana nekekara paþisi naña apuarar ruru ke kiau visena, a pe akila kare re kiau kia naña teke e amiu poli.

9 “ “La naña ataveve ke Yermare, la apa ke lele taaga vena avisirlua kiela þegas, a la apisa ke asape la ape le Yu nena napo, anã pe sa re nene poli, apisokan ga. Ana sirau- nia yoko nekila la nene aim akinai e lamiu vena avisu kilale sane pe kiau sitomiena su re e la poli, ana sike ga e amiu.

10 “ “In na nepisa mña pan amiu nanua rui nesape monar asumñal mñarera amio sitomen la naña piayavi silaga, ana nepisu sane apuarar ruru kiau visena nene. Komin sur ne nanene narui, nekilia nevisaar van amiu sane visae pupia naloge viowaena yoko imi e yomarava vena kilali la

naþa asike ea, ana yoko in na nesuwo amiu ruru nena ga, yoko sur nene taþatete tol amiu.”

11 “ ‘ “Ve ve piavi re, neimin amiu sina. Ya naþa asumal asike e rui, monar auarar ruru mña vano-o neim noworun amiu, ana yoko akilia ala kiamiu nalaena, ana taþatete yar taþena kilia warlua kiamiu karo na þarimiu naþa pe kol vetan amiu. 12 Yar naþa taulu nakilaliena make ga vano-o neimi, yoko noure naga imi sane pupia kemraþe na loyuma e yuma wa mña Ntewa, yoko yar nene sulue sike loyuma nene narui. Yoko neyowauia naga amio kia la naþa nesiri se ea, sane kia kiena ne kieta Ntewa, a kia kiena ne pupia pulkumali, na Yerusalem viu, naþa mligan ma e peni kiena ne kieta ne Ntewa pitomi, a amio la nene, yoko nesiri mña kiau kia viu ea.

13 “ ‘ “Yar naþa kiligana teke ea, popon naga logekilale ya naþa Ninuna ne Ntewa sumña pisawal ke pa þegas nen li nalelagaena lala.” ’ ”

Mak na olua pa e summare nae Laotisia, naga summare naþa pa piowa rui, ana pe asitom re sur poli

14 “Na maro, monar osiri mñak van navisi na summare na pulkumali naþa Laotisia, ovisa sanini, ovisave Visena naþa pimi pan amiu pimi kom pun naga naþa pe þarin sur make ga, naþa naga ga

kilia visave “Sanene.” Naga masisu pona pe lelaga e Ntewa vano tol naþa kana kuruta mlau, a naga pe suþen wetelun yomarava naþa Ntewa siia.

15 “ ‘Naga pisawal pan amiu sanini, sape “In na nekilia ruru kiamiu yumaena lala, a nekilia nevisu kilale sane pe kiamiu sitomena la manin manene re poli, a pe pisun manene ruru re mña poli. Popon manene la naþa visae sinoñan omanini, ko omanin ruruia, pona visae ovisunu, ovisun ruruia, ana naþa sinemiu la peve lua ga sanene, þelaga nene pe sineun re nenaga. 16 Ana komin naþa sinemiun amanini a sinemiun avisun sanene, in na nesape neluelua amiu e logou narui.

17 “ ‘ “Kam na asape amiyuwon polo kiamiu sur wo la mokliu, ana kam na asape taþatete yar tai kilia la sur van amiu, kam na amla ke rui. Ana peraga, e kiau navisuena pe sa re nene poli. Kam na pe apisu kilale amiu re poli, ana pe kiamiu sur wo re nena tai, kam na limamiu koren ga, kilamaramiu þala, a yepemiu mian ga. 18 Nevisa van amiu, popon awasuþe si aim pun inu, aim awar kol nini naþa kap kekan van kana namname rui, vena akilia alarar sur wo tai e limamiu. A popon aim awar kulmrae la naþa miyuwowo,

vena akalo amiu, vena ve amawa re, a popon aim awar m̃aki na vilanen e kilamaramiu, ana vena akilia akirava sina.

19 “ ‘ “Yaru ai naña sineu siia, monar nevis vania vena nakawe ruru kiena malena, ve sanene, monar ala kiau visena lala, ana avilopu amiu. 20 Ayagogo ruruia! In na nesuñal nesuñia nesigariga ke pulutava na kioñia malena. Ko naña ologe pulgou pio, ovietavan inu, neiñasu loyuñia italu tesun, italu tekinana.

21 “ ‘ “Naga naña suñal m̃arera vano-o taulu naviowaena lala, netañan vania sane naga topae amio inu e leleu wa na totanoena, sa ke ga naña in m̃ena netaulu kiau nasinekar, ana siraunia Ata p̃ere inu netotano ke nemio e lelenu wa na totanoena.

22 “ ‘ “Yar naña kiligana teke ea, popon naga logekilale ya naña Ninuna ne Ntewa pisawal ke pa p̃egas nen li nalelagaena lala.” ’ ’

4

Ntewa na lelenu naña meta manene laa ma e peni

1 Pogos naña nepisu pae sur la nene, noñal ke sina ga pulutava tai navaen loyuñia ma e peni, m̃eke ga vamon inu. A nemloge ke sina ga pulgo naña pis pan inu nanua, pis na pulgona miyelu keviu sane kumasua, ana pisa pan inu, sape

“Ovam meta e nini sumo wa, vena nekila ovisu sur la naña yoko aim sirau.”

2 Pisa sanene, ana veraga ga, nemloge sane Ninuna ne Ntewa p̃erelua ninuu, mli-gan inu ma e peni, ana nekira pa e pupia lele wa na totanoena tai m̃eke ga e marau, naña yerkawa tai totano teke ea. 3 Nepisu sa naña pila, p̃ar maran kilavaru la naña po na po, a kana kap nena miyervivia sa ga kuperierier. 4 Kana pupia lele na totanoena nena m̃eke ga lika, a lele na totanoena m̃ena lañasa miyervivia, nopuloia tol lualima yam lua pa vari [24]. E la pepe taaga, yar taaga teke e tai kila sane la m̃ena tol lualima yam lua pa vari [24], la nene ape nasumonena nae ma e peni lala. La nene, m̃ala kulsota la miyuwowo pañisi, a amien karo na p̃arila naña pe kol. 5 Nesuñia nepisu ke sane, nemilan m̃ena yekarpla ke ga likan yo wa nañani, amio m̃aagena na pupia polilu tera ke ea. Vamonía, kap vivaga la olua asuñia apivavaga, naga nene nane ninuna ne Ntewa olua, 6 asñal asike e yotop tai, naña meri ga m̃eke na sa ga sive, pilavila a merarava ruru po sa ga kupito.

Ana likan yo nañani, yar mali la vari asuñaga, naña kilamarala la moki liu sike vamon la a varaun la,

asumñal lavisi, asuvivi pupia lele wa na totanoena.

⁷ Yar mal ðes nene, sa ga laion, na lua sa ga puluk naña purwolu, na telu naga ðar ga maran yaru, na maro na sane pepaumña. ⁸ La nene, la make ga kupela la orai, naña kilamarala la kalo make ruru mña kupela la nene, pa mña e pulugala.

La nene kiela yumñaena, legiena a yemalo, la pe aparurula re pog ta poli, la asumñal apisawal lue ga, asape “Ntewa na mñareraena na mava, naga su ðesa, naga sike nagane, a naga sike sike nena. Naga pe wa naña pe wa, naga pe wa pañisi.”

⁹ E visena la ne sanene, la asumña apisirlua ke kia kiena naga naña totano teke lele wa likan la, apatanon ke naga, asumña apisa ke potena pa naga naña yoko mal lue narui. Pogos naña asumña apisa mña, ¹⁰ nasumonena mña la nene apatanonia, amlotun ke naga naña tañatete mare pogos tai. Ana siraunia, añar plan kiela karo na ðarila naña pe kol, amligan su tano se lana, asape:

¹¹ “Kiamim Suñe Ntewa, mesmesun naña nau-rarena, navatanonena a namñareraena make ga, ala van ko, kionña ko ga taaga. Ko ke naña osii make sur narui,

e ga e kionña nasinenanena atol kiela malena rui.”

5

Tus naña apulonaria, amio narin sipsip, naña lalua asike ma e peni

¹ Ana yokorena nepisu si yerkawa nene naña totano teke e lelana wa, naga mlarar ke sur tai e limana marua, sur nena naga tus tai, naña asiri ga e lepas luwoka, ðisi na apulonaria, ana atelan kana lok olua suwoia.

² Ana nemloge pupia navisi tai pion manene pa metava, piunia pisape “Ane torokin kilaroro lok la nene? Yar tai sike ne kilia vae tus nene woga pona peraga?”

³ Momña ga sanene pano-o, peraga, pe yar re tai naña ma e peni pona yomar-ava, pona vatanon yomar-ava, naña kilia vae tus nene poli, pe yar re nena tai naña torokin kira va loyumña e poli. ⁴ Nepisu sanene narui, nemloge piowa, netagi na netagi, naña tañatete yar tai kila.

⁵ Ana nasumonena la tai nene pis pan inu, pisape “E, ve ottag re sina! Opisu ke ne, nanene naga laion naña molue kome yeririna la nae Suta, naña apio asape lus kiena ne Tepet, naga taulu make sur la ðisi rui. Naga ke narui naga kilia kilaro lok la olua nene, naga ke naña yoko vae tus nene narui.”

⁶ Ana nekira pano, pe laion re poli, ana nepisu narin sipsip tai sumñal sike likan yar mal la vari a nasumonena lala vamon yo wa

nene. Naga pe narin sipsip ga, ana kana lañaliu olua amio kilamarana olua asike e ãarina. Naga sumal sike na, naga apisu sa naña akila kuñañaena e rui, ana mal ruru ga sumã ga. ⁷ Naga mial pimi, kuslua tus naña petan limana yerkawa na ãamarua, metava e pupia lele wa na totanoena. ⁸ Mla pae, ana yar mal la vari nene amio nasumonena la lualima yam lua pa vari [24] nene amloru e lana. La peve taaga añar kiela yukalele lala a kiela piala la naña amiyumãen e kol, pulen ga ponotaninu la naña asikapia, ana kala ponos taninu po pañisi naña pa ke metava, nane leniena lala kiena nalelagaena wa lala. ⁹⁻¹⁰ A la amiyaun ke yau viu tai naña sanini, “Akuñañain ko, ana e komã kuruta opul plan yeririna lala ape kiena ne Ntewa, naña amolue e ãegas nen yeririna make ga, e visena kar make ga, e purvanua kerkeviu make ga, a e narin purvanua make mña ga. Ko osikol la apim ape ãegas taaga navatanonen ãarin suñe ve taaga ga, aim ave yar wa lala na yumãena kiena ne Ntewa, naña yoko ave suñen yomarava nini.

Ana komin naña okila sanene, torokin sane ko ga taaga ola tus nene narui, owar plan kana lok lala, ovae.”

¹¹ Nesumã nepisusu ke sanene, ana nemloge navisi la amiyau, la mok na moki, añã la tenario via na sanene. Amiervivi lele na totanoena wa amio yar mal lala a nasumonena la nene, ¹² amiyau mñarera pañisi, apisa sanini, asape, “Narin sipsip, naña akuñañainia, naga taaga po na po. Nañareraena make ga, nawoena make ga, manmaruaena make ga, puriu kawaena make ga, navatanonena make ga, naurarena make ga, nayeluarena make ga, torokin akila ga van naga taaga.”

¹³ Siraun nanene, nemloge si surmal make ga la mña amiyau, surmal la naña asike ma e peni, amio la naña asike e yomarava, pona e porotano pona e sive, kiela yauena pisa sanini, pisape, “Nayeluarena, navatanonena, naurarena, a nañareraena va va yerkawa naña totano teke e lele wa, amio mña narin sipsip, vano vano ve uro re.”

¹⁴ Ana yar mal la vari nañani apisawalia asape “Sanene” komin visena la nene, ana nasumonena lala

amloru, akinai, amlotun lalua.

6

Lok la olua na tusi naña aplonaria

Lok þesia: Yerkawa na þelaga na kilaen mara, naña kus wosi yuwowo

¹ Nepisu manene mñaga, nepisu narin sipsip naña kilaro lok na sumo na tus nene. Naga kila pae, ana yar mal la vari nene tai pio e pulgo tai sa naña polilu, pisape “Oimi!”

² Ana noñal ga wosi tai naña miyuwowo suñal sike e marau veraga. Noñal yar tai teke meta ea, þar ke viu lamias, ana la amligan karo na þarina kiena þarin suþe teke e þarina, ana kus kiena wosi nañani kirir pano sane yar namara tai naña vanon vena taulu kiena nasinekar lala.

Lok na lua: Yerkawa na þelaga na weñaren yaru, naña kus wosi pivaga

³ Yoko narin sipsip kilaro lok na lua. Kila pae narui, ana nemloge yar mal na lua pio, naga mñena sape “Oimi!”

⁴ Ana wosi taþena ke sina ga pimi kate veraga, naña pivaga. Yar naña kusia, atañan pania vena va war plan suñarena naña sike e yomarava, vena yar la asuñña awewe moñar la. Amligan pupia playu na mara tai e limana, ana naga mñena kiriri pano.

Lok na telu: Yerkawa na þelaga na visoena e yomarava, naña kus wosi malko

⁵ Yoko, narin sipsip kilaro lok na telu. Kila pae narui, nemloge yar na telu pio, naga mñena pisape “Oimi!”

Ana nepisu ga wosi si tai naña malko suñal sike e marau veraga. Yar naña kusa, naga mlarar ke skel tai e limana, vena visuveve kinanena lala kana yeririna na yomarava.

⁶ Ana nemloge visena tai molue ga likan yar mal la vari nañani, asape “Ovano, atañan pan ko asape okilia okila naña yo ve plasan kinanena, naña yoko monar aul narin kinanena ga e kilavaru keviu. Ana ve okila kare manene re purþes nen purolip lala naña amiyuñnen ke sirveve e mrasnela, a ve okila kare manene re purþes nen kilkerer lala naña amiyuñnen waen e mrasnela.” Apisa sanene narui, a naga mñena kiriri pano.

Lok na vari: Yerkawa na þelaga na marena, naña kus wosi na yepen pe yavi

⁷ Yoko, narin sipsip kilaro lok na vari, kila pae ana nemloge yar mal na vari pio, naga mñena sape “Oimi!”

⁸ Ana noñal ga na wosi taþena naña yepena pe yavi suñal ga sike e marau. Yar naña kusia, apio kiena kia asape Marena, a naga, kiena erau tai mial ke amio, naña kiena kia asape Pulukapi.

Ana e lalua nene, atañan asape lalua akilia akila viowa va yar ve moki e yomarava, e playu na mara, pona e viso, pona e maiena, pona e surmal tetan lala. Visae ve sanene, yar la vari asike yomarava, la telu akilia asururu ga, ana tañena tai akilia akilapel naga sanene.

Lok na lima: Li na lela-gaena la naña ape masisu pano-o añemoñar la

⁹ Yoko, narin sipsip kilaro lok na lima. Kila pae, ana noñal wonta pulen ninuna ne yeririna lala amiyuwon la miyervivi miasina. Nanene la naña añemoñar la komin añarera e logearen visena kiena ne Ntewa, a asumñal mñarera asape amlelaga e Yesu. ¹⁰ La nene, noñal atag ke pa Ntewa e pupia pulgo keviu, asape “Ake Supe na sur make ga, ope wa a ope lelaga, awis ovisu kilale kamim kuruta nene. Pogwai naña yoko okila maran va yar viowa la naña akila ke piowa sanene?”

¹¹ Apisa pa sanene narui, ana añar kulsaket yuwowo la pan la amiyenia, ana apisa pan la asape sur naña la apiunia naga pere wa. Asape monar asumñate li ga ve plas ga wa, komin naña kiela erau lañasa asike ga wa, amio mña kiela puruvi tañena lala a vinela lala, naña yoko la mña monar awe moñar la komin naña

amlelaga, ana pogos naña la punu ga aimi toroki, yoko Ntewa kila ga ya naña la apiun na wa.

Lok na orai: Legiena maro

¹² Yoko, nepisu naña narin sipsip kilaro lok na orai. Kila narui, yemninu veraga, a pe piavi re poli mrae pimi malko yemalolo nena, a kupario pimi pivaga sane kuruta, ¹³ a verue la naña asike ma e sinapane akekapil apitom tano e porotano, sa ga naña mralak mene, pogos naña pupia lagi miyui kululun lasa. ¹⁴ Yoko, avilonar sinapane sa naña apilonar takue akus pano, a tavie make ga a purvanua make ga alen plan la vetan lelela lala.

¹⁵ Ana pogos naña yar la avisu sur la nene, pupia marauena naña pupia marauena. Parin supe na yomarava lala, yerkawa lala, nasumonena kiena ne yar na mara lala, yar na sur moki lala, yar mñarera lala, amio mña kiela yaru na yunñaena lala, a yar tañena make ga e yo kar ga lala, la make ga ayalin mesmesun puluve lala pona pulkilavaru, avavinin yo la metava e kunusa, akilayonli naña atapolou ea. ¹⁶ Atol yo la nene, ana marauena pimi keviu manene laa, a apion pa kilavaru lala amio kunus lala, asape “Awis,

aloru akalo ruru imimi, vena navisuena kiena ne naga naþa teke meta e lele wa ve tol imim re, a vena nasinekar kiena ne narin sipsip ve kila kare imim re. ¹⁷ Pupia legiena na sinekar kien la lua nene pimi rui, a yoko ane kilia suñalu mali e pogos nene? Peraga ne, nagane yoko viowa manene laa van ita make ga.”

7

Ntewa pisaar kiena pupia ðegas nen yeririna tai vena ave kiena

¹ Siraun sur la nene, nepisu navisi la vari asumal asike e mrapun yomarava varoka, asumia akilawo ke lagi vari naþa amiyui ke e yomarava, vena lagi la nene ve ayui re si e sive, pona e porotano, pona meta e lak lala. ² Yoko nepisu ke sina navisi taþena, þar sur na ween totou kiena ne Ntewa mali van kiena yeririna lala, ana naga molue e naþa mrae pa meta ea pimi. Naga kilia ña sape navisi vari nene, la aþar ke namareraena naþa akilia akila kare porotano a akilia akila kare sive, ana naga pion manene pan la, pisalupar pan la vena ve akila re si sur tai. ³ Pisa sanini, sape “Ei, toko, ve akila kare re sive pona porotano pona lak lala, vano vano tol naþa teligan totou tai te piamenan yar mesmes lala naþa ape kiena ne kieta Ntewa.”

⁴⁻⁸ E pogos nene narui nemloge ga na wa naþa api-sawal nena maran la naþa amligan totou e la. La nene amolue akom e lus nae Israel la lualima taaga pa lua, naga lus la naþa aþar kia kiena yermarua apua kan la nene, nane Suta, Rupen, Kat, Asa, Naptali, Manasa, Simion, Levi, Isak, Sepulan, Sosep, a Pensiman. Ana e lus make la nene, tai kana manu lala tol lualima taaga pa lua [12,000] amolue komea, kila la punu ga tol sane kana manu ne lala tol ponotia lualima yam vari pa vari [144,000].

Pupia ðegas taþena lala naþa amiyen kulsota yuwowo lala

⁹ Ana siraunia, nekira pa vamon inu narui nomal pupia þina na yeririna lala, naþa moki na moki, taþatete auloia, la ke naþa amolue akom e lus taþena la narui. La ke naþa ape yeririna taþena lala na purvanua taþena lala, amio kiela visena taþena lala, apim asumal asike vamon pupia lele na totanoena naþa narin sipsip totano teke ea. La make ga amien kulmrae yuwowo nowo lala, a aþarar ñamañela lala, ¹⁰ a apio manene pa metava, asape “Kieta Ntewa teke e kiena lelana wa, naga ga amio narin sipsip, lalua ape purþes nen kieta natamaliaena.”

¹¹ Ana amio la nene, navisi mēna lala asuñal amiyervivi yo wa, a amiyervivi mēna nasumonena lala amio yar mal la vari nañani, ana la mēna akinai apan ñarila pito tano vamon yo wa, amlotun Ntewa, ¹² asape “Ee, lelaga pa!

Nayeluarena make ga, a naurarena, a namanmaruaena, a navisaen potena, a navisirluaena, a puriukawaena, a nañareraena,

la punu ga nene ape kiena ne kieta Ntewa naga taaga, a yoko ve sanene sulue na sike ne.

Yeluaren van Ntewa!”

¹³ Ana e pogos nene, nasumonena la tai piun tan inu, sape “Pupia ñina naña amiyen kulumrae yuwowo la ne, okilia osape a la nene, a okilia osape la asu pe na apimi?”

¹⁴ Ana nesape “E peraga, ana ko ope yerkaewa nae e nini tai, ko okilia ña yo?”

Ana pisatamea sape “Ore, la ke nene narui naña apano e pupia pogos naloge viowaena. Kulsota la ne amiyen ke ne, akevanla e kuruta kana narin sipsip nañani, nane apim amiyuwowo ruru sane opisus ke ne. ¹⁵ La na kiela yuñena sanini, sane

‘La asike vamon yo wa kiena ne Ntewa, legiena a lemalo amiyuñae

kiena ke loyuma e mēna yuñwa, a naga naña totano teke meta ne, naga yoko visuar la,

¹⁶ Yoko tañatete si viso kar la, yoko ve moto karla re si narui, mrae ve kila kare la re sina, a pupia kapi ve visun la re sina,

¹⁷ komin narin sipsip naña teke likan yo wa meta ne, naga yoko vagan la, naga yoko sumon la ava e purñes nen wii na malena, a yoko Ntewa yumu plan make wamarala.’”

8

Lok na olua: Yo pa ruru nenaga

¹ Siraun nene, nepisu narin sipsip kilaro lok na olua. Kila narui, sur make ga nae mae peni aparurula veraga, pe maagena re si ta poli, yo mēno nena ga mon ña pano-o tol komsus nen aora taaga.

Kumasua la olua

² A pe yam piavi re nenaga, nomal navisi la olua naña asuñal asike e marana ne Ntewa vena kilaen kiena yuñena, a amla kumasua olua pan la, tai kus tai, tai kus tai.

Pias nen ponotaninu naña amiyuñae e kol

³ Ana siraunia, navisi tañena pimi. Naga kus pias nen ponotaninu tai,

naña amiyumãen e kol, a naga kus pimi sumãl sike e wonta, naña naga mña amiyumãen e kol, a naña sike vamon lele wa na totanoena. Ana añar ponotaninu mokliu pania vena sikapia e wonta vena kila ponos wo, a amla mña leniena lala kiena ne nalelagaena wa lala pania, vena ligán to meta e wonta sane nalaena tai.
⁴ A pogos naña kapi nene kekan ke ponotaninu nena, kana ponosa amio leniena kiena ne nalelagaena wa lala, amolue petan limana ne navisi nañani akaka ava atol marana ne Ntewa.

⁵ Yoko, navisi nañani ãar plategkap lañas naña apranar sike e wonta nene, kokonia pito e pias nen ponotaninu nene ana koven pito tano e yomarava. Ana pogos naña suri nene tol yomarava, kila polilu kapur kar ga e yo punu ga, amio kana mumuena sa naña kapiapo, amio mña yekarpla, a yemninu.

Kumasua na miyelu ãesa: yua amio kuruta

⁶ Ana navisi la olua naña añarar kumasua olua nene, asu ruru ke naña asape ayu narui.

⁷ Navisi na sumo miyu kiena kumasua, ana kila narui mrayua la naña mñarera sane kururu kilavaru, amio kuruta naña pisusun sane kapi, aptom akila moñar sur kar la e

yomarava. Amiyumãen mña sanene pano-o kapi kekan make yomarava komãasa amio kana purlaki ne lala, amio sur make naña kapur sike ea.

Kumasua na lua miyelu: tavie na kapi

⁸ Ana siraunia, navisi na lua miyu kiena kumasua. Nanene kila pupia tavie kar tai, naña kap molue ke komea, akovenlua pito e sive. Pogos na kove sive, ana sive komãas pimi sane kuruta, ⁹ ana kana sur mal ne lala amarmare, a waa la naña asike e pupia lepas nene atalilu.

Kumasua na telu miyelu: verue naña kirir ma e sinapane

¹⁰ Yoko navisi na telu miyu kiena kumasua. Nanene kila pupia verue tai, naña kapi pivaga ke ea tegoli yo sane kapi vivaga, molue ma e sinapane, miere pitomi miae yomarava. Ana kana kapi nena pa tol wii la naña mlau a ãarin wii lala. ¹¹ Kia kien verue nene, asape Wii Melkalka, ana kila narui wii nae yo la moki pimi melkalka, ana yeririna la amun ãele ga, moto karla mña pano-o amarmare.

Kumasua na vari miyelu: yemalolo

¹² Yoko navisi na vari miyu kiena kumasua. Nanene kila naña mrae komãas pimi malolo, a kupario komãas pe tego re si poli, a verue la

moki naþa pe aňal la re si poli. Kila narui legiena pimi plas manene laa, a pe lepamiema re si poli, kila narui yemalolo paþisi e yomarava wetelu.

¹³ Nepisu manene ke sane, noňal pupia pepauňa tai ka ke metava, suňa mlolokai kar ke metava na, pisape “Yo piowa rui e, ana na nene naga kulus ke na wa. Navisi la telu asike ga wa, la kiela kumasua miyelu mñarera manene laa sane. Kam na yomarava, avisuar amiu, pupia na loge viowaena pimi mňaliv ke narui!”

9

Kumasua na lima miyelu: pulus naþa pito manene laa tano, naþa na þesia na loge viowaena mñarera na telu

¹ Yoko navisi na lima miyu kiena kumasua. Nanene kila verue taþena kirir mňalia þarpoyo ma e sinapane pitomi e yomarava. Verue nene, amla ki tai pania, nanene ki naþa vietavan pulus naþa pito tol kap naþa garo tano. ² Pogos naþa mlalua keplamaran pulus nene, kapi piu þar wowo yo molmolue ke ea, sa naþa pupia kap tai piu, ana pa kar ga meta e sinapane, kilawo maran mrae, kila yemalo ke sina ga. ³ Ana pogos naþa kap piu kalo make yo sanene, kelsisi la amolue apitom tano e porotano, ana pe asa re si kelsisi poli ana apim sa naþa pupia kimi natano.

⁴ Apisaluþar la asape ve atol re purlaki lala a kinanena lala pona sur la naþa pitotovi sike e yomarava, ana atamňan asape akilia akila viowa va yeririna na yomarava lala, la naþa pe aþar re totou kiena ne Ntewa naþa naga mligan sike nena e piamenana ne kiena yeririna lala. ⁵ Kimi na tano la nene, pe atamňan la re naþa akilia awe moňar yar la poli, ana atamňan la ga ayuyur la mňa va tol kupario ve lima. Ana pogos naþa akila mňa sanene vano-o, yoko yar la aloge yepela la lalae kar vano vaþisi. ⁶ E pogos nene, la ve moki na asave popon amarmare ga, yoko akale mrapa la naþa amare ea, ana yoko marena yepen mavin la, ligan la asumňa ga sanene.

⁷ Ana kelsisi la nene, pogos naþa nepisu ruru la, atorokin wosi la naþa yar namara la akus ke ne. Amyen karo naþarila naþa pe kol suwo þarila, a pogos naþa nepisu ruru marala, nemilan la ga asa ga yaru. ⁸ Aňe vilþarila sane sira, ana maluela lala, sane na maluena laion. ⁹ Amyenwo yerela lala e pototo, a pogos naþa akaka tetai, kupela la kakapur mňalia sa naþa wosi la naþa aþere kiela kat lala akiriri ava akila mara. ¹⁰ Kelsisi la nene kesila sike e la, a sur na yuren yaru lala sike e la, naþa akilia ayur mňa yar vano-o tol kupario ve lima.

11 La kiela ĵarin suĝe tai, naga navisi tai, ana pe navisi kiena ne Ntewa re poli, naga navisi naĵa pisuar ke mratava na pulukapi. Yar nene, kiena kia e visena kiena le Epru lala, asikia asape Apatono, a e visena nae Krik, asikia Apoliono, kinas nen kia lua nene asape yar na warnena kareen suria.

12 Kelsisi ne la nanene, naĵa nasumo e naloge viowaena la telu nena nanene. Noĵal naga ĵaro pa rui, ana lua sike ga wa.

Kumasua na orai miyelu: navisi lala na weĵaren yaru, naĵa nalua na naloge viowaena mārera na telu nene

13 Yoko navisi na orai miyu kiena kumasua, nemloge visena tai molue kom e mrapun wonta wa nene varoka naĵa amiyuĵaen e kol naĵa sike e yo wa vamon Ntewa. 14 Visena naĵa pisa pa navisi nene sanini, sape “Navisi la vari naĵa apiar la asike e yo naĵa wii mlau ke ea naĵa kiena kia Yupretes, nagane kana pogos naĵa ova okila plan la sina avavano narui.” 15 Navisi la nene, apuarar la ruru asuĵa sanene pano-o tol nena kana aora na kana legiena na kana kupario, naĵa akilia amolue ea vena akila kiela yuĵaena. Ana navisi taĵena pa mluĵar plan la, kila sane amolue apano, apa kar ga e purvanua lala aĵe yar lala lavis tol komĵas nen yeririna na yomarava.

16 Apa amio kiela yar namara lala naĵa akus wosi namara lala, ana nemloge apisawal kana marana tol tenario tol ponotia lua [200,000,000].

17 A pogos naĵa nepisu manene wosi la nene amio yar la naĵa akusia, noĵal pototo sur tai naĵa amligan mono ke yerela, amiyowa ruru la apivavaga sane kapi, amemaena sane lowe memaena, amleleru sane mrae. Kiela wosi lala ape taĵena ga, naĵa ĵarila sa ga laion, a pogos naĵa amiyuveve noĵal kapi a mĵau a posnoyavi na kapiapo mleleru molue petan logola.

18 Sur la telu ne nanene, sane kapi a mĵau a posnoyavi na kapiapo kila lavis yeririna na yomarava nini la komĵas akokovio e pogos nene. 19 Naĵareraena kien wosi la nene sike e ya naĵa molue ke kome logola, a sike mĵena e kesila lala, komin kesila la pilolon sane loĵara, a sur sane ĵarin loĵara mĵena sike e luas nen kesila naĵa mla ke pupia magka pa yeririna lala.

20 Napiowaena la ne mārera paĵisi sanene, a pupia komĵas nen yeririna lala, nane laĵas naĵa amal ke na wa, pe asitom re poli. Pe apulon la re nena e kiela napiowaena la naĵa akila ke e limala poli, ana asuĵa akila luen ga lotena pa yermare lala, a asuĵa akila ke leniena pa nono lala na kiela ntewa lala, naĵa pe

akirava re poli, a pe amloge kilale re sur poli, naþa pe amiyal re poli, naþa yar ga la amiyumaen e kol, pona selpa, pona pototo, pona kilavaru, pona laki.

²¹ A amio mēna nanini, pe apulon la re nenaga e þelaga na wemāren yaru poli, pona kimi lala, pona nakilaen viowa amio sira, pona e kiela vinauena la naþa asumā akila ke ne.

10

Navisi tai mlarar narin tus naþa apilonaria

¹ Ana siraunia, nepisu si navisi mārera taþena molue ma e peni pitomi tano. Naga mien lul sa naþa māna kul-sota, a kuperierier miervivi þarina, marana mēna ga sane mrae, ana lana luwoka sane pupia kemraþe ana ape kapi.

² Ana nepisu naga tarar ke narin tus tai, naþa pike þa teke e limana luwoka. Ana piaþereren lana marua piawa ke e sive a lana mēl piawa ke e porotano.

³ Naga sumālar ga sumā sanene, ana mligan pupia vioena tai naþa sa ga laion, a pogos naþa naga kila, polilu make kar ga lala apisatamē pimi, apis kome kiela mumuena lala.

⁴ Pogos naþa polilu la atera sanene, sineun nesape nesiri plan kiela visena lala, ana lavis nekila narui, visena taþena molue ma e peni pitomi pan inu, sape “Toko, ve osiri re visena kiena ne la nene. Sur

la naþa apisa, pe nakilaen re yeririna la akilia poli.”

⁵ Visena nene sanini, ana nomāl ga navisi naþa piawa e sive amio porotano, kian limana marua pa ma e peni. ⁶ Ana pisa kiena visena mārera tai, pisaar e kia kien naga naþa mal sulue, naþa sii peni amio ya la naþa asike ea, amio yomarava a ya la naþa asike ea, amio sive a ya la naþa asike ea. Kiena visena pa sanini, sape “Nagane pe pogos na sumāteen re si poli! ⁷ Lavis ke navisi na olua nene yu kiena kumasua narui, a visae kila ga rui, vera na nasitomwanena kiena ne Ntewa la imi mālivī rui, vera na sur make ga imi merarava ve sa ga naþa naga pisawal þesan pa navisawalen la naþa amiyumāe kiena þesa.”

⁸ Pisa pa sanene narui, in mēna nemloge visen taþena molue ma e peni pitomi pan inu, sape “Narin tus naþa pike teke e limana ne navisi naþa sumāl sike e sive a porotano, ova ola ke ne wa.”

⁹ Ana nepa lavisin navisi naþani, nepiun narin tus nene tania. Ana tamān ga pan inu, sape “Poga, okilia olavia. Visae olavia monar okania. A nesape nevisa van ko sanini, pogos naþa okania, yoko ologe kiki e logomā vaþisi, ana siraunia, yoko ologe melkalka e mopomā.”

¹⁰ Ana nemlavia nakania, ana kiki e gou paþisi. Ana nesinom pae, ana sanena

naña pisa, naña sur nene melkalka, kila kare mēpeu pañisi. ¹¹ Yoko, visena pitomi si pan inu yam tai, sape “Yoko ve sa ga nene narui, komin navisawalena tañena la asike ga wa naña yoko monar oto ovisawal sina, naña apisayu pegas nen yolai lala, purvanua punu ga, yaru na visena tañena la punu ga, a ãarin supe la naña asike e yomarava.”

11

Yar la lua na iilaaren visen kiena ne Ntewa

¹ Ana e pogos nene amligan kiai tai te lumāu, asape neva nela totou na yo la ea. Asape, “Ova e yumā wa mñana Ntewa, ola ruru kana totounena na keviu pa sanape, a ola totou na wonta naña sike loyumā ea, a oulo mñena yeririna la naña akila ke lotena e yo nene, sane mā tol via. ² Ana kana pupia yo naña mēke vanua, naga ve ola re kana totounena, komin yumā wa nene komþasa yar la naña pe ape Yu re poli la yoko akusia. Wolawa la nene yoko aim ataulu pupia kumali wa nene Yerusalem, yoko aim loyumā ayalor kar ga ea sa naña la lelela, ana yoko akila ga va tol kupario ve lualima yam vari va lua [42]. ³ A pogos naña asike e nene, yoko yar lalua naña asumāl mñarera asike e kiau visen lelaga

aim amālivi. Lalua ayen ga kulupak sa naña mñala kul-sota, a yoko avisawal kiau visena e siarena na kupario la nene va tol luasa, naña kana legiena nena tol manu ve taaga ponotia ve lua lualima yam orai [1260].”

⁴ Yar lalua nene visena wa kiena ne Ntewa pisayu la nakonua rui, naña pisayu sape purolip lalua asumā ga, pona naña pisayu kemrape na kantel lua, naña luoka ga asmāl asike e marana ne kieta Ntewa naña naga pe supen yomarava wetelu. ⁵ A visae yar tai kilali naña kila viowa va lalua nene pogos tai, yoko kapi kilia molue e logola, yoko kilia kilapel ruru nena kiela nasinekar lala. Nane mrapa ne nanene naña visae yar sinenan sape kilamār la, yoko naga ga kan ke sina kiena marena narui. ⁶ Lalua nene kiela namareraena keviu liu, naña akilia akilawo sinapane metava vena yua taþatete kove e pogos naña apisawal visena kiena ne Ntewa, a akilia akila wii lala imi ve kuruta, a akilia akila naña sur viowa kar ga imi pona pogos mñarera imi kila kare yomarava e pogos ya naña lalua asitom asape akila.

⁷ Ana lalua nene, lalua ave navisawalen sanene vano tol pogos naña lalua akila yumāena na sanene pñisi. E pog nene narui, yoko pupia sur mal viowa naña mēke tano e pulukapi

molue vamin lalua, a yoko kiena nam̄areraena taulu la luwoka, kilam̄ar la. ⁸ A yoko akoven tasnela m̄eke likan m̄ruplepa e pupia pulkumali naṗa naga pulkumali m̄a nena naṗa kiela suṗe naga m̄ena am̄em̄aria meta e lak torovia. E nene, naṗa e ṗelaga na visawanen suria, apisa kia na kumali naṗani, pogos tai asape kia na kumali marua viowa naṗa Sotom, pona apio asape Isip. ⁹ Tasnela mom̄a ga e yepisun sanene yoko ṗegas nen yeririna lala, pona lus lala, pona visena lala, pona purvanua la aim avisu la, yoko avisaluṗar la ve asinla re vano-o tol legien ve telu komsusa. ¹⁰ A pogos naṗa apisusu m̄a tasnela yar mare lua nene pano-o yoko apisa karela paṗisi a apitalia kare la ṗisa. Yoko asitom̄al naloge viowaena lala naṗa navisawalena lalua akila pimi pa yar na yomarava lala, ana yoko akekara na akekaran naṗa lalua nene amare pa rui, yoko akila pupia ṗaṗagena a yoko awarwar si nalaena lala van la vanonia.

¹¹ A pogos naṗa legiena telu nene komsusa ṗaro pae, pe asin re luwoka poli wa, la amilan ga lagi na malena tai molue kome Ntewa pitomi tol maren lua naṗa ne, kila si la ga luwoka asum̄al aṗanarla asum̄al asikena. Pogos naṗa yar la apisuia, amarau na amarau, ¹² a pe

yam piavi re poli, amloge pupia visena la kom ma e peni pitomi, pisa pan lalua, sape “Poga, amlua avam metava narui.” Ana la ga luwoka apa metava veraga, akus lul lala apa atol ma e peni, naṗa kiela nasinekar lala apisu sane asum̄alu wowe ga asikena, logola suwowo ga rui apis re si poli.

¹³ A e ke e pogos nene, pupia yem-ninu, naṗa kila lepas nen pul kumali nene komṗas, yum̄a make ga akekapil apororowa make nenaga, a yeririna la naṗa amarmare e yemninu nene tol manu olua. La naṗa amal ruru ga asum̄aga la apisu ke sur nene, amarau kar ṗan wa, ana apisu sane popon la ayeluar ga Ntewa nae peni komin kiena pupia m̄areraena naṗa la apisu kilale ga na wa.

¹⁴ Yemninu nene sur sane pupia naloge viowaena na lua ṗaro narui, kana yam telu nena pere wa, yoko naga ve ve piavi re na imi.

Kumasua na olua mielu: pogos na lip̄ereena, naṗa kana naloge viowaena m̄arera maro na teloka nanene

¹⁵ Yoko navisi na telu miyu kiena kumasua. Nanene narui kila pulgo la moki apisasawal ke pupia visena la ma e peni, amieluar Ntewa apisa sanini, asape “Nagane narui yo punu ga naṗa sumo sike vatanon suṗe viowa

na yomarava nini,
la asike vatanon
kieta Suṣe Ntewa
narui, lalua kiena
Navisaarena,

a yoko naga ve ṣarin suṣen
vano-o taṣatete ṣisi
pogos tai.”

¹⁶ A nasumonena mēna la
lualima yam lua pa vari [24]
amio la, naṣa atotano ateke
e lelela la naṣa pa metava,
akinai tano vamon Ntewa,
amlotunia, ¹⁷ asape

“O Ntewa keviu naṣareraena
na mava, ko naṣa osu
nakonua rui, ko naṣa
osike nagane, ko naṣa
ope na pogos la ne
pimi ke ne.

Mepisa potena pan ko
paṣisi wa, komin
naṣa oṣarar kioṃa
pupia ṃareraena
rui, nagane narui
oṣuṃalu ṃarera e
kioṃa nasuṣenena.

¹⁸ Purvanua make ga na
yomarava nini sumo
na sinela kar ko, ana
pogos na kilologiaen
kioṃa sinekar van la
narui.

Nagane kana pogos naṣa
yoko oliṣere yar mare
lala, a yoko okila kare
yeririna la naṣa akila
kare kioṃa yomarava.

Ana kioṃa yar na yuṃaena
lala, naṣa navi-
sawalena lala, amio
kioṃa li nalelagaena
wa lala, a la naṣa
apatanon ke kioṃa
kia, yoko awar kiela

nalaena wo la e pogos
nene, pe sur koren
ga naṣa ape yerkawa
lala e kioṃa yuṃaena,
pona pe ape yerkawa
re poli.”

¹⁹ Ana e pogos nene apieta-
van yuṃa wa ṃana Ntewa
ma e peni e marana yeri-
rina lala, a aṃal pias nen
navisaluaena wa mon ṃaga.
Amilan ga yo pe taṣena ve-
raga, komin naṣareraena
kiena ne Ntewa sike ea, naṣa
yekarpla e yo punu ga, amio
polilu tera, yo ṃaaga, yemn-
inu, a pupia mras nen yua
aes kekapili.

12

*Sira nowo amio pupia
nopi tai*

¹ Nepisu manene ke sur
nae peni lala wa, ana nemi-
lan ga pupia kile tai. Naga
sira tai, naga kus mrae, mien
pe ṃana kulsota, suṃal sike
e kupario, a karo na ṣarina,
verue lualima taaga pa lua
[12] sike ea. ² Sira nene
ṃeṣena, ana mloge piowa
mlokai na mlokai, komin
kiena kupario ṣisi narui,
lavis waria.

³ Nepisu manene ṃa
sanene, pupia surmali
taṣena molue ma e peni,
naga pe namarauena
manene laa. Naga pupia
arman nopi tai, pivaga,
ṣarin olua naṣa amien karo
na ṣarin suṣe olua sike e la,
a laṃaliu ṃena sike e ṣarila,
make ga tol lualima. ⁴ Ana

nomāl ga sur naþa kuþin kesina sane, ku plan verue la mokliu akekapil akowowo yo tano e yomarava. Ana sur viowa naþani pimi suñalar se maran sira nene, naga sitom ruru rui sape sa sira nene war sisi, karnar ke veraga.

⁵ Suña sanene pano-o sira naþa þarlua narina, pe yermene. Ana Ntewa sinenan sape sisi nene imi ve þarin suþe vena uarar pototo e limana vena ve suþen yeririna na yomarava lala, ana pogos naþa sur mal viowa nene pe tol re sisi nene poli wa, ana akuslua veraga, akuslua pa ma puna ne Ntewa mae kiena pupia lele na totanoena. ⁶ Ana sira nene marau, pure pa tapolou e yomema, e yo tai naþa Ntewa kila ruru pe lelana, ana pa tapolou e yo nene, apisuar ruru naga e legiena moki, legiena tol manu taaga ponotia lua lualima pa orai [1,260].

⁷ Ana e pogos nene pupia mara tai kapur ma e peni. Par navisi nene Maikel amio kiena navisi lala, akila mara amio pupia nopi naþani, ana naga mēna ga amio kiena navisi lala akila mara mārera paþisi pan la. ⁸ Akila mā mara sanene pano-o, tol naþa nopi nene, kiena nañareraena þisi, ana amio kiena navisi lala amloru apito tano. Ana akila kare la paþisi, amla nakoena pan la, aþar plan

lelela ma e peni petan la. ⁹ Ana pupia nopi naþani, akovenlua nena ma e peni veraga pitomi e yomarava, naga amio kiena navisi lala.

Ana e poglis nene nepisu kilale ga pupia arman nopi nene na wa, naga ke ga naþa kus maran lomāra nanua sumo narui, naga yar sur naþa asape Yermare, pona Yermare Lego, naþa nana-gane naga ke na wa, naga þere yomarava nini wetelu kuspall ke mrapa silaga.

¹⁰ Ana siraunia, nemloge pulgo tai pio þar make yo ma e peni, sape

“Nagane na natamaliaena kiena ne Ntewa suñalu,

puriukawaena kiena ne Ntewa tauluia,

nasuþenena kiena ne Ntewa pimi mālivi,

nañareraena kiena ne kiena Navisaarena pimi mālivi, mon metavan make suria.

Yar viowa nene naþa suña pisa kare mratava puna Yesu, akovenlua naga rui.

Legiena a lemalo suñal ga sike e marana Ntewa kilali naþa visawal mlamulen viowa kiena ne yeririna lala, ana nagane narui, akovenlua naga rui.

¹¹ Nalelagaena la mokliu naþa pe asitom re si kiela malena la poli, pe amaraun re si marena poli,

ana la asmāl m̄arera m̄a
 pano-o ataulu yar
 viowa naḡani,

a ya naḡa la apuarar ke e li-
 mala vena akila mara
 amio,

naga kuruta kana Narin Sip-
 sip ga, amio visena
 lala navisawalen kiela
 lelagaena e Yesu.

12 Ataulu yar viowa nene
 rui, sane nagane ma
 e peni, amio la make
 naḡa asike ea, akilia
 akekara na akekara,

ana la naḡa asike e yomar-
 ava pona sive, amloge
 piowa a monar ama-
 rau,

komin Yermare pito tano
 sike likan la amio
 sinemimiena naḡa
 pule manene laa,
 komin naga kilia sape
 kiena pogos plas ga
 teke na, lavis naga
 ḡisi narui, ana sirag
 manene laa.”

13 Visena nene yar tai
 pisawal ma e peni, nem-
 loge pae, ḡisi na nom̄al
 nopi nene pisu kilale naḡa
 akovenlua naga pito tano
 e yomarava, ana sinena
 mimi laa narui, naga pisaar
 m̄arera sape yoko monar tol
 sira naḡa ḡarmare ga na-
 rina na yerm̄ene nene na
 wa. 14 Naga pa m̄areran

si pa sira naḡani, ana mi-
 lan ga amligan kupen lua
 pa sira naḡani, sa naḡa ku-
 pen pepaum̄a, vena ka va
 tapolou e yo tai e yomema
 naḡa akila ruru pa rui vena
 avisuar naga ea. Naga

pa sanene narui pupia nopi
 nene taḡatete si tol naga e yo
 nene, asape yoko naga sike e
 yo nene pogos ve piavi towe
 m̄aga naḡa kas tai, siraunia
 kas ve lua, ḡisi komsus nen
 kas si tai.

15 Ana nopi naḡani pisu
 sira ka pano, naga kilia ga
 sape taḡatete si va war po
 yo, naga sinen mimi laa
 narui, plamolue mliluan pu-
 pia womie tai vena were-
 lua sira nene va talilunia.

16 Pupia wii nene mlau pano,
 lavis tol sira naḡani, ana
 amilan ga yomarava sinen
 miye sira naḡani, miila naga
 naḡa porotano purḡa ver-
 aga pikepaia sa naḡa pu-
 pia logona, sinomlaun ga
 wii naḡa nopi nene mlilu-
 ania. 17 Nopi pisu narui,
 nagane kiena sinemimiena
 pimi piowa laa narui, ana
 mligan sira naḡa sike na,
 sape vanon ga narina taḡena
 lala, nane yeririna la naḡa
 asum̄a ataveve ke navisalua-
 aena kiena ne Ntewa, sane
 la naḡa apuarar ke visena
 kiena ne Yesu m̄arera.

18 Pisa pa sanene narui,
 pano amio kiena pupia sine-
 mimiena, panon kila mara
 amio taḡena la nene.

13

*Surmal viowa ḡesa, naḡa
 molue e sive, nopi mla
 nam̄areraena pania*

1 Pupia nopi mialoro
 pitove, suḡal sike yepas nen
 sive. Ana pe piavi re poli,
 nom̄al ga surmal tai molue

e sive paminia. Yar nařani naga řarina olua, a kana lařaliu tol lualima, a e kana lařaliu la peve taaga karo wa na řarila kiena ne řarin suře lala telan sike ea. A e piamenala la peve taaga, asiri kia tai sike e la, nařa na viuelena nawarnena kareen Ntewa. ² Surmal nene, nořal pe tařena ga, naga sane sape ve sa towe řa laion, komin logona sanena laion, ana lana varoka sane lana surmal tařena nařa pea. Ana naga pimi suřalu sike e nopi nařani, a nopi mla puriukawa pania, kila naga pe řarin suře e kiena lepasa, tařan nařareraena make ga pania.

³ Ana nepisu veve ruru surmal nařani amio řarina lala, nořal řarin tai pupia piakapila na magka tai řeke ea, keviu pařisi. Pogos nařa řar magka nene, naga pe řa marena ga, ana yar řa yomarava la amilan ga nařa akila ruru pimi řao sina, ana kila narui apilon kiela sitomena lala apim amlelaga e yar mal nene, ataveve ke naga.

⁴ Sanene, la akekaran manene laa surmali nene, ana pogos nařa apisu nopi mla nařareraena pania vena imi řarera manene laa, akekaran pařisi, amlotun nopi, a amlotun yar mal nene nařa suřa sumon la. Apisa sanini, asape "Ane kilia taulu kieta yar mal na kilaen mara nene pogos tai? Nagane pe yar re si

tai nařa řarera manene torokin naga poli."

⁵ Ana pogos nařa yar mali nene pimi řarera ruru sanene, siar vena kila kiena napiowaena lala. Naga suřa kila ke kiena visena na vilaveena lala, suřa piuel kar ga, a suřa miyuřae ke amio kiena nařareraena viowa, a kila řa pano tol kupario lualima yam vari pa lua [42], sane kas telu kom-susa. ⁶ E pogos nene, naga suřa řarnena kare Ntewa, piuelin ke kiena kia, a suřa koven ke visena viowa pan peni amio yar wa la nařa asike ea. ⁷ Puriukawa nařa amla pania, torokin naga kila mara va va nalelagaena wa lala, vano-o kilia taulu la, a nařareraena nařa naga řar ke na, torokin nařa naga ve suřen yolai make ga, yeririna make ga, visena make ga, amio purvanua make ga. ⁸ Naga kilia ve suře řa sanene vano-o yar make ga na yomarava nini yoko avatanonia, ana lařasa yoko tařatete avatanonia, a naga nene la ga nařa siar e nasi-iena yomarava pimi, kiela kia asiriar sike loyuřa e tus na maleņa kienę ne narin sipsip nařa ařeřaria.

⁹ Ko nařa visae ologe visena la nene, visae kiligařa tořa ga, popon ologe kilale ruruia. ¹⁰ Nalelagaena nařa vena akusvinaun ga e kiena purvanua vena va yuřae kiela, naga yoko monar va ga narui. A naga nařa na

teluaen kolmekina e playu na kilaen mara, ee, yoko playu na kilaen mara monar te ga kolmekina narui. Visae pogos m̄arera tai sanene, yoko li nalelagaena wa lala monar asuñal m̄arera amio kiela sitomena viayavi lala, monar amasisu m̄a vano-o awar ro ea ava atol luasa.

Sur mali viowa na lua, naña molue e porotano

¹¹ Ana siraunia nepisu ke sina ga sur mal viowa tañena tai, naga molue e porotano pam. Naga kana lam̄aliu na p̄arina lua ga, sa ga narin sipsip tai, ana pogos naña pis, pulgona sa ga nopi naña sumo.

¹² Ana surmal na sumo tañan na lua nena yuñae amio kiena nam̄areraena m̄arera make ga, naga kila m̄a pano-o yomarava amio kiena yeririna make ga la amlotun surmali na sumo nañani, naña p̄ar pupia magka na marena ga yoko m̄ao sina. ¹³ Ana na lua nene asuñae akila ke pupia kile lala amio pupia sur na ilanen lala, pano-o akila tai naña kap molue ke ma e peni pitom e yomarava e maran yar la naña apisu ke ne. ¹⁴ Ana e kile la nene naña naga kila ke ne e kia kiena ne sur mal na sumo, naga suñae pisa kotalia ke yeririna na yomarava lala, p̄ere la apa ape wowe laa narui.

Naga pisawal pan la sape ate nono kiena ne

surmal nene, naña playu sia ana mal si mom̄a ga. ¹⁵ Ana amiyuñae pae, amla m̄areraena pan surmali na lua vena kila nono nene kilia yuveve, akilia vis, a amla m̄areraena pania vena kilia weñar yar ai naña pe kekaran re vatanon naña lotun nono nene poli.

¹⁶ A amio m̄ena nanini, naga m̄areran make la ga vena awe tatu se limala marua, visae peraga, e pi-amenala. Yaru kar ga lala amio yerkawa lala, a la naña limala korena ga amio la naña limala pule, a yar la naña amiyuñae, amio kiela nasumonena lala, la make ga awar tatu nene. ¹⁷ Visae tatu nene ve su re e la, tañatete aul sur tai e yuñae na wilwiliena, a tañatete awilwilin sur tai va yar tañena.

Tatu nene naña awe se e la, molue kome kia kiena ne surmali nene, naga marana na kiena kia.

¹⁸ Ko naña oulo tus nini monar om̄anmarua ruru e yo nene. Visae ovisu kilale make suria, yoko okilia olual marana na kia kiena ne yaru lala, ana apuloviraviran marana na kia na surmali nene, am̄al tol lualima yam orai pa orai, pona sa naña lañasa asape, orai orai orai [666].

14

Narin Sipsip amio la naña atol manu yam ponotia taaga lualima yam vari pa vari [144,000]

1 Nekira ke sina pa yam tai, noñal tavie nae Saeon ñeke ga vamon inu, a ma e luasa noñal Narin Sipsip suñal sike ea, naga amio kiena pupia ñina na yeririna tai. La asiri kiena kia amio kia kiena ne arimana Ntewa sike e piamenala, a la moki pañisi, kana marana tol manu yam ponotia taaga lualima yam vari pa vari [144,000].

2 Ana pupia ñaagena tai kom ma e peni pitomi, taulu naña sive ñanpo e piame pona polilu tera. Ana nemi-agogonia, nemloge ga naña ame kita la amiyelu, ³ a la asuñal asike vamon yo wa, e marana ne yar mal la vari nene amio nasumoneña lala, amiyaun ke yauena viu tai. La tañena la mokliu naña akekanan yauena nene pañisi, la sinelan ñena asape ayaunia, ana akilayon ñelea. La ga naña akilia ayaunia, nane ñina na manu yam ponotia taaga lualima yam vari pa vari nene, naña apul plan la petan yomarava rui. ⁴ La ke naña pe akilali re piowa amio sira yam tai poli. La apuarar ruru kiela malena mekik ruru po silaga, a ataveve ke Narin Sipsip nene va e yo nape naña naga va ea. Yeririna la mokliu naña asike ne, ana la ke naña apul plan la petan tañena la narui, a la akilala apim sane mras ñesa nalaena va Ntewa amio Narin Sipsip.

⁵ La nene pe visokanen re tai molue kome logola poli, pe sur viowa re nena tai sike e kiela malena poli.

Navisi la telu

⁶ Ana e poglis nene, noñal navisi tai moña kaka ke e yo punu ga ma metava. Amla lologena wo naña ve uro re pania, vena naga kilia va lologon va e yo punu ga va yeririna na yomarava lala, vena va tol purvanua make ga, yolai make ga, a visena make ga. ⁷ Naga pisawal ke pa e yo punu ga amio pulgona naña keviu, sape “Amiu avatanon Ntewa, avisirlua kiena kia, komin naña kiena aora na liñereen yomarava ñalivi rui. Alotun naga naña sii sina-pane, yomarava, a sive amio purñes nen wii lala.”

⁸ Ana siraun na nene, navisi nalua taveve pimi naña naga piovion ke sape “Pupia pulkumali viowa naña Papilon naga mlor rui! Naga pa mla ntewa naña pe pe lelaga re poli, a ñere plan yeririna mokliu naña apa ape wowe amio, la sa ga yar na ve torogen ga lala.

Nanagane, pupia pulkumali nene pimi piowa rui amio kiena nono lala.”

⁹ A yam si tai, navisi na telu taveve la pimi, pisawal manenea sape “Yoko yar la ve moki naña akinai

vena alotun yar mali viowa amio kiena nono, a yoko yar la ve moki naþa ataþan awe kiena tatu se piamenala pona limala.

¹⁰ Ana yar naþa kila sanene, yoko naga mēna ga mun e piala naþa pulen kuruta namunena naþa melkalka na pupia sinemimiena kiena ne Ntewa. Yar na sanene, mapulukapi luamene lege kare tasnena e marana navisi wa lala a e marana Narin Sipsip.

¹¹ Ponoyomē na kiela naloge viowaena yoko molue lue e kapi naþa taþatete mare pog tai. La naþa amlotun ke Sur mal Viowa, apatanon kiena nono, amio la naþa aþar ke tatu na kiena kia e tasnela, la taþatete atol yo wo na va ruru laena, ana yoko ayumāen ga loge viowaena ko legiena a kolemalu nalue ga narui.”

¹² Nakoena nini naþa navisi pisa mārera paþisi, ana kana kinasa sape ita li nalelagaena wa lala monar tesuñalu mārera temio kieta sitomena viayavi. Monar telogear navisaluaena lala kiena ne Ntewa, a silaga monar teve lelaga e Yesu.

¹³ Ana nemloge visena tai molue ma e peni, sape “Nanene visena tai naþa yoko osirilua, naþa sape, siar

nagane vano, la naþa yoko amare, naþa kiela malena su ruru sike e limana Suþe rui, yoko awar pupia navisa ruruena.”

Visena nene þisi, ana nemloge Ninuna tañania, sape “Ee, la nene yoko kiela yuñāena wo la avam metava amio la, a nagane yoko taþatete si ayumāe narui, la atol kiela navaruena wo rui.”

Navisi la telu apito aþar kinanena naþa marua e yomarava nini

¹⁴ Nekira si pano, ana lul yuwowo tai mēke ga vamon inu, ana noñal yar tai, sane Narin Yeririna, totano teke e lul nene rui. Totano teke amio karo na þarila kiena ne þarin suþe lala e þarina, naþa amiyumāen e kol, a e limana tarar ke uknaep tai naþa mal paþisi vena teen kras neñ kinanena lala.

¹⁵ Ana navisi taþena molue e yuñā wa, pio ke naþa teke tano e wos nen lul nene, sape “Poga, osuñalu, otar kioñā playu ova osiar yuñāena. Kinanena la naþa sike e yomarava amar-marua rui, nagane pogos na teen narui.” ¹⁶ Ana naþa teke tano e lul suñalu, silin kiena playu pa e yo kar ga e yomarava, te kinanena la naþa marua sike ea.

¹⁷ Ana navisi taþena molue e yuñā wa ma e peni, naþa naga mēna þarar ke kiena playu naþa pe uk, naga mēna mal na mal. ¹⁸ Ana navisi ke sina

tai pitomi, naga naña pe navisuaren pulukapi, ana naga ãaro e wonta pimi pio tañena naña mlarar ke playu, sape “Pogaga, ko mñena ga, pogos naña oto okila kioña narui. Otar kioña playu oto owar punu kilis nen kerep la nene teliv e yomarava nini viora, ote polo mras la naña marua telan sike e kilisa.”

¹⁹ Ana navisi naña mloge, teran kiena playu e yomarava, pito ãarpolo mras nen kilkerep e yomarava, koven la e lele na winplanen was nela naña asike vanua e pulkumali. ²⁰ Ana nasinemimiena kiena ne Ntewa kilapel la ga, pumumu kare la pano-o kuruta mlau ãarpoyo, mlau pimi keviu sa ga womie, kokonia make purvanua wetelu merorol pa tol kolmekin yaru, pano pano kilamarala plasia.

15

Navisi olua amio pog viowa maro olua

¹ Nepisuveve ke sur la ma e peni wa, ana pe yam piavi re poli wa nepisu pupia kile tañena naña pe pupia sur na ilanena pañisi, nane navisi la olua, naña la añar maron pog viowa la olua. La maro sanene komin naña visae la awar ro pae, nane kila sane pupia nasinemimiena kiena ne Ntewa yoko ãisi ruru nena. ² Ana nomal pupia yotop tai, meri ga pano mñeke na sa ga sive, ana naga kap

mñeke ea, ana pila na pila. Ana e lepas nen yo nene, nepisu yar la mokliu asuñal asike ea, a la nene, naga yeririna make la naña ataulu yar tetan, la ataulu kiena namareraena, a la ataulu puriukawa na marana na tatu naña añe sike ea, naña yar nene ãaria sane kiena kia nowo tai.

La naña atauluia, asuñalu asike amio kiela kita lala naña Ntewa ãar pan la, ³ ana asuña añe ke kita la nañani, la asuña amiyaun ke kiela yauena tai naña yauena kiena ne yar na yuñena kiena ne Ntewa naña Navisawalena Mosis, ana nagane pimi naña apio asape yauena kiena ne Narin Sipsip. Yauena nene pa sanini, sape

“Akee Ata Ntewa na Mareraena kioña yuñena la akerkeviu pañisi, apowo pañisi, ko ope ãarin Suñe kiena pog make ga, kioña ãelaga la mesmesu a ape lelaga.

⁴ Ko ope Suñe, pe yar re nena tai naña ve maraun ko re.

Pe yar re nena tai poli naña ve vatanon re kioña kia.

Ko ga ope na wa kemua lelaga,

ana yolai make ga monar akinai tano alotun ko, komin nagane, sur mesmes la naña ko okila, lala añaliv apim amerarava ruru e kilamaran

yeririna na yomarava la rui.”

⁵ Pisi na nekira ke sina ga pa loyuma ma e peni ana nomal pulutava na yuma wa lala suwowa ga sike na. Nepisu sane silparpara na tapolen nena nanua sumo akutarar kome yomema pimi, naa amligan ruru navisaluaena kiena ne Ntewa sike ea. ⁶ Apike pae, ana navisi la olua amolue ea. La amiyen kulmrae urmi la naa amekik ruru po, apilavila, a atelan kulka naa amiyumaen e kol paro e yerela. Ana amial apim, amio pog viowa olua naa apar ke ne.

⁷ La apim asumaal asu narui yar mal la vari tai nene kian piala naa pe kol olua pan la, tai kus tai, tai kus tai, naa apulenga nasinekar kiena ne kieta Ntewa naa sulue na sike ne.

⁸ La akuspae, ana komin pupia naurarena na namareraena kiena ne Ntewa sike e yuma wa nene, kapiu par punu yo paasi, kila yar tapatete va loyuma. Ana suma sanene pano-o tol naa pogos viowa olua kiena ne navisi la olua nene pisi ruru nenaga.

16

Pias nen nasinekar kiena ne Ntewa olua naa puleule nenaga

¹ Ana nemloge visena marera tai molue ma e peni pa pa navisi la olua nene, sape “Nagane, pogos na yuma e kiamiuena

narui. Ataron plan pias nen nasinekar kiena ne kiamiu Ntewa veve taaga vito e yomarava.”

² Pisa pae, ana navisi na sumo pa taron plan kiena piasia pito e porotano, ana kana wii nena mlau pa kila magka wa la molmolue kalotas nen yeririna la naa aane tatu na sur mal viowa sike e yepela, naa la amlotun ke kiena nono, apar kare magka pano-o pisa amloge sinelalaea pano-o paasi.

³ Yoko navisi na lua towe taron plan kiena piasia pito e sive, ana kana wii mlau pito tol sive kila pimi pe kuruta sane na yar mare, a sur mal la naa sike ea amarmare make nenaga.

⁴ Yoko navisi na telu taron kiena piasia pito e wii lala naa amlau, parar purpes nen wii lala, ana kana wii mlau pitove kila la mena apim ape kuruta veraga.

⁵ Ana nemloge visen tai pitomi e navisi nene naa pe parun ke wii na yomarava lala, naga sape

“Ko na osike ma na konuarui, a osike nagane, ope Nawa,

kioma nakoena la nene amarera manene laa, ana kioma nalipereena mesmes ga.

⁶ Lelaga naa yar na yomarava lala, amemamar kioma yar wa lala, akila kuruta na kioma navisawalen la mlau, ana omla maran ke sina pan la pogaga,

naþa mala wii na-
munena ape kuruta
make ga.”

⁷ A visen taþena si molue
mena e wonta, sape

“Ntewa na meta manenea,
pe lelaga paþisi,
kioma nalipereena
lala amesmes ruru
nenaga, ape lelaga
paþisi.”

⁸ Yoko navisi na vari taron
plan kiena piasa pito e
mrae, ana kana wii kila
mrae yo pisun manene laa,
kilia lege yeririna na yomar-
ava la sane kapi. ⁹ Ana
amloge yepisusun, yepisun
kekan la pano-o apiuelin
kare kia kiena ne Ntewa
paþisi. Akilia ke asape
naga mligan ke nakoaena
la nene pimi, akilia ma as-
ape naga visae sinenania
kilia visaluþaria, ana yepela
mavin ga vilon laena, asape
taþatete avatanon naga, a
taþatete aieluar naga pog tai.

¹⁰ Yoko navisi na lima
taron plan kiena piasia pito
e pupia lele na totanoena
kiena ne sur mal viowa
naþani, ana kana wii mlau
pito kila lepas wetelu na
kiena nasuþenena, yo mal-
olo make nenaga. Yar la
amloge piowagan nakoaena
nene þisa, akarar purmenela
la pano-o, ¹¹ apiuelin kare
Ntewa nae peni komin kiela
yepelalaea a kiela magka wa
lala, ana apisalupar ga, as-
ape taþatete nenaga avilopu
la e kiela naviowaena.

¹² Yoko, navisi na orai
taron plan kiena piasa pito
e pupia wii naþa mlau,
kiena kia Yupretes, ana kana
wii nena mlau pito þartaþe
wii naþa mlau ke ne pimi
mema nena ga. Nanene kila
narui þarin suþe na pur-
vanua make lala na lepas
naþa mrae þarpo yo ke ea,
pe kiela mrapa narui, vena
waroen yo ea aimi amio
kiela yar na mara lala.

¹³ Ana noal ninuna
viowa telu naþa sane prok,
naþa tai molue e logona
pupia arman nopi, tai
molue kome logona Sural
Viowa, a tai molue kome
logona navisawalena na
visokanena. ¹⁴ La telu
nene, ninuna ne yermare
la telu naþa asua akila
ke kile lala, a asua aþaro
make puna þarin suþe na
purvanua lala na yomarava,
aþerela apim lele taaga vena
akila ruru make suria komin
pupia mara naþa yoko kapur
e pupia legiena maro naþa
Ntewa na mava pisaar rui.
Ntewa pisayu legiena nene
rui e kiena visena tai, naþa
sape

¹⁵ “Avisuar amiu, yoko
noalivin amiu vinau
ga, yoko ailan inu
sa naþa visae yar na
vinauena tai imi.

Yar naþa kon ruru kiena
sur lala, naga su ruru
ke narui, a tavilo ke
ga wa, vena surmate
inu, vena imimi lua

mevano, yoko wo van
vaṽisi.

Ana yoko laṽasa ailan sane
yepela ve sinas ga
akiriri tetai, amawa
vaṽisi e pogos nene.”

16 Ana nomāl pog na
mara na legiena maro
pimi ṽarpoyo, a ninuna la
nene aure ṽarin suṽe na
yomarava la ava lele taaga,
nane e yo naṽa visena na
Epru sikia sape Amāketen.

17 Yoko navisi na olua
taron plan kiena piasa, ana
taron plan ga pitomi metava
e yepesinas na mēke ne.
Ana visen tai molue kome
yo wa na totanoena loyuma
e yuma wa nae ma peni e
pogos nene, pion manenea
sape

“Nagane pogos na luas nen
sur make ga.”

18 Ana yekarpla siar e yo
punu ga veraga, ṽarar kana
polilu ne la naṽa atera, a
navioena lala a māagena
lala. A ṽarar mēna, pu-
pia yemninu, yemninu mā
pano-o pa piowa manene laa
sa naṽa pe yar tai pisuli re
yam tai poli wa, siar e naṽa
yar mal e yomarava pimi
tol nagane. 19 Ana yemninu
nene kilaṽa porotano, kila
pulkumali lala na purvanua
make ga teliv e yomar-
ava nini piora amloloru, a
kila pupia pulkumali naṽa
Papilon purṽa lepas telu.

Ntewa sumā sitomāl
ke yo nene, ṽarar kiena
napiowaena lala, ana kila

karepel manene paṽisi
torokin nena kiena ṽelaga
naṽa kilakila ke ne, kila
naga mun e piala naṽa
pulemamagan kuruta na
munena na māraena na
kiena nasinekar. 20 A
ṽarar yemninu nene, narin
purvanua la apureure apano
akokovio, a tavie la nanua
asmāl asu ne, amāl la re
si poli. 21 Aes yua la meta
e sinapane amloloru sane
pupia kilavaru lala, a monar
yeririna la naṽa asike e
yomarava. Amloge manene
laa piowagania, apisu naṽa
sur viowa nene māraera
manene laa, pano-o asumā
apisalele kare Ntewa.

17

*Sira viowa teke tano e
surmal viowa*

1-2 Ana e pogos nene navisi
tai pimi, naga na navisi la
olua tai naṽa akus ke piawi
pias olua nene. Naga pimi
mesmesun in ga, pisawal
sape “Otaveve inu. Yoko
nekipian ko e pupia pulku-
mali viowa naṽa Papilon,
naṽa mēke e naṽa pupia wii
la mlau ke ea. Pulkumali
nene miyumaē piowa ga, sa
ga sira na mrapa tai. Naga sa
ga ṽarin suṽe na purvanua
taṽena apa akila ke kolau
pania, a sa naṽa māna ku-
ruta na munen kila sitomena
kien yeririna na yomarava
la apa apiowa laa narui. Ana
oimi, yoko nekila ko ovisu
ya naṽa yoko imi mālivinia

e pogos naþa yoko naga war ruru kiena nakoarena napo.”

³ Ana navisi naþani pimi þerelua ninuu, mligan inu nesike e yomema tai. Ana nepisu sira tai totano teke meta e purwolu na puluk tai. Sur mal nene pivaga make ga, naga þarina olua, a kana lamaliu lala tol lualima, a e yepen make ga asiri kia viowa lala navisalelekareen Ntewa. ⁴ A sira naþani, naga miyowau paþisi e kulsota la naþa amemaena a apivaga, a apaia kare yepena lala e mrakotal lala, a e pialaliga lala, a e sur la naþa pe kol, a e kilavaru la naþa merarava po naþa kana kilavaru ne pa metava paþisi, amio sur la naþa asike loyuniã e mratamelilivi. Naga mlarar ke piala tai naþa pe kol, a piala nene pulen ga kiena þelaga viowa lala amio kiena kolau. ⁵ Asiri visena tai sike e piamenana, pe visen wan ga tai, visena naþani naga sane kia tai, naþa pisa sanini, sape

“Papilon naþa keviu, anenane sira na mrapa lala, purþes nen þelaga la naþa ape kororaki e yomarava.”

⁶ Nepisu manene mña sira nene sanene, nepisu kilale sane mun wii ana maran telivi, a pe komin re naþa mun kuruta na munena poli, ana komin naga mun ke kuruta kana li na lelagaena wa lala, nane la naþa añemoñar la komin naþa

ataveve Yesu. Nepisu sira naþa sanene narui, yepeu þili na þili!

⁷ Ana navisi pisa pan inu, sape “E, ya ne kila omila manene sanene? Osuwa, yoko nevisa meraravan van ko na wa. Sira nene, þarar purwolu puluk naþa teke e wos nena, a þarar þarina olua a kana lamaliu lualima, suri la nene kala kinasia sumã ga, a yoko nekila ovisu kilale ne.

⁸ “Purwolu puluk naþa opisu ne, naga mñeke kemua nakonua rui, ana naga pe su re si nagane poli. Ana e pog tai naþa pimi ke ga wa, yoko molue si vetan pulus naþa mñeke e nagane, yoko vanon marþanun kiena nakoarena. Ana e pogos nene, yoko yeririna na yomarava la naþa asike ga wa, yoko avisu purwolu naþane. Nane la naþa siar e nasiiena yomarava pimi, kiela kia pe su re e Tus na Malena poli. Pog naþa avisuia, ailan vaþisi, komin akilia asape naga sike kemua na konua rui, yoko pe su manene re si yam piavi poli, ana siraunia, naga molue sina. ⁹ A yar naþa pe manmarua ruru po, yoko naga kilia visu kilale ruru kinas nen sur la naþa yoko nevisa.

“Nasumo, þarina la olua. Kana kinasã, pisa pulkumali tai naþa sira nene pe suþenia, kunus olua sike ea. A kunus la nene, la mñena kala kinas sumã ga, naþa

sape pupia þarin suþe la olua asuþa ga. ¹⁰ Tol nagane, þarin suþe la lima nene aþis rui, a tai suþal sike nanagane. Tai mēna ga pe mālivi re poli wa, sike ga wa, a pog naþa imi, yoko su towe laa ve piavi na wa.

¹¹ “Ana purwolu puluk mēna, naþa suþes nanua a nagane pe mon re si poli, nanua sumo naga mēna þarin suþe la olua nene tai. Naga la ke tai narui, ana yoko wasuþe sina sane þarin suþe na orelu tai. Naga pe yerka wa sanene, ana pe sur koren ga, komin yoko naga mēna þisi, va war kiena nakoena mārera.

¹² “Sur taþena na vike meraravanena, nane laþaliu la lualima naþani. Nanene kala kinasia nane þarin suþe si lualima. La nene pe asuþal re poli wa vena ave suþen kiela lepas lala, ana yoko akila ga kiela yuþaen la na wa e pogos na purwolu nene suþalu. Yoko ave suþen pae yomarava nini amio, ana nane naga pe na yam plas ga, sa ga aora taaga.

¹³ “La lualima naþani, la taþatete akila kiela yuþaena lala, ana la ape nakilaen ga yuþaen kiena purwolu puluk nene, vena kiela naþareraena iila naga, vena kila naga imi ve keviu la sane. ¹⁴ Yoko la punu nene aim veraga vena akilali mara amio Narin Sipsip, ana taþatete atauluia. Peraga, ana yoko naga taulu la,

komin naga ke narui naga pe suþe kien suþe lala, naga pe þarin suþe kien þarin suþe lala, a kiena yeririna nowo lala, nane la naþa naga pio la, naga mligan plan la, a la nane ave lelaga e naga.

¹⁵ “Sur navisa meraravanena taþena, naga wii lala amio sive lala naþa opisu sira viowa nene naþa towar la ke ne. Kala kinasa, naga yeririna la naþa asike e yomarava, amio yolai lala, a purvanua lala, a visena lala.

¹⁶ “Ana siraunia, purwolu puluk nene amio kana laþaliu lualima, yoko yepel mavin sira viowa naþani. Yoko asuþalu akila imi viowa van vaþisi, naþa ayen plan mēna kulsota lala ve plamoþe e maran yar lala, a yoko akan make kana kilanþiu lala ana okoven kana puriu lala vito kapi kekania.

¹⁷ “E mrapa ne nanene naþa yoko akila va sira nene, tepisu sane torokin nena nakoena naþa Ntewa pisawal e kiena visen tai nanua sumo rui, sinenan sape sira nene monar waria. Naga ga mligan e kiela sito-mena lala amio purwolu puluk nene, vena akila sanene vania.”

¹⁸ Ana navisi naþani kila make kiena visena e poglis nene, sape “Nane navisa meraravanen sira nene narui, naþa naga pupia pulkumali naþa pe suþen þarin suþe taþena lala e yomarava.”

18

*Pulkumali viowa naña
Papilon mloru*

¹ Yoko, nepisu navisi tañena molue ma e peni pitomi tano. Naga pe navisi m̄arera tai kiena ne Ntewa, pitomi p̄arar pupia nam̄areraena, a kana nategoliena kila yomarava pilavila. ² Naga pio e pupia pulgo tai naña pisawal sape “Pupia pulkumali viowa naña Papilon, mloru rui.

Nagane, yo nene pimi pe uña tai m̄ana yer-mare lala a pe yo tai naña ninuna viowa la atapolou ea.

Manu make ga naña akila ke p̄elaga na kororak viowa lala, la m̄ena añe m̄ala ponovi sike ea.

³ Naga pa p̄ere ntewa la naña pe ape lelaga re poli, a p̄ere yeririna tañena la apa ape wowe amio, la sa ga yar la naña amun wii p̄arila telivi. Sa ga naña naga pa p̄ere p̄arin supe na purvanua tañena lala, apa akila kolau amio, a yar la naña amiyuñāen ke kilavaru e yomarava telivi piora, la ataulu kilavaru namname pañisi e yuñāena viowa lala na pulkumali nene, pano pano-o apim ape yar na sur moki manene laa.”

⁴ Navisi pisayu sanene p̄isi, ana nemloge visen tañena kom ma e peni pitomi, pisa sanini, sape

“Kiau yeririna lala, o! Popon aurmatan yo nini vilaga,

visae peraga, naga warar amiu ava e kiena mlamulena viowa lala,

visae peraga, naga warar amiu m̄ena ava e kiena nakoena lala.

⁵ Kiena mlamulena viowa lala ponpolo m̄aga pa tol ma e peni, a Ntewa tañatete sinen p̄esan naña naga kilaroro kiena navisaluaena yam via.

⁶ Popon ga naña alamaran si naloge viowaena vania sa naña naga kila pa yar tañena lala, popon aul maran vania va yam ve lua e ya naña naga kila rui.

Wii melkalka naña naga kila yar tañena la amunia, popon akokonia ruru m̄ana piala ulemamaga.

⁷ Nanua, kiena nalogewoena e kiena malena meme ga, naga keviu pañisi, ana yoko vilon imi ve naloge viowaena e yepe lalaea lala amio tagiena lala.

Ana nanene na pere ke na wa, komin naga pilaven ke kiena sitomena na wa, sum̄a pisa ke pania, sape “Ke, in na nepe p̄arin supe sira sanene,

neto ruru na neteke ne. Sur make ga po manene laa pan inu, ana tařatete nena neve sa letano tai nařa pe kiena sur re poli, tařatete nena netagin naloge viowaena pogos tai.’

8 Ana naga, e legiena ta ne pimi ke ne, yoko sur viowa la kila kare ruru naga veraga. Yoko marena, warar tagiena, amio viso, a yoko kapi kekalele kare naga.

Naga pe sitom re sur poli, ana Suře Ntewa nařa yoko liřere naga, kiena namareraena naga keviu manene laa.”

9 Ana navisi pisa sanini, sape “Parin suře make ga na yomarava nini telivi pi-ora, la nařa apa amlotun ke ntewa lala na pupia kumali nene, yoko avisu kilale nařa naga mlor rui. La ke narui nařa sane apa akila ke kolau amio, apa amloge po amio naga e kiena malena wo pano-o, pe asitom re nena sur tai.

“Ana pogos nařa mloru, kana kap la nařa kekan ke ne piuyu pa metava, nanene narui yoko sinela viowagan vařisi, yoko ataginia. ¹⁰ Yoko avisu nakoaena la nařa naga sumã řaria, yoko kila la mēna asiar ayuyuwawa. Yoko asu la gar perina akira avisusuia, avisave ‘Ake, pupia Papilon, pulku-mali namareraena,

sinemimi miye ko pařisi.

Lelaga nařane, osu ruru mã pano-o,
ana e aora taaga ga nene omãl kiomã luasa,
omloru, ořisi nenaga.’ ”

¹¹ A řarar mēna, yar na stoa lala e yomarava wetelu yoko atagi a sinela yea, komin nařa pe yar na ulen re si kiela sur la poli. ¹² Nanua sumo, akila kiela waa lala pulen ga tegaki nowo lala, sane sur la nařa amiyumãen e kol řarar selpa, amio kilavaru na kupito nařa pupia kilavaru, amio sur nařa sike e mrakiav, a kulmrae la nařa kala marala la powo, a lak la nařa ponotaninu, a sur la nařa amiyumãen e maluen elepen, pona e lak lala, pona e pototo lala, pona e kilavaru lala, ana nagane, kiela yumãena na tauluen kilavaru la nene apim amlolor make ga. ¹³ A e legien nene, yoko yar la ve aul re si sur na kilaen kinanen lala, sa nařa maki lala, řarar mrasil lala, pona yago lala, puluyavi na kilaen kilaparavi amio kona lala, řarar mēna sur na munen lala sane kuruta na munena. Yoko yar ve ul re si sur la ne sane ponotaninu a sirveve na mras nen olip, a sur na tauluen kilavaru la ea sa nanua sumo, sane puluk, sipsip, wosi řarar kana sur nařa řerewerea. Lařasa nanua sumo apuliwilin yar lala apim amiyumãe korena ga pan yerka wa la sane, yoko ve akila re si narui,

komin pogos naŕa pupia pulkumali nene mloru, yoko yuŕaena toko narui, ana yar taŕatete si taulu kilavaru na visuaren kiena malena.

¹⁴ E pogos nene narui, yoko avisayu yo nene, avisave

“Ko sinoŕan osape owar mrasnoŕa la naŕa ve kerkeviu ve moki, ana naga pe marua re poli wa, kekapil make rui.

Nanua, ko na lumoŕa pule ruru nenaga, kioŕa sur la punu ga po tanea paŕisi wa, ana nagane kokovio make nenaga, taŕatete nena yar tai visu si sur wo tai e ko narui.”

¹⁵ A yar na wilwilinen sur la nene, naŕa la ataulu kilavaru la mok li e rui, yoko asuŕal ga asike perina akira vano, ailania a amaraun nakoena naŕa pupia pulkumali nene suŕa ŕaria. Yoko sinela ye vano-o vaŕisi, ¹⁶ yoko atagin vaŕisi, avisave “Ake, pupia kiamimi pulkumali, mesitom ko paŕisi wa.

Nanua sumo ko na omyowau ruru po paŕisi wa,

oŕar kotal a na kolmekiŕa la naŕa pe kol pialiga la ŕar punu yepemŕa lala,

ana nagane na ko na peraga narui, kap mare.

¹⁷ Sanapen na kioŕa pupia sur mok la nene kovio ga e narin aora taaga ga sanene?”

A yar lala na uararen ŕeligas nen waa la naŕa nanua aŕarwar ke tegaki lala, ŕarar kiela yar na yuŕaena lala, amio la naŕa akomkom ke e waa, pona ataulu kilavaru e sive, la ŕena asuŕal ga asike perina apisu manene ke yo naŕani. ¹⁸ Pogos naŕa kana kap ne la piu, pa ke ma e sinapane, yoko avisasa yo nene avisave

“Lelaga o, pulkumali nene na yo ta nene naŕane, e yomerava nini yo tai pe sa re si nene poli.”

¹⁹ La asitom sanene, a amloge piowa, akoven kare posnoyavi e ŕarila ŕisa, atagi, asape

“Ake, kiamimi pupia pulkumali, piowa pan ko paŕisi wa.

Ko na opulen ga kilavaru, ana memiyuŕae e kiamimi waa lala, moŕar kioŕa tegaki lala, pano pano-o imimi ŕena ga moŕal kilavaru naŕa miila imimi,

ana nagane piowa narui.

E pogos plas ga nene, ana opim ope yo na kovioena ga.”

²⁰ Ana pogos naŕa pupia yo viowa nene mloru sanene, visena tai molue kom ma e peni, sape

“Ma e peni, pupia kekarena a logewoena.

Amiu nalelagaena wa lala, a nalologena lala a navisawalena kiena

ne Ntewa, amiu akilia aieluar naga vaḡisi, komin naga mliḡere sira viowa nene rui, kila maran si pania komin napiowaena la naḡa kila pan amiu nanua.”

²¹ Ana e pogos nene, navisi tai pimi kawelua pupia kilavaru tai, kusyaun pa metavan ḡarina koven pito kopo sive, talilu pito kovio. Siraunia navisi naḡani pisa sanini, sape

“Pupia pulkumali viowa naḡa Papilon nanene narui, yoko akoven lua va ve sanene, akila naga loru vena taḡatete si kilia suḡalu pog tai.

²² A ko Papilon, visena na van ko sanini, sape yauena veraga amio yuka lala, yoko taḡatete yar tai loge si e ko, yar na kilaen yuḡaena lala, yoko taḡatete si tai se ko pogos tai, a yoko ve maagena na vilien re si kinanena lala.

²³ Yomerarava na kapi vivaga lala taḡatete si tegoli kioḡa yo lala, a yoko taḡatete si ologe visena na kekarena kiena mee amio sira mee naḡa atalopa mare ga na wa.

Yar na kilaen kioḡa kilavaru lala, e yomarava nini pe tai torokin la re poli,

a naḡaraena kiena ne kioḡa kimi lala a kioḡa navisokanena

ga lala kila oḡere sito-mena kiena purvanua taḡena lala apa ape wowe.”

²⁴ Nane tepisu naḡa Papilon nene, naga pe yo tai naḡa pe purḡes nen napiowaena manenea. Navisawalena ai pona nale-lagaena wa pona yar taḡena naḡa aḡeḡar la komin naḡa ape kiena ne Ntewa, ana kala kuruta la mlau e porotano na pulkumali nena, naga ke nene narui, naḡa kila naliḡereena a nakoena kiena ne Ntewa mloru ea maḡera manene paḡisi.

19

Pupia kekarena ma metava komin naḡa ma e peni taulu make suria

¹ Siraun naga nene, nem-loge pupia ḡina ma e peni apion manenea, asape “Potena pan kieta Ntewa!

Tamaliaena, urarena a maḡaraena naga taaga ga kiena.

² Kiena naliḡereena make ga ape lelaga a amesmesu paḡisi.

Sira na mrapa la nene anela naga piowa ga,

kiela na kolauena la akila yomarava pimi pe kororaki paḡisi, ana Ntewa mliḡere naga rui.

Ana naga mla pupia nakoena tai pania komin kuruta kana kiena yar na yuḡaena la naḡa mlau.”

³ Asumã amlolokai m̃a sanene, ana asikol ke sina ga, asape

“Potena pa Ntewa! Kapi kekan ke kororaki la nene rui, yoko kana kapi nena viu lue ga va metava narui.”

⁴ Ana nasumonena la lualima yam lua pa vari [24] amio sur mali la vari akinai e marana ne Ntewa naþa totano teke meta e kiena yo wa, ana amlotun ke naga. Apionia, asape

“Po paþisi! Potena pan ke viu!”

⁵ A visen tai molue m̃ena e yo wa naþani, pisa sanini sape

“Kam na yar na kilaen yuãaena kiena ne Ntewa,

amiu yerkawa lala a yeririna kar ga lala,

kam make ga naþa amlogear naga,

nagane kana pog nena napo naieluarena.”

⁶ Ana nemloge sina pupia þina naþa pio naþa kiela m̃aagena sa naþa sive þanpoia mumu, sane polilu. La asape

“Potena pania!

Kieta Suþe Ntewa na Mava, naga taulu make sur rui!

⁷ Teieluar naga, tevisirlua kiena kia, tekekarania.

Nagane pog wo na kilaen þaþagena na talopaena kiena narin sipsip narui.

Wona na sira paia ruru naga su ruru ga sike na,

⁸ a amiyowauia ruru naga e kulmrae viu wo lala, apowo a amerarava paþisi.”

Ana kulmrae nowo naþa miyuwowo ne naþa wona narin sipsip na sira miyenia, naga kana kinas tomã ga, kana kinasa sane yuãaena wo la naþa nalelagaena wa lala kiena ne Ntewa la akila rui.

⁹ Ana navisi naþa sike amio inu e pogos nene pis pan inu, sape

“Yoko nevisa kiomã visena tai vena osirilua e kiomã tus nene. Visena sanini, sane yar naþa yoko avio naga vena naga m̃ena va e kinanena na þaþagena na talopaena kiena Narin Sipsip, yoko naga loge wo na wo vaþisi.”

A sikol sina visena nene, sape

“Naga visena lelaga tai kiena ne Ntewa naþa pe lelaga paþisi.”

¹⁰ Ana nemloge naga pisa sanene pan inu, nekinai pania, nesape nelotunia, ana naga pialuþaria. Pisape “Toko, ve okila re sanene van inu! Monar olotun ga Ntewa naga taaga. In na nepe kiena yar na yuãaena ga, sane ko, a sa m̃ena wolai taþena la naþa apiawa m̃arera ke e visena lelaga lala kiena ne Yesu. A po paþisi naþa amiu asumã akila ke sanene, komin naþa purþes nen kinas nen

navisawalena lelaga make ga naña apisawal nanua pimi, naga Yesu ga ne, amio kiena visena lelaga la naña apuarar ke mārera.”

Yar mārera naña kus wosi na miyuwowo

¹¹ Ana e pogos nene, ma e peni pietava pan inu, nekira pa loyuma, nepisu wosi yuwowo tai naña po pañisi sumalar ga sike na, a yar mārera tai naña kusa totano teke ea. Naga ke narui naña kila mara suwo napiowaena, pona pogos naña kila kiena naliṣereena, ana naga miyumaē nena mesmes pañisi. Yar nena, apio kiena kia asape Parin Suṣe Lelaga Naviawaena.

¹² Ana kiena kia taṣena mēna tai asiri sike ea pe yar tai kilia re kana kinas poli, naga taaga manene kilia. Kilamarana pilavila sane kap naña pivaga, a e ṣarina miyen ke karo na ṣarila kiena ne ṣarin suṣe lala. ¹³ Naga miyen mēna mēna kulkota viavi tai naña aputon pito e kuruta vena kila ve maran la ea, ana naga kiena kia si tai na naña asuma apio naga ea, naga sanini, asape Visena Wa kiena ne Ntewa.

¹⁴ Ana e pogos nene, ṣegas nen yar na mara lala nae ma e peni, amiyowau ru-ruia e kulmrae yuwowo a akus kiela wosi yuwowo lala, asuma ataveve ke kiela nasumonena nene apano.

¹⁵ Naga ṣere la apano, kiena visena molue ke kome gona sane playu na mara naña mal ga lepas luwoka, naña yoko te plan purvanua na yomarava la akekapil. A sir-aun naña yoko naga taulu la, yoko naga sumalu ve suṣen la, a naga ṣuarar ke plaki e limana, pototo tai naña urmi. Nakoaena mārera ya naña sinemimiena kiena ne Ntewa na mava ligana va yar la akusia, ana yerkawa ne nanene narui yoko naga war imi mālivi.

¹⁶ Ana naga kiena kia taṣena sike ga wa, naña asiri e mēna kulkota a e lana, sape

“Parin Suṣe kiena ne ṣarin suṣe lala, Yerkaewa kiena ne yerkaewa lala.”

¹⁷ Nepisu navisi tai sumalar sike na naña yepisun tegolia, naga pion pa manu lala naña akaka ke metava ne, sape “Ei, kam punu ga aim lele taaga e pupia ṣaṣagena kiena ne Ntewa. ¹⁸ Kam manu na kanen tata lala, yoko ve ve piavi re ayumaen kinanena tai torokin amiu nenaga, naña tas nen yar mare lala kiena ne nasinekar kiena ne Ntewa. Parin suṣe lala, pupia yerkaewa na mara lala, yar mārera lala, wosi na mara lala, amio la naña aṣerela ke ne, amio yeririna kar ga lala la naña ape yerkaewa pona ape yar ve torokaki na yumaena ga lala,

la make ga asuñalu vena akila mara va Ntewa, ana naga taulu la kila moñar la pa ke ne.”

¹⁹ Ana nepisu surmal viowa amio ñarin suñe na yomarava amio kiela ñegas na kilaen mara lala, apim amiyuwon vain la ke lele taaga. A sinelan asape akila mara amio naña kus ke wosi yuwowo ne amio kiena yar na kilaen mara lala.

²⁰ Ana asape akila mara narui, ana yar viowa lala amilan ga naña lepas kiena ne Ntewa asuñal veraga apa atarar kiela na sumonen luwoka naña atarar ruru la nenaga, nane sur mal viowa amio navisawalena naña pisosokan ga ne na pe yar naiilaena e kimi lala a sur nailanena lala. Sumo, naga miyuñāen sur la nene pisa kotalia ruru nena yar lala naña ñere kiela sitomena pano atañan añe tatu na sur mal viowa pa e piamenala, apa amlot wowe pa kiena nono.

Ana la atarar ruru nena nasumon-ena luwoka na ñegas viowa nene, ana akuwanpran luwoka pito e pulukapi naña mumu ke ne.

²¹ Ana tañena la pe akila re mara poli wa, amilan ga playu na mara tai molue kome gona naña kus ke wosi yuwowo ne, pa sanene, pa sanene, te moñar kare la amarmar pa ke ne. Ana taveve ya naña nepisuiā, manu na kanen kilanñiu lala apim atewowa tas nen

marena la nañani, akan pano-o meñela la puleule.

20

Apiar Yermare pa tol kas manu taaga [1000]

¹ Ana nepisu navisi tai molue ma e peni pitomi tano, mlarar ke ki tai e li-manā, ki na pulutava na pulus nen marena naña pito na pitove pe luas re poli, a amio ki nena, ñarar mñena sen mñarera tai. ² Ana naga ñere mesmesun pupia nopi nene, naña pe yermarua loñara naña Yermare naña Yermare Lego, pa tarar ruru mñarera, piar ruruia e sen, pisaar sape yoko mon mña sanene va tol kas manu ve taaga. ³ Ana kutarar naga amio kana sen nañani koven pito e pupia pulus naña pito manene tano ne, ana kotawea, kiar ruru mñeke ea, vena yar viowa nene ve va re si kilali yeririna lala na purvanua wetelu, va tol naña kas manu ve taaga nene warovia. A kiena mñareraena tañatete ñisi make na wa, komin naña siraunia, e narin pogos tai ve plas ga, yoko naga kilia molue vena kila ke sina ga ñarina yam tai.

⁴ Ana nepisu yo wa lala, amio la naña atotano ateke e wos nela, naga la naña apisir plan la rui vena akilia aliñere yar lala. A nepisu mñena ninun yar la moki naña asuñā ga amio

la, nane yar ðes la naña amlologon Yesu amio visena wa kiena ne Ntewa, ana ateroro kolmekilania. La nene pe amlotun re sur mal viowa nene poli, pe akinain re kiena wonta poli, a pe aþar re kiena tatu e piame-nala poli, pona e limala, ana Ntewa kekaran la, kila la amal sina vena akilia asumal amio Kristo vena avisuar yo punu ga va tol luas nen kas manu ve taaga naþani.

⁵ Naña amal si sanene, naga pogos ðesia naña yeririna lala amal si petan marena, ana la ga nene atolia. Taþena lala naña amare ga asike na wa e pogos nene, la nene yoko atol ga kiela malena na wa e kana nalua nena, nane e luas nen kas na manu taaga nene.

⁶ Navisa ruruena wo kiena ne Ntewa sike e la naña amal ðes sina vetan marena nene, naña la na kiela malena pe wa ruruia. Marena na lua taþatete nena tol la, ana yoko la ayuñae sane la ape yar wa kiena ne Ntewa, ape yar wa kiena Kristo, a yoko naga visir plan la avisuar yo amio naga e kas manu ve taaga nene.

Yermare, kana luas

⁷ Ana pogos naña kas manu ve taaga nene þisi pae, yoko Yermare kilia molue sina e lele nakoena naña sike ea. ⁸ E pogos nene, yoko naga va kar ga e purvanua punu ga e yomarava nini, visa kotalia si yar lala, a yoko naga werepran pupia

þegas lua nene aim ve taaga, nane yer Koko lala amio yer Makoko lala, vena aim si ave taaga vena akila mara va yeririna lala kiena ne Ntewa. A visae þegas lua nene aimi ave taaga, la ave moki na ave moki, sane mras nen none la garo losi.

⁹ Ana apureviraviran ruru la sa naña li na kilaen mara lala, amial vera ga akusro yomarava apim atol yo Yerusalem, yo naña Ntewa kekaran paþisi, naña naga yo kiena ne kiena yeririna la naña asike ea. Ana amiervivi ruru nena pupia pulkumali naþani, asape sinelan siaren mara narui. Ana amilan ga pupia kap tai molue veraga kom ma e peni pitomin la, kekan la pano-o kekan make la nena ga. ¹⁰ A Yermare, naña naga pisa kotalia la sumo rui, akoven lua naga pa e pupia pulukapi naña mumu ke ne, nane kapi ma nena naña akoven surmali viowa amio navisawalena navisokanena lalua apa asike e rui. Ana la telu nene yoko akus naloge viowaena e yo nene ko legiena a kolemallo, vano vano-o ve uro re.

Naliþereena maro kiena ne la naña pe amlelaga re poli

¹¹ Ana nepisu pupia yo na liþeren yar lala, naña miyuwowo na miyuwowo, amio suþe keviu naliþeren yar lala totano teke metava ea. Kiena naurarena kokonia ruru make yo nene, kila porotano amio sinapane la

luwoka aṗure apevenin plan la apano akovio. ¹² Ana nepisu pupia ṗegas nen yar la tai, naga yar la naṗa amare nanua rui e yomarava, pupia yerkawa lala a yar kar make ga lala. Ana apim aṗalivi e naṗani veṇa asuṗal ase marana ne suṗe keviu nalipereen yaru. Nepisu tus laṗas pike ṗa suṗa ga, ana apa akus ke sina taṗena, naga asape Tus na Malena, ana naga ṗena apike. Ana apisu vevea asape alual ya naṗa asiriyu sike e tus nene e lepas kiena ne yar mare la nene, ana la peve taaga akus kiela nakoena taveve tus la nene. ¹³ A yar mare la nene, amio ṗena la naṗa amarmare asike e sive, amio ṗena la naṗa amare apa asike e yo nalogeen viowa rui, la make ga aimin si naṗa alipereela taveve kiela yuṗaena lala.

¹⁴ Ana amliṗere yar mare la nene pano-o ṗisi, asuṗalu akus sur lua nene naṗa marena amio ṗena yo nalogeen viowa nene, ana akovenpran ga luwoka veraga vito e pulukapi. Ana marena naṗa yaru la atol e yo nene, naga asape marena na lua. ¹⁵ A a si naṗa pe aṗal re kiena kia sike e Tus na Malena poli, naga ke narui akoven ṗena naga vito e pupia pulukapi.

21

*Pulkumali viu naṗa
Yerusalem*

¹ Ana siraun nene, nepisu peni viu amio yomarava viu aṗalivi, komin peni nasumo amio yomarava nasumo amio kana porotano lala a kana sive nena, akokovio make nena rui. ² A nepisu pulkumali wa wo nene, Yerusalem viu, molue kom puna ne Ntewa ma e peni pitomi tano e yomarava. Nepisu naṗa apaia ruru po wa, sane sira tai naṗa amiyowauia po paṗisi imin vena akila talopa amio wona.

³ A e pogos nene nemloge visena wo tai molue ma e peni, pisawal sanini, sape

“Nagane, Ntewa sinenan sape sike amio yeririna lala na yomarava, sinenan sape kila ṗena uṗa sike pu la.

Yoko aim ave kiena yeririna lala, komin naṗa yoko naga amio la lue narui, yoko naga imi ve kiela Ntewa lelaga.

⁴ Wamarala make ga, yoko naga yumuplania, yoko marena pona tagena pona yepelalaena pona naloge viowaena, la nene peraga narui, komin naṗa pogos marua nakonua la ṗaro pano pa kovio rui.”

⁵ Visena nene ṗisi, ana yar wa naṗa totano teke metava pisawalia, sape

“Ee, lelaga paṗisi ṗan wa!
Yoko in na nekila

make sur la imi ve
urviu sina!”

A naga sikol ke sina ga
pisawal nena pan inu, sape
“Nanini yoko nevisa visen
tai van ko naña pe
lelaga nena napo,
naña okilia owasine
ruru nenaga, a popon
osirilua.”

⁶ Ana naga pis mā ga, sape
“Kiau yuñāena make ga,
nekila punu ruru
nena ga!

In na in ñesia a in maro, in
na nasiarena a nalua-
sia.

Yar naña loge moto karia,
yoko nevio māna wii
tai e purñes nen wii
na malena, nela va-
nia mun korenan ga
sanene.

⁷ Yaru naña kiena malena
ñaro e pog mārera
lala, suñal mārera
suñā vano-o taulu
viowaena, yoko naga
tol navisa ruruena
lala sane kiena lali-
mana. Yoko nesuñā
neve kiena ne Ntewa
kemua lelaga, yoko
noure naga imi ve
naruu.

⁸ Ana yar viowa lala, la
mēna yoko atol kiela
lalimana lala. Nane
yar sur la naña pe
apiawa re mārera
e in poli, naña pe
amlelaga re poli,
kiela ñelaga pioy-
owa pañisi, amēmār
yar tañena, akila
piowa amio sira pona
yerñene, añar kimi,
amlotun nono, ape

yar navisokanena. La
ke nene narui yoko
ava atol marena na
lua, nane e lelela
ke napo narui, nane
pulukapi naña pe
ponoyomē, naña
mñewo ñele ga.”

⁹ Visena nene nane ñisi
ne, ana navisi nasumo la
olua nene lala tai, naña
añar pias nen sur olua na
loge viowaena maro la olua
na yomerava, pimi pio inu.
Sape “Oim ke ne sumo wa,
yoko nekila ovisu sira va
talopa, nanene wona Narin
Sipsip.” ¹⁰ Ana ñerelua
inu nepa ga e ninuu, ana
imimi lua mepa metol pupia
tavie tai metava. Imimi
lua mesuñalu mese yo
nene narui, kipian inu e
pupia pulkumali wa naña
Yerusalem, nepisu sina
noñal naña molue ma puna
ne Ntewa ma e peni pitomi
ke tano.

¹¹ Pitomi ke sanene narui,
naurarena kiena ne Ntewa
suñā puleule, kila tego
pañisi, sa naña sur tai naña
pilavila ruru po pañisi.

¹² A kana pupia kove
nena miyervivi nenaga, pa
metava na pa metava, a
pupia pulutava lualima yam
taaga pa lua [12] sike ea,
naña kana navisi la peve
taaga apisuar ruru la māga.
A pulutava la make ga, tai
kia sike ea, tai kia sike ea,
naña kia kiena ne lus nae
Israel la lualima yam taaga
pa lua, ¹³ naña pulutava telu
sike lepas na lagawa, telu

sike lepas na lagi pasipuruia, telu sike lepas na mrae molue ea, a telu sike lepas na mrae pito tano ea. ¹⁴ A pupia kove nena sumālu sike e kana pupia kemraḡe nena tol lualima yam taaga pa lua, asiri kia sike e peve taaga, naḡa kia la nene kiena nalologena la lualima yam taaga pa lua kiena narin sipsip.

¹⁵ Ana navisi naḡa imimi lua mesun ke ne, naga kus ke natotou viavi tai naḡa kol e limana, vena va lual totou na pulkumali nene keviu sanape, amio kana kove nena a kana mratava lala. ¹⁶ Kove na pulkumali nene, lepas varoka piavi maran taaga, ana navisi pa mla kana totou nena, taulu tasme manu lua [2000]. A mla mēna totou na yepasia siar tano pa tol metava, maran taaga ke sina ga e kana lepas la vari nene. ¹⁷ Pisi na pa pisu kana kove, mla totou na kana mero-rol nena, polo kana merpu ne lala pa taulu nena lualima yam orai [60] veraga. ¹⁸ A kove nene pe amiyuḡaen re e kilavaru kar ga la poli, ana miyuḡaen e kilavaru tai naḡa kana marana la po paḡisi, a pulkumali yepas make ga lala amiyuḡaen ga e kol, mekiki po na po, pilavila po na po paḡisi. ¹⁹ A pupia kana kemraḡe na kove nena, la mēna ga apaia ruru la amio kilavaru la naḡa powo, naḡa tai amiyowa e kana kilavaru

naḡa maran taaga sanene, tai mēna amiyowa e kana kilavaru naḡa maran taaga sa ke ga, pano pano-o tol make kana kemraḡe lualima yam taaga pa lua nene. A kia kiena ne kilavaru lualima yam taaga pa lua la nene, sanini. Nasumo, kiena kia saspā, na lua kiena kia sapaia, na telu, naga kalse-ton, na vari naga emrol, ²⁰ na lima naga satonik, na orai naga kanelion, na olua naga krisolaet, na orelu naga perol, na ovari naga toḡas, na lualima naga krisopres, na lualima yam taaga pa taaga naga sasin, a na maro naḡa lualima yam taaga pa lua naga ametis.

²¹ A kana mratava lala, la make peve taaga ape pupia perel peve taaga. Ana nepisu mēna pupia mrapa na pulkumali nene, naḡa naga amiyuḡaen make nena e kol, po na po, pilavila paḡisi.

²² Ana sur tai naḡa nemilania, nomāpe yoko nelual pupia yuḡa wa tai mēke likan pulkumali wa naḡani, ana nekira nomāl re tai poli. Yo nene na pe yuḡa re na sanene poli, komin Ntewa na mava amio narin sipsip, yar la apa amlotun la e yo punu ga silaga. ²³ A nomāl naḡa e pulkumali nene naga mrae amio kupario pe tego re e poli, komin narin sipsip naga sane kana yomerarava nena, naurarena kiena ne Ntewa kila yo make ga asike ga e yemlagi silaga.

24 Purvanua tañena lala yoko ayal e kana pupia yomerarava nena, a sur wo ya la naña pupia ãarin suñe tañena na purvanua lala añar mñaga pe kiela, yoko awar van Yerusalem viu nene, sane kiela nalaena lala. 25 Yo nene yemalolo tañatete yoko imi e pogos tai, kila sanene pupia kana mratava ne lala kilia suwowo ga sumña silaga, 26 a naurarena a sur wo lala na purvanua tañena lala yoko asumña aim lue ga loyumña e silaga. 27 Ana e lepas na sur la naña pe mekik ruru re nena poli, yoko tañatete nena tai va loyumña e nene pogos tai, a yar ai naña kila yumñaena naña na mawaena pona na visokanena, yoko naga mñena ga tañatete va loyumña ea. La naña navaen loyumña, naga la ga naña kiela kia, narin sipsip siri sike loyumña e kiena Tus na Malena rui.

22

Purñes nen wii na malena

1 Siraunia, navisi kilologia purñes nen wii na malena pan inu. Nepisu kana wii wo nena, merarava na merarava, mlau siar e yo wa kiena ne Ntewa naña Narin Sipsip sike ea. 2 Kana wii ne mlau pano, kana yo naña mlau pa ea mlau nena pa likan pupia mrapa na pulkumali viu naña Yerusalem. Wii na malena nene mlau sanene pano, a purñes nen lak na malena lala asumñal

asike lepas luwoka. Laki la nene apo pañisi, komin naña añar mrasa e kupario make ga, yam lualima yam taaga pa lua [12] e kas taaga. A mñas mñena lala, apowo pañisi, komin naña akilia akila ruru maiena kien yolai na purvanua make ga na yomarava.

3 Sanene, yoko ãelaga viowa la kiena ne Yermare na kila kareen sur make ga, yoko e pulkumali nene naga peraga narui. Narin sipsip sike e yo wa kiena ne Ntewa e yo nene, a pulen ga kiena yar lala naña kiela yumñaena, amlot lue ga e silaga. 4 Asike ga lavisinia, a asiri kiena kia sike e piamenala. 5 E yo nene, pe yemalolo re si poli, yo merarava make silaga, a pe yomerarava na kap vivaga re tai poli, pona mrae. Peraga, Suñe Ntewa ga pe purñes nen yomerarava naña tegoli ruru ke yo nene, a naga ãere kiena yeririna la nañani, pisir plan la ape ãarin suñe na visuaren sur make ga.

Nawasupñeena kiena ne Yesu

6 Ana navisi naña pis pan inu, sape “Sur la naña opisuiua pona omloge, ape lelaga pañisi, a yoko aim ave lelaga make nena napo. Kieta Suñe keviu, naga Ntewa naña navisawalena na sumo lala amiyumñae e kiena ninuna, naga pitetalia imimi kiena navisi lala mepim monñalivin ko vena mekipian ko e sur la nene.

Naga kila sanene komin naþa naga sinenan sape kiena yeririna lala monar akilia sur la naþa yoko ve ve piavi re aim aňalivi.”

⁷ A visena kiena ne Yesu e lele nene pa pan kiena yeririna lala sanini, sape “Avisuaria! Ve ve piavi re, neimin noňalivin amiu sina. Yar naþa tarar visena la nene m̄arera, naþa apisawal sike e kiau tus wa nene, yoko wo van vaþisi, yoko naga loge wo vaþisi.”

Yoane pis maro

⁸ Inu naþa nepisu sur lala nene, nemloge visena la nene, inu yermarua Yoane. A pogos naþa nepisu make pae, nemloru nekinai e lana navisi naþa naga kipian in-unia, nemloge sane sineun nesape nelotunia. ⁹ Ana naga pisalup̄ar inu, sape “Toko, ve okila re sanene. In m̄ena nepe yar na yuňaena kiena ne Ntewa ga, sanene ko omio womla la naþa navisawalena la nanua sumo, amio m̄ena yar taþena la naþa apuarar ruru ke visena na tus wa la nene. Popon telotun kieta Ntewa naga taaga ga.”

¹⁰ A naga pisa m̄ena visen taþena pan inu, sape “Ve owarwan re navisawalena lala naþa sike e tus nene. Pog pimi ke lavis narui, popon yar la akilia ya naþa asuňa apisa ke ne. ¹¹ Yar naþa yepena ma yagogena, yoko kila kiena þelaga viowa

va viowa laa sane, yoko kororaki na kiena mlamulen viowa lala va viowa ve keviu manene laa. Ana yar naþa loge, yoko kiena yuňaena mesmes lala aimi awo vaþisi, yoko kiena þelaga wo lala aim ave wa ruru nenaga.”

¹² Visena kiena Yesu e lele nene, naga sanini, sape “Avisuaria! Nepimin ke naþa ve ve piavi re nenaga noňalivin amiu. Neimi nemio kiau nalaen wo lala naþa powo, naþa yoko nekian plan va yar lala taveve yuňaena wo la naþa akila pan inu. ¹³ Inu þesia a inu maro, inu nasumo a inu nasirau, inu nasiarena a inu naluasia na sur make ga.

¹⁴ “Ve ve piavi re, yoko pupia navisa ruruena imi m̄alivin ruru nena kiau yeririna lala. Apuvan ruru m̄ala kulsota lala, amiyowau ruru rui, ana akilia ava awarpo yo e pulutava vena ava loyuňa e pulkumali wa kiena ne Ntewa, akilia ava atol purlaki na malena. ¹⁵ Ana yar taþena la mokliu naþa taþatete avam loyuňa. Nane yar la naþa asuňa apa kar ga sane lokul lala, amio la naþa aþar kimi, amio la naþa ataþa kolau amio lau, la naþa amem̄ar yaru, la naþa amlotun nono lala, a la naþa sinelan asape akila þelaga lala na visokanena.

¹⁶ “In na Yesu, nemligan navisi nene pimin vena visawal visena la nene van

ko, vena okilia ova ola va kiau sum̃are make ga. Navisaarena naḡa apisaar asape molue kome lus kiena ne yermarua Parin Suḡe Tepet nanua, in ne nanini. In na nepe verue naḡa Melag, naḡa pisawal ke sape lavis yelagi imi warpoyo narui.”

¹⁷ Ninuna ne Ntewa mloge visena nene, pisawal pa Yesu sape “Pogaga, okilia oimi!”

Sira naḡa na talopaena amio, sape “Ee, popon oim narui!”

A yar ai naḡa loge visena la nene, popon naga m̃ena visawalia, visave “Ake Yesu, visae oim ga rui!”

Yar naḡa loge moto karia, avietava vania vena kilia vam loyuma. Yar naḡa sine-nan imiena, yoko naga kilia tol m̃ana wii na malena, sa naḡa kiena nalaena tai naḡa pimi ga sa ga nene.

¹⁸ Ana nevisa visena m̃arera tai van amiu naḡa yoko aloge visena lala na visawalena lala na tus wa nene. Visae yar tai sukol si

visen taḡena tai to metavan naḡa sike pa rui, yoko Ntewa kila naga war naloge viowaena make ga naḡa tus nene pisa ke pa rui. ¹⁹ Pona visae yar tai lalua si visena laḡas naḡa sike pa rui, yoko Ntewa lalua si lalimana vetania naḡa sike e purlaki na malena, yoko naga taḡatete tol sur wo la sa naḡa tus wa nene sape asike loyuma e pulkumali wa.

²⁰ Naga naḡa pisawal visena la nene, pisape “Sa ke nene narui. Ve ve piavi re, yoko neim nom̃alivin amiu.”

A sitomena kiena ne yeririna kiena ne Ntewa lala, asape “Visae ve sa nene, wo vaḡisi. Awis Yesu, oim vilaga!”

²¹ A visena maro na lepas na sunena na kiau m̃enienna, in yermarua Yoane nemlen nesape yoko lemamienna wo kiena kieta Suḡe Yesu sike amio amiu, kam yeririna lala kiena ne Ntewa.

Sanene.